







~~23~~ = 1. 38 - 2

ms 209
nr 88

THESAURVS
ANTIQVITATVM
HISTORIARVM
ITALICARVM
CARILIGNENSIS ALBVS VICTOR

THESE
ANTIOCHIAN
EPISTOLARY
ITALIAE
MATHIAS

THESAVRVS
ANTIQVITATVM
ET
HISTORIARVM
ITALIAE,
MARI LIGVSTICO & ALPIBVS VICINAE.



THESE
ANATOMIAE

ET

HISTORIA
ITALICA

MARI MAGISTRO COLLEGIUM VINDOBENSE



THESAURVS
ANTIQVITATVM
ET
HISTORIARVM
ITALIAE.

MARI LIGVSTICO et ALPIBVS VICINAE.

LVGD. BATAV.

Apud PETRVM VANDER AA. MDCCIV.
Cum speciale Privileg. Illustr. ac Praepotent. Ord. Holl. & West. Frisiz.

J. Goeree. Inv.

J. van Nieuwen. fec.



MYSTERY OF THE

MASSACRE

OF THE

MASSACRE

OF THE

MASSACRE

OF THE

MASSACRE

OF THE

MASSACRE

OF THE

MASSACRE

OF THE

MASSACRE

OF THE

MASSACRE

OF THE

THESAVRVS
ANTIQVITATVM

ET

HISTORIARVM

ITALIAE,

MARI LIGVSTICO & ALPIBVS VICINAE;

quo continentur

Optimi quique Scriptores,

Qui

LIGVRVM ET INSVRVM,

Seu

GENVENSIVM ET MEDIOLANENSIVM,

Confiniumque Populorum ac Civitatum Res Antiquas, aliasque vario tempore gestas, memoriae prodiderunt:

Collectus Cura & Studio

JOANNIS GEORGII GRAEVII.

Accesserunt

Variae & accuratae tabulae Geographicae, aliaeque, ut & Indices ad singulos Tomos locupletissimi.

TOMI PRIMI PARS PRIOR.

Scriptores hujus Tomi post praefationem reperientur.



Excudit *LVGDVNI BATAVORVM,*
PETRVS VANDER AA, Bibliop.
M D C C I V.



*Hoc eruditus spirat ore Graevius
Decus Pelasgi, Romuli decus soli.*

G. Hoet pinx.

G. Valer sculp.

P. Ravenn.

SERENISSIMAE. PRINCIPI.
AC. DOMINAE.

MARIAE. ANNAE.

LUDOVICAE.

MAGNI. ETRURIAE. DUCIS.

COSMI. III.

FILIAE.

POTENTISSIMI. PRINCIPIS:
ET. DOMINI.

JOHANNIS. WILHELMI.

S. R. I. ARCHITHESAURARII. ET. ELECTO-
RIS. COMITIS. PALATINI. AD. RHENUM.
BAVARIAE. JULIAE. CLIVIAE. MONTIUM.
DUCIS. ETC. ETC. ETC.

CONJUGI. AUGUSTAE.

DOMINAE. SUAE. CLEMENTISSIMAE:



Quo tempore Florentissima Domus Medicea,
ex qua ortum ducis, AUGUSTA PRINCEPS,
singulari Numinis fato & beneficio; rerum in Etru-
riâ potita est, tanta edidit pace & bello, domi fo-
risque, rerum praeclare gestarum monumenta, ut dubium sit,

* *

utrae

DEDICATIO.

utrae ad extinguendas domesticarum ac praepotentium factionum
pertinacissimas conspirationes, & ad asserendum Augustae Domui E-
trusci Imperii sceptrum, ac sacratum illius Nomen immortalitati
consecrandum, plus contulerint. Verum ea cum praestantissimorum
Scriptorum Annalibus toto, quâ patet, orbe divulgata, & ab
oblivione aut temporum edacitate sic satis vindicata sint, manife-
stae adulationis notam incurrerem, SERENISSIMA PRIN-
CEPS, si longa ac supervacua Divorum Majorum Tuorum,
eorumque, quae ab illis gesta sunt, non fortiter tantum, sed &
sapienter, expositione tuendam mihi rationem susciperem, cur hunc
Antiquitatum Italiae Alpibus & Mari Ligustico Vicinae Thesaurum,
postremam Joh. Georgii Graevii, Soceri nuper mei, curam, TIBI,
POTENTISSIMA PRINCEPS, devotissime inscribere susti-
nuerim. Sed & alias TIBI proprias habui rationes, quae me
currentem ultro etiam magis incitarunt ad hoc meae Veneratio-
nis officium TIBI declarandum: incredibilem illam Animi Tui
Clementiam & Comitatem, inusitatam Ingenii ac Judicii Excel-
lentiam, perfectam Indolis Divinae Virtutem, & quod caput
mihi est, summum bonarum Artium Latinarumque Literarum
non Amorem modo, sed & Peritiam admirabilem, qualem in
aliis Tui Sexus cujuscunque Fortunae, immo & in Viris jam
Tui Ordinis & Fastigii, haud facile quis reperiat. Ast utinam
ipsi Graevio, longe meliori Laudum Tuarum praëconi, diuturnio-
ris vitae beneficio licuisset exiguum hoc summae suae in TE vene-
rationis pignus ad Augustum Pulvinar Tuum deponere! Quam
fortunarum accessionem quando immutabile illud fatum, vel potius
ipse rerum humanarum ordo, seni plus quam septuagenario ab-
tulit, ne aegre feras, CLEMENTISSIMA DOMINA, pro
Tua, quâ Graevium dignata es, Benevolentia, & pro perpe-
tuo Graevii, quem ad ultimum vitae spiritum TIBI, & Po-
ten-

DEDICATIO.

tentissimae Domui Tuae, religiosissimè exhibuit, cultu, obsequio, & reverentiâ, me Defuncti mentem & voluntatem, quibus possum verbis, exsequi, obnixè rogo. Decreverat enim, ut non semel inter mutuos de studiis sermones ab illo accepi, opus hoc, quod primam Italiae, Patriae Tuae, partem Orbis literati oculis exponit, TIBI, SAPIENTISSIMA PRINCEPS, consecrare, cum quod infinitis nominibus obstrictus esset Mediceae Domui, ac praecipuè Maximo Parenti Tuo, COSMO Tertio, sub cuius felici & indulgentissimo Imperio beata otia agunt Etruriae populi, tum quod Regiarum Tuarum Virtutum, consummataeque praeter sexus istius & temporum nostrorum morem per omne liberalium disciplinarum genus Scientiae insolito fulgore abreptus esset in admirationem Divinae Tuae Sapientiae inexplebilem, adeo, ut sibi persuaderet, non posse illustrius ornamentum & decus huic Italicarum Antiquitatum Thesauro accedere, quam si Tuis Auspiciis, Matronae quidem, sed quae non Etrusci modo, verum & Totius Orbis, splendissimum es Sydus, & Ornamentum, lucem adspiceret. Tanta igitur spe, quâ animum usque pascebat, cum inopino fato rebus humanis ereptus Socer exciderit; supplex TE veneror, PRINCEPS, & DOMINA CLEMENTISSIMA, ut serenâ fronte permittas hanc Graevianae devotionis Tabulam ad Majestatis Tuae Aram à Genero & Liberis appendi, qui tranquilliore animo cladem morte Soceri & Parentis ipsis impositam ferent, ac sibi insuper Graeviiue Manibus gratulabuntur, si intellexerint, hoc ejus institutum; & liberorum paternae voluntati obsequentium pium studium, TIBI, AUGUSTA, non displicuisse. Faxit Deus ille Opt. Max. ut longaevam degas vitam in omnium secundissimarum rerum concursu; ut, quidquid ad constituendam humanae felicitatis

DEDICATIO.

summam facit, in TE id omne, quasi ex abundantissimo quodam
copiae cornu, funditus effundatur : ut vigeas & floreas perpetuo
Ipsa, ac vigentes florentesque tecum in amplissimum morta-
lis aevi spatium videas Palatinam simul ac Mediceam Domum.
Hoc ab Deo Immortali studiosissimis votis exposcere non de-
sinet

AUGUSTO NOMINI TUO

In perpetuum

Devotissimus ac subiectissimus

MATTHIAS DE ROY.

ANTIQUITATVM ET HISTORIARVM STVDIOSO LECTORI

S. P. D.

J A C. P E R I Z O N I V S.



HITO *Romanarum Antiquitatum Thesauro*, atque auide distracto, consequens erat & proximum, ut *Italiae* quoque, cujus Metropolis fuit Roma, *Thesaurus* conficeretur similis. Etenim illa Romam non tantum sinu completitur suo, sed & imperium ejus ac leges paulatim suscipere tota debuit, vi & armis coacta, verum mox benigne Provinciis exempta, & in societatem ultro recepta, in eisdem mores, ritus, linguam denique, & civitatem lubens & volens concessit. Hinc omnia fere evaserunt utriusque communia, vel arctissimo inter se foedere nexa. Hinc non Græcia modo Magna ad Ionium & Siculum mare, sed & Gallia cis Alpes ad Ligusticum & Adriaticum, Togata evasit & Romana. Hinc oppidorum municipiorumque Italiae Cives ad Ordines & Magistratus Romanæ pervenerunt Urbis. Complures immo ex illis illustres prodierunt paulatim Viri, qui amplissimis Romæ honoribus usi, suam singuli patriam postea magnificis operum publicorum monumentis passim exstructis ornarunt; multi etiam, præclaris ingenii dotibus cultissimi, ac stilo communis jam linguæ prompti, carminibus, epistolis, orationibus, libris illustrarunt, & feræ consecrarunt posteritatis memoriæ. Certe postquam in Civitatem Rom. admissa fuit Italia, postquam tandem etiam *Veneti & Insubres*, ut apud Tacitum dicitur, *curiam irruperunt*, frequentissima Italicarum quoque rerum & hominum occurrit mentio in quibusvis, sive prosa, sive metro, Græcis Latinisque Romanæ Reip. Scriptoribus, qui ideo intelligi nunc a Lectoribus vix possunt, nisi qui Italicas res sic satis habent exploratas: ut adeo nulla sit Europæ regio, quæ copiosam magis illustrandæ Antiquitatis, certe Romanæ, Doctis præbeat materiam.

Hæc moverunt multos proximorum sæculorum Eruditos ex variis Italiae Urbibus oriundos, ut illarum origines, mores, jura, historias, scriptis eam in rem libris ex professo exponerent atque in publicam ederent lucem. Et sane, sicuti ad intellectum Scripturæ & Historiæ Sacræ Theologi plerique non tantum Hierosolymæ, sed & Judææ totius, immo & Samariæ, Galilææ, vicinarumque Regionum res antiquas, undecunque erutas, scire desiderant, sic & illis, qui Romanæ se dederunt Reip. diligenter indagandæ cognoscendæque, non potest non utilissimum esse illud studium, quod Italicis quoque Antiquitatibus & Historiis impenditur, quum ubique ferme de variis regionis istius municipiis, coloniis, præfecturis, apud priscos rerum Romanarum Auctores agatur. Consilium itaque hoc cepit Perillustis & Eruditissimus Grævius, nuper summo rei literariæ in his terris malo, & maturus licet jam ævi, vel sic tamen acerbo nimis fato, nobis ereptus, ut, quemadmodum elegantissimum Romanarum Antiquitatum confecit Thesaurum, inque eum præcipuos quosque illarum Scriptores congeffit, ita dein

isti

isti adderet alium, in quem præstantissimos itidem Italicarum rerum Commentarios cogeret: plane uti jam antea Summus Virorum, Car. Sigonius, post explicitum *Jus Antiquum Civium Romanorum*, proximo statim libro *Jus Italiae* adjunxit, ut quod prope pari momento pertineret ad Remp. & Imperium Romanorum pernoscendum. Ceterum Andr. quoque Schottus, Vir Celeberrimus, jam anno seculi sextidecimi extremo *Italiam Illustratam*, eodem fere animo & consilio, collegit, inque unum volumen varios ejus argumenti redegit Libros. Sed quum uno illo, nec ita grandi, volumine neutiquam contineri possent omnia, quæ a compluribus ad Italiae totius Antiquitates & Historias posteritati exponendas scripta erant dudum & prodita, ille vero etiam Siciliae & Melitæ descriptiones in idem corpus compegit. Ex quo facile patet, paucos omnino istius generis Scriptores exhiberi istic potuisse. Accedit, quod non optimas, quæ tamen tunc jam publice exstabant, secutus sit editiones, ut vel ex Gaudentii Merulæ libris *de Gallorum Cisalpinorum antiquitate ac origine* liquet, qui jam iterato, annis octo antea, Bergomi cum Novis prodierant Annotationibus, & tamen istic ex prima eos invenias editione repetitos, secus ac ab Ill. Grævio factum, qui præstantissima adhibuit cujusque operis exemplaria. Sed & longe plures, & simul rarissimos, undique conquifivit Commentarios, quibus singulorum Urbium Origines & Antiquitates exponebantur. Neque vero his contentus, etiam Historicos, qui medii temporis, & in superius quoque sæculum vergentis, res accurate conscripserant, in quibus quosdam Italia Patrum Avorumque nostrorum memoria habuit excellentissimos, addi voluit. Verum quia sic nimis id molis ac ponderis futurum fuisset opus, atque adeo ingens voluminum numerus magis onerasset forsan vel absteruisset Lectorem, quam juvisset aut excitasset, ideo visum fuit faciendum Eximio Viro, ut Orbis Eruditi judicium ac favorem quasi tentaret exploraretque hoc *Antiquitatum & Historiarum Italiae, Mari Ligustico ac Alpibus vicinæ, Thesaurus*. Nempe ita existimabat Vir Summus, si ab hoc rarissimorum jam aut præstantissimorum Librorum Syntagmate non abhorrerent elegantis ingenii ac studii homines, quod nullus metuebat, posse deinceps illud institutum similibus Thesauris separatim per majores quasque Regiones deductis continuari, & sic totam dem consummari Italiam: quod ipsum, ubi desævierit bellum, forsan per tantum curabit Spectatissimus Bibliopola, Petrus vander Aa. Ast utinam longior Seni nostro suppetisset vita, quum aliis multis de causis, tum hujus ipsius Thesauri nomine. Ille enim, qui eum formaverat ordinaveratque ipse, qui singulas ejus partes examinaverat diligenter, dignæne essent illustri hoc theatro, an excludendæ potius, ille ergo pro mirifica stili elegantia, Latinique sermonis facundia, qua neminem jam, non in his tantum, sed neque aliis in terris, habebat parem, longe uberiore & limata magis Oratione singulos hujus Operis Scriptores Tibi, Lector, enarrasset, eorumque dotes ac merita in clarissimam dedisset lucem. Nunc aliter visum supremo rerum Humanarum Arbitro, qui eam Reip. literariæ subduxit, quando Opus hoc ferme ad umbilicum jam pervenerat. Præstiterat enim Doctissimus Senex tantum non omnia, quæ in se receperat. Dederat consilium Bibliopolæ, constituerat ordinem Scriptorum, totamque corporis compagem jam effinxerat. Unum deerat, Præfatio, qua totius Operis idonea & liquida redderetur ratio. Eas ergo in partes ut succederem, Amplissimus Vir, Matthias de Roy, Illustris Grævii Gener, & simul Bibliopola noster, me rogarunt. Sed præterquam, quod dura est provincia, quæ mihi injungebatur, persequi partes, quas cœperat ac morte præventus infectas reliquerat Vir tam omni genere excellens: difficile etiam accidat, necesse est,

est, alieni consilii & facti justas explicare rationes. Video in hoc Opere conjungi Italicarum, non Antiquitatum modo, sed & Historiarum Medii ac Posterioris ævi, Scriptores. Quid mentis in eo fuerit Viro Illustri, vellem, ex ipso cognovisset Lector. Sed tamen facile assequor ex re ipsa Viri Consilium, voluisse scilicet eum, ut Lector in hoc Corpore conjuncta reperiret facta Populorum & Urbium istius tractus, non prisca modo, sed & recentiora; noluisse eum Antiqua a Novis plane separari, aut alterutra neglectum haberi, qui plerorumque mos est, sed utraque cognosci, ut ita Lector ex hoc Thesauro facile intelligeret singularum civitatum Seriem Rerum, & quasi Systema quoddam sibi conficere Historiarum posset, ad quas etiam Origines illarum ac Antiquitates, quæ quidem in publicis operibus & moribus cuique Oppido aut Genti propriis consistunt, ut sunt pleræque horum voluminum, referri commode queunt. Verum & inter Historicos hosce multi una serie res suæ cuique Patriæ ab ejus initiis ad sua usque tempora exsecuti sunt, & ita pariter etiam ipsi Antiqua & Nova exposuerunt. Certe Ubertus Folietta Genuensium seu Ligurum, Tristanus Chalcus (sic enim hunc appellandum esse, non *Calchum*, docent nos Præfatio ad ejus *Residua*, ac Epistolæ Politiani) Mediolanensium seu Insubrum, Joh. Bapt. Villanova Laudensium, Ludovicus Cavitellus Cremonensium, Umbertus Locatus Placentinorum res ab ipsis usque urbium & gentium primordiis repetiverunt. Quin solius prisca temporis Mediolanensia Alciatus, Ticinensia Bernhardus Saccus, Orobiorum sive Cenomanorum & Bergomatum res Joh. Chrysostomus Zanchius nobis sua diligentia erutas prodiderunt. Multa quidem in iis etiam occurrunt, maxime quum de ultima suæ Gentis antiquitate agunt, quæ nullam merentur, nec facile facient aliis, fidem. Id vero condonandum superioribus sæculis, quinto & sexto decimo, quando homines ex barbarie priorum temporum recentes communiter ferme laborabant isthoc pruritu, primordia rerum suarum angustiora ut facerent, & ad auctores referrent Deos, vel Heroas quosdam, partim ex Historiis notos, partim etiam ex terra subito natos & plane confictos. Plerique tunc, nec Italici modo, sed ipsi etiam Trans-Alpini, Trojanas quoque jactabant origines, ne quid Romanis ea parte scilicet concederent. Ist hæc Poeticis licet magis decora fabulis, quam sinceræ fidei Historiis, prætermittere tamen penitus non sunt ausi Scriptores istius temporis, quia communiter tunc ea tradebant, iisque sese efferebant, ipsæ Civitates. Secuti ergo & in eo sunt Livium, qui similia commemorat quoque, sed nec adfirmat, nec refellit, nec in magno ponit discrimine, utcunque existimata aut accepta fuerint. Verum ut apud Hunc, ita & apud Illos ferme Auctores, talia in ipsis tantum rerum initiis reperiuntur. In reliquo enim Historiæ suæ corpore plerique procul habuerunt omnes plebejis fabulis gratificandi causas. Si qui hisce nugis prorsus indulserunt, eorum nullam Ill. Grævius habuit rationem. Dilectum enim egit præstantissimorum, quos in hanc cohortem potissimum conscriberet. In eam idcirco minime referendum censuit *Salvatoris Vitalis Theatrum Triumphale Magnalium Mediolani*, quippe quo Libro, & cujus Auctore, ineptiorem stultioremque ipse Sol nunquam vidit, licet maximo in Auctionibus venire soleat pretio, quum revera sit nullius. Ita enim undiquaque stolidissimo stilo insulsißimæ narrantur istic fabulæ. Quin rejecit etiam Bernhardinum Corium, & Paulum Morigiam, qui Mediolanenses quoque Historias Italica condiderunt lingua. Verum & illi suæ Urbis originem ridiculum in modum, serio tamen sermone, ab ipso Noacho, vel ejus Nepote, Thubale, Japheeti Filio, arcessere non sunt veriti, & præterea nihil fere alicujus momenti adferunt, quod ab Aliis, qui recepti erant maximo suo merito, jam traditum non fuerat. Summo itaque jure exclusit eos, ne sæpius eadem Lectori

ctori occurrerent, aut supervacua mole oneraretur hic Thesaurus, quum certe non multum illos sit desideraturus, qui Chalcum legerit & Ripamontium. Neque vero ea, quæ pervulgata etiamdum erant, & in omnibus fere reperiebantur bibliothecis, repetenda duxit. Certe *Erycii Puteani Historiam Insubricam* ubivis obviam una hac de causa in hunc Scriptorum numerum referre noluit, licet ceteroqui minime rejiculam, aut ab hoc instituto alienam. Nec enim opus judicabat, neque laudi sibi putabat fore, Vir Sapientissimus, cogere Eruditos aut Literarum Amantes, ut eadem sæpius sibi compararent: quod fecisset utique, si in hoc tam copioso utilissimarum rerum Thesauro etiam vulgaria, & quæ separatim quilibet jam habebat, miscuisset tot aliis, quæ non tantum dignissima erant hoc loco, sed & quorum vix ulla amplius, sive Librariis in Tabernis, sive in Auctionibus publicis, occurrebant desiderantibus exemplaria. Sic enim demum justum se operæ facturum censebat pretium, si Tibi hic exhiberet, Lector, non tantum optimos quosque singularum Civitatum Scriptores, sed simul etiam tales, quorum magna jamdudum erat penuria. Quin hoc ipsum maxime spectans, quum elegantissimas Uberti Folietæ Historias, quæ Historico vere stilo & judicio sunt scriptæ, denuo hic ederet, adjecit alia quædam illius opuscula, licet ad Ligures nihil pertinerent, sed vel bellum Christianorum & maxime Italorum contra Selymum Turcarum Sultanum exponerent, vel Neapolis laudes aut res continerent alias: ne scilicet tam egregia illius Auctoris scripta, quæ jam nunc erant rarissima, paulatim interirent, si a reliquis & potioribus hic relinquerentur separata aut penitus neglecta. Id quod tanto minus videbatur committendum, quia tenue prorsus est spatium, quod in hoc Thesauro explent, aut sibi vindicant. Ceterum Folietam, qui in anno MDXXXVII. desit morte interceptus, excepit Jac. Bonfadius, haud minore judicio ac elegancia prosecutus seriem, obitu illius interruptam. A proximo enim anno initium duxit, qui restituta Genuensibus sua libertate per dignissimum immortalis laude Virum, Andream Auriam, insignis fuit. Hujus ipsius tam illustris anni res gestas ideo per modum Supplementi adjecit Paulus Folietæ Fratris sui Uberti Historiis, quas Paulus iste primum edidit Genuæ Sæculi Sextidecimi anno LXXXV. Verum illud Supplementum, quod hic quoque exhibetur, quodque ille sibi ab amico oblatum ultro, sed unde ab eo *erutum* fuerit, se nescire, ait, id vero erutum & descriptum est totum ex Bonfadii libro primo, ut conferenti mox patebit, & ipsum Supplementi principium liquido declarat, ubi dicitur, multos cives adiisse Magistratus, & rogasse, ut deligerentur idonei homines, per quos civitas tandem in concordiam redigeretur, *propter eas causas, quæ sunt a me demonstratæ*. Hæc enim nihil istic habent, quo respiciant; at apud Bonfadium vero & comodo leguntur sensu, quum ille in procemio istius libri causas has copiose fatis demonstraverit. Nempe Annales hujus, publica licet auctoritate scripti, latuerunt tunc tamen, forte propter publicum illius, quum adolescentulos corrupisset, supplicium, in scriniis privatorum hominum, nec prodierunt in lucem typis expressi, nisi Papiæ proximo post editum Folietam anno, hoc est, anno istius Sæculi LXXXVI. sumptus liberaliter tunc præbente Julio Pallavicino. Verum scripta Bonfadii exemplaria multis videntur vitiis fuisse adpersa, unde factum, ut varia etiamnum, alia in ipsius Libro Primo, alia in isthoc Supplemento inde sumpto, reperias, sed quæ jam, comparando utrumque, emendare facile possis. Exemplo sint, quæ sensum plane turbant, vel Historiam adulterant, apud Bonfadium pag. 1333. ubi Savonenses dicuntur incusati, quia id recusarent, *quod sua voluntate atque optimo jure ad id tempus deprehenderant*. Nemo dubitabit, opinor, quin pro ultimo verbo reponendum sit ex Supplem. p. 733. *dependerant* scil. Genuensibus, quum

quum alterum, si recte animum attendas, prorsus ab hoc loco & sensu sit alienum. Pag. 1334. Andreas Auria præfertur Catoni, *qui Tanta severitate fuisse dicitur*. Nihil præcedit aut sequitur, quo illud *Tanta* referri possit. Exemplar Supplementi (Vide pag. 734.) habuit *Truci*. Levius hoc est, at gravius paulo, quod pag. 1338. prorsus in fine legitur, *Ad montes finitimis locis, & ad hostium iter observandum, & ad eos vexandos, opportunis, dispositæ sunt cohortes quædam*. Nam quanto rectius & expeditius Supplem. p. 738. *Ad montes finitimos, locis, & ad hostium iter observandum, & ad eos vexandos, opportunis, dispos. &c.* Pag. 1340. in Oratione Pallavicini ad Internuncium Gallorum: *Hæc voluntas in Regem nihil immutata est, & quod ille patietur, non immutabitur*. At legendum ex Supplem. p. 739. &, *quoad ille*. Contra sæpe etiam illud exemplar, seu Supplementum, Pauli Folietæ non juvari modo & corrigi, sed & expleri potest ex altero Bonfadianorum Annalium exemplari, quod Papiæ typis est excusum. Ita Suppl. p. 731. memorantur Duodecim Viri, qui Patriam bonis legibus constituerent, & *fuisse* dicuntur ii, quorum nomina subjiciuntur: sed subjiciuntur tantum Novem, reliquis per incuriam, ut apparet, omissis, quos vide apud Bonfad. p. 1332. Similem reperies lacunam pag. 741. in Nominibus octo Gubernatorum & octo Procuratorum exprimendis, quæ explenda erunt ex Bonfad. pag. 1341. Sed & corrupta sunt, quæ reperiuntur pag. 734. de And. Auria, *Ac, cum Neapolim cum omnibus suis triremibus navigasset, (jam enim Philippinus redierat) tractabantur conditiones, quibus Caroli sese rebus adjungeret, in Arimen insulam concessit*. Atqui insula dicebatur *Inarime*; superiora etiam minime cohærent, & male sunt distincta. Repone ergo ex Bonfad. p. 1334, vel potius ex ejus Papiensi editione (nam & Nostra heic minus recte se habet) *Ac, cum Neapolim cum omnibus suis triremibus navigasset, jam enim Philippinus redierat, tractabanturque conditiones, quibus Caroli sese rebus adjungeret, ad Inarimen insulam confedit*. Sic pag. 737. pro *dum illi ipsi nolint*, leg. ex Bonf. p. 1337. *norint*: ubi tamen in proximis fere verbis, *quæ simplici*, juvanda vicissim est Bonfadii editio ex Supplemento, legendumque, *quæ a simplici* &c. Denique pag. 738. *Pulcifera vallis* nominatur, quæ dicenda erat *Porcifera*, ut constat non modo ex iisdem ceteroqui verbis apud Bonfadium p. 1339. sed & ex ipso Supplem. p. 740. extr. Prætereo alia minoris momenti; satis enim claro liquet ex his indicio, non adeo inutilem hic Lectoribus fore earundem licet rerum in Supplemento illo Folietæ & Bonfadii Annali primo repetitionem, quum alterum alterius egeat auxilio, & ne trium quidem sit foliorum. Ceterum uti Genuensis Reip. Historiam ab initiis Ligurum usque ad tempora Imperatoris Caroli V. seu ad Annum Christianorum MDL. perductam duo illi absolvunt; sic Mediolanensem itidem a primordiis suæ Urbis ad Philippi usque Secundi Hispaniarum Regis, & Insubrum Principis, vitam exsecuti sunt Tristanus Chalcus, & Josephus Ripamontius. Sed & sicuti illorum scripta demum, postquam decesserant ipsi, in vulgus exierunt, atque inde factum, ut ex Bonfadii Annalibus nondum editis aut cognitis publice, illud sæpius jam memoratum Supplementum Paulo Folietæ fuerit subministratum, sic certe *Residua* Tristani, quæ scripta videntur ab illo jam sene & morti proximo, post publicatos jam Viginti Historiæ Patriæ Libros, lucem demum adspexerunt anno superioris Sæculi XLIV. eruta tunc ex Lucii Hadr. Cottæ, Patricii Mediolanensis, Bibliotheca, quando Ripamontius, qui voluntate Procerum, ut in munus Historici Mediolanensis Tristano succederet, ita telam ab eo cœptam continua serie pertexere est jussus, sua Decem Historiæ Mediolanensis volumina tribus annis ante jam ediderat. Quæ causa, quare, quum & ille, & ipsi Reip. istius Proceres *Residua* illa Tristani ignorarent plane, latentia quippe in privata Cot-

tæ Bibliotheca, Ripamontius suam Historiam cœperit ab eo tempore, in quo
 definit Tristani liber Vigésimus, seu ab anno MCCCXIII. licet ille libris XXI &
 XXII. postea inter *Residua* ejus editis, Historiam perduxerit ad Annum MCCC
 XXIII. Liquet hinc, recte quidem olim, at parum recte nunc, post cognita jam
 & vulgata isthæc *Residua*, Historiæ Ripamontii præscribi hunc Titulum, *Ab*
Anno Salutis CIO CCC XIII. *Qui Tristano Calcho Patriæ Historiæ Finis.* Nam
 Finis ille nunc est in anno, non XIII, sed XXIII. Id quod hic monendum vi-
 debatur, ne quem iste Titulus in errorem induceret. Ita vero Historiæ Pa-
 triæ seriem profecutus est Tristanus ad idem usque tempus, ad quod Geor-
 gius Merula, h. e. ad mortem usque Henrici VII. Imperatoris Romani, & Mat-
 thæi illius, qui auctoritatem, opes, imperium Vicecomitum suorum in Remp.
 Mediolanensem condidit, ac posteris reliquit. Erat Merula magni nominis
 homo tempore Ludovici Mariæ Sfortiæ, Mediolanensium Ducis, qui ut ama-
 vit ipse & coluit literas, ita illum fovit, & Venetiis arcessitum in publicam
 suæ civitatis produxit cathedram. Verum ut longe plus, quam par erat, sibi
 Merula ille sumpsit & tribuit ridicule gloriosus, sic reliquos suæ ætatis Do-
 ctos maligno & iniquo passim carpsit dente, edentulus jam senex. Ita fa-
 ctum, ut, licet haud exiguam eruditionis apud alios sibi conciliavisset opinio-
 nem, a paucis tamen extra Mediolanum amatus fuerit, probatusve. Istic
 plerique, Principis judicium secuti, qui eum ad res Majorum suorum me-
 moriæ prodendas adhibuerat, maximi illum faciebant. Quos inter vel præ-
 cipuus fuit Bartholomæus Chalcus, qui immo ipsi eum Principi, Venetiis
 adhuc Rhetoricas profitentem artes, commendavit, & causam hominis, etiam
 post ejus fata, egit in literis ad Politianum datis, cui itidem ille ineptum in
 modum obtrectaverat, & cujus Miscellanea iniquis perstrinxerat notis. Sed &
 mortuo jam Merulæ, perfecit iste Chalcus, ut Tristandum, suum Gentilem,
 ipsius discipulum, in contexenda Mediolanensium Historia Princeps succes-
 sorem daret. Dignus hic erat, si quisquam, isto munere, cujus etiam partes
 egregie est exsecutus. Verum ita, ut non continuaverit Merulæ Historiam,
 sed potius retractaverit, facturus tamen haud dubie & illud, si longior ei
 suppetisset vita. Etenim quum multa Hic primus e latebris eruisset & clau-
 stris Bibliothecarum, quæ ille ignoraverat, multa etiam aliter se habere li-
 quido deprehendisset, novam ideo ab initio urbis Mediolanensis & longe u-
 beriore ac certiore, fabulosis plerisque neglectis, & additis aut aliter
 expositis rebus quamplurimis, conscripsit Historiam. Sed vellem & hi, &
 plerique istius temporis in Italia, diligentius annotassent, unde hausissent ea,
 quæ tradunt, ut Lectores ita decernere possent, quid incertis distent certa.
 Nunc omnia narrant eadem & sua singulorum fide, quæ sæpe tamen labo-
 rat. Non dico in miraculis & similibus rebus, quæ ad auctoritatem divini-
 tatis cujusdam Sanctis Geniis & Præsidibus Loci, vel ipsis Templis, conci-
 liandam ab eorum Sacerdotibus astute in plebem spargi, & constanter ab ea
 dein jactari solent. Hæc enim sæpe Scriptores, nisi commune omnium in se
 concitare odium, ac haberi publicæ & receptæ dudum gloriæ adversarii ve-
 lint, prætermittere illis in locis, certe negare prorsus, non audent. At in
 rebus etiam Politicis Fides illa vacillare aliquando, nec idonea niti auctori-
 tate, videtur. Unum referam, quod pariter Merula & Chalcus, & hic di-
 fert prorsus, affirmant, tempore Imp. Othonis III. & Papæ Gregorii V.
 institutum fuisse Septem-Virorum in Germania Collegium, qui Regem eli-
 gerent Romanorum, a Papa dein coronandum, & Imperatoris Augusti ap-
 pellatione honorandum. Id quod satis jam superque ab Eruditis superioris
 Sæculi, etiam ipso Maimburgio in *Historia Vergentis Imperii*, confutatum est,
 & falsitatis convictum, dum illorum Originem ad serius longe tempus reji-
 ciendam, nec utique ab auctoritate Papali arcessendam, ostenderunt. Antiqui-
 tates

tates Mediolanenses collegit Jo. Antonius Castellionæus, in quibus, licet plurimæ occurrant Christianæ & Ecclesiasticæ, multas tamen etiam vetustioris reperies temporis, Romanique Imperii. Quin ne mutilos quidem neglexit ille Lapidum Titulos, in quibus quia bona fide obscuras, ut erant, exhibuit literarum formas, inde evenit, ut nostri Artifices, licet sedulo ceteroquin & fideliter omnia exprefferint, in dubiis tamen illis literarum vestigiis aliquando aberraverint. Ita Fascic. IV. pag. 427. in Epitaphio Giselberti Abbatis S. Vincentii in Prato, nimis diserte hac in editione legitur, HIC CVEAT, quum satis certo, exoletis licet literis, ediderit Auctor, HIC CVBAT, sicuti & paulo post eodem in Epitaphio ABBAS, non ABP. AS, quod hic visitur. Idem fere fatum sustinuit Tabulæ 1. Fig. 5. ad paginam 380. referenda, quæ ab Castellionæo mutila, & prout longi temporis culpa vitiata invenit, vulgatur cum integra lapidis ipsius figura, secus quam a Morigia factum, unde eam repetiit inscriptionem Reinesius, qui de suo eam, seu ex conjectura, hoc modo supplere vel emendare tentavit: L. SYRVS. EVODVS. SIBI. ET. SYRO. EVTYCHI. CAESIANO. VIRIA. LALA. IN. FRONTE. ... IN. AGR. P. XVI. Ceterum vere an male ita eam legerit, non in magno equidem posuerim discrimine, quum ex tota inscriptione nihil omnino discamus, quod non ex multis aliis jam sit notissimum. Majoris paulo sunt momenti, in quibus Auctor ipse in proxima superiore pagina est corrigendus. Istic enim de *Arria* Gente agens ita loquitur: *Nam & apud Græcos nomen ARRII, Philosophi Nicomediensis, qui vitas Epicteti & Alexandri M. luculenter conscripsit, duplici scriptum invenimus, sicuti & apud Latinos ARRIAE, uxoris Papinii Pæti, ad quem M. Tull. Cicero plures epistolas dedit, quæ leguntur in iis, quæ Familiares inscriptæ vulgo circumferuntur.* Multiplex in his hæret error. Nam Philosophus ille Nicomediensis, non ARRIVS, sed ARRIANVS, fuit dictus, ut quum aliunde, tum ex ejus operibus, quæ supersunt, satis constat. Deinde is Pætus, ad quem scripsit Cicero, non *Papinius*, sed *Papirius* fuit. Gravius vero est, quod illius Pæti, Ciceroni æqualis, matrimonio tribuit, solo hoc cognomine adductus, nobilissimam illam ARRIAM, quæ marito in consciscenda sibi nece prævit, eumque ita suo exemplo, & simul celebri illa voce, *Pæte, non dolet*, ad fortiter moriendum confirmavit. Vide Martialem, Plinium Junioem, & Dionem Cassium. Etenim illa non istius *Papirii Pæti*, sed *Cecinnæ Pæti*, Viri Consularis, fuit uxor, vixitque non Ciceronis, sed nonaginta fere annis post, Imp. Claudii tempore, sub quo periit cum marito. Verum non id nunc agimus, ut conquiramus, quæ in his Scriptoribus notari aut argui possint, quippe quæ Præfationis excederent modum. Progreditur dein Thesaurus hicce ad vicinas Mediolano Urbes, & primo Ticinum, cujus & totius fere Galliæ Cis-Alpinæ Antiquitates & Historias, Sacras ac Profanas, ad tempora usque Caroli Magni exsequitur Bernhardus Saccus, Papiensis Patricius, variæ eruditionis Homo. Romanarum tamen rerum vellem magis fuisset peritus. Inscitum certe est, quod Libri III. initio disputat contra Sabellicum, qui Enneadis Quartæ Libro IX. dixerat, Romanos jam ante Bella Punica fuisse *Principes in Italia*, idque refellere conatur ex eo, quod etiam postea *Socios* istic habuisse legantur. At *Principum* vox neutiquam Dominos in prisco notat Latio, quod ille credidit, sed Primos opibus ac potentia, quod extra controversiam erant Romani. Ita apud Florum I. 3. Albani dicuntur *diu Princeps Populus*, qui tamen soli cum solis & recentibus adhuc, sed paribus tamen, Romanis bellum gessere, & infeliciter prorsus. Deinde vere tunc plus quam Principes Italiæ fuerunt Romani, sed Italiæ strictius sumptæ, quæ Galliam Cis-Alpinam excludit, non istius, quæ ad Alpes usque propagata dein fuit. Illa enim jam debellata longe maximam partem, post domitos Etruscos, Samnites,

tes, Tarentinos, submotumque Pyrrhum, in jus & ditionem Romanæ Urbis concesserat. *Sociorum* vero appellatio nihil detrahit Romanorum in Italicos potestati. Etiam diu postea, depulso dudum Hannibale, deleta jam Carthagine, victis Macedonibus & Syris, quum Italici certissimum jam Romanorum jugum excutere tentarent, nonne *Sociorum* tamen nomine adhuc ornabantur? nonne Italicum illud bellum ideo etiam *Sociale* fuit dictum? Quid Provinciæ? an eo, quod ista appellatione quoque honorabantur, minus Dominos agnoscebant Romanos? Gallos tamen Ligures, Insubres, aliosque cis Alpes tum necdum fuisse subactos, verum est, neque id negaverit Sabellicus. Saccum Ticinensem proxime subsequitur Joh. Chrysostomi Zanchi Disputatio, de Orobiorum, Cenomanorum, ac Bergomi origine, ad Petrum Bembum scripta, sed dum Italicis & Gallicis in nominibus sectatur fontes Hebraicos, in rebus vero ipsis Metastheni aliisque Annianis nugis præcipuam habet fidem, sæpe se orbi literato deridendum præbuit. Laudensium porro Annales nobis reliquit Joh. Bapt. Villanova, sed Italico compositos sermone, quos in Latinum convertit Alex. Dukerus, utriusque Linguae sanequam peritus. Addita his Othonis Morenæ, & Acerbi ejus Filii, Historia, Felicis Ofii doctissimis illustrata Notis, quæ Res non Laudensium modo, sed & ipsius Friderici Ahenobarbi, nobilissimi Imperatoris, sub quo vixerunt illi, copiose exponit. Utinam ad pactionem Friderici cum Papa Alexandro Venetiis factam perducere eam per insuperabilem fatorum vim potuissent Morenæ! Decisa sic foret & abjecta haud dubie controversia, vel, si verum malumus, fabula, a Pictoribus primum Guelphis orta, de Magni Animi Principe pedibus conculcato a Papa, cujus quoque rei nullam ideo mentionem fecit Villanova, ut videri potest pag. 883. Tertiæ Tomi. Ne Cremonenses quidem Annales Ludovici Cavitelli exclusos hoc Thesauro videbis, licet inculto plane & horrido sint stilo exarati, ac vitiosissima expressi scriptura, sive ipsius Auctoris culpa, sive Typographi Cremonensis. Certe Nomina Propria Hominum aut Locorum in terris Transalpinis adeo perperam passim & varie scripta reperias, ut sæpe vix divinando assequi possis, quid velint, aut quem designent. Certus sum, fore, ut aqua hæreat etiam Nostratibus, quicunque legent nomina Urbium Belgicarum pag. 1600. ubi per *Bucsolenses*, *Rugienses*, *Dordoncienses*, *Teveremondanos*, *Curtacenses*, *Ducreatios*, *Arilimenses*, *Devavabroenses*, videtur intellexisse Bruxellenses, Brugenses, Dordracenses, Teneræmondanos, Cortracenses, Duacenos, Harlemenenses, Daventrienses. Ita mox una pag. 1603. Hornanum Comitem appellat, modo *Philippum Momorantium*, *Amiratum* & *Orni Comitem*, modo *Philippum Ofemondium*, *Com. Orni*, & *Præfectum classis*. Pag. 1606. *Golfangus Dux Propontis* est Wolfgangus Dux Bipontinus. Pag. 1608. *Deondeus* est Princeps Condeus. Pag. 1618. *in Zelandia Venense oppidum*, & *Zerchinea*, pro Verense, & Ziricæa; mox *Corconaria* pro Gorcumum, *Zutelanium* pro Zutphania, quæ pag. 1620. *Zeutafanium* dicitur. *Alemania* pro Alcmaria. Pag. 1620. *Dux Pruincensis* est Brunsvicensis. *Austodoromenses* sunt Amstelædamenses. Infinita reperiet Lector ejus generis, quæ Oedipode indigeant Historiarum non imperito. Stili salebras plane horridas agnoscit ipse Editor, sed veritatis studio pensari ait. Ceterum ex Antonio Campo, Italico Historiæ Cremonensis Scriptore, varia Illustrium Civium elogia ab industrio & docto Juvene, Joh. Fayo, Celeberrimi Theologi, Antonii Fayi Nepote, excerpta, & Cavitello idoneis locis sunt inserta. Agmen claudit *Seriosa Narratio Umberti Locati de Placentinæ Urbis Origine, Successu, & Laudibus*, ubi quæ de Origine prima breviter memorantur, ex fabulis Ricobaldicis sunt hausta. At majoris est momenti & utilitatis, quo totum pene opus consumitur, Chronicon Placentinum, usque ad Annum MDLXIII. cui addi-

additur præcipuarum rerum, quæ ad Urbem commendandam pertinent, Nobilitatis, Dignitatis, Gloriæ singulorum Civium, tum Universitatis, Privilegiorum, Operumque Publicorum, Enarratio. Ita vides, Lector, in hoc tibi Thesauro abunde offerri Historiarum, quas tamen hic omnes neququam recensuimus. Neque vero singulas commendatione nostra ornandas putavimus, quum pleræque satis constanti inter Doctos fama dudum fuerint, & suo quidem merito, celebratæ. Tantum quæ monenda videbantur, vel etiam notanda in iis ultro nobis occurrerant, exponere hic voluimus. Si qui earum Scriptores in originibus suæ cuique Patriæ tradendis, vulgaribus vel Annianis indulserunt fabulis, easque ab ultima, immo Noachica, deduxerunt antiquitate, ut vel inprimis fecit Petrus Leo Casella in suo *de Primis Italiae Colonis* libello: id vero condonandum, ut dixi, superioribus sæculis a Barbarie recentibus, quæ antiquitatis veræ ignara, talia ubique tunc fere finxit vulgavitque. Unde neque ipse Alciatus, Egregius ille Jctus, ab illis ineptiis plane immunis fuit, Insuores suos ab nescio quo *Subre* arcessens, Jani per filium Thubalem Nepote, qui Janus fuerit ipse Noachi Nepos. Verum has nugas rejecerunt, ac Barbariei suæ reliquerunt, Doctissimi & Præstantissimi Scriptores, Ubertus Folietta, Trifanum Chalcus, maxime vero ii, qui ex professo antiquitates Gallorum Cisalpinorum magno veri studio indagarunt, præclaris judicii & doctrinæ dotibus instructissimi Viri, Gaudentius Merula & Bonaventura Castilioneus, quos abs Te legi magis, quam a me pluribus commendari, par est. Restat jam nihil, nisi ut Tabulas Geographicas, quantum potest, emendatissimas, & Urbium, Operum publicorum, atque illustrium Hominum Effigies plane nitidas, Tibi hic exhiberi narrem Bibliopolæ nomine & fide, qui neque ullis pepercit sumptibus ad conquirenda undique optima Librorum exemplaria. Sed & quia Italicæ Officinæ, si ab Venetis, Florentinis, Romanis, discesseris, corruptissimos plerumque edidere libros, & ipsi Scriptores, si quid ex Antiquis Auctoribus proferebant, loca eorum raro aut vix usquam adscripserunt, idcirco per eundem Fayum, quem dixi, recognosci diligenter Libros, manifesta ex iis expungi vitia, denique singula Loca Præcorum, quorum verba in his citantur, paginis suis subjici curavit. Id quod vel maxime factum videbis in Barrii Libello *de Laudibus Italiae*, qui totus fere est conflatus ex verbis Antiquorum. Eum quia Illustris Grævius Præfationi subjectum voluerat, Nos quoque illius judicio & sententiæ obsecundantes ac summa tribuentes omnia, Tibi hic, si voles, legendum damus. Vale, Lector, & bonis artibus fave.

GABRIEL BARRIVS,

FRANCICANVS,

DE

LAUDIBVS ITALIAE,

AD CAROLVM MUTIVM,

PATRITIVM ROMANVM.

PROOEMIUM.



VM pro lingua Latina, & de æternitate urbis scripserim, operæ pretium mihi visum est, præclaras etiam Italiae laudes in universum tum Latinorum, tum Græcorum monumentis insertas colligere, & in unum volumen congerere. Quod si mea diligens lucubratio minus omnes colligere potuerit, nemini mirum, nec grave videri debet: quandoquidem fieri nequaquam potest, ut quis, quantocunque ingenio polleat, ac quantamvis diligentiam adhibeat, totius Italiae res

lau.

laude dignas colligere ac scribere queat; cum Italia & rerum omnium, ac clarorum ingeniorum, ac virorum fortium, tum in omni scientiarum genere eruditorum virorum, & utriusque sexus sanctorum hominum parens, bonarumque literarum magistra quotidie his producendis uberior fiat. Quare peroptime agerent Itali, si me, qui res Calabras scripsi, imitantes, singuli suas regiones accurate perscribant. Nam si provinciales suas regiones Latinis literis celebrant, quanto magis nos Latini nostram Italiam Latinis literis Priscos imitantes celebrare, siue jam celebrem & insignem ostendere debemus? Hunc autem Librum tuo nomini dicatum in lucem edere constitui. Idque egi, tum tua, tum Jacobi genitoris tui, & Tyberii avunculi Locrensi Præsulis in me benevolentia adactus: quorum uterque bonarum literarum non expers ita prudentia & gravitate præstitit, ut priscis Mutiæ Romanæ familiæ, quæ illustris est & patritia, proceribus dignus facile possit agnoscere. Sed neque laude caret Mutius avunculus etiam tuus, qui pro tuenda patria in oppugnatione urbis Caroli quinti temporibus strenue dimicavit. Tu vero majorum tuorum vestigiis ingressus eam indolem animique magnitudinem præ te fers, ut ab ipsis minime degener existimari possis.

ITALIA, Europæ regio, multo omnium, absit verbo invidia, totius orbis regionum celeberrima est, & Dei Opt. Max. munere, ac Romanorum beneficio, provinciarum victrix, orbisque terrarum rector atque regina. Est autem inter Varum & Arsiam amnes, ac quicquid pertinet ad Alpes. Atque hinc infero mari, quod Græci Tyrrhenum nuncupant, hinc supero, quod iidem Adriaticum appellant, hinc Alpibus ipsis, præcelsis, salebrosis, asperrimisque montibus, cingitur: quas Alpes sagax natura, incolarum securitati ac quieti consulens, veluti muros arcesque posuit, ut montium fretique divortii incolas ipsos à Barbarorum commercio sejungeret, ab eorumque impetu & sævitia tueretur. Habet autem hinc Niceam Liguriæ, hinc Polam Istriæ, primas & eas claras urbes: quæ felicissima regio incolis suis, omne, quo humana vita carere non debet, quam affluenter suppeditat, ut nihil adventitu boni ab eis desideretur: siquidem & frugum, & pecorum, equorum, aliarumque rerum omnium alitrix est; unde multi & Græcorum & Barbarorum populi sedibus suis relictis in eam ad habitandum accesserunt. Et quid ago? Tanta est hujus regionis felix & perbeata cæli clementia, ac temperies, ut præter rerum omnium copiam, ejus incolæ & ingenii felicitate, & judicii acumine, & morum probitate ac benignitate, & armorum præstantia, animi fortitudine ac virtute cunctis nationibus antecellant. Adde quod Italia, Latinam linguam, omnesque ingenias disciplinas, omneque metri genus, à Romanis edocta, usque adeo ipsis excellit, ut merito omnium liberalium artium, bonarumque literarum, omnium gentium magistra dici possit. Quare non ab re eam Deus orbis terrarum reginam fore, in eaque & terrenæ & cælestis, hoc est, spiritalis, ecclesiæ, in qua† suæ sanctæ domicilium ac solium in æternum esse voluit. Qua Imperio subacta Romani quoscunque barbaros exercitus sibi obvios parvo, aut nullo prope negotio prostraverunt & profligaverunt: nam, ut alias dixi, quingentis totis atque integris annis Romana virtus domi, hoc est, in Italia luctata est, qua ubi potita fuit, ducentis sequentibus annis Asiam, Europam, Africam, totum denique orbem terrarum armis sibi subegit. Non enim Pyrrhus & Annibal, ac quicunque alii Barbari, in Italiam adversus Romanos pugnaturi accedere ausi fuissent, nisi ab Italis acciti eorum auxilio usi essent: nam nostris armis, nostris opibus, nostris viribus, nostris demum virtutibus contra nos nostros armamus inimicos. Queritur, animoque angitur Cicero, ad Atticum scribens, quod Cæsar ut alter Annibal, quod in petitione consulatus ratio ipsius absentis secundum præsentem à Senatu habita non fuerit, barbaros reges contra Rempublicam incitasset, gentes feras armatas in Italiam adduceret, quam conculcatam iri prospiciebat. Eam enim Romani ad universi orbis Imperium perfugium struxerunt ac propugnaculum. Equidem populus Romanus, Itala juvante virtute, magnas hostium copias marique terraque parva manu fudit, urbes magnas natura manuque munitas pugnando cepit, nationes feras, populosque ingentes vi subegit, reges magnos domuit. Habet autem Italia insulas magnas tres, Siciliam, Corsicam & Sardiniam, habet & alias, ut Æolias, quæ septem sunt, & Pontiam, Pandatariam, Æginam, Ænariam, Prochyta, Caprariam, Iliam. Italiam autem non Itali modo laudaverunt, sed provinciales quoque scriptores; vel illi ipsi Græci, regionis cælique clementiam, soli ubertatem, rerum omnium copiam, incolarum humanitatem, hospitalitatem, ceterasque virtutes admirantes, eamque laudandi impatientes summis & quidem merito extulere laudibus. Ait itaque Varro, ut ab Italis exordiar, Rei Rust. lib. i. cap. ii. Cum confedissemus, Agrasius, Vos, qui multas perambulaistis terras, ecquam cultiorem Italia vidistis, inquit? Ego vero, inquit Agrius, nullam arbitror esse, quæ tam tota sit culta. Primum cum orbis terræ divisus sit in duas partes ab Eratosthene, maxime secundum naturam ad Meridiem versus & ad Septentrionem. Et sine dubio, quoniam salubrior pars septentrionalis, quam meridiana, & quæ salubriora, illa fructuosiora; dicendum magis eam fuisse opportunam ad colendum, quam Asia, ibique Italiam: primum, quod est in Europa; secundo, quod hæc temperatior pars est, quam interior: nam intus pene sempiternæ hyemes. Neque mirum, quod sunt regiones inter circulum septentrionalem & inter cardinem cæli, ubi sol etiam sex mensibus continuis non videtur. Itaque in Oceano in ea parte ne navigari quidem posse dicunt propter mare congelatum. Fundanius, En ibi tu quicquam nasci putas posse, aut coli natum? Verum enim est illud Pacuvii, Sol si perpetuo

† Aliquid hic desideratur, vel hæc duæ voces, in qua, redundant.

petuo sit, aut nox flammeo vapore, aut frigore, terræ fructus omnes interire. Ego hic, Ubi nox & dies modice redit & abit, tamen æstivo die, si non diffinderem meo insititio somno meridie, vivere non possem: illic in semestri die, aut nocte, quemadmodum quicquam feri, aut alescere, aut meti possit? Contra, quid in Italia utensile non modo non nascitur, sed etiam non egregium sit? Quod far conferam Campano? Quod triticum Appulo? Quod vinum Falerno? Quod oleum Venafro? Non arboribus confita Italia est, ut tota pomarium videatur? An Phrygia magis vitibus cooperta, quam Homerus appellat ἀμπέλιδεον, quam hæc? Aut Argos, quam idem poeta πολύπερον, in qua terra jugerum unum denos & quinos culleos fert vini. Quot quædam in Italia regiones? an non M. Cato scribit in libro *Originum* sic? Ager Gallicus Romanus vocatur, qui viritim Cæsennatibus datus est ultra agrum Picenum. In eo agro aliqua trifariam in singula jugera deni cullei vini fiunt. Nonne item in agro Faventino, à quo ibi tricenariæ appellantur vites, quod jugerum tricenae amphoras reddat? *Et cap. XLV.* In Sybaritano agro jugerum centesimum reddere dicunt. *Et rursus cap. VII.* Cæsar Vopiscus Ædilicius, causam cum ageret apud Censores, campos Rosiæ Italiæ dixit esse fumen, in quo relicta pertica postridie non appareret propter herbam. *Et libro undecimo Rerum humanarum apud Macrobius Satur. libro II. cap. XII. enumerans quæ in singulis Italiæ partibus optima ad victum nascentur, ait.* Ad victum optima fert ager Campanus frumentum, Falernus vinum, Cassinas oleum, Tusculanus ficum, mel Tarentinus, piscem Tiberis. *Et M. Vitruvius libro VI.* Cum ergo ab natura hæc sint in mundo collocata, ut omnes immoderatis mixtionibus sint disparatæ, ut inter spatia totius orbis terrarum regionumque medio mundi populus Romanus possideret fines: namque temperatissimæ ad utranque & corporum membris, animorumque vigoribus pro fortitudine sunt in Italia gentes. Quemadmodum enim Jovis stella inter Martis ferventissimam & Saturni frigidissimam media currens temperatur, eadem ratione Italia inter Septentrionem Meridique ab utraque parte mixtionibus temperatas & invictas habet laudes. Itaque consilio refringit Barbarorum vires, forti manu meridianorum cogitationes. Ita divina mens civitatem populi Romani egregia temperataque regione collocavit, uti orbis terrarum Imperio potiretur. *Et Julius Firmicus lib. I. cap. I.* Itali fiunt regali semper nobilitate præfulgidi, Galli stolidi, Hispani elata jactantiæ animositate præposterii. Sed nec Italis aliquando sol denegabit Imperia, nec Gallis stoliditatem Mercurii sapientissimum fidus excuet, nec Hispanorum jactantiam pigrum poterit Saturni lumen hebetare. *Et Justinus lib. XLIV. cap. II.* In tanta seculorum serie nullus illis (Hispanis) dux magnus præter Viriatum fuit adeo feris propiora, quam hominibus, ingenia sunt. *Et Livius bel. Pun. libro secundo*:* Hispanorum inquieta, avidaque ad novas res sunt ingenia. *Et Cæsar Gallos mobilitate & levitate animi novis semper Imperiis rebusque studere, & ad bellum mobilitate celeriterque excitari scribit,* Belli Gall. lib. III. cap. IV. Verum, inquit, ut ad bella suscipienda alacer ac promptus est eorum animus, sic mollis ac minime resistens ad calamitates perferendas mens eorum est. *In consiliis capiendis mobiles sunt, quod incertis rumoribus servant.* *Livius lib. IV. quar. dec. †* Gallorum corpora emollida & fluida sunt. *Et Camillus apud Livium lib. V. cap. XLIV.* Gallorum, inquit, gens est, cui natura corpora animosque magna magis, quam firma dedit. In certamen omne plus terroris quam virium ferunt. *Et rursus ejusdem lib. cap. XLVIII.* Gallorum intolerantissima gens est, humori ac frigori assueta, tum æstu & angore vexata. *Et lib. X. cap. XXVIII. Livius ait:* Persuasum erat Gallos primo impetu feroces esse, quos sustineri satis sit; longiori certamine sensim residere. Eo- rum etiam corpora intolerantissima laboris atque æstus fluere, primaque eorum prælia plusquam virorum, postrema minus quam feminarum esse. *Id etiam scribit Polybius lib. II. itemque Florus. Item Strabo libro IV.* Gallis simplicitati atque animositati multum inesse impudentiæ simul & superbiæ, & ornamentorum studium. Etenim aurea illis sunt gestamina, collo quidem torques, manibus autem & lacertis armillæ dignitatis honores, tinctas gestant vestes & auro pictas. Qua ex levitate victores quidem intolerabiles sunt, victi autem stupidi videntur. Amentitiæ quoque & barbarici mores adsunt. *Item Vegetius lib. I. cap. I. ait,* omnes doctissimi viri, omnes nationes, quæ vicinæ sunt soli, nimio calore siccitas amplius quidem sapere, sed minus habere sanguinis dicunt, ac propterea constantiam ac fiduciam minus habere pugnandi, quia metuunt vulnera, quod exiguum sanguinem se habere noverint. Contra septentrionales populi remoti à solis ardoribus inconsultiores quidem, sed tamen largo sanguine redundantes sunt ad bella promptissimi. Mediam vero temperatamque regionem colentibus & sanguinis copia suppetit, ad vulnere mortisque contemptum, & prudentia inest. *Et Ælianus de Varia Historia libro IX. cap. XVI.* Italiam primi Ausones inhabitaverunt indigenæ. Atque permultos postea variosque populos in ea habitasse ferunt, quot nullam aliam terrarum partem coluerunt. Eam potissimum ob causam quod singularum anni horarum in ea temperies sit, quodque regio bonitate telluris excellens sit, & aquis irrigua, fertilisque omnium fructuum, atque compascua, itemque quod fluviis perfusa, mare quoque commodum adjectum habeat, portubusque ex omni parte interstincta, & impellendis solvendisque navibus idoneis locis. Sed & incolarum singularis hospitalitas & benignitas multos pellexit, ut in eam suas sedes transferrent. Ad hæc ajunt veterum memoria mille centum nonaginta septem urbibus Italiam præditam at-

* Id est, lib. xxii. cap. xxi.

† Vide lib. xxxiv. cap. xlvf.

que ornatam fuisse. *Pompejus apud Cæsarem Belli Gallici lib. vi. cap. i.* Tantæ Italiæ facultates sunt, ut si quid esset in bello detrimenti acceptum, non modo id brevi tempore farciri, sed etiam majoribus augeri copiis posset. *Cajus, Plinio libro xvii. cap. v. referente*, Italiæ agrum optimum esse judicat, quod Italiæ totius situs ad radicem montium planicie ad Meridiem excurrente sit à naturâ dispositus. *Annibal apud Justinum libro xxxi. cap. v. cui Romana Italaque virtus nota erat, Antiochum regem alloquens, Romanis bellum inferre cogitantem, negabat opprimi Romanos nisi in Italia posse. Cui Antiocho in Græcia adversus Romanos pugnare volenti dixit Annibal ipse*, Sibi belli sedem Græciam non placere, cum Italia uberior materia sit: quippe Romanos vinci nonnisi armis suis posse; nec Italiam aliter quam Italicis viribus subigi. Siquidem diversum cæteris mortalibus esse illud genus hominum, & belli genus. Aliis bellis plurimum momenti habere, priorem aliquam cepisse occasionem loci temporisque, agros rapuisse, & urbes aliquas expugnasse: cum Romano seu occupaveris prior aliqua ratione, seu viceris, tamen etiam cum victo & jacente luctandum esse. Quamobrem si quis eos in Italia lacefferit, suis eos opibus, suis viribus, suis armis posse vincere, sicut ipse fecerit. Sin vero quis illis Italia velut fonte virium cesserit, perinde falli, ac si quis amnes non ab ipsis fontium primordiis derivare, sed concrevis jam aquarum molibus avertere vel exsiccare velit. Hoc secreto se censuisse, ultroque consilii sui ministerium obtulisse. *Et Virgilius Georg. libro ii. vers. 139.*

Laudibus Italiæ certent, non Bactra, neque Indi,
Totaque thuriferis Panchaja pinguis arenis.
Hæc loca non tauri spirantes naribus ignem
Invertere, fatis immanis dentibus hydri,
Nec galeis, densisque virum seges horruit hastis:
Sed gravidæ greges*, & Bacchi Massicus humor
Implevere, tenent oleæque, armentaque læta.
Hinc bellator equus campo sese arduus infert,
Hinc albi, Clitumne, greges, & maxima taurus
Victima, sæpe tuo perfusi flumine sacro,
Romanos ad templa Deum duxere triumphos.
Hic ver assiduum, atque alienis mensibus æstas,
Bis gravidæ pecudes, bis pomis utilis arbor.
At rapidæ† tigres absunt, & sylva** leonum
Semina, nec miseros fallunt aconita legentes,
Nec rapit immensos orbes per humum, neque tanto
Squameus in spiram tractu se colligit anguis.
Adde tot egregias urbes, operumque laborem,
Tot congesta manu præruptis oppida faxis:
Fluminaque antiquos subter labentia muros.
An mare, quod supra, memorem, quodque alluit infra?
Anne lacus tantos? te Lari maxime? teque
Fluctibus & fremitu assurgens, Benace, marino?
An memorem portus? Lucrinoque addita claustra?
Atque indignatum magnis stridoribus æquor?
Julia qua ponto longe sonat unda refuso,
Tyrrhenusque fretis immittitur æstus Avernis?
Hæc eadem argenti rivos, ærisque metalla
Ostendit venis, atque auro plurimâ fluxit.
Nec genus acre virum, Marfos, pubemque Sabellam,
Assuetumque malo Ligurem, Volcosque verutos
Extulit; hæc Decios, Marios, magnosque Camillos,
Scipiadas duos bello, & te, maxime Cæsar:
Qui nunc extremis Asiæ jam victor in oris
Imbellem avertis Romanis arcibus Indum.
Salve magna parens frugum, Saturnia tellus,
Magna virum, tibi res antiquæ laudis, & artis
Ingredior, sanctos ausus recludere fontes,
Astræumque cano Romana per oppida carmen.

Et Columella libro iii. cap. viii. Mysiam, Lybiamque, largis ajunt abundare frumentis, nec tamen Appulos, Campanosque agros opimis defici segetibus. Tmolon & Corycion florere croco. Judæam & Arabiam preciosis odoribus illustrem haberi, sed nec nostram civitatem prædictis egere stirpibus: quippe pluribus locis urbis jam casiam pendentem conspiciamus, jam thuream plantam, florentesque hortos myrrha & croco. His tamen exemplis nimirum admonemur curæ mortalium obsequentissimam esse Italiam, quæ pene totius orbis fruges adhibito studio colonorum ferre didicerit. Quo minus addubitemus de eo fructu, qui velut indigena, peculiarisque, & vernaculus est hujus soli. Neque enim dubium Massici, Surrentinique, & Albani, atque Cæcubi agri vites omnium, quas terra susti-

* Alii fruges.

† Rabida aliis.

** Legendum sæva.

sustinet, in nobilitate vini principes esse. *Item Solinus Polyhist. cap. VIII.* De homine satis dictum habeo. Nunc, ut ad destinatum revertamur, ad locorum commemorationem stylus dirigendus est, atque adeo principaliter in Italiam, cujus decus jam in Urbe contigimus. Sed Italia tanta cura ab omnibus dicta est, præcipue à M. Catone, ut jam inveniri non possit, quod non veterum auctorum præsumpserit diligentia, largiter in laudem excellentis terræ materia suppetente; dum scriptores præstantissimi reputant locorum salubritatem, coeli temperiem, ubertatem soli, aprica collium, opaca nemorum, innoxios saltus, vitium olearumque proventus, ovilia, pecuaria, tot amnes, lacus tantos, bifera violaria. Inter hæc Vesuvium flagrantis animæ spiritu vaporantem, tepentes fontibus Bajas, colonias tam frequentes, tam assiduam novarum urbium gratiam, tam clarum decus veterum oppidorum, quæ primum Aborigines, Aurunci, Pelasgi, Arcades, Siculi, totius postremo Græciæ advenæ, & in summa victores Romani condiderunt. Ad hæc, littora portuosa, orasque habet patentibus gremiis commercio orbis accommodatas. *Et paulo post*: Ergo Italia, in qua Latium antiquum antea à Tyberinis ostiis ad usque Lirim amnem pertinebat, universa confurgit à jugis Alpium porrecta ad Rheginum verticem & littora Bruttiorum, quo in mare Meridiem versus protenditur. Inde procedens paulatim se Apennini montis dorso attollit, extensa inter Tuscum & Adriaticum, id est, inter superum mare & inferum, similis querno folio, scilicet proceritate amplior, quam latitudine. Ubi longius processit, in cornua duo scinditur, quorum alterum Ionium spectat æquor, alterum Siculum. Inter quas prominentias non uno margine accessum insinuati freti recipit, sed linguis projectis sæpius à procurrentibus distinctum promontoriis pelagus accipit. *Et mox*: Verum Italiæ longitudo, quæ ab Augusta Prætoria per urbem Capuam porrigitur usque ad oppidum Rhegium, decies centena & viginti millia passuum colligit. Latitudo ubi plurimum ccccx. ubi minimum cxxxvi. millia. Arctissima est ad portum, quem Annibalis castra dicunt. Neque enim excedit lx. millia. Umbilicum, ut Varro tradit, in agro Reatino habet. At in solidum spatium circuitus universi vicies quadragies novies centena sunt. In quo ambitu adversa Locrensi fronte ortus à Gadiibus finitur *Europæ* sinus primus: nam secundus à Lacinio auspicatus in Acrocerauniis metas habet. Ad hæc Italia Pado clara est, quem mons Vesulus superantissimus inter juga Alpium gremio suo fundit visendo fonte in Ligurum finibus, unde se primum Padus prorumpit, summersusque cuniculo, rursus in agro Vibonensi extollitur, nulli amnium inferior claritate, à Græcis dictus *Ἡεῖδανός*. Intumescit exortu Canis tabefactis nivibus & liquentibus brumæ pruinis; auctusque aquarum accessione xxx. flumina in Adriaticum deferunt mare. *Et rursus*: Est è memorabilibus inclytum, & insigniter per omnium ora vulgatum. *Et Plinius* libro III. cap. v. Nec ignoro, ingrati ac segnisi animi existimari posse merito, si Italia leviter atque in transcurso in hunc modum dicatur terra omnium terrarum alumna, eadem & parens numine Deum electa, quæ cælum ipsum clarius faceret, sparsa congregaret Imperia, ritusque molliret, & tot populorum discordes, ferasque linguas, sermonis commercio contraheret ad colloquia, & humanitatem homini daret, breviterque una cunctarum gentium in toto orbe patria fieret. Sed quid agam? Tanta nobilitas omnium locorum, quos quis attigerit, tanta rerum singularum populorumque claritas tenet. Urbs Roma, vel sola in ea, & digna, & festa cervice facies, quo tandem narrari debet opere? Et qualiter Campaniæ ora per se felix illa ac beata amoenitas? ut palam sit in uno loco gaudentis opus esse naturæ. Jam vero tota ea vitalis ac perennis salubritatis coeli temperies est; tam fertiles campi, tam aprici colles, tam innoxii saltus, tam opaca nemora, tam munifica sylvarum genera, tot montium afflatus, tanta frugum & vitium olearumque fertilitas, tam nobilia pecori vellera, tam opima tauris colla, tot lacus, tot amnium fontiumque ubertas, totam eam perfundens, tot maria, portus, gremiumque terrarum commercio patens undique, & tanquam ad adjuvandos mortales ipsa avide in mare procurrens. Neque ingenia, ritusque, ac viros & lingua manuque superatas commemoro gentes. Ipsi de ea judicare Græci, genus in gloriam suam effusissimum, quotam partem ex ea appellando Græciam magnam. Nimirum id, quod in mentione coeli fecimus, hac quoque in parte faciendum est, ut quasdam notas, ac pauca sydera attingamus. Legentes tantum quæso meminerint, ad singula toto orbe edisserenda festinari. Est ergo folio maxime querno assimilata, multo proceritate amplior quam latitudine, in lævo se flectens cacumine, & Amazonicæ figura desinens parmæ, ubi à medio excursu Cocinthus vocatur, per finem lunatos duo cornua emittens, Leucopetram dextra, Lacinium sinistra. Patet longitudine ab Alpino fine Prætorix Augustæ per urbem Capuamque, æquo cursu meante Rhegium oppidum in humero ejus situm, à quo veluti cervicis incipit flexus, decies centena & viginti millia passuum, multoque amplior mensura fieret Lacinium usque, ni talis obliquitas in latus digredi videretur. Latitudo ejus varia est, ccccx. millium inter duo maria, inferum & superum, amnesque Varum atque Arsiam; mediæ atque ferme circa urbem Romam ab ostio Aterni amnis in Adriaticum mare influentis ad Tiberina ostia cxxxvi. & paulo minus à Castro novo Adriatici maris Alsum ad Tuscum æquor haud ullo in loco cccc. in latitudinem excedens. Universæ autem ambitus à Varo ad Arsiam vicies quadra-

dragies centena millia pass. efficit. Abest à circumdatis terris Histria ac Liburnia quibusdam locis c. m. passuum; ab Epiro & Illyrio quinquaginta; ab Africa minus cc. ut auctor affirmat Varro; ab Sardinia cxx. millia; à Sicilia m. cccccc. à Corsica minus lxx. ab Issa, quinquaginta. Incedit per maria cœli regione ad Meridiem quidem. Sed si quis diligenti subtilitate id exigat, inter sextam horam primamque brumalem. *Et in fine descriptionis Italiae, ejusdem lib. cap. xx.* Hæc est Italia diis sacra, hæc gentes ejus, hæc oppida populorum. Super hæc Italia, quæ L. Æmilio Paulo, C. Atilio Regulo Conf. nunciato Gallico tumultu, sola sine externis ullis auxiliis, atque etiam tunc sine Transpadanis, equitum lxxx. millia, peditum dcc. millia armavit. Metallorum omnium fertilitate nullis cedit terris. Sed interdictum id vetere consulto patrum, Italiae parci jubentium. *Et lib. xvii. cap. v.* Cato agrum optimum judicat ad radicem montium *Apennini* planitie in meridiem excurrente, qui est totius Italiae situs; terram vero teneram, quæ vocetur pulla. Erit igitur hæc optima, & operi satior. Intelligere modo libeat dictam mira significatione teneram, & quicquid optari debet in eo vocabulo invenietur. Illa temperatæ ubertatis, illa mollis facilisque culturæ, nec madida, nec sitiens, illa post vomerem nitescens, qualem fons ingeniorum Homerus in armis à Deo cælatam dixit, addiditque miraculum nigrescentis, quamvis fieret in auro: illa, quam recentem exquirunt improbæ alites vomerem comitantes, corvique aratoris vestigia ipsa rodentes. *Et libro xiv. Proœm.* Arborum omnium peculiaris parens videri potest Italia. Vitium principatus tantum peculiaris Italiae est, ut vel hoc uno omnia gentium vicisse, quanquam odorifera, possit videri bona, quanquam ubicunque pubescentium odori nulla suavitas præferatur. *Et cap. i.* Tot differentias *vitium* vel sola tantum Italia recipit. *Et cap. ii.* Potissima *vitium* nobilitas datur peculiaribus atque vernaculis Italiae. *Et cap. xi.* Subit mentem cum sint genera nobilia, quæ proprie vini intelligi possint, lxxx. fere in toto orbe duas partes ex hoc numero Italiae esse, longe præterea ante cunctas terras. *Et lib. xv. cap. ii.* Et vulgo olei principatum obtinet Italia in toto orbe. *Et libro xviii. cap. vii.* Tritici genera plura, quæ fecere gentes. Italico nullum equidem comparaverim candore & pondere, quo maxime discernitur. Sophocles poeta *tragicus* in fabula Triptolemo ante mortem Alex. magni annis fere cxlv. frumentum Italicum ante cuncta laudavit; ad verbum translata sententia,

Et fortunatam Italiam frumento canescere candido.

Quæ laus peculiaris hodie Italico est. *Et cap. viii.* Ægyptus similaginem conficit è tritico suo, nequaquam Italiae parem. *Et cap. xi.* Alica in Italia laudatissima. fit è zea tusa in pila lignea, nam lapidis duritia conteritur. *Et cap. viii.* Arinca & zea copiosa in Italia. *Et lib. xii. cap. vii.* Piperis arborem Italia habet majorem myrto, nec absimilem. *Et lib. xvi. cap. xxxii.* Vivit in Italia piperis arbor. *Et lib. xii. cap. xxiv.* Cyprum arborem esse quidam dicunt, quæ in Italia ligustrum vocetur. *Et cap. iv.* Hebenum arborem Romæ magnus Pompejus in triumpho Mithridatico ostendit. *Et cap. xxv.* Balsamum arbusculam urbi ostendere Imperatores Vespasiani, clarumque dictu à Pompejo magno in triumpho. Arbores quoque duximus. Servit nunc hæc, & tributa pendet cum gente sua. *Et libro xiii. cap. i.* Unguentorum gloriam Neapolis, Capua & Præneste abstulere Delo, Mendeſio, Corinthio, Cyzico, & Rhodino. *Et cap. iv.* Palmæ in Italia vulgo, sed steriles. *Et lib. xv. cap. xiii.* In peregrinis arboribus dicta sunt Damascena, à Syriæ Damasco cognominata, jampridem in Italia nascentia. Simul dici possunt populares eorum myxæ, quæ & ipsæ nunc cœpere Romæ nasci insitæ forbis. *Et lib. xiii. cap. v.* Pruna in Damasco monte nata & myxa familiares Italiae. *Et lib. xvii. cap. xxii.* Pistacias primus Vitellius in Italiam intulit. *Et lib. xiii. cap. xvii.* Lotos arbor Italiae familiaris, sed terrâ mutata. *Et libro xxxv. cap. xii.* Vasa Samia in esculentis laudantur. Retinet hanc nobilitatem & Aretium in Italia; & calicum tantum Surrentum. Nobilitatur patinis Rhegium & Cumæ. *Hæc etiam Plinius, sed alibi atque alibi.* Lib. xvi. cap. xvii. Est in Apennino frutex, qui vocatur cotinus, ad lineamenta modo conchylii. Laburnum Alpina arbor. Cap. xxxix. Abietes Alpibus Apenninoque laudatissimæ. Cap. xxxvi. Sed in hoc quoque, ut cæteris in rebus, vincit Italia, quando nullus sagittis aptior calamus, quam in Rheno Bononiensi amne, cui plurimum inest medulla, pondusque volucre. Contra flatus quoque pervicax libra. *Et mox:* Est & in Italia nascentis Adarcha nomine, arundo palustris ex cortice tantum sub ipsa coma utilissima dentibus, quoniam vis est eadem, quæ sinapi. *Et lib. xxv. cap. ii.* Æschylus poeta vetustissimus Italiam refertam herbarum potentia prodidit. *Et cap. iv.* Laudatissima herbarum est Homero *teste*, quam vocari ab diis putat molys, & inventionem ejus Mercurio assignat, contraque summa veneficia demonstrat. Inveni è peritis herbarum medicis, qui & in Italia nasci eam dicerent. Lib. xix. cap. iii. Rubia tingendis lanis & coriis necessaria. Laudatissima Italica, & maxime suburbana; & omnes pene provinciæ ea scatent. *Et lib. xxi. cap. ix.* Meliloton, quod fertulam Campanam vocant: in Campania Italiae laudatissima. *Et lib. xix. cap. viii.* Panacea Ligustica in Liguria montibus nascitur. *Et lib. xxvii. cap. xi.* Lithospermo inter omnes herbas nihil mirabilius. Nascitur & in Italia. *Et lib. xxi. cap. vii.* Saliuncam Alpium aprica, urbium Eporedia, gignunt tantæ suavitatis,

tis, ut metallum esse cœperit. Lib. xxv. cap. ix. Hierobotane herba nobilis Romæ nascitur. Et lib. xiii. cap. xxi. Myricen & Italia habet, quam alii tamaricen vocant. Heraclæa, colocasia, melampodium, siue helleborum, & veratrum, & cytissus, & lycopsis, & argentaria herbæ in Italia nascuntur. Tradunt juncum odoratum & in Campania inveniri. Rosæ celeberrimæ Prænestina & Campana. Cappar Italicum innocentius est transmarino. Laus caseo Italiae, & præsertim Romæ: caprimus etiam fit cunctis præferendus. Lana, & lina Italica laudatissima sunt. Conchylium piscis nobilis in Italia capitur. Uniones in nostro mari reperiri solebant. Achates & smaragdus in Sicilia reperiuntur. Syritæ gemmæ in Lucania reperiuntur melleo colore croco resurgentes; intus autem stellas continent languidas. Vejis gemma nascitur nigram materiam habens, distinguente limite albo. In cauitibus Alpium crystallus nascitur laudata in Europa. Speculares lapides sunt in Italia Bononiensi agro. Palmati lapides in Italia sunt, horum auctoritas venit in marmora, sicut Tanarius. Inter plurima alia Italiae miracula, ipsa marmora in lapidicinis crescere auctor est Papyrius Fabianus, naturæ rerum peritissimus. Ex ophite albo vasa, & etiam cados faciunt. Lapis hic in Liguria nascitur. In Comensi agro Italiae lapis nascitur viridis, qui cavatur, tornaturque in vasa coquendis cibis utilia, vel ad esculentorum usus. In Liguria, Umbria & Venetia albus lapis ferrâ secatur. Cotes in Italia aqua trahentes aciem acerrimo effectu. Mola versatilis nusquam utilior, quam in Italia gignitur. Varro lapides albos tornis duriores, quam Parios tradit. Silicem Sabinum fuscum addito oleo lucere. Xenocrates Obsidianum lapidem in Samnio Italiae nasci tradit. In Vulturino mari Italiae arena alba nascens sex m. pas. à littore inter Cumas atque Lucrinum, quæ mollissima est, pila molaque teritur; dein miscetur tribus partibus nitri pondere vel mensura, ac liquata in alias fornaces transfunditur: ibi fit massa, quæ vocatur hammonitrum; atque hæc recoquitur, & fit vitrum purum, ac massa vitri candidi. In generibus æris palma Campano: simile in multis partibus Italiae, provincisque. Sal è stagnis Tarentinis oculis utilis est. Est salissimus, siccissimus, suavissimus omnium, atque candidissimus: ad medicinæ usus ab Antiquis maxime laudatus. Sulphur nascitur in Italia agro Campano. Asini Reatini optimi. Aquæ auxilia malorum conferentes, & vulneribus medentes, multis locis in Italia scaturiunt. Aqua, cui subinde candens ferrum immergitur, nobilitavit Comum in Italia. Et in fine ultimi libri: Ergo in toto orbe, & quacunque cœli convexitas vergit, pulcherrima est omnium, rebusque merito principatum naturæ obtinens Italia, rectrix, parensque mundi altera, viris, feminis, ducibus, militibus, servitiis, artium præstantia, ingeniorumque claritatibus. Jam situ, ac salubritate cœli, atque temperie, accessu cunctarum gentium facili, littoribus portuosus, benigno ventorum afflatu (etenim contingit recurrentis positio in partem utilissimam, & inter ortus occasusque mediam) aquarum copia, nemorum salubritate, montium articulis, ferorum animalium innocentia, soli fertilitate, pabuli ubertate. Quicquid est, quo carere vita non debeat, nusquam est præstantius; fruges, vina, olea, mella, vellera, lana, vestes, iuveni. Ne equos in trigariis præferri ullis vernaculis animadverto. Metallis auri, argenti, æris, ferri, quando libuit exercere, nullis cessit. Et iis nunc in se gravida pro omni dote varios succos & frugum, pomorumque saporibus fundit. Et libro xxxiii. cap. xi. queritur Italiam corruptam esse Asiæ luxuria, barbarosque alia quoque noxia in eam importasse. Qui libro xi. cap. xxv. sic ait: Pphyli, Cyrenæi populi, peregrinis malis implevere Italiam. Scorpiones quoque importare conati sunt, sed vivere intra Siculi cœli regionem non potuerunt. Videntur tamen aliquando in Italia, sed innocui. Et libro xxvi. cap. i. de morbis in Italiam à Barbaris importatis: Lichen, carbunculus, elephantiasis, colum, podagra peregrini sunt. Est & is peregrinus morbus, quem Gallicum vocant.

Quantum credis & ipse, & Maro, & Cato, alique Itali scriptores, Romanique procures, quererentur modo, si Italiam suam, quam tantopere, ut par fuit, & amaverunt, & laudaverunt, & ornaverunt, à temerariis plebejis scriptoribus & adulatione & sermone deformatam, Italosque suos vel ingenuos & optimates Latine linguæ maiestate deserta in vilissimis vulgaribus libellis omne tempus nequicquam terentes, vitamque inertem agentes viderint? Qui (indignum) nullo veri adhibito iudicio, unius, nescio cuius, vani, paludosus, crassus, & maligni ingenii, in quo non doctrina, sed doctrinæ nomen erat, fallaciis capti, non rationi, sed evidenter falsæ & captiosæ opinioni, veluti divino oraculo, fidem adhibent, & vanum ac cæcum ducem sequentes in vanitatis & ignorantie tenebris versantur. Non perpendentes quam malum sit & turpe, ut probe Cicero scribit, & præsertim ingenuis & optimatibus, nescire, ignorare, & decipi, ac vana & vilia sectari. Et præter hæc vulgares scriptores ac lectores non modico dedecori & ignominie sunt Italiae, cum provinciales gravia sectantes cupide & intentissime in Latinam & Græcam linguam incumbant. Aurelius Ruffinus, homo Romanus, Caroli V. miles, in Germania à Philippo, Cattorum, id est, Hassorum, Principe, in bello captus ob Romani nominis reverentiam ab eo in mensam honorifice exceptus est. At cum inter edendum Philippus ipsum Latine interpellaret, & ille se Latine loqui nescire diceret, & ab eo, & ab omnibus, quod sua patria lingua loqui nescisset, delusus, & quidem iure, fuit, eisque contemptui habitus.

Græci quoque, ut ad rem redeam, amplissimum Italiae testimonium reddiderunt. Polybius enim lib. ii. cap. xiv. & xv. ait: Omnis Italia trianguli figuram habet. Latus, quod Orientem

tem spectat, Ionio mari & Sinu Adriatico terminatur. Quod vero ad Meridianam regionem atque Occasum vergit, Siculo & Tyrrheno clauditur pelago. Hæc latera invicem copulata apicem trianguli faciunt: propositum Italiae promontorium, quod Cocinthus incolæ vocant, & Meridianam plagam spectans, Ionium ac Siculum dividit mare. Tertium latus, quod ad gelidissimum Septentrionis axem & mediterranea loca protenditur, terminat continuatio Alpium, quæ à Massilia & locis supra Sardum pelagus sitis incipiens, usque ad intimum Adriatici maris sinum continue extenditur, exiguo quodam spacio in medio relicto. Huic lateri, quod terminari Alpibus dicimus, & quasi trianguli basem intelligimus, à Meridiana regione versus Septentrionem subjacent campi extrema totius Italiae omnis Europæ maximi atque uberrimi. Horum etiam forma triangularis est. Apicem trianguli facit Apennini atque Alpium copulatio non longe à mari Sardoo supra Massiliam. Latus, quod Septentrionem spectat, quemadmodum supra diximus, Alpes faciunt, quæ ad cclxxv. m. p. protenduntur. Latus vero, quod ad Meridiem vergit, perficit Apenninus. Hic ad trecenta atque octoginta tria mil. pass. protenditur. Basis locum tenet littus ipsum maris Adriatici. Hæc trecentorum & tredecim mil. pass. spacio continetur. Ita omnis camporum circuitus mille & ducentis quinquaginta mil. pass. clauditur. De fertilitate hujus regionis haud facile dixerim. Ita enim in omnia frugum genera fecunda est, ut sæpenumero nostra ætate modius frumenti Siculus non amplius quatuor obolis venum ierit; hordei vero non amplius duobus; dolium vini tantundem. Milii præterea & farris tanta copia est, ut opinionem hominum superet. Quam vero glandibus abundet, quæ ex nemoribus ejus regionis diversis in locis producantur, vel in primis testimonio est, quod cum infinitam pene porcorum multitudinem Italici generis homines alant, & ad sacrificia facienda, & ad privatos usus, & ad necessarium exercitiis apparatus, iis omnibus abunde hæc regio subministrat. Jam vero quanta particularium etiam rerum, quæ ad victum hominum spectant, in ea regione copia sit, ex hoc licet intelligere, quod viatores, cum in hospitia divertunt, nunquam de rebus, quas sint accepturi, particulatim paciscuntur, quod cæteris in locis fieri consuevit, sed quantum singuli quique hominesolvere debeant, cum hospitibus conveniunt. Hi viatoribus honorifice acceptis, & omnibus ad victum necessariis subministratis, non amplius, quam siliquam capiunt; hæc oboli tertia pars est, id precium raro excedunt. Hominum vero tanta copia, ea proceritas ac pulchritudo corporum, tantum in rebus bellicis robur, ut facilius sit ex eorum rebus gestis, quam ex cujusquam oratione intelligere. *Et rursus: Italia septies centena millia peditum, equitum ad septuaginta millia armavit. Et Dionysius Halicar. Antiq. Roman. lib. i. cap. xxiii.* Verum, si quis fabulosum illud à sermone auferens, vim regionis & naturam perscrutari velit, ex quo genus hominum à principio plurima statim perceperit oblectamenta, sive ex terra ipsa, uti priscus habet sermo, sive ab alio quovis modo, nullam certe invenias Italia commodiorem. Sicut enim una regio ad aliam comparatur, tantam magnitudinem non Europæ modo, sed orbis quoque reliqui, mea quidem sententia, est optima omnium Italia. Quanquam non me latet multis me visum iri incredibilia dicere, considerantibus Ægyptum, & Africam, & Babylonem, & si qua alia fortunata sunt loca. Verum, ego divitias ex terra, non in uno ponofructuum genere, neque me capit habitationis cupido, in qua pingua sunt tantum arva, aliorum autem nulla sit, aut parva aliqua utilitas, sed quæ satis sit per se, neque multum adventitiis indigens, hanc ego esse optimam judicabo. Hanc vero rerum omnium ubertatem, & emolumenta plurima, non aliam magis terram, quam Italiam habere credo. Non enim pingues habens agros multos caret arboribus, sicuti frugum fertilis. Neque rursus ad alendas plantas idonea, paucarum est ex satione, sicut arborum referta. Neque adhæc utraque potens, minus est pecori idonea, neque ea dicet aliquis frugum fertilem, fecundam arborum, bonamque pecori, inesse autem hominibus sine gratia stationem. Imo vero ea omnis, ut ita dicam, est voluptatis, utilitatisque plenissima. Quæ enim caret fertilitate? Non fluviiis, sed coelestibus imbribus irrigatus is, qui Campanus ager dicitur, ubi ego trium fructuum culturas vidi, æstivum quidem, post hybernum, autumnale post æstivum semen nutrientes. Quæ enim caret olearum ubertate Messapiorum, & Dauniorum, & Sabinorum, multorumque agricolatio? Quibus caret vineæ Hetruria, Albanaque & Falerna regio? Mirum est profecto quam diligat vites, & quam minimo labore facilis sit ad ferendum plurimos simul & optimos fructus. Præter arva autem, quam multam invenies dimissam ovibus regionem, quam multam capris, majorem autem admirabilioremque bobus & equis: palustris enim & pratorum herba copiosissima, novales roscidæ, & campi perflui, ita ut sint etiam æstate pascui, exhibeantque greges semper perficientes. Inter cætera autem, querceta sunt & sylvæ mirabiles circa rupes, saltusque & incultos colles, ex quibus multum quidem cum sit ad fabricandas naves materiæ & facultatis, multum quoque ad reliqua opera opportunitatis, nulla pars harum neque invia, neque ab usu hominum procul posita, sed operosa sunt omnia, & advectu facilia propter fluminum multitudinem, quæ regionem permeant, faciuntque invectiones fructuum & commercia percommoda. Habet quoque regio ipsa latices aquarum calidarum in multis repertos locis balneas præbere suavissimas, atque morbis diuturnis

nis fanandis optimas. Habet omnis generis metalla, & ferarum venationes copiosas, & naturam maris piscosam. Aliaque habet innumera, alia percommoda, alia mirabilia. Verum omnium pulcherrimum eam habet aeris temperiem ad tempora proportionabiliter, ut nec excessu frigoris, nec caloribus intensis fructuum proventum lædat, neve animalium propagationem, ut minime mirum sit opinatos Priscos hanc terram Saturno sacram, cum hunc divum putarent esse hominibus felicitatis omnis largitorem & perfectorem; (sive Chronon vocari oportet ipsum, ut Græci volunt, sive Cronum, vel Saturnum, ut Romani, omnem mundi comprehendentem naturam, utrovis nomine quis eum vocet) videntes autem homines regionem plenam omnis copię, gratięque, quam appetit mortale genus, volentesque oblationem divinoque & humano generi esse locorum omnium aptissimam, montes & saltus dicarunt Pani, prata Nymphis, & loca virentia, littoraque & insulas Diis marinis, & alia quoque, ut erat cuique deorum & geniorum congruum. *Item Strabo lib. v. de Italię forma plura, atque præter cætera ait: Ut autem summatim dicam, Italia pecorum & frugum præstantissima nutrix est. Cæteræ partes aliis atque aliis in rebus principatum adipiscuntur. Et lib. vi. Hujus generis, hujusque magnitudinis Italia est, cum multa à nobis disputata sint, nunc amplissima significamus, quibus hoc tempore ad tantum majestatis fastigium res Romana conscenderit. Unum quidem quod instar insulæ tutam in circuitu maria custodiant, paucis exceptis partibus, quæ tamen inaccesis, uti muro, montibus vallatæ sunt. Secundum est maxima ex parte ipsius importuositas, & quod Siculi portus existunt magnitudine & excellentia mirabiles adsint adversus externorum impetus commodi. Nec minus ad inferendas incursiones, quam ad ipsam mercaturæ, commoditatem & abundantiam. Tertium aeris universi temperies, cui subjacet. Ad quam varietatem animalia, arbores, & ut paucis simpliciter dicam, cuncta, quibus utilissimus mortalibus victus suppeditatur, plurimam diversitatem habent, sive bonum, sive malum dixeris. Ipsius longitudo à Septentrione in Meridiem ut plurimum extenditur. Cujus longitudinis additamentum est Sicilia, talis & tanta perinde ac ejus pars esset. Aeris temperies & intemperantia pro caloris & frigoris & horum mediocritatis conditione dijudicatur. Itaque cum tanta longitudine, qua nunc est Italia, eam in amborum excessuum medio jacentem, plurimam temperate conditionem continere necesse est, modisque plurimis. Id etiam alio ibi pacto contingit, nam cum montes Apennini perpetua longitudine porrigantur, cumque latus utrumque campos & colles frugiferos emittat, nulla pars exstat, cui non montanis & campestribus bonis frui contingat. Adde fluviorum magnitudinem & copiam. Ad hæc frigidarum & calidarum scaturigines aquarum, quas ad mortalium salutem parens natura compluribus in locis comparavit. Quid diversorum facultates metallorum? Quid materiam atque escas hominibus ac pecoribus attributas? Quis fructuum ubertatem atque bonitatem pro dignitate differat? Inter gentes quidem amplissimas, & Græciam ipsam, & excellentissimas Asiæ partes media consistens, virtutis præstantia & amplitudine ad circumstantibus imperandum nata est ex vicinitate subjugandorum facultatem nata. *Budeus libro v. de Asse, Italiam bonarum literarum magistrā vocat. Et rursus Italiam omnium gentium magistrā appellat. Et præter eas nobiles herbas, quas Plinius in Italia nasci scribit, alias quoque claras atque optimas in ea provenire Græci auctores tradunt. Dioscorides nardum Celticam, & terrestres cochleas medicæ artis usibus probatissimas in Liguria Alpibus nasci prodit. Avicenna, Mesue, cæterique medici, Romanas Italasque anisum, & absinthium, & gentianam, & pæoniam, & spicam laudant, scordiumque Italicum odoratius esse Cretensi asserunt. Democritus laudat stivium Italicum, Geber laudat vitriolum Romanum. Item Galenus libro i. Antid. ait: Multa medicamenta per ipsam Italiam partim sponte nascuntur, partim arte fiunt, veluti Dicearchiæ, Puteoli nunc dictæ, ærugo, cerussa, æs, æris squamma, & quædam alia, & Romæ lithargyrium, hoc est, argenti spuma. Et rursus: Nullus Romæ unguentarius exstat, qui Creta allatas herbas, & ipsarum femina non agnoscat. At in suburbanis urbis non paucas ex ipsis nascentes prorsus ignorant. Idcirco nec quo tempore semen ferant, observant. Ipse vero & chamæpityn, & chamædryn, & thlaspin, & centauream, & hipericum, & polium, & id genus herbas alias Romæ vidi, quas observato tempore, quo vigent, neque æstivo sole arefactas, nec citius, quam par fuit, evulsas, collegi nondum concoctis feminibus aut maturis. Et rursus: Polium & chamædryn duo hæc Romam afferuntur natis in Italia parum meliora. In aliquot siquidem Italiæ locis haud multum deteriora proveniunt illis annis, quorum universum ver humidum non fuerit. Sed sicuti sæpe contingit æstivo tempori simile. Quod si veris constitutio ficcior obvenerit, multa, quæ in Italia nascuntur, pluribus Creta allatis paria erunt, veluti chamædryn, chamæpityn, hipericon, gentiana, thlaspis, helleborus niger, & id genus alia. Et rursus: Romæ siquidem in suburbanis prædiis, & chamæpityn, & chamædryn repperi multo plus redolentes, quam Creta advectas, si tamen continuis imbribus obrutæ non fuerint. Et alibi: Oleum Sabinum optimum est, quod tenuissimum sit. Et Athenæus libro iii. Laudantur ficus, quæ Romæ nascuntur, Callistruthiæ, & alia ficuum genera, velut Chia, Calcidica, & Africana dicta, sicut Herodotus Lycius in commentario suo de ficibus scriptum reliquit. Theodoricus rex in epistola, quæ est ad Theonem, apud Cassiodorum lib. i. Epistolarum, conchylium in Hydruntino mari nasci ostendit. Et præter hæc, quæ ab his Auctoribus commemorata sunt, alia quoque pleraque in Italia aut nascuntur, aut fiunt. Nam terebinthus, platanus, vitex, cedrus, oleander, siliqua silvestris, crocus silvestris sponte in Italia nascun-**

nascuntur. Siliqua sativa multis locis in Italia est. Palma & Romæ & alibi in Italia frugifera sunt, & fructus maturescunt. Frugifera arbores multigena sunt, & harum quædam biferæ, vitæ vero etiam triferæ & quatriferæ. Exstant & glandiferarum arborum omnis generis sylva. Item omnis generis sylvestrium arborum sylva, quæ igni, navibus fabricandis, tectorum tignis, domorum utensilibus conficiendis uberem ac præstantissimam materiam suggerunt. Aucupia omnis generis alitum, & venationes itidem omnis generis sylvestrium animalium esui accommodatorum perpulchræ fiunt. Thynnorum captura ingens fit, qui sale in cadis condiuntur. Fiunt & pulchra cepurica oleraque. Exstant & passim balnea salubria, ac fontes falsam aquam scaturientes, ex qua fit muries. Fiunt & saccharum, crocus, coriandrum, cardamomum, fœnogræcum, cuminum, sesama, gossipium, sericum, panni nobiles lanei, linei, gossipini, & sericei, & figulina vasa præcipua. Nascitur marmor, alabastrites, gypsum, sal fossile, lapis ophites, lapis specularis, lapis obsidianus, lapis molaris, cos aquatia, silex, smiris, magnesias, pumex, gagates, gagites sive ætites, beryllus, crystallus, chalcantum, sive atramentum, rubrica Synopica, sive bolum, rubrica fabrilis, synopes, stibium, hæmatites, alumen, sulphur, corallus, agaricum, fit pix, legitur manna. Herbarum quoque nobilium medicæ artis usibus referta est Italia. Nam præter eas, quas Plinius, Dioscorides, & Galenus in Italia nasci scribunt, proveniunt & tragium, pseudodictamum, radix Rhodia, radix Idea, meum, rhaponticum, iris, panax, Esclepei, Chironica, & heraclea opopanacem gummi fundens, pixacantha, plantæ, quæ styracem & dragacantham gummi sudant, nardus montana, nardus Celtica, aliaque innumeræ nobiles herbæ, ut minimum Cretæ aliisque regionibus invideat Italia. Planta, quæ styracem fundit, provenit in Latio agro Tyburtino, baccas fert colore cæruleo, quibus capræ vescuntur, flores emittit candidos. Nobilitatur & felici illo Apennino monte, qui ab Alpibus perpetuis jugis Rhegium usque protenditur, in quo omnia bona nascuntur. Curæ esse debet singularum Italiæ regionum primatibus ac potentibus conterraneos suos eruditos viros diligere, qui regionem quisque suam accurate & fideliter scribant, & quæ à vetustis auctoribus dicta sint, & quæ regio gignat perscrutantes. Sicut ego de Calabria feci, ut inde unum totius Italiæ volumen conficiatur. Nam haud dubium quidem multa memoratu digna gignit Italia priscis auctoribus ignota. Illis autem herbis, quæ sponte in Italia non erumpunt, minime egeremus, si desidia abesset, sed illis instrueremus hortos. Quandoquidem piperis arborem in Italia, & cassiæ, & thuris, & myrrhæ, & hebeni, & balsami, & pistaciæ, & myxæ plantas Romæ fuisse ostendimus. Citrus, ait Plinius, nonnisi apud Medos, & in Perside nasci volebat, Palladii tempore, Neapoli tantum, ut ipse scribit, erat, nunc ea referta est Italia. Item Armeniacus, Persicus, prunus Damascena, cerasus, tuber, zizipha, mespilus, tricocus, peregrinæ plantæ sunt. Cannæ, ex quibus fit saccharum, crocus, sesama, gossipium, bombyces, qui sericum conficiunt, aliunde in Italiam advehi sunt. Quod Italia, ut probe Columella ait, curæ mortalium obsequentissima sit. Naphtam, Asphaltum in Italia esse quidam tradunt. Habuit & Italia suum Herculem & Achillem. Nam Rusticellus homo Romanus ob prodigiosas vires Hercules est appellatus. Is, ait Varro apud Plinium lib. vii. cap. xx. mulum suum tollebat. Licinius Sicinius Dentatus, ut auctor est Gellius libro ii. cap. xi. ingentis fortitudinis vir fuit, qui centies & vigesies cum hoste congressus est, & nec ullum vulnus aversum accepit, adversa vero quadraginta quinque tulit: quare Romanus Achilles est nuncupatus, de quo plura Plinius lib. vii. cap. xxviii. Aulus Junius Valens, ait Plinius lib. cit. cap. xx. vehicula cum culeis onusta, donec exinanirentur, sustinere solitus est. Carpentia comprehensa una manu retinere obnixius contra nitentibus jumentis. Et alia mirifica fecit. Fufius Salvius, ait idem ibidem, duo centenaria pondera pedibus, totidem manibus, & ducentaria duo humeris contra scalas ferebat. Scæva, ait Suetonius in Cæsare cap. lxxviii. excusso oculo, transfixus femore & humero centum & viginti ictibus scuto perforato, custodiam portæ commissi castelli obtinuit. Milo Crotoniata, ait Solinus cap. iv. omnia egit supra quam homo valet. Cum constitisset nemo eum vestigio educebat. Malum tenenti nemo digitum corripiebat. Cucurrit biduo centum quinquaginta mil. pass. ab Athenis Lacedæmonem. Taurum quadrimum ictu nudæ dextræ occidit, & humeris sustollens stadii spatium portavit, eumque eodem die comedit, unde proverbium, Bovem in faucibus portat. Plinius lib. vii. cap. xx. Ægon Crotoniata ungulas à tauris viventibus avellebat, & eos humeris sustollebat, in montes currens tauros superabat. Euthymus Locrensis semper Olympiæ victor, ac vivus consecratus, in deorumque numerum relatus. Tritanus gladiator ex Samnio, ait Varro apud Solinum cap. iv. rectis & transversis nervis non modo crate pectoris, sed & manibus cancellatis & brachiis omnes adversarios levi tactu ac pene securis congressionibus vicit. Ejusque filius, miles Cn. Pompeji, pari modo natus, ita sprexit hostem provocantem, ut inermi eum dextra & superaret, & captum digito uno in castra Imperatoris sui reportaret. Demum Itali parva manu, ut dixi, magnos externarum gentium exercitus superarunt. Sic & singuli singulos, bini binos, demi denos & pedestri & equestri pugna semper vicerunt. Nam si pauci superant multos, certe terni ternos. Ex decem Sibyllis tres Italiæ fuere, ut Lactantius ait Inst. Divin. lib. i. cap. vi. scilicet Cumæa, Amalthæa, & Albunea. Longum esset omnes clarissimos viros Italos, qui omni scientiarum atque artium genere, item sanctitate floruerunt, recensere.

Hæ sunt Italiæ laudes. Quæ fausta, felix, fortunataque regio naturæ manibus fabricata, & ad imperandum aliis, & ad illos adjuvandum nata est. Quare meminisse perquam velim Italos meos, se eos esse, qui Romana virtute duce & auspice Barbaris gloriose imperare, non turpiter servire soliti sint. Quod si quid horum, quæ humanæ vitæ sunt necessaria, deesse nobis videtur, id non

Italo felici & perbeato solo, quasi infrugifero & infæcundo, cum sit feracissimum, tribuendum est, sed inertia. Nam agricultura veluti vile & sordidum opus adeo negligitur, ut ei parum operæ infumatur. Cum, ut gnare Cicero Offic. libro 1. cap. 42. scribit, omnium rerum, ex quibus aliquid acquiritur, nihil est agricultura melius, nil uberius, nil dulcius, nil libero homine dignius. Et Xenophon, in Catone majore Ciceronis cap. 17. nihil sibi tam regale videri ajebat, quam studium agri colendi. Et Cyrum regem Persarum præstantem ingenio atque Imperii gloria manu sua arbores servasse, agriculturamque exercuisse, ait. Jam vero, ait Gellius, iis, qui per desidiam feracem agrum sinebant sterilefcere, censoria nota inurebatur. Et Scipio Nasica petitiæ adilitatis repulsam est passus, quod adolescentem competitorem, cui erant rustico opere duratæ manus, quasi illudens interrogasset, nunquid manibus incederet. Attilius Calatinus & L. Quintus Cincinnatus, præter alios, ex agris acciti salutem publicam pepererunt. Quocirca cum virum bonum laudarent, ita, ait Cato, laudare solitos, bonum agricolam, bonumque colonum. Non enim, ait Columella Præf. lib. 1. ex agrorum infœcunditate, aut cœli per multa jam tempora noxia frugibus intemperie, nec quod ubertate nimia prioris ævi defatigati & effœti nequirent pristina benignitate præbere mortalibus alimenta. Cum neque fas sit existimare humi naturam, quam primus ille mundi genitor perpetua fœcunditate donavit, quasi quodam morbo sterilitate affectam, neque prudentis est credere, tellurem, quæ divinam & æternam juventam sortita, communis omnium parens dicta sit, quia & cuncta peperit semper, & deinceps paritura sit, velut hominem consensuisse. Nec post hæc reor intemperantia cœli nobis ista, sed nostro potius accidere vitio, qui rem rusticam pessimo cuique fervorum, velut carnifici, noxiæ dedimus, quam majorum nostrorum optimus quisque optime tractaverit. Cum sine dubitatione proxima, & quasi consanguinea sit sapientiæ, ac sine agricultoribus nec consistere mortales, nec ali nequeant. Nunc quasi sordidum opus tam discentibus eget, quam magistris. Et (ut M. Varro conquestus est) omnes patresfamilia, falce & aratro relictis, intra murum correpimus, & in circis potius ac theatris, quam segetibus & vinetis manum movemus: attonitique miramur gestus effeminatorum, quod à natura sexum viris denegatum muliebri motu mentiantur, decipiantque oculos spectantium. Mox deinde ut apti veniamus ad ganeas, quotidianam cruditatem Laconicis excoquimus, & exusto sudore sitim quærimus, noctesque libidinibus & ebrietatibus, dies ludo, vel somno consumimus. Ac nos ipsos ducimus fortunatos, quod nec Orientem solem videmus, nec Occidentem: itaque istam vitam socordem persequitur valetudo. Nam sic juvenum corpora fluxa & resoluta sunt, ut nihil mors mutatura videatur. At Mehercule vera illa Romuli proles assiduis venatibus, nec minus agrestibus operibus exercitata, firmissimis prævaluit corporibus, ac militiæ belli, cum res postulavit, facile sustinuit, durata pacis laboribus, semperque rusticam plebem præposuit Urbanæ. Et nonis tantummodo diebus Urbanæ res agebantur, unde & ob id nundinarum conventus instituti sunt, reliquis rusticæ administrabantur. Et segniores habebantur ii, qui sub umbra civitatis intra mœnia desides cunctabantur. Contra qui rura colebant & colonorum opera administrarent, quibus temporibus procures civitatis in agris morabantur: & cum consilium publicum desiderabatur, à villis accersebantur in Senatum. Ex quo qui eos evocabant, Viatores nominati sunt. Isque mos dum servatus est, perseverantissimo colendorum agrorum studio veteres illi Sabini Quirites, atavique Romani, quanquam inter ferrum & ignes hosticisque incursionibus vastatæ fruges, largius tamen condidere, quam nos, quibus diuturna permittente pace prolatare licuit rem rusticam. Itaque in hoc Latio & Saturnia terra, ubi dii cultus agrorum progeniem suam docuerant, ibi nunc ad hastam locamus, ut nobis ex transmarinis provinciis advehatur frumentum, ne famine laboremus; & vindemias condimus ex insulis Cycladibus, ac regionibus Ibericis, Gallicisque. Et libro VIII. cap. XVI. Magni enim æstimabat vetus illa Romuli & Numæ rustica progenies, si Urbanæ vitæ compararetur villatica, nulla parte copiarum defici. Quæritur Varro, quod præter cætera, in qua terra culturam agrorum docuerunt pastores progeniem suam, qui condiderunt urbem, ibi contra progenies eorum propter avaritiam contra leges, ex segetibus fecit prata, ignorantes non idem esse agriculturam & pastionem. Et quidem Romulus, ait Dionysius Halicar. Antiq. Rom. lib. II. cap. LXXIII. sedentarias & sordidas, cupiditatumque adjunctrices artes tanquam dirumpentes delentesque corpus & animum exercitium, feryis & advenis tractandas exhibuit. Duo vero tantum studia reliquit liberis, agriculturam & belli artes.

Hæc pauca de laudibus Italiæ dicenda mihi visa fuere.

F I N I S.

S E R I E S S C R I P T O R V M,
Qui in primo Tomo Thesauri Antiquitatum Italiae
inveniuntur.

P A R S P R I O R.



abriel Barrius <i>de Laudibus Italiae</i> , Exstat in Praefat.	Pag. (9)
Petri Leonis Casellae <i>de Primis Italiae Colonis Liber.</i>	I
Jacobi Bracellii, Genuensium a Secretis, <i>Orae Ligusticae Descriptio.</i>	49
--- De Claris Genuensibus Libellus.	57
Gaudentii Merulae <i>de Gallorum Cisalpinorum antiquitate ac origine Libri III. novis annotationibus expoliti & aucti.</i>	65
Bonaventurae Castillionei, Mediolanensis, <i>de Gallorum Insubrum antiquis sedibus Liber.</i>	161
Vberti Folietae Patritii Genuensis, <i>Historiae Genuensium Libri XII. auctor & emendator.</i>	201

P A R S P O S T E R I O R.

Vberti Folietae, <i>Clarorum Ligurum Elogia. Juxta postremam Editionem, Romae MDLXXVII. ceteris auctiorem ac emendatiorem, paucisque visam; quippe cujus nulla sit mentio in Catalog. celebriorum Bibliothecarum.</i>	745
--- Conjuratio Joannis Ludovici Flisci.	877
--- Tumultus Neapolitani.	899
--- Caedes Petri Ludovici Farnesii, Placentiae Ducis, ex universa historia Rerum Europae suorum temporum.	929
--- De Sacro Foedere in Selimum Libri IV.	937
--- Ejusdem variae Expeditiones in Africam, cum Obsidione Melitae.	1091
--- Opuscula nonnulla varii Argumenti: nempe	
--- De Ratione Scribendae Historiae.	1189
--- Tyburtinum Hippolyti Cardinalis Ferrariensis.	1217
--- Brumanus, sive de Laudibus Urbis Neapolis, & alia ejusdem Auctoris.	1225
Jacobi Bracellii <i>de Bello, quod inter Hispanos & Genuenses seculo suo gestum, Libri v. Additum est Diploma mirae antiquitatis Tabellae in Agro Genuensi repertae.</i>	1261
Jacobi Bonfadii <i>Annalium Genuensium ab anno MDXXVII. (in quo desinit Vbertus Folietae) recuperatae libertatis usque ad annum MDL. Libri v. in lucem editi a Bartholomaeo Paschetto, in hac vero postrema Editione ab innumeris mendis repurgati.</i>	1323
Hieronymi de Marinis, Patritii Genuensis, <i>Genua, sive Dominii, Gubernationis, Potentiae, Dignitatis, Serenissimae Reipublicae Genuensis, compendiaria descriptio.</i>	1411
Petri Bizari <i>perbrevis Dissertatio de Universo Reipubl. Genuensis statu & administratione.</i>	1451
--- Reipublicae Genuensis Leges Novae, a Legatis Summi Pontificis, Caesaris & Regis Catholici, in quos per Rempublicam collata fuerit auctoritas, conditae; & Genuae die XVII. Martii M. D. LXXVI. publicatae, ac in lucem editae a Petro Bizaro.	1467


PETRI LEONIS CASELLAE

D E P R I M I S

I T A L I A E
C O L O N I S

L I B E R.

THOMAE LATINO C A S E L L A.

TRURIAM uno in libello, quem tuo inscripsi nomini, Italiae auctarium noram ab origine. Italia itaque tibi adaucta ex integro tibi inscribitur : ut si quid in hocce opere relegi dignum Lector animadverterit, mea opera tibi gratias agat. Et utinam in millibus ego tibi, qui mihi unus es pro millibus, & in singulis omnia optime meritus.

PETRI LEONIS CASELLAE

DE PRIMIS

ITALIAE
COLONIS

LIBER.



ITALIAM ab origine incolere Aborigines, Jani admonitu, Comero Duce, huc præmissi coloni. Naves dixeris sensiles, quæ coelestium numine, afflantibus auris, prælucentibus stellis, vasta & varia commissos sibi prætervexere per maria. Advenit & Janus placida exceptus Tiberis vehitura, quicum novi Aborigines. Advenit & Vesta mari supero ad Aterni ostia, cui montana magis & illius fluminis placuere fontes: ab ea Vestini. Supervenit deinceps Sabatius, eo ipse divino deditus cultui: unde & Saga dictus est, & ab eo Sabini, & Curetes: & ultra Tiberim Tusci, Sagi, & Vehi. Janus enim figendarum sedium locum delegit, & sibi eundem juxta flumen, ubi deinceps Roma à primordiis Regina gentium, quod hæc præfideret senissimus populorum Pater, & Rex. Hæc itaque, sicut ego accepi, in historiam pro virili disponam, ita ut legenti exposita & enucleata appareant. Proinde Vestinorum Regia, Amiternum certe à loci situ sic appellatum, licet conditorem antiquitatis monumenta litteris non prodant: indicio tamen sunt ingenue nobilitatis, & gentis originem adserunt vetustissimam. Sic quæ profanos non admisit intuitus, suo ipsa in lumine Vesta latet. Ea fuit Aretia Jani, qui & Noe uxor inter Janigenas mater, & Regina prædens, quæ sempiternum sacrificiorum ignem delectis credidit Virginibus, ex hujusmodi cura, disciplinaque Vestalibus clarissimi semper in Italia nominis.

Cæterum de adventu Jani ita majores ratiocinantur, ut factum adstruant anno post Diluvium cVIII. qui & xxiii. ante Regnum Babylonicum, & Turrim illam, in qua linguarum confusio facta est. Deinde ad disponendas colonias orbem terrarum peragraturos ratem solvit: huc redeundi tamen concepta spe, ubi jam senior requiem sibi delegerat: quod hæc Regio Reginam suo in solio orbi præsentem in stola (si orbis situm advertas) repræsentat Europam, cujus Italia brachium dextrum, quæ coronatam sustinens tripodem sospitibus & hospitalibus offerat Diis. Tripodem autem ipsa est Sicilia, quæ & penus & horreum. Ea igitur figura nihil optatius magis optimo Regi, sanctissimo Patrifamilias. Ager vero is est, qualem laboriosior & industrior agricola exoptaret, idemque probaret, ubertate omnigena colono, quantumvis avido, & hero exultiori exuberans: laudaturque in libris Sibyllinis, & ager, & agricola populus hoc elogio:

*Omnibus copiis quas annus fert affluens,
Et vita illis decenter jucundissima.*

Interim præmiserat in Italiam Janus Cranum, & Cranam, quæ & Carnia, & Crania, filios natu maximos, & eorundem subcrecentem sobolem, cum Comero Gallo, & ejusdem filiis ex Japeti genere. Comerus itaque regionem suo de nomine cognominat Comeram, urbes certas per stationes curribus designat mobiles, populum legibus & justitia instruit. Hi itaque in Italia Janigenarum Principes, conditores urbium, patres populorum. Janigenæ humanum

quidem genus omne: sed Itali & Armeni tantum hoc recensentur nomine, ex quibus Griphonii advenere MLXXXIII. post annum, & perbenigne ab Aurano suscepti, sedes juxta nostrates adepti leguntur; sed liber is alienam per imposturam non integra fide legitur. At nos quæ in rem nostram faciunt, ea per irrefragabilia auctorum testimonia confirmata certa fide contestabimur. Quæ vero de eorundem locorum nominibus perpetuo testimonio probabilia erunt, probabilia allegabimus: in reliquis vero ab alienis mendaciis nostram fidem sincere vindicabimus.

Sed priores in Italia Janigenæ: postremo potissimum loco geniti Cranus & Crana, & eorum posteritas hoc peculiari titulo & paterna dilectione nobilissimi gentium. Hi quod adulterinum intra suos non admiserint genus, quod nuptias benedictione celebraverint, & quod per benedictionem fecundissimi multiplicarint; quod Cranus puer Camillus patri, Crania Virguncula delicata matri, uterque sacrificantibus ministri parentibus adessent, & in domestico obsequio assidui. Hi amor & delictum, qui & senectutis filii, qui parentes moribus, & vultu, ac pietatis referrent studio, & in educandis liberis amanti excubarent severitate pervigiles, eoque ad concordiam, & laborem, ad virtutem, & religionem quasi ad certum instruerent patrimonium. Hi itaque posito altari, coronatis laribus, & quæ pro laribus, domi aderant instrumenta ad focum, quæ & alibi constitutos pharos dicas, & candelabra. Hi generosiores in dies, geminata soboles, masculi scilicet, & femellæ certo anni tempore. Sed & eadem soboles cum adolevisset, in idem conveniebant matrimonii vinculum, germanitate, iisdem natalibus, & morum similitudine probatum. Unde Cranus & Crana primum, deinde, ut etymon in his Italiæ appareat, Thalys & Thalia appellati ætate florentes scilicet compares. Hæc in Janigenis Vestinis prænomina perseverarunt, & Thalassionem, id est, auspiciatam, germanam, perennem, adæquatam, viri & uxoris concordiam in nuptiis legimus, & repetitam optionis vocem genialem circa thalamum. Itaque ipsum in Italo vocis etymon divinum denotat genus. Neque enim à Græcis exteris exquirenda nostri sermonis significatio est. Græcis sua commenta superabundent licet: nos quidem & bobus utimur, & eorum generositatem exercemus perutilem. Neque incongruum est in hujusmodi explicationibus immorari, cum nostri instituti sit primo loco de Originibus tractare.

At humani generis ea constitutio est, ut hominem esse solum non probaret hominum artifex, & omnium arbiter Deus, qui soporato homini costam tulit, eamque in mulierem ædificavit illis in verbis, ad luculentissimum facti testimonium usus, *Et erunt duo in carne una*. Is idem post Diluvium, Noeti, & uxori, & filiis, & uxoribus eorum (in quibus humani generis emissariis præservatum est genus) multiplicationis gratia benedixit. Quare Noetis posterum in hujusmodi, & unitatis, & communionis opportunam necessitatem, symbolum voluere, quod diximus domesticum in laribus, qui ligna ad ignem supposita sustinent, in quibus alii Janum, & Vesta

stam intellexerunt : alii vero Cranum, & Cranam : in sobole enim ratio conjugii constat, & vitæ communio ab ipso principio, & lucis exordio, continuata vicissitudine in sequelam perpetuitatis. Quamobrem lares ipsos Solem & Lunam interpretati sunt, qui à Dei cultu recedentes, & ad creaturarum idololatricam transeuntes, de pietatis semita declinarunt : immo & masculos voluere utrosque, quasi ad masculam virtutis gloriam nuncupatos, qui, & numina, & nomina ad Deitatis multiplicationem pro libito commenti sunt : ita ut in Picumno virum, in Pilumno vero uxorem designarent : quorum concordia & diligentia fit, ut in communione victus nihil unquam desit, dum vir viriliter comparat, & congregat in penu : uxor vero viriliter distribuit ad quotidianum victum, apponens quod sufficiat, & ad communis foci fragorem, quod nidore suo domum odoret, & viciniam : ne quis negligentiores homines ibidem incolas desides arguat, eos intra parietes, infra hominum virtutes flocci, & nauci, & proinde qui viri sunt & rite, & sobrie, & hilariter, epulantibus, & divinis in laudibus hymnos concinentes aderant, Caji filii scilicet, ad cumulanda parentum gaudia progeniti, coronati floribus. Deo itaque primum sacrificare, deinde etiam majoribus suis libare generosissimæ Italiæ conditores didicere : deinde & docere publice, & privatim, ita ut antiquius haberent nihil.

Quamobrem domestica in ara, privatis in ædibus, Paterfamilias, quasi Rex sacrificulus, sacra faceret, & familiaribus epulum daret, & majorum exempla ad excitandam in junioribus æmulationem per virtutes referebat : exinde Axamenta, præcinens ipse idem chori magister apophoreta, tandem largiebatur generosus munerarius in circulo pietatis & lætitiæ conventu.

Hucusque de Italiæ conditoribus, nec dum satis, quos Patres patrum merito recolit Italia. In ea primum Umbri intercogniti quasi cataclysmi fontes, & voragine subsidentia adhuc trepidi devitent loca, editiora incolere, in cavernis, camerisve : deinde etiam, & domicilia habere, & vicos, & oppida, & urbes per apricos colles, & convalles uberes. Turris vero pro metropoli in campestri construebatur media, quo munita omnino refugii arcem haberent : quin imo, & pro temporis, & locorum opportunitate prioribus uti vehiculis, has curules diceret domos, rotabilesve arceras, testas undique quasi arcas. Quod infra sub solarario quidem stabulum jugarum, & pecoris, supra vero distributis officinis domus esset tabernaculo, & tensis. Sed & loca inaccessa, sive in montanis, sive in palustribus, qualis Issa insula describitur : quæ enim natura ipsa munitiora sunt, ea succedunt laboriosiores, aut vado penetrant, quod eis LABORVM RELEVAMEN SECVRITAS.

Quamobrem uberrimi in planicie agri, tanquam in arena consistere, loca communire mœnibus, & armis, & consilio rem tueri publicam instructiores didicere, & pro patria ferro decernunt fortiter. His artibus Aborigines indigenæ reputantur, & eorum urbes ccc. numero novit Plinius, & Strabo ex lectione plurima hæc de Aboriginibus indigetibus ex Italia lib. v. & xiv. & alibi. Hi primum in montanis passim sine mœnibus vicatim habitaverunt. Sed postquam Pelasgi, & cæterorum Græcorum ipsis admixti opem in debellandis finitimis tulerunt, exacta inde Sicula gente, oppida crebra munierunt, subigeruntque sibi totum id terrarum spatium, quod amnes duo Liris & Tiberis terminant. Hi orti ex imis Apennini montibus Italiæ, quam maxime longa est, secantibus mediam, erumpunt in Tyrrhenum pelagus, dccc. fere stadiorum inter utriusque ostium interstitio. Horum Tiberis à Septentrione prope Ostiam urbem se exonerat : à meridiano tractu Liris Minturnam alluit, ambas Romanorum Colonias. Eas sedes perpetuo tenuit IDEM GENVS HOMINVM : INDIGETES scilicet, mu-

tatis tantum appellationibus vetus Aboriginum nomen servantes. Et post pauca : Cæterum Aborigines auctores Romani generis, Italiæ indigenas alii, siueque corporis gentem adserunt, (ITALIAM VOCO GENTEM ILLAM OMNEM quantum Jonius, & Tyrrhenus sinus, tertiaque ab continenti terra amplectitur Alpes) nomen eis inde ajunt impositum, quod posteris suis originis ab se fuerint auctores. De Liguribus vero fabulantes rejicit. Et idem post pauca : Ex Antiochi Syracusani contestatione, & Antiochi Xenophanis testimonio, & vetustis monumentis, & ipse in eandem sententiam adstipulatur. Terram hanc, quæ nunc Italia dicitur, olim tenuere Oenotrii : deinde commemoratis eorum moribus, ac forma Reipub. & quod Regnum tandem Italo delatum est, & ab eo denominatam Italiam : Morgetemque huic successisse, à quo Morgetes sint vocati : & quia Siculus à Morgete hospitio sit exceptus, proprium principatum in ea gente constituerit. Tunc hæc subjicit : Oenotrium, Lycaonis filium xii. ex Arcadia novas sedes quærere compulsus, una cum Peucetio in Italiam venit, & à Peucetio in Italis Peucetii.

En quot Græci, tot etiam commenta : his adde etiam quotquot in Herodoti verba jurati historias scriptitarunt. Nam & sub Umbrorum nomine Aborigines, immo omnem, quanta in Montanis Italia est, comprehensam volunt : invidiane an oscitantia incertum, falso tamen. Qua oblata lectoribus offa, universam confundunt Italiam : in Græcorum colonias confarreatam ut credant. Et quidem rationalis, si qui alienam rem deperditum eat, eandem primum intervertat, tum quasi decoctam abliguriat. At ego te, Apennine, inconcussæ auctoritatis Patrem appello Judicem, qui primus ab origine cognitos hospites, & incolas à diluvii vorticibus fugientes, tua sub juga, quibus cælo proximus es, tuas intra cameras excepisti. Unde si quando egredi ausi sint, & ad victus necessitatem terram colere, tum demum Umbros appellatos, eodem sub Comero Gallo Duce, eodem, inquam, tempore, eundem, inquam, populum diverso nuncupatum nomine, Aborigines scilicet & Umbros. Quorum omnium magno malo Camefenuus huc adveniens obtinuit pene omnia : obtriveratque morum corruptor, blasphemus, exlex, matrimoniorum violator, absente Jano, absente item Comero ; qui tamen cum rediret, Crano, & Crana, & eorum posteritate adjutus, de Jani præcepto omni tandem Camefenum populere Italia. Sed & ejusdem sectæ convenam, & advenam, populum & corruptos Comeros in Montanis coercuere secundum Apennini sinus : intra tamen Umbros, Sabinosve : exinde Montanos ex origine, & commixtione agnoscas Aborigines inclusos, & segregatim ab eisdem incorruptos Aborigines prioribus in sedibus : utrisque tamen, communi omnium consensu suffragioque, Carnam Helernam, cum scepro scilicet, & fascibus duodecim præfecit Janus : Sceptrum vero ipsa alba est, hasta scilicet pura, ut Vertunum dicas alterum in cardinum potestate : unde & Cardia nuncupatur, & Cardinia, quod ei colonias deducendi vis esset, & omnigena sacrorum cura commissâ. Præseditque in convallibus ANSANCII mediis castrametata. Jani auspicio item & prætorium statuit, ubi jus populo redderet, qui circumcirca in figendis aderat sedibus : aram velis circumdatam & ignem excitat, quo nihil antiquius, nihil proprius meminerint, qui publicum ignem ante privatum noverint focum. Itaque supplicare D. O. M. & primitias offerre, & legitima vota persolvere didicere frugum homines. IN PRECIBVS SIQVIDEM immorari, vires colligere est : cum pietate obscunda adire negotia, profligare est. Fortitudini & Justitiæ omnia cedunt. Pietas in homine virtutes alit sorores natu maxima. Et quidem ad aram sacerdotes excubant. Prætorio Prætoriani ad conservandam aureæ ætatis illibatam securitatem. Qui enim secus fecerit, & pacis tempo-

re limites regni sui incustoditos deserit, is demum pacem negligit. Prætorii locus septus erat ad montis radicem, cui Calpæ nomen de Cranæ alba: prisca enim lingua P. pro B. proferebant Vestini, & Sagi: ipsa vero alba, vel hasta summa armorum, & Imperii, ut docet Festus. Hoc loci declivus subsidet mons, ita ut à dextris fluvio forum aperit, qui de latitudine, in quam exit, Atra dicitur. Deinde etiam novæ urbi spatia æquiora relaxat, quamquam is raro miliario minorem secet. A sinistra vero, ubi theatralem Calpæ arcuatur in formam, Cæciam vicum habet. Unde nomen Cæciliæ genti factum est, & mediam, ad forum, qui Decii Syllæ nuncupatur, Occidentem versus, viam non intercludit; sed & ad Meridiem à sepulchretis, & majorum ossibus locus, qui nomine Scopuletum dictus est, modo vicus non infrequens, ex pervetusto, ut diximus, cœmeterio: de quo iterum, & severiori item iudicio, in sepultura concedenda agemus infra. Deinde ad Orientem Vetuloniam dirutam, & lacum, & vicum, cui à frequentiori populo arbore Populetum nomen. Cæterum trans fluvium Septentrionales habet Neminas aquas, quas ab ortus intervallo & varietate nuncupamus. Sed gentis Cæciliæ vetustam in nobis originem placet Inscriptionem probare: hujusmodi enim testimonia pro interprete in historia habentur, & sequenti in libro de Vestinis, Sabinisque Romani populi acturi fumus auctario:

C. JULIVS ATTICVS VESTINVS,
CAECILIA ATTICA Q. CAECILII ATTICI
POMPONI, ET PILIÆ FILIA
C. PLAVTIVS P. I. P. N. DECIANVS
HYPSEAEVS.

Sed ad integram hujus Inscriptionis declarationem, in qua cum Cæcia gente etiam Juliam, & Vestinam, & Pomponiam, & Piliam, sicuti & alibi Deciam, & Juniam, & Syllanam legere est, eam regionem plenius describemus. A Cæcia itaque, & foro, quo Decii vicum petimus, qua laxior ad Meridiem campus excurrit, quod Cranus Mons, qui deinde Sicanius, demum Canius appellatus est, in sinistram reflexus foros laxat & amplificat: eaque in planitie Thebas contra Bœotias promontorium excitat, supra quod urbem constituere, quam Forum Veteres dixere Novum, & infra ad promontorii radicem Hypsæum habet, & Orientalem magis vicum genium Jani: deinde eo inferius Piliam juxta locum, ubi Velia, & qui de Vetulonio ejusdem nominis exuberans fluvius lacu, in Atram influit, quam Aternum dicimus. Et hos intra terminos Populetum includitur vicus, ad Orientem, ubi vetustatis monumentum, & Atticæ familiæ memoria, & Orfitæ, videre est:

ORFITAE ATTICAE
G. APONI SABINI
PRAESTAE
V.S.L.M.

Is ager Vestinus, & ad Orientem protenditur, eadem appellatione de Vestæ matris nomine, quo ipsa adveniens & templum, & arcem, novæ fecit Urbi. Hæc, inquam, ultra fluvium ad Septentrionem aram statuit pro templo, & arcem juxta aram, & in ea Vestales collectas voluit Virgines, quarum cura publicus focus æternus est. Nec longe aberat Regia Cranæ inter templum & Prætorium media, ad ripam fluminis lævam. Vesta itaque castrorum mater propagatis nepotum limitibus, pomœrio etiam regiam ampliavit, & quasi arcem turritam communivit urbem, circumcirca per cardines, & decumanos limites, mœnibus, propugnaculis, aggere, & sacra item fossa, unde ipsa turrita effingitur in circulo residens quasi foros & urbes circumiens, Populorum magistra, quæ & Regina mater. Itaque ubi ipsa adesset

A conventus agi in tuto poterat, utpote juxta turrim patriam. Rex enim in populo pro turri est. Eatenus incertam diximus Amiterni originem: quis enim Urbem diceret ante templi constitutionem, quod est fundamentum Urbium? aut quis urbem neget, ubi Regina medio in Senatu, medio in Populo fixis sedibus ordinata in Rep. consisteret? Sed postquam ad alteram Tiberis ripam secessit Janus, ætate jam senior vacarat ab ejusdem incolatu mons quo dexteram Tiberis ripam, ab ejusdem incolatu, deque ejusdem oraculis Vaticanus dici cœpit.

B Mons itaque & flumen interfluens regiones intersecabant quidem, ditionem vero nusquam disternabant, quandiu supervixit senissimus Janus Pater, cujus ab ore penderent omnes, quem imitari studebant omnes, pudore-ne, an innocentia ambigas: sed certe per utrumque non neget. Et quidem ad alteram ripam Aboriginum coloniis, & suos, & metatus per singulos ad conventus à Vestinis, quos diximus, perque loca commodiora magis frequens colonias adebat, & post Sabatii adventum magis indies, ita ut positis jam Curibus alteris, Regio omnis ejusdem diceretur de nomine: tum & à fluminis ripa dexteram Sabatios, & cæteros: Crana vero Vestalis Magna post matrem Maximam in Vestinis præerat, in ea, quam Calpem diximus; unde & Calpar vinarium vas. Nam C & vinetis vestitus locus, is in declivo positus, & ad Orientem convexus apposite est. Cranæ vero nomen Principem designat in populo, sicut humana inter ossa cranium, quod majores nostri inaurare consueverant, in perpetuam defunctorum (si qui de Rep. optime meriti essent) memoriam, & venerationem, uti apud Quadrigarium in *Annalibus* legitur, lib. xxx.

D Igitur Vesta mater sacrificiis, & formandis occupata Virginibus, Cranus instituendis liberis, deducendis coloniis, Jani imperio, Vestæ obsequio deditissimus, cum omni sobole, ad cujus nutum dirigebant omnia. Cæjus autem & Caja, de quibus supra simplici qua legimus nota nomina, si ea figura recta est, Dominum Domus denotat: si vero obversa ea Domus Dominam, quo se conjugati vicissim appellabant nomine; & eadem ratione, & populos Rantios, & Aruntios dicimus, Carantios legimus, & Caracenos, pro C. Rantii & C. Razenui, vel Rasinii populi apud nos. Sed per vetustatis monumenta probemus singula:

C. CALPETANVS RANTIVS QVIRINALIS, VAL.
CESTIVS CVR. RIPARVM, ET ALVEI
TIBERIS TERMINAVIT.

E Et Calpus Numæ F. & Calphurnii, & Calpetus Albanorum Rex, & alibi habetur: C. Rasimus C. F. Ser. Stell. Tettianus, & pleraque eam in rem testimonia, quæ producere longum esset, effossione facili, quo loci nostro sæculo statuaræ repertæ sunt plures antiquitatis monumenta.

Itaque Caraceni, qui secundum incolunt Atram ad Orientem, & Razenii, quorum locus adhuc servat nomen Razinium, non injucunda in campi planitie juxta Æquos, qui se à fratribus segregantes ad Meridiem ultra Rasinos seclusi sunt. Sed inferius de hujusmodi segregationis causa dicemus suo loco.

F Oppleta jam videbatur Orientalis Tiberis ripa per occidua, in quibus utrisque, quasi sol inter coelicardines, per decumanum regnabat Janus limitem: sol enim in medio residens complectitur omnia, cujus radii & lux, Cranus & Crana, per quos constituendam procurabat Remp. dilectissima de nepotum sobole.

Crana autem, & suo in populo uteri sui filiis, & secundum Janiculi Orientalem ripam ad superum mare de infero, & qua Apenninus inflexus Italiam interfecat omnem, utroque enim mari ambitur

bitur Italia, nisi qua de perpetuo distenditur Apennino, quasi lacertoso ex humero exertum brachium, quacunque habitabilis ea est. Apenninus enim fluminis ripam nescit: terminum vero ipsemet sibi conscivit, ubi declivus esse desit, cujus intra sinus conclusos diximus Aborigines & Comerios, sed advenam & convenam populum, quem materno imperio in officio contineret Crana, benigniori severitate corrigeret disciplina: quæ sobolis amantissima, ita ut exinde Venus dictitari coeperit, ob maternam in subditos sollicitudinem, & conciliandis animorum moribus efficaciam charitatis, qua ad omnes itaret. Aborigines enim incorruptos prioribus in sedibus habitare permisos, quasi filios manu ducens regebat. Itaque cum necessario coloniarum deducendæ essent, ex utrisque Aboriginibus, & Vestinis, eadem ratione, qua & dispositi essent, deducebantur, si per Apennini, uti diximus, propinquiores sinus, si per externos montes & littoralia, quorum portus, claustrave Janigenarum custodibus communita essent, novas scilicet per colonias. Itaque Janigenarum sustenturam Jano deducebat Cranus, & ipsa transmittibat Crana adolescentium floridam juventutem, quasi florenti à ramo examen apum, quos præ vultus similitudine & habitu discernere non posses: admirareris tamen, & sub velo & in armis procedentem, leones diceris in incessu, & laudares Thaleos, Amitinos germanos compares novas in colonias deductos, pleno tempore vere sacro, & ea filiorum educatione, & exhibitione, quæ summa est munificentia, senissimi Patris demulcebant caniciem. Hinc hominum utramque per ripam geminatorum ratio, & Amitini & pleraque hujusmodi nomina.

Facessant interim qui dum omnia Tusci tribuunt, quasi effectam Reginam redarguunt, dum historias pro ingenio fingunt, & propriis fidem abrogant testimoniis, qui Janigenas non nisi in Tuscia norunt: & quam apud Aborigines regnantem non negant, eandem & concepturam, & parituram, alio saltem partus exposituram, quasi Amazonem ad ripam alteram accedentem oscitantes fabulantur, & quasi orbatos & sobole, & spe sobolis consenescentes transigere ævum fecundissimos hominum. Myndvm mala nox semper occiduas regiones obtenebrat, terminos confundit, & illustres populos in abscondito occulit. Sed & qui Anfaneti vallem describunt, eam quidem plus satis arctant: à lacu quidem Velino per Cotylas & rosea rura, & Pinnatias, item & Veliam, & Testrinam Thebæos, & Vestinum agrum ad Antianas & Crunienas aquas, & Veranas insuper per vallem, qua Corfinium itur, & quousque ad Antianum nobile emporium, & ad Hadriaci maris littora perveneris, ea prætenditur vallis, cui nomen ab Ansis provenit. Ansæ vero altaria sunt portatilia, quadrata, quæ suis constant pedibus: ea enim convallis vicis & urbibus oppleta frequentioribus, frequentiores item habebat aras, & publicis & privatis in sacrificiis perpetua quasi unius templi sacrarum Ansarum odorata porticus, quarum exempla in vetustis monumentis cum plura sint, requireret nemo. Est autem Corfinium ea urbs, quæ bello civili inter Cæsarem & Pompejum una inter Reip. arces delecta est: hæc eadem irruentibus in Italiam Barbaris ex omni Italia confluentem nobilitatem excepit: & proinde una hæc urbs pro universa provincia Italico nobilitata nomine, & adaucta populis steterat: sed qua Anfaneti vallis ad Reatem proximior est, & qua IMELLA juxta Casperiam fluit, cujus de appellatione sacrificio opportunum vas omne Imelum dixere vel futile, Festus & Cato, prout dicemus infra: eam, inquam, gentium, & provinciam, & regnum dicas, quod ibidem confederint Umbri primum, qui ab Aboriginibus exacti sunt, & hi quod aberrarint cum corruptis Comeris exinde expulsi intra montium claustra occluduntur, tunc

A moderatiores locum hunc obtinere Aborigines, qui & ipsi tandem à Sabinis extrusi sunt, & res ad Amiterninos, & Curetes Patres rediit. Sed & Cotyla, quæ unica & innatans Insula inquirentibus, & obstupefcentibus Pelasgis reperta, & concessa est, eo oraculo adactis, apud Dionys. Halic. lib. 1.

*Pergite quarentes Siculum Saturnia rura,
Atque Aboriginidum Cotyla ubi se Insula veſtat,
Queis miſti decimas Clario transmittite Phæbo,
Atque Jovi capita, & transmittite lumina Patri.*

Hi itaque dum terra marique emissi quo nesciant, peregrinantur erronei, dum quod quærere jubentur, invenire desperant, errabundi reperere: hospitibus tetendere manus olivæ ramusculo coronati, & olivæ ramos item prætendentes, quibus circumcirca insulam habitare permissum est. In ea post Pelasgos & scriptores omnes etiam & nos rei novitatem ad naturæ ipsius miraculum admiramur, quæ fixam habeant ungulam animalia tuto super ea ferri, & pasci ad libitum & sature: quæ vero fixas non habent ungulas minime sustineri, & primo lævi quantumvis calce, vel plantæ positione terram effosam in putrem resolvi, ita ut tremere circumcirca, & fatiscere videas solum; quare & refugere exinde solent equi, & ejusdem ungulatum genus, nec fuste impelli, ut illuc pedes iterato inferant. Lacus is quatuor jugerum magnitudinem non excedebat. Insula perenniter fluctuans ventorum impulsu, gramen quoddam butoni seu carici simile, colore verò ad bitumen maxime, nec quidem magnum producit; aqua vero immensæ profunditatis, & circumquaque coronis cingitur lacus. Insula in diametro fere quinquaginta pedum, neque ultra pedem ex aquis eminebat. Cæterum ex deducto in lacum fluvio, qui arena sua, quod bituminis fuerat in collectanea illa algarum insula, dissecuerit, hinc inde quasi Æthiopica in secandis marmoribus arena dissecta est: & in figuram semiplenæ lunæ littori hinc inde bifariam divisa adhæserit, & ea frugibus apta, nisi violentius ferrum incusseris: subtus enim aqua emanans altius profiliet ad ludicum incolis spectaculum; & ad horam usque productam in tullos aqueos voluptatis, & admirationis scenam, ipsa in solitudine, unius ad arbitrium quasi exercitatoris agitata placitum. Ea autem fluminis immissio quinquagesimum circiter annum facta est, intermediam per cujus arenam etiam fons quæ in profundo lacus est, suffarta densum ebullire bitumen non permittitur, neque quid gignere, nisi tenue quoddam salgastrum, & quod quasi cratis per aquam innatans fertur. Neque una, sed singulatim singulæ, uno item & altero circulo colludentes, sed alterum quidem minus: & si quis in eorum utrumlibet insiluerit, quantumvis leniter ac leviter, insula nondum constans sub pondere tremat, ac subsiluit instabilis, & invalida, utpote ponderis impatiens, nutat per eam, quam diximus, varietatem motus & quietis.

Est autem illud bituminis signum, quod introducta aqua superfertur, & in adversum littus insulam impellit, & in eam quæ cubitum altitudine non excederet, alieno impetu impellitur, trahiturve propulsata. Itaque novus hospes, longa post tempora vetustissimæ antiquitatis, & religiosi ostentus, rescidit acta, quæ Græcus advena veneratus est quidem, & Barbarus nunquam temerasset, qui de vicinæ ripis, & qui procurrare natus est, terræ poros aperire de fonte didicit sua in simplicitate, alio traductus volens nolens, tanta quidem rusticus accola ausus, & ea maxima, quæ nemo usquam hominum intentasset.

At antiquitas ejusdem lacus Comitias Nymphas venerata est, easque sic dictas Varro adserit à commotu, quod ibi Insula in aqua commoveretur. Præterea & Lacones per interiorum vallem juxta Amiternum succedere hospites, legum quidem & severitatis amantes: sed Lycurgi atrocius vitantes supercilium, & rubricam fugientes. Hi à Vestinis & Curetibus peramanter & comiter suscepti, & in medio

dio locati Thebas condidere Boeotias, & regionem hospitalem, & perhumanos hospites dixere Pitaniās, in quibus Quintus ille, PINNIA familia, ad quam Varro III. de *Agricultura* librum inscripsit, de quibus in hæc verba Strabo lib. v. Qui finitimos & hospites potentia prævalidos blandimentis alliciunt, & charitate devinciunt. Ita ut pedestris exercitus LXXX. millia, & equites VIII. millia aliquando domo emiserint. Et eadem propepagella, de Vestinis item loquens ait: Hæc autem natio exigua quidem est, cæterum fortitudine conspicua ostentata Romanis eorum sæpissime virtute. Et Herodianus in *Antonino*: Præterea juvenes Sparta accitos Laconicam, & Pitanniatam centenam vocabant. Agrum vero, qui Boeotiano collimitat, gentium attigit nemo. Vestinis siquidem Janigenis ingenuis intacta sua patria est, & genus illibatum. Quis enim aut Italos Proceres alienigenas dixerit, aut Normannos, & ex Hierosolymitana expeditione veteranos nobilissimam Christi Domini militiam? Quorum plerique coeli similitudine, soli fertilitate, atque optimatum nostrorum humanitate allecti & suasi sunt, ut media quasi in via ad novam expeditionem paratiores sedem figerent temporariam. Quo facto adaucti numero majores nostri, & ipsi fortissimos viros in contubernium, & fervens juvenus in disciplina virtutum magistros obtinuit, quorum æmula, & virtutum appetentior per eosdem formata ad unguem, adsequeretur & gloriam.

Sed quoad decimas, de quibus superiori in oraculo agitur, Populus aliquando ab Hercule salubriter commonitus oscella pro humanis hostiis obtulit, & de ponte in procurrentia præcipitia dedit.

Cæterum ipsa de Vesta, quæ Urbis regionem ad Septentrionem adauxerat, cætiā ex parte montem, qui juxta est. Apenninus dicitur ab Apio, quod Vestæ flammeum est, velumve, seu veli apex.

Quæ vero ad Meridiem regio interjacet, & ipse mons à Crania, Cranius appellatur, cujus, quamaxime elatus parte est, ocrea, promontorium format: & ibidem infra Apia Vicus in Vestæ venerationem conditus, qui & Avianum pro Apianum dici coepit, arx, inquam, in Civitatis tutelam, & oppidum ad annonæ custodiam. Populus vero Opicus, cujus de nomine coloniae deductæ plures. Crana autem ipsa est Opis, quod perpetua fulciret alimonia, & sustentura materfamilias, quæ in Reip. utilitatem inter filios regnaret, quasi unius corporis membra conferens, qui omnes uno de Cranio, & Crania caro una. Sed neque ipsa alia de causa Crania dicitur, nisi quod regat & repleat humanum corpus, per epar sanguine & spiritu animatum, vestibus fotum, cibo recreatum: ipsa eadem ad populi securitatem Opis oppidum condidit, quale diximus, & cives, si quid adversi accideret, se, & patriam tutaerentur, & ab ea Cranium dicimus capitis ossum prædurum, quod & ornandum est, & armandum ad corporis totius regimen & tutelam. Igitur eadem & in deducendis coloniis Opis erat in annonæ, & cætero apparatu ad expeditionem necessario, quæ Avia ab antiquitate, & Apia à loci diceretur vetustate, & cathedræ prominentia, & apicis dignitate. Venus autem in adolescentiorum juvenia, viribusque & viarum difficultatibus explicandis: item in castrorum vel hospitii sospitem hospitalitatem præoccupandam, provocandamve, ubi mature facto opus esset, eadem ipsa Venus nuncupabatur. Juventus autem, & soboles quæ in nominibus regula apud majores fuerit novis in coloniis exemplo ex uno, sed eodem eleganti, declaratur Inscriptione:

NAEVIAE VENERIAE,
NAEVIA PRIMIGENIA,
ET PRIMVS, PARENTES.

Primus: deducta enim in colonia Princeps est pro Jano: sive is in populo Princeps: princeps item qui vici Magister Tribunusve, domusve Dominus, paterfamilias, cui clavis pro sceptro esset. Janus itaque

A omnium pater viventium, & coloniarum dispositor, in principibus populorum conditor, & pastor, & doctor, agitator, & munerator, qui contemplationis studio & mentis excellentia Rex humilis & ipsam per humilitatem Princeps optimus maximus odoratas ad aras quotidiana per sacrificia propensior, pro omnibus invigilabat interpellator. Ejus itaque ara pro senatulo: sacrificiorum enim prælibationes conventus subsequerentur ad Reip. curam: statis enim diebus, novis lunaribus, convenire jubebantur assessores: qui conventus in Janiculo primum habiti, & jus redditum. Conveniebant itaque Senatores, & hi quos adesse oporteret. Præterea dimisso concilio, si qui vel-
B lent senissimi patris canitiem veneraturi, & divina commemorantem audituri, admittebantur. Hos inter assessores legitur Janus Præficiens, Physicam, Astronomiam, & divinationes, & ritus docuisse, & ad perpetuam memoriam rituales scripsisse, commendans omnia litteris. Docuit & artes mechanicas, Mathematicam, & usum navigandi monstravit, qui dicitur duabus in ingentibus columnis, quarum una lapidea, ne diluvio absumeretur, altera lateritia, ne conflagrare posset, quod docuit consignasse. Unde factum est, ut posteris eisdem nominibus, & veneratione divina sint prosequuti, quæ una fuerat omnium lingua. Non enim linguarum confusio ante urbis Babylonice turrim, & ejus interruptam fabricam anno ante Jani Patris defunctionem decimo, à Diluvio
C CCC. ipsa enim turris annos XXIII. post Italiae regnum ædificari coepit. Prisca itaque lingua Hebræa, quæ in Italia Saga dicebatur, usi sunt Janigenæ vetustissimi hominum, secundum eos qui historias calluerunt. Eam vero reliqui, & minorum quidam gentium, Sabinam, vel Tuscam dicunt, qui si in Tuscis Sagas intelligunt, hos non rejicimus. Proinde Tuscos Sagas à Sabatio dictos negabit nemo: neque omnis Tuscus Saga: sed qui inter Tuscos bonis artibus, & sapientia præcelleret, vetusta de nobilitate pater, Senatorve habitus, is demum Saga dicebatur. Sabatius autem Curetis filius in Italiam advenit, Beli irrationabilem iram, & insidias fugiens implacabilis. Primo itaque Semiramis anno Sabatius in Italiam apulit, & amanter & jucunde à Jano susceptus est: quis enim hominum sanctissimo seni amabilius hospes Sabatio? qui & pietate, & religione pontificiam adauxerit gloriam, prudentia canos exornavit, æquitatis Rex inclytus, populorum Pater. Quare & aliquot post annos creatus Coritus Aboriginibus præficatur; & pro officii dignitate juxta regiam adstabat sellam, adsidebatve sua curuli juxta posita consiliarius Regi, senatorve Principi senatus, vel imperatori magister equitum, vel Augusto Princeps juventutis. Sed qui ut plurimum per Provinciam, regnumve sibi demandatum circumiens, pro tribunali temporario, juxta forulos in gestatorio curuli hastatus jus redderet: idem de Jani mandato deducens colonias, disponensve omnia, collata cum Rege sententia. Et hoc loci animorum moderationem in Crano admiramur, qui Regis filius & Regina vir ipse, & hæres sine titulo consenuerit, & qui perhumaniter, & quam simpliciter, & ex animo supervenientem hospitem exceperit, & creari Coritum passus sit, vel ob senioris reverentiam viri, vel ob honoris contemptum extrinseci, qui virtutum conscientiam sibi satis putaret. Equidem sapiens omnino extra ambitum. Coritus autem à Curete in eo differt, quod
F Cures ingenuus, & Senator est; Coritus vero populi, & item Senatus Princeps. Sabatio igitur Aboriginibus Corito otium fecit Regina, ut per Colonias Crana Razenuas inviseret Venus filios, & Vestam omnium viventium matrem, quæ selectissimas ex omnibus Vestales Virgines ea lege instituerat, uti annis senis divino mancipatæ servitio forent: binis scilicet primis ediscerent: alteris vero binis exercerent edoctæ jam sacra, & sempiternum custodirent ignem: tertio demum, & ultimo binario anni primi novis
Vir-

Virginibus magistræ præessent : deinde ob necessitatem generis & sustenturam coloniarum nubarent. Quo denotatur id sæculum habuisse institutas Virgines, quæ post anni primi disciplinam, quæ sacerdotis sunt legitime possent exsequi, & insequentibus etiam aliarum regimen suscipere Virginum interim deligendarum : majorum enim de testimonio asserimus Vestales in Italia cognitæ longe ante Babyloniam conditam, & Craniam ipsam à pueritia dedicatam Virgunculam. Deinde & Vestalem, demum & Vestalium maximam, quæ in Italia Vestalium illustravit collegium, & rite norit omnia obire munia, & dicere, & facere quæ & posteros edoceret, pietatis Magistra altera & magna à Vesta matre maxima. Deinceps vero germani copulata conjugio, populorum mater & Regina facta est inclita. Sed hoc loci illud adnotandum est, non eadem semper convalescere, cum ab Urbe condita observatum sit, nuptiales faces, & connubia Vestalibus semper male vertere : & è contra virginitatis votum perpetuæ perpetuo felix faustum fortunatumque & Virginibus, & Populo Rom. Cæterum quæ in causa fuerint, ut apud nos testimonia Janigenarum, Vestinorum tanta & Cranae, & Vestæ, & Aurani, & priscorum Regum scriptores præterierint, malitiane an ignorantia, aliorum sit iudicium. Sed hæc ipsa, quæ antiquata nolumus, & quæ Sabinorum nomina, & facta, & quæ Aboriginum, & cognosci, & dici cœperint ab ipso edicamus initio.

Sabatius autem Coritus à Jano & Crana in regni societatem adsciscitur, utriusque assessor, qui exinde Medius Fidius, & Semon appellatus est, & is utramque per Tiberis ripam, qua vacuus inter Vestinos & Annianas interjacebat campus colonias disposuit, ad dexteram quidem suo de nomine Sabatias, & lacum Sabatium nuncupari voluit : Amitinos vero quis deduxerit an Sabatius, an Vesta mater, an ne Crana, incertum est. Ad sinistram vero juxta forulos Curetes suos à Vestinis per Aborigines, deinde ad Septentrionem Casperiam, unde Asprenates dici cœpere : sed deleta est C littera vetustæ dignitatis in Regum genere quasi honoris pronomen, & ea corona de nepotum capite per incuriam prolapsa est. Loca præterea ultra Asprenates ad Velinum, & eam circa regionem, qua maxime Imella fluit fluvius, & juxta Velini cataractas, ubi is exuberans & superfluens primum libere, deinde suo se coercens impetu, quo ipse sibi novo saxo exitus obducit deses : ita ut non nisi excussio fræno, & quasi dissipatis repagulis à Reatinis limitibus, quos supereminat præceps & vehemens, (ut Nili cataractas dixeris) in subiectam delabitur campi planiciem, & adhuc fervens in excandescentia sua, Nar adauget sulphureis immixtus aquis.

At Imella leni decursu Ansaneti vallem ea ex parte ambit perutilis & percommodus altarium ministerio ; cujus si nominis etymon interpretatum volueris, Imelum memineris, quem legeris ad sacrificia vas ustatum, sacrum quidem, sed quod ambabus sustineri egeat ulnis, cum breviorē habet pedem quo consistere non possit. At in Ecclesiasticis idem vas fontem legimus, quod velo cinctum circumferri & sustineri consueverat. Is itaque circa frequentissimas Ansaneti vallis aras defluens superfertur, sustineturque floridis graminibus quasi ministris, Camillive ad sacrificii celebrationem procedens, utpote qui ripas non nosset, & quos super flores graderetur, plecteret quidem innocens, nec tamen protereret, ipse sibi vas floridum & exuberans in fonte fluvius ipse fons, ipse & vas se suis sustentans humeris, ne prolabatur : nesciret enim humi per se consistere æque ac unda vel nymphea caput super undas exerens. Ad hujusmodi similitudinem vas per sacra Vestalibus futile ea de ratione, & eam ad cautelam, ita appellatur, ut ministra sustinendum intelligat, ne aqua exinde defluat, dilabaturve. Hæc itaque ita posita si consideres Imella cur dicatur, & unde

A Imelum, constabit satis. Qui neque à priori lenitate alienus, neque sibi omnino similis adhuc est, & ad Septentrionem & Occidentem descendit, Sabinos irrigans suos. At in Meridiem convexos Latinos demum posuit Sabatius, eo quod Latium à latitudine, & severitate, & nominis maiestate eam nuncupavit regionem, qui regni sedem in Aventino collocavit. His autem de Curetum limitibus tribus Maro verbis disserit vates inclitus, *Æneid. vii. v. 714.*

B *Casperiamque colunt Forulosque, & flumen Imella.* Id est, montana, & campestria, & declivia in irriguum superius, & irriguum inferius : in Casperia enim montana omnia à Reatino agro ad Tiberis oram, & secundum eandem oram, & qua ad mare vergit : montium vero claustra, & planiciem omnem, quæ Latium dicitur, in verbo *forulos* significavit. In *Imella* vero imam vallem, quæ reliqua est Sabinæ regionis pars.

C Item colonias extra Italiam deduxit, vel etiam transmisit plurimas, non ampliandorum terminorum, propagandive imperii ergo, sed pro bono publico, & populorum opportuniori sede, ad alimoniam & securitatem virtute curandam, tuendamque. Unde ad grati animi significationem adhuc honorario titulo conscripti nationum Patres Sabini appellantur, vel, quod potissimum est, Sagi.

Sabatius itaque Sabinorum ditionem, vel potius pietatem adauxit : ripas interim Tiberis ponte conjunxit ligneo, trabibus concinne inter se connexis. Is Vestinis, & Aboriginibus, & Tuscis, & Umbris, & universo laudatissimus orbi adhuc usque per omnium ora circumfertur fama vicens, quod eo Rege fides, & veritas, pax, & annonæ copia, & pudor ingenuus, & iustitia, & præcipuus Dei cultus adeo vixit, ut cum hominibus conversari, nedum hominibus apparere dicerentur cœlestes virtutes Angeli Dei. Cujus rei famam publicam Catullus inter cæteros contestatur in *Epithalamio Pelei & Thetidos*, sub fin.

D *Præsentem namque ante domos invisere castas
Sapius, & sese mortali ostendere * castas,
Cælicola nondum sprete pietate solebant :
Sape pater divum templo in fulgente revivens,
Annua dum festis venissent sacra diebus,
Conspexit terra centum præcurrere currus.*

Is idem pro degenerum demeritis quæ subsequuta sit poena mortales, subdit hæc :

*Iustificam nobis mentem avertere Deorum :
Quare nec tales dignantur visere cœtus,
Nec se contingi patiuntur lumine claro.*

E His itaque humanum genus præmunitum virtutibus, his actibus, & operosa Regis industria majores nostri non in incertum laborantes aureum fecere sæculum ; siquidem per omnem Italiam frequentiora sacrificia : ita ut Oetria, ab Oetro, quæ patella est sacrificiis per liba opportunum vas, dicta sit prima, præsertim Etruriæ pars. Unde & Janigenæ Principes, & Duces Populorum, & Patresfamilias Patellarii Dii appellati. At in nostris, Sancti à Sangis, & Ansis, ut diximus. Titulus autem pro virtutibus, quæ in actione consistunt deferrebat. Actionum vero laus summa est in gratiarum actione. Supplicandi itaque & sacrificandi optimi Regis cura potissima. PIENTAS enim virtutem prima, & ultima coronat munerationem magnificam, quæ & delicatissima est, quasi humanum cerebrum. Unde qui fluere cœperunt, obdurant nervi firmissimas & agiles in nervorum compages virium agitatrices. Sabatius deinceps populum omnem cis & ultra Tiberim agriculturam docuit, & religionem pro discentium modulo, & imitatione probata patribus : ex quibus delecti exercitatores juventutis, quam prædurabant in palæstra, cursuve, discove. Juvenes vero hujusmodi rudimenta militiæ ludum æstimabant. Si qui vero Religioni potius addicti viderentur ad sacrificiorum ministeria

* Restitue, *castas*.

primum, deinde ad arcana mysteriorum educabantur. Majores vero Oecumenicam politiam & contemplationem suadere conabantur, provocabantque verbo & exemplo. Quibus actibus Sabinorum, regnum crevit, cum sapientia regeret quos pietas educabat & fortitudo bonos cives, bonos & eadem faceret colonos: quibus recta omnia, & singula, & semper concupiscere, & videre quod verum est primum fecit, & sentire & dicere itidem & facere. Quare & pro Regis & populi virtutum meritis quotannis annua agrorum ubertas prioris anni ubertatem nova exuberabat annona, ut ipsam etiam terram diceret disciplinabilem, & humano usui & cultui propensio- rem esse, feraciorumque fieri, ne pientissimi Regis disciplinæ in filios tantum promanaret, & posteros frugi, terra ipsa frugalior videri, & laudari multæ frugis, & plenissimæ ubertatis aureos explicaret in segete sinus, culmosve.

Aderat in sceminis, aderat in junioribus pudor ingenuus, omnes in officio continens, & prudentia, & providentia patrisfamilias comites: Curiam Regum diceret Conventum, Juventutem Deorum sobolem, Regem ipsum Patrem Patriæ, quem seniores imitari, quem referre juniores, & vultu, & moribus, ipsis ediscerent verbis, quem perpetuum habere rectorem optarent & divinæ voluntatis interpretationem Senatus, Populusque publice privatimque venerarentur.

Is Pontificia auctoritate pontem, ut diximus, Sublicium constituerat de Aventino proximiori in Janiculum, quo facilior esset ad Janum transitus, utramque ripam connectens, & utramque frequentioribus matrimoniorum vinculis. Præerat generosa in sobole amor mutuus, indissolubilem faciens animorum concordiam. Quibus operibus sapientissimus vir Sacerdos & Rex pacificus in Italia, ubi latere voluit late claruit, lateronibus stipatus Curetibus, Senatoribus scilicet & Prætorianis tutulis felicissimus regnavit Saturnus, laudatissimus quidem omnium votis, omnium vocibus, sed nusquam satis. Hic jam senior Sabum filium præfecit Sabinis, & Aboriginibus: ipse vero contemplationis studio deditus, cum Curetibus aliquot, populi scilicet majoribus, (non enim multos secum duxerat) in quibus tamen & Sacerdotium, Collegium, & Senatum, & Prætorium, & dispositam intelligas Curiam. Inde & Camulus salutare numen Sabinis notum, assessor scilicet, & consiliarius, & custos corporis, quod idem est cum Pallade, vel Vertumno, vel Enyalio, sive & Belbona, vel Bellonæ alumno: sive ipsemet Mars, quem Quirinum dixere Romani urbis custodem, cui hastam dedere & clypeum, & pro galeæ conofrons vitis: quo symbolo securitatem & annonæ copiam designabant. Hi itaque Curetes Vestinis adacti, juxta Tiberim Palatium deduxere coloniam. Ipse vero Sabatius regionem juxta Janiculum Saturniam coluit. De prima itaque Sabatii curuli, prætoriove, ex Aventino, inquam, per posteros salutari Prætor cœpit Dux, qui exercitum per pontificem abdicatum in provincias, vel colonias deduceret infra eum montem Capitolium ara media ad hujusmodi salutationem. Sabatius itaque Sabinis & Latinis suis eam regionem dedicavit. Sed Aventinum, & Petusculum, prudenter, inquam, & in Spiritus sancti lumine S. R. Ecclesia secundam recensuit in distributione Regionum Urbis Romæ. Quare & nos, qui hæc omnia ad Christianam pietatem aptamus, & Ecclesiasticam exordimur historiam, hoc loci Lectorem monitum volumus, in Jano & Sabatio quandam felicitatis Ecclesiasticæ figuram inesse prænunciam: sicut enim Janus per diluvii aquam fabricata navi, quam Arcam nuncupavit, ut copiam necessariorum in ea, & aram supplicationum subintelligas, salvum reduxit sub Dei manu genus humanum; qui item gentium Pater & diffusor, per multiplicationis benedictionem: Is,

A inquam, Janus in Italiam adveniens, Janiculum incoluit novam Coloniam, jugibus odorans sacrificiis, & conventibus illustrans, & suo demum sepulchro. Ita & Petrus Apostolorum Princeps Ecclesiæ fundamentum, & Janitor, fidelium Pater, & Pastor populorum pervigil, per regenerationis aquam salutem prædicans, & Salvatorem Christum, pacificus Romam advenit, Romanis arcibus trophæum Christi inferens, & eundem Janiculum bonæ confessionis suæ locum eligit, & triumphans dedicavit proprio sanguine, & sepulchro celebrem perpetuo efficit.

B At Sabatius persecutionibus agitatus, Romam tandem aliquando devenit, & lævum Tiberis latus obtinet, consors regni, consors collega unanimis, qui alteram ad ripam utramque, una cum eadem esset civitas, quæ flumine determinata videretur, ut in Sabatio Janum diceret alterum, vel germanum pro voluntatum communione, & consilio, & sacrificio regionem suam religione adaugens, Aventinum fecit Janiculo comparem: & tandem ad requietis æternitatem evocatus, quo potuit ossibus suis decoratam voluit inter Sabinos posteros.

C Nec minus fratrum & Tyrannorum persecutionibus agitatus B. Paulus Apostolus, vas electionis, in urbem advenit, eandemque regionem, & Petusculum pro Christi nomine in Ecclesiæ ædificium & unitatem, qui eadem in Ecclesia, eadem in Petri navicula, quasi ponte & charitatis vinculo Populum Romanum connectens insolubili, proprio sanguine purpuravit. Quamobrem civitatis Dei etiam pomœria, Augustalibus tensis & velis obumbrata, nedum altera fluminis ripa, aris Christo Domino positis, thymiamata arderent Deo in odorem suavitatis, & nos perpetua devotione præsentissimi numinis utrobique Tribunal veneremur. Sed ad historiæ telam filum reducamus. Defuncto Sabatio Rege, Sabus filius, qui apud Helernam (Cranam scilicet) Coritus, & Aboriginibus, & Vestinis, & Sabinis præfectus legitur, à lævo Tiberis latere regionem omnem, & quidem frequentissimam, regendam suscepit: ad quod respexit * Virgil. *Æneid.*

— qui de patris cognomine primus

Dixisti populos magna ditioe Sabinos.

D Varro tamen aliter, neque ab re, id cognominis interpretatur, quod ea gens P. P. colat Deos, id est, PRAECIPVOS PATRIOS, vel PATRES PATRIAE.

Cæterum Janus suum apud se Coritum advocat Cranum filium, & demum sanctam in requietem clausit diem, expletis vitæ suæ, à diluvio per arcam & columbam renascentis sæculi anno ccccl.

E Hunc Janigenæ flere omnes, & posita in sanctissimi patris honorem statua intra ædiculam, non procul ab urbe, in ejus recolendam memoriam, Vertumnus appellavere: cui & annuos & perpetuos impenderent honores. Hinc illæ Vertumnales figuræ & cæremoniæ Gentilium in Idololatriam defluentium. Hinc, inquam, in Zodiaci circulo figura sub silentium, quam Criobolium, Tauroboliumque per festos scilicet & statos dies mystico apud eos vocabulo indigitatum voluere, ut qui hoc initiarentur sacramento, in æternum renati dicerentur: sed & laurea celebrioris optionis significationem ex numero graduum Zodiaci, quasi Sol ipse labores, quos in circumeundo ad lauream adipiscendam ferre solet, hoc hominum commento vitaret, injecta ea per tenebras offa: occultata, inquam, novi jubaris claritate vestibulo noctis, & hac ratione victor diem produceret. Hinc & illa Daphnæ virginis Apollinem fugientis, quasi pro virginitate tuenda hæc fugeret: ille vero ad gloriolæ famam curreret, & illius metamorphosis æternitatem. At laureæ symbolum erat virgo, viro matura, vultu occidentali, oblongo, & candido, scilicet quæ ex Occidente in Orientem verso vultu respiceret, cui os sacrum pro laurea fronde ad admirationem usque effigiatum antiquitatis

* Non profecto Virgilius, sed Silius Ital. lib. viii.

B

cer-

cernimus in monumentis, & dexterum super caput in coronam reducens digitorum figura ad computum tricenarium & sexagenarium exprimit numerum, quasi Hesperus perpetuo anni tempore decurrens mane in Phosphorum præcurrat, ad vesperam vero Vesper solem subsequatur, omni nube expurgato cælo, & lumine suo diei sufficiens claritatem. Itaque Solem nusquam dices occiduum, aut intermortuum, cum lux per Hesperum supersit amabilis. Curetes vero in falce, quam Saturno fecere, eandem renascendi spem in coronarum iterationem significatam voluere.

Sed jam tempus est, ut omissis fabulis, ad historiam redeamus. In Jani defuncti quidem Saturni sedem in eodem ipso Janiculo conscendit Crana, quæ apud nos Helernam & Calpen suo de nomine nuncupatas condiderat urbes, præter Colonias quas diximus reliquas. Ipsa & Janigenarum Razenuorum, & Vestinorum mater unica uteri sui filios in Italiæ gloriam, & concepit, & peperit, & aluit, & rexit: regnavitque pro Jano Patre annos circiter xx. senissima Principum: cui successit Cranus Raze germanus, compar, gemellus, conjux. Is Cranæ divinos decernit honores. Qui autem fuerint hujusmodi honores, quos divinos diximus, ad amussim describamus, quo res fiat planior. Ad defunctorum itaque pro meritis, demeritisve discutiendis, locum aderat Prætorium, & ultra Prætorium, quod ad Orientem excurrit: sed ad Meridiem, qua Occidentem vergit, Amiterninorum aderant & sepulchreta, cœmeteriave, quod scopuletum à majorum denominabatur offibus. Ibi à Prætoribus & patribus ad hoc constitutis, uti diximus, judicabantur ex propriis operibus, qui vita defuncti essent sepultura, ne digni quoque loci, quaque pompa sepeliendi: quale discussionis judicium unico in sepulchro quod est in ædibus M. Antonii Florentii in Quirinali cernere est. At qui omni exceptione majores reperirentur, hi ut patres Patriæ, Ili, vel Iti dicebantur, quibus vel summo in clivo, vel media in urbe, vel spectabiliore loco cœmeterii condebantur, & eorum de nomine eidem loco nomen imponebatur, & annua eidem statuebantur: in quibus axamenta carminave in defuncti laudes decantata. Ea enim ita Festus appellata scribit: majoribus item & coronæ ad sepulchrum plures, & vittæ apponi, & coronati, & hæc jure merito circa dignos. Reliquos vero projici & negligi. Quamobrem Dei timorem & legum reverentiam didicere, compulsi metu improperii, vel virtutum amore: item & Cives pro status conditione amare & revereri, & ad Patriæ salutem, ad Deorum cultum dirigere omnium animum vires in semetipsis, & filiis familiaque omni excolere, & uberiorem in dies pro virili educare, optimam in frugem alere. Inde est quod Festus forum Sepulchreti vestibulum adserit. Relata itaque Crana & in Vestinis condita, unde Cranio monti nomen, qui à Sicanio Sicanites dici cœpit, sed Canius communi voce cognitus. Is itaque divinus honor apud eos erat, & is honoris apex apud eosdem maxime, ne in idololatriam tam cito collapsos putes Noetis filios, & nepotes etiam sub ipsius pientissimi Noetis oculos.

Cæterum exinde subortam Idololatriam lapsu temporis ex remissa in patribus disciplina, & degeneri Principum fastu, & procaci lascivientium licentia, cum sanctissimis quidem affirmamus auctoribus, qui idem in omnibus eisdem consentimus.

In urbe autem media locus raro concessus est, ut duo tantum in urbe Roma legantur, Faustulus scilicet pastor, qui Romulum nutrit, ut Tata: is enim in eo, quem sibi Romulus Urbis conditor locum præparaverat, conditus est: summo in comitio ram è regione prospectabat maximam inter utramque cavea, circa quam confessus patrum, vel senatorum. Ea autem in fossa primitias rerum omnium, quibus lege uti licet, & ad victum necessariis conjecerant, & ex ea præterea, qua quisque profectus es-

set, particulam quandam terræ vel glebæ ferens, hæc quidem commiscebant, vocabantque fossam ipsam eodem quo Olympum nomine: deinde in figura circulari circumscripserant Urbem, atque ita commune, vel Rempubicam in comitio indicabatur, & eodem quo Faustulus loco proximus Hostilius perpetuus Romuli latero, & hospes, sepulchro honoratus est: ut in Tutulo, sicuti & Tata comitium pateret ad sepulchrum: cæteri vero aut summo in clivo proximo, montisve cacumine cominus eminus conspicabili, quo sepulchri locum suo decorarent nomine, ut Remutiam Remus. Complantabant autem circa hujusmodi sepulchra lucum, ut qui annuam ad solemnitatem in ejus memoriam convenirent, confessum haberent & convivium interdiu, sub umbra scilicet, ne domesticam desiderarent vitem, sed recumberent quasi sub velo ditioris patrisfamilias, qui illius cœnæ pater esset. Pro confidentium itaque gradu, appositis per epulones ædilefve dapibus sobrietatis, quæ virtus in convivantibus frugi est. Sed ne quid indiscussum prætereamus, Comitium pro Comitium majores usurparunt, conventum scilicet virorum fortium, qui Reipublicæ utilitatibus nati consilio præpollerent, & viribus: & ad indicandam vim rei ea in voce significatæ, M. pro N. scriptum voluere.

Imminebat autem ipso in sepulchro columna, supra quam in conchyli imago esset defuncti, asphalto ut plurimum, vel minio colorata, cum inscriptione, quæ testaretur in posteros ibidem sepulti nomen & merita.

De sepulchro Regiæ historiæ fides deficit suppositum per textum. Cæterum Cranianæ apud nos aquæ ad Cranii montis radices, ubi primum deflexit in Aternum influit: locus is eminens regii protumuli dignitate delectus, (ut puto) & adhuc promontorio illi luco monti nomen perseverat. Est autem is Calpæ ad dexteram ad Orientem longo tractum spatio: sed hoc loci & decliva montis portio quasi in caveam descendit.

Et proinde NIHIL sub sole novum, qui protulit sapientiæ testimonium, eloquutus est. Nam & in lege veteri primum & apud Gentiles item quod reperit & probavit sancta Mater Ecclesia, id quidem suum aptavit in usum: nam & præ templi foribus, & atrium habet, quod Palmatum dicitur, in cujus medio fontem prout in majoribus basilicis & Vaticano præsertim videre est Patriarchio, quod ea de causa Paradisus legitur, ubi anniversarios per dies exposita in communi, vel privata agape, convenire, & convivari consuevere juxta sepulchrum quisque suum, quaterna sub porticu, accumbentibus ad mensam Principibus: plebs vero in area quæ media est, ubi & commune, ut diximus, habent sepulchrum. Et eo de instituto festos per dies in natalitiis Sanctorum sigillatim singulas adimus, colimus Martyrum memorias, eam, inquam, per diem qua cœlesti nativitate & triumpho compotiti sunt, & militia perfuncti: quo die in eorundem venerationem operose feriat solemnitatem agimus: rationalibus quidem quanto magis eorundem acta imitabimur & fidem, quam professi, & effuso contestati sunt sanguine sanctissimi Patres, lucidissimæ columnæ Ecclesiæ, qui Christo Domino nos plebem peperere, partamve adauxere. Neque enim nobis satis esset frequentius per excubia stationalia sanctis advolvi sepulchris, & cerceos accendere, & lampadas suspendere more majorum oculis illacrymantibus. Itaque hoc ipsum est quod imprimis orantes exoremus, ad hoc etiam alter alterum hortemur, ut imitari non pigeat, quod celebrare delectat. Et nos hujusmodi per studia eorundem commendemus orationibus, ipsi enim interpellant pro nobis, & possunt impetrare, & pollent omnino, & volunt utique & faciunt.

At sanctorum sepulchra Martyrum constituta intra ipsum templum, & sub ipso altari, qui locus Confessio

fectio dicitur & Martyrium. Coemeterium vero omnium princeps ipsum est Vaticanum: Lateranense enim Patriarchium nusquam coemeterium legitur, neque titulus: quamvis reliquiarum omnium sacrosanctorum corporum, sive urbanarum, sive peregre advectarum, potissimæ ibidem adserventur portiones: unde conditorio illi nomen factum est celebre, ita ut Sancta sanctorum appelletur.

Placet & hoc loci annotare majores nostros etiam priusquam Christianæ fidei jubar splenderet, jam semper certos de animorum immortalitate hæc constituisse, & celebrationis annuæ perpetuitatem satis contestatos esse fidei veritate inconcussa. Placet & illud præcipue in Vestinis, vel agro qui Aquilanus dicitur, observatum, recolimus apud nostrates nullam usquam hæresim aut enatam esse, aut aliunde allatam: sed neque vel saltem suspicione subodoratam, & id quidem summo Dei beneficio acceptum referimus. Quod & Pius V. sanctissimæ memoriæ, & in fidei puritate exquirenda vigilantissimus observavit, & venerabili edixit testimonio.

Sed jam ad se nostra revocat nos historia, cujus digressionis paradisus Dei, hic fuerat Italiæ statutus: quam per utramque ripam bipartitam diximus per Sabinos, & Tiberim in Vestinis Aboriginibus Latinis una ex parte, ex altera vero Tuscis & Umbris. Ut quæ dicenda sunt congruentius & clare exprimamus: In Sabinis Vestinis utique Janigenæ Razenui, & Aborigines, & Umbri olim computabantur: quos nec ripa fluminis disgregat, quibus Apennini juga dorsumve perpetua sinuantium culminum connexione insolubilis pons æternitatis. At Umbros vel ad alteram ripam computes, vel per se ponas licet: & quas Sabatius in eadem ripa altera colonias posuit, hos Amitinos inter Tuscos connumerare populos. Sabus itaque Sabatii filius, qui nostram præsertim regionem, & optimis formavit legibus, & gentis gloriam adauxerit, de patrio nomine Sabinos appellatos voluit. Sed audiamus Silium, qui Pyrrhichicum illud decantantes Sabinos descripsit, lib. VIII.

IBANT ET LAETI PARS SANCTVM VOCE CANEBANT

AVCTOREM GENTIS, PARS LAVDES ORE FEREBANT,

SABE TVAS, QVI DE PATRIS COGNOMINE PRIMVS

DIXISTI POPVLOS MAGNA DITIONE SABINOS.

Magnam itaque appellat ditionem, quæ à mari usque ad mare protendebatur qua longissima est in Italia, exceptis Tusciæ terminis, secundum Tiberim collimitantibus: ita ut per longitudinem protensa ab Adriatico mari distans stadiis circiter CCLXXXII. à Tyrreno autem in latitudine patens plus minus mille definiatur stadiis.

Ajunt post Cranam regnasse, qui filium nobilem Principem (is enim Aurunus Sagis est) Coritum sibi delegerit, unde & Aruntini: qui in Camillarios & Fidentiores, & seniores exercuere, cujus de nomine apex ipse summo in Apennino apud nos Cornu dicitur pro Coritu Auruno: & is idem secundum sinus à se nuncupatos disposuit per montana generis sui populos. Excepit idem & plerosque advenientes, quos & certis in locis collocavit: nam & juxta Atriam secundum littus, quo in Apuliam protenditur, navi appulere Ausones. Deinceps etiam recensent & Malot Tagetem Auruni filium, & ad eum maritima expeditione appulsum autumant Phaethontem cum suis, qui videns omnia ab Ausonis occupata in Orientali, & Montana ab Infubribus & Aboriginibus possessa, planiciem vero à Vestinis vel Janigenis habitatam, in Occidentali parte locum petiit, posseditque cum sua posteritate montes, & agrum omnem, qua Eridanus fluit usque in regionem proximam, & ea loca denominavit quibus voluerit nominibus. Sed & hoc de illius Annii commentitiis textu, & post Phaethontis adventum Italia circa Istros

A Cimmerios, & Vesuvios arsisse, vocataque ea loca Palensana, id est, conflagratam regionem.

At hunc ipsum Festus scribit Genii filium, Jovis nepotem, qui adhuc puer aruspiciæ deditus, aruspicii tandem disciplinam tradiderit XII. Etruriæ populis. Ajunt & post Tagetem regnasse Sicanum, de quo supra.

De aurea ætate, & ea quæ subsequuta est, brevibus quidem Virgilius, lib. VIII. *Aeneid.* utpote qui incertis in historiis non multis immoratus est:

Deterior donec paulatim, & decolor ætas,

Et belli rabies, & amor successit habendi:

Tum manus Ausonia, & gentes venerè Sicana;

Sapius & nomen posuit Saturnia Tellus.

B Nam & interea Gigantes per universum orbem iterum efferbuerant, quibus pro lege tyrannis. Quid enim tam vastis corporibus aut immani sufficeret cupiditati nisi aliena, & omnia? Divinum timorem & terræ cultum tenuiorum putabant hominum, & hos quidem Giganteo mancipatos obsequio, quod eos, quibus parcerent, servasse ad servitia domestica, forensiave, rusticave destinatos putarent. At Osiris Ægyptius in Thracia primum ostendit in occiso Lycurgo Gigantes mortales esse, & vinci posse, qui eisdem poenas pati coegit, & Regem, & leges vindices pavere docuit. Deinde etiam apud Ematheos, quos Macedones dicimus, plures simul victoria una pugnam per unam stravit feliciter. Is itaque Osiris post Sicani obitum accersitus ab Italis, populorum scilicet Majoribus XII. VI. R. P. C. Vindicibus, advenit in Italiam, ubi novitas & virtus semper imperant. Is Gigantes devicit omnes, & si quos servavit, eos in triumphum duxit, omni potitus Italia, comitatus Hercule Chone, à quo ultima in Italia populi Chones, qui à Sabinis tandem ejecti sunt, L. Castronio Duce. Osiris itaque Læstrigonem Gigantem ex filio Neptuno nepotem Regem constituit. Qua de re lætitia & securitas populorum quam brevissimis est conclusa spatiis. Res itaque publica publice traducitur de Tyranno ad Tyrannum, & eo magistrucem quod & iusto regnaret titulo. Quis autem in Tyranno animi moderationem, temperantiamve requirat? in quo uno, & vasta omnia, & immania omnia fluctuant, æstuant, confringunturque?

C Interea virtutis nusquam oblita Italia per Forcum Cados, quem alii Porcum, vel Porrecum scribunt, qui Sene utranque insulam Sardiniam scilicet & Corficam Vehis coloniis repleturus eo loci appulit, & incoluit, & in utraque Alistam urbem ex D. Gregorio, & aliis scimus: item Alistam in nostris inferioribus ex clarissimorum auctoritate scriptorum ponimus, cujus nominis in Tuscia nulla usquam legitur. Alista enim Aboriginum metropolis juxta Reatem fuerat, quæ ab Amiterninis diruta est. Forci vero nomen inter montium juga novimus, qua exitus, transitusve datur: & inter summitates Apennini Forrecam Apuensem habemus, quod is Phorcus dum Italia tumultibus conclusa Giganteis agigaretur, ipse viam sibi & suis ad gloriam aperiret, quæ invia putaretur. De Phorco autem hæc Virgilius, *Aeneid.* v.

Phorcique exercitus omnis.

D Nam & secundum Apennini clivos, sinusve in proximis ejusdem de nomine Porcinarium vicus, & mons superat & Cadichium, & Porrecadicum, & Vevium, quæ loca posteri dixere Suium, vel Vium, & Porcinarium. Sene vero ex nominis vi sacram denotat crepidam; unde Senicium habemus, & qui Senicio de Vico populus novam in urbem Aquilam commigravit, nomen tamen desertus servat locus, & exiguus in proximo lacus ad Orientem. Inde in sequelam per vicos dispositi sunt Aruntini, Fidentiores & Camillarii, recta regione ad Camponiscum vicum à loci Dominis sic denominatum. Ajunt autem à Camplobascone tempora, à quo gens CAMPLIA:

B 2

Q. CAM-

Q. CAMPLIO. Q. F. VIRILLIO. V. I.
VIRIVM. SIBI.

ET TATINIAE M. F. VERAЕ VXORI.

A quo Campilia juxta Teramum, utraque oppida non ignobilia: & Servius ex Varrone: *Phorcus hic Neptuni ex * Phoote Nympha filius fuit, Sardinia & Corsica Rex, qui cum ab Atlante Rege bello navali cum magna exercitus parte victus fuisset & demersus, fabulantibus occasionem dedit Phorcum in Deum Marinum esse conversum.* Sed hunc ipsum posteri dixere Portunum, quem & Janum. Tum incolere placuit etiam Jonii Maris Insulas, & Cyprum, quam Vestini de Cupra sic denominavere, uti & eadem in Insula Thyum Urbem de vici nomine qui apud nos est, infra Eburios ad milliaria circiter octo, cujus adhuc insigne populare perseverat vetustissimum, quod est citri pomum virenti ramo circumdatum. Cæterum quod Insularibus in coloniis mediterraneisve immixtos Janigenas legis Aborigines, id etiam in montanis observare poteris. Hi enim Regem, vel Ducem auxiliares sequuti, eadem alibi qua in Italia lege sedes obtinebant, sive in insulis, sive in continente. Et hoc etiam factum est ratione, ne locus ullus unquam sine oblatione & sacrificio, & divino cultu fordesceret, sed rudium eruditione, & pietatis propagarentur studia, & virtus avita germinaret in posteris ubique locorum: id unum præ cæteris Janigenarum curante Senatu.

Sed cum adhuc LAESTRIGONES in Italia regnarent, Herculem per Celtas ajunt advenisse Lybium. Hic ille est Hercules Osiris filius, qui monstra ubique terrarum perdomuit sustulitque laboriosus, & Laestrigonas in Italia Tyrannos nonnisi decimum post annum debellatos expulerit, qui exsiccatis paludibus loca culturæ feraciora & frequentiora fecerit. Is & pleraque oppida suo de nomine condidit. At quia Heroes Hercules appellarentur prope omnes de virtutum præcellentia, exinde facile probantur Hercules omnino plures unius de nomine, cui quasi capiti membrorum omnium officia ad virtutem Heroum omnium virtutes attribuit antiquitas: & quidem exinde temporum ratio nutat, & actionum series male constat, & historiæ fides abrogatur. Illum vero vetustissimum Herculem ajunt ex Arana conjugem filium sustulisse Tuscum, quem post patris obitum regnasse in Italia, & Galatheum fratrem advenientem perbenigne suscepisse: & aliquando cum coloniis in Siciliam amandasse ad certam nominis gloriam, & regni thronum.

Ajunt & alterum filium ejusdem nominis, qui post patrem regnarit, cui & eidem successisse Kithim, qui & Colonias trans Alpes deduxerit, & recensent post eum Morgetem filium, qui Campoblasconi cognato, & Electræ viro Coritatum detulerit, qua de causa regnum deinceps assequutus est, & dictus Hastatus Jupiter, item & Jasius, sive sospitator Jupiter.

At Roma juxta Janiculum summo in Aventino sedes fixerat, & Sicanorum Coloniam sub regina Aboriginum alteram ad ripam scilicet subsidentibus Sicanis.

Hæc itaque Roma Romanæ Urbis & nominis fundamenta jecit, cujus imperium orbis terrarum, nomen nec ipsum præscribere coelum ajunt, cujus ad æternitatem focum excitavit Subregina, per quam Urbs maxima exiguis posita est initis. Et quidem Romuli temporibus jacebant in pluribus antiquæ fundamenta fabricæ, quæ Remus restituere optaverat: sed Romulus prævaluit, & Palatinum murum cinxit, & communivit. Aventinum vero de Remi sepulchro Remuria dicebatur.

Post Romam Romanessius filius Subregulus Montanorum fit Aboriginum: hoc contentus titulo ne matre Subregina natus humilitatis respueret dignita-

A tem: & hic honoris contemptus notabilis est, dum mater non Regina, sed Subregina dici vult, & filius Subregulus regiam adaugeat gloriam. At hæc si qui degenerum quasi deliramenta Principum derideat, is sibi uni sapiens erit nemini Rex optabilis. Adferunt & Romanessæ filios Jasium & Dardanum, & de jurisdictione inter se certasse acriter, & Dardanum, ut aliquando vinceret, Jasium fratrem per insidias occidisse. Sed quod pro Jasio Tusci starent, & Siculi, & Siceleus, qui in Celtiberis regnare coeperat: contra adessent Dardano Vestini Curetes & Aborigines, hoc uno inter fratres dissidio concussa est Italia omnis: proinde ea quæ rerum vicissitudo est, Tuscorum res adauxit & gloriam: nostratium vero adduxit. Fugit enim Dardanus in Samothraciam, & ibidem diutius latuit: Principum & civium conventu abstinens, postquam nudata latera sibi vidit assecularum custodia.

B Successit Jasio Corybantus filius apud Tuscos. In Vestinis vero & Aboriginibus Romanessius Romæ filius: & is primus Saturnus constituitur, Pontifex scilicet Maximus, quo titulo regnarunt etiam & posteri.

C At Romanesso defuncto, Picus Priscus filius successit, anno, secundum Lucidi supputationem, eodem quo CHENCHRES ACHERRES, qui & PHARAO. Is Hebræos, quos abire permiserat, terra marique infestius persequitur. Sed adfuit vindex Deus, qui populo suo mare rubrum sicco pede calcabile præbuerat, subsequenter Pharaonem cum omni exercitu excitationis obruit fluctibus. Ut miremur in maris natura quandam mansuetudinem, qua se Populo Dei calcabile exhibuit, & admiremur item tractabili in elemento iram, qua persequutores inclusos obruerit.

D Deinde ab Athu in Regni Mæonii partem adscitus est Dardanus: & ita Regni Trojani origo constituitur: ipse vero, si quæ in Italiæ regno jura haberet, resignavit Tyrrheno filio Athus, & deinceps constituta est Dynastia in Tuscis duodecim populorum Ducibus, & Larthe; unde Ilioneus apud Latinum Regem, *Aneid. vii.*

hinc Dardanus ortus

Huc repetit.

Ubi Servius, non petit, sed repetit, quasi propria.

In tantis rerum varietatibus, & Principum novitate, quis Janigenarum, Vestinorum, Sabinorum, & Aboriginum fuerit status, edicere operæ pretium, quod ea aut nemo attigerit, aut plerique inverterint, aut præterierint, invidia-ne, an ignorantia, nihil disquiro: sed quantum per veritatis testimonium liceat regionum altrici dulcissimæ adero Patriæ. Nam & pleraque consulto omittimus, quia fide dignum auctorem non habemus.

E Coaluerant quidem in populum unum, quas recensuimus gentes, licet intra suos quisque limites exuberanti annonæ copia, florentibus urbibus, oppidis, vicisque, adinventis artibus, adaucta religione, etiam in foeminis venerabili morum disciplina, fraterna dilectione in alterutrum, & majorum reverentia, & divino in cultu propensioribus animis, frequentioribus aris.

F Cæterum in politioribus, eisdemque ornatioribus, virtus æmulationem provocat, æmulatio, si virtus aderit, gloriam parit. Sed quæ Pegasæo insidet gloria contra exorientis jubar Solis, & ex animi candore metitur omnia post se equitantem, nusquam videt umbram, nihil tale suspicata nusquam proturbat. Illa igitur diuturniorem per moram crevit, ita ut quasi Decumanus limes ad Occasum usque protendi, & omnia opplere videatur. Proinde hujusmodi de gloria & æmulatione quasi de fastigio fastidium excitatur in seminarium invidiarum, quo dissensiones in populis, contentiones in conventibus, contemptusque & ex contemptu inimicitia implacabiles, odia intestina, bella civilia.

Qua de re Sabinorum Patrum jussu Prætor, cum excr-

* In Comment. Servii ad *Aneid. v. v. 824.* legitur *Thoofa*:

exercitu, præeuntibus facibus, ex Amiterno nocturna irruptione Alifam Aboriginum metropolim feriata adoriantur, capiunt, diripiunt, soloæquant. Cives, quas clades non intercept, à Reatinis suscepti gentilibus, quod ex Aboriginibus ea urbs magna ex parte constaret, cum de repetundis frustra agerent, nec ulla de vindicandis spes in armis reliqua, disquirentibus omnia, obrepens occurrit ea, quæ in rebus trepidis incubæ desperatio, nec silenti temperantior, nec obloquenti frugalior est. Itaque Alifani extorres agrum olim patrium, & patriæ rudera Diis devovere in possessorum odia, in ditionis vilitatem.

Ea vero offensa Vestini, quod summa rerum, & sacrificiorum, placationum, item & execrationum apud Amiterninos Patres esset, qua etiam victi & extorres abuti auderent Alifani, Reatinorum occlusi mœnibus, contra Reatinos exarsere, quasi hostes in fide receptos ad hujusmodi intentanda animassent. Igitur Reatinum agrum Italiae lumen depopulari, occupare, obtinere gravi mûlta, ut Reatinos pœniteret pro Alifanis stetit.

Sed, quod humanis in actibus frequenter accidit, NON OMNES PROBANT OMNIA, ex Patribus aliqui & plebe, uti par est credere, & in libera adsolet Civitate, abdicationem hanc quantumvis rationabili de causa; quod belli causas temere causarentur, nulla admonitione præmissa, placidiori severitate, severiori diffidio se à fratribus segregarunt, qui se ea de causa Æquos appellarunt.

De generis antiquitate priscis in Italia Populis, & nominibus recensenda, nemo est qui dubitet, nemo qui indigenas neget: & tamen pauciora scriptorum testimonia haberi, & produci possint. Sed ea nostram per interpretationem dilucidiora fient pro venerabilis æquitate nominis, & sacrosancti dignitate officii.

Quod inter dissidentes populos pacem conciliarint, vel perduellionibus bellum indixerint, unde & Romani Feciales acceper, & feciale didicere jus. Feciales enim fuere qui controversias verbo solverent, & hi per Sertorium Resum in Urbe primo cogniti, & apud Virgilium leguntur sub Ufente Duce Turno Regi auxiliares: & Plutarchus in *Numa* auctor est apud Æquos aliquando regnasse Septimium Medium.

Hi igitur ab origine, ea de causa, quam diximus, seclusi intra montes; & à Meridie post Cranum, qua se mons is ad Occasum vergit & Meridiem, regionem obtinuer, oblongam quidem, ut & Vestinos à Septentrione, Sabinos ab Occasu, ab Oriente vero Marfos, deinceps in Latinos usque & Volscos protensi ad Algidum usque incolant.

Qui aliquando in Phaliscis intra Sabatios, incerto tamen deductore, & deductionis tempore, alteram ad ripam Tiberis coloni confedere, ne unis tantum Ingaunis Liguribus tricies agrum datum, ac toties novas fedes datas Italiam intra Italiam putes. At qui de Phaliscis scripsit, Æquos cum legit, de suis omnino omnia dicta putat, & populum unum uno in loco constitutum Æquicolas omnes adseruit nimis indulgens, nec advertit quod legit: auctores enim subdubitant de Fecialium origine, Æquicolisne an Ardeatibus id tributum fateantur. Præterea dum Æqui Algido in monte L. Minutium Cos. & Romanum concludunt exercitum, vel sequenti anno ibidem juxta infelicitate cum M. Horatio pugnant, dum Baulos in proximo habere leguntur, quos à Labico Labicanos novam Romani populi Coloniam, subita irruptione vexant, quæ Urbes omnino in Volscis in Latio sunt, dum Fidenæ, item & Crustumium in finibus describuntur, certe non hæc ad Phaliscos referri possunt, altera de Tiberis ripa, neque exinde ad Algidum nisi Romanum per agrum, si modo per Romanos, & Tiberim, qui Tuscos à Latinis & Romanis disternat, transitus pateat. Proinde de nostratibus, & qui ad Algidum proxi-

A mi sunt, hæc de Æquicolis agunt historiae.

B Sabini vero alteram per expeditionem ex Amiterno profecti, quo statim diebus populorum Majores, Ducesve convenire, & sacris faciundis, & juri dicundo consuevere Patres Conscripti. Hi quibus ea cura demandata erat, juventutem adesse armatam, & in acie adstare jussam expediunt: Cotylam Aboriginum Urbem nobilissimam monti appositam expugnant, & victoria qui scirent uti in lacum proximum inveci, obtinent Victoriæ numen, & statum ibidem celebrem: tum pleraque circumcirca oppida diruunt, novasque urbes ædificant & oppida, præsidia disponunt, castella communiunt, inter quas Cures leguntur, Coloniam deducente Modio Fatidio Testrinatæ.

C Erat autem Testrina Amiternorum vicus, præsidiumve, quo secundum Varronis sententiam majores nostri in agros rejiciebant cives suos, & in pace à rusticis alebantur, & in bello tuebantur. Hi Nonis tantum ad nundinas in Urbem accedebant, de cætero ruri occupati. Hi bella & pugnas depugnabant pro patria. At qui inter eos Pagi Magistri imminerent ea de Præitura, Magistratue, Tatii & Titii dicebantur, & in iisdem Tutulus si quis insignior in hoste propulsando, proterendove emicuisset inter cæteros: si quis limites, patriamque tutatus esset, nec jam palma inglorius alba procederet. De quibus Tacitus *Annalium* primo hæc: *Titus Tatius Rex retinendis Sabinorum sacris sodales in Urbe Titios instituit: ii ad averruncanda mala extra Urbem degabant, & inter rusticos. At qui vel cultu terræ industrius, operosiorve, & frugi semper probaretur, qui & pacis studio, & rei militaris peritia cives servaret, hic tanquam Vici Magister, & Tatius pro communi Vicinorum Tata habebatur. Unde & Avum, & Atavum habemus: cujus nominis rationem compendio explicare non otiosi quidem scriptoris putamus.*

D Terram ipsam, ut Varro asserit, majores nostri dicebant Matrem, & Cererem, & qui ipsam colebant piæ utilemque vitam agere putabantur; ita qui Civem laudare vellet bonum agricolam, bonumque colonum cum dixisset, abunde laudasse videbatur. In agricola enim rusticum, & militem hujusmodi in vico, castrisve versatum: in colono autem fortem virum, & eundem opulentum, & bene constitutæ Reipub. amantem significabant Civem. Unde, & Illo communitæ Urbi nomen, & fabula illa de constructione murorum ejus.

E At situs Testrinæ non longe ab Amiterno ad miliaria quatuor Occidentem versus, & Meridiem, cui de lanificio nomen inditum, prout inferius dicemus.

F Aderant itaque Testrinatibus Magister & Magistra Vici, secundum limites, vel agriculturæ, vel militiæ, vel lanificio edocendis: ut custodiendæ inprimis pudicitia adessent alacri juventuti, bonis imbuendæ moribus, ita ut eisdem pro trocho, tricisve, post agriculturam, & litterarum studia ad ludum secundarium palæstræ cursus, armorum usus, & labor assiduus, quos eorundem virtutibus jucundatus severiorum patrum confessus, dum probat, & coronat, docilem oblectat, & arguit, validam excitat ad palmam, & coronas. Populum itaque militiam dixeris qui locum castrorum noris. Sed Testrinæ culmina dejecta, moenia item disjecta jacent, & ipsa rudera obruta innato sub gramine delitescunt. Et tamen candor ille lucidissimus de marmorum lapidicina in humeris velum desuper emicat. Nec omnino nomen silentio premitur, eo quod Christianam per pietatem vico aptatum vocabulum quasi vicinæ vocis, Testrinæ, indicium sit: neque abre locus is B. Silvestro dedicatus est, & Ecclesia ibidem constructa, & monasterium ejusdem de popularis nomine, qui in summum Pontificem pro vitæ & virtutum merito adsumptus est, qui pacem posuerit, fines Ecclesiæ, magnum Christiano nomini incrementum.

Is vero Rufini à Rufo denominati filius, gente Cornelia, familia Merula Consulari, quæ ut Varro lib. III. *de Re Rust.* & inter Curetes primaria, & inter Romanas patricia, licet minorum gentium fuerat. Hoc item loci ubi nunc Ecclesia prope diruta est Episcopalis, posita Cathedra Testrinensis Episcopi: legitur & Pinnatium proximis de Pinnatiis: ea enim voce dicebantur humiliora, frequentioraque in Curibus montium juga, à Thebe Bœotia Reatinum versus agrum. Et Varro eodem lib. & cap. agit de Pinnio in his locis ubi ageret.

At situs Testrinæ inter milliarius clivum ab Occidente, & Thebas Bœotias, Amiternum versus ad lævam distat stadiis XXIV. Canium vero montem versus ad dexteram habet, & recta regione eunti ad Hypsæum vicum Orientem versus. Horum nominum Varro meminit lib. III. *de Re Rustic.* ipso in initio. Thebas autem Lacones condidere, quos à nostratibus perhumaniter exceptos diximus. Hi pro castris præsidii hoc loco Milliarius condidere Vicum: sed hæc ad Lycurgi tempora rejicienda sunt: & Amiterninis cessere omnia patribus. Ea enim humanis in rebus varietas dominatur, ut pro Milliario Veliam à vellendo pecore asserunt primo, deinceps Velianum denominatur: & id tandem dirutum est: item & pro Thebas Bœotias Civitatem Thomatiam dicimus à Thomate Petri F. Ruperti Nepote Sulzpacensi, loci regulo, qui oppidum restituit, & muro cinxit.

Sed jam tempus est, ut de CVRETVM, quos diximus, nomine, & nominis causâ edicamus. Hos plerique à Cure Sabatii filio: Dionysius vero ita appellatos ait, quod Virgo quædam indigena clarissimo prognata genere, choros ducens in templum Enyalii ingressa, & ex defatigatione consopita à loci numine compressa Medium Favidium enixa est. Is in virilem ætatem adolescens, & forma supra hominem, & re militari longe clarissimus condendæ Urbis cupiditate, magna è finitimis agris collecta manu, Urbem statuit, eique nomen fecit, vel à genio loci, cujus dicebatur filius, aut ab hasta: (ut alii volunt) Enyalis enim Sabinis, & Romanis de Sabinorum documentis Quirinus.

Alii, & exteri quidem, Esychium sequuti, id esse Nurnen scribere, cui suovetaurilia fierent, integro sue, tauro, & ariete. At nos Enyalium victoriæ numen tenemus, qui per militiæ labores victoriam parari scimus & pacem: illud etiam & salutis numen legimus. Quod & Camulum Sabini dixere posteri, vel Minervam, vel Palladem, vel hastatum Jovem, qui & clypeum gestet & galeam, cujus pro coni ornamento idem quod Enyalio finxere, quale signum Roma videt in ædibus Colonianis ad Æquam Virginem. Curibus hæc cognita numina, quibus proximus est Victoriæ lacus. Alii fabulam aliam commentantur, contestanturque quasi liceat suomet arbitrio condere, & histrionicam facere historiam. Qui dicunt Herculem cum Virgine quadam in foveam concubuisse, & inde natum Fabium vel Fovium: & quidem fovissam pro fovea Antiqui dicebant in sacris cæremoniis: & eodem de Fabio habemus Fabiæ gentis primordia. Sed extra fabulam & scenam illud affirmant indubitæ fidei auctores sacras foveas vel fovissas, vel Olympum circumcirca templum, hoc ipso prisco à Fabio excogitatas: & ex eadem familia factionem alteram vel licentem in Luperco agnovit Populus Romanus. Sabatium vero Curis filium sacræ testantur Litteræ, scriptores item omnes: & Sabinos Sabatii posteritatem condendis Curibus avitum nomen aptasse potissima ipsa ratio quæ suavit, persuadet. De Curetum institutis ac moribus eloquentem audire Strabonem juvat, & eadem explicare non inutile est, qui detonso à fronte capite ad occipitium capillati occasionem aliquam fecere Ecclesiasticæ tonsuræ. Item quod selecta de nobilitate linteati incederent, procederentque ad aras, sa-

A cramve militiam: unde apud nos inolevit albarum usus. Vela item quæ sacra circumdant altaria de Curetibus accepta demonstravimus: iidem Enopliam armatam saltationem, & Pyrrhichicam, unde Luperco suos habuere ritus, saltationem, decursusve, & S. Romana Mater Ecclesia choros, vel semicirculos adstantium hinc inde pro corona Episcopi, & in eis hymnodias alternatim succentas: sed & militiam in linteis Ecclesiasticam, vel in Dalmaticis, & in his defensores albat sub fanone, quem præferunt Dominica sub Cruce, & Diaconi in Dalmaticis armatum repræsentant Principem populi, & Duces qui sub Archidiaconi manu populum per classes distribuunt, & in officio continent. Sed de Curetum saltatione quam diximus, & Enoplia dicebatur à circuitu saltationis, dum Regina partum occultant, & prote-

B Atqui iidem ipsi Curetes adinvenire sacrarum cæremoniarum ritus, qui religiosiori semper in observatione vigent. Eo enim nostra omnis spectat oratio, ut de Ecclesiasticis inprimis tractemus, qui sanctorum Civium & Ducum, & Antistitum nostrorum actus & scribere, & dilucidare intendimus. Quamvis & alia subdamus pro curiosiori lectorum indagine. Curetes, subdit Strabo lib. X. cum prudentia cernerent primi omnium greges coegerunt, reliqua mansuefecere pecora, mellis usum, venandi, sagittandique modum inducere, hominumque cœtum ad communem vitam & legum disciplinam instituentes, & æs fabricaverunt. Deorum statuas iidem, & falcem Saturno fecere: artium item omnium, si quæ excultiores sunt, auctores fuerunt: unde & Idæi, & Dactyli à manuum artificio, & artium dignitate: & Cabyri, & Corybantes appellantur. Hi Rhodum, & Cos, & Camos de Camilliarum nomine, & officio dictum condidere. Hi & Colossos in majori Phrygia, cujus portio, Comæ de Cominis nostratibus, & Istam juxta Macedoniam.

D Sed cum Rhodum ponerent, quo ingenii magisterio pollerent, quoque ferventer manuum artificio, satis superque, & ad admirationem ostentare perpetuam, in deligendo situ, in partitione Civitatis, in munitionibus, & ornamentis publicis, privatisque, ad commoditatem, ad salutem, ad splendorem omnibus numeris absolutissimam urbem; & inter cæteras florentissimam constituere Remp. in qua & Architectura, & Pictura, & Sculptura florere, excultissima orbis terrarum ornamenta. Ut eo de civium studio bonæ artes quasi unius loci, & una ars, & pictura una, Artes dicerentur Rhodiæ: & hæc quidem in manuum operatione est, intellectu in ea pervigili. Unde in Rhodiis numismatibus Solem, cui cam Urbem dicaverunt Patres & plebs omnis, sculptum cernimus, & ex altera parte, latioribus, inquam, foliis, enascentem rosam, qua Urbium designarent florem, & florentissimam in militia juventutem, in majoribus validam viribus ætatem, & consiliis mentem vividam. Hanc autem figuram & nos cum S. Matre Ecclesia admiramur, & veneramur in triginta illis argenteis, quibus pacti sunt D. N. Jesu Christi prodicionem mala mercede mercatores pessimi Judas, & Judæi. Cæterum de his hucusque non ab re positis, ad Curetes redeamus, quos legimus vere novo, adulto scilicet, ad Quintiles Kalendas, qui mensis ab Junone, quæ & Vesta est, vel Ops, & Carna, & Venus, Junius dicitur. Vestæ itaque de constituto, & Jani auspicio usurpari coepit, ut hac potissima die in colonias deducerentur novæ juventutis examina. Unde & mensi nomen Junio.

Qua processione alteras juxta Nomentum Cures ad ripam Tiberis ponunt, & eas minores dicunt, ad quas potissimum referenda sunt, quæ scriptores de Sabinis Virginibus. At de Tatio, & Numa ad regnum accito, & cætera hujusmodi, ad veteres omnino Cures,

Cures, in quibus regnarent: etsi ad has urbi proximiores curulia figere nisi temporarias constanter negemus. Et hac in expeditione Curetum locum quem infederunt Modianum clivum nuncuparunt de Curium auctoris nomine. Et hæc quidem in proximo residendi occasio probata est, ne cum ad Senatum in Janiculo habendum, Aventinove procederet Sabinus, homo quasi per aliena progrediretur loca, peregrinus hospes. Sed & qui Palatium juxta Reate habitant, ad viam Quintiam, locum pascendo pecori dum quærunt, in colle constiterunt, quem Palatium patrio de nomine appellavere, & ejusdem collis partem alteram ad Orientem & Meridiem Veliam à vellendo dixere pecore, cum nondum tondendi artem reperissent. Neque absurdum erit ipsum Aventinum de Thioræ oraculo nuncupatum dicere. Thiora autem eodem in agro, eademque via milliaro à Reate septimo distat. Aliud autem est & ab ea secundarium montanorum Aboriginum Theodium, vel Tode: quamvis plerique eadem in voce fallantur, & fallant: sicuti & in Veisla, magna scilicet Isia montanorum, quam Visla scimus ab Isia Insula, & oppido agri Reatini: neque enim cæco duci manus damus. Qua etiam pro loci diversitate, & temporum, & colonorum discretionem Nursia ab Urfa, & Nursina Provincia ab Urfa discreta est, & D. Gregorio in *Dialogis* caraxata inter se differunt. Sed Urfa solo adhuc nomine internoscitur, eo in monte ubi Urfa urbs olim steterat, & subjecta in valle, quæ loca utraque Orfonia uno nomine appellantur, & ea media est inter Cominium vallem, & Comam urbem ad Septentrionem, quæ & ipsa diruta est. Habet & ad Meridiem Phalacrinam vallem. Quibus de locis progenitas Roma mater agnovit familias COMMINIAM & VRSINIAM, & quæ potissima floruit FLAVIA AVGVSTA, quæ cum & PETRONIA & TVRPILIA commixta.

Thio autem, de qua nobis sermo propositus est, & Ornarium vicus, quod ibidem de Pico ave super truncum querneum consistente responsa petebant superstitioniosiores illius sæculi homines. Ornarium vero vel ipsa ab ave, unde & auspicia denominantur, vel quod ibi Deo auspice ornarentur, qui auspiciato inaugurantur. Inde salutationes ad Portam Aventino proximam, apud Romanos Prætoribus, & auspicia capi solita. Sed si quis ad hæc singula, vel saltem ad priora requirat testimonium, ex Veterum auctoritate meminerit, quæso, Sabatium & Romam Curetis in Aventino monte consedisse primum, & Romam Urbem in Aventino Sabinorum coloniam, & ab auspiciis & auspiciis salutationibus, missionibusve omnino deductum nomen.

Meminerit idem Quirinalem à Quiritibus nuncupatum, qui eo loci consedere, isto inter Tatium & Romulum foedere, & eundem montem sive per Tatium, sive per Numam, intra muri ambitum conclusum. Præterea Capitolium à Sabatio Saturnium appellatum adserunt omnes, quem & Tatiæ belli occupatum retinuit, & ipse primis annis incoluit Numa, qui deinde in Quirinali consedit, & utrobique omnino inter Curetes suos.

Et ita Urbs Roma situm quammaxima ea est majori ex parte à Sabinis obtentum noverit. At nos & Dionysium hoc loci, & ubilibet allegare non pigeat, qui hæc de Numæ institutis scripsit.

Roma, Numa auctore, habet ut Diis quibuscumque aras erectas, multa præterea templa attributa, suo cuique numini festa, & institutis qui sacra curent Sacerdotibus, latisque legibus permultis de castimonia, de cæremoniis, lustrationibus, cæteroque cultu & honore Deorum, adeo ut hac parte longe à tergo reliquerit quamvis Civitatem pietatis nomine celebrem. Porro omnia quæ ad religionem pertinent octo libris, juxta totidem sacrorum classes complexus est; de xxx. scilicet Curionibus primo: 11. vero de Flaminibus: 111. de Tribunis col. 1111. de Augu-

ribus: v. de Vestalibus Virginibus: vi. de Saliis: vii. de Pontifice maximo: viii. & ultimo de Pagorum Magistris. Urbis itaque situs, & populus Romanus, & sacra, & ritus à Curibus crevere. Immo sunt qui Accam ipsam Larentiam Apiam, id est, Vestinam, dicunt Romuli nutricem. Adde à Curibus solemni Paliliorum apparatu accersitas, quas interceptit & obtinuit Roma nurus, quibus cum populus Romanus esse coepit pater, immo & populus ipse, qui constabat tumultuaria de turba Quiritum exorditus adauctus est, qui maximus & firmissimus est. Urbs ipsa inter orbis terrarum urbes & Regia, & Regina amplissima congeminatis intra pomœriis spatia montibus, propagatis Imperii finibus, quæ etiam ad regiminis molem sustinendam à Curibus Reges accersiverit, per quos fortis justitiam didicerit, & Deorum suspexerit cultum. Sed neque unquam aliquid à Diis per sacrificia votave poposcit Populus Romanus, quod non sibi & Quiritibus profuturum præfaretur commune. Sed nec Latium aliunde crevit, aut condi coepit quam per Curetes, ab ipsiusmet Sabatii Coriti temporibus. Curetes enim omne quam maxime latum est Latium usque ad Lirim per opportuniora loca coloniis replicavere patriis: quamvis & Græcorum & Trojanorum colonias eadem in Provincia non negemus.

Equidem Curetum opus Lanuvium, & in eo ædem Vestæ forma eadem quæ terræ repræsentaret rotunditatem, & Jano, & Olympo, & sacra circa ipsum fossa, ut suam in Latio haberent sacrificiorum urbem & Vestalium in ea collegium: præterea & Antemnates, & Tellenses, & CIPERV, & Camerium, quod olim Mediterraneorum metropolis Aboriginum fuerat: sed & Vestinos alteros condere placuit Aufone Duce, urbibus in tribus, Aufona scilicet, & Minturnis, & Vestina, de quibus Livius lib. viii.

Sed & ultra Tiberim colonias posuit Sabatias Sabus filius, ubi & Sabatium lacum proprio denominatum voluit nomine: tum & Vejos de motabilibus appellavit nominibus. Sed & Amitinos Vestinos quidem inter Aruntinos novimus suo de Coritatu. Prætermittimus cætera cum Tusciæ originem subscribemus. Quod si Sabinorum Vestinorum illius temporis limites requiras, ad amissim accipe. Ad Septentrionem & Occidentem protendebantur secundum Aboriginum spatia, qui Umbros habuere collimitantes quacunq; Apenninus longo tractu Italianam interfecat, & Oetriæ alterius Janigenarum, quæ Hetruria est, relaxat spatia. Ad Meridiem vero & Orientem ad Septentrionem reflectitur. Italianam, quæ reliqua est, obtinuit Sabinus, qui rerum gestarum gloria, & æmula virtutum sobole per colonias disposita Provinciæ terminos propagavit. Dispositio autem coloniarum apud majores celebrabatur, ea potissimum de causa, quod subcrescens sobolem, quæ pro multitudine exuberaret, ut nec angusta mœnibus jam capere posset patria, nec ager alendo jam satis esset, novis itaque devovere Laribus oportuit, sedes alio quærere justam, ea observatione, de qua supra diximus: creatis primo Prætoribus deducendæ coloniæ, mittebant novexamini auream juventutem, quam Venerem dixerent fabularum Commentatores, secundum auspicia, certum ad locum per Patres abdicatam, per quos omnia & dicere, & facere, & probare licet, in verbis Do, Dico, & Abdico. Sed prius eandem plene instruebant opportunis omnibus armis, inquam, & suppellectili, annona, ducatu, præsidioque. Juniores itaque compares præeunte Petreia anu, scilicet ludibunda, quæ ebriam imitata præ lætitia oberaret: ipsi vero pineæ arboris ramusculo coronati, & sub velo, ramos prætendentes in procedendo Eana caneant, pro quo posteri Peana dixerent, P. littera præposita, qua & Lares designabant. Et quidem ad hujusmodi, signo hoc etiam ipse D. N. JESVS CHRI.

CHRISTVS sibi complacuit, quando Constantino apparens, clara voce signum victoriæ dedit è cælo Propugnator inclutus, qui & Patremfamilias agere in Constantini Lateranensi domo prælucente divina luce, & ad custodiam excitato igni focum pro altari, & mensam, ad quam & curulum sub velo sibi poni dignaretur, & his, qui vice sua Petro succederent.

Eos, inquam, Natalium Deos Lares, generis scilicet humani parentes Janum & Vestam, vel etiam Cranam, quæ & Ops, & Cybeles altera: immo & Carnia, qua unica voce plura significantur, secundum scriptionis elementa: in C enim generosam natalibus rite conjugatam venerabilem matremfamilias; in Ar vero Aretiam de matris nomine; demum in Nia, ipsam Noctis uxorem.

At juvenus, quam abdicatam diximus eo nomine cantuve Eana Janigena, tum se significabant prolem emissariam, examen quasi apum viridi insidens ramo, Venerem nova spe novorum in floribus germinum est in apibus mellitam sobolem per omnia parentibus adfimilem, pro qua parentes invigilent jure merito. Hæc si ad nostra tempora, cæremoniasque aptatas volueris, in Ecclesiasticis Litaniis, processionibusve pro Petreia Tubicines præmittimus, & similia aliquando usurpamus, historias secundum faciem Sanctorum repræsentantes, & stratas, & parietes ornamus floribus veris, & aras passim positas odoribus suffimus, & alleluaticum melos celebramus in Sanctorum, & Sancti sanctorum laudibus, & invocationibus, qualia priscos apud Sabinos, de quibus Virgilius *Aneid.* VII.

Ibant æquati numero, regemque caneant.

Et in sequenti*:

— pars sanctum voce caneant
Auctorem gentis.

Ut in verbo æquati, compares, scilicet coronati conjuges & animorum eisdem moderationem & gravitate temperatam adolescentulorum jucunditatem intelligamus. Inde illud viridi fertum in pileo Episcopi, & præcipue Metropolitanæ, qui sicuti pastor ovium gregem ducit ipse populorum pastor, post se populos trahat. Cæterum orbis universi Metropolitana ipse est Romanus Episcopus. Quid enim Ecclesia quælibet nisi S. R. Ecclesiæ Colonia est? & qui gregi illi præficitur Dux, pastor, Episcopus, eo loci summi Pontificis Romani vices gerit, pro modulo suo secundum partem sibi adsignatam: eo quod Dominus Papa simul & semel locis omnibus adesse non possit, qui tamen auctoritate & potestate omnibus præest, Magisterium & Ducatum præstat. Una itaque est Ecclesia, & Episcopus item unus, & fides una, uti in humano corpore cor unum, & anima una. Vides igitur & in sobole, & in parentibus eandem VENEREM, formam scilicet & politicam & parentum erga filios curam & studium invigilans: Venus itaque quod ad omnes eat, invisens si quid oporteat ad summam animorum jucunditatem, ad sollicitudinum sublevamen, ad virtutum rudimenta, & profectum, ad generis æternitatem. Neque aliena de causa Venus dicitur humano in corpore hepatis dominari: in hepate enim ipsa est vena, & porta, & fons, unde sanguis per omnia humani corporis membra diffunditur, vivo & innato fluendi vigore: ipsa autem caro ex sanguine est, & ipsa, inquam, Venus est bene formato in corpore flos pulchritudinis, bene formato ex animo sapientia virtutum specimen. Unde Virgilius *Aneid.* V.

Gratior & pulchro veniens in corpore virtus.

Sed jam ad institutam redeamus historiam. E Testrina itaque Amiterninorum vico, qua ad meridiem & Occasum positas diximus Cures: è Curetibus vero Sabatias, & Latinas colonias habemus. Sed adhuc

* Memoria lapsus est: Virgilius enim hæc non habet, sed Silius Ital. lib. VIII.

A altero de vico, qui ad Orientem vergit, dicendum restat, Conio, inquam, cujus originem non legimus: & tamen ex Conio, vel Coniatibus Conitum libaminis genus in delitiis frugalioribus novit antiquitas, quod libamen de farina conspersa factum adferit Festus: ornatum vero hominem Afranius, & ex cultu eo vocabulo significari declaraverat, ut qualis is esset populus uno ex verbo discas. Cæterum nec Testrina Conium inferiorem tempore, neque magnitudine supparem dixerim: quod is pervetustus & frequens perpetuis auctus incrementis post dirutam Amiternum, utrumque pene exceperit populum, oppidum jam ex vico: immo & urbs, quæ B Episcopum haberet Ducem populi post Amiterninum, secundas continentem in antiquis Conciliis.

Ejus constitutio, sicuti ego accepi, ad Cranui montis radicem fuerat, cui imminabat è promontorio proximo Arx pro oppido ad Civium securitatem, ad opum congeriem. Inventum vero Opis oppidum ex ipso arguitur nomine. Ops autem ipsa est Crana: habet autem se oppidum ad Rempub. quomodo penus, & focus, & domus ad familiam. In illo itaque publici Lares, communes Dii: unde ante arcem & prætorium ara: in privatis vero ipse focus pro ara est, tectum pro munitiuncula, sella patrisfamilias pro Prætorio, de communi sacro: Lares autem utrobique gemini, & ipsa congestione scilicet in penu, & C distributione, quæ voces in Pilumno, & Picumno antiquitas venerabili novit symbolico: & in utroque gratiarum actiones, sive in primitiis decimisve, sive etiam in quotidiana exhibitione probemus, quæ habentur apud Suetonium,

Italia Duorum

L. Babi, & Petili.

Italia scilicet, quæ uxor olim L. Babi fuerat, per secundas nuptias L. Petilio conjugata est, utrique carissima ut lux & pupilla oculorum, quæ & Lucia appellaretur de conjugum prænomine: & in Bæbia gente Tampilum legimus à minuta distributione in diurnum, quod & Pilumni nomen significat: is enim pilum & pinsandi adinvenit artem, cujus imago ossæ est nudata carnibus, in qua ossa enumeres omnia sigillatim singula cccclxvi. quasi dies, & horas quæ superant in anni circulo, & in annæ perpetuitatem. Petilium vero pro Picumno ab indagando & instanter congerendo ponitur. Quamobrem in Petilia gente Capitonem scriptum reperimus, quo nomine & Lares dicimus. Capitones ipsos quæcunque instrumenta sive lateritia, sive ferrea ligna ad focum sustineant. Sed Festus in verbo *Petiliam*, suram significat, inquit, vulgo suram siccam, & substrictam. Scævola vero ungulam equi albam, & id quidem à Calpe quasi Calpetila descendere de facili conjicitur, dempta nomini priore syllaba: nec ab re allegare est Capitolinos in Petilia gente recensitos, sed à Bæbio Balbum pro patre infantes balbutire lallantes norunt. Habes itaque una ex Inscriptione quicquid in hujusmodi desiderare possis, & à nobis explicatum quidem satis.

F CRANA itaque mater edocuit oppidum edito in loco condere, & circa oppidum per omnem convallem, & palatinas incolere ad agrorum curam, & cætera quæ diximus exercitos vicinos cives, castris vicum construxere Conium, & apposite quidem. Cum enim Amiterni Proceres pineam coronam ob Vestæ venerationem, & Virginalis collegii dignitatem in insigniis gestarent, belli pacisque temporibus albat, ut diximus, eorundem soboles, procedebant. Pini vero nucem, quæ ex figura Conium dicitur, in manipulis & cæteris militaribus signis præfixerunt, & ipsum patrium vicum eo nomine appellarunt. Sed & nux pini pro sceptro & pro Pinariorum hasta antiqua habent monumenta, & hujusmodi etiam signo unitas præsignatur, & virtus populi sacerdotali munita præsidio, & templorum cura, & procurata.

Sacer-

Sacerdotibus annona, & ingenuitas generis, & candor animorum, & fortitudo orientali in limite ad tutelam & securitatem patriæ invigilantium juvenum, quibus niveum pectus concordie candore purpureum in unitatem fidei constans, prædurus obtendat cortex.

Et tamen Vicani non Conienses, sed Opici, qui deinde Japygentes, & Pici, & Picentes dici coeperunt, prout infra suo loco dicturi sumus. Vestini enim ad meridiem Canio, vel Sicanio vallantur monte: atque Oerea confragosum scilicet promontorium secundum flumen ad Orientem se exporrigit, quasi super sinistram recumbentis format imaginem, cujus thorax faxeus, venter vero ab umbilico in marinæ conchæ speciem concavus: cavitatis autem tanta est ut colli, qui antestat, æquari possit Eryci, & is neque arbuta gignit, neque gramina omnis omnino nudus, & adlambentibus animantibus quasi salis petra appetitur, & proficuum est, ambitu milliarium non excedit, altitudine vero ad tertium exsurgit stadium. Inde Veneris & Erycis fabulam, unde Nymphæorum figilla veteramentarii conflavere. At nos hæc quidem ad coloniarum figuram aptamus: & quidem plus fatis prodest ad Vencrem, & uberem uberiorem felicitatem adulta jam ætate adstans & instans Virginibus procax juvenus salax.

Quo de loco quot emanarint coloniæ, vel id unum testimonium probando satis, quod Romani cum pro Republ. & Imperio, coloniisque sacrificarent omnibus, pineas præferebant ad sacrificia nuces, & oleam pineatam ad tripodem sedenti emeritæ militiæ veterum novere symbolum: quo perpetuam cum dignitate annonam de publico statim contestantur monumenta in Urbe, & alibi plura.

Sed in rem nostram intra Conium ad Orientem Vestini constituere Erychium, quem locum stadium dicas, vel campum ubi luderent, sive ad gymnasium Philosophantium, sive ad palæstram, & similia sese exercentium juvenum. Ad Occidentem vero Balneum Vicum, qui licet in vicis minores, villasque distributus sit plures, usu tamen obtinuit uti de balnei nomine nuncupentur, quasi pomœria Urbis. Quod eo præsertim loci ad balneorum usus vasa, & cætera antiquitatis monumenta vetus nomen, & officinam contestetur. Ad Balnei sinistram Occidentaliorem vicus est civitas, cujus apud Antiquos vetusta nominis causa, ne quis putet per secundaria tempora illuc translata de Amiterno Episcopali Cathedra Inscriptionem vetustissimam legat, quam infra adscribemus longe ante ea tempora, & in CLAUDIUS Civitatem cognomentum vetustis in monumentis: de quo infra. Sed & ibidem loci Basilicam Gentilium templum unum atque idem alterum. Expurgata hæc omnia, & in Ecclesiam Dei dedicata utraque sancti Maximi Civitatem dixerunt Veteres.

At templorum, quæ diximus, alterum Urbi Aquilæ proximius Cupra: nomine Cupra autem & ipsa Venus est. Deinde ad Orientem milliario circiter tertio recta regione eunti occurrit Eburium, ubi Sacerdotes collegium haberent & dispositas juxta se per Vicum familias: ad Septentrionem vero intra Veræ & Aterni influentes sinus Ode locus pro comitio, ubi & Puteal laudationum, vel allocutionum, & ibidem juxta ad Occidentem Vatia ad Veræ fluminis utramque ripam hinc inde pro corona vicus, sed in ipsa prope Fidii montis crepidinem Genium Jani.

Hoc loci illud advertendum se offert, quid in Vatia nominis, quæ significationis vis insit: ubi enim certius vaticinium esse possit, quam ad Veram per ipsissimam rei veritatem pro Jani genio piissimi, sanctissimi, & veracissimi patris. Unde & Vatia altera in agro Reatino, quæ percommode in B. Jo. Baptistæ nomine immutata est plusquam Prophetæ. Sed & accolarum nomina, & cognomina nostram in adsertionem, & per vetusta monumen-

ta incorruptam veritatem inconcussa constantia moribus antiquis custoditam liquido probent. Unum enim vel alterum, sed & tertium, & quod excurrit, esto pro millibus: nam & de Claudiæ gentis nomine, & natalibus pone agemus, utpote qui in primis cognitis id supponamus. Ad Oppidi enim firmitatem, ad Oppidanorum pacem, & annona facit, & opes, & eorundem custodia, legum reverentia, exercitia, quibus Tirones probantur, laudationes præterea, & præmia ob virtutem. Quæ res ex vetustis Inscriptionibus exemplo quasi ad allusionem adposito quam oculatissime appareat. Sed hæc paulo post, qui loci situm plene præscribendum putamus.

Quod enim reliquum est planicie, ad forum Appennini, & Veræ fontem, qui pro corona Veram cingeret inter Verium Vicus, & Forconium vulgo Paganicum, frequentius quidem. Ode autem, vel Odeum diximus Vicum peninsulam prope ubi fluvii duo confluentes, quasi pro salutandi officio de loci nominis nomen novum & commune adsumunt Avellinum, à quo in Campania urbs, & populus. Sed de Claudiæ gentis origine & Plutarchus in *Problematibus*, & Virgilius dilucida illa rerum & nominum proprietate Poetarum eloquentissimus, *Æn. VII.*

Ecce Sabinorum prisco de sanguine magnum

Agmen agens Clausus, magnique ipse agminis instar;

Claudia nunc à quo diffunditur & Tribus, & gens.

De sacrificio autem gentis Claudiæ peculiari hæc Festus: Propudianus, inquit, Porcus dictus est, ut ait Capito Attejus, in sacrificio gentis Claudiæ velut piammentum, & exolutio omnis contractæ religionis.

Sed & Clodiam legimus antiquiori prolatione, & pro Claudiam allusione quadam ad Odæ nomen, & loci clausuram, quam diximus, & pro ea accipe vetustatis testimonium:

OPPIÆ C. F. VERÆ CLAUDIVS SEVERVS.

Et alibi:

EREPTA EST OPPIA FIRMO.

Basilios vero Oppia in gente, ut exinde loci ibidem proximo nomen factum sit, Bassiano nisi à Vatia utriusque. Qua parte Vera fluvius in Orientem convexus sinuatur.

Cæterum de gente Claudia in hortis Medicæis suburbanis:

Q. CLAUDIUS HESYCHIUS FECIT SIBI, ET

CLAUDIÆ ODÆ CONJUGI, ET

CLAUDIÆ VERÆ, ET

CLAUDIÆ CIVITATI,

POSTERISQUE SUIS, ET

RUFFIÆ REPENTINÆ CONJUGI.

Et Silius Italicus lib. VIII.

Ecce inter primos Theramæo à sanguine CLAVSVS
Exsultat rapidis NERO non imitabilis ausis.

Hunc Amiterna cohors, & Baccho nomina ducens
Casperula, hunc Foruli, magnæque Reate dicatum
Cælicolum matri, nec non habitata pruinis

Nursia, & à tetrica comitantur rupe cohortes.

Natale igitur solum gentis Claudiæ adparet, & præter locorum nomina, quæ recensuimus, etiam Ruffiorum memoria diruto adhuc in vico prope Bominaculum, in Ecclesiæ titulo reliqua est sancti scilicet Petri ad Ruffiam. At Bominaculo nomen fluminis profunditas fecit. Is locus infra Eburios est ad milliaria circiter tria. Sed juxta eosdem Casentinus Vicus, cujus etymon & nomen de Claudia, & Repentina gente compactum oculato inspectori se prodit. Eburios vero sacerdotes diximus, purpuratos, inquam, patres apicatosque. Hi & vicum quem & selectum incolerent, & agrum sui de collegii nomine possessivum denominarunt, & is uberrimus quidem est, cujus utilitate, & salubritate aeris, & amoenitate loci ultra annonæ usum, & cultum frugaliter,

& magnifice oblectarentur lautissimi hominum. Quo de loco Vestini adaucti numero generosam sobolem in Colonias deduxere, primam secundum fluminis ripas, deinceps progressi ad maris littus Atriam ibidem condidere de loci amplitudine denominatam, oppletis primo, ut diximus, quotquot proximiora & opportuna reperirent loca.

Interea Patrum decreto Apenninum superare iubentur à Veræ fluminis fonte, & descendentes proxima mari supero ad Occidentem occupare littora. Et quidem animo volenti dicto parent, expediti adfunt delecti Tirones, & quo Prætores auspicati signa moveri iubent, & ipsi in viam se dedunt alacres.

Tum Pici præpetes advolant, & progressuri super signa insident, deinde se paulo altius sustollentes supervolant, quasi præcedant Duces de cælo missi alati præcursores: sed cum prandendi, vel figendi castra hora esset, ad signa declinantes adsident auspicato, in eisdem quasi in trichiniis præsident, cœnantque, & somnium per noctem capiunt, metatores diceret & convivas, immo & Phagones junioribus ad genium, ad Patrum admirationem. Ea itaque Ducibus relata gratia, ut & ipsi commilitones Picentes dicerentur, nedum oblatus cibus hospitibus nova in regione perpetuo applausu. Præterea, ut facti memoria apud posteros servaretur antiqua, ad Apennini Alpes usque & jugum crescente clivo duas designant sedes, Aviam scilicet ab Avibus, & Pedicinium à sacerdotali pedo, unde Populi in Apulia Pedicini deducti. Sed hujus nominis apud nos Vicus vetustate collapsus est, populus novam in urbem Aquilam transmigrare iussus. Ipsam vero Aviam aliquando ex præcepto Leonis IV. qui Capracorum militiam instituit, ad Urbis Romæ, & Vaticanæ præsertim Basilicæ custodiam; idemque ad patrimonii tutelam, & totius Italiæ securitatem claustra montana, & convalles, & pontes, & portus omnes, & limites communitos voluit, quo Barbaris inaccessa forent: eo itaque in verbo Proceres, qui militia apud nostrates eminent, arcem hanc restituere, firmitus construxere, magnificentius servavere fortissimi. Cujus cum mœnia diruta, & ruderibus obruta herbis innascentibus floridam conspexissem, Apennini coronam dixi. Excepere verbum comites comiter & hilariter. Et hujusmodi adhuc inter rudera internoscitur memoria, & Ecclesia sancto Leoni primo dicata, qui & primus Vaticanum communire cœpit, & limites ditionis Ecclesiasticæ custoditos voluit quidem, cum Cubiculariorum collegium ad excubias circa Apostolorum corpora excoGITAVIT, & monasterium sanctorum Joannis & Pauli ibidem juxta constituit. Sed tantis Pater defunctus laboribus ad requiem evocatus est, cujus nomen, & tantarum opus laudum Leo IV. adsumpsit quidem & perfecit, tunc nostrates locum hunc, ut diximus, communivere, quem tamen non jam Aviam, sed quod fontes irrigui exinde demanant plures, Venarum dixere Arcem. De militia autem Capracorum monumentum, quod præfractum quidem habemus inter pleraque nostratium monumenta intra Urbem, in pavimento sancti Jacobi, ad Septimianum, Transiberina in regione de proximæ turris ruina servatum. Quod tale est:

Hanc Turrim, & Pagineuma facta

A Militia Capracorum tempore

Leonis Quarti Papa

AG. P.

Qua nota Agathonem Primererium intelligo. Capracorum autem de loci nomine in altero Apennini jugo Capracorita, sub montis supercilio, quem de Gruma vetusto nomine (id enim supercilium significat) jugum illud Majellam appellamus; ad Majellæ itaque supercilium is locus est cum montis ascensum prope superaveris descensurus jam Corfinium. Ea Pelignorum metropolis. In Ecclesiasticis autem Ca-

A pracorum militare nomen, & cui militare insigne cornu fuit, ad dignitatem militiæ sagacioris quidem in custodiendo. Quo nomine loca pleraque adhuc habentur, licet ipsum nomen in Caprarolam deflexerit, cujus olim situs juxta villas locupletes Ecclesiastici Patrimonii, in quibus Prætoriola, Galerias vocabant à prospectus amœnitate, & deambulatione. In Caprarola igitur excubiæ militum, & rusticorum tabernacula, stabulaque. Sed tamen utraque cessare in villas rusticas. Sed & nomina & imagines rerum diruta est antiquitatis fabrica, monumentaque prope omnia hic & alibi deleta deplorataque. Juventutem vero, quam diximus, in Coloniam deducendam auspiciis Pici per montana, & Titean, & Tussitium, & Montaranum priorem ad Forulum, & alterum denique campestem ad locum devenere. Aderat eisdem Prætor, qui Apis, sic dictus ab Apia, vel eo forte de auspicio majoribus qui inauspicato nihil gererent, quorum arbitrio in præpetes alites res committi placuit, uti diximus.

Cum vero præfinitum ad locum infra montes ventum esset, tunc Picus plurimus ad Esculum quandam excitus advolant, confident turbatim: deinde ex eis aliqui conversi occurrunt, adventantes excepturi, ut non ultra Duces: sed castrorum præfecti metatores, hospitesve humanissimi voce, alis, quos poterant plausus & lætitiæ signa edunt alacres: & quasi identidem facturos comites vellent, adhortarenturque, plausus ingeminant prænunciantes concessum expetitur, exquisitum patriæ solum, & agrum uberem. Quare omnes patriam salutant & numini gratias agunt eandem juxta arborem altare erigunt, vota que persolvunt animo lubenti; deinde circum circa castrametati muros & pomoeria designant, vicos, vias, plateas dimetiti. Aram igitur & arborem in urbe mediam dedicant, & eam sacrificiis celebrem faciunt, muneribus ornant, pendulis odoratam suffimentis, & oraculis nobilem. Coloniam nomen item eadem ab Esculo imponunt, ita tamen ut præponerent A litteram pro dignitate loci, Prætoris de nomine: itaque Æschylum nuncupant.

Quo loci Populus brevi coaluit, & adauctus numero est, ita ut omnem regionem inter Apenninum & Mare in longitudinem porrectam excoluerint. Perpetua metropolis Æsculum facta jam in Picentibus mater urbium.

E Et hæc quidem longe ante Picum Priscum. Perseverant etiam adhuc plerisque in locis, & oppidis, & urbibus vetera Vestinorum nomina, utpote Mons Eburius juxta Æsculum Eburiorum scilicet colonia, & Cupra Montana, ubi Cupræ illud Junonistemplum & emporium celebre, de quo Strabo lib. v. & altera item maritima à Cupra nostrate, quam diximus juxta Conium, ex vico olim & templo nobili, de quo superius; sed locus is modo vitibus confitus est: unde etiam & Romæ olim celebris vicus Cyprius ad clivum carinarum, ubi nobilissimi Sabinorum confederunt, quamquam non desint qui de statuis è cupressio frequentioribus nomen vico impositum velint. Sed neque à Conii figura cupressus abest, neque ab Opi Cupra: Cupressus enim & ramos & fructus una educit, quo colonis optatius magis nihil dixeris: tunc enim, & urbs conditur, & pomoerii spatia dilatantur, & murus firmior est, & cultior ager, cum succedit in sobole virtus, & sapiens in majoribus consilium. Quibus artibus in Rep. opulentiam fortitudo, justitia & gloria operantur.

F Deinde & inter cæteras in Picen Aufidenam urbem & fluvium à Fidio, quem diximus, monte numineve, A littera præposita, ut in Æsculo diximus, novi conditores nuncupant. At is Fidius mons, ne quid indiscussum prætereamus, humilior quidem & inter Sicanium & Apenninum medius brevi intervallo, quasi de torque inter mammillas gemma dependens illam intra connexionem montium. Cujus

ius symbolum decorans conjugia praesenti animorum concordia, unde & matrimoniorum Deitatem majores Medium venerati dixerunt Fidium auctorem, & vindicem ubique venerabilem. Ejus autem tumuli prima incrementa sensim adsurgunt, Anfantinos inter & earum ductu, & Carnienas aquas hinc inde medias quasi ad sacramenti & communionis inter virum & uxorem enatis aquis, & recta regione quasi erectis protenditur aris per milliaria tria, ad Veræ fontes, per Conii campum, & Odeum: sed magna ex parte cinctus mœnibus, coronatus propugnaculis, elatus turribus, templis firmatus magnificentissimis, adauctus Ecclesiis, fundamenta hæc nobilissimæ Urbis Aquilæ dulcissimæ & exoptatissimæ patriæ.

Crevit, & à Firma gente Firmum colonia condita est, perduratque (si pax aderit) inconcussum. Ab Osia vero, quæ & Auxia, Ofimum vel Auximum. Sed de utrifque antiquitatis irrefragabilia producamus testimonia:

FIRMVS SABINVS
M. COELIO MARCELLINO
ET CYSPIAE M. F. MARCELLAE VXORI
L. COMINIO L. F. L. N. FIRMO
P. R. Q. AER & ALIM.

Et in *Hist. Hisp.* Ludovici de Pontes:

CLODIA OSSANA MATER
JVLIAE SABINAE F.
JVLIVS M. F. AVXIVS
C. AVXONIVS Q. F. LEG. XX.
FLAVIAE COL. FIRMI PICOENI
SEVI MANCIPTVS
FECIT SIBI ET FLAVIAE
Q. AVXI. Q. F.

Sed & fluvio, qui Senogalliaë muros adlabitur, Aterno de patrio fecere nomen, qui in Picenum transmissi novam condidere Urbem, quæ deinceps à Gallis Senonibus novo nomine adaucta est.

Gentis felicitas vel ex illo arguitur quod ccc. civitates brevi condidere, & maritimas sedes navi quærere coacti fuerint Picentinas, & ccclx. hominum millia Pop. Rom. praesto fuerint auxiliares copiae, sociales legiones. At Senatus Amiterninus ob rem bonis avibus bene gestam, ubique locorum Aviam vel Avianum condi jubet, novis coloniis quasi coloniarum Principem per expeditiones singulas. Sed & Conii populi Picenses, & Avicenses, & Apiam arcem nuncuparunt Picentiam, & Aviam, & Avicensem. Deinde etiam & Japygensis ex maritimis expeditionibus, de quibus inferius per nominum varietatem, multiplicationemque. Certe Opicos negaverit nemo qui opes spectet agri felicitate, sive is montanus, sive campestris sit: is, inquam, irriguus semper, & ubique se ipso uberius operosior Vicanorum industria, quos ad congerendas opes colonos validos in cultura exercitos peritiores: proceritate tamen, & vultu, & moribus nusquam rusticos praeduros licet, expolitissimos dixeris ruri degentes homines agriculturae deditos, & militares viros. Placet omnia & singula explicare, quo facilius intelligatur, & dijudicetur in singulis quasi sub oculis folis hujus exposita. Quæ si veritas ipsa suo probavit jubare, tum nostra demum historia firma fide constabit.

At Populus Vestinus pro temporum varietate, incremento, detrimentove & Reip. & Imperii, per illam rerum omnium concussionem agere, & pati fortia, virtute conniti, pietate repugnare, ita ut quæ Romanus diruerit, ipse meliorem in faciem restituerit Vestinus, & potiori quidem in loco delectu laudabili oculo pervigili. Sed & Barbarus quasi aper irruens vastat & dissipat omnia: eadem Vestinus reparat, & communit, & ornat, fortior & magnificentior. Amiterno enim diruto per Cornelium Syllam oblitus est majorum fuorum patriam. Cæterum Patres Conium commigrarunt, quos & populus

A sequutus est, & vici situs in latissimæ Urbis excrevit sinum. Deinde contra Barbarorum irruptiones editiora captare montium culmina hostibus inaccessa magis, & civibus firmiora. Demum in Remp. constituendam convenere: quæ enim inter diffitos aut justitiæ, aut charitatis communio esse poterat?

Igitur qui ad foros confederant more majorum de ipsius Jani, ut diximus, instituto, hi tandem aliquando novam in Urbem condendam, & Remp. constituendam convenere, & ad agriculturam rusticos prioribus in vicis constitutos missos fecere. Eo autem de agricultura & felicitate Martialis uno versiculo, *lib. xiii. epigr. xx.*

Nos Amiternus ager felicibus educat oris.

B Sed in his frequentius excrevit forum, quem diximus, Conii, ut jam non Civitatis quota pars, sed integra, & per se plenior, & celebrior civitas esset. Forconium eidem nomen, sive à vetusto quem recensuimus Forco, vel à latitudine infra montana. Sed à Forconio infra milliarium distabat Cados, vel Cadichium de Porreci Cados cognomine.

C Auctus itaque Forconii si causam requiras, loci amœnitas, & uberius agri fertilitas, Veræ fons & fluvius, & aquarum copia, & piscium, quos *troutas* dicimus ad ripas sive alieno studio, sive sponte sua per aquarum applausus colludentes circa fontem, & arbores frequentiores: inde Vico Paganico nomen ager is semper floridus, & ubique irriguus, ut ver videatur perpetuum ad Veræ sinus adridere jucundissimus verna. Huc Vestini Proceres, quorum pars maxima Romana de nobilitate, convenere aliquando. Huc & Normanni, qui in comprimendis, expellendisque ex omni Italia Græcis, & eorundem avaritia, socordiaque castiganda enituerent Italici Proceribus admirabiles, quod singillatim singuli contra milles pugnant: eos itaque omni studio invitare, retinere benignitatis vi adhibita amantiores hospites, & amabiliore in dies. Huc Longobardorum mansuetas, & humanitati consona, proximis de locis, & Campania omni ubi dominarentur, convenit nobilitas.

D Et quoscunque præterea vel bellica virtus, vel morum suavitas, consiliumve & rerum gestarum gloria Heroas illustriores faceret, sive per sacræ expeditionis tempora, de quibus superius, cum de Lacinibus ageremus.

E Sed ne quid minus Longobardi, Normanive à Campania evocati hoc loci viderentur habere, Beneventum pro Forconium eam Urbem appellare placuit, ubi & Ecclesiam sancto Bartholomæo, in cujus sacrario veteri Pauli IV. temporibus reperta conspexi sanctorum martyrum corpora Justæ Virginis, & Justinii Episcopi, Felicis, & Florentii, & N. Syontinorum, suo unumquodque in loculo lapideo segregatim collocatum. Qua rerum explicatione implicat quoniam loci Nicolaus II. Papa anno x. circiter lx. post millesimum Robertum Viscardum Apuliae Regem constituerit, Beneventum in Samnitum, an nostratis: (sunt enim qui hæc ad Aquilam urbem gesta scribunt) & quidem recta scripsisse videntur ex ipsa locorum propinquitate, sive ad Veram, sive ad Cranienas aquas id factum velint, loca hæc in proximo sita: à fonte enim, quo Vera fluere incipit, Cranienæ aquæ ad milliaria quatuor non distant. Ad aquas autem Cranienas nobili quadam & generosa æmulatione confederat gens, quæ & ab Aquila, ipsis, inquam, scaturientibus ab aquis dicebatur, fundorum comitatu, & militari disciplina, & rerum gestarum gloria illustres viri, quibus cum Romani Quirites gente Pilia vetusta de Pompiliorum origine: ad eas enim familias, & populos eisdem subditos spectabat is avita possessione locus. Hujus itaque agri domini plerique & ipsi illexerant Heroas, magnifica munificentia, lauto apparatu, sed quorum studia mira felicitate æmulantes anteverterit Veranos, præverteritque eo in Olympo. Hinc

enim locus, raris scilicet, sed magnificis aedificiis in urbem crevit, quæ in dies auctior facta est tumultuantis populi voto. Huc enim commigrare coacti sunt Beneventani, quos diximus, Proceres, & ea omnis nobilitas & populus, qui ad Veram confederat, nedum Curetes. Quamvis etiam nunc satis frequenti in vico populus, & numero, & opibus non contemnendus perseverat, & adhuc Beneventanorum Ducum inigne gestant Pagani scilicet homines Diadematum in fronte caput, & Vicus ipse Paganicum appellatur. Sed quod per ea præsertim tempora, quæ simpliciter alere videbantur ingenia, & sacræ expeditionis occasione castra construi placuit. Quod duarum rostratarum navium per mare procurrentium imaginem repræsentant. Ipsa enim fabrica, & situ adeo graphice, adeo venuste obtuentium se offerunt oculis, ut quid majus excogitari sit impossibile. Proinde quæ navigaturi essent tamquam de navalibus procederent, neque de numero, neque de nomine militari exirent, qui per ordinem alteri præcederent, alii subsequerentur suppres ut intelligamus in his, qui majoris quive minoris ordinis. Qua de re locus is Navilia appellatur.

Proinde novæ Urbi Aquilæ venuste quidem aptari potest illud Solini calidis frigidisque de aquis, quæ Sextiæ dicuntur: quondam Hiberna contulis postea exulta moenibus. Sed & ipsæ Aquarum Sextiarum nomen à Sexto Attico Vestino, ut ex Inscriptione ibidem constat, obtinent:

SEX. ATTIO ATTICO PATRI,
VALERIE SEXTINÆ MATRI,
VALERIE ATTICÆ SORORI,
SEXTO ATTICO FESTO FRATRI
ATTICÆ NOVELLIÆ FILIÆ,
MEMINIÆ PRIMÆ VXORI
L. ATTICVS SECVNDVS SIBI,
ET SVIS V. P.

Integram Inscriptionem adscribere placuit, quod & nomina, & gentes nostratia sint, & locus hic procedenti Pontifici commodior, & propinquior, nisi ad locum utrumque pro voto, precibusque Procerum, & populi annuens accesserit: neque id incongruum est, si modo vera sunt, quæ leguntur.

Descendimus ad tempora, inferiora quidem: & diutius pervagati sumus. Sed ea est historiæ ratio, postulantis ut omnia nostro dilucidemus stylo: quæ nunc ad priora nos revocat.

Curetes Patrum jussu novo edicto expeditionem expediunt per montana Aboriginum: & Comerum Vicum secundum Apennini montis dorsum, sed olivis vestitum fertilibus, & teneris virens herbis, Apianam, vel Apicennam condidere alteram. At quæ deinceps tertia, qua ad mare mons declivis spectat, deducta est. Tertia, quæ Pinnensis dicitur Civitas, & infra montem per convalles undequaque patentes, qua fluvius ex rivorum confluentium auctu procacior factus, & tumidior ea provolutus regione ad mare delabitur, cui nomen inditum APRUSÆ, vel ab apri ruentis similitudine, vel ab Apro coloniae deductore, ea regio omnis circa fluvium oppidis & vicis frequentioribus oppleta, ubi primum familiæ pro populo pleræque dispositæ per loca, quæ agri ubertate numeris colonorum sufficeret. At juxta mare Istonium à vici patrii appellatione, colonos vero Istonates dixere Vestini: ab Aprusa autem fluvio. Provincia omnis ejus decursum fluminis, & ultra Aprutium nuncupatur pro Aprusio, facili apud majores litterarum commutatione. Item alias à Patribus excitati: urgebat enim expeditionis causa, sobole multiplicata. Igitur ejusdem generis Apro Duce per montana Aboriginum, sive Umbrorum, progressi Aprusæ alteri fluvio nomen fecere. Hi Modianum condunt, & nuncupant patrio de nomine, qui olim ad Velinum lacum Modium Vicum à Modis condiderant. Gentis hujus supra meminimus in Modio Fabidio Testrinatæ, & is vicus distat ad milliaria duo

à Scandrilia, quæ ab ABASCANTE, & Ascanio denominata quidem est, utpote Scanianum minoratione quadam vocis in Scandriliam deflexum nomen, nisi is idem colonus deductor Modius Junior fuerit: denominare enim & imponere nova gentibus nomina id tantum (ut Fabius adserit) Ducum & Regum jus est.

Idem & *Sarsinam* Plauti patriam excitarunt, de Sari fluminis vocabulo Vestini & Sabini coloni: nam & fluvius, qui infra eam defluit, Sabum appellant. Exinde Ariminum ad maris littus dextrum, & ea urbs nobilis, de qua varii quidem varia; vox certe sonat exaltatam moenibus & turribus, Mino Duce, coloniam. Minus itaque, sive à minoritate nascendi, nam ultimo loco genitos, ab ipso natali, *Principios* dictos, & regnantes diximus Cranum, & Cranam, vel à minoritate staturæ, vel à minandi officio. A Mino itaque Minecia gens, quæ *Minicia* dicitur, & Minutia ab aquarum deductione, per fistulas scilicet solidas, qua transitus sit opportunior, sive excavato per terram rivulo. Unde & minas, sive immincant juxta terram, sive infra per subterraneos cuniculos, & facere item minas pro cuniculis oppugnare, claret in Miniciis aquis, & in Miniciorum familia legitur Apronianus eadem in gente nobilis, & Naarthium præfectus: à Mincia item Arimini Corrector Flaminiae, & Piceni qui & Genuensem agrum terminat. Coloniae enim in ejus perpetuæ clientela familiæ constanter perseverabant, à qua deductæ essent, sicuti & devicti in victoris familiam & clientelam transibant.

De minoritate in Minertimo significata auctor est Festus, & in Minerva de Ducatu populo præstito, facti testimonium in Capitolio illustrissimum plerisque in statuis, & ipsa in Minervia legione, pia, fideli, quam Domitianus conscripsit ex Vestinis, Curetibusque.

Minerva itaque Virago pro numine Dux Populi ad securitatem publicam Prætor, vultu ipso, nedum armis, hostibus terribilis, minax, acri intuitu, & truculento aspectu, præ flavi luminis copia oculis ardentibus, Phornuto teste. Sed certe prudentiæ Dea, & belli: itaque à minando, ut M. placet Tullio, & ex Cornificio apud Festum legitur oculatam habens galeam, in qua humani quodammodo cerebri positionem inspicere est, & in ea speculatorias habere, ut oculis advigilantibus lumen cœli in his, quæ agenda sunt, videant sensu pervigili: unde Minervam dictam adserit Festus, quod bene moneat. Non itaque contemnenda corporis exiguitas, in quo animi eluceat vigor inclutus. Nam & sapientissimorum testimonio inest MAXIMA IN MINIMO VIS.

Proinde Minerva, quæ primo aspectu formidabilis hostibus, etiam in recessu formidabilior cadem magis est. Et ad hujusmodi formidinem, & incussum hostibus terrorem facit illud Catulli in *Nuptiis Pelei & Thetidis*:

Frons expirantis præportat pectoris iras.

Cæterum qui Ariminum interfluit fluvius, is Ariminus Livio est, & à Meniciis non discrepat. Horatio tamen Folia, quæ vel à Faula, vel à Fauno Sabinorum & Latinorum Rege præisco deductum est: sed ne derivationem à longe petitam putes, accipe vetustatis testimonium:

FOLIAE QUIETAE
VECTIVS TIGRIS.

Vectiam gentem Romanam à Vectio, qui primus in Urbe interrex, clarissimam negabit nemo, & ipsam interregni dignitatem omnino Patriciam, quæ plebejis nusquam communicata est. Vectius autem à vecte dicitur, quod quasi pro vecte esset ad claustra & Serranos montes, ex quibus Vectius Janigena Vestinus origine adparet, & in supra allegata Inscriptione Vectienum habes à Vectio.

In Epitheto Quicta demulcens præferocem quasi Tigrim

Tigrim uxor virum. Sed quod Fauni irrequieti semper, & improvise adparere consueverint, & molestiores esse Virginibus, & infantibus maxime, utpote errantia numina ignea quasi faculae, favillaeque procaciores, petulantioresque. Talem eidem adfessorem adfiduum adtribuere oportuit conjugem, & in verbo Vectius respondet Epitheto Quietæ, agenti scilicet bene, & quiescenti bene, obfirmato in cubiculo, bene ordinata in domo, quo & ad agenda domi forisque alacer uti sciret velocitate. Tigris itaque & Folia correspondent, & proinde animi moderationem profiteri videntur tantorum nominum, & congruentiæ vir, & mulier conjugati compares Diis volentibus. Atque ita majores nostri aqua, & igni sibi invicem communicato, nomen & ipsum florido pro cestu Amoris jugo aptabant sibi concordēs conjugēs, unanimes. Sed ad Fauni procacitatem exprimentam facit historia quod de favillis progenitum testatur Servium Tullum Regem, qui hujusmodi nomina, & omnigenam coleret fortunam, & numina, de servo adsumptus in Regem. Sed & Horatius de Fauni procacitate, lib. III. *Carm. ode XVIII.*

*Faune Nympharum fugientum amator,
Per meos fines, & aprica rura
Lenis incedas, abeasque parvis
Æquus alumnis.*

Idem hæc de Folia, & ejus virili succinit, *Epod. ode V.*

*Nec defuisse mascula libidinis
Ariminensem Foliam.*

Ea de causa in gente Apronianorum Proculi frequentes & Mincii & Pincii in Miniciis. Sed Medii Fidii, qui & Sanguis, & Semon, & Semingus in Aniciis legitur, unde Aproniani Pincii Semones: Semon autem, vel Semingus, quo in Semone Sancum, & Fidium junctos habet: ipsum enim trino nomine numen, quod sit idem, esse comprobemus ex ipsius figura, quæ trino eadem de causa effingitur capite in unicum inflexionis basim, pectus in laxum, quadratum tamen, & unicum definit bene firmatum pedem, quo custodem pervigilem, & hospitibus perhumanum: furi vero, & hosti, & sacrilego inviolabile, & terribile sacrarium, & arcem, & inconcussam, & horribilem præsignarunt vindicem, symbola Gentilium: & eade figura Terminus appellatur: is eo nomine in finibus appellatur æque ac in plateis. Qui vero in summo Capitolini clivi pro vestibulo templi erat, *Triansancta* a B. Cypriano scribitur: terminus enim in finibus constituitur. In quibus vero præminet nervosius illud, quod in infantibus pro amuleto usurpabatur, Miniciæ prænotatur, & propagationem generis, & imperii, & finium. Quare in Mercurii forma figuratur quasi Mincii, qui & Pincii, & Proculi: pomœrii enim ampliorem summum in Reip. auctarium, & limitibus prolatis, & summa in civibus laus est imperii propagatio.

Verum pro Arimini finibus, & Rubico, illustre ejusdem in ponte terminatorium S. P. Q. R. Cæsaris, & exercitui, qui cum sequeretur, in marmore sculptum adhuc perseverat, quod quidem in contestationem loci Terminalis utique clarissimum est testimonium.

Sunt adhuc juxta Ariminum loca plura eodem quo in nostratibus nomine, Coranium, Albanietum, Toranum, & Sabinianum.

Interea Picentes ad se nos revocant, qui adaucti numero, ita ut tot numero, tot civitates populos non caperent, Senatusconsulto novam ad coloniarum Provinciam rate quærere jussi sunt, & ad sinistram navigare. Itaque ad Cupræ maritima littora nandi, & navigandi destitutam in tyrocinio disciplinam discunt, ediscunt in dies singulos animosiores ex laboribus, peritiores ex difficultatibus, neque segnes interim majores natu portum commo-

liuntur. ET QUIDEM VEGETIORA ingenia intentatum relinquunt nihil. Alii itaque arborum truncos in lintres cavant, & majora aufuri in ipsa arena remis se exercent, lintres propellunt modicas, qui tandem aliquando subigerent undas. Majores rates turmatim, & novas ædificant, & eas planiores quidem, ut Cotylam innantem repræsentarent insulam, easque dehinc pice illinire, in eisdem singulis singulas pini arbores fuscitare, vela funibus protendere, transfris remos aptare, affixa in puppi Veneris, vel Cupræ imagine, & eam quidem ad temporis varietatem peropportunam: ajunt enim menstruis mulierum purgationibus, & profluvio tempestates arceri, quæ per Helenes fidus perniciosissimum navigantibus excitantur, si menstruata, inquam, nudetur: cum vero clarior illuxerit sol, expurgato utero, depulsis tempestatibus juventuti naviganti, aranti, ædificanti nihil Venere jucundius.

Cæterum cum nondum reperta esset illa ars Palantica, de qua superius egimus. Augurum monitis, patrum confisi precibus, per ipsam se in tuto obedientiam rati vela dabant lignis bene picatis, & ea vox una omnibus se adinvicem adhortantium, & fausta acclamantium, ut bene picatam navem feliciter abire, procedere, pervenire precati genialiter confidebant, quæ enim stella orientem salutat Solem excussis post se tenebris, Vale dicit. Unde & vento ea ex parte flante nomen Japyga, & hanc in sententiam Virg. *Aneid. IV.*

— *natat uncta carina.*

Venti autem omnes è cardinibus spirant. At cardinum potestatem Jani, & Cranæ diximus, ut ubi, & unde, & quo vellent ventos cierent, quos regerent populorum scilicet Duces, opportuno cum apparatu occurrentes, & Astronomia qua ventorum causas, qua cognitione exorientibus uti scirent ventis. Japyga vero certum non habet cardinem: sic & Æolus ventorum Rex, & Pater pro Jano, & Eano, & Japyga. Boni itaque ominis ventus Japyga quod securitatem pariat, quæ negligentium mater, ut plurimum, aliquando vero noverca est. Et quidem de Cleopatra fugam capeffente idem Virgilius cecinit, *Aneid. VIII.*

— ** ventis, & Japyga ferri.*

Sed Virgilio ipsi navigaturo per ejusmodi nominis invocationem bona omnia precatur Horat. *l. I. ode III.*

*Sic te Diva potens Cypri,
Sic fratres Helena, lucida sidera,
Ventorumque regat pater,
† Obstructis aliis præter Japyga.*

Pervenere itaque prospero occurſu perlustrata Apulia omni (qua maxime convexa est) ad oram fluminis, quam sacro patrio de nomine salutantes nuncuparunt, & in ripas ejusdem religatis funibus confessuri descendunt, sibi invicem gratulantes: aram & ignem excitant, vota Deo Opt. Max. solvunt: deinde in distributione locorum Eburini Patres potiora loca sibi deligunt, & primis in sedibus, & proximioribus ad aras, & tabernacula construunt. Cæteros etiam, ac reliquos pro dignitate familiarum, personarum, ac meritis disponunt. Itaque adhuc Eburina ea dicitur regio, & fertilissima est: quamvis vulgo terra laboris appellatur: qui vero litteras paulo melius apicantur, & qui spectant agri ubertatem Campaniam dicunt felicem. Unde Picentini panes Romæ Pontificiis in cœnis secundariæ delicie, splendidiora corollaria, & ea ex alica, quæ frumenti species est, sed curationem industriorem requirit: quamvis per se alica non injucundius frumentum est, immo & præstantius quod apud nos Martio feritur mensæ. At Neapolitani saccaro & aromatibus immiscent alicam, vel hujusmodi farinæ cujusunque adipem, & oblonga distendunt forma

* Legendum, *undis & Japyge.*

† Reponendum omnino, *Obstructis aliis*, scil. ventis.

quasi cratis in figuram, & insuper auro pingunt, & huiusmodi pastillationis panem Regalem appellant pastam, sive mustaciam.

Sarus vero Sabinorum lingua sanguinem importat, & forte ab Eburiorum purpura vinive. Sed ea in navigatione illud accidit mirabile, quod loci fluvius in mare defluit, qui ex diametro opponitur Suro, quem in Piceno sciverant patrium. Itaque omni quæ reliqua est Italia potiti forte fortuna, consilio, viribus, quasi patrios ipso de mari muros stare facerent, & patere portus locis omnibus fecere nomina, quibus nunquam licuisset sacram fossam fulco ducere retrogrado, quam omnino adidem principium circulari processu factam oportuit. Ad ipsam itaque aram agentes gratias reduces pervenire. Sed & Vesuvium, & Bajas cum frequentibus coloniis tam assidua novarum Urbium, & tam clarum decus oppidorum auxere primi. Hæc enim loca prius incoluerant Aborigines: deinde Vestini Aurano Duce, qui deinceps apud nos regnaverat, sed tandem omni supercumularunt ornamento gentiles convenæ, & advenæ: Romani vero in eum excoluere splendorem, ut à Solino inter orbis politiora recensentur miracula. Opici interea quos Vestinos diximus in Circejum trajecerant promontorium, qui per intervalla temporum, per annos & pacis ocia negligentius agentes, dum patres non consulunt, nec per se scire student, occasionem fecere censoribus novos Tyronum delectus ad illas destinare colonias, per quos expellerentur Opici illi adjudicati degeneres Veteranorum reliquæ, qui vitam veluti pecora transigentes fabulantibus apposita ad fabulam scena essent. Quod regno sub muliebri quasi bruta animantia degerent, & ipsam illam Reginam viro forti Pico nubentem, ea pactione, ut regnum pro dote cederet. Temporis ratio in fabula non liquet, nec facti veritas constat. Poetæ enim inter Picum Tuscum, & Picum regem non distinguunt, qui utriusque facta uni attribuunt, & nova obnubilant metamorphosi in munerationis varietatem otiosioribus munificam.

Novos itaque per delectus Vestinorum patrum consilio provisum est, ne limes is pro securitate & dignitate Italiæ alienigenis pateret incustoditus.

En censurarum notas, quas in sacerdotum collegiis observatas recte quidem, ut omnia sancta Mater Ecclesia, apud quam vera est Religio, jure merito sibi vendicavit quæcunque apud gentes religiosiora esse videbantur. Nos enim Poetarum fabulam (si qua in re præsentis utilis est) & legimus, & explanamus. Ipsum itaque Circæ nomen, unde & Circæum à Circellis Falacrynus Flavium prædiis, altero in libro descripturi sumus. Circellæ autem appellati fontes sunt frequentiores, tenuioresque, excepti labro florido, qui scaturigines illas ambiunt, coronantque, inoffensi tamen, neque enim aquarum vis flores proterit, quibus coronatur media perpetuo vere, ad animorum delicias, lususque, in quibus segnitie & socordia locum non habeant: unde & Musæus de puellarum choreis è Libano monte ad festum accedentium agit, cujus sententiam Musæus Latine, & feliciter expressit:

Non Libani odoriferi in summitatibus saltans.

Hinc & Poetæ personam Principis sponsi in deliciis habiti per fabulam perstringunt ad metamorphosin, ex eo quod pro uxoris fastu, & forma, quæ Solis filia diceretur, & regni opulentia, & ingenio inolescens manu artificis admirabilis in domesticis, forensibusque, belli pacisque tempore, terrestri, maritimave expeditione, splendidiore semper gazarum cultu procederet Picus, regia in trabea, paludamentove, navi Prætoria, & omni classe ad luxum usque instructa, depictis auro velis, familiæ cultu, & ordine dapibus opiparis. Ea itaque Solis filia scribitur, quod Solis attractu aquæ in fontes salientes demanant, & circa

A fontes herbæ & crescant, & vigeant, & floreat, ipsius, inquam, lumine, & motu, sive calore, & virtute. Et hæc semper & ubique Picus pictis in tunics, eloquens, unguentatus maritus, alatus Dux, qui, ubicunque opus esset, illico adesset, quasi volatu imminens, qui mira celeritate omnia perfecit alacer, militum pater, populi securitas, Princeps novus assidebat Reginæ, equitabatur Comes perutilus, ventorum & stellarum peritia nobilis, sed qua gloria? Num ut circulatrix haberetur? talis enim ab Homero describitur, & ejusdem in verbo Virgilius, *Aeneid. vii.*

Picus equum domitor, quem capta cupidine conjux

Aurea percussam virga, versumque venenis

Fecit avem Circe, sparsitque coloribus alas.

B Cæterum cum de fabulis sermo est, & de tantorum Poetarum testimonio iterum, & opportune quidem Homerum appellemus. Quis enim vel in Poetis non meminerit, & imprimis non appellet laudatissimum Poetarum Principem? Qui ab Hospitalis Italiæ littoribus non alienus homo, imo munerator splendidissimus, ipsa in Italia emicuit, cui Circæum, & insulæ Æoliæ, & Sicilia pro cavea, circove delecta est. Is, inquam, qui omnia novit, dum Ulyssis patriam recenset Ithacam, Italiam indigitat, & coloniam ex nomine, & in ea Laertem

C Janigenam utique civem præsentem inter Lucumones populorum Principem, quem Homerus jam casum delineat lectoribus, si qui oculo non hebeti in legendo sient; & ipsum juxta Laertem aditantes Lucumones duodecim. Sed qui Laertes filio absente, & quem vita defunctum putarent, in ejusdem domo petulantiores, Proci Reginæ se viduatæ ingererent, ejus nuptias exostulantes, & de Laertis patrimonio, & proventibus opipare convivantes, quo Reginam, & filium impuberem, & focerum morarum tandem pertæsos compellerent, ut jam nubere vellet, antequam in huiusmodi commestrationibus absumerentur omnia. Ipsa enim Lu-

D cumonum uni quem vidua deligeret jungenda erat, ut populi præsentem interea habere viderentur Principem, cum nepos ætate adhuc minor esset, in quo longum putarent expectare regni successorem, avo Laerte senio, laboribus & vitæ tædio confecto. Penelopen vero quasi Circen alteram Solis filiam prudentia sua eludentem procos, dum exorientis jubar Solis pro occasu acu pingit quasi in moribundi foci funus honorificum texeret velum, quod extrema altera semper parte retexeret nocturno labore Latona altera, quæ de tenebris solem producit: & proinde ea diuturniori mora redeundi terminum marito prorogat, & Telemachi crescentis incrementa,

E & spem enutrit. Procos autem differt, & quos venustate, & ingenio, manu, artificio, & prudentia in familia optime regenda attraxerat, pudicitia & severitate distinet. Neque aliud cogitasse Homerum dixerim, cum eo in circo Ulyssis errores, & historiam omnem refert, nisi quod ad Italiam in Italicis Principibus orbis terrarum Reginam in theatro confidentem spectatricem, & judicem muneris alliceret sui. Qui musas omnes, & omnem produxit artium & scientiarum scholam perutilem in scenam suo in Heroe, qui propria virtute & omnia, & impossibilia perfecit solus, ut munerationem honorificam tantis probata iudicibus universus admiraretur orbis, & fama, quæ veluti aurum per orbis

F cardines, honores, & plausus, & laudatores excitat. Ita tamen, ut priorem, potioreque locum non deferat, quem unum pro omnibus occupatum obtineat. Orbem, Urbem, inquam, Romam, unde celsa quasi de fabrica alloquitur populos, de arce, inquam, Imperii: & ea proferat, quæ æterna memoria digna sunt nominum & virtutum præconia. Hæc autem à nobis sic dicta, Græci æquanimiter ferant velim, qui modo ad nostrates Vestinos stilum reduci verto manum.

Hi nusquam fegnes, neque interea laevum Atriae latus intentatum reliquere, qui opportuniori quidem in loco navalibus Ravennam ipsam metati sunt, ubi infra decresciente mari classis ad excipiendas in portu classes commolito apposita est: quæ quidem urbs regia, & regiae urbis portio: sed hæc sub Augustorum tempora. At Vestini loca circumcirca communivere complura. Sed & Eridanum quasi per euripos decurrentem expedivere plures: & eos patriis de nominibus appellavere. Inde Hadriam alteram ad fluminis ostia, quem Vtrenam dixere, quasi Aternum magnum. Is autem ex sacro foro Corneliensi defluens Eridanum adauget: deinde latius progressi mediterraneum delectas fedes captant. Itaque Verona construitur de Veræ fluminis accolis, & loci flumen ab eo dixere Atesim. Hac igitur ratione auctaria habes, & prorogatis in finibus nobilissimam Provinciam, multiplicata loca, & nomina.

Et Comum à Cominis populis, quos recensuimus. Est enim Antiquis Coma planities oblonga, vel connexis inclusa montibus, vel aquis confluentibus Insula. Comini vero à numine quodam, qui Comus dictus est. Hunc adolescentiorum licentia fecit Deum, non ad comitatem tantum, quæ expectanda virtus est, & probatos decorat cives: sed quia pueri nobiles, qui in Regis obsequia excubarent, & Camillarii dicerentur, aliquando per annonæ & pacis otia lascivire cœperunt, & Lateronum favore procaciam & proterviam in arvinam nutrientes, nocturnisque cantilenis, choreisque rationabilem populi interturbarent quietem, & alienarum appetentia uxorum, ut haberent, in quod rejicerent numen insitum sibi, & in semetipsis coalitam lasciviam prætenderet. Cæterum diversi ab iis Camillarii sacerdotum ministri, in quibus modestia vicens futuræ per augmenta ætatis sponso adest sanctitatis ad Sacerdotii suffecturam. Unde & eisdem Cados dicebant à sacris disputationibus mysticis, quales Nabuchodonosor accersivit ex omni Hierosolyma tres illos selectos in Curiam.

De ejusmodi autem apud nos Cadis Camillariis Vicum habemus & Camillarium, & Aruntinum, & loci memoriam Cadichio superam: hi milliario inter se distantes, sed Camillaria adhuc frequens in Vicanis. At Regii Camillarii quasi in prætorianam cohortem & comitivam adsumpti perpetuam novum salutare numen pro salutis & victoriæ optione Camulum sibi effinxere, de quo superius. Sed de Camulo testimonium ex antiquis monumentis habetur Quintiliani in Sabinis:

CAMULO SANCTO FORTISSIMO
TI. CLAUDIUS TI. FI. QVIR. TERTIVS
MIL. COL. VII. P. R. 7. VEM.

L. D. P. D.

Unde occasionem quasi de proximo præsumpsit Domitianus Imperator, qui se filium diceret Palladis, & Dominum se, & Deum appellari voluit, edixitque.

Sed in eisdem quos diximus Vicis orientales magis Aruntini, quibus illa de Arachne, quæ cum Minerva, vel Testrinæ, vel Corythallia: eo enim nomine apud Athenæum lib. iv. legitur, & apud Ciceronem de natura Deorum lib. iii. Corefia, & quidem à Κέρη, sicuti & Curina:

MINERVAE CVRINAE LADAE
PVNICVS GENIALIS II. VIR.
COLONIAE MORINORVM
SACERDOS ROMAE ET AVG.

F. V. A. M. D. V. L.

Cum Minerva itaque Arachnes contendere ausa est, & concertatione quidem nobili, textura, inquam, quo in studio muliebri laudatur ingenium vicens, & manus laborum diligentissima. Sed earundem compendio explicemus multi nominis concertationem.

Nobilissimæ orbis terrarum Virgines ea in con-

A tentione iudicium provocant, sed Arachnes fila tenuia expolitissima: Minervæ autem texturam, perfectum, inquam, opus laudarunt Patres, & omnium calculis Minerva vicit, quæ etiam ultra sexus pavorem arma tractare, & à bellicis non abhorere sueta congressibus, & populo se ducem præbere, & salubriora commonere feliciter. Quam obrem divinis aucta honoribus, quod in ea celestium contemplationes, & Religionem antiqua ferveritate bonis excultam artibus admirarentur Patres. In Arachne autem ad delicias animus pronus magis, & ingenium ad artificium tenuium suspicienda hæc curialibus, & popularibus apprime favorabilia, sed

B PRUDENTIVM est iudicium, & in omnibus vincit veritas. QVÆ ENIM Virtus eximia ad summam provocat ingenia gloriam, eam non temporum curiculis, nec industriæ & patientiæ alis advecta adsequitur æmulatio. Et quidem veri laboris amatores homines fama nusquam loci deserit, & qui victoriam coronat populi plausus, & cantorum hymnus immortalis, dum victoris laureas adauget, inextinctum devicti servat nomen per ora hominum fama circumferens, quasi Perseus Medusæ caput, vel Holophernis per capillos de Judith, vel Golix de Davidis dependens manu. Sed jam ad rem nostram quasi postliminio revertimur.

C Interea Vestini Janigenæ ad montium claustra Patrum iussu novæ urbi locum deligunt inter utroque Aborigines medium, & juxta Curetes eam Conissam dicunt à Conitio, sacrae fossa, de quo superius. Is locus, quasi penu commune in Reipublicæ species colonis esset suis, deligitur, designatur, communitur, oppletur civibus oppidum, in quo Romanorum temporibus Issiam gentem legimus, & Connexiam. Unde forte oppido illi nomen factum est novum, nisi à fabricæ figura. Sed quæcunque nominis causa fuerit, illud quidem antiquitatis testimonium habemus omnium sententia comprobatum. FABRICAE sequela ruina est, rerum vicissitudo, nominum mutatio: vicissitudo quædam est: commigrarunt enim vetusto de oppido populi, & ad loci congruentiam, quem delegerit, nomen & dispositionem oppidi novarunt.

D Leonissani itaque Conissæ reliquiæ etiam nunc ad montana claustra confident Seranos infra montes, quos alii perperam Ceraunios scribunt, locus is juxta Falacrynam vallem, & collimites Reatinos. De Conissæ antiquitatis testimonia alii alia proferunt, sed mendosius quisque, immo & legunt, & publica inscriptione propositum habent uncialibus, ut dicam, litteris, in oppido Leonissæ loco insigni ad fallaciorem contestationem:

E Sum connexa vera clavis montanaque sera.

Pro quo legendum omnino est:

Sum Conissa sera, & clavis montana severa.

Ita enim & versus constat, & nominis proprietas, & sententia. Eo enim montium juga connexa, quasi in dorso spina aditus omnes obstruunt, unde monti Serano nomen. Sed neque ad historiam minus congruere videntur testimonia antiquitatis, quæ in gentilibus, & propriis nominibus patrium præferunt nomen, sive Civicum. In Ald. 709. 1. Interamniæ:

P. CVRIVS T. L. DIGNVS
P. CATINIO P. L. SERRANO
P. CATILIO PRIMO.

F

Et:

MVTIENAE T. L. DICAÆ
MVTIENAE T. L. DIONYSIAE FIR-
MIONI.

Est autem Catinium in finibus Vestinorum & Aequicolarum. Catilia vero juxta Tybur, in ipsis Aequorum finibus.

Sed ne Leonissæ nomen & etymon subdiceamus quasi prætereuntes, quæ pro ea faciunt, antiqua monumenta adponamus. In *Ant. ad. Smer.* 33.

LIS.

LISSIA SABINA C. ORANDI CON.
LICONIES SECVNDILLA L. JVNII LI-
CONIS.
ET JVNIVS LICINIVS LICINIANVS
Q. LICINIVS ZOSIMVS SIBI ET CON-
JVGI SVAE
ISSIAE ONESIMAE B. M. & ISSIAE CON-
LIBERTAE,
ET CALLIACO FELICI FILIO.

Et pag. 50. quod ad Turrin Verangulorum ha-
betur :

Q. LICINIVS ZOSIMVS FECIT SIBI
ET CONJVGI SVAE LICINIAE
ONESIMAE BENE MERENTI,
ET LICINIAE ISSAE CONLIBERTAE,
ET CALLIACO FELICI FILIO. ITEM
* LIBENTIS LIBENTABO SE, POSTE-
RISQVE EORVM.

Et in eodem agro Leonillano :

LISSIA Q. F.

Itaque & Cantalici oppidi, & ex aduerso instituti
Transfalici ex Licone & Liconia & originem, &
appellationem dixeris.

Præterea legimus Tarquitium Rom. & Euty-
chiam Græcam parentes S. Taurini Embroicenis
Episcopi.

Tarquitii vero ex fratre nepotem Licinium Præ-
fidem & Leonillam Licinii Præfidis uxorem.

Vides igitur in Licinia gente Leonillæ nomen,
& Onesimæ & ISSAE, & ex Licinia, & ISSA, LIS-
SINIAM denominatam, & Liconem, ut facile
conflatum exinde dicas Leonillæ nomen, & Leo-
niani vici, qui juxta Leonillam est, & in monta-
nis oppido nomen Montileonis, de quibus hæc-
tenus. At qui infra ad Falachrynas descendunt val-
les, & Vestinos, humiliores quidem, sed perpe-
tui colles, Pinatiæ scilicet. Sed hæc Strabo ad Lu-
canos rejicit longa post tempora à Sabinis deductos
colonos. Primi enim Sabelli Tauro Duce dispositi
sunt. Unde & Taurum in signis præferunt.

De Samnitibus vero item alii aliam sententiam
proferunt, sequunturve pedarii. Sed qui Comium
Castronium Ducem eas deportasse colonias de Sabi-
nis contestantur, & primum occupasse collem, cui
nomen Samnium, & ab eo quasi ab originario Sam-
nites dici recta sentiunt, & recta sentientibus pro-
be consentiunt.

At Hirpinos ita appellatos ajunt, sicut & Hirpa-
ni vetustiores de Lupo præeunte colonias. Sabini
enim Lupum Hirpum dicunt, deductionis vero
temporum ratio non liquet.

Ultimo loco Lucius Samnitum Dux colonias suo
de nomine Lucanas condidit. Unde Lucanas Pop.
Rom. novit inter ganeorum delicias, de quibus
Martialis, lib. XIII. epigr. XXXV.

Filia Picena venio Lucanica Porca.

Quod si ad Virgilianum illud aptes, de Porca,
quam Æneas vidit albam, Æneid. III.

Triginta capitum fœtus enixa jacebat

Alba, solo recubans, albi circum ubera nati.

utique ad colonias respexisse Martialem putabis.

Cæterum quæ humanarum vicissitudo rerum est,
ea & nostrates perstrinxit, dum Læstrigonem ini-
quorem fortiti Regem, nec perferre satis, nec
tueri patiuntur, Herculi obnoxii fiunt, & dum fa-
vent Dardano graviter apud Corybantum offendunt.
Itaque regni gloria, opulentia, nomenque illud
perillustrius ad Janigenas alteros, eorum quidem
sobolem Tuscum Sagam ultra Tiberim quasi aquæ
delapsu fluminis impetus insolens in dexteram in se
proturbantis, effluentisque deflexere omnia. Quo
tempore Latini illustriores Sabini nominis esse cœ-

* Haud dubie scribendum, LIBERTIS LIBERTABVSQVE.

A pere, & Regnum obtinere. Sabini vero per sapien-
tiæ studium, & pietatis, & Regni contemptum
sevocati ad quietis otia, & veritatis indagacionem
sequestres degebant, nisi per Latinos Reges ad
explendum Senatus numerum revocarentur, in qui-
bus semper primas obtinerent. Sed tandem maris
imperium, & Latinorum ditio, & Campaniæ lit-
tora, & majora prope omnia cessere Tuscis in Pa-
tribus ordinata ex Dynastia Sagis, qui prudentio-
res in dies regere, & Sacerdotii, & Imperii, li-
tuum, & falces obtinere, quasi virtutis, & pote-
statis propriam neque jam acceptum quid referre
Sabatio Sabinisve Patribus: sed Cato lib. III. pro
B Aboriginibus illustre testimonium profert in hæc
verba: *A Tuscis Sagis, qui à Sabinis originem trabe-
bant, Dynastia Larres scilicet, juxta eum Lucumones*
XII. Hos vero Lucius Capita appellat Etruriæ hi
Cives novæ Vetuloniæ optimates, & per Regni car-
dines: ille vero primas, & in urbe præfidens illi
secundum regionem quisque suam maritimam, me-
diterraneamve in collimitibus præfides invigilabant
uti oportuit. Et QUIDEM Justitiæ, & Fortitudi-
nis diuturnum Imperium: Sapienciæ vero ingens
est Gloria. Pietatem immortalitas sequitur. Neque
aliud Sabinorum supererat studium, quam Reipub.
& Agriculturæ laboribus de Deo contemplationi ad-
dici, sacrificiis quotidianis perfungi, publicis, pri-
vatisque, sacrorum mysteriorum amantiores my-
stæ. Et eorum ditio à Nare usque ad Æquicolas,
& secundum flumen Aternum, & Apenninum ad
mare superum. Cæterum Latinorum regnum Latio
comprehendebatur: sed Tusci, qui Regium & ipsi
antiquaverant fastum, in Dynastiam convenientes
pro sapienciæ laurea Sabinos æmulantur. PER vi-
cum juventutis studium vires fovet, colluctatio
Cascos non decet. Scholas itaque instituere, quo
quasi ad bonarum artium emporium convenirent.
Perseverabat tamen eadem in utrisque religio, &
lingua eadem, quæ & prisca esset, & vetustissima.
D Pons Sublicius pristinam consuetudinem antiquari
non sinebat Sabatii providentia, qui ad hoc pontem
jecerat, & posterum diligentia, ne quos procurren-
tis impetus fluminis secundum ripas disgregat, diffi-
dium distractos disterneret, sed charitatis mutua
amor necessarius in posteros propagaretur. Unde
super eundem sublicium Saliorum ludus, & illa no-
minis inter virum & uxorem commutatio, com-
mixtiove.

E Sed ne Curetes intermortuos putares in ipsis Qui-
ritibus, constat & humani Imperii Majestas, Ro-
ma, inquam, quo Vestæ sacra convexerat & Dar-
dani, & Vestinorum posteritatem transvexerat filio
in Ascanio & exercitu omni Æneas pius. Ipsa,
inquam, Roma Quiritibus aucta suis quid non do-
mat? & jure merito quidem, eo quod veritatem,
quæ omnium fortissima est, ultro obviaverit, & in
sanctissimis Apostolis, quorum pedibus advolvitur
venerabunda, osculatur, auscultat, adorat Chri-
stum, quod ejus munere Virtus est, quæcunque
vera Virtus est: quod ipsa ejusdem beneficentia
orbis gubernacula regit Regina gentium. Tu vero
ne quid in Veritatis nomine suspiceris, neve re-
quiras, explanabo.

F Veritas Christus, & D. N. Jesu Christi fides
Veritas est. Is ante sæcula Deus, qui Verbum apud
Deum, per quem omnia fecit Deus, is idem in ulti-
ma sæculorum ætate dignatus de Virgine nasci Ho-
mo, qui semper Deus largitus est nobis suam Dei-
tatem. Christum igitur Roma adorat, & sapit:
in cujus Ecclesiæ unitate Christi fidem universus
complectitur orbis, & quasi circa matris ubera fi-
lioli ingenui pretiosiora materni pectoris monilia per-
tentant gaudia gemmæ, capitis adaugent gloriam.



JACOBI BRACELLII,
GENVENSIS,
ORAE LIGVSTICAE
DESCRIPTIO.

AD BLONDVM FLAVIVM APOSTOLICVM
SECRETARIVM.

ACCEDIT

E J V S D E M
D E
CLARIS GENVENSIBVS
LIBELLVS.

AD REVERENDISS. PATREM LVDOVICVM PISANVM
ORDINIS PRAEDICATORII.



Per i cartelli del Reale Istituto di Scienze, Lettere e Arti di Genova.



JACOBI BRACELLII, GENVENSIS, ORAE LIGVSTICAE DESCRIPTIO.

AD BLONDVM FLAVIVM APOSTOLICVM
SECRETARIVM.



REVERSVS in patriam clarissimus vir Andreas Bartholomæus Imperialis ab ea legatione, qua apud Romanum Pontificem aliquandiu moratus est, cum multa de te non sine magna tui laudē sæpius loqueretur, in sermonem aliquando incidit ejus historia, quam tu magno labore, nec minore omnium expectatione, scribere aggressus es. Inter quæ ait, cupere te, ut Liguriam cum suis populis quispiam regionis ejus peritus exacte describat: ab eo haud contemnenda laboris portiuncula te levatum iri, modo is esset, qui quod tibi præstari optabas, posset implere: meque multa oratione, qua plurimum valet, hortatus est, negotium ut susceperem. Ego cum scirem huic regioni latissimos aliquando terminos fuisse, quippe cum Pisas in Liguribus conditas, & Apuanos Ligures, quos agri Pisani populos esse constat, à probatis auctoribus traditum legamus, quodque longe plus admirationis habet, Massiliam Pompejus Trogus, inter Ligures, & feras Gallorum gentes, positam dixerit, operis difficultate deterritus pedem retuli. Neque enim quempiam seculi nostri quantumcunque doctissimum virum satis idoneum putavi, qui vetustissimas illas orbis divisiones, jam prorsus abolitas vel (ut ita dixerim) sepultas, ita possit eruere, ut ex illa vetustatis caligine in lucem proferat, quinam fuerint Liguriæ constituti fines tunc, cum Apuanus & Massiliensis inter Ligures annumerabantur. Verum posteaquam ex eo cognovi satis fore tibi, si ora Liguriæ, quam Plinius, & qui eam divisionem orbis secuti sunt, Varo & Macra terminari voluerunt, accuratius describatur, haud invitus laborem suscepi: quippe qui à te & recte fieri, & æquum postulari arbitrer: quod uniuscujusque regionis urbes, populos, flumina, cæteraque memoratu digna, malis ab indigena, quam ab externo, cognoscere. Erit aliquod præterea operæ pretium: si in ea ora, quæ ut fertilitate plurimis, ita salubritate, amœnitateque paucis admodum cedit, pleraque invenias, quæ tibi res Italicas dicere aggresso sine lau-

C de præterire non liceat. Illud vero ante omnia mihi concedas velim: ne si diligentius omnia scrutatus fuero, minima persequi, parvisque nimium immorari arguar. Aliud enim terrarum orbem dicturo proponitur, longe alia lex ejus est, quem unius tantum provinciæ labor fatigat. In quo tamen si rationem, legemque excessero, dum me orandæ patriæ cupiditas longius rapit, scio huic facile amoris meo veniam dabis.

A Provincia igitur Narbonensi Italiam petiture, D Liguriæ primus limen aperit Varus fluvius ab Alpibus effusus, haud procul ab urbe Nicæa mari se infundens, nulla re notior, quam quod Braccatam Galliam ab Italia determinat. Occurrit mox Nicæa oppidum à Massiliensibus in littore conditum, Alpes dorso contingens. Dehinc portus Herculis Monæci quondam; nunc Villa Franca. Post hæc Monichus portus, ut Ptolomæo placet; nunc Monacus, Genuensis Imperii terminus. Hunc enim vel collem, vel scopulum, cum esset incultus, Cæsar Genuensi populo ad condenda mœnia concessit, annis jam quinquaginta supra ducentos evolutis. E Imminent Monicho Trophæa Augusti, duo prope millia passuum à littore recedentia, in edito jugo posita; nunc ignobile castellum Torbia nomine sola viarum asperitate memorabile.

Sequitur Mentonum, & Rochabruna, primum ipso in littore, alterum haud procul à mari castellum positum: utraque sterilis soli, & præter ipsum nomen nihil, quod referas, habentia. Deinde Alburntimillium urbs quondam populo & latis finibus valida; nunc vel demptis, vel mutatis paucis literis Vintimilium. Hujus latus, qua parte ad orientem solem vergit, Rucuba flumine abluitur; quod nunc Rodoriam vocant. Vix mille passus ab oppido collis attollitur, cui Apio nomen est: & in colle arx sita, ex qua prima nascentis Apennini juga haud procul aspiciuntur. Ab Rucuba decem passuum abest municipium, quod Sancti Romuli nominant, citri ferax, frequentibusque palmis, quam arborem circumjecta omnis regio nescit, Romanis etiam Pontificibus haud incognitum. Inde quinque millia passuum emenso obvia fit Tabia, duo millia recedens à mari, exiguum oppidum, sed vitis generositate jam non obscurum: quippe quæ

vini nobilitate, quod Muscatum vocant, tantum sibi nomen paraverit, ut non Cypriis, non Creticis, non Falernis montibus inferior putetur. Decem passuum millia ad Mauricium portum numerantur: portum nomine verius, quam re. Hinc quoniam vicini populi jura petunt, fama locum celebriorem facit.

Sequitur Unelia vallis aliquot introrsus vicis habitata. Mox oppidum Dianæ, nunc Dianum, duo prope passuum millia littus effugiens: olea, viteque pariter lætum. Post hæc ipso in littore Cervum. Dehinc Andoria ex edito vicinum mare despiciens, vitiferis collibus undique cingitur. Andorianos fines parvi admodum vici excipiunt. Hos Albingaunum urbs opibus ac vetustate nobilis, nunc Albingana, cujus Merula flumen latus verberat: vulgus Centam nominat, quod centenis torrentibus augeatur. Hanc urbem in plano positam vix quingentos passus ab ora distantem cum validissimi exercitus Philippi Mediolanensium Ducis arcta obsidione cinxissent, quatuorque perpetuos menses oppugnatam cuncta belli mala ferre coegissent, constantia tandem, ac fortitudine populi perterritus hostis more fugientis ac victi obsidionem solvit.

Occurrit posthæc Petra castellum in littore positum. Deinde Finarium oppidum, à coeli salubritate nominatum: abest à mari duo prope passuum millia, angustias vallis claudens, in cujus faucibus situm est. Est & in littore Naulum, urbs portu ac turribus incluta. Est & Vadorum portus. Hinc septem passuum millibus Savona distat, urbs multorum populorum commercio nobilis: nunc disiecta mole, quæ fluctibus opposita, portum efficiebat; manca & trunco corpori similis relicta. Hanc Livius Magonis adventum referens Savonam nominavit: idque nomen cum ad ætatem usque nostram perduret, non est facile rationem reddere, cur Plinius Sabatium, Pomponius Sabatiam appellare maluerit. Albifollam, Cellasque vicosignobiles haud procul inde in littore cernimus. Deinde Viraginem oppidum: quod quidam Vicum virginis dixerit. Succedit vulturum vicus, quem Cherusa parvus amnis interfuit. Porcifera dehinc ut major, ita violentior amnis: qui amoenissimæ valli nomen dedit.

Tum vastum & ingenti mole fluctibus objecta memorabilem portum, frontemque ad Africum versam Genua pandit: urbs vetustate præclara, verum rebus gestis longe clarissima: ut quæ Corsicam, Cyprum, Asiam, Thraciam, Scythiam, magnamque Orientis partem, aut deductis coloniis, aut victoriis suis illustraverit: negotio tamen, quam otio felicior. Cum antiquitatis suæ multa sint argumenta, non illud in ultimis habendum puto, quod auctorem ejus nemo satis affirmare ausus est. Ita ex illius temporibus vetustate prope abolitis, varias de conditore opiniones exortas videmus. Quarum illa plurimum habere auctoritatis putatur, Phaethontem classe in Ligusticum sinum ex Ægypto profectum, indeque Apennini juga transgressum, haud procul à Pado flumine confedissee: relictis in littore navibus cum Genuo quodam classis præfecto, hunc ibi oppidum condidisse, & de suo nomine Genuam appellasse.

Verum quid de urbis initio homines sentiant, cum cujusque judicio liberum sit, excidia certe in obscuro non sunt. Semel à Magone Hamilcaris filio capta, ac excisa est, jussuque Romani populi à Lucretio restaurata. Rursus sexto supra quingentos nunc anno, iterum à Poenis capta, ac prope everfa est. Sed maximis post hæc incrementis Dei munere caput attollens, illis sæpe terrori fuit, & nunc formidini est, quorum insidiis concidit: prævalida nunc viribus ac mari plurimum pollens,

principem nacta omnium moderatissimum Thomam Campofregosum: cujus cum maximæ laudes nullius præconio indigeant, nec eas in præsentia referre animus est: & si sit, operis magnitudine deterri queam. Urbis Orientale latus Ferior amnis præterfluit; quem nunc Bisamnem appellamus. Nec tamen vetusti nominis usquequaque facta videtur oblivio. Namque amnem minorem è proximis montibus præcipitatum; qui se majori violentius immiscet, Ferixanum dicimus: hic si fluvio quondam, ut conjecturis creditur, nomen dedit, ex Feriore in Ferixanum versus, quatuor priores antiqui nominis literas adhuc servat. Inde parvi admodum in littore vici Nervium, Buliascum, Saulum, & his omnibus major Rechum, postea Camulium. Verum ab amne Cherusa, quæ supra memoravimus, adusque Camulium, hoc est, quatuor & viginti millia passuum, non plana modo, & quæ mari proxima sunt, verum valles, collectique longius positi, omnia demum magnificis ædibus decora sunt: adeo frequentibus, ut qui ex alto terras petunt, unam à se urbem aspici putent. A Camulio sinuari promontorium incipit, quod divo Fructoso sacrum est: ejus templum in intimo recessu positum magna veneratione à vicinis populis frequentatur. Id illi promontorium Caput montium vocant: arduum ac saxosum in maria procurrit, sinistroque latere irrumpentes undas angustis faucibus admittens, Delphini portum efficit: qui ab incolis dempta prima syllaba, quasi à bonitate nominandus potius sit, Portus Finus appellatur. Sequitur & alius ab Oriente sinus, quem Rapali nominant. Id valli nomen est, quæ intra montuosa haud sterilis, citrique ac oleæ plurimum ferax, vicum ejusdem nominis haud obscurum habet in littore.

Quinque passuum millia Clavarum abest, oppidum ob alia magis quam vetustate clarum: quippe quod ante centum & quinquaginta annos nondum mœnibus cinctum fuisset. Huc maritimi, huc montani populi plurimi juris dicendi gratia conveniunt. Haud procul inde fluvius Entella mari illabitur, quem nostri Lavaniam vocant: cujus in ulteriore ripa Lavania vicus est, quem clarissima eorum familia, qui se Lavaniæ Comites dici voluerunt, maxime illustrem dedit. Ab ostio Entellæ vix quatuor passuum millia Segestem aspiciamus: quam qui Ptolomæi dimensiones sequuntur, Tiguliam putant, incolæ Sigestrum nominant. Vicus est ipso in littore, cui objicitur insula tenui admodum rivulo à continente avulsa: ea præruptis undique rupibus quasi muro tuta ab omni terræ, marisque incursione securos incolæ habet, gemino portu, dextra, lævaque accessibilis: quanquam qui ad portum vergit, tutior, veriorque portus est. Huic contermina sunt Monilia, quam nostri Moneliam dicere maluerunt, in duos vicos divisa: nihil quod referas præter vitiferos colles habent. Monilianis finibus Framula occurrit, quam ob lapidosos & asperos calces, quasi Ferramulam dictam puto: ea in aliquot parvos vicos distincta vinetis undique ambitur.

Hinc parvo intervallo Levantum abest, municipium nobile magis, quam vetustum, irriguis vallibus, & apricis collibus amœnum. Inde in ora castella quinque paribus prope intervallis inter se distantia, Mons ruber, Vulnetia, quam nunc Vernatiam vulgus nominat, Cornelia, Manarola, Rivus major, non in Italia tantum, sed apud Gallos, Britannosque ob vini nobilitatem celebria. Res spectaculo digna, videre montes non declives modo, sed adeo præcipientes, ut aves quoque transvolando fatigent, saxosos, nihil humoris retinentes, stratos palmite adeo jejuno & gracili, ut hederæ, quam viti, similior videatur: hinc exprimi vin-

vindemiam, qua mensas regias instruamus. Rivum majorem transgressos excipit Portus Lunæ, à scriptoribus quidem, sed parcius quam decuit, celebratus: vastis faucibus sese pandenti, multisque reflexibus tortuoso insulam natura objecit, quæ illum ex Austro & Africo tutum præstat. In qua templum est divo Venerio sacrum: à quo vetusto nomine abolito Portus Venerii, vel, ut plures loquuntur, Veneris appellatus est. Fugiunt introrsus terræ quinque passuum millia: quam longitudinem portus quoque adæquat. In occidentali promontorio oppidum est à portus nomine dictum, Genuensis populi colonia, idemque imperii quondam terminus: cujus in adverso Ilex est castellum, vel ex hoc celebrius, quod ut illud Genuenses, ita hoc Pisanos quondam fines terminabat.

Recessus interior Spediam habet, novum oppidum, citra LX. annos muro circumdatum: ea præ-

A fidi sedes constituta est, ad quem quicquid litium oritur, à remotioribus etiam populis defertur. Promontorio Lunensi ab oriente portus clauditur: quod præterlabitur Macra fluvius amœnus, piscosus, & quod Liguriam ab Hetruria secernit, haud ignobilis. Ut Liguriæ, ita operis nostri finis. Nam populorum, urbiumque longius ab ora recedentium, illis descriptionem relinquendam putavi, quibus vel eas terras incolere, vel aliquando peragrarè contigit. Tres omnino id mare insulas habet scopulo, quam insulæ, similiores: unam Alboingauno adversam, quæ pavidas sæpius naves à clade servavit: aliam Naulo: tertiam Lunensis portus occidentali promontorio prope annexam. Ligusticæ Oræ longitudinem à Varo ad ostia Macræ cum undecim supra ducenta millia passuum Veteres prodiderint, non ultra centum & octoginta à nostris traditur.


JACOBI BRACELLII,

GENVENSIS,

DE

CLARIS GENVENSIBVS LIBELLVS.

AD REVERENDISS. PATREM LUDOVICVM PISANVM
ORDINIS PRAEDICATORII.



ETISTI à me, reverendissime Pater Ludovice, ut eos Genuenses, quos vel ob insignem aliquam virtutem, vel ob egregium aliquod facinus memoria dignos putavero, posteritati commendem, præteriens sane viventes: ne amor, odio, aliive affectui aliquid forsitan tribuisse videremur. Facile erat parere præcepto tuo, si scriptoribus rerum nostrarum paulo diligentius cura fuisset ea posteris tradere, quæ lex etiam historici postulabat. Sed cum illis solum fuisse studium videamus nudam veritatem sequi, & simplici quodam dicendi genere bellorum, aliarumque rerum exitus mandare memoriae, (omnia enim in laudem Reipublicæ contulerunt, nec in enarranda gestorum serie, aut iis exornandis, qui ea feliciter gesserant, ulla ex parte laborarunt) nullum mihi in evolvendis Annalibus nostris auxilium positum esse putavi. Quam ob causam, eorum tantum nomina, quos vel aliarum gentium scriptores laudibus efferunt, vel frequens hominum sermo adhuc admiratur & prædicat, quantum una lucubratione consequi potui, in unum corpus redegi. Nolo tamen de populo meo male id suspiceris: quia clarorum virorum exiguus tibi numerus oblatus sit. Ille quidem ingens, maximusque deprehenderetur, si diligenti & otioso homini provinciam delegasses. Incipiam igitur, unde æquissimum est, à pietate & innocentia: in quibus omnis veræ virtutis columen ac stabilimentum positum est.

Romulum, Felicem, Syrum, & Genuenses fuisse, & Genuensis urbis Episcopos, liquet: qui præter vitæ sanctitatem, singularesque virtutes,

D his etiam prodigiis claruere, ut intra beatorum agmina, & coelestis aulae principes, digne annumerati sint.

Desiderius quoque natione Genuensis divina dispensatione ex indocto agricola mox Lingonensis Episcopus factus, & pro salute populi sui martyrium passus, tanta sanctitatis fama apud Lingones Galliarum populum, ex his, quos nunc Burgundiones appellamus, tamquam manifestis miraculis celebratur, ut par fere Apostolis habeatur.

Multos singulæ sæpe virtutes claros orbi reddere. In Sinibaldum Fliscum, cum, qui Innocentius IV. postea dictus est, ita omnes virtutes natura concessisse videtur, ut neque omnes enumerare, neque quid illi defuerit, invenire facile sit. Singularis tamen prudentia, consiliaque humanum ingenium transcendentia, viam illi non ad Pontificatum modo, sed ad gloriam quoque paraverunt. Nam cum Fredericus II. astu simul ac viribus formidabilis, implacabili odio ecclesiam Dei persequeretur, defunctoque Pontifice Maximo nemo inveniretur, quem infestissimo hosti digne opponerent, & ob id Romana Sedes aliquamdiu vacasset: admirabiles in homine virtutes effecerunt, ut omnium consensu Pontifex crearetur. Is cum animadverteret, omnes sibi exitus præclusos, Petrique naviculam maximis periculis objectam esse, triremes viginti clam Genuæ parari curavit: qua classe Tiberim ingressa, ab Roma Genuam pervectus est, inde Lugdunum petens: atque ibi conventu totius Occidentis habito, quo etiam Regum quidam accessere, damnatum Fredericum abdicavit imperio, plurimum illi virium subtrahens: tantaque prudentia rebus consuluit, ut Pontificatu ad solitam amplitudinem restituto, qui velut profugus Gallias petierat, velut triumphans in Italiam redierit.

Nec doctrina, bonarumque artium studia Genuensibus defuere. Nam & Joannes Balbus ordinis tui, inter cætera ab eo præclare scripta, laboriosum Opus, quod *Catholicon* vocari voluit, non sine laude perfecit. Et Simon Monachus ex Arabica lingua in Latinum sermonem multa convertit: adeo quidem docte & eleganter, ut si eum tollas, magna sane medicinæ pars suis velut instrumentis exarmari putetur. Ursus quoque haud inepto carmine pleraque cecinit. Andalonem, quem de Nigro vocant, multiplex certe doctrina, sed mathematicarum præcipue artium cognitio adeo commendat, ut haud ignobilis poeta Boccatus, nunc venerabilem, nunc præceptorem suum nominare non erubuerit. Horum tamen nemo Innocentium æquavit: qui eo quidem acumine scripsit, ut qui legunt, coeleste potius illi fuisse ingenium prædicent, quam humanum.

Bellicæ rei laude, maritimisque triumphis plurimi celebrantur: è quibus Obertus Aurius, præter hoc quod civitati sancte ac juste præfuit, Pisanam classem, qui populus gloria rei bellicæ terra, marique pollebat, mira felicitate superavit. Aurius Lamba in sinu Illyrico bellum gerens devicta jam prope Venetorum classe, cum nunciatum ei esset filium fortiter dimicantem cæsum fuisse: *Undis*, inquit, *eum commendate: nobilissima enim ipsi sepultura continget: quod pro patria strenue pugnantem, & jam victorem maria servabunt.* Paganus & ipse quoque Aurius eo memorabilior, quod cum Græcorum, Aragonensium, Venetorumque vires in unum contractas, haud procul à Chalcedone magna cæde fudisset, interjecto postea tempore eosdem Venetos sine cæde ac sanguine mari expugnavit, ac cepit. Nec Lucianus Aurius silentio prætereundus est, qui sinum Illyricum diu populatus, cum turpi nihilominus egestate omnis exercitus maceraretur, quotcunque illi erant, argentea pocula egentibus dedit. Postremo cum remigem fame laborantem, & ob id opem miserabilius petentem obvium habuisset, fibulam cinguli præcidit, & inopi dedit. Quibus artibus, & audientem imperio exercitum habuit, & pari triremium numero cum hoste congressus egregia victoria potitus est.

Nicolai Spinulæ facinus eo clarius fuit, quod qui impar hosti viribus erat, pro viribus artem reperit, qua superior fieret. Nam cum cerneret classem Venetam numero triremium longe præstare, suis in unum contractis iussit multarum transtra convelli: hisque inter sese colligatis effecit, ut area, campusque verius quam multitudo navium videretur. Illas deinde in fronte collocans ad hostium impetus excipiendos, & fugam simulans, venientes sine ordine Venetos, & paucitatem illam Nicolai contemnentes, ita elusit, ut priores ante expugnaverit, quam posteriores opem suis ferre potuerint. Hac igitur arte profligatis hostibus, & supra viginti triremibus captis, parva admodum suorum cæde nobilem victoriam consecutus est.

Sed horum omnium gloria (& reliqua mortalium opera) paulatim consenesceat. Gulielmi Embriaci nomen sacra paropsis aboleri non finet. Fuit vir iste non animi tantum magnitudine, sed quadam insuper expugnandarum urbium peritia apprime præditus. Itaque cum exercitus Christiani Palæstinam pervagarentur, & oppugnare Cæsaream urbem tunc munitissimam statuissent, Gulielmus, qui Genuensi classi præerat, primus omnium moenia conscendit, intraque urbem primus penetravit. Quamobrem capta civitate, optio præmiorum ut fortissimo ipsi delata est. Ille vasculum Smaragdinum, quod nunc in Divi Laurentii sacrario magna veneratione servamus, omnibus spoliis antepo-

A fuit, nobilisque victoriæ monumentum Genuam pertulit.

Scio equidem robur ac prævalidas vires inter bona corporis, non inter virtutes annumerari: quam ob causam nulla mihi cura fuit eos referre, qui hac ratione famam sibi pepererunt. Duo tamen exempla ideo subjiciam: qui non tantum corporis robur, sed & animum quoque respiciunt. Cum Francorum Rex Carolus secundus adversus Philippum Artavellum, Flandriamque rebellantem arma sumpisset, comparato validissimo exercitu ad id flumen pervenit, quod fines regni, Flandriamque determinat. Tenebat ulteriorem ripam B Philippus instructas acies ostentans: cui satis erat à transitu fluminis Regem arcere. Cum uterque exercitus aliquandiu immotus suas, hostisque vires conspicatus fuisset, nec inveniretur, qui superare flumen auderet: Nicolaus Janus, ut invicti roboris, ita interriti animi juvenis, tribus tantum sagittariis adsumptis, primus omnium flumen trajecit. Quam hominis fiducia terrefactus Philippus sensim pedem retulit: ac trajiciendi exercitus Regi facultatem dedit. Hoc Nicolao longe robustior fuisse perhibetur Paulus Sylvester, ut vulgus loquitur, Salvaticus, qui Rege judice equo egregio magnitudine virium prælatus est. Nam cum Petrus ulterioris Hispaniæ Rex, inter custodes corporis Paulum haberet, memoriæ proditum est, Regem ad rapidi fluminis ripas devenisse, equoque fluvium intrare non ausum desiluisse, Paulique humeris, quam sonipedis dorso, deportari maluisse. Mira hominis fiducia, qui nobilissimum Regem gestans, non extimuerit ei periculo se atque illum simul objicere: cui devitando ne jumentum quidem vires satis esse putabantur.

C Magnam majoribus nostris justitiæ curam fuisse, cum multa alia declarant, tum Pera, Caphaque ignobilia quondam tuguria, nunc opulentarum urbium claritate æquant, testimonio sunt: quæ profecto nunquam ad id amplitudinis contendifsent, nisi justum illis imperium contigisset. Neque D ego nunc enumerandos puto singulos præfides, qui cum his aliisque urbibus præfuissent, singulare aliquod justitiæ documentum edidere. Paucis etenim memoratis reliquorum licebit innocentiam, integritatemque cognoscere. Simon Vignosus, cum perdomita insula Chium urbem obsideret, edixerat, ut si quis in vineis, aut pomariis invito domino deprehenderetur, virgis caderetur. Cum agrestes ignari quisnam esset, Franciscum filium ejus adolescentem in vineis inventum patri obtulissent, nullis precibus exorari potuit, quin natum uvis à collo pendentibus, flagris cædi jussit. Idem moriens E testamento legavit aureos quingentos inter egenas virgines Chias, viro tradendas, in dotis auxilium distribuendos: tanti arbitratus ea damna, quæ indigne agrestibus intulisset. Maluit vir ille patriæ charitatis oblitus, se justum imperatorem, quam indulgentem patrem videri.

F Matthæus Maruffus belli, pacisque artibus æque memorabilis, cum præses Famaugustæ designatus esset, audierat eam civitatem furtis, rapinisque patere: urbem ingressus omnia deteriore etiam loco posita comperit. Igitur nec præfecto vigilum, nec alii satis credens, ipse noctu obire civitatem cœpit, eo quidem cultu, ut agnosci non posset: tum, ut quemque obvium habuerat, percontari, quo iter tenderet, quave causa inepto tempore cicumvagaretur. Suspectos cruciatus, convictos supplicium sequebatur. Pauculis diebus adeo valuit severitas regentis, ut plenæ preciosis mercibus stationes sine ullo custode etiam noctu relinquerentur. Purgata hoc modo civitate, unus supererat fur insignis eorum numero, qui nocturnas excubias in moenibus agebant. In eum cum sæpenumero insidias, artesque parasset, & ille innoxias manus servans omnes

omnes ejusmodi dolos cautus falleret : Matthæus postremo haud ignobile pallium penes eum dormientem abiecit , ratus fore , ut ille excitatus pallium asportaret. At ille somno excussio , ut ante pedes suos abjectam vestem conspexit , paulisper dubitabundus , ac deliberanti similis , exclamavit : *Quid me toties , Matthæe , tentas ?* ac pallium suo loco reliquit.

Illud quoque multorum sermonibus celebratum fuit : quod dum mercator quidam Persa Capham venisset , fericum , gemmas , aliasque preciosas merces secum afferens , incautoque omnia fraude sublata fuissent : ille infano similis urbem obire , exclamare , Deum atque hominum fidem invocare , omnia fletu , querelisque replere. At Hieronymus Justinianus Consul id crimen non sine sui dedecore latere posse ratus , adhibita rebus diligentia , furtum detexit : & vocato ad se in prætorium Persæ omnia cum fide reddidit. Tum ille ad domum reversus , ex lectissimis mercibus ingentia dona ferens , osculari pedes , gratias agere , eumque justissimum prædicare : ut vero Consulem aspernantem munera vidit , seque non sine magna mercede à Genua Capham usque missum esse affirmantem , ut eum , reliquosque ab injuria tueretur , tam demum in admirationem hominis conversus , exclamare , eam vere urbem templum esse justitiæ , & qui eam regerent , vere dignos , qui orbis imperarent. Nam si quid in patria tale sibi accidisset , plus in dominum ex recuperato furto , quam in se , perventurum fuisset.

Nec matronalis pudicitia curam illi unquam populo majorem fuisse crediderim : cujus rei certissimum argumentum habeo , quod nullæ unquam urbes , quantumvis injustæ ac odiosæ , expugnatae à Genuensibus inveniuntur , in quibus pudicitia muliebris summo studio conservata non sit. Duo tantum ejus rei , longe tamen diversa exempla subijciam. Salagrus à Nigro , non is , quem ætas nostra vidit , sed ille antiquior maritimarum rerum gloria insignis , cum decem triremibus præesset , quatuorque Aragonensium onerarias naves expugnaret , & æstu ac labore fessi socii esurire se ac sitire clamarent , respondit , neque panem , neque aquam jam sibi superesse : jussisse enim , ut hæc omnia in mare abjicerentur. Itaque si famem , sitimque explere velint , expugnandas esse hostium naves , quæ rerum omnium copia refertæ essent. Tantumque valuit severitas ac pertinacia Ducis , ut naves summa obstinatione defensæ , quæ multos proceres cum liberis & conjugibus domum repentes vehebant , captæ tamen sint. Parta victoria , primum omnium edixit , ut mulieres omnes inviolatæ servarentur : majusque ipsi tuendi pudoris , quam prædæ , studium fuit. Contractis in unum foeminis , ac præpositis illis custodibus , dum quænam singulae essent , percontatur , forte comperit ex proceribus unum , quam unice amabat , uxorem moestum ac lacrymantem jugulasse , veritum , ne si mulier eleganti forma in manus hostium devenisset , captivo corpori illuderetur. Salagrus ira concitus , quod illa de se , deque Genuensibus tam male concepisset , homicidæ caput auferri jussit : mulieresque intactas in terra exposuit.

Sed Salagrus ipse legem , moresque Genuensium sancte quidem , sed nullo sane captus amore servavit. At Lichinus Vinaldus vir divitiis & claritate generis inter primores civitatis non posterior , non cum alienigenis , sed secum ipse , & cum amore bellum gessisse videri potest. Nam cum egregia forma matronam deperiret , eique multos annos importunus fuisset , & illa non in decore , sed in pudicitia foemineam laudem positam esse sciens , nunquam in eum oculos deflexisset , forte evenit , ut vir ejus Sardinia captivus in vinculis asservaretur.

A Illa cum nec viro ferre opem , nec parvos ultra liberos alere posset , post egestatem diutius toleratam , juvenem ad se vocatum domi excepit , ejusque genibus advoluta : *Statueram* , inquit , *animo* , *pudorem* , *fidemque* , *quam viro debeo* , *ad extremum usque vita sine labe tueri. At quoniam egestate premente extrema omnia cum his liberis perpessa sum* , *victa malis* , *me* , *corpusque* , *ac famam arbitrio tuo committo. Tu esurientium miserere.* Ille dudum mentem castam , & nunc in perferenda calamitate fortem admiratus : *Bonum* , inquit , *animum sume* : *neque enim patiar* , *ut quam amantis blanditiæ pellicere nequiverunt* , *savitia fortuna adulteram faciat* : omnisque impudici amoris oblitus ad uxorem convolat , & quæ gesta erant , refert omnia , utque mulier innocens ab omni quoque suspitione præservaretur , triticum , vinum , pecunias , neminem præter uxorem ad eam ferre voluit. Exque impugnatore defensor castitatis ejus factus est.

B Multos acceptas injurias æquo animo tulisse memoriae proditum : nec secula quoque nostra adeo virtutum infœcunda fuere , ut hæc æquitas animi in plerisque spectata non sit.

C Verum cum alia ratio eorum sit , qui ad Deum omnia referentes non injuriarum modo obliviscuntur , sed acceptis etiam gaudent , expectantes ab eo mansuetudinis suæ præmia , qui relictæ sibi ultionis retributionem pollicitus est : alia eorum , qui naturalem quandam justitiam sequuntur : non dubitabo exemplum illud referre , quod propter ipsam quoque novitatem rei , ætas nostra sæpe laudavit. Antonius Justinianus , equestris ordinis vir , genere , opibus , clarus , cum in distributione publici tributi insignem se accepisse injuriam arbitraretur , haud aliter se domi continebat , quam si aliquem domesticorum lugeret. Ad quem consolandum cum Lucianus Spinula , vir præter splendorem generis lenitate quadam & auctoritate nemini cedens , venisset : *Oro* , inquit , *Antoni* , *ne hanc injuriam iniquo animo feras.* Id cum longo sermone bis , terque iterasset , Antonius non sine stomacho : *Cupio* , ait , *ex te* , *Luciane* , *prædiscere* , *qua tu æquanimitate injurias ferre soleas.* At ille nihil permotus : *Cogito* , inquit , *aut me gnarum* , *aut ignarum aliquando injurias dedisse* : *ac velut dandi* , *accipiendique vicissitudo sit* , *illatis acceptas compenso.*

D Mirabitur aliquis , idque non immerito , cum egregii Duces Genuensi populo præfuerint , cur eorum neminem attigerim : præsertim cum ex iis alii insigni quodam amore in patriam , alii prudentia , quidam justitia , vitæque integritate , alii singulari quadam moderatione præditi digne laudari mereantur : indignumque sit eorum nomina devitare , qui pro amplitudine patriæ , neque labores , neque pericula ipsi devitarint. Ego sane haud ignarus sum ; uberem mihi scribendi materiam subtrahi , dum viventium judicium reformido : qui vel infensi principibus , vel beneficiis obnoxii , veras laudes parum æquis auribus accepturi forent : nec judicium , sed affectum vocarent , aliorum virtutes referri , alios silentio præteriri. Quam ob causam seponendi mihi omnes erunt : ne suspecta scribentis fides famæ eorum quoque , quos memorabimus , aliquid officiat.

F Nec eos mihi referendos putavi , quos dignitates illustrare. Nam si horum quoque nomina posteris commendanda forent , quis nescit Othobonum Fliscum , quem postea factum Pontificem , Hadrianum vocare , res maximas inchoasse , quas immatura morte præceptus explere non potuit ? Joannes , Lucas , Ludovicus , Flisci , Cardinales , magna rerum gestarum fama in nostram usque ætatem celebrantur. Brancæ Aurio seniori , & huic quoque posteriori , quem regnantem vidimus , imperio possessa Sardinia , & opes prope incredibiles , cla-

claritatem nominis attulerunt. Quid Grimaldos, quid Spinulas eloquar? quid Campofregosos? quid Buccanigras? Zacharias quoque, & Gatilufios? quos vel collata à Regibus dignitates, vel adjecta imperio urbes, aut insignes victoriae, non sine ratione nobilitavere? Quos quidem omnes missos facio: non quod illis praclaras defuisse virtutes putem, sed quod scriptorum negligentia ea, quae vera sunt, animi bona parum persecuta est.

Cum igitur non tam eos, quibus dignitates, opes, honores contigerunt, laudibus efferrideceat, quam qui honeste illis usi sunt, scriptoribus imputo: quod viros memoria dignissimos subripuerint mihi. Unum tamen divitiarum exemplum, quod ut minus splendoris, ita verae, solidaeque virtutis plus habuit, praetereundum mihi nequaquam putavi. Franciscus Vinaldus, omnium qui sunt, qui-

A que fuerunt; Genuensium divitias supergressus eam cunctis in rebus moderationem tenuit, ut imensa opes, & privati hominis modum excedentes, nemini unquam injuriam intulerint, nullius oculis molestae fuerint. Habitavit aedibus, neque sordidis, neque invidendis, victu parco, cultu parciore contentus. Ancillarum, famulorumque tantum illi fuit, quantum mediocris fortunae homini satis esse solet. In hoc tenore vitae usque ad extremum senium perseverans, adeo caruit invidia, ut neminem unquam ipsi inimicum fuisse comprehensum sit. Et ne quis hanc hominis moderationem tenacitatem suspicetur, hic ille Franciscus est, qui id aurum patriae largitus est, ex cujus fructibus publica debita, quae *Capitula* valgo dicimus, quotannis minuuntur.

F I N I S.



GAUDENTII MERVLAE
DE
GALLORVM CISALPINORVM
ANTIQVITATE AC ORIGINE
LIBRI III.

Novis Annotationibus expoliti & aucti.

DECVRIONIBVS

MEDIOLANI

ANTONIVS ANTONIANVS

S. D.



PLANE ita contigit, ut sperabam, cum hos primo Gaudentii Merulæ de antiquitate Cisalpinæ Galliæ libros imprimendos curavi: amant opus omnes, in manibus habent, fovent, osculantur, nec ullum finem faciunt celebrandi. Res ipsa magnopere placet, varietas capit, tenet oratio. Quid pergo? quicquid est, eruditio est, elegantia, suavitas, atque in nostram, quam mire describit, provinciam; & provinciæ caput, quam verissimis laudibus ornat, Mediolanensem urbem; ac urbis denique antiquissimas aliquot familias, quas vel illustrat non ita notas, vel notas decorat, amor, & observantia. Est igitur cur ipse mihi vehementer gaudeam, quod eam, quam animo spem conceperam, comprobarit eventus; & ab urbe nostra non mediocrem gratiam inierim, dum optimi Auctoris totos in ipsius & Provinciæ nostræ laudibus positos labores novorum typorum beneficio ab ignoratione hominum propemodum vindico. Sed habebunt qui eo me nomine diligunt, cur in posterum ament in summa iterum operis inopia, parique cupiditate idem quod antea, beneficium præstantem; verum iis auctum bonis, quæ cum videbunt studiosi non contemnenda putabunt. Cur autem opus vestro insignitum nomine DECVRIONES in lucem voluerim prodire, ineptissime me faciam, si pluribus ostendam. Quid enim? referam laudes universorum, prædicem singulorum? dicam quanta sit familiarum nobilitas, quanta præstantia virtutum? addam prudentiam, liberalitatem, justitiam in omni munere vestram? addam singularem, nec ullis talis unquam laudibus celebratam in ista regendæ urbis provincia pari cum integritate & continentia conjunctam vigilantiam; & hæc ita sunt omnia in oculis, in linguis posita civitatis, ut quot illa homines, tot vos habere videamini laudatores. Omittam igitur, quæ non necessario commemorarem: & si quam me cupiunt homines nuncupati nobis operis rationem afferre, illud intelligant, nullas me quidem non habuisse, cur nuncuparem; in iis tamen singulari meæ in vos observantiæ, quæ diu latere non poterat, in primis fuisse obsequium.

CATALOGVS DECVRIONVM MEDIOLANI.

PRINCIVALLIS MONTIVS J. C. VICA-
RIVS.
JOSEPHVS ARCHINTVS J. C. L. TE-
NENS REG.
HORATIVS CRVCEJVS J. C. } ASSES-
M. ANTONIVS TONSVS J. C. } SORES.
LVDOVICVS SEPTALIVS PHYSICVS.
P. CAMILLVS MARLIANVS COMES.

P. AEMILIVS CAMBALOYTA.
CHRISTOPHORVS RIPA.
CORIOLANVS VICECOMES.
A. MARIA ALIFER.
CHRISTOPHORVS ASSANDER.
DOMINIO CATIA.
OCTAVIANVS DVGNANVS EQVES.
CHRISTOPHORVS BESVTIVS.

INDEX CAPITVM.

LIBRI I.

- CAP. I.** De Galliarum divisione, & circumadjacentibus regionibus.
II. De populis Gallia Citerioris, ejusque divisione.
III. De Insubribus populis, eorumque origine.
IV. De Familiis Insubram & antiquissimis & clarissimis.
V. De Vicis nonnullis, qui in Mediolanensi sunt agro.
VI. De Orobiis populis, qui ad Insubres attinent.
VII. De ceteris Insubribus.
VIII. De Orobiis ceteris, qui ad Insubres minime pertinent.
IX. De Cenomanis.
X. De Venetis.

LIBRI II.

- CAP. I.** Cisalpina Gallia compendiosa descriptio.
II. De Bojis populis.
III. De Gessatis populis.
IV. De Senonibus populis.
V. De Alpibus.
VI. De maritimis Alpibus.
VII. De Coctiis Alpibus.
VIII. De saltu Juliae Alpibus.
IX. De Grajis Alpibus, qua & Grata dicuntur ab aliquibus.
X. De Penninis Alpibus.
XI. De Summis Alpibus.
XII. De Leopontiis Alpibus.
XIII. De Rhaticis Alpibus.
XIV. De Tridentinis, Juliis, & Carnicis Alpibus.
XV. De nonnullis fluminibus & lacubus Cisalpinae Galliae.

- XVI. De Lario lacu, Addua, & aliis fluctibus Alpibus.
XVII. De reliquis Cisalpinae Galliae lacubus, & fluviis, ex Alpibus in Padum influentibus.
XVIII. Cispadanam Galliam qua flumina alluant.
XIX. De translatione dignitatis coronandi Imperatores à Mediolanensibus ad Mogunciacos principes.

LIBRI III.

- CAP. I.** Celte, Galli, & Galatae cur dicti?
II. Insubres unde dicti?
III. De Cenomanorum origine.
IV. Gallus quid significat, prater omnium opinionem?
V. In Judaeos invectio: de Longobardis & Gotthis historia.
VI. De moribus Cisalpinorum Gallorum.
VII. Quibus edulis & rebus abundet Cisalpina Gallia?
VIII. De Lapidicinis.
IX. De Euripis duobus, è quibus unus à Ticino, alter ab Addua Mediolanum defleuntur.
X. De idiomate Gallorum antiquissimo.
XI. De magnificentia Mediolanensis Urbis, deque nonnullis scitu dignissimis Gallorum Cisalpinorum gestis.
XII. De origine Urbis Mediolanensis.
XIII. De situ Urbis Mediolanensis.
XIV. De opibus & potentia Mediolanensium.
XV. De nobilitate conditorum.
XVI. De dignitate Urbis Mediolanensis.
XVII. De navali pugna inter Venetos & Mediolanenses sub Cremona.
Querela apologetica.

GAVDENTII MERVLAE

D E

GALLORVM CISALPINORVM
ANTIQVITATE AC ORIGINE

L I B E R I.



A VOLAVERANT ab urbe, velut à cavea, viri cum auctoritate & moribus, tum literis & beatissima ingenii ubertate conspicui, ad geniales ruris delicias: quorum singula nomina si enumerare contenderem, in longum nimis nostra protraheretur oratio. Sat fuerit igitur è plurimis paucos admodum recensuisse: è quibus primas partes Bonaventura & Nicolaus Castillionei tenebant, quod essent miro & animi & eruditionis candore. Aderat quin etiam Benedictus Jovius, antiquitatum mirus observator. Ad cujus dexteram Baptista Landulphus, & Blasius Phyletus assederant, quales (Dii boni!) physici? Illuc quoque concesserant juvenes nonnulli Ciceronianarum elegantiarum sectatores, Hortensius Appianus, L. Annibal Crucejus, & Petrus Franciscus Busca: qui relicto Patavio & Bononia, Ticinum venerant ad ingenii cultum sub Andrea Alciato. Qui cum se mutuo salutassent, inquit Phyletus, Cur non sessum imus sub umbram aliquam, quæ huic nostro sit non importuna sermoni, donec Socrates noster Alciatus accesserit: *ne dies* (quod ajunt pictores) *ulla transeat sine linea*: tum ne sopor, qui à prandio, ut Plautus attestatur, non perbonus est, nos opprimat. Cum hoc consilium omnes approbassent, sub opacitate ilicis annosæ propter decursum gelidi fontis decessum est. Hic Hortensius, Quantum nunc sorti gratuler meæ, inquit, ne cogitari, ne dici quidem potest: cum hic fere (ut dicitur) *hominum præstantiam in sinu teneam*. Dii boni, quando ex hoc beneficio vobis relaturus sum gratias, qui huc adduxistis lumina totius Cisalpinæ Galliæ florentissima? Utinam, Landulphus ait, veræ essent, (de me tantum loquor) quas enumerasti, laudes. Verum cum ingenioli mei vires ipse perpendo, puto hoc à te dici ex abundantia amoris quadam, qua optimos quosque prosequeris, ut etiam laudatu apud te digna sint ea, quæ fortasse plures agnoscunt minus. Tum Bonaventura, Hæc planæ, inquit, (pace tamen dicam vestra) pueriles videntur exercitationes mihi: dicatur tandem aliquid, quod vestra expectatione sit dignum. Hic tacentibus reliquis, inquit Landulphus, Non consule, sed dictatore opus est. Imo, inquit Castillioneus, Phalaride ad hanc pertinaciam evincendam. Eligatur igitur, inquit Crucejus, ex communi consensu tyrannus, qui habeat in nos merum imperium. Placuit id consilii omnibus. Ductis itaque sortibus, Landulpho cessit tyrannica potestas: qui statim Phyletum elegit vicarium sibi: judices extraordinarios Bonaventuram, & Petrum Franciscum Buscam: qui rebelles castigaret, Hortensium. His peractis desedit Landulphus in eminentiore viridantis herbæ tumulo, &

penes eum Phyletus: & cum graminea sibi quisque torum fecisset in herba, inquit Castillioneus: Quando à nobis constitutus sis princeps hodiernus, fortuna multo magis nunc tibi, Landulphe, formidanda est: feriunt enim summos fulmina montes, *Corpora morbis majora patent*. Memento igitur humanitatis, nec te fugiant exempla crudelitatis extinctæ. Non pepercit fratri Thymeleon: si Julius fueris Cæsar, invenies Brutum & Cassium. Nollem, Landulphe, tamen hæc dicta à me putes, vel ut admonitor accedam, vel ut severe minus tuo imperio utaris, sed ut humanæ conditionis sis memor. Tunc subridens Landulphus, Castillioneus, inquit, hanc ita potestatem exercebo, ut non tyrannum me, sed patremfamilias experturi sitis: nec tyrannicum illud, *Oderint, dum metuant*, unquam sentietis: vos tamen obsecro, ut filios, non subditos agnoscam: nam si vos, quales exopto, reperero, me quoque, qualem exoptatis, facile invenietis. Age igitur, inquit Castillioneus, ut & principem te, & patrem cognoscamus. Tunc Landulphus, Nicolae Castillioneus, inquit, pro tua, quæ semper celeberrima fuit, humanitate hic antiquitatem Cisalpinæ Galliæ, quam fere auctores omnes & Græci & Latini intactam reliquere, nobis expone: ut intelligat debere se tibi plurimum posteritas. Tamen si focus ad cothurnum non ascendat, inquit Castillioneus, conabor tamen pro viribus injunctum onus absolvere: Vos interim omnes oratos volo, ne has ambages meas circumferatis: nam hac in re non omnibus dormio: ad hæc si quæ frigida dictiones exciderint, aut leves sententiæ, tyrannici spiritus importunitati adscribatis, non autem mihi. Verum ne quandoque parturiant montes, & nascatur ridiculus mus, dum pauca dico, precor attendite.

CAP. I.

De Galliarum divisione, & circumadjacentibus regionibus.

ANTEQVAM situm Cisalpinæ Galliæ dicere aggrediar, res postulare videtur, Galliarum situm paucis exponere, & eas gentes, quæ finitimæ sunt. Sed quæ loca, & nationes ob intensissima frigora, & assiduam fere noctem & diem, item ob vastitatem solitudinis minus frequentata sunt, de his haud facile compertum narraverim: cætera quam paucis absolvam. Gallia omnis duplex est, Transalpina videlicet, & Cisalpina, quæ nobis Deorum munere concessa est. Illa rursus ex descriptione C. Cæsaris triplex est, Belgica, Celtica, & Aquitana. Celtas ab Aquitanis Garumna flumen, à Celtis Belgas Matrona & Sequana dividunt: & hos à Germanis Rhenus. Sic quinque metis finitur, Rheno, Alpibus, Mediterraneo mari, Pyrenæis montibus, & Oceano. Ab Oriente enim Gallias, à Germania Rhenus, à citeriori Alpium crepidines immensæ dispartiunt: Mediterraneum mare inter illas & Africam fluit: Ab Occasu Pyre-

THE NEW YORK PUBLIC LIBRARY

ASTOR LENOX TILDEN FOUNDATION

500 N. 5TH ST. NEW YORK, N.Y.

1891

1891

1891

1891

1891

1891

1891

1891

1891

1891

1891

1891

1891

1891

1891



Pyrenæis collibus ab Hispania secluduntur: Inter Occasum & Septentrionem Oceano quoque alluuntur. Ad Alpes jacent Allobroges, Helvetii, qui ad Celtas rejiciuntur. Secus litus Mediterranei freti porrigitur Brachata Gallia, quæ postea Narbonensis est dicta à Narbona colonia: quo in tractu Forum Julii colonia est, & Massilia à Phocensibus condita: de cujus institutis & moribus ita refert M. Tullius in Flacciana Oratione: *Neque vero te, Massilia, prætereo, quæ L. Flaccum militem, quæstoremque cognosti. Cujus ego civitatis disciplinam, atque gravitatem non solum Græcia, sed haud scio ancunctis gentibus anteponendam jure: quæ tam procul à Græcorum omnium regionibus, disciplinis, linguaque divisa, cum in ultimis terris cincta Gallorum gentibus barbaria fluctibus alluatur, sic optimatum consilio gubernatur, ut omnes ejus instituta laudare facilius possint, quam emulari.*

Tunc Busca, contracta fere fronte, Castillioneæ, inquit, nisi tua nimis ad Massiliæ laudes festinasset oratio, non te audivissem, quod Helvetios ad Celtas rejeceris.

Facit hoc, inquit Castillioneus, C. Cæsaris auctoritas, qui de Helvetiis scribens, ait*: *Qua de causa Helvetii quoque reliquos Gallos virtute præcedunt: quod fere quotidianis præliis cum Germanis contendunt: cum aut suis finibus eos prohibent, aut ipsi in eorum finibus bellum gerunt.* Cornelius præterea Tacitus†: *Irritaverant, inquit, turbidum ingenium Helvetii Gallica gens.* Sed redeo ad Gallos, à quibus me, Busca, protraxisti. Sunt hi quidem omnes bellaces, & studio Martis exardent: sumptis armis, quam primum animorum fervent impetu, conferendæ pugnae alacritate impigri: alioqui simplices, & nulla morum malignitate degentes: idcirco irritati exasperantur maxime, & pugnas ineunt *μετὰ περιστάσεως*: nullo tamen negotio fere placantur. Hac nostra tempestate ad disciplinas maxime excoluere ingenia: & agrum habent frumenti præcipue & pabuli feracem, amœnum saltibus, venationibus, quibus maxime Galli oblectantur, idoneum, noxio animalium genere minime evitandum, fluminibus & fontibus irriguum, omnium denique ad usum animantium foetu beatissimum. Totius autem Gallia longitudo est ccccxx. mill. pass. latitudo vero cccxiii. mill. pass. non excedit. Gallias porro cingit Germania ab Oriente. Hæc à Pannoniis, Rhæticis jugis, & Danubio, à Sarmatis, Getisque montibus, & mutuo metu finitur. Oceanus majore ex parte anni ibi sævissimus cætera (ut aliqui volunt) ambit. Verum hac ætate deprehensum est sinus tantum esse, quos terra continens excipiat. Suetia enim & Norvegia cum Dacia conjunguntur: cui finitimi sunt Lapones, fere sub exordio Arctici Circuli: qui omnium gentium commercia adhuc evitant, Regi tamen Daciæ tributa dant annua. Sunt, si forte quæritis, Germani bellacissimi. Unde de his Virgilius inquit, Georg. lib. I.

Armorum sonitum toto Germania celo

Audiit.

Et infra:

Hinc movet Euphrates, illinc Germania bellum.

Facile Germani frigora sustinent: & hyeme quam æstate ad munia belli sunt præstantiores. Bella autem cum finitimis non avaritiæ, aut imperandi studio tractant: sed ut circum se vastæ sint solitudines. Sunt hospitibus boni, & supplicibus mites. Dat Germania crystalli, succini, ceraunii candidi, & viridis gallaci copiam. Germanico Cæsare, cum hyemaret exercitus Italicorum in Germania, miræ virulentia fons repertus est, ex quo qui bibisset, dentium jacturam intra biennium, & genualium

A compaginum dissolutionem subibat, ut standi nulla facultas daretur. Huic pesti remedio esse herbam solam, quæ Britannica dicitur, compertum est. Habet item hæc regio Visontem, mirabili pernecitate animal: & Uros fere forma tauri, quorum vis est & celeritas extra fidem. Alces similes essent capris, nisi essent majores, pellibus variis, & cruribus sine internodiis: idcirco si quo casu concidunt, sublevandi se nulla est potestas.

In Germania quoque sylva est Hercynia, tantæ magnitudinis, ut in ea plures hostium exercitus commode castrametentur. In cujus meditullio planities fertilissima est: quam qui incolunt Cherusci infidi sunt, propter locorum cum ad insidias, tum ad fugam idoneam opportunitatem. Ab his cum tribus legionibus deletus est Quintilius Varus. Tanta autem & sic immensa est ejus sylvæ vastitas arborum, ut immortalis forte fere posita esse videatur. Manifestum est enim occurrantium inter se radicum percussu colles elevari, aut ubi tellus non subsecuta sit, arcus ad ramos usque, & ipsos inter se rixantes curvari patentium portarum modo: ut erectis hastilibus cum curribus, impedimentis, & tormentis bellicis copiæ sine difficultate pertranscant. Habet hic saltus Hercynius alites, quibus nusquam gentium similes reperiuntur. Harum enim volucrum pennæ per noctem ita emicant, & interlucent, ut ejus regionis homines plerunque nocturnos excursus destinent, atque illis utantur ad præsidium itineris dirigendi: præjactis enim per opaca callium pinnulis rationem viæ plumarum refulgentium moderantur indicio. Fulgent & in obscuro lampyrides: quarum fulgoris rationem Sositogenes est conatus adducere, scribens flamulenta animalia naturam ætheris habere, & quinti elementi portionem participare, & ea conjunctione fieri, ut illucescant. Quod tantum id eveniat noctu, ob id dicit accidere, quod minus lumen à majore soleat obumbrari. Venio nunc omnibus (quod ajunt) remis, velisque in Citeriorem Galliam.

C A P. II.

De populis Gallia Citerioris, ejusque divisione.

Inter Apenninum vero, & Alpes, & sinum Adriaticum interjacens planities Citerior Gallia nominatur: non Italiae modo, verum & totius orbis Scriptorum omnium cum Latinorum, tum Græcorum suffragiis beatissima. Hanc rursus bifariam dividimus, in Transpadanam videlicet, & Cispadanam. Transpadana ad Alpes extenditur, & ad Apenninum Cispadana: finiturque Pado, Rubicone, & Apennino, diciturque Togata Gallia, quod ejus tractus homines toga Romanorum passim uterentur.

Bis, inquit Crucejus, per loca illa circa Ariminum, mihi transitus evenit, nunquam tamen Rubiconem (quod sciam) tranavi: quanquam diligens exstiterim in inquirendo hoc tam celebri fluvio.

Ad hæc Castillioneus inquit, Rubicon non procul à Sarfina, Plauti patria, fontes habet: vocaturque hac ætate à circumvicinis populis materno idiomate *Altrusrugum*, paulo inferius *Rugozum*, novissime non procul à sinu, in quem influit, Adriatico, *Pisciattellum* ingreditur per duo millia juxta Cisennam. Non est audiendus Vibius Sequester, qui Rubiconem putat eum esse fluvium, qui Varus appellatur inter Avinionetum & Nicæam in extremis Liguria finibus. Non est hoc loco silentio involvenda, quæ in ponte Rubiconis fuit Inscriptio: ut intelligant omnes, Gallos Cisalpinos & Italos mutua concordia fuisse disjunctos:

E 3

IMP.

* De Bello Gall. lib. I. ab initio.

† Lib. I. Hister. cap. LXVI.

IMP. MILES, TIRO, ARMATE QVIS-
QVIS ES, HEIC SISTITO: VEXIL-
LVM SINITO: ARMA DEPONITO:
NEC CITRA HVNC AMNEM RVBI-
CONIS SIGNA, ARMA, EXERCI-
TVMVE TRADVITO. SI QVIS ER-
GO ADVERSVS PRAECEPTA IERIT,
FECERITVE, ADJVDICATVS HO-
STIS ESTO P. R. AC SI CONTRA PA-
TRIAM ARMA TVLERIT, SACROS-
Q. PENATES E PENETRALIBVS AS-
PORTAVERIT. SANCTIO PLEBISCI-
TI S. VEC. VLTRA HOS FINES AR-
MA PROFERRE LICEAT NEMINI.

Basim trianguli littus Adriatici maris efficit ab Ari-
mino, five, ut vult Pomponius Mela, ab Ancona
usque ad Polam. Campi autem sunt patentes, re-
rum omnium copia fecundissimi. Qui sic opimi
sunt & fertiles, ut & ubertate agrorum, & varie-
tate fructuum, & magnitudine pastionis, & abun-
dantia earum rerum, quae ad victum hominis spe-
ctant, & exportantur, facile omnibus terris ante-
cellat. Mediam Padus amnis fecat, fluvius terra-
rum arbiter, & rerum discrimen, ut is demum
cæteris imperet, qui sub sua potestate subiectum
habeat Padum. Hoc cum Senatus Romanus aspi-
ceret, hinc Cremonam, illinc Placentiam colo-
nias deduxit: quarum opportunitate gentem Cifal-
pinorum Celtarum bellandi studio inflammata,
& ad singula momenta rebellantem, à multis illatis,
acceptisque cladibus in amicitia continuit. Hunc
fluvium Vesulus mons inter Alpina fastigia emi-
nentissimus emittit: & cum dicunt Ligures *Bon-
dicum*, Tusci *Botigon*, hoc est, fundo carentem,
Græci *Eridanum*, maiores nostri, hoc est, Cifal-
pini Galli, *Padum*, à copia piceae arboris, quae eo-
rum idiomate, ut auctor est Metrodorus Sceptius,
Padus tunc appellabatur. Per fines Salassorum mo-
dico fluctu dilabitur: mox augetur à duabus Do-
ris & Morgo fluminibus per agrum Taurinorum.
Fallitur hoc loco Plinius, qui ait *, *Padum ex ra-
pto sibi nihil vendicare*: quando certum sit ante Ti-
cini & Abduæ ingressum plurimis in locis equo va-
dari posse. Ab Alexandria ad Vitellianum oppi-
dum usque, quod nunc *Viadanam* vocant, Caro-
lus ejus nominis quintus Imperator obtinet: mox
aquarum illuvione stagnantem Dux Mantuanus ex-
cipit: quem postmodum in ramos divisum Ferrar-
iae Dux Hercules aspicit: discursuque suo in
mare Adriaticum usque Deltam facit.

Cæterum Græci ante Polybium, qui de hoc flu-
vio aliquid posteritati tradidere, ubinam gentium
sit Eridanus maxime dubitarunt. Siquidem Strabo
Eridanum nusquam reperiri, aut insulas electra
ferentes, in quibus sint aves Melcagrides, attesta-
tur. Æschylus in Iberia Eridanum esse prodidit,
appellarique Rhodanum. Dii boni quas nugas?
Apollonius Padum & Eridanum in Adriam con-
fluere scripsit. Ex his Euripides scopum veritatis
attigit, cum inquit: Ἀρθεὶν δ' ἐπὶ πόντον κύμασι
Ἀδελυῶν ἀκτῶν Ἡριδανὸς δ' ὕδαρ ἐντὶ περὶ φέρον σαλασ-
σων ἐν οἴδμα πατρὸς τριτάταναι νόροι Φαέθονι οἴκτω δα-
κρύων τὰς ἤλεκτροφαεῖς αὐγὰς †. Id est, *Diligebat uti-*

* Hist. Natur. lib. III. cap. XVI.

† Hic locus ex Hippol. Coron. v. 735. & seq. non uno ac sim-
plici mendo corruptus, sic emendandus:

Ἀρθεῖν δ' ἐπὶ πόντον κύμα
τὰς Ἀδελυῶν ἀκτῶν
Ἡριδανὸς δ' ὕδαρ
ἐντὶ περὶ φέρον σαλασσων
Εἰς οἴδμα πατρὸς τριτάταναι
Κόροι, Φαέθοντος οἴκτω, δακρύων
τὰς ἤλεκτροφαεῖς αὐγὰς.
Tolleret enim supra marinum fluctum
Adriatici littoris,
Eridanique aquam.
Ubi purpuream stillant

A que in marinam undam Adriatici littoris Eridani aqua,
ubi purpuream stillant in undam patris misera puella
Phaethontis miseratione lachrymarum electri lucidi
splendores. Cum igitur Græcorum pauci admodum
sciverint quonam in tractu sit Padus fluviorum (ut
inquit Poeta †) rex, non mirum, si tam dissona,
& inter se repugnantia scripsere. Hæcque facilio-
rem ignorati succini veniam facit ignorantia. Ari-
stoteles auctor (ut scitis) & gravissimus, & elo-
quentissimus, penes Padum paludem quandam fuisse
attestatur, calidis & dirum exhalantibus odo-
rem aquis refertam, adeo ut ex eis nullum animal
biberet: nec volucres ejus regionis supervolarent,
quod in illam Mephitim deciderent. Paludis lati-
tudinem denum stadiorum, ambitum vero ducento-
rum exstitisse idem scribit: circa autem margi-
nem crebras fuisse & altissimas populos, quibus
omnis Circumpadanus tractus abundat in memo-
riam Phaethontis, & ab iis lachrymas verno tem-
pore distillantes inter aquas ejus paludis duriciem
lapis imbibere, quas postmodum loci illius acco-
lae per universam Italiam & Græciam collectas com-
portant, & venaleis habent. Illius vero è regione
(si eidem credimus) insulae, quas Græci Electrides
vocant, exstiter: has autem Padus longa seculo-
rum intercapedine cœnosa colluvie continenti ap-
plicuit. Ad has Dædalum cum filio Icaro Minocem
fugientem, devenisse, sunt ex Græcis qui scribant:
& in illarum una æneam statuam sibi, & in altera
stanneam filio crexisse: sed supervenientibus Pe-
lasgis ab insulis Electridibus aufugisse in insulam
inter Sardum Siculumque pontum, quam ab Icaro
ibi vita functo Icarum vocavit: & in ea post &
ipsum extremum diem clausisse. Non desunt igitur
qui putent in ea palude Phaethontem obisse,
& iccirco male etiam olere: certatim tamen cæteri
Græcorum scriptores ajunt, in Pado temeritatis pœ-
nas dedisse: & quæ circa sunt Padum populos suc-
cinum emittere. Dioscorides à nigra populo id dis-
fluere, cadensque in Padum durari, ac coire in la-
pidem preciosi generis: & idem fere scribit Paulus
Ægineta. Solinus à Barbaris in Cifalpinam Gal-
liam succinum primo deportatum dicit: & quod in
ea Itali & Græci inspexerint, ibi etiam ortum suc-
cinum sunt arbitrati, cum sit certissimum non aquis
illud, sed ut crystallum vehementioribus frigori-
bus in Glesaria, quæ insula est in Septentrionali
Oceano, durari. Germanico enim, ut ipse inquit,
Cæsare omnes Germania oras scrutante comperta arbor
est pinei generis, cujus mediale Autumni tempore suc-
cino lachrymat. Rude primo nasci adfirmat, & cor-
ticofum, mox ad expolitionem incoqui adipe la-
ctentis suis. Pro ingenioli mei facultate conatus
sum vobis obsequi, non quod sperarim omnino,
adamussim (quod ajunt) Topographiam hanc vobis
aperire: præsertim cum parcissima admodum apud
Cosmographos hujus habeatur mentio. Nunc tuæ
crunt humanitatis partes, princeps optime, vaca-
tionem dare huic meo labori: idque facturum te li-
bentius spero, quando adesse videas hic viros lon-
ge me doctiores. Hæc cum dixisset Castillioneus,
conticuit.

F Tunc Landolphus, Quando, inquit, ista me-
rito vacatio debeat tibi, non possum non eam ti-
bi concedere, atque etiam gratias agere, qui sic
pensum humanissime tuum absolveris. Nunc, Blasii,
situm & populos, qui primi sunt ex Ulteriore Gal-
lia in hanc Citeriorem venienti, declarabis: præ-
sertim cum tu sis ex Montecalerio, quod oppidum
est licet in Apennino, non procul tamen ab Alpi-
bus Coctiarum.

In aquam patris ter misera
Puella, Phaethontis miseratione, lachrymarum
Electro pellucidos splendores.

† Virgilius Georg. lib. I. v. 482.

Conabor, inquit Blasius, manum ponere in alienam messem, fretus tua & horum humanitate: felicius tamen canonem Galenialiquem imposuisses mihi, si adagii illius, quo admonetur Sutor, *ne audeat ultra crepidam*, memor extitisses. Quando igitur referre pedem non liceat mihi, arenam ingredior. Primi inter Padum & Alpes sunt Salassi, ut his ferme verbis attestatur Strabo libro quarto: *Contraria vero de parte Durias sese immiscet Pado per Salassos intra Alpes illabens Gallia*. Si ergo Durias, qui per agrum Taurinorum fluit, per Salassos illabitur, cum tractum, qui Pedamontanus hac tempestate nominatur, ad Salassos rejiciam: quorum sunt urbes Mons Regalis, Augusta Salassiorum, Segusium, Augusta Taurinorum: citra Padum Alta est colonia Romanorum, Bobium, & Pollentia, quarum meminit his versibus † Claudianus Poeta celeberrimus:

— nec plus Pollentia rebus

Contulit Ansoniis, aut menia vindicis Astæ.

Erat autem Pollentia urbs olim eximia, inter Alexandriam & Astam, ad ripas Tanari: nunc pagus est exiguus. Pollentinas lanas his verbis Columella lib. VII. cap. II. commendat: *Sunt etiam suapte natura pretio commendabiles pullus atque fuscus, quos præbent, in Italia Pollentia, in Batia Corduba*. Volaterranus id municipium putavit esse, quæ Pallantia est in margine Verbanus lacus: in cujus agro Cn. Plancum à M. Antonio triumviro & bello superatum, & interfectum scribit. Ubi hæc Volaterranus expiscatus sit, viderint alii. Fuere Gotthi in Pollentino agro à Stilicone fortunatissimo prælio devicti: cujus victoriam Aurelius Prudentius * plurimis carminibus profecutus est, è quibus hæc:

Tentavit Geticus nuper delere Tyrannus

Italiam, patrio veniens juratus ab Istro:

Has arces æquare solo, tecta aurea flammis

Solvere, mastrucis proceres vestire togatos.

Jamque ruens Venetos turmis protiverat agros:

Et Ligurum vastarat opes & amœna profundi

Rura Padi, Tuscumque solum victo amne premebat.

Depulit hos equitum nimbos non pervigil anser

Proditor occulti tenebrosa nocte pericli:

Sed vis cruda virum, perfractaque congregientum

Pectora, nec trepidans animus succumbere letho

Propatria, & pulcrum per vulnera querere mortem.

Nunquid & ille dies Jove contulit auspice tantum

Virtutis pretium? dux agminis imperiique

Christipotens nobis juvenis fuit, & comes ejus,

Atque parens Stilico: Deus unus Christus utrique.

Hujus adoratis altaribus, & cruce fronti

Inscripta cecinere tube: prima hasta Dracones

Præcurrit, quæ Christi apicem sublimior effert:

Illic ter denis gens exitiabilis annis

Pannonia pœnas tandem deleta pendit.

Corpora famosis olim ditata rapinis

In cumulos congesta jacent: mirabere seris

Seclis posteritas inhumata cadavera late,

Quæ Pollentinos texerunt ossibus agros. †

O celebranda mihi cunctis Pollentia seclis!

O meritum nomen, felicibus apta triumphis!

Virtutis fatale solum, memorabile bustum

Barbariæ: nam sæpe locis ac finibus illis

Plena laceßito rediit vindicta Quirino.

A Pollentia abest duobus fere millibus pass. vetustissimum Triennorum forum: quod hac ætate Bertonorium vocamus. In Alpibus Coctiis est Bobium: ad maritimas Alpes jacet Ceva, titulo Marchionatus illustre municipium: ex his locis oritur Tanarus. Fuere olim gentes istæ Salassiorum (quantum ex majoribus suis nunc habeant nihil) maxi-

A me bellaces. Ab eis D. Brutus cum Marcum Antonium ad Mutinam victum insequeretur, interceptus est: nec prius dimissus, quam data viritum drachma. Messala quoque cum penes istos hyemaret, pro raptis à populatibus lignis ad comburendum pretium pendere coactus est: & C. Cæsaris pecunias semel diripuerunt. Eos tamen Augustus Cæsar delevit: & qui superfuerunt ad Hipporrhædium deportatos sub corona venundedit. Augustam Taurinorum Pœnus Annibal delevit, cum in conditionem volentis venire nollet.

B Salassos, quos Polybius *Δάες* appellat, Lebui Galli sequuntur: quorum urbes sunt Augusta Prætorum in faucibus Grajarum, Pœninarumque: Hipporrhædia à Romanis condita versuum Sibyllinorum jussu. Has duas urbes Romani excolere, quod subitas montanorum excursiones reprimerent. Augustam enim Prætorum D. Cæsar ampliavit, additis tribus Rom. millibus. Mox sunt Vercellæ ad ripas Siccæ, quem Plinius Sefitem vocat. In quarum agro aurifodinæ fuerant patrum Rom. liberalitate sublata, Italiæ visceribus parcere jubentium. In hac urbe commoratus est D. Brutus cum egentissimis tironibus. Tycionum familia non tam antiqua, quam antiquissima, est apud Vercellenses, quando ejus meminerit M. Tullius in *Epistolis ad D. Brutum*. Juxta Vercellas Castinus Joannis adulterini Imperatoris copiarum Dux, & superatus, & captus est ab Ardaburio Orientis Præfecto sub Valentiniano tertio. Tempestate Divi Hieronymi semideserta erat urbs Vercellarum, & inter Ligusticas urbes ab eodem recensetur. Conditam refert Plinius à Saliis Libycorum. Sed animadvertendum, textum Plinianum mendis non vacare, quas vir oculatissimus Hermolaus Barbarus non vidit. Potius enim legerem *Lebunorum* cum T. Livio, aut cum Polybio *Libetiorum*, five *Lebetiorum*, quam Libycorum. Nec vos moveat lectio Ptolomæi, quando & ipse eadem macula sit inspersus. Sunt autem Salii ultra Nicæam populi montes incolentes.

D Decimo à Vercellis lapide Orientem versus Novaria est urbs vetustissima: eam, si Plinio id referenti credimus, condidere Vocontii: tametsi Novarienses fama, quæ plerunque vim testimoniorum habet, conditorem Herculem jactent. Nobilitata est ea civitas cum literarum, tum armorum viris illustribus: L. Albutium Silonem rhetores celebrant: qui sub Pisone Mediolanensem prætor fuit: & Romæ sub Augusto Cæsare Rhetoricen publice docuit, ut auctor est Suetonius: & Theologi Petrum Sententiarum magistrum: cujus vigilis omnis debet, quæ Christianum nomen profitebitur, posteritas. Fuit & Dulcinus ex nobilissima Tornielorum familia, hæresiarcha, in quem cum Clemens quintus Pontifex Romanæ Ecclesiæ animadvertendum censuisset, ipse in Summas Alpes, quæ Novariensi agro imminent, se cum sectatoribus recepit. Quos crepidinum & altitudo & difficultas tutatæ fuissent, nisi superveniens nix solito copiosior plurimam eorum partem & fame & frigore confecisset. Dulcinus Monachus cum Margarita conjugē in justitiæ potestatem decidere, qui persistentes in, quam excitaverant, hæresi inter cruciatus animam efflarunt. Inventus est & Novariensis alter hæreticus, cujus miram pertinaciam ad mortem usque celebrat frater Baptista Mantuanus. Hoc evenit Novariensibus propter nativum ingenii acumen. Novariæ cum essem, hanc in Pario marmore insculptam memoriam legi: quæ cum non mediocrem antiquitatis fragrantiam maxime redoleret, hic adscribendam censui:

TERENTIA Q. F. POSTVMINA SIBI
ET C. VETVRI LVCVMONIS VIRI
SVI

† De vi. Conf. Honorii, x. 202.

* Contra Symm. lib. 11.

† Hucusque Prudentius; reliqua sunt Claudiani, de Bello Get. sub finem.

SVI ET C. VETVRI F. POSTVMINI F.
SVI NOMINE BALINEVM ET LAVA-
TIONEM SOLO PRIVATO GRATVI-
TAM IN PERPETVVM DEDIT.

Hoc in elogio illud observatione dignum existi-
mavi, quod ubique *Postuminus* sine flatili inscul-
ptus est: quod iccirco Veteres factitarunt, aurium
iudicio consulentes, propter pingue quoddam, quo
& repletur, & dictio illa exasperatur: habet enim
aspiratio medium inter consonantem & vocalem
gradum. Floret adhuc Novariæ vetusta illa Albu-
ciorum familia: cujus Mediolani videre licuit in-
numera monumenta, è quibus unum adjunxisse
sat fuerit, in Buleuterio veteri, qui locus est judi-
ciis adscriptus:

D. M. V. F. T. ALBVCIVS FIRMVS VI.
VIR IVN. ALBVCILLI. T. C.

Cationum Novariensium familia, quod nuper
effossum est Mediolani, quam vetusta sit, hoc
mnemosynon indicat: quod cum Basim præstaret
& à fronte, & à tergo hisdem notis inscriptum le-
gitur: quod hic ideo tanto libentius adnotavi,
quanto in eo & illorum & Quadratorum præclara
fit mentio: quæ Volusenum Quadratum à C. Ju-
lio celebratum habuit: & hinc conjectari possumus
illum Insubrem fuisse, quando horum opera plu-
rimum Cæsar uteretur. Accipe igitur, Roche
Quadrato, tuæ familiæ æternam memoriam, li-
cet imperfectam:

L. L. QVADRATVS VI. VIR SENSIBI
ET GRATAE L. ET C. CAECILIO C.
L. MERKATORI AMICO ET T. CA-
TIO T. L. EROT. AMICO.

Sunt in eadem urbe Pórcii, sola Catonum me-
moriam celebres. Irrigatur passim Novariensis ager
manuariis fossis, quibus copiosiori fluctu major est
Maura, Sforc. Ducum opus memorabile: qui na-
vium capax esset, nisi plurimo spatio celeriori cur-
su intuentium oculos subterfugeret. Habet Nova-
ria fere in suburbiis fluviolos miræ jucunditatis
duos, Aconiam videlicet ab Occasu, & Terdu-
plum ab Ortū: qui ambo per Lacmellinum agrum
se exonerant in Padum. In extremo agri Novarien-
sis margine municipium est, Forum Lebuorum,
five Libetiorum, aut Lebetiorum, credibile est à
majoribus nostris vocatum. Hac ætate *Burgum La-
vizarium* nominant: quod lebes vasis sit genus,
ut scitis, ad obsonia coquenda: & ideo ad verna-
rum linguam descendens superiorum temporum
ignavia, five potius tabellionum infantia, Laviza-
rius dici pagus ille cœptus est. Floruit pluribus
viris literarum politia illustribus, Domitio Calcia-
to, & Jacobo Majeto, qui merito Latinæ sirenes
appellari possunt. Ibi quoque familiæ Merularum
sunt reliquiae: quæ quanto in honore fuerit apud
Romanos, Veterum declarant historiæ. Apud In-
subres etiam quantæ auctoritatis exstiterit, mar-
moreus lapis in turri cognomento Imperatoris Me-
diolani hic satis ostendit:

TREBIA C. F. FILVMENA SIBI ET L.
TIVTIO MERVLAE VI. VIR III. VIR
IV. VIR TESTAMENTO FIERI JVS-
SIT.

Hinc ad primum lapidem Syllævenium Syllanæ
pietatis rarum profecto monumentum. A Foro
Lebuorum rursus ad solis occasum, ad quintum vix
lapidem, Rhadium est, & qui adjacet campus
Rhadius appellatur, in quo C. Marius prælio for-
tunatissimo Cimbros delevit: & quod hoc in loco

A est oppidum, quibusdam immutatis & additis li-
teris, *Rhodobium* nominatur. Nec vos moveat L.
Florus, qui Cimbros in Veronenſi planitie devi-
ctos commemorat. Argumento sunt certissimo con-
tra L. Florum Castra Mariana octavo à Novaria
lapide secundum ripas Sefitis. Eusebius præterea,
annalium diligentissimus observator, memoriæ pro-
didit, inter Padum & Alpes à Romanis Cimbros
non longe ab urbe Vercellarum fuisse profligatos.
Et idem scribit Plutarchus in *Vita C. Marii*.

B Non interrupſiſſem te, inquit Landolphus, Blasi,
si paulo diffusius mihi declarasses, & Sallyum, &
Vocontiorum situm: & qui Libyci sint in Cisalpi-
na Gallia apud Ptol. Hos quoniam ne è domo qui-
dem (quod ajunt) ut viderentur, eduxisti.

C Sallyes sunt, inquit Blasius, populi Narbonen-
sis Galliae citra Rhodanum, quibus ab Occasu op-
positi sunt Volcae ultra Rhodanum, ubi is deltam
facit. Blondus, cujus aliquando opinionem sum
secutus, Sallyes ponit in montibus, qui Nicææ
imminent. Plinius *libro* (ni fallor) tertio Sallyes
inter Ligures Transalpinos enumerat: nec decipi-
tur, quando ea Galliae pars, quam Brachatam vo-
cant, alias ad Italos Ligures spectaret. Post Sal-
lyes tenent Albienſes & Alboeci, ut auctor est Stra-
bo *lib. iv.* mox Vocontii montana in Septentrio-
nem vergentia, quorum regio ad Allobrogas us-
que protenditur per profundas valleis. Quorum
præcipuus pagus olim fuit Vertacomatora. Cujus
incolæ, ut vult Plinius, inter Ticinum & Sefitem
Novariam condidere. Venio ad Libycos, quos
nusquam Carolus Imperator in hac Cisalpina Gal-
lia reperit, sed in Africa, cum expulso Caradi-
no Rubrobarbo, M. Turcæ archipirata celebratis-
simo, Tunetum prædæ exposuit. Corruptam au-
tem esse cum apud Ptol. tum apud Plinium dictio-
nem, facilis est conjectura. Apud T. Livium *Le-
bno* legisſe vos puto, quos Polybius *Lebetios* ap-
pellat.

D Redeo nunc, quo citius vos expediam, ad pen-
sum meum. Ad ripas Ticini Vergeminum est, olim
oppidum, nunc Francisci Sforciae Ducis Insu-
brum civitas. Qui hanc condiderint, legisſe me nusquam
memini. Ante Gotthorum illuvionem, hujus ne-
mentio quidem (quod ipse sciam) facta est. Vigle-
banum Hermolaus Barbarus nominat. In Vergem-
minatum agro villa est Sforciaca, ab eodem his
versibus celebrata:

Vilis gleba fui: nunc sum ditissima tellus:

Cur? quia Sforciadum me pia dextra colit.

Mutata est facies: mutavi nomina, vilis

Dicebar: dicor nunc ego Sforciaca.

Litavicus agros tulit hos: nec pœnitet esse,

Auctorem pacis convenit agricolam.

E A Vergemino, five mavultis quoque vos Vigle-
banum dicere, propter decursum Ticini Castili-
num vetus est, & novum versus Septentrionem.
His in locis formæ castrorum quadratæ adhuc vi-
suntur, quæ alii Annibalis castra esse contendunt,
quod hoc in tractu erga patrem jamjam ab Anniba-
le occidendum prima Scipio, cui postea Africano
cognomen fuit, experimenta certissima & pietatis
& virtutis ediderit. Secundo aut paulo plus à Ver-
gemino lapide versus Meridiem sunt Geminæ co-
lumnæ, municipium sane vetustissimum, & ob
venationes Principibus gratissimum: quod nunc
Gambalotum vocatis. Habeo super hac re, quo
meam vobis opinionem probem, Ammianum Mar-
cellinum libro, si tamen recte memini, decimo
quinto: *Deinde*, inquit, *diebus paucis ex Helena*
Constantii sorore eidem Cæsari conjugali fœdere copula-
ta, paratisque universis, qua maturitas proficiſcendi
poscebat, comitatu parvo suscepto, Calend. Decembri-
bus egressus est, deductusque ab Augusto adusque lo-
cum duabus columnis insignem, qui Lacmellum in-
terjacet.

terjacet, & Ticinum, itineribus rectis Taurinum pervenit: ubi nuntio percussus gravi, qui nuper in comitatum Augusti perlatus de industria silebatur, ne parata desluerent. Postrema Lebetiorum urbs est *Lacmellum, ita enim eam cum Ammiano Marc. appellavisse placuit: non autem cum Ptolomæo Gammellum, aut Laumellum cum Antonino Pio. Hoc tempore pagus est satis contractus, nec quicquam ostentans antiquæ nobilitatis, præter nomen.

Hoc in loco Theodelinda, Garibaldi Regis filia, mulierum omnium suæ ætatis & morum sanctitate, & animi & corporis dotibus præstantissima, defuncto Chiltiberto, sive (ut aliis placet) Anthari Deiphonis filio, Longobardorum Rege, Agilulphum cum forma, tum ingenii & corporis viribus illustrem præfectum Longobardorum, qui in Augusta Taurinorum hyemabat, in maritum elegit. Quem postmodum à nefaria Arrianorum hæresi ad sinceram Christi fidem revocavit. Quibus florentibus Maomethes Arabs, à quo contaminatissimum adjuvante Sylvio Monacho dogma primitus emanavit. Agilulphus Longobardorum diademate redimitus necessitate ductus, contra Romanos arma movit, eosque aperto Marte devicit: & Cremonam, Mantuamque, quæ adhuc pro Romanis stabant, vi cepit. Per Lacmellinum agrum dilabuntur Terduplus & Aconia pisculenta flumina. Nunc, tametsi metas Salassorum pertransierim, tyranne humanissime, ut conquiescam, tandem impera, quando Insubrum regio patentissima mihi perspecta sit minus.

Tunc Landulphus ad Bonaventuram Castillioneum conversus, inquit: Quando & Insuber sis, & patrii honoris studiosissimus, eruditissimusque, & sermonis elegantia candidissimus, non pro mea quæ in vos est potestate, impero, sed te miræ humanitatis virum obsecro, ut Insubrum tractum nobis exoptantibus exponas.

Ad hæc Castillioneus, Ne aliis contumaciæ sim, inquit, exemplo, quæ scio, & quæ fortasse etiam nescio, dicam. Verum si vos citius quam (ut dicebat Augustus) coquantur asparagi, expediero, ne mihi, sed ingenio, quod parvis admodum velis navigat, adscribatis obsecro. Nunc attendite, velocius opinione vestra vos dimittam.

C A P. III.

De Insubribus populis, eorumque origine.

QUICQVID terrarum & urbium intra Ticinum & Abduam, Padum & Alpeis clauditur, Insubria nominatur, potens (ut inquit ille†) armis, atque ubere gleba. Campi sunt patentes, & ad radices Alpium colles beatissimi rerum omnium, quas victus necessitas exigit: & quoniam Insubrum vineta solem, & orientem, & occidentem vident, Dii boni quæ preciosa vina generantur? Insubrum urbes sunt Mediolanum, & Galliæ Cisalpinæ totius metropolis, & Europæ omnis Emporium. Quod à Belloveso conditum referunt Historici, eodem fere tempore, quo & Romam. Trogus & alii nonnulli monumentis tradidere Mediolanum ab his Gallis ædificatum, qui Duce Brenno Romam igne consumpserunt. Sed constat inter probatos auctores cc. prope annos antequam Brennus esset, Celtas superatis Alpibus per Julium saltum, qui à Tricastinis incipiens, in Coctias Alpes desinit, Citeriorem hanc Galliam, Tuscis acie devictis ad Ticinum amnem, occupavisse. M. Cato (si tamen illæ, quæ circumferuntur, reliquæ Catonis sunt) scribit, Olanum Lucumonum Tuscorum Principem

A deductis Orobiolorum Coloniis Mediolanensis urbis prima jecisse fundamenta, & ita longo temporum intervallo Olanum dictum. Postremo à Medo Insubrum Duce Mediolanum vocatum. Plinius ab Insubribus refert hanc urbem fuisse conditam. Hæc auctorum discrepans opinio facit, ut nullo negotio credam Mediolanum à Tuscis, qui tunc late dominabantur, prima sumpsisse primordia, & ut ita dicam, in lucem editum, mox Insubrum lacte alitum, novissime à Gallis Duce Belloveso ad virilitatem deductum. Claudianus Poeta non incelebris à sue lanata Mediolanum nomenclaturam his versibus * deduxisse declarat:

*Continuo sublime volans ad mœnia Gallis
Condita, lanigera suis ostentantia pellem
Pervenit: adventu Veneris spissata recedunt
Nubila: rarefcent puris Aquilonibus Alpes.*

C Adhuc Mediolani in fornitem Buleuterii veteris sus insculpta visitur ovini velleris. Facile autem (ut attestatur Georgius Merula) quisque mediocriter eruditus persuaserit sibi tantum Poetam vel gravem aliquem auctorem secutum, aut famæ perseverantis, quæ plerumque vim testimonii habet, opinionem.

Tunc Hieremias Landus ex adstantibus unus: Ab Insubribus, inquit, Mediolanum conditum magis putarem, quam vel à Gallis, aut à Tuscis. Non erant tamen & ipsi Insubres hujus regionis indigenæ: sed aliunde profecti. Cujus nominis (ut tu putas, Jovie) utpote barbari etymologia prorsus ignoratur, quemadmodum & Mediolani: quod ante propagatam linguam Latinam procul dubio conditum fuit, ut propterea Insubres ab imbris (ut nonnullorum opinio est) deducere, Mediolanum à sue lanata tam ridiculum sit, quam falsum. Nec audiendi sunt Græci, qui talia nomina pro linguæ suæ commodo depravarunt, sicut & alia multa, aucti barbaris nominibus Græcas etymologias apponere.

D Non ausim, inquit Bonaventura, tecum, Lande, super etymologiis contendere: scio enim quantum possis, valeasque, præsertim in arenam provocatus: data igitur venia, unde discessit, mea festinabit oratio. Est sane hæc nostra urbs metropolitana cum cœli temperie, tum soli fertilitate, & affluentia cæterarum rerum copia, urbium omnium, quas cœli convexitas tegit, & beatissima & præstantissima. Iccirco Lernæa velut Hydra à damnis acceptis potentior semper à cineribus consurrexit in hostes. E Invenio enim (ut vetustiora conticcam) post regiam Longobardorum potestatem Mediolanum, quamquam bellis vastatum, & sentiente adhuc diversa populo, tamen tam præclara per majores nostros gesta fuisse, ut adfirmare ferme & ausim, & possum, potentissimas urbes & regiones, quarum regna & opes celebrantur, non dico pares, sed Mediolano longe cedere. Semper enim populum habuit florentem, bellacem, numerosum: qui vel facile aut nullo (quod ajunt) magistro armis exerceatur. Atque ea semper ita tractavit, ut nunc sola, nunc adjunctis finitimorum auxiliis effundentes se Germanos, aut Helvetios, vel Transalpinos Gallos in Italiam, aut, ut inquit ille, auspiciis repulit secundis, aut penitus delevit. Sed illud maxime mirandum est, & vix credibile, quod sexto anno, quo à Friderico Rubrobarbo civitas hæc excisa est, adeo opibus potens & populo frequens insurrexit, ut aperto Marte cum hoste potentissimo, ferocissimoque & secundis præliis elato, dimicare ausa sit, illum devictum & castris spoliatum desiderata prope suarum copiarum parte majori supplicem coegerit ab Ale-

* Laumellum habent probæ Editiones.

† Virgilius Æneid. 1. 7. 535.

* Epithal. in Nuptias Honor. & Mariæ, v. 182.

xandro Pontifice Rom. qui Anagninæ tunc exulabat, & ab societate, quæ inter Cisalpinos Gallos præter Ticinenses contracta fuerat contra vim & potentiam Rubrobarbi Imper. turpissimis conditionibus pacem petere. Cujus conficiundæ gratia Comitibus in Cisalpina Gallia peracta sunt. Duo observavit Georgius Merula annalium diligentissimus excusor, quæ nec Blondus supprimit, auctoritatem scilicet maximam Rom. Episcopo accessisse: ex quo illi Mediolanensis Ecclesia, quæ per cc. an. libera, nullius obnoxia imperio, sui juris (ut ita dicam) fuerat, se subjecit. Cujus auctoritatem secutæ & Gallorum, & Hispanorum Ecclesiæ Petri claves agnovere. Alterum, quod debellato Rubrobarbo tandem Pontifici exuli, & bellis acerbis oppressio arma Mediolanensium & sedem dederint, & libertatem. Fuere tamen Rubrobarbicis, & nostræ hujus urbis, & hominum strages longe truculentiores, & tragicis ejulatibus miserabiles. Ante enim Longobardorum adventum atrocior sub Attila Gotthorum rege cladem acceperat. Et ne Bostianis inniti diariis judicer, Suidam adducam, & exterum, & Christianum auctorem: *Μεδιόλανον*, inquit, *πολυάνθρωπος Ἰταλίας πόλις, ἡ κατὰ λαὸν Ἀττικῆς ἡνδραποδίσσατο, ὅς δ' ἐίδεν ἐν γραφῇ, ὅτι μὲν Ῥωμαίων βασιλεῖς, ἐπὶ χερσὶν θρόνων καθημένους, ὅτι δ' Ἰσχυρὸς ἀνιηρημένος, καὶ πρὸς τὸ πᾶν αὐτῶν κειμήλιος, ζητήσας ζωγράφον ἐπέλαβεν αὐτὸν μὲν γραφῇ ἐπὶ θρόνου. ὅτι δ' Ῥωμαίων βασιλεῖς καλῶντες φέρον ἐπὶ τῶν αἰώνων, καὶ χερσὶν πρὸς τὸ αὐτὸ χεῖν πᾶν.* Id est: *Mediolanum, populosa Italia civitas, quam cum Attilas captivam fecisset, vidissetque depictum, Romanos quidem reges in thronis aureis sedentes, Scythas autem interfectos, ad pedes ipsorum prostratos, pictorem querens, jussit loco interfectorum pingi Romanos reges sacculos ferentes ad collum, & aurum fundentes ad pedes ipsius.*

Nunquam auditam historiam, Bonaventura, inquit Blasius, nobis enarrasti: nunc pro tua, quæ profecto singularis est, humanitate desiderarem, ut si non his, quibus omnes scientiæ, tam tibi sunt notæ, quam mihi domus est mea, saltem, quinam videlicet Scythæ sint, quos Mediolani depictos Attilas inspexerit, mihi exponas.

Hæc, Blasi, inquit Bonaventura, Suidæ verba faciunt, ut credam Gotthos esse Getas, altera addita, & una immutata litera. Fidem non modo faciunt Aurelii Prudentii, cujus tu carmina recitasti: sed & Paulus Diaconus verior, quam elegantior Historicus, cujus hæc sunt verba: *Sub Valentiniano patre Theodosii gens Hunnorum diu inaccessis reclusa montibus repentina rabie percita exarsit in Gotthos, eosque conturbatos ab antiquis sedibus expulsi. Gotthi transito Danubio fugientes à Valente sine ulla fœderis pactione suscepti sunt. Deinde propter intolerabilem avaritiam Maximi Ducis, fame compulsi in arma surgentes, victo Valentis exercitu, sese per Thracias infundere, omnia cadibus, incendiisque vastantes.* Hæc ille. Scitis itaque Getas & Sarmatas, qui citra & ultra sunt Istrum, qui per Pannonias dilabens Danubius appellatur, esse in ea Scythiæ parte, quæ in Europa est usque ad Tanaim. Nec super hoc negotio opinione scriptorum varia moveor. Me tamen inter hos admiratione maxima Callimachus Poloniæ Regis à secretis afficit, qui scribit Gotthos sive inopia agri, sive clementiorem celo terram quærentes è Scandia, patriisque insulis advectos esse, exceptosque à littore Oceani, cui hodie quoque nomen est *Gotthiscantia*. Possẽm, si daretur narrandi locus, auctoritate Plinii vobis probare, Scandiam insulam esse in Britannico freto, quæ prima ex Albio solventibus occurrit: inde Dumna, postmodum Bergus, mox omnium maxima Nerigos: ex qua novissime itur in Thulen. Si ergo vel a nominis similitudine argumentum, vel ab auctoritate declinandum est, dicam utroque modo Got-

A thos fuisse Ponti Euxini accolæ, quos Getas vetustiores adpellarunt. Hæc mea de Gotthis est opinio, rursus ad cothurnos me recipio, ut vel facile judicent omnes, Mediolanum non modo cladibus opprimi, sed ab iis, velut ab igne phœnicem, renovari.

B Regentibus pro libidine Gotthis Cisalpinam Galliam populus Mediolanensis servitutis impatiens cum auspiciis Decii Archiepiscopi, tum, qui plurimum potuerat in aula Vitigindis Gotthorum Regis, Felicis, qui & ipse Mediolanensis erat, auctoritate motus Gotthos, qui præsidii causa relictus fuerant, obtruncat. Illi intellecta & suorum clade, & populi defectione ad partes Imperatoris, reparato exercitu urbem valida obsidione cinxerunt: quæ cum in longum nimis protracta esset, quod Bellisarii, cujus auxilio Mediolanenses defecerant, conatibus clam Narfes Eunuchus obstaret: non armis, sed fame edomiti, quacunque conditione coacti sunt intra urbem Gotthos admittere. Gladio eo die xxx. civium cecidisse millia monumentis proditum est. Et ex plebe in rationem Libitinæ ob famem lxxx. mil. venisse. Mulieres ætate florentes Burgundionibus, qui auxilio Gotthis affuerant, omnes in prædam datas, & trans Alpes advectas esse: Urbem ipsam incendio passim fœdatam fuisse. Eodem naufragio submersæ sunt Vercellæ, Novaria, Bergomum, & Novocomum: quæ & ipsæ Mediolanensium auctoritatem secutæ Gotthorum præsidia obtruncarant. Paucis post tamen annis adeo ferocis stragem Gotthorum ausus sit occurrere: à quibus gravissimis etiam damnis affectus est. Erat ea tempestate omnis Italia ob discesum Imperatoris in Thracias, obvia quibuscunque latronibus, cuicunque etiam Barbarorum ex infimo grege libidini exposita. Ne mirum sit ergo, si patria hæc nostra Gotthorum, Wandalorum, Pannonum, Marcomanorum, & Longobardorum excursionibus patuerit, quando & ab eisdem non fere solum Roma, sed & omnis Italia flammis consumpta fuerit. Novissime supervenit Fridericus Rubrobarbus, qui partem urbis solo æquavit, actis in exilium civibus, qui gladio superfuerant. Si mirabitur vestrum fortasse aliquis, ex tot & tantis cladibus, quin hæc urbs radicitus evulsa sit; satis illi factum putabo, si dixerò, cur non & Roma consumpta, quæ pares ærurnas perpessa est. Ad hæc volo etiam hæc damna nostratia fuisse majora & diuturniora. Quæ regio est, in qua facilius coalescat mortalium tam numerosa multitudo? nulla, quam sciam, certe. Intercapedo enim quatuor graduum & quadraginta ab Æquinoctiali facit, ut injuriæ solis minime sit exposita. Nec intensissimis frigoribus ustuletur. Argumento sunt omnium rerum beatissima copia, corpora hominum pulcherrima, & innumera: quæ omnino desiderarentur, si vel solis, aut Borealis frigoris vehementia Galliam hanc nostram vexaret. Nam, ut inquit Pacuvius, *sol si perpetuo sit, aut nox flammeo vapore, aut frigore, terra fructus omnes interire.* Ex copia igitur fructuum conjectura facilis est, quam temperatissimus hic sit tractus; ad quem omnes velut ad salubritatis asylum conflunt.

C A P. IV.

De Familiis Insubrum, & antiquissimis, & clarissimis.

SUNT apud Insubres familiæ sola antiquitate nobiles: sunt & novæ, quarum gloriæ fulgor illas obtenebravit: ut Sforcie Vicecomites, Barbiani, Trivultii, Castillioni, Taurelli, Mayni, Cribelli, Alciati, & alii plures.

Ante

Ante Sforcias præcipua auctoritas penes Vicecomites fuit. De quibus hoc in monumentis lectum est Andreæ Alciati : Angleriae nobile agri nostri propter Verbanum lacum oppidum non modici nominis apud Veteres fuisse creditur : in eo enim passim cernere est vetusta monumenta, elaboratos tumulos, urnas, templa, cryptas, porticus, columnas, idque genus & venustatis, & vetustatis insignia. Alpinarum (puto) gentium præfectura fuit, in qua sub Carolis, Berengariisque Imp. jus dicere, qui à Comite Mediolanensi ad hunc magistratum delectus esset, solebat : & ideo Vicecomes dictus. Unde ortam nobilissimam Mediolani familiam, & verisimile est, & credibile. Barbianorum familiæ (pace hoc aliorum dicere liceat mihi) omnis magis debet Italia, quam suo Romana civitas Camillo. Albricus enim Comes Barbianus Italarum arma, quæ Barbarorum metu longo seculorum intervallo non intonuerant, primus excitavit. Verum ut Poeticis bellariis defessos vos reficiam, audite unius Poetæ novam cantilenam :

Optima quæque dies seclis properantibus atas
Obruit, & longa fortia facta die.
Ne qua tuas igitur tegerent oblivio laudes,
Neve forent titulis invida secla tuis :
Hos ego perpetuis mandabo, Albrice, libellis :
Si veniet votis dexter Apollo meis.
Tempus edax rerum, tuque invidiosa vetustas,
Obrueras tanti pene trophæa Ducis.
Pierides igitur nostro adspirate labori :
Sustineatque meam Pegasis unda ratem.
Fama volubilibus quoties obscurior annis
Lucidior vestro semper ab ore venit.
Bellica temporibus squallebat gloria nostris
Cessabat longo tempore Martis honos.
Omne erat in Venerem studium nocturnaque bella :
Qualibet & census arte parare novos.
Proh pudor Italia, mundo gens nata regendo,
Nec pede, nec celeri bella regebat equo.
Usque adeo turpi languebant corda veterno :
Usque adeo nullus militia usus erat.
Dux aberat tumidos qui signa inferret in hostes,
Duceret & certis agmen equestre modis.
Armorum si quando aliqui exarsere tumultus,
Gesta peregrina bella fuerent manu.
Hinc tibi ab occiduo insultabat miles Ibero.
Jactabat vires Tentonus inde suas :
Hic sua & extremi jactabant tela Britanni,
Et ferus ardentis Belga premebat equos.
Candida sed positis cum pax succederet armis,
Et patrios peteret barbara turba lares :
Victores nullo & victos discrimine passim,
Et miseros civeis qui spoliaret, erat.
Non puduit matris gremio abduxisse puellam,
Uxoremque suo subripuisse viro.
Nemo fuit quem raptus honos, quem damna moverent,
Tantus in Italidum pectore torpor erat.
Ut perhibent Libycos armenta horrere leones,
Ut lepus ad rapida contremuit ora canis :
Non aliter Martis detrectavere labores,
Funderet horribiles buccina si qua sonos.
Non tulit hanc labem, nec tantum dedecus avi
Albricus Latia gloria militia.
Agmina jampridem claris desueta triumphis,
Et resides animos primus in arma rapit.
Attonito tandem pulsi de corde timores :
Et durum Martis dextra resumit opus.
Non tuba, non enses stricti, nec tela, nec ignes,
Nec vaga spumosis flumina vorticibus,
Ardua nec triplici circumdata mœnia fossa,
Nec quoque praruptis oppida structa jugis
Ausoniam terrent, vana formidine pubem,
Pendentem auspiciis, Barbiniane, tuis.

A Hæc metro protulimus, quo facilius à vobis hujus insulsi tædium sermonis levarem : maxime enim potest in rebus humanis varietas. Ex hujus officina tot prodire, quot ex equo Trojano illustres bello Duces. Quod si mihi creditis minus, Sforcias ipsos interrogate, quorum Proavus Jacomutius sub Albrico ex frumentatore factus est armiger Balduini equitis, paucis post annis deinde occiso in bellis domino dignitatem illius assecutus est : novissime turmarum Comitis Albrici Barbiani præfectus.

B Ex Jacomutio natus est Franciscus Sforcia, qui Philippo Vicecomite vita functo, auxiliantibus Venetis, Insulbrum principatum invasit.

C Quantum bello valeant Trivultii, novit Transalpina Gallia : cujus vana esse arma, sublato ab humanis Jacobo Trivultio, sæpenumero vidimus. Castillioneos apud vos Castillioneos celebrare non licet mihi : ne adagio illo, quo ajunt *mulos mutuum scabere*, inuram à vobis.

Maynorum gloriam satius est (ut inquit ille) hoc loco tacere, quam de illis pauca dicere.

Archinti, Stampæ, Tonfi, Cribelli silentio magis, quam eloquentia, laudantur. Caymorum cum viris virtute clarissimis, tum historicorum monumentis illustrem inter Insulbres familiam silentio involvendam cenfeo : quod cum eam inter quæ aliàs Mediolani florebat nomina, Raphael Volaterranus annumerarit, celeberrimam satis arbitror ; verum celebrior multo nunc est, atque erit olim, cum ex ea prodierit M. Antonius Caymus, qui præter legum peritiam, adeo literarum politia conspicuus est, ut non minor sit apud Bituriges, ubi cum summa omnium admiratione legum nodos aperit, quam inter Insulbres ipsius gratia. Ferrarios celebrat Demosthenes ἐν Φηφίσματι ἐνι*, cum inquit : Ἐπὶ χερσὶν δὲ ἡγεμόνων ἀρχόντων χαμηλίων ἐκ τῇ ἀπείρῳ, Φυλῆς πεντακλυσσὸς λεοντὶδὸς ἀριστοκράτης εἶπεν.

D Vetusti sunt & Pectii, qui nunc Peggii mutatis C & T in duplici GG : hi Horatiano carmine nobilitati sunt :

Pecti, nihil me sicut antea juvat
Scribere versiculos, amore percussum gravi.

E Valeriorum, qui nunc de Vale dici malunt, Mediolani plures obviam sunt Inscriptiones. Qualis est illa, quam ex Sancto Simpliciano Gabriel Florentius ad exornationem ædium suarum apud se transferendam curavit. Ex qua jam certissima conjectura Mediolanenses lætari possunt Valerio Maximo historiographo præstantissimo communicipe, velut in patriam longo postliminio tandem reverso : cum apud classicos auctores nihil certi prorsus legatur de vita, moribus, & morte ipsius. Gaudeamus igitur Mediolanenses tam eruditissimo, verissimo, candidissimo scriptore nobilitati, gaudeamus. Nec terreamini, quod astrologiæ studiosus hic legatur. Quando etiam astrologo liceat historiam conficere.

M. VALERIUS
MAXIMVS
SACERDOS
D. S. I. M. STVD.
ASTROLOGIÆ
SIBI ET
SEVERIÆ APR.
VXORI
H. M. H. N. S.

* Orat. pro Corona, ubi nulla mentio Ferrariorum ; locus quippe in vulgatis Demosth. libris sic legitur : Ἐπὶ χερσὶν δὲ ἡγεμόνων ἀρχόντων, Γαμηλιάνος ἐκ τῇ ἀπείρῳ, Φυλῆς πεντακλυσσὸς λεοντὶδὸς, Ἀριστοκράτης Φρασίπριος εἶπεν.

† Epod. ode 81.

Surarum familiam apud Insu-bres, ut nunc est quoque, fuisse clarissimam Mediolani in sancto Carpophoro vetustissimus stylobates indicat: quem hic exscriptum in gratiam Bernardi Suræ annectendum curavi:

ATILIVS MACRINVS SECVNDVS A-
TILIO MACRINO PATRI ET SVRAE
PVPAE MATRI ET MACRINO PRI-
MO FRAT. ET MACRINAE SECVN-
DIN.

Ex hac Surarum, qui *Solæ* nunc appellantur, familia Palphurius fuit orator insignis, & caussidicus. Qui ob suspicionem, quod cum Vitellianis consensisset, Senatu à Domitiano fuit amotus.

Magiorum quoque familia, quæ in hunc usque diem apud nos illustris est, habet quo suam antiquitatem tueatur, tum ex vetustissimis stylobatibus, tum apud M. Tullium Ciceronem: Mediolani siquidem apud Cœnobitas Divi Ambrosii hoc adhuc monumentum Magiorum clarissimum, vetustissimumque inspicere potest:

SEX. MAGIVS SEX. L. LICIN. SIBI
ET SEX. MAGIO SEX. L. TVRPIO
PATRONO ET BASSO ET CELERI
LIB. TESTAMENTO FIERI JVS.

Magios similiter (ut dixi) & Rabios Cicero nominis æternitate donavit, tertia in *C. Verrem* actione, cum ait: *Ipsæ myoparonem pulcherrimum de decem Milesiorum navibus electum L. Magio, & L. Rabio, qui Myndi habitabant, vendidit: hi sunt homines, quos nuper Senatus in hostium numero censuit habendos.* In eadem quoque actione Curtios celebrat, his verbis: *Cum tot tibi nominibus Curtii referrent.* Idem alibi in eadem oratione: *Per sodalem,* inquit, *suum Q. Curtium judicem questionis.* Curtiorum quoque non inelegans mnemosynon visitur Mediolani in domo Philippi Archinti Jurisconsulti, quod ipse ab Angleria in domum suam transferendum operam dedit:

P. QVRTIVS P. F. VICTORI
P. QVRTIVS P. F. PRIMVS
VI JVN.

Tuas, Catellane Cotta, vetustas origines recensere, nisi M. Tullius illas primo & secundo de *Oratore* libro celebraret: in his enim C. Cotta à Cicerone interlocutor cum M. Antonio, P. Sulpitio, & Crasso introducitur. Dictos autem putat Cottas (si tamen Grammaticorum canonibus standum est) ab iracundia & oris torvitate. Unde Fabius libro primo: *jam Cotta, Scipiones, Lenates Serrani sunt, & ex variis causis.* Habes tu quoque, Francisce Crispe, stylobatem, quo tuam tutari antiquitatem possis, qui occurrit aliud indaganti mihi in privata domo vici Biliorum: atque cum in tuam & totius familiæ tuæ gratiam hic adnotavi: ut liquido cognoscas esse me tui studiosissimum:

P. ATILIO
CRISPO
AD

Cetera attritu pedum deleta sunt.

Nec carent Petræ sanctæ suo mnemosyno, si diligentius (ut inquit Alciatus noster) illud examina-verint, & quanto voluerint suorum stemmatum annaleis producere, tanto cum apud auctores, tum in vetustis marmoribus eis licebit: atque etiam ad Herculem suum genus referre. Ad Petram enim sacram in Euxino Ponto adpulsi Argonautæ sunt, inter quos Hercules præcellebat. Hujus Petræ sacræ meminit Apollonius Rhodius *Ar-*

gonant. primo: *ἡ Παναθηναία*, cum inquit, *ἡ δὲ τοῦ περὶ τῆς* Eamque sic appellatam Interpres ait, *ἡ δὲ τοῦ περὶ τῆς* quæ mala magna sacra dicimus. Unde Virgilius, *Auri*, inquit, *sacra fames.* Mediolani vero Petræ sacræ familiæ memoria vetustissima inspicere potest in loco, qui Veneri publicæ adscriptus est in semidiruta ædícula:

HERCVLI IN PETRA SACR.
C. CALVISIVS SECVNDINVS
VI. VIR JVN. DECVR.
ITEMQ. ARAM
V. S. L. M.

In ædícula Divæ Teglae reperiet Andreas Calvus bibliopola tumulum antiquitatis testem suæ, his notis insculptum:

V. F.
C. CALVIVS
CALVI F. O. V. F.
PRISCVS VI. VIR.

Sunt Macri marmoreis & ipsi antiquitatibus insignes, sicut & Andovartoni, qui nunc *Andovarti*, à quibus & vicus in regione ejus portæ, quæ nova dicitur, adpellatur. Accipe igitur, mi Petre Macer, tuorum natalium præclarissimam memoriam, quam in pauperum sancti Martini xenodochio insepeli:

MACRINAE
C. ATILIO C. F. MACRO
M. ATILIO C. F. ADIVTORI
Q. ALBVICIO Q. F.
ANDOVARTONI TERTI.

Novelliorum familiam extinctam prorsus esse existimo, quando (quod sciam) Novellii nulli reperiantur: indicant tamen (ut interim taceam Torquatum Novellium à C. Plinio Novocomensi celebratum) vetusta marmora alicujus hanc familiam nominis fuisse. Verum ex his unum adduxisse sat, superque fuerit. Mediolani in sancto Francisco:

P. NOVELLII PVB. FIL. L. NOVELLII P. F. TE CILLONI FRATRI RVBRO FRATRI.

Eandem quoque jacturam passi sunt Sentii, sive Sentiones, à quibus fuit Sentio ille Germanici ultor sanguinis, si per Tiberium Cæsarem ei licuisset, ut refert Corn. Tacitus. Quod autem Sentii Insu-bres exstiterint, indicio pagus est inter Insu-bres non procul à Castillione, quem *Morasentium* vocant, eo quod Sentiones ibi morarentur. In cuius fano marmorea in Tabula hæc adhuc visuntur:

L. SENTIVS L. F. O. V. F.
NIGER. SIGNIF. LEG. IIII
SCYTHICAE HIC NATVS
HIC SITVS EST.

Ibidem in eadem Tabula:

M. SENTIVS L. F. O. V. F. MACER VETERAN. LEG. IIII SCYTHICAE SIBI ET FRATRI SVO V. F.

Nec his Martinioni carent originibus, qui vetustioribus erant Martiniani: ut videre est in monumento sacra in æde Divi Victoris, cujus templum olim Marti dedicatum fuerat. Ea autem Inscrip-tio vel barbara prorsus est, vel vernacula ejus ætatis: qualiscunque tamen ea sit, hic adnotabitur:

D. M.

D. M.
BONAE MEMORIAE DOMVI
MARTINIAN. EX P.

ROTECTORIBVS INTERNAM SEQV-
RITATEM CER MENDACIS QVIS JV-
STVS PIENISSIMVS BENEMERETVS
IN SEQVLVM ANVS MILITAVIT XLV.
ET VIVET ANN. N. LX. ET SPERO
ME VIVERE ADVC ANVS N. LXXXXVIII.
MESES SEX. DIES IIL ET N. DEIN AR-
CE HIC SICIS REMOVERE VOS QVE-
RET AVT APERIRE AVT VELLE A-
LIVM QVRPV DAVID IN FESCV AV-
RI P. I.

In altera fronte ejusdem tumuli :

○ W ✱ A

ET LVNA PERIMA VERTVTEM ET
GELORIAM FELICE MARTININNO
EREDES FACOLETATEM VIVOS SI-
BI FECET HOC.

In Divi Augustini fano monumentum est Ro-
ciae gentis : qui nunc contempta suorum nata-
lium vetustate *Rozoni* dici malunt : id est hujus-
modi :

V. F. D. M.
MAXIMVS MAXIMINVS PRIMITIVS
VIVIR MEDIOLANI SIBI ET ROCIAE
SECUNDINAE CONIVGI INCOMPA-
RAB. QVI VIXIT AN. XXI. ET ROCIO
MAX. MAXIMINI FIL. QVI VIXIT AN.
VNVM. M. VI. ET ROCIAE PRIMITI-
VAE FIL. PIENISSIMAE. QVI TIBI
DVM STARET PATER AD TORVM
SIC AIT : O MISER QVID GEMIS ET
LACRIMAS ? QVOD TE MISERANDE
RELINQVO ? TE NON TVRBEMVS.
ISTA FATALIA DANTVR. QVI VIX.
ANN. XVIII. M. VI. IN AGR. P. XIX.
INFR.

Arluni similiter hujus urbis cives non tam vetu-
sti sunt, quam vetustissimi, ut ex elogio conspici
datur, quod est in templo Deiparae Virginis, cui
Secretae nomen est. Sed optarem ut unum adde-
rent, alterum immutarent elementum : ita ut Aru-
leni, non autem Arluni dicantur. Fuit & Rusti-
cus Arulenus à Corn. Tacito & C. Plinio haud vul-
gariter celebratus :

L. ARVLENVS ANOPTES
APOLLINI.

Mandellorum gentem esse existimaverim, quos
vetustiores Manduillos conversis V & I, tempo-
rum incuria, in E. Posthac igitur Jacobum Juriscon-
sultum praestantissimum à te, Blasi, tuum admo-
neri velim, ut Manduillum se, non autem *Man-*
dellum vocet : quod si hujusce rei te causas efflagi-
taret, propone homini humanissimo vetustum mar-
mor, quod hac in urbe visitur apud Vestales sancti
Bernardini. Ex quo fortasse etiam Cacuriorum,
qui nunc *Cazuli* dicuntur, agnosces affinitatem :

V. F. F.
M. CASSIVS M. F. O. V. F. CACVRIVS
SIBI ET ATILIAE MANDVILLAE
VXORI ET M. CASSIO BROCCO
FIL. ET L. CASSIO DONATO FIL. IN-
FR. P. XX. IN AGR. P. XX.

Nonne & Mocitii simili ornamento illustres sunt ?
accipe igitur, Francisce Mocitie, musices decus im-

A mortale, memoriam familiae tuae celebrem, quam
Medae (Insubrum oppidum est) inspexi :

V. F. D. M.
CANTIVS MOCITIVS VETER. LEG.
VIII. AVG. VI. VIR DECVR. SIBI ET
CANTIO MAGIO PATRI VETER. LEG.
EIVSDEM VI. VIR COMI ET SVRAE
MESSORIS FIL. ET CVLTVRIO LA-
VANDO ET CVLTVRIO MAXIMO NE-
POTIB. SVIS ET LIBERTIS. IN AGR.
P. IX. INFR. P. L.

B Suam & Elli * habent antiquitatem, etiam nunc
in urbe hac nostra non extincta nomina : eam in
pariete privatae domus Capellarum secundum viam
e regione aedis fere sancti Petri in lintre prospexi :
ea est hujusmodi :

W ✱ A

HIC QUIESCIT IN PACE SEVERIA-
NVS EILLVS CRISPINI ET INNO-
CENTIAE QVI VIX. ANNVM MEN.
III. D. VI. RECESSIT K. NOV.

C Persuasissem facile mihi Ruscas non esse antiquos :
sed cum legerem secundum *de Oratore* Ciceronis
volumen, invenio hos antiquissimis antiquiores :
Ex immutatione, inquit, *ut olim RUSCA cum legem*
ferret annalem, dissuasor M. Servilius, dic mihi, in-
quit, M. Pinnari, num si contra te dixero, mihi ma-
le dicturus es, ut ceteris fecisti ? Ut sementem feceris,
ita metes, inquit.

D Capellae genus suum referre possunt, & solent,
ad Marcianum Capellam scriptorem & eruditissi-
mum, & candidissimum : nihilque referre arbi-
tror, quod Marcianus ex Africa fuerit. Quando
ante Gotthicam rabiem Africani frequentes in Ita-
lia diversarentur : ut legitur de Divo Augustino,
qui Mediolani publice Rhetoricen professus est.

Capriliorum etiam meminit M. Varro. Bebul-
corum gentem, quae adhuc floret, T. Livius æ-
ternitate donavit. Si otium mihi daretur, & si vo-
bis audiendi commoditas, plura de antiquitate Me-
diolanensium familiarum adduxissem : sed cum vi-
deam averfa fronte esse nonnullos ad oppida Insu-
brum aliqua nunc ipse divertam.

C A P. V.

De vicis nonnullis, qui in Mediolanensi sunt agro.

E Vicos, qui in Cisalpina sunt Gallia partim inco-
lae condidere, & partim Barbari, qui hoc in tra-
ctu gravia bella gessere. In agro Insubrum Mo-
guntiacum est oppidum, in quo scepra accipere, &
primos attollere fasces omen erat Longobardorum
Regibus. Moguntiam doctissimus Alciatus adpel-
lat, Modœtiam alii. Ego una tantum antiquitate
fretus, quae eodem in oppido est in templo san-
cti Mauricii, Moguntiacum appellare non dubi-
tabo :

C. SERTORIUS L. F. O. V. F.
T C V S
VETERANVS LEGIONIS XVI.
F CVRATOR CIVIVM OMN
MOGVNTIACI.

Inter egregia oppida Castillionum quoque numera-

* *Suam & Elli, &c.* Quos *Ellos* Merula vocat, *Ælios* esse fre-
quentiori calculo receptum est : nec quicquam movet me vere-
ris illius Inscriptionis testimonium ; quandoquidem in ea non
EILLVS, sed FILIVS legere est : ut post Andream Alciatum,
cujus autographa monumenta custodimus, & nos non semel vi-
dimus : ea igitur est hujusmodi : HIC. QUIESCIT. IN. PACE.
SEVERIANVS. FILIVS CRISPINI. &c.

si potest: quod castrum Stiliconis, si per aliquos licuisset, appellasset. Quis est enim qui nesciat ab Arcadio & Honorio Impp. Mediolani Stiliconem rei bellicae virum peritissimum, sed perfidum, ut postea exitus declaravit, collocatum, ut Romanum Imperium vendicaret à Gotthis, in dies singulos per Pannonias irruentibus in Italiam? Quis est praeterea qui non vel facile persuadeat sibi talem virum locum non selegisse ad oblectationem? & castrum hoc condidisse, quod à suo nomine dixerit? Dii boni quid ridetis? an conatus sum imponere Pelio Ossam? audite obsecro quod adhuc in templo Divi Ambrosii legere est hujus rei mnemosynon: quod tametsi inelegans sit, audiri tamen potest ob hanc rem solum:

Hic jacet Anspertus nostra clarissimus urbis

Antistes, vita, voce, pudore, fide.

Aequi sectator, turbae praelargus egenae

Effector voti, propositique tenax.

Moenia sollicitus commissa reddidit urbi

Diruta, restituit de Stilicone domum.

Quot sacras ades quanto sudore refecit?

Atria vicinas struxit & ante fores.

Tum sancto Satyro templumque, domumque dicavit

Dans sua sacro praedia cuncta loco.

Ut Monachos pascant, aeternis oculo diebus

Ambrosium pro se, qui Satyrumque rogent.

Si ergo similitudo nominis firmat argumentum, dicere non verebor Castillionum quasi castrum Stiliconis. Hinc non procul est Vedanus pagus, qui valde aridum significat: aquarum enim usque adeo indigens est, ut nulli sint putei, & fontes nulli. Sexto Calendas vetustissimo nomine pagus appellatur, qua Verbano Ticinus exit: dictum sic opinor, quod eo mensis die olim rustici illuc confluerent vel ad nundinas, vel ad sacrificia. In eo enim templum est antiquioribus literis insculptum: quibus significabatur illic & Herculi, & Mercurio, & Sylvano, & Divo Pantheo Paganos vota persolvisse. † Vosissium cum praefectura oppidum est adhuc celebre ad eorum collium radices situm, per quos ad Verbanum, Lucanumque, & Larium lacus iter est. Meminit certe Stephanus Περὶ Πόλεως, Varatinae regionis, quam Theopompus libro LII. versus Adriaticum constituit: quo nomine cum eo in tractu nullum fuisse oppidum constet, nec esse, facile adducor, ut putem Βασίσιον esse Vassissium, quod alii ab exitu vallium, Valesium nominant: & Varitium alii more Graeco. Brebia vicus inter Verbanum & Varitium ab his Orobiorum populis habitatur, qui ad Mediolanenses pertinent: ibi in colle Minervae templum fuit cum saltu Tibronano, ut liquido apparet ex antiquitate, quae eo in pago adhuc visitur:

D.

M.

L. COELI F. O. V. F. BARONIS VI.
VIR PONTIFICI * IIII VIR A. P. CV-
RATORI SALT. TIBRONANI ITEM
TEMPLI MINERVAE ET ALBVICIAE

† Vosissium cum praefectura oppidum, &c.] His verbis Merula infert Vosissium, Valesium, & Varissium synonyma esse. Nos vero ejus sententiae sumus; ut Vosissium sit quod recentiores Bosissium vocant, in Briganteis collibus situm. Porro quidquid sit, puto ab eduliorum copia sic dictum fuisse; quandequidem Βάσις cibum significat.

* IIII VIR A. P. Quodnam munus hoc esset, non satis manifestum est: plures enim eruditissimi viri in hisce notis A. P. explanandis nequidquam insudarunt. Non reprobarem tamen amici mei interpretationem, qui Quartum Virum Annonae Procuranda per eas significari ait, fretus verbis Alciati, qui Decurionibus varia fuisse officia dicit, & inter alia Annonae Procurandae. Sed in hac re non modicum haereo: quippe qui sciam eos, qui Annonae praesent, prius Aediles Cereales, mox etiam Praefectos Annonae vocatos fuisse; ut habemus in lege secunda Digestor. de Origine juris. Fateor tamen fieri posse, ut Aediles Cereales, & Praefecti Annonae in Urbe Romana essent, apud Insuubres vero Quattuor Viri Annonae Procurandae.

VIRILLIONIS F. VXORI EIVS COE-
LI IVVEN ET SEVERVS PARENTIB.
OPTIM.

Vicus Martis nunc Vicomercatus Brigantiorum collium metrocomia pluribus vetustis Inscriptionibus illustris, quae cum ad negotium praesens faciunt minus, à me silentio involvuntur. Castrum Seprii putat Alciatus noster dictum, quod Severi olim existerit: ego Seprium (pace tamen Alciati) quasi Insuubrium denominatum magis crediderim: praefertim cum eo in tractu meditullium fere sit Insuubrum. Ab hoc castro agri Mediolanensis pars non mediocris nomen adsumpsit. Id antiquissimum esse oppidum cum nostri Chronographi attestantur, qui etiam Mediolani Imperii sumpsit & deposuit insignia, velut hoc negotio patriam illustraturus: tum etiam monumenta vetustissima sunt indicio, è quibus unum dixisse sufficiat vobis:

I.

O.

M.

L. CAECILIUS NYMPHEROS V. S. L.
M. POSVIT C. FONTEIO CAPITON
COS.

Nec Galerato vico, qui urbeculae speciem ostendit, in agro Insuubrum desunt antiquitatis vestigia: verum cum haec fastidium peperisse potuerint, parcius posthac has memoriolas adducam. Transeo igitur in Albiciatum pagum, qui cultores habuit nomine Montunates, quorum praecleara sit mentio in quadam basi vetustissima, quae ibi visitur:

I.

O.

M.

MONTVNATES
VICANI LOVANIVS
V. S. L. M.

Inter Mediolanum & Ticinum medio itinere Binasunt oppidum vetustissimum, Binasum nunc appellatur. Marlianum, si Alciato credimus id referenti, Marianum antiqui, vel Manlianum dixere, conditoris nomen servans. Mons orphanus paginomen est (ut scitis) inter Insuubres, quo loco arx fuit fere inexpugnabilis: quae quoniam viarum obseffores recipiebat, & exulibus erat asylum, Insuubrum caeterorum armis subversum est. Siderianum in via, qua recta itur Novariam, pagus est. Desiderianum (puto) ab antiquioribus vocatum, velut à Desiderio Longobardorum Rege ultimo conditum. Maxentiam quoque si à Maxentio Tyranno deducerem, quis mihi vitio daret, nisi ineruditus aliquis?

Parabiagum Mediolanensium victoria Divo Ambrosio favente in Helvetios illustravit: vicus ipse satis contractus est: genialis tamen gratiae & ruralis amoenitatis non expers. Pontiolus non procul à Mediolano rus est ultra Abduam historiis celebratissimus: verum pons Aureoli, non Pontiolus, ab his nuncupatur. Aureolus enim (ut refert Julius Capitolinus) unus fuit è Tyrannis, qui Imperium Rom. invadere conati sunt, cum Gallienus Imper. non viris modo, sed & mulieribus neglectui esset. Praerat Aureolus Illyricianis exercitibus, qui venientem Macrianum cum filio contra Gallienum maxime deterruit, captis plurimis ex copiis illius, & nonnullis ad fidem ipsius pretio corruptis. Interfecto tandem Gallieno cum fratre Mediolani Claudius in Aureolum castra movit, & confictu habito in agro Mediolanensi apud vicum, quem à se denominaverat Aureolus, cum aperto Marte devicit. Atque illic Tyrannum sepulchro humiliore donavit. De Aureolo etiam haec Trebellius Pollio memoriae tradidit, de Claudio loquens: Qui primum ut factus est Imperator Aureolum, qui gravior Reip. fuerat, qui Gallieno multum placebat, confictu habito à Reip. gubernaculis expulsi Tyrannum, quem

missis ad populum edictis, datis etiam ad Senatum orationibus hostem iudicavit. His accedit, quod arrogantem Aureolum, & sœdus petentem, Imperator gravis & severus non audiuit, responso tali repudiatum: Hæc à Gallienopetenda fuerant, qui consentire moribus poterat, & timere. Exstat adhuc Claudii liberalitas in Aureolum furore militum oppressum, tumulus cum inscriptione Græcanica:

Κλαυδιος Αὐρεολῶ μετὰ θυῖον ἀρεὰ, Καίσαρ
Τὰ κτερεὰ, θνητῶν ὡς θεῶν, ἐνδίδοσι
Τῷ γὰρ καὶ ζῶντι. Ἀλλ' ἔκ ἐφέλῃσσι φρονήμα
Πᾶσιν ἐπὶ τῇ τῆς σφραγὸς ἀντιθέσει.
Κεῖν δὲ οὐκ ἐπὶ μὲν καὶ σώματι ἐσχάτ' ὀπίσθον
Αὐρεολῶς γερύοντι εἰσὶ τῶν πτερυγίων.

Quod Alciato interprete Latine sic habetur:

Claudius Aureolo post Martia praelia Caesar
Pro mortali hominum jure sepulchra dedit.
Huic quoque vel vitam: sed non contraria pravis
Omnibus hoc prudens militis ira tulit.
Ille igitur clemens, dum corporis ultima servat,
Qui pontem Aureoli dedicat & tumulum.

Interprete quodam Grammatico per tempora Julii Capitolini:

Dona sepulchrorum victor post multa tyranni
Praelia jam felix Claudius Aureolum
Munere prosequitur mortali, & jure superstes
Vivere quem vellet si pateretur amor.
Militis egregii vitam qui jure negavit
Omnibus indignis & magis Aureolo.
Ille tamen clemens qui corporis ultima servans
Et pontem Aureoli dedicat & tumulum.

Sane in capite tumuli inscriptus Hippopotamus ferox & dirum animal, & intra serpentem inclusus, orbiculari forma caudam mordicus tenentem, notat Aureoli tyrannidem & sœvitiem per omne tempus duraturam, cujus rei ratio ab Horo Apolline repetenda est.

C A P. VI.

De Orobiis populis, qui ad Insubres attinent.

QVA Mediolanensis ager (ut verbis utar Alciati) ad Alpes vergit, Græcæ nationis populos incoluisse Orobios Cornelius Alexander, & Plinius auctores sunt: quo in tractu etiam nunc sunt ejus gentis pleraque nomina, ut lacus ipse Larius à suavitate amœnitæque Sicrenus, quasi σικρὴν ἕλῳ, seu sacrum fontem dicas. Fluvius Addua, quod ab adya, id est, inaccessis montibus: Orona quod ab iis collibus defluat, quos Orobiæ tenent, ὀροβίων. Eandem quoque originem & oppida ostendunt, ut Comum, ὀροβίων κώμη, hoc est, villa, sive pagus, & κομηδὼν vicatim: sive ὀροβίων κώμη, qui Deus erat Veteribus commestationum, nocturnarumque saltationum: inde κομᾶζω, petulansum, Leucum similiter à candore montium dictum puto. Canthuriū, Canthiumque ὀροβίων κανθῶνιον, hoc est, à copia, vel præstantia asinorum. Itemque Onium ab eisdem. Orsinicum à victoria in montibus habita, quasi ὀρεοσίμικον. Macreum ab augusta forma, longitudineque. Phegium à fagi arboris copiarum. Eugion, non longe ab Addua, à bonitate soli. Eupylis, qui nunc Pulisianus appellatur, à porta, & accessu, qua in montes tendimus, unde & lacui nomen. Mons Orphanus, seu quod orphanus & destitutus sit ab aliis collibus. Alciatum, quasi Alsiatum, hoc est, frigidum: Veteres enim quod erat frigidum vocabant alsiolum: & pocula alsiola, quæ dantur ad soporem provocandum. Verum quid de Alciato vico Alciatus ipse scripserit, audite: Alciatus vicus, cujus nominis & alter in Bergomatibus est, ab Alcatho Parthaonis Etolia Regis filio auctore colonia in has regiones deducenda: qui postea cum unus ex Hippodamia procis esset, ab Oenomaio interfectus: quapropter inhabitavit tumulum ejus

A Genius, equitantibus infestus, ut ad eum accurrentes equi terrore afficerentur, & prociderent. Cujus rei Pausanias libro sexto auctor est.

C A P. VII.

De ceteris Insubribus.

H i sunt Insubres montani, qui à Græcis Orobiæ dicuntur, de quibus illa dixisse sufficiat. Redeo nunc ad reliquos Insubres, qui per Adduam & Ticinum ad Padum jacent: quorum urbes sunt Ticinum & Laus Pompeja. Ticinum ab Insubribus & Bojis conditum refert Eutropius libro iv. à Saliis autem, quos Saluvios alii nominant, Titus Livius ait ædificatum libro v. decadis i. Plinius à Levis & Maricis Liguribus. Inquirendum esset, quomodo & quo tempore Ticini nomen in Papiæ mutatum sit. Verum hoc onus Petro Francisco Buscæ, & qui adest, & qui Ticinensis est, relinquo. Non gravabor tamen in gratiam ipsius, quid super hac re notaverim dicere. Sunt qui scribant à quadam Longobardorum Regina hoc nomen derivasse, sed de hoc tantummodo famam habeo. Jacobus Gualla, qui Chronicam ejus civitatis edidit, de hujus nominis origine ne verbum quidem fecit. Hanc urbem per tempora Annibalis existisse sunt qui negant, Titum Livium adducentes, qui libro xxi. Ticini tantum amnis meminit: Jam tamen, inquit, Scipio Padum trajecerat ad Ticinum amnem. Quod si ea tempestate Ticini urbs existisset, non tam sicco pede credibile est auctorem tantam urbem silentio involvisse. Hanc quoque urbem cum vi expugnasset Attilas Rex Hunnorum subvertit. Nec fortasse minora damna passi sunt Ticinenses sub Odoacro Herulorum Rege, nova Turcilingorum manu freto. Orestes enim Patricius ex Liguria cum ei occurrisset, nec impetum Barbarorum sustinisset, Ticinum se recepit: verum antequam auxilia præstarentur obsessis, urbem expugnavit, captam ferro, flammaque consumpsit. Orestes Placentiam protractus capite mulctatur. Vitellio quoque ex ulteriore Gallia contra Othonem Imper. irruente, in eadem urbe cum sedissent Valentis & Cinnæ legiones, orta est inter Cisalpinos Gallos, qui Vitellio auxiliares venerant, ingens seditio, & inter Romanos milites. Hinc cædes & civium & militum vehemens. Pannonones itidem tempestate Stephani Rom. Pont. vii. Italiam ingressi Ticinum depopulati sunt. In socialibus etiam bellis graves clades à Mediolanensibus accepere.

E Septimo ab hac urbe lapide secundum Padi decursum Belzoiosum, oppidum sane elegans, & ad venationes idoneum. Id condidit Joann. Galeacius Vicecomes primus Insubrum Dux, cui Virtutum cognomen fuit: mox donatum Barbiani Comites accepere. Ager hic est irriguus ob multos Nilos, quos Carolus Comes Barbianus in eas partes ab usque Mediolano deducendos curavit. In Ticinensi tractu, ut refert Plinius, sabulum nigrum reperitur, quod cementatum, calceque diligenter repa-
stinatum durescit in lapidem.

F Transco nunc in Laudensem agrum, cujus urbs hac ætate in ripis Adduæ, quem Abduam alii etiam vocant. Eam Pompejus Strabo Magni Pompeji pater coloniam deduxit, & à nomine suo Laudem Pompejam vocavit: quemadmodum & Julia pietas in Foro Julio, & alia iis similia. Fide caret quod M. Pompejus eam urbem condiderit, vel auxerit, piratis à se devictis, eum in locum in coloniam deductis: cum sciatis Pompejopolim in Cilicia eam ob causam conditam. Sed ea quæ nunc videtur Laus Pompeja non fuit à Strabone deducta colonia: eam enim Mediolanenses vastarunt: verum cives profugi in margine Abduæ auspiciis Friciderici

derici Rubrobarbi Imp. condiderunt. Laudem vero credibile est à Bojis Transalpinis primo conditam; qui Duce Belloveso Alpes transcendunt, mox bellis vastatam, sicut & Novariam, à Romanis in colonias deductas. Ager Laudensis adeo omnium finitimorum fertilissimus est, ut fumen Cisalpinæ Galliæ dici possit. Et cum Cisalpina Gallia omnium scriptorum calculo cæteris Europæ partibus antecellat, & hæc Africa & Asiæ, merito dicere possumus, agrum Laudensem omnium quos cœli declivitas tegit, beatissimum.

Acerrarum urbis olim florentissimæ inter Insu- bres vestigia ne visuntur quidem: ut quo in loco fuerit, illud Horatii possum dicere,

Grammatici certant, & adhuc sub iudice lis est. De qua tamen quid Alciatus scripserit, audite: *Quod si, inquit, verum est, falluntur, qui Acerras id appellant, quod Insubrum vicum inter Padum & Alpes fuisse Polybius affirmat: ut verisimilius sit, Acerras esse, quæ nunc Agerola dicitur, versus Derthonem. Fallitur & civis meus Raymondus Marlianus, qui Helorediam prius dictam Angleriam in Paraphrasi Gallica Topographia scripsit. Ego Angleriam non Helorediam dixerim ab Anglis Saxonibus, qui cum Longobardis in Italiam venerunt. Hæc Alciatus. Verum ego non ultra Padum, sed citra potius, hoc est, inter Eridanum & Alpes, potius fuisse crediderim: præsertim cum lectum sit eam urbem non procul à Mediolano fuisse, quam cum Romani obsiderent C. Cornelio Merula & M. Claudio Marcello Coss. & obsessis Insu- bres auxilium ferre non possent, conjuncto statim ratibus Pado Duce Viridomaro, qui ex Transalpino genere auxiliares copias Insu- bres contra Romanos adduxerat, Claustidium, quod Romani tenebant, adorti sunt, putantes fore, ut destitutis Acerris, Romani ad Claustidium liberandum festinarent. In agro Mediolanensi non procul à Liviano vicus est, cui Acerræ adhuc nomen est. Facile adducor, ut putem ibi civitatem Acerrarum existisse, & adhuc Acerranus tractus ultra Rescardinam dicitur.*

C A P. VIII.

De Orobiis cæteris, qui ad Insu- bres minime pertinent.

OROBIORVM gentem Zanchus longis ambagibus & originem prosequitur. Ego iis omis- sis, ea tantum amplectar, quæ apud vetustos auctores scripta reperi. M. Cato, auctore Plinio, Oroborum originem ignorare se professus est. Eos Cor. Alexander Græcos fuisse existimat: quod ea vox in montibus degentes significet. Oroborum civitas præcipua est Novocomum, trium Pliniorum patria, in margine Lariano. Hanc urbem non Græci, sed Galli (si Trogo credimus) condidere, quam cum Rhæti vastassent, Romani quater eam repararunt: sed ne super hac re hallucinari nova videar vobis, Strabonem ipsum libro v. si placet, audite de Como loquentem: *Hæc mediocris, inquit, erat colonia: cæterum Pompejus Strabo, Pompeji Magni pater, colonos in eam restituit: quam incumbentes Rhæti vastave- rant. In qua C. Scipio tria hominum millia insuper ad- jecit: postmodum Cæsar quinque inquilinorum millia ad inhabitandum deduxit, è quibus quingenti illustri- simi fuere Græci. Hos etiam civitate donatos in habi- tatorum numero descripsit. Haud tamen ibidem domi- cilium habuere, sed oppido nomen relinquentes, & No- vocomum appellantes, Novocomenses oppidanos vocave- re. Octavo ab hac urbe lapide fons est Plinianus, qui singulis horis, & labrum fere alvei excedit, & fere ita residet, ut illotis fere pedibus vadari possit. In proximis montibus ad excoquenda obsonia Le- beteus lapis excavatur, nec alibi, quod sciam. De- inde est Liciniforum, quod Leucum alii frustra esse contendunt, municipium sane elegans, ea in*

A parte riparum lacus, qua Adduæ flumen erumpit. Sunt item qui dicant, & iis magis assentior, Inci- num esse, qui pagus est Insubrum eorum, qui ad Mediolanenses spectant. Forum Diuguntorum ubi- nam locorum fuerit, hætenus conjecturis assequi non potui. Melpum opulentissimum olim oppidum Boji & Insu- bres eo die flammis consumpserunt, quo Veios Romani auspiciis Fur. Camilli sub po- testate rede gere. Sunt qui arbitrentur esse Melcium municipium nobile & ditissimum: eo nunc poti- tur Comes Firmus Trivultius, & natalium splen- dore, & animi dotibus vir ornatissimus. Hoc in tractu interiit etiam Barra oppidum, unde Bergo- mates ortos putavit Cato. Non desunt quoque qui monumentis tradiderint ab his Gallis conditos, à quibus & Veronenses, & Brixianos. Inter Orobios nec Spina reperitur. Sunt autem Orobii altius quam fortunatius siti.

C A P. IX.

De Cenomanis.

OROBIOS secundum Alpium crepidines Ceno- mani sequuntur, qui ex Transalpina Gallia in hanc Citeriorem (ut refert Polybius) accessere. In quorum vicinia erant Lemovices, Rhedones, & Andegavenses. Cenomanorum metropolia est Brixia, quæ ab iis Gallis condita dicitur à Justino, qui Duce Brenno non Romam modo, sed & Ita- liam incendiis fœdarunt. Titus autem Livius li- bro v. decadis I. Germanorum manum, ait, Elitovio Duce vestigia priorum sequutam eodem saltu, an- nuente tamen Belloveso, Alpes transcendisse, & ubi nunc Brixia, & Verona urbes sunt, descendisse. Fuere cum Venetis Cenomani fere semper Gal- lis finitimis infesti, & rebelles. Præclaram enim Romanis victoriam Cenomani à societate, quæ in- ter Cisalpinos Gallos conflata fuerat, in Romanos tribuere. Cujus rei meminit his verbis Livius: *L. Æmilius imperator effusum agmen ad Mutinam ducit, & in sylvis, quæ tunc circa Mutinam erant, caesi sunt Romanorum LXXX. Cæteri Tannetum peti- runt, sex signa militaria adempta. Fuere tunc auxi- lio Romanis Brixiani Galli adversus alios Gallos & Bojos.*

Cremonam scitis veterem esse Romanorum co- loniam, deductamque fuisse T. Sempronio & Cornelio Coss. tanquam Roma, propugnaculum contra irruentes Insu- bres. Cum autem à Flavianis militibus prædæ exposita est, annum agebat ætatis suæ CCLXXXVII. & ante hanc cladem tempore etiam Divi Augusti in gravissimas ærumnas incidit, quod Antonianis partibus favisset. Non ab re igitur Poe- tarum eminentissimus * Cremonam infelicem his verbis appellavit:

Mantua va misera nimium vicina Cremona.

Gothorum quoque ætate, mox Longobardorum, variis ruinis affecta est. Novissime à Rubrobarbo quoque fere everfa est. Non longe à Cremona Ca- storum locus est, à Tacito celebratus: quem Ca- storis Paulus Orosius nominat. Utra harum verior sit lectio, cum Alciatus aderit, excutiet.

Bebriacum vicus est agri Cremonensis strage O- thonianis exercitus illustris, cum Brixelli ultra Pa- dum eventum pugnae Otho Imperator exspectaret. Ad ripas Serii Crema est, à Rubrobarbo post pro- stratos Cremonenses condita. Oppidum citra cle- psydrum (quod ajunt) & opulentissimum & inex- pugnabile, sub Venetorum ditione.

Mantua ab Hetruscis condita dicitur, urbs & ve- tustissima, & Virgilio, omnium Poetarum Latino- rum, quot sunt, quotque fuere, quotque post aliis erunt in annis principe, per totum terrarum orbem celebratissima. Hanc urbem Mintius amnis undi-

* Virgilius Ecloga IX.

que circumfundit, efficitque lacum, qui carpiones expetiti saporis gignit: puto autem in Benaco lacu generari, quem Sarca fluuius ex Tridentinis montibus influit, & ex lacu pisces illos per Mintium Mantuam enatare. Hanc civitatem Attila, & hoc prior Augustus, mox Longobardi, & his truculentior Cacanus Avarorum Rex, mox Eccelinus Patavino- rum Tyrannus, gravissimis damnis affecere. Non procul à Mantua Riva oppidum est, juxta quod Grimoaldus Longobardorum præfectus Transalpi- nos Gallos crudelissima strage trucidavit.

CAP. X.

De Venetis.

VENETIS etiam Gallica est origo: sciunt enim omnes in ulteriore Gallia secus littus Oceani Ve- netos esse proximos Unellis, Ofissinis, Curiosoli- tis, Sefuviis, Aulercis, & Rhodonibus. Qui cum & ipsi Duce Belloveso Alpes exsuperassent, quod essent in patria fluctibus adfueti, Adriaticum littus occuparunt. Verum de hac re Strabonem audiamus: *Hos ego Venetos esse opinor, à quibus Veneti sinum co- lentes Adriaticum in coloniam deducti sunt. Reliqui enim fere omnes in Italia Galli è Transalpina Gallia commigrarunt, sicuti Boji & Senones. Verum propter nominis similitudinem Paphlagonas esse distitant. Hac autem non adfirmaverim, de hujus enim generis rebus ipsa satis est conjectura.* Hæc ille. Servius in primo *Aeneidos* libro ab Heneto Rege, qui ex Illyrico ve- niens ea loca tenuit, ubi nunc Venetia est, Venetos dictos innuere videtur: Henetosque primo, & He- netiam vocatam. Veneti olim, quod etiam ætate Strabonis prorsus exoleverant, studium impende- bant ad creandos ex equabus mulos: cujus rei me- minit Homærus:

Εξ Ενετων ὄθεν ἡμίονων καὶ ἀγροπεράων.

Id est:

Mularum genus è Venetis quod robore præstat.

Dionysius quoque (ut attestatur Strabo) Siciliae Ty- rannus hinc alendorum semen equorum constituit, quos ad equestre certamen tollebat: adeo ut per Græcos equinæ prolis Venetæ nobilitas manaret.

Patavio antiquitus Venetarum urbium præcipuus honos fuerat: per tempora enim Strabonis censi sunt in ea urbe quingenti equestris ordinis viri, an- tiquis autem annis c. & xx. militum millia misisse constat. Dictum autem est Patavium vel quasi Pa- davium à Padi vicinitate, vel *παδὸς ἡ πέριος*, id est, à volando, quod *captato augurio*, ut Servius scribit, *conditum sit*. Virgilius primo *Aeneidos* libro ab An- tenore conditum Patavium refert his versibus:

*Hic tamen ille urbem Patavi, sedesque locavit
Teucrorum, & genti nomen dedit, armaque fixit
Troia: nunc placida compositus pace quiescit.*

Nobilitata est maxime T. Livio & Historico, & Oratore facundissimo. Quem acerrimi vir ille in- genii Fab. Quintilianus Historicis omnibus & Græ- cis, & Latinis præponere videtur.

Tarvisum urbs Venetæ regionis, unde Tarvisa- ni tractus fluxit appellatio, Totilam quintum Got- thorum Regem in Italia genuit, qui magno exerci- tu conflato universam Italiam armis subegit, Ro- mamque copiis infestis ingressus vastavit, incendit- que. Hanc urbem interfuit Silis amnis placidissi- mus.

Tridentum sunt qui velint ab his Gallis esse con- ditum, à quibus & Veronam. Hoc in loco transitus est Alpium, quæ Tridentinæ vocantur. Quarum meminit Plinius libro tertio. Inter Venetas urbes Væcentia & ipsa recensetur, à Senonibus Gallis (ut Trogus refert) condita. Per Væcentinum agrum Rharonus & Bachilio amnes dilabuntur. Qui ubi ad Væcentiæ mœnia confluere, nec ille Rharonus est, nec hic Bachilio: sed uno nomine Medoacus

A appellatus in mare Adriaticum defertur. Væcenti- nus Palæmon omnium hominum suæ ætatis arro- gantissimus. Hic ille est, quem in suis carminibus Virgilius dignatus est inferere, cum inquit:

— *vel qui venit ecce Palæmon.*

M. Varronem idem *porcum literarum* nominabat, verum *litteras & secum natus, & secum perituras esse* dicebat. Interrogatus, quid inter stillam & guttam differt? *Stat, inquit, stilla, gutta cadit.*

Qui Veronam primitus habuerint fatis est dictum: cam Atheſis interfecat. Hanc urbem tres maxime viri illustrarunt: Catullus scilicet, à quo & Julius Cæsar profectus est: Vitruvius per tempora Augu- sti *Architectura* scriptor: & Æmilius Macer, qui *de herbarum virtute* elegantissime scripsit. Sed hic libellus qui sub Macri nomine circumfertur, non hujus est, sed Odonis cujusdam Medici, ut ipse vidi in codice quodam antiquissimo. Verum ut gravior exiret in lucem, Macri titulo inscriptus est. Qui ad Veronenses Plinium *Naturalis Historia* scripto- rem rejiciunt, pluribus fortasse, quam opus sit, ar- gumentis convicti sunt. In Veronensi agro Benacus est lacuum omnium amœnissimus. In hac urbe oc- cise est Philippus Imperator, quem ex Impp. pri- mum cum filio sacro baptismate nonnulli unctum fuisse contendunt. In Annalibus reperio eum tamen voluisse, ut antea etiam frustra tentaverant Tibe- rius & Adrianus Impp. aram Christo Redempto- ri dicare. Hujus ætate floruit Origenes, vir Chri- stianissimus, & quæ in sacris Bibliis edidit, scri- ptis celebratissimus.

Feltrum item & Bellunum Veneti tractus civita- tes exſistere. Opitergium quoque celebrati nominis apud Antiquos civitas fuit. Opiterginos enim le- ctum est Julio Cæsari contra Pompejanos auxilio ve- niſſe: infauſtoque pugnae eventu diſceſſiſſe, qui ne in Pompejanorum poteſtatem venirent, claſſe jam ab illis circumventa in Adriatico Sinu, inter ſe gla- diis eductis concurrentes occubuerunt. Hujus rei me- minit Quintilianus his verbis libro tertio: *Denique non fecerunt Saguntini, nec in rate Opitergini circum- venti.* Hanc urbem à fundamentis poſt longam ob- ſidionem Longobardorum Rex Rhotaris evertit, cujus loco Heraclea condita eſt à Magno Opitergi- norum Eccleſiæ Epifcopo; & ab Heraclio Impe- ratore Heracleam dixit.

Sunt & in Venetorum tractu Acedum, Ateſte, & Alginum vetuſta oppida. Venetiarum urbs clariſſi- ma, & totius Orientis emporium anno ſalutis Lx. ſupra quadringenteſimum, ut Palmerio placet, in intimo Adriatici maris ſinu condita eſt, poſt vaſta- tam ab Attila Rege Aquilejam. Caterarum enim ur- bium primates Aquilejenſium ruinis & fremitu ter- reſtaſti, collectis ditioſe ſupelleſtili in illas paludes ſalutis gratia ſe recepere. Caterum cum calamitates in dies magis novis ſupervenientibus Tyrannis con- duplicarentur, factum eſt, ut ibi ſedes firmarentur. Itaque crevit urbs ipſa brevi temporum intervallo. Hac autem ætate adeo opum & palatiorum excellen- tia, & recto conſilio pollet, ut facile Italicarum non modo urbium, ſed & totius orbis, princeps dica- tur.

Aquileja ex antiqua nobilitate & potentia aliud habet nihil quam inane nomen. Hæc inter ſe colloquentibus, ecce ſupervenienti nuntius palam Ga- leacium Capellam agere animam retulit. Quam- obrem conſternati omnes illico conſurrexerunt. Dii boni quæ ſuſpiria? quæ lamentationes ea hora non exſistere? Quis dolore non exarſit? Quis tunc non exclamavit, impia fata, fata impia? quæ patriam hanc tam acerbo funere contaminaviſtis. O Dii im- mortales, cur hoc lumen tam cito exſtinctum eſſe voluiviſtis? Hæc ubi ſeorſum conqueſti eſſent, omnes lachrymis confuſi, inſalutato (quod ajunt) hoſpite diſceſſere.

G

GAV-

GAVDENTII MERVLAE
D E
GALLORVM CISALPINORVM
ANTIQVITATE AC ORIGINE
L I B E R II.



POSTRIDIE Galeacii Capellæ viri subacti ingenii parentalia conventum impedivere: dilatum est itaque ratiocinandi tempus in alteram diem: quæ cum illuxisset, præsto omnes affuere, præter Landulphum & Phyletum, quos Ticinum traxit necessitas. Accepit eos autem in museum suum Bonaventura Castillioncus, hujus vir ætatis politissimus. Aderant primi veris delitiæ rosæ pro aulæis, pictisque tapetibus: quæ ob Capellam mœstus deposuerat. Adfuit Otho vir cum singularis humanitatis, tum eruditionis, & cum eo Jacobus Majetus, de quo satius est tacere, quam pauca dicere: qui cum in hemicyclis omnes defedissent, præter omnium opinionem Bernardus Felicianus accessit: quo viso, omnes statim assurgentes, amplexi sunt hominem, non Cremonensium modo, sed & Cisalpinæ Galliæ decus immortale. Omnibus itaque desidentibus, omnium nomine Othonem orarunt nonnulli, ut partem Cispadanæ Galliæ, qua fieri brevitate posset, absolveret. Difficilem provinciam mihi, Otho inquit, imposuistis, utpote quæ ab auctoribus celebrata sit minus: vestra tamen humanitas, non modo ut bono sim animo facit, verum fortasse ex tirone me triarium, & ex gregario legionarium militem efficiet. Aggrediar igitur onus hoc nobis impositum, non tam spe perficiendi, quam vobis obsequendi. Si quid igitur in historia titubatum fuerit, aut si Latine quid dictum minus effluxerit, putatote obsecro esse me in tragœdia (quod ajunt) Comicum: & aliquando inter delitias habere me Grammatistis adversari. Sed dum rem ipsam vobis breviter expono, precor, audite.

C A P. I.

Cisalpina Galliæ compendiosa descriptio.

INTER Padum & Apenninum usque ad Rubiconem quicquid terrarum jacet, Cispadana Galliæ nominatur: & primi sunt Ananes, post Boji, inde Eganæ, mox Senonæ, deinde ad littus Adriaticum Gesatæ. Ananes sunt, teste Polybio, qui non longe habitant à Massilia.

Bojorum regio & ipsa amplissima est, quorum metrocomia fuit Tannetum, nunc Bononia est. Eganæ esse arbitror, qui nunc Tanarum, & Trebiam, Padumque per Apenninum jacent. Inter Ananes Astam coloniam, & Alexandriam urbem celeberrimas numeraverim.

Ad Eganæ Pollentinos, Albam Pompejam, Aquas Statiellorum, Derthonam, Casale sancti Evangelii, & Bobianam urbem rejiciam. Tunc Nicolaus Castillioncus, *Amicus Plato est*, inquit, *amicus Socrates, magis tamen amica veritas*: Invenio ipse Bobium esse in Coctiis inter Ananes Alpibus, non autem in Apennino inter Eganæ. Et vitula tu dignus,

& ego, inquit Otho. Bobium enim, de quo ipse loqueris, non inficias eo esse in Coctiis Alpibus: alterum vero, de quo ipse sentio, medio fere est inter Genuam & Placentiam itinere. Hæcque res Alciatum, miræ cum eruditionis, tum candoris virum, in errorem traxit: qui Georgium Merulam singularis ingenii virum ignorati loci infantia inurere conatus est; quod dixerit Alpes Coctias eas esse, in quibus est Bobium, cum Merula intellexerit Bobium in illis Alpibus, ubi est monasterium (ni fallor) sancti Columbani, quod à Theodelinda adjuvante Adoaldo Longobardorum Rege conditum fertur. Istud vero quod in Apennino est Bobium, Vermianæ ditioni suppositum est.

In ipsa via Æmilia erant Custodia & Lellia municipia olim florentissima, quorum vestigia hæc ætate ne inspiciuntur quidem. Visu pulcherrima sunt per hæc loca Apennini juga, nunc se subtrahentis, nunc in cubitum se curvantis. Huic monti exordia dat Polybius fere usque sub Massilia. Alii initium faciunt sub Vadis Sabbatis, quæ Plinius portum fecit. Paludes autem cum plures per ea loca sint, Vada dicta esse existimandum est à Sabbatis fortasse populis. Existimant autem non male plerique Sabaudæ Duces hinc dici, & regionem Sabaudiam quasi Sabbatiam. Sunt qui contendunt eam nunc urbem esse, quæ *Savona* dicitur: in qua Pertinax Imperator (ut refert Julius Capitolinus) mercaturam per suos homines exercuit, non aliter quam privatus solebat. Sunt per hæc loca oppida nobilissima, quorum ingrata esset enumeratio.

In Apennino erat olim Libarna, quam Incisam Georgius Merula pluribus argumentis esse contendit. Alexandria olim, ut quibusdam placet, vicus fuit, nomine Cæsarea, qui deinde actus à Mediolanensibus, ut facilius Ticinensibus & Rubrobarbo resisterent, Alexandria est appellata ab Alexandro Romanorum ea ætate Pontifice. Eam interfuit amnis Tanarus. In Alexandrino agro Quadringentum pagus est: à Quadringenta, ut inquit idem Merula, Romanorum familia.

Decimo ab Alexandria lapide Augusta Baciensium est in ripis Padi municipium & elegans, & vetustissimum, utpote quod & à Plinio celebratur: nunc *Bassignana* dicitur sub ditione Comitum Hippolyti Mayni florenti adolescentis ingenio. Mox est Forum Fulvii, quod etiam per tempora Plinii Valentinum dicebatur; nunc est Valentia: sane hoc in loco preciosa vina generantur. Derthona Romana colonia inter Insubres & Ligures, quorum arma semper fere conjuncta fuerunt, deducta: ne alteris auxilio essent. Sublatis Romanis & Senatus potestate in Insubrum amicitiam declinavit, quam cum Rubrobarbus, ut Ticinensibus gratificaretur, vastasset, immixtis novis inquilinis Mediolanenses repararunt anno à Virgineo partu MCLV. ut scribit Acerbus Muræna. In agro Derthoniensi Tyrus reptilium favissimus, ut vulgo Leonicens, tantum oritur: ex cujus pastillis sit tyriaca omnium fere venenorum antidotus efficacissima.

cissima. Quæ nec alibi (ut attestatur idem) præstantior reperitur.

Inter Æmiliam viam & Padum Sale, & Castrum novum occurrunt, Gotthorum (ut multi volunt) opera. In quibus illi stativa habuere, ne vicatim dispersi trucidarentur. Antiliæ urbis non procul à Sarravale ruinæ vix inspiciuntur. In quam Tiberius Cæsar (ut Suetonius est auctor) virum equestris ordinis, matrisque familiarem, & cui ea moriens curam funeris demandaverat, misere condemnavit. Sita autem erat Antilia secundum ripas fluvii, qui Iria à vetustioribus est dictus, nunc *Scrivia* nominatur. Interiit & in hoc tractu Iria, quam inter Cumillum & Derthonam ponit Antoninus Pius, cujus etiam meminit Ptolomæus. Non absurdum esset putare pro ea reparatum fuisse municipium, quod nunc * *Vicheriam* vocant, quasi Vicem Iriæ præstans. Mox est Clastidium in agro Ticinensi, horreum Annibalis cum ad Trebiam castrametaretur. In vicinia hac Viridomarum Gallorum Regem M. Marcellus singulari prælio devicit, Jovi Feretrio opima spolia in Capitolio dedicavit. Novissime Bobium est Vermianorum, de quo fortasse plura quam oportuit, diximus.

CAP. II.

De Bojis populis.

Bojos scitis omnes Galliae Cisalpinæ populos esse intra Padum & Apenninum à Trebia flumine usque Bononiam, quæ Felsina ab Antiquis est dicta, & ab Hetruscis condita: cæterum bellis vastatam Boji Galli Transalpini, qui nunc Borbonii nominantur, restaurarunt, & ab eorum nomenclatura Bononiam, quasi Bojoniam dixere. Hanc urbem Rhenus alluit. Bononiam alteram reperies inter Celtas ad littus Oceani. Verum ut ad Bojos regrediar, *Priscis* (ut Strabonis Interpretis utar verbis) temporibus plurima Gallorum gentes fluvium incolabant, è quibus amplissimi fuerant Boji, Insubres, & qui olim cum Gessatis Senones Romana per impetum urbe sunt potiti. Hos Romani posterioribus annis funditus deletos perdiderunt. Bojos vero è finibus ejecerunt. Inde migrantes circumjacentes Istro locos cum Tauriscis habitarunt, bellum assidue contra Dacas gerentes, donec ea gens funditus extincta est. Agrum vero qui ad Illyrium spectat, pascendis ovibus idoneum vicinis reliquerunt. Insubres hac etiam ætate sunt, qui Mediolanum metropolim habuere: ea quidem pridem vicus erat, omnes enim vicatim habitabant, hac vero tempestate eximia dignitatis trans Padum civitas est, quodam modo Alpibus finitima. Hæc ille.

Versus Insubres est Placentia Rom. colonia: quam Asconius Pædianus tradit ordine quinquagesimam & tertiam. Fuit autem deducta pridie Kal. Januarii primo anno Punici belli secundi, Corn. Scipione patre Africani prioris, & T. Sempronio Longo Coss. Fuere autem missa Rom. generis hominum sex millia, quæ Bojis opponerentur, & Insubribus. Deduxerunt triumviri P. Cornelius Asina, P. Papyrius Maso, Gn. Pompejus, & Gn. Cornelius Scipio. Hæc colonia (ut vetera damna conticeam) post mortem Jo. Galeacii Vicecomitis, cui *Virtutum* cognomen fuit, fere ab Insubribus semper octies prædæ exposita est.

Coloniarum à te (inquit Bonaventura) sæpius est facta mentio: quid autem colonia sit, quos habere præceptores contigit, me non docuere.

Duo, mi Bonaventura candidissime, inquit Otho, fuere coloniarum apud Rom. genera: quarum præstantior erat, quæ Latina dicebatur. Itaque cum cis Alpes Galli in fide Rom. vi cladium contineri minime possent, Gn. Pompejus Strabo

A M. Pompeji pater, ut Gallos, præsertim qui ad Alpeis jacent, clementia retineret, legem tulit ad populum, qua veteribus incolis Transpadanis Gallis jus Latinæ coloniae dedit: quo possent in urbe magistratus petere, comitia inter se declarare. Quod jure Latii donati sint majores nostri, libro quinto his verbis Strabo declarat: *Opinari vero cuiquam licet priscos Italos felicitate florentes in communionem devocasse finitimos: atque hunc in modum auctis deinde viribus in Rom. Imperium devenisse. Tandem vero atque ex quo Romani in regni societatem & in civitatem Italos vocaverunt, decretum est & Gallis Cisalpinis, & Venetis idem honoris impertire, universos Italos Romanos vocare.* Non longe à Placentia est Nura fluvius. In via Æmilia adhuc est Fidentiola, vetustissimum oppidum & celebre Carbonis clade, ut his ferme verbis Livius ostendit: *Sylla Carbonem exercitum ad Clusium, ad Faventiam, Fidentiolamque caeso Italia expulit.*

Inter Fidentiolam & Tarum duo sunt ignobiles fluvii Occa, & Conius. A Taro Parmam itur, quæ & ipsa vetus est Rom. colonia. Eam autem ejusdem nominis fluvius interfuit. Quam truculenter vexata sit ab Antonianis militibus Cicero *Philippica* XIV. attestatur: *Declaravit, inquit, in calamitate Parmensium, quos optimos viros, honestissimosque homines maxima cum auctoritate hujus ordinis R. Q. P. dignitate conjunctos crudelissimis pœnis interfecit.* Et paulo infra: *Quæ L. Antonius in Parmensium liberis & conjugibus effecerit, refugit animus dicere P. C. eaque reformidat. Quæ enim in urbe tam immanis Annibal capta, quam in Parma subrepta Antonius? Abundabat aliàs Parmensis tractus plurimum vellere, cujus meminit Martialis, cum inquit, lib. V. epigr. XIII.*

Tondet & innumeros Gallica Parma greges.

Nobilitata est hæc urbs præclaris ingenio viris, C. Cassio scilicet, qui ab epistolis fuit C. Cassii, qui C. Cæsarem interfecit; Cassio altero centurione, & Cassio poeta. Falso autem Macrobius, qui *Saturnalia* scripsit, Parmenses adscribunt sibi. Quando ipsemet in suorum librorum *Præfatione* non Italum se, sed peregrinum fateatur, cum ait: *Se sub alio ortu caeso, quem Rom. sermonis vena non adjuvet.* Parma & Mutina coloniae Cos. M. Marcello deductæ sunt, adscriptæque singulis bina millia hominum in agrum qui proxime Bojorum, ante Tuscorum fuerat. Octona jugera Parmæ, quina Mutinæ acceperunt. Deduxerunt triumviri M. Æmilius Lepidus, T. Ebutius Carus, & L. Quintius Crispinus. In Parmensi agro mons est Ceritus cum castro munitissimo. Montem Ceruchum vocant; cui dominatur Comes Paulus Taurellus cum natalium splendore, tum litterarum & morum elegantia celebratissimus. Guido huic tritavus fuit rei bellicæ scientissimus. Hic enim Genuates Vicecomitum Imperio subegit. Tametsi partem laudis Franciscus Carmancola eripere conatus sit. Conditiones enim pacis, & fœdera per Guidonem Taurellum incepta Carmancola à Philippo Vicecomite missus perfecit. Verum repudiato rursus Carmancola Ligusticæ classi Taurellus secundo præficitur in Alphonsum. Qui triremibus prætervectus quanquam aspera & fere intractabili hyeme Cajetanum ipsum invasit. Mox urbes omnes & Neapolim ipsam, quæ Tyrrheno mari alluuntur, ejcctis inde Hispanorum præfidiis occupavit, & Vicecomiti stipendiarias fecit. Carmancola postquam palatium illud, in quo Mediolani annona venalis exponitur, fere perfecisset, à Vicecomite ad Venetos transfugit: & Venetiis tandem prodicionis suspectus capite mulctatur, vir bello & pace præstantissimus.

Inter Placentinum & Parmensem agrum sal à puteis hauritur, & in usus quotidianos excoquitur, loco

* Rectius fortasse Vicheria diceretur Vicus Iriæ.

loco nomen est Salsulæ : hinc etiam statis quibusdam temporibus Naphta reperitur. Secundum Padum Guastalla est oppidum præcipuum cum castro munitissimo. Mox est Brixellum, quod Autharis Longobardorum Rex fere vastavit, moenia à fundamentis disiecta sunt : quod Dociruphum Longobardum cum manu satis valida recepisset. Qui inde fugiens Ravennam profectus est.

Inter Brixellum, & viam Æmiliam Tannetum, fuit olim Bojorum civitas metropolitana : nunc vicus satis contractus. Cujus præclara mentio certatim fit ab auctoribus, præsertim à T. Livio libro suarum *Historiarum* primo & vigesimo : *Ita, inquit, divisa copia, Bojisque in agrum suum Tannetum profectis.* Hoc in loco Buccelinus præfectus copiarum Theudeberti Regis ulteriorum Gallorum, qui auxilio Getis sive Gotthis contra Insubres accesserat, post vastatum Mediolanum à Narsete gravi bello, & superatus est, & extinctus. In Tannetano etiam agro Longobardorum equitum decem millia Totilam Gotthorum Regem cum universo exercitu trucidarunt.

Transco nunc ad Rhegium Lepidi, triumviratus illius, quo omnis Italicorum nobilitas pene sublata est, monumentum luctuosissimum non procul à Crustulo amne. Quæ loca qualia fuerint per tempora Annibalis, Strabonem audite : *Magna, inquit, intra Padum pars paludibus obtinebatur, per quas Annibal magnis difficultatibus iter fecit in Tusciam. Cæterum M. Scaurus deductis ex Pado usque in Parmensium agrum fossis navigationibus commodis, paludes ipsas exsiccavit à campis. Per Placentina siquidem arva Trebia Padum influens, alique item complures ante fluvii ultra modum plenius stagnant.* Hæc Strabo.

Secus Padum Hostilia est : cujus incolæ apibus olim maxime oblectabantur : & pabulo illis in vicina deficiente navibus imponebant alvearia, atque inde solventes per Padum, qui (ut jam dixi) proximus illabitur, ad quina millia passuum noctibus contrario fluctu procedebant : aurora adventante lintrem sistebant, donec dies illucesceret. Illæ visa luce egrediebantur ad pabulum, pastæque ad naves redibant. Eo tractu depasto noctu semper locum mutabant, nec ad propria revertebantur, nisi navibus pressis pondere mellis plena alvearia intelligebant : & hac ratione domum reverts, mella eximebantur & copiosa, & optima.

C A P. III.

De Gessatis populis.

QVI nunc Romanioli dicuntur, fuere olim Gessatæ : quorum origo defluxit à Transalpinis, habitabantque non procul (ut Polybius attestatur) à Rhodano : qui cum Belloveso in hanc Citeriorem Galliam irruerunt, & expulsis Tuscis, quicquid telluris inter Adriaticum litus & Rhenum Bononiensem jacet, occuparunt. His peculiare fuerat suo periculo bella conficienda suscipere : & ut nudi in certamen prodirent. Iccirco Gessatæ dicti : quæ vox *fortem* significabat. Gessatarum meminerunt Strabo & Polybius.

Urbium Gessatarum nulla habetur mentio : verum quæ nunc sunt, fere à Romanis & aliis Italiæ populis conditæ sunt. Ferraria enim, ut scitis, à Smaragdo Italiæ Exarcho post translatum in Thraciam Rom. Imperium ædificata est : quæ nunc Estensium Ducum & ingenio & opibus adeo exculta est, ut inter urbes Italiæ primarias nunc haberi possit. Non procul à Bononia Forum Gallorum fuerat, & fortasse inter Bojos : ut colligere potui ex verbis Appiani Alexandrini : *Manfit, inquit, itaque juxta campum in villa quadam nullo circumsepta vallo, quæ Celtarum Forum nuncupatur.* Hujus etiam vici meminit Sergius Galba, cum inquit :

A *Antonius ad Forum Gallorum suas copias continebat.* Ubi nunc hic vicus sit, alibi dicetur. Non procul ab hoc pago M. Antonius Pansam Cos. suis abditis per sylvestria viæ Æmiliæ fudit, quo in prælio Cos. vulnere affectus intra paucos dies naturæ concessit.

B Versus Adriam Ravenna est urbs à Thessali condita : quæ diu Gotthis & Longobardis obstitit : circa Ravennam Hispani à Gallis devicti sunt, & Gallorum vires adeo protritæ, ut à paucis diebus ultra Alpes amissis Ducibus se receperint. Plinius Sabinorum oppidum Ravennam vocat. Umbro- rum alii esse coloniam volunt : quod Thessali Tuscorum injuriis contra jus gentium sæpius lacessiti introductis Umbris illorum hostibus discessere.

C Ariminum colonia Cisalpinam ab Italia Galliam separat : iccirco ambarum terminus : non sum tamen nescius Galliam ad Anconam usque à Pomponio Mela produci. Cæsenna & ipsa urbs antiqua vino optimo nobilis. In hoc tractu esse ait Strabo vasa vinaria adeo magna, ut domos altitudine videantur æquare. Sarsina vel solo Plauto, cui palma inter Comicos daretur, nisi Cæcilius Mediolanensis eam arripuisset, celeberrima est. Forum Cornelii nunc Imola dicitur. Hanc recto ordine sequitur Faventia, quam Totilas à fundamentis evertit. Forum Livii Gallo Poeta Virgilii amicissimo nobilitata est. Hinc non longe fuit Adria : de qua hæc Strabo : *Adriam quidem inclytam civitatem fuisse memoria proditum est, à cujus nomine modica transpositione sumpta, & sinus appellatus est Adriaticus.* Tametsi nomen hoc *Ἀδριὰς*, hoc est, *Adriam*, Theopompus descendere testetur. Adriam vero vicino fluvio dictam putat. Idem Strabo juxta Adriam ponit Epiterpum, Ordiam, & Uceriam, quæ omnes bellis protritæ interiire. Butrium Ravennatum castellum fuit. Altinum inter paludes est. Spina tempore Strabonis vicus etiam erat : at quondam Græca civitas, & quidem celebris in Delphis Spinensium thesaurus commonstratur : aliæque de ipsis memoriæ mandata sunt, nempe apud quos maris erat imperium. Eam (ut traditur) unda maris alluerat, nunc locus LIX. à mari stadiis distans in mediterraneo jacet. Quæ interierint gentes per Gessatarum & Bojorum tractum, conjectari facile possumus ex Plinio : qui has gentes per hæc loca recenset, quæ hoc tempore deletæ sunt, ut Forodoclienses *, Livienenses, Pompilii, Truentinoni, qui cognominantur Aquinates, Tannetani, Veliates, & ipsi Boji, præter Bononiam : quorum tribus CXII. fuisse auctor est Cato. Plutarchus in *Vita Claudii Marcelli* in hac Citeriore Gallia Hiberos etiam ponit. Ejus hæc sunt verba : *Hiberi gens Gallica est, qui vicinam Alpibus pascuntur Italiam : qui quamquam potentes essent, & fortes per se, Gallorum tamen aliorum auxilium, viresque implorabant, quos militiam agentes mercede Gessatas appellabant.*

C A P. IV.

De Senonibus populis.

F SENONES & ipsi sub signis Bellovesi Alpes transcentes extremum Cisalpinæ Galliæ angulum, qui Tuscis est proximus, occuparunt, diuque in Italia sub Regibus fuere : è quibus Brennus fuit, cujus auspiciis Cisalpina Gallia Romam, præter Capitolium, incendiis consumpsit. Horum agrum, qui ab Ancona principium habet, primo Siculi, & Liburni tenuere : in primis Palmensem, Præ- tutianum, Adrianum. Umbri eos expulserunt : hos Hetruria, hanc Galli. Senonum in Citeriori Gal-

* Haud dubie rescribendum, *Forodoclienses* : vide Plinium lib. III. cap. XV.

lia metrocomia fuit Senogallia, quasi Senones Galli. Hac ætate urbecula est. Non procul hinc est Metaurus fluvius. Deinde est Pisaurum cum amne. Fanum Fortunæ colonia: nunc Marchia Anconitana, olim Picenum. Hæc sunt, eruditissimi viri simul & humanissimi, quæ ut vobis obsequer, de Cispadana Gallia ab auctoribus excerpti.

CAP. V.

De Alpibus.

HÆC cum dixisset Otho, decurso velut sui laboris spatio, subticuit. Tunc Bonaventura, Quoniam, inquit, estis in regno meo, videor mihi pro facilitate vestra posse me tyrannidem exercere.

Id cum silentio omnes affirmassent, Puellam huc formosissimam, inquit Castillioneus, sine vestibus adduxistis: cum itaque ipse mysta sim, nolo ipsam intueri, ni ab aliquo vestrum vestiatur prius. Quamobrem pro mea, quæ in te semper fuit singularis, observantia, cum propter necessitudinem sanguinis, tum propter eruditionis candorem obsecro te, Nicolae Castillioneæ, ut Alpium, quibus hæc nostra Gallia indui videtur, nomenclaturam nobis absolvas.

Locum, inquit Castillioneus, precibus non relinquam tuis, qui mihi es charissimis charior: verum, ut brevitatis imitator sim tuæ, rem ipsam aggredior. Alpes, quarum pro disjunctione locorum diversa sunt nomina apud Latinos, Græci sola appellatione Cimenios montes vocant. Ab eodem autem loco & Alpes & Apenninus initium capiunt. Strabo ad Genuam Liguriæ metropolim, & Occidentis emporium frequentissimum, Alpium & Apennini exordium rejicit. D. autem Brutus ad Vada Sabbatia: & hallucinari ne videar vobis, ejus verba subjungam: *Ille enim it passim, ego ordinatim, quacunque ivit ergastula solvit, homines arripuit, constitit nusquam priusquam ad Vada venit: quem locum volotibi esse notum. Jacet inter Apenninum & Alpes impeditisissimus ad iter faciendum.* Videtis ergo harum regionum loca à Latinis, quam à Græcis, diligentius excuti. Ipsum autem Apenninum à boum vel copia, vel præstantia dictum crediderim. Apis enim Ægyptiorum lingua (ut vult Solinus) bovem significat. Titus autem Livius ab Hercule, quem in summo montis vertice cultum majores nostri Penninum vocabant, nominatum putat. Explodenda est eorum opinio, qui à Pœnorum transitu, tanquam hic mons ante Annibalis adventum in Italiam nomine caruerit, hæc juga dicta arbitrantur. Sed id Grammatici viderint, quibus mos est contendere de lana (quod ajunt) sæpe caprina. Dionysius Afer hunc montem sic describit:

Μέσση δὲ ἀμφοτέρων περὶ πύλας αὐτοῦ ἀπὸ
Πελοποννήσου. Τὴν μὲν τε μέσσην ὄρεα ἀνδρα γέννη,
ὄρεον δὲ τὸ ἐκ παλαιοῦ ἱερὸν μῦθον. Οὐκ ἂν ἐπὶ αὐτῷ
ἰδὲν μωμῆσαι το σφῆς ὑπεργὸς ἀθλῶν.
Ὁν ῥ' Ἀπεννίνον κικλήσκουσιν.

Id est: Hunc vero sequitur Ausonia ora: quam mons quidem elatus admodum & extensus ut statera per medium secans, atque illum ab omni latere circumspiciens miro quodam ornamento, & insuperabili prope munimine vallavit. Nullus unquam architectus videns negare poterit, quin fuerit Minerva opus. Illum incolæ Apenninum vocant. Hæc de Apennino dicta sint: ad Alpes, quibus à Gallia, Germaniæque, & Pannonia dividimur, accedo. Verum quoniam omnis mea de Alpibus futura est oratio, placet ante diffinire, unde Alpes dicantur: Omnis enim, (ut inquit Cicero) quæ à ratione suscipitur de aliqua re institutio, debet à definitione proficisci, ut facilius intelligatur, quid sit id, de quo disputetur. Hi igitur, quos in vicinia videtis, montes, Alpes nominan-

A tur: quod majores nostri (ut Servius attestatur in quarto *Æneidos*) montes altos Alpes vocarent. Quæ appellatio hac etiam tempestate Apennino, qua per Calphurnianum saltum in Tusciam transitur, indita est. Cælius Calcagninus Alpes dictas putat à perpetuo nivium candore: Ἀλφῆ enim *maculam albam* in corpore significat. Festus *Vitiliginem* vertit, & alio nomine Ἀλφῆ dicitur, tametsi Ἀλφῆ profundius descendat: Ἀλφῆ autem tantum superficiem immutat. Cæterum (ut me ad prima recipiam) Alpes vel à vicinia ut Maritimæ, vel à Regibus ut Coctiæ, vel ab altitudine ut Summæ, vel à populis ut Rhæticæ, & Leopontiæ, nomina sunt fortitæ.

CAP. VI.

De Maritimis Alpibus.

ERVNT igitur Maritimæ Alpes, quæ à Vadis Sabbatiis ad Monæci portum, & hinc & ad Vari fluminis ostia longis anfractibus, & lunatis cornibus extenduntur. Inter Genuam & Vada cc. & Lx. stadia interfunt. Inde ad ccc. & Lxx. stadia Albigaunum est oppidum: quod Merula flumine abluitur: hac autem tempestate Centa, quod centum rivis augefcatur, nominatur. Hinc ad Monæci portum stadia ccc. & Lxxx. In quorum medio Albion est Intemelium Historicorum monumentis celebratissimum, cum quod per tempora Ciceronis Intemelii Bellienum Demetrii vernam in vincula conjecere, quod Domitium quendam virum adprime nobilem, & C. Cæsaris hospitem à contraria factione nummis acceptis strangulaverat, ut auctor est Cælius: tum quod fortunas hujus oppidi Othoniana classis per mare Ligusticum excurrrens prædæ exposuit: cumque torqueretur mulier à militibus, ut quem ipsa inter latebras abdiderat, filium proderet, utrum tortoribus ostendens, *In hoc*, inquit, *latuit.* Itaque mors parentis filio vitam tulit. Ab hujus oppidi nomenclatura nonnulli arguunt: quod à Sabbatiis Alpes initium capiant. Alpia enim prioribus seculis dicebatur Albia Intemelina: sicut & Alpionia. *Namque hoc tempore* (verbis utor Interpretis Strabonis) *in Sapodes, mons excelsus horum ultima attingens, & Alpes ipsas Albiū nominant, perinde ac eo usque extendantur Alpes.*

Monæci autem portus nec magnarum, nec multarum navium capax est. Hic olim venerabatur Hercules: & ab eo nomen oppido inditum est. Hinc recto itinere ibatur ad Augusti trophæa: quam nunc *Villam Francam* vocant. Mox est Sallyium Nicæa. Ab hac urbe brevis est transitus ad Visionem, & hinc Anaonem, mox Antipolim: deinde ad Forum Julii Octavianorum coloniam Paulino Suetonio, & Julio Agricola celebratissimam. A Foro rursus Julii navigatur per Sambra-citanum sinum Citharistam, Imatras, & Massiliam. Huc usque Liguria protenditur, si Trogo & Eustathio id scribentibus credimus.

Inter Massiliam & Antipolim Sallyes Alpes tenent. Alciatus tam de re litteraria, quam quis alius unquam, bene meritus, putat Alpes Maritimas etiam Grajas dici, quod per eas Hercules Duce Græci transferent. Ego (pace tamen tanti viri dixerim) Alpes Grajas esse putaverim, quæ à Segusio in Augustam Prætoriam protenduntur, auctore Plinio, qui ait eam urbem in faucibus Grajarum, Penninarumque Alpium sitam esse: per quas petimus Genevam in ripis Lemanni lacus, unde Alemanni dicti sunt.

CAP. VII.

De Coctiis Alpibus.

INTER Grajas & Maritimas Coctiæ sunt Alpes, in quarum exitu versus Italiam Segusium est. Eas Amm. Marcellinus ita describit†: *Hanc Galliarum plagam ob suggestus montium arduos, & horrore nivali semper obauctos, orbis residui incolis antehac pene ignotam, (nisi qua littoribus est vicina) munimina claudunt undique, natura velut arte circumdata. Et à latere quidem Australi Tyrrheno alluitur, & Gallico mari: * qua cœleste suscipit plastrum, a feris gentibus fluentis distinguitur Rheni: ubi Occidentali subiecta est fideri, oceano & altitudine Pyrenæi surgit: unde ad solis ortus attollitur, aggeribus Coctiarum Alpium, quas Rex Coctius perdomitis Galliis solus in angustiis latens, inviaque locorum adspersitate confusus lenito tandem timore in amicitiam Octaviani receptus Principis, molibus magnis exstruxit ad vicem memorabilis muneris, compendiarias, & vianibus opportunas, medias inter alias Alpes vetustas, super quibus comperta paulo postea referemus. In iis Alpibus Coctiis, quarum à Segusio oppido initium est, præcelsum erigitur jugum, nulli fere sine discrimine pene tractabile. Est enim à Galliis venientibus prona humilitate devexum, pendentium saxorum alitrinsecus visu terribile, præsertim verno tempore, cum linquente gelu, nivibusque solutis flatu calidiore ventorum per disruptas utrimque angustias, & lacunas pruinarum congerie latebrosas, descendentes cunctantibus planctis homines, & jumenta procidunt, & carpenta. Idque remedium ad arcendum exitum repertum solum, quod pleraque vehicula vastis funibus colligata pone cohibente viro- rum vel boum nisu valido vix gressu repente paulo tutius devolvuntur. Hyeme vero humus crustata frigoribus, & tanquam levigata: ideoque labilis ingressum præcipitantem impellit, & patula valles per spatia plana glacie perfide vorant nonnunquam transeuntes: ob qua callidi eminentes ligneos stylos per cautiora loca designunt, ut eorum series viatorem ducat innoxium: qui si nivibus operi latuerint, montanis defluentibus rivis eversi graves agrestibus praviis difficile pervaduntur. Hæc Ammianus. Ex quibus verbis explodenda est nonnullorum, præsertim Baptistæ Egnatii, opinio, qui arbitrati sunt, Alpes Coctias eas esse in quibus Genua Ligurum nunc Metropolis continetur.*

CAP. VIII.

De Saltu Juliae Alpæ.

SALTUS Alpæ Juliae non in Italiam descendit, sed à Coctiis Alpibus excipitur. Incipit autem à Tricastinis & in Tricorios descendens viatorem sistit in Coctiis. Per hunc Saltum scribit Titus Livius in Citeriorem Galliam Bellovesum se recepisse; fugasseque Tuscos acie victos ad Ticinum amnem. Hicque nodus causæ fuit multis erroris, putantibus Juliae Alpæ Saltum, & Juliae Alpæ eandem esse per Alpes viam. Quis enim est, qui non sciat Tricastinorum Augustam inter Narbonensis Galliae urbes à Plinio‡ numerari inter Albam Heluorum & Anatiham non procul ab Apta Julia?

† Lib. xv. cap. x.

* Hodie legitur, quæ cœleste suscipit. Σφαλμα alia, quæ hic occurrunt bene multa, corrigenda juxta Editionem Clariss. Jac. Gronovii.

‡ Lib. lll. cap. iv.

CAP. IX.

De Grajis Alpibus, quæ & Grata dicuntur ab aliquibus.

GRAJÆ Alpes à Coctiis initium capiunt, & extenduntur usque ad Augustam Prætoriam. Paulus Jovius, vir cum miri candoris, tum eruditionis, has Penninas esse contendit. Cujus auctoritati non audeo refragari, quando fere constat ex lectione Ptolomæi, Caturiges esse in Grajis Alpibus. Verum ex lectione Titi Livii secus apparet, ut mox dicemus. Ex Itinerario Antonini Pii habemus Tarantasiæ & Octodurum esse in Grajis Penninisque Alpibus: cujus incolæ alii Ceutrones, Centrones alii nominant: quos Strabo post Salassos collocat his verbis: *Post Salassos sunt Ceutrones, & Caturiges, & Veragi, & Nantuate.* Octodurus pagus nunc est Sancti Mauricii non procul à Rhodano, ubi is se in Lemannum lacum exonerat.

CAP. X.

De Penninis Alpibus.

TITVM Livium si sequimur, facilis erit conjectura Penninas Alpes exordium sumere, & finiri ad Sesitem fluvium: cujus hæc sunt verba*: *Id cum inter omnes constet, eo magis miror ambigi, quam Alpes transierit (Annibal): & vulgo credere Pennino, atque inde nomen & jugo Alpium inditum, transgressum. Cœlius per Cremonis jugum dicit transisse. Qui ambo saltus cum non in Taurinos, sed per † saltus montanos ad Libuos Gallos deduxissent. Nec verisimile est, ea tum ad Galliam patuisse itinera: utique cum qua ad Penninum ferant, obsepta gentibus semi-Germanis fuissent. Hæc ille. Si ergo Pennina jugasepta sunt semi-Germanis gentibus, quæ Helvetii sunt, quis dubitat Penninas crepidines initium capere ab Augusta Prætoria? fallique Jovium virum alioqui doctissimum? Omnes fere tamen auctores ajunt Annibalem in Italiam penetravisse per Penninas Alpes. Vt Servius in illo Virgilii carmine, *Æneid. x.**

— Alpes immittet apertas.

*Quas patefecit non sibi tantum, sed omnibus gentibus, quæ secundum Catonem & Livium muri viceuebantur Italiam. Easque Annibal (post bella Hispaniæ, quæ decem & septem annis confecit) aceto rupit. Juvenalis, Qui montem rupit aceto. Denique loca ipsa quæ rupit, Penninae Alpes vocantur. Quam liquido hanc controversiam Servius tollat, nemo est ex vobis qui non agnoscat. Cujus opinioni calculum adjecit Am. Marcellinus †: *Quæ Annibal, inquit, doctus à perfugis, ut erat expedita mentis & callida, (loquitur enim de Penninis Alpibus) Taurinis ducentibus accolis per Tricastinos & oram Varentiorum extremam ad saltus Tricorios venit: indeque exorsus aliud iter antehac insuperabile fecit: excisæque rupe in immensum elata, quam cremando vi magna flammarum, acetoque infuso ** quæ in solidis solvit per Druentiam flumen gurgitibus vagit †† in totum regiones occupavit Hetruscas.* Cur autem Penninæ Alpes dicantur, diversa est opinio. Alii siquidem à transitu Pœnorum dictas putant. Plures ab uno vel acri incola jugi ejus, norunt nomen inditum. Plurimi vero ab eo, quem in summo sacratum vertice Herculem Penninum montani appellant. Quorum opinionem Petronius Arbiter his versibus affirmat:*

* Lib. xxi. cap. xxxviii.

† Lege, Salassos.

‡ Lib. xv. cap. x.

** Legendum omnino, dissolvit, pro, quæ in solidis solvit.

†† Repone, intutum.

exiit omneis

Quippe moras Caesar, vindictaque actus amore
Gallica projecit, Civilia sustulit arma
Alpibus aeris: ubi Grajo nomine pulsa
Descendunt rupes, & se patiuntur adiri.
Est locus Herculeis sacer aris, hunc nive dura
Clandit hyems, canoque ad sydera vertice surgit:
Caelum illinc cecidisse putes, non solis adusti
Mansuescunt radii: non verni temporis aura,
Sed glacie concreta rigens, hyemisque pruinis
Totum ferre potest humeris minitantibus orbem.

Per has Alpes transisse C. Caesarem idem refert Ar-
biter: & quanta difficultate is per Pennina loca eva-
ferit, his versibus expressit:

Sed postquam turma nimbos fregere ligatos,
Et pavidus quadrupes undarum vincula rupit,
Incaluere nives: mox flumina montibus altis
Undabant modo nata: sed hac quoque missa putares:
Stabant, & juncta fluctus stupuere pruina,
Et paulo ante lues jam concidenda jacebat.
Tum vero malefida prius vestigia lufit,
Decepitque pedes: passim turmaeque virique
Armaeque congesta strue deplorata jacebant.
Ecce etiam rigido concussa flumine nubes
Exonerabantur: nec rupti turbine venti
Deerant: ac tumida confractum grandine coelum.
Ipse jam nubes rupta super arma cadebant,
Et concreta gelu ponti velut unda ruebat.
Vincta erat ingenti tellus nive; vinctaque caeli
Sydera; vincta suis herentia flumina ripis.
Nondum Caesar erat: sed magnam nixus in hastam
Horrida securis frangebat gressibus arva.

CAP. XI.

De Summis Alpibus.

MEMINIT Summarum Alpium Raymondus
Marlianus: sed quæ sint, non satis aperte
declarat: ait tamen has aperire voluisse C. Cæsa-
rem, ut commodiore itinere à Citeriore Gallia in
Veragros esset transitus. Hac igitur conjectura du-
cti alii eas esse arbitrantur, quibus est initium à
Sesite, & finis ad Verbanum. Inque iis esse ajunt
Varalle Alpinarum gentium celebris præfecturæ
municipium, & Ocellum, quæ nunc Ocellana do-
mus appellatur. Ambo in Novariensi agro sita.
Juxta Ocellum amnis Athiso dilabitur, exonerat-
que se in lacum Verbanum.

Non silentio involvendus est & Titi Livii, &
L. Flori error: qui decepti similitudine nominis &
Athisonis, & Athesis, Cimbros à Romanis in
agro Veronensi devictos fuisse, scripsere. Et si
qui ex vobis hoc mihi credit minus, pedem referat
(ut interim taceam Castra Mariana pagum in agro
Novariensi, & Diaria Eusebii Cæsariensis) ad mo-
numenta Plutarchi: qui ait Cimbros à Leopon-
tiis & Rhætis ulterius evagari prohibitos, per
Alpes descendisse, in quibus est Athiso. Qua præ-
terea ratione Sicciani populi, quorum metropolia
est Varalle, inter Alpes Teutonium regulos inter-
ceptos ad C. Marium victos adduxissent, si hæc
apud Athesim gesta exstitissent?

Sed redeo ad Alpes rursus quamvis defessus ve-
stram tamen in gratiam, ut intelligatis apud me
esse antiquius nihil, quam amicorum desiderio pro
viribus obsequi. In eisdem Alpibus est Mastaleo
fluvius, qui in Sesitem penes Varalle præcipitatur.
Non procul hinc est Bormanicum oppidum, à Gal-
lis (ut non absurdum est credere) Narbonensibus
conditum: quando apud Plinium legatur Borma-
nicum in ea Gallia, non procul à Caballione inter
Aream, & Macinam.

CAP. XII.

De Leopontiis Alpibus.

HAS recto tramite Orientem versus Leopontio-
rum Alpes sequuntur: quas ex sententia do-
ctissimi Alciati eas esse diffiniemus, ubi sunt Sui-
tenses: quibus ex Bilitonis castro in ripis Ticini
antequam Verbanum ingrediatur, Claronam recte
tendimus. Bilitio hac tempestate Belinzona dicitur;
quæ alias Insubrum parebat Imperio, verum Sfor-
ciacorum ignavia Ducum cum pluribus aliis castris
in jus Helvetiorum rediit. Leopontiis Græcam esse
originem Plinius fatetur.

CAP. XIII.

De Rhæticiis Alpibus.

LEOPONTIARVM Alpium finis Rhæticus est ini-
tium: fuere autem Rhæti ex his Tuscis vetu-
stioribus, qui Galliam Citeriorem ante Romano-
rum arma incolebant, & postmodum pulsi à Bel-
loveso Celtarum Rege in præruptas Alpium crepi-
dines se recepere. Rhætorum metropolis est Cu-
ria. Celebrantur vina Rhætica à Virgilio, cum in-
quit*:

— & quo te carmine dicam Rhætica?

Rhæticiis enim præcipuus honor fuerat, ut Plinius
scribit, ante Tiberium Cæsarem, qui ob nimiam
vini ingurgitationem dictus est Biberius Mero.
Rhæti hac tempestate Grifones appellantur: & quan-
quam fuerint Duce Rhæto, à quo & nomen acce-
pere, Tuscorum coloni in linguam tamen & mores
Helvetiorum transferunt.

In exordio Rhæticarum Alpium Vallis est Vol-
turena Catonis commendatione celebratissima. Per
eam in Larium se fluvius Addua exonerat. Quanta
sit harum Alpium altitudo, mira ingenii ubertate
Claudianus his versibus† expressit:

Sed latus Hesperia, quo Rhætia jungitur ora,
Præruptis ferit astra jugis, panditque† tremendam
Vix æstare viam: multi ceu Gorgone visa
Obriguere gelu; multos hausere profunda
Vasta mole nives; cumque ipsis sæpe juvenis
Naufraga candenti merguntur sæpe barathro.

CAP. XIV.

De Tridentinis, Julii, & Carnicis Alpibus.

TRIDENTINAS Alpes recenset Plinius in libris
Naturalis Historia, quas esse constat, ubi est
Tridentum. In Tridentino tractu urbem condidit
Anastasius Constantin. Imperator. Hujus rei testem
habeo ipsius Anastasii edictum ad circumvicinos Tri-
dentinæ regionis in hanc sententiam scriptum: NE-
CESSITAS PVBLICA multorum debet devotione
compleri. Quia non decet paucos suscipere, quod constat
plurimis expedire, ne regia jussa tepesacta lentescant,
dum res utilis delegatur infirmis. In Tridentina ergo
regione civitatem construere nostra præcipit auctoritas:
sed quia territorii parvitas magnitudinem operis non
potest sustinere: hoc sollicitudo nostra prospexit, ut ac-
ceptis mercedibus competentibus podaturam murorum
omnes in commune subvehatis, qui vicinitate jungimi-
ni, ut accommodato solatio securius compleatur, quod
paucis inexplicabile fore cognoscitur. Hac scilicet condi-
tione definita, ut nullus ab his oneribus excusetur, un-
de nec omnia domus excipit. Hæc ille. Verum, quæ
fuerit hæc urbs, quam condi mandaverit in Tri-
dentina regione, adhuc ignoro.

Transego igitur ad Julias Alpes, quibus ex Foro
Julii transitur in Noricum. Eas iis verbis Amm,

* Lib. II. Georg. 9. 96.

† De Bello Ger. 9. 340. & seq.

‡ Alii legunt, terendam.

Marcellinus describit † : *Postea res Latio patefacta sunt carentes aditibus : quæ aliquoties dant magnorum Ducum repellere conatus , & pars quæ Illyricum spectat mollius edita , velut incanta subinde superatur. Latus vero e regione oppositum Thraciis prona humilitate diruptum , hincque & inde fragosis tremitibus impeditum difficile scanditur , & nullo vetante. Sub hac altitudine aggerum utrobique spatiosa camporum planities jacet superior , adusque Julias Alpes extenta ita resupina & panda ut nullis habitetur obstaculis , adusque fretum & Propontidem.*

Alpium extremæ sunt Carnicæ , unde Julius Carnicus. Quanto Rom. sanguine hæc loca per tempora Divi Hieronymi adpersa sint , ipse declarat iis verbis : *Horret animus temporum nostrorum ruinas persequi. Viginti & eo amplius anni sunt , quod inter Constantinopolim , & Alpes Julias quotidie Romanus sanguis effunditur : Scythiam , Thraciam , Macedoniam , Dardaniam , Daciam , Thessalonicam , Achajam , Epiros , Dalmatiam , cunctasque Pannonias , Gothos , Sarmatas , Quadus , Alanus , Hunni , Wandali , Marcomanni vastant , trahunt , & rapiunt. Miror non adjecisse illum Cisalpinam Galliam , quam à Marcomannis vastatam fuisse , præsertim Insubrum agrum circa Mediolanum , refert Flavius Vopiscus , qui postmodum Aureliano imperante tanta clade Romanos ad Placentiam affecere , ut pene Romanum solveretur Imperium.*

Gignunt Alpes plures feras. Polybius auctor est belluam in eis gigni , quæ habitu quidem est ad cervi staturam collo duntaxat excepto , & villis , quibus capro perquam similis est : geritque sub mento carnis globum ad palmi magnitudinem capillorum : huic caudam equini pulli esse tradit Polybius. Habent & Alpes lepores candidos , quos hybernis mensibus pro cibatu nivem credunt esse : certe liquecente ea rutilescunt annis omnibus. Item boves & equos agrestes. Nascitur quinetiam in Alpibus salicina , herba verius quam flos. Pannonia gignit hanc quoque & Noricus , Alpinarumque aprica urbium Hipporhediam tantæ soliditatis , ut metallum esse cœperit , vestibis eam interponi gratissimum est.

C A P. XV.

De nonnullis fluminibus & lacubus Cisalpina Gallia.

E Montibus , quos Salassi colunt , duæ defluunt Duria : inter Augustam Taurinorum & Clavadium Morgus est , qui nunc Orchus appellatur : & fluvius alter , quem Sturiam nominant. Inde est Sesites , quem Sicciam etiam vocant , unde Siccianni populi. Mox est Aconia inter Novariam , & Sesitem. Et inter hanc & Ticinum Terduplus. Ticinum Verbanus emittit : cui ob latitudinem Majoris cognomen est inditum. Forma ipsius lacus cochleæ simillima est lunatis quibusdam cornibus biceps , alibi trigona : habet longitudinis stad. CCCLXIV. latitudinis vero XXXII. Quibusdam in locis ita arctatur , ut vix mille passus excedat : aliis tria , aut bina passuum mill. Natura interdum ita placidus est , ut etiam nautarum negligentiam sustineat : sæpenuero ita contractæ frontis est , & æstuantis , ut eorundem peritam audaciam deterreat. Scopulos habet non Cerauniis , non Scyllaceis , aut Cyaneis inferiores , qui ventis & undis adeo oblatrant , ut Virgilianum illud * per eas partes transeuntibus occurrat :

*Et gemitum ingentem pelagi , pulsataque saxa
Audimus longe , fractasque ad littora voces :
Exsultantque vada , atque æstu miscentur arena.*

† Lib. XXI. cap. X. Locus iste miris modis est depravatus , qui omnino restituendus juxta Editionem supra citatam.

* Lib. III. Æneid. v. 556.

A Huic lacui Ticinus ex Leopontinis Alpibus derivans immiscetur : tantoque impetu per Verbanum fertur , ut multo spatio supernatet. Regio circumadjacens adeo felix est , ut verna temperie , & herbarum luxuria facile cæteris antecellat : & ideo non desunt , qui Verbanum à verna temperie dictum putent. Huic exordium est ad Magadinum vicum : mox paulatim arctatur , inde erumpens ut Propontis exspatiatur : iterum premitur , & de novo panditur ut mare Euxinum. Tandem ad Sextas Calendas (vici nomen est , quem Sextium vocant) clauditur : atque illinc Ticinus erumpit.

B Cæterum undique frequentissimis municipiis & portubus ornatur. Siquidem in ea parte , quæ Insubribus est opposita , sunt Locarnum , Ascona & Insulæ cuniculares duæ , à copia eorum animalium in illis stabulantium dictæ : mox est Brisagum , deinde Canobium coriaceæ mercis emporium. Non procul hinc in profundo lacu ruinæ , & disjecta fundamenta Castri Malpago à præternavigantibus conspiciuntur : quod olim (ut scribit Machanæus in *Cosmographia Verbanus lacus*) à quibusdam piratis , quos *Mazarditas* vocabant , ad injuriam & populationem Verbanicolarum , conditum felicissimo circumadjacentium populorum eventu Mediolanenses subverterunt , piratis ad unum saxo ad collum appenso submersis.

C E regione Malpago vestigiorum Isellæ sunt peninsulæ duæ vulgatissimum piscatorium diverforium. Ab Isellis Pallantium transitur , quam Volaterranus Polentiam esse scripsit , fere nominum similitudine deceptus. Hoc municipium ramus Verbani (ita nautæ appellant) longitudinis mil. pass. ambit. Illinc navigatur Intram , & ab ea mox Aronam : quam scitis cum natura loci , tum arte munitissimam Gallorum Transalpinorum exercitum excepisse sub Armiralo : qui eam & classe , quam ad hoc opus præparaverat , & terra oppugnabat : & tentata infeliciter & sæpius expugnatione eam dereliquit. Dictam ipse crediderim Aronam , quasi *oronam* , hoc est , montanam.

D In littore autem quod Insubres tenent , sunt Machanum , ubi Machanæus vir eruditissimus , quem ipse in Augustæ Taurinorum Plinium *Naturalis Historia* interpretantem audiavi , natus est : Lovinium , Germignaca , Arx Travalis , Lavenum , Acerræ , Hisprum quasi asperum ob saxorum difficultates , & novissime Angleria Vicecomitum titulo Comitatus insignis : quam Philadelphus in gratiam Philippi Vicecomitis ineptissime scripsit ab Anglo quodam edificatam , eumque Hectoris fuisse filium comminiscitur. Et hanc ob causam ipse Philolpho dementior velut ab Hectore genitus Angli cognomen assumpsit.

E Hic cum subrissent omnes , Castillioneus : Putemus , inquit , Marte potius Alciato ab Anglis Saxonibus , qui cum Longobardis in Italiam venerunt , esse & conditam , & denominatam Angleriam : vel saltem auctam. In hoc municipio cerne re fuit (nam eorum partem Philippus Archintus ad exornationem ædium suarum Mediolanum transferri curavit) vetusta monumenta , elaboratos tumulos , urnas , templa , cryptas , porticus , columnas , idque genus vetustatis insignia. Alpinarum (puto) gentium præfectura olim fuit : in qua sub Carolis , Berengariisque Impp. jus dicebat , qui delectus fuisset ad hunc magistratum à Comite Mediolanensi , & hanc ob causam Vicecomes nominatus : à quo postmodum præclarissima Vicecomitum fluxit appellatio. Declinante enim Imperio Romano , cum Anastasius imperaret , invenio urbium & provinciarum alias per diversos magistratus solitas regi. Provincias per Comites , Romanam urbem

* Magadinum puto ita nuncupatum ab ipsius vici congruenti situ , forma , & structura. *Maryadis* enim musicum est instrumentum , quadrata tabula constans leviter connexa.

per Præfectum, Neapolim, & Syracusas rursus à Comitibus administratas fuisse, epistolæ Anastasii Imperatoris ostendunt. Rhætici Alpibus Dux præerat, qui ferocissimis gentibus & agrestibus obstaret: erantque Alpes illæ per ea tempora Italiæ portio minima. Lego præterea fuisse Comites sacrarum largitionum: quibus Provinciarum iudices audiebant, & quibus imprimendarum pecuniarum fucrat munus injectum. Erant & privatarum actionum Comites, quibus demandabatur castitas juvenum, & securitas mortuorum. Reperietis quinetiam patrimonii Comites, quorum partes ostendit epistola Anastasii, cujus est initium, *Antiqua consuetudinis ratio persuadet*. Nec deerant domesticorum Comites. Qui igitur Comitibus alicujus eo absente vices gerebat Vicecomes dicebatur. Similis est Vicedominorum familiæ nomenclatura: quæ olim dignitatis potius, quam familiæ, fuerat appellatio.

Mercurium (ut redeam tandem unde discesseram) ab Angleriatibus cultum fuisse plura monumenta sunt indicio. Qualia hæc sunt:

M E R C V R I O
Q. VITALIS
QVINTIONIS FIL.
V. S. L. M.

Item alterum:

M E R C V R I O
C. ALBINVS C. F. O. V. F.
MASCELLIO IIII VIR. * A. P.
PRAEF. D. IVDEX V. DEC.
NOMINE SVO ET IVLIAE
INGENVAE VXORIS ET
A L B I N I O R V M
IVLIANI MASCELLIONIS
INGENVAE MONTANAE
LIBERORVM SVORVM
V. S. L. M.

Vel
potius
ALP.

Porro Verbaniacollæ Mercurium colebant, non tam quod mercibus, hortisque, quam quod aquis præesse putaretur à vetustioribus, & portuum custos. In Verbanum se lacum duo lacus exonerant; alter ab Occasu ex agro Novariensi, quem Ortacum nominant; alter ab Oriente, cui Lucano ex adjacenti oppido nomen est: ambo autem pisculenti admodum. Medio autem Verbanus est velut Alpinarum aquarum rex & dominator.

C A P. XVI.

De Lario lacu, Addua, & aliis fluctibus Alpibus.

VERBANVM sequitur Larius comajor longitudine, latitudine autem minor longe: quem alii à fulicarum copia dictum putant: *λαίρ* enim Græcis, nobis est *fulica*. Alciatus à suavitate larium denominatum existimat. Ego autem à Larone five Larunte, quæ vox Hetruscorum lingua (ut auctor est Cato in *Originibus*) significat principem: ad quam significationem Virgilium allusisse facile quis mihi persuaserit, cum inquit:

An ne lacus tantos? te Lari maxime, &c.

Hic Litteratus quispiam in margine pro notis A. P. scriptit legendum potius ALP. ea forte conjectura ductus, quod Merula Alciatum & Castillioneum secutus Angleriam Alpinarum gentium præfecturam fuisse putet: ex sequenti verbo PRAEF. Verum quilibet vel mediocriter in hac re versatus facile norit ex his etiam quæ supra dicta sunt, has notas A. P. sic legendas, & cum superioribus IIII VIR. conjungendas. Dictionem vero PRAEF. ad sequentes notas pertinere, licet impressorum incuria omisa fuerit nota I, post hanc dictionem; hoc enim pacto legi debet PRAEF. I D. id est, *Præfectus Furi Dicundo*.

† Lib. 11. Georg. v. 159.

A Circa Larium sunt montes ad spectu fontium, & olivetis, ac citrorum copia suavissimi: quorum delicias Claudianus his versibus† expressit:

*Protinus umbrosa vestit qua litus oliva
Larius, & dulci mentitur Nerea fluctu.*

B In hunc lacum descendit Addua ex Rhæticiis (ut jam dixi) montibus præcipitatus: unde & Danubius, qui & Ister appellatur. Ipse autem fluvius hemicyclari forma agrum Insubrum circuit: ex quo Euripum Franciscus Sforcia, hujus nominis primus, Mediolanum deduxit. Inter quod & fluvium sunt populi Græcæ originis Orobii sub Insubribus. Adhuc exstat antiquitatis vestigium nominis corruptio: siquidem mons *Robius* aliud est nihil quam mons Orobiorum, qui nunc *Briantei* nominantur, quorum metrocomia nunc est Vicus Martis. Addua autem è Lario erumpens primo Glaream Adduæ afficit, quam antiqui Fulcherias insulas vocabant, ut attestatur Georgius Merula, mirus antiquitatis vir observator. Quo in loco me puero Veneti à Gallis Transalpinis & Insubribus, auspiciis Ludovici Gallorum Regis, funesta clade protriti sunt. Emicuere eo in prælio Comitis Ludovici Barbiani, qui Insubrum Dux erat, ut attestantur hæc carmina, & fortitudinis exempla, & rei bellicæ peritia:

C *Hec mihi qua tenui manant è paupere vena
Fudit in Albrici nostra Thalia decus.
Cujus posteritas celebres mirata triumphos
Grandisona forsant tollet ad astra tuba.
Namque Sophocleo celebrari dignus honore,
Dignus & Andini carmine vatis erat.
Qualiacumque tamen non dedignabere: si te
Tangit honos atavi, fama, decusque tui.
Hic Decios, alter Fabios miretur in armis,
Et geminos belli fulgura Scipiadas.
Ætatum quoscumque gradus percurreris, ille
Hæreat ingenio, consilioque tuo.
Nam licet ad laudes nullo accendaris Achille,
Sæpe juvat celeri subdere calcar equo.
Auguror, illius summos equabis honores,
(Certa fides) vaturn pectora numen habent.
Addula non negat hoc, cujus tua dextera nuper
Sanguineas Veneto sanguine fecit aquas.
Fluminis in ripa Veneti ulteriore superne
Metati fuerant ordine castra Duces.
Eminus hinc magno tormenta excussa fragore
Grandinis in morem regia castra petunt.
Sternuntur passim peditumque equitumque catervæ,
Aerea & in trepidos machina sævit equos.
Haud tantam passus stragem spectare suorum
Rex pius, hinc subito territa castra movet.
Forte tripartito dum digerit ordine turmas,
Et parat in tuto figere castra loco:
Incidit in Venetas acies, agmenque supremum:
Nec mora, pugnandi copia utrimque datur.
Tollitur in cælum clamor, pugna aspera surgit:
Terribili sonitu terriat arva tuba.
Qualiter aetherea fulmen torquetur ab arce,
Iusta Panomphæum cum quatit ira fovem.
Taliter adversis audaci pectore signis
Fulminat Adriaci dextra cruenta Ducis.
Pellitur ecce gradu turpi formidine pubes
Gallica, & attonito pectore Vasco fugit.
Vicinus, exclamat passim Livianus: & inde
Pugnat ad exemplum cetera turba Ducis.
Instat, & hortatur Latias in bella cohortes,
Atque alacer multa cade cruentat humum.
Bis pulsus cessere equites, bis terga dedere:
Bis pallor visus Regis in ore fuit.
At tibi Barbiaca lux ô clarissima gentis
Venit in Adriacas impetus ire manus.
Invictique Ducis vim vi detruere, & ore
Comminus intrepido consensisse manus.*

† De Bello Get. v. 319.

H

Hor.

Horrifico nec te terrent tormenta boatu,
 Quæque volant docta spicula missa manu.
 Nec quod pene puer dubium certamen inires,
 Usque adeo dulci laudis amore furis,
 Ut ferrum ferro admotum, & dextera dextra,
 Non referam dederis quot Ludovice neci.
 Talis in Hæstoeas ibat furibundus Achilles,
 Talis in Argolicas Hæstoeas ira manus.
 Exemplum mirata tuum trepida agmina campis
 In pugnam referunt victa pudore pedem.
 Sic modo quæ nimio vertebat terga timore
 Pugnandi studio Gallus in arma ruit.
 Ecce volat versis tandem Victoria pennis,
 Vergit & in nostrum cade cruenta latus.
 Turpiter en victis jam cedit victor: ubique
 Et Veneto passim sanguine terra rubet.
 Qui superant rari præda spoliantur & armis:
 Castraque jam capto capta fuere Duce.
 Rex bene pro meritis meritos discernat honores,
 Debetur capiti multa corona tuo.
 Maeste animo, maeste ingenio, sic itur ad astra
 O decus, o patria præsidiumque. Vale.

Tunc Bonaventura, Oblectavit me, inquit, hæc
 tua cantio: sed optarem à te scire, quando è sacro
 Musarum fonte tam luculenter biberis.

Non sunt (inquit Castillioncus) domi nostræ hæc
 nata carmina: sed aliunde accepta jucunditatis gra-
 tia vobis retuli, sed ne sis molestus, obsecro, ut
 quam primum ad metam ipse perveniam, & vos
 missos faciam. Longobardorum in historiis legi,
 & Gotthorum, in lacu Lario fuisse insulam, quam
 Comacinam vocant, in qua Francilio Romano-
 rum Dux primo, postea Gotthorum, & mox Lon-
 gobardorum Reges immensos thesauros condidere.
 Hunc lacum mirum est ciconias, quibus omnis
 Transpadanus tractus abundat, non transvolare. In
 Adduam ex Bergomatum montibus Brembus flu-
 vius irrupit, desert etiam secum ex eisdem fere
 Alpihus Serrium in Padum.

C A P. XVII.

De reliquis Cisalpina Gallia lacubus & fluviis, ex
 Alpihus in Padum influentibus.

In agro Insubrum XVII. lacus, flumina autem LXIII.
 esse Blondus attestatur, eorum tamen nomina
 non recenset. Non me tamen fugit esse Eupilim,
 qui Lambrum emittit, Umbronem ab aliis dictum.
 Est & Lambrus alter, quem Insubres Meridianum
 vocant, & Orona altera, qui pariter excipiuntur à
 Lambro, quem emittere Eupilim diximus. In
 quorum confluenti Sanctus est Angelus oppidum
 elegantissimum: quod Ludovicus Barbianus expu-
 gnavit, cum illud valido præsidio Veneti tenerent.
 Deinde Sebus est lacus, qui nunc *Issens* appella-
 tur, hic Ollium emittit fluvium. Ex Brixiano
 agro Mela Broccho & Morma torrentibus acce-
 ptis desertur in Padum. Ex Tridentinis Alpihus
 Sarca fluvius effluit. Benacus lacus est Veronensis
 agri, citrorum copia odoratissimus: ex eo Mintius
 egreditur. In cujus ripa oppidum est, quod nunc
Governum vocamus, quo in loco Leo Ecclesiæ Ro-
 manæ Episcopus Attilam Hunnorum Regem, ne
 Italiam invaderet, precibus deflexit. Athesis flu-
 vius ex Alpihus derivat: mox est Medoacus, quem
 nunc *Bachilionem* Veneti nominant: medio hic Ve-
 centiam dividit. Novissimi fluviorum sunt Tima-
 vus, quem hac ætate *Brentam* vocari Blondus asse-
 rit, Sisinus, Musio, Anaxus qui nunc *Planus*, Va-
 yanus, nunc *Calorius*, Lipientia, ex Opiterginis
 montibus, nunc *Liventia*, in quem influit Meduna,
 Alsa, nunc *Liminius*. Hæc sunt flumina, quibus
 universa Cisalpina Gallia versus Alpes irrigatur:
 nunc ea, quæ Apenninus emittit, enumerabo.

C A P. XVIII.

Cispadanam Galliam quæ flumina alluant.

CISPADANAM Galliam fluvii plures alluunt ex
 Apennino: & ita quandoque eam partem oc-
 cupant, ut nisi summo cum periculo loca illa inter
 Padum & Apenninum peragrentur: & sæpenume-
 ro adeo stagnant, ut nullis viatoribus sit transitus.
 Plures enumerat Plinius, verumtamen multos præ-
 termisit: ut Borbum torrentem, cujus sunt initium
 Aquæ Statyellorum Ligurum: mox est Tanarus,
 quem ajunt torrentium XII. illuvione augeri. Ra-
 tum Plinius appellat, quem nos Scriviam, Geor-
 gius Merula Iriam putat appellari: Serravalle op-
 pidum fere alluit. Penes Vicheriam Coronus est
 torrens. Vicheriam autem dictam crediderim,
 quod Iriæ, cujus meminit Antoninus Pius, urbis
 vices gerat.

Sed antequam ulterius progrediar, admonendos
 vos arbitror Ratum à Paulo Jovio Statolam dici:
 in cujus ostio est Albianum. Hunc sequitur Copa
 torrens, & illud Tunnus, à quo alluitur Sanctus
 Joannes agri Placentini oppidum. Illinc recta itur
 ad Trebiam Romanorum clade celebratissimum.
 Niciam à Plinio dici putarim, quem recentiores
Nuram appellant apud Fidentiolam. Illum Tarus
 sequitur, ut interfluentes Rarum, Ardam, Ocham,
 Conium torrenteis prætereant. Oritur Tarus ex
 colle Bardonis: in cujus cacumine monasterium est
 Luthprandi Longobardorum Regis liberalitatis ty-
 pus. His in locis Gabellum fluvium Plinius collo-
 cat: qui sit, conjecturis non assequor. Adeo ob
 Gotthos, cæterosque Barbaros mutata fere sunt
 omnium rerum nomina, ut frustra Samnium quæ-
 ramus in Samnio. Deinde Parma est, quem auge-
 torrens Bagantianus. Lentiam non procul à Brixello
 Padus excipit. Rhegium versus Crustulus torrens
 medio secatur viam Æmiliam. Paulo ulterius progre-
 dienti Sicla, qui Salcinium ingreditur, torrens oc-
 currit. Huic fere inhæret Sculterna, qui nunc ac-
 colis est Panarus, in quem non procul à Mutina
 Formigo fluviolus ingreditur. Inter Sculternam &
 Samogiam torrentem fuit Forum Gallorum à Ser-
 Galba, clade Rom. celebratum. Ap. Alexandrinus
 Celtarum Forum nominat; nunc *Burgum Francum*
 appellant, non longe à Perticeto. Per hæc loca
 Claterna vetus oppidum est; *Quadernam* nunc ap-
 pellari audio cum ejusdem nominis torrente: qui
 postmodum ad Caballos dilabitur: vicus sancti Pe-
 tri Silere alluitur. Qui penes Bononiam fluvius
 præterfluit Rhenus est. Qui vero Imolam, quæ
 vetustioribus Forum Cornelii fuerat, quod constat
 à Narsetis militibus esse prædæ expositum, & sub-
 versum, Vatrenus est amnis.

Mox fit obviam Senius fluvius, in cujus ripis
 Cunium fuerat oppidum ditissimum, quod hac æ-
 tate adeo dirutum est, ut cum ubique aretur, igno-
 ratur prorsus, ubi existerit: cujus fuit Comes Al-
 bricus Barbianus Italicæ militiæ reparator: qui ta-
 meti adolescens esset, accitus tamen est à Berna-
 boue, qui tum in Insubribus primas parteis obtine-
 bat. Electus cum fuisset igitur copiarum Berna-
 bouis ductor, in Britones, Bavarosque & Anglos ca-
 fra movit; qui eo tempore Italiam vastabant. Va-
 riant itaque fortuna cum profligati essent à Barbaris
 Insubres, inter multos quoque captus est à Barba-
 ris Albricus: quem militari more, ut hostes dimit-
 terent, nullis rationibus, aut legibus adduceren-
 tur, Bernabos Vicecomes argento (quoniam Barba-
 ros hoc avaritiæ morbo maxime laborare cognove-
 rat) ad trutinam, quanti ponderaret, appenso, si-
 cut auro Hæstor à Priamo, redemit. Albricus ergo
 liber adeo Barbaros per universam Italiam exagita-
 vit, ut XL. mill. equitum eorum trucidando ab I-
 talia expulerit. Cineribus igitur hujus quicunque
 Itali

Itali generis militiam agunt, adeo debent, ut qui eloquentiam exercent Ciceroni, aut Demostheni. Nemini enim dubium est, tot bellacissimos Duces ab ipsius disciplina, quot ex equo Trojano, prodidisse. Sed hæc satis de his dicta sufficiant.

Hoc in tractu Anomi, Senii, & Vatreii fluminum confluenti scelestissimum Octavii, M. Antonii, & Lepidi triumviratum, quo universæ Italiæ nobilitas sublata est, conflatum esse ajunt nonnulli. Non longe illinc est Tiberiacum oppidum, quod deinde Caballos alii dixerunt, modo *Bagnacavallum* nuncupatur, ut auctor est Blondus in suis *Historiis*. Inter Forum Livii & Salsubium à falso fonte olim ibi scatente denominatum, quod nunc *Carum* vocant, Montonus torrens interfluit, è cujus montis regione Tiberis oritur. Proxime huic Bedefis agri Ravennatis amnis accedit. Mox prætereunt duo fluvii, quorum uni Avexa, Bevanus est nomen alteri. In Apennini colle Brintanorum Forum visitur: quod alii Forum Pompilii nominant: nunc *Bretonorium* vulgus appellat. Juxta quod constat à Visigothis Romanos truculentissima clade esse confisos: & mox Romam ab eisdem & prædæ expositam, & flammis multis in locis esse consumptam. Hanc novissime urbem Longobardi vastarunt. Ad Cerviam salinis celebrem Sapis defertur ex jugis Apennini. Ultimi sunt Ariminus, quem *Maridam* loci illius accolæ nominant, Crustumium, quod *Concham*, & Rubicon Galliæ Cisalpinæ versus Italiam limes. Non procul à Metauro fluvio mons est Asdrubalis, nunc *Asdravallis* est, quo in loco victum constat Asdrubalem, & obtruncatum à Romanis.

Hæc fere habui, quæ de lacubus ac fluviis dicere hujus nostræ almæ regionis: quos materna ferre lingua potius dixisse placuit, quam eos silentio involvere. Nam hæc vocabula, quæ nunc sunt nova, sient olim vetera: nam & illa quæ nunc sunt vetusta, erant olim nova.

Non eram, inquit Bonaventura, sermonem tuum rupturus, nisi te prius inspexissem in portum vela deflectere. Quamobrem quo ex devinctis tuo nomini devinctiores efficiamur, te omnium horum verbis oro, ut nos certiores facias, cur sacro diademate Mogunciacis municipibus ornandi Imperatores Germanos concessa sit facultas.

C A P. XIX.

De translatione dignitatis coronandi Imperatores à Mediolanensibus ad Mogunciacos municipales.

SUPER hac re, inquit Castillioneus, ut absolutius expediaris, verba doctissimi Alciati nunc adducam: Post Othonem secundum, inquit, filius & nepos rerum potiti sunt. Ex his nepos, qui Otho tertius est dictus, sua auctoritate Gregorium quintum origine Saxonem Pontificem creavit: quem cum Romani non ferrent, Crescentio auctore, quem honore Consulatus insigniverant, ceu adulterum ejiciunt, Joannemque Placentinum in Sede Apostolica collocant. Erat is doctrina, divitiisque perillustis. Accurrit statim è Germania Otho: & Gregorium restituit: Crescentium Joannemque fide data impune eos de Adriana arce elicit: & alterum vita, alterum oculis privavit. Gregorius, sive ut Romanos ulcisceretur, sive patriæ suæ & Othoni plurimum tribuere volens, sanctionem de Imperatorum comitiis tulit: in quibus dignitas eligendi Imperatorem ad Germanos translata est. Cæterum Othone tertio ex humanis sublato Gregoriana lege Henricus primus ex Gubelingo oppido Noricus primus suffectus est: sed eam legem nihili facientes majores nostri Longobardi Ardoinum Eporrhediensem Marchionem Italiæ Regem Medio-

A lani coronant, & ungunt. Sunt qui convocatis finitimarum urbium principibus atque Episcopis Imperatorem quoque salutatum scribant. Is advenienti Henrico obviam factus ex itinere prælium committit, & egregie hostem vicit. Repulsus Henricus cum Heriperto Mediolanensium Archiepiscopo fœdereicto, reparatoque exercitu revertitur, & Ardoinum acie superat: & more majorum Mediolani coronatus in Germaniam, unde venerat, revertitur. Henricum secutus est Conradus Suevi generis. Adversus hunc, ne Rex salutaretur Italiæ, Longobardi conjurant. Cum ergo Mediolanum venisset, ingressu prohibitus est: cumque hanc urbem frustra aliquandiu obsedisset, tandem re infecta recessit: sive (ut ajunt) miraculo & ostentis territus, sive ut horum velamine suæ fugæ dedecus tegeret. Accepit is Modætiæ (ita hoc municipium Alciatus frequenter vocat, quod nos Mogunciacum) agri Mediolanensis ad decimum lapidem imperialia insignia, parum referre existimans ubi corona redimeretur, dum in Insucribus hoc fieret. Cujus exemplo ut alii quidam ex Cæsaribus urbe Mediolano exclusi coronam imperatoriam Mogunciam accipere, & qui ulterius progredi non potuerunt, Alexandria eam sumpserunt. Sed Mediolanenses has coronas in contemptum paleas vocant prisco loquendi more, quo vilis res & nihili palea dicitur: ex quo & Aristophanes inquilinos Atticos paleam civium nominat in antiqua Comœdia. Coronandi autem Imperatoris hic mos observabatur. Ante aram pontificiis vestibus indutus Antistes petentem se coronari Romanorum Regem sacro oleo dextro in humero perlinibat: in medico dextræ manus digito anulum mox collocabat: deinde ensen nudum tradebat: subinde capiti coronam, dextræque sceptrum imponebat. Hancque omnem solennitatem publicis documentis jubebat esse testatam. Sceptri fastigio pomum aureum stabat, quo Asiæ, Africæ, & Europæ inscriptio brevis inest. Supra pomum crux aurea inseritur, vel ut recordetur se Christianum esse, vel ut Christianos tutetur. Observatum quoque inquit Alciatus esse Mediolani, ut his peractis, qui ex Angliæ Comitibus dignior sit, pedem dextrum, & qui ex Cottarum familia, quæ adhuc Mediolani clarissima est, sinistram osculo tangat, Imperatoremque humeris ferat uterque sublatus in prætorium. Qua in re fidem ipsam suam Alciatus non obstringit, cum didicerit Cottarum ex genere fuisse Ardericum Archiepiscopum, & ab eo regni insignia Berengarium secundum suscepisse. Sublato ab humanis Conrado tres Henrici continua serie Imp. subsecuti sunt: qui licet Romam contenderint, & augustale diadema sumpserint, Mediolani tamen (quod equidem sciam) id ornamentum non accepere. Alciatus armis Rudolphi in Germania, & Matildis in Longobardia exercitos arbitratur non potuisse regni Italiæ coronam consequi. Successit Lotharius Henricorum hostis ex professio Saxonum Dux: qui omnem Germaniam seditionibus vexavit. Itcirco ex Henrici Imperat. defuncti sorore genitus Conradus, Honorio Pontifice Romano favente, Imperatorem sedixit, & in Cisalpinam Galliam properans ab Anselmo Pusterlensi tunc Mediolanensium Antistite Modætiæ regni Rom. sceptrum suscepit. Formidolosum opinor præfuit intra urbem cum cum tanta Germanorum manu, juxta illud Plauti, *Barbarum hospitem qui suscipit, sat litium habet*, recipere.

Subsecutus est & Lotharius, atque per Rhætica juga Romam contendit. Scribit Otho Frisingensis Antistes, qui & Rubrobarbi patruus fuit, sive copiarum parvitate, sive Conradi amore contemptui Italorum fuisse. Ab his putant Guelphorum & Gibellicorum perniciofa nomina in Italia primum cepisse.

Successit Lothario Fridericus Rubrobarbus: inter quem, & Alexandrum Pont. vehemens exorta seditio est. Itaque ad arma si quando aliàs atrocissime concursum est. Raptim igitur, ut erat natura præceps & ferus Rubrobarbus maximo non solum Barbarorum exercitu, sed etiam vicinorum populorum, ægreferentium quod Insubres longe lateque dominarentur, & eorum res florent, suppetiis adjutus Mediolanum copiis cingit. Itaque cum neque à Pontifice, nec aliunde subsidium speraretur, adeo universam Italiam timor exterrefecerat, cives libertatem à Rubrobarbo redemere datis argenti libris sex mill. Mox Mogunciaci imperatorio diademate redimitur: quod oppidum in ripis Lambri, quem Blondus Umbronem vocat, Redivicus, eorum temporum scriptor, Modoitium.

Erat Rubrobarbus lingua, studiis, moribusque ipsis plane barbarus, hoc est, ignavus, perfidus, ferus, implacabilis. Hujusce rei indicio sunt certissimo contra jus gentium vastatae urbes opulentissimæ Asta, Dertho, Cherium, Lacmellum, & Spoletum. Mediolanenses igitur cum & adversus pacem initam, & jura omnia, violari eorum, quam ab ipso emerant, & libertatem viderent, Pontifice suadente in Fridericum rursus arma capiunt, popularique tumultu nonnullas Germanorum copias obruncant: & ita per universam Cisalpinam Galliam bellum subito exarsit, quod ad plures annos gestum, excidio tandem urbi fuit. Habuisse ferunt in castris contra Mediolanenses ad centum millia bellatorum.

Nec hanc ob rem fida pax subsecuta est. Mediolanenses enim sociorum auxilio freti, patriam armis vindicant, ex qua fuerant expulsi, reparant, instaurant. Nec multo post advenientem Imperatorem ad Lenianum vicum aggrediuntur, fundunt, fugant. Qua clade affectus Rubrobarbus, liquido cognovit Insubrum non esse (ut prudenter admonerat L. Pisonem Galba senex) ut cæterarum gentium, quibus servitutis jugum injunctum est, servilia ingenia, sed homines esse, qui nec totam libertatem ferre possint, nec totam servitutem. Pacem igitur Cisalpinis Gallis, cum bello contra Insubres non sufficeret, invitatus dedit, his conditionibus: in primis ut libertatem, qua ante adventum suum in Italiam utebantur, Insubres haberent. Item jura regalia, si quæ antea possidebant, qualia sunt vectigalia, portoria, jurisdictiones, palatia, mulctæ, poenæ, flumina publica, salinæ, bona vacantia, jus signandi nummi, fabricandorum armorum, idque genus similia; quæ supremis tantum Principibus competunt. De cæteris quæ more, usuque civitatibus non pertinerent, idem juris esse: dum tamen cc. argenti beses (*marchas* vulgus appellat) bis mille annui penderentur. Ipsi vero Imperatori, ejusque filio Henrico quinto hoc tributum, ut designatum à Rep. Consules ejus auctoritate confirmarent, nisi qui ab antistitibus sacerdotum eligi solerent, ut provocationum causas, is quem Proregem ipse in Italis appellasset, nunciumve suum constituisset, agnosceret. Ut cives à xvi. ad xvii. annum se imperatorio nomini fidos fore

A tactis sacris jurarent. Ut quoties ipse in Italiam veniret, consuetum munus præstaretur; *Fodrum* id Germanica voce nominatur: Latine *aurum coronarium* ex sententia eruditissimi Alciati vocari potest. Et hæc sunt jura, quæ in Liguribus, Insubribus, Galliaque omni Cisalpina Imperatores habent. Non enim eis summa uti potestate, sicut in cæteras gentes, quæ regnantur Ducibus, aut Principibus, aut Imperatoribus, concessum est. Hocque differunt ab Imperatoribus Reges, quod hi supremum jus in cives obtinent, & pro arbitrio utuntur; Imperatores vero liberis civitatibus non nisi justo moderamine præsidet: atque ita nos Carolo audimus, ut honesta imperet. Ideo Senatus Rom. volentibus Tiberio, Adriano, & Philippo Imp. Redemptori CHRISTO aras dicare, tanquam novam religionem inducentibus non obtemperavit.

B Sublato demum ab hominum numero Friderico, quem Rubrobarbum appellari diximus, infensi Germanico nomini Insubres quamplurimos Imperatores armis ab urbe rejecere: ut minime potuerint regali diademate coronari. Henricus tandem Luceburgensis frustra repugnantibus Gallis Cisalpinis Mediolani primum à Castono Turredano Mediolanensem antistitem in templo sancti Ambrosii, mox Romæ coronatus est.

C At Mogunciaci (ut ad prima redeam) vetusto se jure, debitoque honore fraudari existimantes Henricum ordine septimum ejus nominis adeunt, debuisse regni decora in Divi Joannis Baptistæ templo, & eo in loco Italici regni insignia capere cum oportere exclamant. Idque dignitatis genus sibi Rubrobarbi, aliorumque Cæsarum beneficio tributum, & consuetudine confirmatum vociferantes. Ipse quinque mill. aureorum acceptis in posterum consensu suo ratum fecit. Non repugnare Mediolanenses, quo minus Mogunciacum regni Italici sedem esse Henricus declararet privilegio: quod superius experti fuissent, id quaecunque honoris esset, semper in summam urbis calamitatem verti: quod intra mœnia receptæ Germanorum cohortes, cæteræque barbaræ nationes à rapina, incendio, cadibus temperare non didicerint. Consultiusque poci sit, si exclusus ab urbe Cæsar in eo oppido imperialia ornamenta capiat, in quo cum præter loci angustiam, tum census & victus inopiam diutius esse non posset. Optasset Galeacius Vicecomes eandem Ludovico Bavaro exstitisse sententiam, ut relicta urbe Mogunciacum petisset. Non enim ingratitudinis in se exempla fuisset expertus, ut ab eo, pro cujus tuenda dignitate etiam adversus Romanum Episcopum arma sumpsisset, ceu hostis, & perfidus, & infensissimus in teterrimum carcerem Castri Mogunciaci, quod ipse struxerat, tractus fuisset: ut merito vulgatum sit apud Insubres adagium: *Quas in Italiam calamitates Cæsares invohunt, non nisi tricennali præscriptione obliterari*. Hæc cum Castillioneus dixisset, quod esset jam hora serior, conticuit. Tunc illico abiissent omnes, nisi eos ad cœnam Bonaventura blanditiis suis apud se continuisset.

GALLORVM CISALPINORVM
ANTIQVITATE AC ORIGINE

L I B E R I I I.



EQVENTIS diei omnium consensu apud Comitem Hippolytum Maynum, lectissimi ingenii adulescentem, confabulatio habita est: quod scirent apud ipsum divertisse hospitalitatis gratia Benedictum Jovium, & Petrum Candidum singulari cum erudi-

tione tum acri ingenio viros. Ibi cum præter spem Gualterum Corbetem, Bernardum Felicianum, & Adrianum Cribellum offendissent, dii boni quæ tum lætitia non fuit! Accepti igitur cum perhumaniter singuli fuissent à generosissimo adulescente, inquit Cribellus, Desiderarem ex te, Jovi, intelligere, cur Celtæ à Græcis appellemur: cur item Insubres. Ne molestum sit igitur tibi, quod in Etymologiis scio præstantiorem hac ætate esse te neminem, hæc nobis exponere: ut Larianis non modo nymphis, quæ ad nos tam expetiti saporis mittunt troctas, sed hominibus etiam debeamus.

Tunc Jovius, Tametsi, inquit, γλαῦκα εἰς Ἀθήνας, qui hæc vobis: tamen cum citra pudorem pensum hoc à vobis (ut arbitror) omnibus injunctum mihi rejicere non possim, obsecro vos, ut ubi ingenii mei vires, scio enim quam sint exiguæ, succubuerint oneri, vestrum aliquis statim subsidio fit mihi: ut mutuo fieri videmus à musicis, qui statim canentium velut lassatorum vocis laborem suscipiunt. Aggredior ergo, quando ab eo declinare minus liceat mihi, provinciam hac lege, ne in tam angustia temporis, negotiis enim impediatur, λακωνισμός vitio vertatur mihi. In omnibus, inquit Cribellus, ὁ σφόδρὸς δὴ γυρρήμων ἐστίν.

C A P. I.

Celta, Galli, & Galata cur dicti?

GRÆCIS fuere (inquit Jovius) nullæ gentes circa etymologias diligentiores. Hi ergo communi appellatione Gallos appellant, quicquid à Rheno per Oceanum, Pyrenæos montes, mare Mediterraneum, & Apenninum usque ad Anconam, terrarum clauditur. Cur autem Celtæ vocemur ad Merulam meum scripta Andreæ Alciati vobis satisfaciet epistola: Quanto, inquit, propius vero est, quod ceteri ajunt, propria eos lingua dictos Celtas, qui cum male C & E, quod etiam nunc faciunt, pronunciarent: nempe pro C, G, pro E, A, à Græcis Galatæ, à Latinis Galli sunt dicti: quid autem Celtarum vox eorum lingua significaret, incertum est, cum ea prorsus exstincta sit, Romanaque nunc Galli utantur. Hæc Alciati (inquit Adrianus) interpretatio longe ingeniosior est, quam vera. Celtas enim ipse dictos crediderim, quod equo, curru, navigio vel oblectentur, aut valeant plurimum. Legre est enim apud App. Alexandrinum,

C. Cæsarem usum maxime equitatu Celtico, cui Volusenus Quadratus præerat. Κεληπίζω enim equum exagito significat, vel curru, aut navigio decerto, aut vehor. Κέλως, ἢ κέλῃς, præterea equum, curru, navigium notat: hinc Κέλῃται, hoc est, equites, dicti sunt.

Quid mihi (inquit Jovius) Græcos objicis? cum Celtas ipsi à Celto Herculis filio appellatos putant. Audi super hac re Parthenium Phocensem: Λέγεται, inquit, ὅτι ἡ Ἡρακλέα ὅτε ἀπ' Ἐρυθίας τὰς Γερύωνες βῆς ἤγαγεν, αἰωόμενον δὲ τὸ Κελτῶν χωρὸς, ἀφικέσθαι πρὸς Βρεταννόν. Τῷ δ' ἀρὰ ὑποάραχεν θυγατέρα, Κελτίνην ὀνομα. Ταυτὴν δ' ἐρεσθείσαν ἡ Ἡρακλῆες, κατακρύψαι τὰς βῆς, μὴ θέλειν τε δοσθῆναι, εἰ μὴ πρότερον αὐτῇ μιχθῆναι. Τὸν δ' Ἡρακλέα, τὸ μὲν τοι ἡ τὰς βῆς ἐπεγρόμενον ἀνασώσασθαι, πολὺ μάλλον μὲν τοι τὸ κάλῃς ἐκπαλαῖσαι τὸ κέρως, συλῆρόσθαι αὐτῇ. Καὶ αὐτοῖς γρόνος παλῆναι, ἡνέσθαι παῖδα Κελτῶν, ἀφ' ὧν δὴ Κελτοὶ προσηγορεύουσιν. Id est: Ferunt Herculem cum ab Erythia Geryonis boves abduceret, per Celtarum regionem penetrasse, ac pervenisse ad Britannum: cui filia fuerit, Celtina nomine. Eam autem Herculis amore incensam occuluisse boves illi, neque reddere voluisse, nisi prius cum ea coiret. Herculem autem boves suas recipere cupidum, multo vero magis puella forma concitatum, cum illa coivisse: natumque eis post temporis revolutionem filium nomine Celtum, à quo sane postea Celta sunt vocati. Vide quam fabulosa, & homine gravi minime digna hæc Græcorum opinio. Sequamur igitur Cæsaris definitionem, qui in liminari pagina Commentariorum statim scribit, hos populos ipsorum lingua Celtas, nostra, id est, Latina, Gallos vocari. Quod autem Celtas dicat Alciatus mutatis quibusdam literis vocari, mihi plane non arridet. Sed Galatas à Græcis dictos magis putarim propter lacteum gentis colorem: γάλα enim eis est, quod nobis est lac: à quo nomine Latini Gallos deflexere. Id quod innuere aperte videtur iis versibus Virgilii †:

Galli per dumos aderant, arcemque tenebant
Defensi tenebris, & dono noctis opaca.
Aurea casaries illis, atque aurea vestis,
Virgatis lucent sagulis: tum lactea colla
Auro innectuntur: duo quisque Alpina cornuscat
Gasa manu, sentis protecti corpora longis.

Quod Κέλῃται dicantur equites non contendo: sed Cæsarem sequor, qui ait, Gallos ipsorum lingua Celtas appellari. Si ipsorum lingua, ergo non Græca: nam alia fuit Gallica lingua, alia Græca: cum Cæsar in alloquendis Gallis interprete uteretur. Et Servius in expositione illius versus Virgiliani * Tum sciat aerias Alpes, dicit, à Gallis altos montes Alpes appellari. Item in carmine illo Aeneidos †, Direptumque ab equo dextra complectitur hostem, dicit, quod Cæsar lingua Gallica significat dimittere.

† Aeneid. lib. vii. v. 657. & seq.

* Georg. lib. i. v. 474.

† Lib. xi. v. 743.

C A P. II.

Insubres unde dicti?

SATISFECISTI, ut ipse arbitror, inquit Hermias Landus, qui proxime Corbetem stabat, Adriano: nunc velim, postquam typus es factus, in quem tela infantiae nostrae conjicere possumus, à te scire, cur Insubres appellemur?

Præstantiorem laude me potuisses invenire, inquit Jovius, qui hæc clarius exponeret tibi: verum ne videar tibi nolle obsequi, audi quid de Insubribus sentiam: Ἰνσέβαρες, inquit Suidas, ἔθνη Κελτικὸν πρὸς τὸ Πάδω, ἔς δὲ Ἰνσέβαρες φασίν. Id est: *Insubres Celtica gens ad Padum, quam etiam Insubres vocant.* Secutus est autem (ut puto) Dionysium Afrum, qui Gallos Cisalpinos inter Celtas connumerat his verbis:

καὶ δώματ' ἑλκτῶν,
Ἀρχοῖσι πηγαίων καλλιρρόων Ἑλκτανοῖο.

Hoc est, ut interpretatur Rhemnius Fanius, non autem Priscianus, ut omnium ferme est opinio,

post hunc est Celtica tellus,
Eridani fontes contingens rauca fluenta.

Suidas ergo, ut videtis, & Dionysius Celtarum gentem etiam ponunt in Italia. Insubres autem inter Celtas. Polybius etiam Insubrum meminit, eosque Italos facit: Ἰνσέβαροι ἔθνη Ἰταλικὸν, id est, *Insubres gens Italica.* Eos autem dictos existimarem quasi *subimbres*, quod imbribus subjaceant. Facillime enim propter Alpium rigores, & Meridianum teporem pluvialibus aquis exundat: præterea quæ hoc Insubrum tractu fluminibus, & euripis, ac lacubus, regio copiosior? Qui item putarent Insubres per ἀντίφερον vocatos, quod imbribus, quibus omnis naturæ vultus oppressus est, superfuert, omnino non errarent. Sic & Græci Umbrios dixere, qui à nobis Umbri dicuntur, quod inundatione terrarum imbribus superstitites existerint. Plures etiam scribunt Insubres appellatos esse, quasi fastosos. Quod apud Græcos legatur ὁ σέβαρος ἢ ὑπέροφρος ἄνθρωπος, hoc est, *superciliosus & superbus homo.* Deinde ut sonus plenior ad aures veniret, additum est inter ο & σ, ν, & sic Ἰνσέβαρες sunt vocati. Inter Insubres & Romanos (ut obiter aliquid dicatur extra terminos) olim fuere bella acerrima, in quorum compositione reperio inter cæteras pacis conventiones ictum fuisse hac conditione foedus: Ne Romani civem ex Insubribus aliquem reciperent, neve Romanum Insubres. Hujus rei meminit M. Cicero in *Oratione*, quam habuit pro Corn. Balbo, cum inquit: Etenim quædam foedera exstant, ut Germanorum, Insubrum, Helvetiorum, Iapidum, nonnullorum item ex Gallia Barbarorum, quorum in foederibus exceptum est, ne quis à nobis civis recipiatur.

C A P. III.

De Cenomanorum origine.

LVCULENTISSIME unde Insubres, inquit Cribellus, dicantur, Benedicte, declarasti: nunc cur nobis vicini Brixienfes Cenomani, & Bergomates cum Comensibus Orobbii nominentur optarem scire.

Cenomanos, inquit ille, putat Zanchus quasi Cycnomanos à Cycno videlicet Rege, quem constat in hac Gallia, quæ à Pado ad Alpes vergit, regnasse, nomenclaturam sumpsisse: ut auctor est Pausanias in eo libro, cujus est titulus Εἰς τὴν ἑλκτικὴν ἀρχαίαν, cum inquit*: Κύκνον Ἑλκτικὸν πρὸς τὸν ποταμὸν τῶν Κελτικῶν βασιλεύσαν, id est, *Cycnon apud Celtas, qui trans Padum sunt, regnasse.* Sunt igitur, qui dicant à Cycno Brixiam conditam fuisse, Catulli carmina illa † adducentes:

* In *Atticis*, cap. xxx.

† *Epigramm.* LXVI 11.

A

At qui non solum hoc se dicit cognitum habere
Brixia Cycnea suppositum in specula.
Flavus quam molli percurrit flumine Mela
Brixia, Verona mater amata sue.

Ajunt enim Phaethontem ex Libya in Italiam solvisse, applicuisseque ad Ligures, & ibi condita Genua Apenninum transcendisse, hancque Cisalpinæ Galliæ partem invasisse colonis vacuam. Accidisse item eo regnante maximum incendium per Italiam, & maximum calorem subsecutum: hæcque aeris intemperie Phaethontem è vita excessisse, hinc esse locum fabulis datum, quod in Eridano sit submersus, & Heliades ejus sorores in alnos, sive, ut alii volunt, in populos esse conversas: ut legimus apud Dionysium Afrum iis carminibus:

Οὐ ποτ' ὅππ' ἀπὸ θεοῦ χοῆσιν ἐρημαίῳ ἀνὰ νύκτα
Ἡλῖαδες κόκυσσαν ἐδυρόμεναι φάεινον.
Καὶ δι' ἣ Κελτῶν παῖδες ὑφ' ἡμέρας αἰγείρεισι
Δάκρυ ἀμέλχοντι χεῦσαι νότον ἡλέκτροιο.

Quæ sic interpretantur à Rhemnio Fanio:

Hic Phaethonta suum chara luxere sorores:
Hinc electra legunt alnis stillantia Celta.

Verum cum hæc Fanii interpretatio non perfecte Dionysii sententiam exprimat, laborem attulit, hos non versus modo, sed & superiores interpretanti. Post hunc sunt Celtæ usque ad fluenta Eridani. Ubi dicunt Heliades sorores dolore compulsa Phaethontis fratris occasum adeo luxisse, ut mortuæ omnes in alnostandem arbores lachrymantibus adhuc conversæ sint, earumque lachrymas ab ipsis Celtarum puellis, quæ circumhabitant loca, sæpenumero emungi: cum in * aurem electorum vertantur, & tanquam lapides durecant.

Fuit vero Phaethon (ut revertar ad prima) unus ex nepotibus Noe, quem sermo est in Italiam ab illuvione aquarum venisse, appellatumque Janum à vino, quod primus invenit: vinum siquidem Hebræi [†] *jain* vocant. Subsecuta deinde secula, postquam & picturæ & sculpturæ in medium venerent ingenia, bicipiti fronte Noam effigiarunt. Una quæ esset cano capillitio, & barba veneranda, quæ ætas ante aquarum exundationem transacta indicabatur. Altera rursus quæ esset florentis juventutis, futura tempora prospectabat. Huic rei ad stipulatur Athenæus Dracone Corcyraeo auctore sane probato referente; cujus hæc sunt verba Latinitate à Leonico donata: *Celebris*, inquit, *fuit apud Romanos Deus, quem Patrem appellabant, & cui volentis anni adscripserant initia: fuitque coronarum inventor. Fama est autem bicipitem fuisse, ut & illa, quæ ante, & quæ post se essent, inspiceret. Ab hoc ipso & Janus fluvius, & mons in quo degere solitus fuerat, & appellatus. Nunc Janiculum vocant. Primus autem omnium coronam reperisse creditur: rates, & navigia, pecuniamque primus impressisse, & characteribus significasse. Idcirco apud Italos, & nonnullos Græcia, & Sicilia nummum signari mos erat: cujus ex altera quidem parte biceps facies viscebatur, ex altera vero, non eadem tamen semper modo, sed navigium sæpe, sæpe corna esset insculpta. Huic autem sororem Camisam nupsisse ferunt, ex qua filiam (ut scribitur) Olisthenam nomine suscepit. Postea majora clarioraque animo volens Janus, in Italiam navigasse dicitur: montemque nunc Roma propinquum habitasse, & qui ejus nomen in hodiernum usque diem Janiculum servat. Hæc ille. Nonne etiam credibile est Jonium, quasi Janium esse dictum? Quid præterea sibi vult in numismate navigium illud insculptum, quam arcam illam, quæ se ab aquis omnia submergentibus liberavit. Et Janiculam Italiam prius esse dictam refert Cato in *Originibus*.*

* Hæc verba proculdubio ab Impressoribus depravata sunt: & pro eis aureum electrum reponi debet; ut colligitur ex illis verbis Græcis χρυσαυγος ἡλέκτροιο.

Jan

Jano vita functo Gallum, cui Comero cognomen fuit, successisse quoque lectum est: à quo etiam Italiam mox Galliam esse nominatam. Et adhuc hæc pars nostra Gallia nomen servat, velut ætatis auræ præclarum monumentum. Et fortasse Transalpini Galli à nobis origines traxere: ut à Cenomanis Brixiensibus Cenomani in Gallia Celtica: qui hodie eorum lingua *Lemans* appellantur, Andegavenfibus proximi, & Rhedonibus versus Oceanum. Sic à Bojis olim populis ferocissimis, quorum nunc metropolis est Bononia, Boji in Transalpina Gallia Heduis vicini, quos hac ætate *Borbonenses* appellamus.

CAP. IV.

Gallus quid significat, præter omnium opinionem?

SED rursus redeo ad Jani nummisina, in quo navigium fuerat insculptum. Quo significari arcam diximus, qua Janus ab aquis vindicatus est. Id navigii Scythæ *gallim* & *gallerim* vocant: sic & *fluctus* Hebræi *גלל* *gallim* nominant, hinc Gallos, qui fluctibus non sunt oppressi: vel quod aquis oblectentur; aut quod navigio valeant; vel quod Gallorum regio maxime fluminibus irrigatur.

Hæc sunt (inquit Bonaventura) Cucullatorum mera insomnia: & profecto in tuam opinionem nullo negotio declinarem, nisi contigisset mihi ad Merulam Alciati epistolam super hac re scriptam inspicere: in qua hæc verba scripta esse memini: *An verisimile tibi sit, veteres Gallos nomine caruisse, & legationem ad Judæos in Syriam, tunc hoc in cælo prorsus incognitos, misisse nomina sibi postulatam? Non sunt hæc & hujusmodi Hebræa in albo reponenda: cum præsertim ad historiam conducere possint nihil, obesse vero plurimum. Hebræorum enim aque in scriptis ut in verbis sublesta semper fuit auctoritas. Gallos igitur interpretabor, sicut prius & Galatas, non autem aquis superstites.*

Quid est ergo (inquit Jovius) quod in Timæo apud Platonem legitur Solonem ab Ægyptio sacerdote his ferme verbis argui? O Solon, Solon, Graci semper estis pueri, nec quisquam è Græcia senex repertus est. In vobis juvenis semper est animus: in quo nulla sunt vetustatis reliquia, & nulla cana scientia. Nec mirum, quia apud vos multa, & varia hominum extinctiones exstiterunt: eruntque, aut ab igni, aut aquarum vastitate. Sic tempestate Phaethontis, in qua conflagrasset apud vos omnia: & sub Deucalione diversisque aliis temporibus aquarum illuvionibus corrupta fuisse omnia non prorsus est fabulosum. Fit enim longo temporum intervallo quedam cælestis orbis permutatio*, quam vel inflammationis, aut aquarum populatur injuria. Nilus vero ab hoc detrimento nos facit innoxios. Apud Ægyptios igitur monumenta sunt antiquissima, quæ apud vos, & alias gentes certis temporum curriculum cœlitus, & necessario immissa vastat illuvies. Idcirco posteritas & litteris, & musis prorsus orbat: quo fit, ut quasi juvenes sitis, & rudes, & præteritarum rerum penitus ignari. Auctoritas igitur Platonis, qui fuit naturæ privilegium, facit ut Hebræicis monumentis, quæ ab Ægyptiis ad eos fluxere, aliquando insistam: tametsi ea vitio det Alciatus, qui, ut mihi videtur, deus tuus.

CAP. V.

In Judæos invehio: de Longobardis & Gotthis historia.

QVid habent (inquit Bonaventura) obsecro Ægyptiorum, Hebræorumve scripta fidei? Quid

* Hujus rei causam præclare declarat Seneca Nat. Quæst. lib. 11. cap. xx. ex Berosi sententia, qui arsura terrena contendit, quando omnia sydera, quæ nunc diversos agunt cursus, in Cancrum convenerint, sic sub eodem posita vestigio, ut recta linea exire per orbem omnium possit. Inundationem futuram, quando eadem syderum turba in Capricorno convenerit.

A Berofus, qui pluribus, præsertim tibi, sacra est anchora? Quid demum Zanchi cuculla? qui Berofum sequitur & Megasthenem Persam: quorum auctoritas apud me est tanti, quanti sunt apinæ, tricæque. Quid Ponticus Virunius, qui Hebræus fere videri potest? Quid auctoritatis habet delira illa Hieronymi Gavardi cuculla Augustiniana? cui omnis argumentationis typus est circa Judaica? Audi igitur non me, sed Alciatum, cujus auctoritas hac in re mille cucullis anteposenda est. Is aliquando super Hebræicis delirantem fere Merulam his ad ipsum scriptis litteris arguit: *Viterbum, inquit Joannes Anninus, qui Berofum illum fabulosum commentatus est, quasi vita herbum, à delitiis videlicet herbarum: alii quasi vi Tibur, id est, parvum Tibur: quod in lingua Hetrusca (ut ipse somniat) vi sit parvum. Alii vi Thele à Thebano Hercule. Raymondus Marlianus quasi vita inermium. Blondus à vi turrium. Hermolaus Barbarus à vita Heroum. Vide quas nugas Merula. Ego lecto Desiderii Regis Longobardorum decreto, quo inquit, tria oppida Longulam, Vetuloniam, & Volturnam sub uno muro cingi jussisse, totamque urbem Viterbum appellasse: facile ad etymum Germanicum respexi: (erant Longobardi majores nostri Germani: imo, ut Corn. Tacitus attestatur, nobilissimi Germanorum, qui trucidatis Romanis & Gotthis Italiam omnem tenuerunt) Viterbum enim eorum sermone ampla structura significatur. Vides igitur, Merula, quam facile errent, qui aliunde quam a Longobardis Longobardorum oppidorum nomina deducunt: eos autem maxime errare credendum est, qui à maxime remotis gentibus rem trahant. Habent Hunni, habent Angli, habent Gotthi pleraque in Italia à se indita locis nomina, in ea enim diutius belligerarunt. At Judæi quas bellicas laudes ipsi possunt prætere? superstitiosa gens, & imbellis, & ad omnium servitium nata: adde quod & indoctissima. Exceptis enim sacris Bibliis, quæ ipsi invidia & livore in Christianos corrumpere, adeo ut satius sit eo in argumento commentaria Græca perlegere: nullius doctrina quæquam sua in lingua idoneum habet auctorem, non medicum, non philosophum, non historicum. Apage igitur recutitos hosce & sabbatarios, nec à majoribus nostris Longobardis desciscas, ut alienissimos sequare.*

B

C Potuisset (inquit Jovius) de Judæis Alciatus modestius sentire, & castius loqui. Possem, si daretur narrandi locus, super hac re Alciato, quem invito senatu, populoque grammatico, cognosco esse tuisimum, adversari: sed cum facile animadvertam tam longam verborum seriem ab auribus vestris non sustineri, illud Ciceronis pro L. Flacco pro Judæis tuo, Bonaventura, satisfaciatur Alciato: *Cum aurum, inquit, Judæorum nomine quotannis ex Italia, & ex omnibus vestris provinciis Hierosolymam exportari soleret, Flaccus sanxit edicto, ne ex Asia exportari liceret. Hæc ille.*

D Jam adscendit (inquit Corbetes) hæc vestra ad contentionem disputatio, idcirco ne tempus, quo nihil est pretiosius, his nugis conteratur, obsecro te, Jovic, ut sub compendio Longobardorum, & his priorum Gotthorum historiam nobis enarres: & an Getarum & Gotthorum eadem sit natio. Getas & Gotthos eosdem esse populos non dubito plurimis conjecturis adductus, è quibus duas aut tres adduxisse sufficiat vobis. Ælius Spartianus in Pertinace hæc de iis populis, quos vulgus Gotthos vocat, posteritati tradidit: *Helvius Pertinax filius Pertinacis dicitur joco dixisse, adde si placet etiam Geticus maximus: quod Getam occiderat fratrem, & Gotthi Geta dicerentur: quos ille dum ad Orientem transiit, tumultuariis præliis devicerat. Is Geta à fratre occisus, natus est Mediolani Severo & Vitellio Coss. VI. KAL. Junias. Aurelius quoque Prudentius Getas appellat, & eos ab Istro (qui aliis est Danubius) patrio venisse testatur. Idem quoque scriptum le-*

E

F

gisse

gisse vos puto apud Claudianum libro quarto decimo † his versibus:

*Aspice, Roma, tuum jam vertice celsior hostem,
Aspice quam rarum referens inglorius agmen
Italia detrusus eat, quantumque priori
Dissimilis, qui cuncta sibi cessura ruenti
Pollicitus, patrii numen juraverat Istri,
Non nisi calcatis loricam ponere Rostris.*

Gotthos enim intelligit, quos jam occupata majore ex parte Cisalpina Gallia Stilico ad Atheism in Veronensi agro, ad Pollentiam, ad Astartem fudit: ut lib. VIII. * idem Claudianus his versibus attestatur:

*Tu quoque non parvum Getico, Verona, triumpho
Adjungis cumulum: nec plus Pollentia rebus
Contulit Ausoniis, aut mœnia vindicis Aste.*

Transco ad Longobardos majores nostros: quibus ætas nulla bellaciores vidit. Quam rem si creditis minus, ne pigeat obsecro Cornelium Tacitum † audire: Contra, inquit, Longobardorum paucitas, ** nobilitasque plurimis ac valentissimis nationibus cingit, non per obsequium, sed praeliis, & periclitando tuti sunt. Audite idem Vellejum ††: *Fracti Longobardi, gens etiam Germana ferocitate ferocior.* Misnensium hodie regionem Longobardorum sedem antiquissimam fuisse plures volunt. Hos Tacitus Suevis attribuit, Westphalis alii, quod hos non procul à Rheno Ptolemæus ponat.

C A P. VI.

De moribus Cisalpinorum Gallorum.

NEMINI igitur sit mirum, si Cisalpini Galli & pacis & belli muneribus sunt idonei, quando tam præstantes progenitores habeant, quibus nulla gens est sub coelo æque ferocior.

Tunc subridens Bernardus Felicianus, Facies nos, inquit, Benedicte, insolentes nimis tanta origine. Qua longe Romanis feliciores sumus, atque etiam ipsis Hetruscis. Illis enim pastores è Phrygia, his autem Lydus Volfus principia existere. Verum Cisalpinis Gallis diversi sunt mores. Siquidem Alpinis sunt plane agrestes: qui altiora montium feri, & prorsus infociabiles: quales existunt, qui Vervascam circa Verbanum Vallem tenent: hi enim Troglodytico pene more Alpium cavernas subeunt, sparsimque per invia nemorum montanorum ritu ferarum vagantur. Qui vero ad lacuum vel fluviorum ripas jacent, ad fabrilis opera & agriculturam sunt idonei; ad vasa lignaria tornanda sunt solertes. Alpini habitudine corporis firmissimi, ad multam ætatem degunt, & quamquam senectute premantur, à laboribus tamen non nisi decrepiti abstinere. Errant autem plurimum sicut Nomades cum gregibus vel in suis, aut alienis, aut conductis pastionibus vigilias castrenses agentes, suppellectile ad Scytharum consuetudinem plaustrum vel equis imposita. Montanis multis, nisi quatenus in planiciem descendunt, aut in viciniam deflectunt, usus panis est incognitus. Vescuntur autem castaneis, lacte, caseo, & cæteris, quæ sua sponte dat terra, muneribus: reliqua gulæ irritamenta non novere. Horum mulieres quemadmodum & Jaxamatarum munia virorum egregie supplent, nec pugnam, si casus tulerit, viris admixtæ detrectant. Inter aquas victus est plurimis, dum navibus ultro, citroque merces convchunt.

Salassi, quos hac ætate Pedemontanos vocari audio, si per milites liceret, cuticulam studiose cu-

† Seu de Bello Get. §. 77.

• Seu de vi. Conf. Honorii, §. 201.

† De Moribus Germ. cap. XL.

** Lipsius juxta Farnesianum Cod. reposuit, nobilitas, quod; & mox cincti pro cingit.

†† Lib. II.

A rarent, ad munia belli prorsus inhabiles. Cæteri vero Galli usque ad Rubiconem ingenio tantum valent, ut illud ad omnia facile applicent. Corporis magnitudine sunt Italis proceriores, Gallis vero Transalpinis & Germanis inferiores. Quantum bello valeant, dicant, qui eos sunt experti aliquoties Itali. Fere tamen credibile est prodigiosæ staturæ homines hanc regionem genuisse.

Taceo quod Eustathius memoriæ prodidit de Lyge gigante in Dionysium Afrum, quem ait hunc tractum incoluisse: venio ad recentiora: tempore quo Ludovicus Sforcia rerum potiebatur apud Insu-
B subres, & Lebuos, cum Lambrus aquis extenuatus laboretur, pars calvaria, & dens magnitudinis immensæ repertus in fundo alvei. Dens primo marmor existimatus est, mox ossæ materia deprehensa est. Per eadem fere tempora (ut Georgius Merula, qui se vidisse refert hæc omnia, scriptum reliquit) eodem in fluvio dentes item duo, & os informe effossi fuerunt: quod non satis poterat discerni, armine fuerit, an coxendicis: nisi quod in extrema parte forma acetabuli inerat. Ex his ut Venetias deferretur Mauroceno Venetorum legato Bartholomæus Chalcus vir omnibus rebus ornatus, qui tunc à secretis erat Sforcia, unum tradidit.

C A P. VII.

Quibus eduliis & rebus abundet Cisalpina Gallia?

HABENT quinetiam (ut aliquid etiam à me dictum extra lineam) nostræ Cisalpinæ Gallia regionis singulæ suas dotes. Cereris enim copia feræ omnis tractus frequentissimus est, nullus tamen Lacmellino, aut Alexandrino anteposendus est. Rhætica vina, & quæ in Orobiis Insu-
D brum, & apud Novarienses sunt, fere paria in Italia tota non reperiuntur. Oleum Comense Venafrano non inferius est. Mella passim, iis exceptis duntaxat, quæ ad Alpes nascuntur propter castancarum folia, Hy-
D metiis, Hyblæis, Calyndneisque sunt similima. Cæscum quis sani intellectus Vestinum Novariensis, aut ei, qui intra Adduam & Ticinum sale duratur, comparabit? Quo adeo oblectatus est Antoninus Pius, ut eum pro usu Romam transferri curaret, ut his verbis Julius Capitolinus attestatur: *Cum Alpium casum in cœna edisset avidius, nocte rejectus vit; atque alia die febre commotus est.* Coturnicem regio habet nulla sapidiorem. Hoedos quoque Albracienfibus petulciores reperimus. Rosæ Mediolanenses commendatione Carini Imperatoris, quæ eas abusque Mediolano Romam vehi curabat, cæ-
E teris sunt gratiores, ut refert Fl. Vopiscus.

Quanta sit apud Insu-
E ad hominis victum pertinent, felicitas, indicio sunt superioribus temporibus exercitus Imperatoris Gallorum, Pontificis, Venetorum, & Francisci Sforcia non modo delitiis alti, sed nummis, per decennium & opibus prope ditati: quos profecto tota Italia, addite etiam si placet Siciliam, non sustinisset. Lanæ præterea fert optimas, de quibus scribit Strabo *: *Lanam vero mollem Mutinensis ager, eaque regio, quæ ad fluvium Scutanam pertinet, fert omnium longe optimam: hirtam vero Ligusticæ & Mediolanensis, ex qua bona pars Italia servitiorum vestitur. Mediocre autem, ea quæ circa Patavinum, ex qua preciosissima tapeta, & Gausapina fiunt. Mul-
F las Venetas Iliados B. Homerus extollit hoc carmine:*

Εἰς Ἐρετῶν ὄφειν ἡμίονον γένε' ἀγορπῶν.

Id est:

Mularum genus è Venetis quod robore præstet. Fructibus autem sic referta est Gallia, ut ponarium tota videri possit. Est & huic regioni peculia-

* Lib. v. Geogr.

ris arbor, quam betullam Gallicam vocant auctores, miro corticis candore: qua nulla ex plantis firmiores vasis vinariis circulos facit. Est & herba odoratissima, ea doctis est nardus Celtica, vulgo *lavanda*. Per Alpes item & Apenninum ex quadam arbore fungus enascitur, quod agaricum dicerem, nisi esset efficax minus. Ne Jovium vestrum aliquis tamen circa hæc sedulum, infanientem dicat: fecit hoc idem M. Varro, qui edulium genera in ea *Satyra*, quæ Περὶ ἰδεσμάτων inscripta est, celebravit his carminibus senariis:

*Pavus è Samo, attagena Phrygia,
Melica grues, hœdus ex Ambracia,
Pelamis Chalcedonia, murena Tartesia,
Aselli Pessinuntii, ostrea Tarentia,
Pectunculus Chius, helops Rhodius,
Scari Cilices, nuces Thasæ,
Palma Ægyptia, glans Iberica.*

Fecit hoc etiam Plutarchus, apud quem celebratum invenio fumen & fungos Italiæ, placentam Samiam, nivem apud Ægyptios. Præterea si mihi vitio dabitur non Varronem & Plutarchum, sed Pollucem quoque damnabit celebrantem Tyrium thymum, cestreum ex Scyatho, hœdum ex Melo, conchas Pelorinas, teutlon ex Ascra, galeum Rhodium, ctenen Methymnæum, psetas Eleusinas, apuas Phalericas, tryglas five mulos ex Ionia, anguillas Boeoticas, caseum Cythnicum, salem Tragæum, rapa apud Mantineam, fabas Ægyptias. Strabo quoque in Ascalonensium tractu præcipuas capas gigni memoriæ prodidit. Sed quid hæc? tanquam non pollicitus sim dicturum me aliquid extra lineam vobis.

C A P. VIII.

De Lapidicinis.

QVANTO (inquit Felicianus) intervallo opinionem de te meam exsuperas? nunc ego te Varroniano illo Tricocle præstantiorem puto: & tantum cæteris præcellis ingenio, eruditione, quantum (ut inquit pastor ille apud Virgilium*) *lenta solent inter viburna cupressi*.

Tibi sunt (inquit Jovius) hæc laudum adscribenda præconia. Quis est enim hac ætate, qui litteras proficitur, vel felicissime, vel jejune, cui non sit cognitus Felicianus? Verum ne ab his adagio illo, quo ajunt *Mulos mutuum scabere*, inuramur: quod horum magis satisfaciatur palato. Non vanum erit igitur huic nostræ fortasse narrationi immensas naturæ opes intra almæ parentis viscera reconditas annectere. Quas hominum ingenia ad luxum potius, quam ad utilitatem exquisivere. Sed quo fato id eveniat mali, prorsus ignoro: ut majores nostri de iis jampridem, & sæpe conquesti sint, & de nobis posteritas conqueratur.

Hæc, ô Benedicte candidissime, (inquit Felicianus) reprehendi à nobis, quam emendari magis possint: fatius fuerit, omisis his temporum querelis, quamprimum, quod pollicitus es, absolvere.

Qui hanc nostram (inquit Jovius) Cisalpinam Galliam Bramantius senior, singularissimo & absolutissimo vir ingenio, perlustravit, carbunculos (quos ante ipsum sola mittebat India) Divi Galeacii Sforcie patrum fere nostrorum memoria Insulbrum Ducis effodit: ut morosissimarum mulierum desideriis obsequeretur. Hos argentarii Mediolanenses Rocchæ novæ Rubinos nominant. Clariore sunt Orientalibus, & summa cum difficultate è saxo cælis evelluntur. Unde sæpenumero impenfa major est, quam lucri accessio. Mons, ubi exciduntur, ultra Bilitonem est recta tendentibus ad Leopontios, non procul ab Abia-

* Ecloga 1. v. 26.

A/sco, qui pagus est, ubi Leopontina vallis Bre-gnanæ conjungitur.

Gemmas ordine sequuntur marmora ob quandam pene similem materiam, nisi quod hæc terrea sunt magis. Hæc duobus in locis prope Athisonem, Candia videlicet & Ornovasci, candida excavantur. Speculare marmor, quod est nigrum, à Romanis Luculleum dictum, in Novariensium Alpibus effoditur juxta Lacum Ortæ. His marmoribus usque ab anno MCCCCLXXXVI. Mediolanenses Deiparæ Virgini templum, quod altitudinis fastigio, quanquam adhuc imperfectum, transcendere nubes videtur, construunt. Quod absolutum evincet omnino, quæcunque sub sole sunt hominum manu facta miracula. Alterum similiter matri Partheniæ, quam ad Celsum vocant, in suburbis construunt: cujus aspectus pulchritudinem olim posteritas mirabitur. Silices, quibus cœnosæ viæ per Insulbres sternuntur in urbibus & oppidis ultra Angleriam, Buzirates vicus copiose subministrat.

C A P. IX.

De euripis duobus, è quibus unus à Ticino, alter ab Addua Mediolanum deslecluntur.

E Ticini decursu per cc. ferme stadia Majores nostri inedia averruncandæ (vocalis utor Catonianis) consulentes labentem perniciosissimo impetu euripum usque ab Beatum Insulbrum oppidum munitissimum, mox veluti festum Mediolanum intra urbem ipsam deduxerunt, anno à Virgineo partu MCLVII. per tempora Martini Turreniani, qui mox inter Insulbres primarias partes obtinuit, ubi egregie Senatorem Romæ egisset. Navigium à navium copia ultro citroque commeantium semper vulgus appellat. Utilitatem, quæ hinc emanat, cum ob rerum fere omnium copiam, tum ob salubritatem aeris, oratione quis amplecteretur? Hinc enim piscium sunt vivaria frequentissima: hinc per hortos Nili derivantur: hinc sub ipso limine Nereidum chorum habent Mediolanenses adludentem. Non qualem Veneti, aut Genuates aspiciunt, insuavem scilicet & aspectu ipso formidabilem; sed qualem Ticinus emittit, blandum videlicet, & amœnissimum. Perfrui mini ergo Mediolanenses aspectu Nympharum pulcherrimo, & Napearum coetu florentissimo: & hac ætate præsertim navigio addito ex Addua altero, quod alterius aquarum sæpe penuriam excipit. Id cum Sforcie Francisci primi liberalitas sub Triccio oppido munitissimo excavarit, gloriam ipsius, donec fluat, attestabitur: per quem multifaria merces ex Orobiis proximis, Cenomanis, & Venetis in urbis fere umbilicum devehitur.

C A P. X.

De idiomate Gallorum antiquissimo.

QVIETIS venia merito daretur (inquit Cribellus) tibi, nisi solus nos torqueret articulus: quem ubi absolveris, tam tibi debebo, quam qui maxime.

Quid magis antiquius est (ait Jovius) mihi, quam amicorum votis obsequi? tibi præsertim, qui ob singularem animi candorem & litterarum politiam es mihi carissimus.

Diu (inquit Cribellus) hæsitavi, & adhuc in eadem verfor rota, qui fuerit majoribus nostris sermo: hæsitantiam faciunt plures Græcorum vocalæ, quibus materna lingua utimur, ne illi Græce locuti sint.

Puto (inquit Jovius) ante Romanorum tyrannidem ambabus idioma Galliis fuisse commune, cum propter originem, tum propter viciniam. Græculas voces in hanc regionem per tempora C. Cæsaris

transcripti Comum in coloniam Græci attulere. Quod nobis à cæteris Italis sermo diversus existerit, declarant quædam vocum apud probatissimos auctores reperta discernicula. E quibus exempli gratia vobis pauca dixisse sufficiat juxta Virgilio illud, *Aneid.* 11.

— & crimine ab uno
Disce omnes.

Acorus radix est notissima, eam Romani radicem nauticam vocabant, Galli vero majores nostri piper aqueum. Ploxemum, cujus meminit Catullus, Transpadanis Gallis capsa fuerat. Sic asarum radicis est genus; sed Latinis perpenſa, Gallis bacchar. Virgam similiter Galli dicebant, quam purpuram alii: ad quod significatum in octavo *Aneid.* Virgilius alluſit, cum inquit:

Virgatis lucent sagulis.

Argemonam quoque herbam scitis esse, Romani tamen eam concordialem, & Galli coronam vocabant. Nobis item suibetes herba fuerat, quæ Romanis sylvæ mater, & Græcis *chrysocarpos*. Item qui nobis est equus, majoribus nostris erat marca: & actum ipsum equitandi materna lingua adhuc *marchiare* dicimus: unde Marcomani populi sunt dicti, quod equo, qui *marca* dicitur, aut valeant, aut oblectentur.

Non audiret te (inquit Bonaventura) vir doctissimus Vadianus: Marcomanos enim putat vocatos Germanice, quod *Mark* Germanorum idiomate *limes* significatur: unde Marchiones, qui ad tuendum Imperium Romanum cum militibus adversus barbaras nationes limitibus præerant, dicti sunt.

Plurimi (inquit Jovius) est apud te Vadiani auctoritas, major apud quoscumque tamen Pausaniæ: apud quem hæc legisse aliquando contigit: τὸ πρῶτον ἀνὸς μαζόν τὸ σύνταγμα Τεμαχιστίαν τῇ Ἀπικωρίῳ Φανῇ. Καὶ ἵππων τὸ ὄνομα ἴσω τῆς Μάρκων ἐν τῇ ἐκείνῃ Κελτῶν. Hæc ille. Vides ergo, Castillione, an Vadianus fallatur, an ipse decipiar. Ex his igitur liquido satis constat, non fuisse majoribus nostris cum cæteris Italis idioma commune. Nunc, postquam muneri ipse meo pro virili satisfecerim, obsecro vos, ut vestra omnium gratia tacere liceat mihi.

C A P. XI.

De magnificentia Mediolanensis Urbis, deque nonnullis scitu dignissimis Gallorum Cisalpinorum gestis.

HÆC cum dixisset Jovius, manu mento supposita quiescebat. Tunc Felicianum omnibus intuentibus, inquit Castillioneus, Optarem, Feliciane candidissime juvenis, ut urbis nostræ, quando hæc nobis liceant minus, præconia diceres: horum omnium silentium te loquentem expetit: in te uno nostra nunc vota suspensa sunt.

Utinam (inquit Felicianus) ea in me sit ingenii felicitas, qua possim & desideriis vestris satisfacere, & existimationi apud vos meæ. Quamobrem vestrum fuerit munus, cum dixero, si in parte aliqua declinatum erit, vel me venia dignum existimare, aut tumultuario sermoni adscribere. Cæterum, ne à vestrum aliquo noter, ea tantum, quæ sunt in ore omnium, vel quæ ipsi vidimus: iccirco attendite. Maxima semper fuit apud quascunque nationes Gallorum Cisalpinorum & auctoritas, & virtus formidolosa: invenio siquidem in Græcorum monumentis ad Alexandrum Macedonem, quem ob res gestas Magnum cum cæteris auctoribus appellamus, Gallorum Cisalpinorum legatos hospitalitatis & amicitiae gratia venisse: fuisseque

† In Phocis, cap. xix.

A in convivio, quo omnium fere gentium oratores acceperat, à Rege potentissimo interrogatos, *Quidnam esset, quod Galli maxime timerent*: tunc præter omnium opinionem respondisse, *Aliud, inquam, nihil, Rex præstantissime, quam ne supra nos cælum, aut Alpes ruant*. Quod responsum omnino fefellit animum Regis, cum esse se, quem formidarent, dicturos opinantis. Quibus verbis credibile est Alexandrum de Bello Galliis inferendo, quæ talium virorum essent alumna: sed per ea tempora contra Hetruscos, quorum opes terra marique late patebant, in armis erant: qui XII. urbibus conditis in Cisalpina Gallia universam Italiam tyrannide premebant. Nullus enim Rex citra eorum auctoritatem crebatur. Itaque cum per eisdem Romulus Rex declaratus esset, captata Mithridates Ponti Rex occasione Romanos appellavit Hetruscorum vernas. Hos tamen quanquam potentissimos Galli Cisalpini non suis modo finibus ejecere, sed in eorum agro bella gessere, omnique dignitate & imperio privarunt.

B Profligatis Hetruscis, pacis impatiens & ferox populus in finitimos Venetos, & Medoacos, arma convertit: eaque diu exercuit vario Marte. Cumque horum arma contemptui haberentur, utpote qui essent Paphlagonες ejecti, in Hetruscos rursus Duce Brenno omnem belli impetum centulere, cum essent ab Arunte quodam ad id facinoris excitati. Clusium ergo tunc Hetruscorum metropolim cum majores nostri obsiderent, supervenere Romanorum legati, quorum auctoritate sedari possibile bellum Tusci putabant. Verum cum res non succederet, aperto Marte Hetrusci Gallos aggressi sunt, quo in prælio cogniti sunt Romanorum legati. Clusio igitur relicto, Romam infensissimo agmine petentibus, ad Alliam fluvium exercitus Romanus occurrit: quem cum Galli viriliter exceperant, fere ad unum Romani interiere, eaque dies inter nefastos relata est.

C Nec multo post defensoribus vacua, & capta, & incendio à Gallis Roma consumpta est. Hujus rei auctorem habeo Sex. Ruffum virum Consularem, qui hæc memoriæ prodidit: Galli, qui Italia eam partem tenent, ubi est Mediolanum, usque ad Rubiconem amnem, suis viribus freti Romam ipsam bello petiere, cassisque exercitibus Romanis ad Alliam fluvium, mœnia urbis intrarunt, Capitolium obsederunt. Ad cujus arcem sexdecim senatores nobilissimi confugerant, qui mille auri libris se obsidione redemerunt. Videtis ergo ab Insuſtribus urbem deletam: qui mox per Apuliam vagantes Gallipolim condiderunt: hinc solventes in Græciam delati eam fere omnem populati sunt.

D Annis post aliquibus rursus in Romanos Galli insurrexere: quo in tumultu T. Quintium Dictatorem, qui nisi desperatis rebus crebatur, factum reperio, cum jam Galli ab urbe ad tertium lapidem via Salaria trans pontem Anienis castra posuissent. Quorum timore & justitium indictum est, & juniores sacramento militari adacti. Tertius in Gallos Dictator fuit C. Sulpitius, M. Popilio Lænote & Cn. Manlio Coss. Post multas tandem acceptas, illatasque clades vix arma deposita fuerant; quando majora inter Gallos Romanosque bellorum incendia exarsere: siquidem reparatis utrinque exercitibus, ut si quando aliàs, acriter ad arma itum est. Et cum Galli in agro Latino castrametati essent, juniores rursus ad militiam coacti sunt dare nomina: quod scirent Gallicam gentem & bellacem esse, & ingenii avidi ad pugnam. Quo in certamine Consul vulneratus in Romanos fugientes hac oratione usus traditur: *Quid fugis miles? non cum Latino, Sabinoque hoste res est tibi: quem victum armis socium facias ex hoste. In belluas strinximus ferrum: hauriendus, aut dandus est sanguis.*

L. Vor

L. Volumnio & Ap. Claudio Coss. cum Hetrusci, Samnites, & Umbri in Romanos conjurassent, reperio ab iis Gallica auxilia fuisse mercede conducta, quod cognoscerent Gallos & bellaces esse, & nomini Romano infensissimos. Decio item Decii filio Cos. acerrime pugnatum est contra Romanos: quos cum Decius fugientes nullis aut precibus, aut minis retardaret, Diis manibus se devovit, M. Livio Pontifice adstante: confectum est hoc certamen in agro Sentino, non procul ab Esi fluvio. Hanc urbem Longobardi vastarunt.

Erant Galli cum ob viciniam, tum ob virtutem Romanis terrori: & tumultus Gallicus cum maxima formidine semper exceptus. Idem etiam Plutarchus affirmat his verbis in *Vita Marcelli*: *Faciebat id loci vicinia, & Gallorum dignitas: tanquam qui recordarentur se & ab iis ad Alliam casus, & urbe fuisse dejectos*. Peracto primo Punico bello cladium & stragis faces ex hujusmodi causa inter eodem rursus emicuerunt. Irruperant more torrentis per agrum Hetruscum Galli, Aretiumque acriter obsidebant. Romani Tuscis auxilium ferentes in pugnam descenderunt: qua in pugna, si alias unquam, Gallorum virtus enituit. Nam & exercitus ad excidium deductus, & interfectus est Consul. Cum vero pro redimendis captivis Rom. oratores Mediolanum venissent, contra jus gentium interfecti sunt. Itaque Senatus hujusce facinoris indignatione commotus, delectu per Italiam habito, bellum reparavit in Gallos, quod ad multos annos gestum Senonibus, qui proxime Italos habitabant, excidio fuit. Sunt qui scribant hæc ante primum Punicum bellum fuisse gesta: quod eo confecto subsecutum sit Illyricum: mox tumultus Gallicus. Hanc ob causam C. Flaminius ad populum legem tulit, ut ager, qui Senonibus adeptus fuerat per superiora bella, Romanis civibus divideretur. Id cum Boji intellexissent, qui Senonibus inhærebant, male ferebant hanc Romanorum viciniam. Super hac re igitur inter Cisalpinos Gallos conventus est habitus. Quibus in comitiis contentio omnis consumpta est refricandis injuriarum vulneribus antiquis & recentioribus.

Tandem post longam consultationem ad arma succlamatum est. His pactis Congolitanum & Aneræstem Reges eligunt: quibus summa totius rei commissa est. Hæc ubi Romæ nunciata sunt, varie trepidatum est, discurrentibus aliis ad portas urbis, aliis ad mœnia, pernoctantibus aliis in foro. Omnia certatim deferri in oppidis validioribus ab agris: ac si adfuissent pro mœnibus Galli, qui domo nondum signa promoverant. Accusari ab aliis Patres conscripti, & à nonnullis civium avaricia assiduis jurgiis criminari, & parum defuit, quin sævitum sit in belli auctores. Tanto igitur belli jam excitato incendio Consules per Italiam & proximas insulas habere delectum, parare arma, cogere juniores, vexilla præparare. Coacti sunt etiam sacerdotes, qui belli munere ex S. C. vacabant, ad militiam dare nomina. Romanorum autem formidinem vel apparatus ipse declarat: nunquam enim tot Italicorum millia fuisse in armis proditum est. Veniebant enim in mentem Rom. urbis incendia, exercitus ad Alliam casus, tot Diis sæpenumero adversis contra Gallos suscepta certamina; & hanc ob causam velut fatalem Romanis Citeriores Gallos formidabant. Sic in urbe & apud socios impigre delectus habebatur: & quasi non semel pugnandum esset, tot copiarum conscriptæ sunt, quot antea, nec post (quas ipse legerim) nunquam. Siquidem Polybius refert fuisse in Romanorum exercitu DCCC. & L. mil. peditum, equitum autem III. & CC. mil. Plinius DCC. ped. mil. equitum vero tantum mil. LXXX. fuisse attestatur. Et antequam copiarum proficerentur, sacrificii genus facere coacti sunt, Sibyllinis cedentes monitis, quibus

A continebatur, Græcos homines, totidemque Gallos marem scilicet & fæminam vivos oportere tumulari: cum antea Græcanico more pii ac mites rem divinam facerent. Itum est tandem cum iis copiis in Gallos, qui Hetruriam omnem ferro, flammaque vastabant: & diu vario Marte pugnatum est usque ad C. Atilii Cos. ex Sardinia adventum, quem cum venisse Galli cognovissent ex crebris ignibus per noctem, totis viribus in aciem descenderunt, ut extremam bellialem experirentur. Prævalebant virtute Galli, multitudine vero numerosiore Itali. Contra L. Æmilium Gesatæ, quibus mos erat, ut nudi pugnarent, cum Senonibus constiteret & Cenomanis: adversus C. Atilium cum Bojis, Lebuis, & Salassis Insu-bres processere, collocatis prius plaustris, & impedimentis, omnique præda in proximum tumulum cum præsidio. Cum duas (ut dictum est) frontes Gallorum acies haberent, non solum terribiles aspectu, verum & efficaces ad certamen fuere: verum Insu-bres cum Salassis & Bojis lunatis sagulis & torquibus aureis maxime interlucebant. Interea Gallis equitibus C. Atilium à tumulo arceret conantibus, pugnatum est nervis omnibus cum summa omnium alacritate. Quo in concursu cum Atilius Cos. in confertissimos cuneos pugnaret, ab equite Gallo hasta transfixus, occubuit: caputque hastæ infixum per castra delatum est. Hic ex morte Consulis major invasit Italos rabies, & rerum desperatio. Tandem fusa Gesatarum sagittis acie, ad cæteros Gallos omnis rerum difficultas rediit. Hic clamor, armorumque horror, hic equorum hinnitus, qualis antea nunquam, pro focus & libertate Italici, pro gloria autem & virtute pugnantibus Gallis. Sic omnis ferri experientia à fronte & à tergo vehementius insurgebat. Insu-bribus & reliquis Gallis nulla jam salutis spes validiores vires dabat: Itali vero nisi tunc cum tanto exercitu vicissent, nunquam posthac fore ut vincerent, arbitrabantur. Cœpere tandem Italicorum frontes pedem referre: quod cum Tribuni equitum inopessissent, ut sit in rebus proclamatis, procellam equestrem demissis hastilibus, & equis concitatis in Gallorum peditatum dedere. Tum demum turbati Galli, ac loco moti & repulsi sunt. Quanto animorum ardore tunc pugnatum fuerit, Polybius his verbis ostendit: *Hic tandem belli Gallici finis, quo nullum usque in hunc diem vel obstinatione animorum, vel militum audacia, vel atrocitate præliorum, vel multitudine interfectorum, vel numero copiarum majus, aut audivimus, aut legimus*. Hæc ille. Post hanc pugnam L. Æmilius Consul in Bojorum agrum cum exercitu venit, quo vastato Romam ad triumphum regressus est secum adducens Congolitanum ex fuga protractum. Aneræstes alter sibi mortem consciverat, ne foret hostibus speciosior triumphus.

Sequens annus Consules habuit Q. Fulvium & T. Manlium. Hi accepto exercitu Galliam ingressi sunt; Bojosque venire in deditionem P. R. coegerunt: qui cum cæteros Gallos adoriri, aut eorum regionem vastare proposuissent, crebris imbribus & oborta per exercitum pestilente pedem referre coacti sunt. Hos secuti sunt Consules P. Fulvius & C. Flaminius. Galliam itaque Flaminius aggressus est, Ananesque Gallos subegit: hinc Insu-bres invasit incensis Taurinorum agris: & castra metatus est eo in loco, quo Addua in Padum influit: ibi hac ætate Castrum est novum, pagus. Insu-bres ubi hæc intellexere, armata multitudine ad prohibendos Romanos venire: ibi crebris certaminibus fatigati Romani in Cenomanorum agrum se recepere: inde per superiora loca vagantes equites Orobios populabantur. Insu-bres itaque agrorum vastationem ægre ferentes ferro quam primum decernere statuerunt. Facto igitur agmine

quingenta hominum mil. & sublati vexillis aureis è templo Minervæ, tanto animi ardore Romanos aggressi sunt, ut vix ab oppugnatione castrorum primo adventu repulsi sint: paucis post diebus in ripis Abduæ commissa pugna superati sunt.

Tot cladibus attriti Insubres Romam pro pace legatos mittunt: quibus cum negata esset, rursus ad bellum se alacrius comparant: præsertim cum jam Mediolanum ex Transalpinis Duce Viridomaro armatorum triginta millia in subsidium superatis Alpibus accessissent. Consules erant C. Cornelius Merula, & M. Claudius Marcellus, qui acceptis copiis à prioribus Consulibus, Acerras inter Padum & Alpes urbem Insubrum obsidione cinxerunt. Insubres, quod auxilium obsessis ferre non poterant, propterea quod media quædam loca à Romanis tenebantur, parte copiarum trans Padum missa, Clastidium quod Romani præsidio firmaverant, obsederunt, rati ea difficultate coactos Romanos Acerras obsidione soluturos: eo igitur consilio Clastidium premebant. Romani bifariam diviso exercitu statuere obsessis opem ferre. Cornelio igitur onus injectum, ut curaret, ne Aceranis subsidium præstaretur: Marcello autem, ut Clastidianis opem ferret. Quem ubi Padum Galli trajecisse intellexerunt, Consuli obviam facti sunt: instructaque acie Romanos adoriuntur: ibique Ducis Viridomari temeritate sunt cæsi. Acerani autem virorum strage audita, urbem noctu deferre. Ita urbs Insubrum clarissima flammis consumpta est.

Ultra Linianum miræ celebritatis oppidum in ripis Oronæ pagus visitur, Acerris adhuc nomen est, cum adjacenti regione, quæ Acerrina dicitur. Hic fuisse vetustissimam Acerrarum Insubrum illam urbem puto. Vastatis Acerris Cornelius Mediolano copias admovit. Quod cum se capere posse desperaret, quod populi frequentia defenderetur, populato circum urbem agro copias reducebat. Iter facientem Insubres assequuti extremum agmen adeo egregie invasere, ut maximus timor ea in parte sit Romanis injectus. Conversis igitur signis Consul totis viribus Insubres aggressus est, maximamque eorum partem concidit: qui pugna superfuere in proximos montes aufugerunt. Cornelius re animadversa infesto exercitu Mediolanum revertitur: nactusque urbem metu perculsam, & defensoribus vacuum nullo negotio ea potitus est.

Quievire deinde Gallorum arma usque ad Annibalis adventum, à quibus & copiis novis auctum (fere enim omnem exercitum in transitu Alpium amiserat) satis constat, & ab his in Italiam accersitum, cum illi in animo esset per Narbonensem Galliam apertis Maritimis Alpibus in Ligures irumpere, illinc in Hetruriam. Novissime in Italia soli qui rebellaverint, in armis remansere contra Romanos pulso Annibale: mox cum Liguribus, quorum arma fere semper conjuncta fuere, vario Marte cum Romanis belligerant. A variis tandem cladibus in amicitiam Romanorum sunt recepti, privilegioque Latinæ coloniae Transpadani, Romanorum more loquor, donati.

Sævientibus deinde bellorum Civilium procellis C. Cæsarem sequuti totis viribus huic bello incubere, cæteris Gallis prope reclamantibus. Hujusce rei testem habeo Ciceronis *Epistolam ad Tironem*: *Delectus enim, inquit, magnos habebamus, putabamusque illum metueret, si ad urbem ire cepisset, ne Gallias amitteret, quas ambas habet inimicissimas, præter Transpadanos. Exstincto Cæsare contra M. Antonium insurrexere: libertatemque communem cum Republica Romanorum amplexi sunt: quod unice M. Brutum Cæsaris interfectorem colerent. Negotii hujus testis est Plutarchus: qui ait, Me-*

diolani statuam aeneam M. Bruti in foro conspectam ab Octavio: laudatosque Mediolanenses ab eodem, quod etiam in rebus adversis amicorum essent amici. Quod arma sumpserint in M. Antonium, auctorem habeo in Philippicis Ciceronem, apud quem hæc pridie legi: Quid Galliam? (de hac loquitur Citeriore, quam in M. Antonium D. Brutus armaverat) Quo tandem animo hanc rem audituram putatis? Illa enim hujus belli propulsandi, administrandi, sustinendi principatum tenet. Gallia D. Bruti nutum ipsam, ne dicam imperium, secuta armis, viris, pecunia, belli principia firmavit, eadem crudelitati M. Antonium suum totum corpus objecit, exhauritur, vastatur, uritur omnis, æquo animo belli patitur injuriam, dummodo repellat periculum servitutis.

Optarem in L. Floro, & aliis nonnullis scriptoribus, loquendi modestiam: qui ut cartas explant ambagibus, regiones aliquando citra verecundiam pro animi libidine plus æquo vel laudant, vel vituperant. Audite igitur quicumque estis ex hoc grege M. Tullium Philip. III. *Quodque Galliam Provinciam Citeriorem optimorum, & fortissimorum virorum, amicissimorumque P. R. civium refertam, exercitumque in Senatus potestate retineat. Verum, ne ebrium Ciceronem hæc putet dixisse aliquis, audiat eundem Philip. IV. Galliam totam hortatam ad bellum, ipsam sua sponte, suo quoque judicio excitatam. Hæc ille. Nunc quanta fuerit, & sit, hujus Galliæ Citerioris auctoritas, his verbis idem Cicero declarat Philip. III. Nec vero de virtute, constantia, gravitate Provincia Gallia taceri potest. Est enim ille flos Italia, illud firmamentum imperii P. R. illud ornamentum dignitatis, tantus autem consensus est municipiorum, coloniarumque Provinciae Galliæ, ut omnes ad auctoritatem hujus ordinis, majestatemque P. R. defendendam conspirasse videantur. Eundem rursus audi in V. Philipp. Galliæque quæ semper præsidet atque præsedet huic Imperio, libertatique communi, merito vereque laudetur, quod se suasque vires non tradidit, sed opposuit. Quod si uni Ciceroni fides non adhibenda est, audite M. Antonium apud App. Alexandrinum ita loquentem: Nam si à Celtis, inquit, abiero, neque hostis, neque Monarchicus dicar amplius. Idem cum à Senatu destitueretur, petit Celtarum Provinciam inter Alpeis residentem: quam D. Brutus obtinebat, mente scilicet repetens, C. Cæsarem ex Celtis prodeuntem Cn. Pompejum superasse. Senatus autem Celtarum gentem velut arcem in se præparari metuens, conturbari cepit.*

Ad hæc quibus copiis Ulteriorem Galliam C. Cæsar devicit, nisi nostratibus? Primo in Helvetios duas legiones conscripsit, quas per Ocellum cum tribus, quæ circum Aquilejam hyemabant, trans Alpes traduxit. Mox cum esset in hac nostra Gallia, intellexissetque Cæsar Belgas inter se datis obsidibus conjurare, nonne legiones totidem conscripsit ex nostris militibus? quos Q. Pedio legato in Ulteriorem Galliam deducendos dedit. Deinde cum Cæsar majorem Galliæ motum expectaret, per M. Syllanum, C. Antistium Reginum, T. Sextium legatos delectum haberet ab Cn. Pompejo Procos. petiit, quoniam ipse ad urbem cum Imperio reipublicæ causâ maneret, quos ex Cisalpina Gallia Consulis sacramento rogavisset, ad signa convenire, & ad se proficisci juberet.

Quid igitur oblatrat L. Florus esse nos nivibus nostris similes? quando hinc omnium firmissimus peditatus semper eductus sit, ad quancumque belli aleam semper paratissimus. Verum non deerunt ex vobis, qui mihi jam vitio dederint, quod in re sole clariore morer nimis. Transeo igitur ad facinus aliud, quod constat à quatuor tantummodo Transpadanæ regionis urbibus, cæteris Italis reclamantibus, patratum fuisse. Hyemabat circa Padum ala

ala Syllana: quæ cum ab Othone Imperatore nullo in pretio haberetur, cognosceretque Mediolanensibus, Novariensibus, Vercellensibus, & Hipporrhediensibus Othonis imperium grave videri, eos ad defectionem nullo negotio sollicitavit. Data itaque inter se fide, omnes in verba Vitellii absentis jurarunt. Atque hæc cum Vitellius intellexisset, maturavit ex hybernis milites movere, & in hanc Citeriorem Galliam proficisci tantarum urbium motus auctoritate, quas Corn. Tacitus *florentissimum Italia latus* appellat. Datas præterea à Senatu Romano literas in hanc sententiam reperio: *S. R. amplissimus Curia Mediolanensium ornatissima salutem. Ut estis liberi, & semper fuistis, letari vos credimus: creandi Principis facultas Senatui readiit: simul etiam Præfectura urbana appellatio universa decreta est. Valete.* Hæc autem litteræ ad Mediolanenses datæ functo vita Aureliano fuere.

Possẽ super hoc negotio vobis plura adducere: verum cum his recentiora domi habeantur per Georgium Merulam virum candidissimum declarata, fere usque ad memoriam nostram, videor mihi cum gratia etiam vestra possẽ me canere receptui. Hæc cum dixisset Felicianus, subticuit.

Tunc Hippolytus Maynus Augustæ Baciendorum Comes Petrum Candidum Vergeminatem oravit, ne gravaretur ea, quæ in laudem Mediolanensis urbis composuisset, recitare.

Cui Petrus, Turpe, inquit, mihi esset, Comes illustrissime, precibus tuis locum relinquere: Incipiam igitur, & si quandoque prolixior vobis visus fuero, date silentii signum mihi: nam senectutis hoc peculiare vitium est, ut sint sæpenumero plus quam deceat loquaciores. Sed nunc exordior, precor attendite. Admirabilis quædam res est eloquentia, & quam paucorum ingenia hucusque attingi potuere. Quamobrem nonnullos & graves & doctos viros scimus, qui cum parem rebus, de quibus verba facturi sunt, eloquentiam præstare nequeant, studio tamen & voluntate ducti ea dicunt, ex quibus non tam laudem meo iudicio, quam reprehensionem, sunt consecuti. Moderanda igitur voluntas est, & cohibendus appetitus, ipsique voluptatibus fræna injicienda sunt: nec solum quid possis, sed quid debeas, cogitandum. Ita te tuarum rerum pulchritudo delectet, ut nihil laude dignum te auctore in earum comparatione vilesceat. Nuper enim cum Leonardi Aretini viri in primis docti laudationem Florentiæ urbis lectitarem, non tam dicendi ornatum, qui uberrimus illi adest, quam sententiarum vim ac diligentiam admiratus sum. Tam luculenter enim & ornate scribit, ut nisi penitus attenderis, facile adduci queas, vera esse, quæ ab illo referuntur. Sed nihil est veritate præstantius: summa res eloquentia huic uni cedit, ab illa vincitur. Operæ precium itaque credidi omnem nostram huiusmodi laudatione sententiam meam vobis exponere. Nam cum bonarum artium studiis eruditi sitis, tum cum potissimum otii vacetis, quæ sunt nonnullam negotiis præferenda: æquissimum arbitror in omni re, quæ à nobis auspicanda sit, Deos præcipue faventis optari: cum id demum feliciter evenire credatur, quod divina ope fultum sit.

Itaque celeberrimi vates non sine digna commemoratione Deorum laudes in eorum carminibus prætulere. Leonardus item noster cum alia, tum istud in primis egregie, sed nihil neque luculentius, neque splendidius in toto orbe terrarum Florentia urbe reperiri posse, haud equidem assentior. Quippe voluntatem ipsius extollendam, facultatem vero quam amplissimam fuisse, erudita ac pollens ostendat oratio: quæ illi in exornanda urbe pulcherrima nequaquam defuit.

A Sed ut ad rem aliquando veniamus. Principio quidem magnæ prudentiæ existimo, nihil ad ostentationem facere, nec periculosa, ut idem ait, iactantiam sequi potius, quam tranquillam stabilemque commoditatem. At quo pacto Florentiam urbem id observasse cernimus? quæ inter convallibus quasdam sita, nec præclare se montibus ostendat: nec rursus expeditissimis campis objecta, eminus iter aperit: Vespertinus nempe viator longinqua sedulus prospectat hospitia, finem jam inde ingrati laboris autumans. Hæc autem convallium sylvestris opacitas non tantum urbium adspæctum eripit, verum etiam desperationem quandam adeuntibus videtur præferre. Quippe urbes summis in montibus collocatæ, tum ad aspectum magnificæ sunt, tum ad usum jocundæ. Extrorsum enim adspicientibus incolis lætissimos campos, viridissimos colles, amœnissimos maris tractus prospiciunt: nec est quicquam quod cum tali spectaculo conferri possit. Quid aeris salubritatem commemorem? Quid aurarum suavissimos flatus, sive æstivis temporibus Boreali rigore frigescere, sive hybernis australi tempore major calefcere? Ex quo summis in montibus habitare licet non solum, sive adversa coeli intemperie, sive habitatorum incommoditate atque molestia, quinimo cum summa jucunditate & gratia: sine ventis vero ac procellis nullam orbis regionem licet habitare. Adde quod ingenia his locis acutiora gignuntur, ut non infacete dictum sit, *Ex montibus sapientiam prodire: planiciem vero segetes largiri.* Sed illa profecto fortunatior sedes est urbis, quæ longe flumina, longe monteis excelsos prospicit, eorumque commoditatibus, quantum sat est, fruitur, incommoda vero non sentit. Quæ si ulla est in toto terrarum orbe egregie condita, ea certe Mediolanensium est civitas: sic enim in latissimis, feracibusque campis sita, montibus altissimis procul septa est: sic non longe decurrentium fluminum opportunitatem percipit: ut nulla nedum inveniri, sed ne utilius & commodius ædificata cogitari ullo modo possit. Nam per Deum immortalem, quænam est hac urbe præclarior? quæ populo frequentior? quæ ædificiorum magnificentia ditior? quæ denique viris, mulieribusque illustribus ornatior? videre licet alias urbes, quibus præter inanem quandam vicorum mundiciem, ac decorem, nihil adsit, quod cum minima hujus urbis commoditate conferri merito queat. Jam vero si aeris temperiem ac nitorem contempleris, facile adduci possis, Comes optime, nec alibi purius coelum, nec splendidiorẽ solem, nec astra magis fulgentia te vidisse. Ipsam autem urbem viridantissima planicies undique circumdat, tam frugifero, amœnoque æquore consita, tam glandiferis, opacisque nemoribus culta, tanta vitium ubertate lætificata, ut nihil aspectu pulchrius, nihil provenitu utilius, nihil ad animantium vitam accommodatius natura rerum omnium parens & alumna commenta videatur. Adde iis fontium perennes liquores, cursus amnium vitro lucidiores, pratorum viriditates, & camporum felicem, beatamque fertilitatem: tum volucrum copiam, ac ferarum: quarum studio venandi incolæ mira voluptate afficiuntur.

F Quid oppida in urbium formam deducta commemorem, ut Vergeminum, quod Viglevanum appellant, patriam meam? ut Beatum, Gallarate, Mortarium, Terdate, aliaque multa municipia, quorum frequentia hæc civitas sic undique munita est, ut nihil videri possit illustrius. Itaque cum pluribus in locis magnificæ urbes sint, ad quas visitandas multi mortales fama pulchritudinis allesti conveniant, cum plurima illis deesse conspiciant, adeo hujus urbis magnificentiam, ornatum, copiam intuentur, ut illas veluti famulas quasdam,

Hanc vero cæterarum dominam esse fateantur: sic omnium rerum magnitudine obstupefunt, sic templorum fastigia & ornatum conspicientes, pulcherrima admiratione satiari non possunt. Non enim urbs ejusmodi est, ut quæ optima & præcipua habeat, universa exponat ante oculos hominum inspicenda, ac veluti sollicita quædam meretrix superficiem solum curare cupiat, & culta nimis in publicum prodire: quod plerisque in urbibus fieri videmus. Cæterum ut diligentem matronam de-
 ret, cui dignitas magis peculiare bonum sit, hæc leviora haud multi facit: introrsus autem majora quædam, ac visu digniora domesticorum obtutibus reservat fruenda. Ex quo fit, ut cum eminus illius, ut ita dicam, vultum, cultumque prospexeris, minus formosa ac decens sit: tum vero si propius accesseris, omnia præ illius venustate vilesce-
 re, nec satis nativum splendorem habere videantur.

Quamobrem cum multa multis in partibus memoratu digna, aspectuque sint, nihil est ex omnibus hoc spectaculo pulchrius, nihil dignius. Quod igitur in omni re præcellentissima solet accidere, ut non facile sit exordium sumere, qua potissimum illius præstantiam recenseas, cum multa undique inter se quodam modo de dignitate contendere, & dubitationem asserre non minimam videantur. Id in hac urbe præclarissima exornanda, vel in primis mihi evenire sentio, ut quid prius, aut posterius expediam, non leviter addubitem, & ingenii mei periculum haud ausim facere. Experiendum tamen est, & quicquid studio & exercitatione dicendi consecutus sum, id omne in illius præconiis conferendum. At si parem vel ejus magnitudini, vel meæ potius erga illam voluntati eloquentiam præstare nequeam, nihil est quod deprecem, dolcamve. Nam & urbs ejusmodi est, ut ne à Cicerone, eloquentiæ principe, pro ipsius meritis satis digne commendari possit: & voluntas mea si minus laude, certe venia his primitiis digna est. Æquum est enim pro tam urbe celeberrima, quam in patriam mihi elegi, pro veritate verba facientem assensum promereri.

Unde igitur exordiar? an ut pictores solent? sic equidem existimo. Id erit quam aptissimum dicendi initium. Pictores enim cum pulcherrimas imagines student effingere, primum ideam quampiam excellentem ac venustam mente concipiunt, quod convenientissimum facto opus sit cogitantes, deinde stylo manus applicant, ac prius verticem, & ut ita dicam, vultum coloribus liniunt: subinde notas in reliqua membra distinguunt. Itidem nos cum præstantissimam urbem describere avemus, ab ipso veluti capite sumemus exordium. Id autem quale erit? puto equidem si rerum publicarum administrationem recensuerimus. Cætera vero quæ plerique magni existimant, templa, basilicas, porticus, theatra non pluris faciam, quam si quis imaginibus illis, de quibus paulo ante dictum est, bullas, limbos, fimbrias aut hujusmodi decora censeat addenda. Quippe ut proprii imagine utamur: sicut enim in homine ratio in primis suspicienda est, tum dignitas personæ, membrorumque æqualitas, sine qua pulchritudo esse non potest: sic vos civitatem, quæ optima futura sit, auspicantes, principio Reipublicæ curam intueri oportebit: tum civium dignitatem, æquitatemque vivendi, quæ membra sunt urbis: cætera quæ ad cultum pertinent haud multi putanda sunt. Unde fit, ut si qua urbs eximie munda & pulchra sit, reliquis vero destituatur bonis, non sit propterea huic, de qua loquimur, æquiparanda. Sed ut, unde sumpsit initium, referatur oratio, caput urbis & columen Reipub. est. Hæc quibus regatur legibus haud parum interest: leges autem & jura municipalia, quo-

nam à majoribus tradita sunt, haud ab re fuerit de urbis origine pauca præponere.

C A P. XII.

De origine Urbis Mediolanensis.

Satis constat Ambigatum Celtarum Regem, (ea pars Galliæ tertia habetur ex descriptione Cæsaris) cum jam grandior natu regnum propagare cuperet, Belloveso ac Sicoveso sororis filiis nova loca, novasque sedes eligere, ubi Dii auguriis dedissent, suasisse: assumptis regni viribus, ne qua gens extera advenientes finibus posset arcere. Ea gens populis abundabat: sedes antiquas destituere Bituriges, Arverni, Senones, Cenomani, Carnutes, Boji, Aulerci, Hedui. Tum Sicoveso forte Hercynii saltus obvenere: Belloveso autem Dii immortales felicius iter ostenderunt. Itaque per Tau-
 rinos saltus Alpibus in Italiam cum Cenomanis, Lebuvis, qui in Gallia Ulteriore Hedui alias dicebantur, & Bojis irrupit. Fusisque acie Hetruscis non procul à Ticino & Novaria Hetruscorum pago flumen trajecit: & cum in agrum, quem Insu-
 brium vocari intellexisset, forte pervenisset, omen secutus, quo itidem Hedui pagus vocaretur, urbem condidit, quam Mediolanum appellavit: ab urbe ejus nominis in Gallia ad littus Oceani, cujus meminit Strabo. Nostram vero hanc T. Livius Prisco Tarquinio regnante conditam, anno ante Romam à Gallis incensam ducentesimo, memor-
 riæ prodidit.

Ab iis igitur majoribus hæc urbs excellentissima sumpsit originem. Cæteras enim urbes aut pastores, ut Romam, aut profugi patriis sedibus, ut Tarentum, & Venetias condidere: hæc sola inventa est, quæ non agrestes, aut obscuros conticefecit auctores: verum Diis auspiciis clarissimam Regum Celtarum stirpem, & bellacium populorum, quos non arma Alexandri Magni, non Romanorum denique, si concordem animi Gallorum fuissent, subegere, præ se ferat.

Cæterum ut id, quod dicere instituimus, prosequamur. Utrum igitur Resp. unius consilio atque auctoritate, an plurium arbitrio aptius regatur, læpenumero quæsitum est. Siquidem Plato Atheniensis Philosophorum omnium (ut inquit Cicero) princeps quadrifariam principatuum species distinguit: unam honorabilem, quam Græco nomine *Timocratiam* appellat: aliam paucorum regentium *Oligocratiam*: tertiam *Democratiam*, hoc est, populare regimen: quartam vero *Tyrannidem*: quintam deinde his omnibus præstantiorem adjicit, *Aristocratiam*. Verum cum ea non secus ac phœnix quingentesimo semel anno, vel potius nunquam exstet, in præsentia omittatur. Et ad incepta redeamus.

Nulla igitur regnandi species potior visa est, quam *Timocratia*: ea nempe est, quam apud Laconas & Cretenses viguisse Plato asserit. Cum vir quispiam honoris, victoriæque avidus Principatum capit, non ut cuipiam violentiam, aut necem inferat, sed ut ingenue belligerando Remp. diligenter & egregie tuendo sibi laudem, patriæ vero utilitatem, pariat. Qualis apud Romanos L. Brutus, & multis ante nos seculis præstantissimi Reges: ut Bellovesus & Brennus hujus inclytæ regionis propagatores exstiterunt: qui non tam opum acquisitione felliciti, quam gloriæ & posteritatis memores, omnia post Rempublicam habenda censuere: ut hac ætate Carolus quintus Rom. Imperator semper invictissimus & felicissimus, qui anno ante hunc secundo Tunetum totius Africæ urbem munitissimam aggredi non dubitavit: qua expugnata tantam gloriam assecutus est, ut proxime nunc ad Deos

Deos accedat. Joannem etiam Galeacium Vicecomitem nominari scio vos intellexisse, cum quod Infubrum Dux primus fuit, tum quod illi *Virtutum Comiti* cognomen fuit. Ab hoc tanta in Remp. hanc merita exstant, ut dies me prius, aut vox tametsi ferrea esset, deficerent, quam dicendi materia.

Verum è multis, quo brevior fiam, unum subijciam, quod ejus Principis magnanimitatem, prudentiam, fortitudinemque posteris ostendet. Gessit hic Princeps bella quam plurima contra validissimas Italiae urbes. Nec tamen quispiam repertus est, qui consilio, potentia, opibus hujusce conatibus opponere, aut quæ animo conceperat, quominus ut exsequeretur, ullo pacto quiverit obfistere. Nempe cum adversus Florentiam urbem bellum gereret, quæ inter cæteras Italiae opulentissima quodam modo ac præclara habebatur; nec facile appareret ejus vim ac potentiam brevi posse profertere, cum undique Romanorum, Venetorum, & finitimorum auxilio tuta esset, nec propinquas solum, sed exterarum quoque nationes in bellum exciret, adeo virtute, diligentia, labore urbem sagacissimam elusit atque prostravit; nunc armis imminendo, nunc pacem ostendendo, ut quæ multis sæculis ferme toti Italiae par esse videbatur, nec modicis præliis posse superari, intra breve tempus pene ad excidium deleretur: nec se amplius tueri, aut rem suam incolumem servare, nisi sub Vicecomitis tutela & dignitate putaretur. Cæterum hæc uberius ab aliis tractantur, & nos suo loco nonnulla retulimus. Iccirco ad alia iis ampliora me recipio, quæ non minus Principum nostrorum magnanimitatem, quam urbis Infubrum vim, potentiam, excellentiam declarent. Puto ego multos mortales satis mirari, unde huic civitati tantæ opes, tantæ copiae, tanta denique omnium rerum facultas sit, quemadmodum tot per annos, & novissime diebus nostris gravissima tot bella sustinuerit: quam sæpe infestis hostibus & innumeris reluctata sit, & semper indefessa ac validior emerferit. Quis enim non merito his rebus tam præstantibus & dignis admiretur?

Sed hic omnis stupor apud eos est, qui urbis & opulentiam, & vires nesciunt, ejus magnificentiam nunquam inspexerunt, auribus non facile credunt. Ut enim ab Aristotele positum est, si qui essent illustribus domiciliis sub terra habitantes, cultis picturis, signisque pulcherrimis, quibus beatorum domus ornari consuevere, nec unquam supra terram exivissent, auditu autem & fama specimen ac decorem omnium, quæ hic visuntur, percepissent: nec facile his, quæ referrentur, fidem adhiberent. Deinde aliquo tempore patefactis sedibus in hæc, quæ incolimus, loca emerissent: cum repente cælum, solemque vidissent, tum terras, mariaque patentia: præterea volucrum copiam, ac ferarum, urbiumque multitudinem & ornatum conspexissent; profecto & earum rerum magnitudine obstupescerent, nec satis pulcherrima admiratione satiari possent. Ita si quis fortasse est, qui aliarum urbium ornamento aut amœnitate delinitus sit, hujus autem excellentiam prorsus ignoret, aut negligat: cum ad hanc tandem accesserit, ac prius quidem multitudinem populi lætissimam, urbis frequentiam, pulchritudinemque singularem inspexit: tum eorum, quæ ad victum hominum, cultumque pertinent, copiam simul, præstantiamque cognoverit, quot artes, quot inventa, quanta in hac omnium ubertas & decor sit, quot ditia & ornatissima templa, præclarissimæ regiae, antiquissimæ familiae, pulcherrimæ & delicatissimæ nurus, splendidissimi juvenes, nitidissimi equi, & insignia arma videantur: postremo totius urbis gratiam, nitoremque perceperit: nequaquam ab hac tam præ-

A clare bello, paceque facinora edita fuisse mirabitur, quinimo multo majora ab ea præstari potuisse: & ad orbis imperium adipiscendum idoneam potius esse censebit. At vos assuetudine quadam oculorum imbuti, ut in aliis plerunque sit, mirari desinitis.

Hic autem stupor, hæc admiratio urbem pervadenti ante oculos objicitur. Cum vero civitatem ipsam egressus sis, & singula diligentius contemplatus fueris, Dii boni quæ oppidorum frequentia? quibus plurimæ ex civitatibus Italiae longecederent: quarum nomina propter scriptorum commendationem celeberrima sunt. Quæ omnino apinæ, tricarque erunt, si nostratibus oppidis comparentur. Præterea quæ amœnitas? quæ demum delitiæ occurrent? quam multa videas, quam præclara, quam magnifica? Non enim ut de nive scribit Homerus cœlitus delapsam monte occupare, & colles, jugaque montium, & culta pinguis, sic hæc ædificia universos circum colles & planiciem occupant. Verum omnes Italiae urbes quasi quodam fato in unum locum convenisse videbuntur. Quippe Galliae Cisalpinæ oppida nequaquam cæteris æquanda sunt, quæ in aliis plerunque videre regionibus contigit. Verum pro vicis ditissima hic oppida, pro oppidis opulentissimæ urbes adsunt. Quota etenim apud Cisalpinos Gallos villula est, quæ non ejus ferme oppidi magnitudinem æquet, ex quibus exornari solet Italia? Quam enim habet Hetruria præter Florentiam, & Senas urbem, quæ nostris oppidis vel magnitudinem æquet, aut ubertatem? Signia urbs est, ut scitis, ultra Romam, cujus Pontifex est Laurentius Grana, vir litterarum candore politissimus. Ea in urbe nec tonsor adest, nec medicus, imo nec qui calceos conficiat, aut caligas: igitur pro porticibus gestationes hic cernas, pro viridariis constituta nemora, ac patentissimos terrarum situs cultos, quibus floridius nihil, nihil speciosius, jucundius nihil denique natura commenta videatur. Jam vero si cubicula, si triclinia consideres, quibus potissimum optimatum domus exornari solent, nihil est in urbe tam tersum, tam mundum, sic elegans, quod cum horum nitore, aut politia conferri queat: ita omnia apta, distincta, ornata intueare. Quamobrem quancunque in partem oculos admoveris, omnia nativo decore nitescere, & quasi lætitiâ quandam ex se videntur effundere; tanta villarum amœnitas, camporum beata fertilitas, nemorum, pratorumque viriditas undique refulget.

C A P. XIII.

De situ Urbis Mediolanensis.

E SED posteaquam dicendo hucusque progressi sumus, aliquid & de situ urbis dicam, initium ejus paulo altius repetendo. Enimvero Mathematicorum dimensionibus satis constat omnem terræ ambitum quinque Zonarum spatio esse distinctum, quarum primam solis ardore succendi, spatiosioreque cæteris ajunt esse: extremas frigidibus intensissimis inhabitatas, semper rigere autumant. Inter has autem duas interjectas esse, veluti medias: unam nos incolimus sub axe Septentrionis sitam; alteram vero ad Austrum protendi, ante patres nostros non satis cognitam, nuncita diutinis navigationibus Regis Lusitanorum oculis expositam, quam est hæc nobis Citerior Gallia. Sed ut quæ mihi sunt nota, prosequar: Hæc ubi habitamus, licet à frigore & calore media sit; non eadem ubique cœli tamen clementia & æquitate fovetur: quippe regiones, quæ Tropico Cancris sunt viciniore, ut Parthia, Armenia, Libya, cæteræque finitimæ, propinquiore semper calore torrentur. Quæ vero polis duobus

duobus sunt obnoxiae, frigoribus rigent regiones : & quæ his vicinae sunt, ut Germania, Albion, quæ nunc Britannia, Scotia, Thule, Dacia, Pannonia, Scythia, & quæ Riphæos montes gens habitat. Reliquæ intermediæ regiones velut ab utraque extremitate distantes temperatiore coelo, salubrioreque fruuntur. Cum igitur hæc Cisalpina Gallia in sexto climate, quod *Μεσοπέδιστος* appellatur, cui Mercurium præesse ajunt, remota sit ab æquinoctiali per *IV.* & *XL.* gradus, ambabus partibus fovetur, hinc Boreali frigore, istinc Australi æstu. Igitur velut regina montibus circumsepta, & gemino freto, Adria scilicet & Tyrrheno, ut amborum commoditatibus pro arbitrato gaudeat, incommoda nulla percipiat. Rite igitur Maro noster, decus immortale Cisalpinae Galliae, his versibus * hunc tractum celebravit :

*Hic ver perpetuum, atque alienis mensibus æstas :
Bis gravida fruges : & pomis utilis arbor.*

Situm nempe civitatis beatissimum reddit aeris salubritas, glebæ pinguioris ubertas, fontium, fluviorumque irriguitas, fructuum fertilitas, nemorum & pascuorum viriditas, jumentorum & pecudum fecunditas, quæ incolentium nutrimentum non levem præstant utilitatem. Hæc autem nostra regio hujusmodi fertilitate adeo nobilis est, ut non modo superiorem inveniat, sed ne parem quidem : ea præsertim quæ intra Sesitem & Adduam continetur. Oppidis tam frequentibus & pagis referta est, ut fere ad singula stadia diversoria reperiantur : præterea tam uberi solo est, ut populum, quem copiosissimum habet, sine aliarum gentium auxilio facile nutriat. Tantus est autem folius urbis Mediolanensis populus, ut tota Hetruria non tam numerosum habeat. Tanti autem populi in causâ est fertilitas, fertilitatis autem humor, qui ex tot annibus manat : toto præterea solo aquarum venis refudante. A superiore siquidem parte, quæ Martesana à bellicis incolis appellata est, Lario ab lacu Adduæ, & ab Alpibus alia fluenta decurrunt. Ab inferiori vero Ticinus aquarum nitentium agmine rigat Insubriam, à Verbano caput exerens : amboque diversis itineribus Eridano infusi fluviorum regi miscentur, eumque ad mare comitantur. Non injuria itaque Veteres Mediolanum inde appellatum putant, quod inter amnes media, veluti Mesopotamiæ regio, sita sit.

Dico ergo hanc Provinciam præ cæteris salubriorem & amœniorem esse : nec minus feracior solo præditam : tum his quæ ad humanum victum pertinent, feliciorem haberi : summaque Dei providentia Mediolanensium urbem in ea constitutam. Nec enim commodiore loco nostra hæc metropolitana civitas, Orientis & Occidentis emporium, ædificari potuit : quæ totius orbis regimen esset habitura. Nempe ut arces præcipiti fossa undique præcingi, & in eminentiore quodam urbis loco condi consuevere, ut regentis sedem, & ipsius caput urbis præ se ferant : sic Mediolanensium civitas altissimis septa fluminibus, altiore & tutiore provincia posita est, exindeque universas quasi inferiores urbes Italiae velut ab altissima specula prospicit : ita ut Italiae totius arx, imperii sedes, & reliquarum domina urbium merito appareat. Ab hac siquidem arma, ab hac equi, & quicquid bellici uspiam strepit, egreditur. Hæc sola est, quæ armatos Duces, lucidas equitum alas, peditumque catervas sistit in acie. Ut enim si quis magnam lanificii & mercenariorum copiam aliqua ex urbe continuo efferrî, hisque & eurrus impleri, & naves stipari, ac mari & terra convecari videat, facile & eam urbem mercibus plenam, multosque ibi lanarios, qualium copiam esse scimus in Florentia, incolere, statim eum lo-

* Lib. 11. Georg. v. 149.

A cum judicabimus esse mercatoribus refertissimum : ita qui Duces, qui exercitus, qui arma, qui equos, qui currus, signa, vexilla, & reliquam belli suppellectilem ex hac potissimum urbe prodire inspiciat, & toti Italiae formidinem incutere : nonne & armis, virisque refertam & ad orbis imperium adipsendum idoneam esse fatebitur ? Sive enim multitudinem populi consideres, nihil est in toto terrarum orbe frequentius ; sive pulchritudinem, nihil ornatius, aut ditius. Si vero quæ ad commoditatem vitæ pertinent putaris præferenda, quid est ex optimis ac necessariis rebus, quod ab Insu-
B
C
D
E
F

C A P. XIV.

De opibus & potentia Mediolanensium.

A T si rerum gestarum mavis, Augustæ Baci-
anorum Comes illustrissime, patriæ tuæ gloriam contemplari, nullam invenies, quæ bellorum magnitudine ac diuturnitate latius propagaverit imperium. Hæc veterum Regum sedes, hæc Imperii Romani firmamentum, hæc Italiae tutela : hinc illa immensa effusa sunt agmina, quæ non solum Hetruriam vastarunt, Romanorum exercitus ad Alliam obtruncarunt, mox incensa Roma universam Italiam peragravit, deinde Græcia depopulata, majorem Asiae partem ruinis & incendiis consumpsit. Florentiam autem Syllanæ fecis coloniam munditia vicorum, ædium lautitia non iis clarissimis monumentis insignem esse scimus : quæ quin vetusta & perornata sit, non equidem inficias eo : verum armis, viris, opibus ac gestarum rerum gloria cum Mediolano conferendam nullo modo censeo : nec hac ætate urbem Romanam : ex qua si sacerdotes, qui fere omnes alienigenæ sunt, ejeceris, cultoribus vacua remanebit. Tua autem hæc patria ejusmodi est, ut accessione gentium non augeat, & discessu haud minuatur.

Sed quoniam de tam excellenti ac præstantissima urbe breviter à nobis, & quasi cursim, hucusque pertractatum est : tandem, ut eximius inquit orator, alio vela facienda sunt, & quid in quaque re ejus præstantia maxime eniteat latioribus paulo verbis, & rationibus explicandum est. Jam enim de templorum ornatibus, ac regali sacrarum ædium splendore non ineptus disserendi locus relinquetur. Unde igitur dicere nunc exordiar ? aut quid in primis præponendum sit, haud facile intelligo. Velut enim si quis Helenam illam formosissimam eximii laudibus ornare cupiat : priusne nobilitatem generis expediet, quod Jove & Læda genita sit ; an pulchritudinem, quod à Venere præ omnibus formosior sit habita ; an virtutem, quod eleganter canere & psallere docta fuerit ; an ornatu corporis præstare contendat, quod purpureis, auratisque segmentis uti assueverit ; an leporem potius loquendi anteponat, quod ex ore narrantis suavitate quadam allekti penderent homines ? Hæc, inquam, si quis animo volutet, quid convenientius dictu sit, ignorat, ad eximiam pulchritudinem venustatemque demonstrandam. Sic ipse cum optimam ac pulcherrimam urbem celebrare instituerim, quæ in omni virtutis genere, laudisque præstantia cæteras anteeat, unde potissimum exordiar, ignoro. Nam & ipsa virtutum admiratio incertum me reddit, nec facilem deliberandi facultatem permittit. Ego tamen unde convenientissimum & aptissimum putabo, initium capeßiam.

Primum igitur, ut de opum ac facultatum copia dicere ordiamur, in quæ potissimum Reip. status inniti solet. Ubinam tu gentium urbem reperias, quæ tanta vectigalium copia abundet ? tot exercitus sumptibus suis alat ? Memini à viro
audi

audivisse me quaestorio, tot exactas ex hac urbe pecunias ad alendum per Leviana tempora exercitum, quot fere tota Italia, Venetiis duntaxat exceptis, posset exigere. Joanne praeterea Galeacio imperante apud Insubres legi quinquies & quadragies decies centena millia aureorum sine populi querela, & parvo admodum temporis spatio ab iis exacta, qui tunc quaestores erant: hujus tertiam totius summae Mediolanum impendisse, cum praeter Liguriae populos omnes ferme Italiae urbes, quae ab Alpibus inter duo maria Illyrium, Flaminiamque continentur, in ejus potestate essent: in Hetruria Pisas, Senas, Perusium, Assisium teneret, Bononiam possideret. At vero quae fere avi nostri videre, & in oculis fere nepotum versantur, nonne tamen incredibilia nobis apparent? unam hanc urbem tot per annos cum Venetis, Florentinisque de imperio certantem duarum validissimarum civitatum adeo impetum sustinuisse, & adeo omnes earum conatus flocci fecisse, ut audaciam non solum reprimeret, verum ad pacem ultro poscendam post longum ac difficile bellum impulerit. Hanc autem acta fuisse scire vos arbitror, eo tempore, quo Philippus Maria Vicecomes rerum potiebatur apud Insubres. Taceo Eccelinum Patavinorum tyrannum cum innumero exercitu à Mediolanensibus juxta Soncinum, quod oppidum est in ripis Lollii agri Cremonensis, obtruncatum: cujus cadaver eo in oppido sepultura donatum est.

Venio ad navales, terrestresque copias; quibus felicissimo eventu saepe cum Venetis & Florentinis decertavit, contra eorum opinionem: quod opinarentur Veneti Mediolanenses cum ipsis, qui inter aquas & nascuntur & educantur veluti pisces, congressuros nunquam. Obstupuit ea tempestate universa Europa tam difficile bellum contra tot hostes terra & aqua sine exteris auxiliis à Mediolanensibus administratum. Admirabantur exterae nationes unde tantae opes, tantae copiae, tanta denique rerum omnium facultas esset: quibus non dicam thesauris, sed auriferis foeta mineris immensas ad tantum bellum diutinumque pecunias exponeret. Atque haec Mediolanensium civitas suis maxime redditibus effecit, nullis externis freta praesidiis, sed propria virtute & probitate confisa. Ex quo pereximiam ipsius praestantiam licet agnoscere, quae per se bellum gerere, per se sumptus omnes perferre quiverit; qua in re quid in primis extollendum sit, haud facile cognitu est. An potentiam prius admirentur homines, quod gravissimum & periculosissimum bellum tot per annos enixissime pertulerit? an virtutem, quod hostiles vires saepenumero fregerit, atque deleverit? an opulentiam, quod propriis sumptibus ingentis adversariorum opes funditus exhausserit? Mihi quidem omnia non mediocri laude videntur commendanda. Sed ad majora mea festinat oratio: & de opibus ac facultatibus abunde dictum est à nobis: de nobilitate deinceps restat differendum.

C A P. XV.

De nobilitate conditorum.

QUANQVAM in hac parte nescio, an virtutem contineri putem. Nam cum virtus per se clara & illustris sit, nec ullis imaginibus magnopere indigeat: ita qui majorum suorum res gestas praedicant, ipsi vero nullam in partem utiles sunt, vani potius, quam generosi censerentur. Ut sunt nunc Romani, qui tantum nunc possunt dicere, *Fuimus Troes*: cum choreis, ventri, & gulae dediti, tantum idonei sunt statim quibusdam anni tem-

poribus ad occidendos, veluti lanii, boves. Dii boni, quae antiquitatis fragrantia? Quae virtutis experimenta? Quae facinorum admiratio? occisos sex boves singulis annis à populo Romano, quis non monumentis tradet? Quod si quis horum igitur profapiam longe anteponat, plurisque eorum dignitatem, Rempubicamque existimet, quod ii cæteris nationibus olim imperitarint, medius fidius vehementer errat: nec satis vere nobilitatis vim, amplitudinemque intelligit. Romanorum enim veterum, quae in novis est prorsus extincta, excellentia adeo sua virtute cognita est, atque perspecta, ut nullius laudibus egeat, quo dignior haberi possit, ac praestantior. Si vero conditorum stirpem, claritatemque recenscas, perobscura videbitur eorum successio, vilis, abjecta. Nihil ergo hae hereditas existimanda est. Nonne virtute praclarum fieri, ac rebus gestis eminere praestiterit, non autem fumosis stemmatibus, coloniisque excellere?

Traditum est in annalibus eorum, qui Punicum bellum secundum scripserunt, Placentiam coloniam deductam primo anno ejus belli, in quam sex millia hominum deducta sunt. In his equites deducendi fuit causa ut opponerentur Gallis Insubribus. Num quis propterea ex Placentinis civibus inventus est, qui populi Rom. Imperium jure hereditario ad se vendicet? Num qui totam Italiam tribus & quinquaginta coloniis putet immunem, ut vel nulla superesse credantur Romanae probitatis insignia: adeo universa in unum quodammodo conjuncta sunt, atque confusa, vel si qua aetatem superare potuere, omnis Italia hujusmodi gloriam ad se dicat pertinere? Quod si majorum dignitas, aut splendor quaeritur, quae Byzantio nobilior colonia? quae praeclearior unquam fuit deducta? Hanc quippe Imperatores Rom. ita condidere, ut Imperii signa illo conferrent proscripto totius Italiae, Diis adversis, à Constantino nobilitatis & juventutis flore.

Sed libet aliquantulum hic immorari, & quaerere, uter hic populus origine prior sit, atque nobilior? ut subinde ex hujusmodi collatione virtutis cæterarum rerum amplitudo resplendeat. Romanos Leonardus Aretinus Florentiae urbis auctores esse asserit: ipse ad Gallorum Transalpinorum, aut ad bello invictissimos Germanos Mediolanensium, & reliquorum intra Alpes & Apenninum refero. Qui populus ex iis igitur sublimius ortum ducit? Clarissimos omnium Regum & populorum Romanos esse, Leonarde, profiteris. Non hoc nego: scio enim Romanos tantum fuisse bellaces olim, & praecellosos, quantum hac aetate sunt imbelles & inglorii. Veruntamen nulla civitas adeo bene morata, aut instituta, quae malorum hominum, ut ipse professus es, omnino careret. Itaque si non privatim de singulis civibus, sed universa Rep. verba fecisti, quota est à Pop. Rom. deducta colonia, quae non pari fiducia ac generositate polleat? iisdem conditoribus originem suam acceptam referat? vicissimque terrarum imperium ad se vendicet? ac si qua fortasse inter eas aut simultate, aut injuria, ut plerumque consuevit, contentio exorta est, nequaquam id bellum justum, sed potius civile, atque intestinum nominabitur. Maxime enim refert, an inter cives, an eos qui à civibus oriundi sunt, acie certetur. Quid ergo? nonne Placentini cum Gallis Insubribus & Germanis, Hispanisque pedibus Florentinis arma intulissent, & sub Philippo Vicecomite in eosdem irruissent, nefarium gessisse bellum dicentur? Nec minus Florentini, cum veteris coloniae sedem reliquissent, conditorum fidem sublestam habuisse?

At vero si magis virtute, aut opibus, aut rebus praecclare gestis Resp. superbit: quo tempore

K

Flo-

Florentinorum gens à Romanis orta est, confideremus: quod in Regum successoribus observari ajunt, ut is Regis filius recte appelletur, qui regnante patre ortus sit; qui vero ante vel postea nati sunt, hoc nomine indignos haberi censent. Attendite igitur Mediolanenses, & stirpem vestram recognoscite: tum videbitis quantum cæteris gentibus præstetis origine: & quantum Florentinis à Romano populo ortum ducentibus gloria & dignitate anteitis. Nunquid L. Sylla Remp. Romanam vi & armis obsidente, Fesulana colonia deducta est? Nec mirum si inter se ita debacchentur, & in alios tyrannidem exercent, ubi facultas datur: quia à perditissimo tyrannorum Sylla origines deducunt: cur ita seditiosior civitas? quia à sicariis & gladiatoribus orti majoribus: quos haud secus quam justis belli stipendia emeritos in coloniam Sylla duxit. Ab iis illa sceleratorum manus Duce Manlio sociam se L. Catilinæ furori præstitit: & ab iis Fesulana colonia deducta.

Sæpenumero itaque cogitanti mihi, quænam Florentinos cives causâ impulit, ut pristina urbe destituta ad Arnum flumen potissimum incoherent, nunquid amoenioris cœli, aut uberioris soli gratia pellecti sint? nihil potius occurrebat, quam vitanda eos loci ignominia sedem mutavisse. Quis enim hujusmodi Syllanas reliquias, ac veluti servilia quædam præsegmina non spernat, aut oderit? Quamobrem minime mirandum est, si Leonardus homo & disertus, & elegans, cum Fabricios, Coruncanos, Dentatos, Publicolas, Decios, Romanæ urbis lumina referret, Syllam, Manlium, & Catilinam homines perditissimos, nequissimosque sciens silentio involverit. Norat enim quas clades, quæ ludibria populo Romano, quantas Florentino nomini ac decori sceleratissimorum tyrannorum notas recordatio ac memoria indidisset.

Satis nunc arbitror ex iis quæ diximus, persuasum esse, nec principatus gratia, nec rerum & situs excellentia, nec opum, aut facultatum copia, aut nobilitate conditorum Florentiam, vel aliam ex Italia urbem Mediolano non solum præponendam, sed ne esse comparandam quidem.

C A P. XVI.

De dignitate Urbis Mediolanensis.

SEQUITUR de dignitate aliquid in medium adducere, quo urbis hujus præstantia maxime absolutior & præclarior cunctis appareat. Quanquam vereor, ne pluribus hæc nostra studia haud grata futura sint: qui me fortasse jam existimant assentando atque indulgendo inanem gloriam & popularem famam quærere: eamque à nobis provinciam iccirco susceptam esse, ut hinc favor à Mediolanensibus in me aliquis elucescat. Non deerunt alii, qui hoc onus putabunt impar humeris meis. Fateor esse me ingenio hebeti, obtuso, & hac provincia prorsus impari: verum qua potero ratione his satisfaciam: & oratione longa non utar. Ego nempe etsi cupiam quam plurimis obsequi: usque adeo tamen non ineptus sum, ut favore multitudinis potius existimem, quam doctorum auctoritate id consequi posse.

Cæterum cum præstantiam tantæ urbis intuerer, eorumque ingenia admirarer, maxime qui Florentiam præ cæteris Italiæ urbibus ad cælum efferunt, eamque industria, fide, humanitate, magnitudine animorum putant præcellere; indolui profecto nostrorum vicem, quos nec patriæ charitas, nec honos, aut exercendi ingenii gratia ad scribendum posset allicere: quique facilius aliena re-

Aprehendere didicissent, quam ad laudem & decus alicujus præclaræ rei verba facere. Itaque profusioni meæ debitum credidi, præsertim à vobis rogatus: si quam ipse in dicendo facultatem adeptus essem, eam potissimum in laudanda & extollenda præstantissima urbe conferre, & velut pignus & testimonium quoddam pietatis & studii in Mediolanenses exponere: quod etiam nostros, si modo verum fateri volent, non arbitror reprehensuros. Quid enim minus dignum? aut quid à bonis moribus alienius est, quam cum ipse nec patriam tueri, nec Rempublicam verbis defendere, aut honorem ipsius nec officio; nec oratione tutari queas, adversari his, aut succensere, qui communem causam sponte susceperint? Omnes enim, quibus pietas, religio, charitas odio est, hujusmodi res negligunt. Qui vero & boni & liberales haberi volunt, haudquaquam patienter aliarum urbium laudes suæ anteferri sustinent. Quamobrem desinant illi quidem, quicumque hi sint, nos infestitæ, aut temeritatis exposcere, ac prius seipsos levitatis, stultitiæque condemnent: tantum certe abest, ut hujusmodi homines multi existimem, ut eorum battologiam flocci faciam potius, atque contemnam. Verum his omiſsis ad pensum redeamus.

C De dignitate igitur, quæ primas in omni Republica partes habet, non inepte à nobis hoc loco præfari posse arbitror: præsertim cum hujus civitatis gloriam, claritatemque contineat. Quid ergo? nomen præcipuum, & quasi peculiare hujus urbis, quam in patriam mihi elegi, munus est, neminem Romæ Imperio præfici solere, aut Cæsaris nomine dignum censi, qui Mediolanensi diademate non antepeditus sit, & illustratus, & consueta imperii hinc susceperit insignia? Præclare id quidem majoribus nostris indignum omnino videbatur, eam civitatem, quæ præ cæteris ingenio, prudentia, bellicarum rerum peritia maxime polleret, meritis laudibus carere: sed eam potius ornandam, decorandamque censuere. Itaque nulla cupiditate, nulla jactantia adducti, Mediolanensibus id honoris nationes omnes detulere. Optimo itaque consilio ac summa prudentia effectum videtur, ut hic honor, qui in primis Romanis erat attributus, hæreditario quodam jure ad Infubres transferretur. Sola enim hæc in tota Italia civitas Mediolanensium est, quæ cum Romanis, exterisque gentibus de imperio, de dignitate, de omni denique virtutis laude certaverit: & si occasio daretur, certare posset. Cujus rei evidens signum est, quod omnes potissimum, qui Cæsaris nomen deinceps adepti sunt, hinc primitias Romæ Imperii, hinc regia insignia, hinc primos & attollere (ut inquit poeta) fasces, & auspicari consuevere: nec immerito. Nempe ut is militiæ ornamentis haud dignus videtur, qui prius arma & acies expertus non est, & quantus in hoc munere labor sit, ignorat: ita qui potentissimæ urbis vires nescit, aut cum ea de fortitudine, ingenio, prudentia nullum habuit certamen, nequaquam orbis Imperator dici, aut Cæsaris titulo insigniri promeretur. Non injuria itaque ab Antiquis huic urbi secundæ Romæ nomen est inditum: quæ gloria cæteræ urbes caruere. Mihi non solet videri hac etiam de causâ præstantiam Mediolanensi populo attributam, ut is esset, qui languentis Imperii vires, & in alium labentes orbem propria virtute repararet: nec antiqua & paterna dignitate Italicum nomen defraudari pateretur. Quæ enim civitas, si Mediolanum exceperis, arescente sensim Romanorum, quæ nunc conclamata est, virtute, & languescente probitate, cum in dies nostra hæc urbs magis & magis floresceret, tantam Barbarorum illuvionem, tot bellorum fulmina, tantos Germanico-

nicorum motuum fluctus perferre & cohibere potuisset?

Exemplum quidem publicæ calamitatis Fridericus ille Barbarossa fuit: qui adeo dignitatem Mediolanensem exstinguere molitus est, nulla alia (ut opinor) ratione, quam quod unicam suis conatibus obstare cognovisset: ut Italiæ dominatum, nisi perditam prius Mediolanensium Rep. adepturum se diffideret. Comparatis itaque ingentibus copiis, nec suarum modo, sed exterarum gentium frētus auxiliis, per Alpes irrupit: & sic in Mediolanenses furore æstuans, totus rapiebatur, ut universæ Italiæ terrori esset. Dii immortales, qui tum pavor non fuit? qui mulierum ejulatus? quæ senum & puerorum lacrymæ? Hujus ergo temerariis ausibus nequaquam Mediolanensis populus cedendum putavit, sed adeo prudenter, adeo viriliter obstitit, ut non modo illius superbiam, audaciamque contemneret: verum etiam post longum certamen ad interitum fere illius innumeras copias affligeret. Sic omnis Italia hujus nostræ urbis beneficio à servitute libera exstitit.

Nolo diutius immorari, ac referre, quæ, & quanta hæc civitas, non antiquis modo temporibus, sed ætate nostra, pro tutela communis libertatis perpessa sit: permulta etenim ac præclara exstant exempla, ex quibus Mediolanensium virtus & magnanimitas facillime perpendi potest. Usque adeo autem hæc civitas contra æmulos Italici nominis potens infurrexit; ut nihil antiquius unquam haberit, quam facultates & sanguinem pro libertate totius Italiæ hostibus exponere: & manifestissima fidei suæ monumenta erga illos, qui pie, justeque de imperio sensissent, declarare. Si qui secus ausi forent, eos quidem hostium numero censuit habendos. In qua re sapienter illa certe videtur sensisse. Nam qui ambitione, aut insolentia ducti, ditiores & tyrannides appetunt, & dum rem sibi gratam consequantur, ac inimicorum suorum acceptas ulciscantur injurias, nihil pensi de sociorum fortunis & salute habent: hi profecto omni fortuna indigni putari debent: ac pro viribus ab eorum nefariis conatibus arcendi sunt.

Sed quorsum hæc tam multa? dicet ex vobis quispiam. Nempe ut ostenderem primum hanc urbem pro imperio, pro salute, & dignitate Italici nominis aperto semper Marte certasse. Mox hac gloria Florentinos cassos esse & effoetos. Nam ii, ut Galliam Cisalpinam cum tota Liguria delegerent, reliquamque Italiæ partem, quas artes non sunt experti? quas Germanorum cohortes non excivere? Quis enim Gallorum Transalpinorum exercitus, ante Divum Galeacium Vicecomitem, cui *Virtutum* cognomen fuit, in Italiam traxit sub auspiciis infortunatissimis Armeniaci Comititis, nova loca, novasque sedes, quas incoleret, quærentis?

Sed comprimam ipse me, quando nulla efficacior sit ad delenda injuriarum tam veterum quam recentium vestigia antidotus oblivione. Commodum igitur ad alia stylium divertemus, ac de rebus his verba faciam, quæ avi fortasse nostri vidisse potuerunt. Et sane tam multa ac præcipua se ostentant, ut ignorem quæ potissimum Mediolanensium laus sit anteponenda. Verum ut in reliquis à nobis pro temporis angustia factitatum est, ita nunc faciam.

C A P. XVII.

De navali pugna inter Venetos & Mediolanenses sub Cremona.

GALLIÆ Cisalpinæ condidere, sicut ego accipi, Cremonam Romani in Padi ripis: hanc Veneti summa vi oppugnare adorti, hinc terrestri

A exercitu, illinc validissimis navigiis undique premebant. Dux Philippus apud Insulres rerum potiebatur, urbem bello & pace clarissimam liberare ab obsidione cupiens, classem opinione omnium celerius instruxit, quam secundo Pado subductam in fronte hostium firmavit. Et jam medium lucis spatium sol peregerat, cum se profluente Eridano utraque classis miro tormentorum tympanorumque fragore appropinquabat. Interea Franciscus Sforcia, hujus, qui annis superioribus est mortuus, avus, Mediolanensium ductor, certamen velut detrectaret, aliquantulum substitit: donec terrestres copię supervenirent. Nocte vero jam appetente coactus Sforcia adventu Venetæ classis, quæ adverso flumine vehabatur, aciem instruit: viginti ex omni classe in fronte disponit, duas in subsidiis alas, totidem navium numero esse jussit. Has viris pugnacissimis instructas vela facere imperat. Jamque intra teli jactum convenerant, & se quisque ad certamen præparabat: cum ductor ipse in omnium vultus oraque conspicuus: *Quod multis, inquit, votis, milites præstantissimi, jampridem expetistis, occasionem fortuna attulit, ut vires, virtutemque vestram in Venetos, quos toties majores vestri parvis copiis fuderunt, ostendatis. Hic dies Insubribus imperium & libertatem aut statuet, aut finiet: utraque res in vestra sita est manu: recordemini obsecro quæ majores vestri terra, marique pro gloria & libertate gesserunt. Illi siquidem quoties Hebruscos, quorum imperium late per Italiam ab Ancona propagabatur, aperto Marte fuderunt? Casu ad Alliam fluvium illi exercitu Romanis urbem conflagrarunt. Illi Medoacos, illi Venetos acie trucidarunt. Nobis tamen res est diversissima. Illi etenim pro imperio tantum & gloria, nos autem pro vita & libertate certamus: quo minus vos decet hostium numerosiores copias, & navium magnitudinem extimescere. Nullum vobis cum Italici certamen esse putatote, apud quos rei militaris peritia, navalis belli plurimum pollet, aut cum Gallis Transalpinis, & Germanis, apud quos pro disciplina militari vires corporis firmissima adsunt: sed cum barbaris Phrygiis, & Paphlagonibus, Gracisque, quibus dici, vel fingi potest imbecillius nihil, res geritur. Quibus nulla belli artes, animus ad fugam quam ad pugnam paratior semper fuit. Multitudinem innumeram, quibus longe nobis sunt superiores, quoties expertus ipse sum esse ad fugam quam ad victoriam, quæ semper posita est in virtute paucorum, propensiores. Nos autem illis militum audacia & virtute præstamus. Dii quoque pro justiore sunt parte. Ultro enim nulla Veneti laceffiti injuria Cremonensium sociorum agrum & Cenomanos populantur. Ite igitur alacres, ut ex hostibus non victoriam solum, quæ jam parata est, sed spolia ditia referatis, & gloriam immortalem. Hæc breviter effatus, totis remis, ventisque progredi cœpit.*

At parte ex altera Veneti ex omni classe, quæ quinque & triginta numero constiterat, duodecim delectas naves in fronte statuere. Dux exercitus Nicolaus Trivisanus primus aciem regebat: reliquas viri præstantissimi ejus imperio parere jussi tuebantur. Has omnes inter se catenis vinxerant, haud dubie si major vis ingrueret, universam belli molem sponte subituri, postremas in duas acies, velut alas, posuere. Omnibus itaque ad prælium pro tempore instructis, utrinque signo dato concurritur. Remis undique collisus amnis resonat, acclamantium deinde voces, machinarum stridor, navium inter se concurrentium fragor, auras impleverat. Primus omnium Insulrum ductor in adversam classem magno impetu invehitur, non recta fronte, sed sinistrali latere congreditur, remorumque vi ac militum robore per medios

hostes veluti fulmen elapsus, cæteris iter aperit, seseque infra alveum tota acie constituit. Hic acre bellum oritur, captis jam aliquot ex Venetis navibus: unamque ex his pugnae initio validius obstantem undis immergit: reliquas trepidatione & metu fluctuantes hinc à latere, hinc à fronte consecutus ex itinere sistit. Clausis igitur ab utraque parte hostilibus copiis, cum jam nox increbresceret, pugnamque differre placuisset; suos inprimis firmat: robur denuo totius exercitus in fronte constituit: naves expeditas in lateribus locat, pro faucibus integros reponit, suos hortari, monere, bono animo esse jubet, victoriam Diis faventibus partam esse ostendit: & hostes, quibus cum jam pudeat pugnare, veluti lepores in cubiculis deprehensos metu & desperatione torpere.


Interim Veneti pugna diffusi naves potissimum bellicas in unum conjunxerant, ex tribusque duas acies effecerant. Nicolaus Trivisanus milites affatus, quanto periculo eorum ignavia res deducta sit, admonet: ut decus amissum reparare velint hortatur. Viam edocet ferro & virtute ad Venetias aperiendam esse: & subsidii denique spem nullam. De salute & libertate certamen esse declarat, cum eis præsertim, qui nomini Veneto ab incunabulis hostes sunt infensissimi. Tali oratione animos suorum jamdudum metu & inertia desides ad certamen excitare conabatur.

Interea clarius dies illuxerat, ita omnes ad certamen rediere. Tunc acrior ad pugnam impetus fuit occurrentium inter se navium: denique militum clamor ad cælum ferebatur. Nusquam horridior belli facies. Venetos salutis desperatio, Insu-bres urgebat partæ jam victoriæ gloria. Tandem perfracta belli acies prima est, quæ tribus millibus, & iis quidem bellicosissimis, innixa fuerat: mox ad reliquam classẽ deventum medio in Pado arcem

A veluti firmatam: hic vario Marte diu pugnatum est. Interea Franciscus Sforzia quid optimum factu cunctatus esset, duas cæteris eminentiores puppes, quas *Galeaceas* vocant, in mediam hostium aciem immittit. Haud aliàs acrius pugnatum est. Naves enim navibus ita conjunctæ erant, ut vir viro velut in firmo positus pugnaret & gladius gladium exciperet. Interim naves, quæ in Insu-brum subsidii primas tuebantur, suorum cohortes circundare, faucios efferre, integros addere, hostes plerunque circumire, missilibus, telisque incessere cœperunt. Hacque ratione Venetæ classes, quæ in prima fronte constitutæ depugnabant, magna undique telorum mole obruebantur. Postremo Mediolanensium non ferentes impetum, dirutis quibus hæserant vinculis, suæ quæque saluti consulentes fugam arripere: pleræque tamen nautis, armamentisque disiectis, fluenti alveo immixtæ vagabantur: multæ ex itinere retentæ. Ex his quatuor ductorem protegentes, cum arenis inhæsisent, non sine magna utrinque strage superantur. Nicolaus, postquam Venetos ab omni parte cædi conspexit, & nullam salutis spem superesse, honesta morte haudquaquam inferiorem fugam ratus per medias acies incognitus evasit. Veneta classis hinc inde debellata diripitur: captivi omnes in potestatem re-
B ducti sunt. Ex his qui Barbari fuce in supplementum copiarum acciti undis obruti sunt. Venetis veluti armis depositis fociis vita concessa est. Sex ex classe Veneta rates tantum sunt Venetias delatæ: & sic Cremona obsidione liberata.

C Hæc habui, quæ, ut tibi Augustæ Baciænorum Comes Hippolyte Mayne obsequeretur, dicerem: quod si tuæ voluntati & meæ existimationi minus est satisfactum, angustia temporis id omne precor adscribe, & vale.

V A L E T E.



GAVDENTII MERVLAE QVERELA APOLOGETICA,

QVA RESPONDETUR

MALEVOLIS QVIBVSDAM,

LIBRVM SVVM CARPENTIBVS:

SIMVLQVE OSTENDITUR

EORVMDEM REPREHENSIONES VANAS ESSE AC INEPTAS.



PERSVADEBAM ipse mihi, ad majorum nostrorum æmulationem, quorum vigiliæ si non exstarent, pueri semper essemus, me quoque utilitatis aliquid in medium contulisse, & non hujus ætatis hominum modo, sed & posteritatis gratiam mihi conciliasse: cum quod rem novam, tum utilem mihi scribendam desumpsissem. Verum aliter evenire multo intelligo: & ita intelligo, ut laboris me pigeat mei. Pro gratia enim, quæ ab iis præfertim, qui me convitiis insectantur, merito debebatur mihi, Dii boni quam invidiam non excitavi! Quæ tragœdiæ non sunt actæ! Vociferantur alii pedestrem non observasse me numerum: optarent alii ad quasunque dictiones accentuationes. Nonnulli falsæ me historiæ hallucinatorem prædicant. Scripsere plures, litterarum, quas ipsi bonas appellant, me prorsus expertem. Non defuere qui me Grammaticum & frigidum, & jejunum dicerent: nec posuisse me pedem extra septa Prisciani. Hæc ego æquo animo patiebar, quod legerim hanc veterem alliciendæ veritatis gratia consuetudinem fuisse. Sic Platonem ab Aristotele, Zenonem à Carneade, à Lælio Varronem, à Sulpitio Casselium, & Hilarium ab Divo Hieronymo reprehensos esse: & hunc ab Augustino. Rursus ætate fere nostra Angelum Politianum, Domitium Calderinum, Georgium Trapezuntium, & Galeotum Narniensem Georgius Merula acris vir ingenii notavit. Verum cum apertas contumelias legissem, non potui non eorum infantiam contundere, ne quandoque, si hæc indiscussa, irrefutataque relinquerem, ansam eorum loquacitati largiorem præberem. Itaque, ne te longiore exordio distraham, rem ipsam adgrediar, si te & adversarios istos prius oravero, ne putetis hic maledixisse me, sed respondisse. Vale. Mediolani Kalend. Julii M. D. xxxvii.

ZOILVS. Tanta nunc est hominum temeritas, ut audeant etiam illi, qui vix grammaticale opus Alexandri didicere, suas in lucem nugas edere: quorum turbam passim per Italiam, ambasque Gallias, & Germaniam in dies videmus.

MERVLA. Tanta nunc est ingeniorum perveritas, & malevolentia, eorum potissimum quæ premit ignavia, ut nulla ratione sustineant, quod eruditorum ingenia peperere.

ZOIL. Oleum & operam, Merula, perdidisti in hac tua topographia, & historia. Illam enim plenior, atque elegantior habeo apud Ptolomæum, Strabonem, Plinium: hanc vero apud Ti-

Atum Livium, Sallustium, & Cornelium Tacitum.

MER. Pudet me fere hoc loco tibi respondere, utpote qui sic aperte deliras: dicam aliquid tamen, quo dementiam facilius agnoscas tuam. Dic, obsecro, hi-ne historici, quæ posterioribus seculis sunt gesta, scripsere? Enarravit-ne Titus Livius Caradinum Rubrobarbum & Tunetum Africæ urbem opulentissimam à Carolo quinto expugnatum? Aut Ludovicum Sforciam captivum in Gallias deductum? Vel Romam sub Clemente septimo à copiis Cæsaris prædæ expositam? Neapolim à Gallis obsessam? Sabaudiensem Ducem exulem? proditione à suis Alexandrum Medicem Florentiæ Ducem obtruncatum? Mirum nî quæras tot exercitus Gallorum nostra ætate consumptos apud Sallustium, aut tot Helvetiorum copias in suburbis Mediolani ferro contritas apud Tacitum? Hæc de historia dicta sufficiant: venio ad topographiam, quam hujus Cisalpinæ Galliæ (nescio quo fato) auctores fere intactam reliquere. Plinius siquidem velut canis Niloticus majorem partem dereliquit; idem facit & Strabo: Ptolomæum his aliquanto locupletiores esse non diffiteor. Multa tamen oppida celeberrima sublato ab humanis Ptolomæo, & urbes in lucem venere, extinctæ sunt aliæ. Ne me putes tamen hæc dicere, quo meos de hac Cisalpina Gallia libros commendem tibi, sed ut in maximo esse te errore cognoscas.

ZOIL. Si Tulliani Oratoris Merula per transennam saltem (quod ajunt) libros inspexisset, numerosior ipsius fuisset oratio: verum cum eos ne attigerit quidem, non mirum si vanida est ipsius oratio.

MER. Quorum oratio numeris careat, non video: nam si dictiones pedes efficiunt, & numeros pedes, quorum tandem scripta numeris vacant?

ZOIL. Triangularem cur scripserit Merula Galliam esse Cisalpinam, non video, cum ab urbe Mediolani latum (quod ajunt) unguem pedem ne quidem extulerit unquam.

MER. Quæ te, Zoile demens, agunt intemperix, ut hæc verba sic inania deblaterare audeas? tu igitur Ptolomæo doctior es, qui omnium fere plateas urbium circumforaneus pharmacopola perlustrasti. Adhæc tecum non sentit Ptolomæus Marinum arguens: cujus contentiones, quoniam impressæ sunt, ipse legeris.

ZOIL. Lajos populos nusquam legi cum apud Strabonem, tum Ptolomæum, Livium & Plinium: scio tamen generali nomine Lajos populos significare.

MER. Si hoc mihi non credis, cur non Polybium legis? qui gentes illas, quas Ananes & Salasilos nominavi, ipse Laios appellat.

ZOIL. Vix risum continui, cum apud te legi Gallos fortitudine Romanis antecellere.

MER. Quod dixerim Romanos esse robore corporis Gallis inferiores, ne mirum sit tibi: dixit hoc idem M. Cicero in *Oratione*, quam habuit ad *Aruspices*, cujus hæc sunt verba: *Quam volumus P. C. licet ipsi nos amemus: tamen nec numero Hispanos, nec robore Gallos, nec calliditate Pœnos, nec artibus Græcos, nec denique hoc ipso hujus gentis ac terra domestico, nativoque sensu Italos ipsos ac Latinos, sed pietate ac religione superavimus.* Quod si Ciceroni velut hujus regionis studiosissimo, & omnia trahenti ad utilitatem causæ, standum minus est: audi ipsius adversarium Crispum Sallustium in fine *Bellici Jugurthini*: *Per id tempus, inquit, adversum Gallos ab Ducibus nostris Q. Scipione, & M. Manlio male pugnatum est: quo metu Italia omnis contremuerat. Illique & inde usque ad nostram memoriam Romani sic habuere: alia omnia viriuti suæ prona esse: cum Gallis pro salute, non pro gloria certari.*

ZOIL. Pisaurum, Merula, interpretari debuisses à Pisis aureis, hoc est, à præstantia Pisorum ibi nascentium.

MER. Hanc tuam opinionem credant aniculæ, vel aliquis (ut inquit ille) Judæus Apella. Audi igitur Servium Honoratum Grammaticum in sexto *Æneidos*: *Tum Camillus, inquit, Dictator absens est factus, cum diu esset apud Ardeam in exilio propter Vejentanam prædam non æquo jure divisam: & Gallos jam abeuntes secutus est, quibus interemptis, aurum omne recepit, & signa: qua cum illic appendisset, civitati nomen dedit: nam Pisaurum dicitur, quod illic aurum pensatum est.*

ZOIL. Coctias Alpes Noricum attingere præter Alciatum ex Caroli Bouilli sententia, qui ait, Gallos post everfam Romam per Alpes Coctias in Macedoniam penetrasse, certissimum est.

MER. Sic attingunt Coctiæ Alpes Noricum, sicut Vefulus Indiam. Nodus omnis & difficultas (ut ipse putas) circa Corn. Tacitum, quem si sane intelligeres, ablata esset, versatur. Cum Suetonio enim Tranquillo memoriæ tradidit Tacitus Fabium Valentem itinerum venditorem per Coctianas Alpes cum exercitu, & Cecinnam cum xxx. millibus armatorum per Penina juga in Citeriorem Galliam contra Othonianos descendisse. Vellem nunc mihi diceres, qua ratione Valens potuisset conjungere se cum Cecinnæ copiis ad Ticinum urbem, si loca omnia præter Mediolanum, Novariam, Vercellas & Hipporrhædian ab Othonianis firmo præsidio tenebantur. Præterea in Norico, ubi Coctias Alpes ponis, Petronius urbis præfectus, qui facile Vitellianos per eas partes irrumpenteis rejecisset, concitatis auxiliis, & dissolutis fluminum pontibus eum tractum occupaverat, Othonis sic studiosus, quam qui maxime. In Dalmatia præterea, Pannonia & Myfia, quæ regiones sunt Norico proximæ, pro Othone exercitus erant. Quonam igitur itinere Valentis copię Ticinum pervenissent, si per Noricum iter faciendum fuisset? Sed non ne ego demens, qui in sole caliginem quæro? lege Plinium †, & mecum senties, dicentem: *Alpium incolæ Octodurenses, & finitimi Centrones, Coctiana urbes, Caturiges, & Caturigibus orti Vageni & Ligures, qui Montani vocantur, Latio donati sunt.* Qui non videt hoc in loco populos, qui vicini sunt, à Plinio recenseri, & Coctias Alpes non eas esse, ubi est Segusium, velut Carneades alter helleboro purgandus est. Sunt enim Octodurenses ejus pagi inter Helvetios, qui nunc est Sanctus Mauricius, homines in valle non magna sub Sedunenfi Episcopo. Centrones proximi sunt Garocellis & Caturigibus, non procul à Vocontii Novariæ condi-

† Lib. 111. *Hist. Natur.* cap. xx.

toribus. Jacent autem Vocontii inter convalles Grajarum Alpium, quæ nunc Cinefius appellantur: quibus iter est Genevam, ad lacumque Lemannum. Sed video hæcenus esse à me confectum nihil, nisi pedem intra Coctias Alpes intuleris. Audi igitur Nazarium in *Panegyrico* ad Constantinum Imperat. *Differamus, inquit, parumper Italicas expeditiones, quibus Segusiensium civitatem, quæ superatis Alpibus Italia claustrum objicit, cum ei & virtute velut januam fregisses.* Quod autem Segusium Susa nunc sit ab Augusta Taurinorum stadiis CLX. distans, apparet ex ejusdem Nazarii verbis paulo infra, cum inquit: *Ecce jam apud Taurinos venientem pugna gravior expectat, nec Segusiensium vastitas movet.* Hæc ille. Vides igitur adventum Constantini ex Ulteriore in Citeriorem Galliam, & primo à Segusio in Augustam Taurinorum, & illinc Mediolanum. Habent autem Alpes Coctiæ miram latitudinem, & longitudinem: adeo ut à Bobio (si Georgium Merulam sequimur) Segusium usque pertineant, & à Citeriore in Ulteriorem Galliam protendantur. *Haec functo vita Coctio in formam Provincia (ut auctor est Suetonius) à Nerone sunt redacta.* Quod ad Citeriorem Galliam attineant, testes sunt Annales sacri: Comi siquidem legitur in *Vita Divarum Liberata & Faustina*, quod erant natae patre Joannate apud Curiam Genesinam inter Alpes Coctias habentem Padum fluv. à Septentrione, à Meridie Alpes ipsas. Quo loci Mercatores in Italia è Galliis via Claudia commeantes divertebant. Quo situ constat hanc Curiam fuisse (ut ex hoc loco loquar) Transpadanam, & Apenninum habuisse à Meridie, ubi appellantur Alpes Coctiæ. Falso igitur Georgium Merulam criminatus est Alciatus. Præterea Divus Ambrosius, non Ecclesiæ Mediolanensi modo, sed & Liguriæ, Æmiliæ, Rætiarum & Coctiarum Alpium sacris præerat.

ZOIL. Quod Mediolanum caput Liguriæ sit, ut ab ipso Merula audiui, nusquam legi apud præbatur aliquem auctorem.

MER. Post inclinatum Rom. Imperium multarum urbium & populorum mutata sunt, & variata nomina. Sicut quod quisque etiam doctus facile non credat Cisalpem Galliam per ejusdem Ambrosii tempora, & Gotthis in Italia postmodum regnantibus, Liguriæ nomen habuisse, ut legitur in libello ejusdem super hac re edito. Divus etiam Hieronymus Vercellarum urbem Ligusticam vocat. In *Itinerario* etiam Antonini legimus Mediolanum Liguriæ caput vocari. Et Cassiodori exstat *Epistola ad Gaudiosum Theodoricæ Regis à secretis*, ubi inter cæteras Comi laudes id appellat quandam quasi murum planæ Liguriæ, & munimen claustrale Provinciæ: ita erunt duæ, planam nos incolimus, montosam cæteri: ut Statyelles, & Gabienni Vefuli montis accolæ. Nec te moveat Servius in xi. *Æneid.* qui ait, *Liguriam majore ex parte sui in Apennino sitam esse.*

ZOIL. Coctias Alpes & Julias si diligentius & Alciatum, & Divum Hieronymum Merula perlegisset, easdem esse dixisset.

MER. Si Divum Hieronymum recte intelligeres, diversas esse diceres à Coctiis Alpibus Julias. Lege igitur Latinum Pacatum ita dicentem: *Quæ fugiam? bellum-ne tentabo? ut quem viribus totis ferre non potui, parte sustineam? Alpes Coctias observabo, quia Julia profuerunt?* Ex iis verbis qui non videt Coctias, & Julias Alpes diversas esse, ad militros rejiciendus est. Verba Hieronymi aliud nihil videntur innuere, quam Vigilantium patria Hispanum per Adriaticum sinum in hanc Cisalpinam Galliam destituta Roma se contulisse: & hinc per Coctias Alpes in Galliam Ulteriorem, & illinc mox in Hispanias aufugisse. Quo in loco miror Desid. Eras-

sum Coctias Alpes quasi Gotthicas interpretatum fuisse: tanquam Gotthi his Alpibus nomen indiderint.

ZOIL. Falso quoque Merula Venetos inter Cisalpinos Gallos recensuit, cum constet illos diversum genus esse prorsus à Gallis.

MER. Quod Venetia ab auctoribus in Cisalpina Gallia constituitur, testis est Servius in lib. x. *Æneid.* carmine illo, *Sed non genus omnibus unum: Quia origo, inquit, Mantuanorum & à Tuscis venit, & à Veneris: nam in Venetia posita est: qua & Gallia Cisalpina dicitur.*

ZOIL. Ubinam gentium sint Alpes Summæ, quarum meminit Merula, nusquam, quod sciam, legi.

MER. Credo ad hanc contentionem me à te irritatum, ut hac ratione docearis: si ob hanc rem ingeniosus fuisti, laudo ingenium tuum. Audi itaque & discce quænam sint Alpes Summæ à C. Cæsare libro *Commentariorum* tertio: *Cum in Italiam, inquit, proficisceretur Cæsar, Ser. Galbam cum legione XII. & parte equitatus in Antuates, Veragros, Sedunosque misit: qui à finibus Allobrogum, & lacu Lemano, & flumine Rhodano ad Summas Alpes pertinent. Causa mittendi fuit, quod iter per Alpes, quo magno cum periculo, magnisque portoriis mercatores ire consueverant, patefieri volebat.* Eas autem esse arbitror, quæ ab Peninis ad Leopontiorum Alpes extenduntur.

ZOIL. Dii boni, cur sic Gallis Transalpinis invidisti, ut eorum originem subticueris?

MER. Eorum primordia dixisse me satis arbitror: horum autem, qui nunc Franci nominantur, quia origines ignoras, in hanc rem sedulus intendisti, ut illæ à me tibi declarantur. Accipe igitur quid de his apud probatos auctores legerim: Francos prius Salios fuisse appellatos Amm. Marcellinus est auctor: quod etiam eorum leges arguunt, quæ Salia nominantur. Salios constituit Ptolomæus in Sarmatia vicinos Aorsis, Agathyrhis, & Alanis: qui ultra Riphæos sunt montes, à quibus Tanais oritur. Sali igitur sedibus egressi in Germanias penetrarunt: diuque cum Germanis per tempora Valentiniani Imper. belligerarunt: victores tandem adjunctis secum Arthuaris & Turingis ad Rhenum defedere: brevique factum est, ut quicumque Germani Romanum Imperium detrectarent, Saliis se sociarent: unoque nomine se Francos appellarent. Horum opes deinde oppressa à Gotthis Italia adeo crevere, ut transacto Rheno Ulteriores Gallias occuparint, sedesque in eis constituerint. A quibus per longam seriem à Carolò illo, cui ob res gestas Magno cognomen fuit, Francorum Reges fluxere. Hic Longobardorum Desiderio Rege capto apud Ticinum regiam his dignitatem sustulit, imperatoriam ipse assècutus est. Pipinus Imp. ex hujus sanguine, qui Carolò Calvo successit, ut Italiæ regia Mediolanum diceretur, instituit, quod urbs hæc Citerioris Galliæ metropolis semper extiterit: quodque velut arx & specula totius Galliæ, Italiæ & Germaniæ habeatur. Pipini institutum & cæteri secuti sunt. Nam & Bernardus, cujus tumulus visitur Mediolani in Ambrosiano templo, hic Rex salutari voluit, & ab Antistite Mediolanensi coronari. Dissidentibus inde inter se Ludovico Calvilio, & ejus patruelibus, extinctum est Francorum regnum in Italia. Loco quorum Berengarium Foro-Juliensem Ducem, Italiæ Regem Mediolanenses salutant, coronantque: qui à regno sapius expulsus, id tamen Cisalpinis Gallis adjuvantibus semper invasit: vix unum atque alterum reperies, in quem toties fortuna luserit.

ZOIL. Debuisses hoc loco cur Brigantia nunc dicatur hic Orobiorum tractus exponere: si Poly-

A historiam tuam ad unguem (quod ajunt) absolvi cupiebas.

MER. Si ad singularum aut regionum, vel urbium interpretationem fuisset immoratus, Dii boni finem hæc nostra quando invenisset historia? quando extremam manum imposuisset? Verum, ut hac in re quoque sim de te benemeritus, accipe quid de Brigantia sentiam. Verbum est apud Græcos *Βριάντω*, id est, extollo, quod hæc regio collibus elata sit, quasi Briantia: vel quod incola ejus regionis sit fortis vel agrestis, *Βριάντης*. Quid aliàs Bonaventura Castillioneus vir florentis ingenii de Brianteis collibus consultus rescripserit, audi ipsius verba: *Fortassis nec incongruum fuerit de Brianteo monte vulgo Briantia eadem referre, qua aliquando audivisse me memini, & apud quendam, etsi minus idoneum auctorem legisse, qui tamen paulo post Rubrobarbi atatem vixerit. Totum tractum illum inter Abduam & Mogunciacum vini feracem ab ejus exercitu Germano montes Brigantia esse appellatum à similitudine collium, qui ad lacum Brigantium hodie Constantiensem circumjacent, viribus confertorum. In his enim collibus longo tempore Germani castra habuere, dum bellum à Rubrobarbo contra Mediolanenses gereretur.*

C ZOIL. Juliarum Alpium ratio paulo diffusius fuisset exponenda: ne hac in tua lectione lector, Merula, cogatur hæsitare.

MER. Aliud à me nihil intelliges, quam quod secundo libro legisti. Quid de his Castillioneus sentiat, non gravabor adducere: *Quamvis, inquit, scriptores convenient Julias Alpes eas esse, per quas ex Foro-Julii transitur in Noricum, & adhuc tamen non satis constat, an à Foro-Julii, vel à Julio Carnico nomen sumpserint, & an eodem nomine appellentur: in hoc omnes herent. Sed cum haud dubium sit Ptolomæum Carnos & Julium Carnicum supra Concordiam & Forum-Julii locasse: ita credendum esset Julias Alpes à Julio Carnico nomenclaturam habuisse: & eas esse quibus à Tergasto iter est in Carinthiam, qua & Carinthia vocatur ab eruditioribus: & paulo ultra Pannoniam versus superiorem, qua & Carneola dicitur. Qui quidem mons à Pomponio Mela & Taurus appellatur. Nomen adhuc in Norico & Carinthia durat, hoc est, Taura. Angustissimi in his sunt tramites, nulla curribus via. Mirum in plerisque horum montium locis, cum paulo altius sol ad Cancris tropicum pervenerit, in ipsis nivibus vermiculos quosdam gigni, veluti tineas. Quorum meminit Vadianus vir doctissimus in Commentariis suis in Melam.*

E ZOIL. Qua ratione Rhætiam Italiæ portunculam Merula dixerit, non video: cum sciant omnes Rhætos extra Italiam esse, & Germanorum idiomate uti; Grifonesque hac tempestate nominari.

F MER. Si in hoc sum deceptus, aliquantula venia ab aliis saltem condonabor, si mihi, Zoile, iniquus arbiter extiteris: secutus enim sum Titum Livium, qui ait Tuscos Duce Rhæto in iis locis defedis acie victos à Belloveso: in Rhætici præterea Alpibus aliquando (verbis utor Castillionci) habitasse gentem Italicam: Rhætosque lingua usos Italica illud argumento est, quod apud illos etiam nunc Latinorum lingua perdurat; tametsi prorsus nunc eos extincta sit. Perseverant tamen hujusce rei nonnulla vestigia. Tentare enim adhuc dicunt pro cœnare: eandem fidem faciunt multa circum loca, quorum Latina hodie nomina leguntur: veluti Rhætorum oppidulum *Magavilla*, quasi Magna villa vocatum, & Vallis dulcis *Valtidulc*: & non longe ab his Monticulum quendam *Montiglum* vocant. Rochus etiam Quadratus multa vir experientia cum apud Rhætos nomine Francisci Sforcia esset, retulit inter illos vicum esse, cujus incolæ

colas idiomate Italico uti asserit. Quod originem à Tuscis duxerint, Justinus quoque *libro*, ni fallor, vigesimo attestatur.

ZOIL. Si auctorem, Merula, mihi dederis idoneum, qui Vicomercatum Vicum Martis appellet, auctor sum, ut me in pistrinum dedas.

MER. Nullum fateor habere me, qui hæc dicat, auctorem: verum famam secutus sum perennem, quæ plerumque vim testimonii habet. Deinde regio, cujus hic Vicus Martius caput est, Martisana dicitur, quasi quod ejus tractus homines insani Martis desiderio ardeant. Eo in vico præterea cujusdam Martii tumulus est, quem hic non gravabor annectere. In Æde sancti Stephani in Vico Martio, qui nunc *Vicomercatus* appellatur:

HERC. INVIC
VOT. MARTIVS
LVSOR ALBVCIVS
L. D. D. D.


Quasi quod hæc Inscriptio ex Vico Martio eum esse demonstret.

ZOIL. Æque dclirantem Merulam si dixero, quod fidemumat ex Inscriptioe saxorum, quis mihi vitio vortet?

MER. Omnes equidem, qui solidiores tuis nacti sunt litteras. Nonne idem fecit T. Livius? & eo prior Polybius? quoties enim illi ad columnam Liciniam, qua Annibalis gesta continebantur, con-

A fugiunt, velut ad sacram (quod ajunt) ancoram? Nonne Tranquillus inscriptioni aræ, quæ in Treviris erat, fidem præstat? Quintus quoque Curtius Erythræi maris nomen de sepulchro quodam mutuari, quam vulgatæ stare sententiæ, mavult. Trebellius quin etiam Pollio Valerianum juniorem Imperatorio diademate decoratum existisse declaravit, non alia ratione ductus, quam quod ejus tumulo, qui Mediolani ea tempestate visebatur, Claudii jussu illud vidisset insculptum. Igitur si sic vetustissimi factitarunt, cur me arguis? Quod autem Taciti sit sententia (nunc eruditissimo Castillioneo respondeo) Danubium à monte Arboni (quod quidem *Arnobi* legendum esset) oriri prope Hercyniam sylvam, (vulgo sylvæ nigræ nomen servat) ex adverso Rauracum, quorum oppidum est Basilea, (Arnobi Plinius & Ptolemæus meminerunt) ipse non inficias eo: imo ipsius ingenium laudo. Danubium scribit Alciatus ex præcipiti & excelso montis Arbonæ jugo ortum habere: cum tamen ab iis, quibus paulo compertiores sunt ortus ipsi, referatur ex molli & clementer edito colle eum scaturire apud viculum, quem Eschingiacum Danubii appellant; vulgo *Doneschingen*. Hæc habui, vir ornatissime, quæ in defensionem contra nonnullos, qui vix inspecto opere ad maledicentiam prorumpere, paravi, quorum dicta breviter attigi, recte-ne, an perperam ea diluta sint, tuum sit judicium. Bene vale. Mediolani viii. Cal. Julii M. D. XXXVII.

F I N I S.



ANTHONY & CO. NEW YORK

2 F C R E T A R I U S

VALVE CANCELLARIS

NOTARY PUBLIC

NEW YORK

1875

1875

1875

BONAVENTURAE CASTILLIONEI,

MEDIOLANENSIS,

DE

GALLORVM INSVBRVM
ANTIQVIS SEDIBVS

LIBER.

ANTONIVS DE ANTONIIS,
BIBLIOPOLA MEDIOLANENSIS,
SECRETARIIS,
ATQVE CANCELLARIIS
EXCELLENTISSIMI SENATVS MEDIOLANI

S. P. D.



VNIVERSVM orbis terræ globum, ejusque partes insigniores nonnulli viri doctissimi tum veteres, tum recentiores, cum non sibi solum esse natos cognoscerent, mirabili quidem industria & arte ita descriperunt, ut cum non omnibus datum sit quocunque terrarum peragraré, liceat tamen cuique locorum situm, & ipsorum inter se distantiam, longitudinem, atque latitudinem domi dignoscere. Id quod apud eruditos plurimi semper fuit; quibus, si, ut sæpe fit, de aliqua siue terræ, siue aquæ parte sermo incidat, omnia statim non secus prompta sunt, ac si singula (uti oculis subjecta) perspecta haberent. Præter hos fuerunt alii, qui operæ pretium se facturos existimarunt, si ea omnia, & singula describerent, quæ vel antiquitatem redolerent, vel familias illustrare possent, vel quomodocunque laudem, honorem, & gloriam civibus suis, & ipsi in primis patriæ afferre valerent. Ex quibus unus est nequaquam negligendus Bonaventura Castillioneus Mediolanensis; qui in urbe Mediolani & ejus Provincia describendis operam navavit diligentem, atque sedulam. Cujus opus alias editum, cum nunc vix reperiatur, iterum in lucem dare mihi in mentem venit: idque, si Diis placet, facere cogitavi vobis mihi favoribus, Viri præstantes & egregii; quorum auspicio atque patrocinio nihil non bene ac feliciter cessurum spero, atque confido: quando nemo à vobis unquam nisi voti compos discessit. Itaque vos rogo, ut opus hoc elegans sane, atque utile benigne suscipiatis; & meum erga vos studium memoria teneatis.

SECRETARIIS
EXCELLENTISS. SENATVS
PROVINCIAE MEDIOLANENSIS.

JO. FRANCISCVS LANDRIANVS.
JO. ANTONIVS POGGIUS.
JO. ANTONIVS MARCHESONIVS.
ALEXANDER BESVTIVS.
JACOBVS PHILIPPVS PAGANVS.

CANCELLARIIS
EJVSDem SENATVS.

JO. JACOBVS GHILINVS.
JO. BAPTISTA ANNONVS.
M. AVRELIVS GLVRIANVS.
JOSEPHVS AMATVS.
JO. PETRVS CARCANVS.
CLAVDIVS POGGIUS.

AD
ORNATISSIMOS
AB EPISTOLIS
SENATVS MEDIOLANENSIS VIROS,
BERNARDINI BALDINI HEXASTICON.

Hoc vobis, consulta quibus sunt nota Senatus, Bibliopola dicat CASTILIONIS opus; Non contemnendum certe, si ponderet æquus Judex Auctorem codicis, atque librum. At vos, ANTONI quibus est perspecta voluntas, Non Arabum his donis anteferetis opus.

GAVDENTII MERVLAE
CARMEN
AD LECTOREM

SI formidatæ Romanis arcibus olim
Insubrum gentes; oppida, castra, duces;
Pascua, velivolosque lacus, fontesque perennes;
Castella aereis montibus imposita;
Gramineas valleis, si errantia montibus armenta;
Eruta marmoribus si monumenta virum.
Tramite vis Lector facili percurrere: Caria
Hæc monstrabis iter quantulacunque tibi.

BONA

BONAVENTURAE CASTILLIONEI,
 MEDIOLANENSIS,
 DE
 GALLORVM INSVBRVM
 ANTIQVIS SEDIBVS
 LIBER.



ALLIAM Cispalinam, quam nunc Longobardiam seu Lingobardiam vocamus, initio Hetruscos tenuisse omnes auctores tradunt, conditis in ea duodecim Urbibus. Cum iis ob vicinitatem Transalpini Galli, quos nonnullis Celtas

nuncupavisse placuit, conversabantur. Qui postmodum sedibus fame expulsi, sive agrorum fecunditate allekti fuerint, Duce primum Belloveso in Hetruscos impetum fecerunt, exiguum belli occasionem nacti: quibus ad Ticinum amnem agmine aperto fufis, quicquid camporum inter Apenninum & Alpes interjacet, & Hadriatici littoris partem maximam occuparunt; à quibus mox hæc Italiæ basis Gallia vocitata est. Inter Padum & Alpes Laji habitarunt, quos Orientem versus Libitii vel Lebetii, seu Lebui sequuntur. Post hos inter Ticinum & Abduam sunt Insuabres, penes quos Cispalinorum omnium auctoritas fuit. His postmodum recto ordine Cenomani inhærent. Gallorum postremi Veneti à Paphlagonia profecti, vel ab extrema Transalpinarum Galliarum plaga, quam Oceanus alluit Occidentalis.

Cispadanum tractum, ubi primum Apenninus ab Alpibus discedere incipit, primi tenuere Ananes, post Boji, inde Eganæ, Gallorum ultimi Senones. Hi post Bellovesum aliquot sæculis Italiam ingressi Bojorum intima penetrarunt; ubi Senam urbem condiderunt, anno ante Christum Redemptorem natum octuagesimo septimo supra quingentesimum, regnante apud Romanos Tarquinio Prisco. Crescentibus itaque Gallorum & Romanorum rebus, inter Hetruscos & Gallos secundo bella sunt orta. Galli siquidem Senones superato Apennino, Hetruscos jampridem extra Galliam Cispalinam ejectos, sedibus turbant; Clusium ea tempestate eorum metropolim obsidione cingunt, & late Hetruscorum agros populantur; qua in obsidione irritati à Romanorum legatis, qui prætextu componendæ pacis illuc se contulerant, & desiderio manus conferendæ in aciem cum Hetruscis descenderant: ommissa Clusii obsidione, Romam urbem invadunt. Hi sunt Galli, à quibus Roma capta prædicatur, & incendiis ac ruinis deformata, non à Gallia Transalpina tum primum venientibus: sed in Italia multis jam sæculis educatis.

Gallis igitur Insuabris tractus omnis (ut diximus) inter Ticinum & Abduam contigit. Hos præcipue auctoritatis inter Cispalinos Gallos fuisse omnes historiæ tradunt; in primisque Polybius auctor gravissimus, qui eos villas habitasse nullis septas moenibus, & super strato gramine dormitasse, ad posteros transmissit. Bellicas præterea res atque agriculturam exercuisse, divi-

tias in auro & armentis patrio more exercuisse, ut cum ferret necessitas facile transferri possent. Ultimos vero omnium Gallorum Senones, per ipsa Romanorum rerum quasi incunabula, in Italiam per jam tritum iter inter nivosas Alpes irrupisse verisimile est: cum multa jam ante tempora Hetrusci à Gallis Celtis Duce Belloveso ultra Apenninum expulsi essent. Hujus rei argumento sunt certissimo sedes ab illis occupatæ. Siquidem cum inter Alpeis & Apenninum omnia ante illos Galli jam tenerent, coacti sunt in collibus Apennini Hetruscis proximis sedes figere, quibus cum continuum certamen fere semper haberent, vel cum eos à finibus arcerent, aut irritati ipsi in eorum finibus bellum gererent. Cæterum Insuabris postquam sedes visæ sunt satis firmatæ, armenti adaucta copia, & hostibus procul expulsis ex montibus, in quibus vicatim habitabant, paulatim ad loca campestria descendere placuit: ubi minor hyemis asperitas, & longe lætiora pabula; quibus æstivo tempore collectis sævientem brumam eorum armenta pascerentur. Ejusmodi vero loca in planicie constituta, maxima anni parte virentia, haud dubie ea fuerunt, quæ nunc incolimus, quibus in locis urbem condiderunt. Hic autem verisimile est per multos annos ad armenti, pastoriciæque suppellectilis commoda à Gallis paleacea tuguriola, & ea quidem humilia Nomadico more fuisse constructa, paulatimque Pado flumine exsiccato, & ad justum fluminis decursum exinanito, qui propter angustiora in Hadriaticum sinum ostia late stagnans, lacus magis immensi quam fluminis effigiem præstabat, per Padoam, quæ & Padusæ est, & Volanam seu Nolanam, quæ portum efficit, cœpere Galli planiciem securius habitare. Et hac ratione Padus liberiori eruptione facta in Hadriam, loca, quæ facile cæli ipsius salubritate, agrorum fecunditate, collium apricitate, sylvarum & fontium, fluminumque amœnitate, rerum ferme omnium, quæ ad victum, vestitumque hominis spectant, beatissima copia omnibus antecellunt, Gallis incolenda reliquit. Unde non immerito Virgilius in quarto *Georgicorum* de Pado, & locis his nostris cecinit:

Et gemina auratus taurino cornua vultu

Eridanus, quo non alius per pingua culta

In mare purpureum violentior influit annis.

Quod circa Padum magna agri pars paludibus & Padanis illuvionibus olim obruta fuerit, testis est Strabo, qui Æmilium Scaurum sequentibus sæculis, deductis ex Pado in Parmensem agrum fossis, navigantibus quidem commodis, paludes fluminis reliquas exsicasse, prodidit. Cujus auctoritate satis probatur olim circa Padum paludes fuisse immensas, & his majores in Insuabris regione existisse credibile est, stagnantibus præsertim Umbrone & Orona, plurimisque aliis fluminibus, quibus Insuabris agri plenius ætuant, in unum ferme locum illis coeuntibus. Argumento præterea

huiusce rei maximo sunt colliculi juxta oppidum Divi Columbani Laudensis agri, quos olim Pades alluebat. In plantandis enim vitibus, quibus colles ipsi maxime abundant, navium rostra, anchoræ, & huiusmodi reliqua navium instrumenta, singulis ferme annis effodiuntur: quorum reliquias eo in oppido aliquando mihi vidisse contigit: ostrearum quinetiam & conchyliorum maritimorum conchæ, quas passim ibi aliquando colligere est, nullo negotio arguunt, Padum illavione olim ad colles istos adscendisse.

Cum recepisset ergo dilatatis ostiis, & desiccatis paludibus, Eridanus (ita enim Græci Padum vocant) fluminis effigiem, ut recto tramite deferretur in Hadriam, vero simile est Insubres in campestribus locis velut fertilioribus omnino sedes locasse, quæ quoniam in medio amnium sitæ essent Mediolanum primo adjecta littera, quam *longam in Aulul. Act. 1. Sc. 1. v. 38.* Plautus appellat, hiatus vocalium tollendi gratia, demum Mediolanum nuncupavere. Annis tamen quamplurimis post trajectas Alpes Italicis moribus instituti, (vicinia siquidem & morum & fortunæ similitudinem adfert) cæterarum urbium exemplo, quas per Italiam belligerantes aspexerant, urbem moenibus cinxere; ut si qua vis hostilis ingrueret, facilius injurias propulsarent. Vicus haud dubie primo fuit, si Straboni credimus, ætate vero sua eximiæ majestatis urbs.

Hoc in loco diversorum opiniones non sunt recensendæ, tanquam ab historiarum fide alienæ. Ex antiquioribus nonnulli volunt à sue inventa, quæ mediæ lanæ esset, urbem hanc nostram nomen traxisse. Sunt item qui scribant Insubriam primo vocitatem, & prius Albam, Peuteciam alii. Nec desunt, qui nomen à Græcis deducant. Sed scite pro Catone contra Sempronium respondet Plinius, Italiæ rationem eos Græcis, aliisque gentibus falso mutuari, qui propriam nesciant, & de ea altercentur: eo etiam dementiae plures accedere, qui audeant scribere non à Græcis solum, à quibus verisimilius est, sed ab Hebræis civitatum, regionum, ac populorum nomenclaturas derivent. Idcirco qui Hebræa attingere, Gallos quasi aquis non oppressos interpretantur: contenduntque Gallorum nomen ante eorum ex Ulteriore Gallia in hanc Citeriorem adventum, in Asia, Græcia, & Italia existisse: cum tamen Livius Gallo-Græcos, seu Galatas à Celtis originem traxisse, constantissime adfirmet. Et Trogius de Brenno scribens, qui in Italia cum tercentis Gallorum millibus irruperat in Hetruscos, eorum centum millia non longe à Delphis, urbe oraculo Apollinis celebratissima, in ea Parnassi montis parte, quæ ad Austrum exposita est, Græcorum gladiis extincta; alia vero centum millia tractum in Asia juxta Paphlagonas occupasse, eamque Galatiam dixisse: hosque Gallo-Græcos primum, postea Galatas appellatos, monumentis prodidit. Hi sunt, ad quos Gentium doctor Paulus *Epistolam* scripsit. Eisdem quoque Trevirorum lingua, id est, Celtica, loquutos fuisse temporibus etiam suis Divus Hieronymus scriptum reliquit. Qui si ab Hebræis fluxissent, ut nonnullorum est opinio, non Celtica, sed Hebræa, aut Chaldæa lingua fuissent usi. Reliqua vero centum millia, quæ in Italia remanserant, Mediolanum, Ticinum, Bergomum, & Brixiam condidisse. Hos vero, qui sub Brenno militaverunt, Galliæ Cisalpinæ nomen indidisse haud facile crediderim: cum ante illius in Italiam adventum plurimi auctores tradant, Bellovesum Alpium iter primum in Italiam aperuisse.

Nec desunt qui velint Brennum ipsum non in Ulteriore Gallia, sed in Italia inter Gallos

A Senones Cisalpinos natum. Catonem quoque damnant multi, qui Orobiorum originem ignorasse se fateatur; quin & Plinium Naturæ scriptorem accusant, quod Catonis sententiam fideliter non retulerit: quæ omnia eo tendunt, ut Orobiorum, & Cenomanorum, gentes Gallorum, quando etiam Cisalpinorum interpretationes nominum & cognominum ab Hebræis fluxisse arbitrentur. Quæ quidem nomina, tametsi Hebræa, aut Græca esse reperiuntur, non tamen ex iis satis probant, populos eos Græcos vel Hebræos existisse. Siquidem inveniuntur plura Gentium vocabula, quæ Græcam præ se ferant etymologiam, quas tamen non Græcas, sed Barbaras fuisse Strabo, Plinius, alique probatissimi auctores tradidere: veluti Troglodytæ, Anthropophagi, Hamoxobii, Nomades, ejusque generis quamplurima nomina. Tanta denique jactantia Trogi, Polybii, T. Livii, & Plinii auctoritates parvi pendunt, ut suam his præponere sententiam impudentissime audeant, auctoribus, quorum paulo ante calculo fuerant innixi: contenduntque tantos viros Græcorum commentis fuisse deceptos, aperteque hallucinatos: & ne iis fides ulterius adhibenda sit, ad Berosum Chaldæum, qui ex antiquorum Annalibus omnia Assyriorum tempora digessit, & Metasthenem rerum Persicarum scriptorem, confugiunt velut ad sacram ancoram, tanquam quod ii soli publica, probataque fide scripserint. Et quamquam Cato ille, quicumque is fuerit (suspectæ enim sunt eruditæ auribus *Origines* illæ) Mediolanum monumentis transmisit ab Olano, nescio quo Hetruscorum Duce, primum Olanum dictum, à Medo mox Insubrum Principe actum, Mediolanum nuncupatum, scriptum reliquerit: nos tamen cum cæteris cum Græcis, cum Latinis auctoribus maximæ æstimationis sentimus: qui uno ore omnes affirmant, & primum Gallorum nomen in Italia & alibi auditum, à primo illorum cis Alpeis adventu, & ab eisdem cum pluribus aliis urbibus conditum Mediolanum. Quis enim historicus cujusque nationis existerit ante Bellovesum Insubrum aut Mediolani meminit unquam? Quod si obstinatius contenderint, Orobiorum nomen non Celticum, sed plane Græcum esse, judicioque suo affirmare velint, M. Catonem ob id nequaquam dixisse Orobiorum incertam originem esse, quod eam ipse penitus ignoraret, sed quod ipsum Orobiorum nomen incertam omnino & ambiguum etymologiæ rationem habere posset, Hebræam vel Græcam: satis nobis fuerit & Latinorum & Græcorum auctoritate probasse, Gallos Transalpinos, vel fame expulsos, vel sedium novarum perquirendarum gratia citra Alpes irruptione facta expulsis Hetruscis Mediolanum, Comum, Brixiam, Bergomum, & Veronam condidisse. Simpliciorum igitur historiæ ordinem prosequentes, adhibita pro viribus diligentia circa nominum interpretationes, quæ maximo sunt ad veritatem alliciendam argumento, vetustissimorum quoque Lapidum Inscriptionibus suffulti, de situ Insubrum, & hujus nostræ Metropolitanæ Urbis origine aliquid referemus.

F INTER Insubres olim oppidum fuit longe celeberrimum, quod ab eorum nomine Insubrium vocarunt: quæ res pluribus errandi causis præbuit, qui putarent Mediolanum Insubrium dictum. Sed nos qui loca ferme omnia Insubrum, qui ad colles jacent, perlustravimus, in quibus præcipue eorum vetustæ sedes existere, pro comperto habemus eas fuisse, ubi Castrum Seprii vulgo reliquiarum disjecta vestigia visuntur. Aberrantque tota (ut ajunt) via, qui Seprii Castrum, à quo plurima pars agrorum, qui intra Ticinum & Abduam con-

continentur, cognomentum retinet, ad Severi Imperatoris nomen adscribunt, unico tantum argumento freti, quod materno idiomate Severi Castrum nuncupetur. Tradunt enim Severum ab Insu-
subribus origines traxisse. Nec tamen advertunt hac ferme frivola conjectura ducti, dictionem, quæ Latine sonat Seprium, vulgo Scurium, non autem Severum dici. Ad hæc Federici, cognomento Rubrobarbi, Imperatoris plura diplomata, instrumenta quoque olim in Castro ipso confecta Subrii, non Seprii, nec Severi meminerunt. Ex his itaque conjicimus Subrium fuisse, quod Seprium dicimus. Huic nostræ sententiæ calculum adjecit testamentum Manicundæ Longobardorum Reginae in Castro Cariatæ conditum, quod ab humanis decedens Regina ipsa in coenobium venit, cui nunc soror Sophia præest: in quo legere est, Castrum ipsum Cariatæ ab Insu-
subrum castro secundo lapide distare. Ex iis igitur omnibus colligimus, castrum ipsum primo Insu-
subrium, novissime per negligentiam in Seprium transisse. Quam dictionem corruptam & adhuc in dies ejus tractus accolæ magis adulterant, pro Seprio Scurium pronuntiantes. Plurima in Cariatæ oppido antiqua monumenta visuntur: quæ temporum injuria legi non possunt. In ruinis tamen, Cœlii memoriola est hujusmodi:

M C O E
L I V S C V M
S V I S
M E R C V R I O
V S L M

In coenobio quoque ipso in lapide satis ornato in gradibus scalæ, Albutiorum, qui hac ætate, duabus per incuriam demptis literis, Butii nominantur, monumentum elegantissimum visitur his characteribus insculptum:

P A L B V T I A
N V S
P R I M I T I V V S
A L B V T I A E
P I E N T I S S I
M A E
V F

Non ab re esset putare, Cariate oppidum à copia nucum, quibus ager ille adeo abundat, ut lauris Parnassius, denominatum. Siquidem *nux*, sive *καρύα* dicitur *nux*. Quanquam non desint, qui hoc vocabulo significari etiam velint *castaneam*, & *avellanam*. Sed esto, iis rebus omnibus copiosissimus est tractus ille. Hoc etiam tempore pueri Insu-
subrum nucleum ipsum nucus *Carium* nuncupant. Quod oppidum si etiam dictum diceret, quod in summitate, aut vertice collis sit, non inficias irem. Quando *Καρυάων* verticem & summitatem etiam significet. Ab hoc oppido ad Alpes tendenti vicus occurrit, Viseprum vocant, ac si dicas Seprii vicum; à quo stadiis quatuor tantum distat. Omnis autem regio interjacens tot ingentium ruinarum vestigiis scatet, ut celeberrimæ urbis effigiem intuentibus objiciat.

Porro oppidi Insu-
subrum, seu Castri Seprii magnificam amplitudinem arguunt murorum latissimorum circuitus, fossarum profunditas; tametsi illæ plurimis in locis aggerum ruinis sint oppletæ. Quinque & adhuc templa conspiciuntur plurima ex parte diruta, è quibus duo absolutam Antiquorum symmetriam ostentant. Omnium spectatissi-

imum Divo Joanni Evangelistæ dicatum est, Longobardorum Regum regiam liberalitatem præ ferens. Quæ omnia non levi admiratione prætereuntes viatores afficiunt. In Castro marmora sunt characteribus (ut arbitror) Hetruscis insculpta, quæ nullum in præsentem usque diem (quem sciam ipse, vel alius sit interpretatus) intellectum admittunt. Non absurdum esset fortasse credere ab aliquo Hetrusco aruspice, quorum disciplina percelebris fuerat ubique terrarum, apposita fuisse. Quod ab illis, qui ante Bellovesum, Hetruscis, hic regnabant, monumenta illa (ut aliquorum est opinio) insculpta fuerint, nemo unquam mihi persuaderet: quando fidem omnem excedat marmor ab illis ad hæc usque tempora durare potuisse. Splendidam præterea oppidi hujus magnificentiam xxiv. pagi illustres, quibus præerat, satis superque declarant, auctoritatis pristinae indicia maxima. Omnis denique tractus usque ad sextum lapidem ab urbe, Subrii vel Seprii hac etiam ætate servat appellationem. Illic duarum arcium vestigia conspiciuntur; è quibus altera eminentiori in parte ad collis verticem Mediolanum spectat; à quo in proximam Oronæ Vallem (nomen est fluvii, qui collis radices alluit) per subterraneos fornices aquationis gratia cuniculus ducebatur. In fluminis vero ripa tertium quoque Castrum fuerat, quadrato lapide structum, *Turbinis* titulo, in coenobitarum Virginum usus pios conversum. Arce demum eversa nomen tantum *Turbinis* retinuit. Nec tamen antiquitatum memoriolæ hoc in loco desiderantur. In postico siquidem ædis vetustæ lapis exstat, Barbarorum, vel imperitorum culpa, aut diuturnitate temporis ita fractus, ut quoties illum aspiciam, illud Aufonii *epigr.* xxxiv. mihi toties occurrat:

*Miramur perisse homines, monumenta fatiscunt:
Mors etiam saxi nominibusque venit.*

Habuimus tamen Calphurniæ nomen politissimis, grandioribusque literis incisum; cujus etiam posteritas apud Insu-
subres nunc bellissime perdurat: sed Caphurii literis quibusdam negliger abjectis appellatur:

C A L P H V R
N I A E
C A R I S S I
M A E
F E

Eadem in arce in fornice cujusdam ostioli Tabula marmorea affixa est, his ferme cubitalibus insignis literis:

L C A S S I O
A V T E
L O I O
L F

INTRA circuitum oppidi olim Insu-
subrum, putei, cisternæque, & cloacæ, reperiuntur. Ad sunt quinetiam cryptæ, fornices elaboratissimi, & hujusmodi antiquaria. Vigentibus demum bellis inter Vicecomites & Turredanos, penes quos ea tempestate Insu-
subrum summa auctoritas fuit, de Imperio Mediolanensi disceptantes, oppidum ipsum cum arcibus in illo rerum turbine solo æquatum fuit: legeque municipali sancitum est, ne in id locorum colonia amplius duceretur. Quam quidem legem Prætores Mediolanensis & Gallarcæensis, magistratum initis, jurejurando omni studio, opere,

diligentia se curaturos pollicentur. Unum illud quoque animadvertimus, in meditalio fere Verbanum & Larii lacuum oppidum ipsum situm fuisse, & in colle eminentiori, ut recto itinere ab urbe ad Alpes proficiscentibus primo se offerat aspectu, ex quo velut è specula Insubrum patentes campi cum urbe ipsa videri possint. In eo monumenta prope infinita interierunt, nonnulla adhuc existant, sed plurima à civibus Mediolanensibus, post tantas & tot clades, inde abducta sunt. Ex pluribus vero unum atque alterum adduxisse sufficiat.

I O M
DIS MANIBVS
PRO SALVTE
MEMNIAE
PRISCAE
C F
MEMNIVS
ONESIMIANVS
PRO
FRVCTIBVS
V S L M

Ex hac Inscriptione colligimus, morem fuisse nostris maioribus pro salute agrotantium amicorum, ut Diis manibus sacra facerent & voverent. Fonti quoque Capitonis Consulis, de quo meminit & Tacitus in bello Othoniano, mnemosynon inspicitur literis grandioribus candido in marmore incisum:

I O M
C CAECILIUS
NIMPHEROS
VLSM
FONTEIO
CAPITONI
COS

Est & Veræ cujusdam eulogium; sed plurima ex parte mutilatum, reliquarum literarum prænominis & nominis duntaxat exceptis, intelligentiam non admittit. Hoc igitur in tractu Insubrum Gallorum sedes fuisse expulsis inde Hetruscis facile comprehendi potest: Insubriique nomen oppido, non urbi nostræ (ut multi falso arbitrati sunt) inditum fuisse. Fidem præterea faciunt vici, municipia ditissima, castella munitissima hujus regionis, ex quibus fere nobiliores familiæ Mediolanensium antiquissimæ origines traxere.

Inter tot municipia & vicos, Occidentem versus, secundo lapide oppidum Carnutum visitur, vulgo *Carnagum* nuncupatum: eo in tractu Carnutes, Ulterioris Galliae populos, olim consedis, arguunt soli fertilitas, nominis cognatio, & Insubrum Gallorum vicinia; facile enim cum Belloveso, quem tot hominum millia in Italiam traduxisse constat, & Carnutum copiae Alpes transcenderunt, & haud longe ab Insubribus sedes locarunt. Durat gens Carnutum in Celtica Gallia Oceano proxima olim in clientela Remorum, & totius fere Galliae media, eorum civitas Episcopalis vulgo *Chartres* nuncupatur. Tantæ præterea ædificiorum ruinæ in dies effodiuntur, tot exsculpti lapides, ut nonnisi inter cementa maceriaeque plantari vix possit vitis.

A Castro Insubrum, Ticinum versus, ad Meridiem quinto ferme milliaro, Gallareatum est oppidum, urbeculae effigiem præstans, ad extremam collium radicem in æquo ædificatum; à quo universa planities xxiv. milliariorum spacio ad urbem Mediolanensem extenditur. Cujus oppidi nomenclaturam si attentius quispiam observaverit, Gallorum aream, hoc est, conventum interpretabitur; sicut & Novariam trans Ticinum, quasi novam Gallorum

aream. In hunc tractum siquidem, velut ad campestria loca, quæ fertiliora esse solent, Insubres adhuc montium accolæ colligendorum fructuum vel Comitiorum habendorum gratia, prisco Gallorum more confluebant. Ad ultimum denique excidium redactum fuit oppidum Gallareatum, dum Mediolanensibus nostris ex animo favens, copiis ingentibus Federici Imperatoris, cui Rubrobarbo cognomen fuisse jam diximus, pertinaciter nimis adversatur. Visuntur eo in oppido vetustissimæ Inscriptiones; quales hæc sunt, quæ sequuntur:

H E R C V L I
C V I R M A X
C V M S V I S
V S L M

Item alio in loco:

M E R C V R I O
O P V P V P

Ibidem in turri quadrata:

C P O S T V M I O
P R I S C O
P O S T V M I V S
D R O M O
L I B E R T O
P I E N T I S S I M O
I N A G R I P X X X
I N F P P X X

Votum quoque Severi Silvano persolutum hæc indicat Inscriptio:

S I L V A N O
S E V E R V S
L F
A D I V T O R
V R B I C V S

Non procul à Gallareato vicus est Insubrum viciatoria adversus Hetruscos celeberrimus: *Bustum* Arsum vulgus appellat, sed verius *Bustacium*, quod ibi busta hostium compleverint omnia. Ad dexteram paululum si deflexeris Meridiem versus, Pictæ Curiae occurreris, *Corbetam* nostrates appellant: oppidum dubio procul vetustissimum. Longobardica symmetria constructum habens templum, cujus ruina, quæ facta est annis superioribus, multas Sanctorum reliquias, quæ ignorabantur, & cum eis memoriolam, in qua mentio habetur, & qui eas reliquias illuc locorum portari curavit, & nominis ejus oppidi, quod in hanc usque diem desiderabatur, aperuit. Has tabulas se legisse Gaudentius Merula ejus metrocomiæ municeps, parietis templi Sancti Victoris affixas, attestatus est militem. In silice non admodum polito in latere, quod occidentem solem intuetur, ejus ædis hos characteres esse idem adfirmat Merula:

I O M
S A C R V M
C D O M I T I V S
P H O E B V S
E T
P . V I N I A C H I A

F

SED ad Insubres, qui Septentrionaliores sunt. Sredco: hos enim qui ad Meridiem & ad Orientem jacent in planicie inter Padum & urbem, Ticinum & Abduam, labor alter excipiet. Eos enim & urbis situm Deo favente prosequar, cum primus fuerit liber absolutus. Remis igitur velisque (quod ajunt) omnibus ad colles recurro. A Gallareato Alpes versus miræ amoenitatis vallis incipit ad lacum usque Giviratum, de quo alibi de

cetur: per quam fluuiolus, cui Arno nomen est, limpidissimis aquis fluit, à dextra, lævaque (ut ait Poeta) castella in tumulis, & geniales vici. Crediderim ipse fluuium hunc ab Hetruscis hic olim dominantibus Arnun ab Arno altero in Thuscis, qui nunc Florentiam interluit, propter quandam vicorum ordinem, quibus uterque frequentissimus est, nomen sumpsisse. In iis collibus Crenæ est pagus à fontibus per ea scatentibus, quasi *Kpivn*. Hunc sequitur Oggiona, quasi Eugenea à fertilitate foli. In hac extincta est Ursinorum familia. Hieracium deinde visitur, quod ad sacra rustici illuc vocarentur. Illinc Albizatum itur, vel potius Albuciatum ab Albuciorum familia vetustissima. Crenæ Novelliorum Mediolanensium, quorum meminit Plinius in *Historia Natura*, memoriola visitur:

I O M
C NOVEL
LIVS
C F
FALLV
PIVS
VIVIR
JVNIOR
VSLM

Plurima quoque in Albuciato antiquariorum sunt vestigia:

I O M
MONIVNA
IESVLCANI
IOVANIVS
VSKKM

In calce Eulogii animadvertimus k k characteres geminatos, qui meo iudicio pluralem numerum signant; & libera munera inde significari.

A Joanne quoque Aluyfio Vicecomite insigni Equite, ejus oppidi domino, proavorum suorum jussu olim à castro Insubrum, quod stadiis ferme abest sexdecim, plurima ex hujusmodi antiquariis asportata fuisse intellexi. Ibidem:

CAMVRIVS
APVLONI
FECIT

Item in templo ejusdem oppidi in aræ majoris crepidine:

CAVVS
APVLONI F
SIBITMARX
SSVIII:::
:::ALLV
CAVIF

Quæ tamen interpretationem non admittant, indicio tamen sunt hanc regionem aliàs, quam nunc, longe floruisse: cum passim reperiantur similibus ornamentis insculpta marmora. Paulo superius colli imminet Caidatum oppidulum, in quo plura sunt hujusmodi antiquitatis monumenta. Arcem habet in summo colle positam universæ Arni valliculæ conspicuam. In ea Herculis memoria in marmore Pario sculpta visitur:

HERCVLI
INVICTO
DEO
CVLTORES
VSSLM

A LÆVA Caidati Occidentem versus, qua ad Verbanum lacum itur, Bisnatum oppidulum est, in quo hujusmodi etiam vetustatis monumenta conspiciuntur: in quibus vir miræ ac prope singularis eruditionis Andreas Alciatus Mediola-

ensis noster cognomentum Græcum inesse annotavit. Cujusmodi cognomina apud Insubres passim sunt legentibus obvia:

C T E R E N T I O C F
O V F P A T R I
C O M I N I A E P F M A T R I
C T E R E N T C F O V F
S I L O F R A T R I
Q T E R E N T I O C F O V F
F R A T R I
C T E R E N T I O C L D I O
C H A R I E X T E S T A
M E N T O
S V O
C T E R E N T I V S C F
F A C I V N D V M
C V R A V I T

A BISNATO occidentem versus hiemalem Sexto-Calendas oppidum vetustissimum, quo in loco in Verbanum Ticinus se exonerat, tendenti occurrit. Hic ultimus Insubrum terminus & descriptionis nostræ. Non enim in animo est populos qui ultra Ticinum sunt, quos Lebecios Polybius, Lebuos T. Livius appellat, describere. Porro oppidum hoc à paganorum illuc concursu, qui fiebat sexto Calendarum cujuscumque mensis, nomen sumpsisse auctor est Alciatus. Plurima in eo sunt antiquissima monumenta, quæ libens prætereo: cum quod ea idem Alciatus diligentissime annotarit: tum quod nostri non sit præsentis instituti singulas locorum Inscriptiones prosequi: hanc tamen ex plurimis ejus oppidi adjecimus filii erga patrem charitatis monumentum:

D O M I T I O
G N F I L O V F
P L A C I D O
V I V I R I V N I O R
C D O M I T I V S
M O D E S T V S
M I L E S C O H
V I I P R A E T O R I A E
P A T R I
O P T I M O

QUONIAM passim in ripa Verbani lacus antiquissima Italorum monumenta visuntur cum Inscriptione cohortum & legionum, visum est, quid de re hac sentiam, opinionem meam hic exponere. Ante Augustum Cæsarem & Julium ab Inalpinis populis fiebant subitæ excursions in Cisalpinos Gallos; qui jam pro Romanis sentiebant, accepto Jure Latinæ Coloniarum. Ad hos igitur prohibendos dispositæ fuerunt militum stationes in ipsis Alpium faucibus, qui Barbaros illos, qui jam Comum vastarant, temere irruentes exciperent. Itaque legiones eas esse conjicimus, quas C. Cæsar ad custodiam illius saltus disposuisse memorat initio *Commentariorum Belli Gallici*. Sunt etiam qui magis putent has militum stationes & colonias illic dispositas, ne Insubres clam contractis foederibus cum Barbaris proximis in Romanos conspirarent. Nihil enim est, quod magis firmiterque alienæ gentis Imperium faciat, quam cura illa, quæ à Romanis olim in deducendis Colonis impendebatur: facilius enim suis quam alienis mandabant. Hanc ob causam ajunt Derthonam in Apenninis collibus à Romanis Coloniam esse deductam, quæ impedimento esset, ne Insubres cum Lignibus convenirent. Sic Hastam & Hipporrhædian Colonias arbitrantur, quæ conventum prohiberent inter Salassios & Cisalpinos Gallos. Hac etiam de causâ Augustam Prætoriam, quæ media esset inter Salassios, & Veragros, & Allobrogas. Hæc quidem

quidem gentes Romanos ægre dominos tolerabant, & ad quodque leve momentum sumptis armis, & præfidiis trucidatis, à Romanis deficiebant. Unde in adulationem Romanorum Poeta*, qui tamen ex nostratibus erat, dixit,

— Gallumque rebellem.

Quod neque mirum esse debet; videmus enim persæpe magnos Principes, longius egressos, plerosque populos occupare, quos metu magis violentiæ, quam prompta fide subjugant: qui cessante timore tanquam ab odioso victore rebellant.

A Sexto-Kalendas ad Angleriam brevissimus est cursus. Quæ tot elaboratissima vetustatis monumenta demonstrat, ut merito Alpinarum gentium præfectura possit existimari. Hæc igitur multis argumenta præbuere, ut urbis titulo eam decorarint, tantaque inter recentiores Historicos de Angleria orta est dissensio, ut non defuerint graves alioqui viri, qui oppidi cognomentum ad Anglum, nescio quem, Hectoris filium referant. Hi tamen adulatione magis, ut Principum aures demulcerent, quam veritate adducti hæc posteris tradiderunt. Oppidum omnino antiquissimum est & clarissimum; magisque ante Turredanorum & Vicecomitum arma: dictamque crediderim potius Angleriam, quasi ad glaream Verbani sitam; non autem ab Anglo, vel ab Anglis populis conditam, ut multi volunt. Hoc ex Annalibus nostris constat, à Barbarorum irruptionibus in Italiam prædæ fuisse sæpius expositam. Florente Vicecomitum imperio, maximæ etiam & celebritatis & auctoritatis fuit: præsertim cum JOANNES Vicecomes, Mediolanensis Archiepiscopus, totius fere Cisalpinæ Galliæ imperium, & urbis nostræ utriusque gladii (ut ajunt) potestatem suscepit. Eo enim in loco præfectum habuit, qui Alpinis gentibus ad Summas usque Alpeis, nunc Sancti Gothardi vulgo, jus diceret. Alterum quoque, quem legatum nuncupabat Archiepiscopalem, qui eisdem populis sacra ministraret. Eodem in oppido Joannes idem arcem eximiam munitissimamque in amœnissimo colle condidit: quæ nunc etiam maximam præ se fert magnificentiam. Ætate nostra, cum reliqua fere Verbani regione Borromeorum imperio paret Angleria: quorum clarissimam originem Alciatus in *Antiquitatibus* suis satis ostendit. Iccirco in his diutius immorari superfluum arbitror.

Sed antequam à Verbano pedem referam, non possum non eorum satis opinioni, tum imprimis Gaudentio Merulæ, assentiri, cum & ejusdem semper fuerim sententiæ; non esse verisimile Poetarum principem, qui Mediolani literis operam dedit, & cui perspecta fuerat & cognita Gallia Cisalpina Verbanum tantæ celebritatis lacum silentio involvisse in *Georgicis* lib. II. celebratis cæteris lacubus. Itaque cum Merula ipse legere soleo:

Anne lacus tantos? te Lari? Maxime? teque

Fluctibus assurgens fremitu Benace marino?

Nonne fuisset turpe Virgilio tam vastum lacum, quem certatim & Græci, & Latini scriptores celebrarint, nulla de eo facta mentione prætermisisse? Sed sublatus errore temporum punctus interrogativus hanc creavit omnibus Interpretibus negligentiam. Distinguenda enim fuerat dictio *Lari* hoc puncto? ab illa dictione *maxime*: ut Poeta treis lacus, non duos tantum nominaverit. Velut & Strabo ipse, qui *Geographia* quinto treis ingenteis lacus describens, & Verbani, cujus longitudinem quædringentorum stadiorum esse scribit, meminit. Larium autem tercenta stadia non excedere. Nec verisimile est Vergilium hujus regionis alumnum id ignorasse; quod Græci exteri intellexere: præsertim Strabo, qui eadem cum Poeta nostro ætate

• Virgilius *Æneid.* vi. p. 858.

A floruit, & in eadem Imperatoris aula. Iccirco ut facile existimem, hæc faciunt, Poetarum eximium haud dubie *Maximum* pro Verbano expressisse. Quod quidem epitheton nullo modo Lario convenit, cum de Benaco fiat mentio: cujus longitudo (ut idem Strabo refert) quingentorum exstat stadiorum. Nisi potius dixeris Virgilium Polybii errorem sequutum, qui ait Ticinum à Lario, & à Verbano Abduam erumpere. Sed hac in re magis Vatem Cisalpinæ Galliæ consuetudinem loquendi sequutum arbitror, quam vulgatum Polybii errorem, cum dixerit *sceleratum frigus*, & *Maximum* pro Verbano: idiomate nostro Gallico *Majorum lacum*, Verbanum vocamus: qui vere major est iis lacubus, qui adjacent plurimi. Nunc unde nostra digressa est, se recipit oratio.

B E regione Castri Insubrum ultra Oronam, quem fluvium esse diximus, duo castella Novocomum euntibus occurrunt, Venegona vulgo appellata Castillioncorum ditionis, quæ superioris, & inferioris, ex loci situ, cognomento tantum differunt. His in vicis olim Veneris Agonalia, unde illis nomen est per contractionem literarum, celebrata fuisse, nominis cognatio non leve præstat argumentum. Loca amœnissima Veneri, vel Gratiis, aut Nymphis cæca Gentilitas consecrabat. His enim in locis acclivis adeo naturæ vultus arridet, ut de iis Virgilianum illud merito cantari possit,

Hic ver perpetuum.

C Lauris enim colles ita abundant: ut eos nullo negotio possis dicere cum Parnasso contendere super illarum viridantissima copia. Præterea tractus ipse, sic beatissimo omni pomorum genere, ut totus pomarium videri possit, & Pomonam ipsam illic habitare. Tanta denique aquarum vis, tot liquidi fontes scatent in regione alioqui arida & siticulosa; ut non sine causa in Agonalibus Veneri celebrandis Gentiles hujusmodi loca selegerint. Castellis ipsis ab Orientali plaga vallicula inheret molliter descendens, variis floribus etiam per brumam vires. Hic ortam Venerem diceret, si myrtum ferret regio. Per eam vallem passim fistulæ miræ crassitudinis effodiuntur, per quas (ut etiam Alciatus arbitratur) collectam undique aquarum influentiam Veteres ex Agonalibus derivarent ad oppidum Tradatis. Inter utrumque castellum, & adhuc prata toto ferme anno virentia Adonidis nomen servant. Universum hunc tractum carmine elegantissimo celebravit Baptista Castillioneus Jurisconsultus, ex dominis oppidi superioris Agonalium.

D Haud longe à pratis ipsis Quintieni cujusdam memoria exitat, marmoreo in saxo apud ædiculam sacram literis insculpta politissimis, ex quibus cognoscitur Quintienus hic, Quintianus fani Fortunæ ædituus:

Q
Q V I N
T I E N I
Q V I N T I A
N I
H A R V S P I C I S
A E D I T V I
T E M P L I
F O R T V
N A E
F I L I I P A T R I
P I S S I M O

F T R A D A T E, cujus modo mentionem fecimus, oppidum est, in quo floret Pusterularum familia Mediolanensis, hac ætate etiam percelebris. Porro oppidum ipsum amœnissimum colli adheret amœniori, ab Agonalibus Meridiem versus. Quod vero aquæ, de quibus diximus, in unum collectæ per

per subterraneos tubulos inde educerentur, fidem facit arca marmorea in oppido ipso: in cuius capite duo Delphines fuscina, qua pisces occidi solent, impliciti sunt sculpti. Quatuor praeterea orbes eodem in marmore conspiciuntur: ex quibus testimonio Bernardi Zenalii Architectonices peritissimi noster Alciatus existimat aquas ab Agonalibus, vel aliunde labentis, per cuniculos ex orbibus insipientes copiam earum indigenti populo subministrasse. Eodem praeterea in oppido Parii elegans memoria visitur, iis notis Pario in marmore insculpta:

VOTIS
OMNIBVS
COELESTI
BVS
CONSENTI
ENTI
BVS
BENEMEREN
TIBVS
QVE
L PARIVS
HERMES

Hinc stadiis duobus de viginti Septentrionem versus in vallicula fluminis Oronae situm est Castellionum oppidum. Quod tametsi in valle sit conditum, subjectae tamen planicie virenti amoenitate fruitur. Cujus loci formam qui intuentur, in Theatro esse se arbitrantur. Per prata virentia Orona velut licentiore cursu fluens, collis, in quo arx oppidana imminet, radices radit; à læva oppidi partem alluit, familiae nostrae Castellionae sedis vetustissimae; si urbis Annalibus credendum est. Habuimus quingentis fere exactis annis Thealdum Mediolanensem Pontificem hoc ex oppido, & eadem familia natum. Hic Cenobium Monachorum in Alona oppido, quod Gaudentius Merula Aronam, quasi Oronam, vocat, à montibus deflexo nomine trans Verbanum è regione Angleriae, suis sumptibus aedificavit: quo in loco & tumulari se voluit: oppidanæ magnificentiae testes sunt insanae illae aedium substructiones: quae omnino loci dignitatem excederent, nisi essent Episcoporum, Cardinalium, Summorumque Pontificum, quibus nostra familia longe splendidissima est, structurae. Tempia quoque videre est artificum concinnitate perspicua. Non sunt austeri Longobardorum ruditate structa, nec novitatis lenocinio minus venerabilia: medium quoddam temperamentum tenent. Cernere quoque ibi fuerat arcem Architecti diligentis ingenium prae se ferentem. Ea nunc vicinorum livore, vel magis iniuncto ejus fato, semidiruta est. Quam quidem calamitatem tametsi oppidum ipsum subierit, & ut inquit poeta Gallicus in secundo suae divinae *Aeneidos*,

— quaque ipse miserrima vidi,
Et quorum pars una fui.

Non ad id tamen infelicitatis accessit, ut omnem maiestatem pristinam exuerit: floret adhuc cum monumentis vetustissimis, tum mira ingeniorum ubertate. Ex monumentis duo tantum affigemus hic ad amussim effigiata. Ingenia, quoniam de iis iudicant Insuores, prorsus tacebo, ne in nostratibus diligens nimis, foris autem negligens videar. Turpissimum siquidem semper fore duxi adagio illo tritissimo, quo ajunt, *Asinos mutuum scabere*, merito inuri. In aedibus Nicolai Castellionei, cognomento Romani, marmor adspicitur, manu & ingenio diligentissimi artificis cum iis characteribus elaboratum:

V F
PETRONIVS GE
MELLVS VIVIR
SIBI ET VIRIAE
L F LVCILLAE
VXORI
C PETRONIVS PRI
MIGEN PATRI
SAMONIAE C F LV
TVLLAE MATRI
PETRONIO MARTI
A L FRATRI ET SVIS

Ab utroque candidissimi marmoris latere, duae vites nullis commendatae arboribus, insurgunt: quarum pampinis diversi generis aviculae insidentes, mira artificis marmorarii diligentia, uvarum acinos decerpunt. Literarum praeterea characteribus ita ad amussim accentus observati sunt; ut Petronius ipse omnino non nisi vir splendidus olim existimatus fuerit. Qui vivens tam accuratissimam sui, & suorum memoriam reliquerit.

Summa quoque animi voluptate nobis se L. Victulienus obtulit; qui memoriam adducit alterius Nicolai Castellionei Juris consultissimi; quem merito cum propter necessitudinem, quae inter nos est, tum ob singularem morum & eruditionis candorem, & amo & mirifice observo: in ejus igitur aedibus hanc memoriam inspexi:

L VICTV
LIENVS
VICTORI
NVS
VISV
MONITVS

In dextra lapidis elaboratissimi aquila visitur trunco insidens, quae in rostro avis pennam tenet: ad laevam altera aquila sphaerae supereminet, serpente mordicus tenens. Quid super hac sculptura consultus Andreas Alciatus Gaudentio Merulae rescripserit, accipe: *Quod petis*, inquit, *à me Hieroglyphica illa tibi explicem, quae à Nicolao Castellioneo accepisti, vix ausim ego quicquam scribere; ne quod dicitur, nocturnas Athenas. Adde, quod si pictum ad me marmor ipsum misisses, facilius aliquid certi possem commentari. Scis enim quantum referat suspectum certe mihi est nomen illud Victulieni, & forte adeo abrosum est marmor; ut non possit intelligi. Recte itaque feceris, si tu ipse in rem presentem eas adhibito pictore, mittasque ad me Iconem. Interim ne nihil respondeam, apud Homerum Iliados XII. Polydamas aquilam anguem ferentem significare ait rem infelicitate ceptam, & ex praescripto minus succedentem. Habes hac de re longum poeta carmen. At Artemidorus libro *Oneirocriticon* II. aquilam indicium mortis esse Virorum illustrium ait, quod Veterum moris fuerit, ut insignes Viros mortuos, & immortalitatem adeptos depingerent ab aquila vehi. Sed de hac re haecenus. Idem Alciatus Castellionum putat olim Castrum Stiliconis existitisse; à quo & familia per longa temporum intervalla originem traxerit. Cujus quidem familiae domum, quae ab Attila multos ante annos cum urbe ipsa Mediolani direpta, & solo aequata, reparavit Anspertus Mediolanensis antistes. Hanc rem satis ostendit marmorea Tabula ad sinistram oranti ad altare majus in templo Divi Ambrosii in urbe: in qua carmine, Musis (ut inquit ille) & Apolline nullo, & Stiliconis, & domus memoria legitur.*

Rursus à Castellione ultra Oronam procedenti ad occidentem solem recta in clivo velut in specula totus Giviratus lacus, quasi (ut opinor) Glareatus oculis subicitur: mox Morasentium vicus occurrit, Familiae Sentiorum longae celeberrimae

æternum fere monumentum: in sacra ædícula duo saxa ingentia, quadratissimaque & litteris semicubitalibus exsculpta visuntur. Horum, qui insculpti sunt, characteres tanto libentius hic adduco, quanto mihi videar familiam inter Insu-bres insignem hoc meo labore ab oblivione vindicare:

L S E N T I V S
L F
O V F N I G E R
S I G N I F L E
G I O I I I I
S C Y T I C A E
H I C N A T V S
H I C S I T V S
E S T

Ejusdem magnitudinis lapis alter marmoreus fratris memoriam continet: in quo & Legionis quartæ, quæ Scythicis gentibus opposita fuerat, mentio non ingrata legitur:

M S E N T I V S
L F O V F
M A C E R
V E T E R A
N V S L E G I O
N I S I I I I
S C Y T I C A E
S I B I E T
F R A T R I
V F

Quod Sentii, quorum meminit Corn. Tacitus, Insu-bres exstiterint, etiam declarat lapis ille, in ædícula Divi Petri ad vineam Mediolani. Cujus Inscriptionem non gravarer huc adducere, ni verer *ligna* (quod ajunt) *in sylvam ferre*: utpote in antiquariis Alciati adnotatam.

In eodem fano Morasentiorum in pariete marmoreo in lapide, fractoque, litteræ visuntur alijs fortasse Sentii memoriam continentes. Conjecturam facit verisimilem mentio legionis quartæ, in qua Sentii militabant. Et quanquam imperfecta sit, & injurias ætatis passa gravissimas, eam tamen memoriolam hic annectam:

V E T E R A N I
L E G I : : : : :
I O V I
V S S L M

Sane nobis arbitrari licet, propter Sentiorum militiam pro Rep. vel sub Imperatoribus egregie absolutam, post multa pericula, exantlatosque foris labores tandem domi in patria ocium cum honestate & gloria iis fuisse concessum.

Eodem in tractu Verbanum versus à Morasentio vico milliario ferme tertio Actiatum est familiæ Bossiorum oppidum sane antiquissimum, eminentibus in collibus constructum, lacumque Glareatum ad Septentrionem spectans. Quod quidem Actiacum appellare non dubitarem, nisi verer ad severos hujus ætatis Grammaticos, vel ad Amphictyones Historicorum ordinem causâ mea trahi. Hoc enim tempore usus inolevit, ut statim quod non habetur à Cosmographis, vel Historicis, tanquam nullæ prorsus desideretur Historiæ, vel quod omnia Cosmographi diligentissime observarint, repudiatur. Ogbanniant igitur quicquid velint nostri temporis Aristarchi; quod ipse sentiam, ingenue semper fatebor. Arbitror ergo oppidum ego istud vel à Græcis, quos in coloniam C. Cæsar descriptos misit, quos cum regionis ejus propter aeris inamoenitatem tæderet, in apriciores Insu-brum colles relicta colonia se recepere, esse conditum; vel potius ab Insu-bribus in gratiam Augusti, ob victoriam contra M. Anto-

nium (cui erant hostes infensissimi, ut legere est in tertia, quarta, & quinta *Philippica* apud Ciceronem) & Cleopatram ad ipsum promontorium, de quo diximus, Epiri. Idcirco Populi ut favorem Imperatorum facilius assequerentur, vicos alii, alii aras, ludos, trophæa, & hujusmodi assentationum genera certatim ædificabant, erigebant, volebant. Unde Maximus Vates†:

Actiaque Iliacis celebramus littora ludis.

Et Horatius*:

Jurandasque tuum per numen ponimus aras.

In Ligustico item littore non procul à Nicæa urbe vicus est, oppidum olim florentissimum, quem Trophæa Augusti Veteres nominabant, nunc audio ab iis Liguribus Villam Francam vocari. In Insu-bribus item (ut infra dicemus) Cæsar's Ara fuerat. Nulla igitur aliquem detineat admiratio, si oppidum istud Actiacum nominavimus, nullum sequuti auctorem, sed solam conjecturam. Id autem fecimus, cum ob situs, tum ob nominis similitudinem. Imminet enim Glareato lacui, quem Giviratum diximus appellari, velut Actium Epiri Ambracio mari, quod nostra ætate Larte nuncupant. Fuerit igitur vel à Græcis in coloniam deductis à Cæsare Novocomum, à Rhætis vastatum: five ab Insu-bribus in apertam erga Cæsarem Augustum adulationem conditum, oppidum est hac nostra commemoratione dignissimum. Gaudenti quoque Merulæ sequor opinionem, qui in antiquitatibus suis Cisalpinæ Galliæ montem Robium inter Brianteos colles, quos melius Briganteos diceremus, vini & copia & præstantia celebrem, Orobiorum non Robium plurimis argumentis, quæ recensendi non est locus, dici debere existimat. Multa ipse prætereo oppidorum nomina plane Græcæ inter Insu-bres, hac tantum de causa, quod in iis Andreas Alciatus fuit plusquam oculatissimus. Possem, si Historiam vel Cosmographiam absolutam scriberem, super hac re centenas (si tamen ocium mihi scribendi concederetur) Inscriptiones adducere; in quibus nomina sunt Pelasga: qualis est illa, quam Lomacii haud longe à Novocomo nuper repertam in marmore Pano vidimus:

M A T R O N
V S
I E S I X T I V S
A G A T H O N

Votum (ut suspicor) Veneri & Junoni exsolatum. Crater insculptus cum urceolo, è regione utriusque sacrificium notat. Hunc porro Iesix-tium non absurdum esset arbitrari unum ex colonis, quos D. Cæsar Novocomum misit. Credibile item Actiacum majoris cum amplitudinis, tum dignitatis, quam nunc sit, oppidum existisse. Hujus rei facili argumento est Buguciacum, illinc non procul pagus, ac si barbære diceretur Burgum Actiaci: pauloque inferius in lacus ejusdem margine Cactiacum jacet villula, & ipsa satis exigua, ac si dixeris Castrum Actiaci. Non possum aliquando non plurimum admirari, cum plures Bossiæ familiæ, quæ adhuc hac in urbe florens est, eruditiores viros, & qui satis diligenter nostræ urbis Annales conscripserunt, & circumadjacentium populorum (de iis maxime loquimur, quæ ad ejus familiæ honorem, gloriamque pertinebant) origines & nomenclaturas non observasse. In Castro Actiaci plurima antiquitatis monumenta satis insignia visuntur. Sed pleraque in caverna à viatoribus obtrita interpretationem non admittunt. Quorum primus est Tavius nescio quis; loci

† Virgilius *Æneid.* III. v. 280.

* *Epist.* I. lib. I.

illius accolæ *Tavium* pro Octavio pronunciant, ut pleraque alia nomina. *T. Avium* magis legrem. Et quicumque is Tavius fuit, & ab imperitis male habitus, cæteris tamen annectetur:

TAVIO TFSIM:::
ONTCONRTAVI
VSSVRVSRAP
:::IE::PIF::IVIRIX
IESALV::ET
SIBI:::

A oppido Actiaco ad Givirati lacus initium quindecim tantum stadia intercedunt. In lacus ortu celebre Monasterium visitur: quod à loci situ caput lacus, amoenissimo in colle aquis undique scaturientibus, universæ circum regioni imminens, cognomentum servat. Sunt qui dicant templum cum Cœnobio à viro ejus regionis primario, Regibusque Longobardorum carissimo, conditum fuisse: cui Cœnobio nunc præest Hermes Stampa Apostolicus Protonotarius, Cæsareus Senator, litteris ac singulari humanitate præditus.

Ad læviam lacus Glareati, cujus longitudo stadia LX. non excedit, occidentem ad hyemalem duo lacus minoris quidem longitudinis & latitudinis Glareato adhærent, in quem etiam se exonerant; à diversis quidem pagis circum jacentibus nomina sortiti: ab insignioribus tamen, Anterior Monacii, seu Monecii, posterior Ternati, vel Terlacus, & Marchalli oppidorum servant nomina. In lacuum ambitu & collium verticibus tot sunt ruinarum moles ingentes, quot alibi videre licebit mihi. Hoc etiam in tractu Gallorum Insuorum duo lacus minoris quidem longitudinis & latitudinis Glareato adhærent, in quem etiam se exonerant; à diversis quidem pagis circum jacentibus nomina sortiti: ab insignioribus tamen, Anterior Monacii, seu Monecii, posterior Ternati, vel Terlacus, & Marchalli oppidorum servant nomina. In lacuum ambitu & collium verticibus tot sunt ruinarum moles ingentes, quot alibi videre licebit mihi. Hoc etiam in tractu Gallorum Insuorum

Idem præterea notant quæ supersunt oppidorum nomenclaturæ: veluti Marchallum, quæ quidem dictio Celticam magis, quam Latinam, vocem sonat: *Marcham* etenim Celtæ equum dicunt; unde & *marcare*, hoc est, equitare. Tametsi doctissimus Vadianus Helvetius, in *Commentariis suis in Melam*, *Mark* Germanicam dictionem, quæ limitem exprimat, esse contendat: unde & Marchiones limitaneos Duces, vel limitum custodes & defensores dictos arbitrat.

A Marchallo haud longe abest Daverii vicus haud ignobilis. E regione Daverii Occidentem versus collis in altum extollitur, ita sensim in acutum tendens, ut obelisei magis, quam collis, effigiem præstet intuentibus. In cujus vertice olim turris fuit altissima: cujus etiam nunc vestigia & quidem ingentia visuntur. Turderiam vulgo collem ipsum nuncupant: verisimilius tamen Turrin aeream olim fuisse appellatam existimamus.

Eo quoque in tractu versus Ticinum, Cimbrium est vicus, olim, ut arbitror, celeberrimus: nunc vero colonis semivacuus neglectui est: cujus tam manifesta cognatione nominis arbitramur post insignem illam C. Marii & Catuli de Cimbris in agro Novariensi (ibi siquidem & victoriæ & conflictus typi sunt Candium & Castra Mariana oppida intra Ticinum & Sesitem flumina adhuc celeberrima) patratam cædem, eorum reliquias ad Insuobres, qui nondum pacato erant in Romanos animo, se recepisse; & ab illis per id locorum fedes fuisse concessas, facile crediderim. An magis est verisimile, Cimbro illos in Insuobres nomini Romano hostes infensissimos, ut ibi sedes firmarent, & se mutuis cædibus conficerent, immixtos esse? ut hujusmodi Barbarorum colluvies adversus Insuobrum conatus ipsis veluti propugnaculo esset. Traductionis facilitas, loci opportunitas, rei quam successuram Romani arbitrabantur utilitas, nomen denique pagi ejus non procul à Ticino flu-

mine, facile arguunt, atque etiam mente capto persuadent, Cimbrorum captivorum sex myriadas, quas servatas à Romanis in *Vita C. Marii* Plutarchus refert, his in locis, Romanis concedentibus, desedisse. Credere enim debemus victis loca ad habitandum fuisse permissa, quibus victores vitam, quam jure belli poterant extinguere, condonarint.

Sed postquam de Cimbris mentionem fecimus, (tametsi instituti non sit nostri limites Insuorum transgredi) libet tamen referre. Paulo ultra Cimbrium Angleriam esse diximus: ab eoque oppido ad occidentem partem altius ad xv. millia passuum Thosam fluvium in Verbanum influere. Amnis hic haud dubie olim Athiso dictus est: cujus ripas Catulum C. Marii Collegam vallo & fossa munivisse legimus, ut Cimbro & Teutonas à transitu Alpium prohiberet, quos ab earum saltu arcere non poterat. Recentiores male Græcum Plutarchi codicem sunt interpretati, dum pro Athifone Athesim fluvium, qui Veronam præterfluit, posuere, Titi Livii errorem sequuti, qui celebritatem Gallicam pertæsus, & Venetæ gloriæ studiosissimus, Athesim pro Athifone scripsit, quod illud Veronensis, hoc Novariensis flumen esset agri. Constat siquidem inter Auctores omnes (illum unum semper excipio) flumen illud, apud quem superatis Alpibus Cimbris confedere, duorum tantum dierum itinere ab eo loco, in quo superati sunt Cimbris, à Vercellis distare. C. enim Marius castrametatus fuerat citra Sesitem, non procul à Vercellarum urbe, in agro tamen Novariensi, quem locum accolæ Camarianum vocant, peritiores Castra Mariana. Porro Candius ager nunc Candia dicitur, Lacmellini tractus oppidum non longe à Pado. Huic nostræ opinioni calculum adjicit Eusebius Chronographus diligentissimus, qui Cimbro attestatur à Romanis profligatos, non procul ab urbe Vercellarum & Pado. Verum cum Castra Mariana, licet agri sint Novariensis, proxime tamen sunt Vercellas, quam Novariam. Iccirco falso hæc in Vercellensi agro gesta produntur ab Auctoribus, qui hæc interstitia prorsus ignorabant: hujusmodique victoriæ nomina semper sumunt à locis proximioribus. Porro Athesim sex dierum spatio, cujuscunque etiam exercitui expeditissimo, distare ab illis Alpibus, per quas Cimbris transire, nemo est, qui ambigat. Thosa igitur fluvius, seu Athiso, à Summis Alpibus, à quibus & Ticinus ortum ducit, effluit: non tamen eodem, ut Ticinus in Austrum, cursu, sed hyemalem in Orientem primo per Antigoriæ vallem præceps ruit: mox in vernalem Orientis plagam conversus ad Creolæ pontem, (ita Inalpine populi illi nominant) fluvio Veteri immiscetur, hinc mox dilapsus Oscellam oppidum, quæ & Domossula vocatur, quasi Domus oscellana, deinde præcipiti cursu Vogoniam alluit: cujus incolæ miræ eruditionis vir, & diligentia, Ægidius Tschudius in libello, quem edidit de antiqua Rætia, Agones nuncupat. Universam igitur vallem duo flumina juncta in Verbanum simul influunt. Fluvius porro, quem ad Creolæ pontem Thosæ diximus admisceri, à valle, per quam cursus est illi, Veteris nomen sumpsit: ab Alpibus incipiens, quibus recta itur in Sedunos. Quas quidem Alpes eas esse crediderim, de quibus tertii *Commentariorum* libri initio Cæsar meminit: quas quoniam magno cum periculo, magnisque portoribus, mercatores adire consueverant, patefieri voluit. Quo quidem itinere fidem memoria nostra utebantur, dum Nundinæ, quæ nunc Lugduni habentur, Genævæ excercerentur. Breviori etenim itinere, minoribus quoque impensis, è Gallia per eum transitum in Italiam Lemanno & Verbano lacubus, demum per Ticinum & Padum apportabantur mercès: hæc Al-

pes Transalpinorum lingua, Seduna videlicet, quam Tschudius Celticam arbitratur, Graji vocantur. In Ptolomæi annotationibus ex recentioribus sunt, qui vocem hanc *Gratas*, hoc est, faciles, interpretentur. Quæ res effecit, ut non defuerint qui Alpes ipsas, eas esse existimarent, quas Prisci Grajas appellarint; quod omnino falsum est. Alpes enim Grajæ sunt juxta Tarantasiæ, Ceutronum metropolim, ad vallem Augustæ Prætoriae: porro inter Alpes Grajas, ubi Tarantasia est, & vallem Ocellæ, qua ad montem Sempronii in Sedunos itur, plurima regio intercipitur. Itali materno fere idiomate *Sempioni*, eruditiores montem Sempronii appellant. Plerique & quidem docti (nomina eorum honoris gratia subitico) falso ex *Commentariorum* verbis arbitrati sunt Alpes Summas hoc in loco esse.

Sed de hac re plura: redeo in Veterem Vallem, in qua propter itineris angustias, plurima ex parte mons operariorum manu incisus visitur, maximum omnino Cæsarianæ munificentiae testimonium, nisi in montis excisi fornice insculptæ saxo literæ, notis quidem Græcis, sed quæ tamen in hanc usque diem intelligi nequeant, Gallorum, (ut reor) vel Germanorum opus esse indicarent. Quicquid ibi contineatur, quando insipientibus non sit obvium, barbarum arbitror; fortasseque Burgundionum idiomate confectum. Hi siquidem populi, quos Burguntas (ut existimo) appellat Ptolomæus, olim ad Vistulam usque fluvium Germaniam incolebant, hosque postera ætas Burgundos vocavit. Qui paulo post primam Gothorum in Gallias eruptionem, Sequanorum Provinciam occuparunt, cujus metropolis est Besuntium, ab antiquioribus Vesuntium nuncupatum. Cum vero gentes Burgundionum bellaces in Italiam ad bella vocarentur, à Gothis præsertim contra Mediolanensium vires rebelles, qui Bellisario adhæserant: à quibus tandem post longam difficilemque obsidionem urbs ipsa ferro, fame, flamma vastata est, haud dubie in Italiam convolantibus eorum iter expeditius fuit à Besuntio per vallem, quam Dubis fluvius alluit, in Ararium se exonerans: mox in Antuates populos, quorum meminit Cæsar, vulgo *Pays de Vaux*, deinde trajecto Lemanno lacu, vel Rhodano flumine, per Veragros & Sedunos, superatis Alpibus, quas Sempronii esse diximus, vulgo *Mont Sempion*, per vallem Veterem, ubi mons excisus visitur, novissime in vallem Domosilulæ descendisse crediderim. Trajecto postmodum Verbano in Insubres irrupisse per Lavenum: qui portus est Verbani celeberrimus. Neque lectorem locus hic moveat quod Antuates ad latus Lemanni lacus pro *Pays de Vaux*, juxta Cæsaris sententiam, locaverimus. Et quod idem Cæsar libro iv. Rheni fontem describens, per fines Nantuatum primo fluvium ipsum ferri asserat, qua è re Cæsaris descriptio integra esse non posset: Populos videlicet eosdem ad Rheni ortum, & ad Lemannum lacum pertinere; locis haud dubio trium dierum itineris spatio inter se distantibus: animadvertat igitur prudens lector Cæsarem in nullo sibi non constare: iccirco in quarto *Commentariorum* non Antuatium, sed Ætuatium ipse potius legerem. Populi etenim ipsi, teste Strabone libro iv. ortum Rheni incolunt, cujus verba subjiciam: *Rheno autem vicina omnium primi colunt Ætuatii. Quibus fluminis origo vicina est in Diaduella monte, quem alii Adulam vocant.* Hunc locum dominus Ægidius Tschudius Helvetius diligentissime annotavit. Populos eos, qui anteriorem Rheni fontem habitant, (habet enim Rhenus duos fontes diversos, & uterque Rhenus appellatur) etiamnum *Tuischer*, vel *Tuerascha* nuncupari: corrupto, (ut ipse existimat) Ætuatiorum vocabulo.

Decimo à Laveno lapide versus urbem Besu-

atium occurrit oppidum in apricissimo colle; unde Besutiorum nobilis Familia traxit originem. Eo in oppido vetustissima Imperatorum & Regum privilegia leguntur. Et quoniam, eversa à Gothis Mediolanensi urbe, lectum est apud idoneos auctores, octo millia mulierum Mediolanensium dono à Gothis Burgundionibus datas, non absurdum esset existimare, cum sarcinarum onere, tum mulierum lachrymis & precibus delinitos in illo amœnissimo tractu Burgundiones substituisse: aut eorum saltem ibi sedes firmasse, oppidumque ipsum ab eorum metropoli Besuntio, Besuntium nominasse. Cæterum cum *N* illud ante vulgi auribus nimis intonaret, paulatim ea subducta litera dixere Besutium. Sed à diverticulo (quod ajunt) repetatur fabula.

Si qui sunt, qui minus credant gentes istas Græcis characteribus usas fuisse, conferant se ad *Commentaria* Cæsaris libro primo; & ibi aspicient Tabulas in Castris Helvetiorum repertas notis Græcanicis scriptas: quos tamen constabat idiomate Græco non locutos: sed quo & hodie utuntur Celtico, alioqui Cajo Cæsari, qui Græcam æque ut Latinam linguam noverat, cum Helvetiis & Germanis opus interprete non fuisset. Hæc obiter diximus, in Athisonis seu Thosæ, præter spem, mentionem incidentes. Nunc (ut dicitur) ad pensum redeo.

In agro Daverii antiquissima marmora non desiderantur, quæ facile arguunt ejus pagi vetustam nobilitatem: qualia sunt, quæ sequuntur duo ista:

M E R C V R I O
V S L M
A N T O N I V S
M A X I M V S

Eodem in oppido, ante fores Templi, in lapide duas in parteis fracto, in prima legere est:

V S F
S E X
A T I L I V S
S I L E N V S

DAVERIO vico Ternatus viculus succedit, qui superiori lacunculo nomen indidit: cui collis Divo Jacobo dicatus imminet: habens in vertice castrî diruti vestigia. Mirum est videre casturrium & moenium disjectas moles: quæ vel stulto possunt arguere, quanta fuerit castrî ejus auctoritas. Ab eo montis cacumine brevi spacio tres lacus oculis subjiciuntur, Glareatus, Ternatus, qui oppido nomen indidit, & Monatius. Ternatum porro dictum arbitraret à terna natatione, vel, ut quibusdam placet, quasi Trilacum: hoc in oppido alterius Atilii tumulus inspicitur.

Apud Daverium, Veriorum sedem vel domum, quamplures familias nobiliores olim habitasse, quæ penitus interierint, credibile est. Veriorum cognomento, ex pagi nomine tantum retento, argumentum sunt situs amœnissimus & perspicuus, tum & antiquorum monumentorum spiræ, & epistylia quamplurima: adfunt præterea Inscriptiones, ex quibus duas tantum annotavimus, Antonium Maximum & Sex. Atilium: huic & alterum C. Atilium annectere libuit, ut simul opera nostra (si quid tamen mea carmina possunt) viverent, cum accolarum incuria pedibus pene obtritæ, ac brevi omnino periturae essent memoria:

C A T I L I V S
L F P O L L I O

De Monaco, seu Monetio vico, qui ulteriori lacui cognomen dedit, nihil est quod referam, præterquam quod ejus nominis oppidum inter Japides populos, cujus accolæ Gallico more armari Strabo meminit. Nos lacum ipsum cum oppido à Mona, sanctissimo Mediolanensium Præsule, nomen traxisse existimamus: qui primus in Urbe nostra **CHRISTO HVMANI GENERIS REDEMPTORI** (ut in Annalibus vetustissimis, quæ apud me sunt, legere est) templum erexit: idemque Apostolis alterum in Monato; quod quidem hac etiam tempestate Sacerdotum Collegio decoratum videmus. Floruit Monas post Virgineum partum annum circa octuagesimum post centesimum. A duobus lacubus, & Cimbris recta in urbem tendentibus in colliculorum velut faucibus, objicitur Cloniola villula, olim Cloniola absque dubio eo loci à Romanis deducta. Cum enim M. Claudio & C. Cornelio Coss. in Rom. ditionem à multis illatis, acceptisque cladibus tandem Mediolanum devenisset: reliquumque Gallorum Insuorum (qui ne servitutem subirent, exilium potius honestissimum sibi elegere) robur in proximas Alpes se recepisset: huic nonnulla loca in montibus Romanos concessisse Polybius refert; quo, ne irruptionem molirentur, Cloniolam hanc fuisse deductam quis est, qui sibi id non persuadeat? Hujusce rei nec leve præstat argumentum, quod paulo superius Angleriam ad Verbanum lacum, inter Besuntium seu Besutium, de quo mox dicemus, & Lavenum Verbani portum ad Cuviae vallis ingressum Legiunum (ita oppido nomen est) adjacet. Cujus ditionis denominatio (ut in plerisque aliis videmus) paululum detorta est, dempta *O* litera, & ultima *A* in *M* mutata, à Legione una factum est Legiunum. Porro ad cohibendos tam Gallorum quam Germanorum tumultus, à Romanis olim legionem unam locatam fuisse nominis similitudo primum facit: tum oppidi antiquitas ex tot ruinarum congerie, & lapidum inscriptionibus, loci quoque opportunitas: adjacet enim Laveno portui, ad quem ex Summis Alpibus, & à Veragris, Sedunisque barbaræ gentes in Insuores primum, mox in totam Italiam confluere assueverint. Et eo facilius ab una legione Legiunum oppidum nomen sumpsisse crediderim, cum & in Tarraconensi Hispania urbs celeberrima à Romanis legionibus, quæ diutius eo in loco subsistere, nomen sumpsisse, passim omnes auctores tradant. Quæ quidem paucis fere mutatis Legium nomen adhuc retinet. In Provincia quin etiam Narbonensi Arlate urbs antiquissima Sextanorum, & Biterra Septumano-rum, haud dubio à sexta & septima legione cognomen obtinere; veluti & Narbo, quam Decumanorum Coloniam appellat Pomponius Mela à decima legione, & Arausio Secundanorum. A legionibus igitur ipsis in plerisque regionibus urbes & oppida à militum ordinibus nomen deflexisse est clarissimum. Capitolinus in *Clodio* legionis Quatanorum meminit. Tacitus quoque in primo libro *A mal.* de Quintanis & Undecimanis militibus mentionem facit.

Sciebant igitur Romani Insuorum bellaces gentes, mortis contemptores, paratos potius quodcunque excidium, quam servitutem, pati. Idcirco ad cohibendos tumultuosos eorum impetus legionem hanc statutam eo in loco fuisse, & Cloniolam deductam, quæ eorundem plusquam virilem audaciam exciperent, credere non est absurdum: licet de hac re ne verbum quidem apud auctores reperies; si quis tamen hac in re negotium mihi facisset, ei possem respondere, historias eorum præsertim temporum, quas habemus, mancas & mutilas non modo non exiliter, sed vitio temporum eorum partem maximam desiderari. Ad hos igitur Gallo-

Arum Cisalpinorum conatus, quorum nomine (si Sallustio, Polybioque credimus) nihil à Romanis tetrius, horridiusque audiebatur, credibile est Cloniolam hanc à Romanis constitutam fuisse, & legionem unam, ut diximus, ubi nunc Legiunum est, locatam: ex oppiduli ruinarum reliquiis, quanta olim ejus fuerit amplitudo, facile dignoscitur. Ea in villula Nævii Secundini memoria visitur in stylobate elaboratissimo:

S A C R V M
N V M I N I
A P O L L I N I S
L N A E V I V S
S E C V N D I N V S
P R O
S A L V T E S V O
R V M
T V M V L
V S L M

In oppido Legiuno:

D M
V F C I V L I V S
G R A T T I A N V S

Eodem in Templo:

C **✠** HIC S̄CI PRIMI MARTYRIS CORPVS VENERANDVM IN X̄PO HVMATVM QVIESCIT. QVOD DEO DIGNVS SERGIVS PAPA IVNIOR EREMBERTO INLVSTRI VIRO CONCESSIT AB VRBE ROMA CVM HYMNIS AC LAVDIBVS SPIRITVALIB. Q. CANTICIS DVM ESSET TRANSLATVM QVEM INTER S̄CTOS EIVS S̄PVS TENEAT PRIMATVM IN MVLTIS VIRTVTIB. ET SIGNIS EST DECLARATVM; RECONDITVM EST CORPVS BEATI PRIMI MARTYRIS CVM RELIQVIIS S̄CI FELICIANI ANNO INCARNATIONIS D̄NI N̄RI ĪHV X̄PI DCCCVI KL AVG. INDIC. VIII. ORDINANTE DOM. ANGILBERTO ARCHIEP̄O ANNO XXIII. PASSIO S̄CTORVM VI ID. IVN.

PAULO infra Legiunum & Besuntium seu Besutium æqua in planitie, quæ tamen colliculis sensim assurgentibus adhæret, haud longe à Verbano lacu, Brebia oppidum visitur, tot antiquissimis monumentis refertum, ut maximam sui etiam nunc præ se ferat majestatem. In eo templum Minervæ fuit: cujus adhuc ingentia cernuntur vestigia: Balnea quin etiam, lavationesque eo in loco fuisse lapidis vetustissimus inscriptusque docet. Tempia quoque duo insignia continet, in quibus maxima pars antiquariorum locata est. Oppidi nomenclatura (ut eruditioribus placet) Græcam refert dictionem Bræbium, quasi victoriam, seu victoriæ præmium dicas; vel *Λόδος & Βεργίλιος*, quo nomine utitur Clitophon pro decoro & pulchritudine. Utraque interpretatio nobis arridet. Loci tamen situs indicat hoc in tractu inter duos lacus, Verbanum & Giviratum, circum vicinos populos olim Quinquatrios Ludos Minervæ celebrasse: tametsi ob politiore structuræ formam oppidum ipsum à pulchritudine nomen sumpsisse potuerit. Omnino olim maximum, nunc prope funditus dirutum, Vitelliano tamen ex Vicecomitibus illustri Comite, integerri-moque Viro gloriatur. Qui oppido ipsi, ut & plerisque aliis vicis & castellis, ultra citraque Ticinum annem paterna hæreditate dominatur. Ex eodem quoque oppido Brebiorum familia Mediolanensis originem traxit; ex qua Hieronymus Bre-

bitus noster, cui ob singularem prudentiam & fidem à Carolo V. Imperatore in Insubribus suprema Ærarii cura demandata est, originem ducit. Ex pluribus monumentis, quæ eo in oppido visuntur, duo nec satis integra adduxisse sat fuerit:

CN TERENCE PRIMO III VIR TERENCE
C IVCCV QVI VICIN. HABITANTIB.
LAVATIONEM BALNEO : : : OPTATISS.

Item :

D M
L COELIVS LFOVF
BARONIS
VIVIR PONTIFICII
III VIR ITEM TEMPLI
MINERVAE ET ALBV-
TIAE VXORI EIVS
COELIVS PAREN. OPTATISS.
M: : : :

Ad montium radices, quorum in vertice sanum est totius fere Italiae, Lauretano dumtaxat excepto, celeberrimum, DEIPARAE VIRGINI dedicatum: ultra Glareatum lacum ad Septentrionem, quo in loco tum primum colles in altum extolluntur, Varisium jacet omnium Gentium Alpinarum, quæ inter Summas Alpeis, Lucumonen, & Adulam, ut Tschudio placet; ad nos attinent, præfectura frequentissima & opulenta. Non defuerit summa eruditione viri, qui istud oppidum vicum Varronis appellavit, levissima admodum similitudine nominis adducti. Ego ex Blondo didici, inter Æquicolas olim vicum Varronis existisse, qui ætate sua Amænis diceretur. Sunt item, qui à Græca dictione Varisium deductum velint, Theopompī auctoritate moti: qui Varetinam regionem haud longe ab Hadria constituit. Cumque nullus locus ejus nominis per eas partes reperiatur, facile ad Varisium oculos adjecere. Sed ego loci situm inspiciens (ut interim taceam eruditorum nonnullorum opinionem) à Vallium exitu, quæ in id oppidi plurimæ finiunt, Vallexium sive Vallexitum potius dixerim. A duobus enim lacubus, Verbano & Lucano, de quo mox dicendum erit, valles & circum jacentia itinera in Vallexitum recta extenduntur, & ab Alpius ipsis ad lacus, & à lacubus, plurimi montes in Vallexitum procurrunt.

Sed postquam in id loci incidimus, ubi de earum Alpius tractu, quæ Ticinum emittunt, fit mentio; unum & illud annotasse operæ precium fore duximus. Inter Leopontiorum Vallem, quæ hodie Leventina dicitur, per quam Ticinus amnis rapidissimus à Summis Alpibus (nunc Sancti Gothardi) decurrit, & Vallem vulgo Mesochi, quam Mesus fluvius alluit à culmine Ocelli, (vulgo Sancti Bernardini monte) descendens, tertia Vallis inter duas continetur, (Breuniam vocant) quæ & ipsa à Lucumone monte, nunc Sancti Barnabæ nuncupato, flumen evomit, quod supra Bilinzonam oppidum seu Bilicionis Castrum, ut recentiores volunt, apud Polegium vicum cum Ticino in unum coalescit: ut inquit Ovidius:

Majori perdit nomen in amne minor.

In valle ipsa habitare populos, qui Breunii vocentur, nominis cognatio declarat: ut interim taceam Plinium hoc loco, qui in eo Alpius latere, quod ad Insubres spectat, penes Leopontios locat.

Sed cum de oppidi ipsius nomine inter eruditos non satis conveniat, (plurimæ enim diversæque appellationibus nuncupatur) quid & nos de oppidi ipsius nomenclatura sentiamus dicere non gravabimur. Sunt qui Birinzonam, Bellizonam alii, seu Billinzonam vocent. Quo argumento recentiores Bilicionis castrum dixerint, nec illi aperuere, nec ipse video. Nos oppidum à Breunis populis cognomen-

mentum obtinuisse facile crediderimus. Itaque non Bellinzonam, vel Billinzonam, vel cum neoterici Bilicionis castrum; sed potius Breunorum castrum, vel Breunizonam dicerem, quasi Breuni agri zonam, sive sectionem, aut finem: calculum huic opinioni addunt Alpius & vallis Breuniae accolæ, à quibus ætate hac etiam *Bronzona* pronunciat: quæ quidem vox cognatione ipsa ad præscam populorum appellationem satis videtur alludere.

Nunc ad vallium topographiam, quibus à duobus lacubus in Vallexitum iter esse diximus, nostra festinet oratio. Plures à Verbano & Lucano lacubus valles in Vallexitum finiunt: sed quinque sunt insigniores. Prima ad Lavenum Verbani portum extenditur; cui è regione ultra lacum est Intrium, & Pallantia, haud procul à Thofæ sive Athisonis ostiis in Verbanum; & quo in loco Sequanorum, seu Burgundionum iter, à Besuntio eorum metropoli, in Insubres descripsimus. Adhæret huic valli Cuvia, à vico olim, & nunc vallis præcipuo, nomen sortita. Cujus ditio antiquissimæ Cottarum familiæ inter Insubres paret. Hanc vallem carmine elegantissimo olim Jo. Stephanus Cotta, Poeta percelebris, vallis ipsius Regulus, quando descripsit, ad Gannen hoc meo ordine tertiam redeo. Hæc aurifodinis & præscæ æque ut & opulento Monachorum Coenobio celeberrima est. Hæc in oppidum Lovinii juxta Verbani partem alteram viatorem sistit. Sunt qui hoc Lavinium vocent, quamobrem viderint ipsi: ego communem usum loquendi, quo planius intelligar, sequor. Lovinio proximum est Germiniacum oppidum vulgo nuncupatum. Inter hoc & illud Trissia fluvius, qui Lucanum lacum exonerat, in Verbanum dilabatur. Putarem autem hujus brevissimi tractus fluvium, quo abundat, à losa pisce, qui à Græcis *beïssa* dicitur, denominatum. Lucanum porro lacum Albutius nostri temporis Poeta insignis, & qui olim magis nominabitur, partem Verbani existimat Germiniaci nomenclatura motus, quasi velit interpretari Geminum lacum: tam contracto enim cursu Trissia Verbanum ingreditur, ut unus idemque lacus videatur; præsertim cum de Lucano, de quo & à nobis aliquid referetur, nulla ab antiquis auctoribus, quam ipse viderim, facta sit mentio. Quarta vallis per vicos Induni, Arcifatis, Vigluvi clivum usque protenditur, indeque ad Lucanum excurrit lacum, & ad eam lacus partem maxime, quam portum vocant. Quinta & ultima à Stabio ad ripam Sancti Vitalis viculum, qui caput lacus appellatur, excurrit. In alteram mox Lucani partem recta tendentibus occurrit. Vallis hæc Novocomensi ubi vicina est & proximior. Elegantissimæ in Vallexio, sive Vallexito, antiquitatum Inscriptiones leguntur. E quibus ne sequentia perirent, hæc tria monumenta viva reddidit sua commendatione Alciatus. Quartum in ordine nuper Ambrosii nostri Calimeri opera, qui hujusmodi deliciis oblectatur, apud nos vivit:

I O M
C C A N I A
N V S A R A M
V O T A M
F
L M

Alio quoque in loco:

M A X I M A
V E R A
I D E A
I O V I S

Id etiam antiquitatis ibidem visitur:

S E X
P A E O N I S
M A R C E L L
F I L

Hoc Calimeri nostri diligentia repertum est :

MACRINAE
VERINAE
VALERIVS
LVPIO
CONJVG I
CARISSIMAE

Vallexio recta ad Lucanum lacum contenden-
ti, in valle, cujus à nobis habita mentio
est, Arcifate oppidum sane (ut ipse arbitror) vetu-
stissimum est. Antiquitatem luce clarius arguunt
elaboratissima plurimarum Inscriptionum monu-
menta. Sunt qui arbitrentur, & pro certo habeant,
municipium hoc à Priscis Aram Cæsaris fuisse nun-
cupatum : sed dictionem ajunt contaminatam à vul-
go passim corrumpente omnia. Argumentum hu-
jus rei trahunt à marmore, mixæ cum vetustatis,
tum elegantiae, nuper à ruderibus sterquilini &
oblivione extracto, diligentia Nicolai Castillionei
Jurisconsulti, & mea : auxilio autem Mayni Moc-
cioni, ejus vallis opum magnitudine primarii.
Ex cujus Inscriptione, qui aderant docti homi-
nes, argumentabantur id oppidi à vetustioribus
Aram Cæsaris fuisse appellatum. Nihilque referre
attestantur, Mercurio an Cæsari hæc dicata fue-
rit Inscriptio à L. Cominio. Quando Augustum
constet fuisse Mercurium appellatum à Romanis.
Superque hoc negotio Horatii carmen celebratissi-
mum illud adducebant, lib. I. Carm. ode II.

Sive mutata juvenem figura.

Ales in terris imiteris alma

Filius Maja patiens vocari

Cæsaris ultor.

Itaque ego, qui nolo in re tam tenui superstitio-
sus nimis videri, potius illis assentitus sum, quam
adversarios in me concitare. Cum vero quid &
ipse de hoc sentiam paulo post sim dicturus, re-
deo ad L. Cominium. De quo ut plenior cogni-
tio habeatur, ipsam prius Inscriptionem adnectam,
deinde quis fuerit, conabor explicare :

MERCVRIO
L COMINIVS
POLLIO
MILES LEG
XIII GEM
BENEFICIA
RIVS LEGATI
CONSVLA
ARAM ET
TECTVM
VSLM

Cum ex primo *Belli Gallici* commentario C.
Cæsarem ex hac nostra Cisalpina Gallia delectum
in Helvetios traduxisse existimetur, non ab re
aliqui L. hunc Cominium Insu-
brem à Cæsare in militiam adscriptum fuisse : deinde cum diu &
felicissime rem navasset, vacatione militiæ non
donatum modo, sed privilegiis & muneribus à
Galba, vel aliquo alio Cæsare, honestatum in
patriam secessisse in otium perpetuum. Huic opi-
nioni nec refragabor, nec assentiar. Ipse autem
arbitror L. hunc Cominium, cujus & familia
apud Insu-
bres aliquid nominis decorisque reti-
net, non Cæsari, sed Mercurio, qui Insu-
bribus maximo honori fuerat, cum quod mercibus & la-
cubus præesset, tum quod Matheseos periti Cli-
ma hoc nostrum sub Mercurii tutela esse velint,
aram dicavisse.

Cæterum cum hujus rei gratia in hanc arenam mi-
nime descenderim, ad tria illa elementa GEM. in-
terpretanda me recipio. Verum hac in re sciant
omnes non dici à me, quod sit certissimum, sed
quid ipse sentiam. Sunt qui *Geminata* interpreten-
tur. Ego *Gemina* potius dixerim, velut ex duarum
reliquis unam factam legionem. Cujus etiam men-

tionem habemus in *Commentariis de Bello civili*. Corn.
etiam Tacitus Historiarum auctor diligentissimus
libro decimo nono, legionem hanc Geminam iis ver-
bis celebrat : *Vulgata*, inquit, *victoria post principia*
belli secundum Flavianos dua legiones VII. Galbiana,
XIII. Gemina cum Vidio Aquila Legato Patavium ala-
cres veniunt. Hæc ille. Ex iis itaque verbis colligi-
mus Legionem XIII. agnomento *Geminam* fuisse.

Occurret hoc loco Sciolus mihi aliquis Gallico
nomini infensissimus, dicens, auctoritate T. Li-
vii non emitti optimum peditatum à Gallia Cisal-
pina. Huic autem ego Ciceronem, qui fide & au-
ctoritate decem T. Livii antecellit, fortiter oppo-
suerim ; qui tertia & quarta *Philipp.* Citeriorem
hanc nostram Galliam *Florem* vocat *Italia*, *Imperii*
Rom. presidium, & *pacis ornamentum*. Peditatui præ-
terea Alpino palma datur ab Historicis. Lectum ad
hæc est à Galba duas legiones has in Gallia scriptas
esse. Arbitrantur ergo Legatum hunc multi, de
quo in lapide fit mentio, cujus beneficiarium L.
Cominius se fatetur, Vidium Aquilam fuisse.

Dum hæc memoriæ proderem, mea & Merulæ
diligentia, in Herculearum Thermarum funda-
mentis in urbe hac nostra, ubi nunc Divi Laurentii
fanum colitur, marmoreus lapis est inventus, in
quo ejusdem Leg. XIII. Geminæ memoria inest :
cui Rufinus non solum Tribunicia, sed alius ge-
neris auctoritatis pollens præerat. Inscriptio pluri-
ma ex parte contracta est, & tot super ægestis ædi-
ficiis ita inter cæmenta fuerat obruta, ut nisi ruina
eam aperuisset, lucem nunquam erat visura.
Utrunque marmor unius ejusdemque lapidicinæ,
qui Cominii memoriam sculpsit, eandem præ se
fert manum. Ex iis porro Inscriptionibus duabus,
ignavissimus quisque sibi persuaserit, Legionem hanc
inter Insu-
bres scriptam ab Imperatore ; quando &
milites, & Tribunus ipse Mediolanensis invenia-
tur. Curtiorum Familia siquidem, ex qua erat Ru-
finus, Mediolani egregie floret. Porro quot digni-
tates apud Imperatorem (ut aliqui volunt) Galbam
hic Rufinus obtinuerit, hæc declarat Inscriptio :
Tribunatum ejus XIII. Leg. Gem. VI. Viratum
III. Viratum, ut equitum turmas duceret. Novis-
sime ut monetis, monetariisque præesset, auri, ar-
genti, & æris conflandis :

:::R:::RVFINO:::
TRIMILLEGXIII
VIVIRTVRMIS
DVCENIIIVIR
AAAFF:::CCVRTI
:::VSPATR:::
:::LDD:::

SED jam ad susceptam vallis, in qua Ara Cæsaris
est, descriptionem redeamus. Porro cum A-
ram Cæsaris dico, oppidum intelligo, ut nonnul-
lis placuit, quod nunc vocant *Arcifate*, tametsi
quid de eo oppido certius sentiamus inferius descri-
bemus. Eo in oppido lapis quoque visitur, in quo
Martialis quidam Mercurio vovit. Omnino, ut jam
dictum est, Insu-
bribus maximo fuit honori Mercuri-
us, Tutelaris, ut opinor, Deus ; quod mercium
& lacuum, quorum magnus apud nos proventus
est, custos haberetur. Ejus lapidis hæc est Inscriptio :

MERCVRIO
C F
MARTIALIS
MAR::::

Innumera prope eo in oppido sunt saxa litteris in-
sculpta, sed omni ex parte contracta ac mutila.
Quæ omnino à nobis composito prætereuntur. Lu-
tevi tantum memoriola silentio à me non involve-
tur. Quod nomen adhuc nostris Insu-
bribus gratissi-
mum est. Characterum politia hunc antiquissimum
esse declarat : non ut quidam volunt hominem Cel-
ticum, aut Germanum :

L LVTE

L LVTE
V IVS
L ATER
N VS

IN eadem valle illinc quinto ferme stadio Bisusti vicus accedit. Pagus omnino bis terque uetus, si loci reliquæ inspiciantur. In eo, quod memoratu dignum sit, reperitur nihil, præter ædes Mayni Moccioni satis sumptuose structas: quibus non vicus modo ille, sed ea vallis ita ornatur; ut de iis illud merito dici possit,

Unaque jam tota stabat in urbe domus.

E regione orientem versus æstivum solem colli imminet Clivium: vicus est sane conspicuus, qui sibi ipsi nomen indidit, in clivo constructus; à quo velut è specula anterior posteriorque vallis late prospicitur. In posteriore Stabula sunt; oppiduli id nomen est, quod *Stabium* modo vulgus appellat. Arbitror autem ibi fuisse equorum stabula eorum militum, qui præsidii loco eas partes tutabantur ab excursionibus Inalpinarum gentium; quæ subito agmine illum tractum populabantur. Ad collis dorsum, cui Clivium imminet, duo municipiola visuntur, Psaltrium lapicidinis percelebre, & Isarsum, ubi antiquissimi populi Alpinarum gentium à C. Plinio Hisarci appellati, sedes habuerunt. Quod si quispiam oppidum Arcifate Hisarcis populis pertinuisse existimavit; nec incongruum fuerit, cum loci vicinia, tum nominis similitudine arguere Arcifate dictum, vel Hisarcorum aram, vel arcem, non autem, ut supra dictum est, Cæsaris Aram, ut multis placuit. In vico Clivii memoriorum sunt Albutiorum; qui mihi sunt acceptissimi, quod ex iis tam antiquissimis natalibus orti sint Aurelius poeta egregius ab Alciato etiam celebratus, & Jo. Jacobus harmonica musices peritissimus, mihi que non ob hanc causam solum, sed morum suavitatem charissimus. In horum igitur gratiam memoriam hanc Albutiorum hic annectam:

L APICIO
B RVTTIDIO
S OTERICO
Q VAESTORI
A NNI
P RIMI
C VR PRAESIDI
E T ALBVTIAE
S EX FIL
E XORATAE
E IVS CENT
C ENTOR
Eodem quoque in oppido:
D OLOBRAR
S CALARIOR
L D D C

Magistratus hic, quem Fabrorum Praefectum vocant, non infimæ sortis est in Castris: utpote cui cura non modo metandorum Castrorum, Fabrorum Lignariorum, Carpentariorum, Ferrariorum demandata fuerat: sed etiam qui machinas bellicas ad expugnationem urbium novas commentaretur, veteres reficeret, subterraneos cuniculos faceret, aquarum detrimentis occurreret. Porro ex notis illis quatuor LDDC intelligimus locum dedisse divum Cæsarem.

In collis (ut à diverticulo repetetur fabula) radice, in quo Clivium imminere diximus, Viglucium jacet, vicus olim Clivii. Id ergo magis Viglucium, hoc est, vicus Clivii, dicerem, quam Viglucium. In eo nulla, quæ ipse viderim, vetusta sunt monumenta. Vallis quinta, & in nostro ordine ultima, quæ plurimis oppidis, castellis, arcibus vastatis, est frequens. Ejus regionis incolæ, velut per manus acceperint à majoribus, constanter asserunt, eo in tractu fuisse equorum stabu-

A la, vel Insulbrum Principum, aut Róm. Cæsarium: unde Stabio adhuc nomen est oppido. Vallis ipsa aperta satis est, & herbidam habet planiciem, ad equorum greges alendos. Hic ferme tractus, qui memoria nostra Insulbrum parebat, circum Alpes omnis, Principum negligentia, nunc Helvetiarum paret. Plurima in Stabio antiquaria visuntur, & ea quidem elegantissima: verum ne longior efficiar, ex multis unum dumtaxat adnotandum duximus, ut ex eo liquido cognoscatur, quid antiquitatis, leporisque sit reliquum, vel ut inquit conterraneus Poeta * noster,

*Disce omnes.
& crimine ab uno*

B Cæterum antequam ulterius progrediâr, refellenda eorum opinio est, qui arbitrantur, quicquid est hujusmodi ornamentum per orbem terrarum, à Romanis fluxisse. Intelligant igitur etiam nostris Mediolanensibus hanc curam, vel ut signantius loquar, diligentem sollicitudinem æternitatis existisse. Immo (ut ingenue fatear, quicquid de hac re sentio) hujusmodi opinionis sum, ut quæ hic sunt ab Insulbris, non autem à Romanis, erectas fuisse arbitrer: nisi fortasse hujusce rei præcipua mentio constiterit. Sed ipsam tandem Inscriptionem legamus:

V F
C VIRIVS VERVS
O VF MED VIVIR
I VVPONTIFEX
DECVRITEM
MANIBVS
FILIORVM SVORVM
C VRIO VERIANO
E T VIRIAE CF VERAE
Q VI VIXERVNT
A N N
Q VINOS DENOS

D Dicit fortasse Virium hunc aliquis ex Romano civem factum Mediolanensem: at nos respondebimus huius auctoritate Ciceronis in *Oratione pro Corn. Balbo*, (si tamen recte memini) lege cautum fuisse, ne quis Insulbrum Romana Civitate, vel Romanus nostra donaretur. Hæc Vallis novissima ad Lucanum lacum, & ad eam partem, quæ Caput lacus nomen tenet, terminat: quo in loco ab oppidi ejusdem nominis vicinitate nomen sortitus est mons Mindricius. Hunc Alpinae gentes *Montgerosum*, quasi cum peritioribus dicere velint generosum montem, nuncupant. Ad hunc herbipolæ, sive mavis herbilegus appellare, per Majiensem simplicium colligendorum gratia ex tota fere Cisalpina Gallia certatim conflunt. Paulo inferius est ad Novocomum iter satis arduum & difficile, quod in montium radicibus & ad ripam Lucani lacus constitutum, per quod tamen à Vallexio ad eam urbem mercatores portorum difficillimis ire consueverunt. Descriptus est tandem à me tractus universus, qui à Lario ad Verbanum, & ad Alpium crepidines extenditur. Inter hos autem lacus Lucanus est ab Oriente in Occidentem excurrens. Porro an Lucanum oppidum lacui nomen, an lacus oppido dederit, non fat scio. Satis vero aliquando admirati sumus (hæc obiter dicta sunt, postquam in hujus mentionem lacus incidimus) tot Geographiarum auctores, tam veteres quam neotericos, qui ut aliis diligentiores haberentur, quæque minima, & (ut inquit ille) Apinas Tricasque sunt sectati, hujusmodi lacus non meminisse: cum tamen à Prolitio illustri familiae Trivultiorum ditionis, quod oppidum ad lacus initium statim jacet, ad finem usque ubi Trisia fluvius in Verbanum lacum se exonerat, xxv. passuum milium intercedant, ejusque latitudo alibi sit xvi. alicubi xxiii. stad. constet. Hi tamen Eupilis exigui

* Virgilius *Æneid.* 11. v. 69.

admodum lacus, quem vulgo Pufiani nominant, unde Lambrus erumpit, inter Insubres meminerunt. Qui non procul abest à Licinoforo, quod à plerisque Incinum inter Insubres oppidum existimari diximus. Lacus porro hujus originem, rationemque olim adolescentes audivimus à Joanne Antonio Castillioneo fratre, insigni Philosopho & Matheseos peritissimo, qui demum Francisci Gallorum Regis Physicus, & quidem charissimus, apud Lutetiam Parisiorum fato functus est. Is Aristotelis sententia aiebat: Non semper eadem loca terræ aquosa esse, aut arida; sed permutari secundum fluviorum generationes & defectus; & non semper hoc quidem fieri mare, hoc autem terram perferasse: sed sit, ut ubi nunc mare, olim arida, & ubi nunc arida, olim fuerit mare. Hac Philosophi sententia, fieri potuisse existimabat eo in loco lacunam quidem fuisse, vel paludes ad inferiora vallium stagnantes: quæ demum erumpentibus per subterraneos cuniculos aquis copiosioribus solito, lacus formam receperint. Hanc autem rem factam credebat post Imperii Romani inclinationem undique in Galliam hanc Cisalpinam, velut in propugnaculum totius Imperii firmissimum, invadentibus Barbaris: quorum ætate literarum non modo, sed artium quoque studia pessum ierant, & omnia ignorationis nebula prorsus obducta; ut facile defuerint auctores, qui rem tanti momenti ad posteros transmiserint.

Verum, ut ad rem redeam, omnino constat in altissimis montibus magnas quoque & immensas speluncas esse, & in eis aerem ob cavernarum humiditatem in aquas resolvī. Cum igitur immensus sit aer, ac perpetuo agat, hinc fluviorum sunt origine perpetuæ. Sic Anaximenes putabat ex aere gigni omnia. Sunt qui has aquarum omnium scaturigines Oceano potius attribuant, & in eundem redire. Idemque testantur & Sacri Codices primo *Ecclesiastis*. Quibus rationibus puto satis constare, in maximis montibus subterraneos specus crebris & redundantibus adeo aquis oppleri, ut aliquando montium latera erumpi sit necesse, vel arva stagnari atque obrui; vel convalles aquis insolitis subito in paludes, & plerumque in lacus, converti.

Huic fratris opinioni suffragatur res, quam ipsi postea vidimus, dictu mirabilis, & quæ humanam pene fidem videtur excedere: cam tamen hic annectere non gravabor. Dum Campilioni (vicus est ad ripam Lucani lacus expositus, vulgus *Campionum* vocat) bellis in patria sævientibus agerem, anno Virginæ partus xxviii. supra mille & quingentos per Octobrem mensem, (nisi me fallat qualitas temporis) quarta ferme noctis vigilia, à montis latere, qui oppido ad orientalem plagam imminet, tantam aquarum illuvionem, subitamque præter omnium opinionem terra evomit, nullis pluviis, nulla sæviēte tempestate, terræve motum præeuntibus, unius diei & noctis & quinque horarum spacio; ut jam de omnium salute desperaremus, universique lacus accolæ non de ventura universi orbis conflagratione, sed de secunda aquarum cataclysmo vererentur. Tantis vero pavore nos, qui hujusmodi inundationibus viciniores eramus, invasit; ut ædibus derelictis, non cacumina montium, quæ & aquis operiri hæsitabamus, adscendentes, sed consensu piscatoriis lembis, quos casus offerebat, aquarum procellas fugientes, in aquis salutem ipsam constituerimus. Eadem fere aquarum inundationes sexto ferme hinc anno, in suburbis Novocomensibus, à latere montis, qui Templo divi Abondii imminet, subito eruperunt; quæ brevi tamen temporis spatio exsiccatæ sunt. Ejus Templi Antistes, vel (ut ajunt) *Commendatarius*, est Philippus Castillioneus Insubrum Senator integerrimus, vir omni ex par-

A te reverendus, qui collabentes vetustate ejus Cœnobii ædes magnificentiori forma augustiores reddidit.

Ex iis colligi nullo negotio potest, montes inter lacus Larium & Lucanum exstantes aquis omnino prægnantes esse: & olim vel illic lacum fuisse nullum, aut si fuerit, adeo angustum extitisse, ut eum Cosmographi memoratu indignum duxerint. In Lucanum lacum se, quem ipse viderim, nullus insignis fluvius exonerat, & nihilominus Trisiam emittit tanta aquarum copia, ut is navium capax esset, nisi saxosæ angustię, præcipientesque catartæ penitus obstarent. Hæc omnia facile probant aquis montes prægnantes esse: fluvius ab exitu ad ostia inter Lovinum & Germiagum oppida stadiis ferme XLVIII. decurrit. Ex lacu igitur ipso, quem lacunam fuisse existimamus, oppidum Lucanum, quasi Lacunum diceret, secunda vocali præposita, nuncupatum arbitror. Neque nos latet ex recentioribus, & quidem eruditissimis, vocabuli Lucani similitudine deceptos, hoc in tractu Gaunos populos locasse: quorum tamen nulla apud Strabonem, & Ptolomæum, & ipsum Plinium diligentissimum antiquitatis observatorem, mentio. Porro videntur innuere, Lucanum nunc dici, quod olim Ingaurum mutatione I. in L. N. in V. G. in C. & abjecta V. Verum ubi hi populi, nusquam gentium reperi. Nisi fortasse velint Gaunos eos populos esse, quos (ut inferius dicemus) Plinius in recensendis Alpinis gentibus libro tertio *Naunes* appellat, veluti plurima apud auctorem hunc populorum nomina corrupte legantur. At nos Gaunos, vel ut alii dicunt Gaunes in tertio inflexu, in regione Vallis Gaunæ à nobis descriptæ nominis cognatione illecti verius collocabimus, quam apud Lucanum lacum. Sed jam à lacu ipso paulo inferius recedentes, ad Solbium vicum pervenimus, qui Orobios ab Insubribus separat: vulgo Diocesis (tametsi dictio hæc plane Græca sit, qua significatur *dispositio*, sive *dispensatio*, aut *administratio*, vel *jurisdictio*) Novocomensis dicitur. Sunt hujusce nominis plures apud Insubres pagi. Hos Nicolaus Castillioneus dictos attestatur, quod in solo sint beato, hoc est, diviti, opulentoque. Porro hoc, quo ager Mediolanensis à Novocomensi dividitur, cæteris longe beatius arbitror. Non modo quod inter has urbes medium sit, sed quod ad agrum Novocomensem attineat, qui non tantum tribus Pliniis celebratissimus est, sed etiam Benedicto Jovio, qui si omnibus hujus ætatis viris doctissimis conferretur, non erit hujusmodi collatio iniqua; quando sit non minus omnium bonarum literarum studio, quam inculpatis moribus spectabilis. Hunc igitur cum sciam Orobiorum antiquitates, tum maxime eas, quæ ad Novocomenses spectant, diligentissime annotasse, inde pedem refero, ne in alienam (quod ajunt) messem manum inferam. Cum tamen tractum omnem, qui agro Novocomensi adhæret, inter utrumque lacus Larii cornu adjacentem, jam dudum descripserimus; in primisque Vallem, quam Ascinam nuncupant ab angulo videlicet terræ extremo, in quo Belasium olim (ut audio) Bilacum dictum oppidum Longobardorum visitur, ad lacum Eupilim, qui in fluvium Ombronem exonerat.

Mira ac prope incredibilia hoc in tractu sunt Gallorum Insubrum monumenta; quæ ante me annotata, & in lucem edita fuerint, non sat scio. Unum vel illud tamen non omiserim. In valle ipsa Ascina, Francisci Sfrondati omnis doctrinæ viri singularis, amplissimoque in Senatu Insubrum Cæsareo in universo terrarum orbe celebratissimo, Senatoris, ejus vallis Principis, opera, lapis marmoreus grandioribus literis incisus, in hanc usque diem sepultus, in lucem prodiit. Cujus

antiquissima Inscriptio, Insubrum magnificentiam testatur, quorum opibus & animorum magnitudine, ac liberalitate, oppidis, regionibusque ipsis cognomenta indita esse videmus. In eo siquidem Mediolanensis familiae Burrorum, quæ etiamnum in urbe floret, memoria legitur. Inscriptio ea est:

GENIO ASCI:::
P PLINIVS BVR RV S
ET C PLINIVS:::
A E T E R N I:::

Gaudentius Merula, vir doctus & diligens, Burros ipsos dictos existimat, non quasi Birrhos à colore videlicet ruffo, sed quod pro gentilitiis insigniis bovem habeant caudatum: meminisseque ait hujus ferme rei Servium Grammaticum in illo *i. Georgicorum* carmine:

*Continuo in sylvis magna vi flexa domatur
In burim.*

Martialem quoque libro (ni falleretur) v. epigr. vi. dicit Burrorum mentionem facere, cum inquit *ad Musam*:

Sic Burrus cito sentiat parentem.

Cujus carminis Interpretes ajunt Cornelium Tacitum Burri cujusdam etiam memoriam commendavisse. Hæc dicta obiter etiam sunt, ut intelligant Insubres, hoc est, Mediolanenses, esse se cum antiquitatis, tum ingenii gloria percelebres. Locus hic etiam me admonet, ut non possimus & nos doctissimorum hominum sententiæ non acquiescere: qui C. Plinium Naturæ scriptorem Veronæ, præclaræ alioqui & antiquissimæ urbi, non esse natum, sed in Novocomo, aut potius in Insubribus. Faciunt ad horum opinionem memoriolæ Pliniorum pene innumeræ, quæ passim Mediolani, & per oppida, vicisque Insubrum viatoribus sunt obviæ. Singulis etiam ferme diebus adeo Pliniorum monumenta prisca effodiuntur inter Insubres, ut sit pene impium, cum tot Pliniorum nomina saxi incisa passim reperiantur, Plinium ipsum ad Insubres non pertinere. Nunc in patriam redeo.

Paulo ultra Castillionum ad valliculæ ingressum, quæ in Vallem Aræ Cæsaris, vel Hifarcorum, ducit, collis obijcitur, in cujus vertice vicus situs est, cui Malenato nomen est, latomiis non contemnendis insignis. Collis ipse aggeris effigiem ostentans valli opponitur. Hujus radices radit Orona vorticofus amnis: qui duobus millibus pass. à fontibus fluens vagus, vadofusque labitur: collectis mox in unum aquis, vallis faucibus ita coarctatur, ut hoc in loco nequaquam vadari possit ob aquarum periculosam pernecitatem. Majores nostri Insubres ob publicum commodum flumen ponte conjunxerunt: in cujus arcu, dum in fluminis ripa ego & Nicolaus Castillioneus equis infederemus, pervetustam silici insculptam Inscriptiorem animadvertimus: quæ tametsi interpretationem non admittat, gratiam tamen illam antiquam nonnullæ literarum notæ præ se ferebant. Porro crebris fluvii illuvionibus, & pluviarum procellis plurima ex parte abolita Inscriptio est. Non potuimus non amanter dolere opus ipsum cum auctoris nomine fere consumptum: etsi non pontibus modo, sed urbibus quoque, & regnis florentibus, simile excidium evenisse legerimus. Hæc habuimus, quæ de Insubrum Gallorum antiquis sedibus scriberemus.

Quod si opinioni satis tuæ minus factum fuerit, aut si quid errati occurreret, vel perperam dicti, tui fuerit muneris, Lector optime, clementius ignoscere: hocque te facturum præsertim confidimus, si cogitabis quanta sit difficultas exfoletis splendorem, novis auctoritatem, vilibus gratiam addere. Ex vetustioribus qui hæc aperuerit, fuit nemo. Plinius, & eo prior Strabo, veluti ca-

nes Nilotici vix indicata urbe Metropolitana diffugiunt: Novariæ ne quidem meminit Strabo: celebravit tamen Ascræ vicum vilissimum, & Hippocrenen fontem. Sed quid ego Græcos infimulo? Pomponius Mela, & Solinus, apud quos Apinæ sunt & Tricæ (ut jam dictum est) Mediolanum, urbem toto orbe celeberrimam, & lumen Italicarum urbium, silentio æterno involverunt. Hæc res efficit, ut cum rusticarum vindemiarum tempore, & exhilarandi animi gratia eam Insubrum regionem, quæ ad Alpes vergit, perlustrassem, hæc quantulacunque sunt, annotarim, nulla captandæ gloriolæ aura, aut jactandi ingenii vires mei, quæ nullæ sunt, gratia. Scito igitur hæc à me tantum congesta fuisse, vel ut elegantiora ingenia ad id operis excitarem, vel ut aliis scribendi ansam pararem. Turpe enim fore arbitrabar, ut sedes earum gentium, quæ universo post everfam urbem Romanam Orbis fuere terrori, prorsus ignorarentur.

At non defuerit aliquis, qui dicet fortasse, quid est cur ita à Gallis origines jactes Insubrum; cum & Germani variis temporibus vestri fuerint auctores? Scimus in Romani Imperii occasu non modo Italiam, sed Hispaniam, & Africam, Cisalpinam præsertim Galliam barbaricæ libidini patuisse: nihilque propterea referre à Gallis ipsis, an à Gothis, vel Longobardis Germanica ferocitate ferocioribus, nobis sint secunda incunabula: cum vere Romanus is sit (ut à Romanis exordiamur) qui Romanorum artes, studia, & mores tenet. Auctorum vero nomina, è quibus Topographia hæc nostra emanavit, ex antiquis ferme nulla sunt, cum de Gallorum adversus Hetruscos in Cisalpina Gallia primo nullus, quem hactenus viderim, auctor scripsit: nec tum erant fortasse Latinæ literæ. Hetrusci vero ipsi, quorum opes ante Romanorum arma terra marique supero & infero late, ut Livius refert, patuere, non modo rerum suarum & gestorum historiam posteris non reliquerunt; sed nec literarum sæculi sui characteres, quorum reliquiæ adhuc apud nos exstant, interpretationem admittunt. Qui tamen nostris rebus lucis aliquid attulere, Græci magis, quam Latini, fuere: hosque sequuti sumus, Polybium scilicet Scipionis Africani præceptorem, Trogum, & Plutarchum. T. Livius nomini Gallico, tametsi ipse Gallus existerit, plus æquo iniquus est: utinamque tam diligens (ut ipsum decebat historiam scribentem) fuisset in iis exquirendis, quæ in Cisalpina Gallia oppressis indigenis Hetrusci gesserunt, & quid Galli tumultus in Hetruscos excitarent, Duce Belloveso, quam eorum gloriæ & rebus gestis fuit infensus. Memoriae hæc æquiore animo (adit verbo venia) Græci, quam Latini, prodidere. Ipse autem sub nube *Decadis* primæ libro quinto Gallorum transitum cis Alpes, & mox in Italiam, attestatur se ab aliis accepisse: neque contendit tum primam Gallorum professionem in Italiam fuisse: sed continentem de eis sic esse memoriam. Fuere enim Galli ante Tarquinium Regem Romanis incogniti: cum regionum fines & imperium nondum dilataissent; & ante primum contra Gallos bellum, (tametsi eorum nomen ad Romanos devenisset) nulla tamen prorsus cognitio eis erat, quando primum in Italiam ex Ulteriori Gallia proruperunt: eoque minus Alpium notitiam habuere. De his vero, quæ à recentioribus nonnullis passim pro historiis circumferuntur, quorum nomina modestiæ gratia subticemus, bone Deus, quæ figmenta, quæ deliramenta, quæ mera somnia! Sane quæ ante Romanorum incunabula in Gallia Cisalpina, & Italia post primam Gallorum irruptionem citra Alpes, eoque magis regnantibus citra Apenninum Hetruscis, tanta oblivione obducta sunt, ut locorum & populorum nomina simul interierint. Itaque eorum gesta prorsus ignorantur.

Lectum est ab Hetruscis hoc in nostro tractu urbeis duodecim conditas esse. Quis harum nomina mihi recensere? Quid? quod & Alpinæ gentes, quæ à C. Plinio rerum antiquarum auctore diligentissimo enumerantur, à nullo, quem ego sciam, certo recognitæ sunt. Interiere cum populis & populorum nomina, paucis exceptis, quorum vel calamitates, vel virtutes scriptorum diligentia æternitati consecratas ab oblivione vindicavit. In Alpihus siquidem, quæ verso ad Italiam pectore Austrum spectant, Plinius populos enumerans ab Augusto Cæsare devictos, hos figillatim recto ordine propriis nominibus describit *, Triumpilinos, Camunos, Vennonos, Vennonetes, Hisarcos, Breunos, Naunes, & Focunates.

Triumpilini, qui primi ab ipso recensentur, à plerisque, & quidem doctissimis viris, pro Euganeorum reliquiis habentur, qui juxta Larium lacum olim habitant. Quorum regio Vallemtellinam, quæ & Volturena à Catone dicitur, attingit. Horumque oppida esse præcipua opinantur, Gravedona, sive Glebedona, Glarea, Suricum, Doncum, & Mussium, unicoque nomine Triplebem vocant, hacque nominis similitudine ducti Triumpilinos dixere. Sed cum Camuni populi à Plinio post Triumpilinos recto ordine numerentur, verisimileque sit auctorem tam diligentissimum præpostere populos hos non descripsisse: existimarim magis ipse Triumpilinos eos esse, qui vallem, cui Triumpiæ nomen est, inhabitant. Quæ quidem vallis juxta Plinii descriptionem Camunorum valli proxime inhæret. At Camuni ipsi haud dubie Camonicam vallem vulgo dictam, per quam Ollus amnis ex Sebuno lacu labitur, incolunt: Camuli pro Camunis apud Strabonem leguntur.

Vennonos populi hos sequuntur, quos Strabo lib. iv. Rhætiæ populos vult esse apud Venustam vallem sitos. Cujus sententiæ & ipse Plinius adstipulatur, dicens, Rhætorum gentes eas ortum Rhæni fluminis tenere. Cujus quidem rei maxima nos sæpe detinuit admiratio, quanam videlicet ratione Plinius Vennonos inter Alpinas gentes ad oram Italiæ, è regioneque eisdem in Septentrionem ad Rhætos spectare asseruerit. Ex recentioribus sunt qui existiment eos esse Vennonos, qui hodie Hengadini vocantur; apud quos Ænus fluvius ex Julis Alpibus ortum ducens per Curientem diocesim Ænipontem, vulgo *Inspruck*, præterluit. Nobis vero hujusce rei causa ea esse videtur, quam & Plinius non ignoravit, Vennonos videlicet ipsos olim ad Alpes usque Tridentinorum late patuisse, meritoque Plinium eisdem populos ad Rhætiæ & Italiæ oras collocasse; cum tamen unus idemque populus omnino esset. Idem quoque & de Leopontis legimus, qui inter Helvetios, Sedunos, Salassios, Insubres, & Rhætos siti ultra, citraque Alpium juga inter adjacentes valles habitant.

Ad Vennonetes transeo; quos affirmare non auisim eos esse, qui Ventonini primo, mox Valtellini sunt nuncupati: neque nos movent Catonis *Originis* illæ, quæ, ut diximus, suspectæ sunt Latinis auribus: qui Volturenæ vallem ipsam appellat, cujus nominis nec Plinius ipse usquam meminerit. Magis consentaneum igitur erit existimare, Vennonetes eosdem fuisse & Volturenos, cum eorum regio ab Oriente Vennonibus adhæreat, à Meridie Camunos & Triumpilinos habeat.

Hisarci populi lacum Lucanum attingunt, quorum oppida sunt Hisarcum, vel Hisarsum, ut nunc dicunt, Psaltrium, & Arcisate: nec eorum sententia nobis satis arridet, qui Mefaucos populos pro Hisarcis legendos esse apud Plinium pu-

tant, quorum sedes hodie Mefochi vallis, sive Myfochi, nominatur.

Breuni paucis fere mutatis & adjectis literis antiquum quoque nomen servantes, Bregonii dicuntur, inter Leopontios, Leventinos, & Mefochi vallem siti.

Naunes (ut diximus) haud dubio pro Gaunis apud Plinium leguntur. Hi partem alteram Lucani lacus ad pontem amnis Trifiæ, & præterea vallem totam, Gaunæ nuncupatam, in Vallexitum usque occupant.

Novissimi sunt horum populorum Focunates: qui quonam in Alpium latere, aut vallium angulo habitarent, hætenus, quod ipse sciam, ignoratur. Non desunt tamen, qui diligentius Alpium intima perscrutati sunt, à quibus hi populi collocantur in ea valle, cui Maggiæ nomen est juxta Leopontios. Hæ gentes ergo recta ad Alpes Summas, & ad eam partem, quæ ad ortum Rhodani è regione vergunt, spectarent. Hæc de populis, quos Inalpinos Plinius appellat, hætenus dicta sufficiant. Id autem à nobis libentiore animo factum est, ut intelligas, Lector optime, quam minimam nobis Alpinorum populorum cognitionem Veteres reliquerint.

Cæterum, quia cum Plinio semper ingenui animi esse duximus, per quem profecerimus libere profiteri, visum est hac in parte tribus præcipue auctoribus hujus nostri laboris primas laudum partes adscribere: ANDRÆ videlicet ALCIATO, incomparabilis & candoris & eruditionis viro, qui primus vetustiora nobis hoc in negotio nomina in hanc usque diem obsoleta & incognita in lucem revocavit. Post Alciatum Gaudenzio Merulæ, qui felici pollens ingenio & doctrina singulari, Cisalpinam Galliam omnem longa oblivione fere sepultam, vivam reddidit. Tertiæ merito debentur Henrico Glareano, Joachimo Vadiano, & Ægidio Tschudio, quos tamen domi, quam foris diligentiores arbitror. Horum exemplo plurimi (ut audio) loca propria perlustrabunt, & singula diligentius contemplabuntur: ut & regionum & populorum nomina, quomodo interierint, plane nobis fiant cognita.

Et quoniam *quandoque bonus* (ut inquit ille) *dormitat Homerus*, & cum non omnia possumus omnes, tantoque magis uni non datum est scire omnia, horum novissimus accedo, qui locos ab iis prætermisissos, vel intellectos perperam, hoc libello collegi, sperans scilicet facturum me posteritati operæ præcium, cum diligentius hunc ordinem inspexerit, non tam ab historicis, quam à conjecturis verisimilibus, lapidum Inscriptionibus, & accolarum observatione deductum. Usus sum porro hac in re exactissimo Nicolai Castillionei Legum Interpretis, & Ambrosii Calimeri consilio; qui in mediis (ut ita dicam) Insubrum visceribus nati & educati, acri eorum ingenii acumine omnia exactissime perlustrarunt: & ex ruinarum priscarum vestigiis, recentiorumque nominum interpretatione, pleraque nobis tradiderunt. Poterunt igitur hujusmodi deliciarum studiosi, tametsi levem præstiterimus operam, hisce nostris lucubratiunculis satis adjuvari: quando (ut inquit Fabius) continuo in motu omnia videantur, nihilque dum vivimus, quiescit. Alia siquidem pereunt, & alia quotidie in lucem prodeunt. Forte autem ita auguramur. Continget enim ut ex recentioribus politissimum aliquod ingenium aliqua hujus generis antiquariorum certiora in studiosorum gratiam effodiat, diligentioreque cura ad exemplum nostrum, quod ad patriæ nostræ & dignitatem & antiquitatem pertinere videbitur, libro suo sit additurus. Laus Deo optimo max. Deiparæque Virgini.

* Lib. iii. *Hist. Nat.* cap. xx.

BONAVENTURA CASTILLIONEVS JOANNI BAPTISTAE SPETIANO,

Cæsareo Senatori, & Primario Justitiæ Præfecto, viro doctissimo
& integerrimo,

S. D.



OCELLUM oppidum, cuius Cæsar primo *Commentariorum* meminit, (ut ingenue fatear) ex plurimis unus aliquando existimavi esse, quod Ptolomæus Oscellam inter Lepontios libro tertio vocat. Movebar non tam cognatione nominis, quam Cæsarianis verbis: qui eo in libro ait: *Tres legiones, quæ circum Aquilejam hiemabant, ex hibernis educit; & qua proximum iter erat, per Alpeis in Ulteriorem Galliam ire contendit.* Cum itaque Cæsar ex Aquileja Carnorum legiones moveret, proximum illi iter nullum esse debuerat, ut in Gallias proficisceretur, quam per Alpeis Lepontias, quæ proximiores Aquilejæ essent, quam Grajæ, Peninæ, aut Coctiæ: etenim si iter ipsum recte computetur, verisimile est Cæsarem ab Aquileja in Insubres, inde brevissimo trajectu lacus Verbanum per Agones Oscellam & vallem Veterem, de quibus diximus, superato Sempronii monte, per quem in Sedunos iter est, legiones eas in Gallias traduxisse. Neque defuere, qui nostram hanc, imo quam plurium doctissimorum seculi nostri sententiam improbarunt; qui per Alpeis Grajas, ubi nunc Tarantasiæ metropolis reliquæ visuntur, cum legionibus ipsis iter fecisse volunt: hoc maxime argumento freti, quod Cæsari Alpeis superanti occurrerint Caturiges, Garocelli, & Ceutrones, populi haud dubie huiusmodi Alpium juga incolentes, qui locis superioribus occupatis exercitum itinere prohibere conarentur: cognomentoque nominis oppidi Ocelli ad Chielanum vicum, haud longe ab Augusta Prætoria Salassorum, oculos adiacere, quem Ocellum omnino esse affirmant. Ego vero tametsi auctoritati tantorum virorum, tum maxime eorum, quorum opera & studio plurima vetustatum nomina obsoleta feliciter in lucem sunt prolata, adversari nolim, sed ea tantum causa, ut quæ veritati consona sunt, tuear, quid & ipse novissimus de oppido ipso sentiam verisimili conjectura rationibusque in medium afferre conabor. In primisque doctissimi Glareani, & diligentissimi Tschudii Helvetiorum sententiam sequor, qui Ocellum, cuius Cæsar meminit, non inter Lepontios, eoque minus apud Salassos, sed juxta minorem Duriam fluvium in Coctiis Alpibus locant. Amnis hic à Genebro monte, (vulgo dicto) qui Coctiis Alpibus adscribitur, ortum ducens, *Ours* oppidulum (ut Itali vocant) attingit; Galli mutata R in L litera, non *Ours*, sed *Oulx* nuncupant. Dictio ipsa omnino Celtica, haud dubie *oculum* sonat, quam ut pleræque alias ex Celticis more suo Latinas Cæsar fecit. Vicus ipse *Ours*, vel *Oulx*, venienti in Citeriorem Galliam ex Ebrodunis, vulgo *Ambrun*, per Brigantios, hodie *Briançon*, primus se offert. Loci situs cum Ocelo Cæsaris convenit, qui Citerioris Provinciæ extremum oppidum esse vult. Quæ quidem sententia cum Chielano vico Salassorum minime quadrat: pleraque etenim post Chielanum ad Alpeis usque Grajas oppida & municipia, & quidem antiquissima, numerantur, ut merito extremum Citerioris Provinciæ oppidum juxta Cæsaris sententiam existimari recte non possit. Post *Oulx*, seu *Ours*, amnis ipse Durias minor Scingomagum vicum ambit, vulgo

(ut nobis videtur) Sejufianam, vel Sufanam; indeque Segusium urbem alluens Ortum versus, apud Augustam Taurinorum paulo post in Padum dilabitur. Oppidi igitur nomenclatura, quæ magis ad Ocellum, de quo Cæsar, quam ad Chielanum, alludit, & quod locus hic extremus sit Citerioris Provinciæ, tum, quod Cæsar inde, id est, ab Ocelo, in fines Vocontiorum Ulterioris Galliæ pervenerit, hæc facile arguunt, videl. ipsas legiones per huiusmodi Alpes, non autem per Grajas, à Cæsare trajectas. Vocontios Ptolomæus inter *Orontem* & *Rhodanum* Allobrogibus vicinos ad *Orontem* describit. Raymondus Marlianus, doctus idem & diligentissimus, ubi nunc Vafatium Delphinatus oppidum situm est, Vocontios locat. Inter *Familiares* Ciceronis *Epistolas* illa Planci*, quæ incipit, *Antonius Idibus Majis ad Forum Julii cum primis copiis venit*, Vocontiorum meminit: in eadem *Epistola* legitur, *Ventidius spatio bidui abest ab eo*. Item: *Lepidus ad Forum Vocontii; qui locus à Foro Julii iv. & xx. millia passus abest*. Cum vero Plancius dum hæc scriberet alio in loco testetur se in Citerione oppido Allobrogum ultra Isaram confedisse, (proculdubio hodie *Chiamueri*) facile colligi potest, Forum Vocontiorum, in quo Lepidus confederat, inter Civeronem & Forum Julii Narbonensis Provinciæ, vulgo *Frigium*, constitutum fuisse: à quo si Planco teste Forum Vocontiorum xxiv. millibus passuum abest, absurdum omnino Cæsari fuisse, per Alpes Grajas Legiones traduxisse, & ab eis per Meridicem, fines Vocontiorum attingere, qui per Ceutrones breviori admodum itinere ad Arctum, in Sebusianos, ad quos iter dirigebat, pervenire valuisset. Vocontii igitur, ut dictum est, inter maxo teste, quod & Cæsar innuere videtur, inter Isaram & Druentiam flumina, quæ in Rhodanum exonerant, locati olim fuerunt. Et qui per Alpes Grajas, id est, per Tarantasiæ in Ulteriorem Galliam proficiscuntur, Isaræ fluentia vix attingunt: nemo ideo luculentius clariusque Cæsarem transitum ipsum describere potest, qui inde à Vocontiorum finibus movens in Allobroges pervenit, & ab Allobrogibus in Sebusianos populos, ultra Rhodanum supra Lugdunum, lacum Lemannum ad Ortum pertinentes, vulgo *Pays de Bourg* & *Bressa* nuncupatos; à quibus (ut existimo) Sabaudæ Principes, quod populis ipsis primo imperio verint, non autem à Vadis Sabatiis, aut à Salutiensibus (ut nonnulli volunt) nomen sortitos, facile crediderim. Non oportuisset, inquam, Cæsari in Vocontiorum fines pervenisse; indeque per Allobroges, ut in Sebusianos proficisceretur, si (ut de ceteris nostris placet) ejus transitus per Ocellum oppidum, id est, Chielanum, & per Alpes Grajas in Ulteriorem Galliam fuisset: breviori etenim itinere, utpote bidui tantum spacio, à Grajis Alpibus Cæsar discedens, in Sebusianos iter conficere potuisset, absque eo quod Allobroges, eoque minus Vocontiorum fines, attingisset. Perinde siquidem Cæsar fecisset, ac si quispiam à Mediolano Augustam Prætoriam petiturus, Derthonam primo, mox Scutellensium fines, ingressus, Albam Ligusticam & Augustam Taurinorum adiret. Vale, vir doctissime

* Lib. x. *Epist.* xvii.

F I N I S.

IOV. ANDREAM AVRIAM
PATRICII GENVENSIS,
HISTORIAE
GENVENSIVM
LIBRI XII.

A D

JO. ANDREAM AVRIAM
MELPHIAE PRINCIPEM,
CLASSISQVE PHILIPPI SECVNDI CATHOLICI
REGIS CVM SVMMO IMPERIO PRAEFECTVM.

JOA. ANDREAM AVRIAM

MELPHITENSIVM PRINCIPEM,

EVNDEMQUE SVMMVM MARIS PRAEFECTVM

PRO CATHOLICO HISPANIARVM REGE,

PAVLI FOLIETAE

IN VBERTI FRATRIS

HISTORIAM GENVENSIUM

P R A E F A T I O.



xit jam tandem, Auria Princeps Illustrissime, *Historia Genuensis* tamdiu à nostris civibus expetita, à me vero non postulata solum, sed etiam flagitata: hanc ego diuturnam suppressionem, si necesse esset, probarem sane omnibus: verum cum nemo me culpæ alicujus, nisi levissimæ, arguat, quam etiamsi agnoscam, non improbus habear, nihil de facti probatione laboro. Illa fortasse opinio non vulgaris, quam de Uberto fratre meo habebant cives optimi, *Historiæ* hujus videndæ commovit primo desiderium, ac vehementius deinde quotidie auxit: ut enim eorum quisque ingenio quodam acri atque judicio gravissimo præditus est; plus nescio quid in iis *Historiis*, quæ hætenus de nostra Republica editæ sunt, vel rerum, vel ornati sermonis, vel ordinis, vel dignitatis, vel forte etiam veritatis requirebat: itaque sibi persuadebat à FOLIETA, quem multis in rebus hominem eruditum, & eloquentem, rerum nostrarum peritissimum, antiquitatis in primis studiosum cognoverat, cumulate satisfactum iri: bene habet: laborem de asserenda fide & auctoritate *Historiæ* fratris mihi levavit judicium universæ Reip. Genuensis. Excipiant igitur avide rerum suarum monumenta, & vetustatis exempla Genuenses mei; atque iis legendis, quasi quodam pabulo suavissimo pascant animos suos: ut enim corpori, sic animo suus constitutus est cibus: atque, ut in corpore sensus, cum sibi respondentem naturæ rerum perfecte obijciuntur, voluptate maxima impelluntur; sic animæ facultates cognitione & amore rerum præstantium mirifice satiantur. Obsecro te, Princeps amplissime, qua voluptate detinentur oculi nostri, cum in aliquem locum natura & situ varium, artificio atque magnificentia habitatorum amœnissimum incidunt? numquid à colorum pulchritudine & varietate, ab hortorum elegantia, à delitiis collium, à fontium venustate, ab ædificiorum splendore averti possunt? quæ omnia, licet sint maxime dissimilia inter se; de consimili tamen dignitate atque decore contendunt: quam igitur jucunditatem infundet animis nostris *Historiæ* lectio, in qua, velut in tabula picta, consilia hominum sapientissimorum, conatus Ducum excellentium, stratagemata, artes, insidiæ exprimuntur? annuente Deo votis hominum, vides interdum extorrem gentem, & vagam sedibus suis, præpotentem aliam, & clarissimam pellere, regiones regionibus connectere, & occupati imperii fines cum solis pene cursibus cœquare: hic tu, dum lustras agmina, dum præliis intueris, fugientes insequeris, expugnationes urbium atque excisiones intue-

ris, qui tibi tunc esse videris? quas personas induis? qua voluptate compleris? perge: evolve paginas: occurrunt tibi classes ornatae & instructae, quibus replentur maria: illarum apparatus si tibi describat historicus, quod epulum apponet? fac vero illas in conspectum hostium venire, atque pugnam capeffere; ni te totum vestigio temporis quasi quodam aestu eloquentiae procul à te ipso abripiat, atque in medium praelium tamquam in altum à cogitatione ceterarum rerum abstractum teneat, iudicii omnis atque usus expers omnino sim: age, reduc victores cum triumpho in patriam: exercitationes, & studia pacis & otii attende: jura, magistratus, leges, carimonias, religionis munia legendo cognosce: transis ad novum voluptatis genus, quod te non solum delectat, sed etiam sine satietate delectat. Neque vero ad animi jucunditatem conducit quidem Historia, humanae autem vitae institutionem desiderat: qui enim in ea prudentiae, sapientiaeque principia recondita esse dixit, egregie alterum ejus fructum, qui modo requiritur, expressit. Vel enim aliorum doctrina, & exemplis vitam nostram conformemus; vel ipsi nos duces atque magistros nostris actionibus constituamus, à prudentia necessario adjumenta petimus: at haec nostra, quam comparamus ex eventorum observatione, exigua admodum est, & multis incommodis obnoxia. Quem enim rerum usum brevi isto nobis circumscripto vitae curriculo habemus? quanto cum nostro periculo, & detrimento de rebus interdum experimur? major igitur illa est, atque proteclior, quae ex multorum saeculorum notatione provenit; quae pene innumerabilia illustrium virorum consilia & eventa continent. At hanc ipsam una ministrat Historia: te enim tamquam in quodam humanae vitae theatro constitutum, aliorum periculis, sine tuo periculo cautum ac sapientem facit: in omni rerum statu permulta tibi exempla suppeditat, quae ad usus tuos utiliter traducas. Hi autem fructus, & alii permulti, de quibus alii scripsere, cum à Romana discessimus Historia, ex nostra, si recte loqui velimus, praecipue colliguntur: nulla enim alia gens (absit à dicto arrogantia, aut adulationis suspicio) vel rerum magnitudine & splendore, vel casuum varietate & conversione, uberiores exemplorum copiam ad scribendum subministrare potuit. Erit igitur eorum omnium, qui Annales Antiquorum nostrorum evolvent, communis haec utilitas; maxime autem Genuensium, quos procul dubio magis exempla domestica quam externa movebunt. Te autem, magne Joannes Andrea, non ego in hoc numero ponam: non sunt investiganda tibi monumenta rerum veterum, ut pares illustrem suppellectilem, quae tuae vitae deservire possit: domi habes id omne, quod putatur egregium & imitatione dignum: quod tamen mandarunt litteris eruditi viri; nec fratris mei labor in eo ipso desideratus est: non ab eo longius; neque res vetustate nimia obscuras, velut quae magno ex intervallo loci vix cernuntur, percenseo. Intuentur animis una tecum, atque suspiciunt virum illum virtutibus omnibus, & honoribus exaggeratum, cujus tu nominis, ut etiam virtutis, & opum heres fuisti, Andream Auriam magnum patrum tuum: quem, ut in caelo solem inter reliqua sidera, sic in ista Rep. Principem inter alios heroas à Deo putant fuisse constitutum; atque alium quidem summis efferunt laudibus, quod rei militaris fuerit scientissimus; consilium alterius atque felicitatem in rebus gerendis honorifice praedicant; multos innocentia, temperantia, facilitate, humanitate in imperiis administrandis singulares esse dicunt; non paucos etiam meritis & caritate erga patriam in aeterna gloria ponunt: at vero patruo tuo magno viro de caelo delapso, in quem congestas esse virtutes omnes intelligunt, quas elucere sparsim in aliis viderunt, cum omnia tribuerint honoris insignia, & orna-

D E D I C A T I O.

menta, sibi tamen non plane satisfaciunt. Offendet hic forte exteris aliquis (cur enim id civi contingat?) quod me putet gratiæ causa, vel nepotis superstitis auribus servire, vel aliquid de fama atque gloria aliorum civium detrahere: sed inepte plane, quod aliud esse iudicium meum à iudicio omnium Genuensium arbitretur; & unicuique Reip. divinum aliquem virum divinitus esse concessum ignoret. Hic jam plura non dicam: constat enim inter omnes sapius cum cum hoste pugnasse, quam quisquam cum inimico contenderit; pluribus classibus præfuisse, quam alii concupiverunt; plura maria pervolasse, quam picta ceteri viderunt; plures victorias reportasse, quam alii descripserunt: ejus tandem virtutes tot dignitatibus fuisse decoratas, ut in nullius umquam hominis, vel impudentis, animum cupido tot ac tantorum honorum ceciderit, quot & quantos in Auriam Deus immortalis per Reges, Imperatores, atque Pontifices contulit. Nolum has laudes ita absorbere pietatem viri, ut non exstaret inter virtutes reliquas: nam eas quidem, & admirantur adhuc hostes in mortuo, & perhorrescunt, laudant etiam inviti; amant amici omnes populi, & vehementer prædicant: at vero pietatem, quam cum multis in rebus, tum in amantissimæ patriæ liberatione, & in oblato dominatus recusatione ostendit, cives sic colunt, ut nullum patiantur rivalem: & quam antea signis, statuis, donis, publicis ædificiis, atque litteris testificati sunt, eandem quotidie jucundissimis sermonibus recolunt; novis scriptis concelebrant; memoriam illius posteris suis deinceps tradunt, atque immortalem faciunt. Andream gloriam excepit Joannes parens tuus, ac sustinisset egregie, si vita sibi contigisset diuturnior: quem enim illum futurum speraremus: qui ineunte pene adolescentia Turcarum tyranno potentissimo formidolosus esse cœpit, cum Drogutem Ducem illum maritimum, quo neque callidiorē habere se quemquam, neque fortiorē arbitrabatur, novo bellandi genere superatum, ovans Genuam adduxit: nullus hoc factum profecto felicitati, non virtuti tribuendum esse putavit: jam enim multis in rebus domi, forisque virtutum omnium specimen dederat eximium. At invidi rati, si sol alter exoriretur, tenebricosa sibi latibula perpetuo esse querenda, lucem illam, quæ primo apparuit, ne latius sese diffunderet, obducta cæde nefaria, tamquam densa caligine, nobis per summum scelus eripuerunt. Dicerem nunc ex his viris omnium te virtutum exempla & documenta capere posse, ac debere: dicerem exfuscitari te quotidie, & commoveri ad laudem ab antiquis Genuensibus, quorum tibi illustrem & longam seriem contexit Urbertus, incitari atque inflammari ad gloriam à Majoribus tuis, qui tibi præcipue sua virtute præluxerunt, ni te totum aptum ex temet ipso, & præclarissimum te tui ipsius exemplum jam multis ab hinc annis cum ingenti admiratione & lætitia conspicerem. Abiit flos ille ætatis, quo urgeri te acriter, & impelli ad ea, quæ sita sunt in excellenti gloria, dicere poteramus, cum aures tuæ quotidie personarent laudibus familiæ tuæ, quoquo se verterent oculi illustria aliqua monumenta majorum intuerentur; ipse patruus magnus vivus adhuc & spirans, non magis annis, quam honoribus gravis, præclaris te conformaret institutis: referantur huc quoque, si placet, primi illi conatus tui ad Pignonum, Oranum, & Melitam, quibus non modo ætatem superasti tuam, verum etiam id effecisti, ut jam inciperent Barbaræ nationes credere summam navalis virtutis gloriam in una gente Auria florere, quod illis antea cum suo gravi incommodo expertis, incredibile tamen, & falso per suas oras divulgatum videbatur. Nunc vero, cum ista ætate eam tibi gloriam pepereris, quæ vix cælo capi posse videatur, alio flectenda est oratio; neque jam, ut tibi proponas exempla familiæ

D E D I C A T I O.

ad imitandum es mihi cohortandus, cui majorem, quam accepisti, reddere splendorem multis non temere videris; sed, ut te tui similem constanter exhibeas, hoc est, virum in omni tempore spectatæ virtutis & gloriæ, quo alii te imitari possint, es admonendus. Princeps es patruī beneficio; sed magis Princeps virtute tua; Princeps Philippi Regis maximi voluntate; sed magis Princeps animo excelso: nam inde maris, hinc omnium cupiditatum imperium obtinuisti Princeps civis Reip. opulentia, potestate, ac titulis; cur non te magis Principem sapientia, humanitate, caritate speremus? nā nomen istud Principis geminatum & varie flexum gloriosam tibi coronam necet aliquando, quam tuo capiti feliciter impones. Scribens, ut vides, versor tecum suavissime, quem dignitas personæ tuæ mirifice retinet; atque eo libentius, quod infrequentes mihi sese offerunt hujusmodi occasiones. Sed tamen parcendum est gravissimis occupationibus tuis, nec nimia facilitate immoderate utendum. Dicavi tibi *Historiam* Uberti fratris, ut illi addas decus & auctoritatem: volui etiam illam in tuo nomine apparere, ut novum aliquod atque mediocre signum antiquæ meæ erga te observantiæ exstaret: jam enim tua gloria altior est, quam, ut mea Genuensis musa humilis satis ac tenuis assequi possit. Quamquam altera illa *Historia*, quæ tuæ gentis, tuaque facta egregia continet, cum Regis Philippi nomine edita est, quod essent maxime cum eo Rege, atque ipsius parente Carolo conjuncta: quod ego te haud esse improbaturum confido: qui enim maximo Regi præsens esse perpetuo velles; qui animo suo occurrere semper, quo tempore ab illo imperii tibi commissi causa longissime abstrahe- ris, fies fortasse cum fratris mei labore, tum consilio meo maxima ex parte voti tui compos: quoties enim illam sibi legi curabit, aut lecta jam memoria repetet, toties illi te præsentem statuet Ubertus; facta tua illustrabit; prædicabit obsequia; Ducem Christiano imperio fidelissimum, ad omnem provinciam aptissimum, omnibus præmiis dignissimum commonstrabit. Hæc ipse mecum reputans, venio in spem fore aliquando, ut altera pars *Historiæ universalis*, ac simul *Ecclesiastica* integra maximis Uberti vigiliis conscripta, è tenebris in lucem emergat: qui enim labores & voluntatem Foliætæ gentis summis Principibus gratam esse intelliget, privata sua sive utilitate, sive jucunditate postposita, illas credo diutius non supprimet.

C A R M I N A

In honorem ac laudem Auctoris.

ANGELI JUSTINIANI
EPISCOPI GENVENSIS.

Distinctum ut gemmis nitidis magis emicat aurum,
Inque auro melius lucida gemma nitet:
Sic scripta egregiis factis, sic facta relucet
Egregia egregiis scripta voluminibus.
Te mirer, dubium; qui gentis fortia facta
Scripseris; an scriptis facta notata tuis.

ALBERICI CYBO S. R. I.
ET MASSÆ PRINCIPIS.

Gessistis Cives totum memoranda per orbem;
Quos GENVA excoluit,
Artibus egregiis, armis, virtute, parentis
Functa pio officio.
Scripsisti Civis cunctas relegenda per urbes,
Quem tulit urbs eadem,
Ingenium mirata tuum, gavisa tuoque
Eloquio celebris.

Vicistis cives pugnantes sæpius hostes;
Sive amor Imperii
Augendi hostiles collecta ferret ad oras
Classe, vel ira ageret.
Vicisti Civis, FOLIETA acerrime, rerum
Tempus edax calamo;
Sive tuum cuperes nomen, seu gesta tuorum
Ne voret ulla dies.

ALEXANDRI ARAGONÆ
APPIANI, PLUMBINI D. DESS.

Vt gestis toto nil est his clarius orbe,
Sic scriptis toto doctius orbe nihil.

ANSALDI GRIMALDI
MARCHIONIS MODONII.

Livius à Patria statuæ donatur honore,
Qui numquam calamum verterat ad Patriam.
Quantum ergo VBERTVS mereatur non minor illo,
Qui

AVCTORIS LAVDES.

Qui Patriæ extinctum reddidit omne decus?
Quæve suæ fronti nectetur digna corona?
Ea propriis foliis texuit ipse sibi.

ILLVSTRISS. VINCENTII
DE FVRNARIIS.

Amplius est nil ut, *Ligurum quam quæ inclyta gessit*
Gens, terra atque mari, militia atque domi.
Obscuris sic in tenebris abstrusa latebant;
Vestra aberant Latia lumina litterula.
Exortus tandem Ubertus radiantia clari
Prætulit eloquii, fidereumque jubar.
Illustrata quibus, totum vulgata per orbem
Fulgebunt sacris innumerabilibus.
An chartis Folieta tuis mage certa Sibylla
Vel folia ipsa putet, cui tua nota fides?
Unum te, historias qui jam scripsere, queruntur
Obstruxisse suis denique luminibus.

LVCÆ DE FVRNARIIS.

Si fas est aliquo colore dogma
Fallax Pythagoræ probare verum,
Quod per corpora spiritus vicissim
Transmigrent, nece retrahente primis;
In te spiritus ingredi duorum
Contendit simul, ac uterque mansit.
Alter Tullius esse, Liviusque
Alter cernitur ex tuis libellis,
Scriptis cum vario, gravique stilo;
Et quicumque legunt suos tuosque,
Incerti remanent, utrum sit unus
Horum tu proprie, vel unus horum
Sis tu, cum similes in ore sitis.

ALEXANDRI IVSTINIANI.

Pervia virtuti *Ligurum sunt omnia; belli*
Se quondam studiis evexit ad æthera: testes
Adriaci, Geticique sinus, est testis Idume,
Et parti Hesperio, & Tyrrheno ex hoste triumpho,
Dum maris imperium sibi vindicat, & pia jungit
Fœdera, dum sancta pro religione pacisci
Vitam optat, socios Reges, Populosque tueri,
Aut quas antiquas terras ditione tenebat,
Seu bello captas, seu missis urbe colonis.
Nec satis hoc decoris visum, ni laudis avara
Gens tandem occiduos ratibus penetrasset ad Indos,
Atque ad stelliferi sceptrum aspirasset Olympi.
Namque ego quid memorem reserantem ignota Columbum
Æquora, & ab nostro submotos orbe recessus
Oceani? aut narrem, quos terra Ligustica Divos
Insignes pietate tulit? Quid sacra galero
Tempora purpureo, aut viridi circumdata mitra
Multorum referam, aut triplici redimita corona?
At, postquam placida se vertit ad ocia pacis,
Adspice turratos colles, & mœnia cœlo
Æquata, & vasto jactas sub gurgite moles,
Tectaque marmoreis ingentia fulta columnis,
Et sacras ades, Divumque immania templa,
Jura, Magistratus varios, magnumque Senatum,
Hesperidumque hortos cultu superantia rura,
Regibus & dignos sumptus, magnoque parata
Imperia, & titulos auro, celereque carinas.
At scriptor deerat, qui facta urbisque, virumque
Egregia æternis ventura in secula chartis
Sacraret: Lethe rapidis ne mergeret undis.
Annuit en votis generis fatumque Deusque:
Uberrimumque suis cœlo demisit ab alto,
Grandia, grandiloquo qui pectore, gesta, virosque
Scriberet: annosa ut nequeat delere vetustas.

AMBROSII DE NIGRO.

Vix unum ostentant, quæcumque habuere Poetam,
Historicumve urbes; indeque nomen habent.

Una domus Folieta simul fert Patriæ utrumque;
Huic ergo effulgens gloria qualis erit?
Augendis foliis Folieta fata dicarunt,
Uberrimum profam, carmina Paulus amat.
Applausu Genua hos fratres agnosce decenti,
Quævis tua lingua nitet, gesta que clara manent.

LAVRENTII CONTI.

Lactea si Livi labris facundia manat,
Si dignum Imperio Caesaris eloquium;
Si Crispus brevitate nitet: Folieta disertus
Tres tribus ipse unus surripuit veneres.

HIERONYMI IVSTINIANI.

Amplius haud Martis, nec Palladis invidet urbi
Urbs Jani, Historicum nunc habet ipsa suum.
Uberrimum cœlo nuper nam missus ab alto
Æterno Cives eximit interitu.
Eloquio Patriæ miro qui facta recenset,
Ipso ut Thucydides sit minor, & Livius.
Quare agite ô Cives, animos ostendite gratos,
Marmoreamque alacres erigite effigiem.

ANTONII ROCCATALIATAE.

Illustres reddunt majorum stemmata fratres
Uberrimum, & Paulum, nobilitate pares.
Amborum eloquium tanta est dulcedine, cunctos
Ut vincat Ligures, Romulidasque simul.
Hic Ligur est lingua, Romanus nomine; at ille
Romanus lingua, nomine sed Ligur est.

PAULI ÆMILII FLISCI.

Vrbis decus Hesperia, quondam fundata secundis
Auspiciis, longa serie decorata bonorum
Procedis, sacraque petens ab origine nomen
Diceris orta Deo: clavis bellicæ togæque
Artibus illustris, nulli vel stemmate, vel vi
Cedis opum, caput ut Ligurum jam nomine clares;
Clarescesque magis, rerum monumenta tuarum
Æternis foliis postquam ubertate perenni
Ingenii ac linguæ Uberrimum Folieta dicavit.
Plusquam Servilio debes huic, ille caducis
Instaurasse bonis fertur, donisque caducam;
Hic stabili stabilem scripto donoque locavit.
Felices Ligures, quorum pulcherrima tanto
Ingenio, tanto celebrantur facta decore.

THOMAE BALDI ABBATIS
SANCTI MATTHÆI.

Et folia & flores succi donabit Uberrimum,
Quem genus & virtus aurea ad astra ferunt.

REVER. P. FRANCISCI
ADVRNII.

Uberrimum postquam scripsit Folieta, negatur
Crispus Romana primus in historia.

R. D. NICOLAI DE AVRIA.

Æmula Romana virtutis, & inclyta, Jani
Urbs latere; Titum tu quoque nata tuum es.
Felix, qui gererent cives excelsa, tulisti;
Et qui res gestas scriberet egregie.

R. P. LAVRENTII BLANCI.

Pervades Italas liber legendus
Oras, qua superum inferumque cingit
Æquor Hesperiam: videbis urbes,
Quot Insubria habet, coluntque Tusci.
Tantum Romulidum hospitem fovebit
Urbs, Crispum rata forsitan suum nunc
Redditum superis: petes amœnam
Gaudens Parthenopen; marique sisti

Obvia

Obvio nequiens, volans per alta
Invifes maria Infulas jacentes.
Alpes, & superans, vagus bibentes
Et Rhenum, & Rhodanum, Tagum, & Iberum,
Et qui Danubium accolunt, adibis:
Summotos venies & ad Britannos.
Emenso Oceanoque, obibis orbem,
Quem modo reperit Columbus, ille,
Ornat qui Genuam simul parentem,
Cum tuo domino; qui cum ex Columbo
Phoenicem volitare per virorum
Æternum faciet sua ora penna.
Ne viam timeas inire longam
Mirati aurea verba doctiores,
Complexi excipient, legent, revolvent,
Sæpiusque terent manu refumptum.
Quiesces positus Titum inter atque
Crispum, præcipuo nitens metallo.
Qui nunc sunt, & erunt, ferent ad astra
Cœleste ingenium, eruditionem
Raram, non solitam eloquentiamque
Auctoris: Genuam ferent beatam,
Cui civem dederit Deus, suo qui
Splendorem calamo addidit, decusque;
Quantum haud illa sibi expetivit umquam.

P. JO. BAPTISTÆ NARDI.

*Secula nostra tibi plaudunt, te laudibus ornant,
Majores tribuet sed tibi posteritas.
Illa, Uberte, tibi debitos persolvat honores:
Nam solet invidiam vincere longa dies.*

OCTAVII BOERII.

*Historica Antenor dudum præ laude supinus,
En Jani ad calamum tangitur invidia.*

JO. FRANCISCI GOTTVCII.

*Uberti ubertas foliis tanta effluit, impar
Ut non sit dextra jam tibi lingua Ligor.*

E J V S D E M.

*Cedat, & Antenor, cedat tibi, Jane, Quirinus:
Ubertus Crispo prævalet, atque Tito.*

JVLII GVASTAVINII.

*Mœnia, templa, domus, turres, fontesque, lacusque,
Horti, prata, aurum, naves, viridisque smaragdus
Illustrant Genuam; sunt ista at subdita sacris,
Hæ magis illustrant, quæ temnant tempora charta.*

JVLIANI COSTÆ.

*Lethæis Folieta pius de fluctibus omnes
Eripuit procures, maxime Jane, tuos.
Et vexit calamo, licuit quo scandere paucis:
Famæ immortalis namque sacravit eos.*

PETRI CONTESTABILIS.

*Maxima summorum caderent ne facta virorum,
Ubertus celebri nomine ad astra tulit.
Ille decus magnum Patria, Patria est decus illi:
Alter ab alterius lumine lumen habet.
Illustrant urbes illustrata facta; sed illis
Vita dari scriptis tempus in omne solet.
Inclyta Roma Duces, Scriptores inclyta habebat,
Palladis, & Martis lingua, manusque pares.
Sic Genua Patri gradivo est aqua Minerva;
Hic facit, illa refert; hic meret, illa docet.*

*Illic non deerant Crispi, sunt hic Folieta:
Illic qui facerent, hic quoque qui faciunt.*

JOANNIS LVCÆ CLAVARI
SERENISS. HIERONYMI F.

*Certa fides, ordo magnus, facundia major.
Illustrem faciunt hæc simul Historicum.
Hæc habet ubertim Ubertus Folieta; nec ejus
Ingenio quicquam est majus, & uberius.
Tu Genua exulta: qui fecerunt genuisti,
Et, qui scripserunt maxima facta, viros.*

BARTHOLOMÆI MANCINI
POLITIANI.

*Extulit Ubertum Ligurum Regina, decusque,
Cui lucem tribuit, unde superba micet.
Sed neque Magonis rabiem, non arma, neque ignes
Barbaricos metuat, non peritura Dea.
Namque viri virtus accepta in luce refulgens
Reddidit æternam, ceperat ille brevem.*

PHILODOXI GVASTAVINII.

*Scribebat quondam longæva Sibylla caducis
In foliis, Clarii numine plena Dei.
His nunc in foliis Phœbæo numine plenus,
Æternis scribit sed Folieta suis.*

CÆSAR CORTES.

*E Pario fratri debetur marmore signum:
Debetur capiti laurea, Paule, tuo.*

PETRI BOSELLI
AYELLENENSIS.

*Græcia jam fileat, doctos nec jactet alumnos
Roma suos, scriptor vincit utramque Ligur.*

JOANNIS COSTÆ.

*Si meritos olim populos sacravit honores
Romanus Crispo, Virgilioque suo:
Si docet Ubertum varias Cyllenius artes:
Dictat amor Paulo si, Charitesque, jocos.
Urbs Ligurum, pontique caput celeberrima quondam
Classibus, at nunc jam clarior eloquio;
Æra excude illi, & spirantia marmora finge;
Huic tege Pieria frondis honore comam.*

NICOLAI SPINVLÆ.

*Æternas laudes, tenues ne dicite Musæ:
Æternis tenues quis putet esse pares?
Sic tenui qui te celebrat Folieta camœna,
Nec sapere æternum, nec poterit tenues.*

E J V S D E M.

*Non Helicon, non te lauri, non magnus Apollo:
Æternum faciunt te tua, tu te facis.*

E J V S D E M.

Liber de suo Folieta.

*Phœbe aliis lauros, aliis da Pallas olivam;
Sat Folieta suis me decorat foliis.
His mihi vincentem lauros, oleasque coronam
Nectit, & his Ligurum, statque, caditque decus.*

E J V S D E M.

*Cum deerat Genua scriptor, scribenda gerebat;
Scriptorem peperit, desit ut gerere.*

V B E R T I F O L I E T A E,

PATRICII GENVENSIS,

HISTORIAE GENVENSIVM

LIBER I.



GENVENSIVM meorum historiam scribere aggressus, varie me, pro rerum, quas tractandas suscepi, varietate, affici animo sentio. Nam armis ea gesta sunt, quæ non modo Genuensis hominis, quem ipsa patriæ caritas videatur excitare, sed cujuscunque alienigenæ, ac nomini Genuensi parum æqui studium ad ea literarum monumentis mandanda splendore suo accendere possint: nullus enim Italiæ populus post eversum Romanum Imperium fuit, qui aut plura ac majora ediderit bellicæ virtutis documenta; (cujus verbi invidiam, si qua est, res cognita à me facile deprecabitur) aut qui, quamvis à nonnullis majores opes, majusque imperium partum sit, clariorem rerum gestarum gloria præfulgeat. At domesticæ res eæ fuerunt; à quibus memoria repetendis, ac stylo attingendis, nullius boni ac patriæ amanti civis animus non abhorreat: adeo excellentibus Majorum nostrorum ac vividis ingeniis potius artes defuerunt, quibus domi regerent res, quam quibus foris vincerent hostem. Ceterum, quoniam utramque necessitatem Historiæ lex mihi imponit, ea res dolorem ex patriæ vulneribus tractatione refricandis conceptum mitigat; quod, quamvis cum diverso animi habitu, cum eodem tamen legentium fructu, mala & bona exempla recoluntur: neque minorem illa ad similia detestanda, cladesque ea consequi solitas vitandas habent vim; quam hæc ad animos hominum ad æmulandum decus acuendos, salutemque publicam ab illis manantem omni ope quærendam. Peto igitur à civibus meis, quicumque scripta hæc nostra in manus fument; ut ad utramque rem acriter intendant animum, quo Majorum nostrorum bonis & malis discant, quæ morum via ipsis sit insistenda; quibusque in Republica sensibus animus imbuendus. Majus, si id assecutus sim, neque ego laboris suscepti præmium à patriâ ausim optare; neque patria à cive suo hoc tempore, ni fallor, meritum potest habere: sed cum duæ res Scriptores ad vetera, & ab aliis scripta ac passim sparsa stylo retractanda, & in unum corpus colligenda, (quod nonnulli ætate nostra in *Genuensi Historia* ante me fecerunt) impellere soleant; vel quod multa à Veteribus omiſsa seſe diligentia sua suppleturos profiteantur; vel quod rebus rudi illo & incondito scribendi genere non satis illustratis aliquid lucis facultate sua addituros sperent; in hac postrema nec mihi quidquam asſumere, nec si ab aliis maxime concedatur, agnoscere, pudoris mei fuerit: at in prima asſeverare non verebor, ita me verſatum, ut neque me inſumptæ operæ, neque patriam expetitæ umquam poeniteat.

Ac, quoniam Majores nostri res, quas scripturus sum, non urbanis modo opibus nisi, sed Liguriæ quoque populorum viribus fulti gesserunt; non alienum existimavi nonnulla de Liguria ipsa, cujus caput multis ab hinc sæculis civitas nostra fuit, præfari; quæque varie sparsa multo labore perqui-


ſita collegi, ea ſummatim attingere: iniquum enim fuiſſet, qui populi laborum & discriminum ſocii fuerunt, eos à ſocietate gloriæ excludere.

Ligures unde oriundi ſint, aut unde nomen ducant, incertum plane eſt; nam, quæ nonnulli de Ligone, ac de Ligure Phaetontis filio, tradiderunt, fabulis potius ſimilia ſunt, nulloque certo conſtantique monumento teſtantur: ceterum nomen hoc Ligurum pervetuſtum, idque non ignobile in Italia ſemper fuit: ſiquidem nonnulli auctores tradunt, ut Dionyſius Halicarnaſſeus reſert, (ſi modo liber ipſius nomine inſcriptus *Dionyſii* eſt) Aborigines à Liguribus iis, qui finitimi Umbri erant, ortos; à quibus populis, mutato poſtea nomine, ac Latinis vocatis, Trojanisque immiſtis, Romani decem & ſeptem poſt ætatibus orti ſunt. Illo enim everſo Trojani Ænea duce in Italiam venerunt, ac Latium tenuerunt; affinitatibusque cum Latinis juncti in unum cum illis corpus, unumque Latinorum nomen coaluerunt: ceterum, quamquam frequentius traditur, Aborigines à Græcis oriundos; quorum complures coloniæ, veteribus ſedibus relictis, in Italiam variis temporibus compluribusque comitatibus ſubinde commigrarunt; eamque regionem, quæ eſt inter Tiberim & Lirim amnes incoluerunt, varie à ſuæ cujuscunque gentis nomine ſubinde appellatam; tamen illud conſtat, vetuſtam hanc Ligurum gentem multas Italiæ partes tenuiſſe, ejuſque fines ſæpe variaſſe; ac modo latiffime patuiſſe, modo anguſtioribus terminis incluſos: ſiquidem nonnulli Scriptores, initio ab ipſo Tiberis fluminis orſto, hanc Provinciâ per totam maritimæ oræ longitudinem Maſſiliam uſque perducunt; quamquam Trogus terminos coartavit, Liguriâ inter Maſſiliam urbem & Arnun fluvium includit, urbes Piſas & Lucam in Liguriis ponens, populosque Macræ & Arno fluviis interjectos Apuanos Ligures appellans. Illud quoque conſtat, Liguriæ fines ante Cæſarem Auguſtum non Italia tantummodo terminatos, ſed, Alpibus tranſſcenſis, in Galliam late extentos; & ab ora maritima Maſſilienſi ad amnes Lucrionem & Rhodanum introſus pertinuſſe; Liguresque omnes partim Tranſalpinos, partim Ciſalpinos vocatos. Ex Tranſalpinis celeberrimi fuerant Sallyi, Deceates, Oxybii. At ex deſcriptione Divi Auguſti, Tranſalpinis populis omiſſis Ligurum nomine in Provincia Narbonenſi incluſis, Liguria nona Italiæ regio facta eſt; initiumque ejus ab eodem, à quo Italia incipit, Varo flumine factum eſt, cum ab Oriente Macra amne terminetur. Ejus maritimæ oræ populi olim ii tantum fuerunt. Nicæa opidum à Maſſilienſibus conditum, portus Herculis Monæci, Trophæa Auguſti, flumen Rutuba, Album Intemelium, flumen Merula, Albingaunum, portus Vadum Sabatium, flumen Porcifeſa, Genua opidum, fluvius Feritor, portus Delphini, Entellæ fluviî oſtia, Tigulia, intus Segeſta Tiguliorum, Veneris portus, Erycis ſinus, intima Macræ fluminis oſtia, ſciſſio Boacti fluminis: à tergo illius oræ Apenninus mons: cujus jugis tranſſcenſis, ab altero latere ad Padum pertinente Liguriæ civi-



VBERTVS FOLIETA.







GEN VA.



MARE LIGURICO.



superata locorum iniquitate, praelio dejecti sunt: & Ap. Claudius felicitatem virtutemque collega in Liguribus Ingannis equavit secundis aliquot praeliis: sex præterea opida eorum expugnavit, multa millia hominum in iis cepit, belli auctores III. & XL. securi percussit.

Sequitur annus, Cn. Bæbio Tamphilo & L. Æmilio Paulo Consulibus, in quo nulla Provincia fuit, quæ Consulibus decerneretur præter Ligures: adeo præferocia ingenia nullis adversis rebus frangi poterant, ut ad pacem obnoxiam inclinarent. * Scripserat enim Q. Fabius, superioris anni Consul, ex Liguribus, Apuanos ad rebellionem spectare; periculumque esse, ne impetum in agrum Pisanum facerent. Ob ea novos exercitus conscribi placuit; quattuor legiones in Ligures, ut singula quina millia & duceas pedites, treceas haberent equites: sociorum iisdem Latini nominis quindecim millia peditum addita, & octingenti equites. Profecti sunt igitur in Ligures, quæ tum una Consularis Provincia erat, ambo Consules: & quia prospere ibi res gesserunt, supplicatio in unum diem decreta est. Ligurum duo castra Marcellus habebat, venerunt, uti reciperentur, orantes. Marcellus opperiri eodem loco Liguribus iussis, Senatum per litteras consuluit. Senatus rescribere M. Ogulnium Prætozem Marcello iussit, verius fuisse, Consules, quorum Provincia esset, quam se, quid è Republica esset, decernere: tum quoque non placere sibi, per deditionem Ligures recipi, & receptis arma adimi; itaque eos ad Consulem mitti, Senatum aquum censere.

Insequenti anno, P. Cornelio Cethego M. Bæbio Tamphilo Consulibus, Massilienses nuntiaverunt, maritimos agros infestos Ligurum latrocinis, ob quas res decretum est, ut alter ex Duumviris rerum navalium à promontorio Minervæ, maritimam oram Massiliam usque cum decem navibus tueretur. At L. Æmilius Paulus superioris anni Consul, prorogato imperio, principio veris in Ligures Ingaunos exercitum introduxit. Ubi primum in hostium finibus castra posuit; Legati ad eum per speciem pacis petendæ speculatum venerunt: neganti Paulo nisi cum deditis pacisci se pacem, non tam id recusabant, quam tempore opus esse ajebant, ut generi agresti hominum persuaderetur. Ad hoc decem dierum induciæ cum darentur; petierunt deinde, ne trans montes proximos castris pabulatum lignatumque milites irent: culta ea loca suorum finium esse: id ubi impetravere, post eos ipsos montes, unde averterant hostem, exercitu omni coacto, repente multitudine ingenti castra Romanorum oppugnare simul omnibus portis aggressi sunt: summa vi totum unum diem oppugnaverunt; ita ut ne efferendi quidem signa Romanis spatium, nec ad explicandam aciem locus esset: conferti in portis, obstando magis quam pugnando, castra tuebantur: sub occasum solis cum recessissent hostes, duos equites ad Cn. Bæbium Proconsulem cum litteris Pisas mittit, ut obsessio sibi per inducias quamprimum subsidio veniret. Bæbius exercitum M. Pinario Prætori eunti in Sardiniam tradiderat: cæterum & Senatum litteris certiore fecit, obsideri à Liguribus L. Æmilius: & M. Claudio Marcello, cujus proxima inde Provincia erat, scripsit, ut, si videretur ei, exercitum ex Gallia traduceret in Ligures, & L. Æmilius liberaret obsidione. Hæc sera futura auxilia erant. Ligures postero die ad castra redeunt. Æmilius, cum & venturos scisset, & educere in aciem copias potuisset, intra vallum suos tenuit; ut extraheret rem in id tempus, quo Bæbius cum exercitu venire à Pisas posset. Romæ magnam trepidationem litteræ Bæbii fecerunt; eo majorem,

* Livius lib. XL. cap. I. & XVI.

A quod paucos post dies Marcellus, tradito exercitu Fabio, Romam cum venisset, spem ademit, eum, qui in Gallia esset, exercitum in Ligures traduci posse; quia bellum cum Istris esset, prohibentibus coloniam Aquilejam deduci: eo profectum Fabium, neque inde regredi bello inchoato posse. Una, & ea ipsa tardior, quam tempus postulabat, subsidii spes erat; si Consules maturassent in Provinciam ire. Id ut facerent, pro se quisque Patrum vociferari. Consules, nisi confecto delectu, negare se ituros, nec suam segnitiam, sed vim morbi in causa esse, quo serius perficeretur: non tamen potuerunt sustinere consensum Senatus, quin paludati exirent, & militibus, quos conscriptos haberent, diem edicerent, quo Pisas convenirent: permissum, ut qua irent, protinus subitarios milites scriberent, ducerentque secum: & Prætoribus Q. Petillio & Q. Fabio imperatum est, ut Petillius duas legiones civium Romanorum tumultuarias scriberet, & omnes minores quinquaginta annis sacramento rogaret. Fabio, ut sociis Latini nominis xv. millia peditum, octingentos equites imperaret. Duumviri navales creati C. Matienus & C. Lucretius, navisque iis ornatae sunt: Matienoque, cujus ad Gallicum finem Provincia erat, imperatum, ut classem primo quoque tempore duceret in Ligurum oram, si quo usui esse L. Æmilio, atque ejus exercitui posset. Æmilius, posteaquam nihil usquam auxilii ostendebatur, interceptos credens equites, non ultra differendum ratus, quin per se fortunam tentaret, priusquam hostes venirent, qui jam segnius, socordiusque oppugnabant, ad quattuor portas exercitum instruxit; ut signo dato simul ex omnibus partibus eruptionem facerent: quattuor extraordinariis cohortibus duas adjunxit, præposito M. Valerio legato: erumpere extraordinaria porta iussit: ad dexteram principalem hastatos legionis primæ instruxit: principes ex eadem legione in subsidiis posuit. D M. Servilius & L. Sulpicius Trib. militum his præpositi; tertia legio adversus principalem finitram portam instructa est: id tantum mutatum: principes primi, & hastati in subsidiis locati. Sex. Julius Cæsar & L. Aurelius Cotta Trib. militum huic legioni præpositi sunt. Q. Fulvius Flaccus legatus cum dextra ala ad quæstoriam portam positus; duæ cohortes, & triarii duarum legionum in præsidio castrorum manere iussi. Omnes portas concionabundus ipse imperator circumiit, & quibuscumque irritamentis poterat, iras militum acuebat: Nunc fraudem hostium incu- E sans, qui pace petita, induciis datis, per ipsum induciarum tempus, contra jus gentium, ad castra oppugnanda venissent: nunc quantus pudor esset edocens, ab Liguribus latronibus, verius quam hostibus iustis, Romanum exercitum obsideri. Quo ore quisquam vestrum, si hinc alieno præsidio non vestra virtute evaseritis, occurreret, non dico eis militibus; qui Annibalem, qui Philippum, qui Antiochum maximos nostræ ætatis Reges Ducesque vicerunt; sed iis, qui hos ipsos Ligures aliquoties pecorum modo fugientes per saltus invios consecuti ceciderunt? quod Hispani, quod Galli, quod Macedones, Pœnive non audeant, Ligustinus hostis vallum Romanum subit, obsidet ultro, & oppugnat; quem scrutantes antea devios saltus, abditum & latentem vix inveniebamus? Ad hæc consentiens reddebatur militum clamor; Nullam militum culpam esse, quibus nemo ad erumpendum signum dedisset, daret signum, intellecturum, eosdem, qui antea fuerint, & Romanos, & Ligures esse. Bina cis montes castra Ligurum erant: ex iis, primis diebus sole orto pariter omnes compositi & instructi procedebant: tum nisi exsatiati cibo vinoque arma non capiebant: dispersi, inordinati exibant; ut qui-

quibus pro spe certum esset, hostes extra vallum signa non elaturos. Adversus ita incompósitos eos venientes, clamore pariter omnium, qui in castris erant, calonium quoque & lixarum sublato, simul omnibus portis Romani eruperunt. Liguribus adeo improvisa res fuit, ut perinde, ac si insidiis circumventi forent, trepidarent. Exiguū temporis aliqua forma pugnae fuit: fuga deinde effusa, & fugientium passim caedes erat: equitibus dato signo, ut conscenderent equos, nec effugere quemquam sinerent, in castra omnes trepida fuga compulsī sunt: deinde ipsis exuti castris. Supra xv. millia Ligurum eo die occisi, capta duo millia & quingenti. Triduo post Ligurum Ingaunorum omne nomen, obsidibus datis, in deditionem venit: gubernatores navitaeque conquesti, qui praedatores fuissent navibus: atque omnes in custodiam coniecti: & a C. Matieno Duumviro naves ejus generis in Ligustina ora xxxii. captae sunt. Haec qui nuntiarent, litterasque ad Senatum ferrent, L. Aurelius Cotta, C. Sulpicius Gallus Romam missi: simulque peterent, *Ut L. Emilio concessa Provincia decedere, & deducere secum milites liceret, atque dimittere.* Utrumque permissum ab Senatu; & supplicatio ad omnia pulvinaria per triduum decreta; jussique Praetores, Petillius urbanas dimittere legiones, Fabius sociis atque nomini Latino remittere delectum; & uti Praetor urbanus Consulibus scriberet, *Senatum equum censere, subitarios milites tumultus causa conscriptos, primo quoque tempore dimitti.* L. igitur Aemilius Paullus ex Liguribus Ingaunis triumphavit; transtulit coronas aureas quinque & viginti: nec praeterea quidquam auri argentique in eo triumpho latum: captivi multi principes Ligurum ante currum ducti: aeris trecentos militibus divisit. Auxerunt ejus triumphī famam Legati Ligurum pacem perpetuam orantes: *Ita in animum induxisse Ligurum gentem, nulla unquam arma, nisi imperata a populo Romano sumere.* Responsum a Q. Fabio Praetore est Liguribus jussu Senatus: *Orationem eam non novam Liguribus esse; mens vero ut nova & orationi conveniens esset, ipsorum id plurimum referre: ad Consules irent, & qua ab ipsis imperata essent, facerent: nulli alii, quam Consulibus Senatum crediturum esse, sincera fide in pace Ligures esse.* Pax in Liguribus fuit.

Ceterum nec sic quidem pacatae Ligurum res sunt, ut non ambobus insequentis anni Coss. Aulo Postumio Albino Lusco, & C. Calpurnio Pisoni Ligures Provincia decerneretur: quibus mandatum est, ut cum binis legionibus Romanis, ac sociis Latini nominis quindecim millibus octingentis equitibus, Apuanis Liguribus arma inferrent. P. Cornelius & Marcus Baebius, qui in consulatu nihil memorabile gesserant, in Apuanos Ligures exercitum induxerunt. Ligures, qui ante adventum in Provinciam Consulum non expectassent bellum, improvise oppressi, ad duodecim millia hominum dederunt se: eos, consulto per litteras prius Senatu, deducere ex montibus in agros campestres, procul ab domo, ne reditus spes esset, Cornelius & Baebius statuerunt, nullum ante finem rati fore Ligustini belli. Ager publicus Populi Romani erat in Samnitibus, qui Taurasinorum fuerat: in eum cum traducere Ligures Apuanos vellent, edixerunt, *Ligures ab Ando montibus descenderent cum liberis conjugibusque: sua omnia secum portarent.* Ligures saepe per Legatos deprecati, *Ne penates, sedem, in qua geniti essent, sepulcra majorum cogerentur relinquere; arma, obfides pollicebantur:* posteaquam nihil impetrabant, neque vires ad bellandum erant, edicto paruerunt. Tracti sunt publico sumptu ad quadraginta mil-

lia liberorum capitum cum feminis puerisque: argenti data centum & quinquaginta millia sestertium, unde in novas aedes compararent, quae opus essent: agro dividendo, dandoque iidem, qui traduxerant, Cornelius & Baebius praepositi: postulantibus tamen ipsis, quinque viri ab Senatu dati, quorum ex consilio agerent. Transacta re, cum veterem exercitum Romam deduxissent, triumphus ab Senatu est decretus. Hi omnium primi nullo bello gesto triumpharunt: tantum hostes ducti ante currum: quia nec quid ferretur, neque quid duceretur, captum, neque quid militibus daretur, quicquam in triumphis eorum fuerat.

Post haec Consules ambo in Ligures exercitus induxerunt diversis partibus, Postumius prima & tertia legione Balistam Suilmontiumque montes obsedit; & premendo praesidiis angustos saltus eorum, commeatus interclusit, inopiaque omnium rerum eos perdomuit. Fulvius secunda & quarta legione, adortus a Pisis Apuanos Ligures, qui eorum circa Macram fluvium incolebant, in deditione acceptos, ad septem millia hominum in naves imposita praeter oram Etrusci maris Neapolim transmisit; inde in Samnium transducti, agerque iis inter populares datus est. Montanorum Ligurum ab A. Postumio vineae caesae, frumentaue deusta: donec cladibus omnibus belli coacti in deditionem venerunt, armaque tradiderunt. Navibus inde Postumius ad visendam oram Ingaunorum, Intemeliorumque Ligurum processit. Q. Fulvius Cos. profectus in Ligures, per invios montes, vallesque, saltus cum exercitu transgressus, signis collatis cum hoste pugnavit; neque tantum acie vicit, sed castra quoque eodem die cepit. Tria millia ducenti hostium, omnisque ea regio Ligurum in deditionem venit. Consul deditos in campestres agros deduxit, praesidiaque montibus imposuit. Celeriter & ex Provincia litterae Romam venerunt: supplicationes ob eas res gestas in triduum decretae sunt. Praetores quadraginta hostiis majoribus per supplicationes rem divinam fecerunt. Ab altero Consule L. Manlio nihil memoria dignum in Liguribus est gestum.

Sub Istrici finem belli, apud Ligures consilia de bello haberi coepta. C. igitur Claudius jussu Senatus, ex Istria legiones in Ligures traduxit. Ad Scultennam flumen in campos progressi castra habebant hostes: ibi cum his acie dimicatum; quindecim millia caesa, plus septingenti aut in praelio, aut in castris (nam ea quoque expugnata sunt) capti, & signa militaria unum & quinquaginta capta. Ligures reliquiae caedis in montes refugerunt passim: populantique campestres agros Consuli nulla usquam apparuerunt arma. Claudius de duabus gentibus Istris & Liguribus simul triumphavit: tulit in eo triumpho denarium trecenta septem millia, & victoriatum octoginta quinque millia dccii. militibus in singulos quini deni denarii dati, duplex centurioni, triplex equiti: sociis dimidio minus quam civibus datum: itaque taciti, ut iratos esse sentires, secuti sunt currum. Dum is triumphus de Liguribus agebatur, Ligures, postquam senserunt non consularem tantum exercitum Romam adductum, sed legionem ab T. Claudio Pisis dimissam, soluti metu, clam exercitu indicto, per transversos limites superatis montibus in campos digressi, agrum Mutinensem populati, repentino impetu coloniam ipsam ceperunt. Id ubi Romam allatum est, Senatus C. Claudium Consulem comitia primo quoque tempore habere jussit, creatisque in annum Magistratibus, in Provinciam redire, & coloniam ex hostibus eripere. Ita, uti censuit Senatus, comitia habita, Coss. creati Cn. Cornelius

Scipio Hispalus, Q. Petilius Spurius. Petilio Ligures obvennerunt.

Interim C. Claudius exercitum ad Mutinam, quam Ligures priore anno ceperant, admovit: ante triduum quam oppugnare coeperat, receptum opidum ex hostibus, colonis restituit: octo millia ibi Ligurum intra muros caesa, Q. Petilius Cos. collegam, qui extemplo magistratum occiperet, creavit C. Valerium Lævinum. Is jamdiu cupidus Provinciæ, cum opportune cupiditati ejus litteræ allatæ essent, *Ligures rebellasse*; Nonis Sextilibus paludatus litteris auditis, tumultus ejus causâ legionem tertiam ad C. Claudium Proconsulem in Galliam proficisci jussit: & Duumviros navales cum classe Pisas ire, qui Ligurum oram, maritimum quoque terrorem admoventes, circumvectarentur. Eodem & Q. Petilius Cos. ad conveniendum exercitui diem edixerat; & C. Claudius Proconsul audita rebellione Ligurum, præter eas copias, quas secum Parmæ habebat, subitariis collectis militibus, exercitum ad fines Ligurum admovit. Hostes sub adventum C. Claudii, à quo Duce se meminerant nuper ad Scultennam flumen victos, fugatosque, locorum magis præsidio adversus infelicitate expertam vim, quam armis se defensuri, duos montes Letum & Balistam ceperunt; muroque insuper amplexi, tardius ex agris demigrantes, oppressi ad mille & quingentos perierunt. Ceteri montibus se tenebant, & ne in metu quidem feritatis ingenitæ obliti, sæviunt in prædam, quæ Mutinæ parta erat: captivos cum foeda laceratione interficiunt; pecora in fanis trucidant verius passim, quam rite sacrificant: fatiati cæde animantium, quæ inanima erant, parietibus affligunt, vasa omnis generis usui magis quam ornamento in speciem facta. Q. Petilius Cos. ne absente se debellaretur, litteras ad C. Claudium misit, *Ut cum exercitu ad se in Galliam veniret, campis Macris se eum expectaturum.* Literis acceptis Claudius ex Liguribus castra movit, exercitumque ad campos Macros Consuli tradidit. Eodem paucis post diebus C. Valerius Consul alter venit, ibi divisas copias, priusquam digrederentur, communiter ambo exercitus lustraverunt: tum fortiti, quia non ab eadem utrumque parte aggredi hostem placebat, regiones, quas peterent. Valerium auspicato sortitum constabat, quod in templo fuisset; in Petilio id vitio factum postea augures responderunt; quod extra templum sortem in sitellam in templum latam foris ipse posuerit. Profecti inde in diversas regiones, Petilius adversus Balistæ & Leti jugum, quod eos montes perpetuo dorso inter se jungit, castra habuit. Ibi adhortantem eum pro concione milites, immemorem ambiguitatis verbi ominatum ferunt, *se eo die Letum capturum esse.* Duabus simul partibus subire in adversos montes coepit: ea pars, in qua ipse erat, impigre succedebat: alteram hostes cum propulissent, ut restitueret rem inclinatham Consul equo advectus, suos quidem à fuga revocavit; ipse dum incautius ante signa obversatur, missili trajectus cecidit: nec hostes Ducem occisum fenserunt, & suorum pauci, qui viderant, haud negligenter, ut qui in eo victoriam verti scirent, corpus occultavere. Alia multitudo peditum equitumque, deturbatis hostibus, montes sine Duce cepere. Ad quinque millia Ligurum occisa, ex Romano exercitu duo & quinquaginta ceciderunt. Super tam evidentem tristis ominis eventum, etiam ex pullario auditum est, *Vitium in auspicio fuisse, nec id Consulem ignorasse.* C. Valerius audita ***** periti religionum, jurisque publici, quando duo ordinarii Consules ejus anni, alter morbo, alter ferro periisset, suffectum Consulem negabant comitia habere posse ***** deduxit. Cis Apenninum Garruli, & Lopicini, &

A Hercates, trans Apenninum Brinniates fuerant. Quibus verbis Sigonius hos omnes Ligurum populos victos ex montibus in campos deductos à Lepido significari existimat, cui ego assentior. Inde pergit Livius † de altero Cos. ita scribere: Inter Audenam amnem P. Mucius cum iis, qui Lunam Pisasque depopulati erant, bellum gessit, omnibusque in ditionem redactis arma ademit. Ob eas res in Gallia, Liguribusque gestas duorum Consulum ductu auspicioque, Senatus in triduum supplicationes decrevit, & XL. hostiis sacrificari jussit. Et tumultus quidem Gallicus & Ligustinus, qui principio ejus anni exortus fuerat, haud magno conatu brevi oppressus erat. Deinde anno DLXXX. in Liguribus, inquit Livius *, in agro Statellati pugnatum ad opidum Carystum. Eo se magnus exercitus Ligurum contulerat. Primo sub adventum M. Popillii Cos. moenibus sese continebant; deinde postquam opidum oppugnaturum Romanum cernebant, progressi ante portas aciem struxerunt; nec Consul (ut qui idipsum oppugnatione comminanda quæsisset) moram certamini fecit. Pugnatum est amplius treis horas, ita ut neutro inclinaret spes. Quod ubi Consul vidit, nulla parte moveri Ligurum signa, imperat equitibus, ut equos conscendant, ac tribus simul partibus in hostes quanto maximo possent tumultu incurrant. Pars magna equitum mediam traiecit aciem, & ad terga pignantium pervasit: inde terror injectus Liguribus, diversi in omnes partes fugerunt: perpauci retro in opidum, quia inde se maxime objecerat eques. Et pugna tam pervicax multos absumpserat Ligurum, & in fuga passim cæsi sunt. Decem millia hominum caesa traduntur: amplius DCC. passim capti: signa militaria relata LXXXII. nec incruenta victoria fuit; amplius tria millia militum amissa, cum cedentibus neutris ex parte utraque primores caderent. Post hanc pugnam ex diversa fuga in unum collecti Ligures, cum majorem multo partem civium amissam, quam superesse cernerent, (nec enim plus decem millia hominum erant) dediderunt sese, nihil quidem illi pacti; speraverant tamen non atrocius, quam superiores imperatores; Consulem in se sæviturum: at ille arma omnibus ademit, opidum diruit, ipsos bonaque eorum vendidit, litterasque Senatui de rebus ab se gestis misit: quas cum A. Atilius Prætor in Curia recitasset (nam Cos. alter Postumius agris recognoscendis in Campania occupatus aberat) atrox res visa Senatui: Statellites, qui uni ex Ligurum gente non tulissent arma adversus Romanos, E iam quoque oppugnatos, non ultro inferentes bellum, deditos in fidem populi Romani, omni ultima crudelitatis exemplo laceratos, ac deletos esse: tot millia capitum innoxiorum, fidem implorantia populi Romani, ne quis unquam se postea dedere auderet, pessimo exemplo venisse, & distractos passim, justis quondam hostibus P. R. pacatis servire. Quas ob res S. C. factum est, Placere Senatui, M. Popillium Cos. Ligures, pretio emptoribus reddito, ipsos restituere in libertatem; bonaque ut iis quidquid ejus recuperari possit, reddantur curare, arma primo quoque tempore fieri in ea gente: Consulem de Provincia decedere, cum deditos in sedem suam Ligures restituisset: claram victoriam vincendo oppugnantes, non saviendo in afflictos fieri. Consul, quæ ferocia animi usus erat in Liguribus, eandem ad non parendum Senatui habuit: legionibus extemplo Pisas in hibernacula missis, iratus Patribus, infestus Prætori Romam rediit, Senatuique extemplo ad ædem Bellonæ vocato, multis verbis invectus est in Prætores: Qui, cum ob rem bello bene gestam, uti diis immortalibus

† Lib. XL. cap. XIX.

* Lib. XLII. cap. VII.

honos haberetur, referre ad Senatum debuisset, adversus se pro hostibus Senatusconsultum fecisset, quo viciniam suam ad Ligures transferret; dedique eis prope Consulem Prator juberet: itaque multam ei se dicere; à Patribus postulare, ut Senatusconsultum in se factum tolli juberent; supplicationemque, quam absentes ex litteris de bene gesta republica missis decernere debuerint, praesentes honoris eorum primum causa, deinde & sui aliquo tandem respectu decernerent. Nihilo levioribus, quam absens, Senatorum aliquot orationibus increpitus, neutra impetrata re in Provinciam redit.

Sequenti anno M. Popillius Proconsul iterum cum Statellatibus Liguribus pugnavit, ac decem millia eorum occidit: propter cujus injuriam belli ceteri quoque Ligurum populi ad arma ierunt. Coss. C. Popillius & P. Aelius in Ligures profecti: Senatusconsultum factum; Ut qui Ligurum post Q. Fulvium, L. Manlium Consules hostes non fuissent, eos C. Licinius, Cn. Sicinius Praetores in libertatem restituendos curarent; agrumque iis trans Padum Consul Popillius daret. Multa millia hominum hoc Senatusconsulto restituta in libertatem: transductisque Padum ager est assignatus. Ita per aliquot annos otium in Liguribus fuit.

Anno autem DLXXXVII. Coss. ambos M. Claudium Marcellum & C. Sulpicium Gallum cum iisdem rem prospere gessisse, ex mutilatis ipsorum triumphis, qui in Capitolinis exstant Tabulis, apparet: à quibus iisdem Alpinos Gallos, & Ligures subactos deletosque esse, in Livianis Epitomis, & apud Obsequentem est scriptum: postremo vero anno Urbis quingentesimo nonagesimo quinto in iisdem Tabulis legitur M. Fulvium Nobiliorem Procos. de Liguribus Velcatibus triumphasse: qui annus est à primo hujus belli octogesimus: siquidem anno Urbis DXV. initium scripsimus: haec est autem nobilis illa victoria, de qua scribit, ut opinor, Strabo lib. III. his verbis: Salys primos ex Transalpinis Gallis Populus Rom. in ditionem redegit; cum diturnum adversus eos & Ligures bellum gessisset, quod iter per oram maritimam in Hispaniam impedirent: etenim & terra, & mari latrocinii infesta reddebant omnia: atque iis opibus erant, ut vix magnis exercitibus viam praeberent: octogesimum autem annum bellum gerentes Romani effecerunt, ut iis, qui publice iter facerent, ad studia duodecim viapateret. Nescio autem an hunc Fulvium Florus intelllexerit, (nam multi cum Liguribus Fulvii ante bellum gesserunt) cum dixit, tandem Ligurum latebras Fulvius igne sepsit: unde Forum Fulvii cognomine Valentinum apud Plinium nomen accepit. Quo vero anno Ligures in potestatem ita concesserint, ut parere Praetori populi Romani coacti sint, parum liquet. Strabo quidem post hoc tempus Romanos, Liguribus deletis, & tributo imposito, eorum Rempublicam descripsisse tradit: quod est aliud nihil, quam eos in Provinciae formulam redegisse. Quae verba mecum ipse contemplans, inquit Sigonius, & cum bellis, quae post in Liguribus gesta sunt, comparans, in eam adductus sum opinionem, ut putem, Ligures aliquot post annis Provinciae formam M. Aemilii Scauri Consulis victoria anno DCXXXVIII. accepisse: quam sententiam intelligo praeterea multis posse me argumentis non levissimis confirmare: primum enim hic de Liguribus Gaticis triumphasse in libro De Viris illustribus fertur: deinde eundem etiam in certum ultimae quasi victoriae argumentum Aemilium in Liguribus viam stravisse refert Strabo, quam per Pisas & Lunam usque ad Sabatiam, & inde per Dertonam perduxit: postremo, quod caput est, post hoc tempus Ligurum, ut fociorum in bellis Romanis, fieri mentionem invenio.

Haec fuerunt Ligurum cum Romanis bella, quae

A per variam fortunam in octogesimum annum extraxerunt; cum res ingentibus cladibus saepe accisae susceptam animorum dimicationem extinguere non possent: illudque est ad gloriam exitium, atque haud scio, an unici exempli; quod Romani numquam sese Liguriam Provinciam pacatam habituros sperarunt; nisi quidquid floris, ac quidquid roboris in ea erat, abstracto; quadragintaque capitum familiarum millibus ex ea eductis, atque in alias procul sedes translatis. Neque vero Ligurum, postquam in Provinciam redacti sunt, vita defes fuit, aut nomen contemptum; neque virtus cum libertate simul ab illis exfuta est. Ligurum enim cohortium forti ac fideli opera Romanos in bellis continenter usos legimus: quam etiam nationem ingeniosos homines atque utiles Reipub. tulisse, duo illa illustria exempla declarant; alterum in bello Jugurthino gregarii illius militis, qui Mario de effectu jam desperare incipienti, virtute & industria sua viam patefecit ad arcis munitissimae expugnationem. Sed longe majus operae pretium factum est à Sp. Ligustino; qui, cum reliqui centuriones nomina darent, Tribunisque plebis appellassent, sapienti & tempori apta oratione eos ad meliorem voluntatem traduxit, effecitque, ut ceteri centuriones omnia appellatione ad delectum obedienter responderent: quam orationem, in qua veri militis, & imperiis obedientis effigies exprimitur, haud ab re duxi huc totidem verbis inferere: Spurius Ligustinus (inquit Livius *) à Consule & Tribunis petiit, ut sibi paucis ad populum agere liceret; permissu omnium ita locutus fertur: Sp. Ligustinus tribus Crustumina ex Sabinis sum oriundus, quiritius; pater mihi jugerum agri reliquit, & parvum tugurium, in quo natus educatusque sum, hodieque ibi habito. Cum primum in aetatem veni, pater mihi uxorem fratris sui filiam dedit; quae secum nihil attulit praeter libertatem pudicitiamque, & cum his fecunditatem, quanta vel in diti domo satis esset: sex filii nobis, dua filia sunt, utraque jam nupta: filii quattuor togas viriles habent, duo praetextati sunt; miles sum factus P. Sulpicio C. Aurelio Coss. in eo exercitu, qui in Macedoniam est transportatus, biennium miles gregarius fui adversus Philip-pum Regem; tertio anno virtutis causa mihi T. Quintius Flamininus decimum ordinem hastatum assignavit. Devicto Philippo Macedonibusque, cum in Italiam portati ac dimissi essemus, continuo miles voluntarius cum M. Porcio Coss. in Hispaniam sum profectus. Neminem omnium imperatorum, qui vivant, acriorem virtutis spectatorem ac judicem fuisse sciunt, qui & illum & alios Duces longa militia experti sint. Hic me imperator dignum judicavit, cui primum hastatum prioris centuriae assignaret: tertio iterum voluntarius miles factus sum in eum exercitum, qui adversus Aetolos & Antiochum Regem est missus: à M. Acilio mihi primus princeps prioris centuriae est assignatus. Expulso Rege Antiocho, subactis Aetolis, reportati sumus in Italiam: & deinceps his, quae annua merebantur legiones stipendia, feci: bis deinde in Hispania militavi, semel Quinto Fulvio Flacco, iterum Ti. Sempronio Graccho Praetore: à Flacco inter ceteros, quos virtutis causa secum ex Provincia ad triumphum deducebat, deductus sum: à Ti. Graccho rogatus in Provinciam ii: quater intra paucos annos primum pilum duxi, quater & tricies virtutis causa donatus ab imperatoribus sum: sex civicas coronas accepi, viginti duo stipendia annua in exercitu emerita habeo, & major annis sum quinquaginta: quod si mihi nec stipendia omnia emerita essent, nec dum aetas vacationem daret, tamen cum quattuor milites, pro me uno vobis dare, P. Licini, possem, aequum erat me dimitti. Sed hac pro causa mea dicta accipiat velim: ipse me, quoad qui exercitus scribit, idoneum militem judicabit, numquam sum excusaturus. Ordine, quo me dignum judicent Tribuni

militiam, ipsorum est potestatis. Ne quis me virtute in exercitu praestet, dabo operam, ut semper ita fecisse me, & imperatores mei, & qui una stipendia fecerunt, testes sunt. Vos quoque commilitones, nisi appellationis vobis usurpatis jus, cum adolescentes nihil adversus Magistratum Senatusque auctoritatem usquam feceritis: nunc quoque in potestate Senatus ac Consulum esse, & omnia honesta loca ducere, quibus Rempub. defensuri sitis. Hæc ubi dixit, collaudatum multis verbis Cos. ex concione in Senatum duxit. Ibi quoque ei ex auctoritate Senatus gratia acta, Tribunique militares in legione prima primum pilam virtutis causa ei assignarunt. Ceteri centuriones omissa appellatione, ad delectum obedienter responderunt.

Nec Corsæ mulieris Liguris historia silentio prætereunda est, quæ nomen suum insulæ à se inventæ dedit: quam rem Isidorus libro XIV. *Etymologiarum* capite VI. iis verbis tradit: *Corsica*, inquit, *insula exordium Ligures dederunt, appellant eam ex nomine lucis: nam quedam Corsa nomine Ligus mulier, cum taurum ex grege, quem prope littora regebat, transnatare solitum, atque per intervalla corpore aucto remeare videret, cupiens scire incognita sibi pabula, taurum à ceteris discedentem usque ad insulam navigio persecuta est; cuius regressu insula fertilitatem cognoscentes Ligures ratibus eo proVecti sunt, eamque nomine mulieris auctoris & ducis appellaverunt.* Hactenus Isidorus: quæ verba ab eo ex Sallustii libro secundo *Historiarum* huc translata apparet ex Prisciani libro sexto: qui prima hujus carminis verba sic citat: *Sallustius Historiarum libro secundo, Sed ipsi ferunt, taurum ex grege, quem prope littora regebat, Corsa nomine Ligus mulier, &c.* Hanc famam usque ad sua tempora tenuisse affirmat Rutilius Claudius Numatianus, qui iter suum maritimum ab urbe in Galliam metro scripsit: quamquam ipse rem fabulosam putat: ego cur famæ per tot sæcula testatæ, quæ præsertim Sallustium & alios graves Scriptores auctores habeat, fidem derogem, non video. Denique illud est ad laudem hujus nationis in primis insigne, quod Virgilius * eam inter fortes & strenuas Italiæ gentes commemorans, nobili elogio illam perpetuo decoravit,

Assuetumque malo Ligurem.

qua laude nulla militares viros magis commendat.

Quæ de Liguria Provincia inveni, breviter perstrictis, ad urbem ipsam Genuam venio: quæ unde hoc nomen habeat ductum, neque compertum quærentibus est, neque cum magno ullo sane operæpretio quæritur: nam quæ de Jano Trojano, & de altero Jano Genio Rege Italiæ, ac de Genuo quodam & Genuino nonnulli somniarunt; ea neque ullis certis Historiarum monumentis, quibus itemus, traduntur; ac ne à veterum quidem Poetarum fabulis narrantur: quæque Catonis & Berossi nomine circumferuntur inscripta volumina, ea falso egregiis auctoribus ab imperitis affingi, multa peripicua sunt argumenta. Catonis quidem mentitum commentarium præter cetera lingua ipsa refellit, longe ab ea diversa, qua ætas Catonis utebatur, quaque clarus vir res suas litterarum monumentis mandavit.

Inter cetera igitur vetustate incomperta, causâ quoque nominis nostræ civitatis erit: quamquam ego facere non possum, quin, quæ tacita cogitatio sæpe volutavit animum, eam in medium proferam. Illud inter omnes auctores constat Apennini initium à Genua fieri; ad eamque urbem Alpes cum Apennino committi, ut ea hujus regionis pars, quæ est ultra urbem Genuam, Ligures Inalpine vocentur. Cum igitur duo hi celeberrimi orbis montes in angulum ad Genuam opidum conjungantur, ac formam genu efficiant, haud omnino à vero absumile est, hoc opidum à forma

* Lib. II. Georgic. v. 168.

A genu Genuæ nomen accepisse. De ea re sui cuique libera existimatio sit. Hanc urbem celebre semper fuisse Liguriæ emporium, omnes veteres auctores, in iisque nominatim Strabo, consentiunt. Quæ urbs partes Romanas perpetuo secuta magno in pretio semper apud illos fuit: quippe quæ classium & copiarum Romanarum receptaculum esset: quod ut illis tollerent Carthaginienses, à Magone Poeno diruta est: hancque fuisse primam Genuæ dirutionem tradunt; cum secunda Rotharis Longobardi fuerit; quam tamen, Carthaginiensibus Italia summotis, Romani è vestigio iterum ædificarunt: eaque de causa Lucretio consulare imperium prorogatum est: adeo jam tum dignitas civitatis nostræ excellabat, ut ad eam instaurandam Romani consulare imperium prorogandum censuerint.

B Sed nihil ad dignitatem urbis nostræ commendandam æque facit, ac tabula ahenea in valle Porciferæ avorum nostrorum memoria reperta: quæ testatur Genuam jam tum caput circumjectæ regionis fuisse, unde circumfusi populi jura peterent: ad ejus enim forum rejiciuntur controversiæ, si quæ de finibus aliisve de rebus inter Ligusticos populos in illis tabulis nominatos exortæ fuerint. Quæ omnia peripicuo argumento sunt, Genuenses non ex iis Liguribus populis fuisse, quos latrocinii vitam tolerantibus difficilius erat invenire quam vincere. Eos credibile est fuisse montanos, & Apuanos Ligures, in speculicis latentes, atque omni hominum generi insociabiles. Verba autem ejus tabulæ, in qua plurima est, neque cognitu indigna, vetustatis effigia, huc transferre non piguit:

C *Q. M. Minucius. Q. F. Rufus. de controversiis inter Genuates & Veiturius in re presente cognoverunt, & coram inter eos controversias composuerunt, & quæ legem agrum possiderent, & quæ sineis fierent dixerunt. Eos sineis facere, terminosque statui jousserunt ubi ea facta essent, Romam coram venire jousserunt Roma coram sententiam ex senat. con. dixerunt eidem. Decemb. L. Cæcilio. Q. F. Q. Muntio. Q. F. Coss. quæ ager privatus castelli Veiturius est, quem agrum eos vendere, heredemque sequi licet, is ager vectigal nei fiet Langentium sineis agri privati ab rivo infumo, qui oritur ab fonte Immannicelo ad fluvium Edem, ibei terminus stat. Inde fluvio sursum in fluvium Lemurim, inde fluvio Lemuri sursum usque ad rivum Comberanea. Inde rivo Comberanea sursum usque ad convallem Captiemam, ibei termini duo stant circum viam Postumiam. Ex eis terminis recta regione in rivo Vindupale, ex rivo Vindupale in fluvium Neviasca, inde dorsum fluvio Neviasca in fluvium Procoberam, inde fluvio Procobera deorsum usque ad rivum Vinelascam infumum, ibei terminus stat, inde sursum rivo recto Vinelasca, ibei terminus stat propter viam Postumiam: inde alter trans viam Postumiam terminus stat: ex eo termino qui stat trans viam Postumiam recta regione in fontem Immannicelum. Inde deorsum rivo qui oritur ab fonte Immannicelo ad terminum qui stat ad fluvium Edem agri poplici, quod Langenses possident. Hisce sineis videntur esse, ubi conflunt Edis & Procobera, ibei terminus stat: inde Ede fluvio sursum in montem Lemurino infumo, ibei terminus stat: inde sursum vortum jugo recto, monte Lemurino, ibei terminus stat: inde sursum jugo recto Lemurino, ibei terminus stat in monte Procaro. Inde sursum jugo recto in montem Lemurinum summum, ibei terminus stat. Inde sursum jugo recto in castellum, qui vocitatus Tullianus, ibei terminus stat. Inde sursum jugo recto in montem Joventionem, ibei terminus stat. Inde sursum jugo recto in montem Apenninum, qui vocatur Boplo, ibei terminus stat. Inde Apennino jugo recto in montem Tuledonem, ibei terminus stat. Inde deorsum jugo recto in fluvium Veraglascam in montem Berigiam*

giemam infumo, ibei terminus stat. Inde sursum jugo recto in montem Prenicum, ibei terminus stat. Inde dorsum jugo recto in fluvium Tulelascam, ibei terminus stat. Inde sursum jugo recto Blustiemelo in montem Claxelum, ibei terminus stat. Inde deorsum in fontem Lebriemelum, ibei terminus stat. Inde recto rivo Enifeca in fluvium Procoberam, ibi terminus stat. Inde deorsum in fluvium Procoberam, ubi confluent fluvii Edis & Procobera, ibei terminus stat, quem agrum poplicum judicamus esse. Eum agrum Castellanos, Langenses Veituros possidere fruique videtur oportere: pro eo agro vectigal Langenses Veituriis in poplicum Genuam dent in annos singulos vic. N. CCCC. sei Langenses eam pecuniam non dabunt, neque satisfacient arbitratu Genuatium, quod per Genuenses mora non fiat, quo setius eam pecuniam accipiant. Tum quod in eo agro natum fuerit frumenti partem vicensumam, vini partem sextam Langenses in poplicum Genuam dare debent in annos singulos. Quoi intra eos sineis agrum possidet Genuas aut Veituros qui eorum possideat K. sex. L. Caicilio Q. Munio Cos. eos ita possidere colereque liceat. Quoi possidebunt, vectigal Langensibus pro portione dent ita, uti ceteri Langenses, qui eorum in eo agro agrum possidebant, fruenturque: praterea in eo agro nei quis possideat, nisi de maiore parte Langensium Veituriorum sententia dum ne alium intromittat, nisi Genuatem, aut Veiturium colendi causa. Quoi eorum de maiore parte Langensium Veiturius sententia ita non parebit, is agrum nei habento nei ve frui mino. Quoi ager compascuos erit: in eo agro quo minus pecuascere Genuates Veituriisque liceat ita uti in cetero agro Genuati compascuo nei quis prohibeto, nei ve quis vim facito: nei ve prohibeto, quo minus ex eo agro ligna materiamque sumant, utanturque. Vectigal anni primi K. Januariis secundis. Veituriis Langenses in poplicum Genuam dare debent: quod ante K. Jan. primas, Langenses fructi sunt eruntque, vectigal inviti dare nei debent. Prata qua fuerunt proxima foenifici L. Caicilio. Q. Munio Cos. in agro poplico, quem Veituries Langenses possident, & quem Opiates, & quem Deftunines, & quem Cavaturines, & quem Mentovines possident, ea prata inviteis Langensibus, & Opiatibus, & Deftuninibus, & Cavaturines, & Mentovines, quem quisque eorum agrum possidebit, inviteis eis nei quis ficit, nei ve pascat, nei ve fruatur: sei Langenses, aut Opiates, aut Deftunines, aut Cavaturines, aut Mentovines malent in eo agro alia prata immittere, defendere, ficare, id uti facere liceat dum ne ampliorem modum pratorum habeant, quam proxima astate habuerunt; fructique sunt Veituries qui controversias Genuensium ob injurias iudicati aut damnati sunt, sei quis in vinculeis ob eas res est, eos omnes solvei, mittei, leiberique Genuenses videtur oportere ante eidus sex. primas: sei quoi de ea re iniquom videbitur esse, ad nos adeant primo quoque die, & ab omnibus controversiis, & hono. publ. leg. Moco Meticanio Meticoni. F. Plancus Peliani Pelioni. F.

Sub Imperio Romano, ut cetera Italia, & Liguria fuit, usque ad adventum Gothorum; à quibus quamquam Liguriam & Genuam nusquam captam legi, tamen in imperium Gothorum eam Provinciam, eamque urbem cecidisse, certissima exstant monumenta. Multa enim pro imperio Theodoricus, & alii Reges Gothi Genuæ per epistolas suas mandasse leguntur: quæ urbs, Gothis à Belisario exactis sub Imperium Romanum Græcorum rediit, priusquam Mediolanum caput, & ceteræ Liguriæ civitates: siquidem, Belisarius cum nonnullas copias Græcas sub Ducibus idoneis ad recuperandum Mediolanum misisset, ii Duces è portu Romano solventes, Genuæ copias exposuerunt, indeque ad destinata consilia profecti sunt. Tum Genua per Duces regebatur; eratque, Totila regnante, Dux quidam Genuæ Bonus nomine, ex quo Totilas occasionem arripuit talis doli nectendi:

A adulterinas enim litteras Boni nomine composuit, quas ad Belisarium dedit, qui tum cum classe in Dalmatia adversus Gothos res gerebat: ejus virium partem ut à Belisario abstraheret Totilas, scribebat Boni nomine, sese à Gothis nimium premi, resque in extremum adductas; neque posse diutius à se resisti, nisi validum armatorum subsidium sibi submittatur. Quot similes Duces Genua habuerit, incompertum plane est, quemadmodum illud quoque ignotum, an Totilas simul cum reliquis Italiæ regionibus Genuam recuperavit. Illud constat Roma à Narsete Imperio Græcorum Cæsarum recuperata, Gothisque Italia plane exterminatis, Genuam sub Cæsarum Græcorum Imperio septuaginta annos fuisse; eamque regimini senatoris populi, qui tum magistratus Romæ res Imperii regebat, subjectam. Gothos subsecuti sunt Longobardi, gens fera & truculenta; qui, cum omnes Circumpadanos campos occupassent, præter maritimas Liguriæ civitates, totam illam latissime patentem regionem, omnibus veteribus nominibus plane extinctis, à suo nomine Lombardiam appellaverunt.

Quo tempore eadem fuit civitatis Genuæ fors, quæ multis ante annis urbis Venetiarum: cui originem dederunt Forojulienenses, & ceteri accolæ populi, qui imminentem procellam ab Atila primum, deinde à ceteris barbaris nationibus, in paludes illas confugientes vitarunt, tantæque civitatis fundamenta jecerunt. Sic Honoratus Archiepiscopus Mediolanensis, cujus illis & posterioribus temporibus magnum semper nomen fuit, summaque in rebus Ligusticis auctoritas, cuique omnes sacri Ligurum Antistites parebant, furori immanium Barbarorum se subtrahens, cum magna Mediolanensis nobilitatis parte Genuam situ munitissimam urbem concessit; in eaque ipse cum nobilitate, quam diximus, sedes ac domicilium per annos septuaginta constitutum habuit: cujus rei certissima exstant monumenta, tam in Epistolis beati Gregorii, quam in aliis probatis auctoribus; ut par factum utriusque civitatis fuerit: ac, quemadmodum Venetiæ ex ruinis circum accolentium conflatae sunt; ita Genua ex incommodis & infelicibus casibus præclarissimæ urbis Mediolani, incolarum frequentia atque opibus in immensum creverit: cum præsertim verisimile sit, multos ex Mediolanensibus, in tam longo temporis spatio, partim affinitatibus sese cum Genuensibus conjunxisse, partim amoenitate cœli captos, ac commoditate situs alleptos ad maritima commercia in primis aptam Genuam patriam sibi ac posteritati suæ sumpsisse: cum præsertim Longobardi barbara lege sua, usu ac tractatione armorum, omnique re militari Italici interdixissent, remque rusticam tantummodo, & mercatoriam negotiationem illis reliquissent: quæ res finitimos populos ad Genuam incolendam invitare poterat.

Dispar fortuna fuit septimi Christiani insequentis sæculi, cujus anno septuagesimo Rotharis Rex eorumdem Longobardorum, transiens jugis Apennini, in maritimam Liguriam descendit, totamque oram simul cum Genua, quæ ad eum diem sub Imperio Romanorum semper fuerat, ditioni Longobardorum subjunxit; ac Genuam ipsam, ut Volaterranus tradit, evertit: sub quibus fuit usque ad invictum Carolum Magnum Regem Francorum inclytamque Pipinorum gentem; qui Longobardorum dominatum, qui in Italia ducennalis fuerat, prorsus delevit; Romanorumque Imperator anno Christianæ salutis octingentesimo Romæ in templo Vaticano felicissimis auspiciis à Leone tertio creatus, & inauguratus; Imperiumque cum Græco Cæsare ita partitus, ut illi Provinciæ Orientales remanerent, Occidentales Carolo cederent;

rent; Regnum Italiæ, quæ est citra Romam, exceptis Provinciis, atque urbibus, quæ honoris illius gratia Pontifici donata sunt, instituit: cum omnes hujus Regni civitates singulæ per singulos Comites regerentur: primusque Genuæ Comes Audemarus fuit, magnus vir, ac regia affinitate præfulgens, tum autem multis egregiis virtutibus insignis, ac rebus gestis clarus. Causa tantum virum Genuæ præficiendi fuit, ut ejus spectatam virtutem Saracenorum conatibus opponeret; qui littoribus Hispaniæ omnibus, ac Narbonensibus, & Massiliensibus magna ex parte occupatis, impetum suum in Italiam converterant; ejusque littora, atque adjacentes insulas Siciliam, Sardiniam, Corsicam, quas eidem Pontifici Carolus donaverat, infesta classibus suis continenter faciebant. In quorum Comitum procuratione centum circiter annos urbs Genua fuit; donec Caroli & Pipinorum stirpe in Italia extincta; Imperioque à Francis ad Germanos translato; ipsa cum ceteris fere Italiæ urbibus externo dominatu libera, suis Magistratibus liberis suffragiis creatis uti cœpit, qui Consules appellabantur: quorum regimen nunquam nisi numero varians, trecentos circiter annos duravit; quoad ambitus civium, & contentiones peregrinum Prætores in civitatem induxerunt: ut suo loco videbimus.

Primus Comes Audemarus fuit; cui negotium à Pipino datum est, Italiæ littora ad Saracenorum impetus, qui interjectas Corsicam & Sardiniam insulas occupant, tuta præstandi. Hoc Comite Duce, ac præfecto, Genuenses ingentem ac prævalidam classem compararunt; quæ ingens operæpretium insigneque facinus fecit; Saracenis ex Corsica expulsi, ejusque insulæ imperio Genuensi populo adjuncto: quod bello partum postea Romani Pontifices illi ratum fecerunt.

Ceterum annus decimi sæculi trigessimus sextus lugubris & exitiosus urbi fuit: quam defensoribus vacuum omnibus fere, qui erant armis ferendis, in expeditionem quandam profectis, Saraceni captam, direptamque incenderunt, & everterunt; imbelli multitudine partim cæsa, partim captiva abducta. Tenebatur fama eam rem portendisse fonticulum haud procul à mari, ab eoque loco, in quo nunc moles ædificata est, qui paucis ante diebus sanguine manavit, ripisque superfluis proximas urbis plateas inundavit. His miraculis vulgi opinio semper gavisâ est, fidem vel affirmare, vel abrogare non necesse habeo. Ulti mox injuriam ac barbaram crudelitatem sunt Genuenses; qui ab expeditione reversi, dolore dirutæ patriæ, ac conjugum, liberorum, parentum cæforum & abductorum ardentes, abeuntes Saracenos vestigiis persecuti, ad insulasque Businarias, haud procul à littoribus Sardiniae, adepti in eos prælio victos omnem efferatorum animorum rabiem effuderunt; omnibus, præter perpaucos, qui manus victorum subterfugerunt, velut pari pecudum numero trucidatis: ira igitur & odiis strage Barbarorum exsatiati, naves hostiles captas secum trahentes cum captivis recuperatis in patriam reverterunt.

Insignis quoque est annus ejusdem sæculi quinquagesimus octavus, omnibus, quæcumque Genuenses possidebant, simulque illorum Magistratibus, legibus, institutis, diplomate Berengarii tertii, Albertique filii Italiæ Regum, dato Papiæ, quæ tum urbs Regum sedes erat, comprobatis.

Memorabilis in primis est annus quintus decimus undecimi sæculi, insula Sardinia à Genuensibus & Pisanis societate armorum conjunctis capta; Musactoque Saraceno Rege captivo, qui cum cetera præda Genuensibus cesserat, ad Cæsarem missus. Discrepant ea in re haud parum inter se nostri & Pisanorum Annales: illi enim rem latius explicantes, hanc quartam fuisse in Sardiniam ad-

versus Musactum Regem expeditionem affirmant: historiam ordientes ab anno ejus sæculi quinto: quo tradunt Pisanos primum ingentium præmiorum spe impulsos, Romanique Pontificis edicto inductos, quo Christianos populos, quicumque maritimis opibus pollerent, ad Saracenos ex Sardinia exigendos, dono ipsiusmet nobilis insulæ incitabat, Sardiniam invasisse: ceterum irritum inceptum fuisse, Pisanis bello Etrusco à Lucensibus contra ipsos moto domum revocatis: qui, Lucensibus expulsis, ac suis recuperatis, in Calabriam Rhegium, quæ urbs ipsa quoque à Saracenis tenebatur, obsidendum profecti sunt: qua obsidione illis implicitis, Musactum occasione arrepta Pisanos ulciscendi, prævalida classe comparata in Etruriam trajecisse, Pisasque defensoribus vacuas sine certamine cepisse, captasque incendisse: cum qui domi remanserant, tantam procellam vitantes, sese in montana, & tuta loca subduxissent: at Pisanos Rhegio tandem expugnato, domum reversos, cum prius urbem dirutam & incensam instaurassent, omnibus viribus connisos, dolore & ira illos stimulante, cum ingenti classe Sardiniam septimo post anno repetisse; Musactoque tandem ejecto, insula potitos: ceterum, cum Musactus non nullo post tempore reversus Sardiniam recuperasset, graviter ea re commotum Pontificem, Episcopum Ostiensem Legatum Pisas misisse: quo, simulque Antistite Pisano hortantibus, dominatque Sardiniae Pontificio diplomate Pisanis rato facto, Pisanos sexto post anno tertiam expeditionem suscepisse, felici exitu: verum cum Musactus exturbatus quiescere non posset, Sardiniamque iterum recuperasset, Pisanos majore conatu id bellum sibi capeiendum ratos Genuenses in societate armorum sibi adjunxisse, pactos, ut dominatus insulæ recuperatæ ad Pisanos rediret, præda omnis Genuensibus cederet.

In superioribus expeditionibus, nihil est, quod fidem Pisanorum Annalibus abrogemus: at in hac quarta expeditione haud de parvis rebus Genuenses & Pisani Annales inter se differunt: nam Musactum captum & ad Cæsarem à Genuensibus adductum Pisani prorsus comprimunt; quodque de partitione insulæ & spoliis à Pisanis traditur, ejus rei nulla est apud Genuenses mentio. Porro parum verisimile est Genuenses parte infinito intervallo inferiore contentos fuisse: neque in tot contentionibus de jure imperii in ea insula coram Cæsare sæpe jactatis, Pisani hanc divisionem ac conventa umquam proposuerunt, quibus ipsorum causa tantopere juvari posset: neque Ahenobarbus Sardiniam inter Genuenses & Pisanos æqualiter dividere jure potuisset; quæsitumque jus Pisanis auferre.

Porro Pisanorum Annales historiam Musacti insequi pergentes, Musactum bellum postea sæpe repasse affirmant: adversus quem Pisani cum prævalida classe profecti adversa tempestate in Corsica retenti, insulam defensoribus vacuum occuparunt: quæ res prima concordēs ad eam diem populos in arma egit. Genuenses enim non solum desiderio sua recuperandi compulsi, sed ira & indignatione, quod sese à Pisanis spretos crederent, in omnia præcipitia illos agente, cum duodecim triremibus Arnun fluvium subire, atque urbem ipsam Pisas petere non dubitarunt. Magno illis nimia sui fiducia stetit, classe à Pisanis profligata, ac magna parte navium, simul cum mercibus magni pretii, quas in Orientem vehebant, amissa: ut ea, multisque, quæ eam consecutæ sunt, ætatibus triremes ad bellum & ad mercaturam pariter armabantur & instruebantur: qui mos non civitatis nostræ modo, sed omnium populorum fuit, quicumque rem navalem colebant.

Manca & detruncata omnia è rudibus illorum temporum scriptoribus traduntur : qui res verbo vix attingentes neque causas neque exitus bellorum produnt ; ut omnia veluti densissima ignorantiae caligine obruta vix appareant , ac velut ex magno vetustatis intervallo procul adspicientibus vix cernantur : velut ea quoque in obscuritate versantur , quæ de expeditionibus in Africam & in urbem Dertusiam , illa anno nonagesimo , hac nonagesimo tertio factis , uno verbo tantummodo pronunciantur.

A. C. 1096. Sequitur ordinata & connexa temporum & rerum nostrarum series , initio facto ab anno Christianæ salutis millesimo nonagesimo sexto , quam nunc ordiri pergam , si prius , quæ ad religionem pertinent , paucis perstrinxero. Religionem & doctrinam Christianam civitas nostra à Nazario & Celso accepit , qui ab Apostolis legem humanæ salutis præsidem pronuntiandam , in Galliam Cisalpinam , & in finitimas Provincias missi , exscensione ad littus prope ab urbe Genua minus mille passus facta , urbem ingressi , nonnullosque dies in illa commorati cœlestis doctrinæ semina jece-
runt : quæ brevi in pio populo uberrimos fructus tulerunt : quos aluit complurium sacrorum & egregiorum Antistitum sedula diligentia & nullis laboribus fessâ sollicitudo : in quibus floruerunt Romulus , Syrus , Felix , Valentinus ; quos miraculis claros perpetuus vitæ cursus cum innocentia & continentia supra humanum captum actus ad cœlestes ac beatas sedes extulit. Præfulget Desiderius in pago prope ab urbe natus à Lingonibus Galliæ populis , qui postea Burgundi appellati sunt. Divino monitu Episcopus accersitus ; ac miraculo florecentis scipionis à Legatis ad hominem peregrinum quærendum missis deprehensus : qui miraculorum splendorem martyrii gloria cum-
lavit.

Nunc ad seriem rerum gestarum venio : quam à nullo clariore initio ducere potuimus , quam à bello sacro : ad quod bellum omnes fere Europæ Proceres ingentibus motibus consurrexerunt , mirisque studiis exarserunt , religionis tantummodo & gloriæ stimulis incitati. Primum opus fuit ad Antiochiam : cujus urbis expugnatio diuturni laboris , ac multorum & magnorum discriminum fuit , multoque sanguine Christianis stetit ; anticipi periculo circumstante hinc à præsidio genere & numero prævalido , quo magna , ac natura & opere munita , urbs firmata erat , illinc ab innumerabilibus Turcarum copiis , à quibus sæpe acerrimis ac justis præliis petiti sunt. In qua expugnatione cum à ceteris Christianis Ducibus & nationibus complura egregia fortitudinis , audaciæ , constantiæ edita sunt documenta ; tum vero Guiscardorum atque Italarum militum , qui illos secuti sunt , virtus & consilium ita enituerunt , ut maximæ ac maximi nominis expugnatae urbis , quæ caput Syriæ semper fuerit , tantaque habeat terrestres ac maritimas opportunitates duodecim millia passuum à mari distans , simulque cum illa late patentium circumjectarum regionum principatus ad Boemundum sit delatus : qui locus à Rege ipso Hierosolymorum proximus est. Igitur cum bellum ad hanc urbem confedisset ; primi Genuenses , Pontifice hortante , cum ingenti classe omnique bellico apparatu instructa , ad hoc magna vi nauticorum ac militum referta , anno Christianæ religionis millesimo nonagesimo septimo Christianis rebus subsidio venerunt. Sed neque numerus navium , neque Ducis nomen à scriptoribus traditur. Primo adventu littora Syriæ per immensam longitudinem occuparunt ; quæ res maritimas subvectiones exercitui tutas & pacatas fecit. Per idemque tempus Princeps Tarentinus , & Comes Tholosanus

A cum delecta quinque millium armatorum manu ad classem venerunt ; ingentemque annonæ ac bellicarum machinarum & ferramentorum numerum à Genuensibus acceperunt : quæ res magno usui Christianis rebus fuerunt. Insequenti anno sub finem mensis Maji , expugnata tandem Antiochia , qui labor annuus fere fuit , duo Christiani ordinum ductores , qui metu ingentium Turcarum copiarum ad captam urbem recuperandam adventantium noctu ex urbe clam profugerant , ad classem venerunt ; mentitique sunt , Antiochiam à Barbaris recuperatam. Quo trepido nuncio perculsi Genuenses simul omnia Syriæ littora ab innumerabili hostium multitudine per totam longitudinem prætenta occupata cernentes , cum ibi nec cum ullo operæ pretio , & cum magno periculo esset , solventes iter in patriam dirigunt : atque in itinere cum Myrream Lyciæ urbem tenuissent , reliquias inclyti vatis Joannis Baptistæ , ab urbe Alexandria metu imminentium bellorum eo translata , à sacerdotibus ædis divo Nicolao inscriptæ , quo in templo reliquiæ adservabantur , acceperunt ; à sacerdotibus & antistitibus pro re certa edocti , eas non divi Nicolai , ut vulgo fama ferebat , sed sanctissimi Prodromi reliquias esse , historia , quemadmodum in eam urbem translatae essent , exposita. Læti tanto cœlesti dono Genuenses sacras cineres acceptas , in cella in maximo templo regio sumptu ædificata , ac nobilibus signis ornata venerabundi collocarunt : quæ præsentibus miraculis magnæ sæpe opi in variis & periculosis casibus civitati nostræ fuisse traduntur. Eo anno in demortui locum Ayraldus Guaracchus Episcopus successit est.

Antiochia capta , ejusque possessione hostilibus copiis profligatis , (à quibus sæpe magno conatu est repetita) Boemundo stabilita , copiarum omnes per totam Syriæ longitudinem ductæ anno insequenti millesimo nonagesimo nono sacrae urbi Hierosolymis admotæ sunt , omnisque vis belli ad eam urbem translata , præstoque fuit Genuensium classis : quam magnam fuisse inter omnes externos scriptores constat ; cum numerus æque ut superioris classis vitio scribentium sit ignotus. Dux fuit Gulielmus Embriacus , vir acer ac strenuus , atque impiger , ad hoc sollertis ingenii , neque exigui consilii ; qui portum urbis Joppæ tenuit. Dum in ea esset statione , auditum est , classem Ægyptiam numero longe superiorem ex portu Ascalonis solvisse , ac Genuensem classem petere : cum qua Embriacus sese tanto viribus imparem congregi nihil aliud esse intelligens , quam se ipsum tantum virorum fortium numerum , tantamque bellicorum apparatus vim , classem denique ipsam barbaro hosti occupanda prodere , prudenti consilio minima malorum eligenda statuens , exscensione extemplo hominum facta , omnibusque armamentis ac bellicis machinis com meatibusque & ceteris omnibus , quæ classis vehebat , in terram expositis , alveos navium vacuos demergit , ne in manum hostis venirent : confestimque ad exercitum cum nautis ac remigio delectaque bellatorum manu , cumque omnibus , quæ secum vexerat , iter capit : divinoque numine Christianis rebus propitio factum est , ut exigui damni species in magnum bonum verteret : machinæque & instrumenta à Genuensibus advecta expugnationem sacrae urbis accelerarent , sine iis diutius extrahendam , ut mox scribemus. Iter persequentes cum eo pervenissent , ut in conspectu sacram urbem haberent ; tum ingenti religione mentibus perfusis , venerabundi procidentibus , solum , in quo Dei Filius esset natus ac vestigia fecisset , osculati sunt ; Deum immortalem , ejusque unigenitum Filium Christum Dominum humani generis redemptorem comprecati.

Ut militibus suis religionis studio accensis, ad sacra loca è pollutis manibus impiorum Barbarorum eripienda tantos maris ac terrarum tractus emensis, propitius adesset; bellumque cum nefariis suis hostibus ab ipsis commissum ipse numine suo profligaret, ac cultores nominis sui victoria compotes faceret, perfidosque hostes fugæ ac formidinis impleret: precatione peracta, ad exercitum perveniunt, à Bolionio atque ab omnibus ordinibus comiter ac læte accepti. Magno usui Christianis rebus toto eo obsidionis tempore fuerunt Genuensium machinæ bellicæ omnis generis, ab ipsis partim adductæ, partim ad exercitum per varias occasiones subinde ædificatæ; ut Genuensium fabricorum sollertia & industria à scriptoribus illorum temporum haud vulgaribus præconiis celebretur; ceterum illud est ad memoriam longe insigne Ducis ipsius Embriaci excogitatum. Is Bolionum adiens, *Lentam, inquit, rem fore provideo, imperator, tam munita ac tam valido presidio firmata urbis expugnationem; nisi vires consilio adjuvamus. Cum collaudatum atque ingentibus promissis oneratum exprimere juberet imperator, quod tandem consilium afferret; Turrim, inquit, vasta magnitudinis compatibilem ad faciliores subvectiones adificare mihi in animo est; eo artificio exstructam, ut cacumen deslexum, atque in moenia inclinatum ab altero capite illis innitens, usum pontis præbeat, per quem in urbem sit transitus: quæ res mihi difficilis non erit, nec materia deficiente, & multitudine sollertium & industriorum artificum abundanti. Lætus imperator, Maeste, inquit, virtute; tu vero amabo præclarum cogitatum ad effectum perducere propera, opusque tanta utilitatis rebus nostris perfice, haud exignam partem laudis sacra urbis expugnata Genuensi nomini consilio præclaro isto tuo, & tuorum industria pariturus. Nulla igitur mora interposita, opus cœptum, Embriaco urgente, nocturnoque labore diurnoque continuato, brevi ad effectum perductum; cujus frustra plaustris ad moenia promota sunt, ibique turris coagmentata & erecta; ac coriis ad incendia arcenda ab anteriore parte contestata: quæ re confirmatus Bolionius, turri moenibus admota, præstituto die vix orto sole urbem valida oppugnatione aggreditur: quæ cum nullis ex partibus fegnis, tum vero à turri acerrima erat; Genuensibus ex fenestris, quibus multis in locis patefacta erat turris, omne genus missilium atque ignium compositorum ingerentibus: casuque, sive verius divino consilio, factum est, ut in ipso ardore pugnae acer ventus coortus terga Christianorum afflans in ora adverforum Saracenorum ferretur; quo cœlesti beneficio Christiani utentes, animis renovatis majore impetu oppugnationem urgentes, magnam vim incensarum facum in hostem conjiciunt: quæ cum motu ipso & vi coorti venti majores conciperent flammæ; storiisque ac sacculis variique generis munimentis ex materia igni obnoxia ab hostibus oppositis adhæsisent, brevi omnia conflagravit. Saracenis frustra incendium extinguere nitentibus; cum nemo illorum in loco, quem ceperat, consistere posset, fumo ac vapore venti impulsu in Saracenorum ora tendente, ac nihil Christianos ex propinquo strenue pugnantes lædente: quare moenibus ab ea parte defensoribus nudatis, soloque mox complanato, turris propius promota est; adversus quam Saraceni firmissima erecta antenna, ex ea suspenderunt transversam trabem, quæ impulsæ & reductæ instar arietis turrim verberabat: at Genuenses muralibus falcibus ante præparatis funem, quo trabs suspensa erat, præcidunt; quæ recta decidens, ac pondere suo terræ infixæ in bonum etiam vertit: firmissimum enim suffulcrum, atque usum publicæ inflexo turris cacumini præbuit. Igitur Gotofredus imperator haud cunctandum ratus, fretus divini numinis favore, Princeps ipse per eum pontem moenia ingreditur, miraculo au-*

A daciae omnibus, qui aderant, obstupefactis: quem è vestigio Eustatius frater consecutus est: quo exemplo ceteris incitatis, magna armatorum multitudo eadem via transcendit, moenibusque ab ea parte occupatis, portaque maxima refracta, omnis exercitus in urbem irrupit. Hoc modo clarissima urbs Hierosolyma novem & triginta dierum oppugnatione à Christianis recuperata est: quam Heraclio imperante captam Saraceni quadringentos nonaginta annos tenuerant.

B Partem laudis hujus turris exstructæ Pisani scriptores ad nationem suam trahunt: quam Genuenses operis sociam habuisse contendunt: quod mendacium ab exteris scriptoribus clare refellitur: nam Francorum Annales ac Paulus Æmilius locupletissimus auctor rerum Gallicarum, idemque clarissimus scriptor, totam eam laudem unis Genuensibus tribuit: idem facit Gulielmus Archiepiscopus Tyrius incorruptissimus sacri belli ac diligentissimus scriptor, qui pluribus verbis rem narrat: neque vulgaribus laudibus ingenium & sollertiam Gulielmi Ducis & Genuensium effert: atque usque adeo à communitate hujus laudis Pisanos excludit, ut eorum classem post Hierosolimam ipsam expugnatam ex Italia ad littora Syriæ & Palæstinæ appulsam tradat.

C Captæ urbis, locis sacris prius expiatis, ac rebus divinis rite ac religiose procuratis, creatus Rex est consentientibus Procerum suffragiis Robertus Dux Normanniæ, sive dignitate, sive promerito eminente, qui hujus belli causâ insignem ditionem vendidisset, maximamque ipsius Ducatus partem oppignerasset. At ille ingentibus gratiis Ducibus actis, qui ipsum ceteris prætulissent, delatum regnum non accepit, cum nuncio accepto de obitu Gulielmi fratris Angliæ Regis, ad successionem regni discedendum esset. Iteratis igitur comitiis, non minore studiorum ardore regnum ad Bolionium Lotharingum delatum est: qui non minora modestiæ in regno accipiendo, quam virtutis in illo merendo, edidit documenta, haud passus se regio diademate insigniri; à pietate Christiana alienum dictitans, in ea urbe mortalem hominem coronam auream gestare, in qua Dei immortalis Filius è spinis contextam gestasset.

E Tertia expeditio insequentis anni millesimi centesimi, sex & triginta triremium, ac sex corbitarum, declaravit religionis ac gloriæ studium in Genuensibus ea tempestate indefessum; quod per intermissiones minime relanguescere paterentur: ad hoc index fuit, quanta esset Genuensis nominis in transmarinis regionibus auctoritas. Ea eundem, quem superior annus, Ducem habuit Gulielmum Embriacum; cui spectata virtus ac recens rerum gestarum gloria honorem continuavit: hunc exteri fere scriptores Gulielmum Capitemaleum appellant; cognomine potius corporis & animi robur, quod in forti viro conspectum in primis fuit, significante, ut in claris viris sæpe usurpatum est, quam nomine familiæ honoris causâ eum vocantes, quæ nulla hujus nominis ne in serie quidem Magistratuum apud Annales nostros legitur: quam familiam inter primates fuisse necesse est, cui summa imperia mandarentur. Classis igitur Kalendis Augusti Genua solvens, octo hominum millia vehens non minus ad pedestria bella, quam ad navalia ministeria instructorum, Laodiceæ urbis Constantinopolitanæ ditionis in Syriæ ora portum tenuit; in quo totam insequentem hiemem in hibernis fuit.

F Cum Bolionius clarissimis virtutibus, rerumque gestarum atque insignis pietatis gloria sempiternis sæculorum ætatibus memorabilis, luctuoso Christiani nominis casu mense Junio ex pestilentia decessisset, neque plus annum in regno fuisset, ex quo-

quoque illo temporis curriculo post Christianorum copiarum ex Syria discessum complures non obscuri nominis urbes Hierosolymitano imperio adjunxisset; in demortui tam clari Principis locum suffectus est Balduinus frater, Legato Pontificio ac Patriarcha Hierosolymitano auctoribus: qui regnum plenum contentionum ac discriminum non prius accepit, quam promisso à Genuensibus accepto, illos se auxilio suo non deserturos; illorum videlicet classibus ac navalibus opibus se adversus finitimorum Ægyptiorum conatus, qui illis temporibus mari plurimum poterant, communitum volens. Dignum se tanto fratre in regno regendo ostendit Balduinus: quod decem & septem annorum fuit; compluribus ac magnis rebus gestis, clarisque parvis victoriis.

Interea classis Genuensis illud hibernorum tempus haud quamquam segne tranfierat; sed per varias occasiones è portu exiens Saracenorum agrum crebris incursionibus infestum faciens, variis belli claudibus affecit, incendiis ac ruinis passim grassando. Appetente vere, ac tempore gerendarum rerum appropinquante, è portu exiens classis littora Syriae legens urbem usque Porphyriam, quæ vulgo postea Caphas appellata est, perrexit. Ibi adversa tempestate coactus est præfectus classem in proximum urbis littus subducere; paulloque post classis Memphitii Regis quadraginta triremium idem litus, Genuensibus inspectantibus, prætervecta est: quare Dux, cum tempestas aliquantum exsævisset, classē raptim deducta Barbaros sequi institit; sed atrociori exorta tempestate retro compulsus, ad eandem necessitatem classis iterum subducendæ adaptus est. Die palmarum sacris solennibus operati Genuenses, idoneum tempus ad navigandum nacti cursum in Palæstinam dirigunt: perpetuoque ac numquam interrupto cursu tenore Joppam appellant: à Rege cum omni regiæ opulentiae apparatu honoris causâ obviam profecto signis regisque insignibus sublati & explicatis, ac ceteris omnibus honoris & amoris significationibus comiter ac liberaliter accepti sunt, collaudatique, quod in fide promissorum mansissent. Classe igitur in terram subducta, omnes Genuenses copię; simulque cum illis remigium, Rege duce, Hierosolymam iter intendunt, quo biduo pervenerunt; sabbatoque majoris hebdomadis spectatores fuerunt statim anniversarii miraculi lampadum ad Christi Domini sepulcrum, igne cælitus demissio, sine ullo humano ministerio accensarum, ingenti, ut par fuit, religione perfusi: cui spectaculo Caffarus Annalium nostrorum scriptor se affuisse tradit. Sacris paschatis peractis Jordanem fluvium religionis causâ usque profecti, flumine, quo Dei Filius ablatus à Joanne fuisset, cum veneratione conspecto, societatem, ut Gulielmus Tyrius tradit, gerendarum rerum cum Rege jungunt; iis conditionibus, ut tertia pars prædæ, & spoliolum, urbium, quas de hostibus capi contigisset, Genuensibus cederet, duas tertias Rex haberet: ritusque & forum cum plena jurisdictione inter suos in captis urbibus nationi Genuensi assignaretur.

Igitur Genuenses una cum Rege Joppam repetunt: inde Asur, quæ Veteribus Antipatris fuit, maritimam urbem petunt. Hanc urbem, ut tradit Tyrius, Gottifredus superiore proximo anno obsidione cinxerat; ceterum irritum incepto discesserat, quod classē & navalibus facultatibus carens de expugnatione maritimæ urbis desperasset: quibus postea auctus Balduinus obsidionem repetiit; urbemque ab ipso terra, à Genuensibus mari oppugnatam, tradentibus se opidanis, triduo recepit: qui compos ejus urbis factus, negotiis regni Hierosolymam illum avocantibus, maritimas expeditiones persequendas, ac Syriaca littora pacanda Legato

A Pontificio & Patriarchæ una cum Genuensibus mandavit. Quare mense Majo copiis in naves impositis, ac classē deducta, Cæsaream Palæstinæ urbem maritimam petunt, classēque subducta copiis in terram expositis, in quibus fuerunt octo Genuensium millia, cum etiam remigium ad terrestrem operam navandam descendisset, urbem circumfessam arta obsidione premere instituunt, machinasque expugnandarum urbium fabricari: in quibus operibus dum sunt, duo ex opidanis Saracenis opido prodeuntes ad Legatum & Patriarcham veniunt; factaque dicendi copia, alter eorum, Si ab alio, inquit, populo Antistites armis peteremur, taciti ac sine ulla admiratione rei inter mortales perpetuo usurpata eventum expectantes ad nos nostraque defendenda animos & corpora pararemus. Nunc vos Christianos intuentes, eos videlicet, quibus à vestro Legislatore divinitus vobis dato, omni cade omni que aliena rei cupiditate diserte interdictum saepe fando audivimus, mirari non satis possumus consilium istud vestrum, qui lege vestra sprete nos oppugnatum, ac civitatem nostram nullis à nobis injuriis provocati ulro ademptum venistis, animam quoque ipsam nobis, si resistimus, adempturis ut tota Palæstina & Syria fecistis: quas Provincias sanguine ac cadibus implestis: vosque in primis miramur, Antistites, qui rebus gerendis præstis; quos legis doctores ac populi vobis commissi magistris ceteris exemplo & admonitionibus præire decuit: qui tamen pro eo, ut populos vestros à pravis cupiditatibus revocetis, ad eas illos ulro inflammatis: quarum nefariarum rerum in altera vita rationem reddituri, in hac, si Deus, pietas, religio, existimatio ullius ponderis apud vos sunt, hominibus reddere debetis. Cui Antistites, Novum hoc, inquit, ac nunquam antehac fando auditum est legationis genus: ceteri enim sua, ac Reipublica sua causa legationes obeunt; vos, omni vestrarum rerum mentione omissa, nostra causa huc Oratores venistis; ad observandam legem nostram nos hortantes, ac monentes, ut caveamus nos tanta noxa contempta legis nobis divinitus data Deo immortalis obstringere. Remittimus hoc vobis, ne de nostra salute vicem nostram solliciti sitis: nam nos præcepta & dogmata sacra nostra legis probe tenemus, quæ de melioribus magistris, quam vos sitis, didicimus: neque nos per tam immensa terrarum spatia huc venimus ad res vestras vobis adimendas; sed ad nostras à patribus & avis vestris per summam injuriam olim occupatas recuperandas; utque sacra loca ac templa sacrilegis vestris superstitionibus polluta expiemus; verumque divinum cultum, impiis sacris exterminatis, restituamus: accenderunt præterea fratrum nostrorum miseria, & querela, quos ex immanissima servitute ac tantis ærumnis eripiendos, atrocissimasque illorum injurias pio justoque bello persequendas suscepimus; contumelias in divinum numen, & in sacra loca per tot sæcula à vobis editas, ultore gladio punire aggressi: quæ res adeo non repugnant sacra legi nostra, ut contra sacra Littera exemplorum plena sint bellorum à sanctissimis Patribus, ac piis Regibus divino monitu susceptorum. Nam quas nobis in extrema oratione cades in Syria factas objecistis, omnis ea de causa contracta noxa prorsus exsortes sumus: quæ penes illos tota est, qui injuriis barbaraque immanitate sua nobis eam necessitatem ceteroqui ingenio mitibus imposuerunt. Aliena mala utile vobis exemplum sint ad similia præcavenda; urbemque divi Petri, quam nos illius successores nostram vindicamus, nobis restituite, vobis rebusque vestris salvis; magna aliter earum rerum pernicio, quas modo in aliis deplorastis, nisi sanis consiliis audientes fueritis, obstinatione vobis statuta.

Ita Saracenorum vana oratio ludibrio habita. Qui cum in urbem reversi responsum Antistitum renunciascent, certamen ingens præbuerunt. Arcadius mercatorum salubria speciosis præferens, auctor esse deditioe necessaria civitatem à direptione aliisque belli cladibus redimendi: contra Mirus præsidii

& armorum præfectus, animo ac verbis ferox, imbelles consilium aspernari, seseque suæ ac suorum libertatis & dignitatis vindicem profiteri, communem Martem cum Christianis experturum; quos, auxilio Mahumetis fretus confideret, ignominiae ac cladum plenos obsidionem irritò incepto solvere se coacturum. Quæ hominis vaniloquentia, arrogantiaeque plena verba continuo (ut necesse erat in tanta propinquitate) ad exercitum perlata, tantam indignationem accenderunt, tantumque ardorem magnifica verba factis retundendi; ut continuo impetus animum subierit, mœnia inconsulta temeritate illico aggredi. Militum ardorem Patriarcha verbis subsequendum ratus, concione advocata: *Non, ut vos, inquit, acuerem, fratres, quorum ardentia studia freno potius cohibenda sunt, quam incitanda, vos alloquendos duxi; sed ut in vobis de maxime necessaria re admonendis partes meas implerem: simul ut spem & fiduciam vestram confirmarem. Capitale semper fuit, socii, militem imperatori dicto audientem non esse: militaris enim res obedientia in primis continetur; qua soluta omnia corrumpuntur necesse est. Vos, socii, hoc in bello imperatorem habetis Dei immortalis unicum Filium Christum Dominum. Hunc Ducem unum neque præterea quemquam mortalium in tam longis emetiendis itineribus habetis; hujus signa secuti estis; huic animam devovistis: si huic dicto audientes non fueritis, duplici vos noxa obstringetis; & militaris disciplina eversa, & quod magis abominandum est, pietatis violata. Adeste igitur animis, milites, quaque Deus ipse imperator vester, lumine menti prælato, jussit, me ipsius verbis vobis imperare, ad ea strenue atque impigre exsequenda, fortemque & fidelem operam imperatori vestro navandam, corpora & animos parate: feria igitur sexta, prima luce, noxius prius sacra confessione ac poenitentia deletis, sacroque convivio roborati in armis adeste; nullam omnino bellicam machinam, nullumque alium expugnandarum urbium apparatus, præterquam scalas triremium vobiscum trabentes. Cum his jubet Deus vos urbem aggredi: cujus vos numine suo ante sextam horam compotes se facturum pollicetur. Id vobis ego, mente divinitus monita, certo vaticinio confirmo.*

Orationi Patriarchæ cum exercitus voce ardoris indice succlamasset; Gulielmus Dux, pia oratione comprobata, militarique sacramento à militibus exacto, sese principem in urbem duplici cinctam muro transscensurum profitetur. Cum dies condita venisset, exercitus in armis fuit; scalisque erectis, Gulielmus conscendere primus cœpit, magna armorum multitudine eum sequente: qui cum, nemine resistente, in mœnia evasisset; scalæ nimio pondere prægravatæ perfractæ sunt, superstantesque ruina sua secum traxit: quo spectaculo ceterorum impetus nonnihil repressus est: at Gulielmus solum se in hostium urbe relictum cernens, trepidans divinam opem implorat; ne se militem suum humanis omnibus præsidiiis nudatum in extremo discrimine deferat: quæque via vel salutis expediendæ, vel pestis differendæ prima occurrit, utens turrim proximam ingreditur: quam conscendens obvium Saracenum descendentem prævalens viribus deturbat. Cum cacumen tenuisset, prima mœnia defensoribus prorsus nudata conspiciens, quæ Saraceni illis parum fidentes nulla expectata pugna deferuerant, micanti gladio significare, magnaque voce suos inclamare cœpit; *Properate, inquit, socii conscendere; urbs enim sine certamine nostra est. Quare scalis multifariam admotis, in urbem undique transscensum est; Saraceni & trepida fuga intra interioris muri septa se receperunt. At Genuenses impetu atque ardore animorum nihil remissio procera palma prominentibus gradatim inguinibus usum scalæ præbente innixi murum superant, urbemque ingressi haud quaquam parem igna-*

A viam atque in exteriori muro transcendendo in hostibus inveniunt: qui, ultima desperatione animos acuate, acriter prælium ineunt; quod cum aliquot horas constantissime extraxissent, tandem Genuensibus acriter pedem inferentibus avertuntur: quos passim fugientes Genuenses insequuntur, magnam illorum cædem edentes, ardoreque recentis certaminis iraque & indignatione animos irritante, urbem diripiunt; obvios quosque partim trucidantes, partim capientes: nihilque eorum, quæ captarum urbium extrema esse solent, ab iratis victoribus prætermisum est. Ceterum nemine in urbe jam resistente, omnis vis in templum versa est; in quod præter bellatores, magna mercatorum, omnisque generis ac sexus & ætatis imbellis, atque innoxia multitudo confugerat: quibus manus suppliciter tendentibus obtestantibusque, ne in homines quamvis cultu & religione diversos, tamen ipsos quoque ad Christianorum Dei similitudinem formatos, ad extremum sævire necesse haberent, sed rebus ipsorum contenti, quibus omnibus illis cedebant, nuda corpora sibi relinquerent; atque ad fortitudinis ac bellicæ virtutis gloriam mansuetudinis quoque haud minorem laudem adderent. Misericordia supplicum commoti Legatus Pontificius, Patriarcha, ac Gulielmus Dux, de exercitus consensu, ira jam satiata, veniam dant: templumque impiis sacris expiatum divo Petro dedicant. Ingens fuit captæ urbis præda, in qua partienda optionis honos Gulielmo Genuensium Duci, virtutis ergo habitus est; quod is Princeps mœnia conscendisset, virtuteque & audacia sua iter ad expugnandam urbem præmunivisset. Is decus & dignitatem utilitati præferens; ceteris spoliis neglectis, quæ opulenta fuerunt, ditareque milites & navales socios potuissent; inclytum illud vas ex prægrandi ac solido smaragdo elegit; ex reliqua præda tanta summa impetrata, qua cum fide in octo capitum millia distributa, octoni & quadragenarii pictavenfes nummi ac piperis bina pondo viritim obvenerunt: quæ summa non modo ut opulentis his temporibus, sed ut tum quoque res erant, perexigua, ac vix digna memoratu fuit, sine ulla militantium querela, qui privatam utilitatem ac præmia laboribus debita præ publico decore levia duxerunt. Fidem Annalium nostrorum secutus, quos conscripsit Cassarus æqualis illorum temporum, quique huic expeditioni interfuit, Casaream Rege absente à Patriarcha, & Archiepiscopo, ac Duce Genuensium expugnatam scripsi; atque in hac expeditione primas fuisse Genuensium partes. Quam rem verisimilem facit pretiosum vas ab illis in præda partienda delectum, ac longe nobilissimo præmio profecto Rex, si huic expugnationi interfuisset, primasque in ea habuisset, numquam alteri cecidisset. Præferendus igitur ad fidem mihi visus est Cassarus, qui rebus gerendis ipse interfuit, Tyrio quamvis sancto & probato scriptori, qui multis annis post bellum hoc gestum fuit; eaque, quæ scripsit, de aliis accepit, quique à Rege una cum Genuensibus captam Casaream eo credo errore tradidit, quod in eadem expeditione, qua Antipatris capta est, cui Rex haud dubie initio præfuit, Casarea quoque est expugnata: scriptoresque, quos auctores habuit Tyrius, non satis diligenter singula quæque persequentes, ut mos illorum temporum fuit, cum id non magnopere ad rem pertinere censerent, interfuit nec ne Rex expugnationi illius urbis, illius ab exercitu recessum omiserint: ut major fides ei scriptori sit adjungenda, qui rebus interfuit, verisimilem præsertim tradenti; neque ullam mentionem di causam habenti, quam illi, qui multis de causis labi potuit.

Quibus rebus confectis nono Kal. Augusti Syria solventes, trimestri circiter navigatione, mense Octob. anni millesimi centesimi primi Genuam pervenerunt. Læti

Lætis plausibus & acclamationibus triumphantium more, cum in expeditione quattuordecim menses fuissent, ab iis, qui domi manserant, excepti; idque non tam ob gestas res, quam quod unico in orbe terrarum dono civitatis dignitas ab illis aucta est: cujus æstimationem ne opulentissimi quidem regni pretium, si venale sit, possit æquare. Ex hac urbe vas fuisse advectum & certioribus auctoribus & constantius traditur; quos ego secutus sum: neque illud æstimationem ac fidem pretii celebris vas labefactare debet, quod nullum ejusmodi tantæ magnitudinis vas ex una & integra, neque ex duobus aut pluribus gemmarum frustis coagmentata, sub cælo reperiatur: nam complura apud Orientis ditissimos Reges affabre facta, à locupletissimis auctoribus non uno in loco traditur: ex eorum opulenta gaza hoc vas fuisse verisimile est; quod varietate temporum sit in hanc urbem delatum, quam Herodes magni nominis Rex à se ad turrim Strattonis ædificatam in honorem Augusti ejus cognomine appellavit.

A. C. 1102. Insequens annus millesimus centesimus secundus duabus rebus insignis est, initio facto nummi signandi, quo alieno ad eum diem usa fuerat civitas; & expeditione quadraginta triremium in Syriam missarum, quarum neque hoc neque insequenti anno segnis opera fuit, duabus urbibus expugnatis Acarone & Gibello minore. Quæ res ingentis certaminis fuit, multoque sanguine Genuensibus stetit. Ac insequenti anno millesimo centesimo tertio Dertusia Syriæ, (altera enim hujus nominis est in Hispania citeriore) expugnata est. Duo, qui A. C. 1103. consecuti sunt anni, millesimus centesimus quartus & quintus memorabiles sunt honorifico foedere cum Balduino Rege renovato, ac diligentius sancto: in quo Consules, quorum imperium quadriennale anno millesimo centesimo quinto peractum est, populi Genuensis nomine littora Syriæ, quantum initio facto ab urbe Sidone eorum longitudo in meridiem patet, tuta & pacata præstanda susceperunt: neque se adversus Regem ulla de causa arma latus sponderunt. Contra Rex Genuensibus Hierosolymis & Joppæ singulos vicos donavit; ad hoc tertiam vestigialium ac portorium partem Assuris, Cæsareæ, Aconis, urbium commercii frequentium; tertia quoque parte vestigialium urbis Memphis illis promissa, si ea urbe, Genuensibus adjuvantibus, potiri contigisset. Rexque per totum Consulium tempus, adjuvante classe Genuensi, quæ numero superiores longe antecessit, (fuit enim septuaginta triremium) urbem Ptolemaidem expugnavit.

Diligentius, quam Annales ipsi nostri, rem & causas exponens Tyrius, unum addit nomini Genuensi in primis magnificum: Regem enim asserit, occasione classis Genuensium septuaginta triremium per eos dies ad Syriæ littora appulisse, arma urbi Ptolemaidis, quæ olim Ace vocabatur, nunc vulgo varie appellatur, cum alii illam Aconem, alii Acrin nominent, inferre decrevisse, civisque & Proceres suos spe Genuensis opis oblatae ad eam expeditionem suscipiendam in primis impulsisse: illud præterea addit, præter ea, quæ publicæ nationi concessa sunt, privatim compluribus Genuensibus civibus aedes nominatim incolendas, & prædia fruenda pro cujusque merito assignasse.

Aliter rem narrat Scriptor Pisanus; qui laudem expugnatae Ptolemaidis cum Venetis & Pisanis communicat. Quam urbem ait Balduinum, cum superioribus annis Genuensibus tantummodo sociis illam frustra tentasset, anno tandem ejus sæculi nono, Venetorum, Genuensium, Pisanorum classibus in Syriam appulis, trium horum populorum societate fultum bello repetisse, atque expugnasse. Ceterum nemo fuit, qui non potius standum

A putet incorruptis Tyrii monumentis, nulla majore necessitudine Genuenses, quam Venetos, aut Pisanos attingentis; qui eam laudem integram Genuensibus unis attribuit, cum quibus Balduinum armis & societate conjunctis eam urbem expugnasse tradit. In qua urbe Rex certam regionem Genuensibus cum imperio definivit cum jure proprii Magistratus jura reddentis creandi. Quorum donorum diploma regium editum est; quod in tabulario Genuensi adservatum, non ab re duxi hic adscribere.

In qua re consilium nostrum haud quaquam reprehensum, aut fidem nobis abrogatum iri speramus; si elogium ipsum paullo jejunius, incommptoque illo & rudi eorum temporum orationis genere conscriptum copiosius & politius, sententia nihil mutata aut variata, explicaverimus: est autem hujusmodi: *Quod populus Genuensis, pro ejus perpetua & contestata pietate ac religione, toto sacro bello præpotentibus classibus, firmissimisque terrestribus copiis Christianam rem juverit; in sacraque urbe Hierosolymis, Antiochia, Laodicea, Dertusia expugnandis, plurima opportunitatis atque opera pars in illius virtute & industria fuerit; solique Genuenses celebres urbes Casaream, Ascalonem, Solymum, Biblium Hierosolymitano imperio, ac sacro Christi Domini sepulcro adjunxerint, summos labores exhausserint, sanguinem profuderint, nullis impendiis pepercerint, nullis difficultatibus sint debilitati, nullis jacturis infracti; sed adversus omnia mala invictam constantiam & patientiam præstiterint; ut a nullo omnino Christiano populo promptior, fidelior, constantior, magis multiplex opera Christo Domino, Christianaque Republica navata sit. Hac tot ac tanta merita Balduinus Rex invictus, Dumberio Patriarcha laudante atque approbante, & præclaro elogio ad memoria aternitatem testanda, & amplissimis premiis remuneranda censuit, tertia ditionis & vestigialium parte urbium Casarea, Ascalonis, Assuris in perpetuum concessa, ad hoc singulis vicis in urbibus Hierosolyma & Joppa cum jurisdictione illi tributis. Datum in urbe sacra decimo Kalendas Majas, anno a Verbo homine facto MCV.*

D Capita quoque hujus foederis aureis litteris in marmorea tabula, in æde maxima affixa, incisa sunt: hæcque aræ maximæ superstans prægrandibus litteris hoc insignis monumenti titulo inscripta est, *Præpotens Genuensium præsidium.* Quæ inscriptio longo post tempore ab Almerico Rege singulari ingrati animi exemplo sublata, iterum, Romano Pontifice per litteras nomini Genuensi in primis honorificas acriter & vehementer scriptas contendente, ac pro jure sacrosanctæ potestatis imperante, ab eodem Rege reposita est: sed hæc classis septuaginta triremium altera ne classis fuerit à superiore quadragenaria, an eadem supplemento E Genua submisso ad eum numerum aucta, incertum est: postremum mihi verisimilius sit: neque enim in Annalibus nova ulla hoc tempore classis decreta legitur: quod neutiquam à Scriptore quamvis supinæ negligentiae omissum fuisset; si nova classis novaque expeditio fuisset: quin etiam nomen Ducis vel Ducum in obscuro est, ab Annalibus compressum: inclinant tamen animum multæ causæ, eundem Gulielmum inclyti nominis fuisse: nam toto hoc quadriennio, quo hæc gesta sunt, in numero Consulium fuit; solabantque eo tempore imperia & præfecturæ alicui ex Consulibus mandari: nullius autem virtus ea tempestate conspectior fuit: rerumque gestarum gloria ceteris magis præfulgebat: ad hoc nemo omnino civis eo tempore rerum Syriacarum majorem usum habebat, assidua illarum tractatione partum: verisimileque in primis est, ad tantam ac tam necessariam rem foederis cum Rege faciendi, maxime idoneum virum delectum.

Insequens annus ejus sæculi sextus, quamquam A. C. 1106. ab expeditionibus & bellis Genuæ otium fuit, non tamen

tamen obscurus omnino est, adventu ad urbem Boemundi Principis Antiocheni virtute, & rebus gestis clari ex Gallia redeuntis; ac Constantiam Philippi Regis filiam in matrimonium acceptam secum ducentis. Huic magni honores habiti sunt, viro scilicet de Genuensibus optime merito; qui illis in urbe Antiochia vicum, ac publicum domicilium, sacramque ædem, ad hoc jurisdictionem inter suos, cæde & latrocinio exceptis; totoque Antiocheno principatu immunitatem impartitus est. Is paullum Genuæ commoratus discessit, ad arma inferenda Alexio Constantinopolitano Cæsari profectus, homini infensus, qui Latinorum expeditionibus perpetuo adversarius fuisset; illisque, quibuscumque rebus posset, incommodasset.

A. C. Annus septimus à millesimo centesimo, ac duo
1107. proxime insequentes, bellicosi in primis fuerunt,
1108. ac rebus gestis & præpotenti classe è portu emissæ
1109. memorabiles: quæ fuit septuaginta triremium, Ansaldo & Hugone Embriacis præfectis; vexitque Beltramum Comitis Tolosatis filium: qui primo adventu Tripoli Syriacæ oræ urbe, irritò incepto, tentata, urbem Biblium petunt; Beltramus cum suis terrestri itinere, Genuenses classe: ipsoque statim adventu, cives adspæctu tam potentis classis terri, nulla pugnae fortuna tentata, deditione urbem Genuensibus præfectis tradunt; incolumitatem abire volentibus, ipsorumque rebus pacti: quæ urbs postea huic ipsi Hugoni, ejusque posteritati à Genuensibus fiduciaria data est.

Biblio capta, classis à Balduino evocata Tripolim repetit: qui occasione utens, auxilio tantæ classis fultus omnibus viribus connisus, urbem tandem expugnavit sub finem anni millesimi centesimi noni; per quod totum tempus classis in ea expeditione fuit.

A. C. Consulibus anni, qui consecutus est, millesimi
1110. centesimi decimi, quadriennale imperium mandatum est: cujus consulatus primo anno classis duarum & viginti triremium à Genuensibus armata est: quæ classis in ora Syriæ, atque illi conjunctæ Ciliciæ egregiam operam Christiano exercitui in oppugnatione urbium Berythi & Malmistræ navavit; cum in Berytho expugnanda plurimum laboris per duos continentes menses exhaustum sit, opidanis impigre se defendentibus. At Malmistra deditione ne tradita sit, an vi expugnata; & lenta ne, an celeri obsidione; & magni ne ac diuturni, an exigui & brevis laboris res fuerit; multo ne sanguine, multaque cæde steterit, an incruentæ pugnae fuerint; hæc omnia, negligentia scribentis Annales illorum temporum, ut cetera multa, incomperta sunt. Hoc postremum operum Genuensium fuit in ora Syriæ, ac Palæstinæ, & Ciliciæ, in primo sacro bello: in quo tredecim annorum curriculo populus Genuensis septem prævalidis classibus rem Christianam adjuvit. Nobisque rerum Orientis mentio in multos annos est differenda, quoties novæ expeditiones à Latinis Principibus susceptæ novam nobis scribendi materiam suggerent.

Expeditionibus Syriacis Genuenses ac Pisani defuncti, arma in Christiani nominis hostes magna cum gloria exercita inter se verterunt; veteribus odiis, ac diffidiis, quæ religionis studium ac bellum sacrum compresserat, majoribus motibus repetitis: quæ animo numquam deposita, quamquam interdum vel pace, vel induciis numquam sincera fide cultis, ad modicum tempus intermissa, ac brevi majore cum irarum certamine resurgentia, ingentibus cladibus multoque sanguine ac magnis impendiis utrique populo, per multas sæculorum ætates, steterunt, diffidiorum caussis vigentibus, quas alebant duæ ante oculos positæ insulæ, Corsica ac Sardinia; cum suis ipsæ opibus ac fructibus cupiditatem hominum allicientes, tum utrique po-

A pulo inferi maris imperium haud obscura ambitione affectanti peropportuna: eas res fore providentes Genuenses; dum uterque sese ad bellum parat, adnobilissimum illum ac veteri fama toto orbe terrarum celeberrimum Lunensem sinum, quem posteriores portum Veneris appellarunt, sibi firmandum animum adjiciunt, ne propinquorum hostium receptaculum esset; qui in interiore littore proxime ab altero sinus cornu in Etruriam vergente opidum etiam, quod illorum imperium terminabat, præsidio tenebant. Is portus in duodecim circiter millium passuum ambitum curvatur: insula objecta, atque ab Occidente freto ita angusto à continente discreta, ut singulis tantum triremibus transitum præbeat, tantam sinus partem à procellis & tempestatibus tegit, quæ quamvis ingentium classium capax sit, cum litus eandem portus partem ambiens, recessibus longe introrsus retractis sit excavatum; qui tutissimam stationem ad omnes ventorum flatus subeuntibus navibus præbet.

Hujus igitur sinus angustas fauces Genuenses, A. C. anno ejus sæculi tertio decimo, qui fuit annus ultimus quadriennalis consulatus, valido condito opido, quod à portu nomen accepit, firmaque coeducta colonia insidunt: quo etiam consulatu Lavaniam opidum sæpe antea leviter irritoque incepto tentatum majoribus viribus repetitum, omnemque circumjectam regionem viris ac pagis satis frequentem in potestatem redegerunt. Qua in re mirretur fortasse aliquis Majorum nostrorum consilium: qui imperium urbium ac littorum longe distitorum, per immensa maris spatia, tantis laborum ac sanguinis impendiis, ac per tot discrimina quærentes, propinqua atque adeo intima non respicerent; neque Liguriam imperio obedientem haberent: cujus opida atque urbes partim privatis dominis servientes, partim omni imperio solutæ, suis quæque ac separatim consiliis utebantur, ut urbs opibus tam valida, cujus vires ipsis maximis Regibus formidolosæ jam tum fuisset plerique exteri scriptores tradunt, per angustis ac parvo opido penepudendis finibus uteretur: qui brevi ampliati sunt, omnisque fere maritima Liguria per varias occasiones deinceps imperio comprehensa, populis partim nulla vi adactis ultro in ditionem venientibus, mansueto imperio, ac minime tributis aut ullo genere onerum prægravi allectis, tum præsidio actutela prævalidæ urbis adversus potentiores sese munientibus; partim vel pretio paratis, vel bello per varias causas subjunctis. Cui diversæ rationi in illis imperio adjungendis, dispar quoque illorum animus in parendo respondit: nam aliorum fides ac studium erga populum Genuensem multis locis ita enituit, ut in dimicationibus acriter ineundis, ac discriminibus pro salute civitatis, proque Genuensis nominis gloria haud retractanter subeundis cum ipsis Genuensibus civibus ardore certarent: ut gloriari libeat, nullam umquam civitatem amantioribus aut fidelioribus sociis ac subjunctis usam: contra aliorum tanta perpetuo contumacia fuit, tamquam alte animo imbibita in jugo detrectando contentio, ut obstinatas mentes, atque omni levi spei objecta aura, ad deficiendum mobiles nullæ umquam clades frangerent; quin toties infelicitè experta arma retractarent, atque adversus dominanturbem magno semper cum suo malo consurgerent: ne ego quidem Majores nostros reprehensione liberarem, ni viri in primis pii religionis studium, quod crebra illis induebat arma, omnibus rebus prævertendum semper duxissent.

Qui insequitur consulatus, quadriennalis ipse quoque fuit, nihilque sane memorabile habet: decimus vero octavus ejus sæculi annus, qui consulatus biennalis primus fuit (cum tamen eodem anno Consules insequentis biennii creati quoque sint) in-

insignis est, Bernardo inclytæ famæ Abbate Clarenvalensi, qui postea in divorum numerum relatus est, Episcopo Genuensium à civitate electo: quam tamen electionem Romanus Pontifex ratam non habuit; cum negaret, clarissimas tanti viri virtutes universæ Ecclesiæ apprime necessarias æquum esse unius diocesis procuratore definiri. Insignitur quoque idem annus adventu ad urbem Gelasii Pontificis, à Frangipanorum familia (quæ partes Cæsaris Pontificii solii hostis sequebatur) Roma ejecti; qui, Laurentiana æde sollennibus ceremoniis dicata, in Provinciam Narbonensem à Genuensibus deductus est.

Nec jam bellum inter Genuenses & Pisanos gliscens dilatum est; cum ad veteres odii causas, ob Corsicam Genuensibus nihil tale cogitantibus à Pisanis per summam injuriam ademptam, nova causa accessisset Episcoporum Corforum inaugurandorum contentio: quod jus uterque populus suum sibi Antistitique suo atque in sua urbe vindicabat, Pontificibus Romanis varietate decretorum suorum contentionem alentibus, ut suis locis dicemus: quæ contentio magna cum sanguinis ac cladum mercede, ut Calistus Pontifex *epistola* quadam sua scriptum reliquit, inter utrumque populum complures annos jactata est: neque prius finem invenit, quam ab Innocentio secundo compositæ res sunt: qui, Episcopo Genuensi Archiepiscopatus titulo insignito, jus inter utrumque Antistitem partitus est; Episcopis Marianensi, Nebiensi, Acciensi, Genuensi ditioni subjunctis, Alerienti, Adjacensi, Sagonensi, Pisanæ attributis. Initium armorum, ut Cassarus vetustissimus Annalium Genuensium Scriptor tradit, à Genuensibus, qui læta fuerant, factum est anno ejus sæculi decimo nono: quorum classis sedecim triremium mense Majo magnum Pisanorum numerum cum ingenti auri vi in Gallura Sardiniae Provincia cepit.

A.C. 1119. Majore mole insequenti anno, qui fuit ejus sæculi vicesimus, iidem Genuenses inchoatum bellum persecuti sunt; prævalida classe octoginta triremium, ac quattuor ingentium corbitarum, minorumque navigiorum varii generis ac nominis, quæ sexaginta numerum excesserunt, armata: quam conscenderunt sociorum navalium ac bellatorum viginti duo millia; quorum quinque millia alba indumenta conspectos faciebant: cujus classis metu, Pisani ad conditiones pacis à Genuensibus latas descenderunt; Corsica restituta, ac jure inaugurandorum Episcoporum cesso; cum Genuenses Pisas ingressi magnum numerum captivorum Genuensium è vinculis exemptos in patriam reduxissent: quæ res Cassarus plane refellit, argumentoque est, longe priusquam anno superiore bellum inter duos hos populos coeptum; ac multas utrimque illatas & acceptas clades, quæ ab Annalibus cum nostris, tum Pisanorum, (quos quidem ego legerim) silentio præteritæ sunt, vitio Scriptorum illius ætatis: quibus nihil est jejunius, aut aridius, in rebus gestis narrandis; quarum multas omnino prætereunt, multas uno aut altero verbo attingunt; cum in causis exponendis, & eventibus, casuumque varietatibus prodendis, longe negligentiores sint. Hic falso arguitur Justinianus à Scriptor quodam rerum Pisanarum, tamquam pugnanti locutus; qui hoc anno Pisanos tradiderit de controversia Episcoporum metu classis Genuensis cessisse: cui cessionis locus non fuerit, cum superiore anno Cælestinum Pontificem electionem Romam ad se revocasse, idem Justinianus scribat. Ceterum non animadvertit Scriptor Pisanus Justinianum non scripsisse Calistum superiore anno electionem ad se revocasse, sed rem universam ac totum tractum illius controversiæ tamquam proœmii & argumenti loco summam attigisse; quod evi-

A denter apparet ex iis, quæ insequentibus annis ejus sæculi vicesimo tertio, & tricesimo tertio facta scribit Justinianus, de electione sibi à Pontifice ipso assumpta, & de Episcopatibus Genuensi & Pisano ampliore Archiepiscopatus titulo decoratis, ac diocesis Corsicanis æqualiter inter illos partitis.

At insequenti anno ejus sæculi vicesimo uno validis pedestribus & equestribus copiis coactis, Genuensis populus jugis montium superatis opidum Falconum, ac Petram Bissariam, nonnullosque circumjectos obscuri nominis vicos ditioni adjunxit, opido Vultabio ab Alberto Gavii Marchione precio empto.


B Insequens annus ejus sæculi vicesimus alter Consulibus annuos habuit; quod in posterum quoque observari lege sancitum est, salubri modo civium studiis imposito: quorum ambitionem dulcedo diuturni imperii nimis jam efferre cœperat, atque ultra civiliter petentium morem provehere: quæ res erat discordiis & contentionibus inter illos ferendis: ea lex multos annos observata est. Hoc anno Pisani iniquas conditiones impositas non ferentes, fidem pacis infregerunt. Eorum igitur fines Genuenses infesto exercitu ingressi sunt; quibus variis belli cladibus pervastatis, in sua reversi plus mille captivos Genuam ductos carcere incluserunt: neque minora detrimenta illis mari illata sunt, duabus illorum triremibus magni pretii mercibus onustis à totidem Genuensibus captis, quarum præfecti fuerunt Gandulfus Marus, Rubaldus Maplonus, Bonavassallus Censius, Gulielmus Rufus; qui strenuam & fortem operam Reipublicæ navarunt.

C Insequenti anno ejus sæculi vicesimo tertio, Calistus, cum Concilium universæ Ecclesiæ Romæ haberet, Oratoribus utriusque populi à Corforum Romam evocatis, causa in consilio cognita, judicium de inauguratione Episcoporum, de assensu consilii tulit: quo abrogatis omnibus iis, quæ secundum Pisanos antea decreverat, jus omne Episcoporum inaugurandorum utrique populo abjudicatum ad Pontifices Romanos in posterum revocavit. Genuenses perpetuæ suæ pictati proximi in sacrosancta potestate fuerunt, decretum æquo animo accipientes: at Pisanorum animos ea res vehementer offendit; qui indignabundi ac frementes, ne commeatu quidem petito, Roma excesserunt. Quod à Pontifice ad incendia extinguenda actum est, id illa magis inflammavit.

D Pisani igitur, animis ad bellum accensis, insequenti anno vicesimo quarto ejus sæculi novem triremes onerariarum classi, quæ ex Sardinia expectabantur, mercibus & annona onustæ, præsidio mittunt: quæ dum littora Ligustica prætervehuntur, septem triremes, quas Genuenses ad rerum suarum tutelam, atque ad hostem vexandum ipsi quoque armaverant, apparuerunt: quas in se tendentes procul Pisanæ triremes conspicatæ, majorem numerum subsequi ratæ, (cum verisimile non esset plures à paucioribus peti) onerariis omissis, trepida fuga sese in Vada Sabatia recipiunt prope ab urbe Savone. At Genuenses onerarias triremium præsidio desertas, neque ipsas ulla fatis re ad pugnam instructas adepti, vectoribus subito offuso pavore obtorquentibus, nullaque fortuna pugnae ab illis tentata, ad unam capiunt. Pisanus Scriptor ideo Annales nostros in his navibus captis mentiri contendit, quod ex Sardinia Pisas ac littora Etrusca petentibus longe aliud ac diversum est iter, quam per Maria Savonenfis. Duplex est ac perfacilis responsio: fieri enim potest, (ut quotidie usu navigantibus venit) ut subita aliqua adversa coorta tempestate coacti Pisani paullum læva flecterent, ac littora Savonenfis prætervherentur: deinde undè cognovit semper Pisanus tot post sæculis, onerarias Pisanas Sardinia solventes magis

R

Etru-



Etrusca, ac Pisana littora, quam Provinciam Massiliensem, aut Catalanam, in qua tamen erant Genuensibus & Pisanis frequentissima commercia, navigationis causa petisse? rectoque cursu necessarium ideo fuisse per Maria Savonienfiam transitum.

Felix omnino hic annus Genuensibus fuit, multis detrimentis hosti illatis, & eo ubique victo, arceque sancti Angeli, quam Pisani adhuc retinebant, in Corsica expugnata. Scribit quoque idem Pisanus, insequenti anno Pisanos octoginta triremes armasse; atque arcem sancti Angeli à Genuensibus captam recuperasse; compluraque Corsicæ opida ideo ad Pisanos defecisse: eosque totius fere insulæ potentes factos. Eam arcem utique à Pisanis recuperatam fuisse necesse est, quamvis id Annales Genuenses silentio prætereant; quippe quam biennio post à Genuensibus iterum recuperatam fateantur. Ceterum longe vero absonum videtur, si tam ingens fuit Pisanarum navium numerus, Genuenses cum decem octo triremibus, quas eo anno armarunt, per littora Corsicæ, Sardinia & Etruriæ discurrentes tot damnis & detrimentis Pisanos affecisse, ut ipsemet Pisanus fatetur: qui tradit Pisanos octo triremes armasse; quæ cum pares non essent classi Genuensium decem octo triremium, illa declinata in Liguriam deflexisse, ac paria damna Genuensibus reddidisse, illorum littoribus populatis & vastatis.

A. C. Eodem tenore traducti sunt quinque, qui insequenti anno, Genuensium victoris & cladibus Pisanorum insignes: cum Genuenses, classibus modo majoribus, modo minoribus emissis, continentibus illos damnis carperent, navium, mercium, hominum prædas agendo, infestaque illis littora Etruriæ, Sardinia, Corsicæ, Provinciae Narbonensis facerent. Insigniora fuerunt arx Plombini bis à Genuensibus capta, & suburbia incensa; atque arx sancti Angeli, quam Pisani recuperarant, iterum expugnata; cum toto eo bello Pisani nunquam fines Genuenses intrassent.

Rem ad omnem posteritatem in primis memorabilem, per ea tempora à Genuensibus gestam Volateranus tradit; ipsam urbem Pisas arta annua obsidione à populo Genuensi circumfessam: neque prius solutam obsidionem, quam Pisanis ad extrema adductis necessitas expressa est, superbas ac contumeliosas condiciones impositas accipiendi, summis ædium fastigiis usque ad primam contignationem dejectis: Volateranus secuti sunt nostra ætate Tarcaniota & Leander Albertus: quos omnes somniasse Scriptor Pisanus contendit; remque esse ab omni veri similitudine longe remotam: neque enim tam exiguis copiis, tamque exigua sexdecim triremium classe tantam rem effici potuisse. Equidem ut non negaverim nullam hujus rei apud nostros illorum temporum Annales esse mentionem; mirumque esse, tantam rem tamquam nomini Genuensi honorificam ab illis silentio præteritam; cum præsertim in nonnullis minutissimis persequendis sæpe sint paullo diligentiores; neminemque putem auctorem habuisse præter Volateranum; fierique posse, (ut Pisanus autumat) ut ne Tarcaniota quidem & Albertus aliunde quam à Volaterano rem acceperint; ita non satis firmam esse statuo Pisani Scriptoris rationem: fieri enim posse, ut initium obsidionis, quam annuam fuisse Volateranus tradit, à longe validiore Genuensium classe factum esset, hocque postremum sexdecim triremium missum à Genuensibus supplementum; quod superioribus copiis additum, rem inclinatam impelleret. Decipitur vero Scriptor Pisanus in eo perspicue, quod primam contignationem à solo accipit: colligitque ex eo, ergo Pisas solo pene æquatas fuisse; quod nimis absurdum, ac vix cui-

A quam credibile esset: nam summa ædium cœnacula dejecta sunt: primamque contignationem à culmine non à solo incipere voluit Scriptor noster. Suum de hac re sit cuique judicium. Ego quod ab exteris Scriptoribus nullo jure Genuensium nationi obstrictis traditur, nullo modo omittere debui.

B Ac ne illud quidem omittendum est, postremo anno classem Pisanorum à classe Genuensium sexdecim triremium ad littora Messanæ in terram actam; Pisanosque & Messanenfes, qui ad opem ferendam accurrerant, expulsos, fugientesque ad ædes usque regias à Genuensibus in terram egressis compulso; qui tandem precibus Regis placati res suas Messanenfibz restituerunt. Hanc classem manibus Genuensium ereptam tradit Pisanus Scriptor in sua revertentem, in itinere exscensionem in Corsicam fecisse, eamque insulam à Pisanis populatam ac pervastatam fuisse: ac ne littora quidem Ligustica ab eadem classe cladibus fuisse intacta: quæ res perspicue demonstrat Corsicam Genuensium fuisse, quod illum sæpe negare non puduit. Cum civitas opibus & habitatoribus in dies cresceret, Consulum, qui jurisdictioni ac rebus forensibus præerant, numerus anno ejus sæculi trigésimo ad quattuordecim auctus est: ratio juris dicendi mutata: nam cum prius conjuncti universæ civitati jus redderent, tum munera sua inter se ex lege ita partiti sunt, ut ex septem regionibus, in quas omnis civitas tum divisa erat bini singulis jus dicerent: decretumque est, ut reus forum actoris sequeretur.

C Eo anno Genuensis populus validam turrim ad sanum Romuli ædificavit; incolasque opidorum Bajardi & Polpini; nec non Comites Albii Intemelii Genuam evocatos ad obedientiam beato Syro in perpetuum deferendam, atque in populi Genuensis imperia jurandum adegerunt. Graves erant Innocentio secundo hæ Pisanorum & Genuensium discordiæ, Christianæ Reipublicæ minime opportuna. Igitur nullis paterni ac Pontificii muneris partibus indormiens, sedulo monendo, hortando, precibus quoque enixis agendo, illos tandem eodem anno ad inducias, usque ad suum ex Gallia reditum, in quam tum cogitabat, paciscendas adduxit: qui cum ea, quorum causa venerat, in Gallia transgisset, Lothariumque ad opem sibi adversus Romanos contumaces ferendam traxisset; à classe Genuensium Genuam reductus, Syrum Episcopum à Genuensibus electum inauguravit: magnum sibi in maritimis rebus nomen Genuenses per ea tempora fecerant, magnamque felicibus expeditionum successibus existimationem in dies colligebant; ut multi Proceres atque in finitimis regionibus & insulis populorum dominatus obtinentes, præpotentis civitatis amicitiam ultro appetere; qua sese ac res suas adversus oppugnantes communirent: in quibus fuit Comitas iudex ac princeps præfecturæ Alboreensis; quæ una ex quattuor est, in quas omnis Sardinia divisa est. Is, cum multis iniquitatibus à Pisanis continenter premeretur, ad florentes Genuensium opes confugit; eorumque patrocinium & propugnationem in se firmavit, opimo sacerdotio anno ejus sæculi trigésimo uno sacræ ædi Laurentianæ Genuensium adjuncto; ac dimidia parte montium, in quibus sunt argenti fodinæ, dono data.

F Insequenti anno trigésimo altero, ut idem orbis in singulos annos volveretur, cum dies induciarum exisset, sexdecim triremes in Pisanos armatae sunt, non sine operæ pretio, nonnullis navibus captis: armaque illata sunt Comitibus Lavanæ non satis obedientes, neque ex præscripta formula majestatem populi Genuensis colentibus; arce Riparolo illorum cervicibus imminente ædificata.

A.C. 1133. Latus est insequens annus ejus sæculi trigesimus tertius sine bellicis laboribus tandem impõsito; ac pace inter Genuenses & Pisanos, sedula opera & auctoritate Innocentii Pontificis tandem conciliata; cum res magni ac diuturni moliminis fuisset. Perhonorificus is Pontifex in nationem Genuensem fuit; ejus Antistite Archiepiscopatus titulo decorato, quod beneficium Genuenses remunerantes, Romanam, ac sedes, unde dejectus fuerat, Lotharii Romanorum Regis opibus repetenti Pontifici octo triremes auxilio miserunt: quarum, in Romanos contumaces vexando, ac malis afficiendo, haud segnus, aut parum fructuosa opera fuit. Eodem anno arces Lavaniae Comitum à Genuensibus captæ & everfæ sunt; Comitesque malis subacti ad jurandum in imperata.

A.C. 1134. Insequenti anno ad septem veteres regiones una addita est, parque numerus Consulum creatus; ut, mutata ratione, bini Consules binis regionibus præessent. Pisano bello intermissio, Genuenses, ut bellicosus populus in otio esse non poterat, laudabiliore consilio vires in communes Christiani nominis hostes verterunt, classibus sæpe in oram Africae missis, atque hostilium navium hominumque & mercium prædis actis. Quarum expeditionum illa maxime insignis fuit, xxii. triremium adversus Caimum Maimonum Almeriae regnantem missarum; qui cum quadraginta navibus longis continentibus excursionibus Mediterraneum mare infestum faciebat, commerciaque impediabat: sed irritum inceptum fuit, Maimono nusquam reperto: qui, fama Genuensis classis accepta, in sua se receperat. Perhasigitur expeditiones quattuor insequentes anni traducti sunt.

A.C. 1139. Insequens annus ejus sæculi trigesimus nonus memorabilis est, jure nummi signandi à Conrado Romanorum Rege impetrato: ad cujus beneficii memoriam testandam, decretum est, nomen Conradi nummis inscribi. Nullus populus oræ Liguricae erga Genuenses contumacior fuit, aut in res novandas avidior, quam Intemelii; situ, credo, loci, in quo urbs est, arduo & difficili accessu audaciam & fiduciam hominum incitante. Defecit igitur iterum anno ejus sæculi quadragesimo Intemeliorum Comes, quem prævalidæ terrestres & maritimæ copiae Genua missæ adegerunt tandem, simulque urbis & agri incolas ad jurandum in perpetua Genuensis populi imperia.

A.C. 1141. Otium per quinque insequentes annos Genuæ fuit; qui nullam materiam sribenti præbent, præterquam quadragesimus tertius, in quo Dominus Montis Pefulani conjuratione inimicorum principatu exactus, in veterem dominatum à Genuensibus restitutus est, quattuor triremibus instructissimis subsidio illi missis: quod beneficium ille grato animo remuneratus est; ædibus ac domicilii sede nationi Genuensi in eo opido, quod circumjectarum regionum frequentissimum emporium est, multisque immunitatibus donatis.

A.C. 1144. Longe memorabilior est annus insequens, ejus sæculi quadragesimus quartus, anniversario vectigali libræ auri insulæ Corsicæ à Lucio secundo eodem, quo auctore pax cum Pisanis facta est, Genuensibus remissio: quod Genuenses ad eum diem Pontificio solio persolverant: qui quamquam armis, ut superius scripsimus, ac justo & pio bello ejus insulæ imperium, Christiani nominis hostibus expulsis, sibi pepererant; viri tamen perpetuæ pietati suæ constantes, ne Romano Pontifici adversarentur eam insulam suam sibi vindicanti, tamquam in donatione à Carolo Magno primo Latinorum Imperatore & successoribus, Romanæ Ecclesiæ facta comprehensam, fiduciariam tamen ac vectigalem illam à Pontificibus Romanis obedienter acceperunt: quod tributum hoc anno, ut

A modo diximus, remissum est. Nulla igitur religio in populo Genuensi hæret; neque illum ullo crimine obstringit judicium à Pontifice Romano in invasores rerum Pontificiarum, in quibus Corsicam nominatim complectitur, quotannis latum; quo illis piorum cœtu & sacrorum communione interdicat: nam hoc ad imaginem veteris juris tum, cum nondum Corsica Genuensibus fiduciaria data esset, retinendam à Pontifice sit, neque recte aut vere in invasoribus comprehenduntur ii, qui insulam possident eo jure, quo qui optimo.

B Per ea tempora Afri, qui totam fere Hispaniam multis ante sæculis occupant, cum navalibus quoque opibus in dies crescerent; omnesque illius Provinciae & interjectarum insularum Mediterranei maris portus tenerent; circumjecta maria continentibus excursionibus & latrociniiis infesta faciebant; maximisque detrimentis Christianos mercatores & negotiatores afficiebant: quæ damna & incommoda cum Genuenses à se amovere constitissent, prævalidam classem machinis & ceteris bellicis apparatus affatim instructam, ac non exiguo bellatorum numero refertam, duarum & viginti triremium, quattuorque ingentium corbistarum, anno, qui insecutus est, ejus sæculi quadragesimo sexto comparant; illique Cassarum unum A.C. 1146.

C è Consulibus, & Ubertum Turrium præficiunt: qui portu Genuensi solventes, secunda navigatione usi, brevi minorem Balearicam tenuerunt: quæ insula piratarum insigne receptaculum tum erat: copiisque in terram expositis, in quibus fuerunt centum equites, classeeque in portu Fornello relicta, populabundi in multas insulæ partes discurrunt: magnaque præda hominum & aliarum rerum facta, quarto post die in castra; quæ secus littus statuerant, revertuntur: vixque præda deposita ingentes Maurorum copiae, in quibus trecenti erant equites, superveniunt, improviseque castra invadunt: quorum impetum Genuenses instructis copiis & castris eductis egregie primo sustinent, deinde gradum acriter inferentes illos submovent, tandem omnibus viribus connixi in fugam vertunt: quos fugientes per plus octo passuum millia insecuti ingentem illorum cædem tam equitum quam peditum edunt. Quibus profligatis, omnem vim belli in urbem insulæ caput vertunt: qua primo impetu capta & direpta, ingenti præda aucti; cum nullum aliud belli opus in ea insula reliquum esset, naves repetunt, classeeque conscensa, relicta insula, (cum adhuc multum temporis rebus gerendis idonei superesset) in continentem, & in proximam oram Granatensis regni iter dirigunt: primoque adventu magnum navium numerum in littoribus Almeriensibus incendunt: atque in terram egressi infestas copias urbi admovent. Afri subito terrore fracti, colloquio petito, sese haud contemnenda pecunia redempturos dicunt. Accepta est conditio à Genuensibus, difficultates in magna & munita urbe expugnanda, contra quam præceperant animo, providentibus, ac tempore anni minime rebus gerendis apto appetente. Dumque pecuniæ numerantur, Afrique de industria rem extrahunt; Rex silentio noctis, cum omnibus thesauris urbe furtim excedens, fidem pactorum ac nostrorum expectationem elusit: in ejus statim locum Afri alium sufficiunt: qui quamquam obsides pactos dedit, non tamen magis, quam prior, fidem datam sanctam habuit. Iterum ludificati Genuenses iram, cujus effectus in ipsam urbem irritus futurus erat, omnem in regionem effundunt; quam cædibus, ruinis, incendiis, direptionibus passim grassantes, omni belli clade pervastant: odiisque tandem exsaturatis, adverso anni tempore urgente, classe conscensa Genuam repetunt; ostantesque, ac gloriæ & spoliis pleni portum subeunt.

A. C.
1147.

Discessus Genuensis classis Afros praesenti quidem periculo, sed non metu, liberavit: qui majorem belli molem à Genuensibus, quorum nomen tum Saracenis in primis erat terribile, sibi irritatis expectantes, urbem validiore munimento firmare, majoribusque praesidiis, ac bellicis apparatibus, omnifque annonae copia communire; classemque ac numerum navium augere constituunt; nullumque finem latrociniorum facientes, Eugenium tertium Pontificem maximum Regis Hispaniae ac Comitis Barchinonensis assiduis precibus fatigatum in se incitarunt: qua de causa legatum initio insequentis anni, qui fuit ejus saeculi quadragesimus septimus, Genuam mittit; qui Genuensium animos in Afros inflammet; & ad arma illis inferenda hortetur. In hac. san. potestate perpetuam Majorum suorum pietatem imitati fuerunt Genuenses, Archiepiscopo praefertim annitente; ac monente, quam turpe nomini Genuensi futurum esset, quam alienum ab ipsorum contestata religione, si privatae discordiae, quibus non nihil tum civitas tentabatur, illos à tam sancto & necessario consilio revocassent. Igitur omnibus dissidiorum causis in arbitrium ipsius rejectis, mutuoque se in signum reconciliatorum animorum osculati, omnes curas in comparandum intendunt: tantusque animorum ardor omnibus est injectus, ut matronae partem impensarum ultro se subituras professae sint, gemmas, quaeque pretiosiora habebant, proferentes; atque ut acciperentur orantes. Nihil igitur de summa contentione remisso; quattuor mensium curriculo postquam expeditio decreta est, ingens classis sexaginta trium triremium, ac centum sexaginta trium onerariarum, varii nominis & magnitudinis, omnibus rebus instructissima comparata est; magnaque materiae vis ad machinas fabricandas, ingenisque omnis apparatus bellici copia parata; ad hoc magnus bellatorum numerus aetate & genere florentium coactus. Tantae classi praefecti sunt sex ex decem Consulibus civitatis; Ubertus Turrius, Balduinus nomine familiae ab Annalibus suppressio, qui mos frequens illis est, Philippus Longus, Ansaldus Auria, Ingo à Volta, Ansaldus Pizo. Quinto igitur, postquam comparari coeptum est, mense Consules solventes, cum in itinere nusquam offendifsent, ad portum, quem magnum vocant, classem incolumem appellant. Est autem urbs Almeria in littore ejus Baeticae Hispaniae partis, quae nunc regnum Granatense appellatur, ultra Charidemum promontorium, quod nunc caput Catae vocamus, sita; ab Oriente ipsum portum magnum, quem diximus, habens; ab Occidente lingua in altum excurrens stationem classibus quamvis non satis tutam praebet: ipsa urbs plana & satis ampla est; arcemque habet paullo editiore loco positam, quam *Suetam* incolae vocant; & ad mare per ampla navalia omnis quamvis magnae classis capientia. Genuenses, classe ad linguam translata, ibi Regem & Barchinonensem expectare constituunt: ad quorum diligentiam stimulant Ododnem Bonvillanum mittunt. Regem cognito Genuensium adventu dolor cepit, quod copias suas nimis propere dimississet; neque plus quadringentos equites & mille pedites secum haberet: respondit tamen Oratori, se mox affuturum. Interea Genuenses Duces, ne illud tempus inane abiret, experirenturque, quid animi, quid virium hostis haberet, Balduinum unum ex Consulibus cum quindecim triremibus mittunt; qui ultro citroque discurrens, litusque legens, conatus & consilia hostis speculetur, dato mandato, ne in terram exscensionem faciat, neve manum cum hoste conferat: ille imperata impigre exsequitur. At Mauri ab omni cogitatione maritimae pugnae abhorrentes, tanto Genuensibus viribus inferiores, cum omnes naves suas in terram & in tutum subduxissent, magnas tam equestres quam pedestres copias à circumjectis urbibus &

A populis ejusdem religionis cultoribus corrogant; haud gravate ab illis concessas, cum intelligerent in eventu illius urbis suas quoque ipsorum fortunas verti. Igitur Almerienses tantorum auxiliorum accessione animis sumptis, superbam virium fiduciam praeferentes, equitatum contra Balduinum emittunt; quem ad descendendum, experiendumque utra gens bello sit melior, ferocibus verbis provocant. Ille mandatorum memor, nihil inanibus vocibus movetur; sed ex propinquo motus hostium contemplatur: sicque nonnullos dies Mauros extrahit, donec Barchinonensis Comes cum haud contemnendis navalibus & terrestribus copiis tandem ad exercitum venit: cujus adventu confirmati Consules, cum adventum Regis desperare inciperent, non ulterius differendum rati urbem invadere constituunt: ceterum omnia prius facere, ut hostem quamquam equitatu superiorem ad signa conferenda, justae acie & aequo campo dimicandum attrahant, haud dubiam victoriae spem ipsis faciente genere copiarum suarum & robore hominum: consiliis igitur ad pugnam destinatis, unus ex Consulibus, cui à collegis id negotium datum est, milites ad concionem vocatos talibus verbis hortatus ad pugnam dicitur: *Adversus eundem hostem, contra quem patres vestri in Syria tanta cum gloria egregiis partis victoriis pugnarunt, quemque vos ipsi per hosce annos tot cladibus contudistis, nisi, eo acrius, cives, vos niti decet, quo prae ter religionis ardorem ceteris Christianis communem, tres accedunt stimuli, qui à vobis virorum fortium ac plusquam virilem operam postulant. Primus est injuria vobis per hos annos à laronibus istis continenter facta, tot naves ac merces vestrae captae, tot cives vestri in servitutem abducti: alter stimulus est, quod nisi hanc urbem piratarum receptaculum deleamus, maria perpetuis incursionibus infesta habituri sunt: tertius est ille longe acutissimus stimulus, quod bellum sacrum non nostrum erat; sed maximorum Regum ac Principum, penes quos erant imperia; uti gloria & dedecus partiarum victoriarum, vel cladum acceptarum illorum esset. At hac expeditio Genuensium est, decusque & ignominia ex bene vel male gestis rebus tota nostra futura est: cavete igitur per Deum immortalem, ne qui pro aliena gloria tot fortia opera edidistis; pro vestra ac Genuensis nominis ignavi fuisse videamini: & qui in Oriente nomen Genuense clarum & formidolosum reliquistis, in Occidente ignominiosum & contemptum relinquatis: quique ex Syria semper gloria ex Hispania ignominia pleni revertatis. Succlamant milites alacri consensu, pergerent Duces copiam sibi pugnandi facere: annixuros se, & perfecturos, ut, quemadmodum milites sollertis diligentiae & vigilantiae Ducum adhuc non poeniteat; ita ipsi suam fidem & operam Ducibus haud poenitentiam faciant. Omnium igitur animis praeparatis, rebusque ad pugnam instructis: Barchinonensis ex composito cum suis copiis, in quibus non fuerunt plus quinquaginta equites, aggere fluminis proximi relictus in insidiis latuit. Balduinus unus ex Consulibus cum quindecim triremibus suis urbi invehctus, copias expositas à spatio soli urbi & mari interjecto (non enim moenia Almeriae mari alluuntur, paululum ab illo retracta) insinuavit, speciem provocantis ad pugnam praebens. At Mauri paucitatem ex moenibus contemplantes insidias veriti, non prius se moverunt, quam duobus ex ipsis exploratum in locum quendam paullo editiorem missis; qui circumspectantes, cum latentes insidias non detexissent, Mauri securiores facti, magna multitudine tumultuario ac confuso agmine, nullum ordinem servantes urbe prodeunt, magnoque impetu in Balduinum feruntur: qui sensim, ut compositum fuerat, cedens copias in naves subduxit, septem aut octo ex suis desideratis. At Ansaldus Auria, qui viginti quinque triremes ipsi assignatas ulterius pro-*

motas,

motas, pone linguam latere jussit; cum ipse cum una triremi ad extremum caput linguae specularundus processisset, collegam laborantem conspicatus, signum invadendi Barchinonensi, & suis pone linguam latentibus dat: qui eodem tempore ex insidiis confurgentes; illinc Barchinonensis copiis promotis, hinc viginti quatuor Aurianae triremes remis connixae, ac capite linguae superato, Baldunianisque adjunctae in terram raptim profilientes eodem fere tempore concitatum Maurorum impetum excipiunt, quem fortiter sustinentes spatium dant reliquae classi, quae haud procul constiterat, navibus ulterius promotis, copias cum reliquis, pugna commissa, conjungendi. Univerfa igitur acie Christiani validam impressionem in Barbaros dant: quos primum paulum submovent, deinde gradum acius inferentes avertunt, postremo omnibus viribus connixi in praecipitem fugam conjiciunt; quos insequentes ac terga cadentes magnam illorum stragem edunt: Barbarique, cum intolerandam sagittariorum Genuensium vim, quo illis temporibus praeter ceteris valebant, ferre non possent, in urbem se recipiunt, plus quinque hominum millibus in praelio amissis.

Victoria potiti Christiani classibus in terram subductis, machinas fabricare, ac reliquum apparatus expugnandae urbis instruere & parare instituunt, ita munera partiti, ut pars ipsorum opera instituta urgeret, pars Mauros per varias occasiones urbe erumpentes, Christianosque operi intentos vexantes, ac machinas comburere conantes arcerent; cum interea eorundem Maurorum ne in urbe quidem munienda, ac suspectioribus locis firmandis, omnibusque ad oppugnationem sustinendam & arcendam necessariis praeparandis & expediendis, segnis opera esset. Christianis igitur oppugnationi instruendae intentis, Rex tandem ad exercitum venit; non plus quadringentis equitibus ac mille pedibus secum ductis, tam paucitatem copiarum, quam ferum adventum excusans. Perculit vehementer Mauros adventus Regis, longe majores copias ab illo, ut par erat, adductas ratos: consiliis igitur a vi ad Punicas fraudes versis, animum Regis & Barchinonensis tentant; ingentem auri vim pollicentes, si ipsi cum copiis suis discedentes solos Genuenses reliquissent. Inviectus uterque animus a fardibus fuit: pravum consilium ad removendam a se perniciem a Mauris initum, illam acceleravit: Consules enim, rebus ad suspicionem inclinatis, ac tempore anni rebus gerendis adverso urgente, maturandum rati, nulla mora interposita, machinas productas moenibus admovent; continentique multorum dierum verberatione duabus turribus & magna continentis muri parte prostrata, urbem invadere constituunt, copias in duodecim cohortes partiti, singulas sub signis suis, non minus millenis hominibus constantes, in quibus magnus fuit egegiorum sagittariorum numerus; Regemque ac Barchinonensem ad partem laboris & periculi vocant: quorum Rex tarde ac lente se commovens vix in tempore supervenit; Genuensiumque agmina jam sub signis instructa, ac magno cum silentio procedentia invenit. Dieigitur pervigilio divi Lucae sacro, coelo albescente, magno impetu urbem invadunt; in eamque post trium horarum pugnam per stragem diruti muri tandem perrumpunt, magna hostium edita caede: ad viginti enim Maurorum millia eo die cecidisse traduntur; noctuque urbe potiti, sanguine tandem satiati, irarumque certamine remisso, ad eos, qui in urbe remanserant, capiendos se converterunt; quorum ad decem capitum millia omnis generis omnisque aetatis & sexus, Genuam ducta sunt. Qui in arcem se subdixerunt ad viginti millia numero sese pretio triginta aureorum nummum mil-

lium, nulla oppugnatione expectata, redemerunt: cum praeda in urbe facta sexaginta aureorum millibus aestimata sit; quorum maximam partem in milites & navales socios Consules distribuerunt.

Genuenses, urbi ipsorum in primis opera & copiis expugnatae Othone Bonvillano cum mille armatorum numero praesidio praefecto, classe conscensa, proris in Orientem directis, Barchinonem petunt: ad cujus urbis littora classe appulsa, naves in terram subducunt, ibique hybernare constituunt, cum monitis Pontificis pro jure paternae auctoritatis enixe agentis parentes; tum exorati precibus Comitibus Barchinonensis, contententis, ut sibi auxilio essent in expeditione Dertusensi; in quam omnes ipsius curae versae erant. Genuenses igitur, hybernaculis statutis, Ubertoque Turrio & Ansaldo Auria duobus ex Consulibus cum duabus triremibus Genuam missis, ad ea, quae gesta erant, magistratui & consilio demonstranda, rationemque novi consilii ab ipsis capti reddendam, atque hominum supplementa accersenda; ipsi materia ex omnibus circumjectis regionibus petita, ne totum illud hyemis tempus segne tererent, in machinas ad usum expugnandarum urbium fabricandas assiduam operam conferunt.

Quibus ad effectum perductis, supplementisque petitis acceptis, atque omnibus rebus ad bellum necessariis paratis & instructis; aestate jam inita classe deducta, anno ejus saeculi quadragesimo septimo in pervigilio divi Petri ex hybernis movent, ac velis datis, Dertusiam petunt; Kalendisque Juliis Iberum flumen cum classe atque omnibus copiis ingressi, brevi Dertusiam perveniunt; copiisque in terram expositis castra statuunt. Ea urbs per totam longitudinem ripis fluminis porrecta ab illo alluitur, distatque a mari quindecim millium passuum intervallo, planaue urbis ad flumen pertinentia templum valido propugnaculo cinctum communit: editior pars civitatis arcem satis amplam inferiori urbi imminentem habet; quam *Soctam* incolae vocant. Genuenses in parte inferiore ad flumen pertinente cum parte Barchinonensium copiarum, quibus adjuncti erant nonnulli Anglici Proceres Templariae militiae Equites religionis causa voluntariam militiam professi, confederunt: superiora loca Gulielmus Montispefulani Dominus cum reliquis copiis infedit. Igitur milites Genuenses omnis morae impatientes, ardoreque animorum tracti, inconsulto impetu, Ducumque injussu, propugnacula templi invadunt, praediumque committunt: quod acre per multas horas fuit, compluresque utrimque absumpsit: quam rem Duces acerbo animo tulerunt; militibusque asperis verbis objurgatis, qui disciplinam militarem solvissent; gravi edicto, ne quis talia in posterum audeat, prohibent: machinisque admotis moenia quatere instituunt: quibus dejectis, ac per ampla fenestra patefactis, per ea Christianae copiae in urbem irruunt, Mauris tandem averfis, qui acriter primo restiterant; quorum maxima pars in arcem se recepit. At Duces machinis è vestigio promotis situm loci ex propinquo contemplatos vehementer perculit objecta species fossae immensae pene altitudinis & latitudinis, qua arx cingebatur; ut multi de expugnatione desperare inciperent: ceterum Duces nullam tantam esse rerum iniquitatem gnari, quam non virtus & patientia tandem superet, opus immensi laboris aggrediuntur fossae implendae: quare materia undique comportari iussa, eaque in fossam subinde coniecta, cum neminem aut aetas, aut ordo, aut honoris gradus, aut dignitatis operi & labori eximeret; opere non nocte, non die, intermisso, tandem fossa ad eam altitudinem impleta est, quae esset oppugnantibus opportuna. Igitur

A. C.
1147.

tur Duces turrim ligneam immanis magnitudinis, in qua erat delecta trecentorum bellatorum manus, ulterius promotam arci admovent: à qua magna detrimenta Mauri accipiebant; qui tamen haud quaquam sese deferentes, immanis ponderis saxa machinis suis intorquentes, latus in arcem versum perfringunt, ac decutiunt: cui malo statim Genuenses occurrunt, rete ex funibus magnæ crassitudinis contexto turri undique cincta: quod faxis Mauro- rum impenetrabile, murum turris tutum & inta- ctum ab illorum ictibus præbebat. Interea Comes Barchinonensis, ob non persoluta stipendia, à suis relictus est: solique Genuenses ab omnium socie- tate deserti in ea expugnatione remanserunt: quæ res cursum quidem procedentium consiliorum non- nihil retardavit; ceterum animos Genuensium haud quaquam infregit, aut spem & fiduciam exsecundis ad Almeriam rebus conceptam debilitavit, usu expugnandarum urbium feroces: institutam igitur op- pugnationem urgentes, Mauros ad extrema adduc- tos ad necessitatem deditiois tandem adigunt: de qua re colloquiis initis, ita convenit; ut nisi subsidia ab omnibus Hispaniæ urbibus, quæcumque à suæ religionis hominibus incolebantur postulata, intra quadraginta dies venerint, arx & ea pars ur- bis, quam adhuc tenebant, Genuensibus & Bar- chinonensi illico tradantur: in quarum rerum ob- servationem centum obsidibus ex suorum primori- bus à Mauris datis, res interea in induciis fuit: cum- que præfinitum tempus venisset, auxiliaque nus- quam apparerent; pacta deditio facta est die divo Sylvestro festo, qui est anni postremus, obsidione in sextum mensem completum extracta. Non mo- do spoliolum, sed captæ urbis tertia pars ex con- ventis Genuensibus cessit; duas reliquas Comes ha- buit: quam partem Genuenses imperio diu ab ipsis possessam Comitibus Barchinonensibus, pretio ac- cepto, posterioribus temporibus tradiderunt. Con- sules, duabus maximi nominis urbibus expugnatis, pleni gloria, atque opulenti spoliis onusti, Ge- nuam cum incolumi ac victrice classe redierunt: à qua more triumphantium urbem sunt invec- ti.

A. C. Ut superiores tres anni bellicosi in primis, &
 1149. pleni gloriæ fuerunt; ita quinque insequentes im-
 1150. belles, nulla memorabili re domi, aut foris gesta;
 1151. præter opidum Gibellotum, ac quidquid Respu-
 1152. blica in Provincia Lolizia possidebat, fiduciarium
 1153. in viginti novem annos Gulielmo Embriaco datum, vectigali anniversario ducentorum sexaginta by- zantiorum, ac dono aurei aulæ byzantiorum de- cem, ad ornatum altaris divi Laurentii imposito: ac quidquid Respublica in urbe Acri & in illius finibus & circumjectis regionibus, nec non in urbe Antiochia totaque ejus ditione possidebat cum an- nuo vectigali, in illis quinquaginta byzantiorum, in his octoginta Hugoni & Nicolao Embriacis fra- tribus, in idem temporis spatium, in idemque fidu- ciæ jus dato.

Torpor quidam & socordia per ea tempora civi- tatem invaserat, resque publicæ à primariis civibus neglectæ incuria dilabebantur, quibus summus quo- que ipse magistratus, summumque civitatis impe- rium, quo ad ambitionem hominum instigandos animosque ad seditiones & dissidia acuendos nullus solet esse acrior stimulus, raro ex omni memoria exemplo, fordebat. Ejus rei duplex causâ tradi- tur: alii enim illam nimiam illorum temporum felici- tati assignant: quæ eam negligentiam illudque fastidium faceret, perpetuo humani ingenii vitio à labore ad otium proclivis: cum principes civitatis pace cum Pisaniis sancita, Maurorumque conatibus repressis, civitateque ab externis motibus quieta, rerum urbanarum procuracionem aspernarentur, velut ignobilem; negotiumque molestiarum & of- fensionum plenum à se removerent, ac laborem in-

A glorium repudiarent: alii altius intuentes rem ad gravio- rem interpretationem revocant: formidinem enim adventus in Italiam Friderici Ænobarbi Ro- manorum Regis, Imperatoris designati diadema Cæsarianum à Pontifice petentis, cives à Republi- ca attingenda deterruisse, barbarum ac trux inge- nium impotentemque iracundiam horrentes, quam ille haud dubie in eos primum effusus esset, qui ipsius conatibus sese opposuissent: quam necessita- tem Magistratus & suspecta Reipublicæ propugna- tio hominibus imponebat: neminem igitur bono publico privatam perniciem sibi tum conflare vo- luisse ab homine Italiæ urbibus, si qua dicto au- diens non fuisset, aut superbum jugum detrectas- set, graviter minitante, cædesque, incendia, ex- cidia alternis verbis jactante: ceterum is ipse me- tus causâ, si modo ea fuit, idem remedium mali fuit, qui cives, cum primus ille formidinis impe- tus defecisset, ad sese, liberos, conjuges, commu- nemque patriam respiciendam tandem convertit, consopitamque virtutem excitavit, neque civitatem otio consensescere passus est. Qua in re egregia ope- ra Archiepiscopi fuit, cujus in monendo, hortan- do, desidiâ exprobrando, divini Numinis ulto- ris metum injiciendo, omnia seduli ac boni pastoris officia constiterunt.

C Tanto igitur periculo appropinquante quattuor opibus & consilio eminentes cives Ugerius Guido, Ubertus Spinula, Anselmus Auria, Lanfrancus Piper, insequenti anno, qui fuit ejus sæculi quin- quagesimus quartus, haud retractanter, populoque A. G. cupientissimo & efflagitante, Consules creati sunt: 1149. qui simulatque magistratum inierunt, omnes Rei- publicæ partes erigendas curis suis amplexi, pri- mum omnium triremium numerum longe immi- nutum, navalesque copias, quibus Respublica in primis staret, supplendas curarunt, magno nume- ro carinarum illico posito, deinde ad Rempubli- cam ære alieno & fœnore liberandam animum ad- jecerunt: quæ res partim ab ipsis, partim a succes- soribus proximi anni Consulibus adducta est, com- pluribus publicis vectigalibus & portoriis à fœne- ratoribus redemptis.

D Per ea tempora Fridericus in Italiam venit: ad quem cum ceteræ Italiæ urbes, quæ erant veteris juris Romani Imperii, Legatos misissent, qui in verba jurarent, gratiam præpotentis Principis ca- ptantes: ne civitas quidem in eo officio sibi cessan- dum ducens, duos Oratores ad eum mittit, Hu- gonem Archidiaconum virum insigni doctrina, & Cassarum Annalium scriptorem: qui ab eo comiter & humaniter excepti sunt, cum magna effusæ in civitatem nostram voluntatis significatione: nihil tamen de iis rebus, quarum causâ venerant, tum transactum est; omniaque suspensa de industria in commodius tempus relicta sunt; astu Friderici omnia sibi integra reservantis: cui consilium esset Genuensium copiis & industria uti in expeditioni- bus maritimis, quas animo destinarat: in quibus prout illorum studia magis minusve prompta & obsequentia habuisset, ita illis leviores aut durio- res condiciones ferre. Rebus igitur Genuæ in pri- stinum statum restitutis, pars curarum versa est in ditionem pacandam; quam nonnihil infestam per idem tempus faciebant Marchiones Carretta- ni, animis ex negligentia-civitatis aliquantum sub- latis, qui furto insidiarum arcem urbis Nauli occuparunt, fide promissorum pridem civitati fa- ctorum perfracta. Urbanæ igitur copię eo missæ, omni eorum regione ruinis, incendiis, direptio- nibus per totam hyemem vastata, nullo alio ope- ræ pretio facto, cum naves littoribus appelli non possent, Genuam reversæ sunt.

F Crescebat in dies civitas opibus & existimatione, incolarumque numerus augebatur: animus igitur in- se-

A. C. insequenti anno ejus sæculi quinquagesimo quinto
 1155. Consulibus ad pomerium proferendum, laxiusque
 spatium, quod incolae caperet, novo circuitu mu-
 rorum amplectendum adjectus est: quod opus ma-
 gni moliminis magnæque impensæ & laboris (ex
 lapide enim quadrato mœnia & turrets exstructæ
 sunt) hoc anno inchoatum, brevi, ut suo loco di-
 cemus, ad effectum perductum est. Clara victoria
 de Mauris parta, duabus magni nominis urbibus
 in Hispania subactis, cum suo ipsa fructu civitati
 profuit, tum nomen Genuense apud externos Prin-
 cipes magna in gloria, magnoque in precio posuit;
 ut tam Latinus quam Græcus Cæsar Genuensium
 amicitiam ipsorum consiliis in primis aptam, ingen-
 tibus promissis, & donis sibi adjungere studerent.
 De qua re cum internuntii sæpe inter Emanuele
 Constantinopolitanum & Genuenses ultro citroque
 commicassent; tandem Græcus instituta consilia ad
 effectum perducendi cupidus, Demetrium Metro-
 politam cum haud contemnendis donis Genuam
 misit: cum quo amicitia & armorum societas jun-
 cta est. Cæsarque præter eadem jura eisdemque
 immunitates, quibus Pisani & Veneti in ipsius omni
 ditione utebantur, Genuensibus datas, suam illis
 quoque plateam, suumque privatum forum ac sa-
 cram ædem in urbe ipsa Constantinopoli Genuen-
 sibus dedit, anniversaria pensione quingentorum
 perparorum Reipublicæ, ac sexaginta Archiepisco-
 po, aureorumque aulæorum honoris causa addi-
 ta.

At Fridericus Latinus Cæsar, cum, Cæsariano
 diademate à Pontifice accepto, in Longobardiam
 redisset, Dertona urbe post duorum circiter men-
 sium oppugnationem capta & solo æquata, tantum
 sui terrorem ceteris proximis urbibus iniecit, ut
 omnes, metu ejusdem eventus tributo ultro dela-
 to, se ab eo periculo & ab impetu hominis redi-
 merent. Uni Genuenses in recusando constantes
 fuerunt, qui neque formidine præpotentis Princi-
 pis, neque suasionibus multorum à Friderico clam
 submissorum, ac sese Genuensium vicem sollicitos
 simulantium, terroremque & iracundiam Frideri-
 ci consiliis miscerent, à jure & libertate sua tuen-
 da deduci potuerunt; omnibus curis in se adversus
 Friderici conatus comparandos collatis. At Fride-
 ricus secum reputans, quanta moles esset urbs Ge-
 nuæ, quantique ac quam diuturni laboris, quan-
 tæque impensæ, ac quam dubiæ spei futura esset
 oppugnatione opulentæ ac prævalidæ urbis, situ qui-
 dem ac natura loci in primis munitæ, ceterum in-
 expugnabilibus civium animis longe munitioris,
 ut quod extorquere vi non poterat, gratuito re-
 mittere videretur, necessitatemque beneficium
 suum faceret, Genuæ Legatos sibi mitti postulat:
 mos gestus est: missique sunt Gulielmus Luscius
 unus ex Consulibus; simulque cum illo nonnulli
 ex principibus civitatis, quos Fridericus comiter
 & amanter acceptos, honorificeque appellatos bo-
 no animo esse jubet: cum demonstraret, se à Ge-
 nuensibus obsequia, non servitutem petere, ne-
 que se ab illis tributa quærere; fidelitate conten-
 tum, quam ipse amicitia & perpetua benevolentia
 sua esset remuneraturus; suumque favorem suam-
 que omnem opem ac perpetuum ipsorum salutis &
 dignitatis patrocinium prolixè deferret. Legatis igitur
 promissorum & spei plenè dimissis, in Germa-
 niam rediit.

Nec minor honos, minusve pretium apud Gu-
 lielmum præcellum ac præpotentem Siciliæ Re-
 gem Genuensibus fuit, qui tantum illorum gratiæ
 & auctoritati dedit, ut illis petentibus, Provinciæ
 Narbonensis, ac Gallos mercatores & negotiatores
 ex regno suo exigeret: quod Bernardus quidam
 Othonus piraticam faciens ejus nationis homo ipsos
 multis detrimentis affecisset.

A Longe diversa ratio Hierosolymitani Regis &
 Principum Syriæ fuit: qui Majorum suorum diffi-
 miles nationem Genuensem omnibus iniquitatibus
 infectari cœperant, eorum naves & merces per ad-
 umbratas juris species capere, immunitatibus &
 juribus suis uti non permittere, omni denique in-
 juriarum genere afficere. Quæ injuriæ Genuenses
 tandem adegerunt ad Manfredum ex sodalibus Ca-
 nonicis ædis Laurentianæ ad Anastasium quartum
 Pontificem maximum, qui tum Beneventi Conci-
 lium universæ Ecclesiæ habebat, mittendum, eas
 injurias exposculationum. Is fuit Manfredus unus ex
 sodalibus Canonici ædis Laurentianæ nobilitate &
 consilio spectatus: qui cum Pontifici injurias Ge-
 nuensibus factas gravi & queribunda voce expo-
 sisset: illis motus Pontifex litteras ad Regem Hierosolymitanum dedit in hanc sententiam scriptas:
Vehementer commoti sumus, fili, Genuensium de te querelis, per Oratores suos ea de causa ad nos nominatim missos, graviter exposculationum: jura sua eximia in sancta ista civitate ac regno tuo, non tam à superioribus Regibus beneficia gratis data, quam ipsorum meritis debita premia persoluta, illorumque jurejurando in fœdere secum icto sancita, quotidie abs te infringi: magnasque sibi injurias à tuis fieri, seque rebus suis spoliari. Qua in re magis tuam quam illorum vicem doluimus; rationemque consilii tui haud mediocriter mirati sumus: quippe illis, etiam juribus his adeptis, nihil de potentia ac de maritimis opibus, quibus excellunt, gloriaque tot claris rebus gestis paria decessurum est: at tu regni tui nervos hoc facto praeacidis, quod tot barbaris ac ferocibus nationibus circumseptum non tam viribus suis adversus tot potentes oppugnatores stat; quam conjunctione Occidentalium regnorum, auxiliorumque inde ad te submittendorum spernitur: qui metus Barbarorum audaciam à te armis petendo cohibet: quorum auxiliorum præter, nam quodnavates copiae, quibus Genuenses in primis abundant, haud parva & haud contemnenda pars sunt; ita universa Europa auxilia ad te venire non possunt, nisi à classibus Genuensium & ceterarum Italicarum civitatum, quæ opibus maritimis pollent, subvecta: quas civitates pro eo, ut novis beneficiis demerearis, injuriis etiam faciendis ultro à te alienas. Ut mittamus ingrati animi vitium, quo nullum detestabilius est; quippe quod cursum benignitatis & beneficentiae, quo vinculo mortalium societas in primis continetur, quantum in ipso est, interrumpat: hancine gratiam tot Genuensium in Christianam Rempublicam meritis, tanto pro religione effuso sanguini, tantis hominum & classium factis impensis referi? Quam vero compar tuum istud consilium superiorum Regum sapientium virorum facto est? illi amicitiam Genuensium sibi perhonorificam, regnisque suis multipliciter frugiferam impenso pretio parare studuerunt; tu partem temere abjicis. Collige te, fili; ac considera, primum hoc vulnus à divino Numine illis, quos pro scelerebus ulcisci velit, infligi, ut illis mentem adimat; praevisque consiliis à te remotis paterna monita nostra audi, ac fac, ut in fide pactorum servanda, in Christianis ac bene de regno tuo meritis hominibus favore tuo complectendis, & ab injuriis prohibendis, in debita reverentia Christi Vicario præstanda, Majorum tuorum pietatis ac tui similis sis: neque te à præcipitibus animi motibus auferri sinas. Nos quidem in te à caco consilio deterrendo ideo ardentiores sumus, quod in regno isto tuo tuendo & conservando, non minores nostras quam tuas partes agi putamus; cum de tot Christianorum salute, qui in eorum sedes & domicilium constitutum habent, paterna sedulitate solliciti, tum quod regnum ipsum Romanis Pontificibus auctoribus partum est, ac de nostrorum hostium manibus ereptum. Te igitur non modo pro paterno jure hortamur, fili, sed precibus etiam enixis tecum agimus, ut ad meliorem mentem te convertas, suæque Genuensibus restituas, illorum jura conserves, ipsos in honore pro eo ac meriti sunt, & in caritate habeas; neque nos ad eam necessitatem invitos trahas (à qua semper cogita-

gitatione remotissimi fuimus, tibi enim omnia ampla & fausta optamus) ut, non proficientibus monitis, sacrosanctæ potestatis tela in te intendamus, quæ superna indignatio consequi soleat, Deo immortalī numen suum in Vicario suo spretum celestibus armis ulciscente. In eandem sententiam ad Principem Antiochenum & ad Comitem Tripolitanum, nec non ad Patriarcham Antiochenum scripsit; (minima quoque magnis sunt inferenda) quæ & talia mihi scribenti sæpe venit in mentem mirari, quod legentes quoque miraturos non dubito, quid ita civitatis nostræ vires longe remotis nationibus atque opulentissimis regnis illis temporibus formidolosæ, castellanis accolis, atque angustissimorum finium Dominis, ita contemptui essent: aut quid tandem tam tenuis sortis hominibus animos faceret; ut, quacumque levi de causâ, in tam potentem finitimam civitatem, quæ ipsos nutu evertere posset, armis ultro inferendis insurgere non dubitarent: aut cur Majores nostri tam acres injuriarum sibi à præpotentibus Regibus factarum vindices, ac pro illis ulciscendis dignitateque sua asserenda nulla discrimina recusantes, nullisque pecuniarum aut hominum impensis parcentes, contumelias à tanto inferioribus impositas aut negligenter omnino, aut tam lente ferrent. Ceterum in tantis

A scribendi occupationibus non fuit operæ ejus rei causam ab Annalibus silentio præteritam perquirere; quam etiam diu ac multum perquisitam divinarum potius me, quam inventurum sperarem: sua igitur cuique de iis & ejusmodi rebus existimatio libera esto. Nunc ad seriem rerum contexendam revertor.

B Eo igitur anno tota Genuensis ditio pacata est à A.C. 1157 nonnullis motibus, quibus superioribus annis agitata fuerat; Marchionesque Carrettani, contumacia tandem deposita, in gratiam civitatis redierunt, Naulensis arcis ac ceterarum omnium rerum iudicio & arbitrio populo Genuensi permissio. Sanius consilium fuit Guidonis Guerræ Comitis Albintemelienensis: (retinebat adhuc titulum more horum sæculorum, cum urbs jam pridem in Genuensium ditionem cessisset) ut tutior esset & adversus finitimum conatus munitior, in fidem Genuensium venit; seque ac castella, quæ adhuc possidebat, illorum imperio subdidit: quæ castella civitas illi mox fiduciaria dedit. Quæ supra scripsimus, quatuor annorum curriculo gesta sunt; quorum hic postremus est, ejus sæculi quinquagesimus septimus.

V B E R T I F O L I E T A E,

PATRICII GENVENSIS,

HISTORIAE GENVENSIVM

L I B E R II.

A. C.
1158.



Nullo umquam majore in metu, majoreve in periculo civitas nostra fuit, quam anno, qui sequitur ejus sæculi quinquagesimus octavus: quod tamen utrumque ipsamet brevi virtute & audacia discussit. Repetierat per ea tempora Italiam Fridericus Ahenobarbus, ingentibus ac firmissimis copiis armatus, impotenti cupiditate hominem rapiente, jugum civitatibus, quæ veteris juris sacri Imperii censebantur, imponendi. Prima belli procella in Mediolanum opulentissimam urbem incubuit: quæ prævalida oppugnatione atque arta obsidione ad necessariam deditionem compulsæ est, venia ab irato victore novem argentearum marcarum millibus redempta: quo metu ceteræ Longobardiæ civitates percussæ similem eventum formidantes, tributo imposito imperium acceperunt. Uni Genuenses veterem virtutem & constantiam retinuerunt, qui nihil Mediolanensibus casibus animis infracti, diligentiam in munienda urbe institutam duplicarunt, curasque non ad iratum ac furem hostem felicibusque successibus elatum humilibus precibus flectendum, sed ad sese & libertatem suam ab illius impetu defendendum contulerunt. Quare institutum opus novi muri exstruendi diurno ac nocturno labore urgentes; cum nulli aut sexui, aut ætati, aut dignitati, aut honoris gradui extrema necessitas parceret; octo dierum curriculo opus, quod annum æstimeretur, perfecerunt: quæ claudi in tanta temporis brevitate muro non potuerunt, ea validissimo trabium & asserum munimento obstructa sunt; prævalidæque cohortes stipendia facientium in ur-

bem à Magistratu introductæ; nullaque pars omnimodæ curæ & diligentiae in muniendo & comparando omiſsa est.

D Quibus rebus cognitis Fridericus, qui Boscum usque extremæ Longobardiæ opidum processerat, ut majorem sui terrorem propinquior factus injiceret; cum prius animos Genuensium per aulicos Proceres, quibuscunque aliquid juris cum Genuensibus publice aut privatim erat, flectere frustra tentasset; consiliis à vi inferenda ad animos benignitate alliciendos & in se firmandos versis, Legatos ad se mitti postulat, cum quibus de summa Republica agat. Perampla legatio missa est, octo civitatis principum; qui fuerunt Udo Contardus unus ex illius anni Consulibus, Cassarus Annalium Scriptor, Ubertus Spinula, Gulielmus Cicada, Guido à Laude, Ogerius Bocheronus, Otho Judex Albericus. Hi cum in Aulam venissent, ad Casarem introducti sunt, princepsque legationis de jure civitatis tali oratione disseruisse traditur: *Arrogantia apud te, Caesar, insimulamur, qui tibi eximii esse postulemus: quique consilia à Longobardia, & aliarum Italicarum Provinciarum civitatibus separantes, simul cum illis tributa sacro Imperio pendere recusamus: ceterum res ipsa omni nos invidia liberat; quam si quis suis momentis ponderet, non modo nullam superbiam nostram accuset, sed modestiam insuper laudet: nemoque nobis tam iniquus fuerit, qui in dissimili nostra à ceteris civitatibus causâ non dispar quoque jus esse æquum censeat: ceteræ urbes, Caesar, agros feraces in finibus Romani Imperii possident, fructusque ex illis percipiunt, qui non modo illas alant, sed qui superexsuperantes foras cum magno ipsarum compendio exportentur, ut æquum sit Romanum Imperium eorum, qui in ipsis solo nascuntur, particeps esse, necessariaque onera sua ab illis levare. At nos solo nudo & sterili utimur: quod non-*

nonnullos quidem amoenos, ceterum nullos aut perexiguos necessarios fructus fert. Quare fit, ut nullam Romanum Imperium partem jure petere possit earum rerum, quæ nulla sunt: industria nos nostra, Cæsar, nostrique labores alunt; totaque res nostra maritimis commerciis & mercatoria negotiatione continetur. At industria & labores vestigiales esse non debent: neque id ullo umquam tempore, aut apud ulla quamvis barbaras nationes usurpatum est: commercia vero, & mercatorius questus eo etiam minor, quo mille portoribus obnoxius est, quæ ubique locorum solvimus, ut summa non modo injuria, sed inaudita quoque crudelitatis sit, eandem rem duplici & intolerando onere gravari: quod superadditum onus, ut injuriam omitamus, omnem questum commerciorum omnemque laborum fructum obruat, necessitatemque hominibus exprimat ipsius negotiationis plane deserenda, tributis fructum mergentibus: quare fiet, ut omni via alimentorum parandorum adempta, Liguria ipsa tota, quæ Provincia nulla est hodie in Italia oppidorum ac populorum frequentia celebrior, incolis alio commigrantibus, habitatoribus vacua, brevi receptaculum ferarum fiat. Atque hæc, quæ adhuc diximus, tributis nos liberant; quæ vero mox addemus, non quidem vim adhibent, neque enim possumus; sed verecundiam ceteris Italia sacri Imperii civitatibus imponunt nobis etiam tributa persolvendi: neque enim æquum est, si quis ad calculos rem revocet, operam nostram, quam illis ac sacro Imperio perutilem, assiduam navamus, mercede sua carere, cum illud constet classibus, & bellicis laboribus, & discriminibus nostris maritima commercia Italia tuto fieri; mari ab excursionibus piratarum per totam ejus longitudinem purgato: quæ commercia cum Italia non minus commoda & fructuosa sint, quam illa ipsa soli ubertas, in rebus necessariis in illam importandis: & fructibus, quos ipsa fert, cum magna ipsius utilitate avehendis; non debet opera nostra ipsis tam utilis nobis solis esse infructuosa, neque illis decet, cum participes commodorum sint, impendiorum, quæ assidua hominum & pecuniarum in classes alendas facimus, expertes esse: sed ventrem imitari; qui cum ministerio manuum, ac pedum, ceterorumque membrorum alatur, non segnis, neque nullum mutuum beneficium reddens, datis rebus utitur; sed sanguinem per totum corpus concocto cibo distribuens, membra vicissim alit. Quod non novum fieret, Cæsar; usurpatum est enim omnibus temporibus apud alias nationes: neque jure quis nobis succensuerit, si nos Græcia sapientissima Provincia exemplo uteremur; cujus libertatem cum Athenienses classibus suis defendendam suscepissent, stipendia quoque haud gravate à reliquis civitatibus collata ad partem impensarum tuendam exigebant: sed nihil tale à te petimus, Cæsar, quaque nunc pronuntiavimus, in eam sententiam diximus, ut sacrum Imperium plus etiam quam à ceteris civitatibus à nobis habere se putet, si eo onere à nobis liberatur, quod ipsi amplius decem milibus aurearum argentearum marcarum annuarum statuerunt fuerit. Id si cogitaris, Cæsar, jus immunitatis à nobis, ceteris Cæsaribus superioribus tuis tacentibus, perpetuo usurpatum infringendum non duces: quæ in re sapientia & aequitatis tuæ præclarum exemplum edes.

Flexit ea oratio animum Cæsaris: æquis postulatis assensum, foedusque Genuensibus honorificum sancitum est: in quo Cæsar per duos Legatos Genuam missos Genuenses in fidem & tutelam accepit, jurisdictioni & foro judiciario Imperii exemptos, præter crimen latrocinii, immunitate tributorum, atque omnium onerum quacumque de causâ confirmata: contra populus jurjurando se majestatem Imperii pie culturum promisit; mille ducentis argenteis marcis, honoris, voluntatiq; in illum propensæ declarandæ causæ, dono ad illum missis: quo foedere icto Ge-

nueses in gratiam recepti expeditionem in Albios Intemelios fecerunt; qui ante foedus cum Cæsare ictum, illo suadente & inttigante, defecerant; arcemque in ea urbe à Genuensibus ædificatam diruerant. At Genuenses opido in antiquam ditionem redacto, complures Intemelios cives, qui auctores deficiendi fuerant, captos ac Genuam ductos carceribus incluserunt.

Anno insequenti ejus sæculi quinquagesimo nono, inchoatum secundorum moenium opus ad finem perductum est: quod totum ex lapide quadrato magnificentia sua conspiciendum in primis est: à portu enim incipiens divæ Sabinæ ædem complectens, inde ad ædem divi Francisci conscendens, ædes divæ Catherinæ, ac divi Andree intra pomœrium claudens, ad aream Sarzani mari imminens, terminatur quinque milium quingentorum pedum circuitu: qui dimidius tum civitatis ambitus fuit; cum pars urbis ad portum & ad mare pertinens paris fere longitudinis, muro cincta non sit, rupibus ac scopulis locique natura fatis munita.

Insequenti anno ejus sæculi sexagesimo, duo Legati missi sunt, alter ad Cæsarem Græcum Henricus Guercius; alter ad Lupum complurium Hispaniæ Provinciarum Regem, ad nonnullas controversiarum exortas causas transigendas, pacemque & amicitiam stabiliendam, Ubertus Spinula: qui Genuam reversus, nulla re ex iis, quas cum Rege egerat, ad exitum perducta, insequenti anno ejus sæculi sexagesimo uno Consul factus, classi quinque triremium præfectus est, duplici de causâ armatarum, & in tutelam commerciorum à piratarum Saracenorum molestiis, & ad Lupum Regem ejus classis metu ad pacis consilia, ad quam ille retractanter descendebat, attrahendum. Neutrum consilium vanum evasit: nam ejus classis fama piratarum conatus compressit, qui domi se continuerunt, navibus in terram subductis; onerariæque Genuenses omni damno intactæ incolumes in patriam redierunt. At Spinula omnem Italiæ & Sardinia oram circumvectus, illarumque littoribus pacatis, cursu in Hispaniam directo, portum Deniæ Aragonici Regni opidi tenuit: cujus adventu cognito, Rex continuo legationem ad illum mittit, sese pacis percupidum ostendens, qui tantum spectatæ virtuti & sapientiæ Spinulæ tribuit, ut omnes controversiarum causas, omnesque pacis conditiones ad ejus arbitrium rejecerit; sese eo, quod ille statuisset, statutorum promittens: & hercule Ubertus vir fuit memorabilis, cujus virtute & sapientia res Genuensis ea tempestate in primis stetit; quique nullum ætatis tempus à publicis muneribus tam pacis quam belli vacuum habuit, quibus perpetuo magna cum integritatis & consilii laude perfunctus est. Nihil cunctatus Ubertus, tantamque regii animi submissionem admirans, delata facultate accepta de consilii sententia, in quo fuerunt duo ex Consulibus rerum forensium, Ansaldus Scalia, & Lambertus Longus, eas pacis conditiones tulit, ut Rex libera & omni molestia intacta Genuensibus in regnis & portubus suis commercia præstaret; ac decem aureorum millia præsentia solveret. Quibus conditionibus à Rege cupide acceptis, missus est Genua Legatus Gulielmus Cafficius, ad pacem ratam habendam, & sancendam, pecuniasque accipiendas: adeo tum opes & nomen civitatis nostræ florebant, ut illius amicitiam Reges pretio appeterent. Eadem pax & amicitia iisdem conditionibus cum præpotente Mauritania Rege, quæ Provincia nunc Marocum appellatur, per Othobonum Nuolonis fratrem Legatum ea de causâ Genua missum inita est.

Eodem quoque anno Anfaldus Spinula comes additus est Joanni sanctorum Joannis & Pauli Cardinali, ab Alexandro Pontifice ad Regem Hierosolymitanum Genuensium causa legato, ad controversias componendas, ac jura eximia nationis Genuensis facienda: qui Pontifex eo anno Genuam venit, magnifice & apparate acceptus, cum summa effusæ voluntatis & observantiæ significatione: perhonorificus enim in populum Genuensem perpetuo fuit, quem amplissimis viribus auxit & ornavit: quorum illud haud quaquam vulgatum fuit, quod Archiepiscopum perpetuum Legatum, quem Legatum natum vocant, transmarinarum Provinciarum creavit. Sanctus vir totum pontificatus cursum, qui diuturnus fuit duorum & viginti circiter annorum, à Friderico exagitationem habuit; quattuor pseudo-Pontificibus, Victore, Paschale, Calisto, Innocentio, adversus eum deinceps vitio & per Ecclesiæ diffidium creatis, qui tamen ante illum omnes mortui sunt. Fridericoque tandem, Venetorum virtute, necessitas ad pedes Pontificis suppliciter procumbendi, eosque osculandi expressa est, celebre illud ad omnem posteritatem præfatum, *Non tibi, sed Petro*: cui à Pontifice illud relatum est, *Et mihi, & Petro*. Friderici hujus opes eo tempore terribiliores Italiæ factæ sunt, Mediolano capto, ac funditus everso, quo metu subacti omnes Longobardiæ populi, ac maris inferi Romam usque accolæ, tributum impositum obedienter acceperant. Uni Genuenses recusantes, Papiam, ubi Fridericus confederat, evocati sunt: missa est octoviralis legatio, Gulielmus Rogeronus, Grimaldus Consules, collegæque additi Gulielmus Ventus, Melchior Volta, Henricus Auria, Ogerius Guidonis, Vbertus Spinula, Philippus Justa, Bonvassallus Bulfengus. Eadem, quæ superioribus annis, de tributo imponendo & recusando jactata sunt; istuc tandem disputationum exitus fuit, ut Cæsar rationibus victus necessitatem tributi remitteret; amplissimoque diplomate Genuenses honorificentissime appellatos in amicitiam & gratiam acciperet, amplissimis juribus ac donis auctos; quorum illud eximium fuit, jus ex tota Liguria, cujus tum exiguum partem Genuenses imperio tenebant, à Monæco opido usque ad portum Lunensem navales socios, remigium, naves, materiam, ceterumque omnem bellicum apparatus in usum classium ab ipsis armandarum corrogandi: quam totam oram maritimam, sua jurisdictione Marchionibus reservata, hac in re illis subjunxit: ad hoc urbem Syracusas, quam juris sui esse præ se ferebat, illis fiduciarium concessit: contra Genuenses sese illi classibus atque omni ope sua adesse in omnibus expeditionibus ab illo susceptis promitterent: Legatis igitur Genuam remissis, legationeque renunciata, altera similis septemviralis legatio primariorum civium ad conventa faciendam Papiam missa est: hi fuerunt Ingo Volta & Nuvolonus Consules, Lanfrancus Piper, Beltramus Marinus, Ido Contardus, Bonvassallus Bulfengus, & Rogeronus.

Rebus ita constitutis, novi motus novæque bellorum causæ inter Pisanos & Genuenses ortæ sunt; pace inter ipsos Romano Pontifice auctore constituta à Pisani violata, fideque pactorum fracta: quibus uterque populus non modo publice, sed privatim quoque in omnibus orbis locis à mutuis injuriis prohibebantur: ea fide spreta Pisani, qui Constantinopoli negotiabantur, cum non satis cum Genuensibus de nonnullis controversis rebus conveniret; ut vi & manu, quæ

verbis non poterant, obtinerent, armis arreptis ad mille numero Genuenses nihil tale metuentes improvise invadunt: qui tamen cum non plus trecenti essent, præsidio murorum fori sui tecti, invadentium impressionem totum cum diem sustinuerunt; nocteque appetente, nonnullis probis viris pro communibus amicis sese interponentibus, res pacatæ sunt: fidesque mutuo data ab injuriis abstinendi. Ceterum insequenti die Pisani fidei datæ obliti, Venetisque ac nonnullis Græcis facinorosis, & contaminatis hominibus sibi adjunctis, viribus aucti atrociores in Genuenses cooriuntur: quibus Genuenses viribus inferiores cedere, ac saluti consulere coacti sunt; foro defensoribus vacuo diripiendo illis relicto, magno cum suo damno, ingenti rerum Genuensium à Pisani præda facta; cum captus quoque fuisset adolescens quidam nobili loco ortus Othonis Ruffi filius, ac postea crudeliter necatus. Genuenses, Constantinopoli relicta, Genuam se conferunt; fortunamque suam conquerrunt. Atrox injuria magnas animorum commotiones fecit: Consulesque ira ardentibus duodecim triremes adversus Pisanos illico armant: quam tamen classem portum exire non ante passi sunt, quam omnia iusta fecissent, feciali Pisas missio ad ablata repetenda, postulandumque, ut sibi de injuriis satisfiat: quod nisi Pisani fecissent, ad bellum indicendum: nihilominus fecialis Pisis ludibrio fuit, quam Constantinopoli fides elusa: bello igitur indicto, ac feciali reverso, triremes illico solvunt; portumque Pisani appulsæ turrim captam in ipsorum Pisani oculis demoluntur, nonnullasque Pisani naves incendunt, ac præda Genuam missa, in portum Lunensem se subducunt; ut propiores essent, si Pisani quidquam movissent: eodemque tempore quattuor Genuensium triremes vi tempestatis ad littora Corsicæ & Sardiniae compulsæ complures Pisani naves ceperunt; in quibus triremis fuit, quæ Bonacurium unum ex Pisani Consulibus vehabat: qui Genuam missus cum nonnullis aliis Pisani, quæ cædi superfuerunt, carcere inclusus est, cum multi eorum in captis navibus ab Othone Ruffo jugulati fuissent, recenti dolore filii Constantinopoli necati ad ejus mortem ulciscendam paternum animum stimulante. Pisani Consulem paullo post Genuenses à maximo Cæsaris scriba exorati dimiserunt, quo etiam se interponente, uterque populus per nonnullos dies à se mutuo lædendo abstinuit.

Nec tamen diu quieverunt Pisani; triginta sex triremibus ac nonnullis aliis navigiis armatis, per causam, ut præsidio essent navibus & negotiatoribus suis ultro citroque comitantibus, à quibus duæ onerariæ Genuenses, cum forte in illas nihil tale suspicantes incidissent, captæ sunt: cujus rei nuncio ad triremes Genuenses, quas in portu Lunensi substituisse diximus, perlato, Duces celeritate navium suarum & remigio confisi classem hostilem citato cursu petere non dubitant: qua in conspectum data, nuncio è vestigio ad Duces Pisanos missio ad concurrendum parit utrinque navium numero provocant: detrectant Pisani certamen: at Genuenses irridere, ignaviam, exprobrare, ac modo triremes in illos concitare, speciem præbentes certamen petentium, modo in se citatos mira navium suarum agilitate fugere; totoque eo die per ejusmodi hostis ludificationem extracto, ne sine ullo fructu tempus laberetur, in insulam Planasiam ditionis Pisane iter avertunt; qua eversa, in Corsicam & Sardiniam contendunt; magnaue per circumjecta maria hominum & rerum Pisani præda facta, in portum

tum Lunensem se recipiunt. At Genuæ nuncio captarum navium accepto, classis in Pisanos decreta est: quæ dum comparatur & instruitur, magnus Cæsaris scriba ejus jussu Genuam venit; cujus auctoritate apparatu bellico ab utroque populo intermissio, utrique Augustam Taurinorum, ubi tum Imperator constiterat, evocati sunt, qui de jure suo, Cæsare ipso disceptatore, dislicerent. Octo Oratores ex civitatis longe primoribus missi sunt, Grimaldus unus ex Consulibus, Capo Orgolius, Lanfrancus Piper, Ubertus Cancellarius, Simon Auria, Baldizonus Ufufmarius, Guido Laudensis, Otho Mediolanensis: hæc nomina familiarum erant. Per ingentia verborum certamina cum pax convenire non posset, induciæ factæ sunt in reditum Cæsaris ex Germania, in quam mox cogitabat: in quas inducias post ejus reditum duceni ex utriusque populi longe primariis jurarunt.

A.C. 1163. Insequens annus ejus sæculi sexagesimus tertius nihil memorabile habet, præter obitum Syriprini Genuensium Archiepiscopi, viri in omni vita continentissime acta venerabilis. Habita sunt comitia de successore creando à sacro ordine, ac Consulibus & magna parte Senatus more priscae Ecclesiæ congregatis: qui eam electionem à se ablegatam rejiciunt ad tres Abbates sancti Benedicti, sancti Syri, sancti Stephani, & ad præpositos divæ Mariæ à Vincis, & divi Donati; rectoribus divorum Joannis, Damiani, Mariæ Castellane; tribusque sodalibus Canonicis Laurentianis Rubaldo, Anselmo, Dodone Hypodiano additis, à quibus creatus est Ugo Genuensis, Archidiaconus, qui eodem die à Clero & populo in folio Archiepiscopali collocatus est.

A.C. 1164. Insequenti anno ejus sæculi sexagesimo quarto, cum Cæsar in Italiam rediisset; missi sunt ab utroque populo institutorum de pace colloquiorum causa ad eum Legati. Genuenses quatuor fuerunt Baldizo Ufufmarius, Corfus Sigismundi filius, Bonvasallus Antiochia, Gulielmus Jordanes: ceterum tantum abfuit, ut inchoata consilia ad exitum perducta sint; ut, novis odiorum causis exortis, novum ac prioribus atrocius bellum renovatum sit. Regebatur eo tempore Sardinia à quattuor Judicibus: qui quattuor Provinciis, in quas omnis Sardinia distributa est, Calaritanæ, Turritanæ, Galluritanæ, Alborensi; singuli singulis præerant: summum imperium insulæ, pro suo jure, Pisani sibi vindicabant; de quo tamen cum Genuensibus semper contendebant: Sardorumque studia divisa alterutras partes sequebantur: in quibus Barisio Judex Alborensis, qui ceteros opibus & potentia anteibat, totum sese ad amicitiam Genuensium contulerat, Pisani insensum nimis superbe imperitantibus. Novarum igitur opum accessione fretus Barisio spiritus extulit; animumque ad splendidum consilium adjecit regnum Sardinie Pisani expulsi sibi parandi, consiliis cum Genuensibus communicatis: quos multa induxerunt ad Barisionis conatus favore suo amplectendos; primum quod Pisano opes in ea insula longe suas antecellerent, ac multo latius pateret imperium; deinde quod ea contentio magnis hominum & pecuniarum impensis ipsis semper itetisset, sine ulla magno opere fructus spe; postremo quod sperarent; quod aperta via assequi non poterant, ut Pisani insula exactis, ejus imperium sibi firmarent; ad id per devium iter se perventuros: omni enim Barisionis spe regni adversus Pisano conatus retinendi ab ope Genuensium pendente; sese illius promptam operam & nutibus obnoxia studia habituros, confidebant: Regisque proinde ti-

A tulum ac nomen penes illum, ceterum vim omnem regni penes se fore: igitur Ugonem Episcopum sanctæ Justæ ea de causa à Barisione ad Cæsarem missum duo Legati Genuenses comitati sunt Philippus Justa & Bonvasallus Bulferius. Episcopus ad Cæsarem introductus petiit Barisionem nomine ac diademate regni Sardinie à Cæsare donari; quod regnum ille sese à Cæsare fiduciarium habiturum promittere, atque in Cæsaris imperia jurare paratus esset; simulque anniverfarium tributum pendere, atque interea quattuor millia marcarum argenti presentia numerare. Haud retractanter postulatis annuit Cæsar, Pisani rem ægre ferentibus, atque injuriam magno clamore conquerentibus, qui calore iracundiæ in verborum intemperantiam proVecti, tota Aula prædicare non dubitabant, neminem omnino mortalium, ipsis invitis, ad Barisionem in continentem trajiciendum, aut viam illi ad regnum expediendam satis potentem fore: quin sese, iis ipsis Pisani invitis, ad Regem incolumem transvehendum, atque ad Cæsarem adducendum suffecturos, Legati Genuenses à Cæsare appellati responderunt. Cæsar igitur quattuor Legatos Genuam misit; qui classe à Genuensibus parata conscensa, Barisionem eadem classe ex Sardinia Genuam deduxerunt, cum in magnis opibus, magnaque in existimatione, atque in magnarum rerum gerendarum cursu civitas nostra esset, civium curis in bellica studia, atque in publicam & privatam rem augendam intentis.

Intervenit præclaris cogitationibus usitatum opulentorum populorum malum, civiles discordiæ: quæ incitatum iter ad gloriam & ad summum in rebus maritimis potentiæ locum retardarunt: quarum origo fuit duarum præpotentium ac nobilium familiarum, Advocatorum, & Castelliorum ambitio; cum magnis utraque plebis clientelis fulta esset, magnamque Nobilitatis partem affinitatibus & amicitiiis comprehenderet; totamque fere civitatem secum traheret. Castellis nullius gentis, ante regnum quattuor familiarum, major aut diuturnior Genuæ potentia & auctoritas fuit; cujusque opes magis formidolosæ essent; quæque majorem civitatis partem secum traheret, ut deinceps apparebit. Gliscebant inter has duas familias occulta odia; quæ mutua æmulationo excitabat, dum utraque gens ad summum dignitatis & potentiæ locum tendit, neque altera alterius opes supra suas excellere patitur: quæ odia diu compressa tandem in aperta dissidia eruperunt; verborumque contentione & jurgiis primo jactata, postremo ad manus & sanguinem venerunt. Initium armorum factum est in adventu Barisionis: cui cum Consules honoris causa magna optimatum caterva comitante, obviam usque ad extremas crepidines processissent; rixa inter Falconem Castellum, & Orlandum Advocatum, eorumque amicos & clientes, quorum uterque haud exiguum manum secum habebat, verbis prius & conviciis inchoata, mox contentione animos accendente, ad ferrum exarsit; cruentumque prælium commissum est, cum non gladiis modo, sed missilibus quoque res ageretur: in quo multi lethaliter vulnerati sunt: in quibus fuerunt Balduinus & Henricus Guercii, ac Gandolphus Ufufmarius, Sardusque Orlandi Advocati filius, qui ex acceptis vulneribus paulo post decesserunt. Hæc prima civilis discordia, quod quidem litterarum monumentis proditum sit, civitatem nostram agitavit.

At Fridericus Barisionem à Genuensium Oratoribus, Lanfranco Alberico, Piccamilio, Gulielmo Auria, Jonata à Campo, quos comitati sunt

Bigottus & Guido Laudenſis Jurifconſulti, Papiam deductum, ac Regem Sardiniae creatum regio diademate ſolennibus ceremoniis in æde divi Syri ornavit, Piſanis injuriam alte animo demiffam haud tacitam ferentibus: quorum legationis princeps cum linguæ moderari non poſſet: *Ita ne vero*, inquit, *fieri oportet, Caſar? hanc ne tu gratiam perpetuas Piſanorum in Caſarianum ſolum ſtudiis, ac tot pro illius dignitate dimicationibus & discriminibus ſuſceptis, ac forti & fideli toties navata opera reſers, ut illis Sardiniam juſto imperio tot ſæcula poſſeſſam auferas; parvoque pretio emptam, quæ tua non eſt, alii dones? ac degenerem ditionis noſtra hominem, nobiſque ſervitutem ſervire aſſuetum, per ſummam noſtram injuriam & contumeliam tanto honore afficias?* Irritavit hæc vaniloquentia Oratorum Genuenſium animos, non minus fervidi ingenii hominum: quibus auctoribus, Caſar ea fecerat. Reſponderunt igitur mentiri Piſanos Barifſonem degenerem appellantes, qui nobiliſſimus ſit; ac ſuæ ditionis hominem aſſerentes, qui contra compluribus ipſe Piſanis imperet; ex ejusque ditionis fructibus Piſæ haud parva ex parte alantur: pari mendacio Piſanos Sardiniam ſibi vindicare; quam Genuenſes armis olim, ipſis Piſanis fociis, non minus ſubegerint: qua in re primas fuiſſe Genuenſium partes, vel eam rem argumento eſſe, quod ipſis ceſſerint Piſani honore Muſaiti Regis capti ad Caſarem adducendi, ut perpetuo teſtatum relinquerent, Genuenſium in primis opera & armis Sardiniam, religionis noſtræ hoſtibus dejectis, Chriſtiano nomini & Caſariano imperio adjunctam. Finem impoſuit Caſar altercationibus, quæ ulterius progreſſuræ fuerant; Piſanis vehementer increpitis, qui talia tam inconfiderate projeciffent: nam neque Barifſonem eorum ditionis hominem umquam fuiſſe; & Sardiniam nullius juris quam Caſariani eſſe. Addidit faces incenſæ Piſanorum iræ hæc Caſaris objurgatio: qui indignationem vultu & verbis præferentes, aula minitabundi exceſſerunt. At Genuenſes, cum nulla in præſentia Regi eſſet pecuniæ facultas, argentum Caſari promiſſum, fide publica ac nonnullis veſtigialibus oppigneratis, mutuo ſumptum pro Rege ſolverunt, qui Genuam reductus magnam pecuniæ vim à privatis civibus mutuam ſumpſit, in claſſem, quam paravit, ſeptem triremium & trium ingentium corbitarum inſumptam. Gratias igitur honorificentiffimis verbis Magiſtratui egit Rex; faſtus ſeſe immortale hoc regni parti beneficium Genuenſibus debere; quorum ope, opera, auctoritate, pecuniis illud adeptus ſit: ejus igitur regni penes ſe procurationem tantum, penes Genuenſes imperium perpetuo futurum, quibus omnia ſtudia deberet. Grati animi monumentum primum eſſe voluit haud contemnendum veſtigial in ædificationem ædis Laurentianæ donatum. Ad hoc ſe ad pecuniam publice & privatim debitam diſſolvendam, antequam in terram exſcenſionem faceret, publicis monumentis obſtrinxit: ceterum Rex, cum Sardi, ſive ipſi Regem ac novam formam Reipublicæ per ſe non probantes, ſive à Piſanis inducti, omnes vias pecuniæ erogandæ ex ante præparato interſepiffent, cum promiſſa non faceret, neque mutuum ſolveret, à Piccamilio Conſule & collegis, additis, qui æris exigendi cauſſa cum Rege ierant, neque illum ea de cauſſa in terram umquam expoſuerant, Genuam reductus eſt, ac nonnullis primariis civibus in cuſtodiam traditus.

Quibus de cauſſis, cum haud dubium eſſet, quin bellum à Piſanis immineret, atque civitas in antiquos labores redigeretur; non tamen aliarum rerum curæ omittebantur, tribus Legatis ad Græcum Caſarem ipſius vocatu Conſtantinopolim miſſis; cum ille demonſtraſſet, cupere ſe antiqua

A foedera ac conventa cum civitate renovare. Irrita ea legatio fuit, Legatique nulla re tranſacta Genuam redierunt; mutata Caſaris voluntate, atque ardore illo remiſſo, cujus conſilia à motibus Occidentalium Regum gubernabantur.

Ceterum propius erat inteſtinum malum, odiis inter cives in dies recrudelſcentibus, reſque ad factiones venerat, quæ per ſex inſequentes annos civitatem mirifice exercuerunt; multis utrimque offenſionum cauſſis per varias occaſiones illis ſubinde accedentibus; quarum illa fuit inſignis; Melchior à Volta unus ex civitatis Conſulibus à nonnullis inſimæ ſortis hominibus in ſuburbano ipſo ſuo, quo animi cauſſa ceſſerat, interfectus: ut, niſi ſedula cura & diligentia Ugonis Archiepiſcopi nullis muneris ſui partibus indormientis, omnibuſque rebus ſedulo occurrentis, reſ in præcipitem caſum inclinatas ſuſtinuiſſet; ea incendia excitari potuerint, quibus civitas conflagraret: cum quo Conſules inſequentis anni ejus ſæculi ſexageſimi quinti, conjunctis ſtudiis, compluribus ſalubribus remediis civitatis tranquillitati conſuluerunt; nam tela deponi à civibus, quibus armati vulgo incedeabant, civilemque ac pacis veſtitum ſumi, gravi edicto imperarunt; factionumque & rerum miſcendarum capita ad inducias à mutuis offenſionibus ad certum tempus paciſcendas compulerunt; Ingonis & Amiconi à Volta turbulenti ingenii hominum ædibus, & turribus, quæ in media urbe ſitæ tanquam arces quieti civitatis imminentes, ac ſeditioſorum receptacula erant, in poteſtatem Magiſtratus reſtauctis; ipſorumque audacia, ne ſe commovere ac reſ miſcere poſſet, cuſtodibus circumdatis cohibita.

Interea Piſani conſiliis ad bellum deſtinatis, illuſque conſtandi cauſſas quærentes, reſ ac merces navis Genuenſis, quæ ad inſulam Aſinariam naufragium fecerat, ceperunt. Genuenſes Legatis ad Caſarem miſſis Lanfranco Alberico & Philippo Juſta, injuriam atque inducias ruptas conqueruntur. Reſpondent Piſani initium injuriæ atque induciarum inſringendarum à Genuenſibus fieri; qui Regem Sardiniae per ſummam injuriam cuſtodia incluſum teneant. Mittit è veſtigio Caſar Conradum ſacrificum ſuum, hominem ſpectatæ prudentiæ & gravitatis, ad cauſſas querelarum cognoscendas, reſque componendas. Convenerunt in opidum portum Veneris utriuſque populi Conſules. Multa utrinque ſunt jactata, Caſariano Legato diſceptatore; nullaque concordiae via inter animos exulceratos inſta eſt, reſque à verborum certaminibus & jurgiis ad manus & ferrum tandem revocata eſt, atroci prælio inter Piſanas & Genuenſes triremes commiſſo, cum uterque Conſul triremem patriæ ſuæ conſcendiſſet: quod diuturnum & cruentum fuit; triremi hoſtili ac Conſule capto, cum Genuenſis Conſul grave vulnus accepiſſet. Hæc fuerunt cauſſæ belli inter has duas nationes renovandi, quod Piſani ſecundum eam pugnam Genuenſibus indixerunt: ad quod Genuenſes alacri animo ſe comparare inſtituunt; cum interea mutuis ſe damnis per varias occaſiones utraque gens carperet, quæ ſingula perſequi non eſt operæ pretium.

F Ad magna bella, quæ civitatem noſtram exercebant, accedebant interdum parvorum & imbecillum nonnullorum caſtellanorum motus. Per ea igitur tempora Ughettus quidam Carpena, qui parvam arcem prope opidum Vernaciam ad lituſſitam poſſidebat, cum ad partes Piſanorum tranſiſſet, excuſſionibus ſuis ex ea arce circumjectæ regioni, atque opido propinquo portui Veneris negotium exhibere cœpit: qua re motus Simon Auria

Auria vir impiger ac strenuus, qui tum forte publica causa in opido portu Veneris erat, noctu cum trecentis armatis Vernaciam contendit; moniteque arci imminente, antequam lucefceret, confenso, arcem improvise adortus parvo certamine capit & incendit; Ughettumque, atque una cum illo tres Vezani opidi dominos captos Genuam mittit. At Pisani, bello confiato, octo triremes armatas in Provinciam Narbonensem mittunt; ad annonae viam ea parte Genuensibus intercludendam: adversus quos profectus est Simon Grillus cum classe quindecim triremium: qui Pisanas naves usque ad ostia Rhodani fluvii persecutus, cum illae flumen intrassent, fauces infedit. Pisanae per aliud ostium à Grilli conspectu aversum egressae, conatus Genuensium eluserunt: Grillusque, nonnullis Pisanorum onerariis incensis, Genuam revertitur.

Ceterum longe majorem cladem Pisani Genuensibus reddiderunt, qui una & triginta triremibus eadem aetate armatis in oram Ligusticam venerunt; copiisque in terram ad Album Ingaunum expositis, urbem improvise magno impetu adorti, brevi certamine, quod nonnulla caede ipsis stetit, capiunt & incendunt. Qua re cognita, Genuenses dolore ardentes quattuor dierum curiculo praevallidam triginta quinque triremium classem comparant, quae omnibus necessariis rebus ad bellum instructa è portu solvens, eodem Grillo praefecto, iter in Provinciam Narbonensem dirigit, quo sese Pisani post Ingaunum expugnatum contulerant: qui, fama classis Genua motae accepta, necessitatem pugnae, à qua vehementer abhorrebant, vitantes, Rhodano fluvio se condunt, ac ad Fanum Aegidii usque pergunt: ceterum Genuenses, Ingauno incenso, tantum certaminis animis imbibebant, ut ne sic quidem hostem omittendum duxerint: quare fluminis ostium ipsi quoque ingressi ad idem fanum perrexerunt: quo noctu appulsi, tenebris prospectum adimentibus, nonnihil à locis vadosis conflictati sunt. Postero die Grillus certior factus incolas opidi, ac peregrinos, qui ad mercatum convenerant, à partibus Pisanorum stare; ab iniquo praelio committendo abstinendum, ac voluntatem Raimundi Comitis prius explorandam censuit, tribus Oratoribus ad illum missis, Rubaldo Bisacia, Gulielmo Nigroni filio, Idoneo Contardo. Facile vir mobilis ingenii atque ancipitis animi ad foedus faciendum contra Pisanos attractus est; pecunia à Consule Genuensi, per causam impensae in bellum faciendae, accepta: qui venalem fidem gerens, majore pretio à Pisanis paullo post occulte emptus est, opidanis ipsis quoque corruptis: quod cum rescivisset Consul, vehementer ea destituitione perculsus, & haud dubius, quin Comes ad perfidiam prodicionem quoque esset additurus; à fortuna iniqui certaminis tentanda abstinendum intelligens, stipendio militibus, quos conduxerat, cum fide perfoluto, itinere retro repetito Arelatum venit à Comite opidi comiter exceptus; cujus animo frustra tentato, ostium fluminis exiit.

Dum ea in Provincia Narbonensi majore mole geruntur, ne aliis quidem in locis quies bellicosus populis ab armis erat: tres enim triremes à Genuensibus in Sardiniam missae sunt: è quibus ad locum turrin appellatum in terram egressi, complura aedificia Pisanorum incenderunt, totamque circumjectam regionem direptionibus, ruinis, omnique belli clade pervastarunt. Ulti sunt Pisani ea incendia, opulenti opidi Levanti in ora Ligustica suburbis à quinque & viginti illorum triremibus incensis; atque in reditu, insula portus Veneris frustra tentata, exscensione in littus portus Veneris facta, incendiis & nimis late grassati: ceterum ad-

ventum Morruelli Opicii Malaspinæ filii cum Vezani opidi incolis, qui sese atque opidum Genuensibus recenter dederant, non exspectandum rati, classe propere conscensa in sua se recipiunt. At Grillus nonnullos dies ad littora Rhodani commoratus Massiliam petit: in cujus urbis portu Pisanorum onerariam mercibus onustam capit; indeque profectus insulam Plumatiæ tenet. Ibi classe Pisanorum diu exspectata, eaque nusquam comparente, hyeme appetente, insula relicta, Tolonem appulit; ab eaque urbe solvens Genuam revertitur.

At Pisani discessu Genuensium liberum & à pugnae necessitate securum reditum cernentes, ostium fluminis egressi, datis velis altum petentes, quam cladem ab hominibus effugerant, eam à vi adversae coortae tempestatis acceperunt; tredecim triremibus demersis, remigioque undis hausto: sicque ille annus per utriusque populi clades extractus est: in quo Consules curas quoque domesticas amplexi summa omnia fecerunt, ut pacem inter irritatos civium animos conciliarent, quod quamquam assecuti non sunt, non tamen vanum omnino inceptum fuit, imminentibus turbis dilatis.

Sequitur annus ejus saeculi sexagesimus sextus, A.C. 1166. & foris in primis infestus; ac magnis non solum armorum, sed verborum quoque certaminibus inter Genuenses & Pisanos agitato; nec minus intestinis motibus turbulentus, ut curae Consulibus partiendae fuerint non magis in externa bella persequenda, quam in domestica mala cohibenda; quae alebat potentiorum civium ambitio. Nec diutius accensa odia differri potuerunt, quin hujus anni initio in apertum bellum erumperent; acri praelio commisso, in quo multi mortales ceciderunt, cum ne Nobiles quidem expertes pestis fuissent, Rubaldo Baratterio, Sigismundo Sigismundi, Luifello, Scotto, caesis. Cohibita tandem mala sunt Consulum sedula cura & diligentia; non quidem pace composita, sed tractatione armorum per inducias jurejurando pactas dilata, quae tamen brevi violatae sunt, jurisjurandi religione sprete; ardentibus odiis omnia humana & divina jura perfringentibus.

Interea quattuor triremes à Genuensibus Othone Caffaro praefecto in Provinciam Narbonensem missae sunt, quae portus in ea ora obsiderent, ne quid inde adversus civitatem moveretur; simul tutos commeatus & commercia onerariis facerent. Utrumque munus Caffarus strenue ac naviter per totam eam aetatem exsecutus est. Ad hoc certiores facti Consules, Pisanos Moguntini Antistitis impense illis faventis ope subnixos agere coepisse cum Caesare, ut is Sardiniam ipsis adjudicaret; ac propterea certamen juris imminere; tres triremes jurisjurandi atque antiqui imperii testandi causa in Sardiniam mittunt; Uberto Recalato uno ex Consulibus praefecto: cui incolae praefecturae Alborensis, dominatu Judicis tum soluti, honorifice excepto, ad obedientiam & debitam fidelitatem significandam, septingentas libras tributum nomine pependerunt. In officio quoque fuit Callaritanus Judex Petrus: qui Consule reverenter salutato, atque hospitio comiter accepto, jusjurandum fidelitatis in publico conventu civitati Genuensi & Archiepiscopo palam detulit, decem librarum millibus quadrima die solvi promissis, atque anniversario tributo centum librarum Reipublicae Genuensi, ac librae unius argenti puri Archiepiscopo constituto.

Per ea tempora colloquia de pace inter utrumque populum denuo inducta sunt: cujus causa, Pisanorum jussu, Abbas Gorgonis insulae nonnullis additis sociis Genuam venit: qui leni ac sub-

missa oratione, vultuque & habitu corporis fumam animi demissionem præferentes, civitatem circumuehentes, religionemque & divini Numinis metum consiliis miscentes, homines ad pacem hortabantur. Cum re variis disputationibus multum ac diu jactata nihil actum esset, Pisani duabus triremibus emissis detrimenta Genuensibus intulerunt. Re cognita Genuenses septem triremes in illos armant, Anfaldo Tanclero uno ex Consulibus præfecto; qui Iluam insulam tenuit: adversus quem totidem Pisanæ triremes è portu Plumbini exierunt, Genuensibusque non detrectantibus, prælium commissum est, quod adversum Genuensibus fuit; qui metu nonnullorum navigiorum à terra ad classem tendentium conspectorum sese in fugam duabus triremibus ab hoste captis coniecerunt. Non tam damni quam dedecoris accepti ira incensi Genuenses, quinque triremes è vestigio è portu emittunt, Balduino Guercio præfecto, quæ duabus in itinere sibi adjunctis triremibus, pro eo, ut conceptam maculam delerent, eam insuper ingenti flagitio cumularunt. Pisanas enim naves recenti victoria tumentes, diu ac multis in locis perquisitas tandem ad Vada Sabatia omni genere cladis Ligustica ora grassantes adeptæ haud cunctanter prælium committunt: quod cum initio Genuensibus secundum fuisset; ac naves Guercia & Galletta, valida impressione facta, duas ex hostilibus navibus suppressissent, tanta execrabilis factionum rabies mentes ceterorum præfectorum tenuit, ut decus inchoatæ victoriæ adversæ factionis hominibus invidentes, se pugnae subtraherent; spectatoresque alieni discriminis, nulla ope laborantibus ac circumfessis lata, victricibus navibus in media pugnae mole hosti capiendis proditis, turpi ipsi fugæ se mandantes Genuam pleni ignominiae reverterint.

Longe interea major certaminum moles in Aula Cæsaris inter utriusque populi Legatos erat accensa; cum Maguntinum Antistitem, cujus summa erat in omnibus rebus auctoritas, ingenti vi nummorum sibi devinxissent Pisani, qui à Cæsare in excelso folio sedente petierunt, pro jure suo, ut quoniam Maguntinus, Cæsaris nomine ejusque jussu, Sardiniam ipsis fiduciarum dedisset, pactamque pecuniam exegisset Maguntinus, ea ipse, ut promiserat Maguntinus, palam in conspectu Aulae decreto suo comprobaret; Genuensibusque, quorum Legati aderant, pro imperio mandaret, ut libera insula possessione Pisanis cederent; neque in res illius insulae sese de cetero interponerent: quorum oratione à Maguntino approbata, Cæsar secundum postulata pro tribunali decrevit. Hic Uberrus Spinula legationis princeps magnum ac memorabile animi magnitudinis, constantiae, singularis in patriam caritatis documentum edidit: veniam enim præfatus, si tanta injuria animum ad libere loquendum dedisset, injustum Cæsaris decretum non dubitavit appellare; negavitque præcipientem vocem, Maguntini suasu, à Cæsare, causâ non cognita, ipsisque non auditis, editam vim ac robur & nomen judicii obtinere; Genuensesque illi parituros, cujus judicio se subicere parati sint, si recte ac legitima judiciorum formula servata regatur: quod si in æquitate & religione Judicium parum præsidii experti fuerint, tum vero armis jus suum illos retenturos, & ad omnia ultima venturos; armatosque & dignitatis atque imperii juste parti vindices mortem fortiter appetituros: cum vellent congregarentur Pisani, ac res Genuenses attingerent: profecto temeritatem illos capite atque oculis ipsis luituros; ad quos illis effodiendos fatis animi & virum Genuensibus sit: longa deinde oratione, jam inde ab insula è manibus Christiani nominis hostium erepta, ac Musaito Rege capto, & ad Cæsarem à Genuen-

A sibus adducto, initio repetito, de jure Genuensium in rebus Sardiniae disputavit: exempla etiam & testimonia tam ab exteris quam Sardis ipsis summi imperii omnibus temporibus Genuensibus data protulit: in quibus duo illa commemoravit; vectigal scuti pane onusti, ac duorum vasorum vitreorum piperis plenorum, duorumque vini cadorum à regni Neapolitani mercatoribus & negotiatoribus, Sardiniam commerciorum causâ adeuntibus, vetustissimo ac perpetuo usurpato more offerri Genuensibus, recusantesque à Magistratibus Sardiniae cogi; & tributum casei, quantum plaustrum boum trahit, à Sardis ipsis quotannis die Resurrectionis festo Genuensibus pensum: quæ res certissima signa sunt summi ac vetusti Genuensium in Sardinia juris & dominatus. Libertate orationis ac veritate commotus Cæsar assurgens clara voce pronuntiavit, sibi numquam fuisse in animo jure suo quemquam privare, quæque secundum Pisanos decreverit, ea se inscium juris Genuensis, quod ipsi proponunt, decrevisse: causâ igitur ad judicium rejecta, duos Antistites Maguntinum & Rainaldum Archiepiscopum Legatos, hunc Genuam, illum Pisas mittit, qui in re præsentis pro communibus amicis ac disceptatoribus res componere studeant, dato mandato, ut Pisani Genuenses in duobus superioribus præliis à Pisanis eo anno captos ante omnia restituant. Hi, cum omnia summa fecissent; nihil aliud assecuti sunt, quam ut quini pacificatores utrimque eligerentur. Genuenses fuerunt Lanfrancus Piper, Gulielmus Marinus, Otho Cassarus, Philippus Lambertus, Simon Auria: ceterum ne ab ipsis quidem ulla ratione rerum componendarum inita, res in pristina mala redactæ sunt.

Insequenti igitur anno Consules, cum primum omnium à factionum capitibus jusjurandum in inducias exegissent, quattuor triremes ad tutelam Genuensium commerciorum, quæ tum in Provincia Narbonensi frequentissima erant, miserunt; D Rodoano Moro uno è Consulibus præfecto: qui totam eam æstatem & insequentem autumnum mandatum naviter implevit, quod præclaro exitu conclusit; foedere Republicæ utili cum Ildebrando Rege Aragonum ac Barchinonis Comite iuncto; quo Genuenses sese illi auxilio cum quattuor instructis triremibus assuturos obstrinxerunt in nonnullis opidis recuperandis; quæ à Comitè Fani Ægidii occupata sua sibi Aragonius vindicabat: cujus foederis observandi causâ, Rugerius Marabottus cum nonnullis navibus longis è vestigio in Provinciam Narbonensem navigavit: verum nullo cum fructu, cum Aragonius mutata voluntate à consiliis belli destitisset.

E Is annus conatibus potius & comminandis pugnâ, quam rebus gerendis traductus est: nam & Uberrus Spinula septem triremium præfectus, cum in novem Pisanas incidisset, sapienter certamen detrectavit, qui mox quattuor triremibus auctus, quas ducebat Rubaldus Bisaccia, Pisanas insequi coepit: à quibus pugnam avertere undecim Maurorum triremes, quæ in alto ipsum petentes apparuerunt, coactus est: quæ res spatium Pisanis dedit fugæ præripiendæ; cum Mauri ipsi quoque majore numero Genuensium terrioras retro vertissent, noxque superveniens tres classes diremisset; tenebris mutuum inter illas conspectum adimentibus. Aliæ item septem triremes in Provinciam Narbonensem adversus Pisanos missæ sunt, irritò ipsæ quoque incepto, Pisanis navibus nusquam inventis.

F Eodem anno Fridericus Cæsar, rebus Anconitanis compositis, infesto exercitu Romam petit, copiis Genuensibus suasu Maguntini repudiatis, exer-

exercituque, in eorum locum duplicato Pisanorum numero, suppleto: quæ res certum indicium fuit animi magis in Pisanos propendentis. Longe certioris alienationis exemplum ab eodem editum est; cum Roma reversus multos dies Pisis fuisset; neque Genuenses captivos contra ipsiusmet iussum à Pisanis retentos dimittendos curasset. Neque ullo modo silentio prætereundum fuit, Corsum Sigismundi unum ex Consulibus ad jus imperii usurpandum cum duabus triremibus in Sardiniam missum, qui totum autumnum & insequentem hyemem præfecturis Callaritanæ & Alborensi, cum magno populorum assensu, præfuit. Civitate externo ac visceribus hærente bello implicita, major tamen sensus erat intestinorum malorum cum sæpe per varias occasiones rixæ, & contentiones, prælia quoque inter factionum capita, quique illorum partes sequebantur, committerentur, quæ multorum sanguine ac cædibus dissidentibus stabant; magistratu sæpe frustra conato pacem inter irritatos animos componere; cum non modo consiliis, monitis, hortationibus ageret, sed severe in barbarum & motuum auctores animadverteret.

A.C. 1168. Quibus malis cum ureretur civitas, non tamen curæ exterarum rerum omittebantur; tredecim triremibus insequenti anno ejus sæculi sexagesimo octavo adversus Pisanos missis; quos undecim triremes ad res Genuenses vexandas armasse audiebatur: triremium Genuensium præfectus fuit Nicolaus Rodulfi vir acer ac strenuus: qui tumida Pisanorum verba factis retudit: qui sese Maris dominos apud Provinciæ Narbonensis incolas arroganti oratione jactarant; ac ne adspectum quidem suum ferre Genuenses posse impudenti mendacio affirmarant: eos adeptus Consul in fugam coniecit, quattuor illorum navibus captis. Genuensesque, hac Pisanorum vaniloquentia novos stimulos ad veteres aliorum causas addente, ut illos undique urgerent, Lucensibus persuaferunt, ut arma illis moverent; polliciti sese mari illos acerrimo bello detenturos. Morem impigre gesserunt Lucenses, tantæ ultro delatæ societatis spe inducti, ac non minoribus odiis Pisanos persequentes; armaque statim Pisanis intulerunt, Aslanum Pisanorum castellum prope ab ipsa urbe Pisis quattuor passuum millibus adorti: Pisanisque ad opem ferendam magno numero accurrentibus, acre prælium inter illos accensum est; quo Pisani victi sunt, multique eorum in potestatem Lucensium venerunt: quorum decem dignitate & nobilitate eminentes Genuensibus petentibus dono dederunt. Hi fuerunt Lambertus Major, Sicherius Gualandus, Bulgarinus Capranus, Covinus Baratulus, Guinellus, Ubertus Sicherius, Guilius Baldizonus, Guilius Hodierna, Sylvanus & Lambertus Battibaliani: quæ res Pisanos tandem induxit ad permutationem captivorum faciendam; quod antea diem semper recusarant: reddita igitur utrimque sunt, septingenta capita à Genuensibus, trecenta triginta tria à Pisanis.

Eodem quoque anno sexdecim triremes Genuæ armatæ sunt; quibus præfuit Ido Contardus unus ex Consulibus: quæ à triginta Pisanorum triremibus in fugam actæ, propinquo refugio in portum Genuensem pesti se eripuerunt. Pisani odium, quod in homines non potuerant, in tecta & regionem effuderunt; incendiis, ruinis, direptionibus totam oram passim vastantes.

Per idem tempus res sæpe antea frustra tentata haud meliore eventu repetita est; colloquiis de pace, auctoribus Genuensi, Pisano, Lucensi, sacris Antistitibus, illatis: qua de causâ Antistites ipsi in condictum locum convenerunt: quorum colloquiorum idem exitus, qui superiorum,

A fuit, cum inveteratum odium, ac memoria injuriarum, cupidoque illas ulciscendi, in exulceratis animis prævalerent tædio laborum & impensarum ac satietati cladum; quibus sese prævalidi populi mutuo conficiebant.

B Expetita est eodem quoque anno Genuensium amicitia à Siculo Rege, ad quem petentem tres Oratores missi sunt, Bellamutus unus ex Consulibus, Rogeronus Castellius, Amicus Grillus: qui, cum docuissent Regem, Genuenses eo foedere Cæsari alligatos, ut novis societatibus se implicare non possent, nulla re transacta Genuam reversi sunt. Æque sine ullo effectu fuerunt legationes; altera in Longobardiam ad finitimos populos pacem petentes, ac controversiis nonnullis subinde, ut sit, inter accolæ exortis, finem imponere cupientes; altera ad Cæsarem Constantinopolitanum missæ. Legati fuerunt ad illos Ubertus Cancellarius & Otho Judex; ad hunc Amicus à Myrto. Dispari eventu, qui Alexandriæ urbi ædificandæ præerant, pecuniarum subsidia à Genuensibus petierunt; haud contemnenda summa partim præfenti missa, partim mitti promissa.

C Sequens annus ejus sæculi sexagesimus nonus A.C. 1169. quinque Consules Reipublicæ gerendæ habuit, Anselmum Garrium, Ugonem Tornellum, Othonem Cassarum, Rugerium Marabottum, Nicolaum Rozam, viros probos & sapientes, quorum domi & foris multiplex ac perutilis opera Reipublicæ fuit: eorum enim virtute, consilio, sedula diligentia, domesticæ res lapsæ & ad interitum spectantes restitutæ sunt; civitasque ex turbulentissimo in tranquillum statum redacta est. Corrupta erant omnia populari licentia, audaciaque facinorosorum ac perditorum hominum, quæ, cum eam tam in urbe quam in circumjectis præfecturis factionum principes alerent, in immensum creverat. Ii metu Magistratuum soluti, nulla legum reverentia, nulloque pudore coercente, impotentes libidines vi ac ferro exercere, rapere, vulnerare, cædere, omni denique maleficiorum genere passim grassari, angustiis etiam viarum infestis, infesta itinera viatoribus facere, eos spoliare, male mulctare; nihil denique sacri aut prophani illis sanctum aut intactum esse; quin etiam facinorum & maleficiorum societates à multis coiri, conspirationesque & conjurationes in publicam quietem à populis ipsis publico consilio fieri. Igitur Consules majestatem imperii jam sperni coeptam, ad tantam audaciam coercendam sine viribus parum valituram intelligentes, delectam trecentorum armatorum manum stipendio conductam in urbem introducunt: qua fulti, munera inter se partiti, Anselmus Garrius & Otho Cassarus urbe exeuntes Lavaniam contendunt; Nicolaus Roza, & Rugerius Marabottus vallem Porciferæ petunt: qui in maleficos homines, quorum magnum numerum comprehenderunt, atrocia severitatis exempla ediderunt; cum alios summo supplicio affecissent; aliis manus, aliis pedes præcidissent; complures in vincula coniecissent; multos pecunia multassent; nonnullorum etiam, quorum audacia emicuerat, quique capita & auctores rerum miscendarum fuerant, domos incendissent: qua animadversionum severitate, ingenti Magistratus & legitimi imperii terrore injecto, malis tandem finem imposuerunt.

F Rebus igitur extra pomerium magna cum ipsorum laude brevi pacatis, curas ad urbana mala, quæ propiora ac majoris erant molis, convertunt; causasque dissidiorum investigantes, sex singularia certamina inter primarios cives indicta inveniunt. Cohorrerunt Consules tantam contentionem cives animo imbibisse, ut tamquam alienigenæ hostes, arma inter se intentare non dubitarent: sententiisque variatum est, cum nonnulli eam

eam facultatem ferro de controversiis decernendi faciendam censerent: quorum princeps ita discruisse dicitur: Optimum atque omnium primum fuerat, Patres, discordias inter cives non nasci; vel nascentium semina rectorum diligentia & vigilantia statim opprimi: quorum tamen ego nullam negligentiam accuso, quos Reipublica tempora excusant, continenti hoc Pisano bello ac cervicibus nostris imminenti curas nostras ab urbanis rebus respiciendis totas ad se avocante: secundum consilium est exortas extinguere: id, si monendo, hortando, preces consiliis miscendo assequi possumus; nihil est quod ad odiosa descendamus: ceterum quoniam hoc remedium toties vanum experti sumus; malumque gliscens, ac majores vires majusque robur in dies sumens, ad arma & seditiones, ac bellum civile spectat; quod in remediis postremum est, id nobis necessario est amplectendum: videant igitur ii, qui singularia certamina tantopere detestantur, quoniam res ad manus & ad ferrum deducenda est, utrum sit elegantius, universam civitatem, quam factionum harum principes secum trahunt, internecino bello inter se concurrere, omniaque cadibus, civium sanguine, incendiis, ruinis, aliisque belli cladibus impleri; an senum utrinque capite discrimine discordias ac civiles controversias decerni: neque video, cur nos a re non nova, atque a sapientibus ac claris viris saepe usurpata, ita abhorreamus: apud quos hoc consilium non modo non improbatum, sed in laude etiam positum fuisse accepimus, ut illis titulis insignes incedere Torquati & Corvini sibi gloria duxerint: neque Manlius singulare certamen in filio punivit, sed spretum imperium, ac disciplinam militarem perfractam morte filii sancivit: neque sapientissimi poeta, qui nos ad virtutem melius saepe, quam philosophorum disputationes informant, exempla sapientium ac clarorum heroum ad singulare certamen hostem provocantium nobis temere proposuerunt: quin etiam Longobardi lege hunc usum introduxerunt; quo exorientibus civilibus controversiis occurrendo, eorum Rempublicam minime discordiis civilibus atque intestinis bellis agitatam legimus. Dicat aliquis, Longobardorum igitur legem probas? ego vero illam non magis quam ceteri, probo: ceterum non video, cur non in alterutro necessario malo minimum sit eligendum: quamquam quid ego poetas, aut privatorum hominum facta confector, cum publicum consilium civitatis Romae, ejus, quae cum virtute bellica, tum vero multo magis consilio & sapientia, orbis terrarum imperium sibi adjunxit, possum proferre, cujus imperii initium a duello factum est; cum duobus populis, Albano & Romano, de Latii imperio inter se dimicantibus, rem singulari certamini ternorum utrinque civium decernendam commiserunt: quae via sanguini & cadibus duorum cognatorum populorum parcendi inita est, cur eadem via nos non cades ac sanguinem a civibus nostris abstinemus, non video; omnino non intelligo, cur duella non sint in bene constitutis civitatibus ac regnis ferenda, quae saepe necessaria sint: utique cum jus nostrum aliter obtinere non possumus, probationibus deficientibus; cum injurias nobis factas, pecunias creditas, depositam rem, neque testibus, neque tabulis ostendere possumus. Sapientes viros saepe dicentes audivi, videri sibi duellum Dei immortalis tribunal esse haud fallax; quia dubitandum non sit, quin unde jus stat, eo victoriam inclinet; cum hominum fides saepe in judiciis ferendis soleat aut gratia inflecti, aut potentia labefactari, aut pretio corrumpi, aut ignorantia labi, aut eloquentia perverti, aut litigantium astu circumveniri. At etiam nonnulli religionem nobis injiciunt, Christianam legem pace & concordia in primis contineri dicentibus; atque odia, contentiones, rixas, arma, bella abominari: quasi vero duella discordiarum & odiorum semina sint, ac non potius ad earum causas praecidendas introducta: nam a tractandis quidem armis justitia ac patriae libertatis defendenda causa usque adeo Christiana professio non abhorret; ut Moses ipse, quo interprete Deus ipse leges tulit, sanctique Reges divino monitu maxima susceperint & gesserint bella; nobisque ab Ecclesia, cujus auctoritate in divina voluntate inter-

pretanda omnibus piis standum est, adversus nominis Christiani hostes gladius porrigatur: vel hoc ipsum duellum non ne ab ipsis sacris Litteris comprobatur, splendido ad imitandum exemplo nobis proposito sanctissimi vatis Davidis, pro decore Israelitici populi singulari certamine cum Golia congressi? Quo igitur remedio ad injurias arcendas, & libertatem tuendam utimur, id cer ad pacem & concordiam civitatis constituendam non adhibeamus, non video; ac medicinam, quae nobis querenda ultro fuerat, eam divino consilio oblatam cur repudiemus, non intelligo.

Huic orationi unum ex iis, qui contrarium censebant, ita respondisse accepimus: Numquam longa oratio, magnusque verborum apparatus minorem materiam respondendi praebeuit, quam haec, quam modo audistis, Patres: nam & exempla, quae multa ex historiis & poetarum fabulis prolata sunt, uno verbo refelluntur: inter eos commissa fuisse certamina, qui non iisdem legibus subsisterent, neque eidem Magistratui parerent; cujus imperio ad legum praescriptum directo controversia inter ipsos orta tolleretur: ut nulla alia esset sui juris obtinendi, quam armorum via: quae arma si universis populis inter se conferre justis de causis semper licuit, cur non singulis hominibus, qui non eidem Magistratui subiaciuntur, omni alia ratione juris sui persequendi adempta, idem permittatur? & longa disputatio de jure duelli, cum exemplo omnium regnorum, & bene constitutarum civitatum, quae barbarum hunc morem feramque hanc immanitatem numquam susceperunt, redarguitur; tum multo magis ratione improbat: quid enim hoc aliud esset, quam fundamenta humana societatis plane tollere, ac civilem disciplinam funditus evertere, humanumque genus in eum statum redigere, in quo fuit ante leges latae, & civitates conditae, ac magistratus creati, tum cum viribus & robore corporis valentiores, imbecillioribus oppressis, ferro ac manu omnia ad se traherent, neque dum Magistratus essent, qui aequalia jura omnibus reddentes, ac suum cuique tribuentes, imbecilliores a potentiorum injuriis prohiberent? quos Magistratus quid deinde attinebit creare, aut quid leges ferre, quae hominibus vivendi norma sint, si controversiarum incidentium gladium judicem facimus? si manu ac vi jus nostrum nobis obtinendum est, atque injuria propulsanda sunt? Neque similitudo bellorum, quae si justa sunt, ne Ecclesia quidem prohibet, singulari certamini, quod inter eos, qui iisdem legibus tenentur, committitur, apta est: nam ne bella quidem inter populos ferenda essent, aut recte susciperentur, si populi inter se ambigentes unis iisdemque legibus tenerentur; atque eidem Principi parerent, qui populos illos pro imperio & potestate in officio continere posset; quique illorum controversias justitia norma terminaret: omnino vi & manu numquam agendum est; nisi cum ceteris omnibus viis jus nostrum obtinendi praclusis, bellum necessarium est. Duobus argumentis in primis nitebaris, alterum fuit hominum judicium saepe falsum esse; alterum probationibus interdum nos deficere: quasi vero gladii judicium semper verax sit: ac probationes non saepe fallaces: quae in re tu partes potius vatis, ac divinae voluntatis interpretis, quam Senatoris tibi assumpisti. Equidem confiteor omnia humana Dei numine regi; divinumque judicium nunquam fallax esse: ceterum divina consilia semper quidem recta; verum occulta mortalibus esse statim; nefariaque temeritatis esse certam & exploratam de illis notitiam sibi adsciscere; nisi si cuius menti Deus lumen suum praeulerit. Age igitur tu sacer scilicet vates nobis expone, quis tibi de caelo demissus Angelus enuntiavit, diversam esse in privatis ac singularibus certaminibus divini consilii rationem, atque in bel-
lis publicis, ac praeliis, quae inter nationes ac populos de summa rerum ferro decernentes committuntur: in quibus victoriam non semper penes eos, qui justiore causam tuentur, esse cernimus; sed saepe penes eos, qui plus viribus pollent: nisi forte justior erat causa Gothorum, Vandalorum & ceterarum barbararum gentium; cum nationibus innoxiiis a se victis, patriis & avitis sedibus exactis, ipsi illorum solum occupabant: aut juste

Saraceni Christianum orbem invadentes tantam illius partem occuparunt: quod igitur in maximis & publicis dimicationibus evenire usu compertum est, ut victoria non semper in justiore causam, sed in violentiorem inclinet; id cur in singularibus certaminibus non valeat, tibi docendum est: probationes vero gladii si haud fallaces sunt, jam nunc omnia nostra eorum erunt, qui plus viribus corporis possunt: commentam enim & confictam debiti causam proponentes, sese illam armis planam facturos dicant. Nugatoria ista sunt, Patres, ac barbara stoliditatis inventa, ac ne virtutis quidem essendi, atque experiendi causa, uter bello sit melior, (id quod nostra aetate à multis saepe fit) duellum inter cives suos sapientes civitates permiserunt; quam occasionem bella externa continentem nobis praebent: cujus rei multa in historiis Veterum exempla produntur. Ego, Patres, barbarum & abominandum morem respuendum omnino censeo: exortasque inter cives nostros discordiarum causas severa legum & judiciorum via discutendas.

Cum facile vicisset sententia, quae duellum prohibebat, Consules intelligentes cupiditatum ardorem contra tendendo magis insuper incendi, indulgendo remitti de consilii sententia, Archiepiscopo assentiente, consiliisque quemadmodum resducenda esset cum illo compositis, edicto pronuciari jubent, placere Consulibus ac Senatui, ut controversiae ferro singulari certamine dirimantur, certo die certamini praestituto; simulataeque sententiae se retinentissimos fingentes, adversus propinquorum & cognatorum preces, ac conjugum & parvorum natorum lacrymas eos ab ea mente deducere studentium, invicti steterunt: igitur cum conditus dies venisset; Consules universum civitatis consilium in aulam aedium Archiepiscopi convocant; quo sacrum quoque ordinem Archiepiscopus coegit, infulis ac sacro vestitu indutum, cum augustissimis Christianae militiae signis, crucibus, cineribus divi Praecursoris in conspectu ingredientium collocatis: quae universa magnam adspicientibus offundere religionem possent. Medius inter Consules erat Archiepiscopus; quem non modo senectus & dignitas, sed sanctitas morum, ac contestata pietas, omnisque aetas continenter acta, ad hoc fama prudentiae, venerabilem faciebant: is armatos in consilium introductos ita ad pacem & concordiam adhortatus dicitur: *Dubium mihi initium orationis facitis, vos, qui huc ad controversias vestras ferro decernendas armati convenistis: quos quo nomine appellem, nescio: filios ne vocem, qui fratres vestros hostes appellando, Deum ipsum, ac me ejus administrum & procuratorem parentem repudiatis? ratio enim connexi facit, ut qui aliquem fratrem suum non agnoscit, idem eum, à quo ille ortus est, parentem suum neget: cives ne Genuenses nominem, qui hostiles animos in civitatem hanc gerentes eam tamquam hostium urbem evertere properatis, patrum ac majorum vestrorum dissimiles? illi quae arma in Christiani nominis hostes, in imperium late proferendum, in nomen Genuense clarum apud externos faciendum, per summam pietatis commendationem, ac per summum decus perpetuo exercuerunt, ea vos in vestram, conjugum, liberorum vestrorum, communis patriae perniciem vertitis, divinorum beneficiorum immemores, atque adversus Deum immortalem, unigenitumque ejus Filium Christum Dominum ingrati: qui quem sanguinem à vobis à tetra servitute sanguine suo redemptis pro suo jure adversus nominis sui hostes reposcit, cum vos in filiorum à se adoptatorum ac fratrum vestrorum exitium profundere pulchrum censeatis: quod igitur aliud nomen mihi reliquistis, quo vos compellem; quam illud, quod maxime omnium abominandum est; ut vos ipsius perpetui ac teterrimi hostis vestri diaboli filios dicam? qui parens ac sator discordiarum est; qui quae tantum istum furorē obacatis mentibus vestris objecit; ad quem, militia, in quam in sacro baptismo nomen*

A dedistis, ejurata, transfugistis: parentem igitur vestrum Deum immortalem ejusque Filium vos ad sempiternam beatitudinem perducere cupientem, atque ideo ad pacem, concordiam, mutuam caritatem, injuriasque remittendas hortantem non auditis? execrandum hostem vestrum, vosque ad tartara sempiternosque cruciatus secum trahere studentem, vosque ad odia, rixas, contentiones, discordias, injurias ulciscendas instigantem auditis? at enim ingentium premiorum proposita spes vos transversos agit, atque adversus divina monita contumaces, & obstinatos animos vestros facit: totum immo contra est: pravumque consilium in utramque fortunam luctuosum & detestabile est: in quo victo insania sua sanguine atque interitu sit luenda; victor animam fratris sanguine commaculatam sempiternis suppliciis obstringat; totamque aetatem infestam sit habiturus, cognatorum ac propinquorum à se interempti, factionisque adversa hominum, quorum numerus infinitus est, odiis & insidiis obnoxiam: respicite aliquando, filii: (hoc enim me nomine vel in vos immerentes abuti paternus me meus in vos amor cogit) & vos, liberos, conjuges vestras, quibus orbitatem paratis, communem patriam, cui exitium acceleratis, tandem respicite: dextraeque, quas in mutuam cadem armastis, easdem armis abjectis in mutuum complexum vertite: initium tanti decoris ab iis in primis fieri aequum est, qui primum in factionibus locum obtinent:

C quid igitur cessatis, Fulco Castelli atque Orlande Advocat, familiarum vestrarum, quae capita factionum reliquos secum trahunt, principes? quin injurias atque omnes odiorum causas religioni, pietati, patriae, liberorum vestrorum saluti condonantes vos complectimini? ac quemadmodum initium scindendi unanimem civitatem à vobis familiisque vestris ortum est, ita exemplum eam in pristinam concordiam redigendi iidem vos ceteris praestis? Operae pretium est, majorum nostrorum pietatem, atque illius saeculi simplicitatem & candorem considerare: apta enim & pia oratione ita animi permulsi sunt; ut omnium injuriarum ac praeteriti odii obliti, abjectis armis, omnique animorum contentione deposita, sese factionum capita complexi sint; sicque pax & concordia constituta est; atque, sine urbanis motibus ac turbis imposito, civitas in tranquillum redacta.

Rebus urbanis pacatis externae curae successerunt: ac primum omnium quattuor triremes in Provinciam Narbonensem missae sunt; quae com meatibus & commerciis Genuensium praesidio essent, quibus praefectus est Nicolaus Roza unus ex Consulibus: cujus opera omnis posita est in nonnullis Pisanorum onerariis comburendis: longe fructuosius fuit subsidium quingentorum armatorum Lucensibus petentibus pro jure veteris amicitiae submissum; quod duxit Rugerius Marabottus, unus ex Consulibus: qui se, turri ad littus sita, quam Lucenses tenebant, praesidio prius firmata, cum Lucensibus copiis conjunxit. Cum uterque exercitus ad pugnam instructus staret, Guido Mercatus Pisanorum Consul extra aciem procedens Genuensem Consulem appellat; negatque per Pisanos fieri, quo minus de pace agatur, si idem sit Genuensibus & Lucensibus animus; sperare se, res honestis conditionibus atque utrique parti aptis componi posse. Non minus se pacis cupidos Genuenses & Lucenses respondent; sicque omnia pugna, colloquia de componendis rebus ac de pace inter tres populos firmanda inducta sunt: resque diu magnis disputationum certaminibus jactata est sine ullo effectu, Pisanis eadem ingeni mobilitate, eodemque astu spem pacis eludentibus, quo animos hominum ad illam erexerant.

Interea octo triremes Genua iisdem Lucensibus subsidio missae sunt, Anselmo Garrio Consule praefecto, qui consiliis pacis abruptis, cum remigio atque omni nautica turba ad Capalbium opidum in terram egressus maritima Pisanorum Capalbio

palbio circumjecta late populatus est: prædaque ingenti acta. Genuam reversus est: detrimento accepto Pisani commoti, sex triremes in Provinciam Narbonensem mittunt; quæ parem cladem Genuensibus reddant: adversus eas Genuenses nihil cunctati septem triremes armant; Othonemque Cassarum unum ex Consulibus illis præficiunt, qui littora Provinciæ tenuit, mercatoribusque Genuensibus, qui magno numero Forum Julium ad mercatum convenerant, persuadet, ut secum classem conscendant: morem gesserunt nonnulli: quo præsidio navibus firmatis Pisanam classem quærere institit: quam adeptus, commisso prælioprofligat; tribus triremibus captis, quas trahens, Genuam reversus ovans portum subiit: alteræ item totidem triremes ab utroque populo in eandem oram, iisdem de causis, missæ sunt: Genuensiumque præfectus fuit Ingo Tornellus: qui, cum duos menses ad illud littus, nullo operæ pretio factò, in ancoris stetisset, Genuam reversus, in Sardiniam cum duabus triremibus missus est ad res, quas populus Genuensis in ea insula possidebat, firmandas. Corrogare per ea tempora solebant Consules magistratu abeuntes à civibus senos obolos in singulas libras, ad publicum æs alienum dissolvendum: isque mos perpetuus fere & anniversarius erat: quæ summa cum non satis esset ad Rempublicam eo annolibendam, potiusque onus augeretur, vectigal ad urbes Saonam & Naulum extensum est: quæ civitates se urbanis regionibus contribuerant, jure civitatis donatæ.

A. C. 1170. Prima cura Consulium insequentis anni ejus sæculi septuagesimi fuit pacem superiore anno inter factiones initam stabilire; ac, si quæ odiorum fibræ residuæ in animis essent, eas penitus extirpare, ac curare ut de injuriis factis civilibus & amicabilibus modis inter offensos satisfaceret: omnesque causas tollere, quæ unanimes distrahere inter se possent: quod negotium datum est providis & in animis hominum leniter tractandis habili ingenio viris, Nicolao Embriaco, Gulielmo Burono, Baldizoni Ufufmario, Lanfranco Piperi: ipsique Consules curas omnes ea sollicitudine solutas in res bellicas & externas intendunt. Initium operum fuit, Comites Lavanix, qui sæpe prius moniti, ad arcem Frascarii ab illis furto occupatam, Passanis Proceribus, qui illam à Republica multos jam annos fiduciarium habebant, restituendam comminatione armorum tandem compulsi sunt; cum Genuam accedentes veniam supplices à Consulibus impetrassent: ab iisdem quoque Consulibus sex triremes adversus Pisanos armatæ sunt, in tutelam & præsidium commerciorum & rerum provincialium, Pisanorum assiduus molestiis infestarum: cui classi, tribus additis triremibus, una Rapallensium, altera Saonensium, tertia Naulensium, Ubertus Recalatus unus ex Consulibus præfectus est: qui, conatibus Pisanorum commercia ab ea Provincia Genuensibus claudere studentium vanis redditis, ante totum mensem conversum Genuam rediit: cui successit in idem negotium Oggerius Ventus cum quattuor triremibus, à civitate armatis: quibus additæ sunt duæ Trepedicini triremes, ac duæ, altera à Nicænsibus, altera à Fani Romuli incolis armatæ: qui mandatum munus ipse quoque naviter executus est: Consulesque, ut par Pisanis referrent, Trepedicinum magni in rebus maritimis usus ac nominis, Pisanis, à quibus oriundus erat, capitali odio infensum, cum duabus ipsius triremibus, ac duabus portus Veneris illis additis, miserunt ad Pisanorum res totam eam æstatem acri & continenti bello vexandas: is triremem Pisanorum cepit, duosque Pisanorum Consules; atque una cum illis magnum primariorum civium numerum Genuam captivos duxit. Nec segnis opera Ricii Passani Proceris fuit, qui triremi Rapallensi privatæ triremi suæ adjuncta

A triremem Pisanorum cepit, paulloque post, societate conjuncta cum duabus triremibus Portusvenerensium, una Vernatiensium, una Sigestrinorum, tribus Rapallensibus, haud levibus detrimentis per totam æstatem res Pisanorum affecit: Consulesque octo triremes singulas à singulis urbis regionibus collatas, adversus eundem perpetuum hostem tertium miserunt; quæ cum Pisanorum classe congressæ unam illorum triremem reliquis fugatis ceperunt. Accensum tum, ut cum maxime, erat inter Pisanos & Lucenses bellum, qui signis collatis dimicarunt; victoriæque, cum magna utriusque populi hominum strage, penes Pisanos tandem fuit, qui arcem Motroni ad littus sitam demoliti sunt, cum audissent Genuæ ad eam recuperandam comparari.

B Insignis is annus splendida Cæsaris Constantinopolitani legatione fuit: cujus duo Oratores cum aliquamdiu in Aula Pontificis fuissent, triremibus illorum accersitu ad illos missis, Genuam vecti sunt: honorifice quidem accepti sunt; ceterum nulla res cum illis transacta est, cum Genuenses sex & quinquaginta perperorum millia ex pacto superioribus annis factò debita à Cæsare missa non accepissent; ab Amico & Myrto ex Constantinopolitana legatione reverso docti, orationem Legatorum à mandatis Cæsaris discrepare: qui idem Amicus ad Cæsarem remissus est; sperantibus Genuensibus omnia illo internuncio exploratiora ipsis fore, conventaque stabiliora: eodemque anno Otho Cæsar à legatione Marochi, quæ Reipublicæ non omnino inutilis fuit, rediit; multis, quorum causa ierat, ab eo Rege impetratis: adeo in procul remotas Provincias Genuensium curæ extendebantur.

C Missa sunt anno sequenti ejus sæculi septuagesimo uno Lucensibus prævalida terrestrium copiarum auxilia; ut quam acerrimo bello Pisanos distantes illorum curas à Genuensibus petendis ad sua tutanda averterent; nullamque rationem illos urgendi omittentes. Quoniam Pisani Turrim Motroni, quam invitis hostibus tenere non poterant, diruerant; ædificata est à Genuensibus & Lucensibus communibus impensis altera turris in paludibus maritimis in finibus Pisanorum, in eo loco, qui Viaregia appellatur: eodem anno duæ quoque Rapallensium triremes haud mediocria damna Pisanis intulerunt.

D Venit eo anno Genuam Christianus Archiepiscopus Maguntinus, Germaniæ Cancellarius, Cæsaris Legatus per totam Italiam: qui à Genuensibus perhonorifice exceptus, incolumis ad urbem Lucam deductus est, Longobardis invitis; qui omnes fere eo tempore à Cæsare defecerant: quam rem illi ita ægre tulerunt, ut crudele consilium ceperint de Genuensibus fame suffocandis, com meatibus ex Longobardia illis interclusis: qua de causa tanta annonæ inopia laboratum est, ut tritici medimnum decem aureis nummis esset. Eo quoque anno Barisso Sardinæ Rex, cum octo annos Genuæ tamquam in custodia fuisset, tandem à quattuor Genuensibus triremibus, quibus præfuit Otho Cæsar unus ex Consulibus, in Sardiniam trajectus est; magna primariorum civium caterva honoris causa illum comitante.

E Insequentis anno ejus sæculi septuagesimo altero Consules, Legatis Senas missis, quam in urbem Archiepiscopus Cæsaris Legatus se contulerat, cum in eam omnes Italiæ Proceres partes Cæsarianas sequentes convenissent, summa contentione cum Legato egerunt, ut auctoritate sua induceret Pisanos ad Lucenses, quos captivos tenebant, restituendos; nonnulla pecuniæ summa ea de causa à Lucensibus ipsis Legato promissa: summa omnia fecit Legatus; nihil tamen mo-

vit Pisanos: quibus iratus Legatus, cum obauctoritatem suam ab illis spretam, tum quod in institutis consiliis de pace inter Genuenses, Pisanos, Lucenses componenda parum sincera fide illos agere cognovisset; ac per illos illorumque retractationes fieri, quo minus pax conveniret; omnia jura eximia, quibus à Cæsare donati fuerant, illis abrogavit, Sardinia nominatim illis abjudicata, illorumque bona, nec non civitatem ipsam Cæsariano edicto publicavit: ceterum paullo post colloquiis de pace inter tres populos integratis, quibus accesserunt Florentini, milleni cives ex singulis tribus civitatibus in illam jurarunt: verum inchoatam rem turbarunt clandestina consilia, quæ Pisani & Florentini conjunxerant, de Fano Miniati Etruriæ opido furto invadendo emanata: quæ audacia fraude conjuncta adeo Legatum offendit, ut petentibus Genuensibus, unum ex Pisanorum Consulibus, quem captum secum habebat, in manus Lucensium dederit: quem illi carcere incluserunt.

Multæ parvæ expeditiones eo anno tam ab ipsa civitate quam à compluribus Orientalis oræ opidis in Pisanos factæ sunt, ad Pisanorum res multifariam carpendas: quas singulas persequi non necesse habui: duas illas memorabiliores attingam: altera fuit septem triremium, quæ præfectum habuit Corsum Sigismundi unum ex Consulibus; qui Arnun fluvium ingressus, circumjectam regionem ferro atque igne late vastavit; indeque Planasiam petens, omnia Pisanorum ædificia disturbavit & incendit: altera sex triremium, Rubaldo Bisaccia Consule præfecto adversus tres Pisanorum triremes, quæ nonnullas Genuensium onerarias magni pretii mercibus onustas ceperunt; quas noctu ad littora Sardiniae nihil tale opinantes adeptæ sine ullo certamine captas Genuam ovantes traxerunt. At Pisani tot aliis super alia maritimis damnis debilitati, ut Genuensium vires multipliciter distractas infirmiores facerent, Opicium Malaspinam, qui fiduciarium ditionem ab Archiepiscopo Genuensi obtinebat, ejusque filium Morruellum ditioni Genuensi subjunctum, spe præmiorum addeficiendum, armaque Genuensibus inferenda inducunt: qui ex agro Lunensi moventes incolisque Passani & Lavaniae sibi adjunctis, cum tribus peditum millibus ac centum quinquaginta equitibus ad opida Clavarum & Sigestrum tentanda accedunt: ceterum repulsi à copiis Genuensibus, quas illi è regionibus Montisferacis, Gavii, Boschi, Ponsoni corrogant, pleni dedecoris & ignominiae in sua reverterunt.

Nihil superioris anni adversis rebus infracti Malaspinæ, viribus auctis, vallisque Airanæ incolis concitatis, iisdem Pisanis instigantibus, anno insequenti ejus sæculi septuagesimo tertio è Lucensi agro moventes, Rapallum usque populabundi perrexerunt: ceterum nihilominus irritum inceptum fuit; cum Consules loca conatibus hostis opportuna præfidiis firmassent: quin etiam hi Malaspinarum motus civitati in bonum verterunt: diligentiam enim Consulum excitavit ad curam terrestri militiæ jam diu Genuæ neglectæ repetendam, centum cataphractis equitibus ad subita hostilium motuum institutis: cum quibus, ac simul cum non exiguo peditum numero, Ingo Flessius unum ex Consulibus urbe exiens, arcem Montemleonem adversus hostium irruptiones in agro Mone-liano ædificavit. Rebus terrestribus constitutis, in maritimas curæ versæ, binis expeditionibus eo anno factis: primæ, quæ fuit octo triremium, præfectumque habuit Lanfrancum Albericum, opus præcipuum fuit, Sardiniae res firmare, ac Judices in officio & in fide erga populum Genuensem continere: secundæ, cui præfuerunt Ingo Flessius &

A Otho Cæsar, haud sane ullum operæ pretium factum traditur, nullis Pisanis navibus usquam obviis factis.

Iterum eo anno Malaspinæ ad bellum confurxerunt, arcem Montisleonis eo anno ædificatam adorti: adversus quos egregia trecentorum sexaginta equitum ala, ac valida mille quingentorum peditum manus ab urbe profectæ sunt: quas non expectandas Malaspinæ rati, castris retro motis in sua se receperunt: at Genuenses porro ire pergentes, ad Passanum vicum contendunt; cujus incolæ Malaspinarum suasu à Genuensibus defecerant: arcemque octo dierum oppugnatione captam diruunt. Duplex tributum eo anno à civibus exactum Annales tradunt, tribus obolis in singulas libras initio consulatus, novem sub finem exactis, cum non ferre plus sex erogari mos esset.

Qui sequitur annus ejus sæculi septuagesimus quartus insignis est, pace cum Gulielmo Siciliae Rege facta; sineque veteribus controversiis cum magna publica utilitate imposito. Qua de causa Othobonus Albericus unus ex Consulibus, bis eo anno Orator ad Regem missus est. Compositæ quoque res sunt cum Malaspinis, Opicio Marchione Morruelloque ejus filio in amicitiam receptis, arce Petra coperta ac podio Ericis de illis emptis; quæ ambo è vestigio solo æquata sunt.

Annus ejus sæculi septuagesimus quintus latus civitati fuit, re sæpe frustra tentata tandem ad effectum perducta; ac perhonorifica nomini Genuensi pace tandem inter Genuenses, Pisanos, Florentinos, Lucenses, Friderici Cæsaris auctoritate, ipsoque disceptatore, Papiæ composita: cum Legatos eorum populorum ad se in eam urbem evocasset: in conditionibus enim pacis, dimidia Sardiniae pars, quæ res utrique populo arma induerat, Genuensibus cessit; quam etiam Cæsar pro jure summi imperii illis ratam fecit, atque ita finis molesto bello impositus est: quod duo hi populi latrocinii magis quam justii belli more per multos annos exercuerunt, mutuis ac parvis damnis sese continenter carpentes, cum numquam totis viribus, signisque collatis concursum sit, neque universæ pugnae fortuna tentata.

Insequentes undecim anni nihil sane memorabile habent; præter amicitiam & foedus cum Saladino in has condiciones initum; ut ille arma & bellum à Genuensibus abstinere, neque illorum Syriacas res attingeret; modo Genuenses nullam adversus illum societatem jungerent: & adventum ad urbem Friderici cum Beatrice uxore, atque Henrico filio, qui ei in imperium & in regnum Siculum successit: & adventum Regis Francorum filiae Alexio Græci Cæsaris filio in matrimonium datæ Constantinopolim petentis. Utrique magnifice & apparate excepti sunt.

Otium per totum hoc tempus ab externis molestiis & domesticis motibus fuit: quod tamen non nihil turbarunt in Occidentali ora incolæ Linguiliæ, in Orientali Vernatienses, latrocinii atque excursionibus itinera & commercia infesta facientes: isque exitus utriusque molestiæ fuit, ut Nicæenses in ditionem populi Genuensis se tradiderint, atque imperia jurarint: Vernatiensium, cum illi sæpe moniti finem latrociniorum non facerent, arx & opidum ipsum urbanis copiis eo missis expugnatum sit, populusque jugum acceperit.

Ceterum majore motu quies civitatis intra urbem turbanti cœpta est: in qua vehementis ac præservidi ingenii vir Fulco Castellius immodica ambitione sua discordias civiles multos jam annos depositas excitavit, atque intestina civitatis mala integravit: qui gentis suæ Castelliae caput, quæ tum opibus & potentia ceteras longe antecellebat, cum æquabilitatem juris cum ceteris civibus ferre non posset,

ad primum locum civitatis tendens, res miscendi continenter causas quærebat: cui cum Advocati, dignitate ipsi quoque & opibus præstantes, diu restitissent, pacemque inter illos Archiepiscopo auctore, ut supra dictum est, firmatam sincera fide colentes obfistere destitissent; Gens à Curte, clientelis ipsa quoque & opibus valida, sese illi opponere non dubitavit, compluribus nobilibus familiis studiis cum illis adversus Castelliorum superbiam impotentemque libidinem conjunctis: occultæ igitur inter illos similtates tandem ad apertas contentiones & ad manus ac ferrum venerunt; cum Ventorum gens Fulconi se adjunxisset: præliumque inter illos in suburbiis commissum est, quod utrisque multo sanguine ac cædibus stetit: processissetque res ulterius, nisi prudentia & vigilantia Consulium initia motuum oppressisset.

A. C. 1187. Annus qui sequitur ejus sæculi octogesimus septimus, domi forisque infestus fuit: nam domi semina discordiarum, animis civium insidentia, diu compressa, tandem prodierunt, Angelerio à Mari uno ex Consulibus à nonnullis facinorosis hominibus, quorum caput ac dux fuit Lanfrancus Turca, obtruncato. Idem casus fuit Rubaldi Porcelli & Opicii Leccavelæ præstantium hominum interfectorum: quæ cædes magnos animorum motus fecerunt: resque ad tumultus & ad arma haud dubie spectabat; nisi provida diligentia Consulium periculum imminens discussisset, severe in maleficos animadvertendo: quos ipsi magnis optimatum ac bonorum catervis fulti partim comprehensos ultimo supplicio affecerunt, partim perpetuo exilio multarunt, illorum domibus ac turribus solo æquat.

At in Sardinia Pisani, foedere ac jurejurando violato, Genuenses mercatores ex præfectura Callaritana exegerunt rebus suis spoliatos. Ne tantam injuriam tantamque perfidiam inultam sinerent Genuenses, magnis terrestribus & pedestribus coactis copiis Pisas petunt: ceterum, precibus Henrici Regis Caesaris filii, promittentis Pisanos de injuriis satisfacturos, mitigati cum portum Veneris usque perrexissent, terrestre quidem iter retro repetierunt. Maritima classis, Fulcone Castellio præfecto, circumiens non exigua detrimenta Pisanis intulit: atque in Corsica arcem Bonifacii à Pisanis ædificatam expugnavit, ac solo æquavit. Infelix is annus Christiano nomini fuit: Christianis Principibus in Syria ingenti prælio à Saladino victis; Hierosolymitanoque Rege, Magistro Templariorum, ac magno primariorum Procerum numero capto, ipsaque sacra urbe, ac ceteris, quæ Christiani in Syria tenebant, præter Tripolim, Tyrum, Antiochiam, occupatis.

A. C. 1188. Insequenti anno ejus sæculi octogesimo octavo pax cum Pisanis renovata est, Clemente tertio Romano Pontifice auctore; qui arbiter & disceptator controversiarum assumptus, pro communi parente res composuit. Urbanæ quoque discordiæ sublatae sunt; pace à Petro Cardinali Pontificio Legato inter Lanfrancum à Turri ac Bulbonosum illiusque consortes composita. Eo anno mortuus est Hugo

A Archiepiscopus: qua de causa, ex veteri more & instituto, sacer Ordo, ac Consules, & Senatus, ceterique civitatis Magistratus convenerunt: qui conjuncti negotium ad Abbates divi Syri, divi Stephani, divi Benigni; item ad præpositos S. Mariæ à Vineis, S. Donati, S. Mariæ à Castello, S. Damiani; nec non & ad collegium Canonorum, magistrumque Anselmum, Augustinum Presbyterum, & Rusticum Diaconum rejecerunt: qui congregati Bonifacium Laurentianæ ædis Archidiaconum in demortui locum suffecerunt.

B Initio insequentis anni ejus sæculi octogesimi noni discordiæ civiles ad modicum tempus consopitæ exsurrexerunt, à duabus præpotentibus Voltarum & Ventorum familiis inter se discordibus excitatæ; atque acerbis præliis in multis urbis locis sæpe exercitæ. Pacatæ res sunt sedula opera & diligentia Consulium.

C Interea Christiani Principes sese ad bellum facrum, omnibus regnorum suorum viribus connisi, comparabant: qua de causa missi à Genuensibus duo Legati sunt, Ansaldo Bufferius & Henricus Detefalvus ad Reges Gallorum & Anglorum: qui fortem ac fidelem eandemque, quam primo bello experti essent, populi Genuensis operam pollicerentur, nulla in re à Majorum contestata pietate ac religione degeneraturi: ceterum tanta fuit Dominicæ conjugis Marchionis Ancisæ cum singulari amentia conjuncta audacia; ut Legatos per fines suos iter facientes retinere non dubitavit, quos nisi pretio redemptos se dimissuram negaret: destitit mox incepto, Legatosque dimisit, apparatus Genuensium deterrita. Regum itineri prævertit Friderici Caesaris diligentia, & incensum studium: qui in Syriam ingentibus copiis, per varia discrimina multaue certamina iter morantia tandem pervenit, infelici incepto, in transitu Selephii fluvii, quem posteriores flumen ferri appellarunt, imbris tumentis in finibus Antiochenis undis haustus, anno imperii trigesimo septimo: vir bellicosus ac claris virtutibus memorabilis, nisi ingentem labem ejus laudibus crudelitatis fama, ac sacrosancti Pontificis insectatio adaspergeret.

D At Genuenses nihil cunctati haud contemnendam classem in Syriam mittunt, Guidone Spinula uno ex Consulibus præfecto: cum quo navigarunt, Nicolaus Embriacus, Fulco Castellius, Simon Auria, Balduinus Guercius, Spezzapetra, Rocius Volta, cum ingenti equitum & peditum numero. Hi cum littora Syriæ tenuissent, sese cum reliquo exercitu urbem Ptolemaida, quam posteriores Aconem vocarunt, obsidente conjungunt. Inter principes causas deditiois numerantur bellicæ machinæ à Genuensibus allatæ, & fabricatæ.

E Insequenti anno ejus sæculi nonagesimo consiliis Christianorum ad bellum destinatis, Philippus Gallus Rex, cum quinque & viginti dies Genuæ fuisset, ipseque & Ricardus Angliæ Rex, qui ipse quoque Genuam venerat, neque plus diem unum subsisterat, capita contulissent, magna Principum & primariorum Procerum caterva comitante, classem consensu in Syriam iter tendit.

V B E R T I F O L I E T A E,
PATRICII GENVENSIS,
HISTORIAE GENVENSIVM
L I B E R I I I.



Mic annus insignis in primis est forma Reipublicæ mutata, ac regimine civitatis à Consulibus ad peregrinum Prætorem translato. Ejus rei causâ talis fuit. Creverat simul cum opibus civitatis, atque incolarum numero, quæ utraque in dies augebantur, civium ambitio, multis ex primariis familiis ad primum locum in procuratione Reipublicæ, quæ jam splendida esse cœperat, contententibus: quæ res in factiones ac contraria studia civitatem sciderat, civiumque inter se odia in dies magis accendebat, quæ primo verborum contentionibus & altercationibus exercita, jam ferro & sanguine decerni cœperant. Huic malo, ceteris vanis expertis, unum illud remedium complures boni & quietis amantes cives statuebant, si causâ præcideretur, Reipublicæ procuratione à civibus ad peregrinum Prætorem translata, exemplo multarum Italiæ urbium, quæ hunc morem induxerant. Mentio igitur de ea re sensim injecta, varios sermones, variasque sententias, prout cujusque erat ingenium, in privatis cœtibus præbuit, resque in contentionibus vulgo diu jactata tandem ad publicum civitatis consilium deducta est, in quo non minus sententiis est certatum: itaque, qui à Prætore abhorrebant, ita disputabant: Sapientibus, & gravibus, ac constantia retinentibus viris ita omnis novitas semper invisa & suspecta fuit, Patres; ut etiam ampla & speciosa consilia, & spem majorum opum, majorisque ingenii facientia repudiarent, si eundem statum rerum salubrem multos annos expertum mutarent. Nos contra ita novitatis amantes sumus, ut degener, ac probrosum consilium, ac speciem servitutis preferens, atque adeo servitutem ipsam inducens amplectamur: quæ res omnium maxime abominabilis semper fuit: ad quod consilium nullus umquam populus nisi diuturnitate malorum confectus, extremaque necessitate subactus, cum nulla esset alia interitus vitandi via, descendit. Nondum id vitii res Genuenses habent; neque ad extrema hac ventum est. Quam vero est indignum, cum populum, qui externa imperia molitur, quique exteras nationes ac magnas insulas ditioni suæ jam subjungere cœperit, domi suæ ipsum alienigenæ servire? Neque animadvertunt homines nomen Genuense maximis regnis formidolosum ac venerabile contemptum posthac omnibus & despectum fore. Magno igitur civitati concordia statuta est, servitute ipsa, cum multa alia ejus constituenda remedia iniri possint, vel judiciis severe faciendis, audaciaque perditorum hominum suppliciorum metu coercenda; vel lapsa disciplina salubribus legibus restituenda, ac formanda; vel urbano otio lascivientes animos externis bellis implicando. Est vero simile hoc consilium, ac si quis imperitus gubernator periculum imminens naufragii nulla alia arte discutere sciat, quam navi ipsa submergenda. Vel sola constantia retinenda causâ deberet à turpi consilio nos revocare, ne tam levi re ac medicatu perfacili regimen Consulium per tercentum circiter annos salubre expertum mutasse videamur. His atque ejusmodi multis cum in eam sententiam, qui Præto-

rem repudiabant, disputarent; contra, qui illum adfisciebant, differebant: Quorum princeps, *Ne ego quidem, inquit, minus servitutem abominor, Patres, quæ ultimum malorum est; neque tanto pretio concordiam civitatis emendam censeo: ceterum salubri consilio non civitas in servitutem redigitur, sed potius servitutis periculo liberatur discordiarum civilium causis, quæ civitatibus servitutem accelerare solent, præcis: cui malo, antequam illud majores vires assumat, ac tempore insanabile fiat, statim in ipso initio occurrendum est: quo invidioso servitutis nomine ac nulla ratione rei, quæ agitur, congruenti nonnulli abutuntur, qui novam Reipublicæ formam detestando vocabulo appellent: neque enim Dominum, sed Prætorem accersimus: neque, cum alicui Magistratui omnino in libera civitate parendum sit, quidquam interest, is Magistratus civi, an peregrino mandetur, quem uterque à publico consilio mandatum atque annuum recognoscat: penes quod consilium summum imperium sit; quod Magistratus mandare, ac cum libuerit, abrogare possit; peregrinoque ac cive ministro non imperante æque utatur. Quid est igitur, quod contrarium censentes calum ac terras misceant, ac medicinam, quæ una in presentia occurrit; quamque tam multa civitates salubrem experiuntur, tam pertinaciter repudient? aut quid prohibet, ceteris consiliis animos pacandi inanibus expertis, novi hujus consilii periculum facere, ac proinde, ut illud processerit, ita illo uti? similisque est illorum ratio, qui exortas inter cives discordias judiciis & securitate animadvertendi tollendas esse contendunt; ac si quis medicus, cum causas morbum constantes pracidere possit, atque illum venientem arcere; ab illo tamen corpus invadi permittat, quem postea ipse medicamentis suis discutiat: quæ res hominem sæpe falsum habet. Causæ igitur malorum & discordiarum tollende sunt, quas ambitio summi loci inducit: comparationi vero imperiti gubernatoris, ac navem submergentis, alia longe aptior in eodem genere referri potest, bonum gubernatorem, qui uno & perpetuo venti flatu usus secundum cursum tenuerit, eo mutato velificationem quoque mutare, neque ex ea re inconstantiam argui, sed scientiam gubernandi declarari: non igitur Genuenses mobilitate ingenii formam Reipublicæ mutaturi sunt; sed ad mutata Reipublicæ tempora consilium accommodaturi, neque ea re cursus ad gloriam & ad proferendum imperium impeditur; immo vero ad easdem res via expeditior fit, ac civitatis vires roborantur, quas discordia civium enervet: tantumque abest, ut contemptam civitatem nostram apud exteros faciamus, ut contra nullum sit aliud contemptus jam inchoati tollendi remedium: quo contemptu non jam apud magnos Principes & longe remotas nationes laborare incipimus, sed finitimis Ligusticis opidulis, & perpusillis accolis Proceribus, quos Dominorum pene nominis pudeat, despectui sumus, ut non modo imperata facere deirent, sed arma quoque, si diis placet, contra nos omni levi de causâ sumere non vereantur. Has nomini Genuensi pudendas indignitates salubri consilio tollemus, cum intellexerint hominum Genuensium virtutem vinculis, quibus adhuc civiles discordia illam restrictam tenuerunt, solutam liberiolem & expeditiorem dignitatis suæ vindicem fore. Vicit hæc sententia; ex consilii decreto, Manegoldus Tetocius Brixienfis civis prudentiæ & æquitatis fama com-*

mendatus, primus civitatis Prætor in insequentem annum vocatus est.

Discordiarum civilium causæ novo hoc consilio peregrini Prætoris accersendi præcisæ in posterum videri quidem potuerant: cæterum odiorum semina à causis olim vigentibus jacta, in animis hominum residua, haud quaquam evulsa sunt: quæ ille ipse, qui perpetua fax intestinorum malorum fuit, quique discordias atque contentionum causas inter potentiores familias tanquam potentiæ suæ augendæ aptas alere omnibusque consiliis fovere nunquam destiterat, Fulco Castellius in unum ex Consulibus evomuit: nonnullis enim ex familia sua secum raptis, magnaue armatorum manu stipatus, in ædes, in quas Consules ad rationes publicas subducendas sub exitum anni (cum tempus illorum consulatus nondum exiisset) convenerant, irrumpens, Lanfrancum Piperem unum ex Consulibus virum domi ac foris recti exempli obtruncat: quare graviter tota civitate omnibusque bonis commotis, Prætor populum prius pro concione allocutus, postero die ædes Fulconis amplas & magnificas solo æquavit. De sicariis supplicium sumi non potuit; cum illi facinore tantæ audaciæ admissio illico solum vertissent.

Per ea tempora, Gulielmo Siciliæ Rege fato functo, Proceres in demortui locum Tancredum Rogerii Regis filium nothum suffecerunt: quæ res Cælestinum tertium Clementis tertii, quo Pontifice Gulielmus mortuus est, successorem graviter commovit, jus & auctoritatem Pontificiam spretam iniquo animo ferentem: quare Constantiam Rogerii Regis filiam è cœnobio eductam, votoque solutam Henrico Cæsari Ahenobarbi filio matrimonio junxit, pactus, ut ille regnum recuperatum à Pontificio solio fiduciarium agnosceret.

A. C. 1191. Henricus igitur sese ad bellum comparans, duobus Oratoribus insequenti anno ejus sæculi nonagesimo uno Genuam missis, maritima auxilia ab illis impetravit; ingentium præmiorum spe facta Ugo-lino Mallonio & Idoni Piscio ea de causâ ad illum legatis; nonnullis, quæ parens concesserat, confirmatis, ac novis concessis: armatæ igitur sunt tres & triginta triremes, iisque Orlandus Carmindinus, & Bellobrunus Castellius, præfecti; qui mense Augusto solventes Castellinarium usque perrexerunt: ceterum regia classe non inventa, cum rumor quoque dissipatus esset, Cæsarem urbem Neapolim tum obsidentem ex contagioso morbo decessisse, nullusque idcirco classis eo tempore usus esset; itinere retro repetito ad montem Circejum in conspectu habuerunt regiam classem, quam Margaritus Halmiros ducebat, numero navium longe Genuensi superiorem: neutrique fortunam pugnae experientiam rati; diversa quique petunt, Genuensesque ad Civitatem Veterem mandato à Cæsare accepto in sua se recipiendi, Genuam reversi sunt: quo sub exitum autumnii ipse quoque Cæsar venit: qui consiliis de bello gerendo, ac nova classe, cum idoneum tempus venerit, comparanda constitutis, promissisque renovatis, Germaniam repetiit.

A. C. 1192. 1193. 1194. Interea civiles discordiæ magis in dies accendebantur; cum multæ ex primariis civitatis familiis exsecrabili odio inter se dissiderent, in quibus acerrima fuit contentio inter familias Voltam, & à Curte; quæ tum secundum Castellios compressos, in civitate plurimum poterant: quæ discordiæ per tres insequentes annos, quibus peregrino Prætoris omisso regimen ad Consules redierat, civitatem mirifice exercuerunt, cum omnia seditionibus, præliis, cædibus arderent, summaque esset omnium rerum licentia, nullusque Magistratum metus facinororum & turbulentorum hominum audaciam coerceret, qui vulgo grassabantur; neque res gladiis modo gereretur, sed missilibus quoque, ac tor-

A mentis, & machinis bellicis, quibus ex privatis ædibus & turribus sese mutuo incessabant, ut nonnumquam Consules, Reipublicæ procuratore omiffa, magistratuque abeuntes se domi privatim contingerent. Cum postremo anno, qui fuit ejus sæculi nonagesimus quartus, gens à Curte tenuisset, ut in numero Consulum tres ex factione sua essent, (hi fuerunt Rubaldus à Curte, Joannes Advocatus, Henricus Embrunus) remedium intestinorum malorum externæ curæ fuerunt. Venerat in urbem Cæsaris missu Merualdus: is precibus pervicit, ut Consulibus magistratu se abdicantibus, Prætor iterum crearetur: is fuit Ubertus Olevanus Papiensis, nobili loco ortus, magnique nominis & consilii vir: qui privatis turribus in potestatem suam reductis, ac præsidio firmatis, magnam facultatem mutuo se lædendi dissidentibus ademit.

B Rebus igitur urbanis in tranquillum reductis, curæ in comparandum collatæ sunt, ipseque Cæsar Genuam venit: qui civium ardorem ingentibus atque aliis super alia cumulatis promissis, in omne fallendi artificium compositus incitare non desistebat, cum affirmaret non minus Genuensium quam suam ipsius rem agi in regno Siciliæ parando: se enim honoris titulo contentum in Germaniam concessurum, ac cum Germanis suis atatem acturum; usum ac fructum ejus regni simul cum provocatione Genuensibus cessurum: tantis igitur promissis onerati Genuenses, diligentiam sua sponte pridem commotam intendunt: brevique ingens classis triremium atque aliorum varii generis navigiorum omnibus necessariis armamentis, omnibusque bellicis apparatus apprimè instructa, ad hoc magna nobilium equitum & fortium bellatorum copia referta, comparata est: numerus navium & copiarum non traditur ab Annalibus; sed ingentem fuisse necesse est; cum adversus classem Siculam pugnandum esset; quam numerum septuaginta triremium excedere constabat: classis igitur mense Augusto solvens, Prætor ipso præfecto, qui Draconem Bambolum vicarium Genuæ reliquit, duodecim tantummodo triremibus, ac nonnullis minutioribus navigiis Pisanorum in itinere sibi adjunctis, Cajetam appulsa est: quæ urbs, nulla oppugnatione expectata, illico Merualdo, & Marchioni Montisferacis, Prætorique Genuensi deditionem fecit: Proceres, Beltramo Salimbenio, qui Judex Prætori Genuensi Genuæ affidebat, & uno ex Reipublicæ Genuensis scribis, qui jusjurandum in imperia à civibus Cajetanis exigant, in capta urbe relictis; iter persequentis Neapolim se conferunt, pari fortuna usi, urbe à Neapolitanis, sub ipsum appulsum classis, sine certamine Cæsari tradita, jureque jurando in imperia Cæsaris dato: indeque profecta classis Messanam tenet: qua in urbe gravis contentio inter Genuenses & Pisanos exorta est; ut inter tot veteribus injuriis mutuo irritatos animos omnis quamvis levis causâ ad magnum incendium excitandum satis valebat; quæ à clamoribus & jurgiis cito ad prælium venit, ex quo cum multi utrimque cecidissent, Genuenses eo die inferiores discesserunt, magnumque detrimentum à Pisanis acceperunt; ipsorum cellis ingenti vi mercium magni pretii refertis ab illis direptis. Ulti sunt Genuenses injuriam postero die, tredecim navibus Pisanis adeptis, ingentique illorum numero undis demerso. Compositæ quidem mox inter illos induciæ sunt; Merualdo in speciem pro communi amico sese interponente; pacto, ut tam homines quam res utrinque captæ restituantur, ac de damnis mutuo satis fiat, quæ omnia à Genuensibus cum fide observata sunt, alveis triremium redditus ac mille argenti marcis solutis: neglecta sunt pacta à Pisanis, jusque jurandum spretum, nulla re præter homines restituta: quam rem tamen Genuenses promissis Cæsaris decepti patienter tulerunt; ne

ne procedentium consiliorum cursus interrumpere-
tur, cum Pisanorum audaciam aleret favor Merual-
di totus in Pisanos versus voluntati Cæsaris obse-
quentis: quem sciret in Pisanos propendentem à
Genuensibus abhorrere, ut miseri Genuenses omni-
bus iniquitatibus tota ea expeditione conflictati sint;
tantarumque indignitatum dolore Prætor in mor-
bum inciderit; ex quo cum decessisset, Genuenses
in ejus locum Othonem Carrettanum præfectum
sufficiunt, qui, ne ulla partes suscepti muneris
deseruisse videretur, cum reliquo exercitu Catanam
urbem petiit à Saracenis Reginæ Tancredi uxoris
militantibus circumfessam, nulliusque in ea obsi-
dione solvenda fortior aut promptior, quam Ge-
nuensium opera fuit: qui inde profecti soli Syra-
cusas expugnarunt; haud exiguo Pisanorum nume-
ro in ea urbe deprehenso obruncato: cujus ur-
bis expugnatio res Siculas ac populorum animos in
Cæsarem inclinavit: ut omnes populi certatim sese
dedentes accurrerent. Una urbs Panhormus in fi-
de Reginæ manebat; cui admovendæ fuerunt co-
piæ. Cæsar igitur totus in suas artes & fallacias ver-
sus novo promissio civitatis Syracusanæ illis donan-
dæ, ut sibi cum classe in ea oppugnatione adsint,
Genuenses invitat. Haud gravate illi hanc quoque
extremam operam Cæsari navarunt: qui urbis tan-
dem compos factus, ingentia merita ingenti ac vix
comparabili ingrati animi ac perfidiæ exemplo,
quæ fere est magnorum beneficiorum merces, re-
muneratus est: non modo enim nihil promissorum
fecit, sed jura quoque eximia, quibus Genuenses
beneficio Guiscardorum Regum in Sicilia uteban-
tur, usitatosque Magistratus & Consules per sum-
mam injuriam & contumeliam illis abrogavit, gra-
vi poena edicto proposita, si quis nomen illud in
regnis suis usurpare ausus esset: minas insuper in-
juriis addens, sese, si stomachum sibi Genuenses
faciant, commercia omnino illis adempturum, Ge-
nuamque ipsam eversurum prædicabat. Eo anno
Philippus Gallorum Rex à sacro bello rediens tres
ingentes onerarias à Genuensibus ad subvectiones
datas præsto habuit: quarum præfectus fuit Ruf-
finus à Volta: Genuæque Jacobus Mainierius Me-
diolanensis civis Prætor in sequentem annum ejus
1195. sæculi nonagesimum quintum creatus est.

Novæ offensiones in Sicilia inter Genuenses &
Pisanos ortæ causas armorum præbuerunt, initio
turbandi res à Pisanis orto: ii, ad invidiam pacis
infractæ ac jurisjurandi violati à publico consilio
amovendam, nonnullos Pisanos cives piraticam fa-
cientes submiserunt: qui in colle Bonifacii iterum
occupato opidum condiderunt, ut ex eo latronum
receptaculo Genuensem ditionem ac circumjecta
maria & commercia infesta Genuensibus facerent:
animisque favore Cæsaris sublatis, per eandem pi-
ratarum speciem toto Mediterraneo mari circumvo-
litantes innumera detrimenta continentibus excur-
sionibus Genuensibus intulerunt, naves illorum ca-
piendo, rerumque & hominum prædas agendo,
cum verborum contumelias ad injurias adderent,
aspere probrosequæ Genuenses appellant; ac tu-
mida oratione imperantes, ut aut à navigando ab-
tinerent omnino, aut ommissis telis inermes naviga-
rent: quod si arma attrectare in posterum aude-
rent, sese illis manus & aures præcisuros minitan-
tes: exarserunt subito Genuensium animi tantis
injuriis irritati; vulgoque omnes pro se quisque
conclamare; stolidam verborum ferociam factis re-
tundendam; tantasque injurias & contumelias ar-
mis & virtute ulciscendas: ceterum consilium &
sapientiores nihil per iram aut temerariam festina-
tionem agendum rati, sed omnia, antequam ad ar-
ma iretur, tentanda; Pisanorum Magistratum ad
colloquium vocant: cum utrique ad Ericem opid-
um convenissent, Genuenses opidum Bonifacium

A ædificatum, injuriasque sibi impositas, ac damna
illata conqueruntur; suæque sibi restitui, & de in-
juriis satisfieri postulant. Inchoatum astum retinent
Pisani; civitatem purgantes, Bonifaciumque ædi-
ficatum, aut quidquam eorum, quæ Genuenses
expostulent, publico consilio factum negantes:
quin etiam addentes non minus Pisanis quam Ge-
nuensibus Bonifacianos hostes esse; eademque sese
hostilia ab illis pati; paratosque se societate &
classe cum Genuensibus conjuncta communi bello
latrones persequi, opidumque expugnatum ire:
enimvero tantam ludificationem haud ultra ferend-
dam Genuenses statuunt; ac quoniam in juris dis-
ceptatione nulla spes malis medendi esset, à ferro
B & virtute remedium petendum, stultitiamque &
arrogantem inflatorum hominum temeritatem rebus
non verbis retundendam: cum omnes pro se quis-
que hæc vociferarentur, tres opibus & virtute præ-
stantes ac familiarum splendore insignes cives, In-
go Longus, Henricus Carmindinus, Otho Poli-
pus sese publicarum injuriarum vindices profiten-
tur; negotiumque Bonifacii expugnandi in se re-
cipiunt: classeque trium ingentium corbitarum,
triumque myoparonum, ac trium triremium, com-
pluribus varii generis ac nominis additis navigiis,
C coacta, Bonifacium petunt; terraque ac mari cir-
cumfessum expugnant, magna opidanorum edita
cæde; captumque opidum, latronibus, ac piratis,
veteribusque incolis omnibus exactis, ac Genuen-
sium colonia inducta, Reipublicæ firmant: fini-
timaque littora & maria circumvecti nonnullas
naves à Pisanis captis recuperant; multasque ipsi
Pisanorum capiunt; in quibus fuit ingens atque
arcis instar corbita à Pisanis ad bellum armata,
quam illi leonem campestrem appellabant, videli-
cet nomine ipso formidinem injicientes: quat-
tuor item triremes à nonnullis civibus, ipsis quo-
que è primariorum corpore, adversus Pisanos
armatæ sunt, quæ non minoribus detrimentis Pi-
sanos affecerunt: sicque ille annus per pares utrius-
que populi clades traductus est: sub ejus anni fi-
nem Henricus, cum Genuensium opibus sibi usum
fore provideret; ut animos sibi vehementer offen-
sos conciliaret, nonnulla verba jecerat, quibus spem
Genuensibus ostendebat promissa faciendi. Illi haud
contemnendam rem rati, è vestigio per amplam le-
gationem Papiam ad illum mittunt: Legati fuerunt
Archiepiscopus civitatis, Prætor ipse, Fulco Ca-
stellius, Joannes Advocatus, Ansaldus Bufferius,
Piccamilius: qui nulla re transacta redierunt; cum
Henricus nihil sincera fide ageret, usitatoque astu
utens, quæ jure Genuensibus debebat, ea care ve-
nalialia haberet.

E Annus, qui sequitur ejus sæculi nonagesimus sex-
tus, qui que illum consequitur nonagesimus septi-
mus, unum eundemque Prætozem habuerunt Dru-
dum Marcellinum Mediolanensem, virum stre-
nuum atque impigrum, magnique animi & con-
sili, ad hoc rigidæ severitatis & incorruptæ in-
nocentiæ: illustrabat claras virtutes haud medio-
cris dicendi facultas & copia: ejus opera domi fo-
risque spectata civitati nostræ perutilis fuit. Huic
Prætori primo, sive is illos petierit, sive parum
decorum videretur in libera civitate cives omni
Reipublicæ procuracione omnino carere, additi
F sunt octo collegæ ex primariis civibus: itaque in
posterum faciendum decretum est, quod tamen sæ-
pe est intermissum. Is confestim initio Magistratus
clara virtutis & severitatis suæ edidit documenta:
nihil enim potentiorum offensiones veritus, mul-
torum turres, quæ contra legis præscriptum alti-
tudinis modum excesserant, ad justam altitudinem
80. pedum deprimi jussit: ad hoc cum Idonis Mal-
lonii filius, publicis edictis spretis, portorii non
perfolutis, merces in terram exonerasset, à Præ-
tore.

toreque ad causam dicendam vocatus neglexisset; (ut corrupti sæculi licentia jam ad contemptum Magistratum processerat) de consilii sententia populo armato, ad ædes hominis ipsemet accedens eas dejici, mercesque publicatas, nulla re sibi retenta, in cellas publicas redigi jussit: eodem severitatis exemplo sub finem Magistratus sui in nonnullorum primæ Nobilitatis ædes usus est, ipsius jussu solo æquatas: qui, legum jussu perfracto, Siciliam cum certo triremium numero ab ipsis armatarum navigarunt. Acerbe factum Prætoris Nicolaus Auria in urbem reversus tulit; priusque delictum insignis audaciæ facinore cumulavit, ac malum pravumque exemplum primus posteritati prodidit arma quoque adversus Magistratum ferendi; cum ad id tempus nobilium ac potentiorum familiarum superbia non ultra neglectiorem non parendo processisset: cetera enim criminis consortium stipatus, ædibus Archiepiscopi silentio noctis occupatis, ex illis prætorium ponte injecto invadit. Experrectus Prætor primoque inopinata audacia nonnihil perturbatus, deinde statim collecto animo, populum edicto vocatum contra Auriam & audaciæ socios armat: ceterum propinquis & cognatis sese interponentibus, Nicolaus ad meliorem mentem conversus supplex à Prætore veniam petit: qua impetrata, turbæ commotæ conticuerunt: idque assecutus est Prætor ejusmodi severitatis assidue edendis exemplis; ut solum ipsius nomen tam in urbe quam in tota ditione perditorum hominum audaciam à maleficiis contineret.

Rebus domesticis bellicarum gloria respondit: primo enim præturæ anno Pandulfus Cardinalis Pontificis ad Pisanos & Genuenses Legatus, quaternis ex primariis utriusque populi civibus Ericem coactis, de pace componenda agere instituit: extracta est res astu Pisanorum, Bonifacii recuperationem occultis consiliis molientium, atque in aliud tempus dilata. Pisanique rati, Genuensium diligentia institutis de pace consiliis consopita, omnia se Bonifacii soluta & neglecta offensuros, copias opido admovent: ceterum cum non fefellissent, Genuenses Prætor ipso præfecto, validam classem, quam consilia Pisanorum odorati armare ceperant, cum magno bellatorum numero Bonifacium mittunt: cujus appropinquantis sola fama obsidionem solvit: Pisanique in propinquam Sardiniam se receperunt: quam eadem insulam Prætor inchoatum secundarum rerum cursum persequens illico petit; Callarimque urbem appulsus, ac ne ibi quidem Pisanos adeptus copias in terram exponit, Gulielmo Marchione invito, qui per ea tempora, ut liberiore dominatu in præfectura Callaritana uteretur, à Genuensibus ad Pisanos defecerat: complura prælia Prætor semper Genuensibus secunda fecit, quamvis Marchio magnum Sardorum & Catalanorum numerum coegisset. Tandem cum Genua prævalida copiarum supplementa ad Prætorem venissent, Marchio quoque Pisanorum subsidiis auctus esset, ad universam dimicationem devotum est: in qua Genuenses victores copiis Marchionis profligatis, Fanum Igiæ capiunt, captumque diripiunt, ac magna ex parte exscindunt; spoliisque onusti, ac Corfica repetita, & Bonifacio valido præsidio firmato, Genuam ovantes redeunt: quorum discessu cognito, Pisani cum munitissima arx Sardiniae cervicibus imminens quiescere illos non fineret, piratis nationis suæ undique corrogatis, iterum Bonifacium obsidione cingunt, varioque telorum ac bellicarum machinarum genere magno impetu adoriuntur. Genuenses, re audita, dum ipsi interea comparant, expeditam navim bellicis apparatus refertam, Montarione Auria præfecto uno ex assidentibus Prætori, Bonifacianis subsidio mittunt; qui paullo incautius navigans ab hoste exceptus est:

A paullo post consecuta est Genuensium classis decem & septem triremium; quam duxit Anfaldus Guaracus, unus ipse quoque ex assidentibus Prætori. Guaracos Palavicinos postea factos dicunt: is cum Bonifacium incolumis appulisset, ejus adventu percussus Pisani, tabernaculis propere detentis, machinisque, quas vexerant, prædæ relictis, trepido discessu sese in Sardiniam recipiunt; decemque & novem triremibus raptim coactis reversi proras in prælium dirigunt. Genuensibus non detrectantibus concursus est: isque exitus prælii magno certamine accensi fuit, ut Genuenses tres, Pisani unam tantummodo triremem amiserint. Ad maritimas expeditiones terrestres labores accesserunt: Marchiones enim Gavii itinera latrocinii & excursionibus infesta faciebant: qui, clitelariis Genuensium multis magnam vim mercium vehentibus captis, arce Tessaroli communita se incluserunt: adversus eos Prætor cum urbanis copiis profectus, ablatis rebus recuperatis, arcem à Marchionibus & à Palodii incolis in cacumine collis Carrosii ædificatam diruit.

C Turbatæ quoque res sunt insequenti anno ejus sæculi nonagesimo octavo; in quo Prætor fuit Albertus Mandelius Mediolanensis, nullis collegis additis, in agro Lunensi ab incolis opidi Vezani nonnullisque aliis ditioni Genuensi subjunctis populis, qui per causam solutionis stipendiorum extractæ à Genuensibus ad Pisanos defecerunt; opidumque & arcem portus Veneris terra & mari circumfuderunt: moxque spe, qua venerant, frustrati discesserunt; cum prævalida terrestria ac maritima subsidia Genua missa appulissent: quos abeuntes Genuenses infecuti fuderunt, ac fugarunt; magna illorum edita strage, atque Vesignia expugnata, ac non exiguo captivorum numero Genuam ducto: quibus cladibus fracti Vernatienses, & reliqui, venia suppliciter petita, in gratiam recepti sunt. Parexistis Taxariæ fuit à Prætoris expugnata, Ocronensis Genuensium hostibus invitis, ac solo æquata, Dertonensibusque ad impensam à Genuensibus factam persolvendam coactis, cui accessit expugnatio arcis Palodii. Ac ne maritimis quidem expeditionibus caruit hic annus, octo triremibus Gulielmo Tornello præfecto armatis: qui ad littora urbis Panhormi octo triremes Recuperi acerrimi piratæ improviso deprehensas, ipsumque Recuperum cepit, quem victus precibus Constantiæ Frederici uxoris, unaque triremes captas cum Genuensibus, qui à Constantia captivi tenebantur, commutavit.

E Neque insequens annus xci. vacuus omnino expeditionibus fuit; qui Prætorem habuit Beltrammum Christianum Papiensem, sex illi additis collegis: armata enim sunt octo triremes ad tutelam commerciorum, quibus præfuit Ubertus Marocellus, qui ingentem Pisanorum onerariam in portu Callaritano cepit: quattuor item triremes ac duæ corbitæ in Pisanos, Provinciam Narbonensem latrocinii infestam facientes, emissæ sunt, Simone Camilla præfecto: ejus opera neque segnis neque poenitenda fuit, arce in insulis Stœcadibus capta & diruta, compluribusque Genuensibus, qui in ea captivi adservabantur, liberatis. Defecerunt eo anno (qui mos creber illis fuit) Intemelii: copiis igitur eo missis, duos circiter menses illorum urbs terra ac mari obsessa est nullo cum fructu; obsidione nonnullorum culpa ac scelere soluta.

F Insequenti anno, qui duodecimi sæculi Christianæ salutis postremus fuit, Orlandino Malaprecio cive Lucensi Prætoris sine collegis; in cujus paullo post demortui locum successit Gulielmus Henricus, qui ejus vicarius fuerat, navis Buccanigra in sinu Tunetano tres Pisanorum naves raro virtutis ac fortitudinis exemplo cepit, captasque mercibus & armis onustas Genuam duxit. Legatus hoc anno

no est ad Sultanum Memphiticum Fulco Castellius, redimendorum captivorum causa: missaque pretiosamunera à Sultano quidem accepta sunt; ceterum captivi haudquaquam redditi.

A.C. 1201. Primus annus tertii decimi saeculi Consules habuit: severe animadversum est in maleficos; quorum magnus numerus creverat, quietemque civitatis turbabant. Intemelique, qui adversus pacta triremem armarant, tribus triremibus contra illos missis, metu mali compulsi sunt nudis pedibus, ac cruce gestantes suppliciter veniam petere, atque imperia jurare: octo quoque triremes ad tutelam commerciorum, Nicolao Auria praefecto, emissae sunt; qui pacem cum Siculo regno firmavit; nonnullumque auri & argenti pondus in aerarium intulit. Insigne est ad declarandum, quam longe commercia & negotiationem natio nostra illis temporibus extenderet: complura jura eximia à Leone Rege Armeniae impetrata; facultate Genuensibus facta sacraedis, publici domicilii, fori in urbibus Sisio, Marlinistra, Tharso, obtinendi.

A.C. 1202. Secundo anno Jufredotto Grassello Mediolanensi Praetore, cui quattuor collegae in consilio additi sunt, arx & opidum Gaviu de veteribus Marchionibus Alberto, Gulielmo, Renato emptum est; Marchionibus civitate donatis.

A.C. 1203. Qui insequuntur, tertius & quartus annus, eundem Jufredottum, quattuor illi in consilio assidentibus, Praetorem habuerunt; cujus opera multiplex ac probata fuit: nam inter Ingaunos & vallis Arociae incolas inter se diffidentes pax & concordia conciliata est, Arocianis in ditionem acceptis, qua de causa Praetor Albingaunum se contulerat: qui Genuam revertens, ac per urbem Saonam iter faciens cum civem quendam Saonensem obaeratum comprehendere & in carcerem duci iussisset, quidamque hominis affinis unum ex apparitoribus interfecisset; audaciam graviter punivit Praetor, aedibus obaerati ac nonnullorum criminis consortium solo aequatis, & civitate Saonensi pecunia mulctata: eadem severitas adhibita est erga incolas opidorum Serianae, ac Tabiae: qui apparitores nonnullos Judicis à Praetore quorundam exfulum Saonensium piraticam facientium causa Nicæam missos, quo sese illi receperunt, interfecerant.

Ceterum majoris molis majorisque publicae utilitatis fuit, discordias inter complures primarias civitatis familias acerbis odiis diffidentes, ac ferro & sanguine per varias occasiones exercitas, tollere, gratia inter gentes à Volta & à Curte, inter Aurias & Porcellos, inter Leccavelas & Cassicios conciliata, praeposito & Archidiacono principis Ecclesiae adhibitis: qui viri virtute & prudentia conspecti Orthonem Episcopum Bobiensem evocatum in Bonifacii Archiepiscopi Genuensis demortui locum suffecerunt: quod negotium illis à publico civitatis consilio, & à sacro ordine, more Majorum, delegatum est.

Per ea tempora Latini Principes, ejectis Graecis, Constantinopolitanum Imperium invaserant, Venetis sociis: quorum navis complures reliquias captas, (cum ne sacris quidem parceretur) quae illis in partem obvenerant, Venetias vehens à Genuensi cive Dondedeo Bo cum duabus triremibus suis per ea maria comitante capta est, qui reliquias inventas Reipublicae donavit.

A.C. 1204. Ultimo anno Jufredotti Praetoris, qui fuit ejus saeculi quartus, solo aequatae sunt duae arces ab incolis vallium Arociae & Oneliae aedificatae, tumultusque ab illis excitati compressi, ipsique pecunia mulctati.

Per ea tempora odia inter Pisanos & Genuenses numquam extincta latrociniis potius, quam justis belli specie exercebantur; mutuisque damnis sese utraque natio carpere, ac commercia & navigatio-

A nem inter se infestam facere non desistebat, nulla memorabili re gesta; praeter Recuperum clarissimi nominis ea aetate Pisanum piratam ab Ugone Cafaro Genuensi in praelio interfectum; cum singulis triremibus concurrissent.

B Hoc eodem anno clara res à Genuensibus gesta est. Morte Henrici, ac Friderico successore absente, aetateque ad res regendas nondum adulta, neglectae & solutae erant Siculae res: ea occasione arrepta, Pisani per eandem speciem piratarum, ut Rempublicam exsortem culpae conservarent, urbem Syracusas, quam olim Ahenobarbus Genuensibus dono ac fiduciarium dederat, occuparunt, non prophano modo populo, sed sacro quoque ordine cum Episcopo urbe exacto: hi maria latrocinii suis, non Genuensibus modo, sed omnibus, quicumque in illos inciderent, infesta faciebant. Eos Genuenses pio & justo bello persequi decreverant, multiplicem speciem juris praeferebant, tum quod rem donatam pro jure suo vindicarent, tum quod adversus perpetuos hostes suos, cum quibus assiduum bellum vigeret, irent; tum etiam quod arma adversus piratas & latrones umquam injusta sunt: igitur cum complures naves, variis de causis, per omnia Orientalia littora, non magis ad negotiationem instructas, quam ad bellum quoque, si res posceret, armatas sparsas haberent; virum strenuum & experientem Alamanum Costam ad eas cogendas, ac cum illis Syracusas petendas cum navi omnibus rebus instructissima, delecta fortium bellatorum manu in illam imposita, mittunt: qui, navi Pisanorum omnibus bellicis apparatus affatim instructa in itinere obviam facta, post diuturnum & cruentum praelium capta, institutum iter persequens in Cretam appulit: magnaue felicitate factum est, ut ibi ingentem numerum Genuensium navium invenerit: quas in patriam revertentes ex multis Orientis regnis, casus in eundem locum conglobarat, quae quattuor rectores, quos Consules appellabant, sibi ipsae praefecerant, Lambertum Turnarium, Belmustum Lercarium, Ogerium ab Insulis, alterumque Belmustum Lercarium juniorem: quibus cum mandata publica exposuisset; illi haud retractanter dicto audientes fuerunt, eodem Alamano Duce accepto.

D Consilia atque arma cum Genuensibus Henricus Piscator Comes Maleae consociavit, veteri amicitia cum illis conjunctus, idemque Pisanorum recentibus latrociniis irritatus: classe igitur Syracusas appulsa, navique Pisanorum in oculis Renati Comitiss Syracusanis subsidio à Pisanis missi depressa, copiisque in terram expositis, urbem circumfident, adoriunturque; quam septem dierum oppugnatione tandem captam praesidio valido firmant, Episcopoque & sacro ordine in suas sedes restitutis, eodemque Alamano Comite creato, urbeque illi fiduciarium data, iter Genuam dirigunt, portumque ovariantes subeunt. Laetitiam felicium successuum turbant quattuor naves nondum mercibus exoneratis ab atroci subita exorta tempestate in ipso portu depressae: damnum ab undis non minore ab igne cumulatum est, multis aedificiis fortuito incendio absumptis.

E Sub exitum praeturae, quae multipliciter utilis fuit, tumultuatum non nihil est, cum complures nobiles familiae arma in Praetorem ipsum sumpserint, offensae caede filii Joannis Balbi nobilis hominis, ab apparitoribus per errorem interfecti, nocturnis tenebris prospectum adimentibus: adversus quorum impetum Praetor populum armavit: ulteriusque res processisset: ceterum compluribus bonis & quietis amantibus civibus, ad hoc sacro ordine sese interponentibus, res pacatae sunt, nobilibus familiis, quae tumultum commoverant, in gratiam & in obedientiam Praetoris receptis. Eo anno nonnulla ditionis Genuensis opida iv. triremes negotiationis & mer-

mercium suarum in Siciliam subvehendarum causa instruxerunt: quibus publice dux addita est triremis ex urbe emissâ, Genuensi civi præfecto.

A. C. 1205. Insequentis anni ejus sæculi quinti Prætor inusitato exemplo civis Genuensis fuit Fulco Castellius, quattuor additis collegis. Non servandi moris causam fuisse puto nimiam gentis potentiam magno intervallo ceteras, quæ opibus tum pollebant, antecedentem, & immodicam hominis ambitionem: quæ, quietis publicæ causâ, hoc honoris gradu consopienda fuit.

Non minus quam superior bellicosus fuit hic annus; resque inter Genuenses & Pisanos à latrociniiis ad justum bellum venerat: quamquam ne illa quidem umquam intermissa sunt, ut nihil utriusque populo toto mari Mediterraneo, omnibusque Europæ, Asiæ, Africæ littoribus, quæ navigatione & commerciis suis utraque natio ea ætate late complectebatur, tuti aut pacati esset. Pisani, omnibus curis in Syracusas recuperandas versis, eadem societate Renati Manentis Comititis, ac nonnullorum Etruriæ populorum usi; classè duodecim triremium ac decem corbitarum, compluriumque varii generis ac nominis minorum navigiorum instructa, & in Siciliam missa, copiisque in terram expositis, Syracusas terra ac mari circumfident: qua fama Genuam perlata, comparari diligenter ceptum est: ceterum propius ac celerius auxilium fuit ab Henrico Maleæ Comite latum: cujus omnia sinceræ ac constantis fidei, singularisque benevolentiae in populum Genuensem officia perpetuo constituerunt; forti atque impigra ei ubique navata opera: is igitur Pisanorum in Siciliam adventus certior factus, è vestigio quattuor triremibus armatis cum magna auri vi sese Messanam confert: in quam urbem complures Genuensium naves, partim corbitæ, partim longæ, privatorum commerciorum causâ, ultro citroque commeantes, magnumque civium Genuensium numerum vehentes, congregatæ erant: qui omnes privata negotiatione in præsentia ommissa, opem Syracusis ferendam constituunt: summo igitur imperio ad Comitem delato, navibusque ad bellum armatis, ac validis copiis firmatis, iter Syracusas dirigunt: quibus appropinquantibus, Pisani nihil retractantes sese ad navalem pugnam comparant, classeque Genuensi ad se tendente procul in altum conspecta, proras in pugnam dirigunt: idem faciunt Genuenses antennis sublatis, armamentisque compositis: concursus est acris ac vehementi prælio: quod cruentum & diuturnum fuit, veteribus odiis, multisque ac magnis injuriarum & contumeliarum causis, ad hoc æmula virtute certamen accendentibus. Victoria tandem penes Genuenses fuit; classè hostili capta, præter quinque triremes, quæ auxiliares Longobardas copias vehebant: neque interea Alamanus, qui urbi præsidebat, segne tempus triverat, qui Pisanorum rem ad iniqua inclinatam ex incenibus cernens, urbe crumpens terrestres copias classis casu percussas ac consternatas magno impetu invadit; easque profligatas spoliât; ac castra defensoribus vacua diripit: atque ita obsidio Syracusarum, quæ tres menses & dimidium duravit, soluta est. Hujus victoriæ nuncio accepto, Nicolaus Mallonius & Gulielmus Niger, qui subsidio missi cum tredecim triremibus, in quibus fuerunt triremes tres ab urbibus Albintemelio, Saona, Naulo, ex fœdere singulæ contributæ, itinere retroverso in sua redierunt.

Acer & bellicosus vir Henricus Comes fuit, qui eodem anno egregias res adversus Venetos ac Turcas gessit; Tripolisque Comiti laboranti suppetias tulit: qui cum in ope ferenda delectam Genuensium manum secum habuisset, quorum opera nec fegnis neque inutilis fuit; Tripolitanus beneficium grato animo profecutus, eximia jura nationi Ge-

A nuenfi Antiochiæ, Tripoli, & tota Syria olim impartita, ceterum vetustate obsoleta renovavit, vectigalium & portoriorum immunitate donata, simul cum facultate sacræ ædis, fori, plateæ possidendæ.

Insequens annus ejus sæculi sextus, qui Prætor^{A. C. 1206} exterum habuit Joannem Strusium, per usitata latrocinia inter duos populos traductus est: insigniores expeditiones insequentis septimi anni fuerunt: quo, Prætor omisso, regimen ad Consules^{A. C. 1207} rediit: qui, bello cum Pisanis vigente, omnem operam omnemque cogitationem in quam maximum triremium numerum fabricandum contulerunt; pecuniis ea de causâ mutuis corrogatis: cum igitur auditum esset, classem Pisanorum, quæ fuit octo triremium ac decem corbitarum, in Sardiniam appulsam ad res in ea insula novandas; è vestigio emissus est Nicolaus Auria cum pari corbitarum numero, ac totidem triremibus. Re cognita, Pisani haud sanum consilium rati, cum hostili classe numero superiore fortunam pugnae tentare, sese in Callaritanum portum, quæ urbs in ipsorum partibus tum erat, recipiunt, valloque ostium obstruunt, quæ res irritos Auria conatus fecit; cum modo percurrere, modo ignem classi injicere tentasset. At Pisani suis, qui erant in Sardinia, timentes, decem & septem triremes extemplo laborantibus submitunt: idem faciunt Genuenses novo motu Pisanorum cognito; supplemento quattuordecim triremium, quod Fulco Castellius unus ex Consulibus duxit, misso: ceterum cum Pisanorum subsidium celerius, quam Genuensium fuisset; Auria, hoste appropinquante, metu ne medius circumfisteretur, illico incepto omisso discessit, quem atrox tempestas adorta classem disjecit, duæque naves à classe separatæ Bisaccia & Stelleta, in hostilem classem, quæ subsidio venebat, incidentes à Pisanis captæ sunt.

Insequens annus ejus sæculi octavus in legationes^{A. C. 1208} & consilia agitando magna ex parte insumptus est, Gulielmo Spinula uno ex Consulibus Oratore à Sultano Memphitico ultro evocato, collegarum assensu, misso; & Nicolao Mallonio atque Henrico Detisalvio ad Regem Maroci legatis; qui pacem in duos annos cum illo firmarunt, & Abbatibus Tilieto & Gorgonii sese interponentibus, consilia de pace cum Pisanis instituta sunt: quæ ut magni moliminis & diuturnioris temporis res cum subito componi non posset, omne arbitrium & judicium ad venerabiles viros, de utriusque populi voluntate, reiectum est, induciis interea inter utrumque patitis.

Hoc anno & insequentibus duobus, qui omnes^{A. C. 1209} consulares fuerunt, semina discordiarum & bellorum inter Venetos & Genuenses primum jacta sunt; quæ animo compressa numquam in apertum bellum eo tempore eruperunt: cum etiam opera & auctoritate Romani Pontificis nonnullis post annis, ut suo loco scribemus, plane sublata essent: causæ tales fuerunt. Venit Genuam hoc anno Arnaldus Balduinus Henrici Comititis Maleæ filius cum duabus triremibus, missus à parente opem à Genuensibus petente adversus Venetos, quibus ille insulam Cretam ademerat. Genuenses, qui hominitam multipliciter bene merito omnia summa studia deberent, in officio haud retractanter fuerunt; Comitemque navibus tam corbitis, quam longis, viris, armis, equis, annona, bellicis apparatusibus, pecunia juverunt: quibus auxiliis fultus Comes Venetos in insula Creta acie vicit; Renato Dandulo illorum exercitus Duce capto: ejus corpus paullo post fato functi cum tres triremes à Comite concessum Venetias honorifice veherent, triremes captæ sunt à tribus triremibus Benvenuti Alamani Costæ Comititis Syracusani filii. Tribus post annis ipsemet Henricus eadem causâ suppetiarum adversus

ius Venetos petendarum Genuam venit. Genuenses, Oratoribus prius Venetias missis, summa omnia fecerunt, ut pacem inter dissidentes conciliarent: cuius cum nullam mentionem Veneti graviter offensi auribus admitterent; iidem Genuenses cum veteri amico ac tot in rebus fideli experto deesse non possent, praevalidum praesidium octo triremium, unius triremis majoris formae, trium corbitarum omnibus necessariis rebus affatim instructarum, ad hoc centum equitum cataphractorum, magna addita annonae copia, magnaque telorum & bellicorum apparatus omnis generis vi, ingenti pecuniarum impensa in eas res comparandas facta, quae mutuae fide publica sumptae sunt, vectigalibus publicis ea de causa oppigneratis, mittunt: his accessit foedum exemplum in civem Genuensem Leonem Ventranum praefectum subsidii in Cretam missi à Venetis ira in Genuenses ardentibus editum, quem cum subsidio interceptum Corcyrae suspendio necarunt. Haec facta sunt inter Venetos & Genuenses odiorum & dissidiorum semina. Nunc ad Pisanas res redeo.

Abbatem, quos modo nominavimus, causis discordiarum & controversiis diligenter cognitis, iudicium tandem tulerunt; Legatisque utriusque populi Ericem convocatis, pacem composuerunt ab utrisque haud retractanter acceptam, cuius fides apud Pisanos fluxa ac parum stabilis fuit per usitatum artificium piratarum infracta, quorum quinque triremes totidemque corbitae nonnullas Genuensium naves privatae negotiationis causa navigantes, nihil tale suspicantes, ceperunt: & quamquam una à duodecim triremibus Genuensibus ea de causa armatis, ut commercia Aegypti & Syriae, quae tum frequentissima erant, à piratarum latrociniiis tuta facerent, recuperata est; tamen Consul eadem arte hostes ludificandos censentes, auctores fuerunt Uberto Castaneae & Ugolino Levanto, duas corbitas ac parem triremium numerum armandi: qui eadem specie piraticam facientium, ac consiliorum à publico civitatis decreto separatorum abutentes, Pisana commercia ipsi quoque quantis plurimis possent damnis continenter carperent: quos annona, ac comestibus, pecuniaeque juverunt. Hi portu exeuntes, totoque mari circumvolitantes, brevi non minora detrimenta Pisani reddiderunt; compluribus illorum navigiis captis. Ceterum brevi, omisissimulationibus, Pisani animos nudarunt; cum duodecim enim triremibus ad insulam Portus Veneris furtim appulsi vastare agrum coeperunt. Re subita & nec opinata commoti Portusvenerenses, Vernatiensibus finitimis sibi adjunctis, lembis ac cimbis, quarum magnum numerum in littus subductum perpetuo habebant, raptim deductis, per freti angustias in insulam à Pisani non conspecti trajiciunt; eosque nec opinantes adorti primo impetu fundunt, atque in naves compellunt, nonnullis eorum captis, in quibus fuit ipse classis praefectus Tegrinus: quem Gulielmus Scotus (hos Scotos, sunt qui ad Salvagos, quique ad Centuriones postea transisse affirmant) Genuensis civis, arcis Portusvenerensis praefectus, cum Lanfranco fratre, qui à Pisani captivus tenebatur, commutavit. Graviter factum Scoti tulerunt Consules; qui publico injussu de rebus publicis pravo exemplo statuere ausus esset: exilio igitur hominem mulctarunt, ejus aedibus tanquam perduellionis rei complanatis. Ceterum, cum primo nuncio Pisano adventus accepto civitas, opidanis Ligusticis adjuvantibus, quadraginta triremes armasset; mox cognito Pisano discessu, in sua quisque reversi sunt. Interposuit auctoritatem suam in res pacandas Otho Caesar; atque utrumque populum ad biennales inducias adigit, compluribus utriusque populi captivis in cu-

A stodiam tamquam obsidibus datis: qui negligenter adservati, brevi carceribus fractis, evaserunt.

B Ad Pisano continentis molestias (tamquam ipsae parum civitatem exercerent) accesserant per ea tempora Massiliensium & ceterorum Provinciae Narbonensis incolarum piraticam facientium excursiones: quae haud exiguum negotium ipsae quoque exhibebant, praedas navium & mercatorum ultro citroque commearum agentes. Reddita illis damna sunt; multis eorum navigiis captis à quattuor triremibus ac totidem corbitis adversus illos armatis; alteris quoque quattuor paullo post è portu emissis, Gulielmo Embriaco praefecto.

Postremo anno trium horum Consulatum, Orator missus est ad Massimetum in Africae ora regnantem, ad amicitiam cum illo faciendam, Lanfrancus Turca. Aucta est Respublica, per horum trium annorum curriculum, dimidia parte opidi Vernatiae, ab Henrico Ponsono, ob multa accepta beneficia Genuensibus obstricto, donata, ac parte quoque opidorum Uvadæ, Rossilonis Tagioli eadem beneficiorum causa ab Othone Boschi Marchione donata.

C Insequenti anno ejus saeculi undecimo ad peregrinum Praetorem reditum est: qui fuit Renatus Cotta Mediolanensis civis, octo additis collegis: quo anno Massilienses, haud parem sibi contentionem cum Genuensi populo esse intelligentes, decem Oratores ex primoribus civitatis Genuam miserunt, qui civitatem purgantes, cum docuissent facinorosa à piratis publico injussu admissa, pacem in unum & viginti annos impetrarunt. Non tamen molestiis is annus omnino caruit, à Gulielmo & Corrado Marchionibus Malaspinis exhiberi coeptis; ægre ferentibus opidum Crovariam ab illius Domino Beghino Genuensibus venditum: cum etiam Albertus olim Gavii Marchio, cui ususfructus certi vectigalis relictus fuerat, Praetori dicto audiens non fuisset. Adversus Malaspinas ducenti cataphracti equites decreti sunt; Albertus vectigali privatus est, & ad decennales carceres damnatus.

D Insequenti anno ejus saeculi duodecimo repetitus est mos Consulatum eligendorum, Praetore omisso; primumque opus fuit, pax cum Marchionibus Malaspinis inita; qui, nonnulla pecuniae summa accepta, omni jure suo in opido Crovaria Republicae cesserunt; atque in fidem populi Genuensis iurjurando sancitam venerunt. Nonnihil quietem publicam Nicæ Ligustici opidi incolae, excursionibus suis ipsi quoque turbabant: ad eorum motus compefcendos novem triremes, ternae singulis tribus mensibus armatae sunt.

E Eo anno Fridericus Henrici Caesaris filius Siciliae Rex Genuam venit, omni honorum genere exceptus; sumptibus illi tribus mensibus, quibus Genuae commoratus est, ample praebitis: induciae quoque eo anno cum Pisani in quinquennium prorogatae sunt; in quas quingeni utriusque populi primores cives jurarunt. Semina, ut superius scripsimus, discordiarum inter Venetos & Genuenses jaeta erant: gliscebaturque in dies malum, cum mutuis se damnis carpere coepissent: quae res sollicitos Consules habebat, intelligentes quam periculosum esset civitati, si res, finitimo ac visceribus haerente Pisano assidue premente, tanta insuper novi ac praepotentis hostis mole aggravarentur: omni igitur ratione simultatum causas praecedendas rati, Lanfrancum Rubicum & Ubertum Spinulam Oratores Venetias miserunt: qui inducias triennales pepigerunt, pacemque inter Venetos & Comitum Maleae composuerunt.

F Res ab Annalibus tradita nullo modo nobis omitenda fuit; septem circiter millia mortalium capita omnis aetatis & sexus, puero quodam Germano,

Nicolao nomine, Duce, Genuam venisse, superstitionis quadam opinione illos agente, mari brevi exsiccato, pervium solum fore Syriam ac loca sacra pedibus petenti: exonerata est protinus civitas, Consulum jussu prægravante incondita multitudo.

A. C. 1213. Nihil memorabile habet insequens annus ejus sæculi tertius decimus, præter navim Genuensem ab Aragonio Rege, contra fidem pacis, captam; cum, Uberto à Volta Oratore ad eum missio, homines tantummodo restitisset, mercibus retentis; atque Episcopatum Ingaunorum Genuensi Archiepiscopo ab Alexandro tertio subjunctum; ingensque incendium in urbe exortum, quo complura ædificia conflagraverunt.

A. C. 1214. Insequens quoque annus ejus sæculi quartus decimus totus insumptus est in vectigalia publica vitio temporum lapsa, & corrupta restituenda & emendanda; salubri lege modo publicanorum avaritiæ imposito; decretoque ne vectigalium locationes plus annuæ essent: aucta quoque eo anno ditio est, cum Otho Carrettus Genuam venisset, atque adversus beneficia accepta gratus, sese atque opida sua in ditionem & fidem populi Genuensis tradidisset: quæ eadem à Genuensibus fiduciaria accepit, jurejurando fiduciæ dato.

A. C. 1215. Munitus est insequenti anno ejus sæculi quinto decimo collis Monæci, quem Henricus Genuensibus donarat; quattuor turrium arce ædificata à Fulcone Castellio, nonnullisque civibus ea de causa à Consulibus eo missis. Eo anno Corradus Malaspinna, fide data ac jurejurando violato, (uti is, qui populis dominantur, nihil regni firmandi & augendi libido religiosum facit) incolis opidi Castanæ fociis, fines Brugnatenfis Episcopi ingressus, Colleague Rotundo prope vicum Cellasum occupato, arcem in eo ædificare aggressus est: destitit incepto à Genuensibus repulsus, maritimis & terrestribus copiis ab urbe profectis, quæ Levantum usque opidum perrexerunt, arcemque & opidum Bozolum ceperunt: qua munita ac præsidio firmata, Genuam reverterunt: eo anno Veneti, Anconitani, Pisani, Provinciales Narbonenses, consiliis conjunctis Constantinopoli, duabus triremibus ac totidem corbitis armatis Siciliam petierunt, compluraque navigia Genuensium ceperunt.

Externis molestiis gravius ac propius civitati fuit otium urbanum à Guidone Polefino & Carbone Marcello audacibus & inquieti ingenii hominibus turbatum: qui armatorum manu corrogata, tumultuque excitato, Herodem à Mari sub exitum hujus anni extra pomerium adorti sunt: compressæ sunt turbæ à Magistratu; auctoresque exsilio mulctati, illorumque ædes complanata: quæ tum fere erat turbulentorum hominum poena.

Eo anno Innocentius tertius, quo Pontifice nemo multis ante & post sæculis doctrina, morum sanctitate, meritis in Ecclesiam, rebusque magnis gestis clarior fuit, Concilium universæ Ecclesiæ Romæ habuit: quo nullum umquam frequentius fuisse legitur: convenerunt enim in urbem Constantinopolitanus & Hierosolymitanus Patriarchæ, septuaginta Archiepiscopi, quadringenti duodecim Episcopi, Abbates & Priores octingenti, Oratores utriusque Cæsaris, ac Regum Hierosolymorum, Galliarum, Hispaniarum, Angliarum, Cypri, ceterorumque Christianorum Principum: in quibus adfuit Otho Archiepiscopus noster, & Emanuel Auria unus ex Consulibus, civitatis Orator.

Prolatum est eo anno imperium; Nicæa urbe à Miobando præside, & Antepelicano Episcopo in fidem & ditionem populi Genuensis tradita; jurejurandoque in verba dato, quod Reipublicæ nomine Ubertus Spinula accepit; qui arcem in urbe ab Aragonensibus ædificatam, summa populi voluntate, disjecit: descendisse ad hoc consilium dicuntur

A Nicæenses; ut sese prævalido propinquo auxilio communirent adversus Aragonenses, impotentis illorum dominatus pertæsi: jura quoque Reipublicæ in regno Armeniæ à Leone Rege confirmata & amplificata sunt, Henrico Ferrario à Genuensibus Oratore ea de causa missio: in quibus insigne fuit liberum forum, liberaque jurisdictio inter ipsos permixta; ut mirum sit, unum eundemque Genuensem populum nihil umquam in alienis regnis cupidius expetisse ac retinuisse libera jurisdictione; quam eandem sibi tam facile in urbe ipse sua abjudicaret, alienigenis iudicibus ultro ac crebro accersitis, ac sibi sponte præfectis: qui mos insequenti anno ejus sæculi sexto decimo primum in urbem inductus est, in quo, Consulibus, qui foro præessent, creari desistis, jurisdictio quinque peregrinis Jurisconsultis mandata est, atque inter illos ita partita, non ut conjuncti pro collegio universæ jurisdictioni præessent, sed ut singuli urbis regionibus sibi cuique attributis jus separatim dicerent: ac, si quis superiora civitatis nostræ, quæque adhuc scripsimus, memoria & cogitatione repetat, inveniet, regimen civitatis, quod initio inde factum, cum Cæsariani Comites repudiati sunt, esse liberum cœpit, usque ad annum superioris sæculi nonagesimum, per trecentorum circiter annorum spatium, tam in Reipublica procuranda, quam in jurisdictione exercenda, uno ac perpetuo, numquamque variato, tenore, penes Consules Genuenses cives, nulla peregrinitate in civitatem introducta, fuisse: anno, quem diximus, regimen multipliciter variare cœpisse, peregrinis Prætoribus vocatis ad rixarum & dissidiorum vias ambitioni civium obsepiendas, procuratore Reipublicæ, quæ causa discordiarum erat, illis tradita, eaque varia; modo illis solis regentibus, modo collegio civium Genuensium illis addito, modoque illos accersendo, modo ad Consules redeundo; cum tamen jurisdictio ab alteris Consulibus Genuensibus retineretur: qua ipsa quoque hoc anno Genuenses, ad minima malorum eligenda, sibi ipsi ablata, peregrinis iudicibus cesserunt, civibus male & flagitiose illa utentibus; dum illi in iudiciis faciendis potius studia partium sequuntur, vel potentiorum gratiæ serviunt, quam veritatem & æquitatem bonorum & religiosorum iudicium retinent: qui mos hoc primum anno inductus, ad nostra usque tempora numquam intermissus perductus est; cum forma procuratoris Reipublicæ ac summi imperii tot mutationes acceperit, ut is usus regiminis variandi atque à cive ad exterum transeundi, rursusque ab extero ad civem redeundi, in nullo populo frequentior aut crebrior umquam fuerit.

E Anno, qui sequitur ejus sæculi decimus septimus, intermissus peregrinus Prætor resumptus est, qui fuit Ubertus Rocafolius Papiensis civis: insignis est hic annus pace inter Genuenses & Pisanos tandem composita, Honorio Romano Pontifice auctore; conditionibus pacis in ipsius Pontificis arbitrium reiectis, cujus omnes curæ in sacrum bellum versæ erant, ea de causa Ugolino Episcopo Ostiensi Senatus principe ad utrumque populum legato, quo hortante, mille utriusque civitatis primores cives in pacem jurarunt, Raimundo à Volta & Nicolao Barbavaro Oratoribus Pisas missis ad jusjurandum exigendum; cum ad eandem rem duo Pisanorum Legati Genuam venissent Scorza Lupus, Aldrovandus Suavicus: missique ad Pontificem sunt ab utraque civitate bini Oratores: fueruntque Genuenses longe civitatis primarii Fulco Castellius & Ubertus Spinula: quibus Pontifex, re plane cognita, conditiones præscripsit; pacemque gravi poena, pro jure sacrosanctæ potestatis, in violatores pronuntiata, sancivit: missus est eo anno in Sardiniam Legatus, qui vectigal debitum à præfecto iudicatus Turritani exigeret. Cumulabantur in dies alia su-

per aliam, inter Genuenses & Venetos, simultatum causâ, Alamano Costa Comite Syracusarum, Genuensium fiduciario, littora Cretæ insulæ cum corbita & duabus triremibus prætervehente, à Venetis capto.

A. C. 1218. Ceterum cum à bello sacris expeditionibus minime apto uterque populus abhorreret; consilia de pace pridem instituta tandem insequenti anno ejus sæculi decimo octavo, qui Prætorem habuit Rambertinum Bovarellum Guidonis filium Bononiensem civem, ad effectum perducta sunt in urbe Parma: quo utriusque civitatis Legati convenerunt: inter quos pax in decennium firmata est: pax quoque cum Dertonensibus finium causâ dissidentibus pridem inita, ab iisdem Legatis renovata & confirmata est.

Coquebantur per ea tempora à Christianis Principibus consilia de sacra expeditione: qua de causâ complures Proceres ultro citroque commeabant; in quibus fuit Henricus Malcæ Comes, veteri amicitia & societate sincera fide mutuo culta, cum Genuensibus conjunctus: qui Genuam venit ad Fridericum in Germaniam iter habens: rediensque diploma à Friderico impetratum civitati reddidit; in quo Genuenses omni vectigali, & tributo, omni-que generi onerum ordinariorum & extraordinariorum in regno Siciliae eximebantur: instructa triremis est, qua homo in sua revectus est. Ceterum in sacram expeditionem usitata Genuensis pietatis officia constituerunt; non modo classe in Syriam missâ, sed Oratoribus quoque ad ardorem Transalpinorum Principum incitandum legatis, qui fuerunt Gulielmus Embriacus & Lanfrancus Rubeus.

A. C. 1219. Cum civitatis existimatione & opibus in dies crescentibus, ditio quoque & imperium augebatur: eo enim anno Marchiones Malaspinæ & Intemelii se in fidem Genuensis populi tradiderunt; atque in imperia urbem regentium jurarunt: idem quoque fecerunt incolæ Capriatæ opido fiduciario jurejurando Genuensibus subjecto: quam deditio- nem insequenti anno ejus sæculi decimo nono idem Intemelii confirmarunt; cum Prætor idem, qui superiore anno, cum quattuor triremibus ad eos accessisset, omnisque populus in ædem beatæ Mariæ congregatus Zacariæ Castellio, Uberto Galletæ, Emanueli Auria, Uberto Spinulæ, Jacobo Piccamilio, Genuensium Legatis urbem subjunxit: ceterum illis præsentis Prætoris metu liberatis suum ingenium illico rediit, fide promissorum violata: armis igitur compescendos mobiles animos cum decretum esset, corrogata pedestria auxilia sunt à Corrado & Opicione Marchionibus Malaspinis, Othone & Henrico Marchionibus Carrettanis, Bonifacio Marchione Clavesianæ, ac filio Gulielmi Marchionis Cevæ: qui omnes in officio fuerunt: igitur Prætor quingentis cataphractis equitibus, magnoque peditum numero coactis, tribusque triremibus ac nonnullis navigiis instructis & armatis, magna Procerum & insignis nobilitatis virorum caterva comitante, terrestribus & navalibus copiis Albintemelium petit: satis habuit in præsentia fines Intemeliorum late pervastasse, rebus urbanis ejus reditu poscentibus: triremibus igitur & ceteris navigiis ad obsidionem urbis relictis, Genuam revertitur, consiliis ita dispositis, ut, si Intemelii interea resipiscerent, laboribus belli & impensis pecuniarum parceret; si in vesania perseverarent, tum vero illos majoribus viribus insequenti anno repeteret: at Intemelii discessu exercitus periculo liberatis, pro eo, ut erratum agnoscentes ad sanitatem redirent, tantum animi & audaciæ fuit, ut etiam res Genuensium, nonnullis expeditis navigiis emissis, vexare non dubitarent, parvis subinde damnis eos carpentes, prædasque navium & mercium agentes; quæ tamen à triremibus, quæ sæpe adversus il-

A los mittebantur, illis reddebantur: audaciaque hominum impunitate alebatur; Genuensibus majore cura sacre expeditionis & rerum Syriacarum implicitis: qui eo anno decem triremes subsidio Christianis Damiatam obsidentibus miserunt: quibus, simulque Genuensibus terra militantibus, quorum haud exiguus in ea obsidione numerus fuit, præfuerunt Joannes Rubeus à Volta & Petrus Auria: quæ ea urbs tandem expugnata est insequenti anno ejus sæculi vigesimo; in quo idem, qui superioribus duobus annis, Prætor fuit Rambertinus, imperio ob laudatum regimen bis prorogato; cui in consilio octo cives, more Majorum, additi sunt: ejus expugnationis Pontificis Legatus Genuenses per epistolam suam certiores fecit in hanc sententiam scriptam: *Non ut vos lati eventus Damiatæ expugnata participes facerem, Genuenses, quam rem multorum literis & nuntiis, ac fama ipsa ad vos perlatam puto, has ad vos literas dedi; sed ut gratias, quantas maximas animus meus capere potest, vobis cum Pontificis, tum totius exercitus, qui in Syria Christo Domino militat, nomine agerem, ob prævalidum à vobis nobis, rebusque Christianis laborantibus submissum hominum & navium subsidium: quod cum per se ipsum gratum fuit; tum vero opportunitate ipsa in primis acceptum: eo enim tempore appulit, cum Christianus exercitus labore & tedio diuturna obsidionis, cum parva fructus spe, despondere animos cœperat: qui classis vestra tanquam labores urgendos renovatus: summum igitur hoc beneficium Damiatæ expugnata Christianum nomen vobis ac virtuti & pietati vestre debet: qui hoc paternum & avitum dedistis: qua merita cum in hac vita homines remunerari obstricti sunt, tum vero longe ampliora præmia in sempiterna illa ac beata à Deo constituta vos manent.*

Durabat interea bellum cum Intemelii, neque maritima obsidione à pravo consilio deduci poterant: missus est igitur Prætor ad Fanum Romuli Ubertus Advocatus, qui eos terra quoque urgeret; cum per idem tempus amplius quadraginta capita de illorum popularibus capta fuissent, & Genuam ducta, carceribusque inclusa: ad hoc Emanuel alter ex Comitibus Albintemelii ad stipendia Genuensium, fratre inconsulto, Prætoris opera transiisset: malis igitur fracti Intemelii, Abbate divi Andreæ & Raimundo Judice cive Intemelio, cujus familia, consiliis à reliquorum infania separatis, amicitiam fidemque populo Genuensi debitam constanti perseverantia perpetuo coluerat, operam suam interponentibus; de pace & reconciliatione agere cœperunt: seque cupidos sub obedientiam redeundi ostenderunt: repulsi sunt, simulata fide agere deprehensi, ad ingenium redituri, simul atque laxata obsidio foret: hoc bellum haud levibus impendiis Reipublicæ stetit; necessitate imposita quinis quibusque oræ Ligusticæ incolis aut stipendium unius militis numerandi, aut militem dandi.

Accessit hoc anno ad Fridericum Cæsarem, Romanam diadematis à Pontifice accipiendi causâ petentem, ab illo evocatus Prætor, cum egregia nobilium civium caterva: qui Cæsarem ab urbe Mutina ad Forum usque Corneli deduxerunt, porroque ire pergere recusarunt, per causam, quod id sibi non liceret, publici consilii injussu, ingrato animo Cæsaris & à civitate nostra alieno offensi, à quo nihil æqui impetrassent; quamquam Episcopus Metensis primum scribæ locum (qui honos amplissimus est) obtinens, ac gratia & auctoritate apud Cæsarem in primis valens, acres suas partes interponeret, cum magna animi in Genuenses propensi significatione, donis large ab illis cultus.

Longe acerbior insequenti anno, quo Lotorinus A. C. 1221. Martinengus Brixianus civis civitati præfuit, octo civibus assidentibus, idem Cæsar fuit: qui non modo nihil postulatum à Sorleone Pipere & U-

berto Novaria Oratoribus ad illum missis fecit: sed quæ jura in regno Siciliæ obtinebant perpetuo usurpata, illis ademit, necessitate adactis ad onera & tributa solvenda; ad hoc Alamano Costa Comite Genuensium amico & fiduciario Syracusis exacto, domoque publica à Margarito Messanæ illis donata ablata.

Interea civitatis curæ à ceteris negociis vacuæ omnes in bellum Intemelium collatæ sunt: quod multos jam annos finitimam Ligusticam oram infestam faciens, ac segniter & per dilationes atque intermissiones gestum, majore conatu acrioreque perseverantia sibi capeßendum Genuenses statuunt; cum Intemelii non suis dumtaxat viribus starent, tantæ in se populi Genuensis incumbenti moli haudquaquam per se ipsi pares; sed propinqua societate Comitum Provinciarum Narbon. magnæ potentia, magnarum opum Principis niterentur: qui rationibus suis minime aptum ratus Genuenses finitimos supra modum crescere, bellum hoc illorum visceribus hærens alebat: igitur Prætor trecentis cataphractis equitibus scriptis: ad hoc magnis copiis tam ex ditioni subjunctis hominibus, quam ab amicis & fœderatis Proceribus coactis, Fanum Romuli contendit, camque sibi sedem legit, ex qua, quæ belli usus postulare, ex propinquo administraret: ea re cognita Comes, metu ne Intemelii per timorem & laborum tædium aliquid mollius consulerent, ad eorum animos confirmandos se ipse Albintemelium confert: perculit animum Prætoris subitus ac nec opinatus ejus Principis adventus: ceterum, cum ille perexiguas copias adduxisset, de consilii sententia rem extrahere decrevit, sperans Comitem tædio victum brevi discessurum, quod & factum est: nam Comes ditionis suæ rebus multis de causis ipsius præsentiam poscentibus (ut sua cuique propiora sunt) brevi clam discessit, Gulielmo Corrignano quodam cum exiguo præsidio Albintemelii relicto: qui non satis adversus Genuensium intentam vim munitus, brevi, sibi consulens ipse quoque, discessit: quod idem per varias occasiones fecerunt complures ex iis, qui cum illo relicti fuerant: qua decessione non tamen Intemeliorum animi ita conciderunt, ut pertinaciæ finem facerent, acrem animi vim in sese defendendo adhibentes: qui, dum Prætor terrestres ac maritimas copias urbi admoveat, audaci eruptione facta, nonnullam hominum stragem ediderunt; in qua undecim cives Genuenses ceciderunt: ita ardens Prætor captivos Intemelios, qui Genuæ adservabantur, ad exercitum ductos produci in conspectum civitatis, ac pronuntiari jubet, nisi urbs sibi octo proximis diebus tradatur, sese captivis oculos effossurum: eo metu injecto Intemelii periculum imminens astu discutere aggressi sunt: poenitentiam enim admissorum simulantes, nonnullos spectatæ probitatis viros submittunt, qui iram Prætoris placare studeant; trecentique ex Intemelii sese in potestate Prætoris futuros atque imperata facturos jurant, clavibus urbis ultro traditis: ceterum insequenti die, cum Prætor nonnullos misisset, qui arcis Appiæ nuncupatæ possessionem capebant, atque à reliquis jusjurandum exigere, Intemelii recentis jurisjurandi fide & religione elusa, non modo nihil promissorum fecerunt, sed missos homines comprehendere conati sunt, ut eo pignore Prætozem ab animadvertendo in suos detererent: propeque factum est, ut astus effectum haberet: ceterum qui missi fuerunt, à nonnullis gratiam Genuensium captantibus clam moniti; urbe prope excedentes paratas insidias vitarunt. Hominum perfidia irritatus Prætor undecim ex captivis oculos illico effodi jubet: in Intemeliosque undique urgendos multimoda opera distineri coepit: nam primum fossa magnæ latitudinis & altitudinis circiter duo passuum millia ducta, in eam magnam partem fluminis mœnia urbis præterfluentis derivavit: quæ res perincommoda obses-

sis, ac perutilis obsidentibus fuit; compluresque machinas bellicas ac tormenta statuit, ex quibus ingentis magnitudinis saxa in urbem intorquebantur: ad hoc duo castella in cacumine collis, quem sancti Christophori vocant, urbi imminentis excitavit: fauces quoque fluvii, navi glareæ & saxorum plena demersa, muroque interius ducto, obstruere aggressus est; quodque mirum legentibus videri possit, in inferiori planitie prope littus, alteram urbem turribus ac mœnibus cinctam, exiguo temporis curriculo opere approperato, ne nocturna quidem quiete à labore data excitavit: quibus munitionibus Sorleonem Piperem cum duobus armatorum millibus præfecit: brevique Intemelios in eas angustias adduxit, itaque omnia illis arta fecit; ut multi fame macerati, urbe & avitis sedibus relicta, ad genua Prætoris & Genuensium advoluti supplices veniam petierint; atque in novam urbem incolendam concesserint; ex qua studiis cum Genuensibus conjunctis veterem urbem oppugnabant: ad quod consilium ceteri extrema necessitate subacti descenderunt: id Judices (quæ gens in fide erga populum Genuensem persancte ac perpetuo culta manserat) sponte initio obsidionis fecerant: at Prætor, cum Intemeliorum animi nihil tot malis flecterentur, agro omnibus belli cladibus late vastato urbeque arcibus & munimentis circumvallata, classe maritima ad obsidionem relicta, exercitu dimisso Genuam rediit; sperans Intemelios necessitatibus victos tandem casuros: cujus discessu Gulielmus unus ex Marchionibus Albintemelii Emanuelis frater, animis sumptis, contra fidem datam, ac iurando violato (quæ perpetua dominantibus disciplina est) à Genuensium amicitia ad Albintemelios transivit, Prætor ab illis creatus.

Ingens eo anno, ac mutuarum offensionum plena controversia inter sacrarum & prophanarum rerum capita, inusitato ad eum diem exemplo, orta est, à tali initio inductam: cum Prætor in incolas Fani Romuli pro nonnullis in Rempublicam admissis animadvertere decrevisset, Rubaldum Heliam, Decurione illi addito, eo misit, qui fontes puniret; illorumque agros in primis vastaret, ac bona diriperet; quod vocati ad causam dicendam imperium neglexissent: eam rem moveri sentiens Otho Archiepiscopus, sacram jurisdictionem lædi juraque Ecclesiæ imminui putans, cum illud opidum tamquam à divo Syro Ecclesiæ Genuensi partum pro suo jure sibi tum vindicarent Archiepiscopi, itinere raptim facto adventum prophani judicis antevertit; incolisque ditionis Genuensis, pro jure sacræ potestatis, imperat, ne quis opidanos Fani Romuli violet, illorumve res attingat; gravem poenam comminatus sacris interdicens, piorumque cœtu abigendi, si quis adversus edictum dicere, facereve audeat: qua religione mentibus hominum injecta, Judex ac Decurione infecta Genuam redierunt. Exarsit Prætor in Archiepiscopum; ira & indignatione amens ædes ipsas Archiepiscopi, ac res illius invasit, edixitque, ne quis illi vectigalia & tributa debita penderet. Hoc unum exemplum in civitate nostra editum est in sacros Antistites, illorumque res: in reliquis gloriari licet, nullam umquam civitatem Ecclesiæ obediens, ac dicto pastorum magis audientem fuisse; illorumque majestatem magis pie coluisse; atque à sacris rebus cupiditatem ac manus abstinuisse: reddita tamen Archiepiscopo sunt ablata insequentis anni ejus sæculi vicesimo altero, Spino Sorrefina Prætoris; ac simul jura, quæ tam in maritimis quam in terrestribus rebus possidebat, per judicium latum ab Episcopo Parmensi, & Abbate Tiliæti judicibus à Pontifice datis: ab illisque Archiepiscopus Genuam deductus est, & in suas sedes restitutus; controversia de Fani Romuli & Mulasanæ domatu à judicibus Pontificiis suspensa; atque in eodem statu, in quo prius fuerat, relicta.

At Intemelii ad extrema atque ad summam solitudinem adducti, assiduisque malis, atque aliis super alia cumulatim damnis confecti, cum praesertim nuper quaedam illorum navis ad littora opidi Corneti à tremiti Portusvenerensium in terram acta, ac littori illisa, magna pars vectorum, qui erant ex civitatis primariis, capta esset, ac Genuam adducta, necessitatibus subacti finem tandem pertinaciae fecerunt: supplicesque, Legatis Genuam missis, misericordiam implorarunt; sese urbem tradere, ac de impensis à Genuensibus in bellum factis, quantum tenuibus atque attritis opibus suis conniti possent, satisfacere paratos dicentes. Data venia est, utilitate publica irae praevalente: magisque honorificum visum, urbem servare, quam evertere; ipsique in ditionem accepti sunt, ac Praetor ad res stabiliendas, possessionemque traditae urbis Reipublicae firmandam, Albintemelium se contulit: duabusque arcibus, altera in cacumine Appii montis, altera in editissimo urbis loco, aedificatis; quarum alteri Marinus Bulgarus & Guilielmus Savinionius, alteri Ugolinus Bocucius & Otho à Myrto cum centeno utrique armatorum praesidio praefecti sunt; novaeque urbis mœnibus, Intemelii efflagitantibus, dejectis, rebusque constitutis, Sorleone Pipere Praetore urbi dato, Genuam reversus est.

Eo anno in Syria ingentes turbæ inter Pisanos & Genuenses excitatae sunt; acri praelio in urbe Ptolemaide, quam recentiores Aconem appellarunt, inter eos commissio: cujus causa cum nulla ab Annalibus tradatur, quam aliam nos divinare possimus, quam alto animo insidentia odia, ac perpetuam æmulationem, quæ inter se infensos populos per omnem quamvis levem occasionem armaret? Cum inferiores in pugna essent Pisani; periculum, cui sese aperta virtute eximere posse diffiderent, consilio improbandi exempli discusserunt: ignem enim tectis Genuensium iniecerunt; Genuensibusque ad exortum incendium existinguendum aversis, spatium datum est Pisani urbe excedendum: eo incendio turris Genuensium præcelsa atque ampla conflagravit. At Pisani copiis Hierosolymitani Regis in Pisanam nationem magis propendentis fulti, paulo post reversi ingentia damna Genuensibus intulerunt. Ceterum cum turbæ tandem conticuissent; ac Pisani per judicium ad damna Genuensibus data reficienda damnati essent: ac numquam tamen Genuenses jus suum obtinere potuissent; Berytum concesserunt: in quam urbem Genuensium commercia ab Acone averfa sunt, non prius restituenda, quam de injuriis & damnis satisfactum esset.

Ac ne civitas quidem ipsa eo anno turbarum expers fuit: quas Castellii (qua gente nulla eo tempore inquietior fuit, ac propter exsuperantem potentiam æqualis juris cum ceteris minus patiens) principes excitarunt, cum Balbis contententes; ac familia Camilla, & Belmusta, ipsæ quoque opibus validæ, inter se capitali odio dissidentes. Consopiti sunt exorientes motus prudentia & sedula diligentia Praetoris. Sed ne ora quidem Ligustica turbis & motibus intacta fuit: cum Dianenses ope Intemeliorum subnixi opidi Cervi incolas invasisent; ac Saonenses fines Naulensium infestis armis vexare aggressi essent. Compressi hi quoque motus ejusdem Praetoris virtute & consilio sunt: qui turbarum auctores haud passus est audaciam impunitam ferre; Saonensibus, Intemelii, Dianensibus pecunia multatis: quibus meritis assecutus est, ut ei in sequentem annum ejus sæculi vicefimum tertium imperium prorogatum sit: qui annus ab externis & domesticis motibus vacuus, totus per legationes ad Saracenos & Africanos Reges missas, ad pacem & amicitiam cum illis faciendam, & res Genuenses in illis regnis stabiliendas, traductus est: fuitque is annus Reipublicæ perutilis atque honorificus; compluribus opi-

A dis ditioni adjunctis, partim de veteribus Dominis emptis, partim populis sese ultro in ditionem Genuensium tradentibus.

At insequens annus vicefimus quartus ejus sæculi A. C. bellicosus fuit, Anfaldo Bononia Praetore, collegis nobilibus civibus illi de more additis: nam maritimi hostes, qui civitatem, gentemque nostram continenter in armis habebant, non modo aperto bello ac viribus duntaxat suis nos ac res nostras petentes, sed per cuniculos quoque oppugnantes, ipsius Liguriæ populos cum ingenio mobiles, tum jugi haud satis patientes, ad hoc accolas Proceres, qui civitatis in dies crescentem potentiam sibi exitiosam horrebant, auxiliorum suorum spe ad deficiendum incitabant: cum interea civilia quoque odia ac discordiæ subinde diligentia regentium compressæ, ac sæpe erumpentes, haud parum civitatem concuterent, ac publicam quietem turbarent: ad tot igitur incommoda, terrestria quoque bella accesserunt. Longobardi enim populi haud satis æquis oculis adspicientes nimis in dies civitatis nostræ convalescentes propinquas opes, animoque iniquo ferentes, Genuenses, jugis Apennini jam transscensis, novaque opida quotidie sibi adjungentes, imperium in plana Longobardiæ extendere cœpisse, arma Genuensibus intulerunt: principes moverunt iidem, qui propiores periculo erant, Alexandrini; occasione minimæ rei arrepta, nec satis dignæ tanto consiliorum apparatu. Capriatam enim & Arquatam haud obscura opida, quæ nuper in imperium Genuensium cesserant, sua sibi vindicantes, armis repetere aggressi sunt, æquitatem judicii à Genuensibus oblatam recusantes. Primum opus fuit, castellum Peretum furto tentare; ceterum, cum non fefellissent, cum damno & dedecore repulsi sunt: igitur, cum insidiæ non successissent, ad apertum bellum versi; Dertonensibus ac Mediolanensibus sibi foedere adjunctis; haud exiguis coactis copiis, arma ipsi opido Capriatæ inferunt: quo frustra ipso quoque tentato, agro late vastato, non minus irritum incepto, in sua revertuntur. Quibus injuriis commotus Praetor, non satis è publica dignitate esse censens, hostem repulisse, nisi animum quoque ipsum laceßendi indicasset, urbanis copiis peditum & equitum armatis, Gavium ditionis Genuensis opidum contendit: finesque Alexandrinos infesto exercitu ingressus, Montaldellum opidum, haud irritum eventu, aggreditur: quo capto, atque in ipsis Alexandrinorum oculis diruto, majoribusque damnis, quam quæ Genuenses acceperant, illis redditis, Genuam revertitur. Ceterum Alexandrini, Praetoris discessu animis resumptis, suis & foederatorum copiis Tassarollo admotis, captoque opido ac incenso, cladem acceptam ulti sunt: armisque Arquatam translatis, opidum tormentis ac bellicis machinis excitatis, oppugnare instituunt: ceterum brevi inceptum turpiter omittere coacti sunt: cum audissent Praetorem Genua cum copiis motum Valtabium usque opidum perrexisse. Impensarum in illud bellum factarum causa, certa tributa rebus tam mobilibus quam immobilibus imposita sunt, præter ordinarium onus equos & arma conferendi capitibus injunctum.

Majori motu, majoreque apparatu insequentian- A. C. no ejus sæculi xxv. cujus Praetor fuit Brancaleo Bononia Anfaldi superioris anni Praetoris filius, octo Nobilibus de more illi in consilio assidentibus, bellum repetitum est. Initium motuum fuit, consilium Gavii opidi hosti prodendi à Petro Bono Nobilibus in initum: cujus hominis tam stabilem in se & in Rempublicam fidem Genuenses rebantur, ut custodiam opidi & claves illi crederent: frustrata homines spes est, cum non fefellissent, à valido Genuensium praesidio ac custodia invigilante repulso. Ce-

Ceterum longe infeliciores exitu res hostium Genuenses tentarunt; quamquam læta initia fuerunt: nam, cum Ubertus Advocatus rebus Genuensibus transjuga præsidens, ac Petrus Ventus Prætor, Capriatæ copiis, quas Respublica in illis locis tum alebat, in quibus erant centum equites cataphracti, coactis, fines Dertonenses ingressi opidum Præcipianum expugnassent; redeuntes cum magna hominum & pecudum præda in insidias præcipitarunt: fusi-que, viginti septem equitibus, quorum magna pars cives Genuenses fuerunt, & quadringentis peditibus amissis, ipsi cum reliquiis sese Gaviū receperunt. Nuncius cladis iras Genuensium accendit: Prætor-que, quamquam erat adversa valetudine, itineri se dedit: quo noctu ac prælucentibus tædis raptim facto, Gaviū pervenit; opidumque ac cetera Genuensium loca præfidiis firmat. At Alexandrini & Dertonenses, felici successu animis sublatis; infesto exercitu fines Hastenses, quæ urbs cum Genuensi populo fœdere ac societate conjuncta erat, ingressi, arma circumferentes illorum opida oppugnare cœperunt.

Interea omnes tam Genuensium quam fœderatorum copię ad Prætorem convenerant; quæ fuerunt, præter peditatum, amplius mille ducenti cataphracti equites, in quibus egregia ala ducentorum cataphractorum equitum, qui singuli ternos equos ducebant duobus vicariis ad pugnam armatis infessos; quam Thomas Comes Sabaudius misit, à Genuensibus stipendio sexdecim mensuarum librarum in singulos equites conductam: cum stipendia præfectorum quinquaginta libræ essent, ipseque Comes stipendium centum mensuarum marcarum argenti acciperet, qui fontica causâ retentus adesse, ut convenerat, non potuit. Adfuit quoque cum egregia quinquaginta cataphractorum ternos equos ducentium ala Lotaringus Martinengus Brixianus, qui Prætor Genuensium fuerat; amore, quo Genuensem populum prosequeretur, tractus, honoresque sibi Genuæ habitos hac grati animi significatione sponte remuneratus. Adfuerunt præterea Comites Lavinia, Comites Albintemelii fiduciarii agri Lunensis, Otho & Henricus Marchiones Carrettani, Otho Marchio Clavessanæ, Marchiones Cevæ, Gulielmus Marchio Bosci, compluresque alii accolæ Proceres, ac primariæ Nobilitatis viri populorum dominatu insignes. Igitur Prætor periculo Hastensium fœderatorum motus, prævalidum trecentorum cataphractorum equitum cum nonnullorum peditum balistariorum manu subsidium, Ugolino equite ac Prætoris collega, & Petro Vento atque Uberto Advocato Ducibus, illis haud cunctanter mittit: quo Hastensium animi restituti sunt; quoque non modo urbem ab impetu hostium tutatus est, & illorum excursions repressit, sed haud exiguis quoque cladibus hostem affecit, fines Albanos ingressus, ac late populatus, cum sæpe excursionibus suis ad ipsa urbis mœnia terrorem belli conferret. Ceterum institutum cursum gerendarum rerum ac procedentium consiliorum mors Prætoris interrupit, morbo laboribusque belli ac vigiliis & curis consumpti. Vir strenuus atque impiger fuit; rebus invigilans, nullis in providendo & agendo seduli ac sapientis rectoris partibus umquam prætermisissis. Ejus morte sublatis hostes, ducentisque Mediolanensibus equitibus aucti, ex opido Serravalle, quo convenerant, sese ad Arquatam petendam comparabant: ceterum tumidam hominum orationem Genuenses factis statim retuderunt; qui, Sigencello uno ex Judicibus à Præatore adductis in demortui locum suffecto viro impigro & experienti, magnam exercitus partem Merlo Castellio, Ugone Grimaldo Ducibus ad Montanarium Dertonensium opidum tentandum miserunt, haud irritò incepto, machinis enim bellicis erectis, opidum,

A quamquam celso & arduo loco situm, tormentis verberatum decem octo dierum spatio ad necessariam deditionem, ipso hostili exercitu ex propinquo inspectante, compulerunt. Quo successu hostes fracti, bello omisso, multifariam dissipati, in sua quisque reversi sunt, magna parte agri Alexandrini, dum exercitus ad Gaviū fuit, incendiis, ruinis, direptionibus, ceterisque belli cladibus à Genuensibus late pervastata.

B Quibus rebus confectis, Genuenses mense Augusto in urbem reversi, in demortui Prætoris locum Ugolinum Madonnæ Damæ Bononiensem, in quinque, qui supererant, menses suffecerunt: quo eodem mense, Gulielmus Mallonius & Fridericus Grillus duo ex Prætoris assidentibus, ad stipendia copiis, quæ trans juga ordinariæ alebantur, numeranda profecti, in itinere, cum secum ducentos equites ducerent, opidum Boscum aggressi, magnam hominum & pecudum prædam egerunt: ad idem munus, duobus post mensibus, Jacobus Piccamilius unus ex octo assidentibus Genua profectus, prope factum est, ut in insidias ab Alexandrinis paratas incideret: discussum periculum est ab Uberto Advocato Præatore Gavii; qui, hostium consilio cognito, firma armatorum manu secum raptâ, insidiantes, cum dilucescere inciperet, adortus fudit, quinquaginta illorum captis, qui vincti Genuam missi carceribus inclusi sunt.

C Sequitur annus ejus sæculi vigesimus sextus; quo A. G. Prætor fuit Pecorarius à Mercato novo Veronensis, defectione Saonensium & Ingaunorum insignis, magnisque verborum certaminibus jactatus. Occasionem duo hi populi arripuerunt conventum, quos eo anno Fridericus Cæsar Cremonæ habuit: ad quos magna vis Italorum Antistitum, ac Procerum, Oratorumque civitatum Cæsarianas partes sequentium convenerunt: spes illis injecta est ex voluntate Cæsaris, quam à Genuensibus abhorreere fama ferebat: alebat eam spem Thomas Comes Sabaudius, Vicarius & Legatus rerum Italicarum à Cæsare creatus; qui sese illis apud Cæsarem adfuturum promisit, atque omnibus auctoritatis & gratiæ nervis pro illis connixurum, illorumque patrocinium & tutelam adversus Genuensium arma suscepturum. Hac spe inducti Saonenses & Ingauni, conventum obedientiæ jusjurandum dare Prætori Genuensi petenti recusarunt: se seque ac civitates suas ceteris urbibus Sabaudii procuratori subjunctis contribuerunt, totam Liguriam Occidentalem ad idem consilium sequendum auctoritate sua sese attracturos magnifica & tumida oratione polliciti, quin etiam vectigal falis, quo nullum opulentius esset, ad illum à Genuensibus averfuros. Mutuis igitur promissis animis utriusque inflatis; illorum Oratores ab Henrico Marchione Carrettano consiliorum particeps ad Cæsarem introducti ejusmodi oratione usi traduntur: *Si in nobis imperio tuo nos ac civitates nostras ultro sub-*

D *jicientibus, ac Sabaudium tuum Italia Vicarium & Legatum rectorem adsciscitibus, accipiendis, eaque deditione, auctoritate tua comprobanda, & rata habenda, non multo major res tua, Cæsar, quam nostra ageretur; esset tamen equitatis & fidei tua, sacro imperio subjunctas urbes, illiusque majestatem pie colentes, ab injuriis prohibere; nec pati, ab una aliqua civitate, quia plus viribus possit, reliquas civitates, quæ pari & eodem jure erga sacrum Imperium sunt, servitio injusto premi; quod nunc Genuenses faciunt, superbum dominatum in nos exercentes; cui nullam juris speciem prætexere possunt. Tradiderunt se quidem illorum fidem patres, ac majores nostri; sic sperantes, sese ad exterorum impetus tutiores fore: verum permagno hac tutela illorum posteritati stetit: quam Genuenses ad dominatus interpretationem revocant, durissimo servitutis iugo nos prementes: quæ servitus cum per se ac semper gravis est; tum vero ea, quæ liberis populis impen-*

impeditur in primis abominanda, cum quod pro uno plures Domini habendi sunt, qui omnes superbiam, avaritiam, ac reliquas indomitas libidines in miseros subjunctos exercent; tum quod non contenti civitatum sibi parentium imperio, eas viribus atque opibus exinanire atque enervare multifariam student; negotiationem ac mercatoria commercia omnia, per causam conservandorum portuorum, à portubus civitatum subjunctarum ad se avertentes; ac textrinam, & lanificium, sericificium, quibus plebs alitur, prohibentes: qua recogitur plebs, paternis sedibus relictis, in dominam urbem commigrare; omni alia victus parandi via praecisa: sic fit, ut civitates subjunctas brevi habitatoribus vacuas exsanguesque & enectas pedibus suis proculcandas subjiciunt. Ac nos multa gravia & acerba patienter adhuc tulimus; & passuri fortasse in posterum fuimus: ceterum miserorum Intemeliorum recens eventus nos saluti nostrae indormientes tandem experrexit: quos, animum tyrannicum nudantes Genuenses, omni libertatis specie prorsus adempta, jugo suo subjecerunt; arcibus in urbe excitatis, praesidio imposito, jureque creatorum Magistratuum abrogato, Praetori ab ipsis misso illis subjunctis: qui idem casus ad nos recidisset, nisi alieno malo docti animos ad nostra respicienda adiecisset: quamquam quid nos ista commemoramus? aut cur perspicuum jus nostrum istis ambagibus controversum facimus? jugum Genuensium excusimus; neque sub illo omnino esse volumus, quod si non licuisse nobis Genuenses contendunt; doceant oportet, quo jure illis obstricti simus; quando, quove tempore, nostrarum urbium dominatum illis tradiderimus, quamquam ne hoc quidem stabile jus illis in nos faceret: neque enim ulla deditio rata esset injussu Caesaris facta; sub cujus imperio civitates nostrae sunt: quod si major potentia juris vim habet, si qui minus possunt, potentiori servire obstricti sunt, si nihil inopi adversus opulentiores relinquatur juris; (hoc enim unum dicere Genuenses possunt, quod non magnopere dissimulant) quid erit jam, quod leges ac Magistratus queramus? aut cui usui erit Caesariani Imperii majestas? supervacanea jam posthac erunt tribunalia; si, quae intendimus, non jure, non legibus, sed manu, vi, armis sunt obtinenda: quid? quod (ut initio proposuimus) res sacri Imperii agitur? cujus jura tueri & amplificare obstrictus es, Caesar: à quo urbes nostras abstrahis, si eas Genuensibus subesse permittis: neque enim eas tamquam beneficio suo sibi concessas ac fiduciarias, sed tamquam suas atque armis partas possidebunt: quae res cum per se in te & in sacrum Imperium injuriosa est; tum vero rebus, quas secum trahit, detestanda: potentiam enim, ac simul superbiam, & contumaciam Genuensium auget; illosque in posterum minus tibi dicto audientes facit, majoribus opibus fultos, cum praesertim illi (tanta est in hominibus superbia) sese re liberos aperte preferant: quamvis quandam juris camerae Caesarianae speciem, rem, ut ipsi distitant, inanem, verbis non repudient: pro sapiente igitur hoc facies, Caesar, si arrogantium hominum superbiam, viribus illis praecidendis, compresseris: neque jura Romani Imperii, tot laboribus ac tanto sanguine parta, negligentia labi sines: Genuensesque, tota Occidentali ora illis adempta, quam omnem nos auctoritate & exemplo nostro ad te attracturi sumus; veluti artissimo vinculo constrictos, ne oculos posthac adversus imperium tuum attollere possint, (id quod saepe illos fecisse, tu & Majores tui experti estis) obedientiores tibi reddideris; Liguriaque viribus pro tuis uti poteris.

Adversus ea Genuensium Legati in hanc sententiam discessisse dicuntur: Callide, Caesar, fecerunt Saonenses & Ingauni, qui parum aequitate causa sua confisi, tuam, Caesar, admiscuerunt utilitatem tuam ac sacri Imperii ingerentes, quasi ulla res apud magnos & celsos Principes utilis esse possit; quae ab honestate sit sejuncta: qua utilitate, ex sua natura alios fingentes, te transversum agi posse speraverunt: nostrae vero causa veritate in primis & justitia nittitur; cujus

A longe graviora fore apud te, Caesar, tanti fastigii Principem, in quem omnium Christianorum oculi sunt conversti, quam utilitatis momenta speramus: quamquam ne in hoc quidem utilitatis loco commodius Saonenses & Ingauni, quam nos consistant; cum docuerimus nihil immo à rationibus sacri Imperii alienius esse, nihilque illi damnosius, quam Liguria opida & civitates à nobis abstrahatas aliis regendas dare: quam rem Majores tui, Caesar, reputantes, totam Liguriam, quantum à flavio Varo ad Macram in longitudinem patet, nobis contulerunt; eamque, quod ad usum & facultatem parandarum classium attinet, dicto nobis audientem esse diplomatibus suis, quae exstant, imperarunt, sapienter considerantes Ligusticam oram incursonibus piratarum & Saracenorum expositam, si multas partes distracta sit, quae suum quaque consilium separatim habeant, salvam esse ad illorum impetum non posse: quod si in unum corpus conflatur, illius vires conjunctas non modo ad illam tutandam satis potentes, sed formidolosae insuper exteris & Christiani nominis hostibus fore: coherere autem inter se hanc unius corporis compagem non posse, ac cito dissolvi necesse esse, nisi illi caput detur, quod cetera membra regat, cuique ipsa pareant: hoc autem caput nullum esse aliud posse, quam urbem nostram opibus florentissimam, viribusque longe ceteras antecellentem, ne ipse quidem Saonenses & Ingauni, quamquam homines premortui pudoris sunt, negaverint: quae vires paullatim ac summo labore assiduisque discriminibus collecta argumento quoque sunt majoris virtutis & industriae, vividiorisque ingenii, ac praestantioris consilii: quibus rebus qui prevalent, iis inferiores, natura ipsius jure, parere obstringuntur: id quod sapientia professores tradunt; atque id, quod omnibus temporibus & apud omnes gentes usurpatum est; quod sapiens consilium usus rerum magister comprobavit: neque enim in Syriacis expeditionibus, & in Mauris Almeriensibus, & Dertusiensibus domandis, tam amplis ac firmis Ligusticis classibus Christianus orbis uti potuisset; si non ab uno corpore accersenda, sed à pluribus membris fuissent corroganda, ut omittam Corsicam & Sardiniam insulas, expulsis Saracenis, illam à Genuensibus solis, hanc ab iisdem illis Genuensibus, Pisanis sociis, Christiana Ecclesia restitutas; Musaitumque Regem captivum à Genuensibus Casari traditum, sese atque urbes suas juris Romani Imperii esse, illique subjunctas asserunt Saonenses & Ingauni: de illorum igitur rebus pro arbitrio tuo statuere potes, Caesar: quid igitur? in rebus Ligusticis constituendis, duorum ne imbecillium populorum, ac nullis meritis in Rempublicam commendatorum libidinem sequi debes, Caesar; an utilitatem publicam spectare? quae utilitas necessitatem hanc sibi unius hujus corporis tuendi, neque illius in plura membra distrahendi, exprimit. Neque tu, Caesar, Orientalem oram Genuensibus ademptam, ac Sabaudia subjunctam ad imperium transfers, sed rectorem tantum mutas; atque à rerum maritimarum Antistite populo ad earum prorsus signarum hominem, nullumque in illis usum prorsus habentem, ab illarumque omni cogitatione & tractatione, natura & voluntate, & vero (rationibus suis & regni sui ita ferentibus) remotum, regimen ingenti malo publico avertis. Invidiosa vocabula lanificii adempti, ac commerciorum ab eorum portubus avertendorum, somnabant Saonenses & Ingauni; etiam, si diis placet, futurorum divinatione ad nostram invidiam abutentes: quae res si ab aliis populis aliquando facta sunt; eas nos nunquam fecimus, ac ne cogitavimus quidem: nam, quod casus Intemeliorum se formidare dixerunt; tantum abest, ut eos nos hoc metu liberemus, ut contra moneamus; si similia atque illi admittere perrexerint, prava consilia aequae in ipsorum caput recasura: hominum enim arrogantia & contumacia, quam patientia nostra diutius aluit, cum saepe moniti finem peccandi non facerent, comescenda ac vinculis constringenda, ne se commovere posset, tandem fuit: ad eandem necessitatem ne nos invitos trahant Saonenses & Ingauni, si sapiunt, caveant:

X

jugum

Jugum quidem nos nullum illis imponere umquam stuidisse, vel ea sit fides; quod suis illos legibus uti, suis Magistratibus ab ipsis creatis parere permisimus: optime igitur rebus suis consuluerint, si nostra facilitate nimium abutendi finem fecerint; ac caverint, ne insania sua sese illo laqueo induant, à quo nos illis injiciendo voluntate & ingenio remotissimi semper fuimus.

Iniquus Genuensibus Cæsaris animus nihil veritate causæ inflexus, Sabaudii, & Saonenfium, atque Ingaunorum factum non improbat; quod tamen illis, nulla spe opis suæ ostensa, suis ipsorum viribus tuendum & defendendum reliquit; quibus rebus Genuæ cognitis, confestim classis quattuor triremium ac complurium varii generis navium comparata, & instructa est; ac Belmusto Vicecomite primo, deinde Amico Stralleria in ejus locum suffecto præfectis, adversus Saonenses & Ingaunos missa; quæ maritima commercia rebellibus urbibus clauderet; nonnullæ quoque naves ad Monœcum & Abintemelium stare jussæ sunt; quæ salem Albingaunum & Saonam subvehi prohiberent: missusque quoque est Signium, quod castellum Saonæ & Naulo interjectum est, Nicolaus à Cruce, cum quinquaginta cataphractis equitibus; qui terra quoque Saonenses urgeret; & Naulensibus, quorum perpetua & constans fides in populum Genuensem existit, præsidio esset: ad hoc publicata bona duorum rebellium populorum sunt; ac toto orbe terrarum, ubicumque Genuensium commercia & domicilia essent, prædæ & direptui data.

Ancipiti bello, hinc à Liguribus, qui defece-
rant, illinc à Longobardis civitati imminente,
A. C. Prætor insequentis anni ejus sæculi vigesimi septi-
mi, qui fuit Lazarus Girardini filius Girandonius
Lucensis, magni animi & consilii vir, animos
Genuenses titubantes confirmat; atque ad univer-
sas copias tam civitatis quam foederatorum con-
trahendas hortatur; initiumque à Liguribus do-
mandis faciendum suadet, cum multis ac firmis
rationibus docuisset, nihil esse, quod novo hoste
Sabaudio tanti nominis Principe frangerentur, aut
debilitarentur, qui specie quam re terribior ef-
fet: latis quidem finibus cum Principem impera-
re, compluresque populos subiectos habere; cete-
rum bella externa pecunia ali, cujus ipse semper
egentissimus fuerit: ad hoc imperium Liguriæ,
sterilis & aridi soli Provinciæ, non fructu suo,
quem exiguum ferat, ab exteris Principibus ex-
peti; sed opportunitatibus ab iis tantum quæri,
quorum consilia res maritimas spectent: à qua co-
gitatione Sabaudium mediterraneum hominem lon-
ge remotum esse, ut nihil sit, quod in rem nulli
fructui, nullique sibi futuram usui hominum &
pecuniarum impensas faciat; accepisse quidem il-
lum in ditionem Saonenses & Ingaunos sese ultro
tradentes: qua in re nihil damni faceret: ceterum
eos eadem facilitate, qua acceperit, deserturum:
cumque intellexerit, Genuensibus ipsam acri bel-
lo petentibus, obstinateque in illo à necessitate
ipsa perseverare coactis, susceptam rem majoris
impendii ac laboris quam operæ pretii esse, inceptum omis-
surum.

Consilio probato, civitas in ea, quæ usus instan-
tis belli postulabat, comparanda & expedienda
multimodam operam confert: antiquissima fuit an-
nonæ cura, undique circummissis navibus accer-
sitæ: cujus ingens vis convecta in finitima Saonen-
sibus opida, Varaginem, Signium, Naulum, in
usum exercitus distributa est, magnusque equitum
& peditum numerus ex agro Lunensi, ex aliisque
locis tam ditionis Genuensis quam foederatorum in
urbem contractus: quas omnes, simulque cum
illis urbanas copias in aream Sarzani coactas Præ-
tor, ad animos & corpora ad bellum acuenda &

A paranda hortatus, vexilla signiferis distribuit:
ad hoc curas inferendi & propulsandi belli par-
tiens, dum tormenta & ceteræ belli machinæ
Genuæ fabricantur, ne illud tempus interea se-
gne atque inane abeat, in Longobardiam propere
contendit; locaque hosti opposita validis præfidiis
firmat, atque in urbem reversus omnibus, quæ
usus belli postulabat, paratis, nonnullis prius dis-
cordiarum causis inter tum præpotentes Piperorum
& Embrunorum gentes, quæ magnam civitatis par-
tem affinitatibus & clientelis complectebantur,
compositis, rebusque urbanis constitutis, ex ur-
be cum omnibus copiis movet; in quibus fue-
runt plus quingenti cataphracti equites peregrini
stipendio conducti: prima castra ad opidum
Varaginem facta sunt: quo in loco adversa ma-
ris tempestas coorta eos nonnullos dies tenuit:
quæ cum tandem desævisset, Albisolum contendunt:
cujus opidi arx prævalido præsidio ab hostibus
firmata erat; eam acri oppugnatione urgere insti-
tuunt: in qua re Prætor occupato, Simon Stel-
la necessitatem ad consilium gratiæ captandæ fle-
ctens, tuto accessu impetrato, arcem Stellæ Ge-
nuensibus tradit; quæ res animos rebellium haud
modice fregit, destitutione illa in ipso initio quæ-
rendarum rerum perculos. Auxit timorem dedi-
tio Albisolæ paucis post diebus ab opidanis facta:
C cursum victoriæ nonnihil retardavit iterum adver-
sa orta tempestas: quæ cum cessasset, porro ire
perrectum est, castraque in planitie urbi Saonæ
& ædi Cæciliæ interjecta locata: duobusque post
diebus hostium præsidium ex monte urbi immi-
nente, in quo sita est ædes Reparata, valida im-
pressione facta dejectum est; magna Saonenfium,
Ingaunorum, Sabaudiorum edita cæde: monte
occupato, copiarum ipsius urbis mœnibus sunt admo-
tæ, bellicæque machinæ erectæ, ac mœnia tormen-
tis quati cœpta, agro prius circa hostiliter popula-
to. Haud leviores in deficiendo quam in se defenden-
do inconstiores (qui fere est imbecillium mos)
D Saonenses fuerunt; qui intelligentes suarum virium
non esse bellum adversus tam potentem propinquam
civitatem, expertique quam parum in Sabaudi-
cis auxiliis, quorum spe rem fuerant ingressi, po-
nendum esset, ne pravum consilium pertinacia in-
super cumulatam implacabiliores in se Genuensium
animos faceret, ad hoc Sabaudiorum & Ingau-
norum auxilio deserti, qui nocte fugientium in
morem discesserant, sese in potestatem Prætoris,
libero de se ac de rebus suis illi permissio arbitrio,
dediderunt: cum cruces gestantes ad genua Præto-
ris procumbentes suppliciter misericordiam victo-
rum, ac veniam erratorum implorassent, data est
E venia, nihilque in corpora sævitum; iraque omnis
effusa est in ipsam urbem, fossis impletis, muris
ac portis civitatis dirutis; inchoata mole, quæ por-
tum faciebat, disturbata, arceque in editiore ur-
bis parte ædificari decreta. Ad fortunam consi-
lia accommodantes finitimi Proceres, qui fuerunt
Domini Culiani, & Otho Marchio Carrettanus,
sese in fidem Genuensium tradiderunt, atque in
imperia jurarunt; præteritorum venia à Carretta-
no petita.

Quibus rebus confectis Prætor porro ire per-
gens Finarii substitit; quo in loco obvios habuit
F Ingaunos: qui, illorum Episcopo verba præ-
eunte, supplicibus vocibus humi prostrati ve-
niam postularunt, sese atque urbem tradentes. I-
dem fecit Otho Clavesianæ Marchio ac frater de-
fectionis focii: Prætor Albingaunum accedens,
insulam atque arces omnes præsidio firmat; Ge-
nuamque repetens, sexaginta Ingaunos civitatis
primores, ac centum quinquaginta Saonenses se-
cum duxit, obsidum loco in custodia adservan-
dos; dum Joannes Spinula Saonæ, & Henricus à
Volta

Volta Albingauni, Prætores relictæ, inchoata omnia perficerent: Prætor Genuam reversus; partæ victoriæ ac Liguriæ pacatæ memoriam anniversario facto die divo Joanni Baptistæ festo celebrandam decrevit. Liguriæ pacatæ cura transjuganarum rerum continuata est: in Mediolanenses se pro communibus amicis interponentes iudicium & arbitrium omnium rerum rejectum est: falsi Genuenses opinione sunt; parum sibi æquos iudices, ac nimis in adversarios propensos Mediolanenses experti; cum tamen Mediolanenses Capriatam Genuensibus adjudicassent.

Otium ab externis bellis urbanos motus excitavit: coierant per ea tempora bona pars primariorum civium ex Nobilitatis corpore, complures societates honorum & munerum publicorum inter se partiendorum: qui clandestina ope mutuo sese juvantes, eo artificio res ducebant, ut soli homines ex his societatibus in Magistratibus, in classium præfecturis, in legationibus essent: omnesque publicæ procuraciones inter earum societatum homines, velut in orbem irent, ceteris exclusis: vehementer animos ceterorum civium artificium detectum ac consilia palam facta exasperarunt: qui omnes, tam ex Nobilitatis quam ex plebis corpore, studiis conjunctis in eas societates conspirarunt, Duce Gulielmo à Mari assumpto, viro magni animi & consilii; Prætor ipso consiliorum particeps occulte assentiente, cui cæ societates, quæ essent civitati in factiones ac studia partium distrahendæ, minime probabantur.

Interca Prætori necessarium iter in patriam incidit: quo profecto, Gulielmus in vires & robur conspirationi addendas studia intendit; mandataris & scribis tota Ligustica ditione circummissis, qui quantos plurimos possent in societatem consiliorum traherent: multi nomina in conspirationem dederunt, seseque illi adscripserunt; ut rerum novandarum cupiditas perpetuum est vulgare ingeniorum vitium. Cum res procederent, Gulielmus successu elatus ultra officii fines proventus est, (adeo in magnis rebus modus difficilis est) hominesque, dum in publicam libertatem opprimentes ac prægravantes insurgunt, eam ipsi opprimunt; quamque regnandi libidinem in aliis ulcisci tendunt, ea sese ipsi abripi sinunt: nihil igitur, quod ad auctoritatem & venerationem sibi adjungendam faceret, prætermittens Gulielmus, hortatu suorum ædes ac turres gentis à Volta, quæ erant in media urbe, occupat; tamquam principatum quandam civitatis, in ædes publicis consiliis aptiores commigrando, aperte præferens.

Reversum Prætoris poenitentia consilii cepit, cum rem nimis ultra processisse offendisset; Gulielmumque seductum leniter increpuit; qui longe libertati graviora admisisset, quam quæ ipse in aliis damnasset, atque in quæ veluti liberæ civitati non ferenda conjurasset: compluribusque bonis & quietis amantibus civibus adhibitis, remque leniter ducendo, inchoatum malum tandem discussit; cum Gulielmus in potestate Prætoris ac bonorum fuisset; vir minime ingenio factiosus, neque in suspectis contentionibus pervicax: plus operis fuit in plebe ac ditionis incolis pacandis; qui multa pro haud sanis fecerunt, portis urbis ac turribus sacrarum ædium occupatis.

Rebus urbanis in tranquillum redactis, curæ in res ditionis collatæ sunt; insequentisque anni Prætor Gottifredus Puduanus cum Legatis Mediolanensibus Capriatam profectus est, ad possessionem opidi Reipublicæ stabilendam; ac controversiarum reliquias cum Alexandrinis & Dertonensibus in re præsentis constituendas: ceterum ab Alexandrinis improvise circumventus, parum à summo discrimine abfuit: qui cum haud

exiguas copias sub signis supervenerunt, fideque data & jurejurando neglecto, tanto impetu opidum invaserunt, ut Prætor vix satis spatii ex eorum manibus evadendi, seque Gaviū recipiendi, habuerit: quem opidani secuti sunt, sua quisque, quæ in illis temporis angustiis auferre potuerunt, secum portantes. Alexandrini opidum captum, ne sacris quidem locis parcentes, diripiunt & incendunt; cum crudelis ira ad mortuos quoque pervenisset; quos, inaudito ferinæ crudelitatis exemplo, è sepulcris erutos pinnis mœnium foedo spectaculo suspenderunt. In miseros Capriatenses extorres, omniumque rerum inopes omnia Genuensium munificentia officia exstiterunt: quibus de necessariis rebus large subventum est. Aucta hoc quoque anno ditio est opulentis opidis Diano, Portumauricio, Castellaris, Tabia, nec non vicis sancti Georgii, Dulcedo à Marchionibus Clavessanæ Reipublicæ donatis; certa anniversaria pensione sibi referata.

Bello Alexandrino renovato; cum illi locum A.C. dirutæ Capriatæ tuguriis erectis communissent; 1229. à Genuensibus insequenti anno ejus sæculi vicesimo nono, Jacobo Balduino Bononiensi Prætoris, quingenti equites ad id bellum decreti sunt: quorum quadringenti à civitate ipsa, centum à ditionis incolis conferebantur: quo anno ditio egregio Nicææ dominatu imminuta est; Comite Provinciæ Narbonensis, qui cum magnis equestribus & pedestribus copiis eo contendit, proditione nonnullorum partes ipsius sequentium in urbem, atque in domos & turres suas introducto: restiterant primo acriter Rubaldus Baratterius, Oggerius Biradatus, Lanfrancus Richerius; qui res Nicæenses Genuensium nomine procurabant: ceterum cedere tandem coacti, urbem Comiti reliquerunt; cum exiguum subsidium Genuam missum, quod duobus comitatibus quattuor Genuenses triremes, Othone Mallonio præfecto, in urbem invexerunt, ad tantam vim sustinendam non satis fuisset.

Insequens annus ejus sæculi tricesimus finem A.C. tandem bello Alexandrino imposuit; opido Capriata Genuensibus adjudicato à Sardo Archidiacono Albenfi, & Gulielmo hospitalis sancti Joannis procuratore, ac Bartholomæo Vicentino Monacho Dominicano, in quos ab utroque populo arbitrium controversiarum rejectum est: cujus opidi pacatam possessionem insequenti anno Genuenses tandem adepti sunt.

Incidit eo anno casus, qui ab Annalibus non prætermittendus, ne nobis quidem silentio prætereundus visus est. Gulielmus quidam Intemelius, Roscius Molinellus, Durantes & Recuperus Portusvenerenses haud obscuri nominis piratæ maria circa latrocinis infesta faciebant: quæ res haud mediocrem invidiam & infamiam civitati nostræ constabat, tanquam ea publici consilii auctoritate, vel certe permisso fierent: nonnulli igitur adversus illos triremes armatæ sunt, Ansaldo Bufferio viro impigro & strenuo præfecto: qui piratas diligenter perquisitos ac captos Genuam duxit: quos Prætor pro eo ac meriti erant, capitali supplicio damnavit: misericordia hominum prava non modo vulgi, sed Procerum quoque studia commovit, magnasque turbas excitavit; cum vulgo homines omnis generis & ætatis, virique ac mulieres promiscue veniam dari vociferantes ac prope minaciter poscerent: eoque infamiae res pervenit, ut cum Prætor ad locum destinatum si populi exactor accederet; seditio contra illum & collegas commota sit; ingensque lapidatio facta: qua Prætor equo superfuso ad terram corruit; crureque fracto inter manus domum reductus est;

ex quo vulnere paullo post decessit: tandem seditione compressa, latrones furca suspensi sunt; quorum duo illico exspirarunt. Recuperus Portusvenerensis & Gulielmus Intemelius, cum diu penduli animam efflare non possent, re nova animis obstupefactis, ac populi faventis clamore laqueis incisis, viventes in carcerem reducti sunt: rogati quid illos servasset, divi Joannis Baptistæ numen sibi adfuisse responderunt, cujus cineribus ex imo corde salutem suam commendarint: re in religionem accepta, liberati sunt; multum moniti, ut à piratica facienda in posterum abstinere; poenam non vitaturi, si ad turpem quæstum rediissent; hanc ab illis tanti collati beneficii gratiam liberatorem Joannem in primis reposcere. In demortui Prætoris locum Rodolphus à Volta unus ex equitibus ab illo secum ductis suffectus est.

A. C. Insequenti anno ejus sæculi tricesimo uno, Ugolino Rubeo Parmensi Prætor, Capriatam missi sunt Simon Ventus & Gulielmus Borbonofus. Nobilitatum est hoc opidum diverso modo à ceteris locis: illa enim clarum nomen ab ingenti aliqua in illis locis edita pugna fere acceperunt; at hoc, quod causam tantorum motuum præbuerit, Liguriamque & magnam Longobardiæ partem diuturno bello inter se implicuerit, insigne factum est.

Eo anno Græcus Cæsar immunitates populi Genuensis in transmarinis locis abrogare aggressus est: destitit incepto Genuensibus acriter resistentibus; veritus iram præpotentis nationis sibi irritare: quam eandem iram, cum magno suo malo, Helimelmes Muleasses Maurus, Murciæ & Carthagine regnans, sibi commovit; mercatoribus Genuensibus contra fidem & pacta male tractatis: qui eo facto irritati decem triremes, Carbone Marcello & Nicolao Spinula præfectis, subsidio miserunt Helimelmi Muleassi Regi Settæ (quæ urbs sita ad littus est in freto Herculeo) bello à Murciano & Carthaginensi petito, quæ classis magno illi usui fuit. Ea classis ad egregiam operam Settensi Regi navatam, dum in illis locis fuit, haud contemnendum addidit erga Rempublicam operæ pretium; amicitia cum Mauro Rege, qui Hispalim urbem tenebat, Genuensi nationi perhonorifica ac commerciis perutili, juncta: qui Rex, ad effusum suum in Genuenses animum significantum, illorumque voluntates ad se attrahendas, octo byzantium millia dono Reipublicæ misit; atque equum eximium cum soleis argenteis ac textili aureo instratum: quæ munera à classe vecta rectoribus reddita sunt; equusque tota urbe ad plaudentis populi spectaculum circumductus. Magna pars hujus anni insumpta est in legationes ad Orientales Principes missas, ad amicitiam & foedera facienda.

Eo anno Fridericus Cæsar in urbe Ravenna conventus habuit; ad quos Genuenses quoque per epistolam comiter & humaniter scriptam vocavit: obsequendum voluntati Cæsaris decretum est: profectus est igitur Prætor cum octo ex civitatis primariis Roscio à Volta, Joanne Guercio, Tedisio Flisco, Anfaldo Nigro, Rubaldo Alberico, Almerico Panfano, Anfaldo à Mari, Joanne Spinula, duobus additis Judicibus. Contentio orta est cum Cæsare, causa Pagani à Petra sancta civis Mediolanensis, Prætoris in insequenti anno ejus sæculi tricesimum alterum à Genuensibus creati, cum Cæsar ostendisset, non placere sibi, Prætores ex urbibus, quæ à sacro Imperio defecissent, quale tum erat Mediolanum, evocari: Genuensesque sententiæ retinentes fuissent: quæ res ingentes irarum stimulos Friderico viro perciti ingenii subdidit: quibus impulsus Genuenses in regno Siciliæ negotiatores, illorumque

A. bona, capi, & in custodia adservari jussit, eodem mandato in Tuncetanum regnum & in Syriam dato. Ægre lata Genuæ res est, quæ ingentia certamina præbuit; aliis consentibus, ulciscendam injuriam, ac consilia proinde & societatem cum ceteris Longobardiæ urbibus, quæ arma in Fridericum tulerant, jungendam; aliis ad quietiora consilia inclinantibus, ac consentibus Fridericum placandum, ejusque gratiam recuperandam: ceterum tantæ rei decreto suspensio; ne interea, dum sententiis in urbe variatur, res Genuenses gravem aliquam plagam acciperent; missæ sunt quinque triremes, Gulielmo Mallonio præfecto in præsidium rerum Sicularum & Tuncetanarum: quæ classis, rebus Siculis in tutum redactis, duabus corbitis egregie ad bellum armatis, aucta, in Syriam ad majorem rerum molem navigavit: quæ Provincia cum omnia fere Genuensium negotia continerentur, classis decem triremium ac duarum corbitarum, Anfaldo Boleto & Bonifacio Panfano præfectis, superiori addita est: neutri tamen classi, cum littora Syriaca tenuissent, quidquam sane memorabile faciendi occasionem præbuerunt Friderici copiarum sub adventum classium fuisse, ac fere deletæ, quarum Dux sese cum paucis Tyrum recepit: quæ res Genuenses, quorum classis Aconis portum subiit, maris potentes fecit: cum Cæsariana classis, animis ob terrestrem cladem imminutis, portibus latens in apertum mare prodire non auderet. Nuncius acceptæ cladis imitem Friderici animum tandem flexit; qui ad præsentem fortunam consilia accommodans, Montanario Marino & Piccamilio Oratoribus Genuensibus ad se vocatis, ac benigne & comiter appellatis, homines & bona Genuensium in rebus suis capta dimitti imperavit.

Fœdus atque improbandus barbaræ stoliditatis mos hoc anno à Prætor in privata cædis judicio à Longobardorum legibus, cum magna bonorum & sapientium civium offensio, repetitus est. Eadem navi patriam ex insula Cipro repetentes vehebantur Othobonus Helias & Jacobus Grillus: altercatione & contentione inter illos orta, eaque communium amicorum interventu sedata, navi cursum tenente, Helias nusquam apparuit: omni suspicione in Grillum derivata, homo navi Genuam appulsa comprehensus, ac carcere inclusus est: Prætorque anquirente; cum Grillus delictum constanter inficiaretur; ceteris probationibus deficientibus, ad barbarum remedium descendit Prætor: duos enim optiones de ferreo singulari certamine decernerent: quorum alteri Cacciæ Florentino defensio Othoboni non apparentis actoris; alteri Pistello Novocomensi defensio viventis Grilli rei obvenit: cum concurrissent, victoria penes optionem non apparentis actoris fuit; Prætorque de Grillo tamquam legitimo judicio damnato capitale supplicium sumpsit.

Non solum armis civitas nostra tempestate, sed auctoritate quoque apud finitimos populos & fama consilii atque prudentiæ valebat. Missi sunt igitur insequenti anno ejus sæculi tricesimo tertio, cujus Prætor fuit Pegolottus Ugucionis filius à nobili gente Girardina Florentinus, Lucam, civibus petentibus, duo Legati, Simon Ventus, & Joannes Streggiaporcus, (ii postea Salvagi fuerunt) qui Lucensium res gravibus civilibus discordiis agitata prudentia & moderatione sua pacarunt. Impetratum quoque est eo anno à Pontifice, ut Archiepiscopus à canonicis sacerdotibus civis Genuensis perpetuo legeretur; Joanne Pipere & Nicolao Guizulfo Oratoribus ea de causa nominatim missis.

Eo anno rusticanorum armis res in Liguria turbari coeptae sunt: cum incolae vallium Arociae, Oneliae, Turae, ingentibus motibus contra Episcopum Ingaunum & Clavessanæ Marchionis dominantes confurrexissent: qua de causa, Episcopus Taliaferus unus ex Marchionibus, & Amabilia uxor Othonis Marchionis defuncti, Genuam venerunt opem orantes: missi illis auxilio sunt Corradus Castellius, Gulielmus Ventus, Emanuel Auria: qui, haud contemnendis copiis ex ditio-
ne Genuensi corrogatis, ac bipartitis, rusticanos bifariam adorti sunt, infelici eventu, ab illis fusi & fugati: quo successu rusticani arrogantiores facti in ipsos Genuenses audaciam verterunt, per omnem circumjectam regionem populabundi diffidentes: qui eo quoque audaciae processerunt, ut urbes ipsas Abintemelium & Soanam ingressi, complures Genuenses primarios cives obtruncaverint.

Ac ne insequenti quidem anno ejus saeculi tri-
gesimo quarto, qui Remedium Rusiam Novocomensem Praetorem habuit, incitatus illorum furor finem habuit, delicta & maleficia continuando; ut justus exercitus ad illos ab urbe mittendus fuerit, cujus Dux fuit Joannes Stralleria; vexillis cataphractorum, quae duo tum erant, Petro Veneto & Tedisio Flisco traditis; qui, primo adventu nonnullis arcibus ac vicis sine certamine occupatis, ad necessariam deditionem incolas omnium vallium, quae arma sumpserant, tandem attraxerunt: nonnullisque arcibus communitis, atque Henrico Roscio à Volta Praetore constituto, rebus pacatis, Genuam reversi sunt.

Per ea tempora, cum fama esset, urbem Settam celeberrimam ea tempestate littoralis Mauritaniae emporium omni veteris fortunae opulentia abundare; mercatoribusque ditia commercia exercitibus refertum esse; nonnulli ex Cantabris populis oceani accolae, sive illi cupiditate praedae inducti, sive religionis studio, tamquam omne bellum adversus Christianae religionis hostes justum sit, (hanc certe causam praefidentes) cruce praetexta insignes, ingenti classe comparata, in illam urbem cursum dirigunt. Vehementer imminens periculum Genuenses commovit; quorum in ea urbe magna erant commercia ac frequentia domicilia, plurimaeque illorum familiaris res ea negotiatione implicata; cum praesertim Cantabri hostilem animum non minus in ipsos, quam in Mauros declarassent; nonnullis Genuensium navigiis ad insulam Gades deprehensis; simulque hominibus, qui in illis erant Genuenses cives nobili loco orti, captis: extemplo igitur omnibus viribus connixi mercatores, qui erant Settæ, decem naves armant, quae Cantabris sese opponerent: at Cantabri fraudem & artificium ad cupiditatem addentes, Genuensi classe propinqua facta, amicum ac pacatum animum simulantes, erroremque in capiendis navibus, quas Maurorum esse credidissent, excusantes; atque, ut fidem dictis affirmarent, captivis redditus: cum Genuenses ea credulitate deceptos sub adversum flatum venti sibi submisissent, naviculam incensam in eos adigunt; ventoque flammam in illos ferente, Genuenses fugae (quae una erat certissima praesentis pestis vitandae via) sese mandant; ac, redditu Settæ intercluso, in oppositum Hispaniae littus itinere flexo, urbem Malacam tenent; consiliisque cum Genuensibus, qui in ea & in circumjectis urbibus negotiabantur, consociatis, duabus ingentibus corbitis extemplo armatis, delectam sexcentorum armatorum manum imponunt, subsidioque obsessis mittunt: quod subsidium, exscensione procul ab urbe facta, (neque enim mari introduci poterat, quod hostes late tenebant) terrestri occulta via Ducibus à Rege

A missis incolume urbem intravit: quo praesidio Rex confirmatus, nuncios extemplo Genuam opem oratum mittit; sese dimidium sumptus in classem & expeditionem faciendi subiturum spondens: validum igitur subsidium viginti octo triremium ac quattuor ingentium corbitarum Genuae decretum est: quod (ut quaeque naves subinde armabantur & instruebantur) pluribus comitatibus deinceps submitti coeptum est: primus comitatus fuit quattuor triremium, quem Lanfrancus Spinula praefectus duxit; alter paullo post secutus decem triremium, cui praefuit Othobonus Camilla; postremæ quattuordecim triremes ac quattuor corbitae Ingoni Bonifacio à Volta ducendae datae sunt: eorum adventu, cum praesidium invitis hostibus in urbem introductum esset; Cantabri, obsidione soluta, in sua reversi sunt. Ingens meritum Settanus usitato Afris more remuneratus est, ac promissa barbara fide observavit; nullo non modo praemio beneficium prosequens, sed partem quoque impensarum promissam solvere Genuensibus instantibus recusans: quibus ut superior viribus esset, si res ab altercationibus ad manus venisset, magnam vim Afrorum in urbem sensim ac clam introduxit: quorum adventus Genuenses vehementer perculit, cum astum sero sentire coepissent. Timori damnum continuatum est: rixa enim inter ipsos & Barbaros ex studio utriusque contentions orta, Barbari ignem Genuensium domibus & horreis injecerunt: quod incendium magnam mercium ac pretiosae suppellectilis vim absumpsit. Genuenses, tanta plaga accepta, quae superfuerunt incendio, raptim secum asportatis, urbe excedentes, classemque conscensa, in tuta se receperunt.

Enimvero re Genuae cognita, tanta injuria haud
inulta finenda visa: ceterum, ut omnia prius tentarentur, quam ad arma iretur, missus est ad Settatum insequenti anno, Petro Ansaldi filio Bononiensi Praetore, Carbo Marocellus, qui, cum sese à Rege extrahi & ludificari sensisset, bellum illi, ex mandato, indixit; Hispalimque concessit ad copias cogendas: ceterum necessaria ad bellum comparantem mors sustulit: neque tamen instituta cura omissa est; quam Genuenses, qui ex circumjectis regionibus magno numero convenerant, continuarunt, viginti triremibus ac septem ingentibus corbitis, trigintaque minoribus navigiis comparatis & instructis; cum Genua instrumenta, ac machinas omnisque generis bellicum apparatus, atque omnia ab illis petita, praeterquam pedestres copias, quattuor triremes advenissent: quae classis urbi adnota, eam mari tantum, deficientibus terrestribus copiis, urgere coepit, tormentis continenter quassatam. Qua oppugnatione ardente, alter nuncius Genua super-
venit, Succius Piper: cum interea Ugo Lercarius in Marocelli demortui locum Dux belli creatus esset; imperio, si bellum durasset, cum Pipe-
re communicato: ceterum res tandem composita sunt, cum neutri parti bellum aptum esset, paxque conditionibus nomini Genuensi honorificis, ac nationi percommodis, tandem convenit.

Insequenti anno, Jacobo Tertio Mediolanensi
si Praetore, otium ab externis & urbanis motibus
fuit. At, qui illum consecutus est, ejus saeculi
trigesimus septimus, Praetoremque habuit Oldra-
dum Grossum à Treseno civem Laudensem, in-
gentibus certaminibus domesticis agitatus est; cum
initia externi quoque motus nonnihil turbassent;
Dertonensesque, Papiensium copiis sibi adjunctis,
Arquatam usque perrexissent, consiliis ejus opidi
communiendi: qui re infecta in sua reversi sunt;
cum Praetor, urbanis copiis secum ductis, sese
illis opposuisset.

A.C. Major fuit domesticorum motuum moles : quorum primum creatio Prætoris insequentis anni excitavit ; cum suffragia uno minus fuissent , nonnullique idcirco eam creationem vitio factam , nec ratam habendam contenderent ; nonnulli contra illam defenderent : in quam sententiam præsentis anni Prætor propendere videbatur : cui ut auctoritatem abrogarent ii , quibus creatio non placebat ; in illum ipsum impetum suum vertunt ; negantes , illi ipsi parendum esse : quin contra illi magistratum abrogandum contendentes , quem ille male & flagitiose gereret , leges civitatis non observans : is cum turrim quandam munire instituisset , ad arma ab iis , qui illum oderant , conclamatum est ; omnisque repente civitas in armis fuit , scissis studiis : acriterque dimicatum est , non sine cædibus ac multorum sanguine : ceterum Archiepiscopo , & sacro ordine , simulque multis gravibus & quietis civibus sese interponentibus , arbitrio & iudicio controversiarum exortarum ad illos rejecto , res compositæ & pacatæ sunt , electione iudicio ab illis lato comprobata , ex quo Prætor accersiri iussus est : qui fuit Paulus Sorresina Mediolanensis.

Vix primus hic tumultus conticuerat , cum alter excitatus est à Spinulis & Marocellis , præpotentibus civitatis nostræ gentibus : compressa initia statim sunt Prætoris & consilii diligentia , utraque familia urbe exacta ; quæ tamen eodem anno ab exilio revocatæ sunt , pace inter illas firmata. Eodem exilii remedio tumultus discussi sunt à familiis à Cruce & Ligaporcorum excitati , armis inter se contententibus.

Urbanas contentiones Ligustici motus secuti sunt , ab iis populis excitati , qui habitum deficienti alte animo imbibitum prorsus abicere numquam potuerunt : quamquam illum recentibus malis fracti ad tempus intermitterent. Conspirarunt igitur in Rempublicam iidem , qui semper , Saonenses , Ingauni , Intemelii ; quibus se addiderunt Portusmauritanii. Initium motuum factum est à Saonensibus , una ex triremibus custodiæ ad Vada Sabatia , custodibus dormientibus , capta , arceque improvise occupata , ac Balduino Mulfero & Petro Contardo præfectis simul cum Prætoris Ansaldo Mallonio expulsis. Proximi consurrexerunt Ingauni , Henrico Carmindino Prætoris ejecto. Hos consecuti sunt Portusmauritanii , quorum Prætor fuit Baalardus à Palo : postremi fuerunt Intemelii , quorum Prætor Bonifacius Embriacus , vir cautus , ac rebus invigilans , imminetentemque procellam providens , sese in arcem cum tota familia incolumem subduxit. Motibus auditis , è vestigio quatuordecim triremes Genuæ armatæ sunt , quæ , Fulcone Guercio & Roscio Turca præfectis , Albintemelium primum petere iussæ sunt : quo cum classis appulsa esset , exsensus in terram magni certaminis fuit , Intemelii acriter resistentibus ; quibus tandem expulsis , copiarum expositæ è vestigio collem urbi imminentem , opidanis inde dejectis , occupant. Adverso successu fracti Intemelii , contratendere desistunt : deditoneque facta , complures ex primariis vincti Genuam missi sunt. Arma ab illis ad Ingaunos translata sunt : qui nihilo constantiores Intemelii fuerunt , insula Gallinaria , ex qua Ingauni Genuensium præsidium expulerant , à classe prius recuperata. Idem exitus Saonensium fuit : qui postremi jugum acceperunt ; nullo ne ab ipsis quidem maiore quam à ceteris edito constantiæ & fortitudinis documento : vinctique Genuam magno numero missi sunt ; ex quibus unus tantum Gulielmus auctor deficienti jugo in phari promontorio suspensus est.

Cupiebat eo tempore Gregorius nonus , vir clarissimarum virtutum gloria præstans , animos Ge-

A nuenfium & Venetorum inter se pacare ; cum inter duos claros & præpotentes populos , compluribus de causis , quas supra exposuimus , exulceratos suspectum esset bellum , quod magno impedimento futurum erat ipsius consiliis ad sacrum bellum destinatis. Utriusque igitur populi Oratores Romam evocati ; Gulielmoque Embriaco & Petro Vento à Genuensibus missis , in sacros. potestate fuerunt : paxque inter illos in novem annos , decreto Rom. Pontificis sancita est ; Pontificia exclamatione ac piorum cœtu exterminatione , si alteruter illam infregisset , pronunciata : leges pacis fuerunt , ut pacem & amicitiam pie inter se colebant : neuter , alterius injussu , foedus aut amicitiam cum Constantinopolitano Cæsare jungeret , aut sibi quidquam separatim ab illo pacisceretur : bella omnia communiter ab illis susciperentur , & gererentur : uterque populus insignia & vexilla alter alterius una cum suis erigeret , ac gestaret.

Anni , qui insequentur , ejus sæculi trigessimus nonus & quadagesimus , quorum primus Prætor rem habuit Philippum Vicedominum Placentinum , secundus Henricum Monsam Mediolanensem , turbulenti in primis fuerunt , atque externis & urbanis motibus agitati. Conflavit civitati tanta pericula Fridericus secundus Cæsar. Is cum petiisset à Genuensibus ut sacro Imperio sese jungentes in verba sua jurarent ; constanter negarunt Genuenses se quidquam facturos dicturosque , quod esset libertati suæ imminuendæ : fidem quidem erga Imperium numquam sese violaturos , ejusque majestatem comiter & pie perpetuo culturos : ceterum jusjurandum petiit , quod *homagium* vulgus vocat , numquam daturus : exarsit Cæsar libero Genuensium responso , vir impotentis iracundiæ , ac præservidi ingenii : qui , quod aperta via tenere non potuit , per cuniculos aggressus est : nam & eos Ligusticos populos , qui numquam non defecturi essent , nisi cum occasio & facultas deficienti deerit , spe auxiliorum suorum , ac magnarum societatum illis adjungendarum , ad toties infelicitè experta arma retractanda induxit : & nonnullos primarios cives , ex potentioribus ac nobilioribus familiis , ingentium præmiorum spe oneratos , ac magnæ apud se gratiæ , tum autem eximii in civitate auctoritatis ac potentiæ loci , ad clandestina nefaria consilia adversus patriæ libertatem secum jungenda attraxit : quibus tantis terroribus , & à subjuncto & externo hoste , & à cive ipso circumstantibus ; tanto animo fuit civitas , ut non sese desereret , sed omnibus rebus occurreret.

E Principes igitur Saonenses , Albensium , & A- quensium , tum autem multorum ex accolis Marchionibus societate subnixi , (ut sunt homines in id , in quod ingenio propendent , omni levi objecta aura spei , facile præcipientes) sumptis armis , opidum Varaginem irritò incepto tentarunt : à valido præsidio , quo opidum tenebatur , repulsi quin contra , opidum Albisola illis ademptum est. Horum motuum causa , tredecim triremes armatæ sunt : quæ Fulcone Guercio præfecto , arma circumferendo , Cervum , Dianum , Bestagnum , Portum Mauritium castella , ac vallem Oneliæ percarunt , & ad obedientiam reducerunt : turrimque divi Ampelii in sinibus Intemeliorum seditiosorum , ac quietem publicam turbare solitorum receptaculum , expugnatam solo æquarunt : ceterum longe maiore metu intestinorum motuum ac periculoliorum civitate sollicita , cum occulta perditorum civium consilia emanassent : negotium datum est eidem Fulconi Guercio , cujus viri virtute , consilio , & rectis in Republica sensibus res Genuensica ætate domi & foris in primis stetit ; & Roscio à Turca viro ipsi quoque acri & impigro iisdemque pa-

triae libertatis peramantibus civibus; rebus invigilandi, atque occultis gliscentibus malis occurrendi, delecta fortium juvenum manu illis addita: ad hoc saltus & angustiae viarum ad urbem ferentium firmis stationibus infestae sunt; quas homines ditioni Gulielmi Spinulae subjuncti adorti sunt, nonnullis ex praesidiariis vulneratis: jam tum immodicis opibus spiritus supra privatorum hominum sortem elatos illi familiae suggerentibus; illiusque hominibus ad eminentem quandam in civitate locum ac potentiam communi libertati praegravem tendentibus. Rumor in urbem perlatus magnas animorum commotiones fecit: Praetorque, consilio universae civitatis convocato, eundem Gulielmum Spinulam, Sorleonem Piperem, Anfaldum Embrunum, Raimundum à Volta Burborinum, qui vocati ad causam dicendam imperium neglexerunt, exilio mulctavit; villamque Raimundi à Volta in pago Pavairano, cujus culpa eminebat, demolitus est: qui tamen omnes, Archiepiscopo recen- ter creato Joanne Cucurno, ac duobus Pontificiis Nunciis, qui cum eo Roma venerant, sese interponentibus, ab exilio paullo post sunt revocati, bonis restitutis: gratificati hoc sunt Genuenses Pontifici; recens beneficium remunerantes, quo Pontifex Naulensem populum obedientiae Episcopi Saonenfis subtractum Episcopali honore deco- ravit.

A At civitas in omnes partes rebus suis firmandis intenta foedus amicitiae & societatis cum Mediola- nensibus & Placentinis Friderici hostibus junxit: à quo consilio Genuenses saepe ab illis appellati absti- nuerant; ne Friderici animum offenderent. Per idemque tempus ora Occidentalis, quae omnis de- fecerat, ad obedientiam rediit; praeter Saonam & Ingaunum urbes: bellumque indictum est Jacobo Marchioni Carrettano Finarii Domino; qui ipse quoque à Caesare instigatus, Marchione Lanza so- cio, arcem Petrae adversus conventa oppugnatum ierat: praefectique, quos custodiae urbis supra creatos diximus, cum valida manu ex urbe pro- fecti agrum Saonensem late vastarunt. Nec se- gnis opera Praetoris ipsius fuit; qui cum urbanis co- piis profectus Ubertum Palavicinum Caesaris Vi- carium, fines Genuenses hostiliter ingressum fu- gavit.

B Insequenti anno ejus saeculi quadragesimo uno, A. C. cujus Praetor fuit Gulielmus Sardus Placentinus, ^{1241.} delecta centum cataphractorum equitum ala stipen- dio conductae, cujus praefectus fuit Joannes Ur- sinus, unaque equites cataphracti urbani, ac ba- listarii tam urbis, quam trium praefecturarum, (ut tum civitas non minus ad terrestria, quam ad na- valia bella armata erat) fines Saonenfes ingressi omni belli clade pervastarunt.

VBERTI FOLIETAE,

PATRICII GENVENSIIS,

HISTORIAE GENVENSIUM

LIBER IV.



MAJOR mihi hinc rerum fe- ries ordianda est; majora- que bella, majorque dis- cordiarum civilium moles, acrioribus odiis ac diu- turniore contentione agi- tatarum, monumentis litte- rarum est mandanda. Nam quae adhuc stylo persecuti sumus, quamvis multa eo- rum praecleara neque exigua fuerunt, brevis ta- men potius temporis expeditiones, quam justa bel- la vocanda sunt: & civiles discordias prius privatae nonnullarum familiarum inter se offensiones exci- tabant, ad breve tempus consopandas, ac Magi- stratum modo lenitate, modo severitate compri- mendas; cum illae ipsis solis familiis terminaren- tur; ac cognatos tantummodo & affines, perpau- cosque clientes secum traherent. At, quae posthac scripturi sumus, bella non modo magnitudine sua, sed perseverantia quoque memorabilia sunt, cum maximis & praepotentibus Principibus gesta: & discordiae eo superioribus atrociores fuerunt, quod omnes cives totamque ditionem complexae, nemi- ne ab illis intacto, civitatem in duas partes scide- runt: & longe diversa ratione agitatae sunt; non privatis rixis, ac domesticis seditionibus, & tu- multibus, sed internecinis bellis, & castris, ju- stisque classibus & exercitibus hostilem in modum exercitae, externisque Principibus in societatem ar- morum adscitis: ut praevaleantis populi vires, quae in externos collatae in insignem aliquam magnitu-

D dinem & potentiam nomen Genuense erecturae fuerant, in mutuam perniciem versa se ipsae confi- cerent, ac civitatem continentibus cladibus agitando ac lacerando ita enervarent, ut à praecelso rerum fastigio ad infimum locum deducta, cum suis ipsa viribus stare non posset, ad necessitatem externos Principes & Dominos ultro accersendi saepe ada- cta sit.

E Initium faciendum est à bello, quod cum Fride- rico secundo Caesare, ac cum Pisanis illi adjunctis sociis gestum est: quod bellum principio Genuen- sibus funestum fuit, magna plaga temeritate stoli- de ferocis Ducis accepta; tractu autem varium, in- gentibusque motibus, atque apparatibus, rebus- que haudquaquam contemnendis gestis clarum. In hoc bello, cum vires & potentia, tum animi ma- gnitudo civitatis nostrae in primis apparuerunt: nam non modo impetum Pisanorum navalibus co- piis ac rerum gestarum gloria florentium in se in- tentum repulit; sed Fridericum ipsum Caesarem, cujus opes atque arma toti Italiae terribilia erant, omnibus navalibus opibus suis, quae supra quam modicae erant, in se incumbentem sustinuit; cum terra quoque multis locis urgeret, finitimis popu- lis ac suarum partium Proceribus in ipsos excita- tis: quod etiam eo mirabilius fuit, quod non tota civitas integris viribus suis, sed non plus dimidia fere sui parte à studiis Caesarianarum partium illi abstracta: qui primo occultis consiliis rebus Fride- rici faventes, nudatis tandem animis, armisque cum illo confociatis, urbe Saona belli sede electa, aperto bello patriam oppugnare non dubitarunt; non

non illam sese infestis armis petere, in qua amanda nemini omnino concederent; sed adversæ factionis cives ultum ire dictitantes: nec minus, quam vires, religionis studium Genuensium in eodem ipso bello eluxit: qui, cum tranquillam pacem agere possent, studio voluntati & monitis Romani Pontificis obsequendi, tantam belli molem sibi constare veriti non sint.

Internecina odia inter Romanos Pontifices & Fridericum Cæsarem per ea tempora ardebant: quæ omnia in Italia cædibus, direptionibus, incendiis sæpe miscuerunt; ut nulla ejus Provincia pars à belli cladibus integra fuerit: dum Fridericus Pontificium solum evertere tendit; cujus majestas indomitæ ipsius cupiditati Italiæ imperio imminenti una impedimento esset. Is infesta arma tota Italia circumferens, omni belli clade cuncta vastare, astum quoque & fraudem ad vim adhibere: quasque civitates aperto bello petere commodum non esset; in iis, cum illarum primoribus spe præmiorum ac veterum Gibellinarum partium studio inductis, clandestina consilia tumultuum & seditionum struere: quibus malis in hoc bello civitas nostra intacta non fuit: in illum igitur passim grassantem, ac funestis bellis omnia involventem, Gregorius nonus sacrum bellum crucis titulo insigne decrevit, & pronunciavit: quod Pontificis factum veteri odio novas subdidit faces: rabie enim ob eam rem efferatus Fridericus, ad hoc vitio ingenii vehemens, iræque impotens, contumeliam ac superbium Pontificis ludibrium ad sævitiam adhibens, quoscunque Pontificis partes sequentes capiebat, eis vel quinque vulneribus crucis formam exprimentibus caput perforare, vel in decussim effigiem crucis reddentem findere; sacerdotibus vero obrasum verticem, cute alte detracta, vulnere in eandem formam ducto, deformare.

In tantas angustias adductus Pontifex, in Transalpinorum Regum opem confugere coactus est: quos faciliores ad justa & pia arma induenda, adversus damnatum atque hostem religionis judicatum fore ratus, Concilium universæ Ecclesiæ prius Romam indicendum statuit; ut sacrorum totius Christiani orbis Antistitum, quibus nullæ injuriarum atque irarum causæ cum Friderico intercederent, suffragio recte damnatus: non à solo Pontifice, quem sibi iniquum multis de causis Fridericus ejuraret, falso judicio circumventus videretur: duos igitur Legatos in Galliam mittit, Jacobum Episcopum Prænestinum, & Oddonem Episcopum Portuensem; illum ad Gallorum Regem, hunc ad Anglum: tertius Genuam missus est Gregorius à Montelongo Cardinalis: qui omnes comiter ubique accepti, postulata facile impetrarunt: atque uterque Rex regni sui Antistites itineri sese dare illico jussit. At Genuenses classem triginta navium longarum partim tardarum, quas nunc *galeatas* appellamus, partim trirremium armant, quibus additus est haud exiguus corbitarum ac varii generis navigiorum numerus; quæ Antistites Romam petentes vehant.

Quo tanto in se intento apparatu Fridericus vehementer perculsus, omnes curas ad illum discutiendum confert: quare omnes viarum angustias, qua Antistitibus necessario transeundum esset, firmis præsiidiis occupat, filiumque Entium Sardinæ Regem cum nonnullis navibus longis Pisas mittit, qui à Pisanis beneficiariis suis, acerrimisque partium suarum propugnatoribus, pro jure amicitiae postulet, ut validam classem compararent; qua iter maritimum Transalpinis Antistitibus ad Concilium evocatis claudant; simul Genuensium animos per Legatos suos tentent, eosque in partes Cæsarianas atque in societatem

A consiliorum traducere contentur: utramque rem Pisani non impigre modo, sed cupide quoque faciunt; omni occasione Fridericum demerendi læti: qui idem per occulta consilia Genuæ haud omnino irritò incepto, facere aggressus est; multis ex primoribus civitatis sollicitatis, ac spe ingentium præmiorum in suas partes traductis: in quibus fuit Anfaldus à Mari, quem summum *Halmiratem* classium suarum in Nicolai Spinulæ demortui locum sufficit. Is illico clam Genua profectus se ad Fridericum confert.

B Interea Pisanorum Legati anno ejus sæculi quadragesimo uno Genuam veniunt: quibus ad Magistratum introductis legationis princeps ita locutus fertur: *Sincera fide nos vobiscum agere, Genuenses, quæque suademus, ea vobis ac Reipublica vestra salubria putare, vel illud sit argumentum, quod consilium, quod huc daturi venimus, ipsi prius amplexi sumus: neque vetera partium Cæsarianarum studia, aut Friderici in nos beneficia (quorum neutrum umquam dissimulabimus) elevare auctoritatem nostram debent; quibus rebus præponderare bonum publicum, & civitatis nostræ salutem, ut existimetis, ex intimis sensibus vestris, quos in Reipublica vestra geritis, petimus: quamquam quid ego auctoritatem nostram, aut cujusquam omnino mortalium memoro; rem ad vulgus, quam ad sapientes & graves viros movendos aptiorem? omisissis auctoritatibus, rem ipsam spectate, ac pene loquentem audite. Si postulat Fridericus, ac pro jure suo ageret, ut studiis ac societate nobiscum juncta, arma adversus Pontificem ac quoscunque sacri Imperii hostes pro se ferretis, obsequendum tamen censeremus: ne vos ac civitatem vestram sacro Imperio, cuius juris simul nobiscum atque cum omnibus fere Italia urbibus estis, perduellionis crimine obstringeretis. Nunc Friderici postulat modicum est: neque vobiscum pro imperio, sed precibus agit: non enim ut arma pro se feratis, sed ne contra se feratis postulat: ac ne Antistites adversus se à Pontifice Romam evocatos classibus vestris vehatis: quo modestius nunc agit, cavete, ne, si contumacia vestra hominem ingenio ferocem & contumeliarum insolentem irritaveritis, acrius in vos exardescat: ac considerate, quanta inscitia fuerit; cum tranquillam pacem agere positis, alienorum casuum sine ullo vestro discrimine spectatores; aliena causa, nihilque vos ac Reipublicam vestram attingente, eam negotii molem vobis constare, cui pares esse non positis: quid enim vobis animos facit? vestra ne vires, an Pontificis auxilium? vestras vires numquam elevabimus, si eas adversus nos aut alium similem nostri, cum quibus par certamen sit, exerceatis; præ vero immensis Friderici opibus quota tandem pars sunt? à Pontifice auxilium hoc tempore expectare perridiculum est; qui omnium rerum ipse inops, omni ditione spoliatus, vix mœnibus Roma salutem suam tueatur: conferte nunc ex altera parte Fridericum tantis opibus, totque regnorum dominatu fultum, tantarum rerum gestarum gloria præfulgentem, in tanto felicitatis cursu; ejusque arma omnibus terribilia. Circumspicite Mediolanum urbem opulentissimam, ac ceteras Italia civitates, quacumque oculos contra Cæsares attollere ausæ sunt: quæ excidiis suis temeritatem luerunt: utile alienorum malorum exemplum apud vos, non ad imitanda prava consilia, sed ad pares exitus perhorrescendos, valeat. Neque causæ iustitiæ vos moveat, tamquam ea à Pontifice sit: nam id neque exploratum, neque vestri iudicii est: neque sapientes viri ac de magnis rebus consulentes, in amicitia & societatibus sibi adsciscendis, aut repudiandis, iustiores causas sequi solent, sed sibi aptiores, utilitatemque ac damnum in consilium adhibere; cetera si adsint, latari; si non adsint, non magnopere requirere: quamquam quid nos utilitatem ac damnum possumus, quæ ab hac deliberatione pendent? At enim impium est adversus sacrosanctum Pontificem, divini Numinis potestatem ac venerationem inter mortales obtinere, arma ferre. Quid autem? an & pro illo*

arma non ferre, ac pro illo sese ac Rempublicam suam precipitem non dare? permultum enim nobis inter se ista differre videntur: sed futilia sunt ista, planeque nugatoria; qua apud imperitam multitudinem, atque inanimibus rerum effigiebus potius, quam solidis rebus moveri solitam, valeant; ab ingenitis sapientium viro- rum ac suis momentis res expendere solitorum repu- dientur. Quis porro nescit, Romanos Pontifices multis abhinc saeculis duas personas gerere; alteram sacram, regiam ac mere profanam alteram? qua longe diversa inter se res, ac longe dissimili ratione ab ipsismet Pon- tificibus tractata, diversos quoque animi habitus in no- bis facere debent. In prima ac nobilissima persona mu- neribus iis obeundis, quorum colendorum causa à Deo instituti sunt Pontifices; hoc est in rebus religionis pro- curandis & constituendis, in salute animarum expe- dienda, in sacris mysteriis administrandis, in moribus hominum à divina Legis praescripto deflecentibus ad ve- ram viam revocandis ac regendis, in divino Numine precibus, sacrificiis, votis placando: in iis igitur atque in multis ejusmodi aliis magnis atque praeclaris rebus, impe- dimento esse Pontificibus, aut contra illos venire, nefarii plane hominis, ac Christiana Ecclesia & religionis hostis est: at in muneribus alterius persona exsequendis: hoc est in armis tractandis, bellis movendis, societatibus armorum & foederibus cum profanis Principibus ineundis; religio- sum putare iisdem artibus & consiliis Pontificibus resistere, quibus ipsi alios petere solent, extrema plane inscitia & dementia est: summam faciemus: semper sapientium ho- minum fuisse, ad tempora & ad res consilia accommodare; quae qualia nunc sint, ipsa juxta nobiscum intelligitis. Cavete igitur, Genuenses, ne inani pietatis specie decepti in eum locum Rempublicam vestram precipitem detis; in quo penitentia ad praevalens consilium tantummodo lu- gendum, non ad exsurgendum à tanto casu valeat.

Longa & meditata oratio cum nihil certam ac sta- bilem sententiam Magistratus movisset; unus ex iis, cui negotium datum est, ita fertur respondisse: Neque suspecta est nobis, Pisani, fides vestra in consilio dando: & egregium vestrum in nos animum agnovimus: qui vicem nostram tam solliciti sitis, ac tantopere de sa- lute nostra laboretis: nec sumus nescii, plerosque in ma- gnis deliberationibus utilitatem atque incolumitatem; iis- que contraria damnum & perniciem potiora habere: ce- terum Majoribus nostris, atque omnibus fere celsi animo uatis viris, alia in consiliis capiendis longe antiquiora semper fuerunt: officium, fides, pietas, religio, decus, fama, existimatio. Illorum nos potius quam contraria existimantium vestigiis insistere, nemini mirum esse debet: quid autem turpius fuerit, quam sacrosancto Pontifici omnibus suis, quae eo jure possidet, quo qui optimo, per summam injuriam spoliato, ac veluti carcere incluso, alie- noque arbitrio obnoxiam animam ducenti, ac piorum Re- gum & populorum misericordiam imploranti opem non fer- re? aut quem tandem locum hic habet distinctio illa sacra ac regia & prophana persona? qui ne tum quidem piorum ope deferendus est, cum regiam personam videtur gerere: cum à Regibus beneficiariis ac fiduciariis ipsis suis, ingra- tissimis hominibus, injusto ac nefario bello petitis, armis necessariis neque ulla lege divina prohibitis se defendit. Neque Romani Imperii jamdiu plane extincti inane ac commentitium nomen; cuius tituli fulgore barbari atque exteri Principes, atque Italici nominis atrocissimi hostes ad Italiam spoliandam, evertendam, durissimo servitu- tis iugo premendam, semper abusi sunt, gravius esse de- bet, Italici praesertim hominibus; quam Romani Pontificii solii majestas, quod semper Italica libertatis firmissimum columen atque ornamentum fuit: quodque ex toto Chri- stiano orbe infinita hominum multitudine ad illud con- fluente, speciem quandam Romani Imperii nobis reddit; Italiamque opibus ex omnibus Christianis Provinciis cor- rogatis amplificat: proinde cum animis vestris statuere, Pisani, utrum sit elegantius, ad eos sese applicare, quo- rum omnes cura in Italiam exinanendam, enervan- dam, opprimendam, semper fuerint intenta; an Italia

A libertatis & dignitatis vindicem Pontificem, eundemque opum amplificatorem sequi? ceterum nos perinde adhuc locuti sumus, tanquam arma contra Fridericum ferre, atque ejus partes oppugnare, propugnationemque Ponti- ficis suscipere, decreverimus: quorum nihil facimus, ac ne cogitamus quidem, Pontifici tantummodo, in ne- cessario atque usitato munere sacra persona obeundo, in quo impediendo pietatem ladi vos ipsi modo fassi estis, officio & sedulitate nostra praesto esse constituimus; An- tistitesque Transalpinos ad Concilium rem tam sanctam atque Ecclesia Christiana necessariam evocatos classe no- stra Romam vehere. Quid est igitur, in quo Frideri- cus merito sese à nobis laesum putet? quod minas ac ter- rores jactet? quod caelum ac terras misceat? ejus amici- tiam nos quidem plurimi semper fecimus, ac facturi por- ro sumus; ejusque arma atque opes verendas fatemur; sed cum eo, ne pietatem ledamus: à qua mente nullius terroris denunciatio nos unquam deducet, ejus numine fretos, cujus ira ac vires longe quam ullius omnino mortalium formidolosiores sunt. Cum hoc responso dimissis Pisani, Genuenses Jacobum Marocellum classi praeficiunt.

Interea Antistites Transalpini cum duobus Le- gatis terrestri itinere per Italiam clauso, omnibus- que viis validis Friderici stationibus infestis, Ni- caeam venerant: quorum adventu cognito, classis è vestigio eo contendit; Legatosque ac sacros An- tistites Genuam incolumes advehit: quo brevi convenerunt complures sacri Antistites ac civitatum Legati ex tota Longobardia, ipsi quoque ad Con- cilium evocati: cujus discutiendi nullam rationem praetermittens Fridericus, Uberto Palavicino, ac Marino Ebulio, ambobus Caesarianis Vicariis im- perat, ut fines Genuenses, quantis maximis copiis possint contractis, ac quibuscunque locis possint, adorianur: sic sperans fore, ut Genuenses propiore periculo districti à cura maritimarum rerum ad sua tutanda avertantur: qui imperata impigre exse- quentes, fines Genuenses, alter trans juga Apenni- ni montis, alter à regione Lunensi invadunt, om- nia tumultibus atque omni belli specie complen- tes: quibus motibus spretis, Genuenses intentam curam in res classis expediendas pergunt urgere.

Sed longe periculosiora fuerunt occulta consilia, quam aperte mota arma. Fridericus enim Genuam suis ipsam viribus oppugnare adortus, multos ex primariis civibus cum veteribus partium Caesaria- narum studiis stimulos, tum ingentibus promissis oneratos in suas partes traduxerat: in quibus fue- runt Fridericus Grillus & Joannes Streggiaporcus, primarii ac magni nominis cives: ceterum litterae ad illos à Friderico datae ac massa cerea inclusae interceptae consilia prodiderunt: scribebat enim Fridericus, se omni ope anniti, ut iter Romam Antistitibus intercludat: eaque de causa iussu suo à Palavicino & Ebulio Genuensibus arma illata; non ut civitati publice noceat, quam unice di- ligat, atque auctam cupiat; sed sibi esse in ani- mo, sibi ac sacro Imperio adversantes asperere ac severe punire. Quae litterae, cum, ut in libera civitate, ita comprimi non potuissent, quin bre- vi quod in illis erat emanaret, magnos animorum motus, sed inter se diversos, excitarunt: nam Ram- pinos (id erat tum Genuae factionis nomen Ponti- ficias partes sequentis, cum Caesariani Mascarati vocarentur) magnus timor incessit, de salute sua sollicitos, tanto Principe sibi infenso: cui si aper- ta consilia parum procederent, mille essent viae ipsos dolo opprimendi: igitur Mascarati ad po- nas iudicii subterfugiendas domos suas sedulo mu- nire, magnoque clientium & armatorum nu- mero firmare intendunt. Rosciusque à Volta, pu- blica maiestate sprete, quendam Florentinum ho- minem in ipsa urbe homines ad stipendia Cae- sariis clandestine corrogantem deprehensum, ex

apparitorum manibus vinctum in carcerem trahentium eripere ausus est: qui ad audaciam contumaciam addens, ad rationem facti reddendam vocatus imperium spreuit: eandem contumaciam adhibuerunt Joannes Streggiaporcus & Ingo Grillus: qui ipsi quoque vocati ad causam dicendam, non paruerunt: exarsit Prætor; consilioque civitatis in ædem Laurentii vocato, verba facit, multaque præfatus de suo in præclaram urbem Genuam studio, quam non minus ipso patrio solo, in quo natus & educatus sit, diligat: cum ob honorem sumpti imperii sibi mandati habitum, tum ob perspecta ardentia religionis studia, ac Pontificis Romani susceptam propugnationem; de cuius salute & dignitate anima ipsa decernere non recusent: deploravit præsentem civitatis statum in extremum discrimen ab iis ipsis civibus ejus adductæ, qui privata consilia à publicis separare audeant; quosque non pudeat, patriæ libertatem, dignitatem, salutem, famam, decus, existimationem, Friderici libidinibus gratificari: gratiam barbari atque immanis Tyranni turpem mercedem tantæ proditiōis petentes: in quorum scelus & contumaciam asperis verbis est invectus: quæ eo processerit, ut imperia Magistratuum abnuant, neque vocati se iudicio sistant; quin etiam nocentes homines ac capitalia aulos de manibus apparitorum eripiant; quodque longe detestabilius est, ex privatis domibus totidem arces in ipsa urbe fecerint; quæ communitæ atque armatorum plenæ civitatis libertati & quieti immincant: neque rem (quantum divinet animus) hic constituram: non enim dubitandum, quin à scelere ad scelus spectent: brevique urbem sicariorum gregibus refertam fore, ab ipso Friderico (id quod interceptis litteris per verborum ambages innuat) submissorum, ad omne facinus paratorum: ali nefariorum hominum audaciam bonorum languore; expurgandum igitur aliquando; pestemque, quam aliis machinantur, in eorum caput conferendam: ejusmodi enim homines non civium, sed hostium loco habendos; eo tetriciorum, quod ab exteriorum impetu saltem opposita moenia cives tegant; hos inter latera nostra versari, nihilque inter illorum fidas & jugula bonorum interpositum: prope-randum igitur, ac sceleratis consiliis prævertendum; perditorumque hominum merito supplicio civitatis quietem & publicam majestatem fancien-dam.

Prætor vix perorare permisso, undique à consilio conclamatur, capitales patriæ hostes tollendos; neque hujus lucis usuram unius horæ illis dandam. Cognita civitatis voluntate, Prætor nulla mora interposita, Fulcone Guercio ac Roscio Turca urbanæ militiæ præfectis, octoque regionum vexilliferis accersitis, Joannis Streggiaporci ædes petit, quas illico demolitur: indeque ad familiæ Auriæ domos versus, obvios in itinere habuit Dominicanos ac Franciscanos Monachos supplicibus precibus vastitatem ab ædibus Auriarum deprecantes; quos ad sana consilia reversionem, imperata facere paratos dicunt: mitigatus Prætor, omissis Auriis, homines familiarum à Volta, Ventorum, Piperorum, item Thomam Spinulam, Uberty Advocatum, Ingonem Grillum ad iustitiam audienda ad se vocat: qui cum imperium sprevisent, Prætor præfectos urbanæ militiæ, unaque Jacobum Marocellum Halmiratam cum navium gubernatoribus ad domum Thomæ Spinulæ mittit: quæ, simulque conjuncta turris eodem die expugnata solo æquantur: cum Thomas mortiferum vulnus, dum resistit, in capite accepisset, ex quo paucis post diebus decessit: quo facto ceteri vehementer perculsi abditis locis

latententes sese in publicum dare non audere; qui tamen omnes postero die una cum Auriis, fide publica accepta, ad Prætozem accedunt, seque dicto audientes fore profitentur, præter Joannem Streggiaporcum: quem contumaciæ finem non facientem Prætor perduellionis damnatum exsilio mulctat; illiusque ædificia tam extra quam intra pomerium disturbat; prædiæque vastat, atque Friderico Grillo, Uberty Advocato, Sorleoni Piperi, Pasquali Nigro imperium pertinaciter contemnentibus urbe exactis, locum exsiliæ Longobardiam circumscribit: quam eandem fortunam exspectantes, Princivales, Emmanuel, Ingo Auriæ, Gulielmus, Rossius, Lanfrancus à Volta, Gulielmus & Albertus Venti, ac cum illis complures alii voluntarii exsiliæ causa solum vertunt; seque Buzallam & Roncum ad Gulielmum Spinulam conferunt, eamque exsiliæ sedem deligunt.

Rebus urbanis constitutis, civitateque intus pacata, curæ foras versæ sunt: classisque, quæ complures dies intestinorum motuum causa Genuæ substiterat, Jacobo Marocello Duce, cum tribus Legatis Pontificiis, Antistitibusque, & Principum Oratoribus à civitate ad Concilium decretis Othobono Mallonio ac Trincherio Ismaelio, tandem solvit: numerus navium longarum constat; fuerunt enim viginti septem, partim triremes, partim taridæ: de onerariis apud Annales nostros silentium est: ceteri tradunt, classem sexaginta navium fuisse, partim triremium, partim varii generis onerariarum: quod & verisimile est: neque enim tam exiguus triremium numerus satis amplius fuisset, ad tantam Antistitem, Oratorum, ac magnorum virorum multitudinem, tantisque illorum comitatus ac familiarium greges, ad hoc tantam sarcinarum & impedimentorum vim vehendam.

Classis profecta, Prætor ducentos pedites ac viginti quinque equites subsidio Vultabio opido mittit; quod ab Ebulio, Genuensibus exsilibus adjunctis, arcta obsidione premebatur: quorum adventu Ebulius obsidionem solvit; copiasque Gaviliono opido admovet, quod in deditionem acceptum illico evertit: cum per idem tempus Zolascum opidum Palavicino oppugnanti se tradidisset: qui inde Levantum validum opidum irritato incepto tentavit, acriter ab opidanis defensum.

Interea Pisani ingentem classem quadraginta triremium comparant: quam cum omnibus necessariis ad pugnam rebus instructam, tum delecta ac prævalida bellatorum manu firmatam, Duce Ugolino Buzacarino, viginti septem triremibus Cæsarianis adjunxerant. Quibus rebus Genuæ cognitis, ne numero saltem vincerentur, octo triremes in supplementum emissæ classis, si opus sit, octo urbibus regionibus onus æqualiter subeuntibus, armant: ceterum tanta fuit Genuensis præfecti amentia verius quam temeritas; ut tanti Pisatorum apparatus cogniti non modo ipsum cautiorem facerent, aut impetum reprimerent, sed arrogantiam incitarent: qui extemplo ab opido Portu Veneris solvens, ne hoc quidem qualicumque supplemento exspectato, classem quamquam numero haud multo inferiorem, genere tamen navigiorum longe disparem, tum autem imbelli multitudine, atque ingenti sarcinarum, omnisque generis impedimentorum vi oneratam potius quam ad pugnam firmatam, prævalidæ classi atque hostilibus copiis numero ac genere firmissimis opponere non dubitavit: ac sese, Rempubliam, classem, tantum sacrorum Antistitem & Procerum numerum in præcipitem casum dare: cum pervicacis & arrogantis ingenii hominem, ac superba sui fiducia con-

contemptuque hostium cæcatum Legati ac sacri Antistites, consilia precibus miscentes, ac suadentes & monentes, ut itinere extra insulam Corsicam deflexo, paratam haud dubiam perniciem declinaret, à pravo consilio deducere non potuissent: porro igitur ire pergens, cum littora Etruriæ prætervehens ad parvas insulas portui Pisano & Corsicæ interjectas pervenisset, Pisanam & Cæsarianam classem in conspectu habuit: quarum alteram Buzacarinus, alteram Rex ipse Entius ducebat, Andreolumque à Mari Anfaldi Halmiratis filium Legatum secum habebat: at Genuensis nihil adspectu tanti triremium numeri animo imminutus, classe in pugnam directâ, infestis rostris hostem petit: qui & ipse naves suas in adventantes Genuenses concitat: brevique prælium commissum est, à Genuensibus in tantis omnium rerum iniquitatibus ingentibus animis initum, qui atrociorē pugnam ac majorem, quam pro numero navium ac copiarum, cum non exiguo hostium sanguine ediderunt: ceterum nimia mole brevi obruti sunt, classisque tota profligata est & capta; præter quinque triremes, in quibus fuit prætoria præfectum vehens, ac perpaucas depresas, atque in littus parvæ insulæ Meloriæ, prope quam pugnatum est, ejectas, nonnullique ex sacris Antistitibus ac Proceribus undis hausti sunt: maxima pars cum Legatis Pontificiis in potestatem hostium venerunt, ac cum illis nonnulli ex Genuensium primoribus; in quibus fuerunt Gulielmus Embriacus, Petrus Ventus, ejusque filius Jacobus, Othobonus Mallonius, & Andreas filius, Henricus à Domoculta, Andreas Bulgarus: quos omnes Entius filius ad parentem ita impetrantem vinctos, per summum sacerdotii contemptum, paullo post misit; cum ille filio consulenti quid sacris Antistitibus ac Pontificiis Legatis captis faciendum esset, duobus carminibus respondisset, quæ rudem illam & incomptam vetustatem redolentia hic adscribere libuit:

*Omnes prælati Papa mandante vocati;
Et tres Legati veniant hucusque ligati.*

Feodo carcere omnes nihil commeriti inclusi sunt, omnibusque asperitatibus diu macerati, cum immitis sævitia nullis miserorum ærumnis ac suppliciis satiaretur. Galli tantummodo Antistites, neque ii tamen subito, dimissi sunt, Friderico non tam misericordia supplicum flexo, quam metu illorum Regis adacto, acriter ac vehementer per litteras & nuncios agentis, ac bellum, nisi dimitterentur, comminantis: reliqui retenti sunt; quorum multi malis impares necessariarum rerum inopia, tetro odore, pedore, animi ægritudine consumpti sunt.

Hujus victoriæ lætitia Pisanis perpetua non fuit, longe majore clade illis à Genuensibus ad eandem Meloriam insulam reddita: divino Numine poenas tanti sceleris à sacrilegis hominibus, ac piorum cœtu à Pontifice exterminatis, repetente: at Gregorius tanto Ecclesiæ ictus vulnere brevi mœrore consumptus est; quarto decimo pontificatus anno exacto, cujus cursum, à Friderico sæpe aperta vi, nonnumquam etiam dolis & fraudibus petitus, perpetuo exercitum habuit vir pietate insignis; multisque & egregiis virtutibus, atque in Ecclesiâ meritis clarus, acerbique dignitatis Pontificiæ, & jurium Ecclesiæ, ac constans vindex. In demortui locum successit est Cælestinus quartus Mediolanensis è gente Castillionea: cujus pontificatus minus menstruus fuit: ejusque obitu solium viginti menses vacuum fuit: neque id Cardinalium discordiis, sed quod obfirmassent animis, non prius Pontificem eligere, quam Cardinales captivi à Friderico dimitterentur: quod ille tandem fecit, Balduini Constantinopolitani Impera-

A toris, qui tum in Italia forte erat, auctoritate & precibus victus: qui Genuensibus graviter infensus haud exiguum curarum partem in illos evertendos contulit: cujus consiliis viam expediverunt ipsorummet discordiæ ac partium studia, quæ internecinis bellis tum primum cœptis, illos inter se commiserunt: quæ bella per longum temporis tractum exercita, sæpeque intermissa, ac majoribus motibus acrioribusque odiis semper repetita, florentissimas civitatis vires tandem confecerunt: igitur Fridericus Ansaldo à Mari Halmirati cum prævalida classe misso ac vicariis & beneficiariis suis Genuensi ditioni circumjectis imperat, ut quam acerrimo bello Genuenses terra marique urgeant: quibus rebus Genuensium exsulum animi erecti, egregiam occasionem patriæ repetendæ non omittendam rati, sese Saonam conferunt; à Saonensibus ipsis invitati ac benigne excepti: qui ingentibus Friderici promissis inflati, cupide studia Genuæ oppugnandæ cum exsulis conjunxerunt: sed dispari animi habitu: nam exsules reditum in patriam, quam salvam & florentem vellent, tantummodo spectabant: Saonenses sperabant Genuensium viribus confectis, illorumque civitate enervata, sese ab eorum jugo perpetuo securos facere: quin etiam nonnulli animos ad ea, quæ supra fortunam ipsorum essent, attollentes, Liguriæ principatum sibi despondebant: at Genuenses quamquam tristi nuncio vehementer primo perculsi, tamen animis mox collectis, tanta clade accepta, tantisque undique circumstantibus terroribus nihil infracti, omnes curas in reparandis viribus & in injuriis ulciscendis defigunt. Quare positis togis, sagaque induti duas & quinquaginta triremes, carinis positas, ædificare incipiunt: opusque non diurno modo, sed nocturno labore appropriatum brevi ad effectum perductum est. Cumque ingens oneratarum classis, immanis pretii merces, ac magnum numerum primariorum civium, fortiumque ac strenuorum virorum vehens ex Oriente expectaretur; missum est propere expeditum navigium, quod cladem acceptam demonstraret; moneretque vectores, prævalidas hostiles classes maris potentes per circumjectas oras volitare: caute igitur & explorato iter faciendum; ne ad publicam acceptam cladem tanta privatarum quoque fortunarum jactura adderetur: quo nuncio accepto classarii, cum Sardiniam præterveherentur, sese ad defensionem parant; præmissisque speculatoriis navigiis caute navigantes tandem Genuam incolumes appellunt; magna cum civitatis lætitia, metu, quo diu suspensa fuerat, liberatæ.

E Interea Palavicinus Ponderollum, Bozolan, Crovariam, Carpenam, Ripaltam, ignobilia opida à Varaginesibus prodita occupat: adversus quem subsidia equitum & peditum à Mediolanensibus & Placentinis, Guarnerio Judice & Nicolao Mallonio Legatis eo missis, ex foedere postulata sunt; haud retractanterque ab illis submissa. Dum civitas in triremibus ædificatis instruendis, mercibusque exonerandis est occupata: ecce tertio Nonas Augusti, sub ortum solis, classis Cæsariana, quam ducebat Ansaldo à Mari Halmiras, prætenta portui, prope à terra haud plures quingentos passus apparuit: sive ille fallendi spe ac furto insidiarum urbem intrandi inductus, sive sese aliquid moturum ratus; ac tam propinquum validumque auxilium exsulum propinquis, illosve aut partium Mascaratarum aut quavis alia necessitudine attingentibus, occultoque studio faventibus, animos facturum; sive qua alia causa hoc consilium ceperit: cum nihil successisset, (civitas enim omnis, cum summa omnium ordinum conspiratione, momento

temporis in armis fuit) paucis post horis quam venerat, classe meta Saonam cursum dirigit; indeque Naulum petit; spe à Saonenſibus, Finarienſibus, Ingaunis facta, primo adventu illum ea urbe potiturum: verum irritum inceptum fuit; egregia enim Naulenſium in Genuenſem populum conſtitit fides: qui duas Genuenſium triremes præſidiarias ſubductas ab illius impetu defenderunt; domosque ipſi ſuas, atque ædificia, quæcunque erant extra pomerium, tamquam defenſioni incommoda, incenderunt: at Genuenſes poſt diſceſſum claiſis Cæſarianæ, ceteris omnibus rebus omiſſis, ſummaque contentione adhibita, minus viginti quattuor horarum ſpatio, prælucentibus facibus nocturno operi, claiſem unius & quinquaginta triremium omnibus neceſſariis armamentis bellicis apparatus inſtruxerunt; quam, Anfaldo Soldano & Jacobo Levanto Ducibus, omnis fere juvenſtus cum magno animorum ardore conſcendit: altero die, poſt conſpectam hoſtium claiſem, vexillo ſublato iter in hoſtem intendunt: quod ne noctu quidem intermittunt; ſperantes ſeſe tenebris tectos claiſem hoſilem in portu Naulenſi improvifo deprehenſam oppreſſuros: verum à vento deſtituti ortum lucis antevertere non potuerunt: Cæſarianaque claiſis, illis appropinquantibus conſpectis, trepidans, extemplo funibus inciſis, ancorisque ac ſcaphis relictis, atque omnibus curſum tardantibus in mare projectis, fugæ ſe mandat: quam exoneratam, atque idcirco celerius navigantem Genuenſes aſſequi poſſe desperantes, claiſem Naulum appellunt, fideque Naulenſium laudata, cuius populum Genuenſem perpetuo memorem fore aſſerunt, urbi præſidio ac ceteris neceſſariis rebus firmatæ Fulconem Guercium præficiunt: celocibusque circummiſſis, cum nihil certi aut explorati haberent, quo claiſis Cæſariana, quæ velis in altum datis conſpectui ſe ſubtraxerat, iter intendiſſet, quoſque portus quæve littora petiſſet, Genuam revertuntur.

Diſceſſu Genuenſis claiſis cognito, Anfaldus ab exſulibus Ingaunis inductus arcem inſulæ urbi objectæ invadit: quam nullo ſatis valido præſidio adverſus tantam vim firmatam Lanfrancus Bucca, nulla oppugnatione expectata, illico tradit, traditamque Anfaldus ſolo æquat: indeque profectus opidum Cervum fruſtra tentat; ab opidanis ac Dianenſibus conjunctis nonnullisque militibus Genuenſibus, non ſine detrimento, repulſus, triremi una amiſſa: qua re Genuam nunciata momento temporis claiſis unius & quinquaginta navium longarum, partim triremium, partim galeatiarum, ex cura ante præparata armata eſt: quæ omnem florem juvenſtus vehens, illico ſolvit: qua ab alto conſpecta, Cæſarianæ naves, ne in ipſo quidem portu Saonæ ſatis ſe tutas exiſtimantes, trepidam fugam continuo capiunt: quas Genuenſes aliquandiu inſecuti, cum aſſequi non potuiſſent, in portum Naulenſem concedunt: at Cæſariani, ſperantes ſe Genuam tantæ claiſis diſceſſu defenſoribus vacuum offenſuros, extrema inſequenti nocte nondum certa luce, Genuenſem portum ſubeunt: vana ſpes evaſit: Genuenſes enim, qui remanſerant, armis repente arreptis, ad portum undique concurrentes, acriter primo reſiſtunt: deinde omnibus viribus connixi Cæſarianos repellunt: ſignoque conſueto in montium cacuminibus ſublato, claiſem è portu Naulenſi accerſunt: quam rem Cæſariani ſuſpicantes fore, itinere retro petito, ſeſe in portum Saonenſem recipiunt.

At Fridericus intelligens nihil ſibi via maris, cuius Genuenſes potentiores eſſent, proceſſurum; terreſtribus Ducibus, ac res ſuas procurantibus

A imperat, ut ditionem Genuenſem ex omnibus locis quam acerrimo bello urgeant: cum etiam Anfaldo mandaviſſet, ut nihil de inſtituta contentione in Genuenſibus maritimo bello premendis remitteret: impigre omnes imperata faciunt. Ebuliusque Longobardia cum Maſcaratis exſulibus movens, auxiliaque à Papienſibus, Alexandrinis, Dertonenſibus, Vercellenſibus, Novarienſibus, Albenſibus, Aquenſibus, Caſſinenſibus ſubmiſſa trahens, Marchione Montisferacis, ac Marchione Boſci comitibus, Vuadam uſque perrexit; verbisque ferox ſeſe in vallem ipſam Porciferæ deſcenſurum, arcemque in phari promontorio, quæ portui Genuenſi imminet, excitaturum jactat. Eodemque tempore Palavicinus ipſe quoque ex agro Lunenſi movet; haud exigua Etruſcorum manu, regionisque Lunenſis hominibus, ac Marchionibus Maſſapinis illum ſequentibus: opidaque Montem rubrum & Vernatiam uſque pergit, ſeſeque copias ipſi urbi Genuæ admoturum minatur. Anfaldus quoque haud cunctatus è Saonenſi portu prodiens, claiſem uſque ad Vulturem opidum promovit; ibique in ancoris ſtetit.

C Nihil tantis undique circumſiſtentibus terroribus Genuenſes animis imminuti, ſeſe ad reſiſtendum parant: cumque ad omnia non ſatis eſſet virium; rebus maritimis tamquam minus prementibus in præſentia omiſſis, Orientalis oræ incolæ, nonnullis equitibus illis datis, adverſus Palavicinum mittunt: quibus appropinquantibus Palavicinus retro caſtra movet. At Prætor cum externa militia omnibusque civitatis viribus adverſus Ebulium majoremque molem belli proficiſcitur, nonnullis armatis in præſidio Vulturis opidi relictis: Vuadamque contendit; ac primo adventu cum Cæſarianis manum conſerit: quod prælium Genuenſibus ſecundum fuit: Cæſarianique non ſine ignominia clam noctu, duobus ſignis amiſſis, è finibus Genuenſibus excedunt, ſeque in ſua recipiunt. Anfaldus quoque, cognitis, quæ ad Vuadam geſta ſunt, Arenzanum opidum conceſſit; ibique multos ex ſuis, cum exſcenſionem feciſſet, ac nonnulla ſigna amiſit: exſulesque Genuenſes, qui Buzalæ confederant, non ſe ſine periculo ibi eſſe exiſtimantes, Longobardis auxiliis deſtituti, Saonam ſe conferunt, ac cum reliquis conjungunt. Ebulio repulſo, Prætor copias in Palavicinum vertit: verum non ultra Sigeftrum opidum proceſſit; cum ad ejus ſamam, Palavicinus, omiſſo oppido Vernatia, in ſua conceſſiſſet.

E Igitur Genuenſes à terreſtribus periculis liberi, omiſſas rerum maritarum curas reperiunt; claiſemque, Gulielmo Gabernia præfecto, Saonam mittunt: ſed irritus exitus fuit; exſules enim & Saonenſes oſtium portus vallo antennarum magnæ craſſitudinis obſtruxerant, proximæque littora firmiſſimis ligneis munimentis ſepierant: quæ Gabernia comburere adortus, nonnullis navigiis picis & bituminis & aliorum ignis alimentorum plenis incenſis in ea immiſſis, ſubita coorta tempeſtate omittere inceptum coactus eſt, ſeque in portum Naulenſem recipere. Quare Anfaldus, obſidione ſoluta, cum nondum tempeſtas plane ceſſaviſſet, viginti triremes in Siciliam mittit; quas Uberto Ponzettæ ducendas tradit: quæ claiſis ad portum Piſanum Sorleonem Piperem, & Ingonem à Volta Maſcatorum ad Cæſarem Legatos, qui tum Faventiam obſidebat, in terram exponunt. Anfaldusque novem triremes, quæ reliquæ erant, ſubduxit; reliquam claiſem ex Provincia Narbonenſi exſpectans. Igitur Gulielmus Gabernia, omni ſpe hoſtis lædendi omiſſa, Genuam reverti.

revertitur. Anfaldus quoque cum paucis illis, quas retinuerat, navibus, usque haud satis instructis Saona profectus, Sardiniam primum appulit, indeque Siciliam petit.

Interea exsulum Legati Faventiam pervenerant; quibus ad Caesarem introductis, alterum eorum in hanc sententiam locutum accepimus: Si non major res tua in ope nobis ferenda, quam nostra in illa imploranda ageretur, Caesar, digni fortasse essemus, qui etiam, arumnis nostris nihil rem tuam attingentibus, a te non desereremur: qui, dum nostram fidem adversus quoscumque, vel maximos Principes, tibi prestare volumus, in miserum hunc statum nos demisimus: quid enim est in malis reliquum, quod ad nos non pervenerit? domo ab inimicis nostris iisdemque hostibus tuis exacti, patria extorres, omnibus fortunae versi, omnium rerum inopes, a subiectis ipsis nostris omnibus iniquitatibus vexati, contumeliis appetiti, ab omnibus despecti in turpi exsilio consensescimus: qua per se acerba & indigna, acerbiora facit inimicorum nostrorum, qui contra te arma aperte tulerunt, ex altera parte fortuna collata; quos cernimus alacres ac latos, opibus affluentes, dignitate florentes, in patria tranquillam aetatem agere; penes illos potentiam, auctoritatem, honores, imperia esse: idque te non incolumi modo, sed in maximo felicitatis cursu, atque in tanto rerum fastigio posito. Ac nescimus, quo numine nobis irato fiat, ut quicumque contra te venire ausi sint, aut imperium tuum abnuere, magna excidii mercede sua ipsis temeritas steterit: Genuensibus solis hostibus tuis spretum imperium tuum non modo impune, sed etiam fructui & emolumento sit: in quibus rebus negligendis, ecquid intelligis, Caesar, eo maiorem tuam rem, quam nostram agi, quo major est existimationis ac fama iactura, quam familiaris rei ac patria ipsius amissio? liberant te quidem ab omni adversa existimationis metu res a te praclare gesta, maxima victoria parte, ingentes copia deleta, innumerabiles munitissima urbes expugnata. Eripiunt orationem obrectatoribus praestantes atque heroicae virtutes tuae: sed te non latet, Caesar, tantarum laudum gloriam non minore labore nos tueri, quam querere: qua quo excelsiore loco posita est, eo magis telis obrectatorum est obnoxia. Cave igitur, per Deum immortalem, Caesar, ne, cum hac exceptione nostri destitutorum, lauderis: neque vero te nihil pro nobis fecisse arguimus; maximis classibus saepe, ac nunc, ut cum maxime, a te adjuvi; ne vitium ingrati animi eo maiorem tibi in nobis stomachum faciat, quo ab illo te longius abfuisse cum semper declarasti; tum in nostra defensione, maiore conatu, maioreque ope, quam adhuc factum est, amplectenda, in primis declaraturum speramus: ceterum non in classibus spes contumaciam Genuensium hostium contundendi tota vertitur; qui navalibus opibus ac mari non minus, quam tu, possunt: sed terrestri bello acriter & vehementer petendi sunt, oraque Ligustica, qua aluntur, illis adimenda; urbs ipsa arcta obsidione premenda: neque molliter, ut adhuc factum est, aut incursionibus agendum: neque ea mittenda copia, qua ad primum aspectum hostium, ne fortuna quidem pugna tentata, tamquam aves ad primum crepitum avolent: alii id potius contumaciam hostium, quam audaciam frangit: quod consilium te tua sponte non cepisse, duabus de causis non satis mirari possumus, Caesar: altera est tuum ipsius exemplum; qui ipse non per procuratores bella gerere soleas; sed infesta arma circumferens hostes non magis copiis omnibus tuis, quam praesentia quoque, cuius non minora sunt quam opum momenta, urgere: ut nunc in Faventia obsidenda facis: altera, quod, cum in res, quo maioris fructus sunt, eo major laboris & opera fieri soleat impensa; maioris emolumentum spe Genuae quam Faventiae impetrari petitur: quod cum per se, suaque amplitudine longe majus est: tum ad possessionem regni Siculi, eorumque, qua in Italia tenes, tibi stabiliendam, ma-

gnas habet opportunitates, viamque tibi ad eam, quam spectas, amplitudinem communit: Mediterranei enim maris te dominum facit: qua res Gallorum arma in Italia regnantibus perpetuo formidolosa, & adversus Reges, quos fastidiunt, a Pontificibus accersiri solita, procul a te arcet, maritimo itinere illis intercluso, quod expeditissimum ac tutissimum est; cum terrestre longum atque arduum, milleque discriminum plenum sit: ceterum de his rebus tuum erit consilium, Caesar. Nos miseras nostras tibi aperuisse, opem tuam in extrema fortuna nostra enixis precibus implorasse, fidem in nobis non deserendis obtestatos esse, gravari non debes, Caesar; teque non oratione nostra perstrictum putare; sed afflictum statum nostrum coram te, qui illum sublevare unus potes, luxisse, a quo animo ferre.

Ad ea Caesar, orsus a commendatione perspectae illorum fidei, egregiaeque in se voluntatis, cuius se perpetuo memorem fore dixit, illorum mala & angustias non minus sibi quam illis ipsis graves esse respondet; quibus, non prius se quieturum, quam illos liberatos, atque in patriam & in pristinam dignitatem restitutos videat: ceterum bellum terrestre adversus Genuenses aut nullius, aut parvi admodum, fructus se semper censuisse, ac nunc censere: aliter omnes suas vires, omnemque belli procellam ceteris omisissis, etiam ab ipsis non incitatum in illos versurum fuisse: nam neque Ligusticam oram cum ullo operae pretio Genuensibus adimi; non enim a sterili Liguria solo Genuam, sed potius a civitate Liguriam ali: quae res tamen longi laboris & immensi operis sit: neque enim capta opida ob egregiam Ligurum in Genuenses fidem teneri posse; nisi singula singulis, iisque non invalidis praesidiis firmentur: & civitatem ipsam frustra obsidione cingi, quae illico turpiter sit solvenda; cum nudum & asperum circumjectum solum copias circumfidentes alere non possit; & subvectiones longae atque impeditae per vias asperas & confragosas, atque per abscisas rupes sint; ut triduo maiore necessariorum alimentorum inopia obsidentes, quam obsessos laborare, necesse sit: unam igitur reliquam esse cum Genuensibus belli gerendi, eam, quam institerit, maritimam viam; eam urgendam: mari adempto, omnia simul Genuensibus adimi: non minus se in sociis & amicis suis constantiam & perseverantiam, quam virtutem & fidem optare: nisi illa adsint, inutilia haec esse: summam molliciei esse in ipso limine deficere; ac, nisi consilia subito successerint, animum despondere: non hoc a fortibus viris, quales ipsos esse expertus sit, se expectare: ad ceteras igitur virtutes suas hanc unam patientiae adderent; qua una in primis omnia, ac praesertim bella vincantur: neque tamen haec in eam sententiam dicere, quod non illos terrestribus quoque opibus adjuvare in animo habeat; adiuturum enim se sedulo: qua in re illorum potius voluntati se indulgere, quam ulla magnae rei spe induci: proinde abirent, nuntiarentque iis, a quibus missi essent, forti animo & constanti essent; scirentque Friderico ipsorum salute & dignitate antiquius nihil umquam fore.

Cum hoc responso dimissi Legati sunt; Ebuliusque, litteris Caesaris acceptis, exsulis & Saonensibus instantibus, mense Octobri fines Genuenses ingressus, firmioribus quam antea copiis arcem Signii castelli circumfessit; nihil tamen multorum dierum oppugnatione profecit; Naulensibus arcem egregie defendentibus: ceterum, Jacobo Carretto cum haud contemnendis copiis atque hominibus Finariensibus illi adjunctis, acrior oppugnatione integrata est; moeniaque murali ma-

china quati cœpta: quare Naulenses tantæ in se incumbenti moli impares Genuam auxilium postulatum mittunt. Consilio à Prætorē coacto decernitur, Naulensibus pro multis illorum in Rempublicam meritis, nulla interposita mora, omnibus terrestribus & maritimis copiis subsidio eundum: qua de causâ Prætor Varaginem opidum usque processit: quo ut copię convenirent, edictum fuerat: verum, adversis tempestatibus cum contrahi copię non potuissent, ne omnino defererentur Naulenses, equitum centuria cum non exiguo peditatu missa est, irritō incepto: ante enim illorum adventum, nonnulli Signini præmiis empti arcem hosti prodiderunt: quam Carrettus præsidio firmavit: cujus rei nuncius non minus Genuensibus, quam Naulensibus ipsis tristis fuit: Prætorque & Magistratus Carretti injuriis irritati delectam equitum & peditum manum; Duce Fulcone Guercio, ad hominem bello persequendum, ejusque ditionem vastandam mittunt: ceterum exitus contrarius fuit: profligatæ enim ac fusæ sunt à Carretto Genuenses copię, ac Fulco Dux captus. At Prætor & Magistratus urbi Naulo in tanta hostium propinquitate timentes, quinque ex primoribus civibus eo mittunt, non magis in opidi præsidium quam ad solatium acceptæ cladis, Lanfrancum, & Morruellum Marocellos, Henricum Nigrum, Lanfrancum Ufufmarium, Piccamilium: cum Lanfranco Marocello affinitatis necessitudine sibi conjuncto sermonem contulit Carrettus, poenitentiam factorum simulans; seque novis in Rempublicam Genuensem meritis præteritorum culpam emendaturum confirmans: qui tamen fidem promissorum ludificatus est; cum nullum finem faceret cum Finariensibus suis finitimam ditionem Genuensem incursionibus ac rapinis vexandi: circumactusque tandem est annus initio & exitu Genuensibus funestus.

A. C. At insequens annus ejus seculi quadragesimus 1242. alter nullis quidem cladibus lugubris fuit; ceterum non minoribus molestiis ac vexationibus infestus; Prætorēque habuit Conradum Concessium Brixianum, experientem, ac fortem, magnique animi & consilii virum. Friderici partes sequebantur Alexandrini, Dertonenses, Albenenses, Hastenses, Aquenses, Cassinenses, Vercellenses, Novarienses, Papienses, Cremonenses, Parmenses, Pontremulani, Lunenses, Graffagnini, Marchiones Montisferacis, Cevæ, Bosci, gens Malaspina, gens Palavicina cum magno clientium numero, ad hoc Mascarati Genuenses exules, qui conjunctos habebant Saonenenses, quos supra à Genuensibus defecisse scripsimus, Ingaunos, Finarienses, incolas Celaci, Carpenæ, Bozoli, Montisrubei, Laci, multosque alios; qui omnes sese ad Mascaratorum societatem adjunxerant; cum Mediolanenses tantummodo & Placentini à Genuensibus starent.

Prætor ulcera propiora ac visceribus magis hærentia sigillatim præcidere aggressus, consilio cum nemine communicato, ne aliqua emanaret, mense Martio cum urbanis ac trium præfecturarum delectibus Genua profectus, ditionem Gulielmi Spinulæ, qui in ea regione caput Mascaratorum erat, invadit; homini infensus cum multis aliis de causis, tum quod filium ad Fridericum in civitatem incitandum miserat: Roncumque opidum primo adventu capit, ac præsidio valido firmat: Genuamque reversus, eandem vim belli insequenti mense Aprili in Savinionem & Costam Bellatam ejusdem Gulielmi opida intendit: quibus captis, Gulielmus Buzallam se recipit; magnisque exsulum & faci-

nororum hominum, ac rapinis & latrocinii vitam tolerare affluetorum gregibus communit; cum quibus incolas vallis Scriviæ, ac circumjectam regionem subitis incursionibus, incendiis, direptionibus cœpit vexare. At illi, incolis burgi Furnariorum, Falconis Porciferæ sibi adjunctis, acriter Gulielmo resistentes rem Prætori demonstrant, atque opem implorant. Ille enim vero ex decreto magni consilii exercitū educto, sub finem mensis Aprilis Buzallam petit; opidoque nullo certamine capto, eos, qui erant in præsidio, veniam suppliciter petentes cum rebus suis, quas secum ferre possent, incolumes dimittit: paucisque post diebus captum castellum nec non Genuæ ædes Gulielmi, simulque ædes Sorleonis Piperis disjicit: quibus rebus, quibusque meritis magnam gratiam vulgo inuit; timore incorruptæ severitatis, ac viri reverentia omnes in officio continente.

Igitur percrescente in dies fama, hostes ingentem navalium ac terrestrium copiarum, omnique generis bellicorum apparatus vim comparare, in Genuenses omnem vertendam; Prætor, consilio civitatis vocato, orsus ab ipsorum Majoribus; cum illorum res gestas ac religionis studium magnifica oratione ad cœlum extulisset; hortatusque esset, ut tot præclara exempla sibi ad imitandum proponerent: *Quod si illi, inquit, tot labores exhaustire, tot discrimina subire, tanta itinerum spatia emetiri, tam longinquas Provincias adire, pro gloria & decore numquam recusarunt, cum à nemine læsi, nullisque injuriis læssiti quietam atatem agere possent; quid vobis tandem est faciendum; quibus non de dignitate, aut imperio, sed de libertate vestra, de vita, de civitatis excidio est à Friderico indictum certamen? Barbarus atque infinita ambitionis Tyrannus, imperioque Italia hianti cupiditate imminens, ac funesta arma circumferens, non prius quieturus est, quam nobilissimam Provinciam parentem nostram jugum accipere cogat: nulla alia de causa in sacrosanctos Pontifices tam efferatus est, quam quod in illis oppugnandis sese in arcem Italicae libertatis invadere intelligit; simulque cum illis eversis illam eorum capite nitentem prosterni. Quid autem caci Itali partes illius sequentes petunt; qui nullum amicum habeat, nisi is prius jugum acceperit; Quod autem est hoc hominis portentum? quem haud facile statuas utrum amicum an inimicum magis abomineris: quippe qui amico libertatem, inimico vitam adimat? quod illum in vos moliri, utinam tot lugubria Italia exempla non vos admonerent: sed, ut cetera omittam, sacrorum Antistitum casus cogitationi subjicite; quos captos ac tetra carcere inclusos omnibus humana patientia intolerandis malis jam diu macerat: idque nullis illorum injuriis læssitus; sed ea tantum de causa, quod Pontifici Romano in pio & necessario munere obediendo dicto audientes fuerint, pro debita illi obedientia; cujus nullo jure Friderico contra erant obstricti. Quid igitur illum vobis facturum censetis; quos ad ejusdem actionis societatem, crimen quoque Majestatis læsa, atque imperii spreti, cui vos subjunctos putat, in sacris Antistitibus, ipso contra nitente, vehendis addidisse praefert? Non est igitur tanta necessitati indormiendum, Genuenses; sed, omni privatarum rerum cogitatione ablegata, negotiationeque mercatoria in presentia ommissa, Respublica toto pectore amplectenda, omnesque cura penitus desigenda in vobis ac liberis vestris defendendis, atque excidio à civitate vestra arcendo: quarum rerum exsequendarum liberam facultatem vobis præbent impedimenta lateribus vestris adherentia, divina benignitate, atque opera vestra, me Duce, modo præcisa.*

Animis sua sponte fatis incensis, tam vehementes adhibita oratio miros ardores addidit: ingentesque gratiæ Prætori actæ sunt; qui pere-

grinus magis de Genuensis civitatis salute & libertate laboraret, quam ii ipsi ejus cives. Dimisso igitur consilio; omni contentione in res ad usum tanti imminenti belli necessarias expediendas incumbentes; carinis positis, opereque numquam intermissio, brevi quadraginta triremes ad eas, quas habebant, novas addiderunt: mensaque Julio incunte, certiores facti, classem Casarianam sexaginta triremium ac duarum onerariarum omnibus belli apparatus affatim instructam, magnoque bellatorum numero refertam Pisas appulsam, eodem quo superiorum annorum Ansaldo à Mari praefecto; Pisanos quoque usque ad numerum quinquaginta duarum navium, partim triremium, partim biremium, ac varii generis navigiorum enixos, quibus Buzacarinus praefectus esset; institutam curam & diligentiam duplicant: Legatosque Venetias mittunt, ad auxilia ex foedere Pontifice auctore inito poscenda; in tanto imminenti bello à Caesare & Pisanis omnibus opibus in suam perniciem incumbentibus. In fide fuerunt Veneti; sexagintaque triremes Genuensibus, Andrea Teupolo praefecto, haud retractanter subsidio miserunt: quam tamen classem ideo non ultra urbem Dyrrachium Venetarum rerum Scriptor processisse tradit; quod ad eam urbem nuncium acceperit, classes Casarianam & Pisanam à Genuensibus in mari Corsico signis collatis superatas: quare, cum nullus esset ipsorum auxilii usus, iter retro repetisse: cui Scriptori, quamquam nulla hujus rei in Genuensibus Annalibus est mentio, verisimilia praefertim, quod ad classem missam attinet, tradenti, fides non videtur abroganda.

At Genuenses nihil cunctati, navibus nuper aedificatis deductis, subito tres & octoginta triremes, tredecimque taridas, ac tres ingentes onerarias armant, albo colore pictas; luteo omisso, quo civitas ad eum diem usa fuerat: edictumque totis Genuensibus finibus propositum est, ut omnes ad classem sine ulla mora conscendam praesto sint; Praetorque, populo in aream ante aedem divi Laurentii convocato, vexilloque Georgii Genuensium tutelaris divi effigie insigni sublato, operam suam pro summo praefecto classis profitetur, cunctis approbantibus, ac gratias agentibus, & fore hoc quoque in numero ceterorum meritorum conclamantibus: ipse nullas partes assumpti muneris diligentia sua praetermittens, octo celocibus, quas *portentinos* vocabant, ad eum usum destinatis, vexilla singularum regionum privato illarum insigni distincta distribuit, accersitisque nonaginta vexilliferis à consilio decretis, bina singulis signa, alterum Genuensis civitatis, alterum Venetae, ex recenti cum Venetis foedere, attribuit: delectuque pugnatorum & nauticorum fortiorum in urbe, remigum in praefecturis habitato; classem florentissimis copiis, omni armorum atque omni nautici & bellici instrumenti genere firmat; magna vi bellicarum machinarum in galeatas imposita, magnaue panis torridi, & reliquae annonae copia in naves distributa.

Cumque auditum esset, classes hostiles Portum Veneris appulas; ac cum Uberto Palavino circumjectum agrum urere, Praetor, copiis lustratis, sub finem mensis Julii, classem extemplo conscendit, iterque in hostem dirigit: qui interea, omisso Portu Veneris, Lemari validum ac frequens opidum terra & mari oppugnatum perrexerat; irritum incepto, opidanis acriter se atque opidum defendentibus: cum Praetor Sigestrum opidum praetervectus es-

set; hostes, re cognita, subito metu tam validae appropinquantis classis correpti, angustiis temporis urgentibus, scalis, ancoris, ac non exiguo armamentorum numero relicto, classe raptim conscensa, trepidam fugam Pisas versus capiunt: quos Praetor aliquot horas frustra insecutus est; galeatis celeritatem triremium praegravitate sua non aequantibus: quare Praetor nocte oppressus finem insequendi facit, triremi Pisana minoris formae capta; quam postea Genuam reversus in terram subduci iussit, signa Pisana cruore oblita, ad ignominiam gentis, per terram trahentem. Majore mercede fuga Palavino stetit, tempore eodem capto; haud exigua suorum caede à Levantinis insequentibus edita. At praefecti Casarianus & Pisanus, cum nonnullae ex eorum navibus ad fauces Macrae & Arni fluviorum ejectae essent, verecundia ignominiae fatendae, Pisas accedere non ausi, ante portum Pisanum in salo steterunt: cum interea Praetor ab hoste insequendo ad Levantum substitisset; opidoque egregio praesidio firmato, Sigestrum reversus esset. Ibi cum audisset hostes, quibus se adjunxerat Andreolus à Mari praefecti filius cum duabus triremibus, in quibus vexillum Friderici vexerat, ipsius reditu cognito, ad opidum Ericem classem appulisse, galeatis impedito navigii genere cursum tardantibus relicto, cum expeditis triremibus ad hostes contendit: qui, re cognita, cum manum conferere in animo non haberent, altum petentes Saonam iter dirigunt: quo brevi appulerunt. At Praetor spe hostem certamen detrectantem adipiscendi frustratus, cum diem unum ad Portum Veneris in ancoris fuisset, viam, qua venerat, retro repetit; atque in itinere agrum opidi Corniliae, quod ad hostem defeceerat, populatur: ceterum cursum Saonam directum tenere non potuit, adversa tempestate coactus portum Genuensem subire; seseque in eo aliquot dies tenere: quae cum tandem exstavisset, sub finem mensis Augusti, galeatis Genuae relicto, cum reliqua classe trium & octoginta triremium portum exiens iter Saonam dirigit; sperans se, quando nulla alia re posset, arcta tandem obsidione necessitatem pugnae hosti expressurum: antevertit Ansaldo consilia Praetoris, fuga ante ejus adventum in altum capta: spe igitur, qua venerat, frustratus Praetor, Saona omissa, Ingaunum usque perrexit: quo appulsus agrum Ingaunensem, longe omnium Ligusticorum fertilissimum, vastat; nonnullaque navigia sale onusta capit: ibi cum audisset hostem ad Andoriam opidum stare, cursu propero eo contendit: hosteque non invento, deceptusque à Bonifacio Marchione Clavestanae, qui in colloquio spem fecerat Andoriae tradendae, quod opidum studia cum Ingaunis conjunxerat; iram omnem in Andorienses effundit, eorum regione omni belli clade pervastata, navigiisque in terram subductis incensis.

Eo tempore quinque naves, quorum tres fuerunt triremes, ad Praetorem venerunt, à Romæo Villanova Ballivo Comitum Provinciae Narbonensis Genuensibus auxilio missae: ex iis cognovit hostilem classem ad insulam sanctae Margaritae conspectam: extemplo igitur iter eo dirigit; cumque Antipolim tenuisset, vexillo erecto insulam sancti Honorati petit, spe hostis ibi improvise opprimendi: ceterum ille, Praetoris adventu cognito, ancoris & scalis relicto, trepida fuga periculo se subtraxerat; Heresque opidum concesserat: qua spe dejectus Praetor, consilio hostem, quocumque ille pergeret, insequendi non deposito, Cavalleriam opidum, quo hostem

stem se contulisse audierat, classem promovet, ne ibi quidem fugacem hostem allecutus: qui, Provinciae ora relictæ, iter in Corsicam insulam direxerat: at Prætor adversa tempestate deprehensus diem ad littus Heres in ancoris fuit: postridieque in terram egressus, ac tentoriis ad fauces Capelli fluvii statutus, ducentos medimnos salis in singulas naves imponit; cuius pretio impendia in classem publice facta compensarentur: cum quo unaque cum multis navigiis negotiationis causa ultro citroque commeantibus, quæ sese illi subinde applicarant, spe hostis adipiscendi, à qua toties ludificatus esset, plane deposita, Genuam repetit: quo Idibus Septembris appulsus, magno cum honore exceptus est: qui, cum esset auditum hostilem classem ad littora Corsicæ, sæva coorta tempestate, laceratam ac passim dissipatam; falso rumore deceptus, de consilii sententia, fociis navalibus & remigio commeatum dedit: qua occasione arrepta, Anfaldus, qui integra classe incolumis Pisas appulerat mense Septembri, extemplo Pisis solvens iter Saonam versus capit.

Per idem tempus, cum galeatia ac duæ onerariæ mercibus magni pretii onustæ ex Oriente reversæ Arenzanum opidum tenuissent, ventoque adverso flante, ibi subsistere cogerentur; Prætor illis timens, edicto tota urbe pronuntiato, omnibus confestim consendere iussis, momento temporis ex urbanis tantummodo copiis duas & triginta triremes armavit, à quibus onerariæ remulco incolumes in portum tractæ sunt.

Per idem tempus Ebulius, delecta armatorum manu secum ducta, Saonam venit: insequentique die ipse terrestri itinere, Anfaldus classe Cogoretum & Arenzanum petunt; circumjectaque ædificia diripiunt & incendunt: adversus quos Prætor urbanas copias eduxit: cuius appropinquantis adventu non expectato, hostes iter retro repetunt: ille in urbem reversus summa contentione adhibita, triduo septuaginta triremes omnibus necessariis rebus refertas armat: cum qua classe Kalendis Octobris portu movit, Saonamque appulsus fauces portus obsidet: qua re vehementer commotus Anfaldus, omni elabendi via interclusa, tanta classe portum corona cingente, Ebulio Vicario Cæsaris, ac Marchionibus, & ceteris, qui illum secuti fuerant, nec non Saonensibus imperat, ne quisquam urbe excedat; sed sese omnes pro se quisque ad classem defendendam comparent, puppibusque navium in hostem versis, quam proxime potest terræ se applicat: firmoque vallo ex malis & antennis navium, aliaque lignea similis crassitudinis materia classem circumdat; ex quibus tormenta contorta hostem ab accessu classis arceant: cuius munimenti adspectu commotus Prætor, ab omni oppugnationis consilio deterritus, quam neque sine magno discrimine & cum nulla effectus spe fore intelligebat, aliam viam expugnandi hostis init: duas enim naves pice & aliis alimentis ignis refertas Genua accersitas & incensas in classem hostilem immittit: ceterum adverso flante vento, naves retro compulsæ, flammisque in ipsas tendentibus, eodem incendio, quod aliis machinabantur, ipsæ absumptæ sunt: quo casu hosti animi creverunt: quo ultro illudente; Prætor dolore & ira incensus duas alias naves in eundem usum comparari iubet: quæ dum instruuntur, adversa tempestas subito coorta, eum ab obsidione abstraxit, & in portum Naulensem compulit: enimvero Anfaldus occasionem non indormiens, omnes copias, quæ Saonam contractæ erant, terrestri via Albizolam

opidum mittit: quo ipse cum classe contendit, litus, quam proxime potest, legens. Qua fama excitus Prætor, classe extemplo conscensa, movit, abeuntemque hostem insequi coepit: quem ut à littore divelleret, simulans se Genuam, hyeme jam appetente, repetere constituisse, altum petere coepit; ut, si hostis, eo laxamento dato, littore relicto, apertiori ac liberiori navigationi se committeret, ipse obliquo & breviori itinere sese interlitus & classem hostilem insinuans receptum in portum Saonensem illi interciperet; ac proinde hostem ad necessariam pugnam attraheret: sensit astum Anfaldus vetus & peritus Dux; sententiaque retinens fuit. Cum consilium non procederet, Prætor impetu potius animi & iracundia proventus, quam ulla affectus spe, classem in hostem concitat. Impetum venientis declinat Anfaldus; contraversisque proris, in portum Saonensem atque intra septa classem incolumem subducit. Prætor in portum Naulensem concedit: qui insequentem die prima luce Saonæ classe admota, cum portus fauces totum illum diem infedisset; omni tamen spe omiſsa retractantem hostem ad necessitatem pugnae compellendi; ne in spem irritam tereret tempus, classemque graviore anni tempore maris casibus obnoxiam haberet; valido vento primis tenebris coorto, obsidionem solvere coactus iter Genuam intendit: quod infestum habuit: complures enim triremes à vento magis ac magis sæviente, majoresque subinde volvente fluctus, in terram ejectæ littoribus Arenzani & Vulturis opidorum illisæ sunt, remigio tamen salvo: quas Prætor in terram subductas quam primum refici jubet; rebus necessariis in opus provisus: quibus rebus procuratis, cum reliqua classe portum Genuæ ingreditur.

Nec lætior navigatio Anfaldo fuit; nonnullis illius navibus ad Vada Sabatia in terram ejectis: quibus mox refectis, cum audisset Genuæ, copiis dimissis, classem dearmatam; securus ab illorum petitionibus iter in Provinciam Narbonensem intendit; salem petens, cuius summa inopia Saonæ laborabatur: qua re cognita, Genuenses, copiis dimissis iterum coactis, septuaginta triremes iterum instruunt: quæ, adversa tempestate viginti dies portu se tenere coactæ, numquam se mari commiserunt: neque enim necesse fuit. Interea Anfaldus nullo sale ad opidum Heres invento, Tolonem usque pergere coactus est: in quo portu duas onerarias Genuenses mercibus onustas ex Hispania venientes cepit, ac Massiliam duxit: hunc Massilienses, foederibus Genuensibus spretis, in portum acceperunt: qui, mercibus ex captis navibus in suas translatis, Saonam revertitur: in exituque mensis Octobris Andreolus filius, cum quinque & triginta triremibus ex ea urbe profectus, iter Apuliam versus capit: idem facit paucis post diebus ipse Anfaldus cum reliqua classe, Sicilia repetita: ita anno per fallacias hostis insidiantis, & occasiones captantis, ac bellum ludificantis verius, quam gerentis, sine ullo operæ pretio extracto, tanti utrimque apparatus inanes evaserunt: cuius rei causam mihi diu quærenti, cum, ne timorem fuisse crederem, faceret superbum ac ferox Pisano- rum ingenium, ac de Genuensibus contemptim loqui consuetorum, quique nullam timoris significationem, aut in superioribus, aut in iis, quæ consecuta sunt, bellis umquam dedissent, illa veniebant in mentem; Fridericum Ducibus suis à fortuna pugnae tentanda, classeque sua in precipitem casum danda enixe interdixisse; si fore speraret, ut Genuenses tædio belli ac laborum & impendiorum satietate fessi, quibus pares diu esse non possent, tandem ipsi per se, sine ullo discrimine rerum ipsius Friderici, caderent: si vel lud veteratoris atque ad omnem fraudem & fallaciam

compositi ingenii fuerit consilium; ut bellum diu extrahendo, utriusque prævalentis populi vires asfiduis cladibus & detrimentis conficeret: quos enervatos & exsangues, omni libertatis specie adempta, ad necessitatem jugi capiendi tandem subigeret.

At Genuenses intelligentes causam & fontem malorum & vexationum Saonam esse; eaque tam propinqua urbe ab hostibus stante, numquam sese ac sibi subiectos populos quieturos; eam urbem esse perpetuum hostium receptaculum; ex ea totam oram Ligusticam asfiduis excursionibus terrarumque infestam fieri; ipsamque urbem Genuam obsessam teneri: eam, arcem libertati Genuæ imminentem hostem sibi in media Liguria fecisse, illisque veluti compedibus Genuam constrictam tenere: hæc igitur secum reputantes Genuenses, pestem visceribus hærentem, omni ratione à se depellendam statuunt: quod consilium jampridem animo agitatum, Reipublicæ temporibus, aliisque magis urgentibus occupationibus ad eum diem exsequi prohibiti sunt: igitur omnibus curis in illud bellum versis; viam sibi ad illud præmunire, atque omnia impedimenta, quæ tardare cursum consiliorum possent, remove, & cetera, quæ ad rem perficiendam pertinerent, expedire instituunt: quare occulta consilia pridem cum Marchionibus Montisferacis, Carrettis, Cevæ instituta, sed lente & frigide ducta, majore diligentia atque animorum ardore repetita, tandem ad effectum perducta sunt: ad quæ illos descendisse creditum est; quod voluntatem simul cum fortuna mutarint: nam cum antea inter ancipitem deliberationem Cæsarianas partes, in quibus diu fuerant, constanter retinendi: vel, illis desertis, se ad Pontificem, illiusque partes sequentes applicandi, incertis animis diu fluctuantibus essent; cumque initio crederent, Genuenses tantæ in se incumbenti moli diu sustinendæ non fore; ac proinde Liguriam, ac ceteras circa regiones in ditionem tandem Friderici venturas; illius gratiam ejus partes sequendo captarunt: ceterum, cum vidissent Fridericum aliis curis distentum lente & segniter agere; ac fugaciter cum Genuensibus bellum gerere; neque, vel Pisanis sibi conjunctis, navalibus copiis Genuensibus esse superiorem; illosque ad sese ac libertatem suam defendendam animos obfirmasse; metu, ne, si Fridericus desisteret, aut aliquid illi humani accidisset, ipsi ejus præsidio nudati tam potentis ac propinquæ urbis, quibus ipsi infinito prope intervallo viribus inferiores essent, proculcandi objicerentur; gratiam Genuensium, ac præpotentium populorum societate illis conjunctorum, foedere cum illis juncto, recuperare studuerunt: quo sese ad propugnationem sancti Pontificii solii, ac Genuensium, Mediolanensium, & Placentinorum inter se foedere conjunctorum, obstrinxerunt: insequentisque anni initio, qui fuit ejus sæculi quadragesimus tertius, Genuam venerunt, præsentiaque sua in publico civitatis consilio fidem promissorum sanxerunt, & in leges foederis jurarunt.

Igitur Genuenses cum sua sponte, tum Marchione Montisferacis illos per litteras & nuncios asfidue stimulante, non ultra differendum rati, copias ad Varaginem contractas & lustratas, quarum numerum ab Annalibus non traditum divinare non potui, Emanuele Masio Brixiano illius anni Prætoris Duce, Saonæ admovent: collibusque circumpositis occupatis, ac ligneis muralibus machinis excitatis, urbem circumfidunt, atque auxilia à sociis ex foedere debita postulant: nemo in fide promissorum fuit, præter Placentinos, qui alam quadraginta tantummodo equitum cataphractorum miserunt, tenue ac pudendum subsidium, vel in longe minoris rei certamen, & Manfredum Carrettum; qui pacta au-

xilia misit: ipse quoque Marchio Montisferacis ardentior hortator belli quam adjutor fuit: qui neque adfuit ipse, nec pactas copias misit; nonnulla & genere levia & ad fidem parum probabilia excusans: neque elevatur culpa, quod opera & auctoritate sua Vercellenses & Novarienses ad societatem Genuensium adduxerit; in quibus nulla pars operæ aut opportunitatis in hoc bello fuit: at Genuenses ab omnium societate deserti non ipsi deserunt se: sed obsidionem urgentes, brevi in magnas angustias Saonenses adducunt: qui cum ad cetera mala annonæ quoque inopia laborare cœptum esset, rem per celeres nuncios Entio Cæsaris filio, qui tum erat in Longobardia, ac Manfredo Marchioni Lanceæ demonstrant, & opem implorant: illi enim vero impigre se movent, ac cum copiis numero & genere firmis Aquas usque Statiellensium pergunt, sperantes ad famam ipsorum adventus Genuenses obsidionem soluturos: à qua cogitatione Genuenses tantum abfuerunt; ut contra, novis accersitis copiis, firmati, artiore obsidione opidanos premere intenderint: spe igitur, qua venerat, frustratus Entius, non ulterius injussu parentis sibi pergendum ratus, retro castra movet; egregia ala ducentorum cataphractorum equitum Jacobo Carretto tradita; qui, consiliis à Manfredo separatis, in partibus Cæsarianis permanerat; quique non audacius subsidium Saonam introducendum in se recepit, quam impigrius consilium ad effectum perduxit, eadem ala cum compluribus è ditione Carretta corrogatis hominibus, ac magna annonæ & commeatuum copia, antequam dilucescere inciperet, furtim in urbem introductis: quæ res varios animorum habitus (ut necesse fuit) in utrisque genuit: nam obsessos recreavit, & ad sese defendendos, atque ultima experienda confirmavit; & obsidentes magis irritavit: qui copias auxerunt, ducentis equitibus cataphractis è Subalpina regione evocatis: in quos adventantes opidani audaci eruptione impetum fecerunt: quæ audacia multo sanguine ac cæde illis stetit, aversi enim sunt à Subalpinis, atque in urbem compulsi, multis ex suis amissis: hoc acceptum detrimentum audaciam erumpendi Saonensium compressit, quibus cum omnia in dies artiora fierent, Genuensibus in illis urgendis nihil de summa contentione remittentibus; iterum ad Entium & Lanceam, & ad Cæsarem ipsum, qui tum erat Pisis, opem oratum mittunt, ventum ad extrema esse dictitantes; nec sustineri jam tantam incumbentem molem posse: quare, ni propere cum firmis copiis subsidio accurratur, Saonenses omnium rerum inopia premente mox casuros: ita fidelissimam urbem, cujus tanta merita in Cæsarem essent, cujusque tantæ sint in navalibus rebus opportunitates; ipsis sedentibus & inspectantibus, per summum dedecus in manus Cæsaris hostium ac Cæsaris causâ sibi infensissimorum venturam. Enimvero Fridericus vehementer commotus haudquam negligendos Saonenses statuens, omnibus navalibus & terrestribus opibus subsidio quam primum ire constituit: quare Ansaldum à Mari ex Sicilia accersit; qui cum sex & quinquaginta triremibus mox Pisas venit: quibus haud multo post additæ sunt octoginta triremes, à Pisanis, illo suadente & hortante, comparatæ & instructæ: quibus præfectus est Bonacursius Paludius illorum Prætor: simul Entio filio & Lanceæ imperat, ut quantis maximis possint copiis coactis, opem Saonensibus ferre ne cunctentur. Quibus motibus Genuæ & Saonæ auditis, Prætor consilio in ædem Recuperatæ vocato, ingentibusque hostium apparatibus, & annonæ penuria, qua in urbe totaque ora Ligustica eo anno laborabatur, exposita, sententias exquirat: variatum est: nam aliis durum videri, tot labores exhaustos tantaque impendia facta profundere; ac tum, cum victoria pene in manibus

nibus esset, subito desistere; & ad nutus & comminationes hostis cursum procedentium consiliorum interrompere: cujus terrestres opes quam sint formidandæ, duobus irritis conatibus ipsosmet modo docuisse: maritimam vero classem quid aliud, quam Ligusticam oram incursionibus ac direptionibus infestam facere posse? quæ usitata belli damna, majorum rerum spe affulgente, æquo animo ferenda: perseverandum igitur, ac valido munimento excitato, oppugnationem Saonæ brevi haud dubie casuræ urgendam. Contra alii salubria speciosis præferenda, in extremis præsertim rebus, dicere; contrariumque consilium in omnes partes funestum esse, atque amentis obstinatione sua libertatem & salutem patriæ funditus perditum ire: nam primum fidelissimos Liguriæ populos sibi subiectos, navalibus præsidii nudatos hosti proculcandos, ac direptionibus, incendiis, cædibus, ceterisque belli cladibus urendos objici; eorumque fidem in posterum labefactari, haud exiguo urbis damno: cujus classes illorum hominibus ac navibus, navalibusque sociis ac remigio suppleantur: deinde quem ipsos securos facere ab urbanis motibus: civitate, ob maximam floris ac roboris partem ablegatam in bellum Saonensem, enervata; ac multitudine natura ad omnem levem auram mobili novarumque rerum avida, ac belli tædia atque incommoda perosa? quem autem divinare posse, quin illa in conspectu tantæ classis, atque in spectam validi ac propinqui auxilii, nullo metu cohibita, ad quamvis præceptis consilium animum sit adjectura; ab exsulibus præsertim tot primariis civibus spem melioris fortunæ illi ostendentibus occulte instigata, fameque insuper & alimentorum inopia stimulante? ut nihil horum fiat, tertium certe tentaturum hostem, ne nulla de causâ tantas res movisse videatur: quem igitur dubitare, quin ille Saonam terrestribus & navalibus copiis recta sit petiturus, exercitumque Genuensem tanto numero inferiorem vel primo adventu contrucidaturus, vel certe circumfessurus; atque hinc classe, illinc terrestribus copiis Saona urbe clausum ac veluti circumvallatum obsessurus? qui, omni elabendi facultate adempta, omnique spe subsidii & annonæ præcisa, necessariarum rerum inopia victus, sese atque arma tradere hosti illico cogatur, in miseram servitutem abducendus: neque enim immanem Friderici crudelitatem minus illis implacabilem fore, quam sacris Antistitibus: fuerit parendum igitur necessitati, ac temporibus cedendum, legionesque à Saonæ obsidione abductas in urbem revocandas: atque omnes diligentiae & industriæ nervos, in classem, quantam maximam possint, comparandam, contendendos: bellumque maritimum, quo ipsi invicti sint, neque Friderico ac Pisanis inferiores, repetendum: aliter hoc bellum lugubri navali clade temeritate unius hominis inceptum, longe lugubriore terrestri totius civitatis pertinacia terminandum.

Cum hæc sententia vicisset, Prætor consilii capti Genuensem Magistratum certiorum facit: qui in rem frumentariam expediendam, annonamque & reliquos necessarios commeatus sedulo comparandos omnem diligentiam contendit: at Prætor, cum ultima oppugnatione Saonam tentare decrevisset, omnibus viribus connixus ad tertium decimum Kalendas Aprilis urbem irritum incepto adortus, acriter à præsidio & opidanis defensam: postero die obsidione soluta, quæ paullo plus menstrua fuit, Genuam cum omnibus copiis revertitur; resque urbanas haud satis quietas offendit, plebis ac tenuiorum civium animis in Nobilitatem irritatis: quorum culpa Saonenfibus defectionem jam multos annos impunitam dicerent, nec velle homines nobiles Saonam recuperare; sic ad copias illi urbi admovendas litteris Montisferacis ignaviam

A pene exprobrantis invitos tractos: sic ad ejus urbis mœnia fortunam pugnae numquam expertos, nulla re tentata, segne tempus contrivisse; quam si valida oppugnatione initio aggressi essent, haud dubie urbem neque opere satis munitam, neque præsidio satis valido firmatam primo impetu capturos fuisse: sic subsidium à Carretto, quod nullo negotio ab urbe circumvallata arcere potuissent, ipsis conniventibus, in urbem inductum: nolle Nobiles bellum finire, quod ipsis multipliciter utile & commodum sit: illos enim in imperiis, illos in præfecturis, illos in procurationibus esse; ad illos honores & emolumenta, ad ceteros labores & pericula pervenire: ad hoc homines factiosos, ac Republica ad suas cupiditates abutentes, nolle exsules affinitate & aliis necessitudinibus sibi conjunctos, extinguere, neque acriter persequi bello; illos ad par sibi reddendum lenitate sua velut obstringentes, similemque verecundiam illis injicientes, si forte aliquando in eundem rerum statum ipsi recidissent; rationibusque privatis suis, quas Reipublicæ præferre soleant, ita ferentibus, ad aliquem Principem vicissim defecissent: cum hæc vulgo fremerent, resque ad tumultum spectare viderentur, Prætor gliscenti malo obviam eundem ratus, populo in ædem Laurentii ad concionem vocato, ita verba facit: *Formidolosus quidem, Genuenses, externus est hostis, & Fridericus hostis tantarum opum Princeps nobis infensissimus; ac cum eo conjuncti Pisani, populus maris præpotens, perpetuo & abominabili odio in nos efferatus: ceterum vereor ne ipsimet nobis longe capitaliores hostes simus; eoque periculosiores, quo intus inclusæ ulceram agis ledunt, ac celerius corpus conficiunt, quam extrinsecus advenientia vulnera. Non novum quidem hoc facitis, Genuenses, ut, qui domi remansistis, laboribus & industria ac periculis militantium obiretæti: neque primi vos discordias domesticas inter vos agitis: vetus est hæc usitata liberarum civitatum pestis; qua plures illarum pene perierunt, quam externa vi. Verum illud antehac inauditum exemplum nunc primum Genua proditur: quod intestina disidia in aliis civitatibus pax & tranquilla foris res excitare solent; vel contumacia plebis otio lascivientis & libertate immodice abutentis; vel superbia Nobilium & potentiorum ab injuriis non abstinentium: ceterum eadem ab externo metu consopiri & comprimi solent, iterum quiete parta eruptura. At contra nunc Genua à tanto bello mari & terra ingruente, atque extremo discrimine à potentissimo & irritato hoste nobis imminente, si diis placet, civiles tumultus excitantur: quodque intestinorum malorum remedium esse debuit, id ultro illa accendit: quæ, malum, tanta ista est mentis cecitas, ut insania nostra cum ipso pene hoste nostro de libertate nostra illi prodenda prævaricari videamur? quique concordēs insuperabiles sumus, discordiis nostris viam illi ad nos opprimendos (quando aliam nullam habet) patefaciamus, ac manibus pene nostris illum in urbem introducamus? At enim periculosum quidem est & terribile externum bellum; ceterum odiorum inter nos causa longe illo graviore sunt, ac magis animos irritantes: ut nulla alia cogitatio illis præverti possit: nulla immo, aut genere leviores, aut resaltiores unquam fuerunt: totaque culpa, si quæ est, penes me est, penes quem imperium esse voluistis: non penes cives vestros, quibus tantummodo parendi partes relicte sunt: an ego aut quisquam omnino mortalium inexsuperabilibus vim afferre potest; aut fortunam in manu habere; quam cum omnium rerum, tum in primis bellorum dominam ferunt? an ego Saonam urbem natura & opere, tum autem valido præsidio munitam, ad hoc novo introducto subsidio firmatam, primo adventu expugnare potui, sociorum præsertim auxiliis desertus, quorum spe rem ingressi sumus? ridicula ista sunt, atque ad puerorum iras commovendas vix satis potentes causa: per Deum immortalem, insaniendi finem tandem faciamus.*

*mus, cives; atque in tanto discrimine ad ea, quibus libertas & salus nostra continetur, expedienda & prae-
paranda curas unanimes convertamus.*

Mitigati sunt plebis ac tenuiorum animi sapienti oratione & tempori apta: secundum orationem ea, quae ad bellum pertinerent, Praetor comparare & expedire insistit: edicitque ut omnes, quicumque essent armis ferendis, cum illis ad omnia subita imperata praesto sint: item ut omnia navigia, tam quae ad urbem tum erant, quam ex tota Genuensi ditione corrogata, omnibus necessariis rebus in usum belli instruantur, & armentur: vexilloque divi Georgii statuto, se summum classis praefectum nominat; ad quam, simulatque ipse innuisset, con-
fiscendam, omnes paratos esse jubet: munera-
que tam comparandi, quam gerendi belli pro sua
cuique sorte partitur: tum etiam in arces & loca
opportuna ditionis Genuensis munienda & praesi-
diis firmanda curam extendit: maximam in primis
diligentiae & curarum partem in rem frumentariam
providendam & expediendam confert: nullamque
partem officii negligens, exploratores circummit-
tit, ad consilia & motus hostium ex propinquo
cognoscendos. Omnes in officio fuerunt; omni-
que animorum irratione plane deposita, pro se
quisque mandati muneris partes sedulo & obedi-
enter exsequi pergunt: brevique praepotens classis
comparata & instructa est: numerus navium ab
Annalibus ideo, credo, non traditur, quod nul-
lus usus ipsius fuit, neque illa portum umquam
exivit: at hostis, cum audisset Saonae obsidionem
solutam, cuius rei causa tanti conatus suscepti fue-
rant, Genuensesque sedulo comparare; nullam
causam esse statuebat, cur cum illis manum con-
fereret: depositaque plane ea cogitatio esset, nisi
Pisani ab insita animis arrogantia, sese portus Ge-
nuensis fauces infesturos, argenteisque sagittis ur-
bem incessuros, certa praefinita die, tumida ora-
tione jactassent. Qua re Genuae cognita, Praetor,
omnibus illico deductis, atque undique
corrogatis, necessariisque ad pugnam rebus affa-
tim instructis, ac magno bellatorum numero fir-
matis; adventum Pisatorum exspectat: qui cum
ad praefinitum tempus nusquam apparuissent, ne-
que eorum adventus jam exspectaretur; vindemiis
appetentibus, Praetor remigio & navalibus copiis
precibus victus praeproperum comitatum dedit:
quae festinatio magno periculo civitati stetit: pau-
cis enim post diebus ecce classis hostilis centum
triginta quinque navium longarum caelo albescere
in alto apparuit. Qua subita & terribili specie pri-
mo vehementer perturbatus Praetor, deinde cele-
riter collecto animo, non deserit se; solertique
animo cuncta circumspiciens, astu periculum dis-
cutit: cum sex enim tantum triremibus portu pro-
diens, maximoque divi Georgii erecto vexillo,
proris in hostem directis, speciem praebuit in illos
euntis, ac pugnam quaerentis. At hostes, signo
pugnae procul conspecto, ceteram classem subse-
qui credentes, cum potius furto insidiarum resten-
tandi, quam animo iusto praelio decernendi, domo
profecti essent, retro itinere repetito, ora Ligu-
stica intacta in sua se recipiunt; sicque circumacta
est tertia hujus belli aestas.

Eo anno, cum unum & viginti menses Pontifi-
cium solium, ut diximus, vacuum fuisset, tandem
Anagninae summo Patrum consensu Sinibaldus Eli-
scus Genuensis civis, e nobili Comitum Lavaniae
stirpe ortus, Pontifex creatus est, Innocentius
quartus vocatus, vir insigni pietate & prudentia,
eximiaque doctrina; & quamvis mansueti ingenii,
acer tamen dignitatis Pontificiae vindex, impavi-
dique ad omnes terrores animi. Intercedebat Fri-
derico cum Sinibaldo artae amicitiae ac multorum
utriusque officiorum necessitudo: quo nuncio ac-

cepto, gratulantibus amicis, triste responsum de-
dit; dolendum potius sibi, quam laetandum; ami-
co Cardinali cum inimico Pontifice commutato:
quam vocem perspecta Innocentii virtus ac sibi fa-
miliari usu cognita, & conscientia sui ipsius erga
Ecclesiam animi illi expressit.

Interea anno circumactio, Philippus Vicedomi-
nus Praetor insequentis anni ejus saeculi quadrage-
simi quarti Genuam venit: cuius praeturae primum
opus fuit, pacem & concordiam inter Rampinos
nonnihil inter se ob creationem Magistratuum dif-
fidentes, conciliare; ne illorum diffidia consi-
liis Mascaratorum exsulum viam patefacerent.

At Innocentius initia Pontificatus infesta habuit;
non tam armis, quam dolis & latrocinis Fri-
derici petitus: instituta sunt inter illos pacificatio-
nis colloquia, Legatis ultro citroque saepe missis;
ac Balduino Caesare se interponente: cum Ponti-
fex occupatam Ecclesiae Romanae ditionem non
modo pro Pontificio, verum etiam pro amicitiae
jure reposceret; Fridericusque usitatis artificiis
utens, spem rei faceret, omnia alia longe animo
agitans: conveneratque tandem, ut duo ipsi Prin-
cipes inter se capita conferrent; sic res expeditu
faciliores fore: colloquioque electa est civitas Ca-
stellana: quo Pontifex illico se contulit: moras
nectere Fridericus, ac retractare, variasque res
causari: brevique apparuit illum ludificari, ac
dolo agere: Pontifex rerum componendarum avi-
dus omnia patienter ferre: tandem cum pro com-
perto cognovisset Fridericum insidias ipsi parare,
ac nefaria consilia in ipsius caput machinari, quo
modo e latrocinantis manibus elaberetur, circum-
spicere coepit: terrestre iter sibi omnino interclu-
sum intelligere, Friderico omnia circum late te-
nente, omniaque itinera firmis praesidiis occupa-
nte, unam esse maritimam spem, quam sibi Ge-
nuenses sui expedire possent.

Igitur, cum per litteras miserabiliter scriptas re-
rum suarum statum deplorasset, seque a Friderico
non modo aperta vi, sed dolis quoque ac latroci-
niis ipsum petente circumvallatum demonstrasset;
e cuius manibus sese eripiendi, ac majestatis Pon-
tificiae inviolatae servandae, quae in suo capite pe-
riclitaretur, unam esse in virtute & fide civium
suorum spem affirmasset; omnibus precibus ab il-
lis petit, ut fidei & religionis Majorum suorum,
atque adeo suae in ipsorum Antistitibus nuper ve-
hendis memores, ad tot omnibus temporibus for-
titudinis & pietatis edita exempla, hoc quoque
haud in postremis numerandum decus, Pontificis
ex faucibus immanissimi Tyranni erepti addere ne-
cunctentur; classemque, quod illis expeditissi-
mum sit, quanta satis esse visa fuerit, actutum
comparent; ac fratris sui filios secum vehentes Ci-
vitatem veterem accedant, inde se conscensurum:
sed caute atque astu agendum, Fridericumque ce-
landum: neque enim dubitandum, quin contami-
natissimus homo, quem nullus divini Numinis
metus, nullusque pudor teneat, cuique nihil san-
ctum, aut religiosum umquam fuerit, si occulti doli
parum processerint, aperta vi sit grassaturus: ne-
que sperandum, ut ille majore verecundia a capite
ipso Ecclesiae sacrilegas manus abstinere, quam a
membris paullo ante abstinuerat.

Utraque iussa impigre exsequi pergunt Genuen-
ses, atque ut rem a suspitione averterent, Albertus,
Jacobus, Ugo Flisci, fratris Pontificis filii ex com-
posito petunt a Praetore, ut sibi Parmam acceden-
di, certis ab ipsis confectis causis, comitatum
det; negare Praetor sese Pontificis propinquis in
inimicam urbem concedendi facultatem facturum;
sibique illorum fidem suspectam esse simula-
re: quos etiam, fingens Provinciam Narbonen-
sem per confectas causas petere, classem secum

conscendere cogit : quam simul cum Prætorē con-
scenderunt Ugo Lercarius & Jacobus Levantus
classis præfecti : cumque Vulturem opidum usque
processisset, ibi iterum Flisci Prætori instare, ut
sefe ad necessaria negotia proficiscentes tandem di-
mitteret : ferocibus verbis illos increpat Prætor,
succensere simulans ; seque illis morem gesturum
vehementioribus verbis negat : quin etiam iusjuran-
dum ab illis exigit, illos Prætorē non deserturos,
imperataque facturos ; tantoque astu res acta est,
ut multitudo fallaciæ ignara mordere Prætorē
cœperit, ac fremere : illud etiam restare, ut ad ce-
teras tantas ac tantorum Principum inimicitias hanc
quoque novam Pontificis irritati adderent, ut nul-
lo Christiano Principe sibi amico relicto, nullum
ipsis sit in duris Reipublicæ temporibus, præter-
quam in Saracenorum ac Maurorum misericordiam
perfugium.

At Prætor institutum iter in Provinciam perse-
qui simulans, cum Ingaunum usque perrexisset, in
Corsicam iter deflectit : indeque solvens classis, iti-
nere celeriter confecto, Centumcellarum, quas
posteriores Civitatem veterem appellarunt, por-
tum subiit : cujus adventu per occultos nuncios co-
gnito, Pontifex continuo Sutrio, quo sefe insidias
Friderici vitans contulerat, noctis silentio profe-
ctus ; cum sex Cardinalibus, quos secum habebat,
Centumcellas venit. Sunt qui scribant, illum &
Cardinales, ad sefe occultandos, sacerdotalibus ve-
stibus depositis, armorum habitu ac specie iter
fecisse. Classe raptim conscensa, secundaque navi-
gatione usus, portum Veneris tenuit : quo in opi-
do cum sefe aliquot dierum quiete à jactatione ma-
ritima refecisset, inde solvens, Nonis Juliis por-
tum Genuensem subiit ; magnifice, ac apparate,
magnisque plaufibus, atque aliis lætitiæ signifi-
cationibus à populo obviam effuso exceptus. Cum
Genuæ aliquot dies causâ fontica substitisset : sex-
que interea, præter eos, quos Roma secum duxe-
rat, Cardinales, ac magnus Antistitum numerus ;
ad hoc nonnullorum Principum Oratores ad illum
convenissent : tandem cum à morbo convalescisset,
recentis navigationis tædio à mari abhorrens, ter-
restre iter elegit ; Prætorē & primoribus nequid-
quam maritimam viam suadentibus, seque illum
classibus suis, sine ullo illius impendio, sive in por-
tum Massiliensem vellet, sive ad ostium Rhodani
fluvii vecturos profitentibus : retinuit sententiam
Pontifex ; gratiisque Prætori & civibus actis, iti-
neri se dedit, Prætorē ac multis ex primoribus cum
delecta armorum manu illum per totos Genuen-
ses fines prosequentibus : quos cum exiisset, Præ-
tor & primores illius jussu Genuam reversi sunt.

Per ea tempora magnus motus Tartarorum fuit :
quorum innumera multitudo, relicto patriæ horrido
ac rigenti solo, amœniores sedes sub clementiore
cœlo quærens, regna Asiæ, ac magnam Europæ
partem bipartita inundarunt, cædibus, incendiis,
omnique belli foeditate ubique grassantes : regno-
que Partorum deleta, Choraismos à se olim oriun-
dum populum inde exegerunt : quos extorres ac
profugos diuturnus error tandem in Syriam tulit,
quam subito adventu occuparunt ; Hierosolymis-
que potiti, sacrum monumentum à nulla umquam
barbara natione violatum, suæque religione ad eum
diem intactum, omni nefariæ contumeliæ foeditate
polluere non dubitarunt.

A. C. Initio insequentis anni ejus sæculi quadragesimi
1245. quinti Philippus Guiringhetus Mediolanensis Præ-
tor cum urbanis, ac trium præfecturarum delecti-
bus Saonam petit : agroque tres continentes dies
pervastato, Genuam revertitur. Interea Pontifex
Concilium Lugduni coegerat, ad quod missi sunt à
Genuensibus Legati, Hugo Fliscus & Simon Ma-
rinus, Fridericoque diem dixerat ; gravibus atque

A asperis concionibus in hominis perfidiam, barba-
ram crudelitatem, rapacitatem, violentiam, super-
biam, sæpe invecus. Adfuit causâ Friderici agen-
dæ ampla legatio ab illo missa ; cujus princeps fuit
Petrus Vineæ, vir in primis eloquens, quem hu-
mili loco ortum multæ claræ virtutes, multiplex-
que eruditio cum eximia juris civilis scientia con-
juncta ad summum auctoritatis locum apud Fride-
ricum extulerant. Cum is sefe ad causam dicen-
dam, ut monitus à Pontifice & sacro cœtu fuerat,
mox adfuturum confirmaret, (cujus rei ut fidem fa-
ceret, Augustam Taurinorum usque perrexerat) in-
terea se armatis copiis tam ex regnis suis, quam ex
B Germania accitis Cæsarianum nomen sequentibus
firmabat ; eo, ut fertur, consilio, ut ex Comitatu
Burgundo, quem se secuturum haud dubitabat,
Pontificem, formidine tam propinqui exercitus in-
jecta, à judicio in se ferendo deterreret : nec va-
num fuisset consilium. Ceterum, cum Ludovicus
Rex Lugdunum Pontificis salutandi, honorisque
habendi causâ venisset ; seque ac regni florentissi-
mi opes illi prolixè detulisset, adversus Fridericum,
ac quoscumque Romanæ Ecclesiæ hostes, quæ
apud se, Majoresque suos numinis sanctitatem ac
venerationem perpetuo obtinisset ; tanto parato
præsidio confirmatus Pontifex, Friderico retractan-
te, ac suo more ludificante, cum dies præstituta
C exiisset ; Fridericum ingentibus ac nefariis crimini-
bus oneratum (quæ in Actis Lugdunensis Concilii
exposita non necesse habui hic inferere) de sacri
confessus sententia piorum cœtu exterminat ; illi-
que sacrorum communitate interdicit ; ac jus no-
menque imperii abrogat ; regnum quoque Siciliæ
Pontificii solii fiduciarium abjudicat ; hominibus
illi subjunctis jurisjurandi vinculo ac religione so-
lutis : Electoribusque Principibus potestatem & jus
facit novi Cæsaris indejecti locum sufficiens : quod
idem jus alterius Regis Siculi legendi sibi, summo
videlicet domino, reservat. Obedienter Electores
D imperata fecerunt ; Henrico Turingiæ Lantgravio
Rege Romanorum, duobus post annis, creato.

At Francus ad sacram expeditionem, ad quam
haud multo ante gravi morbo oppressus, atque ex-
tremum spiritum vix retinens voto se obstrinxerat,
à Pontifice Parisiorum cruce signatus proficiscens,
à Pontifice illum faustis ominibus sacrisque preca-
tionibus prosequente discedit, atque inchoatam cu-
ram in rebus, quæ ad eam expeditionem pertine-
rent, parandis & providendis pergit urgere : Le-
gatisque Genuam missis, classe se juvari postulat,
sexdecimque naves stipendio conduxit, cum mo-
rem gerendum Regi in consilio decretum esset :
E cujus classis ipsemet Rex Hugonem Lercarium &
Jacobum Levantum præfectos nominavit ; fama
virtutis & navalium rerum scientia inductus.

At Fridericus, post judicium latum, cum Ale-
xandriam concessisset ; Marchionibusque Montif-
feracis, Cevæ, Carrettis, à partibus Genuensium
abstractis, foederis ac jurisjurandi religione spreta
sibi adjunctis, mense Octobri movit, Mediolanen-
sesque infestis copiis petit : quibus delecta quingen-
torum manus scorpionibus armorum à Genuensi-
bus subsidio missa est, qui virtutis opinione, in
prima acie, ad primam pugnæ procellam excipien-
dam, locati sunt. Præmaque luce Entius Friderici
F filius nothus Mediolanenses magno impetu invadit :
isque fuit illius pugnæ exitus, ut multi ex Medio-
lanensium primoribus, ac non exigua pars Genuen-
sium auxiliatorum capti sint : contra Entius capti-
vus Mediolanum ductus : qui paullo post cum Me-
diolanensibus captivis commutatus est. In miseros
Genuenses Fridericus iram effudit ; dexteris illis
amputatis, atque altero oculo eruto : quibus diu post
liberatis Genuenses, ad solatium injuriæ, atque ad vi-
tam tuendam, certam pensionem publice assignarunt.
Per

Per idem tempus, cum auditum esset, classem Pisānorum vectoriæ Genuensium classi ingentis pretii mercibus onustæ insidiari Pisīs profectam; periculo commoti Genuenses continuo duas prævalidas naves Coronatam & Paradisum, quattuor trimibus additis, omnibus bellicis apparatusibus instructas, delectaque bellatorum manu firmatas, vectoriis navibus subsidio mittunt; Leonardo & Matthæo ex familiari Prætoris comitatu viris præfectis, quattuor, qui illis essent in consilio, civibus Genuensibus additis, Nicolao Mallonio, Bulgarino Bulgaro, Dietisalvo Dietisalvio, Lanfranco Antiochia: qui Pisānorum classe nusquam inventa, in portu Drepani quinque Pisanas naves forte deprehensas incendunt, navimque Florinam nuncupatam magni pretii merces vehementem capiunt, itinereque Panhormum directo, in vectoriam classem è Syria redeuntem incidunt, quam præsidio suo tutam in portum Bonifacii persecuti sunt: ibi decem librarum millibus Reipublicæ reservatis, reliquam prædam navis Florinæ inter se partiuntur.

Sub finem hujus anni atrox procella nocte intem-
pesta subito exorta magna clade civitatem affecit:
navibus non modo, quæ erant in portu, sed etiam
quæ in terram erant subductæ, partim depresso,
partim laceratis; quodque memorabile in primis
fuit, ipsa mole perfracta; quæ tamen naves, infe-
quenti anno, qui fuit ejus sæculi quadragesimus
1246. sextus, Prætoremque habuit Albertum Mandel-
lum Mediolanensem, magna cum cura ac diligen-
tia resectæ sunt. Cumque vererentur, ne hostis fa-
ma cladis exitus, ad res tentandas veniret; edi-
ctum est, ut nemo urbem ac ditionem Genuen-
sium exiret; sed omnes, familiaris rei ac privata
negotiationis curis omissis, cum armis & equis suis,
si usus Reipublicæ postulasset, parati essent. Eo
anno decretum est, ne Prætores ullum Jurisperi-
torum, qui rebus forensibus præessent, dehinc se-
cum ducerent; quos è civibus Genuensibus in po-
sterum legi placuit.

A.C.
1247.

Sequitur annus ejus sæculi quadragesimus septimus, in quo Prætor fuit Gulielmus Castelnovus Placentinus. Is erat eo opere Genuensium rerum status, ut Liguriæ corpore in duas partes distracto, Saonaque, ac quantum ab ea urbe Ligusticæ oræ longitudo in Occidentem porrigitur, Mascaratorum exsulum partes sequente, additis Marchionibus Carrettis, hostili odio inter se ardentes Ligures hostilia quoque quotidie utrimque ederent opera: Fridericusque, novis quotidie accedentibus irritationum causis, execrabili odio in Genuenses effratus, omnibus consiliis pestem illis machinaretur: quarum postrema Pontificis ex ipsius manibus erepti in primis urebat: indignationem facietæ similitudinis commento haud dissimulare solitus; Innocentium, inquit, ante pontificatum adeptum, in familiari consuetudine latrunculis mecum ludentem ad eam necessitatem semper adigebam, ut aut illius Regem captivum facerem, aut Reginam adimerem: nunc eodem Pontifice ad eandem ludi fortunam à me adacto, Genuenses ex transverso venientes, abaco everso, spes meas frustrati sunt: quorum ulciscendorum instituta consilia urgens illud agebat, ut lento bello inter se commissos mutuis cladibus tandem confectos, ac fessos ipse omnibus viribus adortus everteret.

Insequenti igitur anno Gulielmus Castelnovus Placentinus Prætor cum copiis Genua movit; agro- que Saonenſi late pervasato, in urbem revertitur: quo tempore Zolaſcum, Crovaria, Lacus, Caſſa- na Ripalta, Rotandum, Caſale, Bozolum, Car- pena, Cornilia, nonnullique alii ignobiles vici, quia Genuenſibus defece- rant, ad ſaniorẽ mentem converſi, venia erratorum impetrata, in antiquum imperium redierunt.

A Eodemque tempore Andreolus à Mari, qui patri Anfaldo in maritimum imperium successerat, improvise adveniens, portum ipsum Genuensem cum viginti triremibus ingressus est; paullumque in eo commoratus Saonam petit, atque in itinere duas triremes Massilienses cepit, quæ iter Genuam habebant magni pretii merces Genuensium hominum vehentes; contra quem classis decreta est: quæ dum comparatur & instruitur, Andreolus, Genua repetita, ballistis, aliisque tormentis bellicis erectis urbem, per summam contumeliam, ingentibus lapidibus, varii generis missilibus incessere cœpit: ceterum clam monitus ab iis, qui in urbe Mascaratis partibus occulte studebant, prævalidam classẽ mox in illum exituram; protinus proris conversis altum petit, speciem præbens Sardiniam petentis; ceterum haud ita multum provectus iter Saonam flectit: classẽque in portum atque intra septa munimentorum recipit: qui à Prætorẽ paullo post cum quinque & viginti triremibus Genua profecto aliquot dies obsessus est; triremisque ab illo Pisas ad statum rerum suis demonstrandum emissã cum non fefellisset, classẽ Genuensi insequente & urgente, ad littus Varaginis in terram ejecta est; magnaque vectorum pars capta. Prætor, cum nulla spes esset hostis ad pugnam eliciendi, Provinciam Narbonensem petit, classẽque vectoriam mense Augusto Genuam incolumem perduxit: dimissumque remigium est, quod raptim coactum fuerat, aliaque classis comparari cœpta est. At Andreolus post classis discessum, occasione liberi exitus arrepta, quinque triremibus præsidio Saonenfibus relictis, continuo portum egressus Corsicam petit; nonnullisque navibus in itinere captis, cum insulam tenuisset, arces aliquot à Lanfranco & Antonio Advocatis aliquanto ante munitas, validiore præsidio ac copiosiore commeatu firmat: indeque solvens in Siciliam tandem appellit.

Insequenti anno ejus sæculi quadragesimo octavo, cum civitas in expediendis navibus ad Ludovicum Regem trajiciendum destinatis toto animo & operâ esset occupata; Fridericus ea fama commotus, veritus ne Genuenses tanti Regis opibus septi in itinere Siciliam nudam præfidiis, quæ omnia undique ad se contraxerat, invaderent; totus in eo apparatu discutiendo animo & cogitatione insistit: eaque de causâ quinque & viginti triremes ex regnis suis evocatæ portum Saonensem tenuerunt. Pisani quoque, Ubértus Palavicinus, Lunenses, Graffagnini, ex altera parte Jacobus Marchio Carrettus, Friderici jussu, ac Mascaratis exsulibus instigantibus, bellumque undique cientibus, in Genuenses moverunt. Adversus tantos motus Genuenses nihil animis demissis se communire instituunt; delectaque quadringentorum peditum cohorte Placentia accersita; ad quos conducendos missi sunt Amicus Steggiaporcus & Joannes Turca; trecentisque equitibus in urbe ipsa scriptis, ac centum exditione Genuensi trans juga accersitis; loca omnia Genuensium finium irruptionibus hostium opportuna præfidiis firmant: quibus rebus expeditis, curaquo ad rem navalem translata, quaternis trirēibus regionatim armatis, ut sic tota classis numerum triginta duarum conficeret; Ludovico demonstrant, omnia ad eum trajiciendum promissa parata & instructa esse.

Interea Fridericus ad Parmam ingentem plagam accepit; florentissimis ejus copiis, ac numero & genere firmissimis profligatis ac deletis. Parmenses enim biennali obsidione ad extrema adducti ab ultima desperatione: cum Fridericus sese ex illis non civitatis dominatum, sed excidium petere aperte ferret; alia civitate, quam Victoriam appellavit, ædificari, atque ædificiis publicis & privatis frequen-

quentari cœpta, loco mœnibus maximo, templo in media urbe designato, insularumque & viarum spatiis permensis. Parmenses igitur ultima desperatione instigante, improvisa atque audaci eruptione Cæsarianas copias solute ac negligenter agentes; ut in nulla tali re à populo diuturnis malis macerato & confecto, ac vix ad arma sustinenda valido suspecta, adorti ipso in cursu fundunt; novamque civitatem funditus disturbant. Ita Victoria urbs prius deleta, quam condita est: cujus præda Parmenses, ac qui cum illis militabant, (in quibus sexcenti Genuenses fuerunt publice, ut paullo superius diximus, missi) ditavit: omnes enim thesauros suos, omnemque regiam gazam, (in qua fuit diadema ipsum regium, atque magna gemmarum & margaritarum infiniti pretii vis) in eam urbem congefserat Fridericus, in quam etiam, præter concubinarum & spadonum greges amœnissimis hortis inclusos, feras omnis generis inusitatarum Italorum oculis specierum, ex omnibus orbis partibus infinito sumptu conductas, Romanam potentiam æmulatus ad spectacula introduxerat, quod vanitatis plenum consilium, dum fortunam animo non æquat, magno illi stetit, à profusis sumptibus in res nugatorias factis ad extremam pecuniæ inopiam ac necessitatem scortei nummi signandi adacto: qui, atque una Entius filius è clade elapsi, turpi atque ignobili fuga Cremonam concesserunt.

Quo nuncio accepto Innocentius, fortuna hominis despecta, cum Genuensibus egit, impetravitque, ut bona Mascaratorum exsulum, qui civitatem ac res Pontificias vexare non desisterent, publicarentur; ipsique, & illorum filii, ac nepotes à magistratibus & honoribus lege excluderentur. Per hæc tempora Genuæ Mascarati & Rampini, veteribus nominibus omisiss, commune ceteræ Italiæ nomen Gibellinorum & Guelphorum acceperunt: quod nomen pridem in Germania ortum à Cæsare cognomento Gibellino, & Guelphone Duce Bavarie, qui suasu Romani Pontificis contra illum arma tulit, Princeps Fridericus ad id tempus inauditum in Italiam intulit; ceteris nominibus earundem Pontificiarum & Cæsarianarum factionum extinctis: quæ varia fuerant; cum singulæ civitates suum quæque privatum nomen haberent: quæ factiones jam inde ex eo tempore in Italia excitatæ, cum Rom. Pontifices & Germani Cæsares inter se dissidere cœperunt, populique pro suo quisque ingenio, ac pro causarum varietate, sese ad alterutrum Principem applicarent; divina & humana miscuerunt, miseramque Italiam continentibus multorum sæculorum cladibus lacerarunt ac scedarunt: tantaque fuit execrandarum factionum rabies; ut, non modo Italiæ civitates, quarum nulla ab hac labe fuit intacta, internecinis inter se bellis sæpe commiserint; sed in singulis ipsis civitatibus populo bifariam diviso, ipsos fratres in fratres, ac filios in parentes, parentesque in filios armarint.

A. C. 1249. Insequens annus ejus sæculi quadragesimus novus, Alberto Malavolta Bononiensi Prætorē, rebus externis, quam Genuensibus insignior fuit: Hispali opulentissima urbe à Rege Castellæ in Hispania expugnata; Mauris & Saracenis ex illa ejectis, qui eam urbem complura sæcula tenuerant: quæ urbs illarum regionum caput cum maritimis commerciis in primis opportuna sit; ea de causa amicitia & foedus cum eo Rege ictum est, ac leges negotiationis sancitæ; Legatis ad eum missis Hugone Flisco Jurisconsulto, & Gulielmo Bollerio; qui colloquia tantummodo instituerunt, nulla re transacta: ceterum inchoata consilia postea à Nicolao Calvo ea de causa ad Regem missa ad effectum perducta sunt: Ludovicusque Rex à Genuensi classe in Ægyptum trajectus, expositis in terram copiis, (quæ res magni certaminis fuit,

A Saracenis acriter resistentibus) primo adventu urbem Damiatam à Saracenis desertam cepit, paulloque post, copiis Memphi urbi, quam *Cairum* nunc vocamus, infelici omine admotis, luctuoso Christiani populi fato una cum magna Procerum vi captus est, copiis profligatis: qui non plus undeviginti dies ab illis retentus, Sultano interea facto functo, se ac suos centum millibus marcarum argenti redemit, à classe Genuensi in urbem Antonellam vectus, in quabiennium fuit: quo toto tempore pius Rex, ac perpetui moris sui de Republica benemerendi retinens, multis atque ingentibus beneficiis Christianos illarum Provinciarum incolas, Christianamque rem affecit.

B Læti in primis ac fausti Genuensibus fuerunt, duo qui sequuntur tertii decimi sæculi anni, quinquagesimus, & quinquagesimus unus: quorum primus Gerardum Corrigium, secundus Menabovem Turricellum, utrumque sine collegis, Prætores habuerunt; concordia civium tandem composita, ac populis, qui defecerant, in antiquam ditionem receptis, Fridericoque implacabili hoste sublato: instituta autem sunt præclara consilia priore anno, at insequenti ad exitum perducta, initio facto à Fliscis: quæ gens à gentili suo Pontifice beneficiis & honoribus haud modice aucta, ad hoc tanti nominis auctoritate subnixæ, in magnas opes, magnamque potentiam creverat: ii exsulum misericordia commoti, quorum multos affinitatibus, aliisque necessitudinis causis attingebant, de illis in urbem recipiendis, concordiaque civitatis firmanda sermones ferere cœperunt; circumeuntesque, graviores & quietiores cives prehensare, hortari, orare, monere, ut ad concordiam animum adjicerent; quæ non magis in exsulum, quam in ipsorum, qui urbem colant, rem esset: quem enim ex civilibus dissensionibus fructum utramque partem tandem petere, nisi ut civitas, quæ concors adversus externos sit invicta, in duas partes distracta, mutuisque damnis paulatim vires suas carpens, atque assiduis cladibus sese ipsa conficiens, jucundum hoc spectaculum hostibus suis præbeat? præter suum ac publicum bonum, divinum quoque Numen lædi: cui pax, concordia, amicitia inter homines cordi sint: contra, odia, dissidia, contentiones, rixæ abominationi: lædi Christianas leges, ac Christianam professionem, cujus fundamentum sit caritas: averterent parumper ab ira & injuriarum cogitatione animum; atque ad bonum publicum converterent; causasque irarum & dissensionum Reipublicæ, & divinæ voluntati condonarent: nullum tempus sancto consilio exsequendo aptius umquam fuisse: cum civem suum Pontificem maximum patriæ amantissimum, controversiarum disceptatorem habituri sint; cujus fidei, probitati, prudentiæ ipsimet exsules, qui toties illum læserint, stomachumque illi sæpe fecerint, sese committere sint parati: cum nullum orandi, instandi, monendi, obtestandi finem facerent: pervicerunt tandem, ut omnium rerum arbitrium ad Pontificem rejiceretur: cujus iudicio se staturos sollempni promisso ac jurejurando utrique se obstrinxerunt.

F At Prætor cum copiis ab urbe profectus, agro prius vastato, duobus munimentis in collibus urbis Saonæ circumpositis excitatis, iisque valido armatorum præsidio firmatis, Genuam revertitur: quo paullo post nuncius de Friderici obitu perlatus est: qui tanta lætitia civitatem affecit, ut præ illa vix mentis compotes essent. At insequenti anno, cum copię jam Varaginem contractæ essent, Prætorque ex urbe movisset ad agrum Saonensem vastandum: Saonenses & Ingauni, ac ceteri populi, qui defecerant, unaque cum illis Marchio Carretus consiliorum socius, præsidio Friderici, quo omnes ipsorum spes nitebantur, destituti, ac mox societate exsulum

lum Genuensium destituendi; cum pax & concordia Genuensium esset in haud dubia spe: intelligentes quam non suarum virium ea dimicatio esset, Legatos ad Prætores mittunt; veniam errorum ac pacem suppliciter petentes; seseque paratos imperata obedienter facere profitentes: venia data est; & civitas Saonensibus data à Genuensibus tædio diuturni belli fessis: ipsique & Ingauni, ac ceteri populi Ligusticæ oræ, qui simul cum illis defecerant, in antiquam ditionem ac veterem conventionum formulam recepti.

Per idem tempus Lucas Petrus Gradenicus & Jacobus Dorus Venetorum Legati Lucam venerunt: quo Genua missi sunt Guido Spinula & Hugo Fliscus, ad pacem inter utramque civitatem & foedus superioribus annis Pontifice maximo disceptatore initum, antequam dies præstituta exiret, renovandum: qui cum opidum portum Veneris convenissent, pacem & foedus eadem formula in decennium sanxerunt. Eo anno Pontifex, cum, mortuo Friderico, Italiam repetere decrevisset, Massiliam venit: ibique præsto habuit quattuor Genuenses triremes à civitate ad illum trajiciendum missas: ceterum Pontifex, maritima via rejecta, terrestri itinere Genuam venit, à Genuensibus reverenter ac cum omni regalis opulentiae apparatu acceptus: in qua urbe haud diu commoratus, Mediolanum petit; paulloque post præpositus Ecclesiæ Parmensis, jussu Pontificis, Genuam venit, ex cujus auctoritate ac præscripto exsules in civitatis consilio in patriam atque in jus civium restituti sunt, omnibus ætatibus atque ordinibus lætantibus ac gratulantibus. Hac civitatis concordia malis, quibus per decennium civitas vexata est, ac bello, quod populus Genuensis cum Friderico Cæsare, ac Pisanis armorum sociis, ac populis Ligusticis, qui ab ipso defecerant, ac secum ipse gessit, finis tandem impositus est.

Morte Friderici, atque adventu Pontificis magna rerum mutatio in Italia facta est: Gibellinorumque opes, quæ Friderico vivente innixæ supra ceteros se extulerant, illo defuncto, alte conciderunt: contra partes Guelphæ ad eum diem depressæ in immensum creverunt. Florentinorum quidem odium in Ubertos, ac nonnullas potentiores familias, ob illarum superbum & impotentem dominatum conceptum, ceterum metu Friderici compressum, tandem erupit: quas familias populus armis arreptis urbe exegit; Guelphisque, qui exsulabant, introductis, popularem Reipublicæ statum constituerunt; qui illius civitatis potentiam & imperium mire amplificavit. Lucensium enim societate sibi adjuncta, armisque tota Etruria circumlatis, complures ejus Provinciæ urbes atque opida partim vi, partim metu adactas, imperio adjece-
runt, Pisanis ac Senensibus societate armorum inter se conjunctis confusis, illorumque opibus ita fractis, ut Pisanos ad iniquas condiciones pacis accipiendas adegerint: immunitate omnium rerum, omniumque commerciorum gementibus & mœrentibus expressa, opidoque Ripafracta, cujus maxima essent ad bellum momenta, illis adempto: quas res me Historiam Genuensem scribentem haud ab re strictim attigisse, ea, quæ mox scripturus sum, indicabunt: nunc ad res nostras revertor.

Nihil memorabile habet insequens annus ejus sæculi quinquagesimus alter sub Prætores Guiscardo à Petra Sancta Mediolanensi; præter opidum Andoriam de Marchionibus Clavessanæ emptum: at qui consecutus est annus, ejus sæculi quinquagesimus tertius, qui Henricum Confalonierum Brixianum Prætores habuit, insignis est mœnibus Saonæ iterum dejectis, ac fossa ruinis prostrati muri impleta: quam facultatem in foedere Genuenses sibi reservarant: cum biennii dies rei exsequendæ

præstituta exisset: factum est id odio Saonensium pravam animum non satis tegentium.

Insequenti anno ejus sæculi quinquagesimo quarto, Rodulfo Graidano Brixiano Prætores, Pisani cladibus à Florentinis acceptis attriti necessitate ad pacificandum cum Genuensibus animum adjece-
runt: Genuensesque proximo bello fessi, non minus cupidi pacis in judicium Florentinorum de controversiis consenserunt: qui, Lanfranco Marocello & Hugone Flisco Legatis Genuensium auditis, causæque plane cognita, opida Ericem & Trebianum à Pisanis occupata Genuensibus adjudicarunt.

Hic annus non modo Genuensibus, sed omni Christiano orbi, atque omnibus bonis luctuosus fuit, morte Innocentii quarti in urbe Neapoli; qui pontificatus undecim amplius annorum cursum omnibus laudibus cumulatum egregio facinore terminavit; regno Neapolitano, post obitum Conradi Regis, Manfredi ipso Friderici filio notho Principe Tarantino haudquaquam resistente, Pontificii solii imperio adjecto: hunc virum cum exquisita doctrina, cujus illustria exstant monumenta ipsius scriptis immortalitati consecrata, atque insignis pietas, tum vero præstantia in Rempublicam Christianam merita, assidue & indefessi labores clarum & memorabilem in primis faciunt: cujus conspecta virtus ita admirationi & caritati omnibus fuit, ut cum vulgo lugentes dictarent, talem virum aut numquam nasci, aut numquam mori oportuisse. Decreta fuerat ad eum legatio, cujus princeps Prætor ipse fuit: quæ, morte Innocentii audita, iter institutum nihilominus persecuta est: eademque, quorum causa venerat, egit cum Alexandro quarto natione Campano, qui Innocentio successit.

Anno insequenti ejus sæculi quinquagesimo quinto Prætor fuit Martinus à Summariva Laudensis: per quod tempus cum Pisani ægro animo pacem iniquam ferrent, sua sponte mœrentibus animis supervenit occultus nuncius à Manfredi Apuliæ Rege, qui illos insuper in Florentinos incenderet, ac spe societatis suæ, atque ingentium auxiliorum in Etruriam, simul atque se moverint, mittendorum, ad arma Florentinis inferenda incitaret. Cupide paruerunt consilio Pisani, omnia quamvis præcipitia potiora ducentes, quam tam artis vinculis à Florentinis sese constrictos teneri: sed aliqua juris species paci ab ipsis ultro ac suppliciter appetitæ infringendæ prætexenda erat: quæ igitur in præsentia una occurrebat, eam arripiunt: negare igitur sese judicio secundum Genuenses, contra se a Florentinis lato staturos, atque iniquitatem ac pravam animum Florentinorum vulgo lacerare & execrari: qui non suam tantum vicem, sed alienam quoque rapaces sint; quibusque satis non fuerit tot Pisanorum res illis ademptas sibi ipsis adseivisse, nisi etiam, quæ reliqua sunt, aliis per iniquum judicium donent: tantam tamque insatiabilem cupiditatem miseros Pisanos exinaniendi in Florentinis esse: non cessuros se igitur Genuensibus opidis tam opportunis; sed illa, ac sese, & libertatem suam armis defensuros: cum igitur judicatum non facerent Pisani, neque opida restituerent; Legati in Etruriam missi sunt, Princivales Auria & Nicolaus Grimaldus: qui Florentinos & Lucenses in Pisanos judicium Florentinorum contumaciter spernentes, alienaque injuste occupantes incitarent: qui cum Florentiam venissent, in consilium introducti talem orationem habuisse dicuntur:

Longe major vestra res agitur, Florentini, in Pisanis ulciscendis, quam nostra: à quibus gravius quam nos majoreque in re lassi estis: nam nostri nihil illi habent, nisi parvorum ac perexigui fructus castellorum possessionem: at vobis ea, quæ inter mortales sunt maxima, quantum in ipsis fuit, ademerunt, famam, estimationem, fidem, vestro judicio non stantes: quod

ad

ad nullam aliam rem, quam ad vestram contumeliam quæsiisse videntur: nimirum cui tamquam iniquo non parendo, (neque enim ullam aliam causam non parendi comminisci possunt) vestram sapientiam, fidem, religionem aperte damnant. Haud ferenda est vobis, Florentini, tanta ac tam insignis contumelia: sed arrogantium hominum contumacia pio ac justo bello persequenda: postulat id à vobis Florentinum nomen tot egregiis rebus gestis clarum; postulat civitatis vestre magnitudo & potentia, qua omnia circum se lateperdomita habet; postulat denique justa ac generosa indignatio: an gens toties à vobis victa, ac libertate vestris nutibus obnoxia utens, tantum vestri contemptum diutius impunitum ferat? idque vobis nullo graviore negotio implicitis, quod vos connivere cogat? at enim justa quidem hæc causæ ac graves armorum sunt: ceterum bellum difficile, ac discriminum & impedimentorum plenum: tum autem tractu longum, neque satis explorati exitus futurum est: nullum immo facilius, ac brevius, ac certiore victoria spe umquam susceptum est: si enim vos soli Pisanos superioribus cladibus ita fregistis, ut iis, quas illis imposuistis, conditionibus, atque obsidibus magno numero datis salutem à vobis redimere coacti sint: quid futurum est, vobis hinc copiis vestris terra, illinc nobis classibus nostris mari illos urgentibus? quos tanta amentia vis tenet, ut utrumque populum eodem consilio, eodemque facto sibi simul irritantes, utrumque mutua societate subnixum, faciliore occasione ipsos ulciscendi arment: quam occasionem stultitia Pisanorum nobis oblatam, majore stultitia nos omitemus: neque vero sperandum est, Florentini, superba & inquieta Pisanorum ingenia ac supra fortunam elata infide conventorum, ad qua frendentes ac gementes descenderint, diutius mansura: ac non ad omnem levem spem alicujus externæ opis, ad jugum, quod malo & metu victi acceperint, discutiendum, omnibus virium suarum conatibus consurrectura: quam occasionem mirandum est Manfredum adhuc illis non præbuisse: atque adeo quis divinare possit, non inter illos occulta consilia ejus rei, qua utrique expediat, jam seri cepta? quare, cum non illud nunc in deliberatione versetur, utrum bellum, nec ne, tamquam utrumque vestra potestatis sit, cum Pisanis habeatis, Florentini: sed utrum vos soli cum illis aliqua præpotenti societate munitis, an vos cum illis solis Genua civitatis nulli omnino urbium, qua sub cælo sunt, maritimis opibus secunda societate ipsi fulti illud geratis: utrum consilium sit sapientius, juxta nobiscum intelligitis: qua civitas bellis civilibus defuncta, ac civium concordia constituta: totaque ora Liguriæ pacata, & in antiquum imperium recepta: quin omnibus viribus suis usquam alio avocatis, in Pisanorum excidium pro veteri odio proque atrocibus omnium temporum injuriis vobiscum sit incubitura, dubitare non debetis.

Oratio sua sponte jam inclinatis animis admota facilem assensum habuit, prorsusque sic faciendum respondent Florentini; quin etiam gratias Genuensibus agunt, quos videant de ipsorum dignitate & existimatione tantopere laborare: factaque dictis continuantes, Guiscardum à Petrasancta Prætorem Lunensem, cum utriusque populi mandatis Genuam mittunt: facile foedus & societas inter cupidos convenit. Guiscardus divi Georgii signo, quo Genuenses in bellis uti solent, impetrato, discedit. Eodem anno Gulielmo Albintemelii Comiti, ejusque filiis, totique posteritati, perfidiæ in Rempublicam damnatis jus fiduciariæ ditionis abrogatum est.

A. C. Insequens annus ejus sæculi quinquagesimus sextus, Philippo à Turri Mediolanensi Prætore, minime segnis nec mediocriter fructuosus Genuensibus fuit; antiquæ ditionis opidis recuperatis, ac novis imperio adjunctis, rebusque ubique bene & feliciter gestis: quin etiam insigni miraculo illustratus. Pisani enim sive compertum habentes, si-

A ve suspicantes, foedus & societatem inter Genuenses & Florentinos, illisque conjunctos Lucenses adversum se initam; sive fato illos ducente, ad hoc fiducia promissorum Manfredi inducti, bellum, quod ab aliis exspectabant, ipsi occupant facere: infestoque exercitu fines Lucenses ingressi, opidum ad pontem Serchii circumfidunt: qua re audita, Florentini haud impigre in Pisanos movent; Lucensibusque sibi in itinere adjunctis, hostem petunt: quem adepti, necessitatem pugnae effugere non valentem primo incurfu fundunt, magna illorum edita cæde, neque exigua parte in flavium Serchium præcipitata, atque undis hausta: quæ clades Pisanos subegit ad graviore necessitates accipiendas: quæ dum in Etruria geruntur, Genuenses cum omnibus pedestribus & equestribus copiis, quas armare potuerunt, ac cum octoginta triremibus Genua movent; portumque Lunensem ingressi Ericem opidum circumfidunt; fama quæ cladis à Pisanis acceptæ ad illos perlata, opidum oppugnare instituunt: ac suburbio, quod Pisani opido continuum ædificarant, muroque & fossa cinxerant, facile potiti, majore certamine opidum invadunt, ac tandem expugnant: militibusque præditiariis incolumibus dimissis, Genuam ovantes redeunt.

C Novæ eo anno inimicitiarum ac bellorum causæ ad vetera dissidia inter Genuenses & Pisanos additæ sunt: quarum origo fuit Chianus Marchio Callaritanus: is cum ferre non posset, Judicis Alborensis opes Pisanorum societate innixas in Sardinia supra suas excellere; ut pari potentia se muniret, Genuensium amicitiam beneficio suo provocatam sibi adjunxit, Castello Castro opido in judicatus Callaritani finibus illis donato: quod opidum traditum acceperunt Ogerius Scottus & Joannes Pandanus, ea de causâ cum duabus triremibus in Sardiniam missi; quarum præfectus ex familiaribus Prætoris fuit vir nobilis, cui in consilio additi sunt tres Genuenses cives, Peschetus Mallonius, Dietisalvus Dietisalvus, Petrus Advocatus: quæ cum octo Pisanis congressæ, haud incruento certamine victas eas capiunt, captasque Genuam ducunt: quibus successibus Genuenses confirmati, ut nullum locum Pisanos urgendi relinquerent, quattuor & viginti triremes de integro deducunt: quas omnibus rebus abunde instructas, Simone Guercio & Nicolao Cicada præfectis, Pisas mittunt: quæ portum ipsum Pisanum ingressæ, tribus onerariis ac nonnullis minoribus navigiis captis, iter in Sardiniam dirigunt: eo appulsæ res tristes offendunt, morte Chiani Marchionis ab inimicis suis interfecti: huic Gulielmus Cepolla avunculus successit: qui societate ac foedere cum Genuensibus renovato, Genuam venit: subitoque morbo correptus, Republica Genuensi herede nominata, decessit.

E Turbulentæ eo anno nonnihil res urbanæ fuerunt, hæresis enim quæstior Anselmus Dominicanus Prætori ac civitati ipsi sacris interdixit: quod Prætor leges quasdam in hæreticos sancitas ab ipso appellatus in tabulas publicas referre recusasset: provocatum est ad Pontificem, resque coram illo jactata: isque exitus fuit, ut Genuenses sacris illico restituti, leges in tabulas referre coacti sint.

F Quod ad piorum animos augendos & confirmandos ab Annalibus traditur, mihi nullo modo omittendum fuit; neque fides miraculo abroganda: ferunt hoc anno corpora clarorum martyrum Fluctuosi, Augurii; Eulogii, ex Catalonia in promontorium oræ Ligusticæ, quod quindecim millium passuum intervallo ab urbe Genua distat, vulgo caput Montium appellatum, divinitus ac sine ullo humano ministerio translata, & in vetustam sacram ædem Fluctuosi nomine dicatam, illique adjunctum cœnobium illata.

Sequi-



- A. Lerice.
- B. Insula Capraria.
- C. Castellum.
- D. Mare Ligusticum.
- E. S. Maria del Suore.
- F. Castellum.
- G. Porta Veneris.

Prospectus celebris PORTUS ERICIS una cum adjacentibus munimentis, Genuensium ditioni subjectis.

A.C. 1257. Sequitur annus ejus sæculi quinquagesimus septimus, mutata Reipublicæ forma insignis: qua in re mirari licet scribentium Arinales illorum temporum supinam negligentiam; qui factum dumtaxat, idque admodum jejune, narrantes, causam rei, qua nulla memorabilior posteritati traditur, quaque nulla ad exemplum fugiendarum, vel sequendarum rerum, quod in primis à Scriptoribus quaeritur, majoris est usus, ne suspicione quidem attingant: à qua re illos abstinuissè puto metu offensionis eorum hominum, qui tum vivebant: me diu cogitantem eo conjectura fert, ut putem odium plebis in Nobilitatem causam horum motuum fuisse; quod omnibus sæculis & apud omnes gentes ita usitatum fuit, ut naturale prope dici possit: hoc igitur odium, cujus superioribus annis in oppugnatione Saonæ specimen apparuit, sua sponte gliscens primores cives & optimates ex populi corpore aluisse verisimile est: indignantes, credo, Nobilitatem solam in magistratibus, solam in imperiis, ac classium præfecturis, solam in legationibus esse: se vero à Republica gerenda plane exclusos, ab omnibusque contemptos ignobilem ætatem agere: quæ de causâ puto Nobilitatem otio civitatis consulentem, ad invidiam mitigandam, proximum septennium à collegis Prætori addendis abstinuissè: quæ res quamquam videri poterat iras primariorum popularium in præsens permulssè; non tamen illorum animos sedavit; cum viderent nihilominus regimen expeditionum atque omnium rerum penes Nobilitatem esse: occasionem igitur consilii dudum inter ipsos occulte concocti exsequendi præbuit adversa sordium fama Prætoris superioris anni: in quem discedentem atrox seditio multitudinis concitata est, lapidibus illum incessentis, magnisque clamoribus ad mortem pro illius merito deposcentis: qui tumultus deinceps crescens coegit hominem, itinere retro repetito, domo Alberti Malevolæ Bononiensis, qui illi in prætura successerat, se abdentem concitatae multitudinis furori subtrahere: quæ fuga Prætoris adeo motus urbanos non sedavit, ut potius tumultum incitaret. Vulgo igitur alii ad arma conclamare; alii lo popule, vociferari; alii Capitaneum de populo deposcere: impetus illos in ædem D. Syro sacram tulit: in quam cum plebs atque primarii populares cives convenissent; clamore voluntatum indice, Gulielmus Buccanigra popularis Capitaneus, & Prætor populi Genuensis creatur: quem illico in sublime arreptum, ac magno cum plausu, ac clamoribus lætitiæ, & honoris indicibus circumgestatum, tandem populus in excelsa folio collocat, & in ejus verba jurat: idem postero die populus in ædem maximam convocatus Prætozem facere adigit; atque in imperia Capitanei ejusdemque rectoris jurare: insequenti die duo & triginta antiani de corpore plebis quartæ regionatim, qui essent Prætori in consilio, lecti sunt: aliquotque post diebus cum res in primis illis tumultibus non satis essent constitutæ, antianorum, & convocati consilii decreto, magistratui, & imperio Capitanei, illo absente, decennii tempus præfinitum est; vectigalque annum mille librarum in victum & cultum decretum: additque sunt illi, judex, duo scribæ, duodecim à familiaribus ministeriis, quinquaginta armati à corporis custodia.

Tertia hæc fuit Reipublicæ forma, ac tertius rerum status, postquam civitas nostra Cæsarum dominatu exuto, Comitibus illorum beneficiariis parere desit: suisque ipsa legibus, suisque magistratibus in libertate vivere cœpit, à Consulibus ad externos Prætores, & ab his ad Capitaneos transgressa: tumque primum Nobilium & popularium factiones feri cœptæ sunt, omnium, quæ civitatem nostram unquam vexarunt, pestilentissimæ, ac, quamquam minus cruentis motibus, quam Gibellina &

A Guelpha; acrioribus tamen & diuturnioribus, atque insanabilius odiis exercitæ: altius enim morbus pectora hominum infedit: qui omnibus legum remediis sæpe frustra tentatis valentior, vires paulatim absumendo, ac sanguinem hauriendo, ad extremam tabem atque imbecillitatem corpus perduxit: quod exsanguis & enervatum cum suo succo ali non posset; neque suis viribus hæere; externi imperii alimenta, ac suffulera, sua se libertate spolians quaerere coactum est: quæ ab interitu prohibuerunt quidem; ceterum sanguinem, robur, calorem, non reddiderunt; tamque alte ulcus penetravit, ut ne leges quidem duodecimvires tanto consiliorum apparatu latæ, quæ cetera factionum vulnera sanarunt, hoc extirpare potuerint: quod novis causis in dies magis exasperatum, materiam nonnullis præbuit, scelerata parricidii & tyrannidis consilia in patriam struere: quæ tamen in ipso exsequendi initio, evidente divini Numinis beneficio discussa sunt: tandem ad necessitatem legum ab externis Principibus petendarum, tamquam in nobis parum consilii atque ingenii ad nos ipsos regendos sit, adegerunt: quæ leges, quamvis sapientes ac sanctæ, non tamen mala & pericula nostra sistunt, nisi visceribus hærentis pestis omnes fibras nobis unusquisque præciderimus; quæ una est in unum corpus coalescendi spes. Ceterum ego nimium provehor caritate patriæ, ac boni publici studio de spatio ablatus; nunc ad inceptum redeo.

Moderationis specimen edidit novus Reipublicæ popularis status; Nicolao Vento & Jacobo Nigro ambobus ex Nobilium corpore sexdecim triremium præfectis adversus Pisanos missis: quibus in se venientibus septem Pisanae triremes procul conspectis, numero territæ fuga sese pesti subtraxerunt: imminenti periculo præsidio turris cujusdam in ora Sardinia, sub quam se receperunt, vitato: per quod tempus qui erant in præsidio opidi Castri, extrema fame victi Judici Alborensi deditionem fecerunt: Genuensesque eo nuncio accepto, Marchionis avunculo suadente, qui ea de causâ protinus Genuam se contulerat; spemque fecerat, si auxiliis Genuensium adjuvaretur, sese ex Fano Gilia opidum & cetera amissa loca recuperaturum: haud gravate delectam alam centum & quinquaginta cataphractorum equitum illi decreverunt; quam Jachino Calderario ducendam dederunt: hac Philippus Calderarius, classis hujus præfectus creatus, in Sardiniam trajiciens, in itinere navim Pisanam, magnam argenti vim vehementem, cepit: Genuensesque Fanum Gilia introducti, occultis consiliis nonnullorum civium opidi Pisanis tradendi detectis, auctores prodicionis comprehensos horribili ignis supplicio necarunt.

Insequens annus ejus sæculi quinquagesimus octavus, in quo sub Buccanigra Capitaneo Renatus A.C. 1258. Roscius Lucensis Prætor fuit, memorabilis in primis fuit; non magis motibus & casibus suis, quam feminibus magnorum ac diuturnorum bellorum inter Genuenses ac Venetos jactis: initio facto in urbe Prolemaide, quam posteriores Aconem vocarunt, eorum diffidiorum ac bellorum, quæ per multos annos, atque adeo sæcula non minoribus odiis, minoreve irarum certamine, quam viribus exercita ingentibus cladibus ac multo sanguine utrique populo steterunt: quæ bella vel induciis, vel pace (numquam tamen fida) nonnumquam intermissa, acriora semper & infestiora quacunque levi de causâ exfurgebant: quippe quæ non leves illæ suborientes, atque ad tempus mutabiles causas, quæ conditionibus facile tolli possent, conflarent; sed tacita alia subesset causâ, quæ duos præpotentes maris Mediterranei populos ad funestum bellum inter se armaret: ea erat æmulæ virtutis

certamen, ac de principatu maritimarum rerum contentio; in quem ambo impotenti cupiditate tendebant: quæ cupiditas alte animo insidens, cum natura perpetua esset: bellorum quoque ab illa manantium nullus erat terminus: quæ bella tandiu durarunt, donec utriusque populi mutata fortuna finem tandem illis imposuit; cum Veneti potentia & imperio in immensum crevissent; contra Genuensium vires intestinæ discordiæ, continentiaque & internecina civilia bella ita fregissent, ut populo Genuensi exsanguis & confecto nullum jam esset cum Venetorum florentibus opibus par certamen: iis igitur bellorum seminibus neutrius populi voluntas, cum uterque aliis negotiis satis esset implicitus, sed casus, ac duorum tenuis fortis hominum factum materiam & causam præbuit: ut vere à sapienti viro traditum sit, *incendia, quibus magna urbes conflagrent, non semper à theatris & basilicis, sed nonnumquam ab humilibus tuguriis oriri.*

Magna erant ea ætate in ora Syriæ Genuensium & Venetorum commercia; magnamque rei familiaris partem in ea negotiatione implicitam uterque populus habebat; & magnas opes, magnamque potentiam, frequentiaque domicilia possidebat: sed nullam urbem frequentius incolebant, quam Aconem, situ loci ac portus amplitudine commerciis maritimis in primis opportunam. Hujus urbis, quæ Veteribus Ptolemais fuit, tertiam partem Veneti, tertiam Genuenses, reliquam tertiam incolæ ipsi Syri tenebant. Suam utraque natio separatam regionem, ac suum separatam forum, ad hoc suum quæque magistratum habebat; cum sacra ædestantummodo esset communis: peramplaque privata ac publica ædificia, unaquæque natio, ac magnam vim cellarum & tabernarum magni pretii mercibus refertarum exstruxerant; ut non jam ea urbs privatorum negotiatorum societatum receptaculum; sed duorum integrorum populorum, duarumque Rerumpublicarum suis legibus utentium domicilium videretur.

Forte ita tulit casus, ut, Simone Marocello & collega nationis Genuensis Consulibus, in privata ac parvæ rei altercatione Venetus quidam, cuius nomen non traditur, ætate robustior Genuensem & ipsum obscuri nominis adolescentem verberaret: quod factum ad publicam injuriam Genuenses revocantes, ut est natio perciti ac fervidi ingenii, omnique levi de causâ facile irritabilis, armis repente arreptis, magno tumultu, magnisque clamoribus Venetos improvise deprehensos adorti ex ædibus ipsorum publicis expellunt, nonnullis eorum vulneratis. Graviter & iniquo animo rem tulerunt Veneti; neque orationem Genuensium auribus admiserunt sese purgantium, ac temerariam illam primam animorum concitationem, quam consilio regere sæpe in manu nostra non sit, excusantium.

Forte eo tempore Baxoccus Mallonius cum navis Veneta, quam à pirata quodam captam emerat, in portum Aconis earum rerum ignarus venit, Venetique non tam rei suæ recuperandæ, quam referendæ injuriæ studio navem appulsam nullo adito magistratu capiunt: at Genuenses injuriam non ferentes, armis sumptis, non modo captam navim recuperant, sed omnes Venetas naves, quæcumque erant in eo portu, viribus superiores capiunt, magnoque damno Venetos afficiunt. Quibus rebus Venetiis cognitis; Veneti factas sibi ac nationi suæ injurias apud Genuenses conqueruntur; sibi que satisfieri postulant: decreta est legatio Bononiam; in quam urbem Veneti quoque Legati convenirent: ibique, re æquo animo cognita, convenit, ut damna illata æstimerentur, ac sarcirentur. Cum procrastinarent Genuenses; sese ab illis extrahi & ludificari Veneti rati armis sua re-

A petenda statuunt, injuriasque ulciscendas: quare ordinariæ vectoriæ classi XIII. longas & ad pugnam instructas naves, partim triremes, partim galeatas comites clam addunt: quæ classis cum portum Aconis subiisset, omnes Gen. naves, ut in nullo tali metu, improvise deprehensas capiunt & incendunt: neque ira satis exsatiata, facibus admotis, cœnobium sacrae ædis divi Sabæ continuatum, quam Genuenses tenebant, comburunt: qua re commoti Genuenses ad arma discurrent; acreque inter ipsos & Venetos, cum quibus Pisani se conjunxerunt, prælium mox accensum est; magna cæde utrimque edita; ac multis ædificiis utrimque incensis: cumque utraque natio in eadem urbe se ad bellum compararet; non modo gladiis ac hastis quotidie dimicabant; sed compluribus utrimque bellicis machinis excitatis, omni tormentorum & missilium genere sese mutuo incessabant: vetusque Pisani turre à Genuensibus dejecta est.

Interea, cum Genuæ rescivissent, Venetos simul cum vectoria classe naves longas conjunxisse; ut paribus auxiliis rebus Syriacis subvenirent, ipsi quoque nonnullas corbitas ac decem triremes classi suæ vectoriæ in Syriam proficiscenti addunt: quas adversa tempestas adorta est; quattuorque illarum retro in portum Genuensem compulsæ sunt: ceteræ, post longam jactationem, quasiatæ ac mancæ portum urbis Tyri tenuerunt. Quarum adventu cognito, Veneti, qui erant Acone, cum undeviginti triremibus portu exeuntes Tyrum petunt; portusque fauces insident: adversus quos Genuenses vecordi & inconsulto impetu exeunt: quam temeritatem haud leve damnum secutum est, tribus triremibus amissis. At Veneti, res Syriacas validioribus præfidiis firmandas cum statuissent, ingentem classem comparant: adversus quos Genuenses quattuor corbitarum ac viginti quinque triremium classem, cui præfectus est Roscius Turca, navigare in Syriam jubent: cui paulo post, cum auditum esset, longe majorem esse navium Venetarum numerum, octo triremes addiderunt; hoc est alveos bellatoribus & fociis navalibus fere inanes, incolis Syriæ Genuensibus hominibus supplendos; alveis navium Syriam magis quam copiis egere credentes: quæ classis, cum Tyrum appulsa esset, pervigilio divi Joannis movit, atque ante portum Aconis in ancoris stetit, tamquam pugnandi copiam hosti faciens: qui insequenti die, Pisaniæ Massiliensibus, ac ceterarum nationum hominibus, quoscumque stipendiis conducere potuerunt, sociis, cum octoginta amplius navibus varii generis portu egressi magno impetu Genuenses iuvadunt: viribusque longe inferiores haud magno certamine fundunt, viginti quinque triremibus captis: cum perpauca, quæ superfuerant, fuga elapsæ in portum Tyrensem sese recepissent, Genuensesque, qui erant Acone, tanta clade animis infracti è vestigio urbe excedunt. At Veneti, ira nondum exsatiata, residuum odium, quando in homines non poterant, in ædificia ipsa effundunt: cellis & tabernis direptis, ædificiisque privatis & publicis solo æquatis, cum ne turri quidem opere conspiciendo à Genuensibus ædificatæ pepercissent: cujus turris fores, una cum aliquot lapidibus, viri ceteroqui minime vani ingenii, impotenti lætitiâ usitata gravi-tatis obliti, Venetias mittunt; aliquotque navigis in aquam à fundamentis turris exstantem immittis, per superbum nominis Genuensis ludibrium Genuensium turrim navigabilem factam jocabantur. Hæc clades omnes nationes, tam Syriæ veteres incolas, quam in illis regionibus commercia habentes, à Genuensibus alienavit; (ut mos est hominum animos ac voluntates ad fortunam inclinare) præter Principem Tyri, Catalanos, Aconenses cives, Equites Hospitalarios; qui in fide & in amicitia manserunt. In-

Interea Alexander Pontifex, his motibus auditis, qui cursum consiliorum suorum ad expeditionem Syriacam destinatum tardare atque adeo interrumpere possent, vehementer commotus, exemplo ab utroque populo legationes honorificas cum amplis mandatis ad se mitti postulat: omnes dicto audientes fuerunt; Genuensesque quattuor cives longe primarios miserunt, Princivallem Auriam, Lucam Grimaldum, Ubertum Passium, Ugonem Fliscum; Veneti Joannem Canaliū, Philippum Sturlatum, Andream Zenum: missus est etiam a Pisanis, eodem Pontificis vocatu, Renatus Marfupus Jurisconsultus: quos Pontifex, cum omnes Roman convenissent, ad se introductos ita allocutus dicitur: *Numquam putassem, filii, Christianam rem execrabiliorem adversarium umquam habituram, aut vero habere, quam hos ipsos religionis nostra hostes Sarracenos; neque ullo funestiore bello Christianum orbem infestum fore, quam eo, quo ab illis jam multa secula uritur: ecce vos, filii, novi hostes ad res insuper aggravandas additi estis: collis exitiosiores, quod illi, bellum aperte inferendo, ut nobis ab illis caveamus, nosque ad nos ipsos defendendos paremus, saltem admonent; vos arma Christianis detrahendo, ac, ne sese adversus hostiles impetus tegant atque defendant, quantum in vobis est, prohibendo, fratres vestros illustricidandos proditis: patiemini, filii, me hanc necessariam orationis acerbiter adversus vos subire; quod semper parentibus erga filios licuit: quo modo vero arma vos Christianis detrahete inficias ire potestis, qui discordiis vestris illa ab itinere Syriae intercluditis? quibus enim aliis clausibus commeatu, supplementa, nova copia ad bellum tuendum necessaria trajici possunt; quam vestris, filii, quos solos Deus maris Mediterranei potentes fecit? Ac Sarraceni, in Christiana Ecclesia opprimenda, pietatis se sua proximos putant; seque in falsa religione nostra, ut credunt, everiunda, ac sua, quam veram rentur, extollenda, rem divino Numini acceptam in primis facere existimant; at vos nihil detestabilius in illud ipsum divinum Numen admittere vos posse, juxta mecum intelligitis: pudeat vos Christiani nominis, pudeat Majorum vestrorum religionum hominum: quod si nulla verecundia vos movet; at saltem Dei immortalis metus, quem tam graviter leditis, vos ad sanitatem revocet: qui serus interdum, ceterum certus injuriarum suarum vindex, haud diu se insultum passurus est: huic causas odiorum ac dissidiorum vestrorum tandem condonate: quam rem cum ab omnibus, qui Christiano nomine censentur, commune officium postulat; tum a vobis quadam magis necessaria vobis imposita ratio exigit: quos praeter Rempublicam, qua omnibus communis est, rei familiaris vestra respectus movere debet, in Syriacis commerciis maxima ex parte occupata, cum tanto vestro compendio, ut civitates vestras, quarum alia in lacunis, alia in nudo & aspero solo sita est, alia per angustis sinibus utitur, opibus supra ceteras fere Europa auxeritis: qua cum eadem industria sint tuenda, qua parata sunt; non intelligitis, Syria amissa, materiam vos ac civitates vestras ditandi vobis subtrahi? si causa, qua vos ad arma inter vos egerunt, graves essent, non quidem venia, ceterum misericordia aliquo modo digni essetis, privata ne rixa inter duo obscura & contempta capitula remere exorta tantas procellas ciet? respicite aliquando, atque expergiscimini: solidumque bonum ac salus vestra, qua a salute publica disjuncta esse non potest, inanibus istis iris ac futilibus odiorum causis preponderet. Pro jure sacrosanctae potestatis agere vobiscum possem, filii, sed precibus malo: controversias vestras mihi judicandas permittite, ac causas discordiarum pro communi parente cognoscendas, pacemque inter vos componendam, qua facilius conveniet, Christi Vicario disceptatore atque arbitro, quam vobis de illis inter vos altercantibus. Cum verecundia, tum veritate impulsus, sese in sacrosancta potestate fore omnes respondent, sine ulla retractatione, eo, quod ipse*

A judicaverit, staturos: omnia igitur ejus arbitrio & moderatione transigenda & constituenda, sollempni compromisso permittunt. Qui brevi leges pacis dixit, easque poena gravissima sanxit, sacris atque Ecclesiae communitate illis interdicens, qui priores eas perfregissent: casuque factum est ut eo die pax Romae convenerit, quo clades in Syria accepta est: conditiones ac leges pacis omnes acceperunt: quae potius bella & contentiones in praesens sustulit, brevi majoribus motibus revicturas, quam animos veteribus odiis inter se exulceratos conjunxit.

B Eo anno egregium, ac neutiquam silentio praetereundum, Lucensium amicitiae & fidei erga populum Genuensem existit officium; duobus millibus marcarum argenti dono missis ad difficultates publicas sublevandas; tot impendis in res Syriacas & Sardas factis, totque detrimentis acceptis: acceptum donum est, gratiis ingentibus actis; ac mox restitutum, ad majores necessitates servari iustum.

C Otium ab externis bellis, ne res Genuensibus umquam quietae essent, domestici motus exceperunt; quos excitavit ambitio Buccanigræ Capitanei: sive ille ingenio vasto, atque ad immoderata & non concessa tendente fuit; sive illum Magistratus immutavit. Is, cum nimia illa potestate paulatim abuti coepisset, jam eo pervenerat, ut Rempublicam privatis consiliis ac magis pro arbitrio, quam ex legum praescripto, administraret; Legatos & praefectos, quos sibi libuisset, legeret; munera, procuraciones, honores, quibus vellet, mandaret; neque se ullis legum vinculis constrictum putaret: quibus rebus acerbum odium Nobilitatis sibi irritavit, conjuratioque in illum multorum ex primoribus civitatis facta est: quae tantum abfuit, ut hominem everteret; ut contra, illius opes stabiliverit: manarunt enim nondum satis matura consilia; ut multi ex confortibus vere ineunte, anno A. C. 1259 ejus saeculi undecagesimo, urbe excesserint; quos Capitaneus exfulio multavit; illorum domibus disturbatis: nonnulli, quibus fuga expedita non fuit, comprehensi vadibus cavere coacti sunt, sese Capitaneo dicto audientes fore; neque ulla occulta consilia contra illum structuros: quo successu superbia & arrogantia Capitanei aucta est: qui stipendio illi publice aucto, in aedes Opicii Flisci paternis laxiores & magnificentiores, tum autem situ opportuniore de publico apparatus commigravit.

E Hoc anno Genuam venit Othobonus Fliscus Cardinalis Innocentii quarti fratris filius, iter Dertonam habens, ad fratris filios in ea urbe in custodiam traditos liberandos: postulavitque sibi Legatos comites publice dari, quorum adpectu atque auctoritate Genuensis nominis, faciliores expeditu res forent. Mos gestus est tanti fastigii civi aequa petenti: missi igitur sunt Othobonus Camilla, Jacobus Marocellus, Guido Spinula, Hugo Fliscus: qui Cardinalis haud multo post tempore Genuam rediit. Ejus reditus Buccanigræ atque illi studentibus suspectus nonnihil fuit, viri auctoritatem magnasque opes & potentiam verentibus; ac timentibus, ne ille cum Nobilitate ejusdem corporis homo consilia Magistratus sibi abrogandi consociaret: ceterum omnem eam suspensionem Cardinalis moderatio & sapientia mox discussit; qui desperans conditionibus & verborum disceptationibus res posse componi; Buccanigramque voluntate principatu umquam cessurum, proindeque ad vim & ad manus necessario veniendum providens; eamque rem a persona, quam gereret, maxime alienam ratus; simul secum reputans, quam graviter apud omnes bonos, & Pontificem ipsum, totumque ordinem Antistitum esset offensurus, si ipse vir sacer

V B E R T I F O L I E T A E,
PATRICII GENVENSIS,
HISTORIAE GENVENSIUM
LIBER V.

A. C.
1265.



SEQVITVR annus ejus sæculi sexagesimus quintus: in quo civiles discordiæ, à quibus per multos annos quies fuerat, renovatæ sunt; funestique civilis belli, quod ab illis manavit, femina jacta; quod acrioribus odiis, quam superius, atrocioribusque crudelitatis exemplis exercitum, majoribus cladibus ac funeribus civitatem deformavit: conflatum est autem non tam à Guelpharum & Gibellinarum partium studiis, (quamquam hæc nomina malorum auctores in speciem retinuerunt) quam à quattuor præpotentium gentium Spinularum, Auriarum, Grimaldorum, Fliscorum immodica ambitione: quæ familiæ supra ceteras opibus auctæ, ac populorum dominatu fultæ, nimis spiritibus sumptis, neque æquabilitatem privatæ fortunæ cum reliquis civibus ferentes, occasionem ex iis factionibus arripuerunt consilia dominandi jamdiu occulte concocta ad effectum perducendi; cum, divisis bifariam studiis Spinulæ & Auriæ Gibellinarum partium, Grimaldi & Flisci Guelpharum principatum in se firmassent. Earum familiarum impotens regnandi libido, ne cum dominatu quidem, ex quo virtute & consilio egregii & memorabilis civis virique fortissimi Simonis Buccanigræ dejectæ sunt, finem invenit: à summo enim Magistratu lege exclusæ: quod aperta via tenere non poterant, ut dominarentur; per cuniculos assequi tentarunt: discordias enim inter popularis corporis cives, quibus Reipublicæ procuratio & rerum imperium cesserat, ferendo; prævalidasque illius corporis familias, quæ & ipsæ supra modum creverant, artificio aggressæ; atque eas privatis amicitiiis, per varias occasiones, amplexæ, illarum laborantium vicem se dolere simulantes, opemque modo his, modo illis ferentes, tandem sese in societatem regnandi insinuarunt; studia reliquarum gentium ex Nobilitatis corpore eadem contagione imbutarum secum trahentes: quas ipsas quoque Nobilitatis nomen ab honoribus & muneribus publicis arcebat. Tulerunt quidem quattuor hæc familiæ complures claros viros ac militiæ bonos; qui patriam multarum egregiarum victoriarum, & magnæ gloriæ, virtute & laboribus suis compotem fecerunt: ceterum, si quis bona & mala ab illis emanata conferat, haud dubito aliquos fore, qui de gratia splendorum familiarum meritis debita magnum cumulum à malis investitis detrahi putent: cum tamen gloriam eorum, qui præclaris rebus gestis nomen Genuense illustrarunt; illorum odio, qui tot malis & detrimentis civitatem involverunt, haudquaquam imminuendam statuunt: quorum posterius, si modo æquo judicio uti volent, nihil erit, quod ægre ferant, nostrum studium in his insectandis, atque in illis laudandis æque ardens fuisse; neque quod rem ad partium studium revocent; tamquam ego popularis corporis civis illustres quattuor familias, quibus Nobilium nomen ac factio haud parum ornatur, invidia onerare studuerim: qua suspicione me plane liberat, quod

B in quattuor clararum popularium gentium, Adornia, Fulgosia, Montalæ, Guercia immodica ambitione exagitanda, pravisque artibus, quibus plerique ex illarum hominibus principatum appetiverunt, partumque gesserunt, odio civium subjiaciendis, non minus vehementes, minusve acres fuimus: quod idem paullo superius fecimus in Gulielmi Buccanigræ ambitione perstringenda, ejusque flagitiosa Reipublicæ gerendæ ratione aperte damnanda.

C Auctor movendarum rerum fuit Ubertus Spinula: qui, cum suis persuassisset, non aliter Guelphorum potentiam majores in dies vires assumentem, ac pestem & perniciem Gibellinis machinantem, consiliaque regni invadendi struentem, comprimiposse, quam si Gibellini summum rerum imperium ad unum detulissent; magno clientium numero tam ex ipsa urbe, quam ex circumjectis regionibus corrogato; quos partim auctoritate sua ipse attraxit, partim Gulielmus quidam à Petra ex valle Serivia, & Joannes Ravascherius, Gulielmusque Bottinus ad illum adduxerunt; juventuteque familiæ suæ latera cingente; neque exiguis infimæ sortis hominum de plebe Genuensi beneficiis & promissis allectorum gregibus stipatus; quos obæratos, ac sceleribus & maleficiis contaminatos, atque ad vim, facinus, seditionem paratos, cupiditas novandarum rerum, ac spes impunitatis delictorum ad illum attraxerunt. His igitur copiis fultus Spinula, initio mensis Octobris, nocte concubia cum Thoma fratre domo profiliens, prætorium aggressus, Prætozem improvise deprehensum, totamque familiam simul cum eo captam domi suæ in privatam custodiam inclusit; ipseque in occupato prætorio substitit; cum ejus cohors tota urbe discurrens Uberti Spinulæ Domini & Capitanei Genuæ nomen ingentibus clamoribus subiceret. Postero die, luce orta, Ubertus populo in arcem ad Laurentii convocato, cui interfuerunt omnes primarii cives, ex prætorio profectus, Guerciorum præpotentem ac nobilem familiam optimisque in Reipublica sensibus perpetuo usam, per quorum plateas iter fecit, obstitentem habuit: qui tamen non satis, ut in improvisa re, à viribus parati brevi certamine victi & dejecti sunt, illorum ædibus & turribus captis: ceterum, cum in consilium venisset, compluribusque verbis conatus suos honestare obtendisset, acrius illi, quam ipse animo præceperat, à bonis & primariis civibus restitum est: adversus quorum consentientia studia tendere non ausus, non satis adhuc ad vim afferendam paratus incepto destitit: verbis simulans, se consilium quietis publicæ causâ susceptum, quoniam illud civibus non placeat, quietis quoque publicæ causâ æquo animo deponere; ceterum re sese ad aptius tempus reservans: res igitur ita compositæ sunt; ut Prætor, stipendiis debitis acceptis, magistratu illico abiret: atque interea, dum dies novi Prætoris creandi venit, qui tum erat ad quartum Nonas Februarias, regimen rerum penes Guidonem Spinulam & Nicolaum Auriam esset: nullique Uberto & consortibus excitati motus fraudi essent.

Infe.

A.C. 1266. Insequenti anno ejus sæculi sexagesimo sexto, Spinula & Auria nihil retractantes novo Prætori magistratu cesserunt: is fuit Jacobus Paludius Parmensis, octo collegis ex Nobilium corpore de more additis. Infelix hic annus fuit, rebus adversus Venetos à præfectis nostris male gestis: quorum classis cum compluribus detrimentis Genuenses affecisset, haud exigua navium, hominum, mercium præda acta; Genuenses decem & octo triremes, ingentemque corbitam adversus illos armarunt: quarum præfectus fuit Lanfrancus Borborinus; tribus illi in consilio Legatis additis, Balduino Dietisalvio, Rainaldo Ceba, Bonavia Comite; Conrado Vento corbitæ præfecto: quæ classis mox novem triremibus aucta est: cum auditum esset classem triginta triremium è Venetorum portubus solvisse. Igitur Borborinus corbita, quæ iter classis tardabat, Bonifacii relicta, cum triremibus ad perquirendam hostium classem profectus, illam tandem adeptus est ad littora Siciliae, inter Drepanum & Mazariam urbes: consilioque peritorum rei nauticæ spreto, qui illi magnopere auctores fuerunt, ut in alto procul à terra pugnaretur, sive arrogantia, sive formidine jam tum fugam spectans, classem littori quam proxime applicuit: navibusque inter se catena devinctis, continuatam illius feriem fecit, malo pravoque consilio. Venetis enim primo concursu victoribus, factum est, ut omni facultate fugæ retinentibus vinculis adempta, naves in potestatem hostium ad unam venerint: cum præfectus ipse, ac reliqui primores, omnisque turba nautica propinquo effugio invitati, ne tentata quidem pugna, turpiter se in terram ejecissent. Tanta ignavia Genuæ ad prodicionis crimen haud immerito revocata est: ipseque præfectus decem millibus librarum damnatus, atque exsulio mulctatus, bonis publicatis: eandem exsulii & publicationis bonorum poenam præfecti triremium & gubernatores subierunt: cum præfecti singuli duabus librarum millibus, gubernatores mille damnati essent; illorumque domus ac tures dejectæ & complanatae.

Nihil adversis casibus infracti Genuenses alteram viginti quinque triremium classem eadem æstate compararunt, Uberto Auria Duce: qui jam tum adolescentiam nondum egressus magni futuri Ducis multis locis egregium specimen præbuerat: is ignominiae delendæ cupidus, Hadriaticum sinum ingressus, hoste diligenter perquisito ac nusquam invento, nonnullis onerariis captis & incensis, ne inutilis omnino & segnis ejus expeditio esset, iter in Cretam insulam fecit: quo appulsus urbem Caneam vi expugnatam diripit, ac prætorium incendit: itinereque retroverso domum repetens in classem vectariam Venetorum incidit, in qua erant triginta triremes: sapienter igitur prælio cum hoste viribus tanto superiore declinato, institutum iter prosequens in Siciliam appulit: prædamque inter navales socios partitus, parte Reipublicæ obveniente retenta, Genuam reversus trecentos quinque captivos quæstoribus tradidit. Eodem quoque anno Peschetus Mallonius trium triremium præfectus, quarum una Portusvenerensium fuit, ad littora Syriae ingentem Venetorum onerariam cepit; ingenti præda rerum & hominum facta: qui Genuam reversus ipse quoque centum & triginta captivos Reipublicæ tradidit.

A.C. 1267. Insequentis anni ejus sæculi sexagesimi septimi, cujus Prætor fuit Guidottus Rodobius Vercellensis, primum opus fuit interdictum à sacris, quod adhuc durabat, à Pontifice sublatum; civitasque sacris & communitati Ecclesiæ restituta: Oratoribus ea de causâ ad Pontificem missis Nicolao Cicada, Ansaldo à Mari Jurisconsulto, Lanfranco Cataluso, Gulielmo Cybo. Haud retractanter hoc factum est à Pontifice; ut Genuensium animos be-

A neficio delinitos facilius in societatem consiliorum, quæ de bello sacro integrando à Christianis Principibus agitabantur, traheret: qua de causa Legatus Pontificis ac Regum Galliae & Siciliae Oratores, ex composito, eodem tempore Genuam venerunt, oratum, ut cum Venetis pacificaretur; cum duorum populorum maris potentium discordiæ sacris expeditionibus magno impedimento essent: Legati comiter accepti, ac cum benigno responso dimissi sunt; in Genuensibus nullam umquam moram sacris expeditionibus fore; qui Majorum suorum contestata pietate nihil absolum facturi umquam sint: quod idem responsum datum est ipsis Principibus à Genuensibus Oratoribus Simone Mallonio & Petro Camilla ad Regem Gallorum, & Marinetto Marino Jurisconsulto ad Pontificem, certo quoque nuncio ad Siculum, missis: quod vero ad pacificationem attineret, sese in sacrosancti Pontificis & reliquorum piorum Regum potestate futuros, nullam tamen re transacta, per has verborum ambages Genuensibus rem extrahentibus: quorum omnia consilia in Venetos ulciscendos atque accepta damna illis reddenda tum versa erant. Armatae igitur sunt adversus illos quinque & viginti triremes: quæ classis Lucheto Grimaldo ducenda data est; Pescheto Mallonio & Otholino Nigro illi in consilio additis: qui Syriam petens duas Venetorum triremes & onerariam, quas in itinere forte obvias habuit, cepit: cumque portum Aconis tenuisset, turrin à Venetis ad defensionem portus ædificatam & munitam expugnavit: ostioque portus quindecim triremibus infesso, ipse cum reliquis decem Tyrum se contulit, ad consilia cum urbis Domino, ipso quoque Venetorum hoste, de Venetorum rebus oppugnandis conferenda: quo absente, viginti Venetorum triremes supervenerunt: quæ Genuenses triremes numero inferiores adortæ, quinque illarum ceperunt; cum reliquæ, rebus inclinatæ, fuga salutem expeditissent; Tyrumque appulsa se cum reliqua classe conjunxissent: præfectus, cum nulla reliqua esset opera Reipublicæ navanda, cum tota classe itinere retro repetito, tribusque triremibus ad commercia Venetorum vexanda missis, nonnullisque Venetis navibus in itinere illi forte oblatis captis, Genuam cum reliquis decem & septem triremibus reversus est; trecentaque captivorum Venetorum capita ac merces in navibus captis inventas Reipublicæ tradidit. Hæc ferre memoratu digna inter Venetos & Genuenses eo anno gesta sunt: cum utriusque nationis naves privatim, & ad negotiationem & ad piraticam faciendam armatae, per varias occasiones, & hoc anno & per totum hujus belli tempus, mutuo sese parvis damnis carpere numquam destiterint: quæ minutiora sigillatim persequi, fatietatis potius, quam ullius operæ pretii fuerit. Lex eo anno lata nullo modo prætereunda fuit: qua Genuensis nationis Consules per omnes Hispaniæ & Syriae urbes sparsi; illi Consulibus sedes & domicilium Settæ habentibus, hi Consulibus Tyri confidentibus parere jussi sunt.

Annus qui sequitur ejus sæculi sexagesimus octavus, Guidone Corrigio Parmensi Prætor, nulla re domi aut foris gesta, nullam materiam scribentibus præbet: ac ne insequens quidem, cujus Prætor fuit Bonifacius Cariosa ex Regio Lepidi, ulla alia re est insignis, quam adventu ad urbem splendorum legationum, à Sultano Memphitico, à Tartarorum Principibus, ab Imperatore Græco, ad Pontificem & ad Regem Gallorum, ad Regemque Siculum missarum; ad illorum curam ad versus eos Saracenos, qui tum sacram urbem tenebant, instigandam: quos graves omnibus accolæ capitali odio ceteræ nationes persequabantur. Res quoque hoc anno cum Rege Siculo constitutæ sunt: controversiæque, quæ multæ illi cum natione Genuensi

nuenſi intercedebant, ſublata à Simone Guercio, Janella Advocato, Simone Cancellario Genuenſium Oratoribus ea de cauſa miſſis.

A. C. 1270. At annus ejus ſæculi ſeptuageſimus, qui Prætorum habuit Orlandum Putagium Parmenſem, cum toti Chriſtianæ Reipublicæ, tum nominatim Genuenſibus infelix in primis domi foriſque, ac funeſtus fuit: nam & foris vires civitatis ingenti naufragio haud parum acciſæ ſunt; & domi libertas oppreſſa. Eas res nunc ſtilo perſequi pergam.

Nihil adverſis caſibus vividus atque invictus Ludovici Francorum Regis, pietateque incenſus animus infractus, omnibus conſiliis ſacrum bellum alebat & fovebat: qua de cauſa Legatis ſuperiore anno Genuam miſſis, magnum navium numerum omnis generis, magnamque egregiorum bellatorum & nautarum multitudinem conduxerat; ut decem millia Genuenſium in ea expeditione fuiſſe tradantur: quam haud mediocribus auxiliis ipſa quoque civitas publice miſſis adjuvit: quibus præfecti ſunt Anfaldus Auria, Philippus Cavaronus, Franciſchinus Camilla. Omnibus igitur comparatis & inſtructis, Rex cum tribus filiis, Philippo, Petro, Triſtano, Alphonſo fratre Comite Piſtavienſi & Tolofate, Rege Navarræ genero, magnoque Procerum & Principum numero conſcendit: qui in multas partes utile in primis atque aptum ſuſcepto bello ratus Africam prius domitam relinquere, curſum Tunetum dirigit: ſecundaque navigatione uſus, cum oram Africæ tenuiſſet, copias in terram exponit: primumque opus belli fuit, Quarantanam munitiſſimam arcem, omnibusque neceſſariis rebus ad bellum firmatam tentare: quam Genuenſium in primis virtute, qui claſſem ad arcem applicuerant, expugnavit: ea expugnata, copiis Tunetum admotis, urbem arcta obſidione circumſedit: quæ obſidio dum diutius, quam animo præceperat Rex, extrahitur, ingens vis peſtilentis ac contagioſi morbi, ex intolerandis illis Africæ æſtibus concepti, exercitum invaſit: quæ, ingenti multitudine ignotorum capitum primo abſumpta, in Principes ipſos tandem incubuit, magnaue illorum funera edidit: atque unum ex regis filiis Triſtanum, ac poſt illum, Pontificium Legatum ſuſtulit: poſt quos ipſe quoque Rex ſingulari pietate atque omnium virtutum gloria longe præſtantiſſimus, quæ illum in Divorum numerum retulerunt, lugubri Chriſtianæ Reipublicæ fato exſtinctus eſt: cui Philippus filius maximus natus in regnum ſucceſſit. Poſtridie ejus mortem Carolus Siciliæ Rex, Regis mortui frater, cum magna navium claſſe, magnisque pedeftribus copiis Tunetum appulit; caſtraque cum Philippo conjunxit. Ludovici morte non tamen aut obſidio ſoluta eſt, aut bellari deſitum; cum Chriſtiani, obſidione nihil relaxata, eodem tempore & urbem urgerent, & tota regione circa excurrentes, ferro, igni, omni que belli clade graſſarentur; Maurique acriter reſiſterent, urbem conſtanter defendentes; ac Chriſtianis occurrendo, minus liberos illis excuſus facerent. Pax tandem cum Rege Tunetano, Siculo auctore, inita eſt: cujus conditiones fuerunt; Tunetanus quinquaginta duo millia unciarum auri Chriſtianis Regibus præſentia ſolveret, ac totidem proximo biennio; certum tributum anniverſarium Siculo Regi penderet; concionatores Chriſtiani Euangelii admitteret, eoſque inviolatos præſtaret; Genuenſibus, quas debebat, pecunias perſolveret.

ſcedere iſto, Odoardus Angli Regis primogenitus filius cum ingenti triremium & corbitarum claſſe ſupervenit; magna vi pedeftrium copiarum, magnoque Principum & Procerum ſacrorumque Antiſtitum numero ſecum veſto: ingemuit egregius adoleſcens, occaſionem virtutis oſtentandæ ea pace ſibi præreptam: partemque pecuniæ à Tunetano exactæ

A ſibi obvenientem à Regibus oblatam recuſavit: ſine igitur bello infructuoſo impoſito, autumno circumacto, Chriſtianæ claſſes ſimul conjunctæ ex Africæ ora ſolverunt: portumque Drepani in Sicilia incolomes ſubierunt: in quo cum diem tantum fuiſſent, atrox tempeſtas illas adorta eſt: cujus tanta vis fuit, ut omnes naves, quæ fere Genuenſes erant, præter Anglicam claſſem, quæ in intimum ſinum portus retractior intacta fuit, lacerarit ac diſjecerit: ceterum Genuenſes majorem Regis Siculi, quam tempeſtatis ſævitiæ experti ſunt: qui, pro eo, ut egeſtatem miſerorum benignitate ſua ſublevaret, omnia ex naufragio recuperata, tamquam jure ſibi obvenientia, illis abſtulit, nequidquam expoſtulantibus, ac fidem recentium ſœderum teſtantibus. Ab infelici expeditione Philippus revertens, cum Cremonam veniſſet, petente Pontifice ſacræ expeditionis percipido, atque omnia impedimenta remove ſtudente, pacem inter Venetos & Genuenſes auctoritate ſua interpoſita in quinquennium compoſuit.

B Hoc anno, jamdiu ab Uberto Spinula ſtructa invadendi dominatus conſilia, ſuperioribus annis fruſtra tentata, majore apparatu, majoreque conatu repetita, effectum habuerunt: cum ipſe interea majoribus opibus viam ſibi ad illum communifſet; Auria gente opibus prævalida ſibi adjuncta, Ubertoque ejus familiæ principe in ſocietatem imperii aſſumpto: quem virum ceteroqui egregium, ac patriæ perutilem, rebusque geſtis clarum civem ſuis conſiliis imbuit. Occaſionem cogitata exſequendi ambobus præbuerunt turbulenta Reipublicæ tempora, ac corrupti ſæculi licentia; quam præpotentium nobilium familiarum prava ambitio in civitatem invexerat, dum unaquæque majores ſibi opes conſtare ſtudens, infimæ ſortis hominum, quorum gregibus latera ſepta habebat, libidini indulget: legumque vi potentia ſua perfectæ, ac publica majeſtate ſoluta, Magiſtratibus non parentes, ceteris idem faciendi exemplum præeunt: ut, nullo pene metu maleſicia cohibente, libidinem animi unusquiſque pro lege haberet; nulliusque res aut vita à facinoroſorum audacia tuta eſſet; nihilque intra aut extra pacatum aut quietum; ſed vulgo ſpoliarent, raperent, vulnerarent, cæderent. Quo ſæculi vitio Luchetus Grimaldus utens, Albintemelii præturam malis artibus ſibi adſcivit. Eum cum familia Curſorum opibus & clientelis valida ac Gibellinæ factionis caput Prætorem repudiaret, tanquam vitio creatum, eamque ſpeciem verbis prætexens, ceterum re ab adverſarum partium homine abhorrens, arma contra illum ſumpſit: ut idem morbus magiſtratus negligendi contagione ſua in totam Genuenſem ditionem manarat: quibus auxilio Genua proſecti ſunt, Anfaldus Balbus Caſtellius, Ughetus Auria, Gulielmus Turrius cum valida clientium manu: qui prælio à Lucheto ſuperati ſunt, compluribus ex illis captis ac carceribus incluſis: ad quos reſtituendos cum nullis precibus Luchetus aut propinquorum allegationibus adduci potuiſſet; Spinulæ & Auria conjuncti, magna vi amicorum & clientium ſuorum convocata tam ex Nobilitate, quam ex plebe; præclaram ſpeciem præferentes popularis libertatis vindicum, ac regimen civitatis univerſo populo aſſerentium; facile convocatis perſuaſerunt, ut omnes in ipſorum verba jurarent. Eorum igitur animis in ſe firmatis, duæ hæ familiæ ad quintum Kalendas Novembris armis ſumptis prætorium invadunt; cum Prætor cedens, magna multitudine civium tam nobilis quam popularis corporis illum ſequente, illorum manibus ſe eripuifſet, atque in ædes Flifcorum ad divi Laurentii recepiſſet: quo ingentes concurſus hominum Guelpharum partium facti ſunt; ſeſe patrociniū libertatis ac Magiſtratum expulſorum ſuſceptum veniſſe prædicantium adverſus Spinulas & Aurias; qua

qui ad nefarium scelus mentiendi quoque impudentiam addant; hominumque patientiae verbis iludentes, tanto parricidio honestum ac popularem titulum praeferant; seque (si diis placet) ejus libertatis assertores vocent, quam, armis palam adversus ipsum Magistratum latis, illoque de sedibus suis dejecto, manifeste opprimant; ac regimen popolare appellent, quod civibus ablatum in se ipsi privatim verterint, ac, cui populo jugum parent, ad eum imperium transferre se dicunt: res à verbis mox ad manus venit; acreque praelium commissum est: in quo victores Spinula & Auria fuerunt: victoriamque petitem principatus praeium illico secutum est; Uberto Spinula & Uberto Auria, ut privatis consiliis compositum fuerat, Capitaneis Genuensis libertatis creatis; summoque omnium rerum imperio, nullis legibus aut conditionibus circumscripto illis mandato: in eorumque pro tribunali sedentium verba ab universa civitate atque ab utraque Factione juratum est: qui ad animos multitudinis, cujus favore imperium invaserant, retinendos; & ad adumbratam speciem popularis Reipublicae status, qua ambitiosa consilia velabant, praeferendam, rectorem plebi ex illius corpore hominem dederunt, Abbatem populi nuncupatum; sedibus ac domicilio publico, familiaque, & accensis, ac nonnullis aliis inanibus honoris insignibus decoratum; honorifico praeterea confidendi loco inter ipsos medio concessio. Haud melioribus artibus, quam partum est, imperium à novis Dominis exerceri coeptum; compluribus egregiis civibus, certo exsili loco illis definito, urbe exactis: quos nullius criminis compertos cum adversarum partium studium, tum praestans ingenium, vividusque & experiens animus injustum regnum numquam concocturos suspectos faciebat: lenire tamen invidiam multis modis Capitanei aggreffi sunt: nam Archiepiscopo adhibito, ut sacrae potestatis majestas venerationem consiliis adderet; salubri severitate maleficia acriter puniendo, licentia peccandi cohibita, civiumque animos multis matrimonii contractis inter se conciliando, civitatem in tranquillum redegerunt: cum Intemeliorum civitatem, in qua ipsa quoque res turbulentæ erant, Babilano Auria eo publice misso, pacassent; vico Lerma facinorosorum hominum receptaculo deletor: ad hoc speciem quandam prisca regiminis retinuerunt, peregrino Praetore vocato: cui apparitoribus & ceteris inanibus magistratus insignibus relictis, vim tamen ac robur omne ademerunt, imperio suo illum subjungendo; necessitateque imposita omnia ad ipsorum praescriptum dirigendi.

A.C. 1271. Accersitus est igitur insequenti anno ejus saeculi septuagesimo uno (nam quod reliquum tempus superioris anni fuit, post imperium Capitaneis mandatum, Praetore caruit) Praetor Accursius Lancianus: qui mos tamen duobus invecchia Alexandrinus: qui mos tamen duobus insequentibus annis ejus saeculi septuagesimo altero, & tertio, ita voluntate dominantium ferente, intermissus est: quorum duorum annorum primo Othobonus Fliscus magni nominis magnarumque opum Cardinalis, odio & indignatione ardens, Grimaldis ipsa quoque praepotenti familia in societatem consiliorum assumptis, exsilibus Romam congregatis facile persuadet, ut, quoniam patriam, ex qua injuste exacti sint, ac res suas recuperandi nulla alia sit via, quam civitate ipsa Carolo Regi tradenda, id facere ne cunctarentur: neque eo consilio servitutem patriae parari, quæ jam impotentissimis tyrannis serviat; sed dominum mutari, ac patriam ipsam splendidiore catena alligari: æquioribusque oculis illustrum ac præcelsum Regem, tum autem sibi ipsis æquum, dominantem adipisci, quam insensissimorum hostium suorum, sibi iniquissimorum, atque eodem jure, quo ipsos, natorum, factum & super-

A. biam ferri. Probato consilio, cum Rege tantæ accessionis cupientissimo societas Gibellinorum Genua expellendorum, nulla mora interposita, jungitur.

B. Ex eo foedere res turbari multifariam coeptæ sunt: nam Rex res & mercatores Genuenses in regno Siciliae retentos in custodiam dedit; nequidquam Genuensibus fidem foederum testantibus: quam se Rex haudquaquam violare dictitabat, non contra civitatem ipsam, sed contra ejus libertatem injuste prementes veniendo: cujus jussu nihil, quod ad eos ubique vexandos pertineret, omittentis, Nicolaus Auria, & Michelettus ejus frater, ac Thomas Squarciaficus Syriam Provinciam cum procuratoribus publicis petentes ab arcis Meletensis praefecto fraude circumventi ac capti & retenti sunt. Par referre illi potuissent Capitanei; Siculis ac Regi subjunctis, quorum haud exiguus numerus in ditione Genuensi commerciorum & negotiationis causa commorabatur, illorumque rebus retentis: abstinerunt tamen, veriti nimiam Regis iracundiam sibi irritare; illosque tantummodo haud invitos finibus Genuensibus cum rebus suis, certo praefinito die, facessere jussunt.

C. At Grimaldi & Flisci munera inter se partiti, hinc hi in Orientali ora, illinc illi in Occidentales res miscere coeperunt; cum Grimaldi arcem Stellæ & Delphini occupassent: ceterum illorum conatus subito discussi sunt à praevalenti Gibellinorum Factione; cum ex altera parte Nicolaus Auria Grimaldos profligasset, arce Stellæ recuperata ac diruta; altera Ubertus ipse Auria alter ex Capitaneis adversus Fliscos profectus, eorum conatus in ipso initio oppressisset: quibus rebus confectis, duo procuratores Anfaldus Balbus & Ubertus Sardena (ii postea in Fliscos sunt adsciti) missi sunt, ille ad Orientalis oræ, hic ad Occidentalis pacem & tranquillitatem tuendam & stabiliendam. Ac ne ditio quidem transjugana motibus caruit: quos excitavit Manfredus Bosci Marchio, Tagioli opidi incolis sibi adjunctis: qui tamen compressi sunt à Conrado Spinula Uberti Capitanei filio eo publice misso.

D. Majore mole insequenti anno res turbatae sunt: A.C. 1273. Rex enim assiduis Fliscorum & Grimaldorum, ac totius Guelphæ Factionis precibus fatigatus, illum ad delatum civitatis imperium accipiendum instigantibus, majore conatu rem sibi capeffendam constituit: bellum igitur illis undique excitavit: ejusque jussu Marchiones Saluciani & Carrettani, Alexandrinique, nonnullis Longobardiæ populis sibi adjunctis, suis sedibus moventes ditionem Genuensem invaserunt: eodemque tempore regius quidam Vicarius, Nicolao Flisco, qui opida Vezanum, Tivegnam, Spediam, Insulam, Carpenam, Manarolam, Vesignam tenebat, aditum patefaciente, fines Genuenses cum infestis copiis ingressus, oram tumultibus & cladibus belli implevit. Missus est adversus illum Anfaldus Balbus; qui, dum Genuæ comparatur, illius impetum distineret; cujus haud segnissimum opera fuit, Vicario regio retro Spediam compulso. Interea Genuæ exercitu comparato; classeeque quattuordecim triremium armata, quæ Jacobo Squarciafico ducenda data est; Ubertus Auria alter ex Capitaneis Dux adversus Vicarium profectus est. Ab utroque egregia opera Reipublicae navata est: nam Squarciaficus opidum Manarolam, Auria Spediam expugnavit & incendit; atque omnia opida, quæ à Flisco teneri modo diximus, Reipublicae recuperavit. Pari virtute & felicitate Respublica trans jugum & in ora Occidentali gesta est ab Ægidio Nigro & Anfaldo Balbo; Leone & Ricardo Marchionibus Bosci ab illo contusis, opidoque Vuada ditioni Genuensi subjuncto; ad hoc Ulmeta, Cusio, Pornassio opidis captis, quæ à regis tenebantur: cum incolae opidorum Mirbelli, Campi, Rossilionis, Massonis, Tagioli, se imperio Genuensi subjecissent.

A.C. Longe majore virium apparatu insequenti anno
1274. ejus sæculi septuagesimo quarto, qui ipse quoque
Prætor vacuus fuit, res gesta est; cum Genuen-
ses societatem & foedus cum Marchionibus Mon-
tisferacis, Hastensibus, & Papiensibus junxissent.
Carolus enim Rex uno eodemque tempore terra
& mari Genuensem ditionem invasit: qui, non-
nullis triremibus ex Provincia Narbonensi in Cor-
sicam missis, arcem Lombardam à Genuensibus æ-
dificatam expugnavit: adversus quam classem Ge-
nuenses duas & viginti triremes raptim armatas mi-
serunt, Lanfranco Pignatario præfecto, (Pignata-
rii Imperiales postea facti sunt) non sine operæ
pretio. Pignatarius enim, classē hostili non in-
venta, cum audisset eam in sua se recepisse, cur-
sum in Siciliam dirigit; atque in portu Drepani-
tano nonnullas naves capit: idem facit in portu
Messanenſi, magno numero navium ibi quoque
capto: adeoque nomen suum Pignatarius toti Si-
ciliæ ac circumjacentis insulis & regionibus terribi-
le fecit; ut nemo sese aperto mari committere au-
deret: inde Neapolim petit; qua in urbe tum ipse
Rex confederat: vexilloque Genuensis populi ere-
cto, littus legens Gallica insignia lacera ante ipsos
oculos inspectantis Regis per undas traxit: Ge-
nuamque reversus omnem navium & hominum
prædam Capitaneis tradidit; à quibus captivi tri-
dui spatio dimissi sunt.

At terra Anfaldus Lusius Spinula ad arcem Men-
tonum expugnandam à Capitaneis missus, à Sini-
scalco Provinciæ Narbonensis fines Genuenses in-
festis copiis ingressō retro repulsus est; complu-
ribus ex suis ex lassitudine itineris & calore æsti-
vo amissis. Ad acceptam ignominiam delendam,
resque Genuenses in ora Occidentali tutandas,
missus est terra Nicolaus Auria Capitanei frater
cum pedestribus copiis: ipse Ubertus Capitaneus
classem ducendam accepit; qui ex itinere revo-
catus est nuncio accepto, prævalidam Regis clas-
sem quadraginta triremium haud procul ab ostio
portus tamquam urbem obsidentem stare: iti-
nere igitur raptim retro repetito, Ubertus por-
tum clam hoste ingressus faucibus insecutis, regis
classem opposuit. At regii de successu desperantes,
silentio noctis solvantes, Orientem petentes, in
itinere insula portus Veneris capta & incensa, in
sua reversi sunt. Non prophanis modo, sed sac-
ris quoque armis eo anno civitas petita est: cum
Gregorius Pontifex sacris populo interdixisset, ab
Othobono Flisco Cardinale instigatus, conqueren-
te, Genuenses nonnulla prædia sacerdotiorum suo-
rum invasisse.

A.C. Anno ejus sæculi septuagesimo sexto, (nam quin-
1275. ctus nulla re domi forisve gesta silentio præter-
1276. eundus est) quorum annorum Prætor fuit Simon
ab Ancona; in demortui Gregorii Pontificis locum
suffectus est Innocentius quintus, Burgundus pa-
tria, animo in nationem Genuensem mirifice pro-
pensus. Huic cura omnium antiquissima fuit Ge-
nuensium animos inter se dissidentes pacare: pa-
cemque inter illos & Neapolitanum Regem conci-
liare: quam rem, assidue monendo, hortando,
castigando, precibus consilia miscendo, tandem
asssecutus est; Genuensium Oratoribus ad se vo-
catis; qui fuerunt Joannes Ugolinus Jurisconsultus,
Guido Spinula, Babilanus Auria, Lanfrancus Pi-
gnatarius: paxque cum Rege composita est; Gri-
maldis, & Fliscis, illorumque partes sequentibus,
exsulibusque omnibus patriæ & bonis suis restitutis.

Innocentio quinto mortuo, cum non plus sex
menses in pontificatu fuisset, Othobonus Fliscus
Cardinalis, Innocentii IV. celebris nominis Ponti-
ficis fratris filius, successit: qui Hadrianus quintus
vocatus est: neque dubitatur, quin expectatio-
ni ingenti de ipso à claris virtutibus excitatæ re-

A sponsurus fuerit; ni subita mors illum trigesimo
quinto pontificatus die ex humanis sustulisset: pri-
mum atque unum omnino ab illo editum est in Ge-
nuam patriam meritum, atque egregium mitis
animi specimen; interdicto, quo Pontifex, ipso-
met Othobono agente, Genuensem nationem sa-
cris arcuerat, abrogato.

B Hoc anno ab ea parte molis, quæ ædi divi Mar-
ci continuatur, tuta navibus statio ædificari cœ-
pta est. Eo quoque anno Respublica Ligusticis
opidis Vezano, Carpena, Infula, Vesigna, Ma-
lora, Spedia, Tivenia, Volastra, Montenigro,
Amelia, Castilione, Zignaculo, Ripalta au-
cta est, de Nicolao Flisco uno ex Lavanæ Co-
mitibus emptis: quod idem continuatum est se-
quenti anno, quo Prætor fuit Rogerius Guidobon-
dius Parmensis; dimidio opido Vuada de Thoma
Marchione Malaspina, ac plus dimidia parte Vara-
ginis de Thoma Ponzono emptis.

C Turbari iterum cœptæ sunt res, compluribus ex
gente Flisca & Grimalda in exulium actis, rerum
novandarum insinulatis. Cum Pisanis quoque
novæ contentiones Constantinopoli ortæ; ut ani-
mos hereditariis ac perpetuis odiis exulceratos quæ-
vis levis causâ facile inter se committebat: ea de
causâ Pisana triremis Euxinum ingressa est, ad
detrimenta negotiatoribus Genuensibus inferenda:
re cognita, Genuenses, qui Peram incolebant,
triremi à gente Bacheria Genuensi commodata,
extemplo armata, ipsi quoque portum ingrediun-
tur: Pisanamque ad Soldacam urbem adepti, sub
ipsos opidanorum oculos prælium committunt: in
quo victores Genuenses, Pisanis cum parte rerum
suarum dimissis, captam navim incenderunt.

D Res insequenti anno ejus sæculi septuagesimo octavo,
quo Rogerio prætura continuata est, in antiqua
mala redactæ sunt; Grimaldis & Fliscis,
illorumque clientibus exsulibus haud quiescenti-
bus: qui, Alberto Flisco Hadriani mortui fratre
duce & auctore, societate armorum ac fodere
cum Morruello Malaspina & fratribus, populi Ge-
nuensis fiduciariis icto, in regimen civitatis con-
spirarunt; ac, mille ducentis peditibus, trecentis-
que equitibus coactis, fines Genuenses hostiliter
ingressi, à nullaque belli clade abstinentes, opidum
Clavarum captum diripiunt. Adversus eos copias
urbanas duxit idem, qui semper, Ubertus Auria
alter ex Capitaneis: quem exules non expectan-
dum rati, Clavaro, quod octo dies tenuerant, reli-
cto, fines Genuenses egressi, se in vallem Trebbiæ
recipiunt. Bellum persequens Auria, ac porro ire
pergens, opido Arculæ ditionis Morruelli Mala-
spinae copias admovet: cujus opidi fatis muniti ex-
pugnatio cum non primi impetus esset; haud operæ
pretium ratus Auria, sese diutius à patria absentem
à tam levi causâ retineri, Emanuele Nigro obli-
dioni præfecto, à quo brevi expugnatum est, Ge-
nuam revertitur.

E Per idem tempus Albertus, Manfredus, Franci-
scus Marchiones Malaspinae Genuam venerunt, in-
jurias sibi à Morruello impositas exposulatum. Per
multas disputationes res eo deducta est, ut illi præ-
tio accepto, jure suo in opido Arcula Reipublicæ
cederent: quo eodem tempore Mirbelli Domini,
præpotentem vicinum populum beneficio suo de-
mereri studentes, dimidium vici Lelmæ donò
Reipublicæ dederunt.

F Eo anno Carolus Princeps Tarentinus, Caroli
Regis filius, Provinciam Narbon. petens, Ge-
nuam cum sex triremibus venit: cui lautia ampla
præbita sunt; splendidaque insuper addita munera.
Ingenti ac tetra aquarum diluvie hoc anno multæ ci-
vitatatis partes foedatæ sunt; muris urbis multis in
locis, ac portis stratis, fundamentisque turrium
convulsis.

Nihil

Nihil memorabile habet insequens annus ejus sæculi septuagesimus nonus, quo Prætor fuit Gulielmus Brunus Hastensis; præter nonnullas partes opidi Montalti de Conrado Marchione Montalti emptas. Insequenti anno, Cavalcabo Medicio Papiensi Prætor, semina futurorum bellorum cum Venetis erumpere cœperunt: quorum tres triremes, fide induciarum violata, totidem Genuenses triremes magni pretii mercibus onustas nihil tale suspicantes, ad Cephalenias adortæ sunt: ceterum prava incepta in auctorum caput reciderunt: prælio enim ad Peloponnesi littora tria passuum millia prope ab urbe Clarentia commisso victores Genuenses fuerunt, II. ex Venetis navibus captis: qui victoriam ingenti mansuetudinis & moderationis edito documento clariorem fecerunt. Venetos enim captos multum prius increpitos, quod fidem induciarum fregissent, liberos dimiserunt. Idem exitus alterius pugnae fuit, inter eundem utriusque nationis triremium numerum, ad Siciliæ littora commissa: ad quam pugnam Genuenses à Venetis invadentibus invitati ac retractantes, fidemque foederum infringi testantes, attracti sunt. Eadem clementia adversus victos usi sunt; quos omnes dimiserunt, ad amicum & pacatum animum testandum; præfecto tantummodo, trierarchis, & gubernatoribus retentis: quos tamen eosdem præfecto nationis Venetæ in urbe Messanæ sedes ac domicilium habenti donarunt; quos ad Ducem Venetias transmitteret, ob admissum crimen, puniendos.

Nihil aliud memoratu dignum habet insequens annus ejus sæculi octogesimus unus, quo Michael Salvaticus ex opido Valentia Prætor fuit, præter contentionem cum Pontificio Legato exortam, cum ille sacris populo Genuensi interdixisset; quod ab illo extra ditionem Genuensem, ad causam dicendam adversus exsulum accusationes, evocati non paruisent: Genuensesque diploma Innocentii quarti proferrent, quo disertis verbis Legati Pontificii prohibentur Genuensi populo sacris interdiceret Pontificis injussu, illove inconsulto: contemptum est igitur à Genuensibus haud rite latum judicium, de Theologorum sententia. Eo quoque anno Gulielmo Marchioni Montisferacis ditionem suam ex citeriore Hispania cum duabus Genuensibus triremibus illi publice commodatis repetenti, lautia ample præstita sunt, ac viaticum insuper datum.

Pisanorum & Genuensium inexpressibilia inter se odia numquam animo deposita; sed vel satietate cladum ac tædio laborum consopita, vel pace numquam inter tam infensos animos ac perpetuis injuriis efferratos fida ac stabili; ad tempus intermissa, perque omnes levissimas occasiones resumpta, majore quam antea mole hoc anno millesimo ducentesimo octogesimo altero in internecinum bellum eruperunt: quod majoribus, quam umquam aliâs, cladibus per quinquennium gestum, opes Pisanorum multitudine superiorum cladum assectas ita attrivit; ut, quidquid floris, quidquid roboris habuit, detracto, enervata civitas numquam pristinas vires recuperavit; sed assiduis damnis deinceps imminuta, (nam ne postrema quidem clade animis infracti retineri potuerunt, quo minus toties infeliter experta retractarent arma) cum viribus suis stare non posset, libertate amissa, in alienum venerit imperium. Hoc bellum Pisani Genuensibus longe alias res agentibus occultis consiliis diu machinati sunt: quos suis ipsos opibus oppugnari adorti, Corforum animos tentarunt, gentis ingenio inquietæ ac novandarum rerum perpetuo cupidæ, omnique aura spei objecta ad defectionem paratæ: facile igitur fuit Judicem à Ginerca virum magnæ in ea insula potentia, magnarumque clientelarum, ac complurium opidorum dominatu fultum

(quamquam ipse illiusque Majores honoribus & opibus à Genuensibus sæpe auctus fuisset) ingentibus promissis oneratum, ac spe majorum opum, latiusque proferendi dominatus inductum, ad deficiendum à veteribus Dominis, ac bene de gente sua meritis impellere. Hoc viro in suas partes ducto, cujus auctoritatem reliquam Corsicam secuturam sperarent; Pisani non jam cunctandum rati, bellum orsi sunt; idque à parvis initiis: nam triremis Gulielmi à Mari Genuensis, quæ Carolo Andegavensi adversus Aragonenses operam navaverat, defensoribus vacua, qui fere in prælio ceciderant, cum è clade ab Aragonensibus accepta evasisset, hominibus decem octo tantummodo superstitibus, à duobus Pisanorum navigiis in Bajanis littoribus capta Pisas cum præfecto & reliquis ducta est.

Eodemque tempore Judex à Ginerca in Corsica defecit: compluribusque corrogatis atque armatis hominibus, quos partim illius auctoritas, partim suum ipsorum ingenium ac rapinarum spes ad res miscendas attraxit, Genuenses Bonifacii incolas vexare cœpit; in quorum finibus arcem communivit latronum receptaculum. Ex ea incursionibus ac latrocinis totam circumjectam regionem infestam facere; nemini, ne extero quidem, ad insulam accedenti parcere; sed undique prædas agere: qui, cum à Genuensibus monitus injuriarum finem non faceret, neque de damnis satisfaceret: Genuæ confestim quattuor triremes armatae sunt: quæ ducentos equites ac quingentos pedites, quorum trecenti hastati fuerunt, ducenti scorpionibus armati, veherent: quibus tam navalibus quam terrestribus copiis præfecti sunt Franciscus Camilla & Nicolaus Petratius: qui in terram egressi, Bonifacianis sibi adjunctis, primo adventu munimentum à Ginerccio excitatum expugnant, ipsumque congregi ausum fundunt ac fugant. Ille Aleriam se recipit, inde Pisas confert, atque in Pisanorum fidem & ditionem tradit; in illorumque imperia jurat; Palmerio Mignardo Jurisconsulto ea de causa Genuensibus Pisas misso nequidquam reclamante; Deumque atque homines testante, jus aperte violari in Ginerccio veteri Genuensium imperio subjuncto perpetuoque ipsius & illius Majorum jurejurando obedientia obstricto, tum autem ex insula ob apertam defectionem ac manifesta maleficia & latrocinia exacto in fidem accipiendo. Cujus oratione Pisani sprete, in fidem Ginercium acceptum pedestribus & equestribus copiis armant: cum interea Camilla & Petratius in Corsica Tallam, Istriam, Ornanum, Roccam vallis, Contendolum castella expugnassent; totamque Ginericii ditionem octo & triginta dierum spatio in potestatem redegressi. At Genuenses, hujus belli causa, tres & viginti triremes, atque octo pamphilos, (quod navigii genus ipsum quoque centum quinquaginta remis agebatur) armant; Nicolaumque Spinulam classi præficiunt. Tam in hoc bello gerendo, quod magnæ molis fore animo providebatur, quam in ceteris, quæ hoc ipsum bellum antecesserunt, & consecuta sunt, Capitanei munera inter se ita partiti fuerant; ut Spinula, qui opibus excellerebat, quique gratia & auctoritate apud plebem plurimum poterat, ad res urbanas regendas, quod in novo dominatu in primis necessarium videbatur, domi subsideret: Auria, cujus virtus, ac rerum bellicarum & navalium scientia, jam inde à prima adolescentia, assiduo illarum usu & tractatione parta spectata erat, in expeditiones majorum conatuum exiret: sic fore, ut Respublica & domi pacate, & militiæ fortiter ac feliciter administraretur. Ipse igitur Ubertus Auria classem Nicolao Spinulae commissam conscendit,

non ut quidquam de jure Spinulæ in imperando detraheret; sed ut, si facultas pacis componendæ aliqua daretur, cujus Genuenses percupidi erant, ipse, pro summi imperii potestate, populi nomine rem transigeret. Classis quarto Idus Augusti cum e portu solvisset, atque usque eo processisset, unde in conspectu insulam Meloriam habuit; hostilisque classis, quæ fuit triginta triremes, ac magna vis minorum onerariarum armatis refertarum, obviam exisset; causâ visâ non est Nicolao præfecto, cur classem in disparem Martis aleam daret: quare majori numero cessit, seque in altum subduxit: jactisque ancoris, conatus hostium speculabundus expectat: qui satis habentes classem Genuensem arcuisset, nulla re tentata, non ultra Meloriam processerunt: Spinulaque itinere retro repetito in portum Lunensem se recepit: vindemiisque appetentibus, cum voluntariam militiam sine stipendio professi non facile retinerentur; remigium demissum est, ac classis subducta. Idem fecerunt copiæ in Corsicam missæ; quæ peracto stipendio, locis captis præsidio firmatis, domum reversæ sunt: quare facile fuit Ginercio in Corsicam reverso cum centum & viginti equitibus ac ducentis peditibus à Pisanis acceptis, atque ab illorum navibus vectis, loca à Genuensibus paullo ante capta recuperare: at Pisani neminem sibi obstaturum rati, remigio & copiis à Genuensibus dimissis; cum viginti duabus triremibus, quarum præfectus fuit Ginicellus Sigismundus, cursu proprio portum Veneris contendunt: exscensioneque facta insulam vastant; cum ne sacræ quidem ædi parcerent, ex qua tintinnabulum abtulerunt: quo nuncio Genuenses commoti, classem mox deductam instruere incipiunt. Pisani, re cognita, nullamque esse causam cur Genuenses expectarent rati, classe illico conscensa retro iter vertunt: quos Motronem prætervehentes atrox tempestas adorta maximam navium partem in terram ejecit littori illisam, magno mortalium numero absumpto.

His initiis bello commisso, quod atrocissimum fuit omnium, quæ inter duos hos præpotentes populos, ac maximis rebus gestis claros, unquam gesta sunt: Genuenses majore mole majorque consilio sibi hoc bellum capeiendum statuentes, Magistratum quindecimviralem creant; cui à consilio civitatis & à Capitaneis amplissima omnium rerum potestas mandata est: hi quæcumque ad inchoatum bellum pertinerent magna cum cura & diligentia providere & expedire instituunt: edictoquo proposito, navibus omnibus privatorum facultate discedendi negotiationis causâ ante Kalendas Augusti interdiciunt; ut eas Respublica præsto haberet, si quis forte ad bellum earum usus esset: nihilque eorum, quæ leviora viderentur, negligendum rati; vetant in posterum quemquam, qui minori decem triremium numero præsit, Halmiratem vocari, aut vexillum divi Georgii imagine insigne gestare: atque ut omnia justa fierent, Matthæus Canis cum triremi in Corsicam & Sardiniam mittitur; qui bellum Pisanis commissum tota utraque insula pronunciet: cumque publice magna esset alveorum penuria, quorum magnam copiam privati cives habebant, ad privatorum commerciorum usum à singulis paratorum; ut quidem ne ex hac parte Respublica laboraret, carinis positis, centum viginti alveos triremium ædificare instituunt, quinquaginta ad ipsam urbem in proximo littore, reliquos tota ora Liguriæ, quantum fines Genuenses patebant: materiam eorum, qui ad urbem ædificabantur, è sylva montis Ursalis ditionis Pereti accersita est: quam cæsam Thomas Marchio Ponsoni corrumpi jussam, exportari passus non est: quam injuriam Genuenses majoribus curis distenti in præsentia dissimulare coacti sunt; aliaque materia in sylva Bajardi, li-

gnatoribus confestim eo missis, cæsa est. Quibus rebus Pisani ex speculatoribus, quos publice Genuæ habebant, cognitis, ne ulla in re Genuensibus cedere viderentur, totidem ipsi quoque alveos imponunt: nam per ea tempora uterque populus, nullam alter ab altero timoris significationem daret, magnificum sibi reputans potius aperta vi, ac cum denunciatione terroris, quam per insidias aut occulta consilia bellum gerere, raro ac numquam audito exemplo, scribam alter ab altero cum quatuor speculatoribus publice missum mutuo in suam urbem recipiebat; qui certa & explorata de consiliis & conatibus hostilibus ad suos perscriberet: qui mos cum aliquamdiu durasset, sub hoc inchoatum bellum solutus est; scribaque & exploratores dimissi; initio à Pisanis facto.

Sub finem hujus anni, Pisana classis septem triremium quatuor Genuensium triremes, quarum præfectus fuit Gulielmus Ferrarius, nacta è Corsica redeunt, quo supplementum sagittariorum vexerant, sese in illas concitat: quæ cedentes beneficio secundi flantis venti pesti se eripuerunt: à quibus insequendis cum reverterentur Pisanæ naves, quatuor earum in sinu Nebienfi ab adversa tempestate demersæ sunt. Dum bellum utrumque magna ope paratur; non tamen interea ab armis omnino otium erat: sed uterque populus exiguis navium agminibus partim publice emissis, partim privatae negotiationis causâ ultro citroque commeantibus, mutuis ac parvis damnis inter se carpebant, levibusque præliis per varias occasiones, quibuscunque in locis illos inter se obvios casus fecisset, contendebant.

Nos minutiora hæc, qui & legentibus fastidio sint, & sine ullo operæ pretio narrentur, omitemus, cum majora satis & operam nostram & legentium animos occupent: initio igitur insequentis anni ejus sæculi octogesimi tertii Genuenses, ut patet à Pisanis referrent, Sardorumque arma in illos vertebant, compluribus ejus insulæ primoribus spe præmiorum & veteris imperii tædio in suas partes tractis, classem unius & viginti triremium bellatoribus refertam, in quibus fuit Emanuel Malaspina ab ipsis in amicitiam acceptus, atque honorifico stipendio conductus cum quinquaginta equitibus è ditione sua adductis, in Sardiniam miserunt, sub Petro Arcanto & Caccianimico à Volta præfectis, ad res in ea insula seditionibus & tumultibus miscendas: quæ classis cum insulam tenuisset, maxima detrimenta Sardis, qui in partibus Pisanorum erant, terra & mari intulit: at ex altera parte Pisani non minus impigre aut segnius bellum gerentes, per eadem tempora classem sexdecim triremium, Roscio Buzacharino præfecto, in Corsicam mittunt: quæ exscensione in terram facta, copiis Ginercii sibi adjunctis, circumjectam regionem sanctæ Mansæ vocatam haud exiguis cladibus vastarunt: sed longe pluris Genuæ æstimata est decoris jactura: cum Idefius Mallonius & Montanarus Squarciaficus novem triremium præfecti, adversus totidem Pisanas missi, quæ delectam bellatorum manum in Corsicam adversus Genuensibus vexerant, mandatis non observatis, ac remane gestis ignominie pleni Genuam revertissent: quare Genuenses damnorum & ignominie dolore incensi, è vestigio classem quatuor & triginta triremium, quarum sex tantummodo stipendio mercant, reliquæ voluntariæ fuerunt, omnibus rebus necessariis instructam, atque haud exigua armatorum manu ætate & viribus florente firmatam, è portu emittunt; cui præfectus est Thomas Spinula: qui cum celeri navigatione Planasiam ditionis Pisanæ insulam tenuisset, primo adventu suburbia occupat; turrinque demolitur, ac centum quinquaginta mortales capit: qui

quibus rebus confectis, cum Sardiniam petere decrevisset, ut expeditius navigaret, captivos ac faucios Genuenses cum tredecim triremibus Genuam remittit: qua re cognita, Pisani continuo ipsi quoque praevalidam classem quattuor & quinquaginta triremium omnibus rebus instructam, Adreotto Saraceno praefecto, adversus Genuenses mittunt: quae, classe Genuensi ad Planasiam non inventa, in Sardiniam cursum dirigit: Genuensique classe nusquam obvia facta, ne frustra omnino in ea loca venisse videretur, cum insulam tenuisset, copiis in terram expositis, Algerium Castellum privati dominatus nonnullorum Genuensium civium aggreditur: quod aliquot dierum obsidione circumfessum in deditionem accipiunt certis pactis, quorum fides observata non est.

Interea Spinula, qui, Pisanis obsidione Algerii distentis, liberum excursus toto circumjecto mari habebat, agmen Pisanarum triremium atque onerariarum opulentis mercibus plenarum, cum forte in illum incidissent, non incruenta victoria cepit: qui tanta praeda ditatus certior factus de classe hostili tanto sibi superiore Algerium obsidente, intelligens se cum ingenti publico periculo tam potenti classe propinqua in illis locis esse, iter retro repetens Genuam contendit, Gulielmo Ficomatario cum quattuor expeditis triremibus relicto, qui Pisanorum littora excursionibus, direptionibus, incendiis, ac quibuscumque posset cladibus belli, infesta faceret: qui, vexillis cum insignibus Pisanis erectis, per eam simulationem portum Pisanum ingressus, navim deprehensam cum viginti hominibus, in quibus duo fuerunt Senatorii ordinis, capit; captamque ac captivos Genuam ducit: at Spinula decimo Kalendas Julias incolumis cum omnibus navibus ipsi commissis apulit, Reipublicaeque noningenta ac triginta mortalium capita in navibus Pisanis capta, ac viginti octo millia marcarum argenti tradidit: quae res magno solatio civitati fuit; majoribus damnis hosti redditis, quam superiore anno ab illo acceptis. Ex ea praeda decem marcarum millia inchoatae interioris portus aedificationi decreta sunt: ceterum, ne ulla in re hostibus cessisse viderentur, neve illorum animi inflarentur, quod, Genuensibus sedentibus nec opem ferre audentibus, opidum Algerium oppugnassent; totidem quot Pisani triremes è vestigio armant, omnes voluntariam operam navantes, praeter quattuor stipendio merentes: quibus Halmiras praefectus est Conradus Auria Urberti Capitanei filius: hanc classem omnes aetate & virium robore florentes ex omnibus civitatis ordinibus conscenderunt, omni versicolorum vestium ex serico & auro opulentia insignes: quae ad quintum Kalendas Julias è portu solvens iter in portum Pisanum intendit: cumque ad Meloriam aliquot dies in ancoris fuisset, turrinque expugnatam demolita esset, nuncio accepto, classem Pisanorum è Sardinia reversam in portum, qui vulgo *Falesi* vocatur, ad Plumbinum se recepisse, contendit: ceterum ostium portus ingentibus mobilibus à Pisanis obstructum offendit: ut nullo modo penetrare Genuenses possent, ac manum cum hoste obfesso conferere. Dum in ea obsidione est Conradus, quindecim Pisanorum triremes, quae in clade paucis ante diebus à Spinula accepta fuga se pesti subtraxerant, & in portum Callaritanum receperant, classem Genuensium, atque eorum, quae ad Plumbinum gererentur, ignaræ, in alto apparuerunt, eo tendentes: quas conspicatus Conradus, viginti duabus triremibus ad fauces portus relictis, ipse citatum agmen triginta duarum triremium in advenientes hostiles naves rapit: quae classem Genuensem in se tendentem à longe conspicatæ, agmine retro verso trepidantes fugam effusam capiunt;

A Genuensibus eas insequentibus: at hostes validi venti ac sibi secundi forte exorti beneficio è manibus Genuensium evaserunt, quattuor tantummodo à Genuensibus captis: reliquæ undecim in terram se ejecerunt, non sine magna hominum & rerum suarum jactura: at classem Genuensem, cum aquae penuria laboraret, simul multitudine captivorum praegravante, omittere in praesentia obsidionem coacta ad ostium Arni fluvii iter dirigit; eo consilio, ut aquatione facta, captivisque Genuam missis, exonerata obsidionem Falesii illico repeteret: ceterum sub vesperum acerrimo orto Euro, nequidquam contra tendens in portum Lunensem compulsa est: in quo, nihil de saevitia remittente vento, quatrimum fuit: tempusque interea datum est Pisanæ classi è portu Falesio erumpendi, ac sese sine ullo tumultu intra septa portus Pisanus praevalidæ ac magnæ crassitudinis ferrea catena communiti recipiendi: qua re cognita, Conradus nullam esse jam causam intelligens, cur, hoste pugnam detrectante, atque in tuta subducto, in spem irritam tereret tempus, Genuam repetit; ac Reipublicae quinque & nonaginta Pisanorum capita tradit.

B Ferores utriusque inclyti populi animi cum perpetuis & inexpiabilibus odiis accensi, tum ardore continentium certaminum irritati, nullo belli tædio capiebantur, nullisque cladibus ab armis toties per variam fortunam tractatis & depositis, mox resumendis, deterrebantur, quippe quos non magis mutuae injuriæ, earumque rerum cupiditas, quæ in arma agere mortales solent, quam veteris decoris æmulatio utrumque populum stimulare: nihil igitur Pisanorum inquieta ingenia tot eo anno exhaustis laboribus debilitata, eodem anno, aestate nondum exacta, quattuor & sexaginta triremes armant; quibus praefectus est Roscius Buzacharinus à clara gente Sigismundorum: virique tumidi & elati ingenii contemptim de Genuensibus loquentes, sese cum ea classe non modo oram omnem Ligusticam incursionibus & ceteris belli cladibus pervastaturos jactabant, sed ipsas portus Genuensis fauces infesturos: globosque purpurea fascia involutos per Genuensium contumeliam in ipsam urbem jactaturos: igitur solvantes in oram Liguriae iter dirigunt: portum Lunensem ingressi fines opidi portus Veneris ac circumjectam regionem vexare incipiunt, sed valida impressione opidanorum magna cum audacia erumpentium retro in naves compulsi sunt; circiter trecentis de suis amissis: at Genuenses audacia & arrogantia hostis toties victi commoti, iraque & indignatione ardentes, tantum certaminis animis imbibierunt, ut nihil de summa contentione remittentes, nocturnum opus ad diurnum addentes, tridui spatio septuaginta triremes armarint; omnibusque armamentis ac necessariis bellicis apparatusibus instruxerint: quam Urbertus ipse Auria alter ex Capitaneis in hostem ducendam suscipit; è portuque illico solvens ad hostem contendit: qui Genuensi classe ad se tendente in alto conspecta, sublati ancoris protinus iter retro convertit; seque trepida fuga in sua recipit: ita tanti conatus, nulla re gesta aut tentata, & effectu irriti, & tractu brevissimi evaserunt: Genuensesque fugati hostis decore exultantes, itinere retro repetito, portum Genuensem ostantes ingrediuntur: vindemiisque appetentibus, ac tempore gerendarum rerum exacto, remigio ac focus navalibus omnibusque militatibus ad privatas res suas visendas commectus datus est: navesque, quibus navigatione ad eam diem interdictum fuerat, ad privata commercia obeunda dimissæ: quodque anni reliquum fuit, quies à bellicis & ab expeditionibus fuit: cum eo anno si quis diligenter rationem subducatur, inveniet, ducentas

triremes è portu Genuensi emissas : sunt qui tradant hoc anno opus immensæ molis inchoatum, quod à continente in altum procurrens portum facit ; navibusque ab impetu aperti maris objectu suo tutam stationem præbet, opus inter cetera Italica admirabili structura sua in primis visendum : cujus fundamenta solidæ crassitudinis, quanta totius structuræ est latitudo, scopuli sunt vastæ magnitudinis ex montium visceribus eruti, perque multos annos difficilibus ac laboriosis subvectionibus eo congesti, & in immensam altitudinem coacervati, ac deinde impetu fluctuum multorum annorum spatio velut solida structura inter se compacti : structura, quæ ab undis exstat, solidæ crassitudinis ex saxo quadrato tota est ; cujus radices ab interiore parte humiliore alia structura marginantur ; ad merces expositas commodius excipendas : exterius latus eadem vastorum scopulorum congerie ab undis exstante ab impetu fluctuum communitur : qua infracti nullo ruinæ periculo structuram quatiant, aliter haud dubie ruituram : cujus operis architectum fuisse Marinum Buccanigram ferunt.

A. C. 1284. Sequitur annus millesimus ducentessimus octogesimus quartus ; quo nullus umquam per omnia tempora, quibus cum Pisanis bellatum est, memorabilior fuit, aut clariore victoria insignior : ad quam scribendam etsi properat animus, non tamen minores res omittendæ sunt ; quæ plurimæ eo anno ac variæ perque varias occasiones publice ac privatim gestæ sunt : ad littora igitur urbis Neapolis navis Genuensis Joannis Coronati à duabus privatis triremibus Zoni Scornazani Pisani capta est : cui haud diu ea præda læta fuit, iisdem triremibus à quinque Genuensibus triremibus, quæ in Orientem privatæ negotiationis causa iter habebant, captis : per idemque tempus Matthæus Pactius ipse quoque Pisanus civis, cupiditate fratris ulciscendi, in pugna ad portum Falesii à Genuensibus cæsi, duas triremes ac myoparonem armarat, qui ad Sagonarias cum duabus taridis Genuensibus (cæ tum erant majoris formæ triremes, quas nunc *galeatas* appellamus) prælio commisso, tandem in fugam versus est : quæ facinora Genuæ ita accepta fuerunt ; ut homines, qui tam in taridis, quam in quinque superioribus navibus dimicarent, immunitate tributorum, ac nonnullorum aliorum onerum sint donati : captaque est à Pisanis navis quædam opidanorum portus Veneris : quod damnum illis est redditum à Vinciguerra Zacharia Genuensi cive ; navi Pisana ad promontorium Sacrum, quod *Corsum* nunc appellatur, capta, ac Genuam attracta. Cumque Pisani audissent, quinque triremes Genuæ privatim à quinque civibus sigillatim armatas ; Lamba Auria viro in navalibus rebus magni nominis, Benedicto Zacharia, Montanario Marino, Antonio Vfusmario, Andreolo Fallamonica : quæ magnam vim mercium magni pretii ac ditium mercatorum in Orientem vherent ; cupiditate tam optimæ prædæ, quattuor & triginta triremibus mox deductis, quarum præfectus fuit Joannes Cavalca è nobile gente Cajetanorum, è portu exeuntes, naves Genuenses perquirere instituunt : quibus numquam repertis, ne frustra omnino exiisse viderentur, Corsicam petunt : arceque Calvi irritò incepto tentata, discedunt : certioresque pro re comperta facti, classem, quæ è portu Genuensi exierat, quam ducebat Henricus à Mari præfectus, ut præsidio esset quinque opulentis navibus, quas diximus, quæque ad insulam Talariam navem Venetam Pisanorum mercibus onustam ceperat, non plus esse omnino viginti duas triremes ; decem ex suis navibus à se dimissis, ac quattuor & viginti, quas retinuerunt, flore & ro-

A bore virorum, quod ex dimissis omne detractum est, firmatis, Duce Petro Vercio, classem Genuensem quærere instituunt ; quam ad insulam Sardiniam adepti sunt. Enimvero Genuenses hostem in se venientem conspicati, capta navi Veneta incensa, ne impedimento pugnantibus esset, certamen non detrectantes ad pugnam se expediunt : classesque proximæ factæ magno impetu ingentibusque utrimque armis sese mutuo invadunt : pugnatum est diu & acriter, ut inter tam infensos animos : sub vesperum Pisani tandem averfi sunt, novem navibus amissis : quarum una à Genuensibus victoribus demersa, reliquæ octo captæ sunt ; initio capiendi à Lamba Auria facto, qui singulari certamine cum una ex Pisanis congressus eam tandem cepit, ac post eam aliam : quod idem fecit Antonius Ufusmarius : reliquæ, quæ superfuerunt, beneficio se intendentium tenebrarum evaserunt. Igitur præfectus, militibus & sociis navalibus aliquot dierum quiete à præteritis laboribus refectis, quæ merces & mercatores in Orientem vehabant, periculo ac metu liberis, inceptum iter in destinata loca persequi jussis, ipse Genuam repetit : ovanisque ac gloriæ plenus cum captivis navibus, civitate ad spectaculum effusa, portum ingreditur, magnumque captivorum numerum Reipublicæ tradit.

C At Pisani ob cladem acceptam mœsti ; ex eaque intelligentes rem Pisanam militum robore & fortitudine, ad hoc copiis navalibus & viribus Genuensi parem ; ab ea parte, cujus semper maxima in bellis momenta fuerint, hoc est à Ducibus claudicare ; longèque suos Duces scientia rerum bellicarum ac virtute & consilio à Genuensibus superari ; ad pudendum ceterum necessarium descendere consilium, ut extero homini, in quo animus par esset muneri mandato, sese ac res suas omnes tam urbanas quam bellicas regendas committerent : is fuit Albertus Maurocenus Venetus, magnæ inter Venetos auctoritatis, magnarumque opum vir, ad hoc factis clarus : quem tanto honore delato accersunt Pisani fama virtutis & consilii rerumque militarium scientiæ inducti : illam etiam tacita suberat spes, occasionem eam fore præpotentem ac formidolosi nominis urbem Venetias Genuensi bello illigandi : qua tanta nova super addita mole oneratos Genuenses ruere illico necesse esset : magna enim erat Venetiis Alberti auctoritas, & potentia ; cum suis ipsius opibus fulti, tum artæ affinitatis necessitudine cum Duce Venetorum subnisi. Erat autem illis temporibus longe major, quam nunc, Venetorum Ducum potentia, liberiusque imperium : qui nunc novarum aliarum super alias additarum legum, in quas Duces in magistratu ineundo jurare adiguntur, novorumque aliorum super alios coacervatorum magistratuum vinculis constricti nudum fere titulum imperii habent, honoris & insignium speciem retinentes ; cum re nihil aliud fere sint, quam caput consilii publici.

F Perhonorificis & amplis conditionibus acceptis Maurocenus Pisas venit, magnis plausibus & acclamationibus à cunctis ordinibus obviam effusus exceptus : cui in magistratu & in imperio posito mandant, ut nullis impendiis parcens, quam acerrimo bello Genuenses, ubicumque potestas data fuerit, persequatur : ille impigre in mandatum munus incumbens, carinis positus, alveos viginti majoris formæ triremium ædificari jubet : at Genuenses triginta triremes sine stipendio militantes raptim deductas & armatas Benedicto Zacharia præfecto in hostes emittunt : qui, cum littora Etruriæ tenuisset, atque aliquot dies portus Pisani fauces infedisset, nemine adversus se prodeunte ; ne tempus gerendarum rerum inane abiret, sublati

ancoris in Sardiniam cursum dirigit; eo consilio, ut copiis, quas Genuenses in ea insula habebant, sibi adjunctis, omni ope urbem Tunitanam, quam *Sassarum* nunc vocamus, oppugnaret. Catalano- rum navi in sinu Callaritano capta, in Tizanem portum insulae Corsicae se recepit; ibique, quae ad destinatam oppugnationem pertinerent, sedulo instruere coepit: at Pisani rati Genuam sese, tanta parte virium à classe abstracta, defensoribus exinanitam offensuros, ac propterea, si eo omnibus civitatis suae integris viribus accessissent, occasionem magnae alicujus rei haud desperandam, omnibus viribus conmissi classem ingentem septuaginta duarum triremium parant: quam omni bellico apparatu ac nautico armamento instructam, omnique telorum ac machinarum genere refer- tam, omni etiam opulentia insignium armorum ac vestium ornarunt; magna vi argentearum sagittarum ac globorum purpurea fascia velatorum, quos feliciore eventu quam superiore anno arro- ganti superbia sese in ipsum Genuae portum con- vecturos jactabant, in naves imposita, classem conscenderunt. Maurocenus ipse Praetor, Lot- tus Gherardescus Ugolini Comitis filius, Ansel- mus Comes, maxima Senatorum pars, omnisque fere Nobilitatis atque urbanae juventutis flos; quin etiam quidquid roboris in finibus Pisanis, diligenti delectu habito, repertum est, tamquam dimicatione ultima de summa Republica ac de possessione maritimi imperii decreturi: quo appa- ratu cognito, è vestigio Genuenses Zachariam re- vocant: qui mandato accepto consilium Sassarum petendae omittere in praesentia coactus itineri se illico dat.

Interea Pisani omnibus rebus paratis & instru- ctis solvunt; ac Genuam contendunt: quo cum pervenissent, ab ostio portus, nemine prohiben- te, sagittas ac globos, quos diximus, in urbem scorpionibus ac machinis allatis contorquent, pro- bra ingerentes, superbisque & arrogantibus cla- moribus timorem & ignaviam Genuensibus ex- probantes: qui certamen detrectent ultro illis in domo ipsorum oblatum ab hoste, qui ea de caus- sa ab domo sua profectus ipsos per haud exiguum maris spatium petierit: neque sese aperto mari com- mittere audeant, ac communem Martem experiri; sed veluti timidæ pecudes, claustris inclusi hostem ostium portus insidentem, illosque faucibus pre- mentem sedentes ac trepidantes spectent: nullo omnino responso ad probra & contumelias jacta- tas dato, illud tantum respondent Genuenses, ni- hil esse quod faucibus portus infestis gloriantur Pisani, qui id non fiducia virium ac conscientia virtutis fecerint, sed insidiati sint, ac tempus ca- ptarint, quo maxima virium ac juventutis Genuen- sis pars procul ab urbe sit ablegata: quare ne ipsis quidem Pisanis decorum fore cum imparatis atque improvise deprehensis, tum autem praesidio nudatis, praelium committere: neque ita partam victoriam ulli gloriae illis fore: si igitur viri for- tes essent, ac si decus vere spectarent, propere facesserent è portu ac littoribus Genuensibus, se- que in sua reciperent, ac tempus Genuensibus ad comparandum & ad copias suas multifariam sparsas contrahendas darent: id si fecerint, promittere Genuenses, in eamque rem fidem suam obstrin- gere, se brevi illos adituros, atque desiderium eorum armis experiendi, utra gens bello sit me- lior, cupide expleturos. Quare Pisani cum ali- quot dies frustra ibi tempus trivissent, paullum ab urbe recedentes Varaginem Ligusticæ orae Occi- dentalis opidum concedunt: at Genuenses omnes curas in comparandum, ne nocte quidem opere intermissio, intendunt.

Per ea tempora Zacharias oram Ligusticam ab

Oriente tenuit: qui à promontorio, quod *Caput montium* vulgo vocant, classem hostilem littoribus Varaginis praetentam cernens, (pari fere ab urbe intervallo est locus, ubi ipse substitit) littora legens magno remigum connisu ad urbem conten- dit, incolumisque portum subit: cujus adventu re- fecti sunt Genuensium animi; cum classis Pisana interea profecta libera Ligustica littora reliquisset, in suaque concessisset. Ostium portus à Pisanis infes- sum, probra & tela ingesta, Scriptores Annalium Genuensium supprimunt: quin etiam nonnulli ne- gant; parum, credo, decorum id nomini Genuen- si putantes: sed falso: nam contra Pisanorum tu- mida oratio, ac futilis arrogantia, Genuensibus in gloriam vertit: qui hominum vaniloquentiam factis refutarunt, Pisanis exitiali clade, quam mox scripturi sumus, affectis. Exteros Scriptores secu- tus sum, in primis Joannem Villanum aequalem pene illorum temporum, ac certum & locupletem historiae auctorem semper habitum; tum autem ve- rissimiora tradentem: nam & sese id facturos Pi- sani saepe gloriati sunt; & facere licuit, nemine impediante; & globos purpura velatos illos attu- lisse, nostri ipsi Annales testantur.

At Genuenses instituta opera urgent, cum ne- minem è classe Zachariana exscensionem facere passi essent, ne ulla mora in descendendo & con- scendendo festinantibus fieret. Res mira ab Anna- libus traditur, ab hora tertia ad vespertum novam classem octo & quinquaginta triremium deductam, atque omnibus necessariis rebus instructam. Tan- tam classem Ubertus Auria alter ex Capitaneis du- cendam sumpsit, Zacharianis navibus cum ipso Duce sibi adjunctis: conscenderunt praeterea clas- sem multi ex primoribus civitatis: in quibus fue- runt duo praefecti filii omnesque fere Auriae gen- tis, quicumque armis ferendis fuerunt; ac Con- radus Uberti Spinulae alterius Capitanei filius cum delecta gentilium suorum Spinularum manu: sub vespertum classis solvit, magno concursu omnium ordinum atque ætatum ad tantum spectaculum fa- cto, omnia læta ac fausta illis comprecantium atque ominantium: praefectusque hostilem classem per- quiribundus, eaque de causa modo ad levam, modo ad dexteram flectens, Corsicam tenuit: ibi certior factus, Pisanos in sua se recepisse, nihil cunctatus, sacro promontorio solvens iter in illos intendit; secundaque navigatione usus ad octa- vum Idus Augusti Meloriam tenuit; quæ insula est è regione portus Pisani tria passuum millia pro- cul à littore. Ibi cum substitisset, concione advo- cata ita milites allocutus dicitur: *Usitati potius Im- peratorum moris, quo milites ante pugnam alloqui so- lent, servandi, ac nonnulla vos admonendi, quam hor- tandi causa, vos ad concionem vocandos statui, cives: nam laborem adhortandi hostis mihi ipse ademit; qui animos vestros injuriis & contumeliis suis in se irritan- do vicem meam perfunctus est. Vidistis, cives, super- bum hostem, per summum contemptum vestrum, fauces por- tus insidentem: audistis probra ingerentem, omni ver- borum contumelia vobis insultantem, ignaviam exprobran- tem; sagittas & globos in intimum sinum coniectos inspe- xistis. Si tantæ indignitates indignationem vestram at- que iras non satis accendunt; nequidquam aut mea aut cujusquam oratio vos acuere conabitur: praelium igitur ineuntes docete, non in verbis aut maledictis belli for- tunam verti; Genuensesque non verba, sed facta exer- cere solitos; iis vos ac Majores vestros semper pugnasse. Argentea illa sagitta ac globi fascia purpurea velati va- leant non ad vos deterrendos, sed ad cupiditatem tam opi- me praeda acrius incitandam; sentiant hostes non argen- teis vos armis aut purpuratis, sed ferreis pugnare soli- tos: experianturque utra tela melius figant. Magna qui- dem sunt ista ad vos inflammandos, cives; sed illa longe majora, quæ simul cum contumeliis ingentia detrimen-*

ta ac clades conjunctas habent: quorum memoriam locus hic, in quo nunc consistimus, parva hac insula Meloria, quam tenemus, nobis renovant: in hoc, inquam, loco, cives, lugubrem illam ac memorabilem cladem civitas nostra ab his ipsis Pisanis tum, cum nullum illis nobiscum esset bellum, per summum scelus summamque injuriam accepit: classis igitur vestra profligata ac deleta, parentes vestri à perfidis hostibus partim crudelissime jugulati, partim in miseram servitutem abducti, ut sanguinem suum ulciscamini, postulant, recte id pro jure suo à vobis repetentes. Patria ipsa vestra ad maculum nomini Genuensi jamdiu inustam delendam hortatur: quare, in pralio ineundo, memoriam atrocis injuria repetentes eos animos induite, quos habituri tum fuissetis, moerore recentis cladis vos accendente: quid? quod cupiditas dolorem & injurias vestras ulciscendi non modo à Christiana mansuetudine non abhorret, sed contra cum pietate est conjuncta? Deum enim ipsum immortalem praelari facinoris auctorem habetis: quem omnium mortalium teterrimi hostes vestri, ac cælo & terra damnati, sacrorumque & Ecclesia communitate iusto Vicarii Christi judicio exacti, simul vobiscum laferunt: cum illius sacerdotes sacrosque ministros, quos ne verbo quidem violare fas est, pii ac necessarii muneris obeundi causa domo profectos, comprehensos artissimisque vinculis constrictos immanissimo Tyranno ad cruciatus & supplicia tradiderunt. En divinum tandem apparuit Numen, meritis penas, quamquam seras, ab impiis hominibus repetens: quarum neminem justiore aut acriore exactorem, quam vos ipsos statuit; qui simul cum ipso injuriam accepistis: cujus ulciscenda, ac majoris cladis hostibus vestris reddenda, quam quantam ab illis accepistis, occasione vos armans; hostemque vobis viribus imparem in eo loco, in quo plagam accepistis, capiendum præbens; voluntatem suam evidenter declarat; cujus imperium de ipsis pene ore missum ne contemnatis; ac ne majore vos piaculo in divini Numinis injuriis non ulciscendis, quam hostes vestri in faciendis obstringatis; neve divinam iram ab hostibus in vos vertatis; per illum ipsum immortalem Deum cavete, cives. Quam adhuc habui orationem, ea universos nos, qui patria militamus, complectitur: at, quæ pauca additurus sum, ea ad vos tantummodo privatos milites, ac virilem dumtaxat operam Reipublicæ navantes pertinent: nihil illa aut me Ducem, aut imperatorii muneris & curarum socios attingunt. Tria sunt, milites, in quibus spes omnis victoria posita esse solet: vel majores copia, vel præstantior virtus Ducis, vel majus militum robur ac fortitudo: harum quavis si hosti præstes, modo duabus reliquis par sis, speranda est victoria; si omnibus antecelas, tum certa plane & explorata est: copiarum numerum nobis majorem Respublica præbet: de me ac confortibus laborum & curarum viris fortibus ac strenuis, nihil est quod quidquam sublatius dicam: quibus ipsi hostes fatentur, sese de virtute ac scientia rei militaris concedere; peregrino Duce accersito, summæque imperii illi mandata: duobus his suffulcris subnixa Respublica, ne tertio labascit, vestra sunt partes, milites: quas nisi fortiter ac strenue impleveritis, dedecus accepta ignominie (avertat omen immortalis Deus) totum vestrum erit, milites: proinde considerate quam acrem vobis necessitatem pugnandi præsens fortuna vestra indiderit; in eum locum deductis, ut lausparta victoria vobis cum Republica ac cum Ducibus sit communicanda; offensionis & flagitii neminem omnino socium sitis habituri; majore ac minus excusabili culpa, quam ullus umquam exercitus, peccaturi. Hoc si bene fixum animis est, victoria nostra est, milites: ad quam, ut latiore clausula finem vos alloquendi faciam, simul ad atroces injurias & contumelias ulciscendas, postremo ad decus, gloriam, opulentam prædam animos & corpora parate. Magno assensu auditus est præfectus; militibus subinde succlamantibus, omitteret minime necessariam orationem, atque hostem omni ope ad pugnam attrahere ni-

teretur; annifuros se profecto, ne navatæ operæ aut patriam, aut imperatorem ipsum umquam poeniteat.

Cognito Pisis Genuensium adventu ab iis, qui in portu post reditum è Ligustica ora substitute- rant, ac re per celeres nuncios in urbem perlata, tantus ardor animis est injectus, recenti gloria portus Genuensis infestis inflatis, ut arreptis repente armis, nullamque moram patientes, tamquam non ad dubium certamen, sed ad certam & exploratam victoriam properarent; naves, quæ se Pisas contulerant, quæ maxima pars fuit, repente conscenderint; magnis clamoribus pugnam cientes, Archiepiscopoque ac sacro ordine è ponte inspectante, ireque fortes ac felices jubente.

Hic incidit res, sive casu, sive divino consilio; à qua scribenda abstinuissim, veritus, ne in hostis invidiam homo Genuensis illam confinxisse viderer, nisi ea ab Annalibus exteris traderetur: crucem enim hastæ vexilli Pisanorum præfixam, dum vexillum attollitur, delapsam ad terram afflictam scribunt: quin etiam nonnulla privata monumenta à nonnullis Pisanis civibus gravibus viris adservata inspexi: in quibus scriptum est, crucem argenteam non ex vexilli hasta, sed ex manibus ipsius Archiepiscopi ponte superstantis, dum classarios fausta precatone prosequens, ac manum in formam crucis commotam more sacerdotum in illos intendens illam attollit, delapsam in flumen ac demersam. Quin etiam nonnulli rem detestabilem ac piis auribus respiciendam addunt, cum res in omen tristicius eventus vulgo accepta animos nonnullorum perculisset, auditam esse vesaniam nonnullorum ætate & ingenio ferocium vocem: *Propitius vero sit Genuensibus Christus, modo nobiscum faciat ventus.*

Pisani igitur faucibus Arni erumpentes cum reliquis navibus, quæ erant in portu, conjuncti aciem instruant, nullam moram pugnandi facturari. Interea præfectus Genuensis, omnibus ad pugnam necessariis expeditis, suorumque animis præparatis, bipartitam aciem ita instruxit: primum agmen, quod fuit octo & quinquaginta triremium nuper armatarum ipse ducendum sumpsit: media stetit prætoria navis, cujus latera cinxerunt dextrum Conradus Spinula, lævum triremis sancti Matthæi, quæ præfecti filios ac gentiles illorum vehebat: huic continuatæ sunt naves ab octo Genuensibus regionibus, in quas omnis civitas tum divisa erat, armatæ; quattuor dextra, totidem sinistra: quibus interpositæ sunt triremes ab utraque ora Ligustica collatæ: octoque celoces præparatæ sunt, quæ præsto forent ad omnes subitos casus, atque ad subita imperia celeri cursu perferenda. Benedictum Zachariam cum triginta triremibus suis in subsidis pone insulam collocavit, sapienti consilio, quod Ducem non fefellit; ne hostis tanta navium multitudine deterritus certamen forte detrectaret: dato mandato, ut signo accepto illico ex insidiis prodeat, seque cum reliqua classe jungat: omnibus rebus instructis, prorisque in pugnam directis, in hostem vadit; qui jam moverat; conspectaque navium Genuensium paucitate despecta, magno impetu inferebatur. Quantis copiis cursum sit, haud parvo numero auctores variant: Annales Genuenses minimum tradunt: non enim plus octo & octoginta fuisse Genuenses triremes affirmant, quibus addunt octo pamphilos: Pisanorum numerum silent, quas tamen duas & septuaginta numero superiore mense Genuensia littora petiisse, scribunt: sed se ipsi refellere, fidemque sibi abrogare videntur, qui, præter Zacharianas naves, triginta accersitas, octo & quinquaginta à civitatis regionibus armatas, que

que in expeditionem eductas scribunt: quæ solæ explent numerum octo & octoginta: cui addendæ sunt eæ, quas ab utraque ora collatas urbanis triremibus interpositas diximus; ut verisimilius sit, quod exteri tradunt; in primis Joannes Villanus, qui Genuensium navium numerum ad centum triginta, Pisanarum ad centum auget: quamquam Coirus Mediolanensis nonnihil utrumque numerum imminuat.

At præfectus Genuensis hostem eo jam profectum cernens, ut nulla jam sit regrediendi ac certaminis detrectandi facultas, signum dat Zacharia: ille è vestigio prodiens, classeeque explicata, in conspectu hostis fuit. Terribilis species novi agminis animos Pisanorum perculit; impetumque incitatum nonnihil consopivit; cum validiore hoste, quam animis præcepissent, sibi rem fore cernentium: verum, cum propinquitas omnem declinandi prælii facultatem adimeret; ejus necessitatem subire coacti, collecto animo, hostem propinquum factum invadunt: qui sese & ipse magno impetu in illos concitat. Raro aliàs duæ classes majoribus aut obstinatoribus animis concurrerunt: ingens igitur prælium subito accensum est, ira, indignatione, veteribus odiis, multorum temporum injuriis, tum autem æmula virtute utriusque animos stimulantibus, quod à missilibus omnis generis coeptum, ad manus & ad gladios atque hastas, quæ Martem atrociorē faciunt, pervenit: cum naves inter se confertæ ac mutuo urgentes, pedestris ac statariæ pugnae speciem ederent: quæ ubique atrox, circa tamen ipsas prætorias acrior fuit: nam & flos virorum in illis erat: & à circumstantibus magis in Ducum quam in suorum periculum intentis; tamquam illorum casu eventus pugnae vertetur, omni ope adjunctæ sunt: Zachariaeque prætoriae laboranti, triremi sua lateri impigre prætoriae, magno subsidio fuit: idem auxilium Finarii triremis navi Aurias vehenti in non exiguum discrimen adductæ tulit: ceterum miserabilis in primis ac foeda erat certaminis facies, multis cadentibus ac varia peste pereuntibus: cum alii in ipsa pugna obtruncarentur, alii semivivi in mare præcipitarentur; qui misericordiam superstantium implorantes & ad naves adnatantes, quæque fors obtulisset, apprehendentes, supernis remorum ac contorum ictibus necabantur: horribilisque erat in primis maris species cruore interfectorum rubens, sagittis, scutis, hastis, galeis thoracibus, exanimatorum corporibus late constrati: certamen accendebant Duces passim discurrentes, ac milites monentes; sæpe duos hos claros populos manum vario eventu conseruisse, sed in parvarum rerum discrimen ac facile reparabilibus damnis certatum: nunc ad universæ rei dimicationem ventum; in illius pugnae eventu fortunam utriusque populi verti: de summa enim Republica fortunam indixisse certamen; cui nihil inter maris inferi imperium, & omnium rerum interitum, medium propositum sit: tot annorum controversias ultimo illo certamine decerni: quidquid utraque natio viribus possit, in illa classe esse; qua amissa, amissam quoque omnem esse Rempubicam: cum nihil superesset, unde tantum damnum repararetur: obfirmarent igitur animis, aut vincere, aut mori: quorum alterum ipsos ac communem patriam maritimi imperii compotes faceret; alterum à miseriis & ærumnis liberaret. Tanto igitur irarum certamine ab hominibus cum sua sponte odio effectis, tum Ducum oratione insuper accensis dimicabatur, ut prælium diu extractum non modo fatigatione non senesceret, sed ardore certaminis irritatum magis magisque exardesceret:

A ceterum prætorias Pisanas à prætorias Genuensi tandem capta; vexilloque, quod altera navis gestabat, dejecto, Pisanæ naves quacumque facultas data est, effusam fugam capiunt: perpaucaeque pestem vitarunt, portu se includentes; eæque, maxima hominum parte amissa, maxima pars depressa est, viginti octo tantummodo à Genuensibus captis: desiderata fuisse sexdecim Pisanorum millia, partim captos, partim cæcos, paullo plus, Villanus tradit: nostri Annales cæcos paullo plus quinque millia prodidere; captivorum tantum numerum, qui cum aliis antea per varias occasiones captis ac Genuæ in custodia adservatis simul carceribus inclusi summam novem millium paullum excederent; cum exteri numerum tum captorum ad undecim millia augeant, ut illud dictum in Etruria percrebuerit, *Genuam eundem, si quis Pisas cernere cupiat.* In Captivis fuit ipse Maurocenus Prætor, Lottus Comes, decem & octo Doctores, ac magna Nobilitatis & primorum pars.

Tanta clades Pisis audita totam urbem luctu implevit; cum non magis fortunam publicam & fatum civitatis, quam privatos casus vulgo lamentaretur: miserabilisque in primis erat civitatis species: cum mulieres tumultum ac trepidationem augerent: quæ in publicum prodeuntes, ac viris immixtæ, omnem pudoris rationem ac sexus discrimen magnitudine mœroris adimente, ipsæque ac viri alii alios tamquam magis mentis compotes, privatos ac publicos casus rogantes, pluribus & inconditis agminibus passim vagarentur: viisque in mare ferentibus infestis, ut quisque è clade superstes subinde adveniebat, cum circumstantes non prius dimittebant, quam casus suorum plane sciscitati essent. In qua re matronarum gemitus eminebat, quæ, ut quæque tristem nuncium acceperat, à nunciis digredientes, pectora tundentes, ac capillum laniantes, aliæ fratres, aliæ filios, aliæ parentes, aliæ conjuges mortuos, aut captivos flebilibus vocibus appellabant: eos tamquam vivos ac præsentis rogantes, cui fortunæ sese, parvulosque natos, ac miseram familiam reliquissent. Nullaque omnino domus Pisis fuisse dicitur clade intacta: cum pleræque familiæ duobus, nonnullæ etiam pluribus funeribus lugubres fuerint. Ita parva, ac nullius antea nominis, atque asperi, & nudi soli, nullorumque incolarum altrix insula Meloria, quam verius scopulum appellaris, duabus insignibus cladibus in perpetuum nobilitata est.

E At præfectus, tanta parta victoria cum parvo suorum sanguine, machinis ligneis ante portum à Pisanis ædificatis, incensis, cum nullum jam belli opus restaret; expugnatione turrium, quæ portum muniebant, longa & difficili visa, ac nulla spe eo tempore tentanda, à Meloria solvit, itinere in patriam directo: in quo prope factum est, ut atrox tempestas repente coorta lætitiā tantæ gestæ rei corrumpere: omni classe haud dubie demergenda, si procul à portu Lunensi tempestas illam adorta esset: cujus impetum, sese in portum propere recipiens, momento temporis atque, ut ajunt, corpore antevertit: tantaque fuit venti, præter omnem usitatum morem, favientis rabies, ut vix nobilissimus ille portus tutam stationem classi in intimum sinum retractæ præbuerit: qui ventus cum tandem exscessisset; præfectus portum exiens, secunda navigatione in portum Genuensem est invehctus: ipseque una cum primoribus, totoque militantium agmine, ac navalibus sociis, omnibus ordinibus obviam effusis, magno cum gaudio & honore exceptus est; ac vindex dignitatis publicæ salutatus.

Nec minus hoc in bello modestia, quam virtus & fortitudo Majorum nostrorum eluxit, minorive admirationi toti Italiae fuit: quorum animos usque adeo egregia parta victoria non inflavit, aut ad ullam superbam arrogantiam extulit; ut conceptum gaudium nulla insolentis laticiae significatione, ullave triumphis specie ostentandum duxerint: quin contra, omnia benigni Numinis favori accepta referentes, demissis supplicationibus tota urbe, & ad sacras aedes habitis, gratias Deo immortalis, ob tantum beneficium, pie & religiose cum egissent; postremo aedem divi Sixti ingressi, cujus die festo clarissimae victoriae compotes facti essent; sacris operati aulae aureo ad sacrorum ornatum templum honestarunt: quo eodem anniversario & perpetuo dono sollemniter in idem templum delato, memoriam tanti parti decoris in perpetuum renovandam decreverunt. Maurocenus, Venetis Legatis ea de causa missis, haud retractanter restitutus est, nullo pretio redemptus. Genuensesque inchoatum victoriae cursum perfectos, foedus & societatem cum Florentinis & Lucensibus adversus Pisanos jungunt: qui tot cladibus fracti, ad hoc tanta undique mole terra ac mari imminente, summum omnium rerum imperium ad Ugolinum Girardescum Comitem, Guelpharum partium acerrimum propugnatorem deferunt.

A.C. Insequentes tres anni, quorum duo primi Henricum Spettam Hastensem Praetorem habuerunt, 1285. tertius Henricum Brusamanticam, compluribus 1286. minutioribus expeditionibus traducti sunt; partim ad res Pisanas premendas, hostemque assiduis damnis carpendum factis; partim ad rerum Syriacarum & orae Ligusticae tutelam: quas singulas nominatim persequi longum, nullumque operae pretium fuerit. Anno horum trium secundo, Ubertus Auria tantis victoriis clarus, laboribus fessus, satis sese gloriae & Reipublicae fecisse putans, magistratu se abdicavit; in cujus locum susceptus est Conradus filius.

A.C. Anno ejus saeculi octogesimo octavo, praetura 1288. continuata est Henrico Brusamanticae, viro integro, acrique scelerum & maleficiorum vindici. Retinebant adhuc speciem quamdam libertatis Capitanei; ut fere regna nova solent. Appetente igitur sine magistratus, (neque enim perpetuus mandatus fuerat) populus congregatus imperium illis in quinquennium prorogabat: moderationis simulationem adhibuerunt, triennio contenti. Consilia pacis cum Pisanis jamdiu agitata, captivis, qui erant Genuae, magnam contentionem adhibentibus, sedulamque operam suam interponentibus, cum multae legationes ex illorum primariis ultro citroque saepe commeassent, tandem ad effectum perducta sunt; paxque ipsa convenit, Ugolino Comite & Gallurae Judice, qui tum in summo magistratu locati rerum potiebantur, aegre rem ferentibus: quae, civitate reditu tantae civium multitudinis corroborata, ipsorum potentiae & dominatui infringendo esset: cujus impotenter exerciti tedium & odium jam cives capere coeperat. Comes igitur & Judex, ut rem disturbarent, toti in usitatas Pisanas artes versi, cum Pisanis piratis, qui tum erant in Sardinia occulte egerunt, ut res Genuenses vexarent: quod illi laeti imperio, impigre exsequi instituerunt, circumjecto mari excurrentes, ac praedas navium & rerum Genuensium agentes: turbavit ea res animos Genuensium pacis cupidos, missusque est ea de causa Pisas Nicolaus Petrati, injurias ac fidem pacis violatam conquestum, damnumque refici petiit: Praetores culpam a publico consilio avertere, remque comibus verbis extrahere.

Interea Genuae tres triremes ad commercio-

A rum tutelam adversus Pisanos armatae sunt, Petro Embruno praefecto; cui diligenter mandatum est, caveret a rebus Pisanorum attingendis, ac se tantummodo ad res Genuenses tutandas, & ad injurias prohibendas missum putaret: tantumque fuit in Genuensibus pacis servandae studium, ut, quamquam Pisani ludificarent, diesque jam exisset pecunias pactas a Pisanis deponendi, ab hostilibus adversus illos abstinerent. Ceterum eadem res longe acriora odia Pisanorum in Ugolinum accendit; cujus opera & ambitione procedentia pacis consilia distinebantur: cujus ipsi eo quam Genuenses cupientiores erant, quo & bellum majoribus cladibus illis stabat, & viribus attritis longe Genuensibus inferiores futuri erant: conspiratione igitur principum adversae Factionis in illum facta; cujus auctor & caput fuit Rugerius Ubaldinus Archiepiscopus Pisanus, cui ad publicam causam accedebant peracres adversus Ugolinum privati odii stimuli, ob caedem fratris filii ejus iussu factam; captus est Ugolinus: qua in re Pisani immanis & execrandae saevitiae facinus ediderunt: quorum animos tanta rabies invasit, ut cum Ugolino parvulos ejus liberos omnis criminis infantes, nihil misericordia simplicis & innoxiae aetatis effertas mentes flectente, turri incluserint: in qua omnibus alimentis ademptis fame consumpti expirarunt. Turris, in qua tetrum facinus conceptum est, adhuc Pisis videtur, abominando & nullum avum delendo famis nomine nobilitata: auctorem facti generis mortis eundem ipsum Rugerium Archiepiscopum fuisse nonnulli Pisanorum Annales tradunt; vafro commento se divinarum legum poenas subterfugisse putantem, quae sacris hominibus caede atque humano sanguine interdicit, sententiam legis verbis ludificantem; tanquam is hominem necasse negandus sit, qui, alimentis subtractis, necessarium mortis causam praebuerit.

D Annus, qui sequitur ejus saeculi octogesimo nonus, Beltramo Calcano Mediolanensi Praetore, A.C. neque foris otiosus omnino fuit, & domi haud 1289. parvis motibus agitato: ejus initio Respublica quod erat reliquum opidorum Quiliani & Vindae pretio sibi adjunxit. Ingentibus copiis per ea tempora Sultanus Aegyptius urbem Tripolim oppugnabat: qua in obsidione haud segnis opera Genuensium fuit. Benedictus enim Zacharias Genuensium triremium ac nonnullarum corbitarum praefectus, urbe expugnata magnum Christianorum numerum praesenti discrimini ereptos incolumes Cyprum vexit. Moverant se Genuenses, qui Theodosiam incolebant, cum tribus triremibus raptim armatis; quibus praefectus est Consul ipse Paullinus Auria, opemque latum ierant: ceterum cum Cyprum tenuissent, nuncio accepto Tripolis expugnata, & Zachariae in Armeniam ad Regem profecti, eo ipsi quoque itinere directo, se cum Zacharia conjungunt.

F Majora in Corsica gesta sunt a Luchetto Auria, eo cum classe quattuor triremium, myoparonis, septem taridarum, ac nonnullorum minutiorum navigiorum; ac cum pedestribus & equestribus copiis missis, ad recuperanda loca a Judice Ginercae per tempus belli cum Pisanis gesti illis auctoribus occupata: pacta pecunia ea de causa a Pisanis exacta: cedenteque Judice, cum nonnihil initio restitisset; nonnullisque locis, quae retinere non poterat, ab illo incensis, Luchettus loca amissa deinceps recuperavit; quae fuerunt arx Lulmetum, Roccatvaldis, Ginerca, Istria, quam fiduciarium iussu publico Nicolino Petratio dedit; exercituque paulum refecto, Aleriam contendit: in quam urbem indu-

inductus est à familia Cortingorum, cujus principes erant Episcopus ipse Aleriensis, ac Panorcus, & Opicii fratris filii, quæ gens in fide erga populum Genuensem perpetuo manserat. Consiliis à reliqua gente unus tantum Ugucio separatis, quod gener Judicis esset, Petram latam tenens, oppugnationem expectavit: quam haud diu sustinuit, opido tradito, jurejurandoque in imperium dato: post ea Luchettus arma circumferens, Dominos Bagnacæ, Marchionem Viridis, Joannellum Loretum Episcopum Marianensem, qui omnes contra Rempublicam arma tulerant, in antiquam ditionem & obedientiam redegit: quibus rebus confectis, insulaque pacata, Luchettus se Bonifacium subduxit; ibique exercitum dimisit: qua re cognita, Judex novis motibus excitatis, omni ope contendit se in gratiam restitui: repudiatus est; cum hominis postulata minus æqua visa fuissent. Longe deteriore consilio æquissima Pisanorum postulata, rei publicæ in primis utilia & perhonorifica repudiata sunt; cum de illis ingens fuisset in consilio certamen: petierunt enim Pisani, ut dies arcis Callaritanæ, qui appetebat, ex conditionibus pacis, tradendæ in annum prorogaretur: cavebantque Reipublicæ traditione nonnullarum arcium in ipsa insula Sardinia, ac turris portus Pisani, arcis Gorgonæ, ac quinquaginta obsidum, ad hoc reliquam pecuniam debitam numerabant.

Majore discrimine eo anno res urbanæ turbatae sunt: tumultuum auctores fuerunt Grimaldi & Flisci: qui perpetuum Spinulæ & Auriae gentium regnum non ferentes, consiliis cum Mallois, Nigris, Castellis, Salvagis, Embriacis, Marinis, Marocellis, Fallamonis, Piccamiliis, Guizulis, Cibo, ac nonnullis aliis nobilibus familiis, quæcumque Guelphas partes sequebantur, occulte concoctis, illarumque societate fulti, magnoque clientium numero corrogato, armis sumptis, ad armaque clamantes ædem ac turrin divi Laurentii occuparunt; eodemque tempore ædes Abbatis populi cum Capitaneis consentientis, atque ædes Uberti Flisci, quibus Capitanei pro prætorio utebantur, in quibusque tum forte consilium civitatis habebatur, invaserunt: acriter primo Abbas cum familia sua restitit: deinde plebe auxilio advolante eos submovit: nec feliciore eventu Capitaneos tentaverunt, cum multa suorum cæde ab illis repulsi. Eodem quoque tempore Philippus à Volta, qui arma pro Capitaneis sumpserat, æde Archiepiscopi, quam sedem motuum auctores sibi delegerant, illos dejecit: qui omnes in divi Laurentii ædem se subdixerunt: ceterum, ne sacri quidem loci præsidium ab impetu furentis plebis illos tutos fecit: quæ foribus templi, detestando exemplo ignem ac faces subjecit: nec pestem subterfugissent; nisi, ingenti bonorum & præstantium civium multitudine se interponente, misericordia tot nobilium familiarum ipsosmet Spinulas, & Aurias, ac ceteros ipsorum Factionis primarios cives, affinitatibus ac multiplicis necessitudinis jure attingentium periturarum, Capitaneos flexisset: impetu igitur concitatae multitudinis rectorum auctoritate compresso, extemplo incolumes in domos suas rediit: corum quattuor tantummodo postero die exsulio damnatis.

Urbanis tumultibus sedatis, curæ externorum bellorum successerunt. Igitur, cum Pisani promissa non facerent, neque arcem Callaritanam ex pacis conditionibus traderent, insequenti anno ejus sæculi nonagesimo, qui Prætorem habuit Joannem Lucinum, universo civitatis consilio convocato, novus Magistratus, quem *Credentia* vulgo appellarunt, quattuordecim civium creatus est: amplissima rerum bellicarum potestate illi mandata: qui, omni commercio cum Pisanis vetito, primum omnium lustro condito, civitateque, & Liguria opidis illi contributis

A censis, oneribusque pro modo facultatum distributis, compertum habuerunt, eas esse Liguriæ facultates, quæ centum & viginti triremes armarent. Formula præscripta, ex qua in decem triremes Roccabruna duo hominum capita conferret, Mentonum tria, Albintemclium quinquaginta, Podium Rainaldum tria, Fanum Romuli ac Ceriana sexaginta, Tabia viginti quinque, portus Mauritius quinquaginta, Fanum Stephani quinque, Petra lata superior & inferior decem, Henricus, Philippus, Albertus Comites Albintemclii triginta tria, Linguilia & Castellarium quindecim, præfectura Trioriæ quinquaginta, Dianum quadraginta, Cervum quindecim, Andoria triginta, Albingaunum sexaginta duo, Episcopatus Ingau-nus quadraginta quinque, Marchio Clavessanæ quadraginta, Cosium & Thomasium octo, Finarium sexaginta duo, Naulum viginti quinque, Episcopatus Nalensis tria, Quilianum decem, Saona sexaginta duo, Albizola sex, Varago & Cellæ quinquaginta, Vultur centum, vallis Porciferæ septuaginta quinque, Bisamnis centum, Reccum viginti, Rapallum triginta, Clavarum centum, Sigestrum septuaginta quinque, Levantum viginti, Passanum & Lagnotum tria, Matarana ac geminum Carrodanum quinque, Corvaria centum, Carpena septuaginta quinque, portus Veneris viginti quinque, Vezanum decem octo, Arcula decem, Trebianum tria, opidum Ericis tria: hic numerus mille quingenta capita excedit: quod, si classis duplicaretur, duplicata collatio fieret: si triplicaretur, triplicata: & sic deinceps usque ad numerum centum viginti.

Hoc censu habito, Magistratus Credentiæ, societate cum Lucensibus Pisanos bello persequendi juncta, qui terra strenue rem gesserunt, sex triremes, ac myoparonem armarunt, Henrico à Mari præfecto: qui cum classe decem triremium ab eodem Magistratu prius armatarum, quibus præfuit Nicolaus Buccanigra, conjunctus, Iluam insulam, Pisanorum præsidio dejecto, ceperunt, quadragintaque obsides Genuam miserunt; Iluensibusque, ad illorum animos in Genuensem populum firmandos, promiserunt, illos eo jure futuros, quo essent Bonifaciani.

Cum ne his quidem damnis affecti Pisanorum obstinati animi ad conventa observanda flecterentur, majore conatu bellum capeßendum decretum est: foedere igitur cum Lucensibus acriori bello Pisanos urgendi renovato, ingens ac prævalida quadraginta triremium classis armata est; ac Conrado Auriae alteri ex Capitaneis ducenda data: qui extemplo portum Pisanum contendit: cui eodem tempore terrestres quoque copias Lucenses admoverunt: qui portus operibus potius quam præliis à Genuensibus expugnatus est, turri maxima vastæ altitudinis subruta: quæ fulturis suspensa, illis jussu Auriae incensis, cum ingenti fragore Lucensibus mirantibus corruit; iis, qui in illa erant, majore ex parte ruina oppressis, cum pauci perniciem se subtraxissent, qui à Genuensibus capti Genuam missi sunt: post die copiae Ligurum translatae sunt; opidoque deleta, præter templum, quod religio intactum servavit, portu Pisano repetito, turres reliquæ subruui, suffulcris suppositis, cœptæ: qui in illis erant, eundem casum maximæ turris recenter prostratæ horrentes, dedicationem fecerunt. Genuenses catena ferrea, qua portus claudabatur, perfracta, turribusque omnibus dejectis, Genuam ovariantes reversi sunt; catenæ fragmentis secum portatis, ad insigne posteritatis monumentum multis in urbis locis suspensis; quæ adhuc visuntur.

Bellicis laudibus haud minor domi moderationis gloria respondit: nam, cum cognati, & affines, atque omnes, quicumque aliquo jure Capitaneos attingebant, cum illis egissent, inducerent

animum, ut magistratu abirent; consiliaque precibus miscentes docerent, nullum diuturnum imperium quamvis æquum & Reipublicæ utile in libera civitate æquis oculis adspici; ac proinde suaderent, ut leniter gliscentem invidiam, causasque subnascentium tumultuum & seditionum præciderent; nec tantopere amplecterentur summum illum honoris locum; ut civitatis quieti & otio consulerent; facile se exorari passi sunt: tempusque magistratu abeundi sibi ipsi præstituerunt, proxime appetentem diem divi Simonis & Judæ festum.

A.C. 1291. Cum is dies insequenti anno, qui fuit ejus sæculi nonagesimus unus, venisset, Ubertus Spinula & Conradus Auria magistratu se abdicarunt: quem vicennium obtinuerant: negotio prius publice dato Simoni Spinulæ & Uberto Auriæ Capitanei parenti, Reipublicæ emendandæ & constituendæ; lata lex ab illis est, ut peregrinus Capitaneus quotannis ad summum imperium cum summa omnium rerum potestate accerferetur; omniaque civitatis munera, procurationes, magistratus, æqualiter inter Nobiles & popularis corporis cives dividerentur. Fuit hoc anno sub Capitaneis Prætor urbis Gulielmus Drudus Hastensis; in Capitaneorumque locum successit Lanfrancus Suardus Bergomas, vir strenuus atque impiger: qui omnia, quæ fuerant ejus muneris, magna cum virtutis & prudentiæ laude implevit. Hoc anno cum nullæ ad eum diem certæ ac publicæ essent rectoribus civitatis sedes, mercedeque conductis ædibus Magistratus uterentur, prætorium ædificari coeptum est; in quod ad Rempubli-
cam gerendam Magistratus convenirent, consiliumque civitatis vocaretur; in solo, quod templo maximo & ædi divi Matthæi interjectum est, quod, ac quidquid in illo superficiei fuit, de familia Auria Capitanei, priusquam magistratu abirent, mercati sunt.

Res quamvis privatis consiliis tentata, quæ argumento est, quam vivida omnibus ætatibus fuerunt nostrorum hominum ingenia, nullo modo silentio nobis prætereunda fuit: hoc enim anno Tedifius Auria & Ugolinus Vivaldus, duabus triremibus privatim comparatis & instructis, magnæ audaciæ animique immensa spectantis rem aggressi sunt; maritimam viam ad eum diem orbi ignotam ad Indias patefaciendi: fretumque Herculeum egressi, cursum in Occidentem direxerunt: quorum hominum qui fuerint casus, quique vastorum consiliorum exitus, nulla ad nos umquam fama pervenit; hac inventarum Indiarum, ac novi orbis nostro adjecti gloria ætati nostræ, ejusdemque nationis homini divino consilio reservata.

Infelix & lugubris in primis hic annus Christianis fuit, totius Syriæ imperio tandem amisso; ducentesimo circiter anno, postquam magna cum Christiani nominis gloria partum fuerat: urbe Acone, quod postremum opus belli fuit, à Mem-

A phitico Sultano expugnata; Christianisque, qui in ea urbe sunt inventi, quorum triginta millia fuerunt armis ferendis, partim cæsis, partim in servitutem abductis: cum sedula duarum Genuensium triremium diligentia, quas Andreolus Pellatus ducebat, Cyprium Regem, unaque cum illo haud exiguum Procerum & omnis generis mortalium numerum pesti eripuisset: quos pluribus com meatibus ex urbe eductos in nonnullas onerarias, quæ forte præsto fuerunt, imposuerunt: cujus urbis expugnata fama Christiani, qui Tyrum & reliquas Syriacæ oræ urbes incolebant, perculsi, avitis sedibus relictis, sese in insulam Cyprium subduxerant. Infelicitis rerum Syriacarum exitus causâ fuit non tam barbarorum virtus, quam prava & dissoluta rerum regendarum nostrorum hominum ratio; in primisque discordiæ, magnis de hac ipsa urbe Acone inter Patriarcham Hierosolymitanum, Templarios, Hospitalarios Equites, Regem Cypri & Regem Siciliæ, suam quemque eam urbem sibi vindicantes ortis contentionibus; re interdum ad manus & ad ferrum revocata; cum Genuenses quoque ac Veneti & Pisani haud exiguas juris partes in eadem urbe ad se traherent.

C Eo anno initium belli inter Catalanos & Genuenses factum est, navi Genuensi à Catalanis capta; quæ tamen mox à nonnullis Genuensibus triremibus recuperata est. Hujus belli semina diu ante jacta fuerant; cum, in contentionibus inter Pisanos & Genuenses de Sardinia & Corsica insulis, Catalani sæpe Pisanis adversus Genuenses haud obscuram opem tulissent: renovatæ sunt odiorum causæ, Petro Aragonio Rege, Gallis cæsis & exactis, Sicilia potito; cum multis subinde damnis Catalani Genuenses afficerent. Latrocinantium magis quam belligerantium more hoc bellum per complures annos gestum est; utraque natio per varias occasiones mutuis damnis altera alteram carpente: numquamque universis viribus ac iusta pugna concursum est; cum in bellis Pisanis & Venetis multæ claræ editæ sint pugnae, compluresque insignes & memorabiles clades illatæ & acceptæ.

Anno insequenti ejus sæculi nonagesimo altero, A.C. 1292. quo Beltramus Ricienus Bergomas Capitaneus, & Gulielmus Gardinus Hastensis Prætor vocati sunt, Genuenses ab Oratoribus Regis Gallorum & Caroli secundi Siciliæ Regis auxilium ad Siciliam recuperandam postulantibus, frustra tentati sunt; consilio civitatis in contrarias sententias distracto.

E Qui sequitur annus ejus sæculi nonagesimus tertius, A.C. 1293. Simonem Gelmellum Bergomatem Capitaneum, & Petrum Carbonerium Prætorem habuit. Graviter hoc anno & severe in maleficos animadversum est; quorum infinitus creverat numerus: oneraque & tributa civibus viritim imposita sunt, causâ Pisani belli, quod adhuc durabat.

V B E R T I F O L I E T A E,
PATRICII GENVENSIS,
HISTORIAE GENVENSIUM
LIBER VI.



Hoc anno bellum cum Venetis renovatum est, eo, quam superius, majus, quo de majore re dimicatum est; cum in priore bello odium tantum, ex mutuis injuriis conceptum, utrumque populum inter se commisisset; at in hoc ad vetus odium numquam simul cum bellis & certaminibus depositum accessit de summo in navalibus rebus honoris loco, ac de maritimo imperio contentio: quo nullus est ad animos hominum incitandos acutior stimulus; cum neuter populus alterius potentiam nimis crescere vellet, quæ esset suæ deprimendæ. Suspectum quidem semper Venetis fuit Genuensium vividum ac peracrem ingenium, egregiaque indoles sæpe experta; ceterum vires minus formidolosæ finitimis Pisanorum, atque internecinis bellis implicitæ: at, ubi postrema insigni clade Pisanorum opes ita attritæ sunt, ut omni eorum pube partim cæsa, partim capta, sese Pisani à tanto casu in multa sæcula erigere non possent; Veneti, ut cursum tantæ felicitatis interromperent, quamquam dies induciarum nondum exierat, bellum facere occuparunt. Multis autem cladibus hoc bellum utrique populo stetit: in quo narrando Annales utriusque populi haud parum variant; cum Veneti nonnullas clades à Genuensibus Venetis illatas compriment; Genuenses contra non quidem damna accepta detestentur omnino; sed generatim tantum ea attingant. Postrema vero insignis clades, atque ad omnem posteritatem memorabilis, inter omnes tam Venetos quam Genuenses Scriptores constat.

Nulla autem tempore magis in flore virium Genuenses fuerunt: cum illud à gravissimis illorum temporum Scriptoribus tradatur, septuaginta triremes quotannis à Genuensibus civibus privatim ex ipso corpore civitatis armari & instrui solitas, commerciorum & mercatoriarum negotiationis gratia: cum longe major numerus à populis oræ Ligusticæ, quæ tota Genuensium ditione tenebatur, eadem de causâ armarentur: nullumque esset maritimum opidum ex paullo validioribus, quod non triremem saltem armaret: cum nonnulla duas, aut eo amplius instruerent; ut tum hoc navium longarum genere potius quam onerariarum res mercatoria exercebatur; quibus Respublica ad bella, si qua inciderant, utebatur; hominibus in illorum temporum disciplina non minus ad usus bellicos, & ad arma tractanda, quam ad privatos quæstus instructis: ut mirum non sit proximo bello Pisano, quod septenne fuit, sexcentas viginti septem naves longas varii generis & nominis armatas esse: de qua re in *Elogiis nostris clarorum Ligurum* copiosius disseruimus.

Nunc, ut ad inceptum redeam; tam Veneti, quam Genuenses Annales tradunt, initium armorum à levi re à Venetis factum: quorum quattuor triremes majoris formæ, quas *galeatas* appellant, cum numero bellatorum, tum ingenti bellicorum

B apparatus vi, quos in Cyprum vehabant, animos faciente; septem triremes Genuenses ad mercatoriam negotiationem potius quam ad bellum instructas adortæ sunt, certamen detrectantes, ac fidem induciarum testantes: quibus rebus cum ab incepto non desisterent Veneti; Genuenses ad necessariam pugnam adacti virorum fortium opera ediderunt; triremibus Venetis victis ac captis: quas tamen extemplo cum hominibus ac suis omnibus rebus dimiserunt, multum increpitis, quod fidem induciarum, quarum dies nondum exierat, cum amplius duo anni superessent, nulla re provocati violassent. Gravius tulerunt rem Genuenses, quam Veneti; omnes bellorum causas abominantes: quaterni igitur Legati ab utroque populo missi in urbem Cremonam convenerunt; cum Veneti non minus sese pacis cupidos simularent. Nihil per ingentia certamina est transactum: Venetis ludificantibus, Genuensibus vero bona fide ac sedulo agentibus: qui, ut omnia iusta implerent, Legato Venetias ad Ducem missi, testati sunt, sese omnis culpæ perniciosi belli suscepti exortes fore: per se enim non fieri, quominus fides induciarum rata esset: irrita omnia fuerunt.

Anno igitur, qui sequitur, ejus sæculi nonagesimo quarto, Simone Gilmellio Bergomate civi-
A. C. 1294.
D tatis rectore, Genuæ viginti triremes armatæ sunt, mercatoriæ negotiationis causâ in regna Orientis missæ: quæ cum in itinere audivissent classem Venetam, fide induciarum violata, tres ingentes Genuenses onerarias immanis pretii mercibus onustas cepisse; compluribusque aliis detrimentis res & ditionem Genuensem affecisse; mercibus in opido Pera in terram expositis, sese ad pugnam compararunt; Nicolao Spinula, qui tum Legatum apud Cæsarem Constantinopolitanum agebat, præfecto creato, viro expertæ fortitudinis & audaciæ, ac magni consilii & auctoritatis: is ad Venetos nuncium ad res per induciarum tempus injuste ablatas repetendas mittit. Veneti nuncium convicio acceptum contemptim de Genuensibus locuti, cum superbo responso, sese jure belli ablata non modo non restituros, sed classem ipsam Genuensem capturos, dimittunt. Exarserunt quidem Genuenses, contumelia insuper verborum injuriis addita: ceterum sapiens & cautus Dux, cum numerum hostilium navium de nuncio cognovisset, sani hominis non esse intelligens, classem tanto numero inferiorem hosti capiendam objicere, sese in portum Araciæ recipit: in quo cum non satis tutum se ad hostiles impetus intelligeret, altum petiit. Hostis in classem Genuensem procul spectatam cursum dirigit; nullumque urgendi finem faciens, detrectantem Genuensem ad necessitatem pugnae adigit: igitur Spinula proris in hostem visis, paucis (neque enim longæ orationi angustia temporis locum dabant) navales socios ita ad pugnam est cohortatus: *Deprehensi ab hoste, tanto & navium & pugnantium numero inferiores, omni elabendi via clausa, discrimen iniqui praelii subire cogimur, cives: in quo nulla spes alia salutis est, quam ipsius salutis desperatio: hos uno telo, quod acerrimum est,*
C c 3
hosti

hosti superiores sumus, ceteris omnibus rebus impares: quod igitur in aliis praeliis salutis & victoria esse solet, cauta fortitudo, ea in hoc praelio pesti est; ac pro eo vecors audacia est adhibenda; neque alia ratione certam & imminentem perniciem a nobis amovere possumus, quam in perniciem precipites nos dando: neque aliter periculum discutere, quam caco impetu in illud ruendo. Quod igitur in ceteris pugnis virtus facere solet; id ut in hoc rabies efficiat, necesse est: hoc animo si pugnam, qua mox instat, inibimus, vincere possumus, cives: aliter haud dubie perituri. His dictis, naves in hostem inordinatum & incompositum paucitatis contemptu, ac sparsim, pluribusque agminibus venientem concitat: quem tanto impetu invadit, ut ira ac rabie Genuensibus virtutem acuente, subita audacia obtupefactum primo fere incurfu fuderit; viginti quinque navibus captis. Hæc pugna, quam Annales Veneti omnino comprimunt, nimis scilicet populo Veneto erubescendam, non tam classis victæ magnitudine, quam admiratione virtutis, magnis ac claris victoriis æquata est: eodemque aurei aulæ dono ac sacro anniverfario ad ædem divi Germani, cujus die festo parta est, decorata.

Tantus novus hostis additus intestinas discordias, quæ inter Guelphos & Gibellinos per quinquaginta annos civitatem continenter vexarant, ad aliquantum tempus consopivit: qua in re opera & officium seduli pastoris Jacobi Varaginenfis Archiepiscopi, viri pii ac sancti, constitit: qui hortando, monendo, rogando, divini Numinis discordias abominantis metum injiciendo, non prius abstitit incepto, quam inchoata consilia ad effectum perduxit: eo igitur auctore, concordia & pax inita est anno ejus sæculi nonagesimo quinto, qui rectorem habuit Jacobum Calcanum Mediolanensem.

Clades accepta non tam ferociam Venetorum contudit, quam iram & indignationem accendit, cum dictarent, ne nimis magnam Genuenses putarent, si, tot detrimentis a Venetis acceptis, ipsi semel vicissent: quæ victoria non tam ipsorum virtute quam Veneti præfecti negligentia parta esset: ceterum ejus fortuiti eventus gaudium ipsos illis breve facturos; vanissimorumque hominum inanem arrogantiam funestam illis fore: qui præpotentem civitatem, cum cujus opibus & virtute haudquaquam par illis certamen sit, sibi hostem sumere audeant: sese enim ingenti classe armata, in Liguriam navigaturos; ipsasque portus Genuensis fauces navibus suis infesturos. Hæc atque ejusmodi multa cum tumida oratione jactarent Veneti; Genuenses verborum ferociam rebus ac virtute retundendam rati, è vestigio comparare instituunt; nuncioque ad Venetos missio, gratias ultro agunt, qui occasionem Genuensibus præbere in animo habeant, experiendi, utra gens militari gloria præstet: properarent igitur comparare: sese enim quoque nihil in comparando de summa diligentia remissuros: ceterum, ne nimia itineris longitudo certamen differat; medium aptiorem fore locum, qui utrique populo & laborem viæ adimat, & efficiat, nulla in re alter altero superior fuisse videatur. Siciliam igitur se delegisse; quæ media pari fere intervallo utrique populo sit: ejus insulæ littora ipsorum controversias decretura. At Bonifacius Pontifex maximus tantis motibus & apparatibus belli cognitis, ne muneri suo decisset, pacem inter Christianos populos componendi, utriusque populi Oratores, ac Pontifices ipsos accersivit; quos ad se introductos in hanc sententiam ad pacem hortatus dicitur: *Bellica virtute animi & navali industria nihil Majoribus vestris inferiores, uterque ab illorum pietate, ac religione, animique moderatione, & sapientia degeneratis, filii: illi enim nihil alieni*

appetentes, nulla summi loci ambitione transversa acti, omnia sua studia in Christianam rem tuendam, augendam, propagandam vertebant: illorum animi impetus omnis in religionis nostræ hostes ferebatur: vos contra, Christiani nominis ac professionis obliti, vires atque opes vestras in vos ipsos atque in mutuum perniciem vestram confertis. Quem tandem alium fructum ex contentionibus istis vestris petitis, filii, quam eum, quem superiore bello percepistis, mutuarum cladum? jucundum interea spectaculum communibus & atrocissimis hostibus nostris præbentes, vos ac vires vestras internecinis his bellis consiciendo: quæ formidolosa in primis sunt illis; quippe sine quorum classibus nullus sit ad eos Christianorum Regum & exercituum accessus. Si vos fratrum vestrorum, quos in Oriente durissimum servitutis jugum premit, nulla misericordia capit; si religionem negligitis; at saltem vos ipsos ac res vestras respicite: quibus, præter commune hoc cum ceteris Christianis pietatis officium, quadam major necessitas imposita est, providendi, ne hostes nostri supra modum crescant: commercia enim, quibus uterque vestrum alitur, omnesque fere res vestra in regnis Orientis implicata sunt: qua regna cum vestro exitio ab immanibus hostibus nostris teneri, ipsi juxta nobiscum intelligitis. Per Deum immortalem, filii, respicite aliquando; irasque vestras per levibus de causis irritatas, ceteris detrimentosas, vobis ipsis exitiosas, Christiano nomini, fratrum vestrorum miseris, rebus ac salutis vestra, Majorum vestrorum contestata pietati condonate: Christi Vicarium audite; ac divini Numinis ultricem iram vobis ante oculos ponite. Nihil sedula Pontificis cura profectum est: tantum uterque populus certaminis animis imbiberat: facrique Antistites & Legati, cum quattuor menses in Aula Pontificia fuissent, re infecta in sua reversi sunt.

Interea Genuenses mensis curriculo classem ducentarum triremium compararunt: quæ postea ad centum sexaginta redacta est: in qua præter remigium, is ipse Jacobus Varaginenfis Archiepiscopus, qui præsens fuit, numerumque se iniisse in Annalibus suis tradit, ducenos videnos bellatores, & socios nauticos, in singulis triremibus fuisse tradit, omnes Ligustici nominis: ceteris repudiatis; quorum magna vis Genuam confluerat, ut tam splendido certamini interessent: ad numerum hominum & bellicos apparatus, quibus classis asiaticam instructa fuit, omnis opulentia insignium armorum & vestium accesserat: octo enim millia hominum numerata sunt, olofericis & aureis vestibus induturum. Tantæ classis idem Ubertus Auria clade Pisfanorum clarus præfectus fuit: qui cum Siciliam appulisset, ac decem octo dies in ancoris fuisset, hostem expectans; illo nusquam comparente, hymeque appetente, satis ad gloriam profectum ratus, in patriam reversus est. Eo anno aquæductus, diuturni laboris ac magnæ impensæ opus, ad finem perductus est: quod ab Annalibus non omisum, ne nobis quidem silentio prætereundum visum est. Ridicule Augustinus Justinianus veteribus Romanorum aquæductibus opus hoc æquat; amoris patriæ potius nimium indulgens, quam verus rerum æstimator: infinitis enim partibus inferius est hoc opus operibus illis, in quibus Romanæ potentia vis haud in postremis expressa est.

Felicitibus belli successibus intestinæ contentiones continuatæ sunt; Factionibus Gibellina & Guelpha ad arma inter se insequenti anno ejus sæculi nonagesimo sexto insurgentibus; inter quas magno odiorum certamine ac cruento praelio in ipsa urbe dimicatum est: in quo nonnulli nobiles cives ceciderunt. Cessare tandem Guelphi; Grimaldis & Fliscis ejus Factionis capitibus civitate a Spinulis & Auriis expulsis: qui victores, causam prætexentes, quod nihilo magis civitas principatu ab ipsis deposita quievisset; quin etiam summum duorum capitum imperium plurimum valere, ad audaciam in-

inquietorum hominum coercendam, & tranquillitatem civitatis tuendam; principatum sex annos intermissum usurparunt. Creati igitur sunt, dum summa ac soluta omnium rerum potestate, Capitanei civitatis Conradus Spinula & Conradus Auria, utriusque Uberti filii; nullusque externus Praetor est accersitus, omnia Capitaneis ad se trahentibus.

Rebus urbanis in tranquillum redactis, bellicarum rerum curae redierunt: igitur cum auditum esset, Venetos ingentem classem comparasse, qua Genuensium res infestas facerent; armatae sunt adversus eos quinque & septuaginta triremes, Gando à Mari praefecto: qui portu solvens, ac per Orientis maria discurrens, hoste multis in locis perquisito, nusquam invento, in sua se recepit: qua recognita, Veneti, qui portubus suis se continuant, ejus metu liberati in apertum mare prodeuntes multis atque ingentibus detrimentis Genuensium res & ditionem affecerunt: quae non minus quam superiorum annorum damna ab Annalibus nostris omiſſa, ex Scriptoribus Venetis, penes quos fides sit, haud ab re duximus in historiam nostram inferere; si prius dixerò, quod ab Annalibus nostris traditum, omittendum non fuit: pertinere enim videntur ad civitatis nostrae dignitatem augendam, quae à civibus nostris non modo publice, sed etiam privatim fortiter & magnifice ac religiose facta sunt. Eo igitur anno Roscius Auria, cum egregiam multorum annorum operam pro clasſis praefecto Constantinopolitano Caesari in Ponto Euxino navasset, nonnullaque loca expugnasset, hoc laborum & meritorum praemium optavit, ut corpore divae Anastasiae virginis ac martyris donaretur: quod Genuam delatum, in aede divi Matthaei collocatum est: in qua magna cum veneratione & religione adservatur: nunc ad institutam seriem contexendam redeo.

Tradunt igitur Venetorum Annales in numero navium variantes, cum alii sexaginta sex triremes, alii quadraginta sex tantummodo fuisse dicant; Venetos, Rogerio Mauroceno praefecto, initium belli fecisse à Pera, quae tum vicus erat nondum moenibus cinctus, capta & incensa: eadem clade urbi Phocensi, quae Folia vetera appellatur, illata, magnaque illius parte eodem incendio absumpta. Insequentique anno Joannem Superantium cum quinque & viginti triremibus Theodosiam urbem, quae nunc Casa appellatur, ad Tauricam Cheronesum Genuensi imperio parentem occupasse, ibique hyemare coactum, maximam remigii partem vi frigoris amisisse. Haec Veneti Annales: quae ego à nostris compressa, vel negligentia omiſſa stricim attigi. At, quae sequitur, insignis & ad omnem posteritatem memorabilis clades, inter utriusque populi Annales constat.

Genuenses igitur anno ejus saeculi nonagesimo octavo cum audivissent, Venetos classem nonaginta octo triremium instruxisse; ipsi quoque octo & septuaginta triremes armarunt: nonnulli tradunt parem fuisse Genuensium navium numerum. Sabellicus numerum Venetarum navium fatetur, quas nonaginta quinque fuisse dixi; Genuenses non plus septuaginta fuisse tradit: quae res gloriam Genuensium amplificat; siquidem numero tanto inferiores concurrerunt. Tantae clasſis praefectus fuit Auria alter ex Capitaneis, qui Conrado successerat, vir acer, ac strenuus, magnique consilii ac rerum navalium usus: qui sinum Hadriaticum ingressus, cum cognovisset hostem ad Corcyram nigram stare, nihil majore numero hostilium navium deteritus, avidus clades acceptas ulciscendi, ad eum contendit: nec Venetus, hoste in conspectum dato, certamen detrectat: utrique classem in pugnam dirigunt: suas quique spes in certamen afferentes. Venetus numero navium tanto superiore confidere; Genuen-

A sem conscia virtus & clarissima de Pisanis recenter parta victoria ferocem facere: quem viribus consilium addidisse ferunt; quindecim triremibus à clasſe segregatis, & in altum missis; quae, favore ventis captato, pugna conferta, latera Venetae clasſis invaderent: quod ab illis diligenter servatum, non in postremis causam victoriae fuisse memorant. Eam rem silentio praetereunt Annales nostri; ut ceteros omnes ejus pugnae casus, quos varios fuisse necesse est: tantum enim vicisse Lambam dicunt; atque omnem fere classem Venetam cepisse, cum non plus duodecim triremes evaserint: ex captisque navibus sex & sexaginta incendisse; eodemque incendio Corcyram nigram, quod opidum postea *Curzola* vocatum est, ad quod pugnatum est, captum igne à Genuensibus injecto conflagrasse: ipsumque Lambam Ducem, cum reliquis decem octo captivis, ac septem millibus Venetorum captis, Genuam rediisse, portumque triumphantium more ad septimum Kalendas Novembris intrasse; tota civitate obviam effusa ad habendos honores, qui tantae gloriae civitatem compotem fecisset: triumphumque minus conspiciendum fecisse Andream Dandulum praefectum Venetae clasſis spectaculo substractum: quem ipsi Veneti Scriptores tradunt ignominiae impatientem, atque in rabiem versum, capite ad asserem colliso, illico expirasse. Nihil horum ab Annalibus Venetis traditur: tantum captivorum numerum minorem faciunt, non plus enim quattuor millia ponunt: in certamine narrando, quod uno aut altero verbo Annales nostri attingunt, paullo diligentiores sunt; diuturnum enim ac cruentum, & atrox, id quod necesse est, tam acerbis odiorum & irarum stimulis utrosque irritantibus, fuisse dicunt: magnamque Venetorum editam stragem. Tanta victoria anniversario sacro more Majorum, atque aurei aulae dono ad altare divae Mariae in aede divi Matthaei ad sextum Idus Septembris, quo die parta est, celebrari decreto publico jussa est. Hanc pugnam Annales nostri postremum opus secundi hujus belli cum Venetis gesti faciunt: quod tempore quidem primo brevius fuit, septimum enim annum non excessit, ceterum cladibus atrocibus: at Veneti Scriptores multa addunt, quae nomini Genuensi perhonorifica ab Annalibus nostris praeterita minus mirabitur, si quis illorum temporum in scribendo negligentiam notam habuerit: tradunt igitur Veneti Annales, Venetos, reparata clasſe, viginti quinque triremes Marcio Boncio praefecto misisse; quae insulis in Aegæo & Jonio mari ditionis Venetae praesidio essent; hancque classem non feliciore eventu quam superiorem ad Corcyram cum Genuensibus conflixisse, eoque majore mœrore ac luctu secundam hanc minorem cladem quam longe majorem Corcyrensem Venetos affecisse; quod quemadmodum in affecto corpore modica accessio, quae vires debilitatas aggravet, magis sentitur, quam in valente integris viribus resistentibus magna morbi incumbens vis; ita hujus minoris Helleſpontiaci damni Venetorum viribus attritis, quam illis vigentibus gravioris Corcyrensis Venetis major sensus fuerit: hac victoria parta, Genuenses impetum in Cretam insulam vertisse, primoque adventu Cydonem urbem occupasse. Addunt praeterea, reparatis à Veneto viribus, saepe vario eventu dimicatum esse: tandem utrumque populum malis fessum ad pacem necessitate magis quam voluntate attractum: quae anno, qui insequitur, ejus saeculi nonagesimo nono tandem convenit, captivis redditus: finisque bello Venetorum quam Genuensium cladibus insigniori impositus est: quae res animos Pisanorum vehementer perculit, metuentes ne Genuenses molesto negotio liberati arma in ipsos verterent, quibus ipsorum affectae vires pares non essent. Ad necessitatem

A. C.
1299.

igi-

igitur compulsi sunt inducias à Genuensibus in viginti septem annos redimendi, civitate Jurrutana in Sardinia Genuensibus cedentes, omnibusque, quæ ipsi in Corsica tenebant, relictis: ad hoc centum triginta quinque millibus librarum Genuensium, pro impensis in bellum factis, persolutis.

At Capitanei, Guelpharum partium capitibus urbe exactis, satis potentiam familiarum suarum ac res Gibellinas stabilitas putantes, ad invidiam imminuendam, principatu sponte cesserunt: resque ad externos Prætores & rectores rediit. Conradusque Spinula à Petro Aragonio evocatus in Siciliam profectus, classium præfectus à Rege creatus est. Interea semina discordiarum, paullatim gliscentia, majoresque vires ac majus robur in dies assumentia, in apertam tandem seditionem cum magna civitatis perniciæ eruperunt.

A. C. Insequenti anno ejus sæculi ultimo, qui Bellotum Calcanum Mediolanensem Prætozem habuit, 1300. Grimaldi, cum quinque triremibus noctu urbem furto ingressi, cum magno clientium numero, urbe discurrentes, magnum tumultum excitarunt; Lanfranco Spinula, inter pedes oblato, interfecto: momentoque temporis civitas in armis fuit; ac Grimaldi fusi, multique eorum capti, carceribus inclusi sunt. Sacris eo anno populo Genuensi à Bonifacio Pontifice interdictum est; per causam, quod Gens Spinula & Auria, quæ rerum genuæ potiebantur, partibus Aragonensibus, contra jussu Pontificis, faverent; Petrumque Regem pecuniis & classibus juvarent: quod tamen interdictum anno insequenti

A. C. millesimo trecentesimo primo ab eodem Pontifice 1301. remissum est; pace inter Carolum Andegavensem Neapolitanum Regem, cui Bonifacius impense favebat, & eos Genuenses, qui in contrariis partibus erant, inita.

A. C. Quattuor insequentibus ejus sæculi annis, Genuæ, 1302. sub Prætoribus, ab externis bellis & ab intestinis 1303. motibus otium fuit: nihilque in illis memorabile est, 1304. præter molem auctam, & portum Genuæ in longitudinem centum quindecim cubitorum amplificatum 1305. & excavatum; atque adventum ad urbem Calabrensis Ducis Caroli Regis filii, magnifice & appariate ab Opicio Spinula, omnibus consiliis viam sibi ad futuram amplitudinem struente, excepti.

A. C. At anno, qui insequitur, discordiæ atque intestina certamina longe majoribus quam antea motibus repetita sunt: novæque discordiarum causæ ad veteres additæ, ac novæ Factiones, tamquam veteres parum civitatem lacerarent, exortæ. Formidolosa erat Spinularum potentia; cum suis viribus, quæ supra quam modicæ erant, fulta, tum maximæ populi partis cum illis conjuncti favore subnixæ; ac non modo Guelphis, & contrariæ Factioni, sed Auriis ipsis invisæ, haud ferentibus Spinularum opes supra suas excellere; majoremque illorum esse in rebus publicis & apud populum quam suam auctoritatem: quæ res Aurias à veteri Spinularum amicitia, cum quibus semper omnia consilia consociata habuerant, abstraxit; & cum adversariis ipsis, ac perpetuis inimicis suis, adversaque Guelphorum Factione conjunxit; cum solus Barbanas Auria, consiliis à gentilibus suis separatis, in veteri amicitia mansisset; seque cum Opicio Spinula tum gentis suæ capite conjunxisset; quod tamen consilium tandem in ipsius caput recidit. Auctores hujus divisionis fuisse traduntur Guelphæ Factionis principes: qui iniquo animo ferentes totam Rempublicam Gibellinis, atque Auriis, & Spinulis cessisse, non satis æquis oculis inimicos suos regnantes adspiciebant; sese contra sine honore, sine dignitate, in contemptu omnium ignobilem ætatem agere, indignantes: cumque non se satis potentes intelligerent, ad inimicos suos conjunctos evertendos; quod aperta vi & armis se affecturos desperarent, id artificio tentare constitue-

A runt: nullam autem expeditiorem esse, quam discordiarum viam statuentes; Aurias & Spinulas inter se committendo, quorum conjunctorum insuperabiles vires una divisio posset evertere; discordias inter has duas familias, ad eum diem conjunctissimas, ferere coeperunt. Aurias igitur aggressi sunt, illorum vicem sese indignari simulantes; illosque in Spinulas instigantes, qui primum potentiæ & auctoritatis locum sibi in civitate peterent, plusque opibus & gratia apud populum valerent: quam rem illis turpem & ignominiosam nullo modo, si viri essent, ferendam dicunt; omnem suam & suorum opem, si aliquando expergisci ac dignitatis suæ vindices esse decrevissent, prolixè illis deferentes.

B Facile fuit sua sponte jam inclinatos, spe tantorum auxiliorum addita, impellere. Auriæ igitur, iis consiliis imbuti, simulque cum illis Grimaldi & Flisci, compluribus nobilibus familiis, quibus atque invisæ erat Spinularum potentia ac fastus, studia consociantibus, occulta consilia in Spinulas struere coeperunt: exorsi à querelis, quod leges & decreta ad Spinularum potentiam, ac plebis, quæ tota fere illorum esset, favorem magis accommodata essent, quam communem Rempublicam ac bonum civitatis spectarent: tandem die Epiphaniæ festo armis arreptis, seditionem excitarunt: quibus C acriter Spinulæ, plebe comitante, sese opposuerunt: atroxque prælium accensum est: quo in vesperum producto, victoria tandem penes Opicium ac Spinulas fuit: qui insequenti die, magna totius fere populi voluntate, Capitaneus & rector civitatis cum summo imperio creatus est, Barnaba Auria collega addito.

D Adversæ Factionis capita cum Auria gente urbe expulsi, nihil urbano prælio fracti, insequenti anno ejus sæculi septimo, in ditione Genuensi, quoniam in urbe non poterant, tumultus integrarunt; magnoque equitum & peditum numero coacto, Tabiam & Oneliam prævalida opida occuparunt: adversus quos Barnabas ipse Auria alter ex Capitaneis, ac Rainaldus Spinula, una cum Prætoze urbano, (qui magistratus, etiam Capitaneis regnantibus, non intermittebatur, rebusque forensibus & judiciis præerat) profecti sunt: qui, portu Mauritio sede sibi facta, colloquia de pace instituerunt; quæ tandem ad effectum perducta est, haud diu duratura; omnibus motuum auctoribus civitate restituta, qui sub finem anni in urbem reversi in verba Capitaneorum & Abbatis populi de plebe hominis jurarunt. Addiderant sibi, usitato more revocato, Capitanei cum magistratum; ad invidiam levandam, plebisque animos & voluntates tenendas: tamquam summum civitatis locum ac regimen rerum cum plebe communicassent; cum ille speciem tantum principatus teneret, vis omnis penes Capitaneos esset. Tumultus quidem hæc pax ad parvum tempus sistere potuit; ardentia odia atque execrabilia partium studia mitigare non potuit: quæ cum contentionibus, rixis, tumultibus, seditionibus, ferro, sanguine, mutuis credibus, domorum incendiis, non satis satiarentur, inquieta ingenia, atque in res novandas semper avida, novas sectas, novasque factiones inveniebant; tamquam dissidiorum causas dedita opera sibi multiplicantia: invisum erat non modo adversæ factioni, sed suis etiam nimium Opicii imperium, nimiusque fastus, formidolosæque cunctæ civitati opes: quas ille nova ac splendida affinitate firmatas invidiosiores fecerat; Argentina filia Theodoro Palæologo Andronici Græci Cæsaris filio Marchioni Montisferacis in matrimonium data: quam affinitatem Marchio expecterat, ut hominis potentis, ac multorum populorum dominatu fulti, tum autem Genuæ rerum potentis, viribus juvaretur ad nonnulla loca ditionis suæ amissa recuperanda. Hæc res Aurias, ut modo dixi

diximus, ab Opicio abstraxit, ac cum Guelphis conjunxit. Hæc eadem hoc anno Spinulas suos, eos, qui ad divi Lucæ cubant, ab illo abduxit; cum se ab illo negligi indignarentur, solosque apud illum esse in pretio & in honore Spinulas, qui Luculum incolunt, acerbè ferrent. Hi igitur cum Auriis ab Opicio jam alienatis, ac Grimaldis & Fliscis, occultis consiliis Opicii evertendi conjunctis, Barnabæ Auriæ persuadent, ut filiam ipse quoque suam Marchioni Saluciarum matrimonio jungat; ne inferior Opicio esse videatur: quæ res effectum habuit, cum Salucianus ex re sua non minus duceret, sese eadem Genuensis opis accessione adversus Palæologum communire.

Graviter & iniquo animo rem tulit Opicius, de qua ab Auriæ cælatus esset: dolorem tamen, quamquam animi impotens, in præsentia diffimulavit: indignationem & iram accendit Auriarum & Grimaldorum factum; qui insequenti anno ejus sæculi octavo, die Christi Domini natali, animorum conjunctionem, unam eandemque vestem iisdemque coloribus variatam induti palam professi sunt: quam rem tamquam in suam contumeliam factam, ac tamquam bellum aperte sibi comminantem accepit Opicius: qui inimicorum conatibus prævertens, per causam, quod illi occulta consilia rerum novandarum molirentur, Barnabæ collega non repugnante, armis arreptis, plebeque excitata, Aurias ac Grimaldos & Fliscos Guelphæ Factionis capita urbe exegit: ac, sive ne sic quidem satis se tutum putans, nisi suspecto collega amoto, sive socium principatus non ferens, impotentem animi libidinem insequenti anno in Barnabam effudit, astu non aperta vi usus: nam, cum ambo in consilio de rebus publicis agerent, Odoardus Spinula, Opicii patruus, armis arreptis, Barnabam captum in aedes publicas, quæ tum erant Abbatis populi domicilium, in custodiam dedit; Opicio invidiam rei ab Odoardo injussu suo factæ verbis detestante: posteroque die consilium universæ civitatis convocatum, Barnabæ magistratu abrogato, principatum civitatis summumque ac perpetuum imperium uni Opicio mandat.

At exsules opulenta opida portum Mauricium, Andoriam, Albingaunum occupant; adversus quos Opicius prævalidas copias ab urbe mittit: quæ irritò incepto redierunt: cum interea Barnabas, custodibus cœnantibus occasione arrepta è carcere evasisset: quem Spinulæ sancti Lucæ occultis Opicii hostes in aedibus suis triduo occultaverunt: quorum opera, cum Saxellum incolumis se recepisset, magni ad civium concursus Factionis Guelphæ subito facti sunt: qui consilia cum illo Opicii imperio, per vim, ac scelus, & perfidiam in collegam partem deijciendi coquere cœperunt: quæ tandem in apertum bellum eruperunt; ingentibus pedestribus & equestribus copiis coactis, quibus septi Grimaldi & Flisci, compluribus Factionis Guelphæ comitantibus, ac cum illis Auriæ ad urbem accedunt: quibus Opicius, validis copiis urbe eductis, magna audacia ad ædem divi Andreæ, prope ab urbe quattuor passuum millia occurrit: præliumque illic commissum est, quale, acerbis odiis illud accendentibus, esse necesse fuit: in quo Opicius victus est; Prætor, qui secum exierat, interfecto: ille vero fuga periculum evasit; seque in opidum Gavium contulit: ita Opicius, principatu tanta contentione petito, fraudeque ad vim adhibita, parto brevi excidit. Victores urbem ingrediuntur; iramque & conceptum odium, quando in ipsum non poterant, in res Opicii evomunt; illius atque Odoardi & Rainaldi Spinularum aedibus incensis, bonisque proscriptis, ipsoque ac Luculanis Spinulis perpetuo exsilio mulctatis: sedecimque homines, nullo populi consilio vocato, civitati, & di-

tionis usque ad Kalendas Junias regendæ præficiunt; ac Robertum Bevaniam Abbatem populi creant: cumque Kalendæ venissent, regimen rerum inter Nobiles & populum divisum est; duodecimvirali Magistratu creato, pari utriusque corporis numero.

Nec tamen res diu quieverunt. Spinulæ enim Luculani exsules Opicio Duce, Marchione Montisferacis armorum socio sibi adjuncto, cum octo pedum millibus ac sexcentis equitibus urbem petunt; atque in littore ad sanctum Petrum arenæ (ita vocatur locus) castra ponunt; sperantes suum adventum aliquid in urbe moturum: qua spe frustrati, simul annona deficiente, atque effusis imbribus conflictati castra retro movere atque in sua se recipere coacti sunt. At Guelphi, Francisco Flisco cum quadringentis equitibus misso Buzallam Spinularum ditionis opidum incendunt: quibus adversis successibus nihil ferox Opicii animus infractus, iram suam pari excidio & incendio opidorum patriæ ultus est; Montaldo, quod viginti dies obsessum tenuit, & Vultabio opidis funditus everfis: adeo omnia pudoris & caritatis erga patriam jura execrabilis Factionum rabies perfringebat: cum ex altera parte Galeortus & illius fratres Spinulæ haud dissimili furore agitati, opido Monæco occupato, cum triremi tota Ligustica ora discurrentes, prædamque navium ac mercium civium suorum agentes, Genuensia littora ac commercia civitati infesta facerent; nihil turpe aut erubescendum putantes, quoniam inimicos solos non poterant, patriam simul cum illis premere & detrimentis afficere. Missus est contra eos Faravellus Auriæ, cum duabus triremibus; qui longo & cruento prælio congressus, triremem tandem cepit; ex captisque hominibus duos & triginta suspendio sustulit; inusitatum ad eam diem exemplum inducens, cives captos in bellis civilibus necandi.

Ea tum erat civitatis nostræ conditio; ut ardentia partium studia animos civium inter se armarent, omniaque cædibus, minis, incendiis miscerent; eosdem tædia cladum ac lassitudo laborum veluti fessos non tam conjungerent, quam ad tempus sedarent & consopirent; pace numquam sincera fidem inita, & odiis alte animis insidentibus numquam exstirpatis; qui parvi temporis quiete refecti, ac viribus sumptis, in mutuam perniciem quacumque levi de causa insurgebant, intermissaque certamina & contentiones integrabant: ut tum accidit, pace Magistratus opera cum exsilibus composita; qui omnes civitati & rebus suis restituti sunt, præter Opicium, biennium adhuc exsulare jussum; ingenti pecuniæ vi ad incendiorum & ruinarum detrimenta accepta compensanda, illis numerata: cum contra ipsi opida occupata Reipublicæ restituisent: quæ pax facultatem fecit, decem triremes Hierosolymitanis Equitibus auxilio mittendi; qui eo anno à viginti quinque quoque triremibus Pontificiis adjuti, Rhodum, ac nonnullas alias circumjectas insulas Turcis expulsi ceperunt: eamque urbem, & insulam sedem sibi & arcem delegerunt.

Qui sequitur annus ejus sæculi undecimus insignis in primis est; magna Genuæ regiminis mutatione facta, ac primo extero dominatu introducto: qui mos, initio hinc factus, velut probato exemplo traditus, frequens posteritati fuit: ut mirum sit, quod is populus, qui in imperio in alienigenas & procul remotas gentes proferendo tam acer & pugnax fuit, nullisque hominum & pecuniarum impensis parcens, ac nulla discrimina fugiens, majestatis nominis sui atque injuriarum adversus maximos & præpotentes Principes acerrimus vindex; idem domi nihil de libertate sua laboraret, finem contentionibus & intestinis malis

Dd (omni

(omni alio remedio vano experto) externo dominatu imponens; non magis in parto externarum rerum imperio retinendo pertinax, quam in libertate ipse sua projicienda facilis; atque æque in jugo aliis imponendo, & ab aliis accipiendo promptus: ut vix credibile videatur, eadem præservida ac vivida nationis nostræ ingenia, externi dominatus minime omnium gentium patientia, id quod semper declararunt, rectoribus adscitis mox ejectis; ejusdem in primis appetentia fuisse.

Origo hujus moris, ut diximus, hoc anno facta est: quo Henricus Cæsar ad diadema Cæsarianum accipiendum Romam petens, in itinere Genuam divertit, omni honorum genere ipse cum Margaritha uxore acceptus. Is statim claris virtutibus suis omnium animos in sui admirationem convertit; cum omnes sincerum ab omni labe ingenium ac concordiam amans, discordiasque & contentiones abominans; tum autem justitiæ & æquitatis studium suspicerent: quibus laudibus voluntates omnis ætatis omnisque fortis hominum ad sese ita attraxit; ut omnes hominem de cælo sibi demissum prædicarent, ad vulnera miseræ civitatis sananda: quare remedium malorum, quod domi invenire non sperarent, ac foris esset quærendum, id ultro divinitus oblatum nullo modo esse respuendum; ceterum nullum effectum consilium habiturum, nisi arbitrio omnium rerum, ac regimine civitatis, sapienti atque optimo Principi libere permissio: neque aliter res ad exitium ruentes sisti posse. Quod igitur in perditis rebus ultimum malorum esse solet, servitus; id tum Genuenses unam salutis suæ arcem & columnen putantes, imperium civitatis vicennale illi mandant: populusque in aream Sarzanam congregatus in verba Cæsaris jurat: qui anno insequenti incunte, ejus sæculi duodecimo, Ugucione Fagiolano magni in rebus bellicis eo tempore nominis Vicario Genuæ relicto, itinere intermisso repetito, urbe Pisis prius adita, rebusque laborantibus ibi quoque constitutis, Romam se contulit; diademateque accepto, Pisas repetit: consiliisque ad Robertum Regem ac ceteros Imperii rebelles bello persequendos destinatis, classes quantas maximas uterque populus eniti posset, à Pisanis & Genuensibus instrui jubet. Dicto audientes fuerunt haud retractanter Genuenses, magnaue diligentia comparare instituunt; Lamba Auria recenti Corcyrensi victoria fulgente præfecto designato: ceterum tantorum consiliorum inchoatus cursus subita optimi Principis morte in opido Bonconvento interruptus est. Fagiolanusque paullo post Pisas se contulit, Dux belli adversus Lucenses à Pisanis accersitus.

Morte Henrici, cujus vel sola nominis majestas ad efferentes se insanarum Factionum libidines cohibendas satis valebat; ac discessu Fagiolani, omni verecundia liberati Genuenses ad ingenium redierunt; contentionesque ac civilia bella majoribus motibus integrarunt: quæ miseræ civitatis fatali rabie in exitium suum præcipitis prævalentisque populi vires ita attriverunt; ut, qui imperium suum in longe diffusa regna ac remotissimas oras extendissent, validasque urbes & insulas expugnatas adversus maximorum Principum impetus defendissent, urbem ipsam Venetias Italiæ clarissimum lumen atque veteris fortunæ opulentia abundantem arta obsidione pressissent, ad extremumque discrimen adductam, ad necessitatem pacis suppliciter petendæ iis conditionibus, quas victori imponere libuisset, adessent; patrum nostrorum memoria Pisanum finitimæ urbis imperium ultro delatum viribus suis diffusa repudiaret.

Initium motuum à Gibellinis factum est; qui anno insequenti ejus sæculi tertio decimo, Guelphis urbe exactis, civitatis principatum invaserunt; rebusque regendis viginti quattuor Factionis suæ

A homines præfecerunt, duodecim ex Nobilitatis corpore, totidem ex populo: quo impedimento amoto, ipsa inter se Gibellinorum capita Auria & Spinula gentes arma verterunt: pace inter eas virtute & diligentia Saraceni Mantuani Prætoris more Majorum accersiti composita, mox elusa. Ejus motus origo & causa fuerunt, Turriani, & Marchiones, duæ, ut in eo opido, præpotentes familiæ, Rapalli incolæ: quorum illi amicitiam Auriarum sequebantur, hi Spinulis se applicarant: quibus inter se discordibus atque armis contendentibus, haud contemnenda auxilia Genua insequenti anno ejus sæculi quarto decimo utraque familia suis quæque favens misit. Illorum Duces fuerunt Catanius & Simon Auria; horum Galeottus Spinula: quæ tamen copiarum, nonnullis probis & quieti ingenii civibus se interponentibus, statim ex itinere revocatae sunt: quod pium consilium in malum vertit: quæ enim arma extra urbem destinata à clientulis suis abstinerunt; ea in urbem revocata in se ipsa nobilissimæ familiæ cum magno civitatis motu converterunt. Catanius enim Auria urbem cum cohortibus, quas ducebat, ingressus mox exclamavit: *Io Auria, io gens concordia amans, atque omnes cives fraterna caritate complectens: ve Spinulis, ve genti tyrannidem patria molienti, atque ipsi soli regnare cupienti*: ad quam vocem subito civitas in armis fuit; atroxque prælium accensum est; quod ad vesperum extractum multos ex utraque Factione absumpsit; in quibus fuit ipse Catanius Auria tumultuum auctor, errore à suis tragula tractus. Bellum hoc intestinum viginti quattuor dies duravit; quibus continenter dimicatum est: quod nonnullorum pacis studiosorum civium opera paullisper intermissum gravius iterum renovatum est, initio à Spinulis facto: qui tempore captato, Aurias in ipsorum area, quam illi validis munimentis ac delecta florentis juventutis manu firmarant, adorti sunt: quos etiam ex area Luculana loco eminentiori sita ingentia saxa è ballistis, aliisque bellicis machinis contorquentes petebant: quibus testæ ædium perfringebant, ac plurima detrimenta inferbant: ceterum, fortuna brevi variante, victoria penes Aurias tandem fuit; cum præpotens gens Grimalda, omnesque Guelphæ Factionis familiæ præter Fliscos, qui cum Spinulis fuerant, ac magna Gibellinorum pars, se cum Auriis conjunxissent. Spinulæque ad extremum à Fliscis quoque deferti urbe cedere coacti sunt.

At Auria civitatis potentes facti, inclinatam inimicorum fortunam urgere pergunt; Dominico Auria cum prævalidis copiis adversus eos anno insequenti ejus sæculi quinto decimo misso: cujus initia quamquam secunda fuerunt, compluribus detrimentis hosti illatis; tamen vertente se fortuna, inter Serravallem & Arquatam opidum magna copiarum parte deleta cæsus est. Acerbe Auria & Grimaldi, qui cum illis faciebant, acceptam eadem tulerunt: qui dolore ardentes, omnibus suis & amicorum viribus connisi, ingentibus copiis contractis, quarum numerus fuisse dicitur peditum quindecim millia, equites mille quingenti, iique cataphracti, Manfredo Marchione Carrettano Duce, ad Spinulas contendunt: qui à Spinulis sese audacter opponentibus in transitu jugorum ter repulsi sunt, cum magna suorum cæde: tandem superabundante multitudine ex urbe subinde affluentium, nimia incumbenti mole Spinulæ succumbere coacti, terga vertunt, multis ex suis amissis: in quibus septem fuere ex ipsa gente Spinulæ: victores, hostibus fugatis, Buzallam opidum captum diripiunt & incendunt: ceterum lætitia partæ victoriæ brevili-xuriavit, & vana evasit; magna plaga à suis metaccepta. Germani enim, per causam, quod pars stipendi-
diorum, quæ sibi deberi contendebant, quorum dies exie-

exierat, non perfolveretur, seditione commota (qui perpetuus est illius gentis mos) ad mille numero interfectis, Manfredum ipsum Ducem, ac Lambam Auriam, duosque ejus filios captivos factos tandem in opidis Gavio & Vultabio in custodia tenuerunt, donec stipendia ipsis numerata sunt. Similis fortuna in Spinulas incubuit; Uberto Spinula Rainaldi filio, cum nonnullis, à ducentis Germanis equitibus, quos conduxerant, trucidato; iratis, quod unus ex ipsorum natione Buzallæ in privata rixa obtruncatus fuisset: ita similibus cladibus Fortuna in utramque gentem opes suas versavit.

A.C. 1316. At Spinulæ cladum acceptarum dolore ardentis, insequenti anno ejus sæculi sexto decimo magnis coactis copiis, jugis montium transscensis, in vallem Porciferæ descendunt: vesanæque iræ impetum in ipsius Reipublicæ res evomunt; Buzallæ incendium Pontis decimi Reipublicæ ditionis opidi excidio uli.

A.C. 1317. Anno insequenti ejus sæculi decimo septimo, cum, Spinulis contusis, civitatisque regimine æquis partibus inter Gibellinos & Guelphos distributo, res satis quietæ essent; ecce novæ dissidiorum causæ exortæ sunt. Spinulæ enim patria extorres tædio exsulii ac cladibus fessi, petierunt, sese ut ceteros cives, in civitatem recipi, æquo jure cum ceteris victuros. Variatum in urbe sententiis est: Flisci enim & Grimaldi, occasione apta inchoatis consiliis discordiarum inter Gibellinas familias alendarum arrepta, favoremque suum ad Spinulas transferentes, æqua Spinulas postulare dicebant; neque ullam esse causam, cur, cum ceteri patriam incoherent, una gens Spinula fortunæ splendore, rebusque gestis & meritis in Rempublicam clara, patriæ perpetuo expers esset; complectendos esse cives, non perarcendos, si finem pertinaciæ faciant, ac sub legibus & Magistratibus esse velint: neque aliter civitatis quietem umquam stabilem fore: neque enim tantam injuriam & contumeliam, familiam cum tantis ipsam opibus abundantem, tum tot Principum amicitiiis, ac tanta clientium multitudine sultam, sedentem ac segnem laturam. Vehementer sese iis opposuit Conradus Auria, tum familiæ princeps; qui cum à sententia deduci non posset, Flisci & Grimaldi, maxima parte civium assentiente, indignantium unius hominis uniusque familiæ pertinacia concordiam civitatis distineri, Auriis insciis, Spinulas silentio in urbem introducunt. Fatale tum erat Genuæ, ut omnia consilia, quæ ad concordiam destinari viderentur, discordias immo magis accenderent; ut tum accidit. Auria enim, quibus Fliscorum & Grimaldorum animus, adversæ scilicet factionis hominum, suspectus semper fuisset, hoc factio interpretantes, illos numquam satis sincera & constanti in amicitia fide, ipsis desertis, ad eosdem inimicos suos Spinulas transisse, quorum prius Auriis amicissimorum illimet Grimaldi & Flisci fraudibus ac dictis suis inimicitias ipsis conflasset; clandestinisque consiliis, & ab ipsorum conscientia separatis, communes hostes in urbem introduxissent; armis arreptis (cum nonnihil in urbe tumultuatum esset) urbe excedunt: in qua adversus tantam conspirationem in se unos intentam tuto esse non possent; magna clientium multitudine secum educa. At Flisci & Grimaldi, Auriis amotis, sese rerum potentes cernentes, armis sumptis principatum invadunt; Carolo Flisco & Gaspare Grimaldo ad certum tempus cum summo imperio Capitaneis & rectoribus populi Genuensis per tumultum creatis, qui Prætorem juridicendo retinuerunt; honoriore loco in confessibus, ad invidiam mitigandam, illi cedentes. Graviter ea res perculit Spinulas; qui eodem die, cum magno partes suas sequentium numero urbe excesserunt: sicque tota civitas, totaque Genuensis ditio, præter nonnulla

A loca à Gibellinis occupata, in Guelphorum potestatem venit.

B Grimaldi igitur & Flisci, adversariis urbe exactis, potentes civitatis facti, imperium artificio potius quam vi aut armis partum, non minore consilio, minoreve cura, & diligentia retinendum ac stabiliendum intelligentes, nullique rei indormientes, cum audissent, Saonenses & Ingaunos, inter ancipitia consilia his aut illis partibus se applicandi, incertis animis fluctuare, Rebella Grimaldum ad eos mittunt, qui persuadeat, ne à reliquis ditionis Genuensis populis consilia soli separent, sed simul cum illis debitam obedientiam Capitaneis deferant: atque utroque populo lustrato, Guelphos à Gibellinis fecernat: qui, cum, censu habito Ingauni, convenisset longe majorem in ea urbe esse Gibellinorum quam Guelphorum numerum, neque illi dicto audientes essent, ira percitus eos civitate ejicit: illi se ad Conradum Auriam & Rainaldum Spinulam conferunt; cum quibus Marchiones Cerræ ac Carrettani, Comitesque Intemelii & Linguilæ societatem conjunxerunt: quorum in se unum intentum impetum, cum non plus octo dies Rebella sustinere potuisset, urbe adversariis cessit, incolumis ab illis dimissus: quo exemplo incitati Saonenses, qui ipsi quoque maxima ex parte Gibellinas partes profitebantur, à Capitaneis deficiunt: Edoardo Auria & Andaloo Spinula in urbem introductis. Hanc urbem maxime omnium opportunam sedem sibi belli delegerunt Gibellini; novoque muro à parte in mare vergente cinxerunt, latius spatium munimento amplexi: igitur Gibellini duabus his urbibus sibi firmatis, omnibus curis in vires suas augendas intenti, ad florentes Matthæi Vicecomitis opes confugiunt; qui opulentissimam urbem Mediolanum titulo Vicarii Cæsariani imperio obtinebat, cuique complures Cisalpinae Gallia prævalidæ urbes parebant: qui acerrimus partium Gibellinorum assertor, haud gravate cum illis arma conjunxit: societati accessit Canis Scaligerus Veronæ Dominus, magnæ ipse quoque potentia vir.

D Tantis igitur societatibus Gibellini fulti, animisque sublati, ingentes terrestres & equestres copias cogunt: quibus præfectus est Marcus ipsius Matthæi filius. Ex Longobardia igitur anno insequenti ejus sæculi decimo octavo moventes cum omnibus copiis Genuam iter intendunt: cum interea Guelphi, his motibus cognitis, ipsi quoque in comparando, urbe munienda, præsidii firmanda, omnibusque necessariis ad tantam in se intentam molem sustinendam expediendis, nullas diligentia partes prætermisissent. Gibellini igitur Genuenses fines ingressi, urbem arcta obsidione cingunt, bipartito confidentes, castris in valle Bisamnia & Porcifera locatis. E Primum opus fuit oppugnatio turris promontorii Phari: quam Guelphi munièrant, à qua haud mediocria detrimenta accipiebant, illorumque conatus remorabantur: ad quam undique circumventam cum omnis aditus urbanis esset interclusus, illi novam rem commenti sunt: noctu enim ex summo malo prægrandis onerariæ turri admotæ funem magnæ crassitudinis in arcem conjiciunt; per quem extentum arcula lignea unius hominis atque annonæ submittendæ capax, ansis exstantibus eo fune trajectis, ultro citroque excurrans annonam, quæ satis esset in usum septem hominum, qui erant in præsidio, quotidie tuto in turrim importabat. Spe igitur dejecti Gibellini turris per obsidionem potiundæ ad opera curas convertunt: quibus continuatis, ad radices turris subeunt; malleisque magna parte infimi muri præcisa, validisque asserebus suffulta; superstantibus, ni pertinaciæ finem faciant, ruinam turris suffulcris incensis, comminantur. Illi evidenti periculo victi in necessariam deditionem veniunt: qui ex pacto incolumes

mes dimissi, cum in urbem venissent; à furenti multitudine arrepti, nullam purgationem auribus admittente, horribili ac novo supplicii genere affecti sunt; è machina bellica, tamquam par saxorum numerus, longe contorti, corporibus in minuta fragmenta dissipatis. Eo igitur impedimento remoto, Gibellini copiis mœnibus admotis, cum Guelphis ad ædem divæ Mariæ Petræ minutæ manum conferunt: quibus retro compulsis, suburbia sancti Joannis & sanctæ Agnetis occupant, eaque præfidiis insidunt. Quibus successibus perculsi Guelphi, seque solos adversus tantas conspirationes impares intelligentes, à Roberto Neapolitano Rege, & ceteris Italiæ civitatibus, quæcunque partes Guelphas sequebantur, auxilia postulant. Rex nihil cunctatus, mille ducentos cataphractos equites subsidio illis extemplo submittit: quorum adventus concitatum Gibellinorum impetum aliquantum suppressit: eosque copias late sparsas contrahere coegit: ac sese, valle Bisamnia relicta, in suburbia capta subducere: qui etiam montem sancti Bernardi urbi propinquum validis præfidiis infederunt.

Missa auxilia Rex cupidus Genuensium amicitiae & fidei in se firmandæ, ipse paullo post subsecutus, in urbem à viginti quinque triremibus cum uxore ac liberis investus est; perhonorifice atque omnibus effusæ benevolentiae signis acceptus: qui longe majora spe, qua venerat, affectus est, imperio Genuæ illi tradi decreto; Genuensibus ratis eam rem stimulos Regi addituram, ad sua scilicet defendenda: populo igitur in area Sarzana congregato, cum Capitanei coram Prætoris atque Abbate populi magistratu se abdicassent, in imperia Joannis vigesimi secundi Pontificis, ac Regis, in decennium ab universo populo juratum est. Quæ res existimationem partium Guelpharum mire auxit; Florentinique, ac Senenses, & Bononienses, quos inter dubia consilia animis nutantes metus nimiae adversariorum potentiae ad eam diem compreslerat; tanti Regis societate partibus auctis; animis nudatis, armatorum subsidia Guelphis subinde mittere coeperunt. Quibus copiis aucti Guelphi montem sancti Bernardi cervicibus imminuentem tentare constituunt. Audaci igitur eruptione cum quattuor peditum millibus ac sexcentorum equitum ala, præfidia Gibellinorum montem insidentia magno impetu invadunt: ceterum illis locum acriter defendentibus, suisque illis auxilio accurrentibus, irritum incepto retro ad mœnia compulsi sunt. Munierant urbani domum quamdam ædi sanctæ Agnetis propinquam, qua stationem adversariorum infestam continenter faciebant; ponteque tecto eam domum cum mœnibus urbis junxerant; per quem subsidia armatorum & bellicorum instrumentorum in eam domum continenter submittebant: eam igitur domum, à qua non leviter læderentur, Gibellini proximo secundo successu elati, illi appropinquantes cuniculis evertere aggrediuntur: quibus cum Guelphi sese omni ope opposuissent, ingens certamen brevi contractum est: cujus exitus is fuit, ut domus, ignibus subjectis, eversa ruina sua trecentos opprimeret: cum certamina non magno cum operæ pretio numquam intermitterentur; Rex, penes quem unum rerum regimen erat, cum nullus esset Genuæ Pontificis procurator, nullamque in rem Pontifex se interponeret, moræ & diuturnæ obsidionis pertæsus, universæ pugnae fortunam tentare constituit, remque communi Marti decernendam dare.

A. C. Insequenti igitur anno ejus sæculi decimo nono, 1319. copiis bipartitis, Simonem Turrianum Mediolanensem, qui Guelphas partes sequebatur Vicecomitem hostis, cum quindecim peditum millibus atque octingentis equitibus, Sextum opidum mittit: ad quod opidum magna hostium pars confede-

A rat: ipse cum reliquis pedestribus & equestribus copiis, magno numero ad montes circumjectos sancti Bernardi & Peralti, prævalidis Gibellinorum præfidiis infestos, invadendos, urbe movet. Primum certamen ab iis, qui via maritima profecti erant, ad Sextum cum Gibellinis commissum est: eo Gibellinis iniquius, quod Guelphi maris potentes erant: qui, quamquam initio à Gibellinis aliquoties averfi sunt, tamen novis copiis ab urbe continenter submissis, quas triremes vehebant, firmati pugnam subinde ferociores integrabant: ut cedere tandem Gibellini sint coacti, littoribusque relictis in proximos montes copias subducere.

B Pari felicitate à Rege in montibus dimicatum est. Gibellini enim cum suos cecidisse cognovissent, animis concidunt; pugnaque ipsi quoque excedentes, munimenta ab ipsis excitata Regi occupanda relinquunt: adversis igitur casibus Vicecomes fractus, ad hoc intelligens in spem irritam tempus teri, oppugnatis, majoribus copiis, quam oppugnantibus, fultis, obsidione soluta, castrisque retro motis, transscensis jugis in sua se recipit: idem faciunt Genuenses Gibellini, Gavium se recipientes: pace inter Aurias & Spinulas, depositis simultatibus, sincera fide firmata. Hic finis fuit obsidionis, quæ decem amplius menses duravit: ad octavum Kalendas Aprilis superioris anni coepta, octavoque Idus Februarias hujus anni terminata; multisque ac magnis detrimentis & cladibus civitatem affecit. Guelphi parta victoria haudquaquam modeste usi sunt, in tecta ipsa rabiem evomentes; ædibus Gibellinorum regio sumptu exstructis magno numero incensis ac solo æquatis: totaque circumjecta regione, qua nulla exstructio-
C num magnificentia & hortorum amœnitate magis erat conspicienda, incendiis & ruinis deformata, & horrida facta: qui ad sævitiam projectam impudentiam addentes, tamquam victoria non de civibus, sed de infensissimis Barbaris ac Christianæ religionis hostibus parta, contra omnia vetustatis exempla, supplicationibus per urbem habitis, sacrisque reliquiis circumlatis, effusam animi lætiti-
D am testimonio testificati sunt.

At Rex omnia prius arbitratus fore, quam ut Gibellini tot cladibus confusi, ac viribus affectis, bellum repararent, nihil opus esse sua præsentia Genuæ ratus, rebus urbanis constitutis, Ricardo Gambasica gubernatore relicto, cum validis peditum ac sexcentorum equitum, neque contemnendi triremium numeri præfidiis, Avenionem ad Pontificem salutandum profectus est. Ejus discessus Genuam in antiqua mala redegit; obsidione
E longe diuturniore atque atrocior, quam præterita, renovata; longeque majoribus ac pluribus cladibus civitate affecta; horribilioribusque execrabilis sævitiae editis exemplis; cum Gibellini ingentiori motu, effratoribusque animis ad bellum undique consurrexissent: qui eo tempore totam fere Occidentalem oram, ac nonnulla loca Orientalis, ad hoc omnia transjugana Reipublicæ opida tenebant. Eodem igitur tempore Transapennini cum mille ducentis equitibus movent; ac superatis jugis in vallem Porciferæ descendunt; & sex triremes ex Occidentali ora profectæ portum ipsum urbis im-
F proviso ingressæ triremem majoris formæ, ingentis æstimationis mercibus onustam, capiunt: quas paullo post Conradus Auria, Saona cum viginti octo triremibus solvens, secutus est; urbsque terra ac mari obsideri coepta est.

Interea Guelphi nihil ad tantos undique intentos impetus animum demittentes, Gibellinis magna audacia terra & mari sese opponunt: turri promontorii Phari novo munimento ac præsidio firmata: cum cœnobium divi Benigi non contemnenda statione armatorum tenerent: ex quo tamen à Gi-

Gibellinis brevi ejecti sunt; ac nova castella, novaque munimenta in montium cacuminibus atque in aliis circumjunctis urbis locis ab illis excitata; qui etiam mari duas & triginta triremes opposuerunt; quibus inter se catenis ac trabibus junctis, tamquam continuata munitione ostium portus obstruunt; Gaspare Grimaldo ejus custodiæ præfesto: qui cum diem ad quintum Idus Augustas Gibellinis invadendis destinasset; illi, consilio adversariorum cognito, impigre prævertunt: sexque triremibus sub vesperum promotis, tres Guelphorum triremes, quæ se à reliqua classe separantes, ulterius processerant, classe Guelpha inspectante, neque opem ferre valente, vinculis, ut diximus, inter se nexa, capiunt: remigio incolumi, quod sese in terram ejiciens, periculum evasit. Eodemque tempore turris Phari à Gibellinis expugnata est; qui erant in præsidio, cedere tandem coactis; cum oppugnationem aliquandiu constanter sustinissent. At ii, quibus terrestris obsidio obvenerat, arcibus à Guelphis passim ædificatis relictis, adversus quas ipsi quoque multis in locis castella ædificarant, itinere per vicum Mulafanam vocatum facto, in vallem Bisamnam descendunt: quorum motu cognito, Guelphi cum mille equitibus ac quingentis sagittariis, urbe prodeuntes, ad cœnobium divi Joannis Porcerani consistunt; ibique invadentem Gibellinum expectare constituunt: quo cum Gibellini cum delecta mille quingentorum peditum manu, atque egregia sexcentorum equitum ala pervenissent; atrox prælium commissum est: Gibellinis gradum acriter inferentibus, Guelphis locum constanter tutantibus. Nox certamen ingenti irarum certamine accensum, in quo multi utrimque ceciderunt, fortuna neutro inclinata, diremit. Insequenti die Gibellini munimenta Guelphorum, ac collem Carinianum urbi junctum, urbemque ipsam à mari magno impetu invaserunt: sed irritus ubique conatus illo die fuit; qui ab eisdem Gibellinis crebro repetebantur; multaque prælia per varias occasiones commissa sunt.

Intercepta est per idem tempus epistola popularis cujusdam civis; qua Gibellini certiores fiebant de annonæ penuria, qua in urbe laborabatur: in comprehenso inductum ferinæ sævitæ exemplum repetitum est; homine machinæ bellicæ vivo imposito, atque in mare longe contorto. Cum appareret, obsidionem lentam, ac diuturni temporis, dubiæque spei rem fore; Gibellini, consiliis ad oppugnationem versis, magna vi ignium artificio compositorum, ac machinarum, & tormentorum, apparatusque bellicorum urbium expugnandarum in classem imposita, portui propinqui facti, infestis rostris naves Guelphorum fauces portus infidentes, canentibus signis magnoque impetu invadunt: illisque invitis via sibi patefacta, in portum irrumpunt; turrinque interioris portus, quem vulgus *Darsnam* appellat, ac cetera munimenta à Guelphis excitata aggrediuntur: Guelphisque nihil se deferentibus, quamquam primo nonnihil audacia Gibellinorum perturbatis; compluribus in locis est dimicatum: tandem nocte appetente, Gibellini irriti conatu inceptum omittere coacti sunt; compluribus ex suis in illis præliis desideratis: cum non pauciores de Guelphis quoque cecidissent: qui, ut par Gibellinis referrent, insequenti anno ineunte ejus sæculi vicesimo, urbe magno numero erumpentes, castella & munimenta Gibellinorum in cacuminibus montium Peralti & sancti Bernardi ingentibus animis invadunt: acrique pugna commissa, tandem à Gibellinis repulsi sunt; longe majore plaga ab illis accepta, quam ipsi superiore anno Gibellinis portum invadentibus intulissent. Fusi igitur ac profligati se in urbem recipiunt. Gibellinique audacia Guelpho-

rum irritati, portum ingressi, ingenti oneraria duabusque minoribus navibus incensis, triremem captam è portu educunt. Quibus damnis offensa plebs, quæ in Guelphis partibus erat, per tumultum & seditionem aream Spinularum petit; domumque Galeotti Spinulæ incendit. Eodem incendio à plebe objecto nonnullæ Auriarum domus conflagrarunt: processissetque ulterius res, nisi Abbas populi à Nobilibus, frementibus urbem deformari, exoratus, eo accurrens concitatum impetum frænasset; tectis domorum multorum civium ex Nobilitatis corpore prius disturbatis.

At Guelphi, urbano tumultu compresso, cum omnia ultima sibi tentanda decrevisset, ut urbem à molesta obsidione liberarent; cum præsertim Gibellini copiis ex Longobardia & aliunde continenter submissis in dies augerentur, nec circumjectos modo & urbi imminentes colles, sed omnia plana Sexti opidi & littorum Porciferæ late tenerent, prævalida classe sexaginta triremium comparata, partim ex recenter ab ipsis armatis, partim regis navibus, Constante Vicario regio classis præfecto, Sextum via terrestri ac maritima petunt, quibus in locis majus exercitus Gibellini robur confederat: hostemque magno impetu invadunt: quem acriter primo resistentem, magna illorum edita cæde, tandem avertunt: qui trepida ac celeri fuga Saonam se recipit; Guelphis terra & mari illos sequentibus & urgentibus.

Interea Gibellini, qui cacumina montium tenebant, magno ipsi quoque numero, rati tanta vi hominum educta, se civitatem defensoribus vacuum inventuros, urbi copias admovent; ac per suburbium sancti Stephani ac portam divæ Agnetis, quam incenderunt, percurrere tentant: sed inanis conatus evasit, Guelphis constanter se defendentibus. Interea Guelphi, qui Gibellinos cedentes Saonam usque persecuti fuerant, de expugnatione urbis, situ & opere munitæ, desperantes, ut aliquid operæ pretii facerent, cursum Albingaunum dirigunt: quam urbem à Gibellinis desertam intrant ac diripiunt; cum præfectus, cum omnia summa fecisset, Calabrenses ac Provinciales Galliæ Narbonensis avidos prædæ retinere non potuisset.

Felices Guelphorum successus, tantæque illorum navales opes Fridericum Siciliæ Regem Roberti potentiam æmulum in causam traxerunt: qui ea de causa quadraginta triremes comparatas è portu emissas Genuensem oram petere jubet, seque cum Gibellinis conjungere; quibus Gibellini viginti triremes, quas habebant, ex portu Saonæ obviam miserunt. Qua re cognita, Guelphi, qui Albingauno expugnato Genuam redierant, ingentem ipsi quoque classem sexaginta octo navium comparant; quam omnibus necessariis rebus affatim instructam, Lanfranco Ususmario præfecto, in hostem emittunt: neque dubitabatur, quin inter classes viribus & numero ferre pares accensa odia nobilem pugnam ac clade Genuensi insignem essent editura: sed longe aliter res cecidit, magna cum omnium admiratione: classes enim ad insulam Pontiam obviæ factæ, inter se spectabundæ, certamenque comminantes, neutra initium pugnæ facere ausa, nulla re tentata, seque mutuo omittentes, institutum iter utræque persecutæ sunt: classeeque Guelpha Neapolim appulsa; turba nautica ac Calabrum remigium regiarum navium, seditione excitata, per causam, quod stipendia debita sibi non persolverentur, necessarioque victu laborarent, à classe discessit: cum Carolus Calabriæ Dux Regis filius in illis retinendis summa omnia fecisset. Præfectus igitur cum classe manca ac claudicante, itinere repetito, cum ægre in portum Lunensem appulisset, ibi se continebat; aperto mari se committere non audens, metu

Gibellinæ classis, quæ viribus integra per circum-
jecta maria volitabat; arcemque, quam in opido Vul-
ture Guelphi tenebant, expugnaverant.

Quibus felicibus Gibellinorum successibus Ca-
strucius Castracanis inductus, partibus Guelphis in
Etruria ab ipsomet contusis, oblatam occasionem
urgendam ratus, cum victore exercitu Liguriam
ingressus, nonnulla opida, quæ à Guelphis in O-
rientali ora tenebantur, occupat. Tanti nominis
Ducis adventu vehementer perculsi Guelphi, cum
neque mari neque terra Gibellinis pares essent, ne-
que dubitarent, quin Castrucius omnem belli ter-
rorem ad ipsa urbis mœnia esset translaturus, curas
omnes, ceteris rebus ommissis, ad muniendam urbem
convertunt: suburbium igitur sancti Stephani, ac
collem Carinianum, quæ loca tum erant extra po-
mœrium, amplexi, nocturno opere diurnum ex-
cipiente, cum neminem ætas, aut sexus, aut digni-
tas, ac ne facer quidem ordo operis & laboris im-
munem faceret, appropinquato opere mœnibus ex
materia & humo exstructis cingunt: ceterum non
tam munimentorum spe, quam discessu Castrucii
è finibus Genuensibus, novis exortis motibus in
Etruriam revocati, Guelphi à summo metu respi-
rarunt: neque tamen Gibellini tantorum auxilio-
rum spe destituti, ab institutis consiliis oppugnandæ
urbis destiterunt; quam pridie Kalendas Octobris
bipartito terra ac mari aggressi sunt, copiis ad Ca-
rinianum admotis; eum locum, opere nondum per-
fecto, minus firmum ad resistendum rati: quam
spem auxit prima fossa à Siculis militibus terra,
arundinibus, aliaque varii generis materia impleta:
ceterum obsessis acriter locum tutantibus, magna
missilium vi superne emissorum prohibiti sunt ad
secundam fossam penetrare.

Haud dissimili fortuna in maritima oppugnatione
usi sunt; cum, ingentis magnitudinis navi ac non-
nullis aliis navigiis magna bellicarum machinarum
& tormentorum vi refertis catenæ, qua ostium por-
tus claudebatur, admotis, illam perfringere frustra
tentassent. Nox appetens finem certaminum fecit:
quæ ubique cruenta fuerunt, multaque cæde utri-
que parti steterunt: neque tamen irriti successus
obstinatos Gibellinorum animos à fortuna oppugna-
tionis iterum tentanda deterruerunt, qui urbem à
parte in Occidentem versâ ad nonum Kalendas O-
ctobris adorti sunt, cuniculis in eam actis, quibus
ad mœnia penetrarunt: ceterum, cum obsessi con-
trarios cuniculos excavassent in Gibellinorum cu-
niculos exeuntes, acerrimis subterraneis præliis
complures dies dimicatum est. Tandem murus cu-
niculis subrutus in quadraginta cubitorum longitu-
dinem procidit, qui casus aditum non modo Gi-
bellinis in urbem non patefecit, sed difficiliorem
potius reddidit: integer enim neque in fragmenta
dissipatus concidit murus: in quem perfringendum
dum Gibellini intenti sunt, spatium datum est ob-
sessis, interiore ducto muro patefactum ruina lo-
cum obstruere. Irritus igitur is quoque secundus
conatus fuit.

At Gibellini, cum consilia ad urbem non proce-
derent, curis alio conversis, insequenti anno ejus
A. C. sæculi vicesimo uno partem copiarum terra, ac de-
cem octo triremes mari, ad urbem Naulum oppu-
gnandam mittunt: adversus quos quindecim Guel-
phorum triremes, Petro Guano popularis corporis
cive præfecto, profectæ sunt: quæ Gibellinæ classi
ad littora Spotorni obviam factæ ad necessitatem pu-
gnæ attractæ, numero inferiores, tribus triremi-
bus amissis, omisso certamine, celeri fuga pericu-
lum evaserunt; seque in portum Genuensem rece-
perunt. At Guelphi, quod aperta via subsidiique
submittendis assequi non poterant, ut Gibellinos à
Naulo oppugnando ad sua tutanda averterent, illos
extenuatos, tanta copiarum parte Naulum amian-

data, in subsidiis, quæ ab illis tenebantur, & in
monte divi Bernardi aggrediuntur, turri interioris
portus expugnata. Acriter resistunt Gibellini, ac
turrim recuperant, constantiamque in inchoata
Nauli oppugnatione urgenda retinent. Igitur Nau-
lenfes, omni spe subsidii terra & mari præcisa, cum
ipsi suis viribus amplius stare non possent, urbem
Marchioni Carrettano, Gibellinorum nomine illam
recipienti, tradunt: quam mense post deditio arcis
secuta est.

Gibellini Naulo potiti copias ad opidum Ando-
riam transferunt, vano incepto; à prævalido sub-
sidio Genua triginta triremibus partim Regis, par-
tim civitatis advecto repulsi: cum vanum quoque
evasisset consilium Emanuelis Spinulæ Episcopi In-
gaunorum; qui ipse quoque hoc Factionum morbo
haud intactus, nominis ac Pontificii muneris &
professionis, præ vesano partium studio animo alte
insidente, oblitus, copiis, quantas plurimas po-
tuit, in illa temporis brevitate corrogatis, iter
Andoriam versus cepit; subsidiumque Genua mis-
sum in littore Andoriæ prior invadere non du-
bitavit. Pravo incepto merces debita perfoluta
est: in media enim pugna mole armatus ver-
sans, equo suffossio ad terram effusus obrunca-
tus est.

Eodem tempore castellum Montis Leonis in via,
quæ Rapallum fert, situm, prodicione custodis in-
manum Gibellinorum venit, magno cum Guel-
phorum incommodo: viam enim com meatibus ab
ea regione in urbem intercludebat: omni igitur ope
Guelphi consili, duobus peditum millibus ac quin-
gentis equitibus confestim missis, castellum recu-
perarunt.

Gliscebant eo tempore (ut in tanta rerum collu-
vione, omnique civili disciplina soluta, necesse
erat) scelorum & maleficiorum licentia; nulla ve-
recundia, nullo metu legum & Magistratuum
perditorum hominum audaciam cohibente, latro-
ciniis, rapinis, cædibus omnia miscentium, scele-
rum impunitate nefarios homines ad alia ex aliis
atrociora audenda incitante: resque ad interitum
spectare videbantur: ut nullis res, aut salus in urbe
tuta, nemoque à vexatione intactus esset; cum nul-
lum esset in gubernatore regio remedium, cujus
majestatem prava sæculi indulgentia corruperat. Me-
dicinæ faciundæ ratio ab honestis popularibus civi-
bus inita est; qui magno numero fodalitatem pu-
niendorum maleficiorum sanxerunt: hocque mu-
nus sibi sumpserunt, ut decemviralis Magistratus,
qui ex ipsa fodalitate creabatur, querelas læsorum,
tam Nobilium, quam popularium cognosceret; ac,
pro maleficii genere & magnitudine, facinorosos
plectendos curaret; eorum nomine Prætori delato,
illique in reum animadvertenti favore suo adesset:
quod si parum in Magistratu esset opis, omnis foda-
litas congregaretur: ac, si ne illa quidem satis valeret,
tum vero cunctus populus tintinnabuli sonitu è turri
maxima convocaretur. Cohibita est salubri consilio
facinorosorum hominum audacia ac peccandi licentia.
Eo anno turris in mole, in cujus cacumine ignis navi-
gantibus prælucescens statueretur, ædificari cœpta est.

Insequenti anno ejus sæculi vicesimo altero, Gi-
bellini facinus pravi exempli admiserunt. Sacris
ac piorum cœtu Pontifex Vicecomitibus Medio-
lanensibus, tamquam Ecclesiæ hostibus, omnibus-
que, quicumque illorum partes sequebantur, in-
terdixerat. Christianumque populum amplissima
peccatorum venia delata, ad eandem veniæ for-
mulam, quæ contra Sarracenos arma ferentibus
impartiri solet, illos incitavit. Cum diploma Ge-
nuæ in æde maxima recitatum esset, Guelphis il-
lud venerabunde accipientibus, longe diversus
animorum habitus in Gibellinis fuit: qui, con-
tempta sacrosancta majestate, diplomata Pon-
tifi-

tificia lacerarunt: quæ sic lacerata Guelphi, ad invidiam inimicorum inflammandam, Pontifici miserunt.

Eodem anno Princeps Roberti frater, ad res laborantes sublevandas, cum sexdecim triremibus Genuam venit: cujus opibus & favore subnisi Guelphi, magno peditum & equitum numero erumpentes, turrim Hircorum, quod munimentum firmissimum putabatur, improvise adorti capiunt: quam tamen paullo post Gibellini recuperarunt: totusque is annus, per varias occasiones variante fortuna, ac modo illis, modo his, mutuo sese ac munimenta, quæ ab utroque tenebantur, terra ac mari invadentibus, favente, crebris præliis, ac non levibus cladibus traductus est; cum Guelphi à parte Orientem spectante, nonnullis collibus occupatis, multis in locis castella & munimenta excitassent; compluresque sacrarum ædium turres urbi circumjectas præfidiis suis tenerent: sub exitumque anni nonnulla castella, quæ ab eadem Orientalis parte præfidiis Gibellinorum tenebantur, illis dejectis, occupassent.

A.C. 1123. At insequenti anno ejus sæculi vicesimo tertio, Guelphi cum extrema experiri decrevisent; quantis maximis potuerunt copiis coactis, Babilano Nitro, ac Jannotto, & Thoma Fliscis Ducibus, urbe exeuntes, itinere per locum, qui *Casamaneri* dicitur, facto, sub ortum solis ad cacumen montis Peralti perveniunt; Gibellinorumque præsidium magno impetu invadunt: quem Gibellinis constanter sustinentibus, tempus datum est iis, qui suburbia urbis tenebant, tinnitu à Peraltanis vocatis, suis laborantibus auxilio accurrendi: qui inchoatum prælium magno animo excipientes, omni ope connatis Guelphos acriter sese inferentes submoverunt: tandem, novis ac recentibus copiis ex urbe subinde affluentibus, multitudini impares, monte tamdiu ab ipsis ac tanta dimicatione retento, tandem hosti cedere ac terga dare coguntur. At Guelphi fugientes insecuti, illos suburbis quoque tamdiu ab ipsis possessis eodem impetu expellunt: qui præcipiti fuga sese Vulturem opidum receperunt; rebus omnibus suis ac familiis prædæ hostium relictis: eos Guelphi ad opidum usque Sextum urgentes, magnum tam peditum quam equitum numerum nobilium simul & popularium civium capiunt: quos tamen paullo post partim gratis, partim exiguo pretio dimiserunt; matronarum pudicitia intacta. Lætitia hujus victoriæ, pravo exemplo repetito, sollemnibus supplicationibus celebrata est.

At Pontifex misericordia commotus tam nobilis civitatis, ac de Christiana Republica optime meritiæ, cujusque tantæ essent ad sacra bella opes & opportunitates, ad exitum ruentis, amplas & honorificas legationes ad se ab utraque parte mitti postulat. Missi sunt ab utroque duodeni ex primariis civibus; quos ante se stantes Pontifex ad pacem & concordiam hortatus est, tali oratione, ut dicitur, usus: *Utinam, filii, ad bellicam virtutem & animi magnitudinem, qua parentum & majorum vestrorum imaginem exprimitis, illorum quoque sapientiam, & qua caput omnium virtutum est, pietatem & religionem adderetis; ac Christiani nominis, divinaque legis, vobis aliquando in mentem veniret, qua nihil æque studeat, ac pacem, concordiam, caritatem tueri inter eos, qui in Christianam militiam nomina dederunt: quæque nihil contra æque abominetur, atque odia, rixas, contentiones, discordias: injuriarum vero ulciscendarum studium ita exsecratur; ut contra, præcipuum Christiani nominis munus esse statuatur, hostibus, ac gravissimas injurias & contumelias nobis imponentibus, nostra auferentibus, vulnera infligentibus, mortem denique ipsam inferentibus, bona omnia ac fausta precari, ac precibus nostris divinum Numen illis placare: cujus virtutis non solum verbis Christus Dominus nos admo-*

A *nuit; sed exemplum princeps ipse nobis prævit. Hujus præcepti majores ac parentes vestri perpetuo memores, omnes odiorum causas, omnesque injurias suas, ac partium studia Reipublica condonabant; iras atque odia, si qua forte animis infederant, in communem hostem evomentes: qua re id assequebantur, ut publicam & privatam rem honore, gloria, opibus, imperio augerent; nulliusque populi, qui navalibus copiis polleat, nomen aut formidolosius Barbaris esset, aut apud Christianos Reges & populos majore in existimatione. Vos contra, religionis, patriæ, ac vestrimet obliti, omnem animi impetum in vos ipsos & in viscera vestra vertitis, ac vires vestras continentibus cladibus ipsi atteritis; opesque majorum virtute paulatim collectas universas profunditis; urbem ipsam intra & extra pomerium incendiis ac ruinis deformatis; eaque crudelitatis documenta in vosmet ipsi assidue editis, à quibus infensissimorum Barbarorum rabies abstinere: quibus rebus sit, ut & Barbaris risui sitis; & Christianis Principibus contemptui: quorumque nomen longe remotis nationibus olim terribile erat, id nunc accola Proceres, ac perexiguorum castellarum Domini ita despiciant, ut armis vos omni levi de causa petere non dubitent. Majores vestri sacrosanctorum Pontificum monitis de ipsorum salute & dignitate sollicitorum prompto atque alacri animo parebant; vos, piis adhortationibus spretis, quod barbari hostes vestri, atque excidium vestrum cupientes volunt, idem ipsi vultis; ad Pontificis voces surdas aures geritis; hostium desiderio obsequimini. Quod tandem vestrum istud est consilium? aut quid ex discordiis & contentionibus vestris petitis? aut quis tantus iste mentis error vos tenet; ut, dulcedine injuriarum ulciscendarum, injurias aliam super aliam cumuletis, quo nullus unquam fiat ulciscendi modus? id enim querere videmini, ut sic infinitam materiam bellis ac cladibus præbeatis, qua numquam nisi omnium rerum interitu terminari possint: respiscite aliquando, filii; ac vos, liberos, conjuges vestras, patriam non solum ruentem vestram, sed communem Christianam Rempublicam respicite. Pudeat vos majorum vestrorum, pudeat Christiani nominis, pudeat hominum sermonum. Si vos concordiam & pacem inter vos præ nimis accensis contentionum studiis componere non potestis; at disceptatorem sumite, qui pro communi amico res cognoscat. Si majorum vestrorum similes Christi Vicarium idoneum ad eam rem putatis; en ego sedulam & vestri caritate incensam operam meam ad vos defero: si alius vobis magis disceptator placet; non minus eandem meam ac sacrosancti nominis auctoritatem apud illum, quem ad eundem decreveritis, polliceor; æque lato animo, vel judicis & arbitri, vel advocati partes pro salute & dignitate vestra suscepturus.*

E Non modo sancta Pontificis monita animos inter se execrabili odio efferatos nihil mitigarunt; sed contra, ardor recentium certaminum in Aula Pontificis per duos menses jactatorum magis insuper accendit. Oratoribus igitur reversis; cum odia non satis domesticis & propinquis cladibus satiarentur; eas in Orientem quoque, & in longe diffitas terras, quæ à Genuensibus incolebantur, extenderunt: quo missæ sunt à Guelphis decem triremes ad Gibellinorum res vexandas: quas, cum nonnullis damnis Græcos hostes & Gibellinos affecissent, Bosporo superato, Sinopem appulerunt, à Tarabi Domino comiter & honorifice accepti; cum quo societatem junxerunt, Gibellinos & illius hostes Græcos acri bello urgendi.

F Ceterum Tarabis, (ut mutabilia sunt ejus generis ingenia ac numquam stabilis fides) occasionem eam esse ratus, gratiam Constantinopolitani Caesaris ingenti beneficio demerendi, ad facinus abominandæ perfidiæ animum adjecit: trierarchos igitur, & gubernatores, ceterosque munera in classem facientes, per speciem honoris & effusæ in ipsos voluntatis, ad convivium vocatos, nihil hostile suspican-

spicantes, signo dato, ii, qui domi latentes ad scelerum facinus præparati fuerant, ex insidiis procedentes, miseros convivium hilariter & comiter celebrantes obruncant. Tarabisque manibus cæde hospitum cruentis ad littus cum scelerum administris advolans, sex naves scalis in terram expositis littori applicatas magna parte defensorum vacuas capit. At quattuor, quæ procul à littore in ancoris stabant, strepitu exaudito, tumultuque circa triremes conspecto, tum autem casu ceterarum cognito, ab iis, qui è manibus ficariorum forte elapsi in mare se projecerant, ad triremesque à littore disjunctas adnatantes pestem evaserant, fuga salutem expediunt.

Interea Gibellini sexdecim triremes à Constanti-nopolitano Cæsare adjuti armarant, Bosporique fauces infidebant, ut redeuntès Guelphas naves exciperent: quæ mancæ & claudicantes, ut fallerent, noctu iter facientes beneficio tenebrarum secundum paratum pestem vitarunt: quarum reditus urbem fletibus & lamentationibus implevit, miserabilem casum tot egregiorum civium vulgo lugentibus; ac consceleratum barbari proditoris caput exsecrantibus. Inultum tantum scelus tulit Barbarus, Genuensibus intestino bello implicitis.

Tradunt Annales odia inter Factiones minus atrociter hoc anno exerceri cœpisse; hominibus ab alterutra captis liberis dimissis, rerum tantummodo præda utrisque contentis; cum prius homines quoque capti, pecunia velut ab hostibus se redimerent. Eo quoque anno turris Phari à Guelphis duplici propugnaculo cincta est, ac munimento laxius spatium amplexo circumdata.

Factionibus ut cum maxime vigentibus, insequenti anno ejus sæculi vicesimo quarto Robertus Rex cum uxore, ac Carolo filio Calabriae Duce, ejusque uxore ex Provincia Narbonensi Genuam venit; classè quadraginta quinque navium, quarum magna pars Guelphorum Genuensium fuit, vectus, Neapolim petens: ejus adventus, cum exitus decenni appropinquaret, certamina præbuit; tenuioribus fere perpetuum imperium illi decernentibus ac dictitantibus, numquam aliter civitati otium ab intestinis turbis ac malis fore; aliis illum tantummodo, dum in humanis ageret, Principem adficientibus; aliis imperium in certum tempus prorogantibus: tenuerunt tandem Optimates, ac melior civitatis pars, ut in sexennium dumtaxat prorogaretur imperium. Rex, Reipublicæ statu emendato, ac sodalitatibus, quæ complures erant variis titulis insignes, sublatis, quæ essent auctoritati regis infringendæ, Genua profectus, institutum iter persecutus est. Eo anno Gibellinorum classis undecim triremium tres Guelphorum triremes mercibus onustas in littoribus Provinciae Narbonensis cepit.

Nihil memorabile habet insequens annus ejus sæculi vicesimus quintus, præter classem viginti triremium Duci Calabriae arma Siciliae inferenti auxilio missam: quod inceptum inane evasit; compluribus detrimentis insula affecta. Creverat per ea tempora in immensum Castrucii potentia; ejusque opes formidolosæ erant, ac nomen omnibus terribile: infinita hominis ambitio non angustis Etruriæ terminis claudabatur; sed externa quoque imperia cogitatione amplectebatur; Liguriaque rebus animum adjecerat, discordiis ac Factionum studiis, quæ non modo Genuenses cives, sed omnes hujus Provinciae incolae infecerant, illius spem alentibus: consilia igitur rerum miscendarum in Orientali ora, quæ tota fere à Guelphis tenebatur, Gibellinis Occidentalem occupantibus, cum potentioribus familiis, quæ Gibellinas partes sequebantur, continenter ferebat: quibus imbuti Gibellini Rapallenses

arcem insequenti anno ejus sæculi vicesimo sexto occuparunt: quam tamen post brevem obsidionem,

Lucas Niger Guelphorum partium Dux deditione recuperavit.

At insequenti anno quidam ex gente Bertolotta, quæ Gibellinas partes sequebatur, valida ducentorum armatorum manu congregata, opidum Sigestrum, quod à Guelphis tenebatur, noctu occupavit; Guelphis expulsis, ac triginta capitibus ab illis amissis, rebusque & uxoribus ac familiis suis relictis: quæ tamen omnia illis paullo post restituta sunt. Castrucius, rebus Etruriæ, clade Florentinis illata, opportune pacatis, res Ligusticas in se inclinatas adjuvandas ratus, nulla mora interposita, Ligusticos fines ingressus Sigestrum venit; cujus adventus iter Luca Flisci cum delecta manu Genua ad Sigestrum recuperandum profecti cohibuit; cum ille jam Clavarum usque perrexisset.

Ac ne Occidentalis quidem ora eo anno motibus & turbis caruit: in qua Gibellini opidum Monæcum, quod à præsidio Guelphorum tenebatur, custodibus negligenter agentibus furto insidiarum occuparunt: ceterum, cum Guelphi, copiis magno numero ex circumjectis locis illis auxilio accurrentibus, opidum arta obsidione cinxissent, Gibellini viribus longe inferiores, ac nulla re ad tolerandam obsidionem satis provisâ, ad necessarium consilium deditionis inclinabant. Saluti illis fuit inter Guelphos ipsos orta dissensio; cum alii eam arcem Reipublicæ ipsi vindicarent; alii eam Regi tradi & æquius esse & partibus utilius defenderent: quæ dissensio, cum utrique, pro sententia obstinate pugnarent, eo rem adduxit, ut Guelphi inceptum omiserint; Spinulæque arcem partam retinuerint.

Interea Ludovicus Bavarus acerrimus Romanæ solii hostis, idemque Vicecomitum genti vehementer infensus, Romam petens Mediolanum venerat: cujus adventu vehementer perculsi Guelphi urbem munire constituunt; laxiusque spatium amplexi, collem Carinianum, totamque eam partem, quæ à mari ad aream Luculanam pertinet, intra pomerium acceptum, approperato opere, muro cingere instituunt; ac quæcunque in veteribus mœnibus quassata, infirma, patefacta erant, novo munimento obstruere ac firmare. At Ludovicus Mediolano profectus, iterque intermissum repetens, Romam intendit; Vicario in Liguria relicto, qui res regeret: quem Gibellini ac Saonenses cum illis conjuncti non modo nihil retractantes, sed cupide quoque acceperunt, obedientia illi delata: cum idem fecisset eodem tempore Castrucius: qui à Cæsare Vicarius Pisarum creatus, in Etruriam avocatus, res Genuenses in præsentia intermittere coactus, & in commodius tempus reservare; Vicario ad Gibellinorum rerum tutelam Sigestri relicto, discessit: Bertolottis turbulenti & inquieti ingeni gente alio commigrare jussis; ac potestate Guelphis expulsis facta in patriam redeundi.

Eo anno facinus pravi exempli in urbe admissum est; & impunitum fuit, nullo legum aut Magistratus metu in tam corrupta sæculi licentia libidinem & audaciam hominum coercente. Turba nautica per urbem vaga ad ducentorum numerum, magna & queribunda voce Nobilitatem accusabant, stipendia sibi debita minaciter poscentes; unumque ex trierarchis nobili loco ortum, qui tum è Syria venerat, forte inter pedes oblatum adorantur: qui illis urgentibus sensim cedendo, cum ad littus venisset, inopia potioris consilii in mare se projicit: idem faciunt nautæ; hominemque ad trirem suam adnatantem captum, à portu per mediam urbem in averfam atque extremam urbis partem tractum turri ædis divi Stephani includunt: qui non prius dimissus est, quam nautis de stipendiis satisfacto.

Eodem anno Fridericus Siciliae Rex, qui in Gibellinorum favorem impense propendens, Guelphis

phis aditu insulae & commerciis interdixerat; errorem recognoscens, qui portoria illius haud parum imminueret, edicto abrogato, aditum ac facultatem commerciorum illis patefecit: quam rem Robertus Rex perpetuus illius æmulus iniquo animo tulit.

^{A.C. 1328.} Insequenti anno ejus sæculi vicesimo octavo arcemunitissima Vulturis, quæ à Gibellinis jam octavum annum valido præsidio, Afranio Spinula præfecto, tenebatur, ac proxima urbi loca infesta continenter faciebat; à Guelphis noctu eo profectis furto insidiarum ab ea parte, quæ custodiis neglectior erat, ingressis occupata est: præfecto ipso Afranio, qui strepitu exaudito, eo occurrit, ac nonnullis aliis, qui cum eo Guelphis sese opposuerunt, eorumque primum impetum aliquantum sustinuerunt, interfectis: quæ res tempus Afranii filio & reliquis præsidariis dedit, fuga capta, è manibus hostium evadendi: dispar eventus fuit arcis Castellioni in agro Pegiensi, prope ab urbe sex passuum millia à Guelphis eodem tempore frustra tentata.

Neque vero Genuenses satis habebant odia & contentiones atrocibus crudelitatis exemplis inter se solos exercere; sed externos quoque Principes comprehendebant. Missa sunt igitur ad Robertum Regem cum Friderico Siciliae Rege belligerantem à Guelphis quadraginta triremes, Luchino Nigro præfecto: idem trium & triginta triremium Saonæ armatarum subsidium ad Fridericum à Gibellinis missum est. Illud in primis detestabile fuit, quod religio quoque ad studia partium accommodabatur, cum, Ecclesia bifariam scissa, Guelphi Joannem vicesimum alterum, qui sedem ac domicilium Avinione collocatum habebat, verum Pontificem sequerentur; Gibellini ad partes Nicolai quinti jussu Ludovici adversus Joannem Pontificis vitio creati transissent; neque Guelphi Beringerium Marium Genuensem civem, Franciscana instituta professum, Archiepiscopum à Nicolao creatum accipere voluissent.

^{A.C. 1329.} Interea Castrucius, cum in cursu maximarum rerum esset, totiusque Italiae oculos in se convertisset, in flore ætatis lateris dolore consumptus est: cujus mors novorum motuum causa fuit. Castrucius enim partum imperium heredibus, ac vicariatum Cæsaris, quem illis Cæsar ratum fecit, relinquere quidem potuit; virtutem illius retinendi transfundere in illos non potuit. Ludovici igitur ex Italia discessu, Vicecomites anno ejus sæculi vigesimo nono, quos præsentia Cæsaris compresserat, eo metu soluti ad arma confurgentes, piamque & justam causam habere censentes, omnes Ludovici clientes bello persequendi, heredes Castrucii dominatu Pisarum & Lucae expulerunt: cujus urbis potentes facti Germani, cum sibi stipendia non persolverentur, eam urbem Gerardo Spinulae vendiderunt. Perculit ea res vehementer Guelphos; adversæ Factionis caput, strenuum ipsum Ducem & acrem bellatorem, recentisque victoriæ de Guelphis ac Pontificis copiis in Longobardia partæ gloria fulgentem, ad veteres clientelas & immodicas opes, tanto insuper dominatu auctum horrentes.

^{A.C. 1330.} Accedebat ad acerbiterat cumulandam Aitonius Auria, vir qui sibi in rebus navalibus magnum nomen fecerat: quique per totam oræ Ligusticæ longitudinem, ac per circumjecta maria cum classe quindecim triremium late discurrens, continentibus damnis res Guelphorum carpebat, prædas navium, hominum, mercium agens: qui etiam anno insequentis, ejus sæculi tricesimo, munitissimum atque opulentum opidum Fanum Romuli Gibellinis à Guelphis eo bello ademptum recuperavit. Adversus illum Fridericus Marabottus, vir callidi ingenii, novem triremes armavit: quarum duabus in littoribus Sardiniae tempestate adversa amissis, in Aitonum inci-

^A dit: quo procul conspecto, numero navium tanto superiore, proris conversis, fugæ mandat. Concitat in fugientem triremes suas Auria; totusque dies fugiendo & insequendo consumptus est: sub vesperum, Gibellinis nullum urgendi finem facientibus, Marabottus periculum astu discussit: tenebræ enim se intendentes cum hosti eorum, quæ ab ipso agerentur, prospectum ademissent, tædam accensam in prægrandi scuto defigit, eamque in mare projicit: nullo nocturno lumine, quod classe, de more nautico, præluceret, in prætoria puppi sublato: datoque mandato trierarchis consilii consciis, ne nocturnus error lumine, quod sequerentur, adempto, classē dissiparet, ut locum illis demonstratum singuli peterent. Æstu igitur scutum in proximum littus deferente, cum Guelphæ naves alio cursum direxissent; Gibellini classe Guelpha, quam non cernebant, omiſsa, in lumen tamquam in prætoria puppi erectum proris directis ad littus pervenerunt: tædamque & scutum in terram ejectum cernentes, sese vafro Marabotti commento ludificatos fenserunt.

^B Eo anno in urbe inter Guelphos ipsos ingens rixa orta est, à tali causa excitata. Apparitores exulente quendam in ædibus nobilium Malloniorum latentem noctu captum in vincula ducebant: contumeliosum id sibi Mallonii rati, armis arreptis, ac manu clientium corrogata, ex apparitorum manibus victum extorquent: luce orta gubernator regius Abbatis populi auxilio fultus, tintinnabuli maximi sonitu è turri prætorii signum populo dat: qui illico armatus in aream sancti Laurentii convenit, ac vexillum erigit: contra Mallonii culpam culpa cumulantes, pro eo ut veniam errati peterent, arma capiunt, omni fere Nobilitate, præter Grimaldos & Fliscos in eorum auxilium accurrente: ac domos suas circumjectasque plateas communiunt, viarumque fauces transversis vallis obsepiunt, ac vexillum erigunt; ut pene civitas in Nobiles & populares divisa videretur. Abbas gubernatore regio assentiente, facula accensa in area media defixa; nisi ante eam consumptam, octo ex Malloniis judicio stant, sese enimvero regie & publicæ jurisdictionis contemptores pro hostibus patriæ habiturum: seque populum armatum eorum domibus admotum minetur: ceterum plebs moræ impatiens, vociferans, tantam Nobilium contumaciam non esse ferendam, gubernatore & Abbate concitatum armatorum impetum retinere non valente, inordinate ac tumultuose ad domos Malloniorum accedunt: repulsi sunt ab ordinatis Nobilibus acriter se defendentibus: non sine ipsorum malo & damno. Adfuerunt intra definitum terminum Mallonii sese jurisdictioni subjicientes: quievitque tumultus: ceterum Nobilitas omnis graviter in Grimaldos & Fliscos exarsit, qui consilia & studia secum non conjunxissent; acerbique oratione in illos investa, non id mirandum esse, neque novum hoc fecisse eas familias dictitantes: quæ non communis Nobilium dignitatis propugnatrices sint, sed ad principatum civitatis haud obscura ambitione tendentes, plebis benevolentiam capient, ejusque libidini adversari nolint: idem quoque facere solitos adversæ Factionis capita Aurias & Spinulas; qui plebis toti semper fuerint: illorumque neutros de partibus asserendis laborare, sed de principatu & imperio civitatis, quod spe & cupiditate amplexi sint, inter se dimicare. Quattuor illas familias malo publico ortas, quattuor faces bellorum civilium semper fuisse, malis & cladibus civitatem involvisse: illis splendida omnes publicas procuraciones, classium præfecturas, imperia cedere: ceterum omnem Nobilitatem in contemptu vivere: neque tantum nonnullis claris viris, quos ipsæ familiæ tulerint, illorumque egregiis gestis rebus, si quis rem ad calculos revocet, civitatem debere: quan-

tum illorum fastum & ambitionem odio habendam & execrandam : quæ discordias civiles ferendo & alendo, civitatem tot malis involverit, ac tot cladibus deformarit : faverent modo plebi, atque eandem extollerent ; haud reputantes, eam illius esse naturam, ut aut servitio premenda, aut domina habenda sit, media libertate modice uti nescia : eam rem brevi illos experturos : divinare id animum ; prævumque consilium in auctorum capita merito recasurum : satius esse Gibellinos accersiri, & in urbem introduci, quam inconsultæ multitudini servire : id se, si res cogat, omnino facturos.

A. C. 1331. Annus, qui sequitur, ejus sæculi trigesimus unus, finem quidem lugubri civili bello, quo jam quartum decimum annum Liguria urebatur, attulit : ceterum voluntates haudquaquam conciliavit, neque internecina odia animis alte defixa extirpavit ; sed eorum exercitationem ad breve tempus consopivit, mox haud parvis motibus exsurrecturam : quod autem neque virtus, ac communis patriæ caritas, neque tot aliarum super alias acervatarum cladum satietas, neque tot maximorum Principum interposita auctoritas efficere potuerunt, ut Genuensium animos tantis contentionebus exacerbatos ad consilia pacis flecterent ; eam necessitatem externus metus illis expressit ; quo in opulentis & vividi ingenii populis nullum præsentius aut validius intestinorum malorum remedium est : cum auditum esset Catalanos perpetuos Ligurum hostes, discordiarum Genuensium occasione arrepta, consiliis cum Venetis confociatis, prævalidas maritimas ac terrestres copias in Genuenses armare. Multæ autem odiorum causæ Genuensibus cum utroque populo intercedebant ; ut necesse erat populos, quos unus idemque maritimus quæstus alebat, quique eadem navalia studia & commercia colebant, continentibus injuriis per varias occasiones inter se lædere, ac quotidianis damnis carpere : metus igitur externorum armorum, quæ duo præpotentes populi conjungebant, quibusque si res insuper aggravatæ forent, vix ullis humanis consiliis ab interitu sisti potuisset, necessitatem concordie conciliandæ Genuensibus adhibuit : verum, cum res magni moliminis esset, interea induciæ in annum factæ sunt, dum de conditionibus concordie disputatur : qua de causa octoni utrinque disceptatores creati sunt : inter quos cum nihil post ingentia certamina conveniret, utraque parte pro sententia acriter pugnante ; omnium rerum arbitrium in ipsum illum, cui sese regendos tradiderant, Robertum Regem rejectum est ; duodenis Legatis ex utriusque Factionis primoribus ad illum missis : inter quos dum de conditionibus pacis certatur, Catalani ingenti classe armata, quæ fuit quattuor & quadraginta triremium, ac triginta varii generis minorum navigiorum, mense Augusto in Liguriam venerunt ; ac primo agro Mentoni opidi pervastato. Monæcum irritò incepto tentarunt ; littoraque Occidentalis oræ legentes, exsensioneque crebro in terram facta, ubique urendo ac populando, tandem ostium Genuensis portus tenuerunt, Genuensesque ad pugnam provocarunt. Responsum est, eos esse Genuenses, qui Catalanorum inimicitiam & pugnae denunciationem in lucro & beneficio semper posuerint : ceterum inanis potius jactantiæ, quam veræ virtutis fiducia esse, imparatis prælium denunciare : ne dubitarent Catalani : Genuenses enim brevi comparaturos, ac littora ipsa Cataloniae adituros, copiamque pugnandi facturos : igitur Catalani, Genuensibus certamen detrectantibus, porro ire pergentes, ad littus Clavari impulsæ sacram ædem ac coenobium divi Eustachii diripiunt : quos abeuntes cum atrox tempestas adorta esset, res in religionem versa est : repetito igitur littore Clavari, omnia capta coenobio restituerunt.

A Interea Neapoli, re ingentibus contentionebus diu ac multum jactata, tandem pax in has condiciones convenit : injuriarum oblivio esset ; unusquisque in patriam rediret ; civitas à gubernatore regio regeretur ; honores, magistratus, munera, ac procurationes publicæ æqualiter inter Guelphos & Gibellinos distribuerentur. Nuncius Genuam perlatus ingenti lætitia cives affecit : quam publicis supplicationibus, gratis divino Numini actis, testati sunt : nuncium Oratores paulo post secuti sunt. Non tamen defuerunt Saonæ ex Gibellina Factione, quos tanta ac tam obstinata partium rabies teneret, ut pacem compositam turbare & impedire niterentur ; iniquum esse dictitantes, Fridericum Siciliae Regem, qui laborum & impendiorum particeps fuisset, cuiusque opibus ipsorum Factio adjuta esset, bonis pacis excludi : convicio bonorum ac clamoribus multitudinis nefarios homines, qui tam sancto negotio impedimento essent, ad mortem deposcentis, ab incepto destiterunt. Consilio igitur universæ civitatis habito, pax accepta est : ac primum Saonæ, deinde in urbe proclamata. Gibellinique, post diuturnum exsilium, in patriam redierunt.

C Hujus obsidionis & belli ac cladum acceptarum magnitudo longe magis ab exteris Scriptoribus quam ab Annalibus ipsis nostris extollitur : quos ideo hac in re, ut in ceteris junioribus & negligentioribus fuisse puto, quod vererentur earum auctores, ac familias, & posteritatem offendere : tradit enim Joannes Villanus certus & fidelis Scriptor, qui æqualis illorum temporum fuit, clades in eo bello & obsidione (quam obsidioni urbis Trojæ tot Scriptorum monumentis celebratæ comparare non dubitat) acceptas, numerum navium, mercium, hominum amissorum, ædificiorum incensorum, opulentissimum regnum exinanire potuisse : neque mirum id esse ; quod ea ætate populum Genuensem omnium populorum tam Sarracenorum quam Christiani nominis opulentissimum & potentissimum fuisse dicat : quam potentiam atque opes testabantur non solum quotidiani cultus splendor, ingens auri, & argenti, ac gemmarum vis, pretiosa supellex, vestitus totus ex purpura & oloferico, atque etiam auro, cum laneas vestes quamvis pretiosas aspernarentur ; sed magnificentia domorum & exstructionum ; quæ non modo urbem, sed circumjecta urbi loca, totumque illum tractum, qui inter Nervium vicum & Sextum opidum est, per duodecim millium passuum longitudinem ornabant : quam regionem omnium, quæ sub coelo sunt, pulchritudine & amoenitate sua maxime conspiciendam exitiale hoc bellum totam incendiis & ruinis deformavit. Lugret calamitates ab internecino hoc bello civitati nostræ illatas Gerardus Spinula *epistola* quadam : nullius enim generis ærumnarum expertem fuisse affirmat, tot egregiis civibus partim cæsis ; partim, patria & avitis sedibus relictis, alio commigrare coactis ; & opulentis familiis ad extremam egestatem adductis, miseris natis in conspectu parentum in duram barbararum gentium servitutem venundatis : innumeris virginibus ac matronis, parentibus, conjugibus, fratribus orbatibus, patriaque extorribus, in omnium rerum egestate passim vagis, quæstu corporis vitam tolerare coactis.

F Pace firmata, omnibusque in patriam reversis, curæ in res externas, & Catalanorum audaciam ulciscendam collatæ sunt : adversus quos insequenti anno missus est Antonius Grimaldus cum quinque & quadraginta triremibus : qui clades superiore anno acceptas Catalanis reddidit ; compluribus navigiis illorum incensis, ac littoribus Cataloniae directis : qui inde cursu in majorem Balearicam directo, quinque Catalanorum triremes ad ea littora deprehensas cepit, navibus tantummodo potitus, cum remigium atque omnis turba nautica in terram

ram sese protinus ejiciens evasisset. Grimaldus secundum ea bellum Catalano & Balearico Regibus indixit. Illi quadraginta duas triremes ac complures minores naves adversus illum miserunt, qui interea in portum minoris Balearicæ se receperat; sperantes sese hominem in eo portu clausuros: at ille impigre crumpens Catalanos audacia obstupefactos in fugam conjecit: quem nox superveniens ac tempestas exorta ab illis insequendis cohibuerunt: ceterum, hyeme appetente, annonaeque deficiente, Grimaldus quindecim triremibus ad res Catalanorum vexandas in Siciliam missis, ipse cum reliqua classe Genuam rediit.

Hoc anno Saonenses, qui initio hujus civilis belli defecerant, in obedientiam redierunt, conditionibus renovatis cum Gasso Divisiaco Comite Tertulii gubernatore regio, coram Alberto à Sancto Matthæo Abbate populi, ac summo duodecimvirali Magistratu: qui pari numero ex utraque Factione & ex civibus tam popularibus quam Nobilibus constabat: qui tum fuerunt Matthæus Pontulus Jurisconsultus vicarius consilii, Antonius Marinus, Samuel Spinula, Hadrianus Grimaldus, Ubertus Catalusius, Andreolus Savinionus, Anfaldus Lomellinus, Leonardus Cornilia, Raimundus Casalius, Gerardus à Paulo, Petrus Reoza, Leonardus Porcus, Joannes Piper.

A.C. 1333. Insequens annus ejus sæculi tricesimus tertius, variante fortuna, levibus, ceterum cruentis, præliis, mutuisque detrimentis inter Catalanos & Genuenses traductus est; cum Genuæ duæ classes denarum triremium, altera Othobono Marino, altera Janotto Cicada præfectis, armatae essent. Tradunt Annales à Bertolottæ gentis homine in ora Orientali tumultus eo anno excitatos, opido Carpena occupato.

A.C. 1334. At insequens annus ejus sæculi tricesimus quartus egregio facinore à Salagro Nigro edito insignis in primis est: quod antequam exponam, pauca mihi præfari libet; quo magnitudo rei gestæ magis appareat. Corbitarum atque oncrariarum, quæ ad bellum armabantur, major ea tempestate erat in navalibus præliis vis, majoraque ad victoriam momenta, quam navium longarum, bombardis nondum inventis: quo fiebat, ut, cum cominus, ac velut manu conferta pugna committenda esset, oncrariæ à bombardarum ictibus securæ, veluti arces humilitati triremium mole sua imminentes, non modo supernis sagittarum ex arcubus & scorpionibus emissarum ictibus gravius accidentibus, subcunctes longas peterent; sed saxa immanis magnitudinis, trabesque & asseres vasti ponderis in illas devolventes, non homines tantum exanimarent, sed nares ipsas perfringerent, atque demergerent: contra ipsi à supinis ac minime validis inferiorum ictibus, aut nihil aut parum læderentur: at nunc mutata tota ratio est; bombardarum enim ænearum usu invento, triremes eminens prælium committunt: continentibusque ictibus procul ac valide figentibus corbitas incessentes, nullo ictu in tam vastam oppositam molem emissio vano accidente; ipsas crebris locis perforatas, vel ad necessitatem vela demittendi, ac sese hosti tradendi adigunt; vel pertinaces demergunt: cum contra ex ictibus à corbita emissis, vix centesimus quisque collineet: quo fit, ut multis jam ab hinc annis, corbitæ quamvis ingentis magnitudinis congressum cum triremibus devitent, earumque nomen horreant.

Salagrus igitur decem triremium præfectus adversus Catalanos armatarum, quattuor illorum ingentis magnitudinis corbitas ad majorem Balearicam nactus est, omni nautico instrumento omni-que belli apparatu affatim instructas; quæ plus mille octingentos egregios bellatores, ac delectam centum octoginta primariæ Nobilitatis equitum ma-

A) num vehebant: five Sardiniam, ad loca & castella, quæ Auria gens in ea insula possidebat, expugnanda, petentes; five è Sardinia domum redeuntes; nam utrumque traditur: quas, nulla mora interposita, invadit, cedentesque decem continentes dies numquam prælio intermissio infecutus est; cum ipse ab aspero fluctibus mari jactaretur: quarum una tandem capta, cum turba nautica in ceteras tres naves incolumis evasisset, Salagri jussu incensa est: cumque navales focii, ac remigium diuturno labore ac lassitudine fessi, fameque deficientes cibaria à Salagro poscerent: *Nulla, inquit Salagrus, mihi reliqua cibaria, socii, omni annona, quo expeditius & celerius hostem persequeremur, meo jussu in mare abjecta.*

B) *Tres igitur naves, quas cernitis, vobis expugnanda sunt, commeatum omnis generis plena, quibus vires affectas reficiatis:* quibus verbis Genuenses accensi, ac desperatione ipsa velut in rabiem versi, vecordi impetu naves invadunt: inter quos & Catalanos, qui uxores nobilissimas matronas secum habebant, magno animorum ardore prælium commissum est: quod cruentum & diuturnum fuit; hinc famis, illinc amoris stimulis utrumque incitantibus: quibus duobus nulli acriores sunt. Tandem victoria penes Genuenses fuit, omnibus navibus captis, octingentis hostibus cæsis, ac quadringentis Genuam captivis abductis; cum reliqui faucii in terram expositi fuissent: in primis mulierum ac nobilium matronarum ratio habita est; quæ, jussu Salagri, in locum tutum à contumeliis subductæ sunt: quarum singularum sortem Salagrus cum paullo diligentius quæreret; invenit unam illarum nobilitate insignem, ac forma præstantem à conjugem rem ad iniqua inclinatam cernente jugulatam; cum animus impotenti amore amens non ferret, amatam apud alios cernere. Exarsit Salagrus, atroci facinore audito; noxiumque caput innocenti sanguine maculatum, tum autem quod ipsius continentia & justitiæ diffusus esset, merito capitis supplicio plecti jussit.

C) Salagrus igitur, matronis reliquisque mulieribus omni injuria intactis in urbem Callarim prius expositis, ac liberis dimissis, clara victoria, si labores exhaustos, constantiam, audaciam, admirabiliaque virtutis & fortitudinis exempla spectes; si paucitatem navium, quibus pugnatum est, haud ita magna, parta; Genuam reversus est: qui vix portum ingressus, cum audisset, nonnullas Genuenses naves à sex Catalanorum triremibus captas, magnamque partem captivorum ab illis foedo supplicii genere necatam; extemplo portu Genuensi solvit, compluraque navigia Catalanorum spoliis & mercibus navium nuper captarum plena nactus, cepit; iterque in Sardiniam intendit, quattuor Catalanorum triremes, quæ piraticam in Genuenses faciebant, quærens: classeque bipartito divisa, Sardiniam circumiens, triremes, quas diximus, forte obvias factas, quingentis hostibus cæsis, ac centum quadraginta captis, haud diuturno certamine victas capit; portumque urbis Callaris subiens, præfectum captarum triremium eo ipso iugo suspensum necavit, quod Catalani ad supplicium & contumeliam Genuensium hominum statuerant: adversus quos Catalanos, qui Genuenses Peræ urbis incolas vexare non desistebant, eodem anno septem triremes armatae sunt: quarum præfectus Barnabas Catanius fuit: qui nonnullas naves

E) Catalanorum in mari Ægyptiaco deprehensas combussit, multisque detrimentis Catalanos affecit.

Catalanorum motibus compressis, Venetisque nihil moventibus, externo metu soluti Genuenses ad ingenium redierunt; domesticis turbis renovatis; quas cum potentiorum familiarum ambitio, tum Roberti astus conflasse dicitur: cui hanc civitatis concordiam, quæ esset dominatui suo labefactando atque adeo evertendo, quamquam aliud in speciem simularet, numquam fuisse cordi perhibent.

Joannes quidem Villanus tradit, illum, cum utriusque partis Oratores Neapoli essent de pace agentes, ab ea Guelphos magnopere abducere clam conatum; formidinem prævalentium Gibellinorum opum, si in urbem reciperentur, illis objiciendo. Gibellini ira tuebant, tot annorum exsulio inulto; ad hoc illis invisum erat Roberti nomen & imperium, Guelpharum partium haud dissimulanter propugnatoris. Ea odia Factionis principes, quos, præter communes injuriarum causas, dulcedo regnandi instigabat, inflammare, ac consilia in adversarios & Regem ipsum struere primo conati sunt; hominibus diuturnitate malorum fessis, ac recentium cladum memoria omnem discordiarum mentionem abominantibus; ad hoc gubernatore regio viro mansueto & suavis moribus iras leniente, omniumque voluntates ad se attrahente; ac de æquabili Regis voluntate non magis in hanc quam in illam partem propendente, concordiaque studio prolixè omnia pollicente. At ubi Bulgarus à Tolentino successor à Rege missus Genuam venit, longe diversi ac callidi ingenii, discordiisque ferendis apti viri, ad hoc rigidioris severitatis, quam quæ ab hominibus in libertate vivere assuetis ferri posset, oratio Principum prius spreta auribus admitti cœpta est. Hi circumeuntes, ac singulos prehensantes, dictitare consilia Regis, qui totus in Guelphos propendat, in ipsorum perniciem structa, quæ antea dubia fuerint, nunc aperta facta, tali viro Genuam misso: prævertendum igitur esse; neque expectandum, dum ab adversariis, qui nunquam sincera fide in gratiam redierint, opprimantur: ad hoc memoriam injuriarum & cladum acceptarum renovare; ac venisse tempus dicere, illas tandem, si homines sint, ulciscendi: repeterent illos animos, quos tum habuerint, cum tot annos patria extorres in tantis acerbitatibus ætatem agerent; seque ad eadem adversariis referenda pararent; à quibus eam necessitatem ipsis imponi, ut in adversarios conferenda. Consenserat cum Gibellinis Salvagorum gens, quamvis Guelpharum partes sequens, opibus & clientelis tum in primis valida: qui Regem Genuæ dominantem haud satis æquis oculis adspiciebant, variis de causis illi infensi; fidemque dederant, sese nullam in rem interposituros. Quæ cum moveri sensissent duo octovirales Magistratus, quorum alter res plebis regebat, Abbatessque populi vocabantur; alter Nobilitati præerat; circumeundo, hortando, monendo, preces & lacrymas consiliis miscendo, summa omnia fecerunt, ut iras permulcerent, hominesque à prava mente deducerent: ceterum irrita omnia fuerunt. Guelphi enim consiliis cum gubernatore regio occulte confociatis, ipsoque facile in suam causam tracto, haud ex vano reputante consilia novandarum rerum à Gibellinis non magis in Guelphos, quam in Regem strui; non expectandum rati, dum adversarii sese copiis undique accersitis firment, pridie Nonas Februarias anni insequentis ejus sæculi xxxv. Imperialium Gibellinam gentem adoriuntur. Quo motu excitato, extemplo omnis civitas in armis fuit. At Gibellini viribus tum impares, externa clientium & amicorum auxilia accersitum mittunt in varia loca; ipsique interea Suffiliam, & aream divi Matthæi, totamque eam regionem, quæ Domo culta comprehensa ad aream Luculanam pertinet validis munimentis firmant, viarum faucibus vallis ac transversis trabibus obseratis; cum Guelphi gubernatoris regii favore subnisi cetera omnia urbis loca, omnesque arces & turrestenerent. Tandem ad quartum Kalendas Martias magna pars expectatorum subsidiorum Gibellinis submissorum terra ac mari ad urbem accessit; cum maritima auxilia ab octo triremibus & compluribus minoribus navigiis

A. C.
1335.

A Saona profectis vecta essent: quæ primo adventu in portum penetrare non potuerunt à Guelphis repulsæ, qui omnes maris crepidines prævalidis præfidiis occupant: ceterum omnibus viribus confisæ ad portam Vaccarum Guelphis invitis exscensionem fecerunt. Quibus copiis aucti Gibellini, aream sancti Lucæ, Guelphis inde dejectis, totamque eam regionem, quæ intra & extra pomerium ad promontorium Phari pertinet, ac turrim Castelletum vocatam, nec non portam Auriam occupant. At Joannes Fliscus Caroli filius, tum familiæ caput, res in summas angustias adductas cernens, cum Salvagi in fide data manentes ab ipso appellati in causam descendere recusassent, Turriliam ditionis suæ opidum concessit.

B Igitur Gibellini totius civitatis potentes facti, nemine violato, nemineque urbe exacto, cum gubernator regius cum prætorianis suis illæsus, omnique contumelia intactus urbe excessisset, consilio universæ civitatis tam nobilium quam popularium civium vocato, Raphaelem Auriam Siciliae Halmiratem, & Galeottum Spinulam Capitaneos & rectores civitatis in biennium creant; collegis additis, Prætoze peregrino homine ex veteri instituto, Abbatibus, & antianis: quibus rebus Gibellinorum potentia in immensum crevit; cum multæ ex primariis popularibus familiis, Guelphis partibus relictis, studio quietis ad Gibellinos transissent. Auctoritatem urbis ceteris populis sequentibus, omnis ditionis Genuensis arces ac munita loca in Capitaneorum manum venerunt, præter Monæcum munitissimum opidum, quod Guelphi tenebant; illudque sibi sedem & arcem fecerant. At Capitaneorum haud segnis opera fuit; octo enim & viginti triremes in Catalanos armarunt: quarum præfectus fuit Odoardus Auria; cum antea nonnullas quoque armassent: quæ classis ad littus Panormitanum, Catalanis è terra inspectantibus, neque opem ferre audentibus, duas illorum naves incendit.

D Anni insequentis ejus sæculi tricesimi sexti initio induciæ cum Regibus Aragoniæ & Balearum factæ sunt. Tandem utraque parte tædio laborum & diuturnitate malorum fessa, pax convenit. Interea inimicitia inter Factiones iisdem excursionibus, rapinis, populationibus exercebantur; cum nemini parceretur, captique utrimque aut nonnumquam interficerentur, aut ad necessitatem sese redimendi adigerentur; Guelphique, navibus suis, modo pluribus, modo paucioribus Monæco exeuntibus, totam oram Ligusticam ac commercia maritima infesta facerent, ac sæpe fauces ipsius urbis inficerent, opidaque ditionis Genuensis furto caperent, quæ Gibellinis cum minoribus copiis recuperatum venientibus mox dimittebant.

E Ceterum singula hæc minuta persequi neque operæ pretium est, & longum fuerit: illud insigne prætereundum non fuit, fauces portus à viginti duabus Guelphorum triremibus per multos dies anno insequenti ejus sæculi tricesimo septimo infestæ, ac civitas obsidione pressa; opidumque Vulturium à Lombardino Spinula Reipublicæ abstractum; portoriaque ejus nomine exacta. At Capitanei, quibus caput curarum erat, dominatum sibi firmare, omnibus machinis adhibitis pervicerunt tandem, ut sibi à die festo divorum Simonis & Judæ tutelarium civitatis numinum, imperium in triennium prorogaretur; potestasque amplificaretur, summo imperio, quod merum & mixtum vocant, illis mandato; sine ulla in rebus regendis ceterorum assidentium Magistratuum societate; jureque illis facto, Vicarium, quem vellent, qui jus diceret loco Prætoris, eligendi; atque Abbatem populo dandi.

F Eo anno semina dissidiorum inter Genuenses & Ve-

Venetos jacta sunt: decemque Genuenses triremes, praefecto Francisco Marino, Jonio navigantes, obvias habuerunt totidem Venetas triremes: à quibus, cum primo detrectasset, nihilque reiesse Genuensibus cum Venetis diceret, necessitatem pugnae subire coactus est: quæ diuturna & cruenta utrimque fuit; Venetis ira ardentibus, ob duas Venetas triremes majoris formæ, quæ magni pretii mercibus onustæ ex Flandria veniebant, superiore anno à Guelphorum Monæcum tenentium

A navibus captas. Exitus pugnae Genuensibus tandem secundus fuit; classe Venetorum profligata, ac majore navium parte capta.

Insequens annus ejus sæculi tricesimus octavus A.C. illud tantum memorabile habet; vicens triremes 1338, Genuæ à Gibellinis, ac totidem à Guelphis Monæci armatas, ac Regi Gallo cum Anglo belligeranti in Oceanum subsidio missas, stipendio ab eo conductas.

V B E R T I F O L I E T A E,

PATRICII GENVENSIS,

HISTORIAE GENVENSIUM

L I B E R V I I.



EQVITVR annus ejus sæculi tricesimus nonus, quo nullus memorabilior umquam fuit; magna rerum commutatione facta, atque alia Republicæ forma instituta; ut vere hic annus dici possit altera Genuæ origo. Occasionem tantæ rei præbuit casus qui-

dam procul ab urbe & à ditione Genuensi ortus, atque humilis fortis homo: ut vere dictum sit; incendia, quibus magnæ urbes sæpe conflagent, non semper à basilicis & theatris, sed interdum quoque ab humilibus tuguriis oriri. Ingens in Flandria, quo classem Genuensem missam diximus, excitata est controversia inter Antonium Auriam præfectum classis, & turbam nauticam, conquerentem, stipendia sibi integre non persolvi: quæ contentio à verborum altercationibus ad jurgia & convicia procedens, postremo ad manus deducta est: multitudoque superior, præfecto & Ducibus dejectis, classis dominatum occupavit. Re ad cognitionem ipsius Regis deducta, Rex secundum præfectum & Duces judicavit; Petrumque quendam Capurum nautam ex opido Vulture, (qui legati & patroni nauticorum partes apud Regem egerat) ac cum eo quindecim seditionis auctores carcere inclusit. Exarsit hoc facto plebs nautica; nonnullique ira & indignatione ardentem, relicta classe, in Liguriam reversi, sermonem falsum dissipant; Petrum Capurum, ac nonnullos cum eo, quod jus suum ac miserorum nautarum per judicium contra præfectum ac Nobiles postulare ausi essent, suspensio necatos: ac per ditionem Genuensem circa discurrentes, nomenque Capurri magnis & queribundis clamoribus subjicientes, magnos sibi hominum concursus non modo ex opido Vulture, infantis municipis sui casum miserantium, sed ex præfecturis Porciferæ & Bisamni faciant; ut est plebs ad omnem levem auram mobilis: qui omnes cum plebe Saonenfi eadem de causâ commota, cum nonnulli quoque nautæ in eam urbem à classe rediissent, eademque mentiti essent; studiis conjunctis in ædem divi Dominici Saonæ conveniunt. Ibi injurias & superbiam Nobilitatis conqueruntur; quæ eo arrogantiae processerit, ut plebem non modo jus suum impetrare, sed postulare, etiam indignetur: ac si quis contra illos oculos attollere, aut vocem libertatis memorem mittere audeat, capite

plectant. Verum hujus tanti mali majorem culpam penes se quam penes Nobilitatem esse: nihil enim novum Nobilitatem facere; nihil, quod illis non non usitatum ac naturale semper fuerit, admittere: at ipsos, quæ propria & usitata multitudini semper fuerint, ignavia & socordia sua non facere; neque se, armis arreptis, quod unicum remedium adversus Nobilitatem tenuioribus perpetuo expertum sit, libertatis suæ vindices esse: errare enim, si quis per judicium ac postulata jus suum sese adversus Nobilitatem obtinere posse speret: quæ, si ea ratio ineatur, conspiratione & artificijs suis semper ipsorum conatus sit elusura: iis armis illos nunquam non superiores futuros: plebis arma vim & dexteras suas esse: ab iis igitur armis, quibus superiores sint, opem petendam: summæ inscitiae esse ab aliis remedium malorum quærere, quod in se ipsis habeant.

Cum hæc atque ejusmodi à concitatis animis undique vociferarentur; urbana plebe atque opificibus sibi adjunctis, dominatum urbis, Prætor ac Magistratibus dejectis, invadunt: cum prius Odoardum Auriam Genua ad sedandos tumultus missum, unaque nonnullos à gente Vegeria in turrim prætoriam compulso, illa capta, in arce sanctæ Mariæ inclusissent. Civitatis igitur potentes facti, regimen rerum penes duos populares cives esse volunt; quibus vicens nautas, ac parem artificum numerum adjungunt. Morbus tamquam contagione in urbem penetravit: Genuensisque plebs, ne inferior aut seignior Saonenfi fuisse videretur, haud minoribus motibus adversus Capitaneos confurgit; vulgo frementes, Abbatem populi non sibi à Capitaneis dandum, sed à populo ipso eligendum: æquum id esse, & solitum fieri, antequam Capitanei omnia ad se traxissent. Capitanei re improvisa perturbati, omne certamen adversus concitatae multitudinis impetum periculosum censentes, cedunt. Plebs xx. sui corporis hominibus creatis jus Abbatem eligendi mandat. Illi ad nonum Kalendas Octobris in prætorium conveniunt, atque in conclave secedunt; Capitaneis, magna civium caterva tam Nobilium quam popularium corporis eos circumstante, omni plebe, quæ ipsa quoque eo convenit, foris expectantibus. Cum studio- rum certamina electionem extraherent, moraque foris expectantibus tædio esse coepisset; sordidi quæstus homo, cujus nomen propter obscuritatem ignoratur, inconsulti ingenii & linguæ immodicæ vir, ac quocumque impetus animi tulisset, temere

proferri solitus, edito loco conscenso, ex quo ab omnibus conspici & exaudiri posset; *Tenuisse*, inquit, *sortis hominem, cives, salutare consilium vobis afferentem audire potestis?* qua voce omnium oculis in illum converfis; alii hominem stolidum ac projectæ impudentiæ, nihilque pro sano pronunciatum, protinus ex eo loco deiciendum dicere; alii risum, lusumque captantes, eum porro loqui jubere. At ille, *Utique*, inquit, *oratio mea accepta, aut animadversa fuerit; imperare animo nequeo, quin, qua mentem subit cogitatio, eam proferam.* Aderat inter popularium principes Simon Buccanigra, viracer & experiens, magnique, ut res docuit, animi & consilii: manum igitur in illum homo loquax intendens, *Quid*, inquit, *opus est potius, cives, quam ut Simonem hunc Buccanigram, quem adstantem cernitis, omis- sis ambagibus, vobis Abbatem sumatis?* Raro ac vix umquam ulla in re tantus hominum consensus reper- tus est, quantus tum in populo Genuensi fuit, Buc- canigræ nomine audito. Undique igitur conclama- tum est ejus nomen, omnibus una voce Abbatem illum deposcentibus: quem renitentem manu ap- prehensum, nomenque ejus magnis plausibus & clamoribus subicientes, in suggestu medium inter Capitaneos constituunt; recusantique ac retractanti nudatum ensim imperii insigne in manum tradunt. Ille, cum nutu ac manu silentium tandem fecisset: *Studiis quidem*, inquit, *vestris, quæ tam ardentia in me cerno, plurimum me debere consiteor, cives; cete- rum titulum, qui numquam in gente nostrafuit, num- quam ego princeps in eam inducam: honorem igitur istum convenientius ad alterum deferatis, rogo: ensimque traditum restituit; inferiorem videlicet familiæ suæ dignitate cum Magistratum significans, in qua olim Gulielmus summum civitatis imperium obtinisset, perhonorifico Capitanei titulo insignis. Plebs hinc, vera dicere Simonem, fateri; illinc hominem sibi præfectum cupere: qua incertis consiliis fluctuante; subita vox exorta est, *Dominus igitur sit Buccanigra:* quæ vox non minori consensu, minoribusve plau- sibus ac clamoribus, quam prima excepta, Capi- taneos vehementer perculit: qui Simoni suadere cœ- perunt; caveret, ne adversus concitatam multitu- dinem nimis pertinaciter tendendo, materiam feditionibus atque offensionibus præberet: plebis igitur voluntati obsequi in animum induceret: existima- retque se, in Abbatis delato munere accipiendo, dignitatem familiæ non imminuisse, sed Reipublicæ condonasse: id illum ceteræ prudentiæ suæ conveniens facturum. Igitur Simon ad plebem conversus, *Morem*, inquit, *cives, studiis vestris gerere decrevi; in honore siue Abbatis, siue Domini accipiendo: ad quæ verba subito ab universo populo succlamatum est: Nequaquam Abbas, sed Dominus esto, Buccanigra.* Qui- bus ille, *Voluntatem*, inquit, *vestram video, cives, ut Dominus sim; sed cum eo fortasse, ut una cum Capi- taneis his, quos cernitis, rebus præsim.* Conclamat mul- tudo; *Quin tu solus, nemine socio, Rempublicam ge- rito, Duxque esto; hunc tibi summi honoris atque imperii titulum deferimus:* & secundum ea dicta hominem è prætorio in privatas ædes deducunt; *Io Dux, io Do- mine*, in itinere lætis plausibus subinde conclaman- tes: paulloque post, iisdem cum plausibus ac clamo- ribus, magna hominum comitante multitudine, in prætorium reductus est: qui in ipso initio animum statim parem tanto fastigio demonstravit: neque enim plebi dissolutæ indulgens fuit; sed lascivien- tem compressit: quæ, animis sublatis, quod princi- pem sui corporis hominem, ac tanto beneficio sibi obnoxium haberet, non contenta libertate, qui est perpetuus plebis mos; imperio, in quo se positam putabat, abuti continuo cœpit: tota enim urbe ar- mata discurrens, atque *Io popule, io Dux*, subinde vociferans, sui speciem terribilem faciebat: nonnul- lorumque cupiditas egestate inflammata eo provecta*

est; ut Nobilium domos luce ac palam invaderet ac diriperet: qua fama ad aures ipsius perlata, exci- tatus Simon facinorosorum hominum scelere & au- daciæ in ipsis initiis obviam eundum intelligens, con- tinuo cum valida armatorum manu prætorio prosi- liens, urbemque circumiens, nonnullos recenti præ- da onustos in itinere comprehensos capitali supplicio affecit, rebus suis dominis restitutis; terroremque suum circumferens, perditorum hominum nefarios conatus discussit, ac civitatem pacavit: qua severi- tate, quibusque in maleficiis puniendis justitiæ do- cumentis, majestatem imperii & civitatis quietem sancivit, populique obedientiam in se firmavit.

At Capitanei, cum in privatas ædes non sine dis- crimine concessissent, neque in ea urbe, in qua ipsi imperium obtinissent, alium, ipsis dejectis, re- gnantem æquis oculis adspicere possent, ad hoc non se satis tutos inter tot in se ardentia odia censentes, urbem illico excedunt; Auricæque urbem Ingaunum, Spinulæ vallem Porciferæ versus iter capiunt. Pos- tero die omnis populus, unaque plebs rustica trium præfecturarum, ante ædem divi Laurentii armati conveniunt: ibique perpetuum ducatus im- perium Simoni Buccanigræ universi ducant, ac ratum faciunt; nonnullis civibus, omnibus è po- pularium corpore, illi in consilio additis. Leges præterea factiosæ summo cum populi consensu late: quibus omnes Guelphi à Republica gerenda exclusi sunt, Nobilibusque illius Factionis illorum villæ exulii locus definitus; cum de Gibellinis Nobilibus nonnulli tantummodo è gentibus Spi- nula & Auria urbe sint exacti; ex reliquis familiis omnibus, ac ne ex ipsis quidem Auriis & Spinulis nemo exulii causâ solum vertere sit coactus.

Ita Genuæ imperium à Nobilibus ad populum translatus est; totaque Respublica Gibellinis ces- sit: quæque res omnibus sæculis, atque apud omnes gentes magni moliminis, magnorumque certaminum, ac discriminum, magnique consilio- rum apparatus, tum autem diuturni temporis fuit; ea Genuæ eodem temporis momento mota & ad exitum perducta est; inopinatusque casus, ac sto- lidi & obscuri hominis temere emissâ vox, tantæ rei origo & auctor fuit. Quarta hæc fuit regiminis civitatis nostræ forma, à Consulibus post extin- ctum Romanum imperium incepti, deinde ad Præ- tores translati; ab his ad Capitaneos, postremo ad Duces deducti. Sunt qui causam non casui aut sto- lidæ voci assignent, sed Simonis ipsius artificio; quem siue ambitione inductum, siue patriæ cari- tate impulsus, ut illam à perpetuo dominatu quat- tuor Nobilium familiarum liberaret, ad splendi- dum consilium animum adjecisse: ab illoque ex- cordem hominem submissum, consilio in utramque partem tuto: siue enim ejus vox respueretur, frau- dem in homine amente minime suspectam fore: si- ve acciperetur, tum se id, quod intendebat, asse- cuturum: eodemque astu homines alios ab illo fa- ctos & præparatos venisse, qui, simulatque ipsum Abbatis nomen ac munus delatum recusantem, at- que ensim restituentem cernerent, nomen ipsi Do- mini ac Ducis subjicerent: quod ut non omnino à vero absonum Simonis ingenium facit; ita rei in sola conjectura positæ, cujusque indicium nullum umquam emanarit, quis tandem fidem adjungere possit?

Ad memoriam novæ institutæ Reipublicæ perpe- tuo retinendam lege sancitum est, diem ad nonum Kalendas Octobris, qui dies festus est beatæ Te- clæ, celebrandum; vexillo aureo ab ipso primum prætorio ad ejus divæ titulo sacratam ædem delato; quod consequerentur omnium opificum præfecti, singuli singula vexilla suorum cujusque opificiorum corporis deferentes. In ipso ducatus initio haudqua- quam laudabilis exempli facinus à plebe admissum est;

tabulis rationum Reipublicæ atque ærarii incensis, sive iussu, sive permissu conniventis Ducis; ut videlicet animos plebis nonnihil severitate in puniendis maleficiis irritatos eo blandimento permulceret: qua in re ut apud bonos & Nobiles nonnihil offendit, ita illorum voluntates alio facinore mire sibi conciliavit: nam Rebella Grimaldum à magno hominum globo circumventum, atque extremo discrimini proximum eripuit è manibus furentis multitudinis, hominem ad mortem minaciter deposcentis; sceleratorum scilicet progeniem, qui ipsius Ducis avum Lanfrancum Gulielmi Capitanei fratris salutem & dignitatem defendentem, per summam injuriam & crudelitatem interfecisset; eripitque incolumem dimisit: qua severitate, quibusque & in maleficiis puniendis iustitiæ exemplis, & in privatis familiæ injuriis condonandis, moderationis mitisque animi editis documentis, maiestatem imperii sancivit; ac non modo populi obedientiam in se firmavit; sed maximæ quoque Nobilium partis voluntates ad se attraxit; cum Nobilibus ipsis quattuor potentiorum gentium regnum invisum esse cœpisset: quarum fastus eo creverat, ut reliquis familiis nobilibus non jam pro sociis, sed pro clientibus atque adeo subjunctis uterentur: hominesque præteritis malis fessi gauderent, sese acrem otii civitatis vindicem nactus nemini vim afferentem, neminem calumniis circumvenientem: quin contra omnes tam Nobiles quam popularis corporis cives pariter amplectentem; neminemque, qui communi & æquabili jure cum ceteris esse vellet, ab honoribus & classium præfecturis excludentem: ut magnus Nobilium numerus, studiis cum primoribus popularis corporis civibus consociatis; lætantesque à patriæ cervicibus jugum excussum, libertatemque ad cum diem oppressam à Simone restitutam, omnia sua studia, resque omnes suas ad illum prolixè detulerint.

At non idcirco potentiorum nobilium familiarum implacabiles animos mitigavit; cum non magis sese principatu dejectos dolerent, quam hominem è populi corpore solum ac solum legibus dominantem concoquere non possent. Illorum igitur conjunctionibus sæpe est appetitus; quarum exitus infelix fuit: nam infrequenti anno ejus sæculi quadragesimo A.C. 1340. municipis quidam Vulturensis, qui à nobili quodam primario cive inductus, cujus nomen Annales silentio prætereunt, Ducem scorpionis ictu interficiendum susceperat, re detecta capitali supplicio affectus est: paulloque post Duci à nonnullis tenuis fortis hominibus consilia in illius caput à duobus ex Gibellinæ Nobilitatis principibus, quorum nomen ipsum quoque filetur, inita, enunciata sunt: qui cum octingentorum armatorum manu aliquam civitatis partem occupare ac præfidiis firmare constituerant, ibique exfulum promissa prævalida auxilia expectare; quibus subnisi prætorium ac Ducem invaderent: quos Dux stabulo latentes comprehensos, ac per judicium damnatos capite plecti iussit. Ad hoc nullas diligentiae partes in novo rerum statu stabiliendo prætermittens, omnes fere ditionis Genuensis arces recuperatas partim retinuit, partim tamquam Reipublicæ atque otio civitatis incommodas demolitus est; arcem Ericis, quæ à nobili quodam Genuensi tenebatur, pretio redimere coactus. Eum sibi morem fecerant Marchiones Carrettani, ac nonnulli alii Proceres, diuturna impunitate eorum audaciam alente; ut finibus suis egredierentur, ac ditione Genuensi populabundi discurrebant: quin etiam opida & loca sæpe invaderent: quæ res à Genuensibus in tantis civilium bellorum occupationibus, minus animadverti, aut puniri poterant.

Hoc igitur anno Georgius Carrettus Marchio Finarii haud secum reputans, mutatam temporum rationem, neque considerans cum quo viro, quam-

A que acri suæ & Reipublicæ dignitatis vindicare sibi futura esset; fines Ingaunenses infesto exercitu ingressus, agro prius vastato, copias urbis moenibus admovet. Dux haud leviter terrestria & maritima auxilia, Joanne à Mari ex Nobilitatis corpore viro Duce, extemplo subsidio Ingaunis mittit: in quibus fuerunt novem triremes, quæ commodum ex Hispania redierant; ne hominibus quidem è tam longo itinere in patriam & ad suos reversis in terram exscendere permissis. Fama adventantis validi subsidii percussus Georgius, intelligens quam dispar certamen sibi cum tanto viribus superiore esset, obsidione soluta, sese ac copias in sua subducit: nunciosque se excusatum ad Ducem mittit. Eos vultu & sermone adspersus Dux, respondet, non aliter Georgium sibi de injuriis quam præsentem satisfacere posse: id suam & Reipublicæ dignitatem postulare. Georgius in summas angustias adductus, ceteri omnis consilii inops necessitati paruit: fideque incolumitatis accepta, Genuam venit, atque inter convicia populi obstrepentis, ad mortemque illum deposcentis, in prætorium deductus est: nihilo magis comiter à Duce aut vultu, aut verbis acceptus, in custodiam datus est; paulloque post tetro carcere inclusus: ex quo non prius est dimissus, quam necessitate illi expressa, Finario, Varigotto, Cervo, ac ceteris omnibus, quæ tenebat, locis Ducis ac Reipublicæ Genuensi cedendi: quæ loca, simulque castella Procerum Linguiliæ, qui cum Georgio conspirant, Duci illico tradita sunt: qui è vestigio arces Castellarii & Varigotti demolitus est: neque tamen idcirco Georgio placatus; quem lignea cavea fabricata inclusit: quibus rebus confectis, Dux totam Liguriam in antiquum imperium ipsius virtute redactam pacatam habuit, præter Monæcum, quod opidum à Republica abstractum gens Grimalda tenebat; ac præter Albintemelium, quam urbem nonnulli ex quattuor potentioribus familiis sibi sedem fecerant.

At Dux, quamquam ingenio acer & vehemens, severitate & vigilantia sua satis se terribilem inimicis fecerat; nullum tamen ducatus tempus quietum habuit: numquam enim nobiles exsules vel illius vitæ occulte insidiari destiterunt, vel populos ad deficiendum inducere: ut anno, qui superiorem A.C. 1342. secutus est, ejus sæculi quadragesimo altero mittendus cum copiis Prætor fuerit in vallem Oneliæ: in qua multi mortales, Antonio Auria instigante, defecerant: qui Prætor, re strenue gesta, eos, qui defecerant, victos Reipublicæ firmavit: Auriaque hostis patriæ declaratus est, & in exsilium actus, bonis publicatis.

E Infrequenti anno indicia nefariorum consiliorum A.C. 1343. contra Rempublicam, tam in urbe ipsa, quam in multis ditionis Genuensis locis initorum, ipsius urbis Genuæ Principibus Mediolani prodendæ, emanarunt: qua de causâ quidam obscuræ sortis de plebe Genuensi homo, ac nonnulli ex opidis Cervo, Naulo, Tassarolo atroci supplicii genere multati sunt; equinis caudis alligati, ac per urbem rapati.

F Improbum quoque ac mali exempli facinus infrequenti anno ejus sæculi quadragesimo quarto à Luciano Grimaldo, qui Monæcum tenebat, in Rempublicam admissum est: qui defectionis crimen latrociniorum infamia cumulavit: triremi enim armata, piraticam facere contra nationem Genuensem, ipsosque cives suos cœpit; nonnullis navibus civium Genuensium, etiam ex Nobilium Factione, magni pretii mercibus onustis captis: ut sex triremes Genuæ armandæ fuerint, Ugolino Guizulfo ipso quoque ex Nobilium corpore præfecto: quarum tres in oram Orientalem, tres in Occidentalem adversus piratas missæ sunt: quæ triremem Monæci ad necessitatem pugnae adactam ceperunt, ac captam Genuam adduxerunt. Tandem nobiles exsules

les quattuor potentiorum familiarum, occultis insidiarum consiliis toties vanis expertis, aperta vi agendum statuunt: confociatis igitur studiis, ingentes pedestres & equestres copias comparant: qua in re operæ pretium est considerare, quam ardentia sint inter Nobilitatem & populum Factionum studia; quamque, præ illis, ceteræ dissensionum causæ leves: tantum enim nobiles potentiores quattuor familias Simonis odium tenuit; ut aviditas popularis principatus evertendi memoriam inveteratarum Gibellinæ & Guelphæ Factionum internecinis odiis tamdiu exercitarum obruerit, animosque ob atrocissimas mutuas injurias capitaliter inter se infensos subito conjunxerit.

At Simon improvviso nuncio trepidus, capitibus regionum, quos *Conestabiles* appellabant, convocatis; de ratione periculi imminentis discutiendi cum illis deliberare instituit. Via compositionis, quam armorum, tutior & exploratior est visa: igitur Simon, Nobilibus, qui erant in urbe, vocatis, talem orationem habuisse dicitur: *Injuriam, quam sibi Nobilitas impositam putat, partim urbe exacta, partim honoribus, ac magistratibus, omnique procuratione Reipublica exclusa; non tam mihi tribuere, si verarum æstimatrix est, quam perpetuo civitatis mori, ad hoc Reipublica temporibus assignare debet. Quis enim in omni vita me mitior umquam fuit, nisi cum majestas imperii severitatem postulavit? Quis ab omni inferenda injuria, aut natura, aut voluntate remotior? qui ne populum quidem privatas meas ac domus mea injurias in Rebella Grimaldo ulcisci passus sum: quem agre furentis multitudinis manibus eripui. Neque populus in Nobilitate urbe exterminanda novi quidquam fecit: cui ipsamet Nobilitas per septuaginta hos annos, quibus præpotentes quattuor familia regnarunt, hoc exemplum prævit: cum altera Factio rerum potita non modo adversam Factionem à Republica gerenda dejiceret, sed civitate quoque ejiceret: quod igitur Nobilitas à sui corporis hominibus, ac nulla alia re, quam partium Gibellinarum & Guelpharum nomine distinctis, semper perpeffa est; id se à populari corpore hoc tempore pertulisse miretur, aut vero indignetur? cum mitiorem etiam populum erga se, quam ipsi inter se fuerint Nobiles, experiatur; qui non totam adversam Nobilium Factionem (duæ enim hæ Factiones Nobilium & popularium ad veteres hoc tempore addita sunt) urbe expulit; sed eam tantum partem, quæ turbulentioris ingenii visa est; quæque hanc Reipublica formam summo totius populi consensu sancitam sese avversari præferebat: à vobis vero pacatis & quietis civibus, qui domi mansistis, non modo omnem injuriam abstinuit, sed in honore etiam vos habuit, publicis muneribus ac triremium præfectoris ultro delatis: cum Nobilitas totam adversam Factionem exsilio mulctaret, ut duæ jam factæ civitates viderentur; altera, quæ urbem incoheret, altera, quæ extorris patria atatem ageret. Procurationem vero Reipublica vobis, qui Guelphas partes secuti estis, abjudicatam, æquo animo vos ferre decuit; si superiorem rerum statum tum, cum quattuor potentiores familia regnabant, cum presenti comparando, vobiscum reputabitis, in eum locum res adductas; ut, quod vobis relictum est, nimirum patria ipsa, potius in lucro, quam quod ademptum, in damno ponere deberetis. Quamquam ne hoc quidem ipsum libens, sed à vi ipsa coactus feci: nulla enim alia erat via vos in civitate retinendi; nullaque alia re irritatos populi in Nobilitatem animos mitigare potui, quam hac specie contumelia vobis injuncta: ut beneficium mihi potius, si verum amatis, à vobis deberi, quam ullam succensendi causam habere existimare debeatis. Nunc, cum divini Numinis benignitate, meaque assidua diligentia & studio, ira populi in Nobilium nomen satis deferbuerit; en vos honoribus & procurationi Reipublica restituere decrevimus. Quod beneficium nemo putet metum à me potius expressisse, quam ipsam rei aequitatem impetras-*

A se: nam non ideo exsules quieturos intelligo, neque ab armis mihi inferendis destitutos; quæ non vestra, sed sua causa induerunt: qui utinam civitatem tantummodo repetant; atque in animum inducant cum reliquis civibus æquo jure vivere: profecto non asperiores illi in se populum experientur, quam vos illum in vos sensistis, nulla in re umquam læsi. Nunc illi non patriam repetunt, quam illis restituere parati sumus; si modo in ordinem se cogi pati possunt, ac meminisse volunt, se illius cives non dominos natos; sed regnum, quo carere non possunt, cujusque causa patriam funesto civili bello involvere non dubitant: porro vero pergant; haud feliciore eventu quam justiore causa dimicaturi. Proinde quattuor è vobis eligite; qui mecum de conditionibus concordia agent.

B Cum perorasset Dux, Nobiles, conditione data cupide accepta, quattuor à se electis negotium dant controversias cum Duce componendi: paucisque commutatis verbis, res ita convenit; ut exsilibus patria ac bona restituantur; honores & munera publica æqualiter inter populum & Nobilitatem dividantur: duodecimque cives Duci in consilio dati sunt, feni ex utroque corpore. Neque tamen hac compositione arma à Nobilibus deposita sunt; cum urbi appropinquassent, ac circumjecta loca præfidiis occupassent, quin etiam suburbia intrassent; cum per idem tempus multi in ora Orientis ex potentioribus familiis, Nobilium partes sequentes ad arma confurrexissent, Prætoribus ac Magistratibus à Duce missis expulsi: quæ res ingentem trepidationem Genuæ fecit: cumque Nobiles negarent sese aliter urbem intraturos, quam cohorte septingentorum prætorianorum à Duce dimissa: Dux in ipso temporis articulo, cum faucibus premeretur, infidelitatem hominum conqueffus: *Sicuri*, inquit, aut meus, aut potentiorum familiarum in Rempublicam animus adhuc dubius fuit; hodiernus dies finem dubitandi faciet. Hic, inquam, dies, Genuenses, decernet, utrum mea consilia per speciem libertatis patriæ afferenda, & concordia civium constituenda, ad regnum mihi comparandum, ut adversarii mei distitent, spectarint: an nobiles exsules per has ambages de civitate, ex qua extorres immerito se atatem agere distitent, ac jure civium recuperando; an de impotenti dominatu, ex quo ego injuste posseffo illos dejeci, repetendo laborarint: eosque ex istis simulationum involucris evolvat. Nam, prohi Superum atque hominum fidem! quid est, quod illi contra Rempublicam per hos annos moliti non sint; illius opida occupando, populos ad defectionem impellendo, quin etiam piraticam faciendo, ac bonorum & rerum civium suorum, velut hostium, pradas agendo; arma denique patriæ aperte inferendo? aut quid illis in votis fuit, quod non illico impetrarint? In civitatem sese restitui postularunt; restituti sunt: ad honores & ad procurationem Reipublica se admitti contenderunt; admissi sunt: postremo omni illis excusatione adempta, rem novam, quæ una restabat, commenti sunt: præsidium enim, quo me ex decreto vestro adversus ipsorum modo occultas insidias, modo apertas petitiones sepsi, dimitti volunt. Quæ in re quid illis propositum esse censetis? utrum quod sibi & saluti suæ à me armato timeant: an vero ut me, cujus jugulum toties sceleratis consiliis suis, ac latronibus & percussoribus submissis perierunt, nunc aperta vi præfidiis nudatum aggrediantur? ut, me videlicet oppresso, unoque illo, quod ipsorum libidini & ambitioni adhuc obstitit, impedimento sublato, possessionem impotentissimi dominatus sibi stabiliant? A me nihil tale illis timendum esse, neque meum ullum præcipuum esse in Nobilitatem, ut illi calumniantur, odium, argumento sunt à me in ducant gesta; qui eam Nobilitatis partem, quæ domi remansit; quæque animum inducere potuit, ne præcipuum sibi jus inter reliquos cives postularet, non modo nulla in re læsi, sed etiam defendi: cum etiam domesticas injurias ac justum odium meum Reipublica & patriæ cari-

caritati ac studio concordia condonarim. *Quamquam* quid ego me Nobilitatem non lasisse commemoro? quam insuper amplexus sum, in honore habui; quin etiam classum praefecturas mandavi; nullius videlicet studium & operam adspernatus, qui quietorum civium instituto vivere voluit: ceterum ambages istas praecidamus: en, ego, ne quid in me sit, quod civitatis concordiam distineat; non modo praesidium dimittere, sed ducatu ipso à vobis mihi ultro liberis suffragiis mandato abire paratus sum: quodque onus vestra ac Reipublica causa mihi impositum, suscepi; idem eadem vestra & patria causa deponere constitui. Non obstat jam civitatis tranquillitati & civium concordia Simonis Buccanigra persona: utinam ne eam tyrannidi obstitisse experiamini: eripiam ego adversarius orationem, qua me appetiti regni insimulant. Age refellant me ipsi vicissim; in falsam invidiam, ut ajunt, dominandi cupiditatis illos vocantem: secundumque eam orationem, magistratu se abdicavit, atque in privatas Squarciaficorum aedes concessit; paucisque post diebus Pisas commigravit.

Neque vero quinquennale curriculum, quo Simon ducatum obtinuit, imbelles omnino fuit, aut militari gloria caruit, neque infelicitate Refpublica foris gesta, nonnullis claris victoriis partitis; quas hucusque scribendas distuli, ne seriem urbanarum rerum interromperem. Simon enim à Quarto praefectus novem triremium ad mercatoriam negotiationem comparatarum Peram impulsus cognovit, duodecim Turcarum triremes per circumjecta maria populabundas discurrere, magnasque praedas hominum & rerum tam Genuensium, quam ceterarum nationum continenter agere. Quare inde profectus Simon, cum in itinere in urbe Sinope cum Palabi Turcarum principe caput contulisset; neque Turca res ablatas restitueret, pollicitus tantummodo se Genuensem classem non laesurum; Legatis ad Caesarem Trapezuntium cum duabus triremibus missis, ipse Simon cum reliquis septem Cassiam perrexit: civibusque injurias Turcarum conquerentibus, ad easque ulciscendas hominem hortantibus; mercibus in terram expositis, vigintique minoribus navigiis à Cassensibus armatis sibi adjunctis, classem Turcicam perquirere instituit: quam adeptus, acri praelio vicit, decem triremibus captis, ac praeda, quam fecerant Turcae, recuperata. Simon, quae erant Genuensium, retentis, reliquis nationibus suas cuique res cum fide restituit.

Missus est praeterea in Hispaniam Aegidius Buccanigra Ducis frater cum viginti triremibus, ad operam navandam Alphonso Castellae Regi undecimo adversus Mauros: qui graves accolae eum continenter in armis habebant: qui in bellis cum infida gente gestis, expeditionibusque susceptis egregiis & assiduis audaciae, fortitudinis, consilii, rerum militarium ac navalium scientiae edendis documentis, cum gratiae locum apud inclytum Regem adeptus est, ut Rex multiplicem & conspectam hominis virtutem duplici honoris praemio remuneratus sit; Palma urbe Cordubae & Hispali interjecta, cum honorifico Comitum titulo fiduciaria illi data, quam ad nostram usque aetatem Buccanigrae Proceres Aegidii successores possident; ac summo maris imperio Halmiratis nomine insigni illi mandato.

Per ea quoque tempora Princeps Tartarorum, qui circumjectas regiones Tanai fluvio incolunt, multis & magnis detrimentis Genuenses & Venetos affecit; bonis eorum direptis, illisque ex toto regno suo exterminatis, ac copiis Cassiae admotis; quam urbem velut coloniam Genuenses tenebant, quem audaci eruptione Genuenses adorti fuderunt, ac profligarunt; plus quinque Tartarorum milli-

A bus caesis: qui ea clade fractum se simulans, Oratores ad Ducem Buccanigram de pace componenda cum Genuensibus misit: quae cum convenisset, Genuenses fide pactorum freti, omnique metu soluti, per regna Tartari commeare ac commercia exercere coeperunt: quos perfidia sua inescatos barbarus hostis, omnisque divini & humani juris contemptor, comprehensos iterum omnibus ipsorum rebus spoliavit.

B Neque in Hispania undecim triremium, quas ex classe Genuensi Alphonsus retinuerat, cum novem Genuam remisisset, inutilis mora fuit; novem triremibus ac tribus galeatis Boniacobi Regis Garborum fufis ac profligatis; terrestri quoque regione magnis belli cladibus vastata, magnaue praeda abacta; quae magno usui fuit triremibus ex ea reparatis: quae res tanti Genuae facta est, ut ejus causa supplicationes habitae sint. Eodem quoque tempore Christianorum classis quindecim triremium, quarum quattuor Pontificiae, sex Venetae, quinque Genuenses fuerunt, quibus praerat Martinus Zacharias, Smyrnam inferiorem vi captam è manibus Christiani nominis hostium eripuerunt.

C Nunc ad res urbanas redeo: quae longe turbulentiores fuerunt, postquam Simon ducatu abiit, praetorianique urbem liberam reliquerunt: neque instituta pacis & concordiae consilia ad effectum perducta sunt: nam, cum insequentis anni ejus saeculi quadragesimi quinti initio, duo de consilio ex ipsius Nobilitatis corpore homines ad eos publice missi essent, qui de pacificatione agerent; Galeottus Spinula, qui Capitaneus fuerat, negavit se aliter, quam armatum, urbem intraturum. Cohorrerunt, qui missi sunt, hominis postulato, quo nihil esset spei pacis inchoatae magis adversarium: igitur protinus in urbem reversi, portam in locum, ubi exules confederant, ferentem occludi jubent; legationemque renunciant: quae res non modo plebem, sed Optimates quoque nobiles, & popularis corporis ira accendit: cum dictarent Optimates, vatem fuisse Simonem: perspicuumque factum, quattuor familias honestam quidem speciem conatibus suis praetendere; ceterum longe alia animo agitare: neque illos armis patriam repetere, sed veterem dominatum moliri; cujus sibi firmandi causa tantas bellorum & tumultuum procellas terra ac mari excitassent, totque detrimentis Rempublicam concussissent. At plebs non modo exules, & quattuor familias, sed omnem Nobilitatem lacerare: eam cum exulibus ejusdem corporis hominibus, ad hoc cognationibus & affinitatibus sibi conjunctis consilia confocialesse, fremere; illinc exules aperta vi, hinc istos occultis dolis libertatem populi oppugnare, plebisque simplicitatem ludificare: illorum suavis praetorianos dimissos; ut urbem defensoribus vacuum opportuniorem exfulum conatibus facerent: illorum astu Simonem libertatis & dignitatis publicae acerrimum vindicem principatu abire coactum: ceterum non simul cum illo principatum interiisse, neque defensorem plebi ademptum existimandum esse; sed alium illico in Simonis locum sufficiendum, in quo animus tanto fastigio par sit: parere necessitati Nobilitas coacta, re ad seditionem spectante, id summa ope egit, ut hominem animo in se amico, cuique ipsi fiderent, Ducem haberent: quattuor igitur praestantium civium nomina ediderunt; quorum duo corporis popularis fuerunt, Georgius Ricus & Joannes à Valente; reliqui duo Nobiles, Janones Gentilis, Moruellus à Mari; rem ad eam interpretationem Nobilitate revocante, ut ex conventis cum Buccanigra Nobilium quoque ratio in ducatus comitiis haberi posset: ceterum plebs, omnibus utrius-

A. C.
1345.

F f que

que corporis præteritis, in Joannem à Myrto studia sua contulit: cujus gravitas, moderatio, prudentia, eximia patriæ caritas eminebat; cuique plurimum ipsa fidebat: cum ne Nobilitas quidem ab homine mitis ac minime factiosi ingenii abhorreret. Is igitur ipso natali Christi Domini die, sub vespertum, post ingentia certamina, fummo consensu plebis Dux creatus est: cui postero die universum civitatis consilium in æde divi Laurentii ducatum ratum fecit, atque insignia principatus tradidit. Hujus initia magistratus antea vitæ ac spectatæ continentie responderunt: emolumenta enim & stipendia repudiavit; victu se & cultu quotidiano fore contentum, ac legibus & institutis civitatis subjici velle affirmans: quas se ulla in re violaturum, aut quidquam de pecuniis publicis attacturum negavit: ceterum plebs, cum consilia pacis ne inter ipsum quidem novum Ducem, virum sanctum atque integrum, & potentiorum Nobilitatem exitum invenirent, extrahi se rata, simul Nobilium arma & occultos dolos metuens, ad hoc exemplo plebis Saonenfis incitata, quæ per illos dies Nobilitatem urbe exegerat, prævertendum inimicorum consiliis statuens, armis arreptis, discurrere per urbem cepit, populi ac Ducis nomen magnis clamoribus subjiciens: cui furenti nonnullæ nobiles familie, in quibus fuerunt Squarciafici, aliquot in urbis locis sese opponere ausæ temeritatem cladibus suis luerunt, à plebe victæ, nonnullis illarum domibus incensis. At qui Duci erant in consilio tam Nobiles quam popularis corporis cives, res in cum locum adductas cernentes, ut consilio regi non possent, ac ne in tanta rerum colluvione majestatem publicam in personis suis violandam offerrent; magistratu & prætorio relicto, in privatas aedes succedunt; seque turbis subtrahunt: in quorum locum quindecim cives è vestigio suspecti sunt, omnes popularis corporis homines: magistratusque, qui rebus bellicis præerat, cum diligenter in eos inquisissent, Nobilibus, qui erant in urbe, arma ademittit. Ita Galeotti & potentiorum familiarum ambitiosa consilia, non modo in auctorum, sed in ceteræ quoque innoxie Nobilitatis caput reciderunt; civilique bello civitatem involverunt: nam plebs à Nobilitate urbem incolente secunda facta, maturum rata, periculum cervicibus ab exsulibus imminens tandem discutere; nullo publico jussu, sed suo ipsa impetu rapta, è pluribus locis tam mari quam terra erumpens, Nobilitatem, quæ mille armatos stipendio conductos secum habebat, magno impetu invadit: quam primo superior è suburbiis expellit, fugientemque insequens, in proximos montes compellit: quorum locorum præsidio freta Nobilitas constitit, in plebemque gradum infert, quam in fugam conjicit; cum in eo prælio multi utrimque cecidissent, in quibus fuit Sarra Spinula; plebsque, cum advesperasceret, in urbem rediit. At Nobiles sese irritatæ multitudini vim asferre non posse, intelligentes; in spemque irritam ad urbis moenia terere tempus, eadem nocte profecti, in sua se recipiunt.

Metu exsulum soluta civitas, haud diu post, tres triremes publice armavit: quæ, adjunctis quattuor privatorum civium triremibus, mercatorie negotiationis causa comparatis, cum haud exiguo armatorum numero subsidio Ingaunis aliisque populis laborantibus mittit, adversus Antonium Auriam exsulum exercitus Ducem: quo fuso; Ingauni & ceterorum opidorum imperium populo Genuensi firmatum est: ceterum classe Genuam remissa, novi motus in eadem Occidentis ora exorti sunt; compluraque opida ab exsulibus nobilibus ad defendendam instigata: adversus quos duæ Genuensium private societates; altera Nobilium, quæ Portæ

A novæ appellabatur; altera popularium, Castelli vocata; privatam expeditionem susceperunt: quibus Dux publice datus est Guiscardus Lancius Bergomas Prætor urbis, vir impiger ac strenuus, neque militaris relictus. Is complura opida recuperavit: in quibus fuit Onelia, quam Antonius & Stephanus Auriæ invaserant, ac Portus Mauritius: Antoniusque, qui se in opidum Cervum receperat, sese atque opidum Prætori tradidit: qui, rebus ex sententia gestis, oraque pacata, Genuam reversus est.

B Graves ac molestæ erant Italicis Principibus Genuensium discordiæ; Luchinusque Vicecomes Mediolanensium Princeps, controversiarum causas pro communi amico & disceptatore ex propinquo cognoscendas & transigendas susceperat: omniaque Genuenses diuturnis malis fessi ad ejus arbitrium rejecerant. Nec minus de Genuensium pacificatione laborabat Pontifex; frustra pacem & amicitiam inter duos potentissimos Italiæ populos, Venetum & Genuensem, quorum maritima opes Christianis rebus adversus Barbaros tanto usui semper fuissent, reconciliatam ducens; si alterius populi prævalide vires sese mutuo conficerent: quæ de causa Episcopum Patavinum Cardinalem Legatum Genuam misit: qui cum in urbe mensem fuisset, nullasque hortando, monendo, increpando, Pontificias preces consiliis addendo, boni ac seduli Legati partes prætermisisset; Mediolanum se ad Luchinum confert: cum quo multum ac diu de rebus Genuensibus locutus, Romam rediit. Refertur interea in induciis fuit, Luchino ita jubente: qui mense Julio judicium tulit, cujus summa hæc fuit: pax & concordia inter Ducem & consilium, atque exsules esset; eamque Genuenses sancte colerent; exsulibus civitas & bona sua restituerentur; præterquam Galeotto, Gerardo, fratribusque filiis Spinulis Friderico, Carolo, & Antonio Grimaldis, illorumque fratris filiis, Nicolao & Raphaeli Fliscis; qui ab accessu ad urbem decem millium passuum intervallo excluderentur. Omnes Luchini judicio steterunt; civitasque in pace fuit; omnibus ditionis Genuensis opidis Ducis restitutis, præter Monæcum & Roccambrianam, quæ opida quindecim ante annis occupata Grimaldi tenebant; Monæcumque sibi arcem in Liguria fecerant, exsulum, obætorum, facinorosorum receptaculum; ex qua excursionibus, direptionibus Ligustica littora & maritima commercia infesta faciebant; nemini parentes: qui insequenti anno ejus sæculi quadagesimo sexto A.C. 1446 majore motu majoreque conatu ad bellum consurrexerunt; triginta triremibus ac decem peditum millibus ex circumjectis regionibus armatis. Nonnullum metum motus exsulum auditus Duci & civitati injecit: quattuor igitur civibus, omnibus ex populari corpore, cum fides Nobilium cognationibus & affinitatibus exsulibus junctorum multitudini suspecta esset, negotium datum est, contra exsules comparandi: si fuerunt Joannes Tarigus, Dominicus Garibaldus, Pasqual Fornetus, Thomas Morandus à Levanto: qui, publicis pecuniis deficientibus, magno numero ditiorum popularium civium in consilium vocatis, decernunt, viginti quinque triremes, ac plures quoque, si res poscat, adversus exsulum conatus privatorum sumptibus armandas: quibus vectigalibus publicis caveatur, quæ illis pro portione collatæ pecuniæ pignori dentur: quæ res brevi magnum incrementum accepit; origoque fuit celeberrimi illius toto orbe terrarum Magistratus sancti Georgii. Re tota urbe vulgata, quattuor & quadraginta cives nomina dederunt; quorum septem è Nobilitate fuerunt, reliqui ex popularium corpore: ex quibus quindecim, incertum qua de causa, volun-

voluntatem mutarunt: ut res ad viginti novem triremes redacta sit, singulas à singulis civibus instructas & armatas; tribus Nobilibus, viginti sex popularibus: quorum nomina ob egregiam virtutem, eximiumque patriæ amorem omittenda vitia non sunt: fuerunt igitur Lanfrancus Drizacornius, Gulielmus Solcajus, Gulielmus Angio, Jacobus Morandus, Nicolaus Tarigus, Cosmus Salvagus, Philipponus Pan, Matthæus Balbus Saonenfis, Franciscus Coronatus, Nicolaus Ciconia, Franciscus Gattegarus, Petrus Morascus, Andreottus Pefarus, Andreottus Setta, Ansaludus Oliverius, Ampegius Cantellus, Melianus Ferrandus, suffectus in locum Leonardi Coronasce, Ludovicus Panfanus, Fridericus Osbergerius, Jacobus Olinus, Antonius Vivianus, Thomas Illionius, Rastus Piscina, Ludovicus Peronus, Augustinus Benatus, Meliadux Adornius, Joannes Setta, Luchinus Guanus: summus classis præfectus creatus est Simon Vignosius, cui in arca ante ædem divi Laurentii vexillum à Duce traditum est: hæc classis, quæ minus mensis curriculo comparata est, cum ceteris omnibus armamentis & bellicis apparatibus instructissima fuit, tum bellatoribus, ac nautica turba affarim referta; quam non minorem ducenorum hominum in singulis triremibus fuisse tradunt. Tam validam classem exsules haudquaquam expectandam rati, in Massiliæ portum silentio concedunt: qui à Rege Philippo Francorum adversus Eduardum Angliæ Regem conducti, freto Herculeo superato, ad Galliæ littora appulerunt. Eorum adventus Franco gratus in primis fuit; cum ob ceteras res, tum quod duodecim millia arcuballistariorum vexerant: in quo milite plurimum Rex ponebat: nulla enim erat natio, quæ eo teli genere ea ætate aptius uteretur: ceterum in pugna Cresciacensi, quæ funesta in primis Gallis fuit, haudquaquam utilem operam navarunt: quos à postrema acie, in qua primo locati fuerant, in primam translato, tarde ac segniter, ut in mala spe ex assiduo decidente imbre concepta, procedentes Carolus Alanfonius Regis frater, qui equitatu præerat, ad accelerandum ac pugnam capeffendam conviciis urgebat: ceterum nervi arcuum humore perfusi, atque hebetati, minus, ut Genuenses prædixerant fore, pugnae habiles fuerunt: cum igitur potius pugnae impedimento, quam adjumento essent; Carolus non minus illis quam hosti infensus, concitatis equis per illos medios perripit; magna hominum edita strage, compluribusque equorum pedibus protritis: quod crudele facinus cum animos jam contumeliis irritatos accendisset; qui superstites fuerunt, non modo à pugna abstinerunt, sed nervos etiam arcuum, id quod Paullus Æmilius tradit, inciderunt.

At Genuæ, civitate metu exsulum liberata, quæ cura adversus illos parata fuerat, in Orientis res versa est: quarum is tum erat status, ut omnia Constantinopolitani Imperii ignavia, & desidia multorum deinceps Cæsarum, neglecta & soluta, magis, magisque in dies dilaberentur; omnesque maritimæ urbes & insulæ invadentibus expositæ essent; ut præter Turcas & ceteros Barbaros, multi quoque Græcorum primores ex ipsis Cæsari subjunctis talia sæpe ausi sint, Imperatoribus conniventibus, neque bello vindicantibus; ut ipse ausus jus in re facere videretur.

In hoc rerum statu duo opulentissimi totius maris Mediterranei populi, Venetus & Genuensis, insulæ Chio commercii in primis opportunæ ardenti cupiditate imminebant; duplici causâ utrumque stimulante, spe proprii ingentis compendii ex tam opimis commerciis venturi: ac metu imminentis damni, si ea insula in alterius ex-

is duobus populis maiorem venisset. Tradunt præterea Annales nostri, eam insulam olim Genuensibus à Græco Cæsare donatam. facilius crediderim, promissam: nam Genuenses usquam possessionem insulæ adeptos, aut per quosvis alios ullum jus dominatus usurpasse, nusquam legitur. Igitur Genuenses, siue verum jus, siue hanc qualemcumque iuris speciem præferentes, è portu solvunt; Simonque in itinere Tarracinenfes, quos Comes Fundanus arta obsidione premebat, misericordia supplicum motus, Comite Fundano fugato, liberavit: Tarracinenfesque eo beneficio sese in fidem populi Genuensis tradiderunt. Simon institutum iter persequens, secunda navigatione usus, Eubœam insulam tenuit: ibi offendit classem sex & viginti triremium maiore ex parte Venetarum; cum reliquæ essent militiae Hierosolymitanæ; quæ Ingibertum Delphinum Viennæ vehabat. Erat id commentum Venetorum: qui, quod aperto bello conari non poterant, foedere videlicet Cæsaris alligati, vel qua alia causâ prohibiti, per cuniculos machinabantur: Delphinumque induxerant ad dominatum illius insulæ petendum; qua ille illico Venetis esset cessurus. Hunc igitur Delphinum promissione ingentium præmiorum fidem suam labefactare aggressum, auribus & vultu aspernatus Simon, iter persequitur; brevique insulam Chium tenet: caduceatoreque in urbem missio, pronunciat, si Chienfes, ut sese in potestatem populi Genuensis tradant, in animum inducere possint; honorifice atque honestissimis conditionibus illos in fide Genuensium fore: si salutaria non audiant; tum sese ad direptiones, incendia, vastitates, cædes, ceterasque belli clades parent. Verbis male acceptus cum superbo responso dimittitur caduceator. Simon ira incensus copias in terram exponit: qua res non sine certamine fuit, quingentis Genuensibus sauciatis. Simon circumjecta regione quadriduo potitus, urbem terra & mari circumvallare instituit: quam à terra perpetuo ac præalto muro totam circumdat: à mari vero catena lignea ex magnæ crassitudinis trabibus contexta, mille trecentorum cubitorum longitudinis, portum atque omnem partem maritimam claudit; ut omnis, tam mari quam terra, aditus Græcis omnino esset interclusus: qui multos dies artam obsidionem perpeffi, in necessariam tandem deditionem venerunt, his conditionibus; quæ ne mitiores quidem fuissent, urbe primo adventu sine certamine tradita: in civium enim Genuensium numerum & jus accepti sunt, multis immunitatibus donati.

At Simon, urbe strenuo præside ac valido præsidio firmata, utramque Phocæam, quæ urbes sunt in continenti Asiæ littore è regione insulæ Chii, petit; qua utraque deinceps potitus est; cum postrema voluntaria deditione sese subito tradidisset; prior aliquot horarum certamine rem extraxisset. Simon Phocæenses benigne appellatos ac lenibus verbis permultos bono animo esse jubet: fore enim, ut imperio Genuensi magis in dies lætentur, moderationem & mansuetudinem experti: nihil enim Genuenses ab illis, quam obedientiam petere: præsidio igitur imposito, iter in Mitylenem opulentam & proximam insulam parabat; sed seditione nauticorum longiorem militiam detrectantium à præclaro incepto prohibitus est: igitur Chium reversus, rebusque in ea urbe & insula summa cum æquitate & fide constitutis, Chio solvens Genuam repetit: quo brevi, secundo flante vento, pervenit. Is vir ad bellicas virtutes non minores continentia & fidei laudes addidit: nam præter præmia Delphini spreta; filium suum adolescentem per lasciviam prædium Chienfis civis contra edictum patris ingressum, ex quo nonnullos racemos uvæ abstulerat, ad se adductum, racemis uvæ, ad maiorem

ignominiam, collo suspensis, fustuario tota urbe circumductum verberari iussit. Præterea, cum in bello per regionem circumferendo, aliquos innoxios iniuste æolos necesse esset; ad expiandam labem, & qua animo infedisset, quingentos aureos nummos in nuptias pauperum puellarum Chienfium moriens legavit. At Genuæ cum ii, qui re familiari sua expeditionem sustentarent, sibi satisfieri de creditis pecuniis postularent; ærariumque ingenti æri alieno solvendo non esset; vectigalia insulæ omnia in illos translata sunt: conventumque est, ut, nisi intra vigesimum nonum annum privatis satisfactum esset; tum vectigalia illis prorsus cederent; summo ac mero imperio, gladiique & sanguinis jure Ducibus ac Rempublicam Genuensem pro tempore regentibus illibato reservato.

A.C. Tribus insequentibus annis Genuæ tam ab externis bellis, quam à domesticis motibus otium fuit: qui anni nihil memorabile habent, præter pomœrium prolatum, ac mœnium opus, quibus suburbium sancti Thomæ intra urbem receptum est, superiore anno inchoatum, ad finem perductum: ac pestilentiam illam memorabilem, Joannis Boccacii & nonnullorum scriptis celebrem: quæ tota Italia grassata omnes ejus Provincias & urbes funeribus implevit; tantamque vim hominum, ut nonnulli tradiderunt, absumpsit; ut non plus decimam capitum partem superstitem reliquerit.

A.C. Insequentis anni initio, qui fuit ejus sæculi quinquagesimus, Joannes à Myrto Dux fato functus est: cujus mors luctui omnibus bonis fuit; recordatione virtutis & prudentiæ; tum autem amoris in Rempublicam; quam in omni vita privatis commodis prætulit: cui à publico civitatis consilio in ædem Georgii convocato suffectus est Joannes Valens; cum multi summum locum haud dissimulanter ambirent; in quibus fuit Lucas Facius, cujus ambitio eo provecta est, ut non prehensionibus & allegationibus, usitatisque forensis industriæ artificibus, sed aperta vi, ad principatum tenderet, duobus armatorum millibus septus.

Hoc anno tertii belli cum Venetis initium factum est: cujus causa, cum ab Annalibus nostris (ut nihil est illis aridius) nulla tradatur; quærenda nobis ab exteris, atque ab iis ipsis rerum Venetarum Scriptoribus fuit; qui multi sunt: itaque in scribendo variant, ut fidem sibi ipsi mutuo abrogent: quorum nonnulli rebus Venetis ita impudenter favent, ut nonnumquam rem totam invertant: resque Venetorum adversas vel comprimant omnino, vel ita imminuant; ut in clarissimis victoriis à Genuensibus partis, omniumque externorum scriptis celebratis; quin etiam à maxima res Venetas scribentium parte testatis; haud facile discernas, penes utrum populum victoria fuerit. Causa igitur belli talis fuit. Pacis & amicitiae fœdus superioribus annis sancitum quietem quidem ab armis & injuriis fecerat; ceterum animos tot veteribus odiorum causis ac perpetua æmulatione inter se infensos haudquaquam conjunxerat. Erant tum utrique nationi in Pontum Euxinum frequentia & opulenta mercatoriae negotiationis commercia: quorum causa cum magna hominum utriusque nationis multitudo in easdem urbes quotidie conflueret; multæ, ut fit, in contractibus & permutationibus verborum contentiones exoriebantur, quas vetus æmulation, atque infusa odia, tum autem ejusdem quæstus studium, quo nihil potentius est ad animos hominum disjungendos, accendebant; ut res sæpe ad jurgia & contumelias procederet; quin etiam interdum ad rixas & injurias veniret, in quibus Genuenses

semper superiores erant, quippe domi suæ: urbem enim Cassam ac multa præterea opida in toto ambitu Euxini imperio obtinebant, in quibus fere commercia exercebantur. Hic nonnulli Venetarum rerum Scriptores tradunt, naves quædam Venetas ad opidum Protosperum, quod tum Genuenses tenebant, captas, & Cassam abductas: cujus rei cum nullam mentionem neque apud Annales nostros, neque apud externos inveniam, fides penes Scriptores Venetos sit.

Venetis quidem Senatus causam hanc arripuit, Genuenses bello persequendi: triginta quinque igitur triremes, Nicolao Pisano præfecto, raptim armatas adversus Genuenses mittit: quas multum itineris emensas subita tempesta adorta in portum Carysti Eubœæ opidi renitentes compulit: in quo magna illorum felicitate factum est, ut quatuordecim triremes Genuenses, quarum præfectus erat Nicolaus Magnerrius, deprehenderent: quas sine certamine ceperunt, cum quatuor tantummodo evasisent. Annales nostri nullam pugnam mentionem faciunt: quæ enim pugna esse potuit adversus classem numero tanto superiorem ad bellum armatam? Veneti Genuenses restitisse acriter tradunt; ut Veneti coacti sint bonam copiarum partem in terram exponere, quæ Genuensium in Venetos obversorum latera à littore missilibus incesserent; magnæque victoriæ nomen rei gestæ imponunt; septuagintaque patricii ordinis, ac quadringentos ex reliqua nautica turba captos affirmant; ejusque victoriæ memoriam sacro sollempni die Joanni decollato festo quotannis celebrandam decreverunt: adduntque, Venetos victoria elatos Peram Genuensium coloniam accessisse; spe urbis, in qua nihil præparati esset, improvise potiundæ: ceterum re infecta, subito discessisse; cum Genuenses, qui adventum Venetorum præsenferant, urbem ac portum validis munitionibus firmassent: quarum specie deterritos Venetos, nulla re tentata, inceptum omisisse.

Ceterum non multis post diebus Genuenses non minorem cladem Venetis reddiderunt; quod ne Annales quidem Veneti inficiantur, nihil hac in re à nostris discrepantes: nam, cum quatuor triremes, quas evasisse diximus, Chium venissent, remque, ut acta erat, renunciassent; extemplo Simon Vignosius urbis Prætor, quinque triremibus, quæ tum Chii erant, cum quatuor cladi superstitibus conjunctis, Philippum Auriam præfectum creatum ad res Venetorum vexandas mittit: qui urbem, qua Prætor Venetus, classe procul conspecta, ab omnibus rebus imparatus subito excesserat, cepit ac diripuit; prædaque opulenta abacta, ac tribus & viginti patricii ordinis, præter ceteram captam multitudinem, secum vectis, Chium revertitur. Eodem anno tres triremes Genuenses opidum Ciam Venetæ ditionis ceperunt.

Insequentis anno quies domi ac foris fuit. At tres, qui insecuti sunt anni ejus sæculi, quinquagesimus alter, & quinquagesimus tertius, & quinquagesimus quartus, tribus claris navalibus pugnis insignes in primis sunt: in quibus secundæ adversæque res utrique populo gaudium & mœrorem miscuerunt. Veneti enim hostibus, corumque Rege Alphonso, nec non cum Constantinopolitano Cæsare adversus Genuenses icto, tantis societatibus aucti animos sustulerunt; majoreque conatu bellum capeflendum decreverunt: ingentem igitur classem armant, Nicolao Pisano præfecto creato: qui cum duodecim triremibus Venetiis statim profectus, ut, dum reliquæ comparantur, ipse interea res in Græcia præmoliretur, in Orientem iter intendit: quem

quem paullo post triginta triremes consecutæ sunt; atque in Sicilia, ut constitutum fuerat, triginta Catalanorum triremes præsto habuit. Classes igitur conjunctæ institutum iter in Græciam persequentes, Peloponnesum appulsæ, Methonis portum subeunt.

Interea Genuæ, animis non minus ad bellum accensis, ingens ac prævalida sexaginta triremium classis comparata est: quam flos Ligusticæ juventutis conscendit: ceterum neque militum robur, neque navium numerus, neque omnes bellici apparatus; quibus classis instructissima fuit, tanta momenta ad victoriam fecerunt, quanta præfecti virtus. Is fuit Paganus Auria; quo viro nemo fuit ea tempestate, aut militaribus artibus instructior, bellicaque gloria clarior, aut omni heroicarum virtutum genere cumulator. Paganus igitur Genua solvens, secunda navigatione usus in Græciam venit; Pisanumque, cum nondum classes Veneta & Catalana ad eum venissent, in itinere obvium factum in fugam conjicit: qui in portum Chalcidis, quam urbem nunc simulque insulam ipsam Eubocam uno nomine *Nigrumpontem* appellant, se subduxit: urbeque valido præsidio firmata, ac portu, nonnullis navigiis in ostio depressis, obstructo, Methonem petit; quo paullo ante classes appulsas audierat. Ibi cum Pontio Paneratio classis Aragonensis præfecto collocutus, classibusque se in eo portu opperiri jussis, cum nondum Græcorum auxilia venissent, sine quibus cum hoste manum conferre in animo non habebat, Nigrumpontem repetit: quam urbem paullo post Dux Genuensis classe admota oppugnare instituit. Interea, cum Genuensis triremis triremem Venetam prælio victam cepisset, ex captivis statum rerum Venetarum & consilia hostis cognoscit: cursu igitur propere ad Paganum Chalcidem obsidentem contendit; docetque, foederatorum classes conjunctas haud procul inde esse; Ducibusque in animo esse, ipsum petere, manum cum illo conferere: qui nuncius Paganum coegit obsidionem solvere, seque Peram conferre: in qua urbe detrimenta accepta in oppugnatione Chalcidis supplevit. Totam hanc historiam Nigripontis obsessæ & oppugnatae ab Annalibus nostris omisssam miror: quam ego ab Annalibus Venetis acceptam hic inserui.

At Pisanus, obsidione soluta, Methonem illico repetit: ibi Duces de ratione gerendi belli multum ac diu inter se collocti, Methone solvunt; iterque Constantinopolim dirigunt, ut classem Græcorum sibi adjungant; simul ipse Genuensem classem adipiscendi, quam Peram concessisse cognoverant: ceterum ab adverso flante Borea in Cretam compulsi sunt: qua in insula cum aliquamdiu fuissent, vere incunte solventes, omisssum iter Constantinopolim repetunt. Quorum appropinquantium adventu Paganus cognito; cum certamen detrectare illis in locis deprehensus nec posset, nec vellet, angustiis Bospori confusus, quas subito occupavit, ne ab tergo, aut à lateribus ab hostilibus præpotentibus classibus circumveniretur, sed adversa fronte dimicaret. Igitur Veneti & Catalani, cum Constantinopolim venissent, Græcorum triremibus sibi adjunctis, quarum neque numerus, neque nomen Ducis traditur, classem Genuensem petunt: quam die in vespertinum inclinato magno impetu invadunt, non numero modo navium, sed coeli quoque favore superiores: validus enim ventus incubuit, Genuensibus adversus: quibus iniquitatibus nihil deterritus Paganus avide se certamini offert. Numquam duæ classes majoribus odiis aut obstinatoribus animis concurrerunt: cujus rei illud argumentum est, quod prælium accensum neque densissimæ supervenientis noctis tenebræ, neque plurimus assidue decidens imber, nec sæviens tempestas diremit:

A numquam durior conditio pugnantium fuit, tot asperitatibus præter hostilia tela confictorum: numquam majus aut clarius virtutis, fortitudinis, constantiæ exemplum ab ullo populo editum est; quam tum à Genuensibus: qui, præter hæc utrique genti communia incommoda, duabus insuper, quas diximus, iniquitatibus premebantur; majoris hostium numeri ac venti adversi: adversus quæ omnia non modo invicti steterunt, sed illa quoque vicerunt, cum initia adversa illis fuissent, tredecim triremibus ab hoste captis. At Græci, nulla re tentata, omnique plaga intacti in ipso statim initio turpiter pugnam deserunt, ac sese in portum Constantinopolitanum condunt: ceterum pugna per totam noctem inter armorum & incurrentium inter se navium, ac decidentis imbris strepitum, pugnantium clamores, cadentium gemitus, usque ad lucem extracta est: quæ exorta foedam & horridam rei faciem aperuit; mari sanguine rubente, ac scutis, telis, thoracibus, remis, malis, antennis, navium fragmentis, humanis capitibus, brachiis, cruribus, corporibus detruncatis constrato. Victoria tandem penes Genuenses fuit; triginta Venetorum & decem octo Catalanorum triremibus captis, ac nonnullis depressis, quattuorque millibus hostium cæsis: in quibus fuerunt ipse Pontius Catalanæ classis præfectus, ac complures patricii ordinis Veneti; quorum nonnulli muneribus & procurationibus fungebantur. Captivorum numerus non traditur: neque Genuensibus, qui decem triremes recuperarunt, incruentum prælium, aut sincerum gaudium fuit; septingentis ipsorum cæsis, in quo non exiguus civium numerus fuit nobilitate & honoribus præstantium: cujus damni major prope Genuæ, quam tantæ partæ victoriæ sensus fuit: neque victoria, quæ tot domos lugubres fecisset, ullis usitatis lætitiæ significationibus celebrata est.

D Insequenti anno ejus sæculi quinquagesimo tertio Genuenses, ne recens victoria ipsorum negligencia ad desidra luxuriaret, ac vana evaderet, cum ^{1353.} A.C. felicia initia urgere decrevisset, sexaginta triremes armant: quibus Antonium Grimaldum præficiunt, strenuum quidem hominem, nec bellicarum rerum imperitum; ceterum sui fiducia nimium interdum se provehi sinentem. Is igitur Genua solvens, foederatorum octoginta triremium classem, quarum quadraginta quinque Venetæ fuerunt, Nicolao Pisano præfecto, Catalanæ triginta quinque, quas ducebat Bernardus Cabrera, ad Lungherium adeptus, quæ urbs est in sinu Callaritano, nihil majore hostilium navium numero deterritus; ac, ne animo Pagano Auria cedere videretur, qui numero navium tanto inferior, eundem hostem superasset; varietatem atque humanarum rerum vicissitudinem haud secum reputans; neque considerans, Paganum loci natura adjutum, quo favore ipse omnino carebat, tantam victoriam peperisse; prælium non detrectavit. Annales Veneti numerum navium utriusque classis imminuunt: foederatorum enim non plus sexaginta triremes fuisse dicunt, quarum viginti Venetas fuisse, quadraginta Catalanæ; Genuensem classem numerum trium & quadraginta triremium non excessisse. Illud inter omnes constat, hostilem classem longe majorem Genuensi fuisse: concursus est igitur ingentibus animis; Genuensibus ad partum decus obtinendum, hostibus ad acceptam ignominiam delendam contententibus: ceterum minores vires majoribus cedere necesse fuit: quas hostis consilio etiam adjuvit; decem triremibus retro relictis, quæ manu conferta, hostem à tergo, vel à latere, prout res magis posceret, invaderent: quæ res haud par-

vum momentum ad victoriam fuit. Terrestri pugnae hoc praelium per simile fuisse quidam scripserunt; cum hostes naves suas firma antennarum ac malorum catena annexas inter se junxissent, fugae facultatem sibi ipsi praecedentes, necessitatemque aut vincendi aut moriendi imponentes. Numquam maiorem plagam Genuenses acceperunt; una enim & quadraginta triremes amissae sunt, partim depressae, partim captae. Veneti non plus triginta fuisse dicunt: nonnulli externi Scriptores numerum augent; unam enim & quinquaginta captas scribunt: quod si verum est; veriores quoque Annales Genuenses sunt in numero navium, quibus concursus est, tradendo. Tanta clades audita urbem & totam Ligusticam oram luctu & lamentationibus implevit; memoria tot egrorum civium superiore anno amissorum moerorem cumulate.

Ceterum non tam miserabilem eo tempore tanta accepta clades civitatis nostrae statum fecit, quam civium nostrorum stultitia: cujus tanta vis illorum mentes tenuit, ut, pro eo ut res afflictas prudentia sua erigere ac sublevare studerent, eas insuper intestinis odiis & discordiis civilibus aggravarent: quas externorum malorum moeror non modo non exstinxit, aut consopivit; sed magis etiam accendit: quibus unum illud pudendum remedium inventum est; ut, quoniam ipsi per se prudentia sua stare non possent, sese aliis regendos permitterent. Joannem igitur Vicecomitem Archiepiscopum ac Principem Mediolanensem sibi Dominum adsciverunt; qui ipsos auctoritate sua in officio contineret, iis conditionibus, quae illum verius arbitrum & disceptatorem quam Dominum facerent. Is igitur, cum Joannes à Valente ducatu se abdicasset, Gulielmum Palavicinum Marchionem gubernatorem Genuam misit: in qua urbe ab intestinis motibus Archiepiscopo Principe quies fuit.

A. C.
1354.

Igitur Genuenses, rebus urbanis pacatis, animos ad externas adjiciunt: luctuque in iram verso, cogitationem à malis & cladibus lugendis ad illas ulciscendas transferunt. Insequenti igitur anno ejus saeculi quinquagesimo quarto, classem viginti quinque triremium comparant, omnibusque necessariis rebus affatim instruunt: cui eundem ipsum Paganum Auriam recenti victoria in Bosphoro parta fulgentem praeficiunt: cui classi postea additae sunt decem triremes, Vicecomite Grimaldo praefecto, qui Pagano summo Duci subesset. Paganus igitur Genua solvens, cum tota Catalonia ora excurrisset, hoste nusquam invento, itinere retro converso, Orientem petit. Hic multa ab Annalibus Venetis traduntur; quae Genuensi nomini honorifica à nostrorum Annalium supina negligentia omittuntur: scribunt enim, quattuor triremes Genuenses sinum Hadriaticum ingressas, haud exiguis detrimentis Venetam ditionem affecisse; Phario opido & Corcyra nigra Dalmatiae insula direptis & incensis.

Verum longe majora damna à Pagano Auria illata sunt: qui cum tota classe, quae fuit quinque & triginta triremium, eundem sinum ingressus, Istriam usque penetravit: in qua urbem Parentium vi captam incendit; corporibus sanctorum martyrum Martini & Eleutherii prius ablatis; quae Genuam reversus in aede divi Matthaei religiose reposuit. Ejus adventu Venetiis non minus trepidatum est, quam si hostem ad portas haberent: serieque navium inter se annexarum, velut perpetua catena aditum portus obstruxerunt: navesque, ac littora, & circumjecta loca validis praefidiis firmarunt. Auria aliquamdiu in sinu comoratus; ac compluribus Venetorum navibus, quae in illum subinde incidebant, captis, in qui-

bus unam fuisse ferunt infiniti ac vix credibilis pretii mercibus onustam; retro, quo venerat, iter repetit.

Interea Pisanus, cum sine ullo fructu in mari infero fuisset, Sardiniamque usque processisset, ac classem Genuensem Orientem petisse cognovisset, ne Venetorum littora nuda & aperta illi essent, proris conversis, in Orientem contendit; ad Oenusasque, quam *Sapientiam* vocamus, Peloponneso adjacentem insulam, cum sex & triginta triremibus ac viginti duobus parvis navigiis substitit. At Auria cum in itinere audisset, classem hostilem ad Sapientiam stare, cursum eo dirigit; totamque classem Venetam, sive, ut nonnulli Annales Veneti tradunt, improvise deprehensam, ac nihil tale expectantem, ipse ad pugnam animo & corpore praeparatus, sine ullo certamine cepit: ut Veneti superioribus annis in portu Carysti ejusdem Peloponnesi opidi initio hujus belli classem Genuensem ceperant; sive, ut inter nostros Annales, & nonnullos Venetos, ac Blondum constat, modico edito certamine. Hanc victoriam non tam claram facit numerus captarum navium, ac captorum hominum, qui fuit quinque millia quadringenti, in quibus fuerunt complures Senatorii ordinis nobilitate & honoribus insignes viri; quam is ipse Nicolaus Pisanus summus Dux captus, vir rebus gestis omnium illius aetatis clarissimus, rerumque navalium peritissimus, perpetuis imperiis functus: cujus virtute res Veneta eo tempore in primis stabat. Venetiis tantae cladis, ab eo praesertim hoste acceptae, quem pro victo pene habebant; cujusque opes superioris anni clade ita attritas putabant, ut sese in multos annos à tanto casu erigere non posset; tantae igitur cladis nuncius, ut ipsimet Veneti tradunt; non minorem luctum ac moerorem Venetiis fecit, quam si ipsae Venetiae captae essent.

At Auria, tanta parta victoria, reque publica ubique felicissime gesta, Genuam rediit; ingentibus plausibus à tota civitate obviam effusa triumphantium more exceptus. Ejus victoriae memoriam dono aulae aurei ad aedem divi Matthaei quotannis pridie Nonas Novembris celebrandam, decretum est; ipsique Pagano honoris causa domus de publico parata est, cum tanta virtus ad eum diem in ipsa urbe sua tecto caruisset: cui idem domus paratae honos non minus mortuo quam vivo habendus fuit: de publico enim, privatis pecuniis deficientibus, elatus est, ac de publico sepulcrum exstructum. Hujus viri, incertum est, utrum bellica virtus, ac clarissimae partae victoriae, an perpetuum iustitiae & continentiae studium, animusque ab omni forde integer & ab omni quaestu abhorrens clarius nomen clarioremque memoriam faciant. Illud quoque omittunt Annales nostri, triremem Venetam, quae una ex clade ad Sapientiam accepta evaserat, à triremi Genuensi Grimalda in ora Peloponnesi captam: à qua eadem Grimalda duae quoque triremes Venetae deinceps captae sunt, altera in portu Frascario, altera, quae Guidonem Trivisanum legatum in Cretam vehebat.

Insequens annus ejus saeculi quinquagesimus A. C. 1359. quinctus finem funesto bello, quod quinquenna- le fuit, tandem imposuit; cum pax, Matthaeo, Barnaba, Galeacio Vicecomitibus, qui Joanni Archiepiscopo patruo fato functo in principatu successerant, sese interponentibus, convenisset: ex ea captivi utriusque populi mutuo restituti sunt. Nonnulla in historia nostra inserere haud ab re duxi, quae à civibus Genuensibus privatim gesta; quamquam Rempublicam nihil attingunt, dignitatem tamen civitatis nostrae augent: quae ta-

les viros tulerit, qui virtute, clarisque gestis rebus, ad magnos honores magnamque potentiam apud maximos Principes pervenerint: qualis fuit Franciscus Catalusius; cuius viri in Græcorum historia plurima est mentio: is igitur vir classium Græcarum præfectus, fortem & fidelem Joanni Græco Imperatori, multorum annorum navatam operam egregio facinore cumulavit: conatus enim Cantaculeni magnæ nobilitatis ac potentiæ hominis, ingentibus motibus adversus Cæsarem confurgentis, bona ditionis Constantinopolitanæ parte jam illi adempta, opera & consilio suo compressit: quod promeritum Cæsar insigni præmio remuneratus est; insula Lesbo illi & successoribus fiduciaria tradita, sororeque sua in matrimonium data.

Eodem anno Genuenses Africanos piratas mare ac maritima commercia assiduis excursionibus & rapinis late infesta facientes ulsi sunt: funestasque prædas illis fecerunt, urbe Tripoli ea, quæ est in Africæ ora, illorum sede & receptaculo, capta & direpta à Philippo Auria, quindecim triremium ca de causâ Genuæ armatarum præfecto: qui classiem opulentis Maurorum spoliis ac magna captivorum multitudine onustam Genuam reduxit.

Domesticos motus, quos bellum Venetum confopiverat, quies ab externis molestiis excitavit: quæ res non tam assignanda est mobilibus nostrorum ingeniis, quam Vicecomitum Principum inconsultæ ambitioni: qui pacis inter Venetos & Genuenses ipsorum opera & interpositione conciliatæ velut præmium, civitatis servitutem petentes, modum conventorum excedere hoc anno, qui fuit ejus sæculi quinquagesimus sextus, aggressi sunt; nonnulla postulant, quibus jus & fides foederum perfringebatur. Constante illis restitum est à Senatu ac principibus civitatis; in quibus Melianus Catanius & Laurentius Angelus acerrimi fuerunt: qui præcise gubernatori Vicecomitum negarunt, civitatem quidquam postulatorum facturam, ac jura pactorum ulla vel minima in re violari passuram: deponerent proinde eam cogitationem gubernator ac Principes Vicecomites: quod si porro tendant; enimvero civitatem ad omnia ultima descensuram, armatamque libertatis & dignitatis suæ acrem vindicem fore: quæ libertas orationis auribus Principum insueta, illorum indignationem vehementer commovit. Mediolanum igitur vocati sunt Melianus & Laurentius ad causam dicendam: quæ res animos jam irritatos mire exacerbat.

Erat tum in urbe Simon Buccanigra Pisis jam pridem reversus: cui viro res adversæ favorem plebis potius auxerant, quam minuerant. Multa egregii viri, animum nonnihil immutarunt, graves omnium temporum inimicorum injuriæ, aviditasque invidiosos homines ulciscendi; à quibus non modo se principatu dejectum, sed ludificatum insuper præseferbat: accedebant exsiliu incommoda; ad hoc magnitudo susceptæ contentionis, ultra officii fines viros ceteroqui laudatos provehere solita: suberat præterea tacita regni cupido; cuius experta dulcedo carendo magis quam fruendo sentitur: postremo magnificum sibi putabat, si Vicecomitibus Genua exactis, peramplo titulo bis liberatoris patriæ nomen suum ad posteritatem insigne fecisset. Favorem igitur plebis vir callidus & solers, per emissarios suos rem leniter ducendo, adjuvabat: illorum voluntates ex insito plebis in Nobilitatem odio captans, quam criminari non desistebat; causasque discordiarum ferere coepit, diversa ab iis, quæ animo agitabat, simulans: plebi enim suadere intitit, ut simulatque tumultus increpisset, ipsi arma pro Vicecomitibus Principibus caperent, illorumque defensionem suscipere: duplicem ex retento Vicecomitum principatu fructum ad plebem venturum: nam & im-

potentem Nobilitatis dominatum à se depulsurum, quo mitius exterorum imperium experti sint; & meliorem fore tenuiorum quam Nobilium apud Principes conditionem tanto promerito sibi obstrictos. Nec vafrum consilium effectu caruit: nam, cum ad decimum octavum Kalendas Decembris Nobilitas, nonnullis ex popularis corporis principibus studia cum illa confociantibus, arma cepisset; plebs consiliis Buccanigræ imbuta, armis & ipsa arreptis Nobilitati sese opposuit: acreque prælium commissum est, quod diuturnum fuit, & multorum cæde ac sanguine utrimque stetit; cum Nobilitati non adversus exterum modo, quem

unum hostem se habituram putarat, sed adversus eosdem ipsos cives suos, pro quorum libertate non minus quam pro sua arma tulerat, à quibusque in pio negotio adjuvanda fuit, dimicandum esset. At Simon consiliis procedentibus lætus, ducentos armatos in ædem divi Syri, quæ erat prope ab ædibus suis, convocatos, paucis in illa temporis brevitate hortatus; ut memores suæ ac populi Genuensis libertatis, quam felicibus initiis inchoatam Nobilitas, personam ipsius Simonis petere simulando, modo aperta vi, modo occultis dolis evertere sæpe tentarit, atque in extremum discrimen adduxerit; ad illam temperandam ac stabiliendam animos & corpora secum pararent; cum illis ad prætorium convolat, portamque sibi patefieri minaciter postulat. Quo metu subactus gubernator, simul Genuensibus civibus, quos secum habebat, magnopere suadentibus, ne hominem acris & vehementis ingenii armatum, cui ipse viribus par non esset, sibi irritaret, Simoni cessit: quem cum prætorio potitum Nobilitas audisset; pugna omiſsa, in privatas ædes suas se recepit: Simonque postero die Dux Genuensium iterum creatur: qui plebi & popularis corporis Optimatibus gratis actis, ob illorum in se declaratum studium, de Republica ita dis-

seruit: *Si inimicos meos, eosdemque Republica teterrimos hostes pio bello persequi decrevissem, cives; nemo, opinor, mihi tam iniquus fuerit, qui non justo dolori ignoscendum putaret: etenim per Deum immortalem, quid est in acerbitatibus reliquum, quod ego per hos annos ab illis passus non sim; toties modo aperto bello oppugnatus, modo illorum insidiis & latrociniiis petitus; ac tandem eo principatu abire coactus, quem non vi, aut armis, invaseram, ut ipsorum parentes, atque ipsimet sæpe fecerunt; sed quem liberis suffragiis, summoque totius populi consensu, invito & renitenti mihi mandatum Republicæ causa accipere coactus sum? in quo gerendo quid tandem fuit, quod me cuiquam bono, aut vero ipsimet me offensum faciat? An poenitebit ora Ligustica recuperata, atque e manibus occupantium erepta? an superbia ac contumacia accolarum Procerum coercita; meritis audacia vitio sæculorum eversa à me erecta & sancita? an otii civitatis constituta, an ipsorummet Nobilium, à furentis multitudinis impetu defensorum? an perpetua mansuetudinis erga illos, & adversus eosmet, à quibus domus mea tam graviter læsa fuerat, adhibita? quibus tamen meritis illorum in me effertos animos atque invidia amentes placare numquam potui; neque lenitate mea ad meliorem mentem convertere, & ad insitum fastum & nimios illos spiritus libertati & quieti publicæ adversarios deponendos inducere: cum contra mea facilitas illorum audaciam scelere inflammata, ad alia ex aliis graviora in dies in Rempublicam & in communem patriam admittenda proveheret: ad loca Republicæ occupanda, ad conspirationes cum ceteris Principibus faciendas, ad arma patriæ aperte inferenda; quodque projecta in primis impudentia est, ad piraticam ipsam faciendam, ac prædas de rebus & bonis civium suorum tamquam de hostilibus agendas: ut mecum certare viderentur, plura ne mea essent in patria salute & tranquillitate defendenda & constituenda merita; an illorum*

in eadem patria vexanda & laceranda malefacta : quæ tamen prava hominum consilia pristinam mentem meam nihil immutarent ; libenterque lenitate & naturali mansuetudine mea illos ad sanitatem adducere studerem ; si illorum ingenia ullum medicina faciendæ locum darent. Nunc insanabilis illorum ambitio mihi invito, clementia partibus tandem detractis, severitatis necessariam personam inducit. Age bonos Medicos imitemur : qui, ut totum corpus servent, vitiosum membrum ab eo abscindere non dubitant : sic nos discordiarum ac seditionum & intestinorum malorum auctores, quibus vigentibus numquam civitas conquiescet, à nobis & à Republica amoveamus. Neque quemquam moveant Majorum illorum splendor, atque in patriam merita, laboresque bellici : qui si iidem fuerunt, atque illorum progeniem cernimus ; odio potius quam laude, aut benevolentia illorum memoria digna est : si probi viri fuerunt, tum isti duplici poena digni ; qui & ipsi improbi sunt, & qui à Majorum suorum probitate degenerantes, illisque injuriosi illorum nomen sceleribus suis faciunt.

Hac oratione habita, Nobilitatis principes, omnesque ex eo corpore, à quorum opibus sibi timendum esset, exsulio multavit ; reliquis, qui in urbe remanserant, diligenti inquisitione arma ademittit : ac Nobilitatem omnem non modo publicis muneribus, & honoribus, omnique procuratore Reipublicæ, ac facultate navis ad bellum armandi & regendi ; sed etiam privatæ negotiationis causâ comparandi. Nec minus sese Simôn adversus exterum hostem externis præfidiis communit ; cum Marchione Montisferacis, cui nimia Vicecomitum potentia majores vires, majusque robur in dies assumens, perpetuo formidolosa erat, societate armorum juncta ; cujus societatis Dux creatus est Bartholomæus Buccanigra Simonis frater. Ejus opera neque segnis neque imbellis fuit : cum non modo impetus invadentium hostium sustinisset ; sed sæpe ipse audacibus incursionibus in fines Mediolanenses, atque ad ipsa interdum urbis Mediolani mœnia omnem terrorem belli transfulisset.

A. C. 1357. usque ad 1362. Septimum annum secundus Simonis principatus attigit : quo temporis spatio Genuæ & à domesticis motibus & ab externis bellis quies fuit : nihilque memorabile in illis gestum est, præter urbem Cassam à Gotofredo Zoalio Prætoris, novo muro ex cæmentis calce duratis munitam ; cum ad eum diem minus firmo muro ex trabibus & asseribus luto interlitis, cincta fuisset : postremus annus Simonis infestus fuit ; non Nobilibus modo, sed nonnullis quoque ex popularium corpore civibus insidias in illum assidue struentibus : quas omnes mira felicitate evasit ; cum sua cura & diligentia, tum ope & consilio popularis corporis principum civium illi faventium : in quibus eminebant studia Nicolai Canetiditissimi hominis, ac Leonardi Montalti Jurisconsulti ; qui ipse quoque principatum obtinuit, origoque dignitatis & potentiae gentis suæ fuit ; consiliis detectis, ac fontibus partim urbe exterminatis, partim capitali supplicio affectis : in quibus fuit unus ex popularium principibus : quem cupiditas principatus ad id consilium, quod, nisi Simone sublato, ad exitum perducere non poterat, præcipitem egit.

Tandem vir adversus ferrum modo aperta vi, modo occultis consiliis sæpe in illum intentatum invictus, veneno succubuit : nam, cum Petrus Rex Cypri cum filio suo iter in Occidentem habens ad Christianos Principes ad bellum sacrum incitandos Genuam venisset (is fuit annus ejus sæculi sexagesimus tertius) magnifice & apparate à Simone acceptus, omnique honoris genere cultus ; Petrus Marocellus, quem Cypri negotiantem Rex in amicorum numerum acceperat, Regi in suburbano suo epulum dedit ; quo in convivio ipse quoque

A Simon adfuit, numquam à Regis latere honoris causâ discedere solitus : ibi Simon venenum bibit ; cujus efficaci vi cum eodem die pestem intestina conficientem sentire cœpisset, brevi exstinctus est ; vir magni procul dubio animi & consilii : ceterum clarioris memoriæ futurus, nisi, dum magnæ quam bonæ famæ cupidior est, claras virtutes, egregiaque in patriam & populum Genuensem promerita, tantasque gestas res ingenti labe commaculasset, secundo principatu armis & vi repetito. Ejus morte nonnihil tumultuatum est ; tresque fratres mortui Ducis Bartholomæus, Joannes, Nicolaus, Optimatum conspiratione velut in custodia retenti sunt : metu, ne nomine tam in vulgus grato quid libertati & quieti civitatis damnosum molirentur. Comitibus de Duce creando habitis, universus populus viginti viros elegit, à quibus sexaginta creati sunt : ii rursus unum & viginti elegerunt, à quibus decem postremi electi Gabrielem Adornium probitatis & prudentiæ fama in primis commendatum, popularis corporis ac Factionis Gibellinæ virum, Ducem creant : posteroque die sexviralis Magistratus illi in consilio aditus est.

Ceterum morte Simonis nihilo meliores res Nobilium, contra quam ipsi sperarant, fuerunt : neque enim ad ullam honorum aut Reipublicæ gerendæ partem admissi sunt : quas res secum reputantes complures ex nobilibus familiis, stultum ratæ inanes species veris & solidis rebus anteferre ; Nobilitatisque nomen nulli rei in posterum fore, quam civitati dividendæ, ejusque quieti turbandæ ; novæque Factioni ad veteres addendæ, quæ Reipublicæ nervos multifariam distractæ & laceratæ magis hebetarent & inciderent ; ad hoc ipsis ab honoribus & procuratore Reipublicæ arcendis ; imperiaque & munera publica postea penes populares cives fore ; ab Nobilitatis nuncupatione, rem ipsam, vetustatemque generis ut dignitatem retinentes, quibus rebus sese haudquaquam spoliabant ; ad populare corpus transierunt, in illudque nomina dederunt.

At spe frustratæ potentiores quattuor familiæ, quæ partim indicto, partim voluntario exsulio extorrem patria ætatem agebant ; cum reliquæ nobiles familiæ, quæ veteris inanisque nominis, quam veræ dignitatis studiosiores fuerunt, urbem nullo in honore habitæ incoherent, consilia pristinae dignitatis recuperandæ majoribus motibus repetunt, armis cum Vicecomitibus consociatis. Haud contemnendæ igitur copiae anno ejus sæculi sexagesimo quinto, cum superior anno A. C. 1364. nus nihil memorabile habeat, ad Saxellum ditio- 1365. nis Auriarum opidum contractæ sunt : eodemque tempore Marchio Finarii, fide pactorum violata, multa adversus Rempublicam admittere cœpit : missi sunt contra Nobiles Petrus Recanellus Ducis gener, vir strenuus atque impiger ; contra Carretum Franciscus Embriacus : in cujus locum, seu segni hominis opera Duci minus probata, seu fide suspecta, mox suffectus est Bartholomæus Vialis. Utrobique Respublica bene & feliciter gesta est : nam Nobiles Saxello expulsi sunt, ipsumque opidum captum ; & Marchiones Carretti ad conditiones Ducis adducti ; arcisque fræno, quæ Castellum Francum nominata est, in illorum finibus ædificatæ hominum audacia in posterum coercita. Ceterum Nobiles, quamquam primi motus parum processerant, non tamen deservierunt se ; sed nova via consiliorum expedire dorum inita, ipsos inter se populares committere aggrediuntur : quod consilium felix primo experti perpetuo retinuerunt ; eoque astu id assecuti sunt, ut potentiam & summum dignitatis locum, quem jam suo nomine & aperta via in civitate obtinere non

non possent, à principatu ac summo magistratu lege dejecti, per cuniculos, ac per ejusmodi artificia, lites & inimicitias inter primarias populares familias ferendo, seque in illarum societates per has ambages insinuando, civitatemque discordiis & bellis civilibus involvendo, retinerent: opportunum igitur ingenium consiliis nacti, Leonardum Montaltum, virum acrem & experientem, quamquam intima amicitia Simonis, ac consiliorum, quibus ipsi everfi sunt, participatione invisum, spe auxiliorum suorum ad res permiscendas inducunt: igitur eodem tempore, ut compositum fuerat, Ambrosius Vicecomes Barnabæ filius ditio- nem Genuensem cum quinque peditum millibus invadit, Spediamque insignie emporium capit; & Montaltus haud contemnenda amicorum & clientium manu coacta, seditione populi excitata, aperta vi prætorium petit; Prætoresque sese cum nonnullis armatis acriter opponentem, vulnere homini inflicto, avertit: neque tamen consilia successerunt: magno enim amicorum Ducis concursu ad prætorium facto, Montaltus non modo repulsus est, sed urbe excedere coactus; Vicecomitisque cursus, qui jam Clavarum usque opidum processerat, infelici exitu rerum urbanarum audito, repressus est.

At Dux, tota civitate ob externos & intestinos tumultus commota, sese novis copiis communire, seditionumque ac motuum consortes meritis poenis plectere instituit: duosque tantummodo, cosque obscuri nominis homines comprehensos, cum reliqui urbe excessissent, ac partim Pisas cum Montalto, partim in Vicecomitum exercitum sese contulissent, securi percussit: insequentique anno ejus ^{A.C. 1366.} sæculi sexagesimo sexto Bartholomæum Levantum & Nicolaum Moneginum adversus Vicecomites mittit: quorum copiae à Vicecomitibus fusae & profligatae sunt, bona parte illarum capta: quo metu omnis Orientis ora contremuit, magnaue incolarum pars metu direptionis trepida in urbem confugit: cum præsertim Montaltus, hoc successu audito, societate cum Fliscis conjuncta, in Liguriam reversus esset: igitur victores cum felici eventum liberum iter sibi ad urbem expeditissent, mille armatorum præsidio Spediæ relicto, Genuam contendunt: neque tamen Dux infelici eventu ita fractus est, ut defensionem sui omitteret: quin contra, omnes locorum Clavaro & urbi interjectorum incolas ad opidum Rapallum contrahi iussit; omnesque viarum angustias, per quas hostibus transeundum erat, præsidii insidieri; præsidariis quoque, quos stipendio conductos circa se habebat, co missis: quæ res hostium impetum tardavit, illosque coegit longo circuitu in Fliscorum ditionem iter flectere: primusque Montaltus, unaque cum illo Nicolaus Fliscus consiliorum socius & itineris comes, urbi appropinquarunt, in vallemque Bisaminiam descenderunt: quo eodem tempore ab altera urbis parte Aaron Spinula cum novis copiis à Vicecomitibus missis in vallem Porciferæ pervenit; ut Dux tantis terroribus undique circumstantibus coactus sit consilium de pace cum Vicecomitum Ducibus instituere: quæ tandem res diuturnis disputationibus agitata, in has conditiones composita est: Dux in principatu perseveraret; quartuorque aureorum millia Vicecomitibus quotannis penderet: ac quadringentos arcuballistarios, cum eorum usus esset, suis ipsius stipendiis illis mitteret; exsulibus nobilibus liber esset in patriam reditus. Montalto reditus in urbem in biennium est interdictus: qui mense Junio cum clientibus, ipsiusque partes sequentibus, Hastam urbem concessit, ibique consedit.

A Insequens annus, ejus sæculi sexagesimus septimus, lætus Genuensibus in primis fuit; adventu ad urbem Urbani quinti ex urbe Avenione Romam mari petentis: qui nationi Genuensi amicissimus, ad hoc fama sanctitatis conspectus cum omni honorum genere ac cum omnibus effusæ lætitiæ significationibus acceptus, cum sex dierum quiete sese atque Aulæ Proceres à jactatione maritima & itineris laboribus refecisset, octo Genuensium triremibus ad classem adjunctis, conscendit, institutum iter persequens.

B Quiete, quam pax cum Vicecomitibus sancita duobus insequentibus annis domi forisque fecerat, ^{A.C. 1368.} haud diu frui licuit: tertio enim anno, qui fuit ^{1369.} ejus sæculi septuagesimus, cum gravis vulgo esse ^{1370.} coepisset principatus Gabrielis Adornii; ob onera & insueta tributa imposita, plebe fremente, multisque solvere recusantibus, Gulielmus Hermirius & Dominicus Fulgosius, duumviri salutis publicæ prospiciendæ ac commodorum populi procurandorum; (is tum Magistratus à Duce creari solebat, vocabanturque Vicarii Ducis) qui duabus

C partibus urbis, in quas omnis civitas divisa erat, singuli singulis præerant; per speciem muneris sui implendi, in ædem divæ Mariæ à Vincis conveniunt: quo ingentes hominum concursus statim facti sunt: ibi aspere & vehementer in Ducis avaritiam inusitatis oneribus populum conficientis invecti, hortatique multitudinem, ut sibi, in munere publice ipsis mandato exsequendo, ope sua præsto esset; prætorium, plebe novandarum rerum semper avida sequente, petunt; faccesque portæ occlusæ subdunt: qua improvisa re Dux vehementer percussus, atque ut in nullo tali metu ab omnibus rebus imparatus, cum tintinnabuli sonitu nequidquam populi opem implorasset, omnis consilii inops, prætorio occulte excedit: quo Vicariis potitis, Dominicus Fulgosius, cupientissima plebe, Dux creatus est: cui insequenti die consilium vocatum, ducatum usitato ac legitimo more ratum fecit. Is, cum omnes curas in res suas stabilendas intendisset, omnesque in consilio popularis corporis homines haberet; insequenti anno ^{A.C. 1371.} ejus sæculi septuagesimo uno, ut scrupulum, quo continenter pungebatur, sibi ex animo eximeret, neque se satis securum in tanta ac tam facili animorum plebis mobilitate ab æmuli potentia & occultis consiliis ratus, quod eum principatu expulisset, nisi civitate quoque exigeret; Gabrieli Adornio Vultabium opidum locum exsulii definivit: genti Fliscorum circumjectam regionem assiduus excursionibus infestam facienti opidum Rocataliam, quam illi arcem sibi quieti civitatis imminentem, ac receptaculum exsulum fecerant, ademit: duos cives, alterum nobilis, alterum popularis corporis, qui adversus illum cum exsulibus, per speciem Gulphas partes depresso erigendi, occulta consilia iniverant, securi percussit: qua re cognita, Joannes Fliscus Episcopus Vercellensis particeps consiliorum, qui cum octingentis equitibus Bargalia usque rura processerat, itinere retro verso, liberam ditionem Genuensem reliquit: neque tamen is annus omnino imbellis aut inglorius fuit; Melita insula, ac Mazaria Siciliæ urbe, quæ receptaculum piratarum erant, mare ac mercatoria commercia late infesta facientium, à Thoma Murchio decem triremium præfecto, ea de causa Genua missa, expugnatis ac direptis: qui in patriam cum reduci classe opulenta præda onusta rediit, magnam in ea expeditione non modo bellicæ virtutis, sed continentiae quoque laudem adeptus.

V B E R T I F O L I E T A E,
P A T R I C I I G E N V E N S I S,
H I S T O R I A E G E N V E N S I V M
L I B E R V I I I.



BELLUM Clodianum, quod quartum Veneti numerant, non modo superiora bella inter Venetos & Genuenses gesta magnitudine sua transcendisse; sed cetera quoque omnia, quæ Veneti cum aliis quibuscunque nationibus & Principibus ad eum diem gesserunt; ipsimet Venetarum rerum Scriptores fatentur: nulum enim bellum ab utroque præpotenti populo aut majore consiliorum apparatu susceptum umquam est; aut majore animorum certamine, majoribusve odiis gestum; cum suis viribus neuter contentus, exteris quoque societatibus se communisset: causam autem hujus belli insulam Tenedum fuisse, omnes consentiunt: ceterum originem nonnulli exteri Scriptores paullo longius, quam nostri Annales repetunt: cujus non modo semina jacta, sed initia quoque inchoata, ipsumque bellum geri cœptum fuisse, Joanne Andronici patre adhuc vivente, tradunt; cum nostri Annales originem ducant à donatione Tenedi, post mortem Joannis ab Andronico & Emanuele fratribus de successione Imperii armis inter se ambigentibus factam: quæ donatio utrique populo tum primum induerit arma: tractu enim longum fuisse hoc bellum res Venetorum scribentes affirmant, longeque ante expeditionem Cypriacam à Genuensibus factam, inchoatum: quam expeditionem in serie hujus belli annectunt; multaque cognitu digna ac lucem rebus afferentia persequuntur, quæ ab Annalibus nostris omissa, nihilque à vero absone haud piguit referre: ceterum prius expeditionem Cypriacam scribemus; deinde ad seriem Clodianarum rerum contextendam accedemus.

A.C. 1372. Hoc igitur, quem scripsimus, rerum urbanarum statu, insequenti anno, qui fuit ejus sæculi septuagesimus secundus, in insula Cyprio, in qua magna erant & frequentia Genuensium commercia, ingentium motuum initia facta sunt; atroxque incidit ac minime expectatus casus; qui Genuensibus initio lugubris, ad extremum in magnum bonum, magnamque gloriam, & utilitatem vertit. Ejus auctores Veneti fuere, tamquam fato quodam causas odiorum & discordiarum inter duas nationes ubique ferente. Interfectus fuerat in urbe Nicosia à suis ipsius fratribus Petrus Rex, cui Petrus filius in regnum successerat: sacrumque sollemne parabatur, diadematis, de more, accipiendi: quæ res magnam contentionum causam Genuensibus & Venetis præbuit, utrisque ad primum honoris locum in eo sacro tendentibus: patris pueri Regis, penes quos omnium rerum arbitrium & potestas erat, Venetæ nationi studentibus, secundum Venetos judicatum est; primusque illis tributus locus. Graviter & iniquo animo Genuenses injuriam tulere; impotentisque iræ acerbiter alte animo insidentem in ipso convivio exprompserunt, omni verborum asperitate in Venetos inveci: ceterum non

B fatis verbis tantam injuriam ultam rati, facta quoque addenda statuentes, postero die gladios togis occultantes in regiam veniunt; consilio primi loci, à quo per æquitatem judicii sese dejectos putabant, armis retinendi: quam rem cum Veneti rescivissent, Genuenses apud Regem & patruos nefaria arma in Regis ipsius caput sumpsisse, occultisque gladiis se cinxisse criminantur. Facile fuit imbecillam ætatem mendacio circumvenire; præsertim patris animo in Genuenses iniquo, occasione illos evertendi lætis: simulque cum illis nonnullis ex Procerum primoribus Regem instigantibus. Igitur Rex Genuenses cum gladiis comprehensos, haud quæsito, qua de causa sese illis cinxissent, pro manifesto parricidio non modo injusto, sed horribili quoque genere supplicii affecit; ex summo ædium fastigio dejectos: neque crudelitas ipsis parricidii insimulatis terminata est, sed totam nationem complexa; Genuensibus toto regno dissipatis, insontibus, quosque nulla non modo conspirationis, sed ne scientiæ quidem suspicio attingeret, diligenter conquisitis, ac per summum scelus necatis; uno tantum ex iis elapso, eoque gravi vulnere in ore accepto, qui rem Genuam nunciaret.

D Placida quoque ac lenta ingenia tam atrox injuria accendisset. Genuensium quidem animi natura præservidi ac perciti ita in Cyprios exarserunt, ut ceteris omissis curis, in ea, quæ ad tantam injuriam ulciscendam pertinerent, comparanda & expedienda omnem cogitationem intenderint: classe ingenti decreta, cujus præfectus designatus est Petrus Fulgosius Ducis frater: quæ dum omni ope comparantur & instruuntur, placuit interea Damianum Catanium Jurisconsultum cum septem triremibus in Cyprium mitti ad res præmoliendas: qui insequentis anni initio profectus cum Cyprium tenuisset, haud segnem operam edidit: cum non aperta modo vi, sed astu quoque bellum gereret: nam crebris exsensionibus factis, complura loca cepit & diripuit; in quibus fuerunt suburbium Paphi, & suburbium Nicosiæ; & discordias ac dissidiorum causas inter Proceres ferere cœpit; cum aliorum agros & ditiores vastaret, aliorum res, favere sese illis simulans, ab omni belli clade intactas servaret: qui etiam ad fortitudinis & consilii laudes clara quoque continentis & mansuetudinis addidit documenta: nam cum in multitudine hominum capta complures feminæ, nuptæ & innuptæ, repertæ essent, ætate & forma præstantes; eas confestim è manibus militum ereptas, & in tutum locum subductas, inviolatas & intactas, nulloque pretio redemptas suis restituit; conquerentibus militibus ac frementibus, sua sibi belli emolumenta ac laborum præmia à Duce eripi: & mansuetudo apparuit in milite quodam Genuensi à Thoma Guano capto incolumi dimisso: qui in strage Genuensium tota insula facta insimulabatur cædis in Genuensem civem, virum nobilem à gente Marocella, admixtæ; cum ceteris suadentibus, ut meritum supplicium de nefario proditore ac patre

Patriæ hoste fumeret, respondisset, necessitate imperii hominem regis stipendiis militantem purgari.

Interea Genuæ magno animorum ardore comparabatur: ejus expeditionis causâ quadringentis librarum Genuensium millibus, quæ summa totidem aureorum florenorum fere æquabat, ex urbe ipsa & tota Genuensi ditione erogatis: cumque nihil de summa diligentia remitteretur; tandem sex & triginta triremes, præter eas, quas in Cyprum jam missas diximus, comparatæ sunt, omni armamentorum ac bellicorum apparatus genere cumulate instructæ & ornatae: quibus additæ sunt onerariæ ac varii generis corbitæ, magno numero magnam vim bellicarum machinarum saxa immanis ponderis contorquentium vehentes: armatorum ac pugnantium numerus, præter remigium ac ceteram nauticam turbam, quattuordecim millia fuerunt. Petrus vexillo divi Georgii effigie insigni, in frequenti populi concione inter plausus faulta ac læta omnia illi comprecantium & ominantium, Nonis Juniis accepto, non prius decimo octavo Kalendas Augustas conscendit; nec prius quinto Nonas Octobris quinquaginta dierum navigatione Cyprum tenuit: qui primo adventu onerariam ac quattuor naves longas in portu Famagustæ deprehensas incendit: copiisque non sine certamine in terram expositis, urbem circumfedit: quam Regina cæsi Regis uxor, quæ tum forte in ea urbe erat, intelligens quam supra suas vires dimicatio esset, de civium voluntate direptionem mentium, septimo post classis appulsum die Petro tradit: qui fuit ad sextum Idus Octobris, eo ipso die, quo superiore anno cædes Genuensium facta est. Petrus urbe atque arcibus potitus, arma tota insula circumferens, brevi ac sine certamine totam illam in potestatem suam redigit: Rege in angulum quendam compulso, ac duobus filiis Principibus Antiochiæ regii patrui, item Jacobo Lusigniano altero Regis patruo, simulque cum illis plus sexaginta Proceribus atque insulæ primoribus captis: ceterum quamquam justus dolor ad omnia delenda, parique exemplo crudelitatem Cypriorum ulciscendam stimulare poterat; mitis tamen animus supplicio trium dumtaxat Procerum, qui Regem in Genuenses accenderant, suasoresque & auctores immanis facinoris fuerant, contentus fuit: ii fuerunt dominus Cuius, Henricus Gibelletus, Joannes Gravilla; Regique ad suas condiciones adacto omnia restituit, Famagusta tantum adempta; quam circiter annos centum Genuenses possederunt; necessitateque anniversarii tributî quadraginta aureorum nummum millium in certos annos pendendi illi expressa; obfidibusque observandi pacta Jacobo Lusigniano, ac filiis Antiochiæ Principis, compluribusque aliis primæ Nobilitatis Proceribus acceptis, ac Genuam insequenti anno ejus sæculi septuagesimo quarto cum sexdecim triremibus missis: qui omnes in varia urbis loca in custodia adservandi distributi sunt: ipseque Jacobus turri promontorii Phari inclusus, cum exsulii circumscriptum locum accipere recusasset: nihilque ad memoriam illius anni insignie traditur, præter extremam frugum inopiam toto Christiano orbe; ut medimnum tritici Genuæ sexdecim aureis florenis fuerit.

At Petrus, cum in insula Cypro, post illam perdomitam, plus annum fuisset, tandem rebus constitutis Famagustaque præsidio ac rectoribus firmata, quinque triremibus in ejus custodiam relictis, cum reliqua classe in insequenti ejus sæculi septuagesimo quinto ex eo portu solvit: triremique, cui Lanfrancus Pansa præfectus erat, adversa tempestate prope Siciliam amissa, Kalendis

A Majis Genuam appulit; à fratre Duce ac cunctis ordinibus & ætatibus magnis cum plausibus & gratulationibus exceptus: cui honoris causâ ipsi & Orlando filio immunitas onerum in vita data est; ac decem insuper florenorum aureorum millia numerata: tantæque victoriæ anniversariam memoriam sacro solemni ad ædem divi Francisci aureo aulæo oblato repetendam decretum est.

Nihil memoratu dignum habet insequens annus; præter adventum Genuam Gregorii duodecimi, urbem cum una & viginti triremibus petentis: ac tres triremes Famagusta profectas adversa tempestate jactatas: quarum una depressa est, unaque cum illa duæ ingentes onerariæ Lomellina & Gazza demersæ sunt, maxima vectorum parte undis hausta; cum perpauci in terram sese ejicientes vim sævientis procellæ evasissent.

Nunc ad bellum Clodianum venio; & ad ea, quæ illud antecesserunt, atque ab Annalibus nostris omiſsa sunt, breviter perstringenda. Ajunt igitur Andronicum multis injuriis à parente affectum in illum conjurasse; ejus autem consilii auctores illi Genuenses fuisse; indignatos, Venetos sibi honore ab Joanne prælatos. Igitur Andronicum Imperio Constantinopolitano potitum; ut animos Genuensium, quorum opibus subnixus ad Imperium pervenisset, in quorumque favore sibi ad illud tuendum tanta momenta esse intelligeret, aliquo beneficio in se firmaret; insulam Tenedum illis dono dedisse, commerciis in Pontum, quæ opulentissima & frequentissima Genuensibus tum erant, in primis opportunam. Genuensesque Peram incolentes ad possessionem insulæ capiendam duas triremes illico misisse; ceterum spe frustratos esse: præfectus enim arcem atque insulam ab Joanne legitimo Imperatore fidei suæ commissam nemini omnino mortalium Joannis injussu illo vivo se traditurum dixit.

D Per ea tempora classis Veneta, cujus præfectus erat Marcus Justinianus, cum præsidio venisset navibus Venetis, quæ negotiationis causâ Euxinum intraverant, ad insulam Tenedum substitit: in qua illarum reditum totam hyemem præstolata est: quæ cum ineunte vere tandem venisset, viribus auctus Justinianus, periculo à Genuensibus imminente præfecto demonstrato, illum atque incolas ad insulam atque arcem sibi tradendam induxit. Ceterum sive ante obitum Joannis, ut Veneti affirmant, sive illo mortuo, ex donatione Emanuelis, ut nostri Annales tradunt, Veneti Tenedo potiti sunt.

E Genuenses, re cognita, sese hoc anno, qui fuit ejus sæculi septuagesimus septimus, ad bellum comparare instituunt; societate inita cum Ludovico Hungariæ Rege, ac Patriarcha Aquilejensi, Franciscoque Carrario Patavii Domino; quibus multæ inimicitiarum ac bellorum causæ cum Venetis antiquitus intercedebant. Nec minus Veneti externis auxiliis ipsi quoque se communiunt; fœdere icto cum Barnaba Vicecomite Mediolani regnante, gravi Genuensium accola, ac Petro Rege Cypri. Quæ res, quod ad Petrum Regem attinet, quamquam ab omnibus, qui illorum temporum res scripserunt, constantissime traditur, atque ea, quæ consecuta sunt, haud dubiam fidem illi affirmant; tamen eam multos miraturos, tamquam ab omni ratione abhorrentem, non dubito: quis enim credat, Regem tam amentem fuisse, ut, cum pace obnoxia Genuensibus obstrictus esset, illique Famagustam regni emporium valido præsidio firmatam tenerent, ad hoc Jacobum Lusignianum Regis patruum, ac duos adolescentes filios Principis Antiocheni Regis item patrui, nec non complures insignis Nobilitatis Proceres

Genuæ obsides haberent; foedus cum Genuensium hostibus adversus illos iniierit? nisi forte quis dicat, hoc foedus, ante arma à Genuensibus illi illata, Famagustamque adeptam, ictum: quod ut verum esset, nihil tamen Regis incitiam excusaret: nam Genuenses post pacem cum illis factam, bello petere non dubitavit: Famagustam una cum Venetis oppugnando.

At Genuenses, ne in tantis bellorum motibus loca, quæ in Oriente tenebant, praesidiis nudata hostium conatibus exposita essent, Aaronem Stropam cum decem triremibus in Orientem mittunt. Ceterum quæ gesserit Aaron, quique processus hujus classis fuerint, mirum est apud Annales nostros silentium: quod igitur à Venetis Scriptoribus traditur, hic inferam: ajunt enim hanc classem insulam Lemnum *Stalimene* nunc appellatam, quam Veneti paucis ante annis sese à Græcis illius insulae incolis multis injuriis affectos praeferebant, Imperio Constantinopolitano ademerant; non Reipublicæ Genuensis, sed Andronici nomine cepisse, illi sese militare atque operam navare simulantes: quo successu animis auctos Genuenses Peram se recepisse, ibique numerum duarum & viginti triremium confecisse: cum quibus ac duabus ingentibus corbitis è portu Constantinopolitano eductis insulam Tenedum petiisse; Andronicoque praesente, eandem speciem operam illi navantium retinentes arcem oppugnare coepisse, irritò incepto, Venetis constantissime sese defendentibus.

Interea Venetiis classis quattuordecim triremium comparata est; ac, Victore Pisano praefecto, in Genuenses emissæ: qui sinum Hadriaticum egressus, inferi maris littora legens, cum totam fere Italiae longitudinem emensus neminem obvium habuisset, itinere retro converso, ad Antium substitit: adversus quem Genuenses decem triremes, quibus praefuit Ludovicus Fliscus, miserunt. Is temeritate sua sese ac Rempublicam in praecipitem casum dedit, fortunam pugnae viribus tanto inferior tentare ausus: quæ haud diuturna fuit, Genuensibusque adversa sex triremibus ab hoste captis, cum reliquæ quattuor fuga se discrimini subtraxissent: ceterum Ludovico haud exigua mercede infania sua stetit; captus enim, ac Venetias una cum nonnullis ex principibus civitatis missus est, ac carcere inclusus. At quattuor, quæ è clade accepta superfuerunt, triremes illico reparatae sunt, omnibusque rebus instructæ: quarum tres, Petro Piccone, viro strenuo magnique in rebus bellicis usus ac nominis praefecto, sinum Hadriaticum petere iussæ sunt; Venetorumque oras excursionibus & populationibus infestas facere: reliqua in praesidium Famagustæ missa est: quæ eo tempore acri oppugnatione à Rege & Venetis navibus alia de causa eo missis urgebatur: quam historiam mox subjiciam, cum nonnulla, quæ illam praecesserunt, exposuero.

Dum enim hæc à Genuensibus & Venetis mari geruntur, utriusque terrestris ditio bello urebatur. Carrarius enim cum suo ac Ludovici Regis exercitu una parte, ac Patriarchæ Aquilejensis copiae altera, fines Venetorum ingressæ, incendiis, ruinis, populationibus, cædibus, cuncta miscebant: cum interea non minoribus cladibus Genuensis ditio vastaretur: in qua Marchiones Carrettani, Barnabæ ac Venetorum suasu, Castellum Francum, Naulum, Ingaunum occuparunt; quæ urbs à Bartholomæo Vicecomite Praetore illis prodita est: cujus tamen perfidiæ nonnullis post annis graves poenas dedit, à Genuensibus comprehensus, ac forcipibus candentibus laceratus.

Nunc oppugnationem Famagustæ, atque il-

lius causas exponere aggredior. Barnabæ Vicecomes filiam Petro Regi in matrimonium dederat: quam Venetias misit, sex triremibus à Venetis impetratis, quæ illam in Cyprum veherent: qua de causa quinque triremes Cypriacæ Venetias venerunt. Annales Genuenses, septem fuisse Venetas triremes, paremque triremium Catalanarum numerum, nulla triremium Cypriacarum mentione facta, tradunt: quæ classis cum Cyprum incolumis appulsa esset, novamque nuptam exposuisset; egit cum Venetis Petrus, magno auri pondere illis promissio, ut sibi in Famagusta recuperanda adesset ne gravarentur. Morem gesserunt Regi haud retractanter Veneti; cum spe præmii inducti, tum veteri in nomen Genuense odio impulsæ: quare munera inter se partiti; Rex, qui decem armatorum millia sub signis habuisse dicitur, terra moenia urbis, Veneti mari portum aggrediuntur: qui à Genuensibus primo repulsi, cum in altum se subduxissent, & ad prælium iterum aptassent, pugnam ingentibus animis repetunt; magnoque impetu se inferentes, in portum penetrant; tribus corbitis, quas Genuenses ad fauces portus illis opposuerant, ac nonnullis minoribus Genuensium navigiis in portu deprehensis incensis: potiti portu Veneti, quod unum opus belli restabat, moenia, scalis erectis, eodem ardore invadunt: ceterum longe alius exitus fuit; à Genuensibus enim acriter moenia tutantibus cum multorum cæde ac sanguine non modo à moenibus repulsi sunt, sed è portu quoque eodem impetu exacti: qua plaga accepta, Veneti animis infracti, Famagusta ommissa, in Syriam iter dirigunt: Rexque, illis profectis, obsidionem solvit. Sunt, qui scribant, non Regem Venetis, sed Venetos Regi auctores fuisse ab amicitia Genuensium discedendi, ac Famagustæ invadendæ: quo Genuenses bello longinquo implicitos à finibus Venetis averterent.

Ceterum cum inchoata non processissent, omnis vis belli in sinum Hadriaticum versa est. Igitur Genuenses dolore non magis acceptæ cladis quam dedecoris ardentes, simul majore conatu bellum Venetum sibi capeiendum intelligentes, Halmiratem creant Lucianum Auriam, virum gravem ac fortem, tum autem peritum ac cautum simul & audacem Ducem: summumque illi imperium, cui ceteri omnes Duces subsint in rebus maritimis, mandant: ad hoc, ne res bellicæ urbanis motibus turbarentur, aut cursus optimorum consiliorum (id quod saepe usu venerat) intestinis seditionibus interrumpetur, omnes patria tum extorres ab exilio revocant. Igitur Lucianus cum duabus & viginti triremibus, quas interea Genuenses compararant, omnibus rebus affatim instructis, è portu solvens, Hadriaticum sinum petit: quem ingressus, portum Jadrensem subiit; quæ civitas tum Ludovico Hungaro Regi parebat, Genuensium amico & foederato: tresque Petri Picconis triremes, quas ibi præsto habuit, sibi adjunxit: cujus Petri haud segniter inter opera fuerat, prædis hominum, navigiorumque actis, compluribusque eorum depressis & incensis, totaque ditione Veneta populationibus, direptionibus, incendiis, ruinis, aliisque belli cladibus vastata.

Interea Genuæ, quasi res, tanta bellorum mole terra marique urgente, parum aggravarentur, ad externos labores domestici motus additi sunt: quos excitarunt non injuriæ à potentioribus tenuioribus factæ, non onera præggravantia imposita, non perpetuum res novandi plebis studium; sed paucorum præpotentium civium ambitio ductui, hianti cupiditate, imminutium; quorum capita fuerunt, Antoniottus Adornius & Nicolaus Guar-

Guarcus: qui cum Dominicum Ducem vulgo calumniari non desisterent, illorum verbis inductus populus Genuensis, insigne ingrati animi documentum edidit; quod rara illa exempla in praestantissimos cives Romae atque Athenis olim admissa, omnium scriptis conscissa superavit, docuitque quam ab omni levi flante aura facile plebs se auferri sineret: quae oblita, quanta cum iustitiae, aequitatis, continentiae, moderationis, laude Dominicus Fulgosius Dux res per multos annos rexisset; quam nullas optimi Principis partes omisisset; simul immemor immortalis beneficii à Petro fratre recenter accepti; ab illorum inimicis instigata, atrox in illos coorta est: armaque per speciem sese Vicecomiti jugis appropinquant, ac Venetis, qui Portum Veneris jam ceperant, opponendi, (utrumque enim inimici Petri mentiti fuerant) sumpta in illos vertit: quos comprehensos, nullo crimine insimulatos carceribus includit: ex quibus tamen paullo post Petrus evasit, custode ipso incaute agente miro astu carcere incluso. At populus eodem horae momento Antoniotum Adornium Ducem conclamat: qui tamen cum personam suam popularium principibus non satis probari, Guarcumque illis acceptiorem intelligeret; eodem die de amicorum consilio ducatu illi cessit: igitur Guarcus Dux à civitatis consilio creatus, omnes curas contulit in civitatis statum pacandum; causasque tumultuum ac discriminum tam domi quam foris praecedendas: qui, gente Fulgosia immerita primum omnium perpetuo exsilio mulctata, magistratus ceteraque publica munera, ac procuraciones, atque honorum titulos inter Nobilium Factionis ac popularis corporis cives, Guelphos & Gibellinos, aequaliter distribui lege lata iussit; pacem cum Catalanis fecit; Marchiones Carretanos Reipublicae reconciliavit, Ingauno ac ceteris locis ab ipsis occupatis restitutis.

Per ea tempora Genuenses & Veneti non minoribus detrimentis minoribusve discriminibus tera quam mari conflictabantur. Erat tum legio quaedam in Italia, quam *Stella* vocabant, desperatorum hominum; quos aeris alieni damnatos, capitania ausos, facinoribus contaminatos, eadem causa conglobarant: ii sine ullis certis sedibus, sine ullo magni nominis Duce, nullo militari sacramento obstricti, tota Italia praedonum potius quam bellantium more vagabantur, latrociniis vitam tolerantes: jamque populis & civitatibus erant terribiles: ut civitates, in quorum fines illos impetus tulisset, ad necessitatem sese atque agrum suum à belli cladibus redimendi adigerent. Hanc igitur legionem Barnabas pretio induxit ad fines Genuenses intrandos, in illisque quantam maximam vastitatem possent edendam: qui cum superatis jugis per vallem Porciferæ ad littus sancti Petri Arenæ (ita incolae locum vocant) constitissent; Dux à populo armando abhorrens, quæ res quam periculosa regnantibus esset, recenti exemplo Fulgossii didicerat, pecunia periculum imminens discussit; illorum discessu decem aureorum nummum millibus deciso; prædaque, quam fecerant, illis concessa: quibus pecuniis numeratis, illi fines Genuensium pacato agmine sunt egressi, quos infesto fuerant ingressi. At in ditione Veneta Carrarius suis & Ludovici Hungari copiosis fultus, urbem Trivisum atque opidum Mestrem diu & acriter oppugnata in deditionem tandem accepit.

A.C. 1179.
1180.
Dum is est rerum terrestrium status, majore mole mari bellum gerebatur: quod per duos infrequentes annos ejus sæculi septuagesimum nonum & octogesimum, ita utrumque populum exercuit, ut nulli umquam anni, aut bellicosiores fuerint, aut

A maximis rebus gestis clariores; in quibusque magis fortuna variaverit, majoraque ac crebriora utriusque populi ediderit funera. Lucianus enim portu Jadrensi cum duabus & viginti triremibus movens, iter in hostem dirigit; suos primo ad pugnam tali oratione, ut dicitur, hortatus: *Si in praelio, quod imminet, milites, victoriam tantummodo, ac gloriam, & emolumentum, quod ex illa percipitur, spectaremus; digna tamen ea premia ducerem, in qua omnes virtutis & roboris nervos contenderetis: nunc alia gravior accedit causa; qua vobis majorem & acriorem necessitatem imponit, fortem & strenuam, ac plusquam pro virili parte operam edendi: ea est ignominia proxima clade Ducis temeritate accepta; maculaque nomini Genuensi concepta: quæ hoc praelio vobis delenda est: cujus eluenda, quam victoria parienda stimuli eo acriores sunt; quo propior & interior est rerum tuarum amissarum, quam alienarum tibi non additarum, sensus: in hoc enim nihil lucri, at in illo plurimum damni sit: quod autem detrimentum majus esse potest, quam fama & existimationis? quas res tot Majorum nostrorum laboribus ac discriminibus paulatim collectas, nisi hoc secundo praelio recuperamus, universas profundimus. Una est autem eas recuperandi via, si victoriam pepererimus, majoremque cladem, quam ab illo accepimus, hosti reddiderimus. Neque vero hujus victoria fructus major est, quam spes certior; si vos & hostem consideraveritis: vos enim omnes Ligures, ejusdemque lingua & nationis homines estis; ac pro vestra, & patria, liberorumque vestrorum salute ac dignitate dimicatis; commodaque & incommoda belli ad vos pertinent: hostis contra classem alienigena & mercenario milite referta habet: quos pro alienis commodis & gloria pugnares longe alio quam vos animi habitu esse oportet: ac, quemadmodum vos nullum discrimen recusare debetis, ita illi summe stultitia existimare, pro iis rebus, quæ se ac patriam suam nihil attingunt, discriminibus se offerre: à se igitur affectis animis quid expectandum sit, vos juxta mecum intelligitis, milites: documento sunt superiora bella, in quibus semper victores fuimus, cum æquo Marte concursum est; numquam victi, nisi cum illi numero navium longe superiores multitudinem sua nos potius obruerunt, quam vicerunt. Facere præterea animos vobis debet (neque id jactanter dictum quæso accipite, milites) gentis nostra fortuna; cujus ductu semper de hoste Veneto victoriam tulistis: cum sub aliarum familiarum Ducibus fortuna variaverit: in victoriam igitur tot nominibus utilem, atque adeo necessariam, Luciano Auria Duce, animos & corpora, milites, parate.*

Nec minoribus, aut minus acribus irritamentis Dux hostium suorum animos ad pugnam accendebat; iustitiae causam memorans, à qua divinum Numen haud dubie staturum. Venetos insulam Tenedum, de qua certamen sit indictum, iusto titulo, eoque jure, quo qui optimo, possidere, à legitimo Domino donatam: quam Genuenses nullo jure repetant, tamquam parricidii præmium, cujus ipsi auctores Andronico fuerint, filio in parentem armato: pollutum igitur hostem ac rapto vivere assuetum contundendum: cujus tam vecors sit audacia, ut nihil recenti clade infractus, non modo satis animi ad sua tutanda habeat, sed sinum Hadriaticum ingredi ausus sit; victoresque Venetos domi suæ laceffitum ultro veniat: furiis profecto vesani hominem rapi ad novam materiam gloriæ ipsis præbendam: id futurum profecto; si ipsi obfirmaverint animos, aut mori, aut partum decus, eodem ipso Duce, quo illud pepererint, tueri.

At Lucianus institutum iter persequens, naves hostiles unam & viginti ad littus Polæ urbis tandem obvias habuit: in quas procul conspectas magno impetu classem concitat: nec minus avidè Victor Pisanius hostium Dux se certamini offert; cum superiore victoria parta erectus, tum virium fiducia elatus: classem enim delecta quadringentorum

torum septuaginta bellatorum manu, præter ordinariam nauticam turbam firmarat: ad hoc complures Polanos cives virium robore & ætate florentes in classem acceperat, voluntariam militiam professos. Ingentibus animis concursum est; æmula virtute ac perpetuis odiis, tum autem novis irarum causis utrumque acuentibus. Atrox igitur prælium, ac cruentum, & longum fuit; cum nihil neque à Ducibus, neque à militibus & navalibus sociis, de summa contentione remissum esset: tandem victoria penes Genuenses fuit; quindecim hostilibus navibus captis: cum Pisanus, qui admonendo, hortando, castigando, providendo, omnibus locis occurrendo, in media mole pugnae versando, nullas boni Ducis partes omisisset, magna parte navium jam ab hoste capta, desperatam rem cernens, cum reliquis sex fuga salutem consulisset: qui è manibus hostium evadere quidem potuit: civilis livoris impetum subterfugere non potuit: cum enim Venetias venisset, recenti adhuc luctu, ob tantam cladem acceptam; cum ceteris omnibus, qui è clade superfuerant, in carcerem inclusus est: per causam, is, quod inexplorato rem prælio commisisset; illi, quod prælio se subtraxissent. Egregia victoria parta, classis Genuensis, itinere retro repetito, in portum Jadrensem se recipit; duobus millibus septingentis captivis numeratis, præter mortuos, quorum magnum numerum fuisse ipsimet Veneti fatentur: quæ victoria eo mirabilior fuit, quod sine Duce parta est; cum initio pugnae Lucianus, subductilis cassidis buccula ejecta, ingens vulnus à lancea hostili in ore accepto, ex eo illico cecidisset: in cuius loco Proceres, qui Ducis latera veluti corona cingebant, gregarium quendam militem armis jacentis Ducis indutum subornarunt: quod tanta cum celeritate, atque ita caute fecerunt, ut tantæ rei sensus neque ad hostes, neque ad suos pervenerit. Ejus victoriæ ergo aram divi Joannis titulo insignem in æde divi Georgii dedicari placuit: quam Magistratus pridie Nonas Majas, quo die parta victoria est, religiose adiret, cum usitato aurei aulæi donario.

In hac pugna narranda Venetarum rerum Scriptores, qui totam rem accusas pugnae paullo diligentius persequuntur, duabus in rebus à nostris Annalibus discrepant: nam decem recentes triremes Genua in supplementum missas, per ea tempora ad Lucianum venisse, Venetis rem ignorantibus; igitur Genuensem Ducem quattuordecim triremes tantummodo ostendisse, ut earum paucitate hostem ad pugnam facilius attraheret: reliquis pone promontorium haud procul ab urbe Pola distans latere jussis; dato mandato, uti triremes modico edito prælio, sensim cedendo, tamquam nimium ab hoste premerentur; illum ad locum insidiarum pertraherent: tum subito, quæ in insidiis subititerant, prodeuntes, hostiles naves circumvenirent: & Lucianum initio pugnae cum prætoria Veneta congressum vulnere à Donato Zeno in ore accepto occubuisse; omnesque, qui erant in prætoria Genuensi, trucidatos: ceterum Genuenses nihil casu Ducis imminutos, ut compositum fuerat, cessisse; Venetosque ad locum insidiarum tractos ab illis circumventos: quorum alterum, vires consilio juvisse, semper in laude positum est; alterum vero, quod de supplemento missio dicitur, Veneti nullo argumento docere possunt; cum præsertim nulla de ea re Genuæ existent monumenta, non modo apud ullos Annales, sed ne in tabulario quidem, ubi omnia decreta civitatis de minutissimis quibusque rebus facta diligenter adservantur: alterum ab omni veri similitudine prorsus abhorret; morte Ducis ac prætorie vel capta, vel depressa, (alterutrum enim necesse est, siquidem omnes super-

stantes trucidati sunt) nihil ordines turbatos; omniaque sedate & ex composito, tamquam nulla plaga accepta, administrata.

Haud parva quidem est hæc varietas; verum illud magis me conturbat; tantam esse Annalium nostrorum jejuniam, ut nihil attingant earum rerum, quæ in sinu Hadriatico gesta sunt, post adventum classis Genuensis: qui fuit sub finem mensis Augusti anni superioris; cum prælium, quod modo exposuimus, quod initium gerendarum rerum faciunt, commissum sit mense Majo hujus anni: neque verisimile sit, duos tam claros Duces, cum uterque præpotentem classem paratam & instructam haberet, sedentes totum illud octo mensium tempus segne contrivisse; atque in ipso initio senescere bellum tanto ardore susceptum passos, studiaque hominum relanguescere.

Scriptores rerum Venetarum longam de iis rebus historiam contexunt; multosque ambitus faciunt, quos ego omnes persequi non necesse habui: insigniora tantummodo summatim attingam; fidem illis neque detrahens, neque adjungens: in favendo enim rebus suis nimii interdum sunt: ajunt igitur, Victorem Pisanum summum classium ac rerum navalium præfectum, simulatque audit, ingentem classem Genuæ comparari in Hadriaticum sinum destinatam, ut bellum à suis finibus averteret, extemplo sinum egressum, mare inferum petiisse; cumque Neapolim usque processisset; ibique cognovisset, classem Genuensem altum tencitem jam prætervectam; itinere statim retro verso sinum repetisse: quem antequam intraret, classem Genuensem in sinu Tarentino adeptum, Lacinium promontorium insedisset, Japygio (quod idem Salentinum dicitur) è regione adversum; inter quæ velut duo prominentia cornua sinus Tarentinus longo flexu curvatur: cum classem Genuensem in intimum sinum retractam ad pugnam elicere non potuisset: quæ classis cum tandem à portu Tarentino exiisset; Venetos illam statim insecutos: ceterum Lucianum, cum Veneti urgerent, necessitatem pugnae, à qua prorsus abhorrebat, hoc ipso, quod sese ad illam adactum simulavit, discussisse: conversis enim in hostem prorsus, speciem præbuisse sese ad pugnam aptantis. Enimvero Venetos lætos antennæ demittere, arma super tabulata extrahere, galeas ac thoraces induere; bellicas machinas ac tormenta suis locis aptare, ceteraque omnia ad imminens certamen opportuna raptim expedire cœpisse: quibus ministeriis dum illos implicitos cernit; Lucianum prorsus conversis altum petentem multum itineris præripuisse, antequam Veneti suis se impedimentis expedire potuissent: remigumque armis, quæ induerat, prægravantibus, cum cursum Genuensium æquare non potuisset, tandem Lucianum sese à conspectu Venetorum incolumem eripuisse, egregioque comento conatibus hostilibus elusis, Dalmatiam petiisse: ceterum præfectum Venetum, non multo post tempore, cum audisset, classem Genuensem Jadram urbem petere, vehementer commotum, cursum in illos direxisse: qua re cognita, Genuenses, metu ne in itinere opprimerentur, omnia Jadræ, sese in propinquam amicam urbem Polam receperunt; duoque ostia portus, quæ ea urbs habet, alterum in Orientem, alterum in Occidentem versum, trabibus aliisque machinis ita obstruxisse, ut intro penetrari nullo modo posset. Igitur Victorem, cum appulisset, objecta munimenti specie turbatum, omnem conatum mari irritum intelligentem, fortunam terrestris pugnae experiri cum statuisset, moenia invasisse: ceterum à Genuensibus, qui & ipsi in terram exscenderant, acriter moenia defendentibus cum multa suorum cæde ac sanguine repul-

repulsum: quare, cum consilia non succederent, annonæque inopia laborare cœpisset, omisso incepto, Jadram se recepisse: ceterum Venetos quinque triremibus in supplementum, ac magna vi annonæ illico missis, emise imperasse, ut Polam repeteret; neque inde prius discederet, quam urbe, hostili-que classe aut vi, aut deditioe captis: dicto audientem fuisse Victorem: ceterum posteriorem conatum non minus quam superiorem inanem evasisse; cum Genuenses validioribus munimentis mœnia firmassent, atque ostia portus obstruxissent: igitur Pisanum, cum aliquot dies sine ulla effectus spe, nulla re tentata, in ancoris fuisset, tandem annona deficiente, hyemeque appetente, quæ eo anno sæva in primis fuit, obsidione omissa, se in Istriam recepisse: circumactaque hyeme, insequenti anno, cum tempus gerendarum rerum venisset, portum exiisse, Apuliamque petiisse; frumentoque, cujus causâ venerat, in naves imposito, inde profectum in itinere quindecim Genuenses triremes in conspectu habuisse; pugnamque inter utramque classem missilibus potius procul elusam, quam commissam: in qua tamen cum, qui classi Genuensi præerat, cujus nomen ignoratum est, cecidisset; Victoremque ictu sagittæ vulneratum: pugna dirempta Genuenses Jadram concessisse, Venetos Istriâ repetita Polam se contulisse. Victoria ad Polam parta, classis Jadram repetens, in itinere Clodiam veterem, duoque alia Venetorum opida incendit; onerariamque magni pretii mercibus onustam cepit; compluribusque detrimentis nonnulla Venetorum loca, ad illa subinde divertendo, affecit.

At Genuenses, tam felici rerum gerendarum initio animis sublati; cum bellum omni ope persequi decrevisset, in Luciani locum Petrum Auriam sufficiunt, virum impigrum ac strenuum: qui si ad fortitudinem ac reliquas virtutes animi quoque moderationem addidisset, nemo profecto ad ejus gloriam posset aspirare: internecino enim bello finem Genuensibus honorificum & fructuosum imposuisset: nunc nimia arrogantia ingenii-que asperitate, tot animi bona, quibus ea tempestate nemo instructior fuit, cœdavit; felicissimoque successus ac spem ex illis conceptam evertit; atque efferenti se fortunæ nimium indulgens, neque ejus variantis vim secum reputans; sese, exercitum, classem, Rempublicam præcipitem dedit. Petrus igitur cum quindecim triremibus, quas Genuenses armaverant, Genua solvens, Jadram contendit: quo appulsus cum victrice classe se conjunxit.

Per ea tempora novem triremes Venetæ in mare Ligusticum venerunt, in Tiroque parva insula, quæ est ante opidum Portum Veneris, sacram ædem ceperunt, nemine defendente; nonnullasque reliquias ex ea abstulerunt; falso credentes sese corpus sancti Venerii, quod in ea æde summa cum religione adservatur, abstulisse: cumque excursionem facere, oramque Ligusticam populationibus aliisque belli detrimentis carpere cœpissent, missæ sunt adversus illas novem triremes Genuenses: quæ cum Venetas in fugam conjecissent, porro ire perrexerunt, Jadramque appulsæ se cum reliqua classe conjunxerunt. Veneti Annales rem mire augent: scribunt enim Venetos initio horum motuum, cum audissent classem Genuæ comparari, in Hadriaticum sinum destinatam ad fines Venetos vexandos; sive ne ipsi minus animi ad hostem petendum habuisse viderentur, utque pares clades illis redderent; sive se putantes, hoc impedimento Genuensibus obiecto, illos ab alienis petendis ad sua tutanda averfuros; novem triremes inferum mare petere jussisse: qui-

bus insequenti anno sex triremes addidisse: hanc classem, cum ad littora Genuensium defensoribus nudata appulsa esset, per duos circiter annos totam oram Liguriæ crebris excursionibus, populationibus, incendiis, ruinis infestam fecisse: cum ne post Clodiam quidem captam recessissent: ceterum paucis verisimile fore puto; Genuenses navigiis ceterisque maritimis facultatibus abundantes passos esse, ditionem suam biennio belli cladibus vastari; nemine contra hostem emissio: quique ad aliena vexanda tam validas classes subinde emitterent; in injuriis & detrimentis à se arcendis tam ignavos fuisse.

At Petrus, recenti victoria à gentili suo parta, numeroque navium aucto, (fuerunt triremes septem & quadraginta, parque numerus minorum navigiorum, cum non desint, qui triremes sexaginta fuisse tradant) ferox, majora tentanda ratus, octavo Idus Augustas portu Jadrensi solvens Venetias ipsas iter dirigit; atque in itinere Rubinum, Bonajam, Magrum, Gradum, Clavellum valida Istriæ opida expugnat. Venetorum Annales addunt, navim Venetam infiniti pretii mercibus onustam à Genuensibus in fugam actam, prope à littore Veneto mille passus; cum magister navis, vento atque unda ipsum deficientibus, se in terram eiecisset; captam & incensam in ipsis oculis Venetorum à littore inspectantium, ac fortunam civitatis & conditionem suam lugentium; qui tantam indignitatem ferre cogerentur, ut ne ad ipsam quidem urbem suam civibus suis in extremo periculo ferre opem possent: illud insuper addunt; Genuenses, post navim captam, Palæstinam cepisse: quam utramque rem à nostris Annalibus prætermisam miror. Igitur Veneti, cum nulla esset facultas classem armandi, quam hosti opponerent, adventumque Genuensium expectarent, omnes curas in urbem ac loca circumjecta munienda convertunt.

Sed prius nobis Venetiarum situs describendus est. Ea urbs in intimi sinus Hadriatici flexu in mari sita est: quod urbem instar insulæ circumluit: quam à Septemtrione & ab Occidente sole littus continentis cingit; à quo circiter quinque millia passuum distat: à Meridie & Oriente agger ab undis undique exstans variæ latitudinis, cum maxima mille passus non excedat, triginta quinque millium passuum procurfu paullo extrorsus curvato ambit: ut speciem urbis stagno lacunoso atque maritimis æstibus irriguo inclusæ contemplantibus præbeat. Interfcinditur is agger, quem incolæ littus vulgo appellant, sex in locis velut sex ostiis; per quæ aditus in portum, seu in stagnum, navibus ab alto venientibus patet: primum, quod ab Oriente incipit, tres portus appellatur: alterum, littus maximum: quod illud consequitur, sancti Erasmi vocatur: huic proximum duo castella nuncupatur: quintum Metamaucum, sive Malamocum nominant: postremum est portus Clodiæ à continenti exiguo freto interfissum: ut loco aggeris, spatium, duobus iis interjectum ostiis, ab urbe ipsa Clodia occupetur: accessus autem ad urbem Venetias duabus de causis exteris navigiis minoribus difficilis est, majoribus nullus: nam & minima est atque incerta aquæ altitudo, æstibus crescens ac decedens; quæ alveos majorum navium non fert: & canales perangusti sub undis latentes multis in locis defossi sunt: quorum altitudo peritis & gnaris tutam navigationem præbet: cum extere naves, nullumque ejus portus usum habentes, incertæ qua cursum teneant, si paulum modo dextra vel læva deflexerint, vadis infixæ immobiles hæreant: à quibus nisi longo tempore ac magna mole avelli non possint: igitur Veneti spa-

spatium inter duo castella interjectum perpetua atque inter se annexa ingentium trabium transversa serie obstruunt; triplici etiam ferrea catena magnæ crassitudinis ducta: quam navigia quædam informia *Sandones* vulgo appellata, binis ancoris firmata sustinebant: tresque ingentes corbitas validis vinculis inter se annexas ac cratibus constrictas statuunt: quæ inexpugnabilis valli usum ac speciem præbebant: ad hoc fossa in magnam altitudinem depressa ad ædem sancti Nicolai, quæ est in litore ab exteriori mari ad interius stagnum ducta, ac valido trabium vallo communita; iter Metamaucum venientibus intersepit; castellumque ad Metamaucum excitant, ac valido præsidio armatorum firman.

At Petrus porro ire pergens, ostium Veneti portus ad duo castella tenuit: copisque, quibus se mille pedites à Carrario missi conjunxerant, in aggerem expositis, cœnobium sancti Nicolai præsidio Venetorum dejecto expugnat, castellaque irritò incepto tentat: quæ Veneti valido trecentorum equitum ac magni peditum numeri præsidio firman: cum etiam Joannes Barbaricus cum magna celocium multitudine bombardulas vehentium ostium portus infedisset: igitur Petrus omnem conatum ab ea parte inanem fore intelligens, simul tanta munitionum objecta specie deteritus, cum inexsuperabilibus vis afferri non posset, in alteram littoris partem vim belli convertit; ac Clodiæ urbi classem admoveat: quæ urbs in altero extremo littoris cornu sita viginti quinque millium passuum intervallo Venetiis distat; plateasque, ut Venetiæ ipsæ, navigabiles habet, multis illas interfecantibus canalibus, qui in mare feruntur, cum nonnulli etiam tenues euripi extra urbem per campos & salinas discurrant: qui occulti, exterisque ignoti, toto obsidionis tempore, quamvis Genuenses portum tenerent, ad urbem accessum & egressum nunciis ultro citroque commeantibus dederant. Erat in urbe Clodia, præter urbanam juventutem armatam, firmissimum trium amplius millium peditum præsidium: ad hoc hostes castellum inter urbem & portum, qui mille passus ab urbe abest, excitant; ac magna hominum & telorum omnis generis copia firman: quæ res impetum Genuensium, cum portum primo adventu cepissent, retardavit; quo minus ad urbem illico accederent: quo paucis post diebus expugnato; cum Franciscus Carrarius cum copiis, quas duxerat neque numero neque genere contemnendas, ac non pauca peditum signa à Patriarcha Aquilejensi missa ad classem venissent, Petrus haud jam cunctandum ratus urbem invadit. Vanus primus conatus fuit; cum milites imperata non observassent: postero die oppugnatio integrata est: quæ longa & atrox ac cruenta fuit, obsessis sese egregie defendentibus: tandem Genuenses in urbem penetrant, magna hostium edita cæde, ac civitate direpta: matronarum tamen pudore intacto, quæ jussu Petri in Monacharum cœnobium subductæ sunt. Cæsa sunt in ea pugna hostium sex millia, ac plus noningenti capti: cum victoria Genuensibus & foederatis non exiguo sanguine ac cæde steterit.

Tristis nuntius Clodiæ captæ Venetias confestim perlatus, tantam trepidationem fecit, ut moerorem ac luctum acceptæ cladis terror imminenti interitus obtupecerit: cum Senatores ipsi, veluti mentis non satis compotes, tanto undique circumfuso pavore, obtorpuissent: tandem, cum animi à stupore, quo defixi diu steterunt, tamquam à somno emergere coepissent, nullam tamen

A rationem explicandæ salutis inibant; cum subiret animum cogitatio, in eum se locum adductos, ut aut vi, aut fame expugnarentur: quibus enim opibus, classe amissa, ac terrestribus copiis delectis, hosti geminata victoria feroci, tantisque viribus fulto, si ille Venetiis classem admoveat, restituros? neque vero majoris aut diuturnioris certaminis expugnationem munimentorum recenter excitorum, quam Clodiæ fore: quod tamen discrimen ut evadant, ut hoste Venetias omnino non accedente, vel irritò incepto accedente: quo modo adversus famem, quam natura insuperabilem faciat, se invictos fore, omnibus maritimis ac terrestribus commeatibus undique clausis? alterutra igitur peste pereundum esse. Omnia circumspectantibus nihil succurrebat, quam pacem à superbo victore suppliciter exposcere. Durum quidem videbatur, populo, cum quo per centum amplius annos de maris imperio varia fortuna dimicassent, supplices fieri: evidens tamen præsentis interitus species, ante oculos versans, necessitatem illis expressit, hanc quantamcumque indignitatem subeundi: Legatos igitur ad Petrum mittunt; quibus mandant, ut pacem per aqua per iniqua cum Genuensibus componant: quibus ad Petrum introductis, legationis principem ita locutum accepimus: *Magnos vobis animos, Genuenses, facere possunt tot felices ac continuati rerum successus: ingentesque tibi in primis, Dux, spiritus addere tot alia super alia familia tua cumulata decora; clarissima de nobis navali victoria à Luciano gentili tuo viro forti ac claro paullo ante parata; ac Clodia urbe à te modo capta, urbeque ipsa Venetiis obsessa: ceterum quo validior est secundi venti status, eo major diligentia in illo moderando tibi est adhibenda: ac cavendum ne te nimio illius impetu in aliquas lucentes syrtes, atque inextricabiles scopulos sinas auferri. Vetus est hoc, Petre, Multos claros Duces vincere scivisse, victoria uti nescivisse: quod distum non magis in illos valet, qui institutum cursum felicitatis persequi destiterunt, egregisque rebus initio gestis, velut alii repente facti, segnes obtorpuerunt; bellumque ingentibus animis inchoatum senescere, desidia sua passi sunt; quam in illos, qui nullum modum fortuna se nimium efferentis faciendo, atque ad non concessa tendendo, sese, copias sibi creditas, Republicam ambitione suâ præcipitem dederunt; magnarumque cladum civitatibus suis causa fuerunt. Qui fractus victoriarum maximus sperari & optari potest, hoc est, victum hostem ad tuas condiciones adducere, illique pacis leges imponere; id tu, Dux, affectus es: pacem enim à te petimus Veneti; ii, qui clarissimis victoriis partis, ingentibus rebus gestis, nominis nostri fama totum orbem terrarum implevimus; amplissimasque Provincias, atque innumerabiles urbes latissime patenti imperio nostro subjunximus. Penitebit igitur te, Petre, gloria tua, aut te ad cetera gentis tue stemmata, quæ frequentissima sunt, parum detrusus addidisse existimabis; te Venetos ad necessitatem pacem supplices à te petendi adegisse? quique populus virtutis æmulus de principe in maritimis rebus locupletatus per centum amplius annos vobiscum contenderit; illum à te in eum locum adductum, ut non jam sibi ei de dignitate & gloria dimicandum, sed de salute laborandum? magnum est hoc, si rem vere tecum existimare volueris, Dei immortalis beneficium: quod illius benignitate tibi in sinum ultro delatum, cave ne nimia cupiditate tibi elabi sinas: id assequeris; si tecum reputaveris, quanta recordia sit, rem jam partam, ac domi, quod ajunt, conditam temere in incertam aleam dare.*

Quæ ad ea responderit Petrus, quas pacis condiciones tulerit, à nostris Annalibus non traditur: puduisse illos credo, tam barbaram inmanitatem

tem in homine Genuensi litterarum monumentis mandare: illud tantum dicunt, (quod inter Venetos & omnes etiam Scriptores, quoscumque ego viderim, constat) ita atroces condiciones ab illo editas, quæ in nullius hominis integra mente utentis sensum caderent: quibus, si totam ditionem Venetorum ac Venetias ipsas jam cepisset, mitiora edere debuisset: omnia enim illis ademisse, præter hujus usuram lucis, quam ipsam quoque ut à se precariam habere faterentur, volebat. Quæ legatio renunciata majores motus, quam proximus cladis nuncius, in contrariam partem Venetiis fecit: ita enim abominati sunt postulata, ab omni humanitatis sensu abhorrentia; itaque ea res indignationem & iracundiam Venetorum accendit; ut ab ultima desperatione in rabiem versi, omni pacis cogitatione deposita, animos ad tantam tamque vesanam furentis hominis arrogantiam ulciscendam acuerint.

Hic, rerum Venetarum Scriptor haud parva in re à nostris Annalibus discrepat: nullam enim legationis ad præfectum Genuensem Venetiis missæ mentionem facit: quin contra, Venetos ait nihil Clodia capta, & tantis aliis super alias cumulatis cladibus, animo infracto, ad bellum reparandum, ac sese defendendos animos acuisse. Illud quoque addit, quod à nostris Annalibus silentio præteritum est; Carolum Ludovici Hungarici Regis filium per idem tempus fines Venetos infesto exercitu intrasse; Tergestumque urbem arcta obsidione cinxisse; demonstrasseque, sese ambigentium controversias pro communi amico haud gravate cogniturum, ac res inter illos componere omni ope annisurum. Venetos igitur, Aquilejensem, Carrarium, ac Genuenses ipsos, amplas legationes ad illum misisse; resque magnis disputationibus coram Carolo agitas: nihilque tandem, post ingentia certamina actum: immites enim Genuensium animos perstitisse in pravo & crudeli incepto; iis conditionibus pacis latis, quas omnium aures respuerunt: cum omnia Venetis, præter animam, adimerent: quam ipsam quoque ipsorum benignitati acceptam referri à Venetis vellent: ceterum quam verisimile sit, Venetos, Clodia capta, totque cladibus attritos, ad hoc tot terra ac mari circumfistentibus terroribus, præterea omni commeatuum via interclusa, animos ad pacem petendam non demisisse, quod iidem ipsi Veneti levioribus de causis aliquando fecerunt; in aliorum cogitatione relinquo: ac ne illud quidem minus à veritate absolum videtur; Venetos inimico Rege, seque & urbes suas oppugnante; ac cum quo sibi tantæ inimicitiarum causæ intercederent, ob tot omnium temporum inter se illatas injurias, totque civitates mutuo sibi ademptas; disceptatore tanta in re uti non dubitasse: ut illud quoque à ratione est alienum; Regem non potius optasse Venetos iis de causis, quas diximus, tanta mole obrui, quos confectos & enervatos ipse postea facilius opprimeret, suaque sibi reddere cogeret; quam illos sublevare, atque è tantis discriminibus eripere studuisse.

Igitur Veneti, cum res afflictæ & prostratæ cum virum postularent, in quo animus esset tantæ rerum moli par, neminem potiorum habentes Victore Pisano, cum carcere eductum, invidia & obreftatione temporibus Reipublicæ cedente, summæ bellicarum rerum præficiunt, cum ingenti populi lætitia; cui ita carus fuisse & acceptus dicitur, ut illo carcere incluso, multi citati nomen in militiam dare recusarent, seque sub alio Duce umquam merituos negarent: præterea Legatos ad Barnabam Principem Mediolani opem in extrema fortuna oratum mittunt: qui cum Mediolanum venissent, ad Barnabam introducti, illo-

rum princeps talem orationem habuisse traditur: *Ad extrema adducti; terra ac mari artissima obsidione circumfessi; omni maritima & terrestri commeatuum via nobis clausa, ac mœnibus prope ipsis Venetiæ ab hoste captis; (nulla enim alia mœnia urbs nostra habet, præter aggerem ante eam consurgentem, atque in eo à nobis nuper excitata propugnacula, quorum firmissimum est Clodia modo ab hoste expugnata) tot igitur angustiis circumventi in tuam opem & misericordiam confugimus, Princeps: qua una nos è faucibus immanissimi hostis eripere potest, atque à propinquo interitu servare: quam tamen opem verecundius à te peteremus; si, in ea nobis porrigenda vel neganda, minus fides, fama, existimatio, utilitas denique tua, quam nostra salus ageretur: neque enim nos soli tanto onere nos temere aggravassemus; nisi spe auxiliorum & societatis tuæ freti, fœdere ac sollemni jurejurando sancita; ad hoc tam amanter ac prolixè à te ad nos delata: cum videremus Genuenses perpetuos hostes nostros cum potentissimis Principibus accolis nostris arma conjunxisse: sapientiusque duxissemus parva insula Tenedo, qua funestum hoc bellum excitavit, hosti cedere; quam eam negotii molem nobis conflare, qua necessario obruendi essemus, viribus adversus tantam conspirationem longe impares: spe igitur tuæ societatis innisi, bellum ingressi sumus; quam nos numquam falsuram pro certo habemus: neque enim fieri potest, ut tu tanti fastigii Princeps, sedens & inspectans patiaris nos opprimi, atque in tanto officio, quod tibi fides tua ac jusjurandum imponunt, ut cesses: cum interea Genuenses non magis suis quam sociorum viribus nos oppugnent: non enim illorum fœderati minus atroces in nos coorti sunt; aut minus acri bello, quam illi, nos urgent: quod in illum locum nos adduxit, quo nullus sit, præter interitum, inferior. At enim quid est, Veneti, quod calum & terras inanibus querelis impleatis? quod jurisjurandi & pactorum testem cieatis; cum ipsi vos istis molestiis facile eximere possitis, causam belli, quoniam ita levis est, præcidendo, atque insula Tenedo hosti cedendo? utinam hoc nobis integrum esset, Princeps: utinam hiantem voraginem, hac insula nobis detracta, explere possemus; non te, aut quemquam fatigaremus: ceterum res non eo loci jam est, neque de Tenedo exigua insula dimicatur; sed de omnibus rebus nostris, de tota, inquam, ditione nostra, ad quam insatiabilis rapacissimique hostis cupiditas felicibus successibus incitata oculos adiecit; quin etiam de Venetiis ipsis certamen nobis fortuna indixit. Patieris igitur, Princeps, nos cum veteris amicitia jure, caste atque integre à nobis perpetuo culte, tum recentis societatis fœdere tibi conjunctos inspectans & sedens interire? ac non protinus omnibus regni tui viribus connisus ad tuos liberandos accurre? cum præsertim, ut omittam fidem, pacta, existimationem, hominum sermones, non minor res tua agatur, quam nostra: postremum enim fecimus; quod multis esse in deliberationibus primum solet; hoc est utilitas: quæ tum maxime est amplectenda, cum est cum dignitate & amplitudine conjuncta. Regnum habes, Princeps, nobilissimum & opulentissimum; regionemque omnium, quæ sub celo sunt, feracissimam; tum autem innumeris claris urbibus ac validis opidis frequentem: idem tamen regnum est velut corpus robustum quidem ac vegetum, suisque viribus firmum; ceterum truncum ac mancum; cum cruribus & brachiis careat, quibus se commoveat, ac vires suas late proferat: ea autem quid aliud sunt, quam mare ac maritima opes? ea sola in tanta ceterarum rerum, tamque affluentia copia tibi desunt: earum igitur tibi addendarum, hoc bellum non modo præclaram occasionem, si illud toto pe-tore amplexus fueris, sed justam quoque causam præbet: ecquis enim dubitat; quin, si tu acri bello Genuenses urgere cœperis, illos brevi sis ab alienis querendis ad sua tutanda revocaturus? quo bello cervicibus nostris imminente liberati, non debes dubitare, quin*

omni virium nostrarum conatu finis consurrecturi ad tantas injurias ulciscendas, ac pares clades illis reddendas. Quæ autem spes illis ancipiti terrore hinc terra à te, illinc mari à nobis circumventis reliqua erit? annona præsertim illos cito defectura; cujus numquam magnam copiam habent: qua importata tantummodo utuntur: ut, si non alia re, fame certe & necessariarum frugum inopia victi ad illud consilium sint descensuri: ad quod pridem iidem ipsi nos superioribus annis illos adegimus, cum se Joanni gentili tuo voluntaria deditione tradiderunt: incredibilique tua felicitate sit; ut non cupiditas aliena rapiendi, sed desiderium tuarecuperandi, iusta & pia arma tibi induisse videatur. Si tante ac tam splendida causse ad honorificum & fructuosum bellum non satis stimulant; nequidquam nostra, aut cujusquam adhortatio acuet. Illud tantum extrema oratione nostra te monitum volumus; ut, quod facere decreveris, quamprimum facias: ne tum reopem latum venisse doleas, cum jam nulli essent, quibus opem ferres.

Æqua Venetos postulare, seque in officio & fide pactorum fore, respondet Barnabas; omnemque belli terrorem à Venetis depulsum in Genuenses versurum, copiis in illorum fines illico missis: atque ita bono animo esse iustos Legatos à se dimittit; è vestigioque legionem Stellatam, quam superius memoravimus, quæ fuit quattuor millium armatorum, Astorre Manfredo Duce, in Liguriam mittit: quos Ishardus Guarcus Ducis frater, urbanam juventutem secum trahens, valida impressione aggressus fundit; maximo illorum numero partim cæso, partim capto, reliquis, qui pauci superfuerunt, in fugam coniectis; cum ipse Manfredus rusticanis vestibus indutus evasisset. Hujus victoriæ memoriam Genuenses cum usitato dono aurei aulæi ad ædem divi Georgii ad octavum Kalendas Octobreis, quo die parta est, sacro sollemni quotannis renovandam decreverunt: quæ victoria non magis Genuæ, quam tota Italia læta fuit; urbibus ac finitimis populis gaudentibus, illam omnium scelerum ac facinorum colluviem deletam; à qua nullius urbis fines cladibus belli intacti: cum non minus incerta expectatio, quam præsentia mali animos hominum torqueret, incertos, quo illos populantes animi impetus ferret.

Interea Genuenses nonnulli obscuri nominis, vicis in circumjectis littoribus, atque ad ripas Athesis captis, porro ire pergentes, Metamaucum capiunt: ceterum cum, Clodia ac ceteris circumjectis locis captis, urbeque Venetiis mari ac terra velut circumvallata, omnique aditu commeatibus intercluso, victoria in manibus esset; Venetiasque, si nulla alia re, at saltem alimentorum inopia brevi cadere, Genuensibus sedentibus, ac nihil molientibus, necesse esset; Genuenses certum & exploratum temporis beneficium, dum nimia cupiditate, ac moræ impatientes, illi antevertere student, corruerunt: igitur, cum caput ipsum rerum Venetias invadere decrevisset; Clodia cum triginta triremibus moventes, ostium castellorum ad sanctum Nicolaum petunt; per quod majoribus navigiis facilior est ad urbem accessus, canali ab ea parte in satis magnam altitudinem depressio; cum ceteri canales alveos magnarum navium humilitate sua non ferant: ceterum, cum munimenta ac catenas, quibus Venetos ostium obstruxisse superius diximus, superare non potuissent, Metamaucum repetunt: inde Popiliam petunt; qui locus haud plus trium passuum millium intervallo ab urbe distat: duobusque illis in locis cum parte classis confidunt: ceterum, Genuensibus nimium se inferentibus, Joannes Barbaricus cum centum minutis navigiis varii nominis & generis sese opposuit, pugnam potius eludens, quam conferens: quæ Ge-

nuensibus multis de causis iniqua erat; cum lacunarum humilitas, ac canalium exigua altitudo ipsorum navium alveos non ferrent: quæ si paulum modo extra canales dextra, aut sinistra deflecterent, vadis infigebantur: cum contra exigua navigia Venetorum, ac portus sui peritorum numquam offendentia circumvolitarent; Genuensesque naves modo à prora, modo à puppi, modo à lateribus missilibus varii generis inceperant: à quibus magna detrimenta accipiebant Genuenses; cum in primis à bombardis læderentur, quas singulas singulæ scaphæ vehabant: quod novum tormenti bellici genus tum primum in Italia auditum, Genuenses novæ rei specie obstupefactos in primis turbabat; cum singulis illarum ictibus duo, aut tres, aut plures etiam mortales exanimarentur.

Cum mari nihil succederet; Venetique canales sanctæ Martæ, & sancti Spiritus ad urbem ferentes clausissent; Genuenses res terrestri via tentandi, consilium capiunt, ostiumque portus ad sanctum Nicolaum invadendi. Interjectæ tum erant Metamauco & sancto Nicolao sylvæ tegendis insidiis aptæ. In his magno armatorum numero latere jussu; Genuenses validam armatorum manum præmittunt, quæ speciem præbeat accedentium ad demoliendum murum, quem à Venetis nuper ductum supra diximus: in quos appropinquantes alae equitum emissæ est: quorum impetum Genuenses primo constanter sustinuerunt; modicoque edito prælio, ut compositum fuerat, sensim cedentes, tamquam impressionem non ferentes; cum hostem ad locum insidiarum pertraxissent, qui latuerant, ex insidiis consurgentes, in hostem sese effuse inferentem impetum faciunt: quem, magna hominum & equorum edita strage, cum ii quoque, qui se cedere simularant, in pugnam conversi essent, præcipitem intra murum agunt. Satiatatem potius legentibus, quam ullum operæ pretium faciam; si quæ prælia tam in mari ac lacunis, quam in littoribus per varias occasiones, varique fortuna, inter Genuenses & Venetos quotidie committebantur, persequi velim: cum agilitas & celeritas minutorum navigiorum, tum autem maris & vadiorum peritia Venetis auxilio essent; qua re fiebat, ut parvis damnis assidue Genuenses carperentur: cum etiam triremem, cui præfectus erat Vegerius Saonensis, cum illa se nimium intulisset, ac decedente æstu immobilis in vadis hæsisset, complures scaphæ ad illam advolantes cepissent: quam cum Venetias una cum nonnullis aliis navigiis captis, ac ducentis circiter captivis, in quibus fuit ipse Vegerius, traxissent; ingenti lætitia à populo, tamquam magna aliqua victoria parta, excepti sunt: quod in tantis luctibus hoc quantumcunque gaudium affulxisse videretur: quod tamen gaudium brevi luxuriavit, & vanum evasit; majore plaga à Genuensibus illis reddita: nam, cum auditum esset, magnam Genuensis partem classis in Apuliam frumentandi causâ profectam, ac propterea Clodiam defensoribus inanem, ac vigiliis & custodiis neglectam Veneti sese offensuros rati, cum trecentis minutis naviculis, Victore Pisano Duce, noctu ad illam tentandam clam accedunt: ceterum, cum non fefellissent; à Genuensibus cum multa cæde ac sanguine, compluribus navigiis omisissis, ac genero Contareni Ducis cæso, repulsi Venetias revertantur. Quæ clades quamvis in comparatione superiorum levis, tamen eo tempore accepta, causas luctus aggravavit.

Ceterum populo propior erat dolor, ac metus deficientis annonæ, & necessariarum rerum, quarum penuria vehementer laborabatur; cum res in dies artiores fierent; neque ulla spes circumvallatis

tis ostenderetur inopiæ sublevandæ. Vulgo igitur querelæ ac voces audiebantur, desidiam & ignaviam Senatorum & principum civitatis accufantes; qui animis & corporibus jacentes appropinquantem interitum, nullis remediis tentatis, expectarent: adcone virtutem Venetam uno aut altero ictu concidisse, ut à casu se erigere non possit? minutulorum ne navigiorum excursionibus hostem se à cervicibus depulsuros sperare, ac Clodiam recuperaturos? omnibus viribus connitendum, ac iusta classe, iustoque exercitu rem gerendam; eamque communi Marte decernendam dari oportere: nullam enim aliam esse salutis viam; hocque unum consilium in utrumque casum aut salutare, aut certe non damnosum esse: nam si prælio superiores fuerint, tum vero ab interitu sese ac patriam servarint: quod si fortuna sævire persiste-rit, nihil damni fieri; genus enim tantum mortis mutari: longeque satius esse, armatum vindicem salutis & libertatis suæ omnia pro illis expertum in acie, per summum decus, cadere; quam turpissimo mortis genere, quod certissimum impendeat, fame deficere. Numquam concitata multitudo tantum stomachum arrogantia & contumacia sua Nobilitati fecit, tantamque illius indignationem in se commovit; quantam tum gratiam plebs Veneta iis querelis à Senatu & principibus civitatis iniit; gaudentibus, humilis sortis homines, in capeienda Republica, ac communi patria & libertate defendenda, studio sibi præcurrere: seseque ab illis ad ea ultro incitari, ad quæ illi ab ipsis stimulandi fuerant: ceterum longe gravior fuit principum popularis corporis civium egregia in patriam voluntas: qui, maxima parte rei familiaris suæ in medium collata, inopiam ærarii exhausti sublevarunt; bellumque liberalitate sua diu aluerunt: quod promeritum per se magnum ac gratum, cum tempora Reipublicæ majus ac gratius fecissent; Senatus eo beneficio remuneratus est, quod ab ea civitate expectari potest maximum: illis nobilitate donatis, atque in ordinem gerentium Rempublicam lectis: quæ familiæ ad sexaginta numero fuisse dicuntur.

Igitur omnibus curis in classe comparanda defixis, brevi tres & triginta triremes (cum in navalibus magnum alveorum numerum semper habeant) clam armant, duabus ingentibus corbitis, ac duobus pontonibus additis. Id est informe, ceterum firmissimum navigii genus ad subvectiones fabricatum miræ soliditatis ad quamvis ingentia pondera sustinenda: cujus classis ipse Contareus Dux præfectus, cum is ipsum illud munus sibi deposcisset, non libenter modo, sed cupide quoque creatus est: quod tanti viri, cum ob eximiam rerum navalium scientiam atque usum, tum ob summum honoris & auctoritatis locum, maxima futura erant in bello, atque in rebus regendis, momenta. Is sibi Legatos delegit, Victorem ipsum Pisenum, haud retractanter majori potestati summo loco cedentem, & Dominicum Michaelium: quæ res cum ita clam à Venetis administrari non potuissent, ut Genuensium scientiam effugerent; Genuenses, jussu Petri, Metamauco ac Popilia incensis, Clodiam se recipiunt: locisque urbis invadenti hosti opportunis, validis præsidiis & stationibus firmatis; classeque ad pugnam instructa, (quæ fuit non plus quam viginti novem triremes, cum reliquæ in varia belli munera abessent) sese ad resistendum parant.

At Contareus magnum Senatorum numerum, ac florem Venetæ juventutis secum ducens, Venetiis sub vesperum movens, noctu Clodiam apulit: Genuensesque magno impetu adversus se prodeuntes, cum vix satis temporis habuissent ad

A classem explicandam, & ad pugnam aptandam, invadit. Numquam aut majorum animorum ardore concursus est; majoreve irarum certamine, aut acrioribus causis animos utriusque stimulantibus, prælium initum: quod atrox ac diuturnum, & anceps fuit; utroque Duce certamen accendente, ac, quibuscumque irritamentis poterat, animos suorum acuente. Navium numero atque hominum multitudine superiores erant Veneti; & præsidio duarum corbitarum ac pontonum, quorum navigiorum magnus usus in prælio fuit: cum Venetæ triremes, si quæ ab hoste nimium premerentur, ad illas confugerent, tamquam totidem arcium humilioribus navibus imminentium præsidio testæ. Virtute ac robore pugnantium Genuenses præstabant: qui veterani omnes fere erant, atque diuturno armorum usu assuefacti & malis durati: cum Veneti subitatio milite, ac sellulariorum gregibus classem magna ex parte refertam haberent: qui cedere tandem Genuensibus coacti sunt: cum, duabus corbitis, quarum tutelæ maxime fidebant, à Genuensibus expugnat, ac nonnullis triremibus simul captis, animis concidissent. Contareus igitur rem ad iniqua inclinatam cernens, cum reliquis, quæ superfuissent, navibus trepida fuga Venetias se subduxit.

Per ea tempora Carrarius sapiens consilium Duci Genuensi dedisse dicitur; hortatus ne bellum ingentibus animis ac magnis initiis ceptum fenescere sineret, segni mora ad Clodiam sedens: consilia enim ea via haudquaquam processura; nullumque operæ pretium illum facturum: quin contra, periculum esse, ne pestem, quam in alios machinatur, in ipsius caput vertat; si Veneti ultima desperatione omnia audere & experiri suadente, portum Clodiæ forte obstruxerint: quæ res neque impedita omnino illis sit, nec magni sane moliminis: sic fore, ut victoriam, quam, si fortuna uti sciat, certam & exploratam habeat, è manibus emissam hosti tradat: ac pro eo, ut hostem obsideat, ipse obsideatur; in easdemque angustias adducatur, quibus nunc hostem premit: unam Venetos vincendi esse obsidionis viam, cum omnes alias inanes ipsemet expertus sit: proinde sese magnopere suadere, ut Clodia sibi custodienda tradita, ipse quamprimum proficiscatur; marique Tadiæ & Anconæ amicis urbibus interjecto, quanta maxima possit classe infesso, annonæ iter Venetis intersepia: quibus ipse terrestria commercia jam clauferit: sic sine ullo prorsus discrimine, aut periculo convertentis se fortunæ, Venetias per se brevi casuras, quæ prope jam ad extremum venerint. Repudiatum est consilium à Petro; sive animus arrogans, atque altis ignorantie tenebris oppletus, sani consilii capax non esset; sive suspecta illi fides Carrarii esse cœpisset; sive non libenter se emolumento salinarum privaret; sive popularem invidiam ac domesticam obtreccionem veritus, qua multi clari Duces sæpe conflagrassent; si populi ac Magistratus injussu urbe parva cessisset; neque se factum populo probaturum speraret.

Interea Veneti, cum classem reparassent, Carolusque Zenus, qui ante pugnam ad Polam cum quinque triremibus Venetiis in Orientem profectus erat, ac quindecim triremes, per varias occasiones, ex multis Venetorum locis corrogarat, Venetias redisset, prædasque de onerariis Genuensibus actas advexisset, (in quibus navis Bechignonia fuisse dicitur immanis, ac vix credibilis pretii mercibus onusta) animis ob tantas virium accessiones auctis, ultima experiri constituunt. Jam negligentiores Genuenses ex felicibus successibus facti erant: jam vigiliæ & custodiæ laxiores esse cœperant: quæ

res hosti magnæ rei occasionem præbuit: qui mense Decembri Venetiis movit, quattuordecim triremibus præmissis duas onerarias remulco trahentibus: quæ cum ad portum Clodiæ appulsæ essent; omniaque ibi soluta & neglecta offendissent; onerarias, atque alveos duarum ingentium corbitarum, quas superiore prælio à Genuensibus captas & combustas diximus, qui igne intacti superfuerant; nemine obsistente, in ostio portus demergunt: palosque ac trabes defigentes, omnisque generis materiam congerentes, obstruere portum incipiunt: adversus quos magna Genuensium multitudo strepitu excitata, ex urbe repente profiliens, facibus armata, navigiis Venetorum demersis, ac reliquæ materiæ defixæ, ignem sine ullo fructu injicit: superiora enim tantummodo navigiorum atque undis exstantia conflagraverunt; cum ignis ad inferiora penetrare undis prohiberetur: cumque interea Petrus exercitum per tumultum & trepidationem armasset, Contarenusque Dux cum tota classe supervenisset; pugna atrox extemplo commissæ est: pugnatumque est per tres continentes dies; pugna per modica intervalla sæpe intermissa, ac majoribus animis semper integrata, cum magna utriusque exercitus cæde ac sanguine: quam neque nox neque defatigatio dirimere potuisset, internecinis odiis semper recrudescentibus. At Genuenses, pugna tandem defatigatione utriusque exercitus dirempta, ostio portus clauso, omnia circumspectantes, atque animo agitantes, hanc rationem classis è lacunis educendæ tandem incunt: speciem enim præbuerunt ad ostium portus aperiendum magno conatu accedentium; quo, Venetis eo averfis, ipsi interea per ostium portus Brondulani; quod tria passuum millia à Clodia distat, cum classe erumperent: ceterum sine effectu astus fuit. Veneti enim, re statim animadversa, sese Genuensium conatibus opposuerunt: quæ res eo facilior illis fuit, quod ob humilitatem canalium, nullus esset remigii usus; Genuensesque naves suas funibus atque aliis lenti moliminis machinis trahere cogerentur.

Felici successu Veneti elati, animisque ad Genuenses prorsus ex illis locis expellendos adjectis; terrestri quoque via illos urgere aggrediuntur. Erat ad portum Brondulanum cœnobium sancti Michaelis, quod Petrus prævalido præsidio firmarat: quo si hostes potiti fuissent, comæatum annonæ, quæ per fluvium Athesim à Carrario Genuensibus continenter submittebatur, omnino ademissent: quam viam, quæ una reliqua erat, Veneti, resæpe tentata, numquam, cœnobii præsidio obsistente, intercludere potuerant; cum maritimam per portus Metamauci & Popiliæ Barbaricus pridem clausisset. Igitur Veneti, terrestribus copiis comparatis, ostium quoque Brondulanum obstruere cupientes, Carolum Zenum eo mittunt: inter quem & Genuenses acris prælia & cruenta sæpe commissæ sunt: in quibus semper Veneti superiores evadabant, beneficio bombardarum; quibus Genuenses omnino carebant: quas apte terra marique disposuerant, quarumque assiduis ictibus multi mortales absumentur.

Per idem tempus Emanuel, quem ab Joanne parente imperatorem designatum diximus, societate cum Venetis conjunctus, Peram Genuensium coloniam obsidione cinxit: quam tamen brevi solvere coactus est, sub adventum Nicolai Marci præsidio petentibus Genua missi. Hujus viri opera in eo mari neque segnis, neque inutilis fuit: duabus onerariis, quæ frumentum Constantinopolim vehabant, ac nonnullis navibus longis Cæsariensis, post longum ac cruentum prælium, tandem captis, magnæque hostium strage edita; cum Marcus Princeps in hostilem classem impigre insiliisset, ceterosque ad idem faciendum exemplo suo accendisset.

A Insequentis anni initio Guarco Dux, unaque cum illo summus Magistratus, cum prius consilium universæ civitatis trecentorum & viginti civium ex omnibus civitatis ordinibus legissent, tredecim triremes armarunt, quibus præfectus est Matthæus Marruffus, vir spectatæ multis in locis continentis, ac bello & pace clarus. Interea Zenus ingentibus terrestribus ac navalibus copiis (fuerunt enim octo peditum millia, ac triremes quattuordecim) cœnobium sancti Michaelis oppugnare cœperat; non tam illo potiundi spe, quam ut hostem ad pugnam eliceret: neque illum spes fefellit. Cum Petrus adversus illum impigre exiisset, acris inter illos pugna mari ac terra commissæ est; eo Genuensibus iniqua, quod Zenus numero navium superabat; cum Petrus decem tantum triremes haberet: ceterum navalis pugna brevi ommissa est; cum in perangustis canalibus singulæ tantum naves concurrere possent: visque omnis pugne in terram versa est: cum ingens hominum multitudo, in qua fuit delecta quadringentorum veteranorum manus à Carrario missa, à Clodia erumpens Petro laboranti subsidio accurrisset: qua re cognita, Victor Pisanus cum haud exiguo navium numero accurrens, classem Genuensem invadit: in qua pugna Petrus acriter dimicans ictu bombardæ exanimatus est. Morte Ducis, cum Genuenses, ut necesse erat, animis concidissent; turba nautica omnis, triremibus incensis, in terram se eiecit, ac cum reliquo exercitu conjunxit. Idem fecerunt, qui erant in præsidio cœnobii, illo relicto: re igitur ad iniqua inclinata, Genuenses sensim cedentes, parvam Clodiam repetebant, cum numerus copiarum utrinque auctus esset: nautæ enim, ac remigium Venetorum ipsum quoque in terram exscenderat; bellatorumque Genuensium numerus erat tredecim millium; Venetorum tribus millibus amplior. Parva Clodia, quam eandem veterem appellabant, ponte ligneo magnæ longitudinis cum nova conjungebatur: ad quem omnis pugne vis confedit: ceterum, cum Genuenses impressionem Venetorum ferre jam non possent; ommissa pugna, fugam per hunc ipsum pontem inordinatam capiunt: quos cum Veneti nullum insequendi & urgendi finem facerent; postremum Genuensium agmen ab ipsa desperatione in illos conversum, tanto impetu illos invasit, ut eos ipso incursum retro compulerit, spatiumque dederit Genuensibus pontem transeundi: quod cum trepide ac nimis festinanter facerent; alius in alium incurrentes, sese mutuo ex ponte detrudebant; decidentisque aut undis hauriebantur, aut ab hostibus superne imminentibus interficiebantur: ceterum pons, nimio onere prægravante, tandem corruit: qui ruina sua multos traxit, in quibus fuit Thomas Guanus equitatus Genuensis præfectus, vir conspectæ fortitudinis. Ceciderunt eo die de Genuensibus sexcenti; totidem capti sunt: cum insuper Barbaricus cum centum minutis navigiis suis quinque triremes Genuenses in fossa Vinearum (ita appellatur locus) cepisset: & ut nihil ad acceptas clades & calamitatem Genuensium cumulandam deesset, idem Barbaricus novem Patavinas naves frumento onustas à Carrario ignaro ruinæ pontis ac rerum ad Brondulum gestarum Genuensibus missas cepit: quæ annona in usum Venetorum cessit.

F At Genuenses, nuncio de obitu Petri audito, in ejus locum Carolum Spinulam sufficiunt; Ludovico Guarco & Ansaldo Lomellino illi in consilio additis: qui Genua cum egregia delectorum cohorte mense Februario profectus; quoniam Genuenses Hadriatici sinus non jam potentes essent; ne aliquod impedimentum iter maritimum retardaret, terrestri via Clodiam contendit: quem insequenti mense Martio Marruffus maritimo itinere con-

consecutus est: quo eodem mense Agapitus Columna Cardinalis Legatus Genuam venit, à Pontifice pacificatum cum Venetis missus: qui re infecta discessit, utriusque populi animis nondum cladibus satiatis. Eo tempore castellum in pago Buianeto, qui est in valle Porciferæ, ædificatum est; adversus Insuabres ditionem Genuensem, Venetorum instinctu, subinde invadentes.

Interea iter Marruffi Hadriaticum sinum petentis haud sine operæ pretio fuit: nam & duas triremes Venetas in Civitate veteri deprehensas, cum Joannem Marocellum captivum non redderent, cepit & incendit: & in portu Manfredoniæ sex triremes, ac nonnulla minora navigia, in Apuliam à Venetis frumenti accipiendi causâ missas, prælio victas ac captas concremavit: Thaddæo Justiniano præfecto cum ducentis capto; cum reliqua turba nautica sese in terram eiecisset. Itinere tandem confecto portum Jadræ subiit amicæ urbis, quæ toto eo bello, ut Pola Venetorum, ita Genuensium receptaculum & sedes fuit: ex quo portu numero navium auctus, ad littora usque Venetorum processit; in quibus exercitum Venetorum offendit: igitur, ne inane tempus consumeret, inde profectus, Fossiones petit: (id est nomen loci) cuius adventu Veneti perculsi, portum sancti Nicolai, valida turri excitata, quæ adhuc durat, communiunt; aggeremque validis equitatus & peditatus stationibus firmant; septimoque die, postquam turris ædificari cœpta est, Marruffus ante portum sancti Nicolai cum duabus & viginti triremibus constitit: quibus explicatis & in pugnam directis, copiam pugnandi Venetis fecit: ceterum, illis non prodeuntibus, cum octo horas ibi fuisset, iter in Piceni oram dirigit, consilio naves, quæ annonam Venetias subvehébant, opprimendi: quem quinque & viginti triremes Venetæ consecutæ, cum hominem nusquam invenissent, onerarias frumento onustas secum incolumes Venetias perducunt.

Interea Carrarius, ut Venetos ab obsidione Clodiæ averteret, urbi Trivisio copias admovet: ostioque fluminis Natisonis, qui nunc *Silo* vocatur, obstructo, facultatem Venetis subsidiorum ea via submittendorum ademit. Per idem tempus Marruffus cum novem & viginti triremibus littus Clodianum petit: sperans se, si Venetos ad prælium attraxisset, spatium interea daturum Genuensibus Clodiæ exeundi; atque in apertum mare erumpendi: quæ spes illum frustrata est: nam Veneti nihil se locis, quos infederant, commoverunt; cum continuis bombardarum ictibus, quibus Marruffus omnino carebat, ex castello nuper ab illis ædificato, quod *Lupam* nominabant, classẽ, & eos, qui Clodiæ erant inclusi, incescerent. Interea Clodiæ Genuenses centum minutas naviculas ex contignationibus ædibus detractis fabricaverant; cum quibus, pugna cum Venetis commissa, auxilio Marruffo prodirent: qui interea, prorsus viginti novem triremium in pugnam directis, triremi ad arcem *Lupam* missa, Venetos ad certamen provocaverat: quod illi detrectarunt; cum in littore ordines explicati starent, ut Marruffum exscensu prohiberent: quo tempore Genuenses, qui erant Clodiæ, cum naviculis prodeuntes, securibus & dolabris materiam, qua canalis obstructus erat, rescindere ac revellere conabantur: ceterum repulsi sunt à bombardis in *Lupa* dispositis; quas Veneti in Genuenses operi intentos & Marruffum assidue displodebant. Igitur Marruffus, cum intelligeret sibi non cum hominibus, sed cum bombardis certamen esse, Venetique neque exercitum, neque classẽ incertæ Martis aleæ umquam committere voluissent, cedere sensim atque ordinate cœpit: cuius metu liberati Veneti, septuaginta naviculas bombardas vehentes adversus eos, qui Clodiæ exie-

rant, mittunt; eosque fundunt ac fugant, sexaginta illorum naviculis captis, multisque mortalibus partim captis, partim cæsis.

Tandem Genuenses diuturnis malis victi & laboribus fessi, ac fame pene confecti, cum jam præ lassitudine non modo arma non tenere, sed vix recti stare possent, nunciis missis de deditioe, cum aliquibus honestis conditionibus, agere cœperunt: ceterum à Senatu, cum sæpe idem fecissent, semper repudiati sunt: cuius certa sententia perpetuo stetit, illos nisi omnia ipsius arbitrio permittentes non accipere: quam necessitatem extrema omnium rerum inopia Genuensibus tandem expressit. Igitur Kalendis Junii deditio Clodiæ facta est, quam Genuenses circiter annum tenuerant. Ducti sunt Venetias captivi quattuor circiter capitum millia; partim Genuenses, partim aliarum nationum homines, qui cum Genuensibus stipendia fecerant: ac triremes decem novem, nonnullaque alia minora navigia varii generis & nominis: quæ res Clodianorum propriæ cognitæ sunt, eæ Dominis cum fide redditæ: reliqua præda militibus concessa.

Hic à Bartholomæo Facio Ligure fabulosa, ceterum jucunda narratio inferitur: Venetòs, ut Genuenses à reliquis nationibus discerneret, hanc vocem Italo populari sermone *Cavra* pronunciare coegisse; eosque qui *A* vocali *R* præponentes, *Cra-va* more patrio pronunciassent, Genuenses deprehensos, haud absimili Ephrataeorum exemplo: quos in sacris Literis legimus, cum hanc vocem *Sibolet* pronunciare non possent, Ephrataeos deprehensos, à Galaditis in trajectu Jordanis fluvii jugulatos.

Hoc anno haud contemnenda armatorum manus, jussu Mediolanensium Principum, in vallem Porciferæ descendit: quæ, nulla re gesta, à Genuensibus in sua se recipere turpiter coacta est: qui nihil infelici eventu rerum Clodianarum animis infracti, inceptum bellum persequentes; ac, Gaspare Spinula Duce, cum octo & triginta triremibus infesta arma circumferentes, urbem Tergestum à Venetis necessaria deditioe per vim abstractam Patriarchæ Aquilejensi dono dant; Justinopolimque, quæ oppugnationem obstinate expectasset, captam diripiunt; classeeque decem triremibus aucta, Venetias petunt: ceterum, cum ostia obstructa ac littora defensoribus & omnis generis munitionibus firmata offendissent, Istriam repetunt, urbemque Polam, haud sine certamine expugnatam, diripiunt & incendunt. Albæ quoque & Signæ eadem fortuna fuit; quæ opida capta & incensa sunt: ceterum Parentium urbs dissimili eventu tentata est, opidanis egregie se defendentibus.

Hoc eodem anno victor Pisanus, cujus virtutes Veneta ea tempestate in primis stetit, decessit; morbo, ut ferunt, ex dolore contracto: quod decem triremes Genuenses culpa Legati sui è manibus Venetorum illas insequentium evasisent. Supplementum quoque tredecim triremium ad classẽ à Genuensibus missum est: cum, nemine illis præfecto, Trierarchi in orbem eo munere fungerentur. Per idem tempus Principes Mediolanenses Novis ditionis Genuensis opidi, proditioe tradentium, potiti sunt.

Eo anno quoniam multi gravabantur in longam & laboriosam ac discriminum plenam militiam nominare; conquerebanturque, magistratum onus illud non æqualiter partiri; hæc ratio querelarum tollendarum inita est: in tres enim partes civitas & ditio distributa est: onusque militandi sortis arbitrio in orbem ibat: quod si quis, cuius fors educta esset, detrectaret, vicarium in locum suum privato stipendio conductum mitteret.

Hic Annales nostri memorabile fortitudinis & audaciæ, singularisque animi magnitudinis facinus

inferunt, à cive privato Genuensi, privatis consiliis, privatisque armis editum: quod quamquam nihil Rempublicam attingit; tamen, quod ad decus civitatis nostræ non in postremis pertineat, eos illam cives tulisse, qui cum ipsis Regibus ac summis Principibus inimicitias exercere & bella gerere non formidarint, haudquaquam prætermittendum duxi. Ætatem agebat in Aula Cæsaris Trapezuntii Megolus Lercarius; ob egregias virtutes suas, ac morum comitatem, ingenique suavitatem, cum Imperatori ipsi, tum multis Aulicorum primoribus mire gratus. Is, cum forte cum adolescente, qui ætatis flore (ut ferebatur) Cæsari acceptus majorem gratiæ & auctoritatis locum, quam foeda & obscœna ministeria postularent, obtinebat, latrunculis luderet; altercatione inter ipsos orta, post multam verborum contentionem, ad jurgia tandem venerunt: adolescensque superbia & ira correptus, Megolum in ore colapho cæcidit: cumque multi confurgentes contentioni se interposuissent; maximaque pars Procerum atque Aulicorum in adolescentem (ut necesse erat) inclinarent; Megolo acceptam injuriam ulcisci non licuit: cum ne Cæsar quidem justis solatiis Megolum injuriam conquerentem affecisset. At Megolus, omnibus iracundiæ suæ aculeis in Cæsarem ipsum versis, tantum certaminis adversus illum animo imbibit, ut per omnia ardua & præcipitia ipsummet ulcisci statuerit. Igitur è vestigio se Genuam confert; habituque fordido & lugubri, ad hoc barba & capillo promissio ingentem animi moestitiam præferens, propinquis & gentilibus suis, ad hoc omnibus quacunque necessitudine se attingentibus convocatis, injuriaque exposita, petit, ut sibi in tam pio & justo negotio ne desint: enimvero illi haud retractanter duas triremes comparant: omnibusque ad usus bellicos affatim instructas Megolo tradunt: qui, nulla mora interposita, per tanta maris spatia, in Euxinum contendit; littoraque Trapezuntii Imperii tenet: quæ assiduus mari & terra excursionibus infesta faciens, ingentia immittis animi atque inhumanæ sævitæ exempla in miseris captos edebat: quos naribus atque auribus defecit, dimittebat; cupiditate vindictæ alte animo insidente nullum alteri cogitationi locum dante. Cum nullum finem faceret, Cæsar ad tantum dedecus delendum, assiduaque damna depellenda, quattuor triremes armat, atque in Megolum emittit: eas procul in se tendentes conspiciat Megolus, consilio vires adjuvandas intelligens, simulato timore in effusam fugam se confert: quem magna remorum contentione cum duæ Trapezuntiae infecutæ essent; respiciens Megolus, animadvertit, duas ex hostilibus navibus magno intervallo ceteris anteveritisse: quare id, quod petierat, affecutus Megolus, ut pugnam illarum segregaret, prorsus conversis, suas magno impetu in duas proximas factas concitat, quas ipso pene incursu capit: porroque ire pergens, cum aliæ, quæ, ut subsidio pugnantibus essent, accelerant, eo pervenissent, ut nulla esset elabendi facultas; illas quoque sine certamine capit; atque in omnes captos usitato ac foedo exemplo deformandi oris sævit: in quem cum vir quidam ipsa ætate venerabilis incidisset, duos innocentes natos suos egregia oris forma ac primæ adolescentiæ flore fulgentes secum habens, senex ad genua Megoli advolutus, *Per tuam, inquit, fidem, Megole, duobus his natis parce, omnisque iracundiæ tuæ aculeos in me effunde; non modo naribus & auribus, sed vita quoque mihi adempta.* Commotus Megolus & precibus senis & misericordia innoxie ætatis, non filiis dumtaxat, sed seni quoque supplicium remisit: cadumque narium detruncatarum ac salutarum ad Cæsarem deferendum seni tradit; nunciareque suis verbis jubet; numquam Megolum Lercarium destitutum, aut pa-

A cata illius littora relicturum, priusquam eum, à quo atrocissima læsus esset injuria, in manus suas tradidisset: quod Cæsar gemens & mœrens facere coactus est: cumque adolescens, puppi conscensa, coram Megolo stetisset; procumbens, ac lacrymabundus, *Non supplicium, inquit, Megole, sed cruciatus deprecor: cui Megolus, An nescis, inquit, viros fortes in feminas sævire numquam solitos?* quo perplexo responso non tam lacrymas quam famam adolescentis perstrinxit: illoque illæso dimisso, mandat, ut Imperatori nunciet, sibi quidem de privata injuria abunde satisfactum; ceterum patriæ suæ decori & Genuensi nomini nondum consultum: non igitur se prius abiturum, quam Cæsar chirographo suo per amplum diversorium, ac nonnullis juribus eximiis donatum Trapezunte nationi Genuensi sese ædificaturum promittat. Hac historia in valvis scripta, chirographum edidit Cæsar; fidesque promissorum utrimque constitit, diversorio ædificato.

B Cum tanta bellorum mole res Genuensis foris gravaretur, ne domi quidem ab intestinis motibus otium erat. Antoniotus enim Adornius, cum Duci in suspicionem venisset occultorum consiliorum principatus invadendi initorum, urbe excedere coactus est. Eodemque tempore Ludovicus Guarcus Ducis frater, cum à classe rediisset, missus est adversus Petrum Fulgosium, Spinetam Spinulam, Simonem Turrium Clavarenses, res novas in ora Orientali molientes: qui cum nihil profecisset, exsulesque majores vires majusque robur in dies sumerent; coactus est Dux Gasparem ipsum Spinulam cum tota classe, à bello Veneto ad domestica orientia mala compescenda, revocare: qui cum dicto audiens fuisset, in Liguriam reversus, cum opidum Clavarum tenuisset; pagum Lenium petit, in quo exsules confederant: quos resistentes fundit ac fugat: quorumque complures captos Ludovicus Guarcus partim jugo suspensos necavit; partim carceribus inclusit: signorumque captorum nonnulla Cæsaris, nonnulla Vicecomitum, nonnulla Fulgosicæ gentis insignibus picta inventa sunt.

C Gaspar, ea re confecta, insequenti anno ineunte, portum Genuensem subiit; honorifice exceptus, cum multas divorum reliquias à captis urbibus ablatas tulisset: quæ in sacras ædes religiose adservandæ distributæ sunt. Mense Martio ineunte, cura belli Veneti numquam omissa, Isnardus Guarcus Ducis frater cum tredecim triremibus in sinum Hadriaticum navigavit: in quo cum paucos dies fuisset, nuncio accepto oram Ligusticam à Carolo Zeno sedecim triremium præfecto vexari, cursu propere in Liguriam rediit: quem cum una & viginti triremibus (nonnullæ enim se illi in eo itinere adjunxerant) adventantem Zenus non exspectandum ratus, itinere retro repetito in sua concessit. Isnardusque, ora Ligustica liberata, in sinum Hadriaticum reversus est.

E Elanguescere coeperant utriusque populi animi; tædiumque laborum & discriminum, ac satietas malorum & continentium cladum, desiderium pacis in utroque fecerant. Cupide igitur uterque Legatos ad Aymonem Ducem Sabaudie misit: qui per Legatos suos utrumque populum, simul Regem Hungaricum, Aquilejensem, Carrarium ad pacem hortatus fuerat: quorum controversias sese pro communi amico & disceptatore cognoscere paratum ostenderat: colloquiis igitur institutis; tandem, post ingentia certamina, mense Augusto pax in has conditiones composita est: *Rex Hungaricus piratas in ora Dalmatica ne recipito, neque salinas exerceto; eaque de causa Veneti decimo quoque anno septem ducatorum millia illi pendunt: Aquilejensis iis conditionibus esto, quibus erat ante bellum: Veneti & Gen. res mobiles mutuo captas retineto; captivos cum fide uterque illico dimittito. Venetus arcem Tenedi demolitor; ejusque in insula possessione excedito: neutrique populo liceto eam insulam habere; aut arcem*

arcem in illa in posterum edificare, pro qua re observanda, Florentini, qui ipsi quoque sese in ea pacificatione interposuerunt, ducenta millia aureorum interceserunt: neutri populo liceto circa fluvium Tanaim mercatoria commercia exercere: ne ea res, ut saepe factum est, causa armorum sit. Carrarius arces & munimenta ad ostia fluminum & in stagnis adificata demolitor; finesque inter ipsum & Venetos à Sabaudio ipso terminantur. Hanc pacem omnes integre observarunt; præter Carrarium, qui fidem pactorum, parvo interjecto tempore, fregit.

Ceterum inter Genuenses & Venetos rem distinxit Joannes Mudacius præfectus arcis Tenedi; cuius pertinacia, dum arcem restituere differt, remque variis calumniis ac novis commentis extrahit; prope factum est, ut ad exitum perducta pacis con-

A filia everterentur, resque in antiqua redigerentur mala: cum Genuenses sese à Venetis ludificari putantes, insequenti anno de bello renovando consilia agitare cœpissent; mercatoresque Florentinos Genuæ negotiantes captos in custodiam dedissent. Ceterum Veneti Legatos Genuam miserunt, Zacariam Contarenum, Michaellem Maurocenum, Joannem Gradenicum; qui Genuensibus plane satisfecerunt: cum ejus cunctationis culpam à publico consilio totam in Mudacium avertissent. Missus est igitur à Genuensibus, ita postulantibus Venetis, Tenedum certus homo; quo præsentem arx solo æquata est: quæ res finem imposuit lugubri & inter necino sex annorum, ut Annales Veneti rationem ducunt, bello: in quo fortuna varians complura ac clara utriusque populi edidit funera.


A. C. 1382.

V B E R T I F O L I E T A E,

PATRICII GENVENSIS,

HISTORIAE GENVENSIUM

L I B E R I X.



Pax utrique populo læta bellicis quidem cladibus finem imposuit; ceterum majoribus domesticis ærumnis civitatem involvit: qui perpetuus nationis nostræ mos fuit; ut pax, qua nullum cæleste donum majus homines habent, perniciosior sæpe Genuensibus fuerit,

A. C. 1383. quam bellum, teterrima hominum pestis: domestica enim dissidia à belli laboribus & periculis compressa, civitate eo metu soluta, ingentibus motibus insequenti anno, qui fuit ejus sæculi octogessimus tertius, eruperunt: in quo apparuit, nullum esse tantum bonum, quod non pravo illius usu possidentibus in malum vertat: ut humanæ felicitatis, vel miseriæ, majora sint in animis hominum diverse rebus utentium, quam in ipsa rerum natura momenta. Ea est multitudinis natura, ut de magnis & clavis viris, non ex ipsorum virtute & meritis, sed ex sua libidine existimare soleat: cui ut illi obsequentes, vel adversantes fuerint, ita illos ipsa affici.

Salubris igitur Guarci Ducis moderatio imperii, ut numquam civitas ac res urbanæ pacatiore ac tranquilliores quam hoc Principe fuerint; ad hoc multa & clara ipsius & fratris in Rempublicam merita, ad odium potius quam benevolentiam hominum egregio viro conflandam valuerunt: dupliciter plebi offenso, quod Nobilium potius quam popularium partium Ducem esse fremerent; qui Nobilibus magistratus, & honores, ac Reipublicæ procurationem restituisset; ad hoc novis tributis plebem onerasset; temporum necessitatem hominis voluntati assignantes. Alebant hoc odium nonnulli ex popularis civium corporis principibus: in quibus eminebant studia Leonardi Montalti Jurisconsulti, & Antoniotti Adornii, ad principatum, quem Adornius jam delibasset, tendentium; ceterum diversis artibus: nam Adornius gentis potentia ac Factionis opibus subnissus, supraque privatæ fortunæ modum conspectus & elatus, haud obscura ambitione, tamquam sibi debitum illum

repetebat; à nullo consilio, quod ad illum ferret, omni recti ac pravi discrimine omisso, abhorrens. At Montaltus, cui multæ & claræ virtutes, ad hoc neutiquam vulgatæ prudentiæ fama, magnam vulgo auctoritatem, magnumque bonorum favorem conciliabant, dissimulata cupiditate, habitumque ac personam pacificatoris indutus, viam sibi ad eundem summum locum præmuniebat.

D Qui igitur ex popularium principibus novare res cupiebant, occasionem acceperunt à Magistro justitiæ, novo per ea tempora Magistratu in civitatem inducto; qui summam & legibus solutam facultatem habebat, in maleficos vel capitali supplicio animadvertendi; rem nimis gravem & liberæ civitati haudquaquam tolerabilem esse dicentes: Prætori igitur, novo Magistratu abrogato, suam ordinariam jurisdictionem restituendam; qui fontes ad legum præscriptum plecteret: negabant præterea Ducem præsidariis stipendio conductis stipatum esse oportere: regnantium id esse, non Magistratus liberis suffragiis electi: quem sua innocentia & æquabilitas in rebus regendis munire debeat, non satellites more Regum mercede parati: haud decoram eam esse speciem civili Magistratui; ac cupiditatem regnandi, non regendi præferre: non igitur superfluo sumptu ærarii egestatem aggravandam. Hæc popularium principes.

E Accedebant tenuiorum querelæ, nova imposita onera deprecantium; in quibus fuerunt lanii, qui Ducem adierunt, novum portorium venalibus pecudibus impositum tolli seditiosis pene clamoribus deposcentes: qui nulla re impetrata, cum nihil blandis Ducis verbis mitigati, soli tumultum excitare non auderent, cum nonnullis aliis parvis sortis hominibus, quos eadem causæ cum illis conjunxerunt; ad incolas circumjectarum vallium & præfecturarum sibi adjungendos urbe exeunt: qui tinnitibus ex turribus sacrarum ædium, ac proximorum cœnobiorum excitati, armis repente arreptis, magnis agminibus, magnoque impetu in urbem irrumpunt: ordinumque ductorem quemdam ex corporis Ducis custodibus, ac magistrum justitiæ, forte obvios factos interficiunt: magnaue plebis urbanæ parte cum illis conjuncta, tota urbe diff-

discurrunt, *Io popule*, conclamantes; oneraque tolli, minacibus clamoribus postulantes.

Tandem ii, qui quietis amantiores erant, tam ex urbana, quam ex rustica plebe, ad duo millia numero in ædem divi Dominici conveniunt; quo etiam venit Montaltus cum nonnullis ex popularium principibus. Actum est magnis verborum disputationibus de præsentis rerum statu. Exitus consiliorum fuit, ut Nobilium Factio à Republica gerenda omnino arceretur; summusque antianorum Magistratus, & Consilarii Ducis omnes popularis corporis crearentur; recentiaque onera & portoria tollerentur: ad quæ postulata Duci edenda, quatuor cives ex primariis missi sunt: quorum princeps Montaltus fuit. Missos legatos illico plebs consecuta est: quæ cum arcam prætorii replevisset; Isnardo & Ludovico Ducis fratribus cum paucis, quos secum habebant, obsistere non ausis; conclamant undique, ut onera & portoria tollantur: expressaque est necessitas Duci furenti multitudini morem gerendi: per scribam igitur pronunciavit; se illorum studiis, tam in portoriis tollendis, quam in legibus de potestate & jure ipsius latis (nam hoc quoque additum postulatis erat) abrogandis, obsecuturum: tabulæque, in quibus leges scriptæ erant, per fenestras in aream dejectæ sunt; quas plebs illico laceravit. Eademque nocte Dux, centum ex primoribus civibus convocatis, de eorum consilio jus gerendæ Reipublicæ Nobilibus abrogavit, custodiamque arcium ditionis Genuensis omnem ad populares transtulit, atque onera sustulit: ad hoc Fulgossii & ceteri exsules patriæ restituti sunt.

Ceterum ne sic quidem finis tumultuandi factus est: cujus tumultus sedandi causa, consilio iterum vocato, octo viri creati sunt omnes populares: dimidia pars mercatores; dimidia opifices, (nam hæc quoque nomina in Factionem gliscebant) qui *Provisores* appellati sunt: iisque summa potestas data rerum pacandarum, ac Reipublicæ constituendæ. Mercatores fuerunt, Fridericus Pagana, Thomas Illionius, Antonius Justinianus, Franciscus ab Ancona; opifices, Leonardus ipse Montaltus, qui in eo corpore censebatur, quod ipsius gens ex collegio notariorum esset, Jacobus Callacius, Damianus Ponsonus, Emanuel Bobius: qui tamen nullum operæ pretium fecerunt: tantam enim contentionem accensis studiis homines animis imbibebant, ut illorum edictum, cum pronunciari jussissent, ut plebs rustica urbe excederet, urbanique arma deponerent, non modo seditionem & tumultus non sedarit, sed potius accenderit. Omnia igitur in urbe strepitu & clamoribus discurrentium armatorum agminum personabant: cum alii *Io popule* conclamarent, alii nomen Antoniotti Adornii subjicientes, illum sibi Ducem minaciter deposcerent. Quibus in tumultibus, Antonius quidam Bufferius vectigalibus exigendis præfectus, cum in tumultuantes incidisset, trucidatus est: ulteriusque processum foret; nisi sodalitas quædam gravium & pacati animi civium insigne capitis nigriacubati leonis gestantium, multis locis occurrentes, ac modo hos, modo illos prehensantes, ut quisque notus illis incidebat, orantes, monentes, ne ad extremum sævire vellent, sed communem patriam respicerent, neque eam præcipientem dare pergerent; animos nonnihil mitigassent.

Cum igitur turbæ aliquantum defecissent, Dux, qui nulli rei se interponere audens, ad eum diem quieverat, spectator, quo tumultus evaderent, animis sumptis, populum in prætorium convocatum ita allocutus dicitur: *Ea me moderationis & facilitatis mea documenta dedisse putabam, cives, ut, si quid vos cuperetis, id ne per vim & seditionem à me extorquere, quam civilibus viis impetrare malletis. Scilicet ego ille durus & superbus, qui civium meorum*

A orationem auribus non admittam? ego ille inexorabilis, cui ad æqua impetranda vis, parum verbis proficientibus, adhibenda sit? aut vero tam omnium rerum ignarus, qui non intelligam ad universæ civitatis voluntatem consilia mihi conformanda? huncque summum honoris locum à vobis mihi mandatum, non ut regnum in vos exercerem, sed ut vos regerem, ac commodis vestris consulere? quod illi faciunt, qui libidinem animi consensui universæ civitatis præferunt: qui populum, cujus in liberis civitatibus summum imperium est, à deliberationibus publicis, contra omnia veterum civitatum exempla, arcant: Magistratus quidem, & procuraciones publicas, atque honores mandari, nisi iis, qui honestate fortuna, tum autem rerum usu & scientia idonei ad munera publica sunt, indecorum est: ceterum universum populum, penes quem summum arbitrium esse debet, à deliberationibus de summa Republica arcere, id eorum hominum est, qui ad dominatum suum potius quam ad communem libertatem consilia dirigunt. Quæ mox subjiciam, Genuenses; ea obsecro ne à me, ut voluntati vestra, quam tantam video, adverser, sed ad rationem facti mei reddendam pronunciata putetis. Offendunt vos nova onera & tributa. Ea non ego, sed tempora Reipublica, atque adeo vos ipsimet vobis imposuistis; quorum tantus ardor fuit in maximo bello suscipiendo, tantaque in suscepto tuendo constantia; ut necessario ea quoque, sine quibus tantum bellum ali non posset, vos velle, jure interpretatus sim: ac propterea ad consilium onerum imponendorum non tam voluntate mea, quam tacito vestro jussu descenderim. Nobiles participes gerendæ Reipublicæ servare non potestis: ne hoc quidem factum tam voluntatis mea, quam eorundem temporum fuit: quæ nollent, nos tanta externi negotii mole oneratos discordiis insuper civilibus aggravari: quam externam molem facilius sustinere posset civitas, omnibus suis viribus nitens; quam illorum opibus, qui iis maxime excellent, manca & detruncata: neque vero minus mihi, quam vobis aut nota, aut odiosa est natura insita Nobilibus superbia, & arrogantia; minoremve mihi stomachum faciunt elati illorum spiritus, qui æquabilitatem juris cum ceteris civibus suis ferre non possunt: neque post impotentem illorum dominatum à viro clarissimo Simone Buccanigra extinctum, animum tamen dominantem deposuerunt: ac, tamquam Genuæ duo corpora civitatis sint, dimidiam partem Reipublica gerenda postulant: quæ res in primis est concordia civium distrahenda, atque impediendi, quo minus cives in unanimum mentem coalescant. Ceterum hæc, utcumque à vobis animadvertantur, insanabilia vulnera non sunt; atque adeo jam sanata sunt, oneribus sublatis, ac Nobilibus ab omni publica procuracione exclusis. Quid ultra postulatis, Genuenses? quo ulterius tenditis? quid est, quod omnia seditionibus & tumultibus miscere pergatis? quis, malum, tantus iste furor mentibus vestris objectus est? an interitum communis patriæ ex motibus istis vestris petitis? neque prius quieturi estis, quam omnia ruerint & conflagraverint? an verome Duce vestrum fastiditis: ac dejicere magistratu contenditis? utinam hæc causa motuum sit; nulla enim faciliior est: agite, voluntatem vestram aperte profiteamini: ego enim, si me invisum, aut aliqua de causa, si ve illa justa, si ve injusta sit, offensum civibus meis cognovero, etiam retinentibus vobis, magistratu abiero: neque promptiorem me in mandato honore vobis volentibus accipiendo, quam in eodem vobis volentibus restituendo experiemini. Qua oratione temporis apta concitati animi permulsi sunt, ut omnes sentiente clamore principatum illi ratum facerent; modo portoria atque onera tollerentur: ut apparet, hac una cura plebem torqueri; de reliquis non tam sua sponte, quam à principibus popularium incitatum laborare.

Interea Antoniottus Adornius, urbanis motibus cognitis, nihil cunctatus, maritimo itinere in urbem

bem venerat: cujus adventu metu injecto, ne qui novi motus excitarentur, Magistratus homini imperat, ut actutum ex urbe faciens, Saonam se recipiat; spe facta, cum motus defedisent, ipsum patriæ restituendi: qui cum parvisset, ac propterea nusquam apparet; magnus animorum motus in urbe factus est, variusque de illo rumor erat, aliis illum mari demersum, aliis ab inimicis clam trucidatum, aliis in custodia in prætorio adservari frementibus: resque tandem à tacitis querelis ad apertam seditionem exarsit; cum clientes & illius Factionis studiosi ad mille numero, armis arreptis, sese illa prius posituros negarent, quam pro comperto cognovissent, quid Antoniotto factum esset: ulteriusque ventum foret, nisi Montaltus, cui magnam fidem vulgo habebant, illos docuisset Antoniotum Saonæ fospitem esse, mox in patriam revocandum: qua in re auctoritatem suam se interpositurum pollicitus est.

Ceterum Antoniotto, haud multis post diebus, decreto publico in urbem revocato; adventum hominis tam in vulgus grati fatalem sibi horrescens Guarcius, haud contemnendum hominum partibus suis studentium numerum ex proximis vallibus, simulque cum illis quadringentos stipendia facientes in urbem introducit; quorum præsidio adversus Adornii conatus tutus esset: ceterum quam curam ad rerum suarum tutelam præparavit, ea illius evertendi ac pestem illi accelerandi causâ fuit: graviter enim vulgo offendit hac in urbem armatorum introductione: ad primum igitur Antonioti adventum civitas in armis fuit: conveneruntque in ædem divi Syri Antoniotus, Montaltus, & Petrus Fulgosius; qui ipse quoque ab exilio revocatus per ea tempora in patriam redierat: simulque conjuncti tribus armatorum millibus septi prætorium petunt, magnis clamoribus nomen populi & Antonioti Adornii in itinere subicientes: qui cum ad prætorium venissent, quod Guarcius, ut in illo exiguo spatio temporis potuerat, communiverat, illud oppugnare instituunt, portasque refringere, ac faces subdere parant, præfidiariis acriter primo resistentibus: tandem, cum oppugnantium multitudo subinde augeretur, Dux se imparem tanto certamini intelligens, prætorio adversariis cedens, in ædem divi Laurentii occultis itineribus se recipit: inde paullo post, navicula conscensa, urbe excedit; eo principatu relicto, sub quo tot egregiæ res gestæ sunt.

Quæ ambitio Guarci inimicos inter se conjunxerat, ea, illo principatu & patria pulso, eosdem inter se commisit: prætorio enim occupato, bifariam divisi sunt: ac Montaltus cum popularium principibus in inferius conclave, quod Abbatum habitationi assignatum erat, se recepit, ac de novo Duce eligendo agere cœpit. At Adornius, cum superiora occupasset ingenti multitudo clientium ac tenuiorum septus illum Ducem acclamantium, in solio ducali consedit, sceptro ac ceteris principatus insignibus arreptis: Fulgosio cum illo consentiente, vel in præsentia nihil repugnante: multitudo illum tam in ipso prætorio, quam tota urbe discurrente magnis clamoribus, lætisque plausibus, actinnitibus ex sacrarum ædium turribus Ducem acclamante: quorum tumultum strepitu spreto, ii, qui cum Montalto erant, Antoniotto frustra monito, ut cum ceteris ad consilium de Duce eligendo convocatum accederet, Fridericum Paganam recti exempli ac quieti ingenii civem eligunt. Qua re audita, Antoniotus cum suis mortem Friderico minitantibus in inferiora descendit: quorum furori Fridericus se subtrahens, in privatas ædes principatu repudiato concessit: quod idem fecerunt Montaltus & ceteri cives, possessione prætorii Antoniotto relicta: qui tamen Montaltus non deserit se: vir enim fortis & experientis animi postero die delecta sexaginta armatorum manu ful-

A tus, ædem divi Syri ingressus consilium principum civium vocat: qui auctoritate viri inducti, frequentes ad illum conveniunt; Adornii quoque odio stimulante, qui injussu consilii, principatum invadere ausus esset, ut hominem, in quo esset tanto fastigio animus par, illi opponerent, ipsum Montaltum Ducem eligunt; non quidem recusantem, aut retractantem, sed testantem, se principatum, quem tumultuum sedandorum ac Reipublicæ constituendæ causâ accipiat, rebus pacatis ac civitate in tranquillum redacta, non plus semestris spatium retenturum: missique sunt ad Antoniotum, qui consilii nomine hominem monerent, ut Montalto Duci rite creato loco cederet. Haudquaquam tantum pertinaciæ in principatu retinendo, quantum audaciæ invadendo Antoniotto fuit: audivit enim gravium & sapientium amicorum salubria monentium consilia; vocibus multitudinis illum retinere conantis spretis. Cessit igitur sine certamine: quod in tali ingenio multi mirati sunt. Ducique Leonardo, qui cum magno gravium ac primariorum civium comitatu in prætorium venit, sceptrum traditum est; cum ingenti civitatis & bonorum lætitiâ, sperantium hominis spectata virtute & consilio res civitatis in commodiorem statum perventuras: ad quam spem animos hominum erexit, egregio in ipso statim principatus initio clementiæ edito documento; Nicolao Guarco, ac fratribus, nonnullisque aliis exsulibus, à quibus sese multipliciter læsum putabat, in patriam revocatis, comiterque & honorifice habitis.

Nec vana spes fuit: quam nulla in re fefellit, præterquam in principatu ultra præstitutum diem retinendo: quæ tamen res in bonum publicum vertit: ejus enim virtute, vigilantia, consilio, multa civitatis vulnera sanata sunt: resque publicæ ita constitutæ, ut numquam pacatiore ac tranquilliore rerum statu civitatem & ditionem Genuensem usam constaret: nisi gravi pestilentia, qua noningenta capita singulis hebdomadibus absumpta dicuntur, conflictata esset: majoraque expectabantur, nisi insequenti anno ejus sæculi octogesimo quarto immatura mors cursum optimorum consiliorum interrupisset: quæ pestifera febris correptum tertio die post, quam in morbum incidit, sustulit; cum magno hominum bonorum mœrore, neque cum parvo externorum Principum, ad quos fama tantarum virtutum pervenerat, dolore: cum paullo plus annum curriculum in principatu fuisset: qui priora benefacta amplissimo dono cumulavit, sacro Sudario, quod domi compresserat, atque in ædium penetralibus religiose adservarat, Reipublicæ testamento legato, ejusque jussu in æde divi Bartholomæi reposito. Expressa est in eo imago Christi Domini ex illius sudore, cum os sibi eo linteo absterfisset: quod Regi Abgaro efflagitanti ipsum Dominum misisse sacræ Historiæ tradunt. Elatus est amplissimo funere, omnibus bonis, ac cuncta pene civitate luctu illum prosequente; centumque notariis, quibus honoratior ac propinquior feretro locus tamquam muneris conjunctioni debitus, assignatus est, longa bini ordinis ferie collegam honestantibus.

Initio ejus principatus, Jacobus Lusignianus, qui Genuæ in custodia adservabatur, Petro fratris filio Rege mortuo, absens in regnum Cypri successit: quem Dux, Magistratibus ac Senatu comitante, honoris causâ invisit: successionemque gratulatus, ac convivio & ludorum spectaculo honoratum cum decem triremibus ea de causâ comparatis & instructis, Nicolao Marruffo præfecto, in regnum misit; foedere cum Guarco paullo ante icto, quo Famagustæ imperium cum certa insuper pensione anniversaria Genuensi populo à Rege pendendaratum fiebat.

Indemortui Montalti locum Antoniotus Adornius

silentio; ac sine certamine successit: qui consilio, quod omne popularium civium fuit, & familia Montalti retenta, initia ducatus impotenter exercuit. Nicolaum enim Guarum, qui Antoniottum diversi à Montalto ingenii, virum multis de causis sibi iratum metuens, sub illius electionem urbe excefferat, in itinere à Marchione Finarii comprehensum, ac sibi insequentis anni initio à captante regnantis gratiam pravo exemplo traditum tetro carcere in arce Ericis opidi inclusit.

A. C.
1385.

Erat Antoniottus vir magni animi, ac magna spectantis, percupidusque famam nominis sui late propagandi: cui rei occasionem præbuit Urbanus sextus Pontifex maximus à Carolo Rege Neapolitano Nuceriæ obsessus. Vividum igitur ingenium, atque otii impatiens, quod tum summum & ab urbanis motibus & ab exteris expeditionibus Genuæ fuit, ad consilium magni moliminis, magnique splendoris adjecit, Pontificis è manu Caroli eripiendi; præter gloriam ac pietatis commendationem sacrosancti Christi Vicarii è faucibus infensissimi hostis erepti, duplicem inde fructum sperans; & civitatis adventu Romanæ Aulæ, diuturnaue commoratione ditandæ; & in societatem arbitrii de schismate tollendo, quo tunc Ecclesiæ res maxime concutiebantur, veniendi: quæ res perampla sibi & honorifica futura esset. Ea igitur de causâ decem triremes omnibus rebus instructas, Clemente Facio præfecto, in regnum Neapolitanum misit: qui Urbinæ præpotentis familiæ ope adjutus, Pontificem incolumem cum magna Cardinalium ac Romanæ cohortis parte è manibus obsidentium ereptum classè Genuam advexit: cum quo ducti sunt sex Cardinales consiliorum in Pontificem initorum participes, ac partes contrarias sequentes: quorum quinque jussu Pontificis saccis insuti miserabili ac fœdo spectaculo in mari demersi sunt; uno tantummodo Anglo precibus Procerum Anglicorum condonato. Ab eo omnibus precibus contendit Adornius, sese collegam adscribi arbitris ad res schismatis componendas electis: quod cum non impetrasset; ex ea re indignatione orta, Pontifex sub finem insequentis anni ejus sæculi octogesimi sexti, cum de nulla re inter ipsum & Adornium conveniret, Genua solvens, maritimo itinere Lucam petit: cum amplius annum Genuæ fuisset; ac prius æs alienum, quo Genuensibus ob paratam classem obstrictus erat, cujusque causâ opidum Cornetum illis oppigneraverat, dissolvisset: arce ac vico Plebis, opido Taurano, ac nonnullis vicis Episcopatus Ingauri, Bercerio vico, & arce Episcopatus Naulensis, opido Spotorno, & arce, nonnullisque aliis obscuri nominis vicis Episcopatus Saonensis, loco solutionis, pro summo jure sacrosanctæ potestatis in Ecclesiæ bona, Reipublicæ traditis: quæ etiam Respublica per ea tempora castellum Lermam imperio adjecit, à Violante Auria Brancaleonis filia & Donini uxore ejusdem familiæ hominis pretio emptum.

A. C.
1387. Pontifice profecto, sub initium insequentis anni ejus sæculi octogesimi septimi, insidiæ in Ducem, qui ad eum diem urbanis molestiis caruerat, detectæ sunt: cujus conspirationis qui capita fuisse dicebantur, Franciscus, Raphael, Leonardus Justiniani, Garibaldi fratres, urbe aufugerunt: captique sunt Nicolaus Bonaverius, Nicolaus Marruffus, Raphael Ponsonus, Jannottus à Mari, Thomas Pinellus, societatis consiliorum insimulati: qui extorti, cum in negando fortitudinem & constantiam adhibuissent, non tamen omnem pœnam fugerunt, ingentiæris summa atque exsulio mulctati.

A domesticis insidiis securus factus Antoniottus, honorifica paullisper intermissa consilia repetens, cum fama exiisset, Tunetanum Regem classem ad res Genuensium vexandas parare; prævertens ipse,

A Manfredoque Claramontio Siciliæ Halmirate in societatem armorum assumpto, duodecim triremes anno insequenti ejus sæculi octogesimo octavo in illum armavit: quibus Raphaellem fratrem præfecit: qui Genua solvens, cum Siciliam insulam apulisset; Claramontio cum octo triremibus, quarum tres ipse paraverat, quinque à Pisanis Ducibus conduxerat, sibi adjuncto, in Africam navigans, insulam Lothophagitin, nunc *Gerbim* appellatam, tenuit: cujus expugnata imperio veluti ex propinquo aptiore Claramontio cessit; sex & triginta aureorum millibus in compensationem traditæ insulæ ab illo acceptis: classequè opulentis spoliis captæ insulæ & tanta auri vi ditata, ovans Genuam rediit.

B At Antoniottus aliam ex alia causam suam & Genuensium nomen illustrandi quærens; intelligensque, Afros nullum finem facientes Christianas & Linguisticas res vexandi contundere, suarum ac civitatis virium non esse; animo ad amplum consilium adjecto, in externam opem confugit; Oratoribus ad Carolum sextum Gallorum Regem missis: cujus legationis princeps longa & luculenta oratione Gallorum laudibus referta, Regem ad eam expeditionem suscipiendam ipsius Majorum exemplo hortatus est: qua oratione permotus Rex, Genuensium pietate & religionis studio laudato, expeditionem decrevit. C Eam orationem Paullus Æmilii libro nono *Historia Gallorum* ab ipso conscriptæ inclusit. Summa imperii delata est ad Ducem Borbonium, unum ex Regis patris. In eam militiam ingens multitudo Gallorum Procerum certatim nomina dedecrunt. Idem Angli fecerunt, cum æmulatio tanti decoris ad eos transisset: eaque de causâ induciæ inter utramque nationem factæ sunt; cum odia ac contentionum causæ tum, ut cum maxime, inter ipsos vigerent: adeo illorum temporum pietas ac religionis studium ceteris omnibus rebus prævertere solebat: magnumque hoc, non in Liguriam modo, sed in universam Christianam Rempublicam Antoniotti promeritum constat: ejusque nomen duplici est titulo insigne; & sacrosancti Pontificis è manu hostium erepti, & Sarracenorum ferociæ compressæ: cujus instinctu Galli eam expeditionem susceperint: qui, ne bene procedentia consilia sedula diligentia ac vigilantia sua inchoata ipse moraretur, interea florentissimam classem quadraginta triremium ac viginti ingentium onerariarum, omnibus necessariis rebus affatim instructam comparavit: cui præfecit Joannem Centurionem Ultramarinum affinitate sibi conjunctum: five ea gens tum inter populares familias censetur; five ea in re Antoniottus privatam necessitudinem, legibus Nobilium Factionem ab omni honorum & publicarum procurationum genere arcentibus, eximiam fecit: quas ceteris in rebus diligenter observavit; cum nulla publica, aut bellica, aut civilia munera hominibus ex Nobilium Factione mandaret; neque in quindecim viris, qui illi in consilio assidebant, quemquam nisi è popularium corpore admitteret.

E Igitur Proceres ac Duces Franci & Angli, cum terrestri itinere Genuam venissent, parata classè conscensa, Africam petunt: quam cum incolumes tenuissent, ad littora Tunetana copiarum non sine certamine expositæ sunt: cum ingens Barbarorum multitudo ad exscensum prohibendum frustra accurrisset, à sagittariis Anglis, in quo teli genere ea gens maxime excellit, repulsa. Id fuit belligenus; ut Tunetanus Rex bipartitarum copiarum dimidium præsidio urbis reliquerit, ipse cum reliquis prope ab urbe confederit, castraque valido munimento firmavit: iisque sese continens Christianis invadentibus nullam pugnandi copiam faceret, haudquam sapiens consilium ratus, se ac regnum in tantam aleam præcipitem dare. Multis autem iniquitatibus Christiani premebantur: cum Arabes equi-

equites Christianorum cataphractos, ac gravem armaturam stabili pugnae, quam excursionibus aptiorem, ipsi leves & veloces modo à lateribus, modo à tergo adorirentur: ac modo instantes, modo fugientes, modoque territantium, modo paventium speciem praebentes, pugnam potius eluderent, quam committerent: annonamque & cetera omnia, per circumjectam regionem discurrentes, Christianis, qui obsessum venerant, quam ipsis obsessis artiora facerent. Igitur Christiani, cum Regem ad justam pugnam attrahere saepe tentassent; nullusque esset cum Numidis ludificantibus levium praeliorum fructus; omnem vim belli, omnis regis castris, in urbem vertunt: idque erat oppugnationis genus, ut, si omnibus copiis urbem invaderent, Rex ipsos in urbem versos à tergo adorirens detrimentis afficeret: ut partiendae curae fuerint, copiaeque dividendae; quarum altera pars moenia tentaret, altera in exteriorem hostem versa, Regis impetum exciperet.

Hoc belli statu praefectus Tuneti enisis precibus cum Duce Christiano egit, ut ad colloquium venire ne gravaretur. Morem gessit Dux: firmoque delectorum comitatu septus extra aciem procedit: propinquum moenibus factum, praefectus ex muro ita allocutus est: *Si causam, quae vos Gallos & Anglos nullis à nobis injuriis laesos, nullisque contumeliis laceratos impulit, ut mare trajicientes nos oppugnatum veniretis, scirem; tacitus, sive eam causam justam, sive injustam censerem, eventum belli expectarem; eo Deum immortalem victoriam daturum sperans, quod jus staret: ceterum cum nullam causam tanti hujus vestri motus divinare possem, colloquium tuum, Dux inclite, expetivi; ut illam ex te cognoscerem: quam si tu proferre non gravaberis, tum nos, si eam judicabimus, quae merito vos ad arma nobis inferenda induxerit, satisfacere vobis de injuriis, ac praeferitas culpas emendare parati sumus: quam rem ne vos quidem respicere debetis, vobiscum reputantes, quam incerti sint bellorum exitus; neminemque sapientem, quod certum & exploratum, rebus amicabiliter compositis, sine certamine obtinere potuit, id per vim dubio eventum, mille discriminibus sese ac suos subjiciens, extorquere maluisse: quamquam imperare animo nequivi, quin hoc quoque adjicerem, quod te non nihil pungat: equum enim fuerat vos a perpetuo gentium more non discedere, ac, si qua in re à nobis vos laesos putabatis, id prius nobis demonstrare, atque injurias factas per Legatos conqueri, res ablatas repetere: quod si nos à vobis moniti, in officio non fuisset; tum causam vobis nos justo ac pio bello persequendi dedisse ab omnibus censermur: quam rem à magnis & claris civitatibus ac maximis Regibus fieri solitam cum vos omiseritis; culpam, quae tum in nobis de injuriis non satisfaciendis habisset, in vos injuriam facientes translatam quo modo à vobis removeatis, vobis videndum est.*

Ad ea Borbonius, *Ni ea, inquit, praesens vestra fortuna esset, quae huic suspicioni locum non det; arbitrarer, te nos potius ludificandi causa, quam de rebus belli serio agendi hoc colloquium petiisse: adeo futilia, ac ridicula, ac vix pueris digna commenta protulisti. An ulla gravior & justior causa nobis arma adversus vos inducere potuit ea, quam vos nobis continenter praebetis, Genuensium rebus assidue vexandis, commerciaque illis infesta faciendo? cujus civitatis nobis non modo ejusdem religionis necessitudine, sed societate quoque armorum perpetuo conjuncta; ac sine cujus classibus nullum fere bellum adversus religionis nostrae hostes suscepimus, nec vero suscipere commode potuisset; defensionem non minus suscipere debuimus, neque minus de illius, quam de Lutetia & Londini salute & commodis laborare: at etiam de jure & de perpetuo gentium more in bello prius denunciando, quam inferendo mentionem facere non pudet: cujus perfringendi non nos hoc bello, sed vos ipsi aucto-*

res fuistis: qui bellum adversus Genuenses, non à denunciatione armorum, neque à rebus per feciales repetendis, sed ab illorum rebus rapiendis orsi estis: vestrum in vos exemplum versum est: neque nos, sed vos ipsi bellum vobis movistis. Injuria sociis nostris facta feciales fuerunt ad bellum, ad quod nos omnia alia cogitantes ipsi attraxistis, vobis indicendum. Quid est igitur aut magis ridiculum, aut minus ferendum, quam quod in vos valet crimen, id in nos conferre? ac juris disceptationem querere, neque interea ab injuriis faciendis abstinere? si justam in vos concitatum iram mitigare, si excidium imminens à vobis amovere cupitis; id non fucis istis vestris, sed sociis nostris omittendis, ac de injuriis re, non fallaci oratione, satisfaciendo, assequendum est. Haec à Borbonio pronunciata sunt, non minus pacis quam Barbaris cupido; difficultates belli cernente, atque annonae inopiam formidante.

Hoc igitur initio colloquiorum facto, brevi res convenit: haecque sunt scriptae conditiones pacis: *Sarraceni ac Tunetani à Christianis incursionibus suis vexandis, littoribusque tam Liguria & Provincia Narbonensis, quam ceteri Mediterranei maris, atque interjectarum insularum abstineant: captivos omnes Christianos reddant: decem aureorum nummum millia praesentia illico numerent: finibus Africa sese in posterum contineant. Quibus rebus à Barbaris haud retractanter factis, classis Genuam reversa est; Christianis Proceribus vectis: qui pleni gloriae, rebus feliciter & celeriter confectis, terrestri itinere in sua se receperunt.*

Nec vero Antoniottus ita bellicis expeditionibus intentus fuit, ut cetera negligeret; ac non partem curarum in ditionem Genuensem amplificandam conferret: nam praeter loca à Pontifice data, ac Lermam, ut paullo ante scripsimus, acquisitam, emit de Marchionibus Saluciarum, Carrettis, & Clavessanae, Plebem Teicii, nonnullaque opida, ac vicos vallis Arociae; de Carolo Flisco validum opidum Varisum; de Morruello & Georgio Grimaldis non obscuri nominis castellum Stellam: ad hoc ejus opera celebre opidum Novae, quod Mediolanenses Principes occupant, ad Rempublicam rediit: praetorium perampla aula auxit & ornavit; cum numquam segne tempus tereret, sed omnibus rebus invigilaret, occurreret. Omnino nemo ea aetate fuit, in quo essent majora, aut plura naturae & industriae bona: ingenium vividum, callidum, follers, magnum consilium, celsus ac sublimis animus, nihil humile aut sordidum, nihil non magnificum & amplum umquam agitans: cibus ac potus parvus, somnus modicus, tempora numquam otio, sed partim rebus agendis, partim litterarum studiis data. Tantarum laudum una omnino exceptio fuit, immodica ambitio, regnandique cupido, perpetuum praeclearorum ingeniorum vitium: quarum laudum gloria illis temporibus ita eluxit; ut fama late perlata magnum illi nomen, magnamque auctoritatem, & venerationem apud exteros Principes collegerit, multique controversiarum arbitrum illum fumerent: in quibus fuerunt Joannes Galeacius Dux Mediolanensis, & nonnullae ex principibus Italiae civitatibus foedere inter se adversus illum conjunctae; Florentia, Bononia, Patavium, illarumque focii populi: inter quos de magnis rebus ambigentes, Magni Magistri Hierosolymitanæ militiae Pontificii Legati collega pacem composuit.

Quae tamen tot ac tam eximiae virtutes, totque egregia in Rempublicam merita haudquaquam tantam vim habuerunt, ad clarum virum in principatu retinendum, quantum execrabilia Factionum studia ad eum illo exigendum: insequenti enim anno ejus saeculi nonagesimo, consilia contra Antoniottum diu ante concocta, quorum Petrus Fulgosi auctor fuit, emanarunt: quae primo sine effe-

ctu fuerunt, Petro ab Antoniottu, cui res suble-
verat, capto; compluribusque primariis civibus par-
ticipibus consiliorum, qui fuga ex urbe periculo se
subtraxerant, veluti perduellionis reis exsilio mul-
ctatis. Antoniottus igitur tot civium contra se con-
spiratione, præter omnem opinionem suam percul-
sus, ad hoc plebis mobilitati diffidens; cum inter
ancipitia consilia, Petri vel tollendi, vel dimittendi,
incertus animi diu fluctuatus esset; hinc nimis se
offensurum apud magnam plebis partem, atque uni-
versam civitatem in illius favorem versam timens,
si hominem sustulisset; illinc periculosum censens,
tam potentem inimicum, tamque acrem virum, no-
va præsertim contumelia irritatum dimittere; ad
hoc non se satis adversus tantam in se intentam ac
subitam molem paratum sentiens; consilium tandem
capit haudquaquam pro cetera sua ferocia, animi-
que magnitudine nullis umquam adversis rebus fra-
cti, inimicis, ac temporibus cedendi: quare simu-
lans se in hortos suos suburbanos animi causâ sece-
dere, porta divi Thomæ urbe egressus, triremi Con-
radi Auria ea de causâ parata clam conscensa, prin-
cipatum simul & patriam relinquit, Antonium Ju-
stinianum longum secum ducens; metu ne vir ma-
gnarum opum, magnæque potentia, ad hoc magnæ
apud populum auctoritatis & gratia, Dux eligeretur:
cum nollet acrem & tanto fastigio parem ani-
mum, principatum sibi repetenti oppositum habere:
quem tamen, Duce novo creato, atque eo metu li-
beratus, paullo post dimisit. Is fuit Jacobus Fulgo-
sius Dominici Ducis filius; Petro præterito, cujus
acriores & vehementiores spiritus magis formidolosi
civibus essent. Hæc electio silentio facta est, raro
illis temporibus exemplo; cum discessu Antoniotti
cognito, nonnihil tumultuatum esset, totaque ci-
vitas novam rem, atque à tali ingenio, talique animi
robore minime expectatam, admirata, in armis fuisset:
qui tamen tumultus statim conticuit: novusque
Dux civitatis studiis obsequens, legibus præscriptis
sefe subijci passus est, quibus Antoniottus solutus
fuerat.

A. C. 1391. At Antoniottus subiti consilii poenitens patriam
repetere decrevit: quare eadem, qua venerat, trire-
mi, insequenti anno ejus sæculi nonagesimo uno, Saona
urbe solvens Sextum opidum tenuit, (ita credo
appellatum, quod ad sextum ab urbe lapidem si-
tum sit) petiitque sese in civitatem, ut unum pa-
catum civem recipi: quam rem impetrare non po-
tuit; cum tamen de ea magnis contentionibus inter
amicos Ducis acta esset; multique illi auctores
essent, ut illum omnino reciperet: talis viri præ-
sentiam in omnes partes ipsi præsidio futuram: si-
ve enim Guarci, præpotens gens, à qua non minus
quam ab Adornis sibi timendum esset, quidquam
moverent; Adorniorum potentiam eo beneficio sibi
devinctam illis oppositum: si ve Adornii contra
illum insurgerent; facilius Guarcorum auxiliis se-
ptum illis restitutum: ita perlibratis illarum familia-
rum potentia momentis, ipsum inter illos medium
tutius regnaturum. Igitur Adornius spe, qua vene-
rat, frustratus, contumeliaque exacerbatus, prio-
ribus animis repetitis, atque imbecillitate Ducis,
ingenioque encervato spreto, principatum sponte de-
positum, vi, si nulla alia sit via, resumere consti-
tuit: quare retro, unde venerat reversus, delecta
ostingentorum armatorum manu in circumjecta re-
gione coacta, cum iis copiis ad urbem contendit:
atque ad litus sancti Petri arenæ confidit: in quo
nonnullos dies fuit, ignavo Duce sedente & inspe-
ctante, nihilque adversus Antoniotti conatus contra
comparante. Tandem Antoniottus, rebus per oc-
cultâ colloquia cum amicis & suarum partium ho-
minibus compositis & constitutis; armatis, quos du-
xerat, septus, urbem, nemine obsistente, ingre-
ditur: cum Dux non modo ipse se cum clientibus

A non opposuisset, sed submissa à Carrettanis Marchio-
nibus auxilia, quæ ad idem sancti Petri arenæ litus
usque perrexerant, repudiasset, gratiisque actis in
sua se recipere jussisset; pavido animo ac studiis lit-
terarum dedito, otiique amante, omnem conten-
tionem horrente. Quo impedimento amoto, Anto-
niottus postero die cum magno clientium & extero-
rum stipendio conductorum numero armatus, præ-
torium petit; Fulgosio prius per nuncium monito,
ut possessionem sibi vacuam præberet: prætorium
ingressus, scepro arrepto, Dux ab omnibus salu-
tatus est; Fulgosiusque comiter in convivio acceptus,
domum cum honorifico comitatu ab eo dimissus.

B Eo anno Saonenses defecerunt; duabus arcibus,
quæ in ea urbe à Genuensibus tenebantur, captis,
ac præfectis Genuensibus expulsis: indignati, quod
Dux Signinis ab ipsis bello petitis, ut illorum opi-
dum sibi subjungerent, validum subsidium cum
triemi misisset: quo firmati Signini, Saonenses
cum clade ac cæde nonnullorum ex ipsorum prima-
riis repulsi. Arrepta est ea occasio ab inimicis
Ducis, illum lacerandi, multitudinemque occul-
te incitandi; illius culpa Saonam amissam dictan-
tibus, qui nimia ambitione elatus, sese privato consi-
lio, neque civitatis voluntate & sententia exquisita,
rebus, quæ nihil ad Rempublicam attinerent, in-
terponendo, pacatos Saonensium animos suis injuriis
C irritatos ad necessitatem deficiendi adegerit: princi-
patum ab ipso iisdem artibus exerceri, quibus par-
tum sit; Regis hæc & dominantis esse, non Magi-
stratus liberum populum regentis: quos sermones ut
comperceret Dux, cum res ad motus & seditiones
spectaret, duos popularis corporis cives liberius locu-
tos, tamquam seditionem commoventes, ac res
novas molientes, capitali supplicio affecit; Petrum-
que Fulgosium in opido Novis in carcerem conjici
jussit. Hæc eo anno.

A. C. 1392. At insequentis initio ejus sæculi nonagesimi secun-
di de cive quodam ex Nobilium Factione, (cujus no-
men æque ac duorum superiorum ab Annalibus file-
tur) insimulato, ac comperto, quod contra ipsum ac
principatum suum occulta consilia suscepisset, idem
supplicium sumpsit. Majorum motuum causâ fuit
Benedicti Vialii Jurisconsulti comprehensio. Is, cum
Duci vehementer suspectum sese fecisset, à Duce vo-
catus totum fere diem una cum Antonio fratre Epi-
scopo Saonensi cum Duce fuit. Longi inter illos
habiti sermonis is exitus fuit, ut Benedicto egressu
urbis à Duce interdictum sit, domiciliique & custo-
diæ locus, quo se contineret, ædes Emanuelis Gril-
li communis amborum amici circumscriptæ sint: ce-
terum cum ille nonnullis post diebus, si ve relaxan-
di animi causâ, si ve alia animo agitans, urbem egres-
sus in suburbanum ejusdem hospitis secessisset; ma-
gnusque amicorum numerus eum officii causâ salu-
tatum accessissent; re cognita, Dux vehementer
E exarsit, hominemque comprehensum, in poenam
spreti imperii, in arcem Ericis in carcerem misit:
in quo paucis post diebus tædio & mœrore animi
confectus decessit: cum haud multo post Vialium,
in eundem carcerem Jacobus quoque Fulgosius, qui
ducatu cesserat, missus fuisset. Dolo amissi fratris
ardens Antonius Episcopus, in proxima loca Fli-
scorum ditionis se confert. Enimvero Flisci occasio-
ne consiliis Nobilitatis apta læti, hominem non mo-
do comiter & honorifice, sed cupide quoque acci-
piunt: quem sua sponte irritatum ipsi ultro in An-
toniottum, ejusque impotentem dominatum accen-
dunt, sua omnia ad illum prolixè deferentes: quo-
rum promissis confirmatus Episcopus, sexcentis ar-
matis ab illis acceptis, urbem ingreditur: cum quo,
animis tandem nudatis, studia & societatem conjun-
gunt Baptista Buccanigra Simonis primi Ducis fi-
lius, & Ludovicus Guarcius; cum sua sponte Anto-
niotto infensi, tum Nobilium, qui ditiones & do-
mina-

minatus in circumjectis regionibus possidebant, perpetuum morem suum discordias inter popularis corporis cives ferendi & alendi retinentium occultis consiliis imbuti, ac spe illorum favoris incitati. Ii omnes, magna clientium copia corrogata, in aream ante ædem divi Francisci ex multis urbis partibus conveniunt: adversus quos Antoniotus, animo statim à primo pavore collecto, prævalidas armatorum centurias mittit: quæ cum pluribus agminibus diversis viis in aream arcis Castelleti convenissent; acre prælium subito commissum est: quo tandem Adorniani superiores fuerunt; adversarii in fugam coniectis, ac Ducibus captis; quorum varia fortuna fuit: nam Episcopus in urbe Naulo à Duce tetro carcere est inclusus; illiberaliterque, ita Duce jubente, in illo habitus: Baptistæ Buccanigræ certus exsulii locus definitus: Ludovicus Guarcus, vulnere in crure accepto, è manibus inimicorum elapsus, Rhodum se contulit.

Domesticis inimicis disiectis, Dux copias, quas habebat, in Nobiles motuum auctores vertit: Raphaelemque fratrem cum septingentis equitibus & duobus peditum millibus adversus Spinulas mittit: cum non minus astu quam aperta vi agens, callidus artifex viam sibi in animis nonnullorum ex gente Spinula subjunctis pretio emptis præmunivisset. Raphael parvo certamine Buzalla, Burgo Fornariorum, Ronco, primo adventu Reipublicæ Genuensis nomine occupatis, revertitur: Duxque paullo post, arce & opido Saviniono Fliscorum ditionis, custodum prodicione pretio & promissis corruptorum, potitus est: qui instantes motus providens, prætorium validiore munimento firmare ac copias augere instituit. Diversus exitus Turriliæ ejusdem gentis Fliscæ opidi fuit, frustra à Raphael vi & armis tentati: quem Dux ea de causâ miserat, ab Antonio Flisco ejus opidi Domino irritatus; qui contra ipsum arma sumpserat, ac montem usque Fasciam cum trecentis armatis irritò incepto perrexerat, sperans sese adventus sui fama aliquid moturum.

Cum consilia Nobilibus per Vialium, & Guarcum, ac Buccanigram socios, non processissent; nihil non tentatum relinquentes, ad Montaltos se convertunt: quos eorundem auxiliorum suorum spe contra Antoniotum incitant, qui curas inter se partiti sunt. Antoniusque Leonardi Ducis filius, adolescens impiger ac cupidus, cum patris suis Turriliam petit ad promissa auxilia accersenda. At Martinus Jurisconsultus, affinitate, qua Antoniotto conjunctus erat, spreto, sororis illius filius, ad seditionem commovendam in urbe substitit: qui, Clemente Promontorio præpotente ac non contemnendarum opum homine sibi adjuncto, simulque cum illis ingens numerus popularis corporis civium Guelphæ Factionis (non enim tot postea subortæ Factiones ejus Factionis memoriam plane extinxerant) in ædem divi Syri noctu conveniunt: qui multa de Antoniotto dejiendo colloqui; insequentie die porta sancti Andreae infesta, nonnullas leges ad auctoritatem & potentiam Ducis infringendam ea nocte compositas, circummissis præconibus, tota urbe pronunciarunt: ceterum cum ab iis, quos corrogant, deserere inciperent, neque Antonius, cujus sperem fuerant ingressi, compareret, animis concidunt; Ducemque validis copiis armatum metuentes, ad eum mittunt, supplicibus precibus postulantes, ut tutum aditum ad veniam petendam accessuris, pro sua humanitate, dare ne gravetur. Postulatis annuit Adornius: cumque diploma scribi cœptum esset, ecce Antonius cum copiis à Fliscis acceptis, ingentique Antoniotti inimicorum agmine, magnoque plebejorum numero illi adjuncto, ipsius nomen magnis clamoribus subjicientium, cum fratribus in urbem perripit. Subita re vehementer percussus Antoniotus, omisso diplomate, quod scribebatur,

A tantæ in se intentæ moli cedens, trepida fuga in cœnobium sancti Dominici se recepit: insequenti nocte, non exigua amicorum & clientium manu comitante, urbe excessit: posteroque die Antonius ætatis annum vigesimum tertium agens, cum memoria clari parentis, tum egregia indole, à qua multa præclara sperabantur, commendatus, summa cum civitatis lætitia, miro omnium consensu Dux renunciatur: posteroque die, ne minus firma creatio videretur, per tumultum ac multitudinis acclamationem facta, à consilio sexaginta primariorum civium, omnium è popularium corpore, ducatus illiratus factus est: qui primam ducatus commendationem à re incertæ existimationis duxit, Spinulis enim & reliquis Nobilibus castella & loca ablata restituit: quod quamquam per consilium civitatis fecit, cum nemo in consilio voluntati regnantis palam refragari auderet; nec bono publico privatam perniciem sibi conflare vellet; varios tamen ea res privatim sermones præbuit: aliis gratum animum erga eos, à quibus esset adjutus; ad hoc æquitatem viri, qui injuste ablata veteribus Dominis restituisset, laudantibus; aliis Antonii factum vehementer improbantibus, qui privatam beneficiorum gratiam de publico remuneratus esset; neque æquitate aut justitia adductus, sed studio dominatus sibi iisdem opibus stabiliendi, quibus illum pepererat, ad prævum consilium descendisset: neque enim ea opida & loca injuste Nobilibus ablata videri posse: neque debuisse Montaltum justo bello parta, ac juris publici facta, ambitiosa largitione à Republica alienare: quod etiam, omiſſa juris disceptatione, ingenti malo publico factum sit: neque enim è Republica esse, privatos cives tot populorum dominatum ipsis cervicibus civitatis imminentem possidere: talibus enim opibus fultos Nobiles æquabilitatem juris cum ceteris civibus ferre non posse, nimiosque sibi spiritus fumere; ac propterea omnia discordiis, contentionibus, turbis, seditionibus miscere; omniumque malorum publicorum ac bellorum denique civilium causam & auctores esse: civitatem à domesticis motibus & cladibus numquam quieturam, quoad Nobiles eos dominatus possideant, qui eos ceteris civibus formidolosos faciant: ac propterea ea ablata non modo illis non restituenda; sed occasiones quærendas, oblataſque arripiendas, iis, quæ adhuc teneant, illos exuendi: privatos hos dominatus iis civitatibus convenire, quæ sub Regibus sunt, at in liberis haudquaquam ferendos: sapientissimos complures Legislatores, in quibus is ipse fuit sanctissimus ac Deo immortalis tam acceptus Vates Moses, legibus agrariis latis, privata prædia æqualiter inter cives dividi voluisse, eamque divisionem statis temporibus renovari; nec quemquam unum majorem agri modum, quam alterum possidere; quæ res esset concordie civitatis distrahendæ: nedum sanctus Vates & Legislator ille, quique illius exemplum & auctoritatem in legibus condendis secuti sunt, paterentur, cives castellorum & opidorum dominatu fulciri. Quam disputationem haud ab re hic inferendam duxi, quod finis historiam scribentis sit, non tantum res gestas nuda ac simplici narratione complecti; animosque legentium jucunda illa rerum varietate tenere, (nam hoc fortasse Poetarum fuerit) sed utilibus exemplis lumen civibus suis in Republica gerenda, & in consiliis de dubiis rebus capiendis præferre: quæ exempla majorem profecto vim ad homines erudiendos habent suis momentis, ab ingeniosis, & acutis viris, rerumque gerendarum usu & scientia præditis, quam nudis verbis proposita.

Sequitur annus ejus sæculi nonagesimus tertius; A. C. quo, & duobus insequentibus, res urbanæ tumultuosiores fuerunt, aut pluribus motibus agitata, crebrioribusve Principum mutationibus

bus obnoxia: quas nunc persequi pergam. Antonii igitur creatio, quæ lætitiæ ceteris fuit, unum, quem minime decuit, Martinum Montaltum arta cognatione illi conjunctum angebat: qui indignatus, atque ægre ferens, adolescentem sibi confirmatæ ætate viro prælatum, ad amicitiam Antonioti se contulit, perpetuo atque infito humanis ingeniis vitio, ut externis & hostibus se potius applicent, quam suos sibi prælatos ferant; insidiasque Antonio struere cœpit: quæ cum inter tot consiliorum participes occultæ diu esse non possent, detectæ, Antonium ceteroqui miti ingenio ad necessitatem hominem carceribus includendi adegerunt: quibus illum liberare non potuerunt nonnulli apud clientes extra urbem variis de causis ætatem agentes; cum re audita ducenti circiter numero promontorium usque capitis Phari perrexissent; inde à Raphaele Ducis fratre repulsi & in fugam coniecti.

Per quod tempus ne res quidem oræ Ligusticæ à domesticis motibus quiescebant; cum in opido Rapallo Eduardus à Turri Factionis Gibellinæ princeps ab exsilio reversus, tumultu concitato, Guelphos adversarios opido expulisset, eorumque bona diripisset; paulloque post Guelphi Nicolai Flisci opibus subnisi, parem cladem Gibellinis reddidissent. Montaltorum inter se discordiæ animum Antonioti nullis occasionibus indormientis ad spem principatus repetendi erexerunt: in quo consilio hominem confirmarunt Galeacii Principis Mediolanensis adhortationes, omnia auxilia large ad illum deferentis; sive ille veteri amicitia Antonioti crebris ac mutuis officiis perpetuo ab ipsis culta indutus, hoc fecit, sive cogitationi de rebus Genuensibus numquam depositæ adjumenta longe præmoliens; haud dissimilem eventum ex illorum discordiis exspectans à temporibus Joannis Archiepiscopi patru.

Igitur Antoniotus Venetiis, quo se patria extorris contulerat, eumque sibi exsiliū domicilium sumpserat, profectus, per fines ditionis Mediolanensis Vulturem opidum usque perrexit: cujus adventus vehementer inimicos perculit: cum præsertim Dux lente, neque satis pro ipsorum ardore, se ad defensionem compararet: qui cum animum primo illo pavore confopitum acribus amicorum stimulis incitatus tandem collegisset; hostem, qui ad portas civitatis excurrebat, audaci eruptione aggressus, ipso impetu fundit ac fugat, Christophoro Antonioti filio capto; cum pater è manibus Montalti sese in ditionem Carrettanam recepisset.

Neque tamen Antonioti fuga res civitatis quieverunt, aut Antonius molestia liberatus est: quem tumultus & seditiones circumjectarum vallium incolarum diu exercuerunt: qui arrepta sub Antonioti adventum arma, illo fugato, non modo non deposuerunt, sed direptionibus & incendiis per circumjecta urbi ædificia, atque amœna civium suburbana grassantes, omnia tumultibus implebant: quos sæpe à militibus contra illos missis repulsi, illis in urbem reversis, crebro integrarunt: cum Raphael Ducis frater, vulnere in crure accepto, tumultuantibus haudquaquam compressis, in urbem reversus esset. Ceterum hæc leviora: illa longe major fuit moles, quam reliquæ Factiones, Adornio repulso, conjunctis studiis illi intenderunt; quarum principes Genuæ tum erant; majorem vim regnandi cupiditate ad illos in eum incitandos habente, quam ad comprimendos Ducis clementia, & mansuetudine, egregioque in ipsos promerito: qui non sibi illorum exsilio, contra perpetuum usurpatum morem novum principatum adipiscentium, ab illorum insidiis cavisset.

Ab altera igitur parte Petrus Fulgosius, cumque illo Nicolaus Zoalius, magnæ potentia ac

A magnarum clientelarum civis, ingenti hominum multitudine armata, ad ædem divi Syri consistunt: ab altera Ludovicus Guarcus & Episcopus Saonen-
B sis magno impetu prætorium invadunt: quibus Dux & fratres, cum delecta stipendia facientium manu, quam habebant, ac non exiguo partium suarum studiosorum civium numero, acriter resistunt: quo prælio maxime accenso, Fulgosius, non tam Montalti opprimendi voluntate mutata, quam faciliorem viam sibi ad principatum fore ratus, si ipse, dejecto Montalto, in prætorio fuisset, in illud se cum suis contulit: Montaltoque se per speciem opem ferentis adjungit. Pugnatum est
C diu & acriter, cum Dux ac fratres discriminibus sese offerentes, nihilque sibi parcentes, in media pugna mole audacter versarentur: tandem adversarii fugati & profligati sunt: cum magna illorum cædes fieri potuerit, ni mitis Ducis animus in parcendo civium sanguini, conjunctionis ejusdem patriæ atque ingentis humanitatis, quam studii partium, magis memor fuisset.

Vix prima periculi procella discussa erat; cum ecce Clemens Promontorius, eminentium opum ipse quoque vir, magnisque clientelis fultus, recentiprælio Ducem fessum sub vesperum cum mille armatis magno impetu invadit, atrociusque prælium quam superius commissum est; Promontorianis ingentem vim telorum instar creberimæ grandinis ingerentibus: ut Montaltus ac fratres prætorio cedere coacti sint; ac per Auriarum amicorum domos in privatas ædes se recipere: cujus discessu prætorio vacuo relicto, Petrus à suis in folio ducali repente locatus, sceptroque tradito, Dux acclamatur: ceterum Promontorianis nihil de contentione prælii remittentibus, impar statim ipse quoque cessit; Clemensque magna cum lætitia illico à suis Dux conclamatus est. Molestus vulgo fuit, & præsertim Antonioti inimicus, cujus studiosus habebatur, Promontorii principatus, iis artibus partus: quare in ædem divæ Mariæ à Vineis maxima civium pars convenientes, duodecim cives ex primariis eligunt; potestate amplissima illis mandata Reipublicæ constituendæ, ac civitatem pacandi: qui Clementem prius frustra monitum, ut principatum, per vim ac nullo jure partum, illico dimitteret, populo in illum armato, ex prætorio ejiciunt: civitasque in varias sectas ac voluntates distracta est; aliis alio tendentibus: cum non satis in tantis tenebris constaret, quid sequerentur, quod potissimum consilium caperent: cum multi Montaltum Ducem reposcerent, morum suavitate atque ingenii mansuetudine à sanguine abhorrentis, inducti; multi alterius nomen subjecerent; neque
E exigua pars in Principem Mediolanensem, aut alium alium exterum dominatum inclinaret. Tandem duodecim viri in prætorium convenientes, post varias disputationes, Franciscum Justinianum annum Ducem eligunt, recti exempli ac magni nominis civem; ad hoc quieti ingenii, pacisque & concordie amantem hominem.

Nec tamen res civitatis quieverunt: cum Antoniotus Adornius, validis copiis ab Joanne Galeacio acceptis, ex Insubria movisset; cujus motus cognitus ingentem trepidationem in urbe fecit. Antoniotus fines Genuenses, Duce invito, ingressus, Vulturem usque perrexit: cum quo Antonium
F Montaltum, qui urbe numquam exierat, occulta consilia conjunxisse suspicio fuit. Is vir, ceteroqui pius atque integro ingenio, cum juventutis ardore ac potentia familiæ elatus, tum experta dulcedine principatus captus, privata vitæ afluere non poterat: contra quem, ejusque & Adorniorum partes sequentes, Buccanigra & Episcopus Saonen-
lis, non plus triginta ipsos comitantibus, in foro mercatorio insurrexerunt: prælioque commisso, mul-

multis ex utriusque sequacibus accurrentibus, ac numerum suorum pugnantium augmentibus, atrox praelium esse coepit: in quo tandem Montaltani victores fuerunt.

At quattuor Nobilium Factionis praepotentes familiae, quae, velut voluntario exulio sibi ipsis indicto, in opidis & vicis, quibus dominabantur, urbi circumjectis aetatem agebant; occasione principatus recuperandi ex discordiis popularium arrepta; per speciem, laboranti Magistratui opem ferendi, ac publicae quietis perturbatores compescendi, arma induunt; principesque Spinulae, mille quingentis armatis corrogatis, iter ad urbem intendunt: cumque ad montem usque, quem Peraltum incolae vocant, processissent, consistunt, adventum Fliscorum haud contemnendum armatorum numerum ducentium expectantes; ut conjunctis viribus adversarios invaderent: ceterum Factionis Adornianae homines, quae tum omnium potentissima erat, ac non modo ceteris Factionibus, sed ipsis quoque Nobilibus formidolosior; cum metu detrimenti accipiendi commoti, tum veteri Nobilium perpetuorum hostium suorum odio incitati, praeventendum rati; viribus ac copiis firmati, urbanisque contentionibus paullisper intermissis, ad Nobiles contendunt; Spinulaeque, cum ad locum, ubi illi subsisterant, pervenissent, magno impetu invadunt, ac longe viribus superiores ipso incurfu fundunt, & in fugam conjiciunt. Qua re audita, Flisci, itinere, quod jam coeperant, retro repetito, in sua revertuntur.

At Dux, taedio molestiarum, neque satis virium esse cernens in ducatus majestate ad mala civitatis sistenda, neque se quidquam proficere in tanta rerum omnium colluvione, intelligens, inviso principatu abiit: quae res in civitate summo rectore orbata, metum & trepidationem auxit; ut omnes, tamquam excidio urbis imminente, consilii inopes pervias & plateas civitatis discurrerent: quaeque cariora habebant, in aedes sacras, ac sacra coenobia, tamquam religione locorum tutiora futura, comportarent; resque funditus ruituras fuisse, multi crediderint; ni Montalti virtus, quae diu quieverat, rebus ad iniqua inclinatis subvenisset: ad quem ceterarum Factionum capita, ceteris omnibus omis- sis, sese applicarunt; ut communi ac potentiori hosti, cui singuli pares non essent, communibus viribus resisterent: qui tamen delectam trecentorum manum ab Antoniotto missam ab ingressu urbis per portam divi Stephani prohibere non potuerunt: quae res Antoniotto viam expedit, cum copiarum robore per portam Carbonariam in urbem hora nona penetrandi: quinque millibus peditum stipendia facientium, nonnullisque equitibus ac duobus popularium millibus Adornianas partes sequentibus: qui in urbem ingressus quievit, non satis sapienti consilio; cum recta praetorium petere debuisset, nec spatium inimicis primo illo pavore obstupefactis animos colligendi dare: quae res consilia secundo cursu procedentia evertit. Antonius enim Montaltus non deferens se, atque in extrema necessitate nullum praecipue aut temerarium consilium ratus; magna civium manu (extremo periculo illis quoque ultima audere suadente) ipsum comitante, in platea divae Agnetis in Adornianos impetum facit. Qua subita re perterritus Antoniotus, numerum invadentium majorem ratus, certamine statim omisso, ipsius copiis fusis ac profligatis, trepida fuga urbe excedit; ipsomet Montalto, & ceteris mirantibus, ac veluti miraculo obstupefactis. Nonnulli ex Adornianis caesi sunt: plures tam equites, quam pedites capti.

Montaltus, tanta re gesta, ea nocte privatis se aedibus continuit: postero die habitu & forma privati, equo inscens, praetorium petit: ibique a

A summo, ac ceteris inferioribus civitatis Magistratibus, procurationesque publicas habentibus, summo omnium consensu, magnaque cum omnium laetitia, quibuscunque Adorniana Factio odio erat, perpetuus Dux, cum consilio ipse non interesset, iterum creatur; accersitusque a consilio, in leges ducatus praescriptas jurat. Egregium ac memorabile Montalti & fratrum facinus ita civitati gratum fuit; ut illud peramplis praemiis remunerata sit: anniversarioque sacro ad aedem maximam, atque aurei aulaei dono celebrandum duxerit; inusitato ad cum diem, & haudquaquam laudabili exemplo, memoriam victoriae de civibus, quam silentio obliterari decuit, eodem honore, quo de externo hoste partem ad posteritatem testatam facientes.

B Secundi hujus ducatus tempora non minus, quam superiora, infesta & turbulenta fuerunt, nec minoribus motibus agitata; neque minoribus ipse Montaltus conspirationibus adversarum Factionum petitus: quas inimicitias inter ipsa Factionum capita, non tam ullae magnopere injuriae, aut acres ullae intercedentes odiorum causae, quam regnandi cupido excitabat: quae ipsos Factionum principes modo inter se conjungebat, modo disjungebat: ut tum usu venit in altero hoc Montalti principatu: contra quem occulta consilia conjunxerunt iidem ipsi partium Antistites, quos paullo ante metus Adornii illi adjunxerat. Ab illis igitur incitatus Nicolaus Rex ex popularium corpore civis, arma contra Montaltum sumpsit; occasione arrepta arcis Mulasanae urbi propinqua a nonnullis ejus regionis incolis occupata: ad quos Rex se statim contulit, Ducemque illorum consiliis addidit: neque ea re contentus Rex, nonnullis post diebus cum quadraginta tantum comitibus urbem ingressus, *Io popule, io qui bonum civitatis statum cupiunt*, conclamat: cum quo se Baptista Buccanigra, arreptis armis, illico conjunxit: qui a Montalto haud magno conatu repressi, urbe excedere coacti sunt.

D Neque solus hic motus fuit: per idem enim tempus ad Vicum Quintum tumultuatum est: in quo nonnulli Adornianae Factionis homines, qui arcem occupant, ab iis, qui partes Fliscorum sequebantur, capti & ad unum trucidati sunt: & in coenobium sancti Andreae ingens ex tribus proximarum vallium praefecturis hominum multitudo, quicunque Adornianarum partium erant, Antoniotto illos occulte instigante, convenerunt, Antoniotto Ducem tumultuosae & minaciter postulantes: contra quos, priusquam majus robur tumultus sumerent, Paulus Montaltus Ducis frater, & Antonius Guar- cus Ducis affinis, cum florente uterque armatorum manu, alter terra, alter mari, profecti, vix inito certamine, tumultuantes fundunt & in fugam conjiciunt; gravi vulnere in crure a Paulo accepto. Vix hic tumultus discussus erat; cum, Ducis adversariis non quiescentibus, alius increpuit, ab iisdem circumjectarum vallium incolis excitatus: adversus quos delecta praesidiariorum manus a Duce missa, illos primo impetu e monte sancti Bernardi ab illis occupato dejecit, & in fugam vertit.

E Interea Buccanigra, haud contemnendo amicorum numero contracto, in vallem Bisamnam venit: cui cum multi se adjungerent, antequam majores vires colligeret, a Ducis stipendiariis contra illum missis fusus ac captus, Praetori, qui per judicium in illum animadvertat, traditur: qui ingenio severo & aspero, ac jurisdictionem legibus solutam exercens, hominem capitis illico damnatum in arcam ante praetorium producit: quem ad supplicium ductum Dux e fenestra conspiciat, miseri ac veniam supplicibus fletibus implorantis misericordia commotus, ad hoc precibus Antonii Guarci utrique affinitate conjuncti exoratus, hominem dimitti jubet: quam rem aegre ferens Praetor, subito

coadvolat: immitisque animus in incepto persistens, spiculatorem urget; ut quæ sui muneris sunt, exsequi pergat: sumptumque omnino, etiam Duce invito, supplicium fuisset; ni Raphael Ducis frater prope accurrens, hominem è manibus Prætoris eripuisset: quo egregio clementiæ edito documento, Montaltus, cum universæ civitatis ac bonorum omnium voluntates sibi conciliaffet, non tamen indomitam Factionum principum ambitionem ad principatum impotenter tendentium mitigavit: quorum conspirationi, conjunctisque in suam perniciem studiis se solum imparem cernens, principatu abire decrevit: sub finem igitur mensis Maji triremi conscensa, urbeque & principatu relicto, Monæcum se contulit, spe ea arce potiundi; cui Thomas Montaltus ejus patruelis ab ipsomet Antonio præfectus erat. Spe, qua venerat, frustratus Antonius, Thoma arcem non tradente, itinere retro repetito, Saonam venit; indeque se Gavium opidum confert: in quo faciliorem ejus arcis præfectum expertus est, arce sibi ab illo tradita: quam, invito Duce successore, diu tenuit.

Is erat tum Genuæ rerum status, ut, cum quattuor præpotentes corporis popularis familiæ Adornia, Fulgosia, Guarca, Montalta, omnia ad se attraxissent, omnemque civitatem ac totam Liguriam Factionibus suis comprehendissent, quæ eodem cum gente nomine vocabantur; potentioribus quattuor Nobilium familiis à principatu plane exclusis; ipsæque de principatu non verborum modo contentionibus, sed armis quoque sæpe dimicarent, omniaque seditionibus, tumultibus, cladibus miscerent; reliqui popularis corporis cives, quamquam neque vetustate generis, nec domestici cultus splendore, si principatum quattuor illis detrahas, inferiores, cumque illis secundæ fortis Nobiles medii starent: quod si aliquando discordiarum civilium tædium ac mala civitatis eo rem adduxissent, ut quattuor iis familiis principatu esset cendum; ad unum ex hoc corpore mediorum civium deveniretur: isque appellabatur medius Reipublicæ status: ut tum accidit, principatu ad Nicolaum Zoalium, virum prudentiæ & integritatis fama commendatum, delato. Qua re cognita, Antoniottus, totus in suas artes versus, animum pacatum ac cupiditatem æquo jure cum ceteris civibus vivendi simulans, pacem à novo Duce petiit, impetravitque: quæ res magnum odium ceterorum Factionum principum Duci conflagavit: qui contra illum conspiravit: ceterum consilia nondum satis matura, diligentia Ducis oppressa sunt; Antonio Guarco cum triginta civibus cum illo consentientibus captis, & in custodiam traditis: ceterum, cum ea res magnos animorum motus, magnosque fremitus vulgo faceret; Dux offensiones metuens, consilio viginti primariorum civium vocato, Guarco ac ceteros dimittit: quo facto non gliscentem seditionem compressit, sed illi Duces addidit.

Igitur Guarci, indignatione acceptæ contumeliæ ardentes, simulque cum illis Fulgosi conjuncti, ab occultis consiliis ad apertam vim versi, prætorium adoriuntur. At Zoalius ab omni ejusmodi contentione abhorrens, tum sese ac principatum suum capitibus Factionum, ac Flisco Cardinali invisum sentiens, quæ quintæ Factio surgere incipiebat, ducatu se abdicans, duobus mensibus post, quam illum accepit, in privatas ædes concessit: Respublicaque ad principes Factionum rediit: duarumque ex illis Antoniotto Adornio & Antonio Montalto capitibus absentibus, res ad duas reliquas Factiones delata est: quarum principes Antonius Guarco & Petrus Fulgosius, cum alter alteri cedere nollet, rem fortunæ & sortium arbitrio decernendam permittunt. Sors Guarco obvenit: cui quamquam neque ex legum forma, neque ex more Majorum creato,

A postero tamen die mandatus honor à consilio sexaginta popularium civium, dimidia parte Gibellinorum, & dimidia Guelphorum, comprobatus est. Inusitata electio cum multis non satisfaceret; magna hominum multitudo, in quibus fuit Zoalius, consilio illam infringendi, in aream ante arcem Castelletum conveniunt: quo sese statim circumjectarum præfecturarum incolæ ad duo millia numero contulerunt: qua virium accessione firmati motuum auctores, in plana urbis atque in campum Fossatelli descendunt: verum à valida Guarcanorum impressione retro averfi, se iterum in superiora recipere coguntur. Cum igitur neutra pars concidisset, facies seditioni commotæ subditæ sunt: momento enim temporis urbs armatorum gregibus referta est: quos partim Lucas Fliscus, ex ditio-
B ne sua movens; partim Antonius Montaltus, ex opido Gavio, quod tenebat, profectus, in urbem introduxerunt: hic principatum repetens, ille potentiae suæ augendæ causa, si res, quo ipse incubuisset, inclinasset. Quarum copiarum adventu declaratum est, Fulgosios & Guarcos specie magis quam voluntate conjunctos: neque enim Fulgosius satis impigre, & ut res Guarci in tantas angustias adductæ postulabant, se movit.

C In tantis turbis, tantaque rerum colluvione, quod unum ad res aggravandas deerat, additum est: ecce enim Antoniottus triremi in portum Genuensem improvise invehit: qui cum, subita exorta adversa tempestate, exscendere non potuisset; spatium datum est adversariis sese illi opponendi: in quibus acerrimus fuit Montaltus: qui hoc pro cetera audacia & animi magnitudine fecit: ceteris enim certaminibus in præsentia omis-
D tis, vires suas in Antoniottum convertit, & plus ceteris sibi invisum, & magis formidolosæ potentiae hostem: primus itaque in triremem à tempestate laceratam impigre insiliens Antoniottum, armamentis confractis, atque incommode sparsis velut compedibus impeditum, ad necessitatem se ipsi de-
E dendi adegit: quem captum in altera è turribus, quibus porta Campi communitur, inclusum valida custodia cingit; Guarco Duce ægre rem ferente: ceterum in præsentia tantis undique molestiis implicito dissimulare coacto. Auxit acerb-
F tatem, quod suspicio illi, neque ea tota ex vano, ut postea res docuit, injecta est; Montaltum cum Adornio in gratiam accepto in perniciem suam occultis consiliis consensisse. Adornius quidem à Montalto paullo post dimissus est, valido præsidio in illius tutelam addito; à quo Vulturem opidum usque deductus est.

Igitur Guarco novis copiis firmatus, ut sese tot circumstantibus terroribus liberaret; primos omnium eos, qui ad Castelletum constiterant, auctoresque rerum movendarum fuerant, cum tribus armatorum millibus petit: quibus illi auxiliis à Montalto clam submissis fulti, non modo acriter resistunt, sed omnibus viribus connisi illos tandem avertunt, profligatosque in fugam conjiciunt: cum vix è victorum manibus ipse Dux evasisset, ac cum paucis in prætorium se subduxisset. Ducis clade Antoniottus animis sublatis, vocatu amicorum & partium suarum studiosorum, postero die in urbem venit, magna cum lætitiâ à suis in arce Castelletto acceptus. At Guarco tantas undique in se unum intentas vires cernens, neque se tantæ incumbenti moli ferendæ esse intelligens; triremi clam conscensa, urbe excedens, Saonam se contulit: quo profecto, qui Castelletum tenebant, Gibellinarum partium homines, in plana descendunt; magnisque clamoribus Aquilæ nomen subjicientes, tota urbe discurrent: quorum metu Guelphi domi se continebant, malis & cladibus intacti: cum Gibellini furentes omnem iræ impe-
tum

tum in aedes Archiepiscopi, edito loco supra cœnobium sacrae aedis Castelli sitas, effudissent: quas pravo & detestabili exemplo incenderunt, per causam, quod receptaculum Guelphorum essent; in iisque coetus & conventicula fierent ad Jacobum Fliscum tum Archiepiscopum; consiliaque & machinamenta adversus Gibellinos concoquerentur: quæ res aliis incendiis causam præbuit. Guelphi enim, qui in valle Bisamnia magno numero, Luca Flisco Duce, constitierant, ira accensi, ut par inimicis referrent, magnifice exstructam domum, ac peramœnos hortos Antonii Justiniani incenderunt: quod incendium Gibellini, nonnullis Fliscorum & aliorum primariorum civium Guelphæ Factionis domibus in urbe concrematis, ultii sunt; partium furore ea foedæ crudelitatis exempla inter ejusdem patriæ cives edente, à quibus barbari, infensissimique hostes, urbibus hostilibus captis, abstinere solent.

Interea Adornius, indomita principatus cupiditate illum rapiente, nonnullorum suorum animis occulte præparatis, ut æmuli studia, quæ res una consiliis obstabat, consopiret, vir dictis, factisque omnibus ad fallendum instructus, artificio Montaltum aggressus fuerat: persuaseratque, ut, quoniam hæc de principatu contentio unanimem ipsorum amicitiam sola distrahere posset, ab illo petendo ambo in præsentia abstinere; seque alii temporis reservarent: paterenturque, hoc laxamento dato, civitatem fessam cladibus respirare: probo alicui & quieto medii status civi principatu mandari permissio: acquieveratque consilio Montaltus, Adornium sincera fide agere credens. Quare, in signum magnæ animorum inter se effusionis, mutuo complexi, in sacram ædem Franciscanam, proximam ac subjectam arci, descendunt: quo statim ingens primariorum civium, tam Guelpharum quam Gibellarum partium, numerus, ipsorum vocatu, convenit; rem novam, ac tantam, & tam subitam publicam animorum conjunctionem mirantes; animisque suspensi & incerti, quo duorum diversarum partium capitum inexpiables odiis & internecinis contentionibus de principatu dimicare solitorum consilia evaderent. Ibi Adornius omni artificio ad fallacias compositus, summam animi demissionem ac poenitentiam factorum simulans, pene lacrymabundus veniam præteritorum supplex petit; culpamque suam & ceterarum Factionum principum aperte fatetur, gravibusque verbis accusat; quorum indomita ambitio atque immodica regnandi cupido civitatem tot tumultibus, seditionibus, bellis denique civilibus involverit; totque detrimentis & cladibus lacerarit, atque ejus vires confecerit: ceterum resipiscendi lumen sibi & Montalto huic præsentī divinitus prælatum dicit; decrevisseque proinde ambos finem immodicarum cupiditatum facere: ad quod exemplum ceteros, depositis contentionum ac partium studiis, imitandum hortatur; ex quibus contentionibus nullus alius umquam fructus, quam publicarum & privatarum cladum perceptus sit: quare, ut, omissis dissidiis, ad publicas res prostratas erigendas, cogitationes convertant, orat & postulat: cujus rei caput fore; si alicui medii status civi probo, & moderato viro, ac consilio pollenti, tum autem quietis ac boni publici amanti, summum imperium mandent. Orationem Adornii non minore egregii erga commune bonum animi significatione proluxe subsecutus est Montaltus: cunctis stupore defixis, unde tanta ac tam subita ingenii mutatio in Antoniotto facta esset.

Latī igitur primores ad nonaginta numero in sacrum ad Ducem creandum secedunt: quod illis vix ingressis, ecce ingens strepitus multitudinis, quæ foris stabat, exauditur (instigantibus iis, quos Adornius ante præpararat, vocemque præeuntibus)

A feditiosis, minacibusque clamoribus Antoniotum Ducem deposcentis: in quo uno viro sit animus tanto fastigio par; quique opibus & potentia sua quietem publicam turbantes possit compescere. Enimvero Adornius, tacito gaudio exultans, vafra consilia sibi successisse, haud retractanter delatum principatum accipit: ejusdem simulatoris personam retinens, seseque tanto plebis consensu victum dictitans; cui concitata resistere periculosum sit: spondensque, cum tumultus defecerint, Republica constituta, civitatisque statu in tranquillum redacto, sese eo principatu lætum abiturum, quem nunc invitus, ac temporibus coactus, accipiat. Qui in sacrum concesserant, metu concitatae multitudinis, suam ac patriæ conditionem ingemiscientes, duobus & septuaginta suffragiis electionem comprobant: Adorniusque quartum Dux, magnis multitudinis plausibus, ingentique tenuiorum numero circumfusus, in prætorium deducitur: bonis patriæ fatum lugentibus; quæ diuturnis cladibus concussa, publiceque & privatim exhausta & enecta, mercatoria negotiatione intermissa, ingenti vi aeris alieni demersa, spe sese à præteritis ærumnis recreandi, ex fallacibus Adornii verbis subito dejecta sit.

Montaltus quidem in Antoniotum, à quo ita ludificatus sit, exarsit: hostilem igitur in illum animum gerens, urbe protinus excedit; seque Gavium, quod opidum tenebat, confert; dies noctesque animo agitans, quemadmodum tantam perfidiam ulcisceretur: quam universam invidiam Antoniotus simulatione moderationis mitigare non potuit; neque animos Factionis Nobilium lenire, illis in partem gerendæ Reipublicæ, atque in numerum antianorum & consiliariorum suorum assumptis: quin illi de ipsius pernicie cum popularium primoribus ac medii status civium vota & consilia jungerent: quibus malis, tamquam parva hæc essent ad lacerandam & conficiendam Rempublicam, accesserunt potentiorum nobilium familiarum iniqua consilia: quæ, omni caritate erga eam Rempublicam, quæ in aliorum manu esset, deposita, ejus membra discerpere; eaque partim exteris Principibus tradere, (potius id dictitantes, quam ea ab inimicis civibus teneri) partim ipsi occupare aggressi sunt. Ariarum igitur vocatu, quidam ex Gallis Proceribus Contiacci Dominus à Rege missus, in Liguriam venit, consilio oram Occidentalem Regi Gallo subjungendi: qui Diano opido primo adventu occupato, majorem molem, quam præceperat animo, totam oram cernens, ac majorum virium, quam quas adduxerat, rem esse; tædio ac difficultatibus fractus, occupato opido dimisso, itinere retro repetito, in sua reversus est.

Insequentique anno Joannes & Ludovicus Grimaldi fratres opidum Monæcum per prodicionem ^{A.C. 1395.} traditum occupant; quod perpetuo magno cum civitatis publice & privatim malo retinuerunt: quod opidum, simulque portus Delphini, & portus Veneris, pariter occupata, Guelphorum receptacula illis temporibus fuerunt: qui Adornium regnantem ferre non poterant: contra quem Antonius Guarcus, armis sumptis, in vallem Porciferæ bis eo anno venit: primo, conatu irritō, secundo, cum operæ pretio; munimento ad pagum sancti Ulciffi à Duce excitato, proditoris traditione, occupato; Raphaele & Adornino (illo fratre, hoc Ducis filio) contra illum missis invitis. Guarcusque animis auctus, duobus millibus peditum ac quingentis cataphractis equitibus, favore Principis Mediolanensis stipendia magna ex parte suggerentis, coactis, ditionem Genuensem tertium repetiit, sine ullo fructu: cum ad mœnia usque urbis processisset, subitoque discessisset.

Æstateque circumacta iidem, Guarcus & Montaltus, societate armorum conjuncta, ambo ex

Infubria moventes, fines Genuenses cum magno armatorum numero (eodem Joanne Galeacio Genuæ imperio imminente copias & pecunias suppetitante) quartum ingressi, Stalianum usque irritum incepto pergunt. Interea Dux, tribus peditum milibus ac mille equitibus, quos assidue alebat, se adversus inimicorum impetum seperat; ac circumjecta urbi loca validis præfidiis firmarat; neque cura ditioris omiſſa, omnia loca irruptionibus hostium exposita, mille peditum præfidio in illa distributo, communierat; circiterque octingentos cives, quorum fides illi suspecta erat, urbe exegerat: qui etiam Dux sub finem hujus anni Reccum opidum ab adversariis occupatum, terrestribus & maritimis copiis eo missis, recuperavit. At Joannes & Ludovicus Grimaldi, Duce tot domesticis occupationibus illique propioribus implicito, occasionem urgentes, inchoataque consilia persequentes, haud disparem priori in re Monæci eventum sperantes, urbem Albigemelum infestis signis petunt: ceterum votis exitus contrarius fuit: cum præfecti egregia fides in Rempublicam constitisset; incommodusque casus pontis, per quem transeundum erat, perfracti, incidisset, qui ruina sua superstantes secum traxit, quorum maxima pars periit; quique superfuerunt, membris laceratis, manci, corporeque inhabiles facti sunt; ipsique fratres Grimaldi capti, in arce Petrae, quod opidum à Duce tenebatur, carcere inclusi sunt.

A. C. 1396. Sequitur annus ejus sæculi nonagesimus sextus, in quo magna rerum mutatio facta est: cum Antonioti adversarii sæpe ab illo repulsi, nihil adversis eventibus infracti, à suscepto consilio hominem principatu deiciendi, desistere non possent, Joanne Galeacio assidue illos incitante, ac copiis & pecuniis juvante: quorum Montaltus, auxiliis impetratis, Mediolano Gavium redierat, omnique ope in eo comparando intentus erat: at Guarcus in Spinularum ditione copias cogebat. Quibus motibus cognitis, Antoniotus, cum sibi rem esse non tam cum inimicis civibus, quos contemnere facile poterat, majoribus ipse opibus fultus, quam cum præpotenti ac vicino hoste Joanne Galeacio, cui ipse par nullo modo esset; quique per has favendi exsulibus ambages viam sibi ad imperium Genuæ muniret; animum ad illud consilium adjecit: ut, quoniam ipse adversus tantas in se unum intentas vires Genuam retinere non posset; ab illa saltem hominem arceret, quem, ob veterem amicitiam suam, nulla in re à se violatam, spretam, ac novam cum hostibus suis conjunctionem, capitaliter oderat; provideretque, ne Genua in ejus manus veniret, à quo ipse expellebatur: magno igitur animi certamine adversus illum sumpto, civitatem Regi Gallorum dedere decrevit: quam rem, civibus tot malis fessis, haud difficilem persuasum fore ratus, ipsos ex suburbanis æstivis secessibus in urbem cogit; animisque Gibellinorum primum, deinde Guelphorum, ac tam Nobilium Factionis, quam popularis nominis civium, in iisque Lucae Flisci Cardinalis, cujus magna erat inter Guelphos suos auctoritas, exploratis; cum illos à re non magnopere abhorre sentiret: universos convocatos ita allocutus dicitur: *Hodiernus dies finem asseret, Patres, de mea fide dubitandi: hodie, inquam, obrectatorum oratio, quæ plurima fuit, retundetur: apparebitque utrum ego infinita cupiditate regnandi quartum hunc principatum patriæ appetierim, ac per fraudem, ut mihi iniqui homines dicitant, mihi pepererim; an ad illum invitatus attractus; dum concitata multitudinis studiis seditio clamore me Ducem deposcentis obsequor, materiamque tumultibus subtraho; otio civitatis & saluti publicæ consuluerim. En, civitate pacata, rebusque in tranquillam redactis, turbarumque causis sublatis; ipse ultro, nemine cogente, me principatu mox, vobis inspectantibus, abdicare constitui; eaque de causa vos convocavi: quamquam ecce alia mei lacerandi materia. Non dubito,*

A *quin hoc factum meum pro eo, ut eripiat, daturum immo sit malevolis sermonem: qui videlicet calumniabuntur, me non voluntate, neque boni publici causa ductum abire; sed necessitate subactum, ac timidine adductum, hoc subitum consilium cepisse, cum longe mihi alia mens esset; quod Mediolanensis in me intentum impetum sustinere non posse sperarem. Timiditatis suspicione si me antea vita cursus, resque à me gesta non satis liberant; eam oratione à me remove non postulo. Necessitas vero quæ esse potest, tantis opibus, tantis clientelis, ad hoc tot & tam florentibus copiis munito? cum praesertim ne mihi quidem desint externa amicitia; quarum vires Mediolanensi in meam perniciem incumbenti opponam: cur igitur cedis? dicat aliquis: idem quietis publicæ & communis boni studium, quod me invitum ad principatum à cupientissimo populo ultro delatum non recusandum adegit, ut illo non invitatus abeam, hoc tempore hortatur: nam, etsi maxime ad summum hoc honoris fastigium tuendum satis animus & vires suppetunt; tamen cum id effici aliter non possit, quam patriam longo fortasse, pernicioso certe bello involvendo; non ita imperium amplexari debeo, ut civitatem & salutem publicam in discrimen adducam. Siquidem honores & imperia bonus & malus aequè sibi optant: ceterum hoc inter illos interest; quod bonus patria, malus sua causa ad illa contendit. Non obstat igitur posthac otio publico ac civitatis felicitati Antonioti Adornii persona. C Atque utinam is esset civitatis nostræ status, Patres, eaque fortuna nostra, ut alicui vestrum, Patres, summo hoc honoris loco cedere possem: multos enim inter vos esse video; qui etsi non meliore mente, quam ego, utuntur, neque me caritate patria vincunt; prudentia certe & consilio antecellunt: majoreque sunt animi robore ad tantum onus sustinendum: ceterum non idcirco pericula & tempestates imminentes à Republica depelleremus: neque enim Mediolanensis odio mei, à quo nulla in relatus est, me privatim petit, aut satis habet hoc loco deciscere; sed cupiditatem ambitione inflammata in res ac libertatem nostram intendit: cui rei dissidia nostra ac meum sibi resistendi consilium, iter patefaciendum sperat. D Quod ad me attinet, materiam ego illi cedendo praripiam: alteram viam discordiarum illi obsepiendi partes vestra essent, Patres: ad quam rem ego vos hortarer, si sæculi vitia huic spei locum ullum darent; aut si ad hoc malum cohibendum quidquam esset in bono Duce opis. Nunc, quoniam eo loci res nostra sunt; ut Duces, nesci cupiant quidem, boni esse non possint, tot contentionibus agitati, atque illinc adversarum Factionum oppugnationibus petiti, hinc suarum partium hominum assiduis stimulis ad dominatum sibi, Factionique suæ, omiſſa cura publici boni, stabiliendum incitati; ad illud consilium descendamus, quod unum remedium Majores nostri discordiis, quas ambitio civium ad summum magistratum tendentium excitabat, præcidendis, ac malis publicis sistendis invenerunt; idque non modo posterioribus corruptissimis temporibus, tum, cum præpotentes Principes perpetuos dominos adſciscabant; sed optimis illis principibus, cum peregrinos annuos Prætores vocare ceperunt: quod exemplum illi nobis prodiderunt, quamque viam illi, sive bono, sive pravo consilio, tum sponte inierunt, eandem nos hoc tempore necessitate coacti insistamus, si vobis ita videtur, Patres: (hac enim in re nihil privata rationes meas attingente, sed ad Rempublicam tantummodo pertinente, staturus eo sum, quod vos censueritis) rectoremque aliquem ac moderatorem studiorum nostrorum nobis constituamus: cujus summa auctoritas ac potentia, mala, quibus in dies magis magisque conficimur, compescat: nullum autem in presentia Gallocurrit opportunius malis nostris remedium, quam Gallorum principatus: quem tribus de causis Mediolanensi anteferebam duco: primum, ut iniquum & injuriam hominem ulciscamur, imperio civitatis nostra hiant cupiditate imminuentem, ac modo per occultos dolos, dissidiaque nostra artificio alendo, pestem nobis machinantem; modo nobis aperta arma comminantem. Huius-*

ne nos homini, Patres, hanc latitiam dabimus, jugi tandem nobis impositi nullam gratiam nobis habituro, quod nos illius imperio sponte subjunxerimus: quod idcirco tamquam de invitis vel circumventis partum in nos impotenter exercent? Talia timenda non sunt a maximo Rege, ac beneficio tanti doni ad nos caritate complectendos provocato: deinde quod Mediolanenses Principes experti sumus; deprehendimusque nihil aliud illos nobis quam servitutem struere. Age, illis opponamus eum Regem, qui nos ab eorum faucibus eripiat: cum praesertim timor nobis a Gallis non impendeat: qui latepatient, atque omnium, quae sub caelo sunt, opulentissima ditione utentes; ad hoc longe a nobis disiti, Genuam non sibi ad regnum amplificandum, aut ad suas opes augendas, finesque latius proferendos, sed ad maritimarum expeditionum opportunitates datam putabunt: postremo minus dedecoroso est, tanti fastigii Regi, quam parvo praestito Mediolanensi Principi parere. Perorare poteram: ceterum quemadmodum, quocumque loco facultas mihi data est, patria prodesse re semper studui, ita congruenter me instituto meo facere existimabo, si nunc verbis, quo uno reliquo possum, illam juvero. Quoniam igitur in solitudinem concedere in animo habeo; ubi procul a negotiis, atque ab omnibus curis, & contentionibus civilibus, quarum rerum satietas me jam dudum tenet, in otio, quod reliquum est aetatis, agere decrevi; hoc postremum mei in patriam amoris ad vos monitum volo pervenire: crebras rectorum & principum mutationes raro vel numquam bono, saepe malo civitatibus fuisse: neque enim hoc sine ingenti motu expediri potest; quo res labefactari necesse est: consilium igitur, vos in fidem & tutelam Gallorum tradendi, a vobis, me auctore & hortante, sapienter captum constanter vobis tuendum censeo, Patres: una est autem ejus tuendi via, si cogitaveritis eam esse civitatis nostra praesentem fortunam, ut optima optare quidem possimus; sperare nequaquam: minima igitur malorum pro optimis accipienda esse. Necesse est in extero dominatu multa subinde exoriri, quae nonnihil offendant; at ea offensiones leviores vobis videbuntur, a quoque animo ferentur, si cogitaveritis, majorum vulnere, majorumque cladum amotionem levi hac offensionum mercede vobis stare. Hoc si animis vestris bene fixum & statutum erit, sapienter vobis, liberisque vestris, ac quieti & saluti publica consulueritis.

Cognita civium voluntate; duo primarii cives ex civitatis decreto ad Regem mittuntur, Damianus Catanius Jurisconsultus, & Petrus Persius: qui illius animum explorent, conditionesque ditionis exponant. Praebuit illorum in regiam adventus magna inter primarios Proceres, eosque, qui in consilio Regi erant, certamina; aliis tam amplum ac splendidum donum, tum autem regno Galliae multipliciter opportunum percipiente accipientibus; quod ultro ac sine ullo certamine delatum, vel taedio laborum & impensarum in illo retinendo, vel metu aliorum Principum illius urbis imperio haud obscura cupiditate imminet, rejicere alienum esse, & a florentissimi regni Gallici dignitate & a regii animi magnitudine dicerent: magnamque degener consilium ignaviae infamiam, magnumque dedecus Gallico nomini inustumum: aliis utilia & solida speciosis & inanibus praeferenda contententibus; ac Ligurum instabiles animos, aliumque ex alio Reipublicae statum spectantes, praesenti numquam contentos, opponentibus; qui haud dubium sit, quin praesentibus malis, quae eos ad hanc necessitatem adegerint, liberati, ad ingenium sint redituri; cupidiusque libertatem, cujus dulcedo ex memoria hominum in illa vivere solitorum numquam deleatur, sint recuperaturi, quam libentius illa se exuerint: proinde Regem a negotio molestiarum & impendiorum pleno, tum autem numquam stabili possessionis, magnopere revocantibus: ceterum Rex prioribus assensus est, aptiora ipsius animi magnitudini sua-

A dentibus; conditionesque a Genuensibus propositas accepit. Cognita Regis voluntate, mandatarii regii ad rem conficiendam accersiti sunt. Ii fuerunt Franciscus Cafenatici Dominus, & Arnulphus unus ex regis Quaestoribus: qui cum Genuam venissent, deditio Regis nomine in has conditiones illis facta est: Genuenses Regem Francorum verum Dominum accipiunt, ejusque majestatem pie colunt; juribus Imperii, si qua sunt, salvis: vexilla regia & Caesariana simul cum Genuensibus eriguntor: Rex Vicarium Galliae nationis Genuam mittit; qui res una cum consilio civium illi a civitate adjuncto ad praescriptam formam legum regat; quam egredi ne licet: gubernator in consilio ipsi addito jus tantummodo duorum suffragiorum habet; quorum momenta aequalia sint cum ceteris; ut Duces habere solebant: dimidium consilium aequaliter esto, Guelphorum, & Gibellinorum, ac Nobilium Factionis, & popularis nominis civium: princeps tamen consilii Gibellinus esto: Vicario absente, de omnibus maximis & minimis rebus consilio statuere licet, perinde ac si ille adesset: nulla Regi nova vestigalia aut tributa imponere, neque vetera attingere licet, quae civitatis sunt: Genuenses eosdem, quos Rex, amicos & hostes habent: eos tamen ad hujus vel illius maximi Pontificis partes sequendas cogere Regi jus ne esto: Genuensis ditionis regimen penes consilium civitatis esto; neque in illius urbes atque opida Praetores ac rectores mittere Regi licet: decem tamen arces, quae nominatae sunt, Regi traduntor: quae praesidiis & praefectis ab illo missis teneantur: Rex quattuor proximis mensibus omnia loca, omnesque arces ditionis Genuensis civitati adempta recuperare obstrictus esto; omniaque summa facere, ut illa in Genuensium ditionem redeant: item Genuensium atque omnium locorum ditioni subjuntorum adversus quoscumque oppugnantes propugnationem suscipere obstrictus esto: Regi Genuensium dominatum, juraque sua in alium transferre ne licet. Quibus conditionibus scriptis, ac celebri jurejurando sancitis; consilio universae civitatis in aulam maximam convocato, Antoniotus principatu se abdicavit: scepro & clavibus urbis, ceterisque imperii insignibus procuratoribus regis, ad translationem dominatus significandam, tradidit: quem illi regium Vicarium interim, dum Vicarius Gallus Genuam venisset, pronunciarunt; iisdem insignibus Regis nomine gestandis, traditis.

Hic dies finem quidem attulit vastis Antonioti cogitationibus; quae ipsum, & adversarios, ac patriam mirifice ac diu exercuerunt: laboribus & malis civitatis nequaquam: cujus quietem Montalti & Guarci turbare non desistebant; cum sua ambitione impulsus, tum Joannis Galeacii assiduis stimulis incitatus; dolore ardentis tantae conceptae spei ad irritum cadentis; Gallosque consiliorum ab ipso tot laboribus, ac pecuniarum & hominum impensis fatorum fructum percepisse: ambo igitur initio sequentis anni cum nonnullis pedestribus & equestribus copiis in vallem Porciferam descendunt; sperantes, se eas ad primum ipsorum adventum ab hominibus trium praefectarum, ad ipsos confluentibus, aucturos: praefereutes, sese non ad vexandam civitatem venisse, sed ad Antoniotum exigendum; ejusque jugum bonis discutiendum; qui, nihil attineret, utrum cum Ducis, an cum Vicarii regii titulo regnaret: ceterum non modo, ut ceteri superiores, irritus conatus fuit: sed auctoribus etiam lugubris & exitiosus: fusi enim & fugati sunt Guarcani & Montaltani, a copiis ab Adornio ex urbe contra illos missis: cum quibus Spinula & Flisci, qui modo Guarcorum & Montaltorum conatibus impense faverant, copias suas atque arma conjunxerunt; cum nollent Rempublicam ad Duces ac populare imperium tantopere ipsis invisum redire: ipsique Duces capti: quos tamen Cafenatico, omni ope contentendi, in manus tradere recusarunt; cum a turpitudine facti abhorren-

A. C.
1397.

tes, tum popularem invidiam veriti; si cives tanti fastigii, atque ejusdem patriæ caritatis vinculo sibi conjunctos in manus exterorum tradidissent: quos immo paucis post diebus dimiserunt: qui Gaviū perpetuum ipforum domicilium reversi sunt: paucisque post diebus Valerandus Lucemburgus, Liviaci & sancti Pauli Comes, ac Petrus Episcopus Meldunensis, Genuam venerunt à Rege missi: quibus Antoniotus vicariatu & prætorio cedens, in privatas aedes concessit; arce Castelletto retenta in pignus pecuniarum sibi à Republica debitarum: quibus persolutis, sexto post die arcem quoque tradidit. Addubitatumque nonnihil est, utrum custodiam arcis regis procuratoribus, an civitati committi jus esset: de qua re Jurisperitorum collegium consultum secundum regios respondit: arxque illico illis tradita est à Paulo Monelio, quem Antoniotus illi præfecerat.

Optimum consiliorum cursum nonnihil Saonenfium usitata contumacia turbavit. Defecerant ii superioribus annis à populo Genuensi: seque in tutelam & ditionem Aurelianensis Ducis, Regis fratris tradiderant: ceterum Aurelianensis per hæc tempora, quæ nunc scribimus, omni jure suo in rebus Saonenfis fratris Regi cesserat; neque tamen Saonenses moniti sub vetus imperium Genuensium redibant, aut imperata faciebant. Ad eos igitur profectus est Vicarius regius; qui frustra homines ab ea mente deducere conatus, Genuam rediit: ceterum voluntate Regis illis plane demonstrata, pertinaciæ fine facto, ad obedientiam redierunt; atque in verba Magistratus jurarunt.

At Guarci & Montalti, cum Antoniotus, principatu relicto, omnem illis excusationem præcidisset, ne soli quieti, ac bono publico, civitatisque tranquillitati obstare viderentur, omni tandem contentione deposita, in gratiam cum civitate ac cum Vicariis regis redierunt; atque in urbem ex locis, quæ occupant, commigrantes, cum reliquis civibus studia conjunxerunt: opido Gaviū cum arce Reipublicæ reddito; pensione illis publice assignata, rata à civitate facta; quæ tamen illico exciderent, si quidquam contra regium dominatum moverent.

Rebus igitur ad meliora inclinatis, unum restabat, quod civitatis concordiam & unanimitatem distineret; metus poenarum ob præterita delicta, quarum formido multos ad res novandas adigere posset. Novus igitur Magistratus quattuor civium ex præstantioribus creatus est, qui petentibus veniam daret; jurejurando ab illis accepto, se in posterum cum ceteris bonis & quietis civibus pacem civitatis ac concordiam culturos: curisque ad res ditionis pacandas extensis; in Orientalem oram Cervas Auriam cum haud contemnenda armatorum manu, in Occidentalem ipse Vicarius regius profectus est: qui ambo haud exigua operæ pretia fecerunt; cum Vicarius Petram ac Justenesim opida, quæ à familia Antonioti tenebantur, & Portum Mauritium, quod Auriæ occupant, Reipublicæ recuperasset: nullisque partibus curæ rerum pacandarum omisiss; præter ordinariam Prætoris jurisdictionem, alia gravior & severior potestas in urbem inducta est: Capitaneo justitiæ (ita enim appellabant) electo, qui solutus legibus fontes ac quietis publicæ perturbatores pro arbitrio plecteret. Eoque anno pestilentia, quam naves ex Oriente appulsæ contagione sua in urbem introduxerant, in dies magis sæviens; Valerandus Vicarius, qui ea de causâ ab urbe secesserat, Barleo Lucemburgo patruo, qui res urbanas regeret, & Episcopo Meldunensi, qui ditioni Transalpinæ præesset, relictis, ipse in Galliam concessit.

Rebus tam intra urbem, quam extra, ad meliora inclinatis, una familia Bertolottorum satis, ut provincialis gens, potens in ora Orientali restabat; qui tumultuum & seditionum auctores cum in locis circumjectis opido Levanto, cujus incolæ erant,

A cuncta direptionibus, rapinis, incendiis, cum ante dominatum regium, tum illo introducto, sæpe miscuissent, neque veniam admissorum impetrare potuissent; in arce quadam, *Cornilia* vulgo appellata, se communiverant, auxiliaque ab uno ex proximis Marchionibus Malaspinis accersiverant: contra illos ^{A.C. 1398.} igitur initio anni sequentis Capitaneus justitiæ cum prævalida sexcentorum armatorum manu missus est: qui (Antonio Cucurno genere nobili, Factionis Gibellinæ ac non exiguarum clientelarum viro, per causam novarum rerum adversus dominatum regium tentatarum in itinere capto, ac Genuam missus, in qua urbe extortus in tormentis mortuus est; B Guarco & Montalto dimissis, qui ipsi quoque eodem crimine conspirationis cum Cucurno infimulati innocentes reperti sunt) Capitaneus igitur, Cucurno Genuam missus, cum ad locum, quem Bertolotti tenebant, perrexisset, manum cum illis conseruit: in quo prælio ipse Capitaneus cecidit, ejusque copiæ fusæ ac profligatæ sunt: qua victoria Bertolotti contumaciores facti, opidum Levantum petunt, inimicorumque villas opido circumjectas prius direptas incendunt.

C Eo anno Antoniotus Adornius, qui quater Dux fuerat, (nam hoc quoque ad insigniorem hunc annum faciendum Annalibus insertum est) in Castello Franco Finariensis agri ex pestilentia decessit; vir in principatu petendo acrior, quam in tuendo parto constantior; & in hostibus invadendis audacior, quam in resistendo invadentibus fortior; animoque in periculis magis adeundis impavido, quam in conflatis infracto; claris virtutibus, nisi eas insignis ambitionis macula deformaret, non suæ modo, sed multarum ætatum princeps haud dubie futurus.

D Neque vero in tantis urbanis occupationibus cura externarum rerum omnino omittebatur: decretæ sunt enim quattuor triremes ad tutelam locorum, quæ in Oriente Respublica possidebat. Cum ora Occidentalis seditionibus ac turbis ureretur; ne Genuæ quidem res quietæ erant, cum Vicarius regius Gibellinorum querelis, atque eorum, quorum libido in superiorum annorum licentia solutior fuerat, nimiam Capitanei justitiæ severitatem non ferentium, metu tumultuum cum Magistratum tollere coactus esset: quæ res gliscentes seditiones non modo non compescuit, sed acceleravit; initio facto ab incolis trium præfecturarum, quicumque partes Gibellinas sequebantur. Ii sive cupiditate prædandi sua sponte commoti; sive à capitibus Factionum imperium regium ægre ferentibus, quod esset ipforum potentia & dominatui infringendo, instigati; Antonio Rege cive Genuensi, & Raphaele Carpancto magnarum clientelarum in illis vallibus viro, Ducibus, armis arreptis, magnisque agminibus passim discurrentes, tumultibus cuncta compleverunt; cum à nullo facinoris genere abstinerent, hominesque Guelphæ Factionis captos, tamquam hostes & alienigenas, ad necessitatem sese pecuniis redimendi adigerent; ut cives ex villis & suburbanis suis illorum furori se subtrahentes, in urbem commigrare coacti sint. At illi facinoribus querelas miscentes, nimis hunc regium principatum in Guelphos propendere, nimisque contra Gibellinos premere expostulabant; neque ferendum esse dicebant, omnium ejus regionis arcium custodiam Guelphis tantum traditam: quæ querelæ necessitatem à Vicario expresserunt, nonnullas arces de consilii sententia à Guelphis præfectis ablatis Gibellinis tradere: quæ res non modo concitatos motus non compressit; sed audaciam res novare cupientium auxit: earum enim arcium præsidio ad majora audenda confirmati sunt. At Vicarius nihil omittens eorum, quæ ad pacandas res valere existimaret, ipsos Montaltum & Guarcum, eorum auctoritatem plurimum valituram ratus, ad eos mittit: qua re non seditionem compressit,

fit, sed illi Duces ac robur addidit: indignabantur enim Guarcus & Montaltus, sese à Vicario regio non modo nimium in ordinem cogi; sed etiam infra eos, quibus dignitate præstare solerent, amandari: ad hoc dominatum regium fatalem sibi horrebant, nimis in Guelphas partes, quodque odiosius erat, in Nobilium Factionem propensum: qui capitali odio causæ populari, à qua se nimium premitputarent, infensi; illiusque extinctionem perpetuis consiliis molientes; haud dubium esset, quin regiones procuratores in se continenter instigarent; persuasurique tandem essent, numquam stabilem Regi Genuæ possessionem fore, nisi capita Factionum tollerentur. Præterea, cum ea in præsentia Genuæ patriæ fortuna sit, ut non in libertate, sed in regno esse cogatur; satius esse ducebant, nihilque id à pietate patriæ debita abhorrere, in ea ipsos regnare, quam alienos & externos regnantes pati; ac quoniam in alterutram necessitatem adducti sint, pestem, quam sibi alii machinentur, in machinatores vertere, quam ipsos excipere: quod si fortuna consiliis inviderit, potius esse salutis & dignitatis suæ vindices; ac pro illis ultima fortiter expertos, armatos per virtutem cadere; quam sedentes, nihilque audentes cervicem tandem carnifici per ignaviam subicere. His igitur causis inducti, animis nudatis, propugnationem tumultuantium aperte suscipiunt, ad viresque astum adhibendum statuunt: eodemque artificio Nobiles petendos, quo populares ab illis captari soleant; quibus Nobilibus nulla ipsi verecundia sint obstricti: non enim se ab illis suis temporibus caritate & benevolentia adjutos; sed, consilio clam inter illos inito, per favoris simulationem, populares ipsos ad mutuam perniciem opibus suis armandi, illosque inter se committendi; ac per has ambages, cum per apertam vim non possent, ad eum dominatum subreperent; à quo illos deiecisset vir fortis & clarus Simon Buccanigra, ab omnibus popularis nominis civibus, in quibus aliqua ingenii & animi indoles sit, perpetuo imitandus. Gibellinas igitur partes subjiciendas, quæ Nobiles inter se sint divisuræ & commissuræ, magnamque illorum partem sibi adjuncturæ: specioso igitur titulo patriæ à servitute externorum eximendæ assumpto, magnos ad se concursus hominum faciunt; qui tantorum Ducum auctoritate excitati, majoribus motibus ad integrandos tumultus repente consurrexerunt: ingentibus igitur armorum agminibus fulti, aquilæ nomen, & Gibellinum subjicientes, urbem petunt: primoque adventu moenia aggrediuntur, irritum incepto, à dispositis præsiidiis repulsi, scalis relictis.

Perturbavit vehementer repentinus motus Vicarium regium, & consilium: qui delecta civium manu, ex omnium Factionum nominibus, tam popularium, quam Nobilium, ac tam Gibellinorum, quam Guelphorum, quicumque amantiores boni & quietis publicæ putabantur; illis arma tradunt, custodiam urbis inter illos partientes; gravi poena per edictum ceteris armorum tractatione interdicto. At invadentes, cum se in loco, quem tenebant, novas copias expectare constituisse simulassent, silentio insequentis noctis in averfam urbis partem custodiis neglectam transeunt; ac per portulam sancti Michaelis in urbem irrumpunt, magnis clamoribus Gibellinum nomen subjicientes: ad quem strepitum civibus excitatis, armisque ab omnibus statim arreptis; omnes urbis partes repente tumultibus & terroribus impletæ sunt; cum omnia clamoribus dissonis Gibellinum ac Guelphum nomen subjicientium personarent: neque quisquam in tanta rerum perturbatione & colluvione, atque in illis tenebris, quem locum peteret, quoque opem ferret, satis exploratum haberet. Auria & Spinulæ areas suas, in quas Gibellinas partes sequentes convenerunt, muniabant. Idem Flisci faciebant, ad quos Guelphi se aggre-

gabant: cum nonnulli ad prætorium accurrerent, ut Vicario præsidio essent; nonnullique tota urbe discurrentes, à maleficiis non abstinere. Tandem luce orta, ac tumultu magis ac magis crescente, omnes curæ in exitus platearum muniendos, ac vallis & trabibus intersepiendos versæ sunt; cum ad ipsas fauces prælia, odiis partium instigantibus, inter munientes committerentur: brevique civitas in duas regiones, tamquam in duas civitates, divisa est; cum utraque pars altera alteram occupasset, validisque munimentis firmasset; uniusque & ejusdem Factionis homines in regionem à Factione sua occupatam, ædibus propriis relictis, si quæ erant, in alterius Factionis regione, commigrassent. Guelphi eam partem tenebant, quæ ab æde divi Petri incipiens, ad ædem sancti Andreae porrigitur; atque, ædibus divi Laurentii & divi Ambrosii comprehensis, ad subjectum mare pertinet. Gibellini ab æde divi Lucae initium facientes, quidquid portæ Campi & ædi sanctæ Catherinæ per plateam Magdalenæ, Auriarumque aream interjectum erat, tenuerunt: quotidieque prælia inter ipsos committebantur: in quibus multi cadebant; cum, omni pietatis, sanguinis, humanitatis jure perfracto, neque frater fratri, neque amicus amico parceret. Quarum Factionum tanta vis fuit, ut Montaltum ipsum & Guarcum inter se divideret; cum hic ad Guelphos, ille ad Gibellinos sese applicassent: quæ Factione prævalente, Montaltus & Cervas Auria, ejus capita, prætorium invadunt, arcamque capiunt; ægre Vicario sese adversus tantam vim defendente: ceterum Montalti impetus pergentis ex ejus possessione Vicarium prorsus extrudere ab Auria cohibitus est; affirmante, sese satis operæ pretii fecisse, facultate Guelphis favore Vicarii subnisis Gibellinos opprimendi adempta: verum civibus non esse in animo ulterius progredi, aut dominatum regium urbe exigere. Sensit dolum Montaltus obrectatoris, ac ducatum destinatum ipsi invidentis: indignatus igitur, relicto Auria, in ædem divi Dominici cum suis secessit: quæ re animadversa, Guelphi, qui ad eam horam inferiores fuerant, terga Gibellinorum prementes, nonnullis detrimentis illos affecerunt, Oddone Grillo capto.

At Vicarius regius, tumultibus in dies crescentibus, majoresque vires assumentibus, omnia prius expertus, cum neque consilio, neque auctoritate, neque precibus denique, quibus aliquando minas miscebat, quidquam profecisset; haudquaquam sanum consilium ducens, majestatem regiam, quæ in sua persona periclitabatur, in tanta rerum colluvione contumeliis expositam diutius habere; sibi que ab impetu concitatae multitudinis timens, urbe excedere decrevit: quare, navicula clam conscensa, se Saonam confert, indeque in Galliam contendit. Ejus discessu res recruderunt; majoribusque motibus prælia integrata sunt; hominibus omni verecundia solutis, ipsoque certamine iras aciente: cum (tamquam non satis ipsi essent ad patriam lacerandam) Guelphi tria externorum peditum millia, Gibellini octo in urbem introduxissent: qui Guelphos viribus inferiores intra septa regionis ab illis occupata concluderant, tota ipsi urbe discurrentes: qui etiam, turribus interioris portus captis, triremique ex navalibus educta & armata, non modo terræ, sed maris & portus potentes facti, Guelphos commeatibus & annona intercluserant: quos intra septa compulsi, suasque opes illis prævaluisse gloriabantur: cum contra Guelphi laudi & decori sibi ducerent, Gibellinos intra munimenta sua, ut sæpe jactare soliti essent, perumpere non potuisse: quod, nisi mors Montalti impetum Gibellinorum nonnihil inter discordium repressisset, res ulterius processissent; nullaque umquam tempora majoribus cladi- bus insigniora fuissent.

Animis igitur principum civitatis ad pacem utrimque inclinatis, peropportunus adventus Gasparis Cossæ Neapolitani, viri magni consilii, magnique nominis, fuit: qui Legatum Pontificium Gallias petentem tribus triremibus vehebat. Is auctoritatem suam & sacrosancti Legati majestatem interponens, res ita composuit, ut plus duobus suffragiis Gibellini in summo magistratu haberent, atque in decem octo Consiliariorum numero decem essent Gibellini: munimenta quoque, veteri Castelletto ab anno ejus sæculi nonagesimo quarto ad eam diem addita, solo æquarentur: quod & factum est: quamquam ea res gravis fuit Guelphis, non satis adversæ Factioni fidentibus.

Discessu Cossæ, animisque hominum verecundia præsentis Legati, quo auctore pax inita erat, solutis; civitas in pristina mala illico redacta est, acrioribusque quam prius odiis, majoreque irarum certamine dimicari coëptum est: ac majora funera edita sunt; initio turbandi res à Guelphis facta: qui Prætorem ipsum suspectum, quod occulta consilia cum Gibellinis iniisset, prætorium ipsi in domicilium assignatum illis tradendi, comprehenderunt; ab extorto quoque ordinem consiliorum exquisiverunt: qua re commoti Gibellini, armis repente arreptis, atroces in Guelphos coorti sunt; acreque prælium cum multorum sanguine ac cæde inter illos subito contractum est; multis circumjectis ædibus incensis: miserabiliorque per eos dies, quam prius, fuit civitatis facies: cum à die pridie Idus Augusti ad Kalendas Septembris, quinquies & eo amplius, paucorum dierum interposita pace, prælia integrata sint; magnis editis crudelitatis & internecini odii exemplis, ac triginta amplius privatis ædibus ex magnificentioribus civitatis combustis; præter turres & ædificia publica iisdem incendiis hausta, munimenta quoque & septa mutuo sæpe refracta.

At, mense Septembri incunte, Gibellini acerrimi coorti noctu in munitiones Guelphorum impetum faciunt: quibus refractis, Lercariorum aream, firmissimamque turrim occupant: duæque & viginti ædes privatæ, atque ædes divi Petri incendio à Gibellinis injecto conflagrarunt: Guelphique, munitione constructa, angustiores se regione incluserunt: tandem odiis exsatiatis; nonnullis religiosis ac piis viris, Antonioque Justiniano auratæ militiæ Equite, & Gulielmo Centurione Ultramarino, bono & quieti publicæ studentibus civibus, & ab ejusmodi contentionibus remotis, sese atque operam indefessam, & auctoritatem suam interponentibus, pax convenit: cujus lætitia sonitu maximi tintinnabuli ex prætorii turri contestata est, in recensendisque damnis hujus belli, quæ civitas tum, animis ab ardore certaminum sedatis, magis sentire coëpit; præter publicorum & privatorum ædificiorum incendia, ac præter haud exiguum numerum primariorum civium cæsorum; detrimenta accepta plus decies centum aureorum millibus æstimata sunt.

Interea Rex Gallus, discessu Meldunensis ab urbe cognito, nullo modo curam Genuensium rerum omittendam statuens, successorem illico Genuam mittit Collardum Callevillam ex Consiliariorum suorum numero: qui, magna civium primariorum caterva, qui illi honoris causa obviam prodierunt, comitante, urbem est ingressus. Ejus adventu quies civitatis stabilita est; claustris viarum refractis, tabernisque apertis, commerciisque, quæ diu intermissa fuerant, repetitis. Unus Conradus Auria fuit, qui inquietiore, quam ceteri, ingenio vir, resturbare aggressus est: opido Varagine favore Guelphorum improvise adventu capto; cum eo cum triremi clam profectus esset. Oppressa statim sunt hujus motus initia, diligentia novi Vicarii; qui eo cum noningentis armatis, & duabus triremibus profe-

A ctus, triremi Auria in terram ejecta, opidum ab Auria extorsit; ipso, quique illum secuti fuerant, incolumibus cum suis rebus dimissis.

B Quiete civitati reddita, omisæ curæ externarum rerum repetitæ sunt; quattuorque triremes superiore anno in tutelam rerum Orientis decretæ, quæ in tantis urbanorum motuum occupationibus armari & instrui non potuerant, incunte autumnio, Georgio Granello præfecto, è portu tandem emissæ sunt: quarum tres, cum una, incertum qua de causa, forte abesset, in quattuor triremes Maurorum, quarum duæ minoris formæ erant, in mari Siculo inciderunt. Maurisque invadentibus, ad necessariam pugnam nostri attracti sunt, quæ atrox fuit, atque utrimque cruenta: nostrique extremo periculo proximi fuerunt, cum Mauri in triremem, quæ Paulum Montaltum Leonardi Ducis filium præfectum habebat, insiliissent; urgendoque ac gradum ulterius faciendo, nostris averfis, triremi usque ad malum potiti essent. Discussit periculum audacia & virtus Montalti: qui gravi febri implicitus, strepitu audito, ex lecto, in quo cubabat, profiliens, arrepto gladio, in tabulatum conscendit; suisque ipsius præsentia & adhortationibus in pugnam converfis, ipse primus Mauros invadit, omnibusque viribus connisus tandem avertit, magna illorum edita cæde. Conspecta est in primis gregarii cujusdam navalis focii è valle Bisannia virtus & fortitudo. Is Maurum nostris terribilem, mira quoque incredibilis fortitudinis opera edentem, uno gladii ictu capite, & altero brachio à reliquo corpore desecto, obtruncavit. Victoria tandem penes Genuenses fuit; hostilibus navibus vel omnibus, vel majore ex parte captis: nam ab Annalibus numerus non traditur, qui tantum magnam vim captivorum liberatam memoriæ prodiderunt: quæ res ut pergrata Siculis fuit; (erant enim fere ejus nationis) ita vehementer Tunetanum Regem offendit, cum quo civitas tum in pace erat: qui irâ incensus, omnes Genuenses in regno suo negotiantes comprehendi jussos carceribus inclusit: excusatione non accepta, penes suos culpam pacis violatæ esse: qui priores Genuenses invaserint, ad necessitatemque pugnæ recusantes adegerint. Eo anno pestilentia quoque, ne quid mali abesset, urbem invasit; minus quidem sæviens, quam superioris anni, cum non plus triginta mortales in die absumeret; ceterum eo insignior, quod per claras domos vaga multos primarios ac clari nominis cives abstulit; cum superiore anno per ignota tantummodo capita grassata esset.

E Sequitur annus ejus sæculi nonagesimus nonus, A. C. 1399. novo plebejo Magistratu insignis: tenuiores enim atque humilis sortis homines, motibus Factionum à primariis civibus tam Nobilium Factionis quam popularis nominis inductarum consopitis, tranquillitateque civitati reddita, vulgo conqueri, hujus concordia bonis solos Nobiles & potentiores frui, plebemque omnino illorum expertem esse: quin etiam meliorem fuisse suam conditionem, discordi quam pacata civitate: quippe illis contentionibus se ali solitos, neque injurias sibi armatis à Nobilibus fieri; at nunc totum contra esse: nam nobiles & primarios cives iis, quæ ipsis utilia sint, intentos, commoda plebis negligere; bonumque suum, bonum publicum appellare, sine ullo plebis respectu; tamquam plebs nulla pars civitatis sit: quin contra, eam tributis aliisque ex aliis intolerandis oneribus premere: neque id mirum, cum nemo sit in publico consilio, qui commoda eorum defendat, vocemque pro illa mittat: ad hoc injurias sibi quotidie à potentioribus fieri; in quibus arcendis non satis opis in Magistratum jurisdictione esse, quam primarii cives potentia sua infringant; Magistratibus conniventibus, qui ex suorum hominum

nam corpore sint: pacem igitur aliorum in suum bellum vertisse.

Hæc vulgo frementibus, magna hominum multitudo, tam Gibellinarum quam Guelpharum partium, ut numero ad postulata impetranda validiores essent, societatem consiliorum faciunt: nomine & insigni scipionis à summo inflexi, quem vulgo *scrozolam* vocant, assumpto. Hæc societas cum in ædem divi Augustini crebro conveniret; multis sæpe colloquiis inter se habitis, decreverunt tandem Nobiles à Magistratibus & Reipublicæ procuratoribus arcendos: hunc primum gradum ad ipsorum consilia exsequenda fore: reliqua postea visuros. Vicarius, re cognita, principem illorum, viatore ad illum missò, in prætorium vocat. Ille dicto audiens non fuit: quin contra, plebs, illo instigante, armis tandem arreptis, turrin ac portam divi Thomæ occupavit; totaque urbe discurrens, Regis ac populi nomen magnis clamoribus subiciebat: primariis popularis nominis civibus, venia admissorum à Vicario promissa, frustra illos compescere conatus: qui contumaciores facti, insequenti die tumultu majoribus motibus repetito, mille amplius numero prætorium, Vicario illorum furori cedente, invadunt ac diripiunt: qui tamen gubernator, continuo à primariis civibus ad mille & quingentos congregatis, in prætorium reductus est; prolixo illorum promissio confirmatus, sese atque omnem Nobilitatem, omnesque alicujus nominis cives illi adversus omnem vesanæ multitudinis inconsultam vim præsto semper futuros: cum dicerent, ea, quæ tum fierent, non minus sibi quam ipsi molesta esse, eaque mirari illum vetarent; utilitatem hos esse plebis impetus, dictitantes; ceterum breves ac consopitu faciles, si eorum animi suaviter & cum arte tractentur, resque leniter ducantur: concitatam igitur flectendam potius, quam frangendam, illiusque studiis in præsentia obsequendum; à Nobiliūque Factione petendum, ut quietis publicæ causa cedere paullisper, pro sua sapientia, suumque tempus expectare ne graventur: brevi enim, cum tumultus, quibus nunc omnia ardent, defuderint, suum illis locum restitutum iri. In eam rem primarii populares omnes suas curas collaturos; neque, nisi re perfecta, quieturos, pollicentur. Haud retractarunt Nobiles, necessitatem in voluntatem vertentes. Mos igitur à gubernatore plebi gestus est: quæ res eam à Spinularum domibus ad ædem divi Lucæ oppugnandis revocavit: Nobilibusque à Republica gerenda decreto publico exclusis; summus Magistratus quindecim popularis nominis civium civitati præfectus est: sed ne sic quidem animi multitudinis mitigati sunt; frementis, se in aliorum utilitatem sine ullo suo fructu dimicasse, ac tantos labores & discrimina impendisse: eos enim homines in Magistratu esse, qui tantum hoc populari nomine secum conjuncti sint; ceterum voluntate, studiis, consiliis non minus, quam Nobiles, disjuncti: de plebis igitur corpore novum Magistratum creandum; antianorum Magistratu & jure rato manente: cujus novi Magistratus munus sit, ea, quæ salubria civitati ac populo commoda censuerint, Vicario proponere; ac jurisdictionem Magistratum propugnare, si armis Nobiles & primarii cives illam potentia sua infringere tentarent. Gestus est in hac quoque re mos, Magistratusque quattuor virorum de plebe creatus est, qui *Priores* appellati sunt; duodecimque illis ex eodem corpore in consilio additi; in eorumque verba omnes opifices jurarunt. Majus in dies robor, majoremque auctoritatem assumere coeperat novus is Magistratus; neque dubitatur, quin ad magnam amplitudinem venturus fuerit, si diuturnior fuisset: cum multi ex primariis civibus ad illum accedere coepissent, ac, quæ à Republica esse

A censerent, ea illis exponerent; majorem vim, majoremque auctoritatem, pro jure suo, ad ea persuadenda cum Magistratum habiturum putantes; cujus opes armis opificum munitæ regentibus formidolosæ esse poterant. Quadrimestri tempore popularium antianorum circumactò, docuit plebs, se non de Nobilibus exigendis laborasse, sed de suo Magistratu impetrando dimicasse: passâ est enim Rempubicam in pristinam formam redire: antianorum Magistratu, & reliquis publicis procuratoribus, & honoribus inter Nobilis Factionis & popularis nominis cives æquali numero distributis.

B Infecerant urbana mala, tamquam tabes, totius ditionis incolas, in qua nonnulli Guelphæ Factionis homines, duabus minoris formæ triremibus armatis, excursionibus ac populationibus totam oram infestam faciebant; prædam hominum ac rerum Gibellinorum agentes, captosque ad necessitatem se redimendi adigentes: quarum triremium altera capta est ab una ex triremibus ordinariis civitatis custodibus, cui præerant Augustinus Spinula & Baptista Justinianus. Ejus præfectus, ac navales socii ad viginti numero in promontorio capitis Phari jugo suspensi sunt: cum etiam circumjecta urbi loca vexationibus non carerent, incolis ac rusticis contumacioribus factis: ut cives, eorum metu latrocinii grassantium, amœnis villis & suburbanis relictis, se in urbem recipere coacti sint. Sub finem anni, quattuor triremes in custodiam locorum Orientis, Friderico Promontorio Duce, missæ sunt: duæ præterea impensis Regis armatæ eodem profectæ sunt, præfecto Joanne Lemenigrio Bucicardo magni nominis magnarumque opum viro; qui postea Vicarius Genuam à Rege missus est, ut mox dicemus.

C Sequitur annus ejus sæculi centesimus, quo superiores A. C. 1400. cædibus quidem & incendiis, ac cladibus omnis generis foediores & lugubriores fuerunt; ceterum nullus umquam fuit, aut majoribus motibus agitatus, aut crebriore regiminum mutatione magis varius; majoribusve editis à populo Genuensi mobilitatis suæ documentis, magis erubescendus. Initium turbarum factum est à duobus de plebe hominibus, Cosma Castillionio, & Raphaele Carpeneto. Ii, sive sua sponte commoti; sive, quod verisimilius est, à principibus Factionum inducti, ingemiscuntibus, sese principatu civitatis excidisse, neque Gallorum imperium concoquere valentibus, ad ipsorum potentiam & dominatum extinguendum introductum; occulta consilia cum nonnullis suæ sortis hominibus de Collardo ejiciendo inierunt: quæ cum, ut inter multos agitata, emanassent; Castillionius comprehensus est, & carcere inclusus: Carpenetus fuga periculum evasit, in vallemque Porciferæ se recepit, unde oriundus erat; in quaque magnas clientelas habebat: qui nihil adverso eventu deterritus, aperta vi, quoniam insidiæ non successissent, agendum, omniaque ultima tentanda ratus; ut consiliorum socium supplicio eriperet, magna hominum Factionis suæ manu corrogata, ad moenia silentio noctis accedit: portaque divi Thomæ nulla satis valida statione firmata incensa, in urbem penetrat, passimque discurret, *Io popule*, conclamans: ad quam vocem civitas momento temporis in armis fuit. Qua improvisa re perculsus Vicarius, non satis ad defensionem paratus; nemineque metu grassantium in ejus auxilium consurgente; cum ne opificum quidem Priores, ad quos nullus hominum concursus, contra quam sperabatur, factus est, sese tumultuantibus opponere ausi essent; omnis reliqui consilii inops in turres sancti Andreæ se subducit. Carpenetusque Castillionium, cujus potissimum causa res moverat, carcere extrahit: neque ulterius à tumultuantibus processum est: civitasque quatrimum sine rectore fuit.

F Is motus Factiones aliquamdiu consopitas excitavit;

vit; hincque Adornii, illinc Guarci, & Montalti conjuncti, veteribus odiis repetitis, ad arma consurrexerunt; præliumque inter illos non sine aliquorum cæde commissum est. Numquam civitas in majora aut plura studia distracta est, aliis alio tendentibus: cum alii dominatum regium prorsus rejicerent; alii illum impense retinerent; alii ducatum repeterent: ut, fluctuantibus animis, magnisque ubique difficultatibus occurrentibus; nemini in tantis tenebris, quid vellet, quodve consilium sequeretur, satis constaret. Re diu multumque in circulis & coetibus sermonibus agitata, magnisque contentionibus jactata, ingens multitudo honestorum civium in prætorium tandem convenit: ac magis inopia potioris consilii, quam ut illud, quod faciebant, satis probarent; ut tumultus in præsentia compescerent, magistratu Vicario Gallo abrogato, cujus nomen plebs ferre non poterat; Baptistam Buccanigram auratæ militiæ Equitem in ejus locum sufficiunt, titulo dato Capitanei custodiæ regiæ: Oratoremque ad Regem mittunt, qui factum excuset à necessitate expressum, confirmationemque Buccanigræ postulet. Neque excusatio à Rege accepta est; & electio Buccanigræ rejecta: quin immo Collardo, qui discriminibus se subtrahens, interea Saonam se receperat, imperatum est, ut auxiliis à Principe Mediolanensi & Marchionibus Carrettanis postulatis, dum ipse Rex comparat, faceret, quod è Regis re & dignitate, atque ex sua fide esse censeret.

Favebat in primis Buccanigræ Antonius Guarcius, tamquam consiliis suis aptiori: amboque conjunctis studiis animum ad turrim Castelletti, quæ à Gallis tenebatur, occupandam adjiciunt: eaque de causa nonnullas turres atque ædificia illi circumjecta communiunt. Qua re Adornii commoti, ædes suas ad divæ Agnetis ipsi quoque munimentis & stationibus firmant: quæ res omnia inter eas Factiones suspiciosiora fecit. Buccanigra quidem vehementer commotus, timere rebus suis cœpit: cum præsertim Adornii perpetui hostes sui, Montaltis, qui ab amicitia & societate Guarcorum per eos dies se averterant, sibi adjunctis, majores vires, majusque in dies robur assumerent: qui eo quoque progressi sunt, ut arcem prætorii aggredierentur, irritum tamen incepto. Quare rebus suis prospiciens Buccanigra, consilio civitatis convocato, impetravit, ut octoviri crearentur, discordiarum componendarum & pacandarum rerum causa; milleque milites scriberentur, ad regii dominatus majestatem & Buccanigræ magistratum tuendum: qui omnes apparatus inanes evaserunt: nam, cum Adornii plana omnia ante arcem Castellettum occupassent, neque populus tinnitibus è summa prætorii turri ad opem ferendam, ut mos est, à Buccanigra vocatus, neque opificum Priores, ac ne ipsi quidem recenter conscripti milites, qui in ejus verba jurant, se commovissent, ea re fractus Buccanigra, prætorio relicto, Guarco frustra illum retinente, in privatas ædes suas concessit. Quo impedimento amoto, Adornii Montaltis sociis & Guarciis animos ad certamina acunt: quæ plurima ac per varias occasiones per eos dies, quibus civitas vacua rectore fuit, inter illos commissa sunt: cum Adornii vires & animi crevissent, Orlandi Fulgosi fratribus (quæ Factio multos jam annos conticuerat) adjunctis; qui ambo conjuncti prætorium petunt; ejusque potentes facti, magnis hominum illarum Factionum gregibus tintinnabuli sonitu vocatis, ad ipsos concurrentibus, tota urbe discurrent, nomen utriusque familiæ subjicientes. Qua re offensi vehementer Montalti, indignati nomen suum præteritum, relictis Adornii & Fulgosiis, se iterum cum Guarciis, à quibus modo discesserant, conjungunt: quibus etiam se addiderunt Jacobi Fulgosi filii; indignati, Orlandi fratres sibi ab Adornii honore prælatos. Integratis

A igitur utrimque viribus, sæpe concursus est, victoria neutro inclinata.

B Multipliciter eo tempore bonorum animiangebantur; hinc miserabili civitatis à suismet civibus undique laceratæ adspectu, illinc metu à Rege tacite animis insidente; quem fama erat armis amissum dominatum repetiturum: octovirique pridem ad res constituendas electi, consilio vocato, duodecimviralem Magistratum elegerunt, omnes popularis corporis cives, æqualibus partibus Guelphos & Gibellinos: qui, tribus trium vallium præfectis adjunctis, res regerent, dum novi Vicarii adventus expectatur: ceterum inire magistratum prohibiti sunt ab Orlando Fulgosi; qui postridie cum ducentis armatis prætorium ingressus, sese rectorem civitati præfici postulavit, irritum incepto: nam Montalti & Guarci vires suas illius conatibus opposuerunt; acrique & cruento prælio, in quo multi utrimque ceciderunt, dimicatum est: Fulgosiis & Adornii è prætorio tandem expulsis, haud levibus acceptis detrimentis, Thomaque Orlandi fratre ac nonnullis aliis captis: qui tamen, paucis interjectis diebus, dimissi sunt; cum Montalti & Guarci prælio superiores curam muniendi prætorii neglexissent.

C Interea quattuor Oratores ad Principem Mediolanensem missi sunt, postulatum, ut sese pro Genuensibus veteribus amicis suis apud Regem deprecatores interponat, ejusque animum erga civitatem mitiget: cujus rei eventu bonorum animis suspensis, ne civitas interea sine rectore perseveraret, Baptistam Francum Lusardum plebi in primis acceptum rectorem civitatis & Capitaneum regiæ custodiæ usque ad adventum regii Vicarii successoris eligunt: non multoque post Franciscus à Montecclaro Ducis Mediolani opera à Rege missus, Genuam venit: qui prætorium petens, ad mandata regiæ exponenda, eo vesanæ multitudinis furor proventus est; ut, à magnis utriusque Factionis hominum gregibus impetu in illum facto, retro iter repetere, seque in domicilium sibi assignatum recipere coactus sit; Lusardo clamante ac testante regiam majestatem graviter lædi: qui, cum omnia summa fecisset, ut regia mandata vel ore ac viva mandatarii voce, vel saltem scripto ab illo edito cognoscerentur, neque quidquam profecisset, ad culpam à se detestandam, magistratu abiit: Montecclarus tamen paullo post tumultuose auditus est: qui cum decretum Regis, operamque & diligentiam à Mediolanensi apud Regem Genuensibus navatam exposuisset; decretum est interea, ut ordinarius antianorum Magistratus civitati præesset.

E Ceterum paullo post Rainaldus Olivarius à Rege missus, Genuam venit; qui res regeret usque ad adventum Joannis Lemenigrii cognomento Bocicardi, novi Vicarii à Rege decreti: cujus eadem fortuna, quæ Montisclari, quamquam paullo senior fuit: homines enim trium præfecturarum, Factionum capitibus instigantibus, magno impetu magnisque clamoribus in urbem irrumpentes, urbanaque plebs illi adjuncta, carceribus fractis, totaque urbe discurrentes, nomenque populi subjicientes, Olivarium, nemine pro illo consurgente, concitataque multitudinis furori obviam ire audente, in turrim Castellettum non satis munitam compulerunt: cui malo nulla alia medicinæ faciendæ ratio à bonis & quietis civibus inita est, quam Lusardum Olivario collegam addendo: quæ res cum plebi non probaretur; ab eademque rejectus esset Gabriel Recanelus, ad idem munus publice electus; necessario, plebeque cupientissima, is Magistratus in Lusardum solum iterum recidit, Olivario plane excluso: bonis & quieto ingenio civibus tacitum quidem serenitibus; ceterum intimis sensibus ingemiscens, nimis sæpe majestatem regiam lædi, ac contemni: neque

neque dubium esse, quin tanta civitatis contumacia à culpæ expertibus gravibus poenis luenda aliquando sit.

At Baptista tanta plebis in se propensione confusus, nonnullorum licentiam ac nimiam linguæ libertatem cohibere anno ejus sæculi primo aggressus est; Orlando Fulgoso, Adornino Adornio, Gabriele Recanello comprehensis, per causam, quod nimia orationis acerbitate præsentem regiminis formam ac regentes perfringerent: quod esset perturbando quieto civitatis statui, seditionibusque & turbis excitandis: quæ res, ut in sæculo tam corrupto, insolita magnos sermones præbuit; vulgo factum damnantibus ac frementibus, etiam sermonum libertatem adimi; ac quærentibus, quid tandem in teterrima servitute umquam ulterius fuisset? Seditionem igitur veritus Baptista, rem illis temporibus omni quamvis levi momento excitari solitam, de amicorum consilio, comprehensos omni poena intactos dimittit: quæ res multum homini de auctoritate detraxit, solutioremque licentiam facinorosorum fecit, nullo severi imperii metu cohibitam; peramplamque fenestram maleficiis tam in urbe quam in tota ditione fecit: in quibus insigne illud audaciæ exemplum editum est, Andreae Zoalii Capitanei justitiæ à subjunctis Flicorum ditioni in pago Fontanelio obtruncati; quod tela illis pro jure muneris sui adimere voluisset.

Talis civitatis status nomen Genuense, verendum olim exteris ac maximis Regibus, finitimis atque humilibus Proceribus contemptum fecit: ut non dubitarit Gerardus Appianus Plumbini Dominus Andreæ Lomellinum per ejus fines iter facientem, leviam nonnulla causatus, comprehendere, & ad necessitatem se redimendi adigere: quam tamen injuriam ille continuo ultus est, ditionem Appiani cum quattuor triremibus, quas, fratribus, ac Lazaro Carretto, & Orlando Fulgoso adjuvantibus, brevi comparavit & instruxit, invadens: qui haud dubitatur, quin illam insulam Domino adepturus fuerit; nisi ille de injuriis fatiscississet, viginti millium aureorum nummum decissione.

Cum omnia, tam in urbe, quam in circumjacentis locis, tumultibus, latrocinis, cædibus arderent; neque ad maleficia inhibenda satis magna vis esset in Lusardi imperio negligi incepto: octoviri popularis corporis utriusque Factionis rebus regendis creati sunt, cum amplissima omnium potestate: ceterum, cum ne sic quidem turba ac tumultus sisterentur, Baptistæque regimen in summum odium & contemptum venisset, Baptista ab octoviris magistratu abire jussus est: in ejusque locum rebus civitatis regendis usque ad novi Vicarii adventum, duo virtute & fortuna præstantes cives successi sunt, Antonius Justinianus Longus, & Georgius Adornius, qui Priores nominati sunt: quorum illud primum egregium fuit, quod morem in regiminum mutationibus, quæ creberrimæ tum erant, delictis ignoscendi, qui mos licentiam peccandi alebat, salubri lege sustulerunt. Eoque contemptus, sæculi vitio, legitimum imperium venerat, ut nonnulli infimæ fortis ex præfectura Bisamnia homines, qui turres sacrarum ædium sancti Stephani & Inviolatæ præsidii & armis firmatas tenebant, persuadendo, ac pene precibus & pretio ab illis deducendi fuerint; cum imperio agere periculosum Priores ducerent.

Cum igitur ad extremum ventum esset; nullo legum fræno, nulloque Magistratuum metu dissolutam peccandi licentiam cohibente; affuit tandem necessarium remedium rigidæ severitatis Boticardi; quæ res prostratas erigeret, ruentesque ab interitu sisteret. Is vir multis egregiis virtu-

tibus commendatus, compluribusque rebus gestis clarus, ad magnum honoris & auctoritatis locum apud Regem conscenderat: unus ex Mareschalis, quod est apud Gallos amplissimum munus, ac Legatus in Italia creatus: qui ingenio ferox, corporeque procerus, adspectu ipso malis terribilis, aptus in primis visus est imperio regio fanciendo, ac vulneribus civitatis sanandis. Is, delecta mille peditum manu, ac totidem equitum ala, urbem ingressus est; omni honorum genere à civibus obviam effusus exceptus. Illius adventus spem bonorum ad optima quæque jam inde, cum auditum est illum gubernatorem à Rege creatum, erectam non modo confirmavit, sed mire etiam auxit: quamquam initia ordinarum rerum ea fuerunt; quæ dubiam existimationem facere possent, utrum ea ad audaciam factiosorum hominum compescendam & infringendam, seditionumque & tumultuum vias præcidendas; an ad imperium Genuæ Regi suo stabiliendum, ab illo compararentur: nam principio, biduo, postquam urbem ingressus est, Baptistam Buccanigram, ac Baptistam Francum Lusardum ea dignitate, iisque familiis ortos, cives, tamquam majestatis convictos, quod regimen civitatis, post illam Regi deditam, Regis injussu assumere ausi essent, capite plecti, indicta causâ, jussit: quod tamen munus uterque à consilio civitatis, liberis suffragiis, ac bonis approbantibus, mandatum acceperat; salvo Regis honore, cum titulo regionum custodiæ præfectorum; tum, cum, civitate rectoribus orbata, omnia factiosorum & seditionum audaciæ exposita essent: qui cives ad supplicium ducti, cum supposito asseri caput acclinare recusarent; eaque de re rixa & jurgio inter muneris exsequendi ministros & plebem adstantem exorto; cum plebs ingentes clamores sustulisset, Regis nomen subiciens; hi clamores apparitores, velut alienatos mente, à ministerio exsequendo in se converterunt: qua re factum est, ut Lusardus, impetu capto, ex apparitorum manibus negligentius eum custodientibus se eripuerit; turbæque faventi sese immiscens, ex arca prætorii atque ex urbe se proripuerit; in suburbanumque suum receperit: ubi cum novem dies latuisset, furtim urbe & finibus Genuensibus incolumis tandem excessit: de Buccanigra supplicium sumptum: Lusardi domus solo æquata.

At insequentem anno ejus sæculi altero arcem lo-A.C. co edito ac civitatis cervicibus imminentem ædificavit: turrim enim Castelletti laxum spatium munimento amplexus, valido muro ac præalta fossa cinxit, lateraque in circuitu turribus firmavit: ad hoc arma civibus ac plebi rusticæ, præter gladios & majoris formæ scorpiones, ademit; quæ in prætorium comportari jussit, per causam civitatis impensis, quæ in stipendia militum fiebant, levandæ; quorum tanto numero nihil opus fore dictabat, materia maleficiorum inquietis ac perditis hominibus adempta: postremo Vicarios, Vexilliferos, Comestabiles, nec non opificum Consules plebi ademit; cui omnibus conventibus & cœtib; in perpetuum interdixit: Consulesque opificum, tam superioris, quam hujus anni à plebe electos, quæ sese nullum jussum ea de re accepisse dictaret, carcere inclusos pecunia multavit: quæ severe exacta est: quo exemplo perterriti Vapulantium Fratrum ordines, in domos sodalitatum ad statas ac sollempnes preces convenire destiterunt; veriti, ne res ad cœtuum & conventiculorum interpretationem revocaretur: quæ omnia quamquam liberæ civitati paullo duriora videbantur; cives tamen non æquo modo animo, sed læto quoque ferebant, diuturnitate malorum fessi; atque ærumnas & calamitates, quibus discordiæ civium

ac factiosorum hominum ambitio civitatem involvisset, adhuc horrentes : unum fuit, quod homines pro cuiusque sorte varie affecit : non enim coetibus plebi interdicens, ac magistratus illi adimendo, tantam gratiam à primariis civibus, atque ab iis, qui hæc fellulariorum conventicula tamquam seditionum officinas improbant, Bocicardus iniit ; quantum apud tenuiores offendit. Hi conditionem suam ingemiscences vulgo fremere, ne miseras quidem suas complorandi, atque inter se consolandi relictum locum ; quin etiam, Magistratibus sublatis, neminem fore, qui ipsorum jura defendat ; ac pro ipsis aut in judiciis, aut ad civitatis Magistratus, aut, ubi res poscat, vocem mittat : verum hæc non à Bocicardo in primis manare ; sed à potentioribus & opulentioribus civibus, qui hæc illi suggerant, quique huius usuram lucis, si possint, sibi quoque sint adempturi : speciosum illos titulum seditionum causas præcidendi jactare : quasi non ipsi harum ipsarum seditionum atque omnium civitatis malorum ambitione sua origo & fons sint, dum in primum civitatis locum unusquisque tendit ; aut quasi plebs se umquam commoveat, nisi ab illis instigata ; neque illos pudere plebem novarum rerum cupidam alternis pene verbis appellare ; quarum ipsi non cupidi modo, sed auctores quoque & effectores sint : quarumque consilia non inter se dumtaxat, sed cum exteris quoque Principibus continenter struant.

Ceterum Bocicardi opera adeo grata civibus fuerunt, ut, Dominico Imperiali & Cosma Tarigo Oratoribus ad Regem missis, enis precibus impetrarint, ne Bocicardus ab illo umquam per omnem vitam Genua revocaretur ; cuius prudentia & virtute civitas, sese à præteritis malis respiraturam, atque ad priscum illum feliciorem temporum statum redituram, speraret. Quæ res impetrata ingenti gaudio civitatem implevit : fuit enim Bocicardus omnibus virtutibus, quæ in claro & cello viro esse possunt, vere admirabilis ; ab omni flagitiorum genere omnibusque libidinum illecebris ac juventutis lusibus natura longe remotus, ad hoc religionis ac sacrarum ceremoniarum, divinique cultus diligentissimus observator ; cum magnam partem temporis sacris & precationibus daret. Condecorabant justitiæ studium, animi magnitudo, regia liberalitas, intrepidus ad terrores animus, celeritas in negotiis susceptis conficiendis, ingeniumque minime in consiliis rapidum, sed omnia circumspiciens ; quaque re nihil est ad hominum benevolentiam magnæ fortunæ viris attrahendam validius, summa humanitas, morumque suavitas, atque in quotidiana consuetudine & colloquiis comitas & affabilitas : quibus laudibus id assecutus est, ut omnis generis hominum voluntates teneret : cum boni eximias virtutes amarent, improbi vererentur. Ejus egregium eo anno opus fuit opidum Monæcum situ munitissimum Ludovico Grimaldo cum suis rebus abire permisso ademptum ; ac vallis Arociæ cum arce recuperatæ ; quæ tamen exercitum expectavit.

Eo anno Famagustæ decem humilis fortis homines de urbe Jano Regi tradenda ac porta Nicosienfi occupanda conjurarunt : ceterum, cum ad consilium exsequendum ipsorum paucitas non satis esset, socios consilii participes expectantes, quiescebant : verum casus inopinatus periculum discussit : nam cum quodam die milites, qui erant in statione & custodia portæ, postmeridianas horas lusu tabellarum, ut sit, traducerent, contentio inter illos orta est ; quæ primo ad clamores & jurgia, mox ad ferrum exarsit : ad quem strepitum cum magnus populi concursus ex omnibus civitatis partibus factus

esset ; unus ex proditoribus, qui forte erat in proxima caupona, strepitu exaudito, ratus conjurationis socios ante tempus portam occupare voluisse, subito timore amens, nihilque percunctatus, ad Antonium Guarcum Prætorem accurrit, sperans se, consilium enunciando, veniam criminis impetraturum ; remque omnem, ut ab initio ducta erat, aperit. Prætor proditores ad unum comprehensos ac criminis convictos una cum accusatore jugo suspensos necavit.

Regnabat tum Janus Lusignianus Genuæ natus & educatus ; magnoque in honore & caritate, dum apud Genuenses fuit, semper habitus : qui tamen Genuensibus Famagustam adimere tentavit, arta obsidione cinctam : quam se non prius soluturum affirmabat, quam aut urbem cepisset, aut cani sibi nati essent, cum unum & vigesimum ætatis annum tum ageret : qui cum die quodam cum Guarco Prætor ab illo evocatus, ad mœnia accedens in colloquium venisset ; Guarculusque illi beneficia & honores à Genuensibus perpetuo acceptos memoraret, ingratumque animum exprobraret, qui illis Famagustam Petri patruelis, ac Jacobi parentis Regum concessu tot annos possessam adimere studeret, respondit : *Nihil omnium, quæ dixisti, Prætor, insicias eo ; Genuæque me natum & educatum glorior ; multisque beneficiis & honoribus à Genuensibus, dum apud illos essem, affectum numquam negabo : ceterum neque tu, neque quisquam mirari debet, si mores atque indolem Genuensium cum lacte quoque imbiberim. Si, cum exteris ac longinquas Provincias animi magnitudine petere soleant, urbiumque & opidorum imperia sibi in illis parare, magnopere me à Genuensium meorum virtute & instituto degenerare existimarem, si urbem mihi finitimam atque in sinibus meis sitam, rationibusque meis tum aptam, tum autem à Majoribus meis fundatam ditioni meæ adjungere non quærerem. Tu quoque, Prætor, memoria tenere debes, quam multa gravia in cives tuos admiseris ; dum principatum patriæ tibi parare studeres.* Quibus rebus pronunciatis, nullo responso expectato, calcaribus equo subditis, è Prætoris conspectu se proripuit. Famagustæ subsidio tres triremes, Antonio Grimaldo Hierosolymitani Ordinis Equite præfecto, Genua missæ sunt : qui cum Famagustam appulisset, Rex obsidionem solvit ; Catalanique tredecim naves, quas in portu habebant, demerserunt.

Eo anno duæ Genuensium triremes, quæ in Cyprum iter habebant, Iluam insulam, quæ receptaculum hostium esset, Domino Plumbini adimere tentarunt : sed irritum inceptum fuit ; Genuensesque castellum quoddam improvise ab ipsis occupatum, restituerunt. Eo anno nonnulli trium vallium homines temeritatem armorum adversus præsentem Reipublicæ statum sumptorum ultimo supplicio luerunt. At Vicarius nullas quamvis minutas officii partes negligens, quattuor opificum rectores ab ipsomet institutos jussit ducentas anniverfarias libras ab universis opificibus colligere, easque Augustinianis Monachis dare, ad damnum compensandum anniverfarii doni ab ipso vetiti.

Eo anno, cum duo potentissimi orbis terrarum Principes, Bajazetes Turcarum Rex, ac Tamerlanus Tartarus, omnes Orientis vires secum trahentes, (trecenta enim millia hominum Turca, octingenta Tartarus sub signis habuisse dicuntur) internecino bello ac majoribus prope odiis quam viribus pugnarent ; Genuenses Peræ urbis incolæ, postulante Tamerlano homine implacabilis iracundiæ, ejus signa sustulerunt.

Insequentis anni initio ejus sæculi tertii, Baptista Lusardus, cum apud Marchiones Varsii exfularet, iis armis, quoniam aliis non posset, gubernatorem oppugnare cœpit, quæ semper magis peten-

petentem quam petatum fere lædunt; hoc est verbis, probra & maledicta in Vicarium continenter ingerens: quæ Vicarii iracundiam adeo commoverunt; ut villam Lufardi in suburbano Myrteti illico complanari iusserit: ita Lufardus immodicæ linguæ rei familiaris jactura poenas dedit.

Eo anno Emanuel Palæologus Græcorum Imperator, qui Constantinopoli profectus, ad opem Christianorum Principum adversus Bajazetem Turcarum Imperatorem efflagitandam, ultra Alpes animum fuerat, domum rediens, Genuam venit: qui honorifice & comiter exceptus est, donis etiam cultus, ac tribus triremibus tam in ipsius, quam in locorum, quæ Genuenses in Orientis Provinciis possidebant, defensionem concessis.

Eodem anno Rex Cypri iterum Famagustam, copiis admotis, obsidere coepit: adversus quem classis novem triremium, duarum galeatiarum, ac septem ingentium corbitarum decreta est: cujus is ipse Vicarius præfectus fuit. Quo motu audito, Rex Genuam pacem postulatam misit, neque illam impetravit; omnibus lascivientis Regis audaciam bello domandam clamitantibus. Igitur gubernator, cum Cyprum appulisset, Regi supplicii ac nullas condiciones recusanti facile pacem dedit, cum majoribus rebus immineret; omnibus prius impensis in classem factis ab illo persolutis. Vicarius, rebus Cypriacis pacatis, Candelorum petit; navibusque, quas in eo loco nactus est, incensis, Dominum Candelori supplicem in gratiam & amicitiam recepit: indeque profectus Berytum appulit, urbemque diripuit: quod ne idem Alexandria faceret, ab adversis ventis prohibitus est: cumque pacem à Sultano impetrare non potuisset, quam ille ultro oblatam respuit; classisque Genuensis, multis partim mortuis, partim ægrotis, imbecilla ac manca facta esset; itinere retro converso, Genuam repetit: cum tres triremes, duæ Rhodienses, una Chienfium sese illi itinere addidissent. Quo Peloponnesum prætervehente, undecim Venetorum triremes ac duæ galeatiæ ex portu Junco prodeuntes, pace violata, impetu in illum facto, tres triremes capiunt: quas Methonem trahunt; captivosque Genuenses Venetias mittunt: gubernator cum sex reliquis triremibus iter persequens, Veneta galeatia, quæ forte in illum incidit, capta, Genuam pervenit.

Hic annus non omnino à civilibus motibus quietus fuit; quorum suspicione triginta Genuenses cives exsilio multati sunt. Pudet illorum temporum ignominias civitatis nostræ referre; quæ eo contemptus venerit, ut duo privati cives, Casanus Auria ac Baptista Lufardus, ausi sint per litteras patentes suas bellum Reipublicæ indicere: qui Saxello opido profecti, cum Arenzanum usque perrexissent, ab urbanis copiis adversus eos, Bartholomæo Grimaldo Duce, missis, repulsi sunt. Ac ne illud quidem exiguum dedecus fuit; sex hominum millia ad oppugnandum Saxellum missa re infecta rediisse; cum tamen in reditu ditionem Marchionum Variorum non exiguis cladibus affecissent: ceterum opidum Saxellum paucis post diebus à Casano & fratre in gratiam receptis Reipublicæ traditum est, ea conditione, ut dirueretur. Eodem anno Gerardo Appiano Plumbini Domino petenti pax data; cum decem millia aureorum nummum ad damna refarcienda persolvisset.

Eo anno Pileus Marinus Archiepiscopus Genuensis morum sanctitate venerabilis, ad reliquum cursum vitæ sacerdotaliter semper actæ facinus cum singulari pietate conjunctum, atque ad omnem posteritatem memorabile addidit: totus enim

A in animarum salute procuranda, moribus facerdotum corrigendis, religionisque ac sacrarum rerum cultu stabiliendo & amplificando, animo & cogitatione defixus, alterum munus vestigialium ac bonorum Ecclesiæ procurandorum, remque pecuniariam administrandi tamquam fordidum & ignobile atque Episcopo indignum adspersus, quattuor primarios cives sibi publice datos collegas adscivit; quos curationi huic bonorum Ecclesiæ in egestatem miserorum sublevandam distribuendorum, ac rei nummariæ tractandæ à se & à successoribus in perpetuum ablegatæ præfecit: qui Magistratus à re, misericordiæ appellatus, ingentia incrementa paullatim accepit; amplissimis juribus à Romanis Pontificibus, & à Republica auctus.

Insequenti anno pax cum Venetis renovata est à procuratore ea de causâ Genua Venetias misso, gubernatoris permisso; qui tamen privatas inimicitias atque odium in Venetos non deposuit; litteris ad Michaellem Stenum Venetiarum Ducem, & ad Carolum Zenum præfectum classis, quæ superiore anno Genuensem classem invaserat, in hanc sententiam privatim datis, quas non ab re duxi hic inferere: *Joannes Lemenigrius cognomento Bocicardus Marefchallus Francia, Michaeli Steno Duci ac Carolo Zeno civi Veneto salutem d. Litteris vestris ad Regem meum pridem datis, quibus me falsa invidia pacis violata onerare studuistis; crimenque, quod in vos valet, in me transferre non erubuitis, jamdudum respondissem; nisi me Gallorum & Genuensium, quos Venetis captivos habebatis, respectus tenuisset: quibus nunc dimissis, faciendum mihi existimavi, ut calumnias & mendacia vestra refellere non amplius differrem. Scripsistis, me in urbe Beryto bona ac merces Venetorum depradatum esse: si id fecissem, summa cum ratione fecissem, atroci vestra injuria provocatus; quorum Consullem civitatis Nicofia non puduit, certo navigio missis, Syrios religionis nostræ hostes monere, sibi à me caverent, qui eo cum exercitu brevi appulsurus essem: ceterum prada Beryto abacta ita exigua fuit, ut verisimile non sit, merces Venetas in ea fuisse: quæ res cum Venetorum ipsorum vestrorum facto, tum meo comprobatur: nam, cum tanta sit in illis regionibus Venetorum multitudo; nemo tamen ad me expostulatum, ac res Venetorum repetitum venit: neque ego naves, aut res vestras, quas Famagusta in portibus ac Rhodi habebatis, cum id mihi expeditum esset, attigi; quod utique fecissem, si ullarum vestrarum cupiditas me tenuisset. Nam, quod scripsistis, te Carolum, cum ego Methonem præterveherer, in animo habuisse, pro amico mihi obviam venire, ac pradam ad Berytum factam amicabiliter repetere; ceterum cum animadvertisses, me hostili animo ad vos accedere, te ad necessariam pugnam à me attractum: in qua te victorem discessisse, tribus triremibus de meis captis, ac reliquis in fugam coniectis, gloriatus es. Ea in re quid aliud vos egisse putatis, quam ut ad perfidiam injuriamque rupti fœderis mentiendi quoque impudentiam adderetis? quo modo enim ego hostili animo accedere ad vos potui, qui sauciorum ac regendis armis inhabilium classem plenam haberem? quam, si hostili animo in vos fuisset, magno bellatorum numero firmare potuissem, quorum magnam copiam in onerariis reliqui: ceterum cum me per amicorum littora pacatum iter facturum crederem, neque fides vestra, quos nulla in re la-*

A. C.
1404.

cim vos, ego decem; vos decem octo, ego quindecim; vos viginti quattuor, ego viginti; vos triginta, ego quinque & viginti, modo neminem, nisi Venetos ducatis. Veneti enim soli lassitis, neque ego quemquam, qui non aut Gallus, aut Genuensis sit, cum utrique lesi simus, ducam. Quod si magis certamen navale vobis tanquam illi magis assuetis cordi est; singulis triremibus equo Marte concurramus, quæ neminem iis de causis, quas dixi, nisi harum nationum vebant. Quibus litteris Venetias à certo nuncio delatis, nihil à Venetis responsum est.

At Bocicardus, sive de Genuæ imperio Regi suo stabiliendo magis quam de salute Genuensium laboraret, sive hac ipsa in Regem sancita obedientia salutem Genuensium contineri putaret, nimis acerbis remediis civitatis vulnera potius exasperabat, quam sanabat; dubiamque existimationem fecerat, utrum duriora essent ea, an superiora Reipublicæ tempora, & utrum præterita dissoluta illa licentia, ac nimius libertatis abusus civitati perniciosior esset, an infinitum Gallorum & Bocicardi imperium acerbius: nam, quamquam ab intestinis tumultibus ac turbulentis illis seditionum procellis, quæ à verborum contentione ad manus sæpe & ferrum revocabantur, quies facta erat; majestatis tamen antea ignotum crimen non minus civitatem exercebat: cum antea, civium studiis in varias sectas distractis, altera Factio adversus alteram insurgeret, armaque in illam sumeret; nemo se, præsentem rerum statum, ac Factionem tum regnantem oppugnando, contra Rempublicam venire, aut majestatem publicam lædere putabat; sed inimicum suum de principatu per vim adepto vi dejicere contendebat: contra quem conspirationes palam fiebant; ac consilia de illo evertendo non solum inter cives, sed cum exteris Principibus inibantur: quod tum aut nullum crimen putabatur, aut perleve, ac vix animadversione dignum: cum etiam regnantes ipsi, adversus quos arma ferebantur, facile id in aliis ignoscerent quod ad se aliquando perventurum vererentur: at tum, mutata ratione, non modo arma sumere, aut occulta consilia contra præsentem rerum regiarum statum inire, quæ res semper impunita fuerat, capitale erat; sed paullo liberiores quoque sermones capite puniebantur: quotidieque homines, ac primario orti loco adolescentes ea de causâ ad supplicium rapiebantur; quarum rerum judicia ad voluntatem & imperium Vicarii, non ad legum municipalium præscriptum dirigebantur, quas sese Vicarius in majestatis insultatis non observaturum palam ferebat: ut non magis olim dissoluta impunitate, quam nunc nimia severitate, Genuæ laboraretur; præteritaque mala diuturna assuetudine minus sentirentur; horum morsus insuetis acutissimus esset. Neque vero natura rerum subitas mutationes fert; neque ab altero extremorum ullus est, nisi per medios gradus transultus: inveterati enim animi habitus, aut non deponi possunt omnino; aut contrario ac frequenti & diuturno usu tolluntur: accedebat aliud non levius malum, tributa atque inusitata vectigalia: quæ cum civibus ac plebi urbanæ gravia erant, tum vero ditionis Genuensis incolis ita acerba, ut populorum defectiones quotidie publice fierent; compluresque hominum greges ab ultima desperatione in rabiem versi, cacuminibus montium occupatis, angustis viarum infestis, populationibus, latrocinis, cædibus infesta omnia facerent: ac non modo publicani, atque ii, quibus ea procuratio obvenerat, ad exigenda tributa circummissi à latronibus, si in eos forte incidissent, sed ipsi quoque Prætores ac rectores opidorum ab ipsis populis, quibus præerant, præsentis acerbitate metum poenarum vivente, jugularentur.

A Eo tempore Antonius Guarcius insimulatus consiliorum adversus regiarum rerum statum Papiæ initarum, exsulio mulctatus est; ingentibus præmiis propositis, si quis hominem, vel vivum, vel mortuum in manus regiorum rectorum daret: neque caruit effectu consilium, Guarco paucis post mensibus Papiæ à sex sicariis circumvento & intercepto; qui tanti sceleris facinus haud diu impunitum tulerunt: in eadem enim urbe à Magistratu comprehensi, ignominioso ac crudeli supplicii genere perierunt; cruribus boum per terram tracti, ac membratim lacerati.

B Eo anno cum Philippo Maria Vicecomite tum Papiæ Comite, ac Facino Cane induciæ annuæ factæ sunt. Is vir, compluribus claris gestis rebus, magnum sibi nomen in rebus bellicis fecerat, ad magnamque potentiam peramplumque opidorum & populorum dominatum pervenerat; ejusque nomen terribile finitimis Principibus & populis erat: cum quibus privata sorte natus homo fœdera jam & societates atque amicitias jungebat.

C Non urbs modo Genua per ea tempora interstinis malis laborabat; sed Christiana quoque Ecclesia eodem morbo afflictabatur, in duas partes scissâ: quarum altera Benedictum à Luna Catalanum genere, qui Avenione sedes ac domicilium collocarat; altera Innocentium, qui Romanum solium tenebat, sequebatur. Genuenses igitur ad Benedictum sese applicarunt; non tam à Vicario regio ac Ludovico Flisco (qui relicto Gregorio ad Benedictum transierat, ab illo in Senatum lectus) summa contentione pugnantibus inducti, quam venerabilis Archiepiscopi auctoritate & sententia commoti: qui, sacro ordine sæpe convocato, de Theologorum consilio re diu ac multum disputata, Benedictum ut verum Pontificem colendum decrevit: qui Benedictus, cum compositum cum Innocentio fuisset, ut in locum medium ambo convenirent, in quo de pace Ecclesiæ concilianda agerent, Avenione profectus, insequenti anno ejus seculi quinto Genuam venit sex triremibus vectus: omni regii apparatus splendore, omnique effusæ lætitiæ significatione exceptus, atque omni venerationis & obedientiæ officio cultus; arce quoque ipsa Castelletto illi honoris causâ in manus data.

D Hoc anno Pisani ingenti seditione adversus Gabrielem Vicecomitem consurrexerunt; quem principatu urbis ejecerunt, cum arces obtinere non potuissent. Quam rem cum Regi suo, in cuius fide Vicecomes erat, gravem & molestant fore, Bocicardus intelligeret; protinus cum duabus triremibus, altera majoris, altera minoris formæ Liburnum contendit; Pisanosque hortatur, ut Gabrielem in urbem revocatum, Dominum agnoscant: quibus recusantibus, indignatus Bocicardus, annona illos intercludere aggressus est: quod inceptum haud parvo illi stetit; triremi Bocicardi, quæ ea de causâ Arnum flumen ingressa erat, à Pisanis una cum Bocicardi fratris filio ac nonnullis Genuensibus è civitatis principibus capta: quo successu vehementer irritatus Vicarius, Vicecomitem induxit, ad urbem ipsam Pisas Florentinis vendendam, Liburno opido sibi dimisso, Florentinique ab Vicecomite in possessionem arcis inducti sunt: in qua custodienda tam supina negligentia illorum fuit, ut, cum summa omnium admiratione, à Pisanis ex ea sex post diebus ejecti sint. Vicarius cum nihil proficeret, Genuam reversus, urbem gravi pestilentia laborantem offendit; qua in dies magis sæviente, ipse ac Pontifex coacti sunt Genua excedere, cum etiam cives, urbe relicta, in suburbana sua concessissent: qui Pontifex Saonam se contulit, inde Finarium,

narium, atque deinceps Monœcum, & Nicæam; tandem Massiliam reversus est, cum in singulis hisce locis aliquot dies substitisset.

Interea Florentini urbe Pisis arta obsidione circumfessa, mense, postquam arce exturbati fuerant, ab Joanne Gambacurta Pisanorum præfecto pretio quinquaginta millium aureorum nummum empto prodita potiuntur, exercitu in urbem introducto; omnesque Pisanorum arces obtinuerunt, præter Liburnum opidum, quod Bocicardus à Vicecomite traditum semper retinuit. Hoc anno Innocentius alter ex Pontificibus Romæ mortuus est: in cuius locum Angelus Cornarius Venetus successit, dissidio Ecclesiæ adhuc durante, ac tum, ut cum maxime vigente; cum uterque Pontifex se cupidum res componendi simularet, cuius causâ se pontificatu abdicare paratum verbis præferret; re autem uterque ab ea cogitatione remotissimus esset.

A.C. 1407. Annus ejus sæculi septimus duabus rebus memorabilis in primis est; imperio aucto, finibusque Genuensibus prolatis, atque Magistratu sancti Georgii instituto. Sergianenses, cum cernerent in Gabriele Vicecomite Domino suo non satis virum esse, ad ipsos à Florentinis, quorum nomen abominabantur, defendendos, impetrarunt, ut sibi ipsis ac rebus suis consulere: sui igitur potentes facti, se in fidem & ditionem populi Genuensis tradere statuerunt: eaque de causâ Genuenses Franciscum Justinianum, sollertis ingenii virum, Sergianam miserunt: inter quem (Antonio Marchione Mulatii disceptatore, ac pro communi amico se interponente) & Sergianenses convenit, ut illi sese ditioni Genuensi subicerent: ad cuius urbis possessionem accipiendam illico Genua profecti sunt, Gulielmus Medulius Gallus, Ligusticæ oræ Orientem spectantis præfectus, & is ipse Franciscus Justinianus, qui cum Sergianensibus transiegit; ac Carolus Lomellinus, qui ab Jacobo Mercante Jurisconsulto Sergianæ Prætor in possessionem urbis Sergianæ, opidorum Castellum novi, Falcinelli, Sancti Stephani, arcis Sergianensis, arcis Firmæ fidei inducti sunt: pretio bellicorum apparatus, qui in arcibus inventi sunt, ac stipendiis arcium præfectis & militibus debitis persolutis. Sergianæ Liburnum additum est, à Bocicardo Reipublicæ dono datum: cui tamen Genuenses impensas in reparandum opidum, in ejusque custodiam factas persolverunt: quæ summam viginti sex millium aureorum nummum confecerunt. Sub finem mensis Octobris tanta vis imbris dejecta est, quæ multis in locis foedas murorum ipsorum urbis atque ædificiorum strages fecerit; subterraneorum quoque specuum & cloacarum fabricis corruptis & prostratis.

Eo anno Magistratus sancti Georgii institutus est, atque altera prope Respublica Genuam inducta: cuius rei causâ & origo hæc fuit. Cum assidua impendia in bella ac classes, quæ armabantur, atque alia, quæ tempora Reipublicæ necessario postulabant, facienda essent; pecuniæ à privatis hominibus, deficientibus publicis, crebro mutuæ sumendæ erant: quibus, vectigalibus ipsis illis oppigneratis, cavebatur; fœnusque ex ipsismet vectigalibus mutuatarum pecuniarum creditoribus persolvebatur: quod varium erat, caputque ipsum in portiones dividebatur, quas centenarium librarum esse placuit; ut qui mille libras mutuas dedisset, decem portiones in vectigalibus haberet, pro quibus singulis certum fœnus anniversarium perciperet: cuique autem vectigali oppignerato certus numerus civium publice præficietur; qui ratione crediti ac fructus vectigalium subducta, debitum fœnus quotannis creditoribus cum fide persolveret: ceterum cum res,

A alio super aliud vectigali deinceps oppignerato, (ita egestate publica cogente) in immensum crevisset; singulisque vectigalibus oppigneratis certum numerum civium præfici necesse esset, tantaque multitudo confusionem pareret; distracta hæc membra in unum corpus contracta ac compacta sunt: cui octoviralis Magistratus præfectus est; qui veteribus nominibus, quibus vectigalia inter se distinguebantur, omisiss, sancti Georgii appellatus est: jusque hoc illi additum; ut non jam publice, ut antea, eligeretur, sed à creditoribus tantummodo, ac vectigalium oppigneratorum participibus quotannis crearetur: qui nulla in re rectoribus civitatis ac prætorio subesset, neque ab illis penderet; sed suas separatas ædes, suæque segregata consilia à Republica haberet; consilioque universæ civitatis haudquaquam consulto, sed altero consilio, quod è participibus tantum constaret, convocato, de rebus suis pro arbitrio statueret, quodque statuisset, jus esset, atque omnes participes teneret: rectoresque civitatis ante initum magistratum ad iurandum adigerentur, (id quod perpetuo servatum est) sese res sancti Georgii non attacturos, neque quidquam de ejus juribus imminuturos. Quod participum corpus, alia ex alia necessitate bona publica oppignerandi in dies exoriente, in immensum numerum crevit; ejusque dignitas & potentia majus robur in dies assumpsit, insulæ Corsicæ ac nonnullorum aliorum Reipublicæ locorum imperio illi adjuncto: ut sic iisdem moenium septis (res à nullis Legissatoribus umquam excogitata, ac nullis Philosophorum disputationibus agitata) duæ Reipublicæ includantur; altera turbulenta, ac discordiis civilibus & seditionibus jactata & lacerta; altera quieta & pacata, incorruptos priscos mores retinens, rectique domi ac foris exempli.

Interea Benedictus, consiliis de Pontificum congressu repetitis, Genuam venerat: ubi perpaucos dies commoratus, undecim Cardinalibus ac Bocicardo concordia Ecclesiæ avidissimo comitantibus, anno sequenti incunte ejus sæculi octavo Portum Veneris perrexit; quo in opido A.C. 1408. quinque menses substitit: quibus internuncians, litterisque ultro citroque mittendis absumptis; cum consilia de capitibus conferendis non successissent, à quibus uterque abhorrebat, quamquam contrarium in speciem præferret; Benedictus, classe sex triremium consensa, in Cataloginiam, ora Genuensi nusquam tacta, iter dirigit. Pileusque Archiepiscopus, antiquorum morum vir, ac divini Numinis metuens, cum utrumque extrahere & ludificare cognovisset, veritus, ne se aliqua contagione commacularet, Ecclesiæ procuratore relicta, in Etruriam in solitudinem concessit. At Genuenses, consilio universæ civitatis convocato, coram ipso Vicario re ad suffragia deducta, statuunt, neutri Pontifici non rectis sensibus ambulanti parendum.

Eodem anno Gabriel Vicecomes Galeacii filius nothus, is, qui Pisas, Bocicardo auctore, Florentinis vendidit, insimulatus consiliorum adversus regiarum rerum statum clam initorum, capitali supplicio à Bocicardo Genuæ affectus est: qua in re nomini Bocicardi omni sordium infamia ad eum diem intacto ingens labe adpersa est: ajunt enim Bocicardum immanem pecuniæ vim pro Florentinis intercessisse, quam cum dissolvere pigeret, pessimo exemplo creditorem sustulisse. Hoc à certioribus auctoribus traditur, mihi que verisimilius fit: quid enim rei esse poterat, quamobrem homo è Vicecomitum genere sese rebus Genuensibus interponeret; aut regiarum rerum statum turbare aggrediretur? cum præsertim Genuenses ipsi nullum ejus cogitationis signam darent: qui etiam, si maxime id

tum animo agitent, quid opis aut opportunitatis esse poterat in externo homine egente, omnibusque rebus suis spoliato, ut de tanta re cum illo consilia conferrent.

Per idem tempus à familia Justinianorum, ceteris civitatis principibus sibi adjunctis, ingentium tumultus in urbe Chio excitatus est; cum regiminis Bocicardi tæderet: qui armis arreptis, arce in suam potestatem redacta, Prætorque dejecto, alium in ejus locum sufficiunt: adversus quos A. C. insequenti anno ejus sæculi nono Conradus Auria cum tribus ingentibus corbitis parique triremium numero missus est: cognatique & affines Chienfium Genuæ in custodiam in arcem dati. At Conradus, cum mense Junio Chium appulisset, quatuor dierum oppugnatione suburbia urbis capit, quam cum & ipsam oppugnare pararet; subiit animum cogitatio, bellum non cum extero hoste, sed inter cives ipsos Genuenses, & affines, ac cognatos geri: colloquiis igitur de pace & reconciliatione institutis, rem leniter ducendo brevi ad effectum perduxit, Chienfisque, sine pertinaciæ facto, ad obedientiam Reipublicæ & Vicarii regii reduxit: nonnullis ex primoribus civitatis exilio mulctatis. Igitur Conradus, re feliciter confecta, urbeque præsidio firmata, ac rebus constitutis, Genuam rediit.

Per ea tempora Concilium universæ Ecclesiæ, quod Pisas convenerat, pontificatum Benedicto & Gregorio abrogavit; renitentesque, neque sententia à Concilio lata stantes, hæreticos atque Ecclesiæ hostes pronunciavit. Quare Cardinales viginti numero, ab utroque missi, conclavi inclusi, Petrum Philardum Cretensem Cardinalem Franciscani gregis Monachum Pontificem creant; qui Alexander quintus nominatus est, à quo Ludovicus Dux Andegavensis, qui per eos dies iter Pisas habens, Genuam venerat, trirememque à Genuensibus commodatam classi addiderat, titulum Regis Siciliae accepit: quem eundem titulum Gregorius Ladislao dederat.

Per ea tempora res Mediolanensis intestinis malis ac civilibus dissensionibus laborabat; Vicecomitibus ipsis principibus inter se discordibus, ac mutuis odiis flagrantibus: cum Philippus Maria Papiam urbem teneret, cujus Comes appellabatur; Joannes Maria Dux esset Mediolani: quæ discordiæ studia civium diviserant; ac Guelphas & Gibellinas partes accenderant: quæ res adeo potentiam atque opes Vicecomitum fregerant; ut, qui antea opulentissimam Italiæ partem, nobilissimisque urbibus frequentem late patente imperio obtinuissent, finesque circumpadanæ regionis egressi, Piceno, Emiliae, Etruriæ se superfudissent, totique reliquæ Italiæ formidolosi essent, nunc contempti, atque ab omnibus despecti jacerent: Mediolanensisque ditio, quæ perexigua illis reliqua erat, omnibus belli cladibus ureretur, exterorum armis continenter petita & lacerata: quibus cum resistere Vicecomites suis ipsi opibus non possent; hoc unum remedium malorum invenerant, ut aliquem, vel populorum dominatu ac suis opibus potentem, vel bello clarum atque ingentes Factiones hominum secum trahentem accerferent; eumque bello, atque armis, rebusque Mediolanensibus regendis, cum summo imperio præficerent; quem gubernatorem appellabant. Igitur Antonius Turrianus, qui tum summum potentiae & auctoritatis locum Mediolani, atque apud Ducem obtinebat, totaque, quæ cum illo conspiraverat, Factio, Duci persuadent, ut Bocicardum gubernatorem accerfat: nullis enim majoribus opibus res suas illum communire posse, quam hominis strenui primum, ac fortis magnique animi, & consilii viri; ad hoc Gallorum favore subnisi, tum au-

tem Genuæ viribus, quæ in ipsius manu essent, fultum. Accersitus est igitur Bocicardus; cujus prudentia hanc haud levem exceptionem habuit, animi vasti, ac magna & immoderata semper spectantis, præque hac cupiditate non satis omnes eventus circumspectantis, quod tum illi accidit; qui, dum nimia in urbe quoque Mediolano regnandi cupiditate abripitur, Genuam amisit. Is igitur tantæ ultro oblatae rei occasionem non late modo, sed cupide arripiens, magna pecuniæ vi publicæ mutuo accepta, Genua profectus; in qua Ugonem Alverniam præsidem reliquit; jugis superatis, cum rem magni certaminis fore provideret, hinc Malatestarum potentissima ac clara gente, inde Marchione Montisferacis societate Facini Canis fulto, eidem loco imminentibus, magnas pedestres & equestres copias inter Novas & Gaviu Genuensis ditionis opida coegit: sex enim millia peditum, ac plus quinque millia equitum sub signis habuisse dicitur: cum quibus copiis iter Mediolanum intendit.

Esse coeperant Genuensibus tædio & fastidio Gallorum mores; Bocicardusque præter inexpiable plebis in se odium, quod illa ob Magistratus ademptos numquam deposuerat, cunctis ordinibus invisus factus erat: sive id illius culpa, sive Genuensium ingeniorum vitio; qui cum libertate nisi ad suam perniciem uti nescirent, externa tamen imperia ferre nondum didicerant: quorum sermones, cum partim metus, partim verecundia præsentis Bocicardi comprimeret; cum ab oculis faceffisset, eruperunt: vulgo igitur pro se quisque fremere, haud diutius ferendum virum imperii nimium, atque omnia consilia ad possessionem Genuæ Regi suo stabiliendam, dirigentem; præque illis nullam boni publici ac civitatis commodorum rationem ducentem; quam immo odiis finitimorum Principum assiduus injuriis ab ipso læsorum involveret. Quibus motibus cognitis, Baptista Lusardus, qui tum apud Marchionem Montisferacis exsulabat, Marchionem ipsum ac Facinum Canem societate armorum cum illo conjunctum, quibus multis de causis Bocicardus capitaliter offensus erat, in illum instigare coepit; nullam præclariorem aut expeditiorem viam hostis evertendi esse dictitans, hoc Genuensium motu: nullam igitur esse rationem tantæ occasionis omittendæ: cum præterea spem faceret, principatu civitatis Genuæ potiundi; quæ multi, levioribus opibus fulti, essent adepti. Assentiuntur Lusardo, neque illam occasionem ullo modo omittendam dicunt Marchio & Facinus; dictisque facta continuantes, Marchio cum octingentis equitibus, ac mille octingentis peditibus; Facinus cum mille octingentis cataphractis equitibus, duobusque peditum millibus, movent; munera inter se ita partiti, ut Marchio ab Oriente, Facinus ob Occidente urbem ancipiti bello circumfiderent. Interea Genuæ, cum universa civitas, omnesque ordines in Gallos conspirassent, Legatus à Bocicardo relictus sese imparem ad resistendum sentiens, iter arcem versus, compluribus primariis civibus comitantibus, cepit: quo antequam perveniret, à Porciferano quodam, cujus fratrem præses suspendio necarat, interfectus est: quod exemplum plebs imitata, alte insidens odium in Gallos expromere coepit; omnes quicunque in ipsum incidissent, interficiens. Præsede interfecto, cum civitas rectore careret; postero die duodecimviralis Magistratus electus est ex popularibus & nobilibus Guelphis & Gibellinis æqualiter constans, qui rebus præflet: ceterum Marchione & Facino appropinquantibus, nullaque re Genuæ ad resistendum parata; ingens formido civitatem incescit: cum

cum præsertim gentem Facini rapto vivere assuetam à præda contineri posse, non speraretur: ut multi direptionis metu urbem relinquerent, quæcumque suarum rerum poterant, secum asportantes; cum mulieres & imbellis ætas iussu Magistratus in naves, quæ erant in portu, se subduxissent. Tandem, cum Marchio & Facinus venissent; illeque in valle Bisamnia sub ipsa mœnia urbis castra posuisset, hic in littore ad sanctum Petrum Arenæ appellatum aliquanto longius ab urbe confedisset; civitas singulos Oratores ad utrumque mittit: quorum alter Marchionem ad urbem intrandam, Magistratus verbis incitavit; alter Facinum oravit, ut, quoniam nullius ipsius esset usus, Marchione in civitatem introducto, discedere ne gravaretur: qui civitati morem gerens, castris retro motis, in sua se recipit: Marchio omnibus honoribus & plaufibus, omnibusque lætitiæ significationibus à cunctis ordinibus obviam effusus exceptus, ad locum diversorii magnifice apparatus deductus est. Eodem tempore imperium civitatis Gallorum Regi, qui tot locis fidem patrum violasset, Bocicardoque regimen est abrogatum. Theodorufque Palæologus Marchio Montisferacis præfes civitatis, ac præfectus militarium rerum in annum est creatus: qui eo jure esset, quo Genuensium Duces libero suffragio creati esse solerent; idemque stipendium haberet.

Interea Bocicardus præfecturam Mediolanensem adeptus, motibus Genuensibus auditis, Mediolano cum omnibus copiis raptim profectus, eodem die, quo juga transcendere parabat, sibi regimen abrogatum audit: quare non par sibi cum tot ac tam potentibus hostibus certamen esse intelligens, in fines Principis Achajæ in Subalpinam regionem concessit.

Eodem anno tamquam parum discordiarum esset, initium factum est, Factiones Guelpham & Gibellinam renovandi; quæ jam diu vel extinctæ, vel consopitæ erant: quattuor civibus electis; duobus nobilibus, totidem popularibus, omnibus Factionis Gibellinæ: quibus negotium datum est militum regendorum, ac mœnium tuendorum, arcisque expugnandæ: quam rem cum Gibellini à Guelphis graviter ferri sentirent; non injuriam mitigare, sed eam porro aggravare, Guelphosque magis ac magis premere pergunt. Igitur viribus, quibus plus poterant, abutentes, pervicerunt, ut summus duodecinviralis, ac ceteri urbis Magistratus omnes è Gibellinorum corpore, præteritis Guelphis, crearentur: quibus etiam, ut ab eorum occultis machinationibus tuti essent, arma ademerunt; multis ex illis ultra urbem Saonam exfugio submotis. At ii, quibus ea procuratio obvenerat, rebus satis comparatis, mense Septembri nondum exacto, arcem magno impetu invadunt: in qua oppugnatione virtus & audacia Benedicti Cavallerii ex opido Vulture enituit; qui primus primæ munimenta transgressus, ad radices primæ parvæ oppositæ turris pervenit; qui virtutis ergo torque aureo donatus est: quibus rebus confectis, arx, bombardis statutis, acri & iusta oppugnatione urgeri cœpta est, quam se diutius sustinere non posse Galli intelligentes, incolumem discessum cum omnibus rebus suis pacti, deditionem fecerunt; ea conditione, nisi subsidium intra octo dies in arcem introduceretur: quibus peractis, subsidio nusquam apparente; Galli cum fide incolumes dimissi sunt: in quibus fuit Narbonæ Dominus, qui paullo ante in eam arcem se subduxerat, cum magnam auri vim secum tulisset. At Guelphi, Luca & Ludovico Cardinali Fliscis auctoribus & faventibus, opido Portu Delphini occupato, arcem communiunt: contra quos Ubertus Spinula & Raphael Montaltus cum delecta armatorum manu terra, in-

A gentique corbita ac triremi mari missi sunt: qui arcem expugnarunt; mulieribusque inviolatis & intactis, tres & octoginta viros captivos Genuam duxerunt; qui omnes in carcerem inclusi sunt. Qua re Cardinalis & Lucas perculsi, Recco opido excedunt: cujus Lucæ ædes in eo opido loco edito instar arcis ædificatæ iussu Magistratus disturbatæ sunt. Eodem tempore Conradus Auria ad opidum Portum Veneris, quod Galli adhuc tenebant, recuperandum, cum tribus triremibus missus, spe, qua venerat, frustratus, ne expeditio sine effectu omnino esset, copiis Trebiano & Vernaciæ admotis, utrumque opidum expugnat.

B Per idem tempus Bocicardus occulta consilia Saonæ cum nonnullis agitarat, de ea urbe Gallis tradendæ: quæ cum emanassent, Saonenses, armis arreptis, proditores urbe expellunt; quinque eorum captis ac suspendio necatis. Facinus egregium ad littus Valentia urbis à Paulo Interiano editum, ob quod immunitate ipse, totaque ejus familia publice donata est, omittendum non fuit. Is navim, quæ Barasiam celebris nominis piratam vehebat, invasit; quam post longum & cruentum prælium, in quo Barasias ipse haud leve vulnus accepit, tandem expugnavit: cum ii, qui erant in navi capta, Barasiam, antequam Genuenses conscenderent, saxis obrutum in mare projecissent; metu, ne, si Genuenses navim Barasiam esse cognovissent, à quo per tot annos tanta detrimenta acceperant, implacabiles in ipsos forent: qui tamen ne sic quidem exorabilem Interianum habuerunt; qui sex & triginta illorum antennis navis suspensos necavit; rem cum iustitia conjunctam se facere ratus, meritas pœnas de piratis & latronibus sumendo, quorum decem novem super tabulato in prælio cæsi inventi sunt. At Genuæ, consilio trecentorum civium coacto, qui omnes Gibellini fuerunt, Magistratus Marchioni Montisferacis prorogatus est, stipendio ad quindecim milia librarum aucto.

D Per idem tempus quinque ingentes Genuensium corbitæ stipendio Ladislai conductæ, cum septem Ludovici Andegavenfis navibus congressiæ, una depressa, atque una in fugam coniecta, reliquas quinque capiunt; cum quibus ac cum novem triremibus Ladislai Genuam reversæ sunt. Longe alio à Saonensibus animi habitu Albintemelienfes in populum Genuensem fuerunt: adversus quos partes Gallicas sequentes, atque in defectione perseverantes, missus est Othobonus Justinianus, cum sex triremibus ea de causâ armatis; tredecim Ladislai additis: qui cum Albintemelium appulisset; dum Dominicum & Bartholomæum Aurias Duces terrestrium copiarum exspectat; colloquiis de pacificatione inductis, animos blandis verbis permulcens, illos ad sana consilia revocare studuit: quos nullum pertinaciæ finem facientes ad quintum Idus Junias, cœlo inalbescente, quamquam Auria ad exercitum nondum venissent, oppugnare aggressus est, præda militibus promissa; qui, acriter ac diu resistentibus opidanis, omnibus viribus connisi, tandem à superiore parte in urbem irrumpunt: quam diripiunt, mulierum pudicitia opera Othoboni & Ducum Auriarum, qui pugna commissa supervenerant, servata: præda militem ditavit; ingens enim fuit, cum Intemelii, ut animos populi ad sese acrius defendendum acuerent, nihil suarum rerum amovissent. Neque vero arx prius octo diebus, post urbem expugnatam, deditionem fecit. Quibus rebus confectis, Othobonus cum quindecim triremibus solvens, Portum Veneris repetit: ceterum ingenti imbre dejecto, adversaque maritima tempestate exorta, cum Ladislai triremes in illis locis diutius esse recusarent, ab opido tentando pro-

prohibitus est: qui Portu Veneris cum sociorum triremibus discedens, ultra portum Pisanum processit.

Per idem tempus Bocicardus, quattuor millibus armatorum corrogatis, opidum Plebem Theici irritum incepto aggressus est, cum damno & dedecore ab opidanis acriter se defendentibus repulsus. At Genuenses odio Fliscorum in defectione obstinate perseverantium, raro, ac nescio an satis laudabili exemplo, duas res admiserunt: nam & portiones sancti Georgii, jure ejus Magistratus violato, publicarunt ac vendiderunt: partiumque Guelpharum homines ad eas emendas metu mali coactos adegerunt. Mense Augusto ejusdem anni, cum Florentini ac Senenses foedus adversus Ladislaum Genuensium socium & amicum Regem iniissent, Othobonus Justinianus cum octo triremibus Genuensibus, ac nonnullis Calabris, quæ se illi adjunxerant, portum Thelamonis invasit: quo expugnato, prædaque inter Genuenses & Calabros divisa, Othobonus, triremi ad custodiam Thelamonis relicta, cum reliquis septem, atque octo ingentibus corbitis Genua submissis, ad obsidendum Portum Veneris reversus est: ceterum cum morbo correptus Genuam redire coactus esset; in ejus locum successit Baptista Montaltus, vir impiger ac fortis: qui cum obsidionem urgeret, minus pro se cautus, gravi vulnere in vultu accepto, ab exercitu discedere coactus est: in cujus locum missus est Joannes Francus Fiaconus: ceterum, cum Flisci à pertinacia animo imbibita deduci non possent; missus est contra eos Othobonus Spinula cum haud contemnenda militum manu: qui primo adventu suburbii opidi Savinioni direptis ac vastatis, omnem laborem adversus opidum ipsum situ & opere munitum inanem ratus, copias ad Pontem decimum transtulit: quem tamen Marchio, illo omisso, Savinionum redire jussit; quo ipsemet, paucis post diebus, se contulit: nihil tamen operæ pretii fecit.

Res inusitata, ac vix umquam audita, haudquam prætereunda fuit; eo anno cum plures cives, tam ex Nobilium quam ex popularium corpore, partibus Guelphis ejuratis, ad Gibellinas transisse; eamque Factionem sollemni jurejurando, tabulisque publicis consignatis, professos esse; in quibus fuit Jo. Centurio, ac Leonellus Lomellinus. Sub finem anni Lucas Fliscus magni discriminis facinus ausus est: cum enim audisset Marchionem Genua profectum; omnia neglecta & soluta sese offensurum ratus, cum non plus sexaginta equitibus ac nonnullis peditibus cœnobium sancti Spiritus usque, quod paullo plus jactu lapidis à mœnibus urbis distat, perrexit, consilio res urbanas tentandi: sed repulsus est à Conrado Carretto Marchionis Legato; qui nuptiarum filii causa in Montemferacem ierat. At Flisci, cum diuturnum exsiliium nulli alii rei quam ipsis exinaniendis esse intelligerent, ad sanio rem mentem tandem conversi, nonnullis gravibus & probis civibus sese interponentibus, in gratiam atque in civitatem recepti sunt; portionibus sancti Georgii, quas publice venditas superius diximus, illis restitutis.

A. C. Insequenti anno ejus sæculi undecimo à parva re initium ingentium motuum factum simul & oppressum est. Orlandus Fulgosius Petri filius Jurisconsultus Genuam venit, conquerens, se ac fratres inique tractari: cui cum vulgo suavis esset, ut Romam, unde venerat, rediret, dicto se audientem fingens, Clavarum se contulit, ac circiter quadringentis armatis corrogatis, nocte furtim urbem ingressus est: sacramque ædem Sancti Michaelis occupatam præliis firmavit: totaque civitas postero die in armis fuit, cum maxi-

A ma pars civium rectorem mutari nollet. Fulgosiusque, in quibus fuit Thomas, magna audacia prætorium invaserunt: sed brevi repulsi sunt; Conradusque Carrettus Marchionis Legatus magna civium manu stipatus prætorium egressus, Orlandum cœnobio se continentem aggreditur: ceterum complurium bonorum & quietorum civium sese interponentium opera res ita compositæ sunt; ut fratres Orlandi adventum Marchionis in urbe præstolarentur, ipse actutum urbe excederet: qui, triremi statim conscensa, Leoanum iter direxit: ceterum, adversa tempestate coorta, in portum Saonæ compulsus, à plebe, quæ tota Marchionis erat, trucidatus est.

B Interea Albintemelii res turbari iterum coeptæ sunt: exsules enim Albintemelienenses circiter quinquaginta numero, consiliis cum iis, qui in urbe erant, communicatis, urbem ingressi, dominatum invaserunt; nonnullis civibus Genuensibus, qui vim grassantis pestis fugientes, sese in eam urbem contulerant, captis, ac sese redimere coactis. Magistratus, re cognita, Brasum Francum, virum strenuum, ac mari & terra spectatæ virtutis, cum duobus peditum millibus, ac tribus corbitis & triremi, Albintemelium extemplo mittit: quo appulso, exsules, qui ad numerum quingentorum creverant, veniam supplices petunt; sese urbem liberam relictuos dicentes, modo incolumes cum suis rebus dimittantur; quorum orationem cum auribus non admitteret Brasus; exsules urbe excedunt: qua postero die Brasus positus, rebus constitutis ac præsidio firmatis, Genuam revertitur.

C At Galli, rebus Genuensibus prorsus desperatis, Gavium, Montaltum, Palodium, Genuensium opida Facino Cani, item Portum Veneris, Ericem, Sergianellum, Falcinellum Florentinis vendunt. Eo anno Catalani, cum duas Genuenses ingentes corbitas cepissent, easque suis adjunxissent, classe sua usque ad numerum septem navium expleta, insulam Chium circumeuntes, bombardis oram Chiensem à contemptu incessabant, probra in Genuenses subinde ingerentes: quæ res cum stomachum mercatoribus Genuensibus, qui in ea insula negotiabantur, fecisset; tribus amplius millibus aureorum nummum à Monensibus insulæ Dominis sublevati, triremique à Mytilenes Domino commodata, quinque ingentes corbitas armant; cui classi præficiunt Baptistam Francum Lusardum ac Paulum Lercarium, qui Cassam Consules destinati erant, cum alterno quindecim dierum imperio. Ii Chio profecti, classem Catalanorum quærere instituunt: quam tandem in portu Alexandriæ adepti, sine mora prælium committunt, quod æquo Marte cum multo utriusque populi sanguine diremptum est: paucisque diebus, alterum item atrox prælium inter classes initum est; quod magis secundum Genuensibus fuit; duabus navibus, quas à Catalanis captas modo diximus, recuperatis: qui Catalani in Genuenses Rhodum prætereuntes, qua in insula ipsi substiterant, verba contemptus ac arrogantiae plena, magnifice ipsi se extollentes è terra jacere coeperunt; quæ retundendi cum nulla esset Genuensibus facultas, Catalanis aperto mari sese non committentibus; Catalanos omnes, quoscumque in navibus captivos habebant in oculis Catalanorum antennis navium suspensos necarunt.

F Initio anni ejus sæculi duodecimi, induciæ annuæ factæ sunt cum Ludovico Andegavensi; se-
ptemque ingentes corbitæ contra Catalanos excursionem facientes, prædaque agentes, armatæ: quas mille quingenti armati conscenderunt, Antonio Auriæ præfecto: qui classem circumferens, nusquam Catalanos invenit, cum quibus manum confere-

ret; nonnullas tamen illorum naves incendit, cum Methonem usque processisset; itinereque deinde in Occidentem verso, Barchinonem usque perrexisset; cujus praesentis metu certamen detrectantes, naves, quas in salo habebant, in terram subdixerunt. Neque tamen sine ullo operae pretio haec expeditio fuit: Carpenfes enim ob Gibellinarum & Guelpharum partium studia armis inter se contententes, ancipitique fide defectionem ad Florentinos spectantes; cum leviter eorum animos tractando, ad sanitatem reducere non potuisset; longo & cruento praelio, in quo circiter quingenti eorum ceciderunt, victos domuit: circiter viginti eorum, ad ceterorum terrorem, suspendio necatis. Reverfus igitur Genuam Antonius, catena ferrea, quam ad portum Pinum in Corsica perfrigerat, allata, honorifice acceptus est: cui civitas immunitate omnium rerum donata, Reipublica bene gestae testimonium dedit.

Per ea tempora Florentini nullis à Genuensibus injuriis laesi, ditionis Genuensis hominum fidem tentare, eosque donis & promissis in suas partes trahere, atque ad deficiendum sollicitare instituerant: quae res cum multis in locis emanasset, de nonnullis, qui eorum consiliis imbuti inventi sunt, capitale supplicium sumptum est. Capriataque ac nonnulla obscuri nominis opida varietate temporum à Genuensibus abstracta in antiquam ditionem redierunt.

Interea inter Marchionem & Genuenses omnia suspecta facta erant; resque haud dubie ad arma & tumultus spectabat; quos Saonensium motus accelerarunt: quibus, alius in Auriæ Gentis, aliis in Spinulae partes inclinatis, cum studia Factionum arma induissent, resque ad caedem & sanguinem exarsisset; missus est ad res pacandas Georgius Adornius cum ducentis armatis: qua eadem de causa cum Marchio Saonam venisset; Georgium, quem familia ipsa, qua ortus erat, suspectum consiliorum adversus se initorum faceret, in custodia retinuit: quod idem Legatus Marchionis Genuæ in Thoma Fulgosio frustra tentavit: quem cum, centum armatis missis, in praetorium accersisset, dicto audiens non fuit Thomas; quin contra, eodem die, primis se intendentibus tenebris, ejus opera & auctoritate *Io popule* tota urbe conclamatum est: ad quam vocem momento temporis civitas in armis fuit: ortaue luce, Thoma, & fratribus ingentibus Factionis suae hominum catervis stipatis, omni contentione pugnantibus, Magistratus Marchioni abrogatus est: octoviralisque civium Magistratus ex popularium corpore rebus regendis praefectus, Barnabas Guanus Jurisconsultus, Franciscus Justinianus, Raphael Judex, Carolus Ciconia, Antonius Paverus, Joannes Grepus, Joannes Calatius, Baptista Zoalius, omnes Gibellinae Factionis homines; quibus additus est unus ex suburbiis Jacobus Sorius: bellicis quoque rebus praefecti sunt Petrus Francus, Thomas Fulgosius, Jacobus Francus, Blasius Francus; cum praefectus custodiae urbis, militumque praefidiorum esset Philipponus Francus. Praeclarum moderationis specimen rectores magistratus sui initio ediderunt; aequi ac justii, concordiaeque civitatis potius quam Factionum memores: consilium enim trecentorum civium convocarunt; in quo decretum est, ipsis referentibus, Nobilium Fa-

ctionis cives ad gerendam Rempublicam restituentes, omnesque magistratus & procuraciones, praeter summum principatus locum, inter utriusque corporis cives aequaliter dividendos: decretum quoque est, munitionem arcis Castelletti à Boccardo aedificatam demoliendam.

At Marchio nullam jam esse causam Georgii retinendi intelligens, hominem dimittit: cujus in urbem adventus magnae laetitiae vulgo fuit. Commendabant enim hominem in vulgus multa ac magna in illum fortunae & animi congesta bona; clarum genus, affluentes divitiae, praepotentium hominum amicitiae ac studia; ad hoc animus mitis ac lenis, summa morum suavitas ac facilitas; integri mores, animus ab omni genere flagitiorum abhorrens: quibus rebus id affecutus fuerat, ut voluntates hominum teneret, omniaque illi secunda & ampla vulgo optarent: cujus animorum propensionis illud primum specimen fuit, quod ad praetorium ac rectores civitatis invisendos & salutandos, mille quadringentorum armatorum cohorte stipatus accessit: nec dubium fuit, quin paullo post summo omnium consensu Dux crearetur: decretumque est, ut memoria mutati hujus regiminis anniversario sacro ad aedem divi Benedicti cum donario textilis aurei celebraretur.

Interea Marchio acerrima oppugnatione arcem maximam Saonae (plures enim in ea urbe erant) urgebat; moenia bombardis, aliisque machinis bellicis, globos ac saxa immanis magnitudinis contorquentibus, continenter quatens: cum quattuordecim castellis in circuitu excitatis, arcem cinxisset, ac velut circumvallasset: qui non solum aperta vi, sed damnatis quoque artibus agere haud se indignum ducens, fidem Jacobi Passani arcis praefecti pretio ac promissis labefactare conatus est: adversus quae omnia animus Passani invictus stetit, fidemque & constantiam Reipublicae ad extremum praestitit: quam fidem civitas immunitate onerum, quam ejus Majoribus olim datam confirmavit, atque anniversaria pensione remunerata est. Alia fortuna arcis sancti Georgii fuit, quam praefectus viribus impar Marchioni tradere tandem coactus est: ad quam recuperandam Jacobus Adornius Ducis filius missus est: tandem, colloquiis de pace institutis, inter Ducem & Marchionem convenit; ut Marchio omnia loca occupata Reipublicae restitueret; civitasque illi, pensionibus in certa tempora collatis, viginti quattuor aureorum millia solveret.

Eodem quoque anno, Baptista Montalto inter-nuncio, cum Florentinis in urbe Luca pacificatum est: ex qua pace opida Portus Veneris, Erix, Sargianellum, Falunellum Genuensibus restituta sunt; cum Casanus Spinula Sergianam, quam urbem Galli ipsam quoque vendiderant, à Florentinis acerrime oppugnatam constantissime defendisset. Arx quoque & opidum Gavium, decem aureorum millibus acceptis, à Ludovico Cane Reipublicae restitutum est. Eo anno quattuor Oratores ad Sigismundum Imperatorem creatum gratulatum missi sunt, Benedictus Buccanigra Albin-temelii Episcopus, Thomas Panfanus Eques, Nicolaus Spinula Jurisconsultus, Franciscus Justinianus: qui Caesar, ita Oratoribus petentibus, civitatem ab omni jure dominatus Gallorum, si quo forte obstricta esset, liberavit.

V B E R T I F O L I E T A E,
PATRICII GENVENSIS,
HISTORIAE GENVENSIUM
LIBER X.



CIVITATE externis dominatibus soluta, causae ad illos redeundi praecedendae videbantur: quarum illa praecipua erat, civium de principatu contentio; dum ad illum quisque non jam forensi ambitu, aut allegationibus, prehensionibusve; sed armis, ac per vim & seditiones contendit: omnibus dictitantibus, hanc esse intestinorum malorum, ac discordiarum, & bellorum civilium originem & fontem; hanc ad necessitatem externorum Principum adfiscendorum, tamquam ad minimum malum adigere: non igitur prius finem malorum fore, quam tantorum malorum radix prorsus extirpetur: ambitionem igitur civium coercendam, ac salubribus legibus electionem definiendam, certisque terminis circumscribendam; extra quos nullus ad principatum pateat aditus. Re vulgo probata, duodecim cives ad eas leges condendas creati sunt, aequali numero ex Nobilium & popularium corpore, omnes à Factione Gibellina: Leonardus Catanius Jurisconsultus, Lucianus Spinula, Aelianus Centurio, Blasius Salvagus, Franciscus Auria, Princivales Vivaldus, Joannes Francus Lufardus, Benedictus Valdetarius, Jacobus Justinianus, Antonius Rebuffus, Antonius Mulasana, Martinus Bandinus: quibus hominibus ab universo populo Genuensi in aream ante aedem divi Laurentii congregato amplissima potestas mandata est regiminis civitatis emendandi & constituendi. Hi cum saepe convenissent, remque magnis disputationibus diu ac multum agitaissent, quam plurimas leges tulerunt ad mores corrigendos & disciplinam collapsam erigendam; quas tabulis publicis consignatas non necesse habui hic referre: ea tantum persequi contentus, quae ad Ducis electionem pertinent; fuerunt autem haec: *Dux non minus quinquaginta annos natus, civis Genuensis, popularis, Gibellinus, mercator, creator: ejus electio haec esto: vacuo solio, summus duodecimviralis antianorum Magistratus, majore parte suffragiorum consentiente, quadraginta populares cives, partim ex corpore mercatorum, partim ex corpore artificum, quaternos in singulas tribus ex primoribus eligunt: quadraginta electi viginti unum cives populares ex utroque corpore eligunt: hi quoque decem cives ejusdem corporis & sortis eligunt: hi decem deinde septem saltem suffragiis consentientes Ducem, sive ex se ipsis, sive ex aliis civibus creant; aliter lectus vitio creatus censetur: nullumque jus res regendi aut imperandi habeto: in antianorum collegium unus ex tribus praefecturis legitur.*

Ceterum apparuit, animis inveteratis odiis exulceratis, ac studiis partium accensis, quam parva sint legum momenta ad quietem civitatis constituendam: numquam enim magis Factiones exarserunt, aut majori rabie exercitae sunt, quam post eas latas leges; initio motuum ab Isnardo Guarco facto. Is, cum Adornianam gentem, in-

Bter quam & Guarcos numquam dissidiorum causae deerant, nimis diu regnantem non ferret; anno ejus saeculi quarto decimo, haud contentis ^{A.C. 1414} mnendis terrestribus ac pedestribus coactis copiis, Casaregio movens, itinere raptim facto, mense Junio, urbem intravit: cui cum ii, qui à Ducis partibus stabant, acriter restitissent, Guarci is exitus conatuum fuit, ut nonnullorum pacati animi civium opera in Etruscos exsulatum ierit.

CEo amoto, Montalti, ne minus animi, quam Guarci ad turbandas res, principatumque petendum habuisse viderentur, majore conatu ad res miscendas consurrexerunt; initiumque ejus belli fecerunt, quod (incompertum qua de causa) *Medium* appellatum, civitatem nostram omnibus belli cladibus funestam fecit. Baptista enim Montaltus & Brasco Francus consiliorum socius mense Decembri, magna hominum suarum partium multitudine congregata, nocte intempesta tumultum excitarunt, tota urbe discurrentes; ac nomen populi & Montaltorum magnis clamoribus subjicientes: quae res primo eos, qui cum Duce erant, causam tumultus ignorantes obstupescit: qui tamen brevi, collecto animo, sese ad resistendum parant; signoque tinnituum ex turri aedis divi Syri edito, cives ad arma pro Duce capienda invitant: momentoque temporis civitas in armis fuit, ingentesque hominum globi ad opem Duci ferendam accurrunt: cum quo non modo tota Adorniana Factio, sed Thomas Fulgosius, ac fratres magnam ipsi quoque multitudinem partium suarum hominum secum trahentes, se junxerunt: quos secuti sunt nonnulli Justinianae gentis; nec non Clemens Promontorius, ac filii, Sopranorumque familia; praeterea nonnulli ex primariis civibus popularibus Gibellinis: ad hoc omnes fere Guelphi tam ex Nobilium quam ex popularium corpore; cum praepotens gens Spinula occulte Montaltis faveret; quae tamen mox animos nudavit. Igitur ii, qui partes Ducis sequebantur, ex aede divi Syri erumpentes, Montaltos & Spinulas, qui ante aedem divi Lucae constiterant, magno impetu invadunt: satisque acriter edito praelio, cum aequo Marte discessissent, tumultus ea nocte quieverunt: ceterum postero die majore irarum certamine accensi sunt, cum Spinulis & Montaltis se adjunxissent gens à Mari, quae tum armis & hominibus pollebat, Vivaldi, Nigroni, Grilli, Imperiales, compluresque Gibellinae Factionis populares cives: in quibus fuit is ipse Isnardus Guarco, nonnullique Justiniani, Bartholomaeus Bosco Jurisconsultus, Simon Bucanigra, ac fratres, Franci, ac perpauca Guelphae Factionis populares: cum Auria gens, unaque cum illa nonnulli tam ex Nobilium quam ex popularium corpore utriusque Factionis in neutros inclinantes, spectatores alienorum malorum sedentes quiescerent: quotidieque praelia in variis urbis locis committebantur; cum non gladiis modo atque hastis, sed missilibus quoque ac bombardis res gereretur. At Spinulae turrim Antonii Spinulae ad

divi Lucæ validis præsiidiis firmarunt, ac ponte pervio proxima ædificia junxerunt; circumjectasque plateas munimentis obstruētas ac firmatas tenebant: ex quibus cum adversariis, qui finitimas domos ipsi quoque suis præsiidiis occupant, prælia committebant: resque ad eam rabiem exarsit, ut fratres à fratribus contrarias partes sequentibus manus non abstinere: cum sedula diligentia nonnullorum bonorum à turbulentis consiliis abhorrentium civium nihil proficeret; qui urbem assidue circumeuntes, atque homines, ut aliquid cuique juris adversus singulos erat, prehensantes monerent, finem ferendi tandem facerent: quid enim illos ex tam obstinata contentione præter occasum patriæ petere, cum etiam induciæ nonnumquam initæ sine effectu semper fuissent. Igitur, cum res ad internecionem spectaret, opifices congregati, Duce assentiente, octo ex ipsorum corpore elegerunt, quibus negotium datum est, pacem inter cives conciliandi: qui tandem, Antonio Justiniano annitente, rem eo deduxerunt, ut Georgius concordie civitatis causâ Magistratu abiret; in ejusque loco, dum Respublica constitueretur, regimen rerum penes Baptistam Montaltum & Thomam Fulgosium esset. Non recusabat Georgius, vir ingenio miti ac salutem publicam private ambitioni præferens: ceterum bene inchoata consilia Ducis filii everterunt, ætatis fervore transversos illos agente: qui tota urbe discurrentes, ad armaque conclamantes, ac nomen familiæ subjicientes, confopitos tumultus iterum excitarunt: rebusque in præterita mala, sine ulla spe concordie, redactis; eodem die, quo ad arma itum est, complura ædificia in ipso foro incensa sunt.

A.C. 45. Insequentis anni ejus sæculi quincti decimi initio aliquorum dierum induciæ factæ sunt; non tam ad consilia pacis agitata, quam ad sese acioribus præsiidiis ad bellum comparandum utrimque quæsitæ: quo spatio plus trecenti equites ex Insurbia Duci subsidio venerunt; cum ex Monteferaci haud contemnendæ copię Ducis adversarii submissæ fuissent, quibus præsiidiis utraque pars firmata animos ad redintegrandum bellum, hostemque ulciscendum acuebat. Igitur Dux, cum induciæ exiissent, occupat adversarios invadere: edicto igitur proposito, ut omnes inermes in domos suas se reciperent; signo pugne tinnitu turrium dato, copias suas adversarios invadere jubet: quæ omnem vim belli in ædes Nicolai Spinulæ mare spectantes vertunt: atroxque prælium accensum est, quod prima luce commissum nox, re in neutram partem inclinata, diremit. Secundum illud prælium à compluribus egregiis civibus intermissa pacis consilia repetita sunt: in quibus fuerunt Flisci, qui ab omni Factionis studio integri, in neutris partibus fuerant: quæ consilia, ut divina quoque ope juvarentur, supplicationes habitæ sunt, ad pacem Dei immortalis poscendam, divinique Numinis iram placandam: ceterum tantum abfuit, ut tanta religionis oculis obfusa species quidquam furore amentes animos moveret; ut contra, sacerdotibus & piis hominibus per forum transcurrentibus, tumultus excitati sint, ac ferro acriter decertatum; nonnullæque peramplæ ædes conflagravit: quæ prælia cum quotidie integrarentur; incendiisque aliis super alia cumulatis, urbs magis in dies deformaretur; ac res ad extremum venisset; tandem in tantis civitatis nostræ tenebris virtus trium præstantium civium, Barnabæ Guani Jurisconsulti, Jacobi Justiniani, Antonii Aurie affulsit; qui mentem ab omni Factionum contagione intactam perpetuo ser-

varant. Eos cum vulgo auditum esset in ædem divi Dominici convenisse; magnos hominum concursus nominis auctoritas repente ad illos fecit: quos Barnabam Guanum ita allocutum accepimus: *Si ex intestinis discordiis nostris, cives, quibus civitas nostra jamdiu laceratur, postremoque hoc bello civili, quo jamdiu, & nunc, ut cum maxime, uritur, aliquem privatim fructum peteremus: minus mirum esset, homines privato emolumento, vel cum rerum publicarum interitu, servire: fecerunt hoc idem alii sæpe: iterum tantum abest, ut aliquid ex illis privati lucri faciamus; nihil immo meliore loco domestica res nostra sit, quam publica, nobis omnibus exinanitis, ac sanguine omni missis enectis: maritimis enim commercis omissis; ac mercatoria negotiatione & industria plane deposita; item opificiis & sellulario opere intermisso: quibus rebus in pace & concordia civitatis alimur & ditamur; ad extremam paupertatem & omnium rerum inopiam ipsi nos detrudere properamus: id quod nostrum plerisque jam sentire cœpisse credo. Discordias civiles atque intestina bella in aliis liberis civitatibus sæpe fuisse legimus; nullamque fere illarum hujus morbi expertem fuisse: ceterum suas illa causas habuerunt, etsi haudquaquam laudabiles, aliquo tamen modo excusabiles, dum vel Nobilitas se solam dominari æquum censet, neque homines novos pares ferre potest: contra illi sese à Nobilitate despici atque procuratore Reipublica excludi indignantur; vel plebs ere alieno demersa, aut nimis oneribus oppressa, atrox in potentiores cives insurgit; vel agros publicos à paucis insecos, virum dividi postulat; vel tabularum novarum ac proscriptionum spe ad res misceandas incitatur. Nihil horum Genue est: nullis usuris se plebs suffocatam dolet: agri, qui dividantur, in solo macro ac sterili nulli sunt; honorum ac munerum publicorum sua cuique ordini & Factioni pars aequaliter tributa est: quæ, malum, tanta ista rabies nos agitat, ut, cum nulla sit inter nos dissentendi causa; nullum tamen dissentendi finem faciamus? equidem nullam aliam insaniam nostram causam invenio, quam cecitatem quamdam divinitus fortasse objectam; quæ nobis mentem & consilium eripiat: quod primum vulnus divinum Numen iis, quorum scelera ulcisci decrevit, infligere solitum esse, ajunt. Illud igitur ipsum Numen nobis iratum, nos ad meliorem mentem convertendo, placemus; aliquando nos, patriam, liberos, posteritatemque nostram respiciamus: quandoquidem deteriore loco ut sumus, nullus jam est inferior locus; quam omnium rerum interitus.*

Miro silentio & assensu auditus est Guanus; triumque præstantissimorum civium auctoritate, novem civibus, Antonio Marruffo, Honofrio, Vignolo, Bartholomæo Justiniano, Martino Bando, Joanni Collatino, Jacobo Valdetario, Dominico Furnario, Vincentio Clavarino negotium datum est, aliquam rationem ineundi rerum componendarum. Ii quattuor, arbitris nulli Factioni suspectis assumptis, per ingentia certamina pacem tandem composuerunt: ex eaque septimo Idus Martias turris Luculana in manum Jacobi Franci ac Petri Justiniani tradita est: posttridieque ejus diei arx Castelletum Friderico Promontorio & Hieronymo Justiniano custodienda data: plateæque civitatis prius trabibus ac muris clausæ, apertæ sunt: ceteraque dies Georgio Duci Magistratu abeundi nonnullis immunitatibus donato definita est: in cujus locum Thomas Fulgosius & Jacobus Justinianus ad regimen rerum, dum civitatis res constituerentur, succederent: in custodiamque urbis ducenti externi milites scriberentur, quibus præfectus est Augustinus Sopranus, cui utraque Factio fidebat: sicque internecino bello finis impositus est: quod, præter ignota capita, plus centum viginti cives cogniti nominis sustulit:

in quibus fuerunt Melchior Gentilis, Nicolaus Auria, Joannes Spinula, Carolus Adornius, Gaspar Fatinantius, Ughettus Justinianus, privataeque aedes partim incensae, partim ruinis prostratae, centum quadraginta sex numeratae sunt. Ad decimum Kalendas Aprilis Thomas Fulgosius & Jacobus Justinianus praetorium ingressi, Ducem adeunt, ac conventorum admovent: qui, equo magnifice instrato conscenso, omnibus principatus insignibus ornatus, sceptrum atque ensen nudatum praeferebat; summo ac ceteris minoribus magistratibus, magnaue civium turba comitante, inter tubarum sonitus in privatas aedes concessit, atque in porticu confidens ducatu se abdicavit.

At Thomas & Jacobus in omnes partes mandati muneris exsequendas intenti, consilium octingentorum civium ex corpore Nobilium, & popularium, ac Gibellinorum, & Guelphorum, iis Factionibus numquam plane extinctis, convocant: in quo Ducem eligi, legibus circumscriptum placuit; qui tertio Kalendas Aprilis creatus est Barnabas Guanus: quae res magna laetitia civitatem affecit; civesque opinione prudentiae & probitatis electi Ducis ad meliorem spem crexit: quam ille spem & opinionem brevi virtutibus suis auxit: cum omnia summa cum moderatione ageret, & ad praescriptum legum dirigeret; nemini vim afferri, nemini injuriam fieri pateretur; pietatis insuper & religionis diligentissimus cultor; ne severitatis quidem, cum res posceret, oblitus. Sabaudium enim quemdam, qui superioribus annis Genuam ventitare solebat; occasioneque civilium discordiarum arrepta, occulta consilia cum nonnullis ferere coeperat, de civitate Caesari tradenda, cuius ipse se Vicarium fore sperabat; cum cum morem, ne tum quidem civitate in tranquillum redacta, omitteret, comprehensum capitali supplicio affecit.

Tanta felicitatis institutum cursum parvus quidam casus interrupit; qui occasio fuit civitatis in antiqua mala redigendi. Pagi cujusdam Urforum appellati homines cum eo forte tempore (nescio qua de causa) in armis essent; ad eos compescendos, tumultumque sedandum missus est Georgius Guanus, custodiae urbis praefectus: qui res potius inflammavit, quam mitigavit. Urfani enim nimia Guani severitate exasperati, tribus ex cohorte illius interfectis, ipsum comprehensum retinuerunt. Exarsit enimvero Dux degenerum rusticorum contumacia: quam ne impunitam relinqueret, è vestigio Thomam Fulgosium majoris auctoritatis, majorisque roboris virum ad eos mittit. Vix ille discesserat; cum nonnulli (bono ne, an pravo animo utentes, incertum) Ducem aggrediuntur; docentque, errare illum vehementer, si putet, Fulgosios & Adornios illum, aut quemquam alium extra familias suas, Ducem concoquere posse: quem summum honoris locum duae hae familiae, ceteris exclusis, non jam ut populi beneficium; ac liberis suffragiis mandatum; sed tamquam jure sibi debitum petant: haud dubitandum igitur, quin illi in ejus perniciem & caput nefaria consilia struant; quibus ipse, nisi antevertat, brevi opprimatur. Haec & alia ejusmodi saepe iterando, pervicerunt tandem, ut Barnabas nonnulla civitatis loca res novare cupientibus opportuniora praesidiis & armis firmaret: quae res animum Georgii & Thomae vehementer offendit: qui Thomas, re cognita, omisis Urfanis, mox in urbem revertitur: Duceque non adito, cum ipse & Georgius capita contulissent, Thomas injuriam à Barnaba utrique familiae factam conqueritur; quarum potentiam & dignitatem imminuere studeat: ceterum haec merito ipsis acci-

dere; qui alium Ducem, quam ex suis gentibus creari, passi sunt; ac sese ex possessione principatus civitatis, tot laboribus ab ipsorum Majoribus parta exturbari: cum errorem nisi emendare properent, brevi fore, ut clarissima hae duae familiae avita potentia & dignitate spoliatae, in ordinem cogantur: quae res olim discordes familias inter se fecerit, odiaque aluerit, praeliis quoque commiserit; dum utraque in eundem principatus locum tendit, cumque sibi unaquaeque earum praeparat; eandem rem nunc illos conjungere; ne principatu simul deiciantur: cuius rei prohibendae una tantum sit via; si studiis & viribus consociatis, ad amissum principatum recuperandum unanimis consurgant: quod si alius alio rem trahat, tum vero viam sibi consilia ad effectum perducendi mutuo interclusuros: ac quoniam in unum eundemque locum ambo tendere non possint; alteri ab altero cedendum: cuius rei arbitrium sese illi permittere, eo, quod ille decreverit, staturus. Probat consilium Georgius, ac sic prorsus faciendum dicit; nullamque in se moram ad cogitata exsequenda esse ostendit: ceterum principatum multis de causis magis ipsi Thomae, quam sibi convenire affirmat; idque cum iustius, tum temporibus aptius dicit: aequum enim esse, ceteros ejus honoris participes fieri, quem ipse multos annos obtinuerit: ad hoc fieri non posse, quin principatus multis ipsum invisum fecerit; cum Thomae omnia ad gratiam integra sint.

Quibus rebus constitutis, cum dies destinatus venisset, (is fuit tertio Kalendas Julias) Georgii & Thomae jussu, tota urbe ad arma conclamatum est; momentoque temporis civitas in armis fuit, magnaue hominum multitudo sese capitibus Factionum adjunxit: qui complures urbis plateas praesidiis insederunt, quintoque Kalendas Julias praetorium invadunt; Ducisque praesidio ad resistendum impari in fugam mox coniecto, praetorio potiuntur; quo paullo ante Barnabas, rebus ad iniqua inclinatis, excesserat, periculoque se subtraxerat. At multitudo armata ex utrisque Factionibus permixta, tota urbe discurrens, una voce nomen Fulgosium subjicit, ingentibusque clamoribus Thomam Ducem deposcit: quem recusantem, ac modestiae simulatione retractantem, sublimem arreptum in praetorium deferunt. Quo tanto populi favore, tantaque voluntatum conspiratione, vehementer perculsi Innardus Guaricus & Baptista Montaltus suarum Factionum capita, urbe protinus excedunt: illeque in vallem Scriviae, hic Vernaciam opidum concedit: qui paucis post diebus, principatu Thomae stabilito, Portu Veneris opido, quod ad eum diem tenuerat, Duci tradito, ipse Pisas commigrat. Postero die, cum trecenti cives ex primoribus civitatis in praetorium convenissent, Thomas Dux Genuensium legibus solutus renuntiatur: quae vox magnis plausibus à populo, magnisque laetitiae significationibus excepta est; nullusque umquam Dux majore fastu principatum inivit: cum Baptista Fulgosius Ducis frater, qui subito utrique orae Ligusticae, rerumque militarium, atque urbis custodiae praefectus declaratus est; Theramusque Adornius, cum quo affinitatis necessitudo sibi intercedebat, ad conjunctionem utriusque familiae testificandam, magnis hominum agminibus stipati, à plaudentibus ac Fulgosium nomen laetis acclamationibus subjicientibus, vexillis gentis Fulgosiae insignibus pictis sublati atque extentis; inter tiliarum ac cithararum cantus aere tinnitibus è sacrarum ædium turribus emissis undique personante, multis

civitatis partibus obitis, prætorium tandem subiissent.

A.C. 1416. At Thomas, insequenti anno ejus sæculi sexto decimo, cum in invidia principatus per vim & seditionem invasi levanda, omnes curas defixisset; brevi id multis in patriam promeritis, principatumque melioribus artibus, quam quibus illum adeptus fuerat, gerendo, assecutus est: nam & plebem multis oneribus levavit; & ditionem Genuensem compluribus opidis & vicis adjectis auxit: quos Proceribus Malaspinis finium Genuensium accolis per justas causas ademit; illorum audaciæ severus ultor, publicæque dignitatis ac contemptus sui acerrimus vindex. Verum hæc leviora sunt: quorum etiam nonnulla, ut sese multitudini vendicaret, facta, calumniari quis possit: illud unici exempli in patriam caritatis, ac singularis animi magnitudinis ab illo editum specimen, nullum livori aut obtreptioni relinquit locum; quod grande æs alienum publicum privato ære suo dissolvit, sexaginta millibus aureorum; quæ immanis summa (ut erat illa ætas) ipsis maximis Regibus horribilis visa esset; è re familiari sua in vectigal falis oppigneratum redimendum prolatis.

Eo anno, cum acerrimum bellum inter Gallos & Anglos terra marique accensum esset; Galli, Legatis Genuam missis, decennialibusque induciis cum Genuensibus factis, octo ingentes corbitas, totidemque triremes conducunt: quas, præter remigium ac ceteram turbam nauticam, sexcenti sagittarii conscenderunt: quo genere teli nemo eo tempore Genuensibus peritius utebatur; nemoque validiore, aut longiore, aut certiore ictu figebat: quibus navibus classi suæ additis, Galli, animis sumptis, cum Anglis navale prælium committere non dubitarunt: quod quamquam primo satis acre fuit, magnoque irarum certamine initum; Galli tamen imbecillitati navigiorum suorum diffisi brevi omiserunt: quod sex naves Genuenses, quæ in pugna nihil aliarum discessu perterritæ remanserant, ad noctem fortiter dimicantes extraxerunt: quarum tres ad extremum capte sunt, tres pestem evaserunt: quæ Genuensium virtus omnium laudibus celebrata est. Publicam gloriam Laurentius Folieta virtute sua cumulavit: qui per ea maria privatae negotiationis causa commeans, cum navi, quam unicam habebat, in qua non plus duo & sexaginta homines erant, in septem naves Anglicas ad pugnam comparatas incidit; quas Dux Vemichius Regis affinis ducebat: quarum insequentium impetum Folieta cum ab urbe Caletio usque ad locum Bancum maritimum Sanctæ Catherinæ appellatum fortiter dimicans sustinisset; tandem, suis partim faucibus, partim assiduo numquamque intermissio labore fessis, animum despondere cepisset; omnia circumspiciens, nautam videt expertæ fortitudinis, qui, gravi vulnere in gutture accepto, loqui non poterat, innuentem, ut vulnus sibi obstrueretur: quod Laurentius, utcumque potuit, mox fecit, sanguinemque fluentem suppressit. At ille ab ultima desperatione in rabiem versus, securi arrepta, asserem, quo pons ab Anglis injectus innitebatur, præcidit: qui, adminiculo subtracto, corruens, magnum numerum superstantium Anglorum ruina sua secum traxit: qui omnes undis hausti sunt. At Angli tam inexpectatæ rei stupore oculis & animis defixis, pugnae oblitæ Folieta omittunt: qui incolumis Genuam tandem pervenit; cum ex sexaginta duobus hominibus octo cecidissent, quinquaginta fauciati superfuissent, quattuor tantum integris.

At Thomas in omnes partes muneris sui implendi, resque vitio temporum collapsas restituendi,

A animum & cogitationem continenter versans, rem magni moliminis, immensique laboris, atque infiniti sumptus aggreditur; quam operi assidue insistendo ad effectum brevi perduxit: interiorum enim portum sæculorum negligentia diu neglectum, ac numquam adversus maris impetus reparatum, atque idcirco inundantibus undis obrutum, inutilemque factum, erectis vastæ magnitudinis machinis, aquaque egesta, exsiccavit: duobusque validis muris ex lapide quadrato miræ crassitudinis longitudinisque, altero centum novaginta: altero sexaginta cubitorum cinxit, ac munivit.

B Per idem tempus Vincentellus Istria Corfus defecit; arce Ginceræ, nonnullisque aliis locis occupatis; ditionemque Genuensem terra & mari cum tribus triremibus ac biremi, quas habebat, vexare cepit: adversus quem Abrahamus Fulgosius Ducis frater cum unica corbita, duabusque triremibus, altera majoris, altera minoris formæ, missus est: qui à Corfis, quorum haud exiguum numerum secum habebat, proditus, nonnullis detrimentis acceptis, pedem referre coactus est: ceterum Joanne Fulgosio ipso quoque Ducis fratrem cum corbita & triremi extemplo subsidio missis, copiis auctus Abrahamus Vincentellum bello repetitum Ginceræ, ceterisque occupatis locis expellit: Fulgosiique fratres, cum in Corsica debellatum esset, resque pacatæ, Genuam revertuntur. Eodem anno Respublica dominatu castelli Ponsoni aucta est, ab Henrico Marchione venditi.

C Ceterum, cum civitas sub moderatione optimi principis à præteritis malis respirare cepisset; Duxque Thomas tantorum bonorum auctor in magna gratia & benevolentia cum omnibus esset; haud diu quiete frui licuit: hoc enim anno, qui ejus A.C. 1417. sæculi fuit decimus septimus, initium factum est cursus tantæ felicitatis interrumpendæ. Guarci enim, & Montalti, ceterique Genuenses exsules, Adornis cum illis conspirantibus, indignatis sese, quorum opibus & favore subnissus Thomas principatum patriæ adeptus esset, illius artificio elusos, in Thomam conjurant: ceterum adversus hominem tantis opibus ac tanta populi benevolentia fultum, totque strenuorum fratrum grege munitum omnes conatus suos irritos fore rati; majoribus auxiliis externorum Principum sese communiendos intelligebant. Qua de causa Raphael Montaltus Luca, quam sedem exsuli sibi delegerat, Mediolanum profectus, Philippum adit, consiliaque & mandata conjuratorum exponit: oratque, ut tot civium à truculento Tyranno per summam injuriam patria exterminatorum, ac bonis everforum, inopem ætatem in exilio agentium misereatur; illorumque propugnationem pro sua humanitate, atque animi magnitudine suscipiat. Cupide arripuit Philippus occasionem ultro oblatam, cujus semper avidissimus fuerat, rerum Genuensium turbandarum & miscendarum; ex quarum turbulento statu viam sibi ad Genuæ imperium, cui impotenti cupiditate imminabat, patefacturum sperabat: quare causam aliquam sibi dari semper optaverat, Genuenses intestino bello inter se committendi; quo enervatos & confectos facilius sibi subjungeret. Raphaellem igitur benigne appellatum bono animo esse jubet; omnesque vires & opes suas exsulibus prolixè defert: quos sese numquam ope sua deserturum promittit. Ejus auctoritas Marchionem Montisferacis ac Carolum unum est Marchionibus Carrettanis, multis de causis Thomæ insensos in societatem consiliorum traxit.

At Thomas, cum ea moveri sensisset, haudquam adversus tantam in se unum omni societate omnique externa ope nudatum intentam molem

animo defecit, sed omnia, quæ ad hostem repellendum usui futura esse crederet, comparare instituit; benevolentia populi fretus, ac præsidio strenuorum atque unanimatorum fratrum erectus. Thomamque Malaspinam Cremorini Dominum consiliorum participem Genuæ obversantem, quem ad occulta consilia in ipsius caput struenda venisse resciverat, comprehensum in custodiam dedit; ac Baptistam custodiæ urbis præfectum, Spinetaque fratrem, ad ditionem ejus occupandam cum quattuor peditum millibus mittit: qui, duobus opidis obscuri nominis captis, Genuam reversi sunt: nihilque præterea eo anno post tantos consiliorum apparatus exfules moliti sunt: qui infestisquenti anno, quo nullus toto eo sæculo infestior fuit, mille & quingentis equitibus ac duobus millibus peditum coactis, Genuam contenderunt; quo cum pervenissent, in littore celebris nominis Sancti Petri Arenæ, prope ab urbe, die natali Christi Domini, castris locatis, biduo in speculis fuerunt; si forte ipsorum adventus aliquem motum in urbe excitaret: ceterum, cum diligentia Ducis nihil opportunum illorum conatibus faceret, castris retro motis, ac jugis superatis, opidum Gavium in itinere capiunt; præter arcem, quæ tamen cum opido ipso paullo post in manum Philippi venit, à præfecto tradita, octo aureorum millibus proditoris pretio acceptis. Cumque fama vulgasset, Spinulas Luculanos ultra juga adversus Ducem copias cogere; omnes, qui ejus familiæ Genuæ inventi sunt, comprehensi in custodiam traduntur, in absentiumque bona publice possessum itur. At exfules omnem vim belli in opidum Capriatam vertunt: extemploque Baptista Ducis frater cum mille peditibus & quingentis equitibus subsidio missus, re infecta, rediit; nonnullis damnis in reditu acceptis ab exfulibus, atque ab incolis Campi ditionis Spinularum pagi. Quibus rebus Dux irritatus complures Spinulas Luculanos diligentius conquisitos in custodiam ipsos quoque tradidit.

Paucis post diebus Theramus Adornius, qui ab exfulibus novo atque inusitato exemplo Dux creatus fuerat, unaque Isnardus Guaricus Genuam veniunt; atque in pago Corneliano appellato, prope ab urbe tria passuum millia subsistunt: quibus sexto post die turris promontorii Phari prodita est: qua potiti, cum usque ad ipsa urbis moenia excurrerent, arcem Castellacium, quæ est in cacumine montis urbi imminente, tenebant; irrita incepto, à Baptista retro compulsi: in qua fuga duo Genuenses cives, alter ex Nobilium Factione, alter ex popularium corpore capti sunt; quos Dux capitali supplicio affecit. Mense Aprili Baptista Buzallam contendit; quam captam incendit. At Philippus instituta consilia persequens, opidum Burgum Furnariorum & Ovatom una cum arce expugnat: quo tempore tres ingentes corbitæ, quas Dux, Joanne fratre præfecto, contra Jacobum Adornium miserat, tres naves ejusdem Jacobo prope Provinciæ Narbonensis littora ceperunt.

At Philippus majore conatu bellum Genuense sibi capeßendum intelligens, tria equitum atque octo peditum millia (in quo exercitu omnes exfules fuerunt) Genuam mittit: qui ex valle Porciferæ in vallem Bisamnam transgressi, duo munimenta, quæ Thomas tamquam claustra ab ea parte hosti opposuerat, expugnant; excursionesque usque ad ipsa urbis moenia, non sine cæde ac sanguine faciunt. At Thomas & fratres omnibus rebus invigilantes, hostium conatus diligentia sua eludebant: quorum tanta fuit virtus, ut, cum bellum à potentissimo hoste ipsis moenibus institisset, in urbe tamen ipsa nullus tumultus esset, nullumque belli vestigium appareret; tabernis reſeratis,


cellulariisque operi intentis; mercatorioque foro conventu contrahentium frequenti. Igitur hostes, cum nihil inceptorum procederet; ne diutius in spem irritam tererent tempus, castris retro motis, juga transcendunt; ac majoris rei spe frustrati, ad minutiora se convertunt; omnibus locis, quæ civitas ultra juga habebat, occupatis, atque inter se divisis: Theramoque Adornio Capriata & Taliolum obvenit: Ponsonum & Parecum Marchioni Montisferacis datum est: Petram opidum Marchio Finarii obtinuit: cetera omnia Philippo ipsi cesserunt.

Neque interea in ora in Orientem versa quies fuit: ceterum motuum initia virtute & diligentia Ducis & fratrum compressa sunt: quibus rebus gestis, Thomas totam Italiam fama nominis sui implevit: qui tot discrimina prudentia, vigilantia, virtute sua à se discussisset: ceterum, cum Philippus Genuenses bello urgere non desisteret; Genuenses Florentinos legationibus assidue fatigabant; quibus consilia precibus miscentes, illorum opem implorabant: non enim minus ex ipsorum quam ex Genuensium re esse dictitantes, Philippum supra modum non crescere: cum Mediolanenses Principes sese non magis Liguriæ quam Etruriæ imperio imminere omnibus temporibus apertissima signa dederint: qui si Genua potiantur, profecto ex ea urbe sibi ad Etruriæ imperium gradum facturi sint; ac, si nihil aliud, potentes maris facti, mare ac maritima commercia Etruriæ clausuri: ceterum, cum ista Florentinos nihil movissent, Genuenses ad consilium ipsis parum honorificum, in primisque detrimentosum descendere coacti sunt; Liburno Florentinis centum & viginti aureorum nummum millibus vendito, quibus bellum adversus Philippum ale-

Infestisquenti anno Genuæ ab externis & intestinis motibus otium fuit: at qui insecutus est ejus sæculi vigesimus, insignis in primis fuit, clarissima victoria de celsissimo Rege parta; quam nunc exponere pergam. Ferdinando parenti mortuo in duobus nobilissimis Aragoniæ & Siciliæ regnis successerat Alphonfus filius maximus natus: cujus clarissimæ & heroicæ virtutes, quarum fere omnium fastigium tenuit, unam tantum exceptionem habuerunt; immodicam regnandi & proferendi imperii cupiditatem: quod perpetuum fere sublimium ingeniorum vitium illum sæpe ad non concessa provexit. Is igitur nihil nisi celsum & amplum sibi nomen, magnamque famam faciendi; mire angebatur, cum Sardiniam, & Baleares, ac ceteras interjectas insulas teneret; unam Aragoniæ regno & Siciliæ interpositam Corsicam velut continuatam imperii sui seriem interſcindere: præ potenti igitur cupiditate ejus insulæ potiundæ, foederis cum populo Genuensi à Ferdinando parente perpetua fide persancte culti oblitus, occulta ejus rei consilia cum multis ex Corsorum primoribus serere cœpit; quos cum spe ingentium præmiorum, tum insita animis mobilitate inductos facile fuit in suas partes suamque voluntatem transducere: Corsorum enim ingenia supra ceteros mortales novandarum rerum avida sunt: qui nunquam in præſentes Dominos sincera ac stabili fide, nova semper imperia spectant; ad omnemque levem spei auram mobiles, subita consilia deficienti capiunt. Eorum igitur promissis erectus Alphonfus, cum tredecim ingentibus corbitis ac tribus & viginti triremibus Barchinone solvit: primumque opus ejus in Italiam appulsi fuit Corsicam, nihil tale Genuensibus ab amico Rege expectantibus, invadere: in qua primo appulsi Calvo munitissimo opido, quodque velut claustra est

insulæ à parte in Italiæ littora versâ, atque alterum ex Genuensis imperii firmamentis, proditi-
ne Corforum potitus est: quo felici ac celeri suc-
cessu erectus, Calvo prævalido præsidio firmato,
eundem exitum sperans, Bonifacio urbi Africam
spectanti alteri firmamento classem admovet. Est
autem Bonifacium urbs, quam Veteres, sive ob
similitudinem, sive quâ alia de causâ, portum
Syracusânium appellabant, natura & opere muni-
tissima, in præalto promontorio sita, quod rupes
undique abscessas atque inaccesas habet; mari fe-
re omne promontorium circumluente, præter exi-
guam partem, qua paullatim se extenuante, con-
tinenti jungitur, pirique formam adspicientibus
præbet. Cingunt urbem prævalida moenia crebris
ambientibus turribus: sinus maris non plus ducen-
torum passuum latitudinis, à faucibus mille passus
introrsus retractus, radicesque promontorii attin-
gens, altitudinis quamvis magnum alveum feren-
tis, tutissimam stationem navibus ab omnibus ven-
tis præbet. Rex situm urbis diligenter contempla-
tus, cum de expugnatione desperasset, ad obsidio-
nem se convertit; copiisque expositis, urbem ven-
luti corona terra ac mari cingit & circumvallat;
confilio oppugnationis non tamen omnino omis-
so: quare bombardis statutis in loco, quem cam-
pum Romanellum appellant, unde solum urbs
quati poterat; moenia verberare instituit: pede-
stribusque copiis admotis, urbem crebris oppu-
gnationibus subinde aggrediendo, constantiam ob-
fessorum tentabat: qui brevi in summas angustias
adducti sunt; hinc annonæ inopia premente, il-
line Aragonensi nullam nocturnam aut diurnam
quietis partem dante: ut juvenus numquam ar-
ma exueret, cum multis locis regis terra ac ma-
ri urgentibus occurrendum esset; neque in tanta
defendentium paucitate essent, qui integri fessis
succederent. Tot igitur asperitatibus circumventi
ac malis domiti ad necessitatem cum Rege paci-
fendi adducti sunt; iis conditionibus, ut Rex
permitteret Bonifacianos Legatos Genuam mitte-
re, qui statum civitatis demonstrarent: quod, si
ad Kalendas Januarias, quæ proximæ erant, sub-
sidium à Genuensibus non submitteretur, tum
vero sese urbem Regi tradituros: in quam rem
viginti adolescentes principum liberos obsides de-
derunt. Legatus, celo ce conscensa, secunda na-
vigatione usus Genuam venit; in Senatumque in-
troductus cum statum rerum Bonifacianarum ex-
posuisset, quasque in angustias fidelissima ipsorum
colonia adducta esset, demonstrasset: quæ, nisi
propere subsidio catur, in manus Alphonsi ex pa-
cto ventura sit: ad hoc, cum omnium temporum
merita Majorum suorum in Rempublicam Ge-
nuensem commemorasset, longa & flebili oratio-
ne opem Genuensium imploravit; cum preces
consiliis subsequens addidisset, longe pluris Ge-
nuensium quam ipsorum Bonifacianorum inter-
esse, cam urbem retineri; quippe Bonifacianos,
deditione Alphonso facta, nihil præterea, quam
Dominum mutatuos; iisdem legibus, iisdem im-
munitatibus, quibus sub Genuensibus, sub illo
futuros: at Genuensibus in Bonifacii casibus omnis
insulæ Corsicæ eventum verti. Responsum est
Legato, Bonifacianos apud Genuenses, à quibus
oriundi sint, non modo generis & sanguinis ne-
cessitudine, sed meritis quoque & officiis, ac fi-
de uno & perpetuo tenore sincere ab illis culta,
filiorum caritatem semper obtinuisse: quare, ta-
meti ipsorum discrimina nihil populum ac Rem-
publicam Genuensem attingerent, illorum tamen
causâ non minori, quam sua ipsorum, Genuensi-
bus curæ semper fore; neque minore contentione
de Bonifacianorum salute & commodis, quam
de suis, Genuenses dimicatuos: bono igitur

A tur animo esset Legatus: postulatum enim auxi-
lium in tempore illis præsto futurum; brevique se
effecturos sperare, ut nihilo Regi lætiore exitu
bellum hoc terminetur, quam injustiore causâ sus-
ceptum sit; Rexque sese pravis consiliis pares even-
tus adeptum lugeat. Igitur consilio civitatis voca-
to, decretum est, septem ingentibus corbitis ac
navicula Bonifacianis primo quoque tempore sub-
sidio eundem: ceterum res decretu quam expe-
ditu facilior fuit, urbe habitatoribus pene inani:
qua maxima civium pars contagionem grassantis
pestilentiae fugiens excefferat; ærario pecuniis ina-
niore: quas difficultates Ducis diligentia & vir-
tus expedivit, haud contemnenda pecuniæ sum-
ma à fœneratoribus Lucensibus mutua sumpta;
domestico argento ac pretiosiore suppellectili,
gemmisque, quas habebat, in eam urbem oppi-
gnoratam missis: brevique classis comparata &
instructa est, omnis generis comæteum ac bel-
licorum apparatus cumulate plena; ad hoc præ-
valida ac delecta bellatorum manu firmata: cui
præfectus est Joannes Fulgosius Ducis ipsius fra-
ter, adolescentiam vix egressus, ceterum magnæ
indolis juvenis: cui in consilio dati sunt, more
Majorum, quattuor cives, Thomas Savignonus,
Paulus Interianus, Christophorus Calaus, Joan-
nes ab Andrea. Omnibus rebus expeditis, cum
se homines ad conscendendum accingerent; ecce
res orta est, qua prope factum est, ut omnia ever-
terentur, adversa tempestas validis flantibus ven-
tis; quorum rabie subinde crescente, mire ani-
mo angi Dux, metuens, die præstituta urgente,
ne tantorum consiliorum apparatus irriti evade-
rent, tantamque plagam Corsicæ amissæ Respu-
blica acciperet: quod impedimentum cum huma-
nis consiliis expediri non posset, ad divinam opem
vir pius confugit; ad ædemque Deiparæ Corona-
tæ accedens, sollemni sacro ac precibus Dei im-
mortalis pacem exposcit. Pii animi est credere pre-
ces optimi viri tam pia causâ incensas auditas ef-
se: insequenti enim nocte adversus ventus subito
concidit; ac pro eo acer Septentrio incubuit, in
Meridiem navigantibus inprimis secundus; qui
nunquam interrupto tenore flans classem paucis
horis in conspectum Bonifacii tulit: quæ cum
substitisset, Joannes milites ac navales socios tali
oratione ad pugnam acuisse dicitur: *Non, ut vos
hortarer, cives, alloquendos vox duxi, quem ego labo-
rem semper inanem & supervacaneum putavi: nam ve-
que ignavi, & timidi, strenui, & audaces oratione
imperatoris sunt; non enim verbis natura vincitur; &
fortes sua ipsos virtus & audacia per se satis acuit. Ex
hoc postremo genere vos esse, illud certissimum est ar-
gumentum; quod cum Genua remanere possitis, nemi-
ne tamen vos cogente, in tanti discriminis voluntariam
militiam alacres nomina ultro dedistis. Tales igitur vos
viros caritate patria mihi præcurrentes adhortandos du-
cam? aut id sine vestra magna injuria me facturum
credam? verum ego, ut vos, quæ res hoc tempore aga-
tur, admonerem, vocavi: versatur enim magnus in
quorundam mentibus error; qui nos sola misericordia
Bonifacianorum commotos, ac ne fidelissimam coloniam
perire sineremus, domo profectos credunt: quam tamen
rem dignam, ut omni nostro conatu amplecteremur,
numquam negaverim: ceterum in longe majoris rei dis-
crimen, quam Bonifacium est, dimicaturi sumus: de
servitute enim à patria, nobis ipsis, parentibus, fratri-
bus, conjugibus, liberisque nostris arcenda certamen
nobis fortuna indixit. Bonifacio enim capto, imperium
Corsicæ Alphonso stabilitur; quam arcibus ac firmis præ-
sidiis firmatam nulla spes est ex ipsius manibus unquam
extorquendi: ex hac porro insula nos faucibus perpetuo
est pressurus, civitatemque nostram arta obsidione, sine
ullo magnopere impendio suo, urgendo, commercisque
& annona comæteibus, quibus alimur, intercludendo,
fame*



fame suffocaturus: qua re fiet ut sedens & tranquillam quietem agens, nos ad necessitatem tandem adigat jugum accipiendi: longe igitur alium animorum habitum pugnam iniuri induere debetis: etenim si Bonifacii salus tantummodo ageretur; satis haberetis, pugnam acriter inire, nihil de summa contentione remittere, nihil non tentare, omnia denique summa facere; ut urbem, subsidio introducto, liberaretis: quod si ea vis hostium vobis opponeretur, cui nullo modo pares esse possitis; tum vero inexsuperabilibus vim non asserendam statueretis; fideque ad extremum peroluta, Bonifacianis permetteretis, ut in extremis rebus suis, sibi ac patriæ consulere: at in libertate vestra defendenda, sic statuere debetis, cives, nihil inter subsidium Bonifacium introducendum (in qua re libertas ipsa vestra vertitur) & mortem medium: quam mortem non solum gloriæ & decoris causa, fortiter optetere debetis; sed quod ex morte vestra viam straveritis iis, quos superstites fortuna fecerit (quos multos fore necesse est) ad perrumpendum per medios hostes, atque ad ultimum sinum penetrandum; navesque, quæ in tutum evaserint, urbis crepidini applicandas: quæ non ita paucæ esse possunt; quin eam vim annonæ & reliquorum commentuum, ad hoc illud hominum presidium in urbem inferant, quod ad victum parvo opido in multos menses providendum satis sit: atque interea Bonifacianos ipsorum fortuna, aut classis a nobis iterum comparanda, aut Regis discessus, suis negotiis illum alio avocantibus, expediat. Neminem vestrum hominem putarem; qui, uxore ac parvulis liberis ante se statutis, ac misericordiam ipsius implorantibus, in miseram ac perpetuam servitutem abducendis; non eos, si nulla alia illos servandi via esset, morte sua redimeret: eam cogitationem secum ipse quisque in pugnam afferat: adspicietis matres Bonifacianas, in medio ardore pugna, passis criminibus, ac flentes è mœnibus opidi manus in vos intendentes, parvulos natos vobis ostendentes, misericordiamque vestram implorantes: eas non Bonifacianas mulieres, sed matres, sorores, conjuges ipsas vestras putatote, natos vestros, illorumque salutem & libertatem vobis commendantes: hoc si bene fixum in animis cujusque est, certissima me spes subsidii introducendi tenet; sin aliter animati estis, nihil est, quod nos in tanti discriminis casum temere precipites demus. Cum vix perorasset, conclamant omnes, ne cunctetur; sed rem communi Marti committere properet: omnes enim animos obfirmasse, nisi presidio Bonifacium invecito, è prælio vivos non redire.

Interea Rex, cum cognovisset classem Genuæ comparari; fauces portus valido trabium, ac funium, & ferreæ catenæ magnæ crassitudinis obstruxerat: quas insuper, quinque ingentium navium proris in hostem obversis, inter se funibus ac trabibus continuato ordine connexis firmaverat: quarum extremæ ponte utrique littori jungebantur, quibus à terra subsidia in naves pugnantibus submitterentur: pone quas alium ordinem minorum navium tamquam in subsidiis collocaverat; tormenta in littore disposuerat, quibus latera subeuntium hostilium navium incefferentur: mandatumque terrestribus copiis dederat, ut simulatque hostilem classem invadentem vidissent, ipsi eodem tempore mœnia aggredierentur; sperans se illa defensoribus vacua offensurum, opidanorum animis & oculis in eventum navalis pugnae versis. At opidani classem Genuensem conspicati, silentio tenebrarum hominem ad præfectum mittunt: qui cum ad classem adnataisset, statum rerum præfectum docet. Præfectus, fide & constanti virtute Bonifacianorum laudata, hominem eadem via remissum duarum rerum admonere Bonifacianos jubet; ut certamine navali contracto, ipsi bipartiti partim muros custodiant; partim cum securibus præsto sint, ad funes ac trabes, quibus catena devincta sit, præcidendas. Cum classis, ven-

A to cessante, ad octavum Kalendas Januarias haud procul ab ostio portus in ancoris stare totum eum diem coacta esset, navis Babilani Nigri ingenti bombardæ ictu magno foramine aperta est: quare littus circumiens, ad partem ab eo loco aversam navigare coacta est, ad cavum obstruendum: in quo opere dum est occupata, Bonifaciani demonstrant, posse ab ea parte, quamvis cum ingenti labore, in urbem penetrari; locumque indicant: cujus rei tantus ardor nonnullis ex iis, qui erant in navi, est injectus; ut, Bartholomæo Pinello Duce, nihil adspectu præfractarum rupium à via vix humanis pedibus superabili ingredienda deterriti, per arduum & angustum clivum mutuo innixi, ac trahentes & sublevantes se, eminentiaque saxa manibus apprehendentes, in summum jugum evaserint; atque urbem nonnihil annonæ gestantes sint ingressi. Postero die vento, qui cessaverat, acerrimo iterum coorto, Genuensibus secundo, hosti adverso; præfectus haud cessandum ratus, paucis milites cohortatus est, ut suæ & Majorum suorum virtutis & gloriæ memores acriter prælium ineant; cujus felicem exitum Dei immortalis auxilio freti sibi animo sponderent: qui ideo Deus exercituum jure appelletur, quod ejus Numen in victoria danda vel adimenda in primis appareat: neque dubitandum, quin justæ Genuensium causæ esset affuturus, ac prælium cum injusto hoste, atque alienorum per summam injuriam appetente, profligaturus: cujus rei jam evidentia signa dederit, vento adverso, haud dubio miraculo, extincto; ac Genuensibus prospero immisso, & nunc iterum excitato: à perspicuis igitur pene verbis Dei invitati, ad fortem & intrepidam operam edendam animos & corpora parent. Cum sua sponte satis antea incensi, tum oratione Ducis incitati milites, alacri clamore pugnam poscunt. Hoc militum ardore confirmatus præfectus, nihil cunctandum ratus, omnibus ad pugnam instructis & aptatis, ancoris sublatis, valido vento terga afflante, in hostem fertur: tantoque impetu munitionem, qua portus claudebatur, invadit, ut illam primo incurfu perfregerit; hostibus miraculo non expectatæ rei obstupefactis: qua re, aditu sibi patefacto; fauces cum tribus navibus ingressus; ceteris quinque retro relictis; sive quod angustia plures non caperent, sive alio consilio; cum navibus in fronte locatis prælium conferit: quod ingentibus utrimque animis commissum, ipso certamine paullatim accendebatur; Aragonensibus in naves Genuenses magnam vim bombardarum è terra displodentibus; Genuensibus in Aragonenses scorpionibus ac ballistis magnam vim telorum ingerentibus; quibus multi utrimque vulnerabantur, atque exanimabantur: in quorum locum hinc terra ab Aragonensibus, illinc à navibus Genuensibus, quæ retro substitutebant, recentes & integri assidue submittebantur; ut atrox & miserabilis species pugnae brevi facta sit. Certamen accendebant hinc Rex, prælii è littore è sublimi loco inspector: qui Aragonensibus maximus erat stimulus, ad fortem & strenuam operam edendam; cum nullius audacia aut ignavia Regem, sub cujus oculis res gerebatur, posset latere: illinc Bonifaciani, qui è tectis ac summis ædium culminibus prælium spectantes, signis tantum ac manibus in supplicantium ac misericordiam implorantium modum confirmatis, sese ac parvulos liberos suos, quos matres è sinu inspicundos proferebant, Genuensibus commendabant: virorum igitur fortium opera utrimque edebantur; utroque Duce, Rege terra, præfecto navis discurrentibus, providentibus, omnibus rebus occurrentibus, omnia denique bonorum imperatorum munera exsequentibus. Cum amplius tres horas,

horas, magno animorum certamine ac spe neutro inclinata, pugnatum esset, Dux Genuensis sollerti industria cuncta animo agitans, rem commentus est, quæ Genuenses victoriæ tandem compostes fecit. Erat in classe Genuensi Andreas quidam celebris nominis urinator, quem à comparatione *mergum* appellabant: is sese undis mergere solitus, per incredibile temporis spatium, nihil falsi humoris imbibito, sub undis durabat: è quibus nulla re læsus emergebat. Hic iussu præfecti spe præmiorum oneratus se demergens atque imum petens, latens ad classem hostilem adnatavit, alveumque regiæ subiens funes omnes ancorarum, quibus navis firmata erat, incidit: quæ firmamento subtracto, undis jactari coëpta est, atque huc & illuc ferri, in suasque ipsas naves incurrens, nonnullasque earum secum trahens, seriem classis interrupit; atque ordinem pugne perturbavit. At Genuenses, occasione arrepta, per mediam disiectam hostilem classem, Aragonensibus stupore obtormentibus, ac causam pugne à regia omisissæ ignorantibus, perrumpunt; atque ad intimum sinum penetrant; promontoriique crepidini conjuncti subsidium hominum, & annonæ, ac reliquorum bellicorum comænatuum per ostium in urbem introducunt. At Rex, ut exitum Genuensibus intercluderet, quando ingressum non potuerat, aliam pugne rationem init: classem enim bipartitam utrique littori præterdit; crebris bombardis, & in naves impositis, & in littore dispositis, quibus latera Genuensium navium prætervehentium incesserentur: simul animos suorum adverso successu dejectos verbis erigit; nihil esse dictitans, quamobrem Genuenses virtutem casui & fortunæ assignent: quos, cum sese aperta vi pares non esse sentirent, ad fraudem animum convertisse: sed non semper dolos felices fore, quibus consilio occurri possit; ac suum locum virtuti quoque relictum: proinde sese ad acceptam ignominiam delendam confirmant. At præfectus Genuensis ea specie primo nonnihil perturbatus, deinde celeriter collecto animo; eadem sollertia, eisdemque artibus hostis apparatus elusit, quibus superiores conatus frustratus fuerat: ventum secundum nactus, ancoris sublati, simplici ordine navium iter ingreditur; navicula ante agmen præmissa, pice, bitumine, sulphure, tæda, aliisque ignis alimentis plena: quæ ubi classi hostili appropinquavit, nautæ, materia multis locis subito incensa, navicula vacua relicta, in scapham, ut constitutum fuerat, desiliunt: at navis subito conceptas flammæ late undique jactans, atque hostem vapore afflare incipiens; tantum terrorem, qui erant in navibus, iniecit, ut obliti pugne sese partim in terram, partim in mare dejicientes, appetenti pesti trepidantes, alique alios urgentes subtrahere festinarent. At Genuenses fortuna utentes, per mediam hostilem classem transitu libero dato, è faucibus portus erumpunt: velisque in altum datis, secunda navigatione patriam repetunt, magnis cum plausibus, & aliis effusæ lætitiæ significationibus à cunctis ordinibus excepti; omnibus conclamantibus, raro ullum unquam facinus memorabilius, ac majoris aut infuscipiendo audaciæ, aut in gerendo consilii & fortitudinis, aut in conficiendo felicitatis ab ullo populo editum esse; quam hoc à Genuensibus, ductu Joannis Fulgosi, & auspiciis Thomæ fratris in urbe Bonifacio obsidione eximenda.

Bonifacii retenti lætitiæ, gaudium Calvi insequentis anni ejus sæculi vicesimi unius initio sine certamine recuperati continuatum est. Calvenses enim injuriis & contumeliis Catalanorum & Aragonensium subacti, conjuratione facta, armisque arreptis, præsidio regio expulso, sub an-

tiqum Genuensium imperium sua sponte redierunt: ceterum neque hoc, neque ullum aliud gaudium Philippi ambitio sincerum esse sinebat. Is non tam ab exsulibus, quorum greges circum se assidue habebat, continenter instigatus, quam indomita cupidine Genuam veteri imperio adjungendi abreptus; nullum Genuenses vexandi finem faciebat: qui, bello Thomæ Duci palam indicto, bis exercitum in vallem Porciferæ misit; irritum tamen semper incepto: quare Philippus omnes conatus suos adversus Genuenses semper inanes evasuros, intelligens, nisi maritimo quoque bello illos urgeret, octo triremes à Rege sibi commodatas stipendio conduxit; quibus duas addidit, quas Finarii ipse armaverat: sub exitumque ætatis Guidonem Torellum cum ingentibus equestribus ac terrestribus copiis Genuam mittit; quibus Genuenses spretis, hostiles conatus toties inanes experti, incredibili celeritate octo triremes armant, Baptista Fulgosio, magni animi viro, magnique rerum bellicarum usus, præfecto; qui, Senatus iussu, Finarium petit: quem triremes Philippi cum pari navium numero adventantem procul conspicatæ, remis, velisque fugam capiunt: quarum una, quæ ceterarum cursum æquare non potuit, in terram ejecta, à Genuensibus incensa est; reliquæ septem cum duabus Finarii armatis, itinere in Occidentem primo simulato, prorsus conversis, portum Pisanum tenuerunt: quas Baptista numquam omisissas ad necessitatem prælii adegit: quod primo atrox & cruentum, ad extremum Genuensibus adversum fuit, quinque navibus amissis, ac præfecto capto; cum tres remorum beneficio pestem evasissent: qua clade Dux infractus, cum sibi imparem contentionem cum Philippo esse cerneret; pecuniis deficientibus atque animis civium labare incipientibus, hanc quoque moderati animi laudem ceteris recte factis suis addidit, ne urbem pertinacia sua ac regnandi cupiditate everteret: igitur de fratrum ac complurium præstantiorum civium consilio & assensu, civitatem ac ditionem iisdem pactis, quibus olim Antoniottus Adornius Regi Gallorum ditionem fecerat, Philippo tradidit, seque ducatu abdicavit; triginta aureorum nummum millibus sibi debitis acceptis: cui patria egregium in illum caritatis ac memoris meritorum animi testimonium dedit: nam indignum rata, egregium virum ac de se ita meritum, abjectum & contemptum in solitudine inopem ætatem agere, urbem Sergianam cum tota ditione illi donavit: quindecim aureorum nummum millibus Spinetæ fratri rerum Saonenis causa numeratis. Igitur Thomas, Torello ipso ac magna civium turba prosequente, ad mare deductus, parata nave conscensa, iter Sergianam versus cepit: quo profecto, Franciscus Carmaniola Comes Castelli novi, qui Torello successerat, cum omnibus copiis urbem ingressus, ejus possessionem Philippi nomine cepit: qui magistratu non mutato, ut animos Genuensium deleniret, quindecim aureorum nummum millia, ad detrimenta in bello accepta refarcienda, civitati donavit: Carmaniolaque, Castelletto, ceterisque ditionis Genuensis arcibus prius acceptis; stipendioque bimestri sibi numerato, ducta ratione annui stipendii octo librarum millium, cum totidem Ducibus solverentur; Urbanoque à Sancto Alosio in locum suum relicto, Mediolanum rediit: quo paullo post viginti quattuor Oratores à civitate missi sunt, ad obedientiam palam in celebri Procerum conventu deferendam; jusjurandumque sollempnibus verbis dandum.

At Philippus, imperio Genuæ parto, curas ad illud sibi stabili possessione firmandum extendere coëpit: qui quamquam non erat nescius, eam esse Ge-

nuenfium fortunam, eumque rerum statum, ut in libertate esse non possent; ea tamen esse ingenia intelligebat, ut servitutem ferre nescirent: documento esse Gallorum Reges, ipsiusque majores; quorum dominatus Genuæ numquam diuturnus fuisset: ad hoc rem sibi esse intelligebat, non tam cum privatæ fortis hominibus, aut mercatoribus, qui quæstui intenti publicas res minus curent, & ab omni cogitatione novandarum rerum privatæ negotiationi semper damnosa longe abhorreant, quietorum quam splendorum consiliorum amiciores; quam cum multis claris ac præpotentibus familiis; quæ æquabilitatem juris cum ceteris civibus non ferentes, præter multorum populorum dominatum urbi ac ditioni Genuensi circumjectorum, capita Factionum Genuæ erant; singulæque innumeram multitudinem hominum tam urbanam, quam ex omnibus Genuensibus finibus, ad se trahebant, pro ipsarum dignitate & amplitudine omnem dimicationem subire paratorum: in his familiis acres ac strenuos viros, magnæque indolis ac magni animi homines semper fuisse; qui consilia de magnis ac publicis rebus cum Regibus ac Principibus agitent; fœdera ac societates jungant; bella gerant; inimicitias sumorum virorum ac Principum non recusent; auctoresque perpetuo sint rerum miscendarum; dum unaquæque earum, vel ad principatum ipsum civitatis, vel ad eminentem potentiae gradum contendit, deque eo ferro decernit: ejusmodi hominibus non facile jugum imponi. Cum omnia circumspectaret; nullam aliam expeditiorem viam inibat, consilia ad effectum perducendi, quam, vires paullatim detrahendo, Genuenses privatim & publice enervare; facile enim fore, exsangues & enectos subigere: quam rem facere dupliciter aggressus est: opida & castella ditionis Genuensis à Republica abstracta, levibus de causis, largiendo; ac lentum & continuum bellum inter illos alendo: quo paullatim conficiantur; dum ipse exulibus arma patriæ, atque ipsimet subinde inferentibus, tamquam majestatis oblitus, segniter ac negligenter obfistit, modica ac sera auxilia suis submittendo: quæ bella tantarum opum Princeps nutu discutere potuisset.

A.C. Insequenti anno ejus sæculi vicesimo altero; 1422. qui Petrum Georgium Papiensem, Episcopum Novariensem, Guidonem Torellum Parmensem, Speronem à Petra sancta Mediolanensem, Franchinum Castellionum Jurisconsultum Papiensem, Vicarios Philippi habuit; quibus sub finem anni successit Carmaniola; septem naves, Francisco Spinula præfecto, adversus Catalanos parvo pecuniarum impendio armatæ sunt: cum remigium, nullo petito stipendio, victu tantummodo contentum fuisset. Spinula igitur è portu Genuensi profectus, classe Catalanorum nusquam inventa, ne ejus expeditio inanis omnino evaderet, opidum Longosardum in Sardinia expugnavit, Genuamque reversus est: quattuorque rectoribus, quos supra nominavimus, stipendia persoluta sunt: ducta ratione viginti duarum millium librarum annuarum: quod idem stipendium, additis insuper libris octo millibus, Carmaniola voluit: cum diceret eandem summam Bocicardo Gallo persolutam fuisse: neque consideraret illud potius meritum gratuitum præmium fuisse, quam mandati muneris stipendium; nullumque ipsius meritum in Genuensem Rempublicam exstaret.

A.C. At eo, qui consequutus est, annus ejus sæculi 1423. vicesimus tertius; cum Philippus ad Joannæ Reginæ ac Ladislai Provinciæ Narbonensis Comitis à Regina adoptati partes sese applicuisset; Carmaniola omni contentione in consilio universæ civitatis pugnans, ac docens, è re Genuensium esse, Al-

A phonsum & Catalanos perpetuos nominis Genuensis hostes, Neapoli, quam urbem occupant, expelli; pervicit tandem, ut civitas primo retractans, atque inopiam ærarii excusans, ducentis librarum millibus in sumptus decretis, tredecim triremes ac totidem corbitas armaret: quarum præfecti creati sunt; triremium, Galeottus ex Marchionibus Finarii, Simon à Mari Corsicæ incola, Andreas Lomellinus, Andreas Spinula, Petrus Auria, Anfaldus Grimaldus, Othobonus Imperialis, Petrus Rex, Meroaldus Marruffus, Thomas à Credentia, Nicolaus Biasia, Paulus Sansonus Saonensis, Blasius Asleretus, qui idem totius classis Scriba fuit; addita est triremis minoris formæ, ac biremis Joannis Cossæ: at corbitis præfecti sunt, Franciscus Spinula, Thomas Interianus, Babilanus Nigrius, Philippus Vivaldus, Thomas Squarciaficus, Lucas Ardimentus, Leonardus Savignonus, Dorinus Grimaldus, Hieronymus Falamonica, Bartholomæus Borlasca, Bartholomæus Borellus Saonensis, Jacobus Quantus urbe Pera oriundus, Antonius Montonus à Pisis: novemque majoribus corbitis, præter ordinariam nauticam turbam, quingeni armati singulis additi sunt; reliquis quattuor minoribus duceni singulis: additæ sunt classi triremes tres, duæ majoris, una minoris formæ, quas Ludovicus Genuam misit: cuius pecuniis duæ quoque Genuæ triremes armatæ sunt; quarum alteri præfuerunt Opicius & Raphael Flisci, alteri Baptista Fliscus Canetus & Jacobus Fliscus.

At Alphonsum tristis nuncius ex Hispania acceptus, Henricum fratrem ab Joanne Rege Castellæ tota fere ditione sua spoliatum, captumque, & in custodiam datum, à cogitatione rerum Neapolitanarum in præsentia avocavit: quare Petro fratre infante in custodiam urbis & rerum in regno paratarum relicto, ac Jacobo Caldora, cui in primis fidebat, nonnullisque aliis sociis consiliorum & regendarum rerum additis, cum sollemni jurejurando populis confirmasset, sese cum majoribus terrestribus & navalibus copiis brevi rediturum; cum quattuordecim triremibus Neapoli solvit: atque in itinere Massiliam, civibus, ut in nullo metu, negligenter agentibus, portisque ac mœnibus urbis nullis custodiis aut stationibus firmatis, capit; quam militibus diripiendam dedit: cum nihil ipse ex præda voluisset, præter corpus divi Ludovici, Caroli secundi Andegavenfis filii, qui ejus civitatis Episcopus fuit; quod postea Valentiam delatum loco celso & conspecto collocari jussit; indignum esse affirmans, corpus sancti viri miraculis clari in squalore direptæ & incensæ urbis contemptum obsolescere. Illud quoque perpetuæ continentiae & moderationis suæ exemplum edidit, quod mulieres ante direptionem jussu suo in ædem sacram subductas, ne contumeliis militum obnoxiae forent, attingi aut excuti vetuit; cum multi asseverarent, illas ingentem auri & gemmarum vim secum tulisse: qui, itinere repetito, secunda navigatione usus, Valentiam tandem incolumis appulit.

Interca Guido Torellus præfectus classis à Philippo designatus, mense Decembri incunte, Genuam venit: quæ res animos Genuensis juventutis in Carmaniolam propensæ à Philippo alienavit: cujus magna pars classem conscendere recusavit, imperium Torelli respuens, in quo nullum usum rerum navalium esse crederet: tandem classis solvit; quæ cum Cajetam appulsa esset, Cajetani paucitatem navium despicientes, cum classis nondum tota apparuisset, primo Genuensibus illudere, rogantes, ubi tot equitum & peditum nubes essent; ubi tot corbitarum, quem jactaverant, immensus numerus: ceterum ubi naves armatis homi-

hominibus refertas portum subeuntes viderunt, animis conciderunt; praefectumque, nunciis missis, orarunt, ut Aragonensi praesidio incolumi dimisso, urbis dominatu contentus esset, quam illi tradere parati essent. Accepta est conditio, atque urbs tradita: quod exemplum ceterae maritimae urbes secutae sunt: quibus rebus confectis, classis Neapolim petit; cum eodem tempore Franciscus Sfortia eidem urbi copias admovisset: quae, hinc Francisco terra, inde Genuensibus mari acriter urgentibus, brevi in magnas angustias adducta est; ut multi ductores cum copiis, quas secum habebant, urbe excesserint. At Caldora res ad iniqua inclinat cernens, auxiliis ab Alphonso plane desperatis, sibi consulendum, ac, quod futurum erat, cum suo emolumento adjuvandum ratus, occulta colloquia per internuncios cum Francisco serere coepit de Petro ac Neapoli deferenda; si stipendia sibi ab Alphonso debita persolverentur: paucisque commutatis verbis, res convenit: postulatisque stipendiis ex aere Philippi persolutis, quae ingentem summam confecerunt; Caldora simulans, Petrum infantem perniciosae consilia in ipsius caput occulta struere, ipsum capiendi & carcere includendi, cum copiis suis ipse quoque Neapoli excessit: quare Petrus infans sese ab omnibus fere desertum cernens, in arcem novam se recipit: Franciscusque & Torellus urbe, Reginae Joannae nomine, sine certamine potiti sunt.

A.C. 1424. Neapoli capta, insequenti anno ejus saeculi vice-
fimo quarto classis omnem oram Neapolitani regni circumvecta, quae dubia erant, Reginae confirmavit; quae imperium detrectabant, partim vi, partim metu ad deditionem adegit. Neapolimque reversa, cum, omnibus longa militia absumptis, nihil esset, unde militibus & navalibus sociis stipendia debita persolverentur, exiguo subsidio a Regina ipsa quoque pecuniarum inopia laborante sublevati sunt, centenis aureis nummis in singula navigia distributis: quorum stipendiorum causa magnae contentiones inter Torellum & praefectos Genuenses excitatae sunt; quae usque ad jurgia exarserunt: at classis, rebus feliciter confectis, Genuam incolumis sub finem Maji pervenit.

Per idem tempus Petrus unus ex Alphonso fratribus, ex Aragonia profectus, cum viginti quatuor triremibus iter in regnum Neapolitanum habebat: cumque Bonifacium praeterveheretur, subiit animum cogitatio experiendi, an, quod frater tantorum laborum & pecuniarum impensis aperta vi assequi non potuisset, id ipsi furto insidiarum succederet: igitur omnia se apud Bonifacianos, ut in nulla suspecta re, soluta & neglecta offensurum sperans, copiis nondum certa luce silentio in terram expositis, urbem aggredditur: quam, parum abfuit, quin primo impetu caperet; cum bona militum pars jam in illam irrupisset: ceterum Bonifaciani, strepitu audito, ex omnibus urbis partibus in eum locum accurrentes, omnibusque viribus connisi, Aragonenses, non sine suorum sanguine, retro compulso urbe ejiciunt.

Eo tempore civitas nostra, quamquam diuturnis intestinis malis lacerata & attrita, tamen ditissimis commerciis ac late in multas Orientis partes extenso imperio florebat: nam in insula Cypro Famagustam celebre emporium possidebat: ad hoc insulam Chium in Aegeo, ac Peram urbem in Bosporo Thracio obtinebat, ejusque imperio Amastris urbs Ponti & Bithyniae; atque in Taurica Chersoneso Cembalum, Soldana, Cassa, (quae Veteribus Theodosia fuit) subjunctae erant: quae etiam, palude Maotica penetrata, Tanam urbem ad fluvium Tanaim, qui Europam ab Asia dividit, dicto audientem habebat: ad hoc in urbes Sino-

A pem, Trapezuntem, Sebastopolim, compluresque alias Dominorum voluntate foedere sibi conjunctorum, Consules mittebat; qui jurisdictionem inter Genuenses exercerent, qui negotiationis causa sedes & domicilium in illis, multisque aliis Orientis urbibus collocarant. Sub finem hujus anni, Carmaniola a Philippo revocato, Jacobus Insulanus Bononiensis Cardinalis ejus Vicarius Genuam venit: cujus annum stipendium tredecim millium librarum fuit.

B Interea Florentinis nimia Philippi potentia ac felicitas formidolosa esse coeperat; cujus cursum impedire atque interrompere studentes, anno ejus saeculi vicefimo quinto classem trium & viginti triremium, partim ab Alphonso commodatarum, partim ab ipsis armatarum, comparant: Thomamque Fulgosium in Philippum instigare incipiunt, hominemque hortari, ne turpi atque ignobili exsulio consensescere velit; sed sese ad amissum principatum repetendum, patriamque ab impotenti Philippi dominatu liberandam accingat. Non recusat Thomas; non tam Florentinorum verbis inductus, quam spe ex rerum Genuensium statu concepta impulsus; cum sciret complures ex primoribus civitatis, ob multas acceptas injurias, graviter offensos: quae injuriae quantum Philippum civibus invisum faciebant, tantum sibi favorem vulgo conciliabant; recordatione mitis imperii, ac memoria beneficiorum a regnante acceptorum in multis nondum oblitterata: ad hoc Guelphorum odia in Philippum ardentia ipsi nota essent; quibus Philippus spretis solos Gibellinos amplificandos susceperat: hac spe attractus Thomas classem conscendit; unaque cum illo Nicolaus & Joannes Ludovicus Flisci, ipsi quoque patria extores, ac cum illis haud exiguus exsulum numerus: classis igitur cum Genuam appulsa esset, mense Aprili ineunte ante ostium portus in salo stetit spectabunda, ecquos motus ipsius adventus excitaret; nomen Fulgosium magnis clamoribus crebro subjicientes: sed nullus motus factus est; cum omnia firmissimis praesidiis munita essent. Igitur Thomas atque exsules, spe, qua venerant, frustrati, puppibus retro conversis, littus in Orientem versum legentes, portum Delphini, Sigestrum, Moneliam opida capiunt; Florentinisque copiis equestribus & terrestribus ad Sigestrum in terram expositis, Thomas tota ora discurrens, totaque regione ab omni belli clade intacta, multos ad se attraxit.

E Quibus rebus cognitis, Philippus classem Genuae comparari mandat; nonnullis Padi accolis in supplementum remigii missis, cum ipse tertiam partem impensae faceret; decemque & octo triremes ac nonnullae ingentis magnitudinis corbitae instrui ac parari coeptae sunt, Antonio Auria classis praefecto: praeterea tria equitum ac quinque pedum millia; quas omnes copias Nicolao Tertio cognomento bellatori ducendas tradidit, in plana Sigestri descendere jubet: inter quos & Florentinas copias acre praelium commissum est: cum prima acies equites fuissent: ex quo praelio pari Marte discessum est: at postero die iterum manu conferta; cum auditum esset, Joannem Ludovicum Fliscum opido Pontremulo, atque a valle Tari fluminis cum delecta juventutis manu adventare, Tertiani ingenti ac subito pavore correpti, in turpem fugam sese conjiciunt: quos Florentini insequentes, ac terga cadentes, magnam vim armorum, quae fugientes tamquam iter retardantia passim abiciebant, collegerunt; parvo numero hominum interfecto, sed compluribus captis.

F Mense Julio Philippus Opicium Olgiatum Mediolanensem Genuam procuratorem rerum bellicarum

carum mittit: eodemque mense Baptistam Cica-
dam, ac Stephanum Catanium Jurisconsultos, Fran-
ciscum Auriam, Bartholomæum Spinulam, Va-
lerianum Lomellinum, Gregorium Marinum, Ni-
colaum Fliscum, Raphaellem Adornium, Tho-
mam Promontorium, Oliverium Marruffum, Fa-
bricium Adornium, Nicolaum Judicem, Bapti-
stam Leonardum, Paulum Moneliam, insimula-
tos occultorum consiliorum adversus Philippum
initorum, Mediolanum evocat; qui annum Me-
diolani in custodia retenti sunt: quo peracto, non-
nulli dimissi sunt, nonnulli exilio mulctati; uno
tantum Nicolao Flisco carcere incluso. Anno ex-
eunte, Philippus Cambium Bononiensem & Ur-
banum à sancto Alosio Tunetum ad redimendos
captivos Legatos misit: cum quibus ivit Ambro-
sius Spinula à Genuensibus missus; qui tres à Re-
ge comiter accepti, cum maxima parte captivo-
rum redempta reversi sunt.

A.C. Insequenti anno ejus sæculi vigesimo sexto Fran-
1426. ciscus Spinula, Philippi permisso, Plebem Teici
& Vallem Arociæ occupavit, præferens octo li-
brarum millia sibi à Republica debita. Inardus
Guarcus, opido Ovada occupato, sibi quoque non-
nullam pecuniarum summam debitam prætexe-
bat: ad hoc cum Philippus mense Aprili sese ab
Andegavensibus ad amicitiam Alphonfi transulif-
set; societatisque fœdus cum illo junxisset; Boni-
facium & Calvum opida Corsicæ insulæ claustra
Alphonso dare promisit, Genuensibus ne quidem
consultis: ceterum, quoniam ea loca, insciis Ge-
nuensibus, illorumque injussu, voluntateque inco-
larum non explorata, tradi non poterant, Philip-
pus Portu Veneris atque Erice opidis pignori da-
tis, Alphonso cavit: quæ opida Rex suis præfidiis,
quorum stipendia solveret Philippus, interea reti-
neret; dum Philippus Genuenses ad cedendum
opidis in Corsica concessis inducit: quas res cum
Genuenses rescivissent, gementes & mœrentes dis-
simulare coacti sunt: qui eodem tempore quattuor
triemes in Florentinos tribus triremibus mare
Ligusticum excursionibus infestum facientes arma-
runt; quibus præfuit Bartholomæus Justinianus;
Trierarchique fuerunt Othobonus Imperialis, Bar-
tholomæus Vivaldus, Joannes Montaltus, Nico-
laus Ubertus: quæ Florentinas triemes ad Por-
tum Mauricinum opidum adeptæ, prælio victas
ceperunt. Eodem quoque anno, autumno ineun-
te; Abrahamus Fulgosius & Theodorus Fliscus,
cum magna paganorum turba multis ex locis cor-
rogatorum, urbem ingredi ausi sunt; spe seditio-
nem in Philippum excitandi, resque miscendi:
ceterum, cum neminem auctoritate nominis sui
movissent, urbe protinus facessere ignominie pleni
coacti sunt.

A.C. At insequenti anno ejus sæculi vicesimo septi-
1427. mo, Thomas Fulgosius, consiliis Philippi princi-
patu Genuensi exturbandi repetitis, Antonio Flisco
& Legato Florentino sociis, cum quadringentis
equitibus atque octingentis peditibus exteris, qui-
bus nonnulli oræ Ligusticæ homines additi sunt,
Genuam venit; atque in suburbanis Albario &
Terralba, mille circiter passibus ab urbe distan-
tibus, castra locat; ratus ad nomen suum circum-
jectarum vallium homines ac complures ex ur-
bana juventute consurrecturos; cum in castris
vulgo conclamaretur, *Io popule, facezzant Longobar-
di*: ceterum octavo Idus Augustas scalis admotis,
mœnia aggressus, scalis amissis, non sine cæde
ac sanguine repulsus est: qui cum circiter men-
sem mœnibus Genuensibus assedisset; audissetque
haud contemnendas copias urbi subsidio ex Lon-
gobardia missas adventare; cum se in vicos Ner-
vium & Reccum recepisset; castello quodam in
monte Fascia ab hostibus ædificato occupato, cum

A copii omnibus mox rediit; propeque ab urbe
tria passuum millia confedit; magnis ac conti-
nentibus detrimentis regionem, totamque oram
Ligusticam afficiens, trium triremium, quarum
duæ Florentinæ erant, tertia Joannis Grimaldi
Domini Monœci præsidio fultus: adversus quas
quattuor triemes missæ sunt, Aramo Salvago
præfecto; ac duobus Catalanis, & Joanne Mon-
talto, ac Blasio Axereto Trierarchis: quæ hostiles
triemes ad Vernaziam opidum adeptæ, duas ea-
rum prælio congressas capiunt: cum Dominus Mo-
nœci, velis in altum datis, pesti se subtraxisset,
& Franciscus Fliscus Canetus, triremi, cui præ-
erat, in terram ejecta, cum toto remigio ma-
nus hostium evasisset: unus reliquus ex Trierarchis
B Antonius Falconus Saonenfis captus est, ac sus-
pendio cum nonnullis aliis necatus: qua clade au-
dita Fulgosii, omiſſa urbe, se Reccum opidum re-
cipiunt.

Eo anno Carolus Lomellinus civis Genuensis;
Philippo assentiente, urbem Abintemelium cum
arce occupavit; quam in decennium fiduciariam
à Philippo accepit, oppigneratam ob tria aureo-
rum nummum millia à Carolo Philippo mutuo
data: quæ res civibus gravis fuit, magno motu
animorum memoria Ovada & vallis Arociæ alie-
natarum repetita. Interea Fulgosii sub finem hu-
jus anni, cum Genuam iterum rediissent, at-
que à parte in Occidentem versa in suburbanis
C Corneliano & Coronatæ aliquamdiu confedis-
sent; copiis in partem Orientem spectantem transla-
tis, castrisque in valle Bisamnia statutis; duabus
continentibus noctibus urbem furto insidiarum,
prima in eo loco, qui Carinianum vocatur, alte-
ra ad sanctum Michaellem, irrito incepto tenta-
runt; insequentique die, spe tumultus in urbe
excitandi, circumfuso terrore mœnia ab omni-
bus partibus aggrediuntur: quod inceptum ipsum
quoque vanum evasit: quos tot laboribus fessos,
ac vix armis sustinendis validos, ad omniumque
D rerum inopiam adductos, obsessi recentes & ala-
cres, eruptione facta, adorti fundunt ac profligant;
magna equitatus ac non exigua peditum
parte capta; in quibus fuerunt Thomas Fresco-
baldus Florentinorum Legatus ac procurator,
Bartholomæusque Comes Ferrariensis.

Insequenti anno ejus sæculi vicesimo octavo Bar-
A.C. tholomæus Capra Cremonensis Archiepiscopus 1428.
Mediolanensis, Jacobo Insulano Cardinali à Phi-
lippo revocato successit, vir laudatis moribus. Eo
tempore Barnabas Adornius verbis sacerdotis cu-
jusdam humilis fortis hominis inductus; qui spem
fecerat, si ille cum exigua armatorum manu ad
urbem accessisset, sese illum in possessionem arcis
E Castelletti inducturum; cujus rei cum nonnullis
militibus arcis præfidiariis occulta consilia com-
posita haberet; Barnabas cum non plus quingen-
tis armatis in vallem Porciferæ descendit; ac sexa-
ginta homines ad sacerdotem, ut compositum fue-
rat, occulto mittit: qui cum non fessellissent,
comprehenſi sunt: de quorum primoribus suppli-
cium suspendio sumptum est: Barnabasque spe
tam leviter fundata frustratus, Vulturem opidum
se cum suis recepit: adversus quem missus est Inar-
dus Guarcus; qui tamen ante adventum Nicolai
F Piccini, quem exspectabat, nihil tentandum duxit.

Interea Philippus urbe Brixia à Veneris spolia-
tus, Alphonsum ad regnum Neapolitanum repe-
tendum instigare institit: quod regnum ab Al-
phonso ipsius Philippi ope & opera recuperatum
magno sibi usui adversus Venetorum potentiam
fore sperabat: ceterum Rex, sine Genuensium
amicitia, quorum tantæ essent maritimæ oppor-
tunitates vanum omnem conatum ratus, illo-
rum voluntates sibi conciliandas ducens, ea de
causâ

caussa Bernardum Carvarianum, Andream Bibrum, Berengarium Cravellum Oratores Genuam mittit: qui cum mandata in Senatu exposuissent; Senatus quattuor ex praestantioribus civibus elegit Barnabam Guanum, Clementem Squarciaficum, Thomam Judicem, Gasparum Lercarium: qui pacem & amicitiam, quibus conditionibus visum esset, componerent: quæ inter illius percipidos facile convenit, nulla Philippi facta mentione. Hanc amicitiam Genuenses cum Rege sanxerunt, potius ne illum sibi magis irritarent, quam quod amicum unquam sperarent, aut sincera fide secum agere crederent: in qua fide usque eo permanfurum, dum incepta ad exitum perduxisset; ceterum mox ad ingenium rediturum, consiliumque Corsicæ adjungendæ, quod animo penitus infidens illi excuti non possit, repetiturum. Rem, quam illorum temporum Scriptores dignam existimarunt, quam posteritati traderent, ne nos quidem omittendam duximus; illius anni ficitatem: quæ tanta fuit, ut Genuæ omnes fontes exaruerint; cum à mense Junio usque ad Decembrem, tamquam cælo clavo, nulla imbris gutta decidisset.

A.C. 1419. Interea Barnabas Adornius ab incepto non desistens, anno ejus sæculi vicefimo nono nonnulla castella in montibus urbi proximis excitavit: ceterum Nicolao Piccino appropinquante, cum non satis Porciferanorum fidei crederet; cedendum statuens, finibus Genuensibus excessit. At Piccinus, cum in vallem Porciferæ descendisset, Porciferanis ob tot ac tam faciles defectiones vehementer iratus, totam vallem excindere atque incendiare decrevit: verum Magistratus Genuensis precibus exoratus, Porciferanis veniam suppliciter petentibus ignovit: cum tamen tintinnabula è turribus sacrarum ædium omnia sustulisset; quorum sonitu homines ad arma vocare solebant. Eodem anno Lucenses Paulum Guinifium, impotente hominis tyrannide ipsorum patientiam vincente, captum Philippo victum tradiderunt: qui, cum acri bello à Florentinis premerentur, Genuam opem imploratum mittunt: quibus Genuenses quindecim millia aureorum nummum mutuo dederunt; arcibus Motroni & Petræ sanctæ pignoris nomine acceptis.

A.C. 1430. Insequenti anno ejus sæculi tricesimo opida Sigestrum & Monelia, atque arx portus Delphini, quæ loca exsules numquam dimiserant, Francisci Spinulæ Othoboni filii opera & virtute recuperata sunt. Piccinusque Carregam, Turriliam, Pontremulum, Varisium ditionis Flischorum opida; nec non omnia, quæ Marchiones Malaspinæ in agro Lunensi possidebant, occupavit; Florentinorumque exercitum urbem Lucam acri obsidione urgentem fudit ac profligavit; magna parte equitatus capta: cui bello mille sagittarii Genuenses cum haud exiguo operæ pretio interfuerunt. At Philippus ad invidiam Lucæ imperio subjunctæ detestandam, famamque nimix cupiditatis vitandam, simul ad animos Genuensium permulcendos, cum Lucensibus convenit, ut Lucenses, præter loca Genuensibus oppignerata, civem Genuensem Prætozem quotannis eligerent; qui consiliis ipsorum interesset; neque ejus injussu possent legationes aut mittere, aut audire. Eodem anno Jacobus Appianus Plumbini Dominus, ut sese adversus Florentinorum insidias & machinationes communiret, se in fidem populi Genuensis tradidit; pactus eosdem se amicos & inimicos, quos Genuensis populus, habiturum.

A.C. 1431. Sequitur annus ejus sæculi trigesimus unus, multis ac magnis rebus gestis insignis; quo anno Florentini & Veneti armorum societatem adversus Philippum junxerunt. At Senenses Florentinorum nimiam potentiam formidantes, cum

A sese opera Francisci Spinulæ Othoboni filii cum Genuensibus amicitia & fœdere conjunxissent, totum bellum in Etruriam transferri cupiebant; quo Florentini impliciti ab ipsis attingendis avocarentur. Philippo igitur auctore, convenit; ut partitis muneribus, Genuenses, Senenses, Lucenses, nonnullis equitum alis à Philippo submissis, quam acerrimo bello Florentinos distinerent; Philippusque interea Venetorum ditionem trans Abduam fluvium invaderet: qui ne solus adversus tantas Venetorum ac Florentinorum opes dimicare videretur; auctoritatemque rebus gerendis adderet, ipso auctore, Genuenses de communi consilio bellum Venetis indicunt, in quod una & viginti triremes decretæ sunt: ceterum ordo compositus turbatus est; Veneti enim prius expectatione Philippi moverunt: qui cum pecuniarum penuria nondum copias suas omnes contraxisset, coactus est equitatum, ad bellum Etruscum destinatum, adversus Venetos mittere; ut nihil tota æstate in Etruria memorabile gestum sit. At Veneti nullam rationem Philippi urgendi omittentes, ingenti classe atque omnibus rebus instructissima, magnaue copia egregiorum bellatorum referta, quam magnus numerus Patriciorum Venetorum conscendit, Padum fluvium ingrediuntur: adversus quos Philippus parem quidem navium numerum Papiæ armarat; ceterum militibus, ac bellicis apparatibus, omnique alia necessariâ re longe inferiorum: virtus sola præfecti superiores Venetorum opes, & apparatus, ceteraque omnia æquabat. Is fuit Joannes Grimaldus Genuensis. Igitur classes ad decimum Kalendas Julias ad Cremonam urbem concurrunt; acriterque per aliquot horas dimicatum est: tandem classis Veneta fusa ac profligata est; viginti octo navibus, atque octo hominum millibus captis: in quibus tredecim Veneti fuisse dicuntur, quos à fortitudinis fama, tredecim Scipiones inani jactantia appellabant: per quod tempus Bartholomæus Furnarius cum quinque triremibus ac duabus ingentibus corbitis adversus Florentinos missus, illorum littora totam eam æstatem continentibus excursionibus, compluribusque illatis detrimentis infesta fecit.

At Veneti tam infelicis exitus dolore incensi, omnes iras in Genuenses verterunt; præfecti & nautarum illius nationis hominum virtute se tantam cladem accepisse rati: quos, ne tantam injuriam inultam sinerent, cum acerrimo bello terra & mari persequi decrevisent; cum Joanne Jacobo Marchione Montisferacis perpetuo Genuensium hoste egerunt, ut Barnabam Adornium apud ipsum exsulantem ad Genuenses vexandos mitteret: qui haud retractanter morem gessit: ipsi decem & octo triremes subito armatas mittunt; quibus præfectus est Petrus Lauredanus, vir in rebus bellicis ac navalibus magni nominis, multisque insignibus victoriis clarus: qui, cum secunda navigatione usus, Pisas venisset; in ea urbe galeatiam, quattuorque triremes omnibus rebus instructissimas, quas paratas offendit, sibi adjunxit: quæ galeatia præter consuetam turbam nauticam, trecentos delectos milites vehebat. Eam classem Jacobus Adornius & Antonius Fliscus exsules conscenderunt. At Genuæ adventu Venetæ classis Pisas cognito, Franciscus Spinula Othoboni filius classis præfectus, necessariis rebus nondum satis comparatis, nimio ardore pugnandi provectus, excellentique suorum virtute confusus; quam iidem Veneti tanto omnibus rebus superiores in Pado fluvio non sustinissent; omnia raptim agens, è portu Genuensium cum una & viginti triremibus, atque ingenti corbita solvit: ad nonumque Kalendas Octo-

bris classem Venetam ad ædem divi Fluctuosi, quæ ab urbe Genua minus viginti millium passuum distat intervallo, obviam habuit; cum qua prælium mox commisit. Raro duæ classes ingentioribus animis, majoreque irarum certamine concurrerunt; præliumque atrox & cruentum per multas horas fuit, rebus neutro inclinatis: ceterum ambabus prætoriis inter se confertis; Florentina galeatia beneficio venti exorti utens, per mediam classem perrumpens, magno impetu prætoriam Genuensem invadit; quam ingenti rostri ictu percussam in alterum latus ita inclinavit, ut eo latere demerso, nemo se sustinere à lapsu potuerit; sicque prætoria capta est: quam rem reliquæ naves conspicatæ in fugam se conjiciunt: quas Venetæ infecutæ, octo illarum capiunt, cum tredecim evasisent: quarum undecim portum Delphini proximum subierunt, reliquæ duæ, altera Genuam, altera Plumbinum, pervenerunt. Præfectus Venetus victoria moderate usus est; præfecto Genuensi ac reliquis captivis humaniter & honorifice tractatis; turbaque nautica statim sine pretio dimissa: ceterum Genuenses tanto vulnere icti, non tamen animum desponderunt; sed in duodecim triremes, quæ ex pugna superfuerant, reparandas, ac reliqua necessaria providenda omni cura atque opera incubuerunt: cum qua classe tandem reparata & instructa Nicolaus Justinianus præfectus littora Genuensium eo anno tutatus est: cum Veneti totum illud tempus potius in faucibus curandis, quam bello persequendo posuissent: qui paullo post partam victoriam, Franciscum præfectum, tresque in consilio additos, ac navium captarum Triarchos Venetias miserunt; qui omnes carcere sunt inclusi.

Interea Barnabas Adornius cum trecentis equitibus & octingentis peditibus à Marchione Montisferacis missus; cui multi sese illius partium homines aggregarunt, fines Genuenses ingressus, Sextum usque perrexerat: cujus copias Nicolaus Piccinus adversus illum à Philippo missus prælio congressus fudit, ipso Barnaba capto: qua victoria parta, Piccinus inaudita illis temporibus crudelitatis exempla in miseros Liguriæ incolas edidit; quos inermes ac supplices veniam petentes, ante se adductos jugulari iussit: quorum sanguine tandem satiatus, omnes, quicumque superfuerunt truculentæ iræ, cum ne imbecillæ quidem ætati, ac sexui, aut sacro ordini parceret, præconi subjectos, finitimis metu adactis invitis licentibus, in publica auctione vendidit: quibus in Liguria confectis, fines Montisferacis infesto exercitu ingressus, ferro & igni cuncta late pervastavit.

Interea Veneti, cum audissent Genuensium opida, totamque transmarinam ditionem non satis firmis præfidiis teneri; spe injecta, Chium maritimis commerciis in primis opportunam urbem improvise adventu opprimi posse, Chiensibus, ut in nullo tali metu, solute & negligenter agentibus, ad hoc non satis ad resistendum validis; anno ejus sæculi tricesimo uno classem tredecim ingentium corbistarum ac triremium majoris formæ duodecim, minoris trium, magna celeritate comparant, atque instruunt; cui Andream Mocenicum præficiunt, delectaque cohorte septingentorum armatorum, quam ducebat Scaramucia Papiensis, vir magni in rebus bellicis usus ac nominis, in illam imposita; alia in speciem simulantes, iter in destinatam insulam intendunt: tantamque contentionem adhibuerunt; ut, quamvis mense Novembri aspera hyeme navigarent; itinere tamen incredibili celeritate confecto, famam adventu suo prævenerint: qua subita horribili specie oculis objecta, Chienfes primo consternati; mox animis, extrema necessitate urgente, à pavoris cogitatione

A ad curam salutis defendendæ converfis; dum hostes copias in terram exponunt; dum loca castris locandis ac bombardis statuendis aptiora explorant; dum tormenta ac ceteros belli apparatus expediunt, totamque oppugnationem instruunt; ipsorum interea haud segnis est opera: summoque imperio ad Raphaelem Montaltum delato, virum strenuum & experientem, atque inter ferum & arma educatum, plurimoque rerum usu eruditum; turres præfidiis firmant, ballistasque ac scorpiones in mœnibus disponunt. Tandem tertio die post exscensionem, Veneti, omnibus rebus præparatis & instructis, urbem invadunt: mœniaque longa vetustate imbecilla ac pene soluta, bombardis quasiata, multis locis prosterunt. Acriter opidani resistunt, magnam sagittarum ac missilium vim ingerentes: quæ quamquam minus terribili specie, minusque horribili sonitu, majores tamen hominum partim cæcorum, partim fauciorum, quam bombardæ, edebant strages. Pugnatum est diu & acriter, animis utrimque obstinatis; opidanos sua ac conjugum & liberorum salute & libertate aciente; Venetos indignatione accendente; quod urbs parva ac sita in plano, nullisque exteris præfidiis firmata, ad hoc mœnibus multis locis decussis, non extemplo deditionem fecisset.

C Fine certaminis sub vespere facto; Mocenico præfecto, quænam ratio oppugnationis optima videretur, Scaramuciam consulenti respondisse illum ferunt; *Verba sibi à Venetis data, vanamque spem ostensam, vile atque imbecillum Græcorum castellum facile expugnandi: ceterum se urbem offendisse, neque armis, neque viris carentem; ad hoc nullius Italica artis rudem: sese igitur magnopere auctorem esse, aut temerarii incepti omittendi, aut consilia ab oppugnatione ad obsidionem vertendi.* Strages murorum à bombardis facta in primis Chienfes perturbabat; nam materia deerat, qua patefacta ruinis loca obstruerent; neque omnia paucitas hominum obire poterat.

D Quod huic periculo humani ingenii sollers investigatio remedium invenire non potuit, casus invenit. Erant forte in portu duæ ingentes onerariæ magni pretii mercibus refertæ duabus turribus junctæ, quæ fauces portus muniabant: forte nocte intempesta nonnullæ Venetorum scaphæ ac celoces explorandi studio clam portum ingressæ, cum se inter scopulos quosdam & naves insinuasent, strepitumque edidissent; tantum terroris his, qui erant in navibus & in turrium præfidiis, injecerunt, credentibus omnem hostilem classem portum intrasse, eoque potitam; ut mentibus subito pavore ab omni cogitatione alienatis, extemplo navibus incensis ac turribus relictis trepida fuga in urbem se receperint. At hostes occasione utentes, turribus ac navibus defensoribus plane vacuis extemplo occupatis, portam in suam potestatem redigunt: quæ res urbi saluti fuit; defensorum paucitate iis qui in urbem confugerant, suppleta: ita magnum damnum Chienfis in maximum bonum vertit. Is casus utriusque partis animos confirmavit: nam & obsessis, qui deficere & labare inceperant, fiduciam auxit; ut non jam ad tutanda mœnia, quamvis multis locis aperta, sed ad erumpendum quoque esset audacia: & Venetos ad spem urbis potiundæ, de qua desperare jam cœperant, erexit: qui atrociores coorti; urbem ancipiti oppugnatione terra & mari magno impetu aggrediuntur; majoribus navibus magno armatorum numero refertis à portu muro urbis admotis. Acriter magnoque animorum certamine utrimque dimicatum est; pugnaque à bombardis & missilibus coepit: quibus multi ex Scaramucianis non satis armis recti vulnerabantur: tantaque fuit Venetis bombardarum copia, ut uno die plus octingenti globi in urbem

urbem emissi numerati sint. Pugna terrestri maxima accensa, nihilo interea segnior erat maritima oppugnatio: summis enim navium malis muri altitudine longe exstantibus, hostes ex corbis magnam missilium vim in defensores subjectos atque ictibus apertos superne ingerentes, eos locum relinquere coegerunt: quare scalis ad murum defensoribus nudatum erectis scandere coeperunt. At Montaltus eo accurrens, unam esse extremi discriminis discutiendi viam audaciam cernens, porta patefacta cum fortissima juvenum manu urbe erumpens, hostis nihil tale expectantis latera invadit; scalasque admotas ad terram deturbat; quarum ruina omnes superstantes exanimati sunt: nox accensum certamen diremit. At Veneti, cum nihil aperta oppugnatione succederet, opidanis acriter se defendentibus, de Scaramuciae consilio cuniculos agere coeperunt: quo in opere illis occupatis, is ipse Scaramucia consilii auctor, dum inspector & adhortator suffodientibus adest operi intentus, ac parum pro se cautus, tragula ictus concidit: ex quo vulnere paucis post diebus exspiravit: cujus casu animi obsidentium conciderunt, obsessorum creverunt.

In ea obsidione incidit casus, qui cum ab Annalibus memoriae sit proditus, nulla causa nobis quoque visa est illum omittendi. Erat tum Chii Ambrosius Grimaldus, qui cum ceteris civibus in ea defensione operam Reipublicae armatus navabat. Huic in somnis imago horribilis serpentis ignem vomentis, hiantibusque faucibus illum petentis ac veluti voraturi speciem praebentis, obversata est. Somnium amicis cum narrasset; omnes consilium dederunt, ut à praeliis & eruptionibus abstinere; neque ad moenia accederet, sed domi se privatim contineret: paruit aliquandiu monitis: verum cum quodam die magna eruptio in hostem facienda esset; Grimaldus, suo fato illum trahente, imperare animo nequivit, quin agmini se aggregaret; non tam pugnandi consilio (nam abstinere decreverat) quam exitus inspicendi studio: dumque sub murum latet; paullo majore strepitu orto, cum impotenti cupiditate cernendi, quid incidisset, moderari nequisset, caput proferens; ecce bombardam è regione in illum obversam conceptas jam flammās ore evomentem cernit; simul ictum petrae eodem momento cum flamma emicante explosae in ore accipit, qui caput illi ablatum longe inde tulit, fidemque somnio affirmavit.

Interea, cum in civitate Pera Genuensium colonia de obsidione Chii auditum esset, Damianus Grillus, magni animi, magnaeque auctoritatis vir, ad memorabile in primis & audax facinus animum adiecit: seseque ac caput suum tot Genuensibus civibus in extremum discrimen adductis devovet: quare juventutem hortatus ad societatem egregii inceperat, ad septuaginta eorum animi robore & corporis viribus florentes secum traxit; duabusque expeditis triremibus conscensis, iter Chium intendit: qui cum navibus hostium urbi praetentis appropinquasset; nihil Genuenses adspectu tanti numeri deterri, remis connisi per mediam classem hostilem, praestupore audaciae obtorquentibus Venetis, ad urbem percurrunt. Incredibile est, quantum exiguae illius delectae manus adventus momentum fecerit ad summam belli; quantam sui fiduciam, quantumque despectum hostis; qui ignavia sua duas naviculas per mediam tantam classem evadere passus sit, Chiensibus addiderit: qui audacibus & crebris eruptionibus hostem continenter vexabant. Igitur Veneti intelligentes sese in spem irritam tempus terere, copiis in classem acceptis, mense Januario bimestrem obsidionem solvunt: duabusque ingentibus corbitis adversa

A tempestate in itinere amissis, Rhodum insulam tenuerunt: in quam tantam vim fauciorum exposuerunt, ut jure rogatum sit, ecquis è tanta classe integer superfuisset. Interea Genuae nuncio obsidionis accepto, tres ingentes corbitae ac duae triremes continuo armatae fuerant; ac cum egregia mille quingentorum delectorum militum cohorte, magnaeque commeatum ac bellicorum instrumentorum vi Chiensibus subsidio missae; Thoma Ceba praefecto, ac Thoma Squarciafico, Philippo Justiniano, Hieronymo Fallamonica Navarchis, Pellegro Axereto, Martino Nigrono Trierarchis: quorum adventus mense Martio, post hostis discessum inutilis plane fuit.

B Tot rebus gestis clarum annum, nec qui con- A.C. secutus est, ejus saeculi tricesimus alter imbel- 1434. lis, aut segnis fuit: in quo Orlandus Lampugnans Mediolanensis civis in locum Bartholomaei Caprae Archiepiscopi Mediolanensis successit: cujus anni initio civitas opidum Roccataliam recuperavit; Nicolao Flisco, qui illud invaserat, capto, & in custodiam dato. Interea, cum acre bellum inter Venetos & Philippum accensum esset; civitas, Philippo postulante & instante, atque hominum & pecuniarum ac bellicorum apparatus supplementa promittente, quattuordecim corbitas & decem triremes in Venetos armavit: cui classi praefectus est Petrus Spinula Cypriani filius: qui mense Aprili exeunte solvit, non minus ad terrestre quam ad navale bellum instructus: magna enim copia veteranorum terrestribus bellis assuetorum classem conscendit. Petrus igitur, nonnullis onerariis Venetis, quae forte in illum inciderunt, citra Pharum captis, Adriaticum sinum ingressus, exscensione ad Corcyram facta, copias urbi admovet: ceterum cum incepta non procederent, Corcyrensis egregie sese atque urbem defendentibus; suburbiis, ceterisque urbi circumjectis incensis discessit; atque in Aegæo insulas Naxum & Andrum primo adventu capit: verum, annona deficiente, Chium contendit: ibi militibus refectis, partem navium in Cretam mittit: quae nonnullas onerarias ex Syria venientes nactae, unam earum magni pretii mercibus onustam ceperunt: cum ceterae beneficio supervenientis noctis & secundi flantis venti evasisent. Ac Petrus, magna parte autumnii circumacta, Genuam reversus est, aspera tempestate in itinere jactatus, quae naves passim dissipavit, una illarum depressa; quae tempestas cum per totam hyemem saevire numquam desisset, non prius mense Martio lacerata & manca Genuam appulsa est.

E Dum Petrus classem sine ullo fructu Aegæo circumfert; Veneti, triginta tribus triremibus comparatis & instructis, portum Pisanum classem appellant; duabusque galeatis ac quingentis armatis à Florentinis sociis acceptis, iter Genuam versus dirigunt: quos littora legentes Baptista Fulgosius, qui magnam hominum Factionis suae multitudinem spe novarum rerum contraxerat, terrestri itinere sequebatur: cumque tam navales quam pedestres copiae Sigestrum usque perrexissent; insulam terra ac mari circumfidunt; cui Genuenses tres ingentes corbitas, ac mille quingentos milites, Nicolao Nigronio Duce, subsidio è vestigio mittunt: qui, Venetis & Florentinis summa contentione contra nitentibus, subsidium in insulam introduxit. At hostes, cum audissent, florentes ac recentes copias Clavaro & Spedia profectas adventare, itinere fugae simili discedunt, cum nonnulla suorum caede: ceterum Veneti paullo post reversi, cum sinum Rappallensem tenuissent, accepta detrimenta Genuensibus reddunt; neminemque mortalem nacti, in quem

quem arma distringerent, iram in villas & arbores effundunt, compluribus earum incensis & succis: indeque discedentes Genuam contendunt; inanique jactantia elati portum ipsum navibus, quæ illis obfisterent, vacuum penetrant: in quo cum duas circiter horas fuissent, discedunt.

A.C. 1433. Interea sub finem veris sequentis anni ejus sæculi tricesimi tertii, Nicolao Marchione Eltenfi, & Ludovico Marchione Saluciarum arbitris & disceptatoribus, pax inter Philippum & Venetos ac Florentinos tandem convenit: quorum metu liberatus Philippus totum se ab Alphonsi amicitia avertit; studiaque sua ad Andegavenses veteres amicos transtulit; sive mobilitate ingenii; sive indignatus, Alphonsum nimis lente egisse, neque se satis pro ipsius Philippi ardore movisse; sive perpetua Vicecomitum in regiam Gallorum propensione, veterique amicitia mutuis officiis perpetuo culta impulsus: ad cujus exemplum Genuenses se subito conformarunt, parvi amicitiam Alphonsi facientes; quam neque stabilem fore, neque ab illo temporibus coacto cum fide petitam exploratum haberent; quemque majoribus occupationibus, quibus nunc esset implicitus, liberatum, omnes vires suas in ipsos Corsica exterminandos, quæ cura illi antiquissima sit, conversurum, non dubitarent. Ex ea pace Franciscus Spinula cum ceteris, qui Venetiis captivi tenebantur, dimissus, in patriam reversus est, honorifice, magnæque cum lætitia acceptus.

Eo anno Græci incolæ Cembali, Tauricæ Chersonesi urbis, conjuratione in Genuenses urbis Dominos facta, armis improvise arreptis, Genuensibus ejectis, urbem Alexio cuidam Græco Theodori Domino, quod opidum parvo intervallo abest à Cembalo, tradiderunt: qua re cognita Genuenses classem in illos decernunt: cui Carolum Lomellinum præficiunt. Per idem tempus cum duæ Venetorum galeatiæ in Euxino adversæ tempestatis vi in terram ejectæ essent; Genuenses Cassiæ incolæ, navibus direptis, mercatores captos in custodiam dederunt; ut eos cum Francisco Spinula, quem nondum liberatum, auditum erat, commutarent.

A.C. 1434. Insequenti anno ejus sæculi trigésimo quarto classis in recuperationem Cembali comparata; quæ fuit decem corbitarum, parique triremium numeri, in qua fuerunt sex bellatorum millia; mense Martio Genua profecta, Euxinumque ingressa, Cembalum appulsa est: Carolusque, copiis in terram expositis, ac mœnibus admotis, urbem expugnat: qua recuperata, cupido illum cepit, Solcatum Tauricæ Chersonesi mediterraneam urbem Genuensi imperio adjiciendi: quare Cassiam petit: indeque cum pedestribus copiis Solcatum versus terrestre iter capit: quod dum incaute & inexplorato facit, ab ingenti multitudine Tartarorum improvise circumventus, maxima exercitus parte obruncata, ipse cum paucis evasit.

Per idem tempus Vincentellus Istria vir magnæ audaciæ, magnique rerum bellicarum usus, totam Corsicam, exceptis Bonifacio & Calvo, occupavit: duabusque triremibus excurrens, mare Corsicæ, & littoribus Genuensibus interjectum, infestum faciebat; continentibusque damnis Genuenses afficiebat, atrocia crudelitatis exempla in captos edens: cum quo Zacharias Spinula triremis custodiæ præfectus, quam unicam tum secum habebat, congressus, illum tandem, post longum & cruentum prælium, vicit ac cepit; captumque cum triremibus Genuam adduxit: de quo perduellionis damnato capitale supplicium sumptum est.

Alphonsus ab expeditione Africæ frustra susce-

Apta, Messianam reversus, animo ad res Neapolitanas adjecto, Reginae animum tentare instituit, si forte recuperare ejus voluntatem posset: quod inceptum irritum quoque fuit; quamquam Regina primo sese ab ejus amicitia haudquaquam abhorere simulasset: qua spe dejectus Alphonsus, simul intelligens miras esse regni incolarum in Ludovicum Andegavensem, qui tunc in Brutiis erat, animorum inclinationes, quem Joanna ad destinatum regni successionem à Gallia evocarat; quibus duobus incolumibus omnes conatus inanes fore intelligebat; ea cogitatione in præsentia plane deposita, regna sua Hispaniensia repetere decrevit: qua de causâ sese Drepanum confert, ex qua urbe brevior esset, & facilius in Hispaniam transmissus: eoque omnem classem contraxit. Igitur omnibus ad profectionem paratis & instructis, cum conscendere pararet; adversus ac prævalidus ventus subito coortus solvere prohibuit: à quo tres continentes menses, flatu numquam intermissio, in ea urbe retentus est; fortunæ iniquitatem accusans, quæ omnibus inceptis suis adversans, iter quoque in patriam sibi impediret: divini consilii ignarus, quod illum ad destinatum regnum Neapolitanum, velut perspicuo Numine suo retineret: ut hominum mentes futurorum improvidæ, ac præsentium rerum speciebus captæ, illis sæpe lætari solent, quorum jucunda initia perniciem & excidium secum trahunt; contra, ea respicere, quorum primus adspectus minime lætus, felices exitus conjunctos habet. Alphonso quidem adversæ tempestatis incommodum in ingens bonum ac felicitatem vertit: improvisa enim regni Neapolitani recuperandi haud leviter fundata spes illi assulfit. Ludovico, dum ipse Drepani otiose cessat, subito morbo absumpto: quem paullo post ipsa Joanna Regina consecuta est; Renato Ludovici fratre filio adoptato, & herede regni relicto. Is in bello, quod Galli cum Anglis gesserunt, captus, jam amplius triennium à Philippo Duce Burgundiæ in custodia adservabatur: quo subito ac tanto nuncio vehementer erectus Alphonsus, consilio profectionis plane abjecto, subsistere in Sicilia, ibique quomotus principum & populorum regni Neapolitani evaderent, expectare constituit: ut ex iis consilia & conatus pro tempore caperet: itaque Messianam propere repetit: mortua Joanna, eodemmet obitus die, Neapolitani sexdecim à principibus civitatis eligunt, quos Consiliarios appellant; illisque omnium rerum regimen & arbitrium per-

E At Eugenius quartus, Reginae morte audita, nuncio è vestigio Neapolim missio, Consiliarios monet, ut ab eligendo Rege, aut regno cuiquam deferendo abstineant: quæ res neque juris, neque arbitrii ipsorum sit: regnum enim Neapolitanum perpetuæ ditionis Pontificiæ esse: quod Carolus Andegavensis, ejusque stirps à Pontificio solio fiduciarium obtinuerint: ea stirpe morte Joannæ extincta, jus regni cui libuerit fiduciarium tradendi ad Romanum Pontificem delatum. Sese igitur prope diem Legatum cum amplis mandatis Neapolim missurum, qui de ea re cum Neapolitanis prolixè agat: Consiliarii, testamento Joannæ, sive vero, sive subditio (nam utrumque traditur) prolato; respondent, sese nullum Regem novum creaturos, neque alium Regem sibi dari passuros, quam eum, quem Joanna vera ac legitima regni Domina sibi Regem reliquisset: proinde nihil esse, quod Pontifex sese, aut sacrosanctam potestatem in eam rem interponat.

F Mors Joannæ magnos motus in regno excitavit, ac studia Neapolitanorum divisit; aliis aliotendentibus: Consiliarii Legatos ad Renatum mittunt, qui illum moneant & hortentur, ut ad paratam regni possessionem quam primum advolet:

at multi ex regni principibus tædio diuturni Andegavensis imperii, simul compluribus privatim læsi injuriis, voluntate nudata, Alphonsum Regem accersiebant: in iis fuerunt Joannes Antonius Marzanus Dux Sueffanus, Christophorus Cajetanus Fundanorum Comes, ac Rugerius frater, alter Protonotarius, alter Quæstor regni, Franciscus Pandonius Comes Lauretanus: in primis vero Joannes Antonius Ursinus Princeps Tarentinus, qui opibus & dignitate longe eminens, acriore quoque odio Andegavensibus erat infensus, majoribus injuriis læsus: à Ludovico enim ea in primis de causâ una cum Jacobo Caldora magni nominis Duce in Brutiis missò, omni fere ditione sua, præter nonnullas arces, spoliatus fuerat. Hic igitur in Alphonsi fidem receptus, haud contemnendusque copiis adjutus, brevi amisâ ditionem recuperavit. At Sueffano animum ad omne consilium versanti, quemadmodum defectionem suam Alphonso aliquo insigni promerito acceptiorem faceret, mira magnæ rei occasio oblata est: per occulta enim consilia cum Cameraco quodam interioris arcis præfecto (nam duas urbs habet) Capuam cepit: cum sua ipsam utilitate, tum multo maxime momentis, quæ ad summam universæ spei factura esset, permagni faciendam. Ea capta Sueffanus & Cameracus nuncios ad Alphonsum mittunt; quibus eum Regem salutant; quæque illius causâ egerint, ostendunt; orantque, ne tantarum rerum inchoatæ spei desit, sed ad ipsos advolet; ejus enim præsentia ad res Capuæ stabilendas opus esse: nam sese quidem Capuam furto capere potuisse; captam vero ab ancipiti exteriori & interiore imminenti periculo tueri suarum virium non esse: illinc armatis copiis, quas hostes haud contemnendas adhuc coegerint, ac porro cogere non desistant, obsidione urbem urgentibus; hinc magno civium numero ob vetera partium studia Andegavensibus rebus haud dissimulanter faventibus.

Interea Cajetani, omnium animis in regno Neapolitano incerta futuri Regis expectatione suspensis, omnibusque regni Proceribus, & populis alterutri Factioni studentibus, in veteribus Andegavensibus partibus constanti fide manentes, à Philippo & à Genuensibus, utroque Legatis missis, petunt, ut præsidium sibi mittere ne graventur; quod urbem teneat, dum communis Mars controversas inter ambigentes decernit; cuique sua fortuna ac virtus possessionem regni stabiliverit, e urbem quoque Cajetam simul tradant: interea sese, urbem, ac se ipsos præfecto præsidii mittendo regendos permisso: virum igitur mittant non modo fortem ac strenuum, sed gravem quoque ac moderatum: qui belli & pacis artibus instructus utrique muneri par sit. Nulla umquam legatio lætius audita est à Genuensibus; metu ad eum diem sollicitis, ne, si Alphonsus ipsorum perpetuus hostis urbem egregio portu munitam occupasset, eamque sibi in medio Mediterraneo mari arcem fecisset, maritima commercia, quibus omnia sua continerentur, ipsis clauderet; ipsosque veluti faucibus premeret: ad hoc periculo tot civium suorum commotis, quorum magnus numerus cum infiniti pretii mercibus ex compluribus orbis partibus contractis, mari tot circa discurrentibus classibus infesto, in eam urbem veluti in tutum receptaculum sese subduxerant: bono igitur animo esse jubent Cajetanos: sese enim non postulatam modo præsidium missuros; sed, si res poscat, omnibus suis navalibus copiis Cajetanis, ingentibusque classibus affuturos; ac non minori contentione pro urbe Cajeta, quam pro ipsis Genuæ mœnibus dimicatu: factaque dictis continuantes, Franciscum Spinulam virum spectatæ virtutis cum delecta trecentorum armatorum manu

A Cajetam mittunt; ingenti oneraria ac triremi ad littorum tutelam addita, una cum Francisco missus est à Philippo Otholinus Zoppus, ex intimis familiaribus in Aula educatus, atque aulicis artibus eruditus; qui vafro & sollerti ingenio, studeat regni incolas quamplurimos posset ab omni studio & sensu Aragonensium abductos ad suas partes transducere. Adventu Spinulæ & præsidii, simul promissis Genuensium, quorum fides constitit, confirmatisunt Cajetanorum animi; cum etiam delecta armatorum manus à consilio Neapolitano, petentibus Cajetanis, in præsidium missa urbem intrasset.

B Interea, cum Legati Procerum ad Alphonsum venissent, ac mandata exposuissent; haud parva ea initia ordinarum rerum visa; haud levique fundamenta institutorum consiliorum jacta; hinc per ampla ditione Tarentina sibi adjuncta; illinc Capua tantarum ad bellum opportunitatum urbe occupata; ad hoc tot tantique nominis Procerum erga se conspirantibus studiis. Ingentibus igitur gratiis actis, ob tanta merita, tantamque illorum in se voluntatem, nullis prius beneficiis à se provocatam, quarum rerum sese perpetuo memorem fore demonstrat; sese mox adfuturum, omnibusque regnorum suorum viribus rem amplexurum confirmat: nullaque interposita mora, cum septem tantummodo triremibus, quas paratas instructasque habebat, è portu Messanæ solvit; Petro fratre in Sicilia relicto, qui copias, commeatus, & reliqua in usum belli necessaria deinceps submitteret. Ipse, ut adventum suum à Neapolitanorum scientia averteret, altum tenens, procul à littoribus Neapolitanis Pontiam insulam classem appellit; indeque Ænariam petit: certioribusque Proceribus, qui erant Capuæ, de adventu suo factis; littora Sinuessæ locum colloquio constituit: quo cum convenissent; post primos amplexus, ac prima comitatus officia, quibus Rex animos Procerum accire cepit, cum dixisset sese illos ad Ænariam non accersisse, illis parcentem, quod maris insolentes homines nausea angere necesse fuisset; sed sese ad illos accessisse. Tum consultari de ratione belli gerendi coëptum est. Rex Cajetæ urbi animo & cupiditate imminebat; qua sibi addita, duabus urbibus, quæ velut regni claustra essent, omnem plane aditum in spem veniebat ab ea parte terra marique interclusurum. Proceres ab eo consilio Regem magnopere revocare, Capuæ timentes, quæ haud dubie ab illo deserta in manus hostium illico ventura esset; qui ingentes pedestres & equestres copias paratas habeant, quas mox Capuæ sint admoturi. Stat Regi sententia Cajetam petere: cum diceret, sibi ad utramque rem satis virium esse: Joannem enim Antonium Ursinum cum iis copiis, quas habeat, partim ab illo scriptas, partim ab ipso illi submissas, ac cum strenuis & impigris Ducibus subsidio rebus Campanis evocaturum. Adquiescunt Proceres consilio & voluntati Regis; cui ut aciores stimulos ad se defendendos adderent, ad genua procidentes in ejus verba & imperia jurant. Igitur consiliis constitutis, ac finito colloquio, Rex cum copiis, quas habebat nec numero, nec genere contemnendas, Cajetam, Proceres Capuam ad suscepta munera utrique discedunt.

F Cajetæ natura & situs talis est. Promontorium præcelsum atque undique abscissum, tria amplius passuum millia in ambitu patens, totum fere mari circumluitur; præter exiguum partem Capuæ urbi obversam, qua continenti jungitur: duo sunt hujus promontorii cacumina, quæ velut duos montes efficiunt, valle modicæ altitudinis interjecta; submissius alterum, quod in altum vergit; alterum excelsius, ac submissiori imminens, quod à parte continenti juncta consurgere incipit. Ad

submissioris radices urbs est Cajeta; quæ leni fastigio consurgens, magnam partem dorsi submissioris collis ædificiis continuatis occupat; interjecto muro ab eminentiore monte discreta. Hunc quoque montem mœnia cingunt, ab ea parte qua à terra ad illum aditus est: nam, qua mari alluitur, totus undique rupibus è filice ita abscissis cingitur, ut, etiam si à nullo custode defendantur, vix ulla humana ope superabiles sint. Est in cacumine turris præcella ac munita, quam Cajetani armatorum præsidio firmarant: quorum præfectus Andegavensibus partibus insensu Alphonsus occulte favebat: ejus igitur prodicione, Alphonsus per occulta colloquia eo monte ac turri furto tenebrarum potitus est: cum Spinula, qui tumultu ac trepidis nunciis excitatus cum valida manu protinus eo accurrerat, omnia hostium plena invenisset; editoribus collis partibus jam occupatis.

Alphonsus felici eventu confirmatus, cum illius copiarum quotidie augerentur, urbem à terra urgere cœpit; cum Petrus frater, quem accerserat, nondum venisset. Primo, idque per multos dies, res in præliis fuit, quæ inter regiones & Genuenses erumpentes per varias occasiones committebantur; in quibus multi cadebant utrimque, ac vulnerabantur: deinde ad verberationem mœnium ventum est: quam Alphonsus, magna tormentorum vi idoneis locis deposita, continentem pene exercebat; murusque ac turres quassatæ multis locis procidebant; cum parvo tamen fructu: nam Genuenses, ut ad talia nullum erat hominum genus ea tempestate sollertius, impigra nocturna opera quassata reficere, ruinis patefacta munimentis excitatis obstruere; cum tamen numquam à præliis & eruptionibus omnino abstineretur; Francisco Spinula omnibus rebus invigilante; omniaque, quæ imperatorii ac militaris muneris essent, monendo, hortando, castigando, omnia providendo, omnibus locis occurrendo, in media pugnarum mole versando, nullam à laboribus quietem aut militibus dando, aut sibi fumendo, impigre obeunte. Cum adversus arma & impetus Alphonsi satis invicti steterissent obsessorum animi; à re, quam natura vinci non finit, oppugnari cœpi sunt; hoc est, ab annonæ & necessarij alimenti penuria: omni terrestri & maritimo aditu commeatibus clauso, ac multitudine exterorum inopiam opidanorum aggravante: sed res initio minus sentiebatur; artiora deinde omnia esse cœperunt: frugibusque pene absumptis, fame laborari cœptum est: nec diutius durari potuisset; nisi Spinula necessitate subactus ad consilium specie crudele, ceterum necessarium, quodque rebus ad extrema adductis unicum remedium reliquum erat, gemens & mœrens descendisset: omnem enim imbellem multitudinem urbe emisit: quod agmen mulierum ac puerorum immistorum, ad hoc squalore & macie confectorum, cum in conspectum Alphonsi venissent, & ad genua misericordiam implorantes procubissent; objecta oculis miserabilis species ita illum commovit, ut, animi mansuetudine jus belli vincente, quo illos intra mœnia retro compellere potuisset, illorum fame præsentis alimento sedata, illos, quo liberet, abire permiserit: quæ clementiæ fama divulgata miras hominum inclinationes in Alphonsum fecit: quibus rebus cognitis, Genuenses nihil procrastinantes, ingentes quinque corbitas comparant, omnibus necessariis rebus comulata instructas & refertas; quas subsidio laborantibus Cajetanis mittunt. Huic classi præficiunt Blasium Asseretum unum ex publicis Scribis; qui sibi in maritimis rebus magnum nomen fecerat, cum multis omni tempore editis bellicæ ac navalis virtutis & industriæ documentis; tum recentis memoriæ facinore, quo Petrutium Verrem celebri nominis piratam singulari triremis certami-

A ne secum congressum, cum virtute ac fortitudine, tum consilio vicit.

At Spinula, civitate exonerata, ut quam longissime posset, vitam obsessorum produceret, panem ac reliquas fruges militibus & opidanis parce admitti cœpit: ceterum, frugibus in dies magis deficientibus, etiam equis consumptis; cum herbarum radicibus, omnique sordidi alimenti genere vitam tolerare cogerentur; opidani supplicibus precibus à Ducibus petere cœperunt, ut, fide ad extremum perfoluta, atque omnibus humanis malis patientia & constantia sua victis; cum una fames esset insuperabilis, sese sibi in extremis rebus suis consulere paterentur. Nondum eo loci adductam rem, respondere Duces, ut despondendus animus sit; ac non expectandum subsidium hominum & com meatuum; quod haud dubium à Genuensibus, civium suorum, ac tantarum opum Cajetæ inclusarum periculo commovendis, mittendum sit: interea tamen posse de pace & deditionis conditionibus cum Rege agi: qua facultate facta, opidani ad Regem petitem mittunt, ut aliquem ex suis, quem idoneum judicaverit, Cajetam mittere ne gravetur; cum quo de conditionibus pacis agerent. Missus est Antonius Panhormita celebris illorum temporum poeta; ut domus Alphonsi semper omnium ingenuarum artium receptaculum fuit; nemoque omnino erat ea tempestate toto Christiano orbe, aut doctrinæ, aut eloquentiæ, aut ingenij laudibus præstans; quem non Alphonsus magnis præmiis invitatum in magno honore apud se habuerit. Panhormita igitur, cum in concione Cajetanorum coram Otholino Zoppo, absente Spinula, qui, vulnere in femore ex tragula accepto, rebus interesse non poterat, longa & accurata oratione de præsentis rerum statu disseruisset, Cajetanosque ad deditionem inclyto & clementi Regi faciendam hortatus esset; petierunt Cajetani à Rege triginta dierum inducias, quibus nisi à Philippo & Genuensibus subsidia in urbem introducerentur; tum vero sese deditionem jam ex eo die facere, obsidesque pactorum servandorum principum civitatis liberos dare paratos. Non accepit condiciones Alphonsus: classem enim à Genuensibus parari audiverat, ante cujus adventum sese transacturum sperabat; neque, deficientibus alimentis, Cajetanos esse diutius obsidioni ferendæ putabat; cum ea de causâ Panhormita sæpe ultro citroque com meatisset; convenit tandem, ut ipse Zoppus cum Rege ipso sermonem conferret: facilius enim, ipsis Principibus agentibus, quam per internuncios rem conventuram: qui, Spinula non consulto profectus est: enimvero Spinula re subito cognita exarsit; in publicumque prodians, cum jam ex vulnere satis covaluisset, in hominis arrogantiam & temeritatem gravibus verbis est invehitus: Otholinoque reverso, omnem mentionem deditionis discussit. Ex eo tempore parum inter Spinulam & Otholinum convenire cœpit: quæ tamen Ducum discordia nulli impedimento rebus gerendis erat: cum Spinula voluntates civium teneret, illorumque fidem & prompta obsequia in se firmasset; contra Otholinum animis respuerent Cajetani, ob superbiam & avaritiam invisum: quare omnia arbitrio & imperio Spinulæ regebantur; Otholino frustra dissentiente.

Interea Petrus frater cum magno corbitarum & trirerum numero ad Regem venit: quibus navibus copiis auctus Alphonsus, omni deditionis spe amissa, urbem oppugnatione aggredi constituit. At Genuæ, cum auditum esset navales Regis copias in dies augeri, majoris molis majorisque conatus ea expeditio visa; variatumque sententis est: nam alii moveri pudore, si miseros socios in suam opem confugientes, ac spe promissi patrocinii ad res-

stendum Alphonso inductos, aliter sibi consilium capturos, in ipso initio nulla re tentata turpiter deferuissent; ipsique metu & ignavia hosti à se victo cessisse viderentur: moveri etiam periculo egregii & primarii civis, ac de Republica præclare meriti; simulque cum illo fortissimæ cohortis, quam non ad bellum misisse, sed hosti opprimendum objecisse viderentur: accedebat ingens mercium magni pretii vis ac privatae fortunæ opulentia; quam, ut diximus, Genuenses ex omni regno periculis imminuentium bellorum subtraxerant, Cajetam tamquam in tutum locum convexerant; cum tanta rei familiaris jactura à publica calamitate disjuncta esse non posset. Contra alii ab impendiis belli abhorrente; eo gravioribus futuris, quod in tanta ærarii inopia ex privata re essent eroganda: summæque temeritatis esse dicere, sese ac Rempublicam tot discriminibus ac laboribus sine ulla fructus spe involvere: quod enim tandem istud esse consilium; ipsos, apud quos omnia tenuia sint, adversus tantum Regem tot opulentissimorum regnorum viribus fultum bellum suscipere? nam, quod ad cives & merces Cajetæ inclusas attinet, nihil esse expeditu facilius: pacto enim salva & incolumia omnia fore; ad quod Alphonso haud retractanter descensurus sit, celeritati Cajetæ potiundæ studens, neque humilia hæc ac fordida respiciens.

Hæc disputatio cum civitatem diu tenuisset; vicit tandem pars, cui decus, existimatio, dignitas publica, tum autem fides omnium rerum antiquissima fuerunt: quattuor naves ad priores addicte sunt: quæ res dum sedulo comparantur, decretæ sunt: quæ res dum sedulo comparantur, auditum est, fratrem Regis cum tota classe Cajetam appulsum: esse autem undecim turres ac decem & septem variæ magnitudinis corbitas: quarum regiam ea esse magnitudine, ut altitudo prope dimidium malum alterius quamvis ingentis onerariæ æquet. Igitur Genuenses tres onerarias, quæ erant in portu Saonæ, ad privatam negotiationem destinatae, mercibus exoneratis, ad bellum armatas ceteræ classi addunt; numerumque duodecim navium omnibus necessariis rebus cumulate instructarum efficiunt. Rem distinguebat urbana juvenus, omnem mentionem belli animo & verbis respuens, irata ob stipendia superiorum expeditionum non soluta; simul offensa ob cladem & ignominiam ad Solcatum Ducis temeritate ac vitio recenter acceptam: cumque navium magistri, monendo, hortando, suadendo, rogando, stipendium offerendo, omnia summa facerent; nemo tamen reperiebatur, qui in invisam expeditionem nomen daret: cum ne ex tota quidem Ligustica ora, in quam idem morbus pervaserat, regionum præsides, omni contentione adhibita, quemquam ad nomen proficendum cogere potuissent; præter inconditam tyronum turbam, agro potius colendo quam armis tractandis aptam. Mire angustius præfectus, his interpositis moris, quæ cursum institutorum consiliorum retardarent; vociferarique, hac urbana pigritia & fœcordia, Franciscum Spinulam ac fortissimam juvenum manum, simulque dignitatem publicam prodi: vehementerque agendo, tandem pervicit, ut strenuissimus quisque ex urbana juventute & ex circumjecta regione ad nomina danda imperio adigeretur: qui & patriæ caritate victi, & aptis temporis verbis delent, ad hoc spe promissorum præmiorum inducti, tandem in potestate Magistratus fuerunt: fuitque fortissima hæc manus victoriæ in primis causa.

Ceterum, cum audiretur omnia Cajetanis artiora in dies fieri; metusque esset, ne illi tædio malorum ac desperatione subsidii tandem animo succumberent; mitti placebat, qui, quæ Genuæ gererentur ac pararentur, Cajetanos doceret; ac

A spe mox adfuturi subsidii confirmaret: ceterum, quemadmodum mittendus in urbem terra marique arte circumfessam, ac velut circumvallatam, penetrare posset, non reperiebatur. Proficitur operam suam Benedictus Palavicinus, cui notitiæ domesticæ jus cum Alphonso intercedebat: Regemque astu eludendum suscipit. Collaudatus Palavicinus, qui sese tanto discrimini pro patria offerre non dubitaret, mittitur. Is, ad Regem cum venisset; non magis Cajetanorum ipsorum, quam Genuensium, ait, rem agi in Cajeta conservanda; cum ejus excidio conjunctus sit tot civium Genuensium ea urbe inclusorum interitus, ad hoc tantæ privatae fortunæ jactura: sese igitur Genuam missum, qui Cajetanis Genuensium verbis suadeat, ut obstinationis finem tandem faciant; ac deditiois consilia auribus admittant: de illa igitur, si cum bona Regis gratia liceat, sese urbem ingressum cum Cajetanis acturum: sperare se, illos auctoritate Genuensium permotos, quorum spe omnia ipsorum nitantur, ad saniora consilia inclinatos: enimvero Rex sincera fide Palavicinum agere ratus, latus occasione rebus ac desiderio suo in primis apta, facultatem urbem ingrediendi ac de pace agendi Palavicino facit. Ille urbem ingressus, Franciscum, ac præsidium & Cajetanos docet, quanta diligentia Genuæ comparetur; remque haud procul ab eo abesse, ut classis solvat; quæ mox sit affutura, ac prævalidum hominum ac commeatuum subsidium, Rege invito, in urbem introductura: quare obfirmarent animos, ad tot jam exsudatos labores perpaucos dies addere; qui ipsos è manibus Regis infensissimi sint erepturi: qua spe erecti Cajetani, ad omnia constanter perferenda animos firmant. Palavicinus ad Regem reversus, summa sese omnia fecisse renunciat: ceterum rabiem quandam Cajetanorum mentes invasisse, ut morte sua patriam evertere sibi pulchrum ducant: qui, commeatu à Rege sumpto, felici dolo latus Genuam revertitur.

D At Alphonso, cum fama apparatus, qui Genuæ fiebat, in dies cresceret, ipseque à navalis pugnae fortuna abhorreret, omnibus viribus connitendum statuit, ut rem ante Genuensium adventum transigeret: quare urbem justa oppugnatione atque universis viribus tentare decrevit: igitur turri lignea ædificata, quam mœnibus admovent, atque omni apparatu oppugnandarum urbium expedito, omnibusque rebus instructis; Petro fratre maritimæ oppugnationi præfecto; ipse terra urbem tripartito magno impetu invadit. At opidani nihil tanto undique circumfuso pavore infracti, omnibusque locis impigre occurrentes, prælium ingentibus animis excipiunt: quod acre ubique subito accensum est; circa tamen Regem atrocior erat, præsentia Regis stimulos suis addente: turris rotis agi cœpta primo terrori opidanis fuit; deinde ulterius promota, partim sua ipsa mole, partim ingenti vi missilium è machinis, quas in muris crebras opidani disposuerant, contortis, perfracta & disjecta est: cujus ruina cum superstantes oppressisset, obsessorum animi ab ea parte creverunt: cumque prælium à missilibus procul cœptum jam mœnibus appropinquasset; regique murum subeuntes scalas admovent, ac corvos mœnibus injicere conantur; & machinæ admotæ longioribus & furculis ad id paratis discutiebantur, & subeuntes creberrimis missilibus è muro venientibus (nullo telo in confertos ac constipatos vano accidente) partim vulnerabantur, partim exanimabantur. Similis fortunæ pugna in maritima oppugnatione versabatur; in qua quæ naves muro propius succedebant, ingentia detrimenta à machinis muralibus accipiebant; neque corvi, propter nimium intervallum, injici poterant, &

si qui injiciebantur, ii, axibus rotarum præfractis, ac pondere ipsi suo depreffi, in mare corruerant; omnesque superstantes armis degravati undis hauriebantur. Hic res memoratu digna traditur, quam omittere non fuit consilium: duos enim Drepanitanos ferunt ita præsentī animo in salute expedienda fuisse, ut demersi, thoracibus, quibus erant induti, diloricatis, ac reliqua armatura sub ipsis undis sibi detracta, ex undis emersi ad naves incolumes enataverint. At Alphonsus, cum nihil succederet, omniaque cædium & sanguinis plena essent; ne in suam & suorum perniciem frustra pertinax esset, receptui cani jussit, neque oppugnationem semel infelicitè tentatam, postea repetendam duxit.

At Genuæ, omnibus rebus comparatis & expeditis; cum dies conscendendo præstituta venisset, quæ fuit sub finem mensis Julii; atrox tempestas cum fulguribus ac tonitribus subito orta est, quæ ingentem marmoreum lapidem à culmine templi divo Ambrosio dicati avulsit: quæ res in omen vulgo accepta est, varia interpretatione; aliis ad spem læti exitus, aliis ad metum tristis eventus, pro cuiusque ingenio, illam trahentibus: Magistratusque Blasium per viatorem monuerunt, sese à profectio- ne præsentia sua de more honestanda tempestate prohiberi; quare in alium diem differret. At ille ad nuncium conversus, *Abi*, inquit, & *nuncia Magi-*
stratui, me tum conscendisse, cum culmen Ambro-
siani templi de cælo tactum est: meque inaniam ista-
rum specierum honoris ante tempus habiti numquam
cupidum fuisse; quare officium istud in illud tempus re-
servent, cum victor cum reduci classe in patriam redie-
ro: quo responso dato, classem solvit, cui additæ sunt tres triremes, ac naviculæ exigui alvei: cum omnis multitudo tam militum, quam nautarum, duorum millium quadringentorum numerum non excederet: additi sunt præfecto quattuor cives, qui illi essent in consilio, Leonardus Savinionus, Antonius Salvagus, Luchinus Facius, Thadæus Zoalius: magistri navium fuerunt Ælianus Spinula præfectum vehens, Jacobus Justinianus, Cyprianus à Mari, Galeottus Lomellinus, Jacobus Calvus, Carolus Interianus, Lucas Interianus, Joannes Thomas Nigrius, Andreolus Auria, Hieronymus Fallamonica, Jacobus Raibaldus, Joannes Perdix, Joannes Fridericus: trierarchi fuerunt, Othobonus Imperialis, Ludovicus Camulius, Stephanellus Cajetanus.

Interea, cum Alphonsus audisset classem è portu solvisse; omnibus, quæ ad prælium navale pertinebant, propere expeditis & instructis, classem ipse cum sex armatorum millibus ex toto exercitu delectis, conscendit: quod duabus de causis fecit: quod personam ac præsentiam suam magnum momentum ad victoriam facturam putaret; & ut fratrum contentiones tolleret ad præfecturam classis haud obscura æmulatione adspirantium. Conscenderunt cum Rege ii ipsi regii fratres, Joannes Rex Navarræ, Henricus militiæ divi Jacobi Magister, ac Petrus Infans; unaque cum illis Princeps Tarentinus, Dux Suesanus, Comes Fundi, ac centum Proceres titulo ac dominatu populorum insignes, magnæque vis Nobilitatis. Igitur Rex quinque corbitis in obsidione Cajetæ relictis, cum reliquis, quæ fuerunt quattuordecim numero, Kalendis Augusti è portu movit: insulamque Pontiam tenuit, atque ad latus in Orientem versum mille passus procul à littore in salo stetit. Nomina navium, quas Alphonsus duxit, fuerunt, *Magnana* omnium celsissima, quæ Alphonsum ipsum vehebat; *Figaretta* Regi Navarræ attributa; *Infangasotta*, quam Magister Jacobitanus regebat; *Incantona* Petri Infantis vectrix; *Imboschetta*, cui præerat Legatus Regius; *Ingarona*, *Incorilia*, *Botifona*; ceterarum nomen incompertum est.

A Interea Blasius, omnibus curis in ea, quæ ad tantum imminens certamen pertinerent providenda & expedienda intentus, nullamque sibi ipse diurnæ aut nocturnæ quietis partem à laboribus dando; non modo, quæ factò opus essent, imperare, sed omnia minima & maxima per se ipse obire; singulasque naves lustrans, officii sui milites, nautas, gubernatores, navarchos admonere; suum cuique locum pugnae assignare; subsidia apte collocare; puppi, pro-
ræ, lateribus, corbis, qui res regant, præficere; gladios acui, scuta, thoraces, hastas fractas, aut parum corpori gestantis aptas refici & aptari; si quæ quassata aut contusa in navibus essent, sarciri ac firmari à fabris & artificibus, quorum magnum numerum circum se habebat, jubere: qui, omnibus rebus constitutis, ne ulli parti imperatorii mun-
eris deesset; tali oratione milites ad prælium adhortatus dicitur: *Si cum alio hoste nobis res futura esset, cives; haud parum vererem, ne nomen regium plerumque nostrum perturbaret: nunc, cum prælium nobis in-*
stet cum Alphonso, eo ipso, quem iidem ipsi nos Genuen-
ses ad Bonifacium nuper vicimus; credo nos didicisse,
Reges quoque viris fortibus superabiles esse: & Hercu-
le, adempto hoc fulgore nominis regii, quid aliud Re-
ges tandem sunt, quam privata capita, non pluribus
manibus, aut oculis, aut majore robore corporis uten-
tia, quam ceteri mortales; interdum etiam eo imbecil-
liore, quo minoribus laboribus duratum est? quod idem
de Procerum & Magnatum cohorte, quibus latera se-
pta habent, dicere licet: qui nihil aliud plerumque sunt,
quam effeminatorum hominum, greges, umbra, otio,
epulis, luxu enervatorum: ejusmodi species perinde sunt,
prout illas sibi quisque fingit: ignavis & timidis terri-
biles; fortibus & audacibus contemnenda: sed nihilo
plus metueret major pugnantium, ac major navium nu-
merus, quem Alphonsus secum trahere dicitur: omnium
enim sæculorum usu compertum est, rem militarem ac
victoria spem non numero hominum, sed virtute pu-
gnantium contineri; maximasque victorias de innume-
ra hominum multitudine ab exiguis copiis partas. An
ego vos, viri fortissimi, ac rerum navalium usu &
scientia ceteros mortales, omnium fere concessu, longe
antecedentes cum imbellibus copiis Alphonsi comparem?
in quibus quamquam multos fingere libeat viribus at-
que animi & corporis robore florentes, diuturnoque usu
armorum assuefactos & roboratos, quos verisimile est
illum a terrestribus copiis detractos in classem transstu-
lisse; dubitare tamen non debemus, quin eos mare, cu-
jus insolentes sunt, inutiles faciat: ac jactatio, teter
odor sentina, nausea, æstus, etiamsi ferrum non ad-
moveas, conficiat. Quæ hæcenus commemoravi, ci-
ves, ea ad metum, si quis forte animo cujusquam inse-
dit, demendum valent: pauca addam, ad vos ad pu-
gnam incitandos, atque in hostem inflammandos: pri-
imum est vestri contemptus, quo nullus ad generosos ani-
mos acuen- dos acrior est stimulus: quos si hostis non dico
fortes ac strenuos, sed viros saltem armis tenendis aptos
putasset, numquam omnem regii apparatus opulentiam,
atque infiniti pretii regiam gazam sponte, ac nulla re
cogente, in classem conjecisset: tamquam nullum à vo-
bis immineret periculum; ac velut ignaviam vobis haud
obscuris ambagibus exprobrans: ecquid intelligitis, vi-
ri fortissimi, quanto contemptui virtus vestra tumido
ac vano ingenio sit? an ille tantam arrogantiam ac su-
perbam virium fiduciam diutius impunitam feret? quid?
præmia, quæ nulla ex victoria unquam majora petita
sunt, quæque singulos ditare possint; quæ ipse hostis ve-
ster ultro vobis offert, uno factò duplicem vobis stimu-
lum ad pugnam addens; quantam vim ad vos impel-
lentos debent habere? accedit misericordia civium ve-
strorum, qui mœnibus Cajetæ inclusi opem vestram sup-
plices exposcunt; quæ una illos è faucibus insensissimi ho-
stis possit eripere: postremo fides vestra agitur; ne Caje-
tanos fidelissimos socios vestros, qui, cum tranquillam
atatem procul ab omni contentione agere possent, sese Al-
phonso

phonso tradendo; vestra tamen non in postremis causa, ne urbe opportunissima hostis vester potiretur, qua velut compede vos constrictos teneret; sese tot laboribus ac discriminibus implicare non dubitarunt. Eos si in media mole periculi deserimus, atque hosti prodimus; quid turpius nobis, quid nomine Genuensi magis abominabile omnibus nationibus umquam futurum est? cum igitur vobis non vestram tantum, sed civium ac sociorum vestrorum vicem pugnandum sit; agite, ad plusquam virilem opera partem edendam corpora & animos parate, atque in tam opimam pradam arma alacres capite. Cum orationi praefecti vocibus animorum indicibus crebro fucclamatum esset, Properaret ad hostem ducere, ac facultatem manus conferenda facere: sese enim non aliter, quam aut victoria aut morte sua praelio finem imposituros.

Hoc animorum ardore confirmatus Blasius porro ire pergit, & ad quartum Nonas Augusti hostem in conspectu habuit: caduceatoremque in scapham impositum ad Regem mittit: qui illi demonstret, Genuenses ad hominum & commeatuum subsidium Cajetam introducendum venisse, neque ullo modo Cajetanos in fidem receptos deserere posse: quod si per Regem liceat; sese, munere mandato impleto, nulla re tentata, protinus iter retro repetituros: si prohibeat Rex, tum vero sese viam sibi ad destinata consilia perficienda quacumque ratione aperire conaturos. Exarsit Rex postulato: caduceatoremque totum illum & insequentem diem retinuit, dum de responso deliberat. Ea consultatio biduum tenuit; variantibus in consilio sententiis: nonnulli enim salutaria speciosis anteferentes, Regem a consilio navalis pugnae cum Genuensibus incundae magnopere detertere: exemplo recentis Bonifaciani eventus, in quo Genuenses longe & navium numero & pugnantium copia inferiores, quibusque non solum cum Rege, sed multo magis cum locorum iniquitate pugnandum fuerit, omnia virtute perfecerint, subsidiumque Bonifacium, ipso invito, introduxerint: neque turpe dicere tanto Regi, non quidem virtute aut opibus, sed navali peritia, qua hostes haud dubie excellant, illis videri cecidisse: quare ne se in praecipuum discrimen daret; sed minima malorum eligeret, subsidiumque Cajetam introduci pateretur; quae nihilominus tandem casura esset, commeatibus consumptis: neque Genuensium tenuibus opibus ad tanta impendia magnarum classium continenter emittendarum diu suffecturis. Quam orationem ut degenerem, atque animi sui magnitudini parum aptam aspernatus Rex, Ego ne, inquit, ut tantum dedecus admittam? ac tot res a me gestas tanto flagitio necessarii certaminis cum inopibus nautis detrectati deformare non dubitem? ac subsidium, me inspettante, ac viribus longe superiore, Cajetam introductum, segni obsidione me ad parva urbis moenia consensescere faciat? Tum vero me indignum regno, regio nomine, ac majoribus meis clarissimis Principibus plane iudicem: nam Bonifacium obiectum quid aliud habet, praeter astum quemdam & casum funium regiarum ancorarum incisorum, ac navicula incensa commentum; quod timidos hostes subterlapsos, cum aperta virtute congregari non auderent, manibus meis eripuit? sed non semper praestigia felices sunt: navalis vero peritia & assiduus usus, ad quam tandem rem valet, praeterquam ad velocitatem quandam atque expeditionem discursum tum, cum pugna potius eluditur, quam committitur? quorum naves si harpagonibus & ferreistrabibus injectis sistas, ac manum veluti stataria & terrestri pugna ex propinquo conferere cogas; tum intelligitur, quantum nautica concursatio stabili militum virtute cedat: accendit praeterea indignatio; quod exigua civitas, cuique omnia tenuia sint, ultro me tantorum tamque opulentorum regnorum opibus subnissum bello appetere audeat; ac tamquam praecipuo certamine, per animi libidinem, nullis a me injuriis provocata ad-

versus me sumpto, omnibus rebus, quascumque aggredior, quamquam nihil res suas attingentibus, mihi sese opponere ludum ac jocum putet. Adeone nos degeneri isti & contempto hominum generi despectos esse? frangenda est aliquando amens contumacia, graviusque illorum plaga majestas nostra sancienda. Quibus rebus pronunciatis, caduceatorem dimittit; cui comitem addit Franciscum Pandonium, qui responsum det, ac praelium Genuensibus indicat: monitum prius, ut animum praefecti primo leviter, deinde minaciter agendo tentet; an forte a consilio pugnandi deducere possit.

Pandonius cum in conspectum praefecti venisset; mirari vehementer Regem dicit, Genuenses cum tanta classe in ea loca venisse; ac quaerere, quid ipsis rei in regno Neapolitano sit? quid juris in illa illius parte habeant, aut umquam habuerint? quid petant; aut quo tandem veteris amicitiae & societatis jure, quave veteris foederis necessitate inducti Cajetanos adversus se defendendos susceperint? aut quod tandem istud fuisse consilium; Cajetanorum causa, cum quibus nihil juris ipsis umquam fuerit, tantum Regem, a quo nullis injuriis laesi sint, sibi irritare; ac sese tanto bello implicare; tantamque negotii molem nullum fructum tot laborum & impendiorum spectantes sibi conflare? sapientius igitur illos rebus suis consulturos, si retro iter vertant; neque alienis rebus, quaeque nihil ad ipsos attineant, se interponant: neve Regi in jure suo persequendo impedimento sint: id illos integra Regis gratia adhuc facere posse. Multa in eam sententiam a Blasio dicta sunt; quamobrem negotio desistere non posset: neque jam esset integrum Genuensibus Cajetanos in fidem receptos deserere: neque eam rem suae deliberationis esse dixit; cujus tantummodo partes sint Magistratui Genuensi, a quo missus sit, parere. Excanduit Pandonium, atque intemperantia linguae provectus: Tantane, inquit, vos vestri ac Regis ignoratio tenet; ut speretis vos Cajetam jam ad extrema adductam a Regis manibus erepturos; vosque tam tenuium opum homines Regi omnium maximo & potentissimo pares bello esse confidatis? Eventus rerum, ac bellorum in manu Dei immortalis esse, respondet Blasius: Genuenses nullis minis, aut terroris ac periculorum denunciatione officium, quod omnium rerum ipsis antiquissimum sit, umquam deserturos. Cui Pandonium tamquam in rabiem versus, Clades, inquit, vos vestra, quando verba non possunt, ad sanitatem revocabunt: proinde vos ad praesens praelium, & ad internecinum bellum parate. Jam superiorum rerum eventibus Regem didicisse, respondet Blasius, Genuenses non magis ad accipiendas quam ad inferendas clades aptos; neque certaminum magnopere detrectantes esse: cum vellet Rex, congregaretur; intellecturum illum, potentissimorum quoque Principum opes tenuiorum hominum virtute, si Deus annuat, superabiles esse. Annales nostros secutus a viris gravibus illorum temporum aequalibus scriptos, Blasium Regi denunciaisse, sese ad subsidium hominum & commeatuum Cajetam introducendum venisse, scripsi; a qua re ne Bartholomaeus quidem Facius Alphonsi ipsius Scriba, quique de vita & rebus ab illo gestis octo libros conscripsit, discrepat: quamquam scio nonnullos externos Scriptores aliter tradere: ajunt enim Blasium Regi nunciaisse, sese ad cives Genuenses praesidio Cajetanis missos obsidioni eximendos venisse: quod non modo re falsum est; sed genere nugatorium: quid enim attinebat tam validam classem tantis impendiis comparare; aut tantam virium civitatis partem tanto discrimini subicere, ejus rei causa, quam epistola assequi poterant; Francisco Spinulae praesidii praefecto scribendo, ut fide ad extremum persoluta, si in eo res esset, ut Cajeta jam teneri non posset, pactus cum Rege incolumem exitum, suae ac mili-

tum saluti confuleret? quæ res usitata semper fuit: deinde Rex Blasii postulato non modo non retrahenter, sed cupide quoque annuisset: quid enim ipsius consiliis erat aptius, quam urbem delectæ cohortis præsidio emissio, enervare? postremo quid magis ridiculum fingi potest, quam Genuenses delectum fortissimorum juvenum præsidium Cajetanis ad illos tantummodo ludificandos misisse, quod, cum tempus gerendarum rerum venisset, revocarent? ut mirer, Paulum Interianum Genuensem civem, exterorum ineptum somnium ac patriæ parum honorificum potius, quam patriorum Annalium incorruptam fidem secutum.

Nuncio regio sub vesperum dimisso, certamine instante, Blasius totam noctem, quæ illud antecessit, ad omnia maxima & minima, quæ ad victoriam ferrent, mentem atque animum versans infomnem traduxit: diuturna investigatione sollers ingenium rem tandem commentum est, quæ maximum præ ceteris omnibus momentum ad victoriam fecit: tribus igitur ex magistris navium ad se vocatis, quæ cogitatio animum subierit, demonstrat; imperatque, ut, cum ipsum recta & aperta via cum tota classe in hostem tendentem viderint, illi cum navibus suis longo circuitu altum petentes, usque eo provehantur, dum secundi venti favore captato, prorsus conversis, flexoque in hostem itinere, latera & terga hostilis classis sub adverso vento deprehensæ in media pugna invadant. Illi imperata impigre exsecuti sunt: Blasiusque nuncio circummisso reliquos Navarchos mirari vetat, si, cum ipse classem in hostem recta moverit, tres naves sese à reliqua classe segregantes, atque iter alio vertentes viderint; id enim illas suo jussu facturæ, itaque facto opus esse.

Orta luce, Blasius, Aragonensi classe in se veniente procul conspecta, ancoris propere sublatis, velisque datis, classem ipse quoque suam in hostem movet: tresque naves, ut imperatum fuerat, à reliqua classe digredientes, velis in altum datis diversum iter capiunt: quas Alphonsus procul conspicatus manum in illos intendens exclamat: *Ecquid videtis, milites ac Proceres, tres ex hostilibus navibus metu sese pugna subtrahentes fugam capere? properemus igitur non tam ad certamen, quam ad certam & exploratam victoriam, & ad prædam; vel, si tanta paucitas pertinax fuerit, ad eam velut parem pecudum numerum jugulandam, & ad vecordis temeritatis pœnas ab amenti hoste exigendas.* Igitur classes brevi propinquæ factæ infestis rostris magno impetu mutuo se invadunt: quarum quattuor singulari certamine concurrunt: in quibus regia navis cum prætorica Genuensi; ac, quæ Regem Navarrae vehabat cum Lomellina, eaque in qua erat magnus Magister Jacobitani Ordinis, manum conferuerunt: reliquas quinque Genuenses singulas binæ Aragonenses circumstant: præliumque initum est animis tantummodo par, ceteris omnibus rebus dispar: Aragonensibus navium multitudine superantibus; illorumque copiis numero, Genuensibus genere firmioribus: Regis enim milites non quidem robore corporis aut virtute animi inferiores; sed terrestribus pugnis assueti, ac maris insolentes, non modo ad militaria opera prompte edenda non satis habiles esse, sed plerique illorum tetro sentinæ odore ac nausea confecti; ad hoc jactatione navium vestigio titubante, neque arma tenere, neque se regere à casu posse; pugnaeque omnino inutiles esse. At Genuenses in usitata navali militia notaque disciplina, nulla nova re perturbari, habili & expedito cursu ultro citroque discurrere, atque omnia, quæ militaris & navalis muneris erant, impigre obire: isque erat pugnae status, ut quæ naves compari Marte concurrerant, in iis æqua fere fors pugnae esset; Aragonensibus numero pugnantium, Genuen-

A sibis virtute & peritia rem æquantibus: at in Genuensibus, quas binæ Aragonenses circumstantes ancipiti prælio premebant, haud mediocriter laboraretur. Acriter magnoque irarum certamine per multas horas pugnatum est, neutro fortuna rem inclinante; Genuensibus magnam sagittarum ac triangularum vim scorpionibus & ballistis (cujus bellici instrumenti usu in primis pollebant) certiore ac validiore ictu figentium; ad hoc magna tedarum ac bituminis & accensorum calcis globorum in Aragonenses naves ingerentibus: quibus multi partim vulnerabantur, partim exanimabantur: cum ipsi contra haud levia detrimenta acciperent à varii generis Aragonensium missilibus, ac præsertim bombardis, quarum illi numero abundabant; atque à subter discurrentibus hostium triremibus, quæ ipsæ quoque haud levia damna quamvis supinis ictibus inferebant. At Blasius rem, tot iniquitatibus prementibus, in angustum adductam cernens, homines, qui erant in tribus triremibus, quarum vel nullus vel perexiguus in pugna usus erat, corbitas propere, ad fructuosiore operam navandam, sapienti consilio, conscendere jubet: quibus recentibus atque integris copiis sauciorum & caesorum numero suppleto, refectioni sunt pugnantium animi; præliumque, quod apud Genuenses multis in locis segne esse coeperat, novo hoc addito auxilio recruduit. Cum diu & acriter pugnatum esset, re potius in defatigationem ultimam spectante, quam ad alterutram spem inclinata; interea tres naves, quas à reliqua classe se separantes altum petiisse diximus, secundo vento capto, valido flatu impulsæ, pugnae superveniunt: quarum adventus fortunam prælii ad eam horam ancipitem secundum Genuenses decrevit: neque vero peritum Ducem fefellit, ab illis navibus initium victoriæ faciendum: tanto enim impetu latera hostilium navium in pugnam versarum ex transverso invaserunt; ut regia gravi ictu percussa in latus prætoricæ Genuensi obversum ita alte inclinata sit, ut, aqua accepta, haud procul à periculo demersionis fuerit; insanamque trepidationem superstantibus præbuerit: qui in latus inclinatam ruentes pondere insuper suo illud gravabant: quod etiam faciebat saburra eadem inclinatione in idem latus aggerata: ut navis nunquam se in rectum statum plane erigere potuerit; sed propendens tabulatum, ac superstantes ictibus Genuensium apertos objiceret: qua occasione illi utentes ingentem telorum ac lapidum vim instar creberrimæ grandinis ingerebant: quibus regii nulla re protecti vulnerabantur atque exanimabantur: qui etiam à flamma & vapore ex globulis calcis tabulato illis, quorum magnam vim Genuenses intorquebant, emicantibus prospectu adempto, pugnam omittere cogeantur: quare Rex ad iniqua rem inclinatam cernens, simul ut sese periculo sagittarum instar densissimæ nubis eriperet; ex summo puppis tabulato, in quo omnia circumspectans ac providens constiterat, descendere, ac sub tectum puppis se recipere coactus sit: qui tamen ne in extrema quidem spe se deserens, Genuenses in regiam veluti victoria jam parta transilientes comprehendi, ac vinctos ad se adduci jubebat: qua re animadversa, à præfecto transilire prohibiti sunt: qui nautas regios mali custodes minaciter adegit ad antennas dejiciendas; quæ, funibus incisis, tanto impetu deciderunt, ut prægravi ictu navis concussa atque undis afflicta fatiscere multis locis atque undam accipere coepit.

Incidit præterea casus, qui Proceres Regem circumstantes metu exanimavit: verum enim magnæ crassitudinis à ballista Genuensi magno impetu contortum ad pedes Regis accidit, magna-que vi tabulato infixum est, ut parvo momento Rex

Rex pestem vitavit : quare Proceres Regem ne ad tanta quidem pericula animum submittentem , nisi genibus , consiliaque precibus miscentes suppliciter orare , ne sese ac suos nimia animi magnitudine ac constantia perditum iret : meminisset , se non suo tantum capite dimicare , sed in ejus casibus omnium regnorum suorum fortunam verti : illo salvo , salva omnia , damnaque facilia reparatu fore ; pereunte , simul omnia peritura : proinde sese ille sibi , Reipublicæ , ac regnis suis reservaret : satis illum decori , satis officio atque existimationi fecisse ; omnibus regiis & imperatoriis muneribus cumulate impletis : satis spectatam virtutem & constantiam ; ceteris laudibus prudentiæ quoque gloriam adjiceret , quæ doceret cetera omnia , præterquam fortunam , a magnis viris posse præstari : huic , cum res cogat , cedendum , cujus ingruentis vis nullis humanis opibus refringi possit . Expugnatus tandem invictus animus precibus est : quare consiliis acquiescens , nomina ac statum fortunæ Navarchorum Genuensium sibi edi postulat : omnibusque , Blasio præsertim præfecto decus dediti Regis summa ope petentibus , Jacobo Justiniano , cujus familia Chii rerum potiretur , jureque signandi aurei nummi esset insignis , deditioem fecit .

Hic necessario nobis paullum è via excedendum est ; atque aperiendum , quemadmodum gens Justiniana dominatum nobilis insulæ , partim Genuæ ipsius patriæ , partim exterorum Principum concessu , adepta sit : quam rem ad hunc locum facere distulimus ; ut seriem jam inde ab initio repetitam continuaremus ; quam sæpe interruptam interpositæ res minus perspicuam fecissent . Insulæ Chii , atque utriusque Phocææ in ora Asiæ imperio , ductu Simonis Vignosii , Genuensibus parto , classeeque victrice Genuam reversa , magistri navium , quorum sumptibus expeditio facta fuerat , ac bellum altum , sibi de impensis factis , ac de pecuniis Reipublicæ mutuo datis satisfaceri postularunt : cum exhaustum ærarium tanto æri alieno solvendo non esset , vectigalia partæ insulæ illis ad certum tempus oppignerata sunt ; quæ , nisi intra præstitutam diem à Republica redimerentur , loco solutionis creditoribus cederent , simulque cum illis insulæ & utriusque Phocææ utilis , quem vocant , dominatus ; summo imperio , quod merum & mistum Jurisconsulti appellant , ac jure gladii Reipublicæ salvo : quod creditorum corpus *Monas* Græco vocabulo nominatum est . Hæc Monas , vectigalibus non redemptis , utili dominatu uti instituit , Magistratum ex sui corporis hominibus Reipublicæ Chienfi ac rebus gerendis præficiens ; quattuorque viros ipsius Monadis suffragio creatos nominans , ex quibus summus Genuensis Magistratus Prætozem legit , qui jurisdictioni Chii præsit . Hæc Monas per varias occasiones variisque temporibus omnis fere à familia Justiniana occupata est : quæ cum capitum & larium numero frequentissima esset , ac divitiis florens , portiones ceterarum familiarum partim pretio , partim jure affinitatum & successionum , aliisque legitimis titulis sibi paravit . Hujus familiæ nonnulla pars Genuæ substitit ; multo maxima intestinorum malorum ac domesticarum discordiarum pertæsa , Chium , tamquam in quietiores sedes ac domicilium , commigravit ; urbemque tam extra quam intra pomerium magnificentissimis ædificiis frequentavit & ornavit ; cum centum amplius capita patrum familiarum essent .

Ceterum cum , Bajazeto Turcarum Principe à Tamerlano Tartarorum Imperatore acie victo ac capto , Constantinopolitani Cæsares periculo à Turca cervicibus imminenti liberati respirare cœpissent ; ingens metus Justinianis est injectus , ne Cæsar vires paullatim assumens , insulam veteris juris

A Constantinopolitanorum Cæsarem , quam Genuenses quinquaginta amplius ante annis illis abstraxerant , armis repeteret , quibus ipsi haudquaquam pares essent : quare in omne obsequii genus compositi , illius ira mitigata , insulam ab illo fiduciam impetrarunt : quam ille genti ac nomini Justiniano concessit , cum jure aurei nummi signandi : quod jus Justiniana gens perpetuo usurpavit ; quingentorum perparorum anniversarium vectigal in Cæsaris vestiarium ex conventis pendens . At Turcarum potentia in Asia in immensum crescente , atque omnibus finitimis regnis formidolosa facta ; Justiniani , utraque Phocæa jam à Turca occupata , insulæ quoque Chio timentes , foedus cum Mehemete Calepini Turcarum Regis filio , Oratoribus ad illum missis , inierunt : quo foedere Justiniani anniversarium tributum quattuor florenorum millium pendere obstricti in amicitiam & fidem à Turca accepti sunt , facultate illis ac jure commerciorum facto per omnia Asiæ regna , quæcumque Ottomanorum imperio parebant ; tutoque accessu & recessu omnibus negotiationis causâ Chium commeantibus , etiam Turcarum hostibus dato : defensioneque Justinianorum Chii Dominorum (ita enim illos in diplomate appellat) adversus quoscumque suscepta ; cum sollemni jurejurando promississet Turca , Justinianos à se successoribusque suis inviolatos fore ; illorumque res intactas . Quo foedere sancito , insula opulentis commerciis celebrata est , atque incolis frequentata , quæ ad nonaginta millia capitum numerum adscenderent : ejusque vectigalia aucta ad sexaginta anniversaria aureorum nummum millia , partim ex mastice , qui nullo alio orbis loco nascitur , partim ex portoriis , partim ex ipsorum incolarum tributo : Justinianorumque opes & dignitas in immensum crevit : qui tum egregio muro urbem totam cinxerunt , validis circum propugnaculis firmato ; peramplaque ac profunda fossa circumducta , in quam mare exceptum totam urbem circumluit . Justinianorum insignibus portæ urbis superpositis , in celebrioribusque urbis & muri locis affixis , decimo octavo post anno , idem jus fiduciæ , eademque foedera & pacta cum Joanne Palæologo Constantinopolitano Cæsare , eo , qui Florentino Concilio interfuit , renovata sunt : ceterum tanta fuit in Justinianis modestia , eaque patriæ caritas , ut numquam summi imperii titulo ac nomine Genuam parentem urbem fraudarint ; aut usum Prætoris , qui jurisdictioni præesset , Genua accersendi intermiserint : cum incolæ sollemni illa ac stata anniversaria acclamatione , ut mos est genti Græcorum , Justinianos Dominos agnoscant & saluent : idem jus fiduciæ , eademque pacta post pugnam hanc , quam modo scripsimus pugnata , à Turca Constantinopolitano imperio & urbe potito confirmata sunt . Justiniani igitur insulæ dominatu sibi stabilito , singulas ejus præfecturas , quæ tredecim omnino sunt , tredecim ex ipsis quotannis in orbem lecti , singuli regendas accipiunt . Illaque est neutiquam vulgata hujus claræ gentis commendatio ; quod , cum ceterum octo familiæ , quæ caput supra ceteras extulerunt , Spinula , Auria , Grimalda , Flisca , Adornia , Fulgosia , Montalta , Guarca ad summam potentiam , summasque opes malis publicis magna ex parte pervenerint ; ex discordiisque civitatis creverint ; una Justiniana gens ad parem dignitatem , parque honoris fastigium , nulla , nisi salubri Reipublicæ parte , nullisque improbandis artibus conscenderit . His igitur de causis Alphonsus Justinianam gentem , in deditioem faciendâ , ceteris familiis Genuensibus merito prætulit . Nunc ad institutam historiæ seriem redeo .

Casum regiæ captæ reliquæ naves secutæ sunt ; partim illico se tradentes , partim cum aliquantum præ-

prælium etiam extraxissent: sicque finis prælio sub vesperum factus est; quod ingentibus animis initum, magnoque irarum certamine continuatum, decem horas duravit: Genuensesque tota classe positi sunt; præter unam navim, quæ fuga cladi se subtraxit. In potestatem Genuensium venerunt, præter Regem ipsum, Regemque Navarræ, ac magnum Magistrum Compostellani Ordinis Regis fratrem, amplius centum Proceres dominatu populorum insignes; atque ingens nobilium virorum atque Equitum numerus: in quibus fuerunt Joannes Antonius Dux Sueffanus, Joannes Antonius Princeps Tarentinus, Antonius Comitis Fundani filius, Joannes Magister Ordinis Alcantaræ: nemoque omnino Principum ex tanta clade evasit; præter Petrum natu minimum regionum fratrum, qui in subjectam triremem fune demissus fuga salutem expedivit. Huc accessit regia gaza, ac reliqua infiniti pretii præda, ingensque auri vis ex captivorum redemptione redacta: ad hoc pretium navium, ac bellicorum & navalium armamentorum, & instrumentorum; quæ victores ita ditaverunt, ut multi eorum ex tenui fortuna ad magnas opes pervenerint. Huic victoriæ tanta cum gloria à Genuensibus partæ, si numerum navium, quibus sæpe concursus est, ac multitudinem illarum captarum, atque hominum cæsum spectes, multas omnium temporum anteponas: ceterum si magnitudinem rei gestæ, ac virtutem, & consilium in illa gerenda, in primis vero splendorem Regum ac Procerum captorum consideres; haud facile reperias, quam ex omnium sæculorum memoria illi conferas.

Cladi navali terrestri continuata est: Cajetani enim tanta victoria animis aucti, audaci ac prævalida eruptione castra regia aggressi; primo incursum hostes, cum mœrore tantæ cladis sub oculis pene ipsorum acceptæ obtorpuissent, fundunt ac fugant, castrisque potiuntur; quæ & ipsa opulentæ prædæ Cajetanos compotes fecerunt. Blasius, multitudine captivorum prægravante, securitati suæ cavens eodem die classem exoneravit, quinque millibus illorum in terram expositis, ac liberatis; portumque Cajetæ cum classe victrice ac victa simul subiit.

Interea Genuæ certo nuncio victoriæ nondum alato, omnia exspectatione suspensa erant: rumor tamen incertis auctoribus manarat, res ad Cajetam prospere successisse: quæ res omnium animos ac spem crexit; ut, jurisdictione intermissa, opifices, sellulario opere omisso, ac tabernis clausis, urbem percontabundi circumirent; atque ut quisque peregre adveniebat, eum circumstantes, ac rogantes, ecquid novi afferret; atque ecquid de classe ac rebus Cajetanis audisset, non prius dimitterent, quam omnia ordine enarrasset. Tam sollicitæ ac suspensæ civitati cum certus tandem nuncius victoriæ partæ ac Regis ipsius capti venisset; tum vero nemo fuit, qui superfundenti se lætitiæ temperaret: sed matronæ omnis decori oblitæ in publicum profilientes, ac magnis & crebris agminibus per urbem discurrentes; ipsæque ac viri, nullo ætatis, aut sexus, aut ordinis, & fortunæ discrimine immixti, ac præ gaudio mentis vix compotes, plausibus ac clamoribus effusam animi lætitiæ significarent. Tres continentes dies supplicationes habitæ sunt, gratiæque Deo immortalis actæ: decretumque est, ut Nonæ Augustæ divo Dominico festæ, quo die tanta victoria parta est, sacro sollempni atque anniversario dono ad templum illi divo sacrum delato celebrarentur.

Ceterum tanta lætitia brevi Genuensibus non modo luxuriavit, ac vana evasit; sed in mœrorem quoque & indignationem vertit: qui tamen mœror ad extremum in ingens gaudium erupit. Philippus

enim, nuncio victoriæ accepto, extemplo duos nuncios, alterum Genuam Ludovicum Crotum, alterum ad Blasium Marcum Barbavarium misit: qui Genuam missus est, petiit à Senatu, ut eandem classem ad Siciliam occupandam mitterent. Responsum est Regi, neque classem sine novo stipendio reliquisque bellicis apparatus ac terrestribus copiis mitti posse; & à maritimis periculis omnia tuta esse. Aragonensi enim classe deleta, nullam aliam toto mari Mediterraneo Genuensi parem reliquam esse: qui ad Blasium venit, verbis Philippi illi imperavit, ut Genuensi portu omisso, recta Saonam contenderet; indeque Regem ac captivorum delectos primores Mediolanum ad Philippum adduceret. Dicto audiens fuit Blasius, imperio adactus; quamquam grave censebat patriam tanto spectaculo ac gloria pene tantæ partæ victoriæ orbare: videbatque obtreptatorum sermones de se duriores futuros: ceterum præponderabat Principis respectus, cuius imperio sese facere nullo modo posse intelligebat, quin pareret: neque enim neglectum sibi impunitum fore, nullius rei pœnas Principibus, quam spreti imperii, vehementius, aut perseverantius exigentibus; neque, ad manus Philippi internecino odio ipsum persecuturi subterfugiendas, fatis sibi præfidi in civium suorum opibus aut benevolentia fore sperabat: quorum principes immo in ipsa expeditione iniquos sibi expertus esset; ut nonnulli Scriptores tradiderunt, in quibus est Bartholomæus Facius; qui scripsit Nobilium Factionem, cumque illa conjunctam magnam clararum popularium familiarum partem, cum hominem novum in tanto imperio positum concoquere non possent, omnibus rebus illi incommodasse: ac, quoniam aperta via imperium abrogare non poterant, idem per occultos cuniculos tentasse; stipendiis extrahendis, delectuque artificio impediendo: quæ res coegerit Blasium per occultos nuncios opem Philippi adversus Magnatum Genuensium iniquitatem implorare; cuius favore imperium illi ratum factum sit, ac difficultates expeditæ: postremo considerabat illa tempora locum ejusmodi querelis non dare; cum Factionibus accensis, jam in usum ac disciplinam Genuensibus venisset, armis inter se de jure publico contendere: alteraque pars primariorum civium urbe extorris, studiis ac societate cum externis conjuncta, patriam infestis armis obsessum & oppugnatum venire, illiusque ditionis opida & castella occupare ac retinere. Tam indignum tamque in nomen Genuense contumeliosum exemplum, magnas animorum commotiones Genuæ fecit; vulgoque omnes pro se quisque fremere, itane sibi iniquum esse Philippum; adeo sese ab illo sperni; ut si tanti facinoris gloriam Genuensibus, quorum tota est, permittere noluerit, at non saltem cum illis communicandam duxerit; sed totam ad se attraxerit? non ferendam tantam injuriam; sed justum dolorem adversus Philippum capitaliorem atque abominabiliorem hostem; quam Alphonsum, ulciscendum: si ab exterioribus signis ad intimos hominum sensus penetrari potest, cupisse profecto Philippum Genuenses ab Alphonso profligari ac deleri: ut civitatem, juventutis robore extincto, exinanitam & enervatam libidinibus suis magis obnoxiam, (quod ille semper spectavit) pedibus sibi proculcandam subiceret. In Cajetanos in fidem societatem receptos ab Alphonsi impetu defendendos tantam classem Genuenses comparasse: tantam hominum ac pecuniarum impensam fecisse; vires civitatis ac florem Genuensis pubis extremo discrimini objecisse, in Philippi injuriis à se ipsis repellendis, in duro atque immani jugo à cervicibus discutiendo, non eandem virtutem adhibuituros? in alienis rebus, ac nihil fere ad se attinentibus, fortes atque impigros, in suis ignavos ac desides? Irritatis ani-

animis duæ contumeliæ additæ sunt, quæ illos magis exasperarunt: vetuit enim præses Senatum per litteras suas Principes amicos victoriæ partæ certiores facere, superfluum esse dictitans officium, in quo Philippus præverterit: ad hoc Philippus Henricum Regem Navarrae, nonnullosque carptim captivorum primores, Alphonso gratificans, cum quo redierat in gratiam, qui Genuam adducti fuerant, sibi illico Mediolanum transmitti imperavit: quæ res liberiores voces hominum elicit, minime dubiorum, quin deficiendum esset: ceterum multa consilium distinebant: primum principum civitatis voluntates, quas in Philippum antea mire propendentes, haud satis exploratum erat, an tot patriæ impositæ injuriæ immutassent; deinde res suo ipso molimine gravis atque ardua, tantam arcium multitudinem Philippo in finibus Genuensibus occupante: tenebat enim Philippus præsidii suis valida castella, Novas, Gavium, Vultabium, Fialida castella, Novas, Gavium, Vultabium, Fialidconem; ad hoc tres arces ædificarat ad Pontem decimum, Montem bellum, Bulzanetum, quæ viam illi deinceps ad Genuensia mœnia per vallem Porciferæ muniabant: erat præterea in illius potestate urbs Saona cum duabus arcibus. Terrebat in primis arx Castelletum in ipsa urbe, ut illis temporibus, munitissima, atque edito loco sita, prævalidoque præsidio firmata: ad hoc Alphonso duas Portus Veneris arces, ac munitissimam turrim Ericis opidi occupata tenebat.

Interea Mediolani Alphonso & Philippus inter se in gratiam redierant; magnaue voluntatum conciliatio inter ipsos facta erat. Alphonso enim à Philippo comiter exceptus, honorifice tractatus, simulatque facultas colloquendi cum Philippo facta est, ita de præsentis rerum statu differuisse dicitur: *Si mihi cum imperita multitudine agendum esset, Philippe; vereretur, ne mihi assensum præsens fortuna mea abrogaret, ac leviores me auctorem faceret; ac ne oratio, quam habiturus sum, non tam sententia mea, quam meorum temporum videretur: rerum enim ignarum vulgus auctoritate potius duci quam rationem sequi solet: at graves & sapientes viri non tam loquentem spectant, quam rationum momenta ponderant; ac perinde ut illa sunt, ita de rebus statuunt: amplum tibi & in præsens esse, & ad posteritatis memoriam fore censes, Philippe, Alphonsum Regem navali pralio victum & captum: ceterum hujus gloria magnam partem fortuna, magnam milites & Duces, quorum virtute, fortitudine, consilio te absente præstata res gesta est, ad sese trahunt. Genuenses quidem, te plane excluso, non partem modo, sed totam sibi illam vindicant; suis armis, suis hominibus, suis classibus, ad hoc navalium rerum scientia & usu victoriam partam aperte præferentes: una tibi ex egregio facinore reliqua est gloria, qua tota tua sit; in cuiusque societatem neque fortuna, neque milites aut Duces, neque Genuenses, neque quisquam omnino mortalium venturus sit; bonus illius usus: luxuriavit quidem multis sepe ac vana evasit victoria letitia; nullo fructu, male illa utendo, ex ea percepto. At tua tanto est iniquior hac in re quam ceterorum conditio; quod pravus illius usus non modo fructum sperandum corrumpit, sed in magnum quoque tuum damnum, atque adeo in exitum vertet: quo magis igitur in ancipiti ac lubrico aut salutis, aut excidii loco versaris; eo tibi consideratius & providentius est agendum; ac cavendum, ne te inanibus speciebus auferri sinas; sed salubria in consilio potiora habeas. Miratus sum, Philippe, te, amicitia mea subito relicta, ad societatem Andegavensium tete adjunxisse. Mitto querere, quid in me offenderis, quam ob rem me desereres; quæ mea injuria te à me abduxerint; nam istis omnibus rationem utilitatis ac consilia status rerum stabiliendi præponderare solere scio: ut igitur de hac ipsa rerum stabilitate tecum agam; quid tandem in me relinquendo, & te ad Andegavenses appli-*

A cando secutus es? non te latet, Philippe, Andegavenses homines Gallos esse Italici nominis hostes sempiternos; ad hoc Italia imperio ex omnium sæculorum memoria imminentes: quod illis natura ita insitum est; ut numquam bellum atque arma ab Italia abstinnerint; nisi cum occasio aut facultas illa inferendi defuit: hos igitur homines tu in Italiam accersis? atque in possessionem tanta ac tam opulenta illius partis inducere studes; ex qua stabilita gradum illis ad te opprimendum tute ipse facias? quod si speras, illos tanto tuo hoc beneficio devinctos ingenium exuturos, magna te omnium rerum ignoratio tenet: *B* nam neque homines beneficiorum memores unquam sunt, cum hac memoria illis inutilis & incommoda est; neque impotens dominandi & regnandi cupiditas, omnia divina & humana jura persfringere solita, memoria beneficii accepti vincitur: quod etiam minoris ab accipiente quam à dante ponderari solet: quam compar hoc factum tuum Joannis Galeacii parentis tui sapientissimi Principis prudentia est? qui ceterorum Regum ac Principum arma Italici spernenda, Gallorum autem formidanda dictitare solebat: primum præpotentia, deinde Italia visceribus hærentia: quod idem tibi à nobis Aragonensibus periculum non est: tenuibus scilicet Regibus, ac tantis maris & terrarum spatiis ab Italia discretis: quin contra Aragonensium & Vicecomitum amicitiam utrique utilem, perpetuam quoque esse necesse est: quæ utrumque *C* adversus communem præpotentem ac formidolosum hostem mutua ope communiat: quid igitur pravissimo consilio tuo agis, Philippe, quam ut naturales hostes tuos opibus tuis auctos adversus te confirmes? meque Italia exterminato, atque hoc tui propugnaculo tibi ipse adversus hostium impetus detracto, viam illis ad te opprimendum communias? à quo consilio nisi desistis; brevitum, cum inutilis ac fera erit pœnitentia, intelliges, te non tibi, sed hosti tuo vicisse; neque in tuam utilitatem, sed in tuam perniciem victoriam partam; utiliore quæ tibi futuram fuisse cladem, quæ non magis te quam hostem naturalem tuum profligasset; meque regno Neapolitano potitum, tibi tandem adjunxisset; utriusque rationibus ita ferentibus: at victoria, propugnaculo, quo tutus esse maxime potes, tibi adempto, te pedibus Gallorum proculcandum, atque avita ditione tandem evertendum projicit.

In suam sententiam tandem traduxit Alphonso Philippum, cum veris rationibus victum, tum lenitate & humanitate Alphonso captum: in hoc enim Rege comitas, atque ingenii facilitas, singularisque cum majestate conjuncta morum suavitas, ita ceteras præstantes atque heroicæ virtutes ornavit, ut miras hominum voluntates ad illum allicerent. Philippum quidem ita attraxerunt, ut totum ab omni studio sensuque Andegavensium abductum ad Alphonsum traduxerint; artificiosoque societatis & amicitiae fœdere illi devinxerint; qui Genuensibus imperavit, ut sex ingentes corbitas ad Regem in sua devchendum compararent & instruerent: quæ omnia à Genuensibus gementibus & mœrentibus, quia nondum res ad deficiendum satis maturæ erant, obedienter tamen facta sunt.

Ceterum Philippus certior à suis factus, Genuenses graviter offensos, spectaculo Regum civitati subtracto, de quo Philippus tamquam à se victo triumphare voluerit; ne vultu quidem tantam injuriam satis dissimulare, remque ad defectionem haud dubie spectare; vehementer percussus, astu Genuensium consilia eludere parat: per speciem enim honoris habendi, Genuam scribit, non se aliter de redemptione captivorum acturum, quam coram Genuensibus ipsis, quorum opera & virtute capti sint: legationem igitur ad se mittant amplam & honorificam. Missi sunt Legati: quos ad se introductos Philippus benigne appellat; atque sese non minus de Genuensium commodis & amplitudine quam de suamet laborare: omnia se adhuc fecisse, ac porro facere perrecturum, ut victoria non minus Genuensibus

quam sibi læta sit; atque adeo illis quam sibi etiam fructuosior: expugnasse se tandem Alphonfi animum diu renitentem; atque ad regno Sardiniae illis cedendum induxisse. Quo major res erat, eo minus credibilis Genuæ visa: mirarique omnes tam subito Philippi voluntatem mutatam; ut, qui in Genuenses conterendos, enervandos, omni dignitate spoliandos, omnibus iniquitatibus premendos, omne suum studium perpetuo contulerit; eos repente tanto imperio, tantaque opum accessione augendos suscepit: profecto in tanta benignitate aliquid fraudis latere: quæ fraus statim apparere coepit, aliis atque aliis armatorum agminibus tamquam in præsidium Sardiniae coactis subinde Genuam missis. Exarsere Genuenses hoc novæ fallaciæ commento; ac vix ad pueros fallendos idoneis ambagibus.

Cum hic esset animorum habitus; Genuensesque minime dubii, quin definiendum esset, locum & tempus consilii exsequendi circumspectarent; orta est res, quæ priora vulnera exulceravit; atque ad superiores offensionum causas novam animorum iritationem addidit; Genuensesque ad cogitata consilia defectionis acceleranda adegit: Legati enim Cajetanorum principes civitatis Genuam venerunt victoriam gratulatum; ac gratias actum, quod sese ex faucibus Alphonfi eripuissent: qui in Senatum introducti, Genuensis populi in se omnium temporum merita diligenter persecuti; cum non pauca de Francisci Spinulæ præsidis fide, constantia, fortitudine, ad hoc justitia, & continentia, totiusque cohortis virtute atque indefessis laboribus, malorumque tolerantia addidissent; eaque singula magnifica oratione facta dictis æquando ad cælum extulissent; ad extremum orationem ita concluderunt, ut dicerent, sese, dum fortuna regni possessionem vero Domino adjudicat, intelligere in nullius omnino populi aut Principis, qui sub cælo sunt, quam in populi Genuensis fide & ditione melius esse posse: proinde postularunt, ut Senatus quotannis Prætorem ac civitatis suæ rectorem Cajetam mittere ne gravaretur: per amplum id nomini Genuensi dupliciter fore; qui ad bellicam virtutem ac navalium rerum scientiam & gloriam, qua omnibus populis antecellant, ea continentiae, justitiæ, moderationis exempla addiderint, ut homines sese ultro illorum imperio subjiciant: deinde magno beneficio Renatum in perpetuum demerituros; si urbem munitissimam, ac nobilissimum illum portum, quæ tamquam claustra ac propugnaculum ab ea parte regni Neapolitani sit, de manu Genuensium acceperit. Laudata est virtus & fides Cajetanorum; qui cum tranquillam pacem agere possent alienorum malorum spectatores, sine ullo discrimine rerum suarum; fidei tamen adversus legitimum Dominum servandæ causâ in tam præcipitem casum sese suaque omnia dare non dubitarint; atque omnia extrema sint perpeffi: lætari igitur populum Genuensem, quod beneficium suum apud tam gratos & fideles homines posuerit. Quod ad Prætorem mittendum attinebat; dilata res est, dum voluntas Philippi exploraretur: qui, re cognita, usque adeo non tenuit iram; ut jure gentium violato, Legatos Cajetanos comprehendere atque ad se victos adduci imperaret: quos ante se stantes, ac verbis primo male acceptos rogavit; quod tandem istud ipsorum fuisse consilium, ut in Prætore postulando populum Genuensem sibi tanto Principi, tum autem eorundem Genuensium Domino prætulissent. Liberum responsum unus ex Legatis dedit: *Sese rectores ab ipso Philippo & a Genuensibus missos expertos, illorum superbiam & avaritiam abominatos; horum equitatem & continentiam amplexos. Dux libero responso nonnihil se commotum demonstrans,*

A multis rationibus docere homines coepit, bene illos rebus suis consulturos; si, partibus Andegavensibus relictis, (id quod ipsemet fecisset) sese ad Alphonsum applicarint; qui regno haud dubie tandem potiturus esset: si scirent igitur, properarent gratiam futuri Regis captare; ingentique promerito præteritarum offensionum memoriam deleere: sicque illos suis consiliis imbutos domum remittit.

Tantis indignitatibus atque acerbitatibus alia super aliam coacervatis subacti Genuenses ad cupiditatem libertatis exarserunt: ac quamquam ad veteres difficultates novus esset additus terror duorum millium armatorum, quos Philippus per simulationem præsidii in Sardiniam decreti Genuam miserat; libertatem tamen per æqua, per iniqua, per prona, per ardua repetendam statuunt, principio conspirationis à primoribus civitatis facto: qui, partitis muneribus, cum sibi quisque ceteros cives, prout cuique aliquid juris adversus singulos erat, appellandos & incitandos suscepissent; neminemque retractantem, aut ejusdem ardoris expertem invenissent; hoc universæ civitatis consensu confirmati tempus patrando facinori eligunt pervigilium natalium festorum, quæ suberant; simul ad Thomam Fulgosium Sergianam mittunt; qui consensum civitatis ad recuperandam libertatem illi demonstraret; petatque, ut sese ad salutare consilium omni ope adjuvandum comparet: ceterum aptior & facilius ad consilium exsequendum adventus Erasmi Trivultii, viri opibus & factis clari, successoris præsidis visus est; qui propediem expectabatur: qui cum venisset, ac cum Opicino veteri præside, qui obviam processerat, urbem intrasset; repente illi, quibus id negotii datum fuerat, portam divi Thomæ, per quam præsides ingressi fuerant, statione facile expulsa, occupant & ad arma conclamant; subitoque Franciscus Spinula, qui se principem professus fuerat, cum haud contemnenda gentiliu suorum ac clientium & amicorum manu in publicum profiliit: libertatemque magnis clamoribus subjicit. Incredibile est, eo nomine audito, quam subito omnium ordinum & ætatum studia ad libertatem repetendam exarserint: nemo enim, qui esset armis ferendis, domi se continuit; momentoque temporis civitas omnis in armis fuit, auctoritatem Francisci secuta: quibus subitis motibus præsides perculsi, cum, porta urbis occupata, nullus retro esset regressus, diversum iter capiunt: Trivultius arcem versus, in quam incolumis evasit: at Opicinus aedes publicas repetens, ad quadrivium, quod vulgo *Fossatellum* appellatur, ab ingenti armatorum multitudine, quæ ex multis undique urbis partibus pluribus agminibus eo confluerat, circumventus interficitur: qui ante ædem divi Syri nonnullas horas exanimatus jacuit; cujus mors palam testata, & ad Genuensium commotum ardorem incitandum, & ad militum præsidiariorum animum frangendum, magnum momentum facere posset: qui morte alterius præsidis, alterius veluti carcere debilitati, ne tentata quidem pugna, se Genuensibus dederunt; à quibus paullo post armis spoliati dimissi sunt. Illud memorabile ad memoriam posteritatis fore timebatur, tam brevi ac tam facile sine sanguine ac cum duorum tantummodo hominum cæde, Jacobi Carboni & pueri cujusdam Opicino à stapeda. Exemplum Genuæ Saona secuta, ipsa quoque, præside Mediolanensi expulso, arces paullo post captas disturbavit: ceteræ quoque arces in finibus Genuensibus à Philippo excitatæ, paullo post parvoque negotio deinceps captæ solo æquate sunt. At Genuenses, jugo excusso, sex primarios cives urbis rectores ac libertatis tutores eligunt, Matthæum Lomelinum, Petrum Bondenarium, Franciscum Spinulam,

lam, Andreolum Auriam, Nicolaum Justinianum, Petrum Cassinam: quibus, paullo post duobus additis collegis, Andrea Marino & Joanne Navono, ampla facultas data est status rerum emendandi, ac Reipublicæ constituendæ; modo ne veteres leges usuque non abolitas abrogarent, neque antianorum jus aut auctoritatem infringere.

A.C. 1436. At Philippus, initio insequentis anni ejus sæculi tricesimi sexti, dolore tantæ urbis, præter omnem expectationem, amissæ, incensus, iracundiaque ardens, omnes curas in eam recuperandam vertit: imperatque Nicolao Picinino, ut suis, qui arcem Castelletum tenebant, cum omnibus copiis subsidio accurrat: ea arce retenta, recuperari Genuam aut vi, aut metu posse; ceterum omnia in celeritate posita esse. Impigre imperata facit Picininus: omnesque copias tam pedestres quam equestres ex hybernis corrogat.

Interea Genuenses inchoata consilia liberandæ patriæ urgentes, arcem arte circumfessam aggrediuntur; validaque ac continenti unius diei oppugnatione, quam præsidiorum acriter se defendentium virtus ad noctem extraxit, tandem illos possessione exterioris muri dejectos intra interiorem compellunt; aliquotque dies quies à præliis fuit: cumque audiretur Picininum cum omnibus copiis venturum, resque Genuenses caput curarum Philippo esse; Genuenses, ut sese adversus tantam in se intentam molem, quibuscunque rebus possent, communirent, ad externas opes confugiunt: Damianoque Palavicino Jurisconsulto, Simone Maza, Joanne Justiniano, Luciano Grimaldo, Legatis ad Venetos & Florentinos missis, petunt ab utrisque ut sibi opem ferre, ac secum foedus & societatem jungere adversus Philippum communem hostem ne graventur: ipsi interea nullas partes diligentiae omittentes, ingentem fossam ante urbis moenia à parte in hostem versa ducere constituunt: fama que adventus Picinini cum ingentibus copiis in dies percrebescente, (quindecim enim peditum millia & complures equitum alas sub signis habere dicebatur) arcem altera oppugnatione tentare constituunt: dieque ad consilium exsequendum præstituto, omnis civitas mota est; cum imbellis ætas & sexus, quamquam prælio interfutura non erat, adesse tamen spectaculo vellet: qua tanta multitudine tantoque oppugnationis apparatu qui erant in arce vehementer perculsi, quæ consilii via ipsis esset incunda consultare cœperunt: resque mediis certaminibus, aliis alio tendentibus acta est. Erasmus enim, qui cum illo in arcem se subdlexerant, nihil exitum rei qualiscumque futurus esset ad suum vel decus, vel dedecus pertinere existimare: alii furorem concitati populi timere Philippi injuriis irritati; sibi que ipsis infensi, ob privatas injurias tamquam à Philippi procuratoribus acceptas: ii omnes salubria speciosis præferre, atque à præliis abhorre, nullamque viam salutis expediendæ pudendam ducere: iis omnibus præfectus arcis acriter resistere, dedecus ac pudorem militaris flagitii veritus. Vicit tutior ac frequentior sententia: quare deditionem paciscuntur, si ad certum diem subsidium in arcem non esset introductum; unamque ex turribus arcis obsidem servandæ fidei in manum Genuensium tradunt: quiesque Genuæ aliquot dies fuit.

Ceterum cum auditum esset Picinini adventum appropinquare; Genuenses nova Philippi injuria irritati, qui Genuenses omnes tota ditione sua diligenter conquistos ac captos custodia incluserat, omnibus viribus connisi arcem invadunt: præfecto vociferante, ac nequidquam fidem recentium pactorum testante: parvoque certamine captam extemplo solo æquant; omnibus, qui in ea inventi sunt, ut Philippo par referrent, in artam custodiam traditis.

A At Picininus fines Genuenses infesto exercitu ingressus, iisque, qui contra illum missi fuerant, facile repulsis & in fugam conjectis, omnia populationibus ac direptionibus miscens, per vallem Porciferæ iter faciens ad mare pervenit: atque in littore, quod Sanctum Petrum ab Arena vulgo appellant, quod ab urbe circiter duorum millium passuum abest intervallo, nonnullæ navium carinæ, quæ ædificabantur, incensæ sunt: quam rem tamen postea Picininus facti turpitudinem agnoscens, subito ac temerario militum impetu, sese inconsulto, Philippique injussu, factam excusavit: ceterum arce capta, cum nulla esset causâ ibi subsistendi; ne frustra omnino fines Genuenses ingressus videretur, iter in oram in Occidentem versam flectit: Vulturemque opidum populabundus petit, ab incendiis tamen abstinens: inde infesto agmine Ingaunum contendit; Galeotto Carretto Marchione Finarii foederum fide, quæ ipsi cum Genuensibus intercedebant, spreta, non jam occultis studiis favente, sed palam sese illi adjuncto. Picininus, agro Ingaunorum late pervasato, ingentique hominum & pecoris præda abacta; ingenti vi sagittariorum ex ditionibus Marchionum Cevæ ac Carrettorum corrogata, copias urbi admovet; cui præerat Thomas Auria Conradi filius, vir strenuus ac spectatæ virtutis. At Ingauni cives, cum magna armatorum multitudo ex circumjecto agro, sub adventum Picinini, belli procellæ sese subtrahens in urbem veluti in tutum locum concessisset; simul recentes sagittarii Genua extemplo missi urbem intrassent; iis copiis freti sese acriter ad resistendum parant. Picininus, urbe magno impetu sæpe frustra tentata, cum de expugnatione desperasset; consilia ab oppugnatione ad obsidionem vertit: quare urbem undique circumfedit; parte inter urbem & littus interjecta firmissima armatorum manu infessa.

Interea Genuam, quamquam Legati, quos missos diximus, cum Venetis & Florentinis nondum foedus icissent; ex Etruria tamen mille pedites cum nonnullis equitibus missi Florentinorum subsidio venerant. Læticia recuperatæ libertatis brevi luxuriavit: quam dum acrius Genuenses repetunt, quam illa salubriter utuntur, civitatem in antiqua mala redegerunt: quæ contentione, tumultibus, seditionibus, omnia miscuerunt: is enim per ea tempora tum erat Genuæ rerum status, ut, cum summus imperii locus, popularibus civibus lege deberetur; nemoque nisi ex popularium corpore, ut sæpe diximus, ad ducatum admitteretur; multæ sæpe contentiones inter populares cives excitatæ sint ab ambitione potentiorum familiarum in eum locum tendentium: resque sæpe à prehensionibus & allegationibus ad tumultus & seditiones, postremo ad manus & ferrum venit: per quæ dissidia duæ familiæ populares, Adornia & Fulgosia vires paullatim colligendo ita creverunt, itaque supra ceteras caput extulerunt; ut ad alterutram tantummodo earum ducatus deferretur, ceteris omnibus de dignitate illis longe concedentibus, cum Montaltorum & Guarcorum potentia, quæ iisdem de causis plus quam modica fuerat, ac nomen consensisset. Harum igitur duarum familiarum Adornia & Fulgosia opes ita excellebant; ut non modo omnem civitatem, sed totam Liguriam Factione sua comprehenderent: nemoque omnino esset, qui non alterutras partes & animo & ipsa nominis appellatione profiteretur: cum ne Nobilium quidem Factio, ac splendorum familiarum homines rem pudori sibi ducerent: resque eo pervenerat; ut principatum patriæ non jam ut populi beneficium hæ duæ familiæ expectarent, sed velut pro suo jure peterent; satisque justam causam illum invadendi solum familiæ nomen haberent; nemine

jam factum, aut mirante, aut improbante, aut ad crimen ullum revocante: in quo turbulentissimo rerum statu Nobilium Factio, quod aperta via obtinere non poterat, ingenio & artificio, ut jam superius diximus, assecuta est, ut pristinam dignitatem suam vel summo principatus honore exclusa, paulatim recuperaret: nam, cum adversus consentientis populi vires haudquaquam se parem intelligeret; illas inter se dividendo enervare studebat: quare muneribus inter se partitis, bifariam divisi; altera illorum pars in alterius præpotentium harum duarum popularium familiarum Genuæ regnantium amicitiam sese insinuans, alteramque adversus alteram suis ac ditionum suarum opibus, quæ plusquam modicæ erant, fovens, illas brevi ita sibi devinxerant, ut Adornii & Fulgosii nobiles familias, quarum opes tanto sibi adjumento essent, in societatem auctoritatis & potentiae assumere non indignarentur: cum tamen neutram illarum ita excellere vellent nobilis Factionis homines, ut alteram deprimeret; sed ita res temperarent, ut neutra alteri præponderante, paria essent in utrisque auctoritatis & potentiae momenta: ad hoc, siquando irritatam plebem in se conspirantibus studiis insurgentem cernerent; illam inter se committere studebant, Adorniorum & Fulgosiorum nomina subji-ciendo; quæ exaudita subito consentientia plebis studia distrahebant: cum unusquisque, priore contentione omissa, sese ad nomen Factionis suæ, quod ceteris omnibus rebus præponderabat, applicaret; atque in Nobilitatem intentam vim in se ipsi verterent.

Accedebant ad domestica incommoda duo totius Italiae Principes, Alphonsus & Philippus, Genuensi nomini capitaliter infensi; nullumque finem Genuam vexandi facientes; quam suis quoque ipsam viribus oppugnabant, ejus civibus in illam armatis, ut quisque illorum præsentis rerum statu minime contentus, aut necessario, aut voluntario exulio solum vertens, sese ad alterutram eorum conferebat. Ceterum Genuæ, arce diruta, atque animis metu Philippi solutis, mira omnium rerum negligentia erat, Magistratusque rebus emendandis & constituendis creatus frigide ac lente omnia agebat, studiis partium alia alium trahentibus. Quorum discordiæ, ex qua nihil salutare speraretur, cum civitatem tædium tandem cepisset; popularium principes in ædem divi Syri convenientes, Isnardum Guarcum Ducem creant; cum clari parentis memoria, tum suis ipsum virtutibus commendatum: atque, ut parens difficillimis Reipublicæ temporibus rem cum summa æquitatis & moderationis laude quinquennium rexerat; ita in hujus moderatione & æquitate haud exiguam spem à præteritis malis respirandi vulgo ponebant: cui in ædes publicas pacate deducto Magistratus cessit: atque in suas quisque privatas ædes concessit: ceterum idem fere finis, quod initium magistratus Isnardi fuit, septimo die ab illo dejecti: Thomas enim Fulgosius, qui paullo ante urbem intrarat, à Factionis suæ hominibus honorifice exceptus, valida clientium & amicorum manu coacta, ædes publicas aggressus, præsidioque dejecto, consilium civitatis convocat: atque (ut sunt hominum ingenia ad aliquam speciem juris actionibus suis imponendam nimio plus facunda) non sese ad libertatem patriæ invadendam, aut Rempublicam opprimendam, quam vita ipsa cariorem habeat, venisse ait; sed ad jus suum repetendum, atque adeo continuandum: se enim Ducem Genuensium liberis suffragiis ac legitime creatum, patriæ salutem suo honore potiore ducentem, ut ab imminentibus cladibus illam prohiberet, urbe quidem excessisse; ac passum esse Philippum Dominum Genuensibus adscisci: ceterum magistratu numquam sese abdicasse.

A Philippo igitur expulso, ejusque jugo excussio; vigere jus ducatus sibi numquam abrogati: quare non se aliena ereptum, aut Isnardum mandato honore ejectum venisse dicit; sed illum vitio creatum arguere: jus proinde ducatus sibi hærens in alium, se vivo, transferri non posse: quod ratum haberi à consilio postulavit: summo omnium consensu ducatus illi ratus ac continuatus fuit.

B Igitur rebus urbanis constitutis cura externarum successit: decretumque est, in Etruria milites scribi; ac validum sagittariorum subsidium Ingaunum missum est, Angelo Dentuto præfecto: qui cum ad littora Ingaunensia navim appulisset; in terram impigre defiliens, atque Ingaunis audaci eruptione obviam exeuntibus conjunctus, in urbem cum adducto hominum præsidio perumpit: in quam extrema annonæ inopia laborantem Benedicti Perdicis navis primo, deinde Bartholomæus Auria trium navium adversus Catalanos armatarum præfectus, magnam vim comæatuum omnis generis invexerunt: quare Picininus spe urbem per obsidionem potiundi dejectus, consiliis oppugnationis repetitis, illam magna tormentorum vi quatere instituit: in qua oppugnatione immanis sævitiae exemplum ab illo editum est: Valentem enim quendam Focaciam, hominem gregarium, litteras Genua ad Ingaunos deferentem, interceptum, cruribus ad collum deligatis, tamquam globum tormento inclusum in civitatem fœdo ac miserabili spectaculo contorsit.

C At Genuenses fœdere tandem per Legatos cum Venetis & Florentinis icto, copiis aucti; cum duo millia peditum in Etruria scribi jussa venissent, Ingaunum obsidione eximere constituunt, sexque sagittariorum millia ea de causâ cogunt: qui cum, omnibus rebus præparatis & instructis, iter ingressuri essent; auditum est, Picininum obsidionem solvisse: paulloque post Legati Ingaunorum Genuam venerunt; qui in Senatum introducti, illorum fide & constantia laudata, multis immunitatibus donati sunt: cumque Genuæ magna esset pecuniæ penuria; captivi Aragonenses exiguo pretio in singula capita dimissi sunt: sub finemque hujus anni, cum Alphonsus Portu Veneris tandem discessisset, arces illius opidi ac turris Ericis recuperatæ sunt; atque omnibus ditionis Galeotti Carretti hominibus accessu finium Genuensium est interdictum.

D At Philippus anno, qui infecutus est, ejus sæ-^{A.C. 1437}culi tricesimus septimus, cum res illi aperta vi non successissent, ad dolos & artes versus, eo ab impotenti cupiditate provectus est, ut fratres ipsos inter se nefario parricidio committere non dubitavit: quare Baptistam Fulgosium Thomæ Ducis fratrem per occultos nuncios, spe perpetui illius patrocini à se suscipiendi facta; ad principatum patriæ invadendum, Thoma fratre dejecto, impellere adortus est. Eorum hominum erat Baptista, qui, quæcumque spes crescendi illi oblata esset, ad eam sese, omni fandi ac nefandi discrimine omisso, à nimia cupiditate rapi sineret: quare conditione haud retractanter accepta, cum voluntates prætorianorum paulatim collegisset, occasione arrepta, cum Dux in æde divi Dominici religionis plenus sacris operaretur; perditorum hominum manu coacta, ædes publicas occupat, atque eorum suffragio, qui non plus octoginta septem fuerunt, Dux Genuensium renunciatur: qua re subito nuncio ad Thomam perlata, cum confusum primo animum mox collegisset, non deserit se; sed magna bonorum multitudine, atque omnibus, qui factum Baptistæ improbabant, ad illum confluentibus; cum satis virium collegisset; ædes publicas è vestigio recuperat, ac fratrem capit. Hic singularis mansuetudinis atque egregiæ fraternæ pietatis exemplum à Tho-

Thoma editum est : nam cum multi illi auctores essent , ut de scelerato fratre pro manifesto perduellionis crimine justum supplicium sumeret , æmuloque sublato , principatum sibi stabiliret ; eorum orationem Thomas animo ac vultu respuens , *Ne isthuc* , inquit , *Deus optimus maximus* , *Virgoque Regina sinant* , permittantve , ut ego alieno exemplo potius pravus fiam , quam alii meo recte facere discant : atque plus apud me fraterna injuria , quam pietas valeat . Ego ne , ut odioparricidii in parricidium ipse ruam ? ac principatum mihi occisi fratris scelere ratum faciam ? vivat vero frater , quem si meum exemplum ad bonam mentem converterit ; hunc magnum ex clementia mea fructum percipiam fratris lucrifacti : sin impunitas ad italia dehinc audenda provexerit ; satius est me in solitudine privatam vitam agere , quam principatum fraterno sanguine pollutum gerere .

Interea regni Neapolitani Proceres , Renato jam à Burgundio dimisso , per assiduos nuncios & litteras instare , maturaret in regnum venire . Alphonsum enim præsentem , spe , donis , promissis , auctoritate denique sua , Procerum ac populorum voluntates ad sese magis ac magis in dies attrahere ; magnasque animorum inclinationes ac magnos hominum concursus ad illum quotidie fieri : neque in se satis esse opis aut auctoritatis ad rem sistendam : alterius igitur Regis præsentiam illi opponendam : quod nisi ille facere properet , brevi omnia Alphonfi fore .

Quibus adhortationibus permotus Renatus , cum pecuniæ inopia omnia tardiora faceret ; quinque tamen triremes Massiliæ comparavit & instruxit ; Georgioque Comite Pulcini Genuam misso , septem triremes à Senatu impetravit ; quarum præfectus is ipse Baptista Fulgosius designatus est ; quattuor illi civibus , more Majorum , in consilio datis , Georgio Grillo , Gaspere Marruffo , Uberto Justiniano , Angelo Joanne Lomellino : insectoquentique anno ejus sæculi tricesimo octavo mense Aprilis ineunte , Renatus cum quinque triremibus Massilia solvens Genuam venit , honorifice acceptus , maxima civitatis parte obviam effusa : quindecimque post diebus Genua solvens , cum duodecim triremibus Portum Veneris tenuit : ibique præsto habuit Janum Fulgosium cum duabus triremibus , quas in Corsica armarat ; quo sibi adjuncto , secundam navigatione usus Neapolim appulit ; classemque subito ob rei nummariae penuriam dimittit .

Hoc anno Genuæ pestilentia vehementer laboratum est : quam ortam ferunt ab ancilla quadam , quæ gregarii militis , cum quo consuetudinem Veneris habebat , contactu infecta , contagione sua morbum vulgavit ; cujus tanta vis fuit , ut maxima pars civium in suburbana concedens , urbem pene habitatoribus vacuum reliquerit ; nec prius quam circumacta æstate , cum salubria corpora esse coepissent , in urbem redierit .

Per idem tempus aliquot Catalanorum naves excursionibus ac latrociniis mare infestum faciebant : multaque inhumanæ sævitiae & rapacitatis in Genuenses exempla edebant : classis igitur quattuor ingentium corbitarum in illos decreta est , cujus præfecturam compluribus ex potentioribus civibus ambientibus , ac magnis allegationibus petentibus ; Dux & Senatus invidiam declinantes , primoribus Magistratibus ac nonnullis ex principibus civitatis convocatis , qui omnino sexaginta fuerunt , eorum suffragio rem permittunt : creatusque est præfectus , Pelegrus Promontorius ; qui Genua profectus , cum hostem multis in locis perquisitum nusquam reperisset , itinere , ut mandatum fuerat , Neapolim directo , turba nautica , seditione facta , ire recusavit , metu ne secundi mensis stipendium , primo jam peracto , sibi non persolveretur : quare

A præfectus classem Genuam reducere coactus est ; magno cum Ducis ac principum civitatis dolore & indignatione ; qui Dux cum iracundiam primo dissimulasset , paullo post de tribus seditionis auctoribus comprehensis suspendio supplicium sumpsit .

Insequentis anni , qui fuit ejus sæculi trigesimus A. C. nonus , libertatis recuperatæ tertius , cum initia 1439. quieta in primis domi ac foris fuissent ; ut haud diu ea quiete civitas frueretur , res Renati adversæ fecerunt : quæ initio lætæ , paulatim labi coeperunt . Alphonfusque Rex , Genuensibus triremibus à Renato , ut supra dictum est , dimissis , naves undique contrahere coeperat , ut Renatum navalibus copiis omnino nudatum mari quoque oppugnaret : cui cum Genuenses omni ratione opem ferendam statuerent , tres naves ad superiores quattuor addiderunt : cum quibus Promontorius præfectus solvens , Neapolim , nemine impediante , pervenit : ceterum Renatus impendiis parcens , quattuor navibus retentis , reliquas tres dimisit : cum quibus Promontorius præfectus discedens Nicolaum Fulgosium Spinectæ filium in suum locum suffectum Neapoli relinquit . Is initia juventutis suæ memorabili in primis facinore insignia fecit . Renatum enim ex Samnio Neapolim reversum primo retractantem , ac sermonem vix auribus admittentem , firmissimis rationibus tandem victum induxit , ad arcem munitissimam , quæ Castellum novum appellatur , oppugnandam : quam Alphonfus ab Joanna acceptam valido præsidio tenebat , illique præfecerat Rainaldum Sancium Catalanum , virum impigrum ac strenuum , constantisque in dominum fidei : quam rem velut nullius facultatis ac spei ab omni hominum cogitatione longe remotam nemo umquam tentavit .

Igitur Renatus , ut , qui auctor consilii fuisset , A. C. ejus quoque præcipuæ essent imperii partes , Nicolaum rei gerendæ præficit : arxque insequentiano 1440. ejus sæculi quadragesimo terra à pedestribus copiis Renati , mari à classe Genuensi circumfessa est . Est autem hæc arx ad mare ab extrema altera urbis parte moli , quæ conjuncta illi est ac portui imminens , subsidiis terrestribus & maritimis patens . Eam ædificavit Carolus Andegavensis primus Rex ; tantum spatium munimento amplexus , quod non arcis modo , sed peramplæ quoque regiae habitationis usum præberet . Duo prima opera Nicolai fuerunt : turris , quam vocant , sancti Vincentii , prope ab arce in mari consurgens , delecta ex toto exercitu quadringentorum manu in naves accepta , acri aliquot dierum oppugnatione in deditionem accepta ; & arx à terra ampla & præalta fossa circumdata , quam , crebris castellis excitatis , communivit , ut omnis ad arcem velut indagine cinctam terra & mari aditus esset exclusus : quibus operibus perfectis , arx terra marique oppugnari ac tormentis atque omni missilium genere continenter quati cœpta est : cum corbes in summis navium malis altitudinem turrium arcis pene æquarent ; ex quorum ictibus multi in arce vulnerabantur , ac nonnulli cadebant .

At Alphonfus omni sibi ope connitendum statuens , ne arx , in qua tanta essent ad summam belli momenta , in potestatem hostium veniret ; cum omnem maritima via subsidii introducendi spem turris sancti Vincentii , quam hostis tenebat , ac classis arci prætenta præciderent ; validis coactis pedestribus & equestribus copiis , ad quindecim milium numerum , Neapolim contendit : propeque ab urbe ad arcus jactum , in loco , qui vocatur *Echia* , confedit : cujus advenientis fama prius commotus Nicolaus , fossam in majorem altitudinem depresserat ; castellorumque numerum duplicaverat . Opposuit sese Alphonso Renatus pari fere copiarum numero , partim ex urbana juventute delectorum ,

eorum, qui stipendia faciebant; ita ut inter utrumque exercitum sola via intercederet: multa quoque praelia per varias occasiones committebantur, utroque Rege praesente & inspectante, ac partem laborum & discriminum capeffente; suosque patrii decoris aemulatione, spe praemiorum & honorum, ac ceteris omnibus animorum incitamentis ad fortem & fidelem operam edendam acuate.

Hic memorabilis virtus Petri Ludovici Auriliae Neapolitani genere Nobilis, ac Renato ob egregiam spectatam fidem carissimi, atque in regia honorifico Oeconomi munere fungentis silentio praetereunda non fuit: is quotidie equo concitato confertissimos hostium globos infesta hasta invadebat: qua tandem perfracta, saepe ab illis circumventus, mira virtute atque animi praesentia, ad hoc agilitate & equi regendi peritia salutem expediebat: quae exempla eximiae virtutis & fortitudinis saepe Alphonso inspectante edita, in eam sui admirationem atque amorem magnum Alphonsi animum traxerunt; ut Rex indignum ratus conspectam fortissimi ac nobilissimi equitis virtutem gregarii hominis ignaviae obnoxiam esse; toto exercitu per tibicinem edici iussit, fraude utriusque manus amputandae proposita, ne quis Auriliam, arcu, scorpione, sclopo, aliove ullo missilium genere petere auderet; adversus quem hasta tantummodo & gladio uti liceret.

At Alphonsus sese in spem irritam terere tempus intelligens; cum omnia ultima tentasset, incepto tandem omisso, in sua se recepit: sub cuius discessum Rainaldus extrema omnia perpeffus, omni alimento deficiente sibi, suisque incolumitatem pactus, Renato arcem tradit: miserabileque fuit exeuntium arcem agmen, cum squalore suo atque horrido totius corporis habitu, ad hoc pallore peremptorum, ac macie umbrarum verius hominum, quam hominum speciem intuentibus praebarent. Castellum novum captum mox altera arx, quae castellum Ovi appellatur, sine certamine consecuta est, a fratre Rainaldi praefecto ad extremam omnium rerum inopiam ipso quoque adducto tradita. Genuensium & Nicolai praefecti laudes, quorum forti, follerti, impigra in primis opera arx capta esset, Renatus ac Procerum principes litteris suis, & ad Senatum Genuensem, & ad ceteros Italiae Principes amplissimis verbis scriptis persecuti sunt. Arce capta, quantum Andegavensium res crevisse videbantur, tantum inopia Renati, quae in dies magis apparebat, omni spe quidquam e Gallia erogandi plane praecisa, brevi conciderunt: quae omnino corruissent, nisi virtute & opibus Joannis Candolae magni inter Neapolitanos Proceres nominis, ad hoc Eugenii Pontificis Alphonso execrabili odio infensi; pecuniis praeterea ac navalibus Genuensium copiis, quas suis ipsi pecuniis alebant, hoc & insequentibus duobus annis sustentatae fuissent.

A. C. 1441. Genuenses hujus anni initio, qui fuit ejus saeculi quadragesimus unus, foedus & societatem cum Eugenio adversus Alphonsum communem hostem, ac multis de causis utrisque invisum, junxerunt. Ex eo foedere Pontifex quattuor equitum millia conscripta adversus Alphonsum misit; Genuensesque, veteribus triremibus refectionis, ac novarum carinis positis, classem comparare instituunt; cuius praefectus designatus est Joannes Fulgosius Thomae Ducis frater natu minimus. Ea electio gravis enimvero & acerba Nobilitatis Factioni fuit: fremereque omnes; ac Ducem nimis suorum studiosum, omniaque ad illos attrahentem lacera-re: sed nemo rem gravius aut indignius tulit, quam Joannes Antonius Fliscus, magnae potentiae, magnarumque opum vir: qui eam praefecturam cupiditate & spe sibi destinarat, neminemque secum

A de ea certaturum animo proposuerat: is non occultis querelis rem pervellere; sed palam vociferari, ventum ad extrema esse; nec tantas injurias atque indignitates ferri jam posse: veteri civitatis instituto classium praefectos ex utroque Nobilium & popularium civium corpore alternos legi debere, a quattuor deinceps creatos esse praefectos omnes populares, Asseretum, Baptistam Fulgosium, Promontorium, Nicolaum Fulgosium: quas res, quamquam animos Nobilium acriter pungerent, concordiae tamen & quietis causa patienter illos tulisse: ne quinctum quidem relictum Nobilitati locum: quod quid aliud esse, quam Nobiles ab aditu honorum, atque ab omni Reipublicae participatione excludere? tantum sui contemptum diutius non esse ferendum: sed expurgandum aliquando Nobilitati; ac causam dignitatis atque adeo libertatis suae capeffendam: se quidem, vel aliis dormientibus, tantarum injuriarum acrem vindicem fore: minitabundusque, urbe relicta, Turri-liam ditionis suae opidum concedit.

Erat eo tempore omnibus, quos praesens rerum status non delectaret, quique res turbare cuperent, paratum in Philippi ope praesidium. Eos Philippus amplecti, illorum spem promissis alere, re juvare: consiliis igitur cum illo communicatis, acpecuniis acceptis; illius hortatu, Joannes Antonius, magna montanorum manu ex circumjectis regionibus corrogata; compluribusque in ora maritima gentis Fliscae studiosis concitatis; ditionem Genuensem invadit; omniaque tumultibus complet: ad hoc nonnullis navigiis amicorum ac cum illo consentientium opera contractis; terrestribus & maritimis excursionibus, cum saepe in conspectum urbis ipsius veniret, omnia infesta faciebat: cum eodem tempore nonnullae naves ab Alphonso, postquam foedus a Genuensibus cum Eugenio initum audivit, missae, ut illos negotio in suis ipsorum finibus exhibito distentos a cogitatione classis adversus se comparandae averteret, littoribus Genuensibus inveherentur; praedaeque hominum & navigiorum facerent: quas regias naves Galeottus Carrettus Marchio Finarii, quod opidum exsulum Genuensium atque a Republica dissidentium perpetuum receptaculum fuit, amicitiam Alphonsi secutus, littoribus suis excipiebat; annonaeque & aliis in usum necessariis juvabat: quare mari commeatibus clauso, brevi urbs multarum rerum penuria tentari coepta est: quibus undique circumfusus pavoribus, Dux haudquaquam obtorpuit; sed animum ad pericula undique intenta propulsanda, atque omnibus rebus occurrendum intendit; magno militum numero scripto, atque urbe, omnibusque ditionis opportunis locis, validis praesidiis firmatis; ad hoc nonnullis navigiis armatis: in quas res cum pecuniae in usum classis, ex foedere contra Alphonsum mittendae, erogatae necessario omnes insumptae essent; classis instrui atque emitti non potuit. Enimvero Eugenius, re cognita; cum jam ipse plus quattuor equitum millia adversus Alphonsum misisset; sese ab illis ludificatum vociferans, asperisque verbis in illorum perfidiam (ut ipse appellabat) inductus est: neque exasperatus animus ullis umquam excusationibus, aut necessitatis, aut temporum Reipublicae mitigari potuit.

F Interea Renati res magis ac magis in dies labebantur; omnesque, illo deserto, sese ad Alphonsum applicabant, cum illius liberalitate invitati, tum desperatione rerum Andegavensium debilitati; cum Renati inopiae par certamen cum Alphonsi opibus haud diu fore cernerent: Neapolique acri terrestri ac maritima obsidione circumfessa, frugum atque omnium necessarium rerum penuria vehementer laborabatur: nec duratum esset; nisi naves Genuenses assiduo subsidio submissae, ter aut quater in anno annonam in urbem invexissent:

sent: quibus discedentibus mare iterum claudebatur, urbsque in antiqua mala redigebatur: ut hæc anniversaria impensa urbem Genuam assidue exhauriret; essentque Genuensibus res Neapolitanæ veluti profunda quædam vorago, quam nihil umquam expleret: quæ tamen vix tolerabilia impendia Genuenses patienter ferebant: idque non tam ob certamen, quod adversus Alphonsum animis imbiberant, ac veteris & inexpiabilis in Catalanam gentem odii stimulos; quam quod vires hominum navalibus opibus, atque usu & peritia pollentium supra modum crescere, atque in Italia convalescere nolebant: ad hoc Alphonso animum tot tamque acribus omnium temporum caussis irritatum numquam sibi placabilem fore sperabant: quibus impensis Neapolis ab Alphonso insequenti anno, qui fuit ejus sæculi quadragesimus alter, octavo Idus Junias, quartoque post anno, quam Renatus eam ingressus fuerat, tandem capta finem attulit. Urbem Alphonso partim aperta vi expugnavit, partim furto insidiarum surripuit; valida delectorum militum manu per specum, qui olim usum aquæ ductus præbuerat, usuque illo diu intermisso, ab omnium cogitatione & memoria remotus erat, in urbem immisâ: qui ex specu per puteum in domum aniculæ cujusdam erumpentes, atque ab ea occultati; cum Alphonso à parte ab eo loco maxime aversa valida oppugnatione urbem aggressus esset; ipseque Renatus atque omnes copiæ, ad arcendum Alphonso impetum eo accurrissent; atque omnium Neapolitanorum animi & oculi in eum locum, ubi contractum certamen erat, versi essent, immissi armati è domo, ubi latuerant, prosilientes, murum proximum urbis defensoribus nudatum occuparunt: signoque dato, cohortes ad id ab Alphonso ante præparatæ ex insidiis, ut compositum erat, confluentes eo accurrerunt: quæ partim à superstantibus in murum extractæ, partim proxima porta ab eisdem refracta in urbem introductæ sunt: ad quem tumultum à tergo personantem, cum multi, ceteris rebus omisis, ipseque Rex accurrisset; tum Alphonso majore impetu connisus in urbem penetravit: Renatusque omnem urbem plenam hostium cernens, una cum Proceribus Gallis, ac nonnullis Genuensibus primariis civibus illius partes secutis in arcem concessit: in quibus fuit Antonius Calvus; cujus pecuniis Renatus magnam partem belli aluerat: sicque Alphonso urbe potitus est eadem aquæductus via; qua noningentesimo prius anno Belisarius illam ceperat: demonstrasse autem hoc iter Alphonso Anellus quidam cæmentarius dicitur; cum à fame ad transfugii necessitatem adactus, tum ab hac ipsa anu, quæ armatos domi excepit, inductus: Inqui casus docuit sapienter à nonnullis dictum, *In cendia, quibus maxima urbes conflagrent, non semper à basilicis, ac theatris & templis, sed interdum ab humilibus quoque tuguriis oriri.* Hanc aniculam ferunt ad extremam necessarij victus inopiam adductam ad Renati genua advolutam, supplicem aliquid alimentij sibi ac parvulis natis fame pereuntibus petiisse: quam Renatum verbis male acceptam truci vultu aspernatum, à se dimisisse: illam dolore ardentem animum non muliebriter ad flebiles questus, atque ad divini Numinis ultricem iram precibus fatigandam; sed ad viriles cogitationes, studiumque contumeliæ ulciscendæ contulisse: quam contumeliam cum Anello, cum quo ut ejusdem fortis homine forte familiaris usus sibi intercedebat, conquestam, hominem ad hanc viam Alphonso enunciamdam induxisse.

At Genuenses, ne amicum Regem, quem quatuor annos magnis impendiis sustentaverant, in extremis angustiis destituisse viderentur; hoc quoque exemplum ejusdem tam in perditis & desperatis,

quam in lætis vel dubiis rebus animi, ejusdemque in amicum & socium fidei addiderunt; duasque ingentes naves omni nautico armamento omnique bellico apparatu affatim instructas, ad hoc cum annonæ magna copia ac delecta armatorum manu Neapolim mittunt; mandato magistris navium dato, ut Regi, quidquid consilii ille ceperit, sine ulla retractatione dicto audientes sint: quas Renatus ad arcem appulsas, nulla interposita mora, conscendit, Calvumque arcis præficit, quam veluti pecuniæ creditæ pignus haberet: diemque præstituit, qua, nisi subsidium submittatur, sibi consulat, permisit: ipse cum Etruriæ littora tenuisset, ad urbem Pisas exscensione facta, Florentiam contendit; ut animum Eugenii tentaret: quem, quamquam Alphonso capitaliter infensum, cum à molesto infinitorum impendiorum ac perexiguæ spei negotio abhorrentem offendisset; omni auxiliorum & recuperandi regni spe dejectus, iisdem navibus patriam repetens, in portum Massiliæ est invehctus. At Calvus, tempore definito circumacto, cum omnia apud Renatum desperata essent; pecuniis debitis sibi integre persolutis, Alphonso arcem tradidit.

Eo anno Baptista Fulgosius, Thomæ Ducis frater, armorum præfectus fato functus, regii sumptus & apparatus funere elatus est: quæ insueta liberæ civitati species animorum motus fecit; invidiamque in Thomam jam ante multis de caussis commotam mire inflammavit: cum ille non modo apud Nobilitatem numquam ipsi satis æquam offendisset; sed multis quoque ex popularium principibus stomachum fecisset. Vulgo igitur pro se quisque superbiam & fastum Ducis lacerare, fremereque omnes; parum esse Ducibus, omni æqualitatis jure perfracto, Genuæ regnare; nisi etiam Regum speciem apertis signis præferant. Quid attinebat exteros Principes expellere; si, illis exterminatis, non jam dominatu civitas liberaretur, sed Dominos tantummodo mutaret? minore certe pudore ac minore dedecore civitatem magnis ac præpotentibus Principibus, quam civibus suis tenuis fortis hominibus, servire; ac, si non suaviore, splendidiore certe catena constrictam Genuam ab externis Principibus teneri. Hæc indignatio opportunum Thomam consiliis Joannis Antonii Flisci præbuit: quæ ille ab Alphonso & Philippo fatus & incitatus, in Ducis perniciem assidue struebat; compluribus ex civitatis primoribus consiliorum participibus: quæ consilia inter multos agitata, cum, ut necesse erat, emanassent, in Thomæ notitiam pervenerunt: ceterum res suo ipsa molimine ardua, cum diu extraheretur; contemptui esse coeperant Duci Flisci conatus ac minæ: at cum audisset, constitutum esse Flisco, ad quintum decimum Kalendas Januarias urbem noctu à maritima parte, eo in loco, ubi est ædes divorum Nazarii & Celsi, adoriri; quod ibi mœnibus nudata scopulis veluti in gradus excisis facilem adscensum accedentibus præbet; Dux eum locum valida armatorum statione firmat: ceterum, cum intoleranda vis frigoris esset, acerrique Favonius atque ab Oriente venientibus adversus flaret, qui erant in statione, ventum satis pro se pugnare distitantes, stationem deserunt, atque in sua quisque privata tecta concedunt: verum incredibili Flisci felicitate factum est, ut Favonius subito in non minus acrem Septentrionem versus sit: quo utens Fliscus parvis navigiis, quorum magnum numerum contraxerat, conscensis, Camulio opido solvit; triumque horarum spatio urbem ac locum destinatum defensoribus nudatum tenet; nulloque certamine urbem ingreditur: quo trepido nuncio excitatus Dux, incertus consilii animo fluctuare, varique suadentibus amicis nemini satis assentiri: tandem, cum dies venis-

venisset, armaque contra se commota nunciarentur, multique illi auctores essent, ut otio civitatis ac paci civium consulens fortunæ cederet, haud temere tantum consilium præcipitandum dicere, sed caute & circumspicte agendum: permisitque arbitros & disceptatores rerum suffragio civitatis creari. Electi sunt sexdecim cives, omnes fere è corpore populari, qui, ut mandatum fuit, octo ex civitatis primoribus legerunt; penes quos omnium rerum arbitrium & regimen esset. Hi fuerunt Baptista Guanus Jurisconsultus, Petrus Fliscus, Baptista Furnarius, Demetrius Catanius, Theodisius Auria, Petrus Bondinarius, Andalonus Marruffus, Lucas Grimaldus. At Fliscus, cum interea Thomas animum non induceret, ut magistratu abiret, ædes publicas invadit, illisque nullo certamine potitur: Thoma in turrim Solarii compulso, qui paullo post sese in potestatem Raphaelis Adornii tradidit: ceterum antiani, octo, quos diximus, additis, octo cives eligunt, penes quos regimen omnium rerum esset, Capitaneos Genuensis libertatis vocatos; Raphaellem Adornium Jurisconsultum, hunc ipsum, qui Thomam expulerat, Joannem Antonium Fliscum Equitem, Paulum Albarium, Andalonum Marruffum, Lambam Auriam, Baptistam Spinulam, Meliaducem Salvagum, Dominicum Ricium à pago Bargalio lanium: ceterum eorum discordia brevi hic Magistratus lapsus est; ut paullo amplius menstruus fuerit: quare ad quintum decimum Kalendas Februarias insequentis anni, summa civitatis voluntate, silentio electus est Dux is ipse Raphael Adornius Georgii filius, Antoniotti nepos, qui ambo Duces fuerunt: creatique sunt quattuor cives, qui salubribus legibus statum Reipublicæ emendarent, ac Ducis potestatem nimis se efferentem, atque idcirco semina dissidii & seditionibus præbentem cohiberent: neque tamen eo aut insequenti anno civitati à malis quies data: duobus civibus à Philippo & Alphonso instigatis continenter illam vexantibus: alter fuit is ipse Joannes Antonius Fliscus; qui nimis animis, cum populares Duces ac popularem rerum statum Nobilium opibus prævalentem ferre non posset, urbe iterum excesserat, opidisque Recco & Portu Delphini occupatis, cuncta populationibus, direptionibus, aliisque belli cladibus miscbat: alter fuit Petrus Fulgofius magnorum spirituum adolescens; omniumque, quos ea ætas tulit, acerrimus & audacissimus: qui gentem suam Fulgosiam principatu patriæ dejectam graviter ferens; ad hoc egestate rerum ad splendidum cultum tuendum necessariarum inductus, cum perduellionis damnatus atque hostis patriæ judicatus esset; ex opido Novis, quo ea de causâ à Philippo donatus fuerat, excursiones faciens, omnia circa itinera late infesta faciebat, prædas undique agens: in quibus illa insignis fuit, centum viginti clitellarii muli magni pretii mercibus onusti, quas in Galliam convehabant, abacti; in quibus arma omnis generis ad usum ipsius Regis affabre facta fuisse dicuntur: quæ res molesta in primis Raphaeli Duci fuit, tanti Regis offensionem verenti; quem litteris demisse conscriptis placare studuit, culpam à civitate & publico consilio amovens; atque in exulem contumacem transferens: ut duo hæc inquietæ & vivida ingenia, tamquam duo ungues in ulceribus publicis essent: cum per idem tempus, anno

A. C. 1443. ejus sæculi quadragesimo quarto, necesse fuerit tres corbitas armare adversus Catalanos, commercia maritima jussu Alphonfi infesta facientes: cui classi præfectus est Gulielmus Marruffus, duobus illi, more Majorum, in consilio datis, Philippo Grimaldo & Hieronymo Furnario.

Tandem civitas diuturnis malis fessâ, ad necessitatem cum Alphonso pacificandi adacta est; conditionibus potius Reipublicæ temporibus aptis, quam

A satis ipsi honorificis: ad iracundiam enim Regis, ob acceptas clades, atque ob memoriam sui capti animo alte insidentem permulcendam, pelvim auream quotannis Regi pendere se obstrinxerunt: qua pace facta, aliquandiu res Genuæ quietæ fuerunt: quare animo ad res constituendas adjecto; hoc anno Magistratus ille institutus est, qui à numero ipso annorum nomen accepit: in cujus procurationem vetera nomina à publicanis ac ceteris Reipublicæ debitoribus nondum exacta rejecta sunt.

B Sequuntur duo anni ejus sæculi quadragesimus quintus, & quadragesimus sextus: quorum primus nihil memorabile habet præter obedientiam à Portuvenensibus, Legatis missis, delatam; cum nonnullæ causæ dissidendi intercessissent: at secundus magnam Genuensis populi offensionem, ob fastum & arrogantiam Alphonfi; qui pelvim à Genuensibus ex fœdere missam non privatim, sed palam in frequenti Aula, regni que Proceribus convocatis, accipiebat: quæ liberis oculis minime tolerabilis species, Genuensium animis exasperatis, res in antiqua mala redegit.

C Sequitur annus ejus sæculi quadragesimus septimus, maxime insignis ob duo memorabilia edita à duobus Genuensibus civibus, alterum suspiciendæ moderationis, alterum incredibilis audaciæ, exempla. Ea tum erant tempora, quæ vitia Ducum ferre non possent; & virtutem ac probitatem, si cuius emeretur, odissent. Raphaelis igitur Ducis moderatio, æquitas, justitia, mansuetudo, prudentia, cum illum vulgo etiam adversæ Factionis civibus carum facerent; Adornii suis invisæ erant, tamquam ipsorum libidinibus minus aptæ: consilia igitur agitare cœperunt de illo dejiciendo, ac ducatu ad Barnabam consiliorum auctorem transferendo; cui alia esset morum via, quique non tam jus & æquum quam emolumentum & amplitudinem in principatu patriæ quæreretur; ac suorum cupiditatibus obsequi haud abnueret: sed prius omnia tentanda statuebant, si forte res sine tumultu atque offensionibus transigi posset; vim ad extremum reservantes: igitur Raphaellem arte aggressi, demonstrare homini instituunt; si ipse in animum inducere possit, ut ducatu abeat, fore, ut concordia ac civitatis tranquillitas constituatur ac stabiliatur. Enimvero Raphael nullam fraudem aut dolum subesse existimans in consilio, cujus auctores essent ipsi suæ gentis homines, quorum non minoris quam sua interesset principatum patriæ in gente Adornia esse; nihil cunctatus, sese in illorum potestate fore respondet: averteret hoc à se Deus optimus maximus, ut ipse ambitione sua bono publico in mora esset: principatum patriæ se non sua, sed Reipublicæ causâ suscepisse, Reipublicæ quoque causâ non minus lubenti animo deponere paratum: factisque dicta subsequens extemplo magistratu se abdicavit; & in privatas ædes concessit, à magna civium frequentia virtutem & merita divinis laudibus prosequentium deductus: ceterum quamquam duodecim cives rebus constituendis creati sunt; tanta tamen fuit in Barnaba & consilii consortibus impudentia, ut ab impotenti cupiditate eodem die, quo Raphael magistratu abiit, Barnabas Dux creatus sit: quæ tamen lætitia Barnabæ haud diuturna fuit; nec principatus fraude ac malis artibus partus plus menstruus fuit.

E At Janus Fulgofius magni animi, magnorumque spirituum vir, memorabile in primis facinus ausus est: qui nihil deterritus fama firmissimæ sexcentorum delectorum militum cohortis, quam Alphonfus Fulgosiorum hostis ad Barnabam & Adornios miserat; cum una tantum triremi silentio noctis portum furto ingressus, cum delecta quinque & octoginta tantummodo fortissimorum juvenum manu, atque in omne discrimen pro illo paratorum, ædes

publicas ac prætorianos invadit; prælioque atroci commisso tanta fuit in Fulgoso virtus & constantia, ut omnibus suis faucibus, ac nonnullis cæsis, victor tandem evaserit, ædibusque publicis, ac ductu patriæ, Barnaba ejecto, potitus sit. Is initio ducatus Petrum Fulgosi exsulio mulctatum non modo patriæ restituit, sed urbis præfectum armorum creavit.

Ceterum, cum non magnorum modo Principum odiis per ea tempora res Genuensis premeretur; sed finitimorum quoque tenuis fortis Procerum contemptu laboraret; in illis molestissimus semper fuit Galeottus Carrettus Finarii Marchio: quod opidum in ora Ligustica in Occidentem versa ditioni Genuensi interjectum eam mediam secat. Ex eo opido Carrettus per varias occasiones in fines Genuenses excurrere, diripere, prædas agere, aliisque belli cladibus incolas vexare: cum Genuenses majoribus externis & domesticis occupationibus impliciti rem dissimulare ac negligere sæpe cogerentur. Quæ patientia cum hominis audaciam aleret; diuturna impunitate ad alia ex aliis majora in dies audenda proVectus, Salanellum quoque & Justenecum duos ditionis Genuensis vicos occupavit; atque hoc anno prægrandem onerariam magni pretii mercibus onustam cepit. Enimvero Genuenses exarserunt; hominemque nullum insaniendi finem facientem acri bello persequendum, atque ex tota Liguria prorsus exterminandum constituunt; necessaria pecunia in usum belli decreta. Quod cum magno conatu gerendum constituissent; scribi copiæ justæ sunt, in vicariatu Clavari sexcenti pedites, in vicariatu Spediæ quadringenti, in tribus præfecturis urbi proximis octingenti, in ipsa urbe quadringenti sagittarii, in præturis Varaginis, Savonæ & Nauli pedites mille, Ingauni & in ditionibus gentis Aurisæ & Lingullis quatuor peditum millia, in ditione Saxelli à Philippo Auria Domino quinquaginta sagittarii, in ditionibus Fliscorum quantum Duci visum esset. Spinulæ regionem Luculum appellatam incolentes ducentos sagittarios contulerunt: quæ copias Finarium initio insequentis anni, qui fuit ejus sæculi quadragesimus octavus, admotæ sunt: cumque ejus belli causa multa à multorum conscientia remota esse oporteret; potestas Duci permixta est, cum quattuor tantummodo civibus illi additis, rem, quemadmodum illis visum esset, silentio ducendi: hi fuerunt Andreas Imperialis, Petrus Montenigrus, Lucas Grimaldus, Paris Justinianus: qui mense Junio duas naves, Finariensis belli causa, armarunt: quorum Finariensium odio inusitata rei exemplum Genuæ editum est: nam ipsis Finariensibus Dominis illorumque ditioni subjunctis, quod omnes in vexanda Republica consensissent, fructus ex vestigalibus publicis oppigneratis adempti sunt, atque in usum belli conversi.

Sub finem hujus anni mortuus est Janus Dux cum bonorum dolore: probata enim est illius gerendæ Reipublicæ ratio: quem dolorem civitas testificata est, per amplexum marmoreo sepulcro illi decreto. In demortui locum successus est Ludovicus Fulgosi: insequentisque anni, ejus sæculi quadragesimi noni, initio nonnullæ naves in quosdam piratas Corsos & Provinciales Narbonenses excursionibus mare infestum facientes decretae sunt; bellumque Finariense, opido tandem capto, ad finem pervenit: quæ res ancipitem deliberationem in consilio præbuit: multis censentibus opidum non modo diripiendum, sed prorsus excindendum, ulcusque illud à corpore Liguriæ abscindendum. Vicit mitior sententia; quæ suburbia tantum diripi decrevit, atque arcem Goonem solo æquari. Finariensesque, cum Genuam venissent, venia errorum suppliciter postulata, in imperia jurarunt: quibus postea multæ immunitates, multaque jura eximia concessa sunt.

A Marcoque Carretto, qui cum Galeotto non consenserat, quin contra, rem Genuensem fortiter ac fideliter juverat; cuique idcirco tertia pars Finarii promissa fuerat, fides servari decreta est: sub finemque anni acriter & severe animadvertendum in eos decretum est; qui Romæ Pontificias litteras ac rescripta contra publica civitatis jura impetrarent.

Insequens annus ejus sæculi quinquagesimus turbulentus nonnihil fuit: Ludovico Fulgoso, qui civitati ignavia sua non satisfaceret, magistratu abrogato: in cujus locum Thomas Fulgosi Sergiana (tanta erat hominis existimatio) tertium Dux accersitus est: qui ultro delatum honorem repudiavit; ætatem prægravem, atque annis & laboribus fessam, neque jam numeribus publicis aptam excusans: suavitatem Petrum Fulgosi præfectum armorum urbis, recenti gloria expugnati Finarii fulgentem eligi: in eo viro esse indolem parem tanto fastigio: bellicosam tempora Reipublicæ imminere; bellicoso igitur & vivido ingenio opus esse. Probato consilio, Petrus frequentibus suffragiis Dux creatur. Petri ducatus ipso initio infestus maxime fuit; & Principum exterorum & exsulum Genuensium, quos Principes alebant, insidiis appetitus: quorum conatus, terrore aliquo injecto, compescendos ratus Petrus, Galeottum à Mari multis de causis suspectum, ac linguæ immodicæ hominem, anno ejus sæculi quinquagesimo uno, in area antea divi Francisci togatum & crepidatum suspendio necavit, cum hac inscriptione in tabella à pedibus suspensa exarata, *Hic homo locutus est ea, quæ non licet.* Quæ scæda & liberæ civitati intoleranda species animos hominum vulgo vehementer commovit.

Illud quoque ab Annalibus traditum silentio prætereundum mihi visum non est, quattuor Legatos sacrum diadematis à Friderico accipiendi, honestandi causa Romam missos: Episcopum Naulensem, Nicolaum Fulgosi urbis armorum præfectum, Demetrium Vivaldum, Nicolaum Vialem notarium. Sub finem hujus anni, cum Galli à Carrettis auxilio accersiti in oram Ligusticam deflexissent, opidaque Finarium & Petram occupassent, missi sunt in præsidium circumjectorum locorum quingenti pedites ac ducenti sagittarii: arxque Fiaconum aucto præsidio firmata.

At insequens annus ejus sæculi quinquagesimus alter, præter duos Oratores Romam missos, ad obedientiam Nicolao Pontifici deferendam, Episcopum Naulensem & Gotardum à Sergiana, illud memorabile habet, validum præsidium in urbem Peram missum trecentorum sagittariorum, ducentorum loricatorum, quadringentorum galeatorum; cum formidolosa esset Mahumetis Turcæ potentia, quem urbi & portui Constantinopolitano imminere fama erat.

Sequitur annus ejus sæculi quinquagesimus tertius, cum toto Christiano orbi, tum Genuensibus privatim lugubris: nam sub finem veris, classis Aragonensium Fanum Florentii in Corsica occupavit; & Constantinopolis à Turca tandem expugnata est, acriter ab Joanne Justiniano Genuensi summo terrestrium & maritimarum copiarum Græci Cæsaris Duce defensa: qui cum validissimam Turcarum oppugnationem constantissime sustinisset; gravi vulnere accepto, ejus curandi causa prælio excedere coactus est: qua occasione Turcæ utentes, prælio acriter redintegrato, omnibusque viribus connisi civitate potiti sunt. Expugnationem Constantinopolis deditio Peræ subito consecuta est: quam coloniam suam Genuenses per amplexus ædificiis atque insignibus sacris ædibus frequentarant. At Genuenses Fano Florentii & Pera urbe amissis commoti, reliquæ Corsicæ ac ceteris urbibus, quas in Euxino possidebant, timentes, dominatum omnis

insulæ Corficæ, nec non Caffæ urbis, quam olim Theodosiam appellatam scio, in Magistratum sancti Georgii transtulerunt.

Locus postulat, ut de Magistratu sancti Georgii nonnulla attingam; quo appareat, quanta cum ratione Corfica in eum Magistratum translata sit, tamquam possessione ejus insulæ pacatiore & stabiliore futura: quibus de causis Magistratus sancti Georgii Genuæ institutus sit, superius exposuimus. Hoc corpus civium, in quod vectigalia publica transferri coeperunt, paullatim auctum, novisque alia ex alia exorientibus quotidie causis publicorum vectigalium alienandorum; paullatim viribus assumptis, in numerum & amplitudinem justæ civitatis crevit: factumque est, ut in eadem urbe duæ essent civitates, duæque Respublicæ; non genere solum variæ, quod penes alteram esset regimen atque imperium civitatis & totius Genuensis ditionis; sed moribus diversis ac fortuna & statu rerum dispares: cum superior corruptissima sit, nihilque sani aut integri habens; ad hoc turbulenta & inquieta, molestiarumque plena, discordiis ac factionibus agitata, seditionibus, tumultibus, bellis denique civilibus lacerata, postremo libertate orbata, ac modo exteris Principibus, modo civibus suis pudendam ac duram servitutem serviens: at hæc priscorum morum sanctitatem & incorruptam veterem disciplinam retinens, pacato & tranquillo statu utens, omnibusque pacis & quietis, illibatæque libertatis bonis florens: quibus rebus factum est, ut cives patriæ debitum amorem à priore Republica ad secundam hanc omnem transtulerint, acerrimique illius defensores sint; cum cujus rebus secundis, vel adversis, privata ipsorum res conjuncta sit, magna ex parte in vectigalibus publicis occupata. Res profecto mira, atque ex omnium sæculorum & gentium memoria unici exempli; quæque numquam vel in alicujus Legislatoris cogitationem venerit, vel in aliquorum Philosophorum disputationibus versata sit, ut intra eadem moenium septa eodem tempore duæ Respublicæ formæ essent; tyrannica una, politica altera: ita nulla re inter se implicitæ aut coherentes; ut, altera ruente, altera non modo non consideret, sed ne metu quidem labefactaretur.

A. C. cum decrevisset, hoc anno, qui fuit ejus sæculi
1454. quinquagesimus quintus, cum superior nihil me-
1455. morabile habeat; Bernardum Villamarinum magni in navalibus rebus nominis Ducem, cum ingenti classe, simul Palermum Neapolitanum terrestrem Ducem cum haud exiguis copiis Genuam mittit: in quibus fuerunt Raphael & Barnabas Adornii, atque Joannes Antonius Fliscus, cum magna exsulum manu; quos Alphonsus, præcipuo certamine animi adversus Petrum sumpto, restitui in patriam volebat.

At Petrus nihil tanta terra & mari sese circumstante mole animo infractus, sese ad resistendum comparat: at cum ad apertam vim atque exteriores conatus sese parem fore confideret; ille assiduus stimulus animo infidebat domesticorum odiorum, quæ metu ad eam diem compressa haud dubie in spem tam validi & propinqui auxilii essent eruptura: in quo periculo discutiendo, eximii consilii ac neutiquam vulgaris militaris astus specimen edidit: ædibus enim publicis valido præsidio firmatis, quidque facto opus sit, præfecto monito; ipse simulans sese

A urbem exire, ad copias hostium ex propinquo speculandas, atque ad nonnulla, quæ usus postulet, providenda; devio atque occulto itinere à nemine conspectus in arcem concessit, quæ à cohorte numero & genere firmissima tenebatur; ac motus adversæ Factionis speculabundus expectat: nec fefellit hominem sagax consilium: nam adversæ Factionis capita Petrum urbe vere excessisse credentes, primis se intendentibus tenebris, in publicum armati profiliunt; nomenque Adornium & Aragonense magnis clamoribus subjicientes, magna hominum turba excitata, ac sibi adjuncta, ædes publicas magno impetu invadunt; quique præsidio relictæ fuerant, acriter resistentibus, brevi atrox certamen inter illos accensum est. Enimvero Petrus procedente consilio lætus, cohorte secum rapta, ad locum, in quo contractum certamen erat, contendit; magnisque clamoribus Fulgosium nomen subjiciens, inimicos in adversum certamen totos animis & oculis intentos à tergo invadit: quos primo incurfu fundit ac fugat, magna illorum cæde edita; in magnamque eorum partem, qui stragi superfuerant, tota urbe dissipatam comprehensam, tamquam in seditiosos, capitali supplicio animadvertit.

C Igitur Petrus ab urbanis motibus egregio commento securus, liberas curas ad ea, quæ ad impetus exteriores arcendos pertinebant, adjicit, omnia providens ac circumspiciens, omnibusque impigre occurrens. At hostes spe urbanorum motuum, quæ in primis se commoverant, dejecti, simul diligentia & vigilantia Petri nihil eorum conatibus opportunum relinquentes, in spem irritam sese terere tempus intelligentes, appetente hyeme, itinere retro repetito, in sua concedunt; aliquot triremibus relictis, quæ rem Genuensem infestam facerent: ut ea
A. C. 1456. de causâ insequenti anno ejus sæculi quinquagesimo sexto, nonnullis motibus in ora in Occidentem versa, atque in urbe Ingauno excitatis, missi sint eo ad res pacandas, Andreas Francus, Bartholomæus Auria, Antonius Lomellinus: ceterum, classibus Aragonensibus per Ligusticum mare assidue discurrentibus, naviumque & hominum prædas agentibus; duæ naves omnibus rebus instructæ ad litorum & commerciorum tutelam postea emissæ sunt.

D At Petrus cum tantas dimicationes, virtute, consilio, constantia, vigilantia sua octo annos sustinuisset; omniaque ultima esset expertus; neque execrabile in se odium Alphonsi ullis Francisci Sfortiæ, aut cujusvis precibus mitigaretur; cum ille animo obfirmasset Petrum de honore dejicere, atque Adorniam gentem ac reliquos exules in civitatem restituere; omnibus auxiliis nudatus, atque assiduus sumptibus exhaustus; simul impotentem dominatum suum universæ civitati offensum & invisum intelligens, fortunæ tandem cedendum statuit: qua in re nihil à se ipso, infractoque animo, ac vivido ingenio suo, ceterisque à se rebus gestis absconum fecit: ductu enim cedere quidem constituit; sed non inimicis suis cedere: igitur de consilii civitatis sententia, anno ejus sæculi quinquagesimo octavo, dominatum
A. C. 1458. Genuæ, ut aliquando jam factum fuerat, iisdem quibus antea conditionibus in Carolum septimum Regem Gallorum transferre decrevit: qua de causâ quattuor Legati in Galliam missi sunt, Marcus Grillus, Joannes Ambrosius Marinus, Gotardus Stella, Baptista Guanus; qui civitatem Regi tradiderunt: Rexque è vestigio Joannem Andegavensem, & Calabrensem Ducem Genuam mittit: quo honorifice accepto, ac jusjurandum exigente; populus in hortis Fulgosis, qui sunt in suburbiis sancti Thomæ, in imperia Regis juravit; ipseque Regis nomine juribus publicis, & sancti Georgii confirmatis, possessionem civitatis regio nomine accepit: cui Castellum in ipsa urbe ac reliquæ totius ditionis Genuensis arces traditæ sunt.

V B E R T I F O L I E T A E,
PATRICII GENVENSIS,
HISTORIAE GENVENSIUM
LIBER XI.



DOMINATV in Regem translato, duplex gaudium civitatem cepit: nam & se ex infinito illo Petri imperio liberatam lætabatur; & causam Alphonso, cui nullæ inimiciæ cum Carolo intercederent, civitatem vexandi præcisam sperabat: quæ spes usque adeo homines frustrata est; ut, re cognita, Alphonfus atrocior & vehementior in Genuenses coortus sit; dolore & indignatione imperii, cui ipse haud obscure imminerebat, in alium translatus: quare, Petro Spinula & ceteris exsulibus instigantibus, præter eas naves, quas in mari Ligustico continenter habebat, excursionibus & prædationibus omnia infesta facientibus, prævalidam classem comparat viginti corbitarum ac decem triremium: quam omnibus apparatibus bellicis, omnique comæatuum copia affatim instructam, ad hoc magno militum & nauticorum sociorum numero refertam, Villamarino præfecto, Genuam mittit: quæ classis urbi admodum, ante ostium portus in ancoris stetit: ad hoc terrestres copias, quarum Duces erant Adornii, auxit: ut urbs artificissima obsidione terra & mariungeretur; ingemiscentibus Genuensibus ac mœrentibus, quo consilio se laboribus & discriminibus erepturos sperarant, illud miseras & calamitates civitatis auxisse. At Andegavenis ostium portus cætenis & trabibus obstruit; urbemque cum regionum militum, quos ipse adduxerat, tum eorum, qui sub Petro stipendia fecerant, præsidio firmat: cum in omnibus rebus sollerti opera Petri ipsius uteretur, viri expertæ in rebus bellicis virtutis, & magni consilii.

Cum res in magnas angustias atque in extremum discrimen adductæ essent; peropportuna Alphonso mors, quæ fuit Kalendis Juliis, Genuenses ab imminente peste eripuit; eosque animos jam despondentes à desperatione recreavit & erexit: contra, obsidentium fregit: classisque, ut erat multis ex locis collecta, ita subito dissipata est, navibus fugientium specie, alia alio tendentibus: Adornii-que ac Joannes Philippus Fliscus obsidionem solvere coacti sunt.

Bellicos labores pestilentia excepit, quæ crebris funeribus civitatem deformavit; maximaque pars civium ea de causâ in suburbana concessit: qui, cum graviore tempore anni circumacto vis morbi defavisset, in urbem reversi sunt; eorumque curæ in statum corruptum rerum emendandum versæ: ceterum cum ad tantas copias necessario alendas ærarium non satis potens esset; coactus est Joannes ingentem pecuniæ summam partim à privatis Genuensibus civibus, partim à Francisco Sfortia Mediolanensium Duce, Daniele Riso Neapolitano ea de causâ ad illum missio, mutuam sumere.

Alphonso tanto hoste ac tam obstinato Genuensium infectatore mortuo; res Genuenses in multum tempus quiescere & à diuturnis malis respirare posse

videbantur: ceterum, tamquam discordiæ & contentiones ac turbæ fatales nostræ urbi essent, subito novum incendium exortum est ab eadem face excitatum, quæ illis temporibus bella civilia ac domesticas perturbationes perpetuo accendit. Petro enim Fulgosio metu Alphonso liberato suum repente redierat ingenium: quem poenitentia ceperat præproperi consilii:angebaturque ingentium spirituum vir, sese nimis celeri rerum desperatione principatu cessisse: causas igitur novorum motuum quærens, cum sese Novas & Vultabium recepisset, quæ opida velut pignora sibi retinuerat; pecunias sibi debitas ac promissas ob Castelletum & reliquas arces Gallis traditas, civiliter primo petere cœpit: cum differretur, conqueri Petrus, se extrahi ac veluti ludibrio esse; ac magis & magis instare: postremo, cum responsum esset, nullam in præsentia in tantis rei nummariæ angustias tantæ summæ dissolvendæ Genuæ esse facultatem; minaciter agere, ac sese fide publica circumventum & deceptum, clamare; non esse ferendam injuriam, seque contemptus sui haud segnem vindicem fore feroci oratione præferre: quæ verba cum præservidum ac præceps hominis ingenium formidolosiora faceret; Genuenses Petri fratres ac propinquos, quos cum illo consentire haud dubitarent, urbe exactos exsilio mulciant: quæ nova insuper addita contumelia cum turbarum cupido causas novandi res accumulasse videretur; Petrus Francisco Sfortiæ demonstrat, sese gravibus injuriis à Gallis & Genuensibus pariter læsum, neutri se ulla esse verecundia obstrictum; ambos igitur se justo & pio bello persequi decrevisse: quod bellum non magis susceptu justum sit, quam confectu facile: ingentem enim esse tam in urbe quam in totis Genuensibus finibus totaque Liguria clientium & Fulgosianæ Factionis hominum multitudinem; à quibus assiduis precibus ultro accersatur: eos omnes ad primum ipsius adspectum haud dubie consurrecturos; neque dubitare se, quin ipse eorum opibus & favore nifus è vestigio urbe sit potiturus: inopiam pecuniæ solam consilium distinere, cujus si tanta summa à Francisco subveniat, quæ in menstruum stipendium copiarum necessario scribendarum satis sit; sese nullam moram movendi facturum.

Ea de re nunciis sæpe ultro citroque missis, Franciscum assiduis precibus fatigabat. Ille inter ancipitia consilia incertis animis fluctuare: hinc cupere Gallos Genua expulsos, dupliciter invidiosos; quod illi, ipso vetere amico ac socio, tum autem finitimo non consulto, neque particeps consilii facto, Genuæ imperium acceperant, tamquam ipsius amicitia spreta; & quod formidolosos Gallorum opes nimis prope se convalescere haud læto animo adspiceret: illinc stultum censere, nulla re cogente, tantam negotii molem sibi ultro conflare; ac tam potentem hostem, tum autem tam propinquum factum sibi irritare. Hæc sententia cum animo infudisset, respondet Petro, gravem quidem sibi esse accolam Gallum; ceterum nullam se speciem armis illi inferendis prætexere posse: verum ne animo deficeret Petrus: quam enim opem illi aperta via ferre jus & pudor pro-

hibeant, eam sese occultis consiliis laturum. Ferdinandum enim Aragonum & Neapolis Regem ad causam Petri toto animo suscipiendam, illiusque consilia fovenda & adjuvanda inducturum: ab eo Petro tamquam à potentiore & opulentiore Principe longe maiora auxilia quam à se exspectanda: nec minus factis, quam dictis, promptus prius abstinit incepto, quam Ferdinandum Petro conciliatum ad illius consilia amplectenda induxit: cum illi demonstrasset, quod ultro offeratur, id illum cupide petere debuisse: unam enim esse Gallos Genua expellendi viam, Petri amicitiam & audaciam: impigrum & experientem virum tamquam obicem Gallorum conatibus in ipsum intentis opponendum: neque debere illum credere, Gallos Genuæ imperium per se quæsisse, rem molestiarum & impendiorum sine ulla fructus spe plenam: non igitur Genuam suis ipsam momentis, sed opportunitate Principibus utilem esse; ipsis in primis Gallis, qui ex ea urbe gradum sibi ad ipsum in regno Neapolitano opprimendum facere quæsierint: implicandos igitur Gallos Genuensibus molestis; quæ illos à consiliis regni Neapolitani petendi, quod aperte præferant, avocent: ridiculumque esse ipsum Ferdinandum à Petro, tamquam execrabili odio Alphonso parenti invisus fuerit, abhorreret: animos enim Principum, ac res publicas gerentium, magna negotia tractantium, rationes imperii atque utilitatem publicam conjungere & disjungere: cum ratione igitur temporum mutata, mutanda quoque esse consilia: magna ratione tum Petrum regiæ Aragonensi invisum, ac bello persequendum fuisse, majore nunc eundem amplectendum ac sustinendum. Probato consilio, Ferdinandus per litteras suas peramanter scriptas omnes regnorum suorum opes ad Petrum prolixè defert: perpetuumque illius patrocinium sese ex eo tempore suscipere confirmat, quod numquam sit deserturus: haud exiguaque pecuniæ vi ad illum missa, hortatur & postulat, ut omnibus viribus connisus Gallos Genua expellere studeat: si id assequi in præsentia non possit; illos certe quam acerrimo bello distineat.

Enimvero Petrus non procrastinat, hyemeque A. C. nondum plane exacta, insequenti anno, qui fuit 1459 ejus sæculi quinquagesimus nonus, copiis quantis maximis, equestribus & terrestribus, potuit coactis; Joanneque Philippo Flisco, suas & ipso odii causas cum Gallis habente, magnamque clientium manum secum trahente, sibi adjuncto, ex opido Novis movet: Apenninoque superato, in pago, ac colle Albario amoenissimis hortis & villis frequenti, qui distat ab urbe haud plus quingentos passus, castra locat. At Joannes, quamquam ardentia omnium ordinum atque ætatum odia in Petrum prehenderat; contra summa in Gallos studia, neque à militibus omnino imparatus esset: tamen urbanam ac sellariam maxima ex parte multitudinem haud temere veteranis atque equitibus objiciendam ratus, moenibus se continebat; quamquam levia prælia, quæ quotidie inter milites suos erumpentes & Fulgosianos nullo magno discrimine mittebantur, non magnopere prohiberet. Petrusque Fulgosius ac consiliorum consortes hostes patriæ ac Regis Gallorum judicati & pronunciati sunt: neque tamen, bello moenibus ipsis insistente, exterarum rerum cura omissa; auxiliumque Mitylenæ Domino adversus impetum Turcarum insulæ imminentium mitti decretum est: Prætorique imperatum, ut contumaciam Georgii Carretti unius ex Marchionibus Finarii Reipublicæ fiduciarii, qui Cessanum Ingaunensis diocesis opidum invasisset, justis poenis afficeret: item obviam eundem temeritati Pauli Dentuti decretum est: qui nomine præfecti, Magistratus injussu, sibi privatim adscito, re mali exempli, naves capere atque alia hostilia facere cœpe-

rat: quæ tamen omnia lente administrata sunt, majoribus occupationibus urgentibus: illud Reipublicæ fructuosum fuit, induciæ cum Rege Anglorum in quadriennium factæ, qui, nonnullis controversiarum causis cum Genuensibus sibi intercedentibus, mercatores illius nationis retinuerat, cum magno commerciorum detrimento.

At Joannes, omni animi contentione in sese muniendo adhibita, primum Petrum Aicardum Portumauritianum cognomento Scarincium cum duabus triremibus piraticam facientem, virum strenuum, ac non exiguo usu & scientia navalium rerum, stipendio conducit: simul à Rege Galliæ impetrat, ut Rainaldus præses Hastensis cum delecta trecentorum equitum ala, quam habebat, rebus Genuensibus laborantibus subsidio veniat: utque Renatus Rex ex Provincia Narbonensi florentem trecentorum equitum cohortem ad se mittat. Cum ad apertam vim omnia diligentia Andegavensis essent clausa; Petrus suarum artium memor animum in omnes partes versari: nam modo luce ac palam copias urbi admove, modo silentio noctis scalas ad moenia erigere, modo speciem urbem invasuri præbere; nullam denique nocturnæ aut diurnæ quietis partem, subitis consiliis suis, obsessis dare; si forte tædio laborum, atque assidua vexatione labefactare obstinatos animos posset: adversus quæ omnia invicti Genuenses steterunt; nullusque motus umquam in civitate factus est, odio Petri inveterata Factionis studia, raro admodum exemplo, vincente: quem omnes auribus adspernabantur, animo respuebant, verbis tamquam pestem patriæ ac facem omnium malorum execrabantur: ceterum, cum fama percrebesceret præsidem Hastensem cum prævalida equitum ala appropinquare; Petrus, ante subsidii adventum, dimicatione ultima urbem tentandam decernens, copias propius moenia admove, occasiones captans rem prælio committendi: cujus rei nullam facultatem faciebat Andegavensis missilibus Fulgosianos ex moenibus incessens: quo tempore Joannes Philippus Fliscus ætatis ardore provectus, simul vana cupiditate ostentandarum virium elatus, dum moenia incaute propius subit, ictu colubrinæ concidit; in castraque inter manus relatus, paucis post horis exspiravit: cujus mors omnia evertit: seditione enim castra nonnihil agitari cœpta sunt: nam Orlandus & Ubertus Flisci Joannis Philippi fratres, simulque Jacobus fratris filius, ne ipsi quidem satis inter se concordēs ab exercitu discesserunt: quos haud exigua militum pars, simul magna Ligurum multitudo, quos auctoritas Joannis Philippi in castra traxerat, secuti sunt: quare Petrus, exercitu imminuto, non se tuto ibi esse intelligens, silentio noctis castra retro movet; insulamque Sigestri cum arce imposita non satis defensoribus firmatam primo adventu capit: indeque Clavarum petit, opidanosque blandis verbis ac promissis ad suas partes traduxit.

Interea Rainaldus præses Hastensis cum equitum ala Genuam venerat: qui tamen, cum obsidione soluta nullus jam sui usus esset, finisque stipendiorum appeteret, itinere retro converso, in sua se recepit: at Genuenses, decem triremibus ac duabus corbitis continuo comparatis & instructis, Joanne Cossa è Proceribus provincialibus præfecto, ad loca per tempus belli ab exsulis occupata recuperanda cum hac classe ac cum terrestribus copiis contendunt: exiguoque certamine primum arx portus Delphini, ac deinde opulentum opidum Clavarum, postremo insula & arx Sigestri recuperatae sunt. Petrusque res perditas cernens, exercitu dimisso, sese Novas recepit, haud diu quieturus.

Unum restabat ad reliquias belli conficiendas, urbs Naulum, quam Joannes Carrettus Marchio Finarii per hæc belli tempora occupatam valido præsidio

dio tenebat: ceterum, cum is esset urbis situs, ut aditus subsidio introducendo intercludi non posset; à re ardua in praesentia abstinendum decretum est: verum quod humanis consiliis desperabatur, ut ea urbs eo tempore recuperaretur; id casus fecit: duodecim enim triremes Aragonenses, Villamarino praefecto, per ea tempora venerunt, omnia circa Liguriae littora excursionibus & latrocinii late infesta facientes: cumque frumentandi causa portum Naulensem subiissent; Genuenses, recognita, Villamarinum aggredi statuunt: ceterum ut hostem celarent; urbis portis obseratis, itineribusque stationibus incesis; viam commitantibus in eam partem claudunt: ipsi interea, incredibili adhibita diligentia, decem triremes brevissimo temporis spatio comparant & instruunt: quae media nocte portu solvunt, secundaque navigatione usae, nondum satis certa luce, in conspectu Villamarini fuerunt: qui re improvisa atque ab omni expectatione longe remota vehementer percussus; cum subita confusio animi neque numero hostilis classis recensendo, neque ulli cogitationi omnino locum daret; funibus ancorarum extemplo incisis, sese ex portu repente proripuit; trepidaque fuga altum petens sese periculo eripuit: qui idem pavor cum ad animos praefidiariorum Finariensium mansisset; Genuenses portum Naulensem sine certamine ingressi, praefidiarii metu obtortentibus, urbe & arce sine certamine potiti sunt.

At Andegavensis, rebus Genuensibus pacatis, civitateque in tranquillum redacta, omnes cogitationes in regnum Neapolitanum, quod tum illi caput curarum erat, convertit: qua in re omnia Genuensium in illum grati & memoris animi publice & privatim officia constiterunt, decem triremibus ac tribus corbitis cum trimestri stipendio illi decretis; ad hoc ingenti auri pondere donato, (sexaginta enim millia aureorum nummum fuerunt) immani, ut illis temporibus, summa: nec minori summa a compluribus privatis civibus certatim atque ultro offerentibus se, ac liberalitate sua desiderio Joannis occurrentibus, mutua accepta: praeterea audiebatur, Renatum parentem duodecim triremes Massiliae comparare, quas ad filium mitteret: exieratque fama, ipsum Regem Galliae omnibus regni opibus Joanni adesse decrevisse. Harum omnium classium summus praefectus creatus est Joannes Costa: jamque Genuam venerat Ludovicus Valla gubernator Regis in locum Joannis succedens.

Quibus apparatibus cognitis, vehementer percussus Ferdinandus, ut novo negotio exhibito cursum Gallorum tardaret, magna vi auri Petro Fulgoso missa, illum, ut ad patriam amissumque principatum repetendum sese quamprimum compareret, hortatur. Non procrastinat Petrus: haud contemnendisque copiis extemplo corrogatis, Apennino superato, in vallem Porciferæ descendit; propeque ab urbe quattuor millia passuum confedit. Eadem diligentia eademque defensionis ratio, quae in superiore impetu Petri cohibendo, ab Andegavensi inita est; muris valido praesidio firmatis, magnoque sagittariorum numero completis. Angi Petrus, autumnus appetente, ac vereri, ut fluvio Porciferæ autumnalibus imbribus intumescere, ipse in illis locis diutius esse posset: ad hoc intelligere, si tempus stipendiorum exiret; milites ad signa retineri non posse: omnia igitur quamvis praecipitia, modo celerrima essent, consilia sibi amplectenda statuere: verum cum ab exploratoribus pro re certa comperisset, omnia loca in urbe intentissimae & artissimae custodiae esse; inops consilii, unde initium invadendi faceret, circumspectare: opportuna fuit consilii classis à portu profectio, ad naves Ferdinandi, quae ad portum Liburni stare dicebantur, persequendas: quae cum inaniorem praesidiis urbem fecisset; Petrus haud cunctandum in oblata occa-

sione ratus, dimidio mense Septembri circumacto, silentio noctis moenibus appropinquat; parteque copiarum in virgultis & vepribus circumjecta vestientibus in infidiis collocata, ipse moenia circumvehitur, omnia oculis intente circumlustrans: cum custodum voces exciperet somni & lassitudinis indices, toto exercitu raptim magnoque cum silentio moenibus admoto, scalisque erectis, cum magno audaciorum militum numero in urbem transcendit; custodibusque partim dormientibus, partim semisomnis obruncatis, cum nullus sui sensus in urbem penetrasset, proxima portula refracta, omnes copias in urbem introducit; proximumque collem, qui Petrae minutae vocatur, armatis complet: quo trepido nuncio Andegavensis vehementer primo percussus, ac nimis propere classem urbe emissam dolens, tamen celeriter collecto animo, non deserit se; sed armis repente arreptis, omnibusque, quos circa se habebat, armatis, atque omnibus opportunis urbis locis praesidiis firmatis; ipse cum suis stipendia facientibus, magnoque civium omnis generis globo, qui ad eum convenerant, in hostem pergit; atque extra septa interioris muri (duplici enim muro Genua cincta est) in vasta area, cui ab altera parte imminet collis Petrae minutae, is ipse, quem infederat Petrus; ab altera collis, in cujus cacumine arx Castelletum est, acie instructa constitit, conatus Petri expectans; ut ex illis ipse consilium caperet: totaque nox ita traducta est; cum missilibus tantummodo eminus mutuo se incesserent, nemoque se loco moveret; ejusdemque rei expectatio illinc spe, hinc metu animos Ducum versaret: sperante Petro Factionis suae homines favore exercitus jam in urbem introducti tutos motum tandem excitaturos, atque ad arma consurrecturos; idemque Andegavensitimente, ac mobilia multitudinis ingenia formidante: cui rei ut, quantum humana providentia posset, occurreret, Paulum Adornium, qui erat in proximo, triremi ad eum missa, propere accersit, ut nomen adversae Factionis Petro opponeret: lux orta pugnam, quae ad eam horam segnis fuerat, irritavit; acriterque dimicabatur, cum collis Petrae minutae percommodus esset Petro; Andegavensi contra arx Castelletum imminens tutelae esset: sub quam, cum à Fulgosiensibus numero superioribus premebatur, se recipiebat, intra septa interioris urbis muri suos subducens: cui cum multi auctores essent, ut sese in arcem ipsam recipiens, saluti consuleret; degener consilium auribus & animo adspersus est, cum magna vocis & vultus contentione respondisset, non eo adhuc res adductas, ut tali consilio locus esset; oreque alacri & erecto certam victoriae fiduciam praeferret. Longe alius habitus animi in Petro fuit, moerente & ingemisciente, Factionis ipsius Fulgosiensium homines ita à se alienatos; ut nullo metu ipsos cohibente, ne ullus quidem vel minimus motus in civitate fieret: qui moeror crevit, cum auditum est, in urbe nomen Adornium clara voce subijci; triremisque portum subiens conspecta est, quam Paulum Adornium vehere fama exierat: secum igitur reputans, illud sese tantorum consiliorum apparatus affecutum, ut pro eo ut amissum principatum recuperaret, in eum inimicos suos, adversaeque Factionis principes à se toties expulsos induceret; remque ad iniqua inclinatam cerneret; in rabiem versus, atque ad omnia praecipitia paratus in inferiora descendit: ac cum delecta manu portam sancti Thomae petit, eo consilio, ut, illa occupata, ac valida statione firmata, novoque praeside Ludovico ex adibus, in quibus subliterat, dejecto, ac nemine hoste post terga relicto, ipse deinde omnibus copiis Andegavensem invaderet; remque communi Marti decernendam daret: sed spe frustratus est: Ludovicus enim cum firmam delectorum manum circa haberet, magno animo sese illi opposuit; acriterque praelio commisso,

illum tandem avertit: qui ad suos rediens, cum interiori muro appropinquasset, portamque, quam Vaccarum nominant, patefactam ac sine statione vidisset; subiit animum impetus interiorem murum cum paucis illis, quos secum habebat, intrandi, indomita cupiditate omnia quamvis periculosa tentandi, si forte ipse intra urbem ipsam interiorem tamquam victor conspectus segnitiam Factionis suae hominum excitaret: quare porta praesidio equitum firmata, quibus Massinum fratrem & Galeottum patrualem praefecit, dato mandato, ut nulla quamvis gravi de causa locum commissum defererent; ipse cum paucis interiorem murum ingreditur: ceterum, qui portae custodiam relictis sunt, siue maiore superveniente vi abacti, siue cupiditate praedandi abducti, simul atque Petrus discessit, portam deferuerunt: quam hostes valida statione è vestigio firmarunt: nec major constantia aut fides in comitibus fuit; à quibus fere omnibus est desertus, isque solus cum tribus equitibus mansit: quem ex insigni cono superposito agnitum Cossà insequi institit. At Petrus ad extremam desperationem adductus, animo agitare quemadmodum discrimini se eriperet: quare equo concitato, iter in averfam portam urbis, quae spectat in Orientem, Hircorum vulgo appellatam, intendit; si forte per eam patentem se ex urbe proripere posset: quam rem aggressus est magis inopia potioris consilii, quam effectus spe: cum ad portam pervenisset, eamque clausam invenisset; equo circumacto iter retro vertit, ignarus quo tenderet, aut quam partem urbis peteret: cum aliquantum processisset, duplicem ictum ferrei fustis à Cossà, qui numquam illum omiserat, in capite accipit; eodemque tempore ingentibus ac crebris lapidibus ex summis aedibus in illum devolutis percussus equo dejecitur; captusque ac semianimis inter manus ab hostibus ipsis spectaculo laetis in aedes publicas deferitur; in quibus paullo post exspiravit: cuius exanime corpus à multis hostili odio in illum efferatis pugionibus confossum est; iram acceptarum injuriarum, quando in vivum non potuerant, in mortuum expromentibus. Hoc miserabili exitu Petrus Fulgosius cursum vitae in inimicis & adversariis exercendis, à quibus ipse quoque exercitus est, perpetuo positum terminavit: in quo viro haud facile statuas, utrum naturae & ingenii bona, quibus nemo omnino ea aetate instructior fuit, plus habeant admirationis, an pravus illorum usus vituperationis.

Petri morte audita, ejus copiae subito dilapsae sunt; peditumque exigua pars partim è moenibus se demittentes, partim per portulam, qua urbem intrant, se proripientes, salutem fuga expedierunt: maxima pars aut capti, aut caesi: equitatus omnis captus est: in illisque Massinus Petri frater, & Orlandus Fliscus, ac Sigismundus Brandolinus, qui alienigena in custodiam datus est: de Fulgosio & Flisco, quod Genuenses cives essent, tamquam majestatis & perduellionis reis atque hostibus Regis, capitale supplicium sumptum. Occupationibus Genuensium rerum defunctus Andegavensis, mense Octobri à Genuensi ora solvens Neapolim proficiscitur; spem hominis alentibus magna Procerum Neapolitanorum parte: à quibus occultis consiliis evocabatur: in quibus princeps fuit Joannes Antonius Princeps Tarentinus, is ipse, qui superioribus annis Andegavenses expellendi Alphonsi accessito se auctorem palam professus erat; siue vitio ingenii, parum stabilis fidei ac mobilis animi vir fuerit; siue Ferdinandi injuriis ad novorum consiliorum necessitatem subactus sit. Varia in eo regno repetendo fortuna usus est Andegavensis: cum initia laeta fuissent, ac magnam partem regni recuperasset: ceterum exitus tristis fuit: à Ferdinando enim regno exterminatus est, atque omnibus, quorum

potitus fuerat, fere exutus: qui cum in insulam Ischiam, quae Aenaria Veteribus fuit, se recepisset; decem triremibus à parente submissis consensu, sexto post anno, quam in Italiam venerat, Galliam repetit; Genua quoque urbe à Gallis, ut mox scribemus, amissa.

Petro defuncto, atque exsilibus contusis, infestis A. C. 1460. quentis anni initio ejus saeculi sexagesimo octavo annuæ ab externis & urbanis motibus fuit: quod tamen leviter laceffitum est à Ludovico Fulgosio nonaginta librarum millia sibi debita poscente; & à Scarincio pirata, cujus paullo superius meminimus; qui excursionibus & latrociniiis infestum circum mare faciebat: & aliquam viam rei cum Fulgosio componendae ineundam esse, & audaciae piratae, majore classe in illum emissa, obviam eundum, decretum est: ad hoc arces opidorum Mulazanæ, Camulii, Stellæ, Petrae, jussu Magistratus dirutae sunt: quæ nulli rei, quam pecuniis absumentis essent: ceterum hæc leviora erant: illud malum propius erat, atque animos civium magis angebat; assiduum tributum, quod è privata re conferendum erat, in extrema aerarii inopia, tot sumptibus in præterita bella factis exhausti: quæ tributa affectam familiarem brevi confectura essent: quæ res magna incendia excitavit, magnorumque motuum & tumultuum causa fuit; magnisque discordiis, contentionibus, postremo dimicationibus civitatem involvit, ut numquam Reipublicae tempora turbulentiora, aut duriora fuerint; majoribusque molestiarum tempestatibus jactata: defixerant animos cives in cogitationem hujus mali vel extinguendi, vel levandi: aliusque aliud, pro se quisque, in medium afferre, nonnulli censere immunitates tollendas: magnam in eam Reipublicae levationem fore: ceterum frequentius in eam sententiam ibatur, nullam aptiorem & expeditiorem esse viam difficultatis nummariae expediendae, quam aut nova portoria instituere, aut vetera augere. Enimvero plebs acriter resistere, ac clamare, nihil aliud hoc esse, quam onera publica à divitibus in pauperes inclinare: non ferendam tantam injuriam: quin etiam, si quis in judicando aequitatem adhibeat, totum contra esse debere; onerum enim publicorum plebem expertem esse omnino oportere; quæ ab honoribus & commodis publicis exclusae sit, nullaque in re Reipublicae particeps: penes eos igitur onera esse debere, penes quos emolumenta & commoda sint: simul Vicarium regum orare, ut sui patrociniū fusciperet; ipsosque ex hiantibus faucibus divitum & potentiorum extraheret.

Cum res assiduis contentionibus agigaretur, quotidieque consilia haberentur sine ullo fructu; plebsque contumacior in dies fieret, ac minaciter magis quam suppliciter ageret; ipsa quoque à praesidio suis congregata est. Turbulentum id consilium maxime fuit: ac clamoribus & querelis in divites & potentiores consumptum, dum acerrimus quisque potius principum civitatis avaritiam & ambitionem, tum autem animum plebi perpetuo iniquum lacerat; quam quidquam salutare in medium consuluit. Tandem adolescens quidam infimae sortis, *Quid opus est, inquit, tot consiliis & disputationibus; in quibus adversarii nostri semper superiores erunt, nosque artificii suis ludiscabunt? nostra certamina, non disputationes, aut verba, sed arma & gladius decernant: seque continuo ex loco, in quo congregati erant, proripit, atque ad arma conclamat: qua voce exaudita; in suburbio sancti Stephani, quod intra pomerium exteriore muro receptum magna civitatis pars est, novandarum rerum cupidi (qui magnus numerus fuit) extemplo armis captis in publicum profiliunt: portamque divi Andreae, ac turres illam utrimque communientes validis stationibus firmant: clamantes, non sese contra regum dominatum, sed ad injurias à se arcendas arma sumpsisse. At regius Vi-* ca-

carius incitatos plebis animos potius miti oratione flectendos, quam, obviam armis eundo, (ut multi illi auctores erant) illorum iram magis irritandam ratus, vanum id consilium expertus est; multitudine armatorum in horas crescente, seditioneque majores vires paullatim assumentes: ut insequenti nocte ii omnes, quos luce ac palam ad arma ire pudor prohibuerat, in armis omnes fuerint: Vicariusque regius tantæ multitudini armatæ cedendum statuens, in arcem cum suis se recipit: at primores civitatis, omnesque boni & quieti studentes cives non deserunt Rempublicam; sed plebem circumeuntes, ut sibi adversus singulos aliquid juris erat, prehenfare; sermones temporis aptos serere; orare, ut averterent parumper ab ira animos: quid tandem illos ex seditionibus & tumultibus querere præter patriæ communis interitum? quæ cupiant, eadem omnia cum bono publico impetraturos; si se Regi sinant, ac salutaria auribus admittere possint, ipsismet enim disceptatoribus, si modeste agatur, rem transactum iri.

Flectere cœperant animos, resque ad pacificationem spectare videbatur; cum ecce Paulus Fulgosi Archiepiscopus civitatis, Petri frater interfecti, & Prosper Adornius urbem ingrediuntur; quorum adventus spem bonorum ac procedentia consilia evertit: magni enim armatorum concursus subito ad utrumque facti sunt; ut studia Factionum plebem ac rerum novandarum cupidos ad sua quemque capita suosque Duces aggregabant: acriusque prælia in compluribus urbis locis commissa sunt. Terrebat in primis Nobilitatem ac principes civitatis omnesque quietos cives Pauli ingenium non minus vehemens ac fervidum, quam Petri fratris; ad hoc infinita ambitio, regnandique impotens cupido; præ qua omne jus, fas, pudor, religio apud illum levia essent: præterea animus immitis, tantis injuriis læsus, ac lædendi cupidus: facile autem esse hominem evertere, Prospero sibi adjuncto: cum quo non minoribus ipso per se Adornianæ Factionis opibus subniso, si Nobilitas ac Vicarius regius vires suas jungerent, illico Paulum triplici machina oppugnatum ruere necesse fore. Negotium sibi deposcit gens Spinola, Prosperum in causam traducendi: cum quo complura privatæ necessitudinis atque affinitatis quoque jura sibi intercedebant. Occultis igitur colloquiis, nunciis inter Prosperum ac Vicarium ultro citroque commeantibus, agi cœptum: quæ cum sensisset Paulus noctu clam urbe excedit, in qua non se tuto esse intelligeret; atque in proxima montana concedit, eventum expectans. At luce orta Fulgosiæ Factionis homines circumeuntes plebem sedulo monere, caverent à Nobilium artificii; qui nihil aliud simulatione pacificandi agant, quam ut, Prospero ad se attracto, Fulgosiæ Factionem urbe expellant: quæ exacta, Adornianam quoque non minus invisam exterminaturos; civitatemque Gallis subjecturos, qui in miseram plebem omni præsidio nudatam omnia inhumanæ crudelitatis exempla edituri sint, quæ adversus regium dominatum arma sumere ausa sit: quod illi facinus tamquam ad divini Numinis læsi crimen revocare soliti sint. Qua oratione plebs incitata, armis iterum sumptis, seditionem integrat: consiliumque universæ civitatis convocatum est, quod omni genere hominum ac sordidorum opificum promiscuum fuit. Ibi octo opificibus sellulariis lectis, penes quos regimen rerum & totius civitatis esset, arx oppugnari decreta: ceterum longe majora momenta ad res miscendas fuerunt in Pauli Fulgosi astu & consilio, qui interea non deseruerat se, nec segne tempus triverat; re ardua tentata & ad effectum perducta: per nonnullos enim suæ Factionis homines, qui in urbe substiterant, ad ejusmodi negotia ducenda in primis idoneos mo-

nere Prosperum cœpit, caveret ab insidiis Nobilium: errare enim illum, si putet, Nobiles perpetuos Adornianæ & Fulgosiæ gentis, atque implacabiles hostes quidquam secum sincera fide agere: popularis enim nominis odio, quod primas auctoritatis partes in urbe obtineat, summo principatus loco concessio; omnibus curis semper in clarissimas duas has gentes Adorniam & Fulgosiæ, quarum opibus & potentia popularis dignitas innisa stet, premendas & extinguendas fuisse intentos: cui consilio ipsarummet familiarum discordias, quæ Nobilium artificii salantur, ipsas opportunas facere: respiciendum aliquando, ac studia & vires adversus communes hostes conjungendas, causam enim, quæ una unanimes distingere videatur, præcidi facile posse, si modo uterque in suam perniciem obstinatus esse nolit: ac, quoniam tot annorum usu didicerint, summum principatus locum, in quem utraque familia tendit, neque societatem admittit, in alterutra tantum esse non posse; transigi rem facile posse vel alterno imperii usu, vel aliqua salutaris inita ratione. En sese, quoniam alterum alteri cedere necesse sit, initiumque ab altero eorum fieri, ducatu cedere illi paratum, summo in sacris rebus loco contentum. Prospero facile in sententiam tracto, extemplo ambo urbem repetunt; ad quorum adventum octo populi rectores illico se magistratu ac mandato munere abdicant, & in privatas domos concedunt: consilioque civitatis convocato; Paulo principe, ac tota Factione Fulgosiæ haud minus quam Adornianæ acriter pugnantibus; Prosper frequentioribus quam ullus ad eum diem suffragiis, Genuensium Dux renunciatur.

Igitur Gallis civitatis principatu dejectis; unum opus belli restabat arcis expugnatio: quæ situ & opere ut ea ætate in primis munita, magni ac diuturni certaminis, magnorumque impendiorum erat: ad hoc civitas cum tam potente Rege haudquaquam parem contentionem sibi esse intelligebat: ceterum rem necessariam, ac per omnia ardua & desperata tentandam & ad effectum perducendam statuebant: primum igitur, cum pecuniæ nusquam aliunde erogari possent, tributum à civibus morientibus quidem animo ac gementibus, ceterum dolorem comprimentibus, severe exactum est: postulatque à Francisco Sfortia, ut, quoniam Gallos possessione Genuæ & Liguriæ expelli, quæ Italiæ claustra & ostium sit, non minus è re ceterorum Principum, ipsiusque in primis Francisci, qui omnium proximus incendio sit, quam Genuensium ipsorum sit, in arce expugnanda sibi ope sua adesse ne gravetur. Respondet haud retractanter Franciscus, sese Genuenses in tam sancto negotio libertatis suæ tuendæ, & duri Gallorum jugi discutiendi, nullis umquam opibus suis deserturum: multæ autem eæque non leves causæ Franciscum ad subitum consilium accipiendum induxerunt: primum, quod accolas Gallos abominabatur; deinde quod Ferdinandus, cui cum Gallis apertæ inimicitie intercedebant, cujusque idcirco partes causam Genuensium suscipiendi præcipuæ fuerant, bello domestico, eoque peracri implicitus, neque externa respicere, neque sese novo negotio onerare poterat: ad hoc occultis consiliis à Ludovico Caroli filio apud Burgundium exsulante, cum quo occultam societatem junxerat, in parentem secum discordem assidue instigabatur; atque ad illum simul & Andegavenses Genuæ expellendos incitabatur. Iis de causis Franciscus magnum auri pondus ac mille delectos pedites Genuensibus submittit, Thoma Raitino Duce: cui duo mandata in primis dat; alterum, ut in expugnationem arcis omni ope incumbat; alterum, ut inter Prosperum & Paulum concordiam, qua una omnia continerentur, tueri studeat.

At Genuenses pecuniis & copiis aucti, oppugnatione-

tionem arcis sedulo instituere incipiunt; aliquot bombardis majoris formæ fabricatis: viasque proximas in arcem ferentes transversis ductis muris obstruunt; ut improvise in urbem irruptiones obsessis clausæ essent: qui non solum arcem tenebant; sed subjectam quoque ædem, ac per amplum cœnobium divi Francisci, quod proximum arcis ac prope continuatum est, delecta trecentorum armatorum cohorte firmarant: quotidianaque prælia ad munimenta inter Gallos & Genuenses, qui arcem undique copiis suis circumfederant, committebantur: cum non modo sagittis, sed bombardis quoque dimicaretur: ceterum, cum inceptum oppugnationis non procederet, consilia ab obsidionem versa sunt: parsque copiarum, cum tantus numerus ad obsidionem supervacaneus esset, ad urbem Saonam recuperandam missa est: quæ brevi, irrito incepto, ne ulla quidem re tentata, redierunt; cum Patriciorum Genuensium, quorum ingens multitudo in eam urbem se subduxerat, ad quorum auctoritatem Saonenses sese adjunxerant, fidem in Gallorum Regem constantem ac stabilem; & urbem præsidii & omni apparatus & com meatuum genere assatim firmatam offendissent: ceterum Genuæ longe durior erat obsidentium quam obsessorum conditio, quippe obsessi arcis mœnibus tecti ex tuto pugnant: at obsidentes ictibus obnoxii vulnerabantur, multique cadebant: quotidieque exanimatorum corpora inter manus, miserabili adspectu, ante oculos propinquorum & cognatorum deferebantur. Illud autem erat in primis horribile, quod Galli ex arce continentibus bombardarum ictibus subjecta ædificia petebant: ad hoc ingentis ponderis saxa ac durioris quoque materiæ immanes globos è machinis, quas ingentes & crebras statuerant, in sublime intorquebant: qui magno impetu ex alto in ædificia incidentes, non modo summa tecta perfringebant, sed in inferiora quoque tabulata penetrabant; magnasque edebant trabium & murorum strages: ex quarum resilientibus fragmentis multi exanimabantur: longe autem ærumniosior erat pavor, quam damnum ipsum; quippe ille ad omnes, hoc ad paucos pertinebat: nam, cum tormenta nullum certum aut destinatum urbis locum peterent, sed passim omnes partes civitatis incertis ictibus incescerent, ac propterea nullus esset tutus ab illis locus, fiebat, ut singulorum animi expectatione incertæ & inevitabilis pestis tamquam in ipsorum cujusque capita casuræ pavore prostrati, inter vota & gemitus jacerent. His malis accessit ipsorum rerum capitum paullatim gliscens discordia; quam inter illos delatores & obrectatores, quorum plena erant omnia, ferere non desistebant: cui malo Dux Mediolani à Legato suo certior factus occurrens, continuo Paulum ad se Mediolanum evocat. Prosper se ab intestinis insidiis liberatum censens, majore diligentia & contentione obsidionem pergit urgere.

Interea Carolus, defectione Genuensium & obsidione arcis audita, haud contemnendas copias, quas subsidio suis mitteret, in Delphinatum contraxerat, nec numero exiguas (sex enim millia sub signis fuerunt) & genere longe firmissimas; in quibus magnus loricorum equitum numerus fuit. Eodemque tempore Renatus Rex Andegavensis decem triremes Massiliæ compararat & instruxerat: quam classẽ præter navales socios ipsemet cum mille delectis militibus, quos in terram exponeret, conscendit: cum quibus copiis Renatus mari, Dux terrestris exercitus terra, è Gallia movent: qui ambo quarto, post defectionem, mense Saonam convenerunt, à Genuensibus civibus, quos in eam urbem concessisse diximus, honorifice atque omnibus lætitiæ significationibus excepti: qui cum biduum Saonæ reficiendi à præteritis laboribus milites causâ substi-

tissent; Genuensium civium clientibus ac nonnullis etiam stipendio ab eisdem conductis sibi adjunctis, maritimum & terrestre iter Genuam intendunt; Varagine opido sine certamine in itinere capto.

At Genuæ quamquam initio motibus Gallorum auditis, suadente Francisco Sfortia, pecuniisque adjuvante, Marcus Pius Dominus Carpenfis cum egregia equitum ala in urbem introductus fuerat, tamen hostilibus copiis tam propinquis, magna trepidatio fuit: civibus secum reputantibus, quam non suarum virium esset dimicatio cum tanto Rege terra & mari urgente: cum ne ipsæ quidem ipsorum vires totæ integræ apud ipsos essent; sed magna nobilium & primariorum civium pars ab hoste staret, ejusque partes & castra sequeretur: augebant terrorem duæ res; altera Renatus ipse Rex præsens; qui profecto, nisi magna & explorata prope spe, personam suam numquam bello & castris commisisset; altera genus ipsum hostium, quos ferebat fama homines esse diuturna assuetudine armorum duratos ac feroces; ad hoc ingenio immites, ad facinus pronos, avidos sanguinis, victisque implacabiles.

At Dux Mediolanensis non minus, quam cives ipsi, de exitu rerum Genuensium sollicitus, quæ regnum suum, rerumque suarum statum haud leviter attingerent, Paulum Fulgosium, cujus ingenium vividum ac sagax, operamque fortem atque impigram magno usui laborantibus rebus fore intelligeret, Genuam remittit; multum prius monitum, ut concordiam cum Prospero coleret, in qua omnia duarum harum clarissimarum familiarum posita essent. Cum Paulus fassus vera loqui Ducem, quantum suum semper fuerit concordiae studium, illud argumento esse, respondisset, quod ipse neque à Duce, neque ab ullo mortalium monitus suo opte ingenio inductus sponte Prosperum ad illam invitarit & adduxerit: in ea mente se manere constanter, ac perpetuo mansurum: ceterum alienam voluntatem se præstare non posse: vereri se, ac semper veritum Prosperi parum stabile ingenium atque aures delatoribus pervias: qui falsa veris miscentes discordiarum causas ferere, atque omnia inter ipsos suspiciosa facere non desistant: se quidem, urbanorum artificiorum ac forensis fuci gnarum, ad illis resistendum animum obfirmasse: at ne Prosperum pervertant periculum esse; quem in fide & constantia retinendi ipsius in primis Ducis partes esse: atque ita dimissus à Duce, Genuam venit; comiter & hilariter in speciem vultu à Prospero acceptus. Primum consilium fuit, pecunias per æqua & iniqua cogere; iis, quæ Mediolano submissæ fuerant, ad tantum bellum haudquaquam suffecturis: ceterum, cum tributum à civibus injussu Magistratuum exigere non posset, quæ res magni moliminis ac diuturni tractus erat; Prosper rem novam ac pessimi exempli ingressus est: triginta enim longe primarios cives, tam ex Nobilium Factione, quam popularium corpore, qui divitiis excellere putabantur, in arcta custodia retinuit; cum ingentis mali comminatione, nisi Reipublicæ in extremis illius temporibus re sua familiari subvenissent: quod impotentis tyrannidis editum specimen Prospero ad nullam rem valuit, nisi ad ingentem invidiæ molem sibi ac genti suæ Adornæ conflandam: quam rem spectasse dicitur Paulus ejus consilii auctor, vir ad omnem fallaciam compositus: cum omnes constanter respondissent; sese ad omnia ultima perpetiunda potius, quam ad assem ea via à se extortum dandum paratos: qui etiam Prosper facinus facinore cumulans, duas ingentes corbitas, quæ erant in portu, dominis ablatas, Navarchis ejectis, occupavit, quas ad subita belli præsto haberet.

At Prosper & Paulus capita de ratione belli gerendi ac tantæ moli resistendi conferentes, ita mu-

munera inter se partiuntur; ut Paulus, flore juventutis, ac quicquid roboris esset in populo, simulque Sfortianis copiis, in quibus summa belli spes esset, ex urbe eductis, dorsum collis, qui à Castelletti arce ad extremum promontorium divi Benigni, quod est alterum Genuensis portus cornu, porrigitur, occuparet; ab eaque parte hosti terra ac mari invadenti resisteret: Prosper vero cum reliquo populo in urbe subsistens, quæ ad bellum necessaria essent provideret; ac motus & tumultus, si qui forte excitarentur, comprimeret: in primis Gallis ex arce erumpentibus sese opponeret. Consiliis ita dispositis, adventum hostium expectant; qui interea Varagine moventes Cornelianum usque perrexerant, qui pagus minus tribus passuum millibus ab urbe distat. Eo subito Prosper & Paulus, simulque cum illis Marcus Carpensius, cum magna populi parte ac cum equestribus copiis contendunt: ceterum hostes, contra quam sperant, instructos, atque telis intentis in se venientes conspicati, itinere extemplo retro repetito, nulla re tentata, trepido cursu in sua se recipiunt; hostium parte illos insequente, ac terga premente: qui eodem impetu cœnobium divi Benigni, ac proximos colles, nemine resistente, occuparunt: quam rem magni certaminis fore crediderant: Renatusque Rex, classe littori divi Petri ab Arena prætenta, in ancoris stetit: proque certo creditum est; si Rex porro ire pergens portum intrasset, terrestresque copiarum impetu non suppressio ad mœnia accessissent; eo die hostes urbe potituros fuisse, ac bello finem imposituros: ceterum, sive militum lassitudini de longo itinere fessorum timuerint; sive tumultus aliquos in civitate secum ipsa discorde excitatum iri sperarint, quæ res urbem sibi in manus sine certamine traditura esset; sive cives, qui in castris erant Saona profecti, metu direptionis patriæ, si illa vi & impetu capta esset, illam ad necessitatem deditionis adigi mallent; auctores ulterius non procedendi Gallis fuerunt. Hostes, castris statutis, ac tentoriis erectis, quod reliquum ejus diei fuit, ac proximam noctem totumque insequentem diem in eo loco substituerunt: quo tempore levibus ac crebris præliis inter Gallos & Genuenses certatum est: quæ Genuensibus fere secundiora animos illis auxerunt.

Biduo exacto, cœlo albescente, Renatus milites, qui erant in classe, in terram expositos, totumque exercitum ad se accersitum instructum collem conscendere jubet; ipse ex triremi eventum spectator stetit: primum agmen equites levis armaturæ, sagittariis additis, fuerunt; in media acie robur ipsius exercitus fuit: postremi gregariorum ac tironum multitudo sequebantur. Tripartita quoque fuit Genuensium acies: equitibus levis armaturæ ac sagittariis à Paulo præmissis dato mandato, ne hosti appropinquarent; sed missilibus procul illum incesserent: ipse cum robore urbanæ juventutis ac Sfortianorum militum in medio colle constitit; ut iter hosti ad arcem interrumperet: reliquam collectitiam turbam in circumpositis collibus disposuit; qui clamoribus & crebris incursionibus latera exercitus petentes, hostem potius terrarent, quam prælio tentarent. Prosper quoque haud otiose cessans res in urbe ita instruxit: nam partem urbanarum copiarum, quas retinuerat, in maritima loca & ad extremas urbis crepidines adversus classem regiam distribuit; partem adversus eruptiones prædianorum arcu opposuit, ipse cum delecta armatorum manu ad ædes publicas constitit; ex quibus, ubicumque usus & eventus rerum postularent, occurreret; cum recentes commeatus atque omnia, quæ ad reficiendos milites in colle pugnantes, ubi moles belli constiterat, summaque rerum vertebat, pertinebant, assidue

A Paulo submitteret: inter quem & Gallos acre certamen interea contractum erat; cum Galli primo impetu, conscenso colle, planitiem quandam occupassent, turba sagittariorum fugata: quæ pugna atrocior subinde fiebat, copiis semper crescentibus; cum Gallis multa essent adversaria, primum iniquitas locorum, Genuensibus superiora loca obtinentibus, cum ipsis in adversum enitendum esset: ad hoc Genuenses, recentibus copiis in fessurum locum succedentibus, vividiores semper & alacriores pugnam integrarent: cum contra Galli diuturno itineris & prælii labore fessi, cui eisdem paucitas copiarum, nullis recentibus supplementis refecta objiciebat; ad hoc æstu & siti confecti, cujus ea gens intolerantissima est, animis & corpore deficere incipiebant. Cum pugna, spe neutro inclinata, ad meridiem producta esset; repente forma illius mutata est: nam Galli omnibus viribus connisi cacumen proximi collis occuparunt; quod cernens Paulus, ne supernis illorum ictibus subiceretur, ipse quoque alterius collis fastigium, pari altitudine è regione oppositum occupat: quos Galli bombardis ac colubrinis, quarum magnam vim habebant, è colle dejicere contendunt. At Paulus, munitione subito adversus earum ictus excitata, ipse contra ingentibus ballistis, ac vario telorum genere Gallos petebat; cum etiam in valle haud satis ampla interjecta cominus æquoque Marte pugnaretur: cum per aliquot horas ita pugnatum esset, fortuna vires neutro inclinante: incidit improvisa res, quæ rem ad eam horam dubiam decrevit secundum Genuenses: tres enim ordinum Sfortianorum ductores nullis cum comitibus, pugna tum ut cum maxime accensa, superveniunt, Carolus Cadamustus, Georgius Martinus, Nicolaus Epirota, viri fortes & strenui, ac longo usu bellicarum rerum clari; qui præceptis Francisci Ducis instructi, Paulo ac Genuensibus, clara voce ita, ut à propinquioribus Gallis, qui in valle pugnant, exaudirentur, nunciant, magnam equitum & peditum copiam à Francisco submissam adesse, manumque ita, ut ab hoste quoque conspicerentur, intenta, nonnullos incolas Porciferanos, quos ex composito armarant, ad exercitum tendentes demonstrant: primum agmen adventantium Sfortianorum esse mentientes: quæ res Genuensium animos mire auxit, qui ingenti clamore effusæ lætitiæ indice sublato, nomenque Ducis & Sfortiæ subjicientes, loco, ubi constiterant, moventes, pleno gradu ad hostem contendunt, illumque magno impetu invadunt: quem alacritate hostium & terrore supervenientis auxilii, ut putabat, animo infracto tandem avertunt. Ii sensim atque ordines servantes se recipientes, cum postremum agmen prælium excipiens impetum Genuensium sustineret; tandem, cum multitudo, quæ in montibus disposita erat, clamoribus sublati, ut à Paulo præceptum dicimus, terrorem addidisset; Paulusque suos ad gradum acrius inferendum hortatus, terga recedentium premens, illosque velut missilium nube obruens, in effusam ac præcipitem fugam tandem coniectos, usque ad mare magnam illorum cædem edens insecutus est: quos Renatus orantes adspersus navibus excipere recusavit; quin contra triremibus procul à littore in altum propulsis, ne milites ad eas annatare possent; magna vocis asperitate ac vultus contentione exclamavit; milites, qui ignavia prælium deseruissent, omni misericordia indignos: quare hosti trucidandi relictis, plus duo millia quingenti cæsi sunt, magnaue pars, qui inconsulto pavore in mare se projecerant, ut nando salutem expedirent, undis hausta: reliqui, qui vivi superferunt, à Genuensibus capti sunt: quæ victoria

R r

non-

nonnullo quidem sanguine stetit, compluribus fauciatis; at nulla fere cæde, quattuor omnino tantum capitibus in omnibus illis præliis desideratis: cujus victoriæ memoria anniversario solemnî die divo Alexio festo, quo parta est, celebrari decreta est.

Lætitia tantæ victoriæ partæ, ne ulla umquam quies miseræ civitati à malis daretur, intestinæ discordiæ, ac domestici tumultus continuati sunt. Prosper enim, cui elatum ac superbum Pauli ingenium suspectum semper fuisset, veritus, ne, si ille gloria tantæ rei gestæ præfulgens urbem ingressus esset, omnium oculi in illum converterentur, ac principatus, ipso exturbato, illi conferretur, ingressu in urbem Paulo interdixit. Mansuetum quoque ingenium tam atrox injuria accendisset; Paulus quidem ita exarsit, ut linguæ non temperaret, vociferans: *Hæcine mihi tanta victoria parta, ac tanti in patriam promeriti gratia refertur, ut à patria, quam servavi, Genuensis civis, nullius criminis insimulatus, causa non dicta, excludar? hancine mihi principatus illi virtute ac laboribus meis stabiliti mercedem persolvit Prosper? hoc vero ex omnium seculorum memoria unicum in me insignis perfidia atque ingrati animi à viro premortui pudoris editur exemplum? qui si virtuti & gloria mea ignavissimus ipse invidit, ne Majores quidem meos viros clarissimos, ac de patria omnibus temporibus optime meritos, in me veritus est: quid enim regnum Cypri à Majoribus meis perdomitum, ipsumque ac Regem Reipublicæ Genuensis vestigalem factum commemorem? quid Famagustam nobilissimum illius insula emporium imperio Genuensi adjectam? quid Corsicam Fulgosiorum virtute retentam, Bonifacio urbe incredibili virtutis & audacia exemplo ex Alphonso faucibus erepta? quid arcem Neapolitanam expugnatam? quid recentia optimi Ducis Thoma, ac multiplicia in patriam merita, qua tanta fuerunt, ut merito pater patriæ appellatus sit, saepeque ex urbe Sergiana, quam sibi sedem senectutis delegerat, ad principatum patriæ ultro evocatus: ut taceam Malaspinarum gravium accolarum ac fines Genuenses numquam vexare desistentium audaciam à Baptista fratre compressam? age nunc contra conferat Prosper gentis suæ in communem patriam merita; atque Adorniorum suorum facinora, qui aciem ac classes numquam viderint: tum vero ignavior ego, quam ille sum; nisi mea ac meorum dignitatis acer vindex fuero: è vestigioque Pandolphus frater scapha piscatoria conscensa, promontorio Phari superato, cum via terrestri occlusa esset, in urbem venit: quem paullo post ipse Paulus eadem via consecutus est: quibus statim imperatum est, ut ex urbe propere facerent. Sese enimvero facere non posse, respondet Paulus, quin Ducis dicto audiens sit; verum causam, quæ ipsum tanto edito in patriam promerito urbe expellat, quærere: ceterum res brevi à sermonibus ad manus venit. Bartholomæus enim Auria Lambæ filius cum duabus triremibus portum ingressus est; cumque omni turba nautica armata sese cum Paulo & Fulgosis conjunxit: quos Carolus Adornius, jussu Prosperi fratris, delecta armatorum manu stipatus adortus est; Sfortianis inspectantibus, neque se prælio immiscentibus, mediosque se gerentibus: tandem victoria penes Fulgosios fuit. Prosperque cum paucis comitibus fuga ex urbe pesti se subtraxit: cujus Fulgosis potentes facti sunt; Spinetaque Fulgosius Pauli consobrinus ipso Paulo concedente, (credo, ne ambitione inductus ea fecisse videretur) Dux silentio creatus est.*

Insequentî nocte Ludovicus Valla Vicarius regius arce excessit, classemque Renati conscendit; arce prius Ludovico Fulgosis tradita, qui initio horum motuum ex urbe Sergiana, aliquot armatis, quos in agro Lunensi corrogarat, terrestri itinere ad urbem præmissis, ipse cum celoce Genuam

A advolarat: qua arce potitus Ludovicus, Spineta triduo post, quam creatus fuerat, sine certamine cedente, Dux creatus est: Vallaque Vicarius regius cum præsidio, quod in arce Castelletti habuerat, secum educto, urbi Saonæ à Renato præfectus est. Sub finem anni missi sunt duo Legati ad Franciscum Sfortiam Ducem, Balthasar Lomellinus, & Gotardus Stella; ad gratias agendas, ob patrocinium Reipublicæ Genuensis susceptum & auxilia submissa: illius enim opibus, fateri Genuenses, Gallos Genua expulso.

B Per ea tempora Carolo septimo mortuo successit Ludovicus filius: ad quem cum Franciscus pro veteri amicitia & societate Legatum gratulatum misisset; Legatus non modo non comiter neque hospitaliter à Rege, sed truci vultu & asperis verbis acceptus est; exprobrante, Francisci opibus illiusque militum opera copias parentis deletas, Gallosque possessione Genuæ exactos: ad hoc favere Franciscum Ferdinando regiæ Gallorum aperto hosti; Joannique Calabriae Duci propinquo suo adversarium esse. Respondenti Legato, quin ea omnia inductum ab ipso Ludovico, ejusque adhortationibus Franciscum ingressum; respondit Rex, aliud tum privatam fortunam suam tulisse, aliud nunc rationes regni ab ipso postulare; quæ simul cum fortuna sententiam quoque mutant: Legatumque minitabundus à se dimittit; cum se acrem ultorem injuriarum regiæ impositarum fore affirmasset.

C Gallis exactis, atque Adornia gente Genua exterminata, Fulgosiique rerum potentibus, quiescere aliquamdiu civitas à domesticis motibus & ab intestinis malis posse videbatur; cum nullæ discordiarum civilium, quæ turbare res possent, causæ apparerent: at eæ subito, unde minime sperabatur, exortæ sunt; hoc est inter ipsosmet Fulgosios, quos cupido principatus inter se commisit. Paulus enim Archiepiscopus expostulare atque indignari coepit, penes se labores & discrimina, penes alios præmia esse: non se Gallos & Adornios urbe & principatu sibi, sed aliis ejecisse: quippe alios in imperio positos; se in contemptu vivere: monstri id simile esse, ac nullo modo ferendum: cum in suum assensum magnam clientium manum traxisset, eosque omnes, quibus facinoribus & rapinis vitam tolerare assuetis aptius erat Pauli ingenium: cum Ludovici nimia lenitas neque illi, neque suis utilis esset: ejusmodi igitur hominum gregibus stipatus Paulus, Ludovico, ut in nulla tali suspecta re, improvise petito atque dejecto, principatum pridie Idus Majas insequentis anni, qui fuit ejus sæculi sexagesimus al-
E ter, invadit; Duxque renunciatur: qui tamen principatus haud diuturnus fuit; eodem mense occupatus & depositus: cum Paulus adversus totius civitatis consentientem voluntatem tendere tutum non duxisset: cives enim diuturnitate malorum fessi, atque otii avidi, nominaque Factionum abominantes, vehementis & perciti ingenii hominem haud dubium quietis perturbatorem in principatu æquis oculis adspicere non poterant. Igitur illo sine retractione principatu abeunte, quattuor ex opificum corpore rectores civitatis creati sunt; Simon Cantalupus, Christophorus Davania, Dominicus Trabucus, Conradus Bozomus: quorum magistratus octo tantum dierum fuit; Ludovico Fulgosis ad sextum Idus Junias Duce tertium creato: quod occultis primariorum civium consiliis factum esse creditur; totam Rempublicam in manum opificum venisse indignantium, neque à mansueti & moderato Ludovici ingenio abhorrentium.

F Sub finem hujus anni Calisto Pontifice mortuo, Pius secundus Senensis in demortui locum sus-

suffectus est: cujus pontificatus primum opus fuit, bellum Turcis indictum; cujus causa Fabianum à monte Politiano egregium Jurisconsultum Genuam misit: qui, convocato civitatis consilio, Pontificis verbis Genuenses pro contestata illorum pietate hortatus est, ut Majorum suorum & veteris gloriæ memores sacrum bellum omnibus civitatis viribus amplecterentur. Pontificis sollicitudine amplissimis verbis laudata, responsum est; Genuenses à sua & Majorum suorum pietate haud umquam deflexuros, idque cum sua sponte & Majorum exemplis inductos, tum Pontificis adhortationibus incitados: duodecimque cives ex primariis electi sunt, qui ea, quæ ad expeditionem pertinerent, procurarent.

A.C. 1463. Sub initium insequentis anni ejus sæculi sexagesimi tertii Ludovicus; cui assidua impendia in Saonam tuendam gravia esse cœpissent, ex qua urbe nullum emolumentum perciperet, simul bellis civilibus ac domesticis molestiis implicitus, cum magna pars Procerum, Ducibus Britanno & Burgundio rerum capitibus, ab illo defecissent; Francisco Sfortiæ, gratia cum illo reconciliata, tradidit: simul omnia jura, quæcunque Gallorum regia in urbe Genua, totaque ditione habebat, transtulit: cujus rei omnes Italiæ Principes per litteras suas certiores fecit, minas ac denunciationem inimicitarum regiæ Gallorum addens, si quis Genuensibus adversus Franciscum opem tulisset.

Interea Paulum Fulgosium pœnitentia ceperat principatus depositi: quare, Ludovico nullo negotio iterum dejecto, principatum iterum invasit; quem sibi à Pio Pontifice ratum fieri, seseque legibus solvi, si quibus fortasse vir facer profanum principatum gerere prohiberetur, postulavit, impetravitque.

A.C. 1464. Interea Franciscus Sfortia, anno insequenti ejus sæculi sexagesimo quarto ineunte, in possessionem urbis Saonæ, hominibus ea de causa cum mandatis eo missis, à Vicario regio inductus est: tribusque arcibus, quæ erant in ea urbe, traditis, paucis post diebus urbs Ingaunum, ceteraque Ligusticæ Occidentalis oræ opida Saonæ exemplum secuta, sese Francisco dediderunt: Joanne Carretto Marchione Finarii, & Lamberto Grimaldo, qui Albintemelium urbem, ac Monœcum opidum, nonnullaque alia Genuensis ditionis loca à Republica abstracta tenebat, adhortantibus. Gentilitium istud edidit Grimaldus; tamquam ab usitato parentum & avorum more se degeneraturum putaret, si cum illi nobili ac per vetusta urbe, haud contemnendis opidis patriam spoliassent, ipse, (quod unum eo tempore poterat) non ad ea, quæ reliqua erant, illi detrahenda atque ad externos transferenda operam & consilium contulisset.

At Paulus Fulgosius Dux, qui ad eum diem simulationibus suis famæ & existimationi hominum servivisset, liberas sibi omnium rerum voluntates cernens, suo ingenio vivere cœpit. Ibleto enim Flisco similis ingenii viro sibi adjuncto, omnem ducatus sui vim in inimicos infectandos, bonos ac quietos cives vexandos contulit; ingentibus gregibus satellitum ad vim, facinus, rapinas, cædes paratorum stipatus. Il non noctu solum, sed luce ac palam, per urbem vagi, rapere, spoliare, vulnerare, postremo occidere, nullo divini Numinis metu illos tenente, nulla hominum reverentia cohibente: ad hoc nullus esse judicis locus, nulla Magistratuum reverentia: sua cuique libido pro lege esse, nullis præsidii innocentia tuta esse: civitatisque funeribus aliis in alia quotidie editis subinde deformari: omnia denique, quæ captarum urbium ultima esse solent, pati; ut nulla asperiora aut

A miserabilia tempora, nullusque lugubrior rerum status Genuæ umquam fuerit, qui Adornianis ac Fulgosianis æque odio esset: quare omnes boni catervatim, urbe castello omnium scelerum excedebant, impotentium tyrannorum latrocinii sese eripientes, ac suam quisque fortunam, suaque privata, consiliis publicis desperatis, sequentes; multique primarii cives Saonam se subduxerunt. Il assiduis precibus Franciscum Sfortiam Ducem Mediolanensem fatigare, ut misericordia nobilissimæ ac finitimæ civitatis percuntis tandem illum caperet; illamque ab interitu, à quo non multum absit, servandam, atque è faucibus perditorum latronum eripiendam fusciperet; non hoc in postremis laudibus illius fore. Haud retractanter fuscipit rem Dux, bonoque animo esse cives jubet: ceterum satius esse ducens rem sine tumultu conficere, animum Pauli per Georgium Annorensem tentat; magnis præmiis propositis, si arcem Castelletum sibi in manum tradere in animum inducat. Cum nihil ea movissent Paulum, Dux, quoniam res consiliis non processisset, ad arma descendendum intelligens, ut quantis plurimis posset machinis Paulum oppugnaret, Ibletum Fliscum, Spinetam Fulgosium, Prosperum Adornium ad se evocatos in suam sententiam præmiis captos traducit: cum, inter cetera, castellum Ovadam Prospero dedisset; ac Jacobonus Fliscus, qui arcem Montogium tenebat, ipse quoque præmiis inductus signum Ducis Mediolani sustulisset.

At Dux, Proceribus Genuensibus, quos sibi adjunxerat, ad partes impositas exsequendas dimissis, Jacobum Vimercatum cum ingentibus copiis in Paulum mittit. Is per vallem Porciferæ iter faciens, Cornelianum usque pagum perrexit, ibique substitit; ut multis ad illum quotidie confluentibus, exercitum auget: cui se subito peditatus à Duce Saonam missus aggregavit, multique ex primaria Nobilitate Genuenses cives ingentem plebis rusticæ multitudinem secum trahentes: quorum Duces ac capita fuerunt Paulus Auria & Hieronymus Spinula. At Paulus sese tantæ moli in se unum incumbenti, atque universæ civitatis odio haudquaquam parem intelligens; non quidem principatu cedere in animum induxit, sed urbe excedere, ac se ad occasiones recuperandi dominatus reservare decrevit: quare arce Castelletto delecta quingentorum armatorum cohorte firmata, Bartholomæaque Petri Ducis fratris uxore, ac Pandulpho fratre in ea relictis; ipse, infidelitate amicorum multum accusata, in primis Ibleti Flisci caput execratus, qui præmiis emptus ipsum consortem facinorum, qualiacunque tandem fuerint, in medio cursu prodiderit, quattuor navibus conscensis, quas dominis invitis abstulerat, vela in altum dat: quarum una mox demersa, quæ navigationi inutilis, cursum ceterarum retardaret, nonnullis onerariis, quas tritico onustas Genuam petere fama erat, insidiari cœpit.

At Ibletus Fliscus, cognito Pauli discessu, cum magna clientium & ditioni Fliscæ subjunctorum manu ad urbem accessit; ac sine certamine porta Hircorum occupata, ac præsidio firmata, ipse cum copiis in urbem introductus in hortis Carinianis confedit, ac Vimercatum accersit. Retractare primo Vimercatus, neque satis incolis & paganis fidere, aut suam salutem mutabili rusticorum fidei committendam ducere; tandem Ibleti & ceterorum adhortationibus victus, Idibus Aprilis Corneliano movet; longoque ac difficili circuitu per aspera & confragosa in vallem Bisamnam descendit; urbemque ingressus sese cum Ibleto in hortis Carinianis conjungit;

triduoque porta Vaccarum, præsidio Fulgosiorum ac Joanne Galeacio Fulgoso præfecto fugato, à Sfortianis capitur: Vimercatusque cum omnibus copiis in urbem penetrat, ædibus publicis accircumpositis turribus ab Ibleto occupatis, ac præsidio firmatis. Tum milites, qui erant in custodia arcis, quotidie in inferiora descendere soliti, ac levibus præliis cum hostibus contendere, finem erumpendi fecerunt, cœnobio divi Francisci, atque intra arcis septa se continentes. Igitur Vimercatus omnibus urbis locis, præterquam arce ac cœnobio Franciscanorum, potitus, ad ædes publicas accedit, quas aucto numero validiore statione firmat: magnique subito populi concursus in ædes facti sunt, visendi hominis causâ: qui subito sublimis arreptus, & in maximam aulam delatus, consentientibus omnium studiis, magnoque animorum ardore præses civitatis, ac Vicarius Ducis Mediolani salutatus est: consilioque confestim habito, urbis principatus in Ducem Mediolanensem translatus est; Vimercatoque iusjurandum Ducis nomine exigente, in ejus imperia juratum: continuoque curis ad arcem urgendam adjectis, ejus rei causâ tres vastæ magnitudinis bombardæ Mediolano Genuam missæ sunt, difficili ac magni negotii attractione, per loca aspera, ardua, confragosa. At Bartholomæa mulier sagax & astuta de deditioe arcis simulate agere cœpit; consilio, ut putabatur, extrahendi, quo interea Paulo tempus daretur ad comparandum, ac subsidio veniendum. Sensit astum Franciscus; quare, ut Bartholomæam ad necessitatem arcis tradendæ invitam subigeret, opida Novas & Vultabium, quæ ad eum diem passus fuerat à Bartholomæa teneri, illi ademit: quo vulnere icta Bartholomæa, per occulta consilia atque à conscientia Fulgosiorum, qui erant in arce, secreta, pacta, ut sibi Novæ restituerentur, ac quattuordecim millia aureorum nummum nonnullis de causis sibi debita, ut illa affirmabat, numerarentur; Gaspari arcem tradidit, noctuque clam, Fulgosis omnium rerum insciis, præsidium Sfortianorum in arcem introduxit: sicque quadraginta post Pauli discessum diebus, arx Castellum in potestatem Ducis Mediolani venit: quibus rebus confectis, amplissima legatio viginti quattuor ex principibus civitatis ad res firmandas, conditionesque deditiois sanciendas Mediolanum missa est: quibus magnifice & apparate à Duce exceptis, ac præstituto die ad Ducem introductis, in magno Procerum cœtu Baptista Guanus, ac Joannes Serra Jurisconsulti ex principibus legationis luculentis orationibus rem nobilitarunt: cum Guanus res à Genuensibus omnibus temporibus gestas, clarissimas victorias partas, urbes & insulas imperio adjectas persecutus esset; Serra laudes Francisci Ducis, magnitudinemque rerum gestarum, clarissimasque virtutes, quæ illi ad tantum fastigium adscensum dedissent, magnifica oratione ad cælum extulisset: Franciscusque prudenti & moderata oratione nihil suæ virtuti assumpsisset, sed omnia divini Numinis benignitati accepta retulisset: addidissetque, se, non imperii proferendi cupiditate, (satis enim opulentum atque amplum regnum possidere) Genuam in fidem accepisse; sed caritate nobilissimæ ac propinquæ urbis ruentis inductum, ut illam ab interitu sisteret, secundum eam orationem deditio sollempnibus verbis facta est ac pacta, & conditiones fœderis sancitæ.

Dum ea Genuæ & Mediolani aguntur; Paulus infestam classem circumferens, cum quiescere non posset, oramque Ligusticam circumvolitans, Villam Francam venit; portumque subiens, nonnullas Genuensium naves in eo deprehensas magno impetu aggressus est; nihilque atroci prælio justi-

diei assecutus, irritum incepto, sub vesperum, pugna omiſſa, altum petit; itinereque in Orientem directo, Siciliam usque perrexit, naves Genuenses quærîtans: adversus quem quattuor ingentes corbitæ, Francisco Spinula præfecto, Genua emissæ sunt: qui Paulum haud procul littoribus insulæ Corsicæ adeptus est: at Paulus, eo conspecto, impar sibi certamen cum Francisco ratus, in scaphas descendens sese cum maxima suorum parte in terram subduxit, navibus Francisco relictis; quas captas Franciscus Genuam adduxit.

Moderatus Francisci principatus finem tandem imposuit seditionibus, tumultibus, bellis civilibus, rapinis, cædibus, exsiliis, ceterisque calamitatibus; quæ per multos annos miseram civitatem privatim & publice lacerarant; ac sanguine misso ita enervarant, ut viriles portiones in publicis vectigalibus à centenis libris ad vicenas trinas descenderint; ac pro illis pax & tranquillitas civitatis domi & foris, otium, justitia, ceteraque felicitum civitatum dona successerunt: tantaque in caritate Franciscus cum civitate fuit, ut, Catalanis & Rege Neapolitano Corsicam vexantibus, Magistratus sancti Georgii eo, qui consecutus est annus, ipse sua sponte dominatu ejus insulæ illi cesserit; ratus eam sub tanto Principe, & ad externos impetus, & ad intestinas seditiones tutiorem & quietiorem futuram: quem felicem civitatis cursum mors Francisci, quæ fuit ineunte vere sequentis anni ejus sæculi sexagesimi sexti, interrupit. A.C. 1466. Hoc Principe nemo ex multorum sæculorum memoria altius heroicarum virtutum ac gloriæ fastigium tenuit; nemoque clarioribus belli ac pacis laudibus cumulior fuit: qui inter perpetua & assidua bellicæ virtutis omnis generis edita opera, bis & vices justa acie victor fuerit, numquam ipse victus; ac, cum aperta vi, tum occultis insidiis totius pene Italiæ in ejus perniciem conspirantis sæpe petitus, tanta in se intenta discrimina consilio & virtute discusserit: quæ res illum opulentissimi ac nobilissimi principatus tandem compotem fecerunt. Bellicas laudes pacis artes æquarunt: nemo enim illo continentior, in subjunctisque regendis moderatior, aut justior fuit; nemo religiosior, aut liberalior; nemoque illum regii cultus splendore superavit: quibus virtutibus tanta in caritate cum omnibus fuit, ut ejus mors, tamquam optimi parentis, bonis omnibus acerba, Genuensibus luctuosa fuerit: qui tanto icti vulnere, ne qui novi motus ejus morte excitarentur, omnia, quæ ad statum rerum tuendum, ac principatum Galeacio filio conservandum pertinerent, providere & expedire instituunt.

Longe diverso ingenio, longeque à Francisco parente diversis moribus Galeacius fuit: quæ res longe quoque diversam fortunam illi fecerunt. Genuenses quidem Principem mutatum subito senserunt: perampla enim legatio quattuor primariorum civium, Meliaducis Salvagi, Pauli Justiniani, Lazari Auriz, Jacobi Aslereti ad illum, usitati in talibus rebus officii causâ, missa, neque comiter, neque honorifice à novo Principe accepta est: quæ res eo acerbior Genuensibus fuit, quo Florentinos Legatos in majore honore habuit. Renovata sunt cum Galeacio ab eisdem Oratoribus pacta & conventiones; in ejusque verba juratum.

Per idem tempus, cum Barchinonenses, fide patrum fracta, quattuor corbitas ingentis magnitudinis contra Genuenses emisissent; classis adversus illos decreta est: cujus comparandæ & instruendæ octo civibus negotium datum est, Antonio Giberto, Thobiz Gentili, Luciano Marino, Alexio Salucio, Luciano Spinulæ, Marco Lercario, Lazaro Varisco, Joanni Francisco Palmario: à quibus sex corbitæ omni bellico apparatu ac nautico instrumen-

to, ad hoc magna militum & sociorum copia instruita, comparatae sunt. Huic classi praefectus est Lazarus Auria: qui portu Genuensi solvens, quamquam hostem multis in locis perquisitum nusquam adeptus est, non tamen segnis hominis opera fuit: diligentia enim sua, littora ac circumiecta maria Genuensiumque commercia tuta praestitit; navi etiam hostili capta, ac pari detrimento hosti reddito, qui navem Genuensem prius ceperat.

Sub finem hujus anni, cum leges municipales ac forenses res multis in rebus corrigendae viderentur, illarum emendandarum causa, octo cives electi sunt, tanto muneri aptiores visi, Aelianus Spinula, Nicolaus Interianus, Franciscus Salvagus, Lucas Grimaldus Jurisconsultus, Andreas Benigassius Jurisconsultus, Antonius Cabella, Guilielmus Marruffus, Ubertus Folieta.

Per idem tempus, cum inter Galeacium & Blancam Mariam matrem, lectissimam & sapientissimam feminam, antiquorumque morum mulierem, non satis conveniret; quod mater filium a paterno cursu deflectentem assiduis monitis, adhortationibus, precibus; postremo objurgationibus quoque in rectam morum viam revocare contenderet; ille autem morosam & incommodam libidinum moderatricem non pateretur, minusque liberas se rerum voluntates habere, aegre ferret; tandem mater omnem laborem in filio regendo irritum cernens, Mediolano excessit, Cremona urbe, sua dotali sede ac domicilio senectutis electa: ceterum vix urbe egressa in opido Mariniano in morbum incidit; quo subito, haud sine veneni suspitione, consumpta est.

A.C. 1467. Quattuor insequentes anni nihil sane memorabile habent; praeter nonnullas legationes levibus de causis in varias partes missas: at, qui confectus est annus, ejus saeculi septuagesimus unus, 1468. 1469. 1470. contumeliosus in primis civitati nostrae fuit: quae, 1471. ut Galeacium cum uxore, ac fratribus, magnaque Procerum caterva, Florentia, ubi voti causa fuerat, venientem honorifice exciperet, aedes publicas ac primariorum civium aedificia omni regiae opulentiae apparatu instruxerat: amplissima praeterea dona praepararat: in quibus fuerunt quattuor crateres aurei, singuli duodenarium pondo: quae omnia Galeacio ingrata fuerunt, qui summum civitatis contemptum praeferebat ipse, & uxor, ac ceteri, qui cum eo erant, vestitum fordidum ac degenerem induti; non modo praeparatis diversoriis usi non sunt, sed ne illa quidem adspicere in animum induxerunt: ut tantorum apparatus impensae a Genuensibus frustra projectae sint: qui Galeacius cum triduo in arce fuisset, citato ac confuso agmine discessit; ut ejus iter fugae magis quam pacatae profectionis simile esset: hoc Galeacii superbum & arrogans factum magnum cumulum veteribus offensionibus addidit: ceterum Galeacius paucis post mensibus a Senatu Genuensi postulat, ut per amplam legationem sexdecim ex principibus civitatis ad se mittant; velle sese cum illis de magnis rebus, ac de summa Republica agere. Mittuntur Legati, Dominicus Spinula, Lazarus Auria, Simon Nigronius, Thobias Gentilis, Lucas Grimaldus Jurisconsultus, Marcus Lomellinus, Benedictus Fliscus, Ambrosius Marinius, Baptista Guanus Jurisconsultus, Jacobus Justinianus, Petrus Clavarus, Franciscus Camilius, Bendinellus Saulius, Paulus Francus Turturinus, Baptista Rapallus, Laurentius Presenda. Nihil aliud cum Legatis egit Galeacius, quam de navalibus ad eam magnitudinem amplificandis, quae quinquaginta triremes caperent: quamquam morem gerendum Duci in consilio decretum est: tamen res ad effectum numquam perducta est.

Sub finem hujus anni amplissima legatio Ro-

A mam decreta est ad Pontificem Sixtum, qui Paulo successit, natione Ligurem, patria Saonensem: ad pontificatum gratulandum, simul obedientiam de more deferendam: fuerunt autem Baptista Guanus Jurisconsultus, Gotardus Stella, Ludovicus Centurio, Jacobus Asseretus, Ambrosius Spinula, Paulus Justinianus, Hieronymus Grimaldus, Petrus Gentilis, qui comiter & honorifice a Pontifice accepti multa jura eximia ab illo impetrarunt, quorum diploma in tabulario publico adservatur.

Insequenti anno ejus saeculi septuagesimo tertio, A.C. (nam qui antecessit, nihil habuit quod memoriae 1472. mandaretur,) Galeacio postulante, viginti triremes armari decretae sunt: cujus rei causa Respublica undecim millia aureorum nummum insequenti anno ejus saeculi septuagesimo quarto Galeacio mutuavit; Luca Grimaldo Jureconsulto, A.C. 1474. Joanne Petro Vivaldo, Pelegro Monelia, Francisco Borlasca ad eum missis: ceterum, cum omnia inter Ducem & Genuenses suspiciosa facta essent, Galeaciusque se Genuensibus offensum intelligeret; verereturque, ne illi ab ira & indignatione aliquid subiti consilii contra se caperent; mitigandum ingenium & Genuensium animos permulcendos ratus, quattuor Genuensium Legatos ad se mitti anno, qui consecutus est, postulat.

C Mituntur Jacobus Casanova, Paulus Justinianus, Marcus Lercarius, Affranus Spinula; quos Galeacius comiter & benigne accepit, ipsosque simul omnes illorum familiares splendidis ac magni pretii vestibus donavit.

Hic annus populo Genuensi lugubris & calamitosus in primis ac maxime probrosus fuit; urbis Cassae, a Veteribus Theodosiae appellatae, frequentis ac celeberrimi totius Euxini emporii imperio, quod multa saecula civitas nostra possederat, scelere & avaritia nonnullorum ipsorummet civium nostrorum amisso. Creverat ea urbs sub Genuensi imperio in magnas opes; civitatisque nostrae privatim & publice fructuosissima erat; ob frequentia & ampla commercia, quae privatim cives divitiis augebant: quibus rebus fiebat, ut magnam potentiam magnamque auctoritatem apud accolae Tartaros obtineret: ipseque Tartarorum Imperator, cui latissime patentes circa regiones parebant, coloniam illam, quae regnis suis haud exiguo emolumento esset, in magno pretio magnoque honore haberet: quare omnium finitimarum praefecturarum controversiae, Genuensibus Magistratibus disceptatoribus & arbitris (ita Imperatore volente) Cassae transigebantur: neque praefectus campestris regionis sine voluntate & assensu Genuensium Magistratum eligebatur: quorum Magistratum tanta erat in eo negotio auctoritas, ut in quem ipsi studia inclinassent, is, victis competitoribus, praefecturae compos fieret: praeter Consulem autem, cui duo in consilio addebantur, & ad quem summa imperii pertinebat quattuorviris Magistratus eligebatur rebus campestribus moderandis & procurandis.

Is cum esset status rerum, Mamaces campestris praefectus moritur; in cuius locum Satrapes quidam nomine Eminaces successit. Huic, F ex testamento Mamacis ab Imperatore approbato, nominatus erat successor Caraimerza Satrapes: ceterum uxor Mamacis vidua mulier praedives ac potens, insignisque superbiae & ambitionis femina, in eam praefecturam indomita cupiditate pro filio suo Seitace tendebat: cum non modo precibus & allegationibus, sed pecuniis quoque & corruptionibus pugnaret; negotio Constantino Petrocossio Genuensi dato; qui primo Gotofredum Lercarium Genuensium Consulem, ac deinde Baptistam Justinianum successorem appellavit;

quorum fidem nullis promissis assidue obtundendo labefactare umquam potuit; cum viri graves & integri providerent, quantam ea res malorum tempestatem esset excitatura: ceterum non eadem fides & integritas, idemque boni publici studium in successoribus Magistratibus fuit; qui fuerant Antonius Cabella Consul, atque Ubertus Squarciaficus, & Franciscus Fliscus, illi de more in consilio additi: quattuorviri vero rerum campestrium fuere, Nicolaus Turrilia, Julianus Fliscus, Bartholomæus à sancto Ambrosio, Cyprianus Vivaldus, cum Uberto Squarciafico altero ex Consiliariis affinitate conjunctus. Horum novorum Magistratum electio spem Constantini ad rem iterum tentandam erexit: qui, initio facto à Nicolao Turrilia, per eum Ubertum Squarciaficum in sententiam traxit, mille aureis nummis illi, ac duobus millibus Squarciafico promissis; quod is Consul fuisset, magnumque esset in colonia ejus nomen & auctoritas: qua ceteri commoti deinceps appellati, omnes pretio corrupti in societatem consilii venerunt. Seitaceque in urbem accersito, Emineci per dolos & confictas calumnias pestem machinari incipiunt: quem per litteras occultæ amicitiae occultorumque consiliorum cum Imperatore Turcarum apud Melincherium Tartarorum Imperatorem insimulant: hortanturque, ut proditori præfecturam abroget; aliter civitatem Cassam non posse servari. Imperator sese morem gesturum voluntati coloniae respondet, cujus salutem non minus quam suam cordi habeat; rationemque initurum Eminecis amovendi: quo tamen amoto præfecturam ad Seitacem deferri non posse, Caraimerza vivente; & potiore jure, quod illi auferri juste non possit, in successione fulto, & Aidaris propinqui sui immensarum opum, immensæque potentiae Satrapis favore subniso: ut ardua in primis & periculosa sit Seitacis creatio, quæ magnis motibus ac magnis offensionibus causam possit præbere: ceterum Magistratus Genuenses, avaritia stimulante, monitis Imperatoris auribus non admissis, rem nihilominus urgere pergunt; multisque ultro citroque comitantibus litteris & nunciis, res tandem eo deducta est, ut Genuenses, modo Emineces tolleretur, sese accipere paratos dicerent quemcunque successorem Imperatori mittere libuisset. Probat rem Imperator: Aidarique & Caraimerzæ negotium evertendi Eminecis dat; successione in præfectura Caraimerzæ sollemni jurejurando promissa: quibus consiliis ac machinis in caput suum cognitis, Emineces ab omnibus desertus, fuga, quæ una erat salutis expediendæ via, sese periculo subtrahit. Caraimerzaque & Aidares fidem promissorum ab Imperatore postulant: qui, promisso confirmato & iterato, ea de causâ, iisdem Caraimerza & Aidare comitibus, Cassam se confert; isque solus urbem ingreditur: cum Satrapes, non satis explorata Magistratum Genuensium voluntate, extra urbem substitissent. Magna inter Imperatorem & Magistratus Genuenses certamina ea electio præbuit: Genuenses acriter & obstinate pro Seitace pugnare, qui ipsorum promissis inductus Cassam venisset; quorum promissorum fidem servari, ad ipsorum existimationem pertinere dicere: contra Imperator litteras ipsorummet Genuensium proferre; quibus Eminece extincto libera eligendi consilia permisissent: captiose litteras suas interpretari Genuenses: extinctum enim illum dici, qui vel mortuus, vel in vinculis sit, Eminecem & vivere & in libertate esse. Fluctuare inter ancipitia consilia Imperator: nolle fidem Caraimerzæ & Aidari bis datam fallere; nolle Genuensium animos offendere: tandem Ubertus Squarciaficus à disputationibus in minas versus, *Nisi Seitacem*, inquit, *eligis*, *Imperator*,

A nos omnes, quos Saldaja, te instante, in vinculis habemus, capitales hostes tuos emittemus; quos nosti, cum numero, tum potentia sua te ac regnum tuum in ultimum discrimen adducere posse: quo timore victus Imperator Genuensibus obsequi in animum induxit; omniumque Magistratum Genuensium voluntate Seitaces in prætorio Genuensi præfectus campestris regionis creatur.

B Graviter Caraimerza & Aidares tanta injuria arserunt; ab Imperatoreque deficientes, qui in sua concesserat, maxima Procerum & Satrapum multitudinem armorum societate sibi conjuncta, Eminecem evocatum, exturbato Seitace, in locum suum restituunt; pestemque atque excidium Genuensibus contumeliæ auctoribus machinari incipiunt, Turcarum Regem in ipsos incitantes; spe haud dubia facta, si ipse copias suas Cassæ admovisset, sese illi urbem, & cetera loca, quæ Genuenses in ora Euxini possiderent, exiguo, aut nullo certamine tradituros. Haud cunctatur Turca: opportuneque classem quadringentarum octoginta navium in expeditionem Cretæ preparatam in Cassam vertit; in quam Imperator cum Seitace à Genuensibus evocatus redierat, urbemque ab assiduis Eminecis oppugnationibus, cujus copiae in dies augebantur, defendebat: quæ oppugnatio à dimidio mense Aprili ad extremum Majum perducta est; cum tandem classis Turcica Kalendis Junii in sinum Cassensem appulsa, copias multis in locis in terram exponit, atque urbem tormentis statutis verberare instituit, veteribusque mœnibus decussis, cuniculi agi ac nova mœnia quati cœpta sunt. At opidani, tantis circumstantibus terroribus, & à Turca & à Tartaris, trepidi, clavibus urbis ad Ahamatem Turcicarum copiarum summum Ducem missis, deditionem faciunt. Retractare primo Ahamates, atque, ut sese defenderent, monere: tandem mutata voluntate; nuncium in urbem mittit, cui Consul & collegæ prætorium & solium consulare tradunt: postero die Ahamates arma, telaque omnia in prætorium comportari jubet: lustroque habito, incolarum numerum nationatim recenset, omniaque bona & depositas pecunias profiteri externos jubet: ex quibus plus viginti quinque millia aureorum nummum abstulit: secundum ea, urbem ingressus mille quingentos impuberes Constantinopolim mittit, atque omnes servos capit, tributumque ab incolis, pro dignitate ac rei familiaris portione, à quindenis usque ad centenos asperos exigit; dimidiumque rei familiaris ab incolis aufert: quibus rebus confectis, omnes Latini nominis incolas classe conscensa in urbem Peram trajici jubet: certamque regionem hominibus in urbe Constantinopoli, vacuum ædificiis frequentandam tradit; ceterum dispar fuit Uberti Squarciafici & Seitacis exitus: nam debita merces perfidiæ Uberto persoluta est, suspendio necato: at Seitaces reservatus, biennio post in præfecturam restitutus est.

E Nec mihi omittendum visum est memorabile & audax facinus, quod Simon Furnarius felici exitu edidit: armis enim arreptis, ac ceteros Genuenses ejusdem fortunæ consortes, ut idem facerent, adhortatus, Turcas omnes, qui erant in navi, qua vehebatur, nihil tale suspicantes improvise aggressus obruncat, navemque favore secundi venti à reliqua classe Moncastrum opidum appellunt, prædamque inter se partiuntur, quæ singulos ditavit: verum in nonnullis minutis rebus dividendis orta inter illos contentione, cum à verbis ad jurgia, postremo ad ferrum venisset, Dominus Moncastri hæc sentiens, navim & prædam sibi assumit; ipsosque nudos & omni re spoliatos dimittit.

I Interea Genuæ offensiones & animorum irrationes

tiones in Galeacium in dies augebantur: cum neque ille, neque ejus administri & procuratores injuriarum finem facerent; pacta & conventa perfringentes, fidemque promissorum quotidie violantes; neque legationibus, quæ multæ quotannis alia super aliam Mediolanum mittebantur, quidquam proficeretur: Duxque acerbiter in injuriarum ab ipsius procuratoribus civitati quotidie impositarum, cum querelæ de illis ad eum deferrentur, superbis responsis orationeque contumeliæ plena insuper exasperaret: quæ res quamquam magnas animorum commotiones in omnibus faciebant; Galeaciumque haud dubium servitium civitati machinari, perspicue apparebat; non tamen erat idem omnium sensus civium: nam alii censere, tantas acerbitates haud jam ferendas, sed libertatem repetendam: neque jusjurandum obedientiæ violari, quod Galeacius toties pactis & conventis non stando ipse prior perfregisset: contra alii nimias vires Galeacii formidare; periculosumque ac præceps ducere, rem arduam ac minime explorati exitus aggredi; in primis vero memoriam præteritorum malorum horrere; in ea ne, Galeacii jugo excusso, civitas iterum redigeretur, vereri: præsentem igitur qualemcumque tandem fortunam potius tolerandam, quam tantam negotii ac discriminum molem excitandam, quæ in nullo meliore statu civitatem esset constitutura.

Igitur, cum res ad defectionem spectaret; Galeacius, Joannis Scipionis Palavicini Vicarii sui monitu, ad illud consilium animum adjecit; quod, pro eo, ut defectionem impediret, illam immo maturavit: munitionem enim ab arce ad mare per mediam urbem ducere decrevit; per quam maritima subsidia in arcem introducerentur: cui rei idem Joannes Scipio consilii auctor viam præmunire ex discordiis civitatis instituit: persuadere enim plebi coepit, tributum non recte universe ac promiscue pendi; sed divisionem inter plebem, & tenuiores, atque Optimates fieri oportere; singillatimque utrumque corpus portionem suam tribuere; magnam in ea re allevationem oneris plebi fore: deceptos ad eum diem artificis Optimatum, nec satis in sua re sapientes plus oneris subisse, quam illis jure obveniat: postulent modo constanter jus suum: se enim æqua postulantis auxilio & favore suo non defuturum. Haud mirum fuit, in animis ad omnem levem occasionis auram natura mobilibus, ac, vel nullo magnopere proposito emolumento, novandi res semper avidis, tantam & utilitatis & spei rem facile assequendi simul oblatam speciem magnas commotiones fecisse: acres igitur ingentique motu ad postulatum consurrexerunt. Perculit ea res vehementer animos Optimatum gementium & mœrentium, illud etiam restitisse ad summa malorum intestina odia ac civiles discordias.

Palavicinus igitur id, quod quæsierat, assecutus, ut civitatem inter se committeret, haud jam cunctandum ratus, jussu Galeacii præferens, funiculo ab arce ad mare perducto, fossam fundamentis munitionis jaciendis fodere incipit: quæ res, præter publicam causam & apertum civitatis servitium, urbem quoque ruina innumerabilium magnificentissimorum ædificiorum deformabat: atrox igitur res civitatem luctu implevit; magnasque iras & indignationes accendit: commotæque inter plebem & Optimates odia, tanquam majoris mali formidine minoris sensum conspiciente, exstinxit, & in ipsum Galeacium convertit: lamentationes igitur & querelæ vulgo exaudiebantur; nudasse tandem animum Galeacium, ac servitium, quod jamdiu occultis dolis atque artibus machinatus esset, aperte tandem moliri. Hæc imbellis ætas, & sexus, ac timidi & humi-

lis animi homines flebilibus vocibus jactare: at virilis ætas, vividaque ingenia, omnesque, in quibus aliquid roboris erat, inutilibus querelis omis-
 A
 B
 C
 D
 E
 F

sis, iniquissimum jugum tandem excutiendum, libertatemque repetendam ferociter conclamare: in quibus Lazarus Auria indignatione atque animi magnitudine, tum autem communis patriæ caritate proventus, cultello, quem gestabat, educto, ipsis Galeacii procuratoribus atque administis inspectantibus, funem præcidit: ut tanta conspiratione civitatis perterritus Palavicinus domi se contineret, neque in publicum prodire auderet.

Quibus motibus cognitis, Galeacius, ut imminenti periculo qua posset occurreret, octo ex primariis civibus ad se accedere extemplo jubet: qui, quamquam metus civitati est injectus, ne Galeacius vel illorum morte ceterorum audaciam comprimere vellet, vel saltem ipsis in custodia retentis, illis tanquam pignoribus animos Genuensium constrictos libidinibus suis obnoxios teneret; missi tamen sunt: qui cum in conspectum ejus venissent, Franciscus Marchesius Jurisconsultus celebris nominis legationis princeps ita verba fecisse dicitur: *Superbia, & rapacitas, ac crudelitas proximorum Ducum civium nostrorum ad necessitatem exteri principatus quarendi nos adegit, Dux: quod consilium ab invitis expressum divina prope virtus clarissimi parentis tui, in cujus imperium & fidem nos tradidimus, felix etiam fecit: ejus aequitas, justitia, continentia, mansuetudo, moderatio firmissimam & stabilem arcem, ac nullis machinis labefactandam, aut everte-
 tendam in animis Genuensium defixit: ut omnes præteritis malis civitatis & acerbitatibus letaremur, quæ iter nobis patefecissent ad tam felicem statum: & ad illud consilium, ad quod nullis prementibus malis nostra sponte numquam animum adjecissemus. Mutata ratio gerendarum rerum à ministris tuis, fortunam quoque urbis & animos populi Genuensis mutavit. Si nos nullis acerbitatibus vexare, nullis contumeliis afficere, pacta & fidem conventorum violare, discordias inter plebem & Optimates serere & alere numquam destiterunt: postremo, munitione per mediam urbem ducta, novam arcem edificavit: quæ res apertum indicium est ultimum servitium molientium. Mito hac in re religionem jurisjurandi spretam, fidem conventorum fractam: nam hæc quam præ indomitis cupiditatibus suis ministri tui leviter semper duxerint, sæpe experti sumus: illud quero, quam tandem utilitatem spectarint; quamque spem habeant in manibus: si imperium tuum Genuæ sese stabilituros putant; ut omittam vulgata & omnibus temporibus decantata illa, stabiliora esse imperia beneficio adjuncta, quam vi parata, ii parum memores recentis exempli fuisse videntur, cum Genuenses radio Ducum civium suorum externum imperium sibi accerserunt: nec cogitasse, eo faciliorem & proniorem esse à principatu ad libertatem regressum, quam à libertate ad externum imperium transitum; quod ad hunc uno tantum stimulo agimur, hoc est, injuriarum & malorum odio; & ad illum duobus, & hoc ipso eodem malorum odio, & (quo nullus natura acrior est) amore libertatis. Genuenses, Dux, suam fortunam, Majorum suorum animos gerunt: illi, fortuna civitatis ita ferente, vividam ingenii indolem, omnes marium tractus præpotentibus classibus obeundo, civitates & insulas imperio addendo, exercebant: nobis quoniam unam libertatis tuendæ gloriam reliquam fortuna fecit, in hac innumeris exemplis numquam nos à Majorum virtute degenerasse declaravimus: orationem quamvis humili tamen apta comparatione concludam, Dux: vetus hoc esse apud nos, Genuensium ingenia persimilia esse herba ozimi, quæ leviter atrectata suavi, aspere & presse tetro odore manus perfundat. Acris oratio vim habuit timidum ac mobile Galeacii ingenium facile mutandi: liberum igitur de re arbitrium Genuensibus permittit: quæ res magna cum omnium læticia*

titia Genuæ excepta est : plebsque exultans (ut nullum modum in libertate exercenda habere solet) Galeacio tamquam victo verbis contumeliosis insultans, jacta fundamenta munitionis revellere aggreditur.

Galeacium, cum primus ille motus timoris desedisset, remque suis ipsam momentis expendere cœpisset, pœnitentia facti cepit: reputantem quam turpe, quamque ignominiosum sibi tanti fastigii Principi esset, ad primam comminationem populi sibi subjuncti, à re tanto consiliorum apparatu incepta subito destitisse. Inflammabantur hæc ab Angelo Stuffa Florentinorum Legato, qui vir paullo dicacior, quam personam publicam gerentem decuisset, facetiis & salibus suis Galeacium ceperat; ejusque vivido & prompto ingenio mire delectabatur Galeacius: is igitur Galeacium ad dignitatem suam armis vindicandam incitare non desisteat. Galeacium anceps cura agitare: hinc cupere existimationem amissam recuperare, illinc consensum Genuensium in tuenda libertate insuperabilem intelligere, formidareque adversum exitum, qui dedecus cumulaturus esset. Fluctuant inter ancipitia consilia, discordia inter plebem & Optimates Genuæ in partiendis oneribus nonnullarum triremium comparandarum, animos fecit: igitur è vestigio triginta peditum millia scribi jubet: ceterum timor externus concordiae vinculum Genuensibus fuit: qui contentionem inter se omissem, omnem in Galeacium vertunt; seseque ad resistendum mutuo hortantur: at Galeacius, conspiratione Genuensium audita, primo titubare; deinde infinitæ impensæ ratione subducta, omnibusque fere ordinum ductoribus, quique præcipuum usum in re militari habere existimabantur, ab arduo ac laborum & discriminum pleno, sine ulla magnopere effectus spe, negotio deterrentibus; ut erat timidi ac ne ad exiguum quidem tempus stabilis ingenii, voluntatem subito mutat, atque inchoatum consilium deponit.

Ceterum Genuæ studia animorum contra Galeacium commota sensim gliscere; iniquumque tandem jugum discutiendum palam ferre, ac rem in quotidianis cœtibus & circulis sermonibus agitare: proni erant omnium animi in libertatem repetendam: ceterum, qui auderet initium facere, nemo reperiebatur. Hieronymus tandem Gentilis, magni animi, magnarumque opum juvenis, charitate patriæ stimulante, sese pro communi libertate in tantum discrimen dare non recusavit: qui, multorum ex principibus voluntate explorata, mense Junio magna armatorum manu in proximum suburbanum suum corrogata, nocte per portam divi Thomæ statione fugata cum omnibus suis urbem ingressus, libertatem discurrens clamare cœpit: ad quam vocem cum multi consurrexissent; nonnullique se illi aggregassent; omnibus urbis portis occupatis, in loco, quem magis idoneum judicavit, cum suis constitit, eventum exspectans: neque mens illi data est prætorium aggrediendi; quod, haud dubitatur, quin tanta armatorum manu stipatus expugnaturus fuerit, ac præclarum consilium ad effectum perducturus. Interea, luce appropinquante, multi ab illo dilabi cœperunt: cumque clara luce se cum paucis relictum cerneret, ad portam sancti Thomæ se recepit, quo res evaderent, exspectans.

Interea Magistratus, omnesque fere primarii cives, ac consilium civitatis, in prætorium ad Guidonem Vicecomitem conveniunt: is senex, ac natura pavidus, ejusmodique motuum & contentio-num insolens, trepidans salutem suam ac statum rerum Ducis sui supplicibus verbis civibus commendabat. De consilii decreto, octo cives, præsidio armatorum illis dato, ad tumultus sedandos,

A ac Hieronymum compescendum mittuntur: quibus audacter obviam factus Hieronymus cum paucis illis, qui apud illum remanserant, (fuerunt autem non plus triginta numero) illos avertit, propeque factum est, ut in fugam conjiceret: tandem, viginti quattuor ex honestioribus urbis artificibus sese interponentibus, res compositæ sunt: venia Hieronymo, omnibusque, quicumque illum secuti fuerant, data; septingentisque aureis nummis Hieronymo numeratis, quos in libertatem patriæ asserendam impendisse dicebat: ita Hieronymus, porta restituta, gemens & mœrens tam egregios conatus irritos: ac Superos atque homines testans, brevi fore, ut Genuenses ignaviæ suæ in libertate, tanta oblata occasione, non recuperanda pœniteat, urbe excessit.

B At Genuenses civitatem & Rempublicam extra noxam conservandam statuentes, quattuor Oratores ad Galeacium mittunt, Antonium Spinulam, Joannem Salvagum, Bartholomæum Justinianum, Ubertum Folietam: qui civitatem purgarunt; docueruntque, nihil publico consilio motum: neque temeritatem inconsulti adolescentis civitati ac Rempublicæ assignandam. Sub finem anni repentinus & inexpectatus nuntius Galeacii cædis omnium animos stupore defixit: sublatus est conjuratione C trium adolescentium ex principibus civitatis, Joannis Andreæ Lampugnani, Caroli Vicecomitis, Hieronymi Olgiati: quos ad necem Principi machinandam induxerunt, cum nonnullæ injuriæ privatim à singulis acceptæ, tum studium quoddam gloriæ ac cupiditas famæ patriæ ab impotenti tyrannide liberatæ: quod studium cum suo ingegno susceperant, tum Nicolai Montani rhetoris, apud quem prima rudimenta adolescentiæ posuerant, imbuti: cum ille in lectionibus & disputationibus suis principum liberis, qui ad illum disciplinæ causâ confluebant, (tamquam ad eam rem formandos illos accepisset) demonstrare non desisteret, eas urbes beatas esse, quæ in libertate essent, contra eas, quæ alterius imperio parerent, miseras: claros omnes viros, quique magnas res gesserint, quorumcunque nomen ac fama ad posteritatem celebris sit, in liberis civitatibus semper fuisse: Principes enim ac Reges nimis se effferentem virtutem subjunctorum odisse, eamque omnibus iniquitatibus premere solitos, & extinguatam cupere: alebat præterea illorum spem commune universæ civitatis in Galeacium odium, ut sese facinore patrato, non modo tutos ac defensos ad satellitum Galeacii impetum, sed tamquam libertatis auctores conspectos ab omnibus certatim complexum iri sperarent: cujus libertatis nomen tota urbe discurrentes subicere constituerant: fuit enim Galeacius, veluti monstrum quoddam, ex ingentibus vitiis & virtutibus conflatum: præfulgebat in eo magnifica liberalitas, atque in omnes tam quam exteros beneficentia; domestici cultus multiplex splendor omnes Reges ætatis suæ superans: conspiciebatur enim ingens vasorum aureorum & argenteorum multitudo; nobilium equorum ex omnibus nationibus conquistorum innumeri greges: eminebat in primis venaticus apparatus; quem infinito sumptu tuebatur, ut ea res sola illi centenis sexagenis millibus aureorum nummum quotannis staret; immani, ut illis temporibus, summa: nam, præter stabula canum, in primis oculos spectantium tenebant in peramplis porticibus falconum & accipitrum prælongi ordines perticis infidentium; pendentia serica aulæa auro & argento egregiis acus picturis distincta & variata: doctrina, eloquentia, omnibusque ingenuis artibus claros viros undique conquistos, magnisque stipendiis conductos apud se in honore habebat; ad hoc bonos & recti exempli homines fovebat & amplectebatur;

batur: contra vitii inquinatos & maleficos homines oderat & infectabatur: faciles aditus, benignae aures: procedebant stipendia numquam intermissa aut retardata: cujus rei tam diligens observator fuit Galeacius, ut omnes, qui illis alebantur, quae fuit infinita multitudo, tamquam in arca condita ea haberent. Egregias virtutes ingentia vitia deformabant, flagitia ac foedae corporis libidines; quibus injurias saepe addebat, stupratis à se matronas suis prostituendo, inhumana crudelitas, avaritia, ac rapacitas infatiabilis; nova onera subjunctis alia super alia imposita: quae vitia virtutum splendorem obruentia execrabile odium illi vulgo conflagrant.

Tria sunt in conjurationibus pericula, quae singula superare incredibilis felicitatis est: primum in conjuratione ipsa ducenda, quae si diutius extrahitur, vix fieri potest, ut non res vel prodicione, vel levitate alicujus ex consilii consortibus, vel aliquo verbo temere pronunciato, vel aliquo nec opinato casu emanet: alterum in facinore patrando, quod in Principem ipsum intentum sui ipsius cogitatione animum, cum hora advenit, confundere ac pavore defigere solet; deinde majestas ipsius Principis mentes hominum quadam sui veneratione obstupesciens, ad hoc ingens Procerum atque armatorum & satellitum circumfusorum numerus; quae omnia juncta tanto horrore mentes perfundunt, ut ferocissimi ceteroqui homines, atque in assiduus caedibus versati, quique in acie adversus mille in se intentos gladios inter foedam & horribilem circa se cadentium stragem intrepidi steterint, ab hac una infinita terroris mole obrutis animis concenterint: tertium, post patratum facinus, periculum laeti vel tristici exitus. Horum trium, duo consilio & audacia conjuratorum superata sunt: nam diutius re extracta, ac nonnullis clientibus ad extremum in consiliorum societatem acceptis nihil umquam emanavit: cumque Dux ad templum divi Stephani die divo illi festo, magno Procerum numero ac tota fere Nobilitate stipatus, ad hoc magna armatorum & satellitum manu latera cingentium accessisset, nihil adolescentes tanto terrore offuso infracti sunt: Lampugnansque obviam Duci factus, tamquam turbam officii causa submovere vellet, nemine mirante, (erant enim omnes tres in intimis familiaribus & Aulicis Ducis) genu nixus, sinistra in speciem libellum porrigentis elata, dextera pugione inguen ad ventrem Ducis duobus lethalibus vulneribus hausit: duoque reliqui accurrentes binis & ipsi lethalibus vulneribus Ducem confodiunt; qui, tantum Deipara nominata, exanimatus corruit. At tertium tempus usque adeo duobus superioribus non respondit, ut exitiale è vestigio omnibus fuerit: nam & Lampugnans à feroci Aethiope, qui Duci erat ab equo, cum laciniis mulierum in solo confidentium implicatus cecidisset, illico interfectus est. Olgiatus vero & Vicecomes acerbissimo supplicio ac cruciatibus omni humanae patientiae intolerabilibus audaciam luerunt; cum Hieronymus deformitatem illam virtute honestasset; qui cum, carnifice pectus ferro aperiente, acutissimo doloris morsui succumbere inciperet, subito ad pristinum animum reclusus, constanti & intrepido vultu haec verba pronunciavit; *Collige te, Hieronyme, egregii facinoris memor: mors quidem acerba, at fama perpetua; stabit vetus memoria facti.* Mortuo Galeacio, nimioque illo imperio civitate liberata, Principeque successore mansueti ingenii puero, ac tutrice & omnium rerum procuratrice & moderatrice matre, placidis & amoenis moribus muliere; res Genuae in multum tempus quiescere posse videbantur: si per capita Factionum in oratio esse licuisset. Ii variis in locis dispersi, omni-

A bus viis res novas tentandi ad eam diem obstru-
ctis, omnique undique spe praecisa, morte Galeacii
audita, omnes ad spem mutandae fortunae animos
erexerunt.

At Genuae, nuncio caedis perlato, Vicarius Magistratibus ac multis ex principibus civitatis convocatis, cum initio orationis eadem dissimulasset, Ducemque tantummodo vulneratum dixisset; atque omnes tanti parricidii consortes comprehensos esse, meritas poenas sceleris mox duros; nullumque motum Mediolani factum: verum, ut Ducem ex humanis decedere contingat, nihil praeterea, quam jacturam unius capitis fieri, omnes vires ac fundamenta principatus stare; paratum esse successorem alterum ex duobus Galeacii liberis Joannem Galeacium natu majorem; ipsorum porro prudentiae esse saluti ac tranquillitati patriae consulere, ac providere, ne quos inexpectatus ac subitus casus motus excitet. Magistratus & omnes convocati atroci re commoti, sententiis exquisitis, octoviralem Magistratum creant, qui quieti civitatis tuendae omnibus curis invigilent; amplissima omnium rerum facultate ea de causa illi permittit. Is Magistratus initio insequentis anni, qui fuit ejus A. C. saeculi septuagesimus septimus, pecuniis ex tributo 1477: erogatis, ducentos pedites ordinariae custodiae praetorii addidit: nonnullis frumenti medimnis in plebem, permulcendorum animorum causa, distributis: per quod tempus Franciscus Soffia Jurisconsultus Genuensium Orator quinque aureorum nummum millia à Sixto Pontifice in tutelam insulae Chii impetravit.

Initium motuum factum est ab Joanne Baptista Guarco; qui cupidus Factionem suam jamdiu consopitam ac pene oblitteratam renovandi, magna armatorum manu corrogata, tota valle Porciferæ discurrens, multis sese illi subinde adjungentibus, omnia tumultibus complevit. Hujus tumultus causa, nonnullae peditum centuriae Mediolano statim Genuam missae sunt: quarum una artam atque arduam viam ingressa, nullo certamine à rusticorum manu, qui omnes angustias infederant, vestibibus & armis spoliata & profligata est, Guarco suo jussu id factum negante: ceterae, per altiora montium tuto & pacato itinere facto, ad mare incolumes pervenerunt; ex opidoque Vulture navigiis in urbem vectae sunt.

Per idem fere tempus Carolus Adornius atrocissimam injuriam fratris conquerens, quem nullius criminis insimulatum Mediolanenses tot jam annos in arce Cremonae in custodia habuissent; ne Galeacii quidem morte, in qua omnes fere ingentium noxarum rei, ac capitalia ausi è carceribus & vinculis soluti fuissent, illum dimisissent; in vallem Porciferæ venit, magnumque hominum Factionis suae numerum illico ad se contraxit. At altera parte Fliscorum Factionis homines maritima Orientalis orae Ligusticae incolentes, ipsi per se sine ullo capite motus excitarunt, cupidi injurias Fliscis à Mediolanensibus impositas ulciscendi: igitur cum magna illorum manus ad Reccum opidum convenisset, montana petunt; consilio castella veteris ditionis Fliscorum, quae illis exactis praesidiis Mediolanensibus tenebantur, expugnandi. Erant tum Romae Fliscorum exsulantium capita; cum Genuae unus tantummodo adolescens superesset Joannes Georgius. Is cum assiduus nunciis & precibus ab his, qui arma moverant, caput rerum accerferetur, eniso Vicarii Ducis imperio, ne ab urbe discederet, retinebatur: cujus etiam rei causa occulti custodes illi circumdati sunt: ceterum, accersentibus nullum instandi finem facientibus atque obstantibus, causam ab ipso suam prodi, custodibus elusis, atque imperio spreto, ex urbe evadit; ac Tur-

S f riliam

riliam se confert, magna lætitia à suis exceptus: verum, cum firmiore ætate ac robustiore animo ad res regendas opus esset; paullo post Matthæus Fliscus Danielis filius ad illos venit.

Tanti undique motus & tumultus urbi circumfusi omnia Genuæ sollicita & suspensa faciebant: in qua occultæ motuum causæ sensim gliscebant, quas nonnulli inquieti ingenii è populari corpore homines, ac præsentium rerum status pertæsi, & rerum miscendarum cupidi, sensim ferebant: ii, omisso discrimine, falsa, an vera jacerent, ac verane, an falsa invidia Nobilitatem onerarent, fremere vulgo, totam fere Rempubicam Nobilibus cessisse; illos in consilium adhiberi, illos consuli, illorum sententia & arbitrio omnia regi & administrari: indignissimum esse, Nobilitatem, quæ dimidiam Reipublicæ partem, eamque populi beneficiariam habeat, artificijs suis totam illam ad se attrahere: qua oratione cum motus in animis hominum facere inciperent, eorumque licentia impunitate quotidie augeretur; metu poenarum cohibenda visa est: igitur, nonnullis, quorum suspectior erat audacia, in prætorium vocatis, ac graviter & asperis verbis objurgatis; duo ex ipsis, ut eorum exemplo ceteri comprimerentur, Baptista Delphinus & Benedictus Ponzonus comprehensi, ac vincti apparitoribus in carcerem ducendi dati sunt: quæ res per urbem vulgata haud exiguos motus continuo excitavit: nam Baptista Costa & Gregorius Sorius, nonnullique alii ejusdem in Republica sensus homines, soliti in consilio libere sententiam dicere, ac Nobilitatis voluntati obviam ire, subito ad arma conclamant, populumque ad seditionem hortantur: vociferantes, Nobilibus auctoribus ea fieri, quorum consilium sit comprehensorum morte ceteros à sententia in consilio libere dicenda detertere; ut nemo posthac adversus illorum libidinem vocem libertatis memorem mittere audeat: seditioneque commota; in strepitu & tumultu furentis multitudinis Ponzonus ex apparitorum manibus ereptus est; cum Delphinus jam ante vultu obducto, silentio in arcem ductus esset. Jam tabernæ claudi cœperant; seditioneque magis ac magis sæviente, ingens timor principibus civitatis est injectus: qui Vicarium Ducis circumstantes omnes pro se quisque sedulo monere, ut furenti multitudini cederet, nec materiam imminenti incendio præberet: paruit Vicarius, Delphinusque extemplo dimissus est; turbæque illico conticuerunt.

Urbanis motibus auditis, Matthæus Fliscus incertus primo animi addubitavit, an Genuam peteret: tandem speciosioribus vincentibus silentio noctis cum paucis armatis, quos precibus secum trahere potuit, ad urbem accedit: scalisque mœnibus urbis admotis, ut tum erant omnia Genuæ custodiis & vigiliis soluta, procuratione Reipublicæ Vicario pene omisâ; quinquaginta armati mœnia transcendunt, portulaque Olivellæ appellata, quæ perpetuo negligenter adservari solet, reliquas copias introducit; ac colle hortorum Cariniani occupato, libertatis nomen clara voce subjicit: cui se nonnulli illico adjungunt, levique prælia inter ipsos & prætorianos prodeuntes in variis locis urbis commissa sunt: à quibus prætoriani, quamquam & numero & genere firmiores, inferiores semper discedebant; modicoque edito prælio pugnam statim omittebant, formidine saxorum, quæ à mulieribus & pueris cum ipso ingenti detrimento superne in ipsos creberrima dejiciebantur: ut facultas data sit Matthæo integram noctem tota urbe discurrendi, ac seditionem cingendam: quæ res sine effectu fuit; ut orto sole Matthæus se cum paucis relictum viderit, similisque exitus Hieronymi Gentilis animo obversaretur: cepisset

profecto fugam ceteri omnis consilii inops; nisi spes, unde minime expectabatur, jacentem erexisset. Petrus enim Auria Petri filius, principibus familiæ invitis ac deterrentibus, cum sese ex consilio repente proripuisset, togaque abjecta, ac telo arrepto, cum Matthæo conjunxisset, multique ex familiæ Auria clientibus se cum illo conficiant; neque principes familiæ clamoribus, minis, adhortationibus, ad extremum precibus illos à temerario ac præcipiti consilio avocare potuissent: duplicatis viribus, atque auctis animis, Vicarium oppugnare adorti sunt Matthæus & Petrus; prætorianis, portam Hircorum & turrim sancti Stephani adhuc tenentibus, prius dejectis. At Vicarius, cum principes civitatis illum retinere conarentur, ipseque prævalida ac delecta mille armatorum manu communis esset, numquam tamen se septis prætorii credere voluit, sed in arcem cum omnibus suis vir supra modum timidus se recepit, agmine trepido & incomposito; Genuensibus urgentibus ac terga cadentibus; nihilque prætorianis præ timore superne venientium saxorum resistentibus, ac galeas, thoraces, scuta, lanceas, ut expeditior fuga esset, passim abjicientibus: factumque est, ut armati ab inermibus, multi à paucis caperentur, ac vulnerarentur; multique ex prætorianis in eo itinere sunt desiderati. Operæ pretium est considerare, quo furoris & insaniæ commota multitudo progredi soleat: quæ, cum audisset, Vicarium prætorio excessisse; tamquam prætorium invisorum hostium munimentum & arx esset libertati imminens; ac non communis patriæ & publici consilii domicilium; accurrens, ea in illud foedæ rapacitatis exempla edidit, quæ nulla barbaries umquam edidisset: prætorio enim direpto non satis habuit vasa & supellectilem Mediolanensium asportare; sed ipsarum portarum fores, ac fenestrarum valvas revulsas, omnemque materiam, quæ prædæ facilis fuit, abstulit: quarum rerum resectio haud exiguo pretio publice stetit.

Matthæus igitur & Carolus Flisci civitatis potentes facti universæ civitatis consilium convocant, ac de Republica constituenda referunt. Postulare tempora visa sunt, ut regimen rerum penes populares esset: Nobilitatis igitur Factione haud reclamante, creatus est magistratus ex popularis corporis hominibus, qui summæ Reipublicæ præficeret; appellatique sunt libertatis Genuensis præfides: ii fuerunt, Petrus Magiolus, Dominicus Promontorius, Ludovicus Rivarolus, Bartholomæus Canicia, Nicolaus à Marco, Gregorius Vuada: perpetuo artificio usa Nobilium Factio; ut per speciem habitus honoris popularium animos sibi conciliaret, ea procuratione Reipublicæ illis cedens, quæ brevi lapsura esset; quamquam mox duo ex Nobilitatis Factione illis additi sunt, Cervas Auria & Hieronymus Grimaldus: cumque inter majores occupationes, majores curæ non essent negligendæ, negotium datum est quattuor civibus, Alexandro Spinulæ, Uberto Folietæ, Carolo Lomellino, Baptistæ Justiniano, Florentinos, qui contra publica edicta Saonam usque trimenibus progressi erant, bello persequendi & ulciscendi. Cum bellum à Mediolanensibus haud dubie immineret; adversus illos iidem Matthæus & Carolus Duces creati sunt: ceterum Optimates ac principes civitatis longe magis multitudinem, ac tenuiores, plebemque rusticam armatam horrebant, assiduusque direptionis metus bonorum animis infidebat: cum immatura Matthæi & Caroli ætas, apud quos omnia tenuia essent, tantæ negotii moli par non esset: evocari igitur Roma placuit Ibletum Fliscum caput familiæ, ac magnæ auctoritatis hominem: in quo uno & animus & facultas esset; neque voluntatem

tatem defuturam pro certo crederent imminentes motus comprimendi, Rempublicamque è tanto periculo eripiendi. Variis casibus ætatem agitam habuit Ibletus: nam initio principatus à Galeacio, cui suspectus fuit, opidis ac vicis antiquæ ditionis Flischorum, ceterisque omnibus suis spoliatus, ac Mediolanum ductus, ibi aliquot annos in custodia fuit: astu tandem è manibus Ducis elapsus, omnium rerum inops multas orbis partes pervagatus, cum usque ad extrema Galliæ processisset, tandem Romam cum Joanne Ludovico fratre minore natu venit, brevique familiæ commendatione, quæ Romæ perpetuis honoribus florisset, ac summum rerum fastigium aliquando tenuisset, gratiam ac voluntatem multorum Aulæ Procerum, atque ipsius Sixti Pontificis tenuit: à quo diu sustentatus est, omnibus in domesticum cultum laute præbitis: retinebatur tamen à Pontifice rebus Mediolanensibus favente, ac quieti Liguriæ consulente, quam inquietum Ibleti ingenium posset turbare: qui, cum per crebras litteras Genuam ab Optimatibus accerferetur, nonnulli quoque Cardinales clam illum hortarentur, ut ad liberandam patriam properaret; noctu clam biremi, quæ forte eo tempore in flumine reperta est, conscensa, secunda navigatione usus brevi Genuam pervenit, honorifice ac læte ab Optimatibus & omnibus bonis obviam effusus exceptus: cui statim summum bellicarum rerum imperium mandatum est.

Eodem tempore ceterarum omnium Factionum capita animis erectis Genuam venerunt: ii fuerunt Carolus Adornius, Augustinus & Jo. fratres Adornii, Raphaelis filii, qui ipse quoque Dux Genuensium fuit: qui tamen urbem ingressi non sunt, quamquam ab Ibleto & libertatis præsidibus invitati; sed in cœnobio divi Benigni substiterunt. Fulgosi quoque deinceps venerunt, Jo. Galeacius, Thomasinus, Paulus urbis Archiepiscopus, qui Dux fuerat: qui ipsi quoque extra urbem substiterunt. Eo tempore multis de causis infelicissimus erat civitatis status: nam & omnium animi exspectatione suspensi & metu solliciti erant, ancipiti & utroque ingenti periculo imminente; hinc à capitibus Factionum, quarum jamdiu compressa cupiditas ne tandem erumperet, periculum erat; illinc à Sfortianis Principibus, qui magna ope comparare audiebantur: sed longe magis urebat intestina, visceribusque hærens pestis, detrimentaque, quæ quotidie ab arce accipiebantur: tetraque & miserabilis erat rei facies; cum arx crebris bombardarum ictibus, ad hoc mortariis novo quodam prægravis missilis genere subjecta tecta continue peteret; quæ, nullo ictu vano accidente, perfringebant, cum hominum, ac mulierum, & puerorum cæde: quæ mortaria in altum emicantia ac magno impetu decidentia fœdas publicorum & privatorum tectorum strages edebant: quorum tanta vis in prætorium contorta est, ut, tectis omnibus in partibus perforatis, atque inferioribus tabulatis perforatis, nemo illud subire auderet. Idem erat privatorum ædificiorum subeundorum metus; cum nemini tutus esset in suismet ædes receptus: tormenta enim, non unum tantum urbis locum petebant, sed passim emissâ nullam partem intactam relinquebant: quod malum, cum sua ipsum perniciem, magnum erat, tum metu & sollicitudine abominabilius: quippe damnum ad paucos perveniebat; metus atque exspectationis exitii nemo expers erat.

Interea Mediolani magnæ equestres & pedestres copiæ coactæ sunt; quarum Dux creatus est Robertus Sanseverinus, qui ea tempestate rerum militarium scientissimus habebatur: additi illi sunt tres ex Principis patris, Sfortia, Ludovicus, Octavianus per speciem honoris Mediolano ab-

A gati; cum tanta fratrum multitudo rebus prægravis esset. Interea Ibletus omnibus curis in res præmunientibus intentus, arcem Castellacium appellatam, in cacumine montis urbi ab Occidente imminentem, custodibus, primo propugnaculo eorum negligentia subito occupato, turpiter se tradentibus, occupavit: nec parum ejus arcis expugnatione ad summam belli profectum videbatur: ea enim arce præfidiis in arces urbis à superioribus locis submittendis iter intercludebatur. At Sfortiani Genuam suis ipsam quoque viribus expugnandam rati, Prosperum Adornium è carcere educunt: injuriam, quæ tamen à præsentis Principe illi facta non sit, temporibus excusant: animum ingentibus donis atque ingenti habito honore permulcent: Vicarium enim illum Genuæ creant, ingentiumque præmiorum spe erigunt; hortantur, ut fortem & fidelem operam in recuperanda Genua, cui ipse cum summo imperio perpetuo præfuturus sit, Principi navet: qui hoc summum illi beneficium perpetuo sit debiturus, & Genuæ & dignitatis suæ recuperatæ. Accepit conditionem perhonorificam læto animo Prosper, vir sincera fide ac constanti ingenio. His apparatibus nonnullorum principum civitatis ac bonorum animi occulte lætabantur, pristini ac quieti civitatis status cupidi.

C Interea Sfortianus exercitus, omnibus rebus satis paratis & instructis, movet: numerus copiarum, præter eos, qui subinde adjuncti sunt, fuit centum viginti peditum signa; quæ ducebat Donatus cognomento Comes, magni in rebus militaribus nominis, qui rudimenta primæ ætatis sub Francisco Sfortia posuerat; subque illo perpetuo militans omnes belli artes prædidicerat: & quattuor peditum alæ, quarum præfectus erat Joannes Comes: cum his copiis Sanseverinus ab opido Sarravalle vallem Scriveriæ ingressus, Buzallam venit: multi autem erant in exercitu nobilitate & opibus insignes Proceres: summus ipse Dux Sanseverinus, tres Principis patrui, quos diximus, Prosper Adornius, Joannes Palavicinus, qui multos annos Genuæ præfuerat, Joannes Jacobus Trivultius Erasmi filius, Petrus Franciscus Vicecomes; multique primæ nobilitatis viri: qui insignibus armis fulgentes, ac generosorum equitum gregibus conspecti egregias clientium catervas secum trahebant: cum Marchio Montisferacis delectam quoque quingentorum peditum manum ad exercitum misisset. Conjunxerunt se cum exercitu omnes Spinulæ familiæ principes; quorum caput fuit Alexander Jurisconsultus, qui honoris & auctoritatis locum, quem in consilio Galeacii obtinuerat, adhuc retinebat. Ii magnam hominum vim ex vallibus Scriveriæ & Borbiliæ, quibus tum Spinulæ imperabant, præmiorum spe allectam secum eduxerant.

D Interea ad Prosperum magna Porciferanorum suæ Factionis hominum manus convenerat: quibus iter expedientibus & præmunientibus, hostiles copiæ, sine certamine superatis jugis, in vallem Porciferæ descendunt; pacatoque agmine, itinere per longitudinem vallis facto, ad mare perveniunt. Interea Carolus Adornius, Prosperi frater, nocte, quæ præcesserat, arcem Castellacium clam intraverat: cum quo complures Factionis suæ homines clandestinos sermones contulerunt; ordoque rerum gerendarum inter ipsos compositus est.

F At Ibletus, ceteris omnibus neglectis, omnes curas in hostilem exercitum intendit; quo superato, vel abacto, cetera omnia tuta & proclivia fore sperabat: quidquid igitur roberis ac floris in juventute Genuensi fuit, ex urbe emissio, dorsum collis Promontorii copiis suis occupat: quibus præfectus est cum ceteris Fulgosiis ipse idem Paulus, qui in eodem loco ante annos sexdecim de Gallis eodem modo

Genuam petentibus claram victoriam tulerat; ut fortuna loci, memoria parti decoris nondum oblitterata, fiduciam Genuensibus augeret: qui transverfis trabibus, atque omni materiæ genere itinera claudere instituunt, adscensum quoque ad superiores partes variis objectis impedimentis hosti adimere: quem interea Guarcus magna Porciferanorum manu, per varias occasiones terga & latera incessendo, carpere non desisteat; qui ultra flumen Porciferam in pago Corneliano in patenti litore, atque equitatu explicando apto, confederat. Intervent res, quæ quamquam nullum momentum ad summam rerum fecit, tamen omittenda visa non est. Benedictus enim Spinula, qui cum duabus triremibus suis Legatos ad Pontificem vehendos ceperat, mutata subito (incertum qua de causâ) voluntate, in portum rediit: suspectum fuit Ibleto Benedicti factum: hominem igitur duabus triremibus, quas Philippus Lomellinus ducebat, in illum emissis, improvise comprehendere parat. Spinula, cum rem sensisset, fuga se periculo præripuit: quem cum Lomellinus aliquantum spatii infecutus urgeret, Spinula sub collem cœnobii sancti Andreæ tutum receptum habuit, læte ab exercitu acceptus, tamquam suarum partium homo. Noctem, quæ consecuta est, hostes haud parvo metu sollicitam traduxerant: nam neque Porciferanis itinerum ducebatur satis fidebant, instabilis fidei & mutabilis ingenii hominibus; & adversos colles armatorum completos, crebrisque facibus collucentes cernebant; ad hoc totam belli cogitationem amplectentes angebantur, se magna annonæ inopia laborare: neque, omnibus viis clausis & obstructis, ullum aditum ad urbem videbant: omnis igitur spes in motibus civitatis esse: nam idem, quo venerant, retro iter repetere, nulla re tentata, ac tot locorum angustias superare, id cum turpe, tum periculosum in primis videri: orta luce, exercitus torrente, qui fere exsiccatus erat, trajecto, ad promontorium sensum accedit: primum agmen erant scutati: hos sequebantur sagittarii: postremi erant scloparii: claudebat agmen innumera multitudo, non tam ad pugnam, quam ad subsidia & supplementa cadentium instructa: equites ad radices collis substituerunt: cum ad cacumen evasisent, prælium cum Genuensibus commissum est, primo Lombardis secundum; deinde valida Genuensis juventutis manus superveniens, prælio inito, fortunam pugnæ mutavit: nam averfos Lombardos ad radices collis retro compulit, qui tamen præsidio equestrium alarum tuti fuerunt: quam rem cernens Sanseverinus, non deferit se; sed vetus ac peritus Dux equites ad pedes descendere jubet, ac trabes & cetera munimenta à Genuensibus opposita securibus & dolabris refringere imperat: quod dum illi impigre exsequuntur, interea Lombardi, colle iterum conscenso, majore conatu prælium repetunt; quod dum atrox esse incipit, incidit casus, qui rem decrevit. Carolus enim Adornius cum delecta, neque numero exiguo, armatorum manu arce erumpens, Ibletum, qui cum paucis, neque his satis firmis in urbe substiterat, valida impressione aggressus, primo impetu fundit ac fugat: qui civitate illico excessit. Ejus rei nuntius cum eodem tempore in utrumque exercitum perlatus esset, varios animorum habitus fecit: nam Genuenses, qui ad eam horam pugnam cominus & eminus constanter sustinuisent; ac rem in favorem suum inclinassent, ut exteri Duces de omittenda pugna cogitare inciperent; continuo animis fracti in altiora montis se subducere coeperunt.

At Prosper felici occasione utendum ratus, fratre instante, prævalida cohorte clientium Adorniorum secum rapta, per inferius planum iter urbem petit, ac per portam divi Thomæ à fratre patefactam ingressus, ipse & frater tota urbe dis-

currentes, ac nomen Adornium & Spinulam tantummodo subicientes, omni mentione Joannis Galeacii compressa, ne invisum nomen animos exulceraret; totaque urbe pronunciari jubent Joannem Galeacium præteritorum erratorum atque armorum in ipsum sumptorum veniam dare. Postero die Prosper, Senatu ac multis primariis civibus convocatis, concionem habuit, in qua litteræ Principis perhumaniter scriptæ lectæ sunt: quibus Joannes Galeacius Princeps ac tutores Prosperum Vicarium suum Genuæ creabant, omnesque ad quietem ac bonum publicum atque ad obedientiam hortabantur: litteras Principis Prosper ejusmodi oratione subsecutus dicitur: *Non simulate me, neque fallaciter, sed ex animi sententia vobiscum agere, cives, vel ea sit fides, quod qua vobis publice suaserim, ea ipse prior privatim sum amplexus: atrocibus injuriis à Galeacio affectus, omnibus meis spoliatus, tetro carcere diu maceratus, quem animum erga illum gesserim, ad intimos suos quisque referat sensus: en Joannes Galeacius filius lenissimo ac benefico ingenio Princeps, beneficiis suis paternis injurias obliteravit; meque, omnibus meis restituit opibus, etiam & honoribus auctum, Vicarium Genuæ creavit: quod munus non tam honoris mei, quam communis boni & salutis causâ, mihi gratum fuit: quod ego studium, quamque sinceram fidem benemerito Principi constanter præstare decrevi, eandem ut vos quoque illi præstetis, communis parens nostra, quæ aliter salva esse non potest, vos hortatur, cives: nam, per Deum immortalem, quid tandem querimus, aut quid nobis volumus; quemque tandem fructum ex discordiis civilibus petimus, nisi ultimum rerum omnium interitum? una præteritis malis nostris, quibus misera patria lacerata & exinanita est, salutis via inventa est, Sfortiarum principatus: quod consilium divina Francisci virtus approbavit; quæ nobis continuo pacem, quietem, tranquillitatem restituit, ac finem tantis ærumnis tandem imposuit: ut omnes latremur, in tantis hujus sæculi tenebris hoc lumen nobis affuisse; vota quoque pro illius vita faceremus: ignosci nobis potest; si Galeacius filius superbia sua, ac diversa à clarissimo & sapientissimo parente regendi ratione animos nostros à principatu Sfortiano alienavit: ejus nunc morte omnes irarum causæ sublata sunt; resque in pristinum optimum Franciscani principatus statum restituta sunt. Joannes Galeacius avitorum potius quam paternorum morum emulus in gratiam nos accipit, nos amplectitur; omnia, quæ à benignissimi Principis liberalitate expectari possunt, prolixè ad nos defert; ut tempora Francisci, in quibus unis felicissimus fuit Genuæ status, plane redierint. Quid est igitur, quod tantum ultro oblatum donum, quod unum arx salutis nostræ est, non toto animo amplectamur? aut quam (malum) libertatis inanisimam ac falsissimam speciem consecramur? ad meliorem igitur mentem nos convertamus; optimumque hunc Reipublicæ statum, qui omnibus pacis bonis civitatem hanc brevi florentissimam facturum sit, amplectamur. Oratio varie, prout cujusque sensus erat, accepta est.*

At Sanseverinus reliquias belli conficere pergit: arcesque Montobium & Savinionum, Ibleto ipso tamen tradente, adimit: cum ille initio quinque millibus partim maritima, partim montana incolentibus coactis, aliquandiu restitisset. Hunc Sanseverinus, minime opportunum quieti Genuensium ingenium Mediolanum secum duxit, data fide liberaliter & honorifice illum à Principe tractatum iri: & constitit fides. Præerant tum quidem in speciem rebus Mediolanensibus mater Principis & consilium Procerum illi additum: ceterum jus imperii, & omnium rerum regimen & arbitrium erat penes Cicchum Simonettam: qui alienigena ex mediocri sorte ad summum auctoritatis locum apud Franciscum & Galeacium, ad eamque potentiam pervenerat, quæ in quovis Principis ipsius affine & cognato immodica & invidiosa fuisset: ejus igitur opera, cum, Donato Com-

Comite capto, pervulgatum esset, quattuor Ducis patruos, unaque cum illis Robertum Sanseverinum consilia novandi res struere; Sanseverinusque, Donato capto, una cum Ibleto Flisco aufugisset; Octavianus unus ex patruis Principis fuga & ipse capta in trajectu Abduæ, equo ab impetu fluminis perverso, undis haustus est: reliquis tribus fratribus, Ascanio, Sfortiæ, Ludovico locus exulii singulis definitus est, Neapolis, Pisæ, Perusia; quæ ad splendidum cultum tuendum pertinebant, perample præbitis. At Sanseverinus & Ibletus disparē fortunam habuerunt, qui ambo in confinibus comprehensi: Sanseverinus dimissus est; at Ibletus Mediolanum reductus in custodiam traditur. Mediolanenses igitur Joannem Ludovicum suspectum habentes; illumque, Ibleto fratre captivo, aliquid haud dubie aufurum, atque immiscere tentaturum rati, omnibus minimis rebus invigilantes, hominem ex ea, quæ reliqua illi erat, ditione exterminare constituunt: adversus quam tantam in se intentam procellam Jo. Ludovicus, quamquam omnium rerum egens, tamen fide, charitate, constantia, studiis suorum, quæ summa & incredibilia in illum constiterunt, fretus, ad resistendum se parat: editisque ac summis cacuminibus se tenens, omnes viarum angustias munimentis objectis obstruit. At Joannes Comes & Joannes Palavinus copiarum Mediolanensium Duces, cum copiis, quæ fuerunt peditum duo millia, equites quinquaginta, Genua movent; terrestrique itinere insuperabili omisso, Rapallum opidum copias trajiciunt, opidumque communiunt. Rationes Flisci postulassent, ut ipse munitis & inaccessibilibus locis se tenens, sine ullo discrimine rerum suarum conatus hostium inspectans cluderet; ceterum inopia rerum subactus, cum suos alere jam non posset, in inferiora & plana descendit: adversus quem hostis profectus non sine sanguine & cæde averfus est, & in opidum retro compulsus; quotidieque per varias occasiones prælia inter illos committebantur. Tandem Joannes Ludovicus, cum durare jam non posset, necessitatibus victus, ad iniquas pacis conditiones descendit: opidis Turrilia & Roccataliata hosti cassis.

Parvum hoc bellum majorum motuum origo fuit: ut eo tempore bella ex bellis feri necesse videretur: suspectum enim Prosperum Sfortianis fecit; à quo ferebatur occultis subsidiis Joannem Ludovicum adjutum: ad hoc fama exierat, Prosperum filiam suam Joanni Ludovico matrimonio collocare: quod etsi falsum fuit, filia Marchionis Finarii paulo post ab Joanne Ludovico ducta; arta tamen affinitate Prosperum matrimonium illud cum Joanne Ludovico conjunxit: sororis enim Prosperi filia nova nupta erat. Hominem igitur mandato vicariatus munere exigere decernunt; ac nisi voluntate cedat, vim adhibere: tam parum stabilis est Principum gratia, atque omni levi aura suspicionis mutabilis: ceterum Sfortianos brevi poenitentia consiliorum cepit: nihilque in rebus Genuensibus novandum visum.

Eo tempore Thomasinus Fulgosius indignans segni exilio se consensescere, agitare animo cœpit de nova aliqua re audenda & molienda; rem ex re feri disctans, fortunamque rebus moderari; eam audentibus adesse, segnes deferere. Præbuerunt occasionem consiliis turbulentæ jamdiu Corforum res; Proceribus illius insulæ magistratus Sfortianos spernentibus; ac capitibus Factionum bellis civilibus, cædibus, direptionibus, ceterisque belli cladibus omnia vastantibus; qui etiam soluti Principis metu tributa non solverent. Thomasinus igitur in ea insula se aliquid moturum sperans; cum præsertim consideret, sese materna origine Corsica oriundum, acceptum animis Corforum fore; parva quædam

A navigia in portu Thelamonis nactus, iis consensens, cum delecta trecentorum armatorum manu ex eodem portu solvens, Corsicam tenuit; primoque adventu Beguliam opidum, ut inter Corsos non contemnendum capit: qua re Genuæ audita, Ambrosius Langasus cum duobus militum millibus, quos adversus Prosperum, ut diximus, Genuam adduxerat, continuo Corsicam petit: copiisque expositis, ac Beguliæ admotis, Thomasino ad deductionem illico adacto leges imposuit, ut ipse sedes ac domicilium cum uxore ac liberis Mediolanum Verona transferret: ita motus Thomasini eodem fere momento temporis excitati & compressi sunt. Longe majoribus tumultibus, seditionibus, cædibus, incendiis, direptionibus, eversionibus Liguriæ ora in Orientem versa ardebat: cumque Catalani excursionibus suis cuncta insuper infesta facerent; quattuor triremes adversus illos missæ e portu sunt: quarum duæ inscitia Trierarchorum Antipoli obsessæ, tandem in potestatem hostium venerunt. Dolore ardentem Genuenses sex triremes illico instruunt; quibus præficiunt Ludovicum Rivarolum, virum strenuum & experientem; cujusque fortitudini & virtuti civitas in primis fidebat: Trierarchi fuerunt Benedictus Spinula, Gregorius Centurio, Joannes Baptista Calvus, Franciscus Montaltus, Andreas Albericus, Franciscus Mainerius: cum hac classe portu egressus Ludovicus hostem quærere instituit: qui cum in alto procul apparuisset; e vestigio Rivarolus classē in illum concitat; qui certamen detrectans, fugæ se mandat; remorum beneficio evadit. Rivarolus spe frustratus, ut aliquid operæ pretium faceret, insulas Sardiniam, Corsicam, Siciliam circumvehitur; nemineque invento, Genuam revertitur.

Interea, cum inter Prosperum & Mediolanenses omnia in dies suspiciosa fierent, alterique struendis, alter cavendis insidiis assidue intenti essent, Prosper majoribus præfidiis adversus Sfortianos salutem suam & rerum suarum statum præmuniendum intelligens, initio ejus, qui consecutus est, anni ejus sæculi septuagesimi octavi in opem Ferdinandi Regis Neapolitani, quem Sfortianis & Reipublicæ Florentinæ infensissimum noverat, confugit. Enimvero Ferdinandus occasionem omnibus votis optandam ultro oblatam cupide arripit; seseque Prosperi, atque ejus salutis & dignitatis perpetuum propugnatorem fore profitetur; omnesque regni sui vires ad illum prolixè defert: qui, ne verbis ac promissis, quam re promptior videretur, ingens auri pondus cum duabus triremibus ad Prosperum mittit: quo præfidio confirmatus Prosper sese ad resistendum Sfortianis comparat: qui cum hæc sensissent, mandatum munus illi abrogant: in cujus locum Episcopum Comensem sufficiunt; eumque cum paucis occulto Genuam mittunt, ac quid facto opus sit, docent. Ille, mutatis vestibus, clam, omnibusque ignaris, urbem ingressus, in ædem divi Syri se recipit: eoque Senatu ac compluribus ex principibus civitatis convocatis, litteras Principis legit; oratque, ut pro sua fide, proque ingenita in patriam charitate, sibi omni ope adesse ne graventur, in magistratu sine strepitu ac tumultu ineundo. Defixit subita & inexpectata res audientium animos: qui cum se collegissent, nemo in illis fuit, qui non rebus Sfortianis animo faveret: ceterum in consilio exsequendo sententiis variatur: alii censere, Episcopo, ipsis comitantibus, sine ullo alio apparatu, prætorium adendum; Principisque litteris lectis, postulandum à Prospero, ut abrogato munere successorī legitimo cedat: alii nimis id periculosum ac temerarium ducere: sed Aurigæ gentis clientibus, qui sunt in proximo, accersitis, præfidi-

præfidiisque ex proximis arcibus detractis, ac lateri adjunctis, tum rem tentandam. Cum nihil satis expedirent, animos plebis, quemadmodum affecti essent, circummissis idoneis hominibus, leniter tentari placuit. Miræ animorum inclinationes in Prosperum inventæ sunt, omnibus nomen Sfortianum respuentibus: quæ etiam plebs, armis illico arreptis, per urbem discurrere cœpit: cujus incitato furori Nobilitas se subtrahens, partim urbe secessit, partim se variis latebris abdidit; Episcopusque Comensis solus relictus ægre in arcem se recepit.

At Prosper, cum turbæ aliquantum defedissent, concione convocata, tali oratione usus dicitur: *Facilem assensum mihi apud vos, cives, præbebit insitum in nos Nobilium Factionis odium, ac perpetuus nos insectandi mos, non nobis solum, sed patribus & majoribus nostris toties expertus. Patrum atque avorum suorum haud dissimiles filii numquam me apud Sfortianos falsa invidia onerare, ac calumniis suis suspectum facere destiterunt, nihil de me Sfortianis tale suspicantibus: quid enim ego suspiciosi in illos umquam admisi? pervicerunt tandem, ut mihi mandatam procurationem abrogarent; aliumque in locum meum Genuam mitterent: per summum nominis mei dedecus: quod illi non tam odio mei fecerunt, nullis injuriis, aut contumeliis à me umquam lassi, quam vestri; quorum me vident adversus ipsorum superbiam atque arrogantiam acerrimum defensorem, ut meo præsidio nudatos, vos oppressos ac perpetuo pedibus conculcandos teneant. Illi vos per latus meum petunt: res est igitur non magis mei quam vestri consilii, cives: egoque id animi habiturus sum, quod vos mihi feceritis. Vultis adversus impotentem Sfortianorum dominatum, atque adeo atrociolem Nobilitatis tyrannidem libertatem vestram asserere? en ego vobis animam hanc devoveo, omnia ultima experiri ac perpeti paratus. Vultis cedere? ego quoque mox cedere paratus sum.* Miras voluntatum attractiones hæc oratio ad Prosperum fecit; omnesque ex tota concione conclamarunt, sese cum illo omnem fortunam subire paratos: sexque ex honestioribus artificibus, duobus mercatoribus additis, pacificorum nomine assumpto, electi sunt: quibus postea in consilio triginta, omnes ex popularium corpore dimidia pars mercatores, dimidia opifices, additi sunt, qui res componerent una cum Prospero, qui, vicariatus ducalis nomine abjecto, rector Genuensium creatus est, summo rerum imperio illi mandato: cui Magistratui quamquam in eo complures moderati ingenii cives essent, cum tamen aliter furentis multitudinis rabies sedari non posset, necessitas expressa est, Nobilitatem ab honoribus & magistratibus, ac publicis muneribus, omni denique procuratione Reipublicæ, lege excludendi; ut numquam, nisi cum pecuniarum exactio facienda esset, adhiberentur: quæ atrox injuria acerba in primis & intolerabilis Nobilitati fuit.

Eo tempore conjuratio à compluribus civitatis Florentiæ principibus, Pactiis auctoribus, facta est: qua alter ex fratribus Medicis Julianus in æde sacra compluribus pugionis ictibus confossus in ipso sacro acceptis, illico exanimatus corruit. At Laurentius, multis amicis ac sacerdotibus accurrentibus, in ipsum sacrarium raptus ac servatus est. Egregia universæ civitatis studia ac magna amoris significatio in Medicos exstitit: nam universa civitas confurgens, quoscunque ex conjuratis comprehendit, (pauci autem evaserunt) ignobili ac crudeli genere mortis affecit: in quibus Archiepiscopus Pisanus è fenestra prætorii cum toga ipsa resti suspensus demissus, suspendio necatus est: sævitum est in primis in genus Pactium; cujus non modo viri interfecti & excarnificati sunt; sed ad infantes quoque & imbellem ætatem ira crudelis pervenit: à qua ne ipsa qui-

dem ædificia perampla ac magnifica intacta fuerunt, maxima illorum parte solo æquata.

Interea Genuenses, cum fama ingentium Sfortianorum apparatus in dies percrebesceret, ipsi quoque diligenter comparare instituunt: ac primum omnium Roberto Sanseverino celeberrimo ejus ætatis Duci accersito summum bellicarum rerum imperium mandant. Is, postquam milites, qui, ædificiis ædi divi Syri circumjectis occupatis, ex eis usque ad forum mercatorium excurrerant, omniaque tumultibus ac cædibus implebant, haud sine certamine ac cum ruina nonnullarum domorum expulisset, sicque eam civitatis partem pacatam fecisset, eadem cura ad domos Spinulas Luculanas, quæ & ipsæ à militibus exteris ex arcibus emissis occupabantur, irritum incepto translata est: nam utraque arx Castelletum & Luculana eo majoris formæ bombardas direxerunt, quibus Sanseverinum non sine multorum ædificiorum strage abegerunt. At Sanseverinus in omnibus maximis & minimis procurandis & obeundis multimoda opera distineri cœptus est: at primum omnium memor, quantum momenti viarum angustiarum superiore bello fecissent, omnia circa urbem loca munitionibus obstruere cœpit: totum enim promontorium, quod ab urbe in mare excurrit, valido ac perpetuo munimento circumdat: præterea collem quendam in valle Porciferæ, ubi quondam arx fuerat, perpetua fossa, propugnaculis, ac tormentis communitum cingit: à qua fossa perpetuum murum usque ad montem, qui duorum fratrum appellatur, longitudinis quadringentorum passuum, altitudinis quinque pedum, ac trium latitudinis perducit: ac nulli non rei occurrens, veritus, ne hostis, veteri itinere omisso, in vallem Bisamnam flecteret, arcemque Luculanam occuparet, transverso valido muro totam latitudinem glareæ Bisamni interfecat: quod firmis propugnaculis communit, tanto artificio factum, ut ex eo milites ad hostiles ictus recti pugnarent: quibus operibus confectis, omnem exercitum Genuensem sub signis centuriat: in quo de exteris non plus fuerunt, quam quingenti armati, Neapoli per eos dies cum septem triremibus missi; quæ Legatum Pontificium vexerunt, auctoritatis & existimationis rebus addendi causa missum: cum quibus etiam venit Ludovicus Fulgosius, qui sæpe Dux Genuensium fuerat, ac trecenti, quos Augustinus Fulgosius adduxerat; ac familia & custodes corporis Sanseverini, qui omnino non plus centum fuerunt: ceterum urbanæ juventutis & circumjectorum locorum, qui omnes in armis fuerunt, innumera multitudo fuit: ut existimatum sit, nullam Italiæ urbem tantam multitudinem armare potuisse; omnesque erant armis, tam ad se tutandos, quam ad hostem petendum egregie instructi. Interea Sfortianus exercitus, qui fuit duorum millium equitum ac peditum quattuordecim millium, octo gravis armaturæ, sex levis, in quo exercitu complures Genuenses fuerunt, Sfortia Principis fratre notho Duce, movet.

Per ea tempora Joannes Ludovicus Fliscus, qui Antipoli, in qua urbe diu fuerat, Sfortianorum jussu, Carpum commigrabat, Genuensibus motibus auditis, iter Genuam flexerat, propeque ab urbe quattuor passuum millia substiterat, extemplo in urbem accersitus est; quo paullo prius venerat Matthæus Fliscus: horum adventu vires Genuensium haud parum auctæ sunt: tota Liguriæ Orientalis ora, multis montanis adjunctis, ad arma induenda ipsorum auctoritate adducta, exercituque hostium appropinquante, Sanseverinus Joannem Ludovicum, egregia armatorum manu illi addita, præcelsum montis cacumen prope urbem insidere jubet; ut ex eo hosti subeunti terrori esset, ac per occasiones detrimenta quo-

quoque inferret. Interea hostis Buzalla opido movens, atque per vallem Porciferæ iter faciens, urbi appropinquabat: jamque eo perrexerat, ut Joannes Ludovicus ex edito cacumine prima agmina cerneret: qui propere, ut jussus fuerat, sub munimentum, quod illi defendendum obvenerat, se recipit, dieque jam in postmeridianum tempus inclinato, tumultuatum aliquantum à nostris est; ut in re subita, atque ordinibus non satis explicatis: re animadversa, hostes instant, urgent tumultuantes; multique nostrorum inconsulto animi impetu proVecti, quos Joannes Ludovicus retinere non potuit, extra vallum procedentes hostem invadunt; quorum paucitas ab hostili multitudine subito oppressa est. Nuncius cladis in urbem perlatus non tam rei magnitudine tristis fuit, quam omine in summam totius belli tamquam infelicitate inchoati. Igitur Prosper & præfides belli, nonnullis pecuniis in capita Factionum distributis, illos ad fortem & fidelem operam navandam hortantur: omnesque copiae, quæ incerto hostium itinere varie per circumjectam regionem in sua cuique loca assignata sparsæ erant; cum hostis advenisset, ad Robertum contractæ sunt.

Eo tempore, concione in aream, quæ est ante prætorium, convocata, litteræ Ducis Mediolanensis nomine composita, ad Episcopum Comensem scriptæ recitatae sunt: sive illæ vere Ducis litteræ fuerint, ut sit, interceptæ; sive à Prospero & præfidibus confictæ, & ad tempus accommodatae: quibus Dux Episcopum certior faciebat, sese inter necino bello Genuenses rebelles persequi decrevisse; eosque in veram servitutem, ut reliquas urbes imperio suo subjunctas, redigere, nulla Reipublicæ forma illis prorsus relicta; arcibusque omnibus tam urbis, quam dominatus Genuensis, valido præsidio firmatis, artificibusque vinculis illos constrictos tenere: iisque de causis florentissimas equestres & pedestres copias Genuam misisse, quibus urbem diripiendam concesserit: quæ res milites dupliciter in immensum sit ditatura; & ex argenteis vasis, pretiosaque suppellectile, quarum rerum nulla omnino urbs sub cælo opulentior sit; & ex pretio tot opulentorum capitum redimendorum: bono igitur animo esse juberet, qui erant in arcis præsidio; quibus perampla præmia tot exsudatorum laborum mox essent obventura. Hæ litteræ per urbem divulgatae animos hominum ad sese & patriam à tanto imminente exitio defendendos acuerunt: populusque sub vesperum, in suas quisque domos, ad quietem capiendam dimissus est: qui, circa dimidiam noctem, tinnitu, è sublimibus turribus excitatus, subito confurgens induit arma; atque urbe exiens Sanseverino se adjungit: qui superiora cacumina tenens; cum omnes aditus munimentis obstruxisset, omniaque arte bellica præclare firmasset, hostium conatus & incepta circumspectabat.

Interea juvenus Genuensis hostiles copias appropinquantes cernens, erumpere in illas cupiebat: quam Sanseverinus intra vallum continuit: qui tamen nonnullorum superexuberanti ardori indulgere coactus est: ii protinus erumpentes hostem subeuntem sagittis atque aliis varii generis missilibus invadunt; pugnamque aliquandiu fortiter sustinent: tandem superveniente hostium multitudine, ac paucitatem gravante, pugnam omittunt & intra munitionem se recipiunt: quam hostes statim invadunt: nec minus acriter Genuenses resistunt; atroxque prælium brevi ingentibus utrimque animis accensum est; quod, spe neutro inclinata, per aliquot horas duravit: quod Sfortiani, ut exigua quiete corpora à labore reficerent, paullisper intermissum mox majore animorum ardore repetunt; pugnaque, exigua illa

A quiete viribus renovatis, magis irritata est: ter Sfortiani eo die pugnam intermiserunt, terque eandem majore irarum certamine integrarunt: tandem, viribus lassitudine & locorum iniquitate affectis, pugnam omnino omittunt: intelligentesque, neminem sanum inextinguibilibus vim afferre umquam tentasse, in sua se recipere constituunt: itaque agmine ad iter composito, ordineque servantes, superiora montium cacumina petunt: quos abeuntes juvenus Genuensis insequi, ac terga cedere, damnisque continentibus carpere cupiebat: verum à Sanseverino retinebantur; ne temere in præcipitem casum Rempublicam tanto discrimine ereptam darent: ceterum incidit casus, qui maximæ rei occasionem præbuit; nonnullæ enim triremes atque onerariæ à Ferdinando missæ, portum subeuntes conspectæ sunt: quarum adventu Sfortiani, suspicantes ingens aliquod subsidium à tanto navium numero advectum, trepidare cœperunt, atque ordines solvere, confusaque agmine iter facere: quorum timore animadverso, Genuenses, nemine illos jam retinere valente, ac veluti furore quodam rapiente, magno impetu terga abeuntium, magnisque clamoribus atque omnibus copiis invadunt: quos statim fundunt ac profligant; omnesque capiunt, præter paucos principum ac nobiliorum, beneficio generosorum equorum è peste ereptorum: reliqua omnis multitudo ad unum capta: cum non plus septingenti in tanto prælio cecidissent: neque ex tanto exercitu, præter primores, & partem equitatus, ad hoc perpaucos illos pedites, qui in angustiis annonæ præsidio substiterant, ullus ad suos incolumis pervenit: quibus Sfortianis ut nihil ad omne genus miseriæ & ignominiae restaret; maxima pars ignotorum capitum vili à Genuensibus in remum Aragonensibus venundati sunt.

D Victoria parta magis decore rei gestæ speciosa fuit, quam re civitati utilis: nam neque curæ civium in reliquias belli conficiendas, atque arces expugnandas continuatae sunt; quæ res, animis militum recenti clade fractis, perfacilis existimabatur: sed omnia solute & negligenter agebantur: neque pax & otium civitati restitutum est; sed contra turbarum & discordiarum causæ ab eadem Nobilitate alebantur, à qua feri cœperant: dolore enim injuriæ acceptæ ardens Nobilium Factio, desiderioque amissi in Republica loci, & amissæ dignitatis recuperandæ flagrans; antiquam viam, quæ una expeditissima erat, populi inter se committendi ingressa est: quod vafsum consilium sæpe non sine effectu fuit: Duci igitur Mediolanensi magnopere suadere instituunt; ut Ibletum Fliscum, cujus frater Joannes Ludovicus natu minor interea castella & opida ditionis Fliscorum ab ipsis abtracta, beneficio victoriæ utens recuperarat, liberum dimittat: nullum enim expeditius iter esse, aut brevius Genuæ recuperandæ, quam hujus viri potentiae; qui totam fere Liguriæ oram in Orientem spectantem, atque innumeram montanorum multitudinem secum trahat. Probat consilium Mediolanensis Dux, Ibletumque è custodia eductum, ac blandis verbis donisque delentum, ingentiumque præmiorum spe oneratum, F promisso ac jurejurando accepto, strenuam illum fidelem operam rebus Sfortianis navaturum, dimittit. Ille enimvero tot omnium temporum injuriis à Sfortianis læsus, nullo se illis jure, nullaque verecundia obstrictum censens, fide promissorum spreta, ac Sfortianis rebus neglectis, ad ea, quæ ipsi propiora erant, curas vertit: ceterum, cum adventum tam potentis viri libertatis præfides civitati gravem censerent, hominemque egentem, summis rei domesticæ angustiis prementibus, nihil

nihil pro sano facturum timerent; ejus animum donis mitigandum, ac Reipublicæ conciliandum rati, certam pecuniæ summam illi donant. Eo miseriæ & ignominia illis temporibus civitas nostra venerat; ut pax & quies à civibus suis pretio esset redimenda. Pecunias donatas Ibletus partim inter suos statim distribuit, partim immoderatis sumptibus brevi absorbit; in quos nemo umquam fuit ingenio effusior.

Ceterum Nobilitatis Factio nullam machinam ad præsentem rerum statum evertendum omittens, cum in segnitie & socordia Ludovici Fulgosi, qui tum erat in urbe, parum ponendum censeret, Baptistam Fulgosium, cujus nomini memoria acerrimi parentis Petri haud parvam existimationem conciliabat, accersit; ejusque spem, omnibus Nobilitatis viribus delatis, erigit. Ille enimvero cum delecta armatorum manu opido Novis movet, ad urbemque accedit: cujus motu cognito Prosper, & præsidēs, omnes transitus viarum stationibus insident: quarum Duces, fide neglecta, Baptistam non modo aditu non arcuerunt, sed tutum illi insuper iter ad arcem Castelletum demonstrarunt: quam Baptista sine certamine ingressus, paullo post cum armatorum centuria in aream divi Francisci descendit; eoque multos ex Factione sua convocatos in Prosperum incitat, & ad Factionem Adornianam regnantem pellendam hortatur; simul, ut sibi omnium virum suarum conatu adesse, ad possessionem vicariatus Genuæ sibi mandati adipiscendam, ne graventur. Bono animo esse hominem jubent convocati; seseque pro illo omnia anseros, nullumque discrimen recusaturos profitentur. Hac voluntate confirmatus Baptista in arcem redit; quam cum Sfortiani, annonæ deficiente, tenere jam non possent; seseque ob multas illatas injurias, execrabili odio Genuensibus esse intelligentes, nullam aliam se ab interitu servandi rationem cernerent; utramque arcem deinceps Baptistæ tradunt, salutemque suam illi commendant. Baptista arcibus positus, urbem invadere decrevit: cujus rei cum Factionis suæ hominibus ordinem per occulta consilia ita composuit; ut intenti starent, sonituque bombardæ displosæ audito, armati ad arcem accederent, sese comites sibi profilienti addituri: quibus rebus cognitis, Prosper & præsidēs ferro decernere, seseque Fulgosis invadentibus opponere, constituunt. Cum se prævalidis cohortibus in prætorium corrogatis communissent; contra magna Fulgosianorum pars in ædes Fulgosianas, quæ sunt in suburbio sancti Thomæ, peramplas ac quamvis magnæ multitudinis capaces se recepissent, iis Prosper Augustinum & Joannem Adornios, fratres, cum valida armatorum manu in area Fostatelli (id est nomen loci) opponit, ac Robertum & Joannem Ludovicum Fliscum in subsidiis collocat: cum Ibletus averfam urbis partem tuendam sumpisset; ac providendum, ne qui motus in suburbio sancti Stephani excitarentur: atque utraque pars animis suspensis sonitum bombardæ exspectabat; quo tandem edito, qui erant in Fulgosianis, extemplo profiliunt, Fulgosiumque nomen magnis clamoribus subjicientes, celeri gradu in hostem tendunt: quibus Augustinus & Joannes Adornii acriter se opponunt; subitoque inter illos in ea via, quæ portæ interiorum moenium Vaccarum appellatur, & aream Fostatelli interjecta est, acre prælium accensum est; tandemque Fulgosiani averfi sunt. Prælium quoque est in vasta area, quæ sub veteres muros est: ibi quoque res Adorniana superior fuit: ceterum Prosperum, in ipso ardore rerum gerendarum, Ibletus turpiter prodidit, fœdo pretio sex millium aureorum nummum à Baptista emptus; Joanne

A Auria interprete atque hujus consilii auctore & machinatore: quorum duo millia præsentia & numerata sunt: promisitque Ibletus daturum se operam cum Factionis suæ hominibus, ut Baptista Dux Genuensium crearetur: quæ res, Oratore Regis Neapolitani non inscio, transactæ sunt: quibus rebus factum est, ut Prosper sese ab omnibus desertum cernens, cum Fulgosi urbe libere discurrerent, prætorio cesserit; maritimaque urbis petens agere in triremes regias evaserit; inimicis, quique ab illo aliqua injuria affecti fuerant, instantibus, hominemque prementibus, ac lapidibus incessantibus: quorum incitato furori se subtrahendi nullam viam aliam habuit, quam sese vestitum, ut erat, in mare projiciendi.

B At Baptista, Ibleto sibi adjuncto, non protinus prætorium ingressus est, sed in ædes Centurionum concessit: qui ab universo civitatis consilio Dux Genuensium renunciatus, prætorium armatus petit; ibique Dux ab omnibus salutatur: indeque iterum in domos Centurionum reversus. Senatu & ducentis ex primoribus civibus convocatis, relatum est de octovirali Magistratu creando soluto legibus, cum amplissima omnium rerum potestate; qui Baptista in Republica regenda adisteret: contra quam relationem Bendinellus Saulius, vir opibus excellens, ceterum auctoritate longe excellentior, ita diservisse fertur: *Omnes homines, Patres, qui de publicis & magnis rebus consultant, non solum spectare præsens tempus debent; sed longe magis in posterum providere; neque ullam quamvis magnam præsentis utilitatis speciem perpetuo bono anteferre. Magnam copiam, cum recentiorum, tum veterum atatum eorum hominum proferre possim, nisi ea omnibus nota esset; qui præsentem utilitatem amplectentes, futurorum improvidi, pravo exemplo ab ipsis recte factis manante, Respublicas sibi commissas tandem everterunt: quo exemplo eo perniciosius, quam facto peccatur, quod damnum à perperam facto oriens breve plerumque est, ac negotio illo terminatur; at pestis ab exemplo exiens, perpetuo serpens, tamquam exemplum ipsum, nullo tempore definitur; nec prius ejus virus cessat, quam civitatem velut tæbe confecerit. Atque hoc ego perinde locutus sum, tamquam tempora Reipublica hunc octoviralem Magistratum postulent, cum absoluta omnium rerum potestate ac legibus solutum: quam necessitatem neque ego video, neque quisquam à me rogatus me docere scit: quam tamen ut libeat quammaximam fingere, adeo ne nobis exordis hujus sæculi civium nostrorum principatus? quorum ita impotens fuit dominatus; ita dura sub illis tempora, ut sæpe victi malis & calamitatibus externos Principes nobis accersere coacti simus. Quod si tum, cum illi tot Magistratuum gregibus circumvallati, tot legum vinculis constricti ita intolerabiles fuerunt; ut nos ad necessitatem adegerint descendendi ad ultimum consilium: quid futurum sit, cum illorum libido hoc novo Magistratu sulta ac legibus soluta erit, (neque enim cuiquam illorum facultas, aut voluntas deerit, juris probato exemplo usurpandi) in cogitatione vestra relinquam: proinde facite, Patres, etiam atque etiam cogitetis, in quam præcipitem casum Rempublicam, vos, ac liberos, totamque posteritatem vestram detis: quam vero compar hoc factum vestrum Venetorum sapientissimorum hominum consilio est; qui gravibus & moderati ingenii viris Ducibus utentes, tamen cum eorum nimium imperium grave esse libera civitati videretur; alios super alios Magistratus addendo, ac munera & procurationem principatus inter illos partiendo, novasque alias super alias leges ferendo, illius potestatem paulatim cohibentes, eo tandem rem adduxerunt, ut ille tot vinculis constrictus commovere se injussu Magistratuum non possit; speciem tantummodo fere, & insignia principatus retinens, vi cum Magistratibus & Senatu communicata: quæ res stabilem, ac florentem, nullisque intestinis discordiis agitatam præclaram illam Rempublicam conservat: ego nullo modo*

hunc octoviralem Magistratum probo: vos quod feceritis, Deum volo fortunare. Magno silentio audita est oratio, propter viri auctoritatem:isque animorum habitus fuit, ut boni sententiam taciti probarent; pauci verbis palam assentirentur; omnes temporibus serviendum duxerint: Nobilium Factione tantummodo eo tempore pugnante, ut in Magistratibus creandis sui ratio haberetur: cujus rei initium factum est in hoc ipso Magistratu; creatique sunt Galeottus Centurio, Lazarus Auria, Hieronymus Grimaldus, Aetiolinus Salvagus, Baptista Garronus, Thomas Præfenda, Bartholomæus Canitia, Baptista Bassiaddonne.

A.C. 1480. Sequens annus ejus sæculi octogesimus, quo prætorianorum ac custodiæ civitatis urbanæque militiæ præfectus creatus est Ludovicus Fulgosius, nihil scribendum habet; præter duas naves subsidio Apulis rebus missas, Marinam & Capellam; quibus præfectus est Baptista Lomellinus: in qua Provincia Turca urbem Hydruntem cum magno totius Italiae terrore occupat; & duas itidem naves, Auriam & Centurionam Pontifici accommodatas, in subsidium Rhodiensium; quos Turca acri oppugnatione urgebat.

A.C. 1481. At insequens ejus sæculi octogesimus unus insignior fuit; quattuor & viginti triremibus Pontifici in expeditionem adversus Turcas accommodatis: cujus classis Pontifex Paulum Fulgosium Archiepiscopum Genuensem, eundemque sacra purpura decoratum præfectum creavit: Trierarchos civitas elegit Cevam Auriam, Edoardum Grillum, Gentilem Camillam, Mauritium Catanium, Ægidium Carmendinum, Joannem Ambrosium Fliscum, Gothofredum Lomellinum, Balthasarem Lomellinum, Hieronymum Stellam, Baptistam Rapallum, Joannem Calderam, Joannem Canobium, Melchiorem Testam, Baptistam Benisiam, Gasparem Davaniam, Gasparem Biasiam, Bartholomæum Casanam, Gasparem Vintimiliam, & tres Savonenses, Andream Natonum, Bartholomæum Corsum, Silvestrum Pavesium: quæ classis magna adjumenta attulit Ferdinando in Hydrunte recuperando. Exemplum eximiae virtutis & fortitudinis editum est eo anno à navi Giberta: quæ cum duabus navibus Venetis ejusdem magnitudinis congressa, post duorum dierum acerrimam pugnam, paribus illatis & acceptis cladibus, æquo Marte discessit. Inanis & sine effectu sub finem anni expeditio suscepta est, cum quattuor navibus, suavisu & adhortationibus Monachi Franciscani religionis fama conspecti, ad Mitylenen insulam à Turca occupatam liberandam.

A.C. 1482. Insequens annus ejus sæculi octogesimus alter memorabilis in primis est, Corsica obedientiæ Magistratus sancti Georgii restituta, initio facto à Fano Florentii: cujus possessionem, simulque alterius opidi Begulæ Franciscus Pammoleus cum triremi missus cepit.

Magna sibi, cum totius civitatis, tum Factionis suæ ipsius Fulgosiae odia conflarat Baptista Dux; ob asperitatem morum, intolerabilem arrogantiam, ac superbiam, quæ jam in libera civitate ferri non posset: ad hoc animum ad altiora ac non concessa adjecisse dicitur: occulta enim consilia cum Cæsare agitaſſe, de urbe Genua cum vicariatus titulo fiduciaria sibi posterisque suis perpetuo accipienda: quæ res Genuam libertate orbata ejus imperio subjeciebat. Hæc sive vera, sive, quod mihi verisimilius fit, à Paulo patruo infinitæ ambitionis viro conficta, ut aliquam honestam speciem prætexeret consilio, fratris filii honore spoliandi, cum emanassent, anno ejus sæculi octogesimo tertio, conjuratio principum ipsius Fulgosianæ Factionis, Paulo patruo conscio & approbante, nec non Augustino Fulgosio custo-

A. diae urbis præfecto assentiente, facta est: cujus caput fuit Lazarus Auria, qui opibus & auctoritate antecedeat: quæ sine ullo strepitu, ullave offensione ad exitum perducta est. Nam cum Lazarus cum magna civium Fulgosianarum partium caterva in cubiculum Cardinalis venisset; cumque eodem Baptista, patrui vocatu, inermis, ac cum paucis comitibus, ut in nulla suspecta re, ipse quoque venisset, inſit Lazarus: *Homines in aliena re plus sapere, quam in sua, vetus proverbium est: nihil igitur tibi mirum videri debet, Baptista; tot egregios & ingenio præstantes cives ipsa civitatis nostra lumina, tum autem domus vestra studiosissimos, quos huc convenisse vides, verius & acutius, quæ e re vestra familiaque vestra sint, quam vos ipsos cernere: quibus cum patruus hictuus, vir sapiens, primo resistens ac retractans, rationibus victus tandem assensus sit; non debes tu, atate & usu rerum sapienti magistro tanto inferior, præcipuam aliquam ac suprail- lum sapientiam tibi assumere; sed te ad ejus sententiam & judicium conformare: neque tu ullum consilium tibi utile debes putare, aut ullum honoris titulum amplum; quod cum præclara familia tua dignitate & potentia non sit conjunctum: quæ res caput curarum vobis esse debet; familia enim opibus stabilitis, magnus semper & clarus eris. At illa eversa, simul tibi quocumque tandem honoris titulo præfulgeas, concidendum est: potior igitur tibi in consilio esse debet, dignitatis ac potentia gentis Fulgosia firmanda ac stabilienda cura, quam ullius tui privati honoris respectus: ac, si quis de celo demissus tibi nunciet principatu tibi abeundum; non te hominem putarem, si eum in adversa Factionis hominem, gentisque vestra perpetuum hostem transferri mallet, quam in patruum hunc tuum. Hanc necessitatem non tibi celestis aliquis nuncius denunciat, sed tempora imponunt: quibus aut parendum est, aut turpiter corruendum: neque enim illud nunc agitur, Baptista, uter vestrum Dux Genuensium sit, de qua re minus laboraremus, studiis nostris in utrumque aqualiter propensis; sed utrum ducatus ipse in gente vestra maneat, an ad infensissimos inimicos vestros transferatur: quorum omnes cura in vos evertendos perpetuo sunt intentæ: transferetur enim, nisi tu temporibus serviendum in animum induxeris. Neque tu quidquam tibi de fama prudentia & ingenii tui tibi detractum debes putare; si dixerimus, patrui tui ingenium his temporibus aptius esse: convertetur enim hic orbis, aliquaque tempora venient, quæ magis tuum quam patrui ingenium poscant: illis igitur te reserva, Baptista; neque nunc te principatu abdicare puta, sed illum patruo custodiendum ac tuendum commodare: quem tibi ac liberistuis, cum tempora tua venerint, stabilem ac ratum restituat: vince animum, Baptista; teque nobis tui amantibus; quibusque nullum jus, nullaque necessitudo major cum patruo quam tecum est, regendum permitte. Si ab inferis nunc existat vir fortis & clarus parens tuus, nihil alienius à pudore tuo esse duceres, quam non principatu illi cedere: in patruo hoc tuo, in quo vigorem illum animi atque ingenii, celsamque illam indolem expressam cernis, corpus quoque parentis tibi redditum puta: idem igitur consilium erga illum adhibe, quod non modo te pudor hortatur, sed tempora quoque cogunt. Baptistæ tam atrocis ac tam inexpectatæ rei admiratio vocem includit: qui antequam animum stupore defixum colligeret, mentis impos & consilii inops, ad necessitatem sese ducatu abdicandi atque arcium tradendarum subactus est: posteroque die, magno civitatis consilio vocato, Paulus Fulgosius Cardinalis trecentorum civium suffragio Dux Genuensium creatus est: quam injuriam Baptista in libro, quem *De factis & dictis mirabilibus* conscripsit, filo ultus est, asperis verbis in patrui perfidiam invectus: nullumque est lutulenti vitii, aut nefarii sceleris, aut obsceni flagitii genus, quod non Baptista in patruum congesterit.*

Tt

Per

Per totum hujus sæculi cursum, anniversarium ac juge inter Genuenses & Catalanos bellum fuit: quod latrocinii magis quam iusti more belli exercebant: ut neque mihi operæ fuerit, tam minutas res stilo persequi, & legentes summa satietas earundem exilium rerum numquam variatarum cepisset. Numquam enim ad universæ rei dimicationem inter ipsos ventum est, numquam iustis classibus concursum: sed, cum quotidianis ac parvis damnis mutuo se carperent; ac singulas vel binas naves, prout in valentiores aut imbecilliores inciderent, sibi mutuo adimerent.

A.C. 1484. Eo anno, qui fuit ejus sæculi octogesimus quartus, Sixtus Pontifex mortuus est; & in ejus locum successus Joannes Baptista Cibo, civis Genuensis, nobili ac pervetusto genere oriundus; qui Innocentius octavus appellatus est: ad quem amplissima legatio duodecim ex principibus civitatis, summum honorum fastigium gratulandi atque obedientiæ deferendæ causâ, decreta est: ii fuerunt Hector Fliscus Jurisconsultus, Lazarus Auria, Melchior Nigronus, Christophorus Spinula, Franciscus Lomellinus, Lucas Grimaldus, Thomas Fulgosius, Pasqual Saulius, Ludovicus Gibertus, Bartholomæus Canitia, Baptista Bassiadonne, Joannes Caldera.

Eodem anno bellum inter Genuenses & Florentinos in agro Lunensi ortum est: quod quamquam magno conatu à Genuensibus cœptum est, ingentibusque animis initio geri cœptum; tractu tamen turpe & probrosum Genuensibus fuit: quorum perpauci ex iis, qui rebus gerendis præfuerunt atque arma tractarunt, infamia fordium intacti abierint: ut minime mirum sit, pravæ belli gerendi rationi infelicem exitum respondisse. Causâ, quæ hoc bellum conflagavit, Sergiana urbs fuit: quam Augustinus Fulgosius inconsulta ratione Florentinis vendidit: qui, irarum causis inter ipsos exortis, eandem urbem in manum Magistratus sancti Georgii paullo post dedit: Magistratus illam continuo prævalido præsidio firmavit. At Florentini infesto exercitu fines Sergianenses ingrediuntur: in quam urbem Genuenses duos Legatos miserant, qui rebus præessent, Gentilem Camillam & Hieronymum Sopranum: quibus postea addiderunt Hectorem Fliscum Jurisconsultum, Opicium Auriam, Thomam Justinianum, Baptistam Rapallum; qui Erice subsisterent, ad subita belli providenda: at Florentini magnum momentum ad Sergianam capiendam Petram sanctam opidum captum facturum intelligentes, copiis admotis illud oppugnare instituunt: adversus quos, consilio primo universæ civitatis habito, in quo omnium rerum ac controversiarum cum Florentinis amplissima potestas duodecim Legatis, qui nondum discesserant, mandata est; validæ copiæ, & numero, & genere profectæ sunt, Dominicacio Auria Duce; cum multi primarii cives tam ex Nobilitatis Factione, quam ex popularium corpore, multique artifices in voluntariam militiam nomina dedissent: ad hoc, ut Florentinos à rebus Genuensibus vexandis ad sua tutanda averterent, classem decem triremium ac quatuor corbitarum, cujus præfectus fuit Constantinus Auria, in cujus locum, si quid humani illi forte accidisset, successus est Mauritius Catanius, Liburnum maritimum opidum, quod Florentini tenebant, oppugnatum mittunt: quæ classis duas rates solidæ crassitudinis, atque ad omne pondus sustinendum aptas miro artificio factas, secum duxit: ex quibus, bombardis statutis, opidum quateret. Interea ad Petram sanctam acriter pugnabatur; in quod opidum cum Dominicacius subsidium introduxisset, atque excursiones nonnullas fecisset, in arcem Stationem, quæ est in finibus Petrasanctensibus, se recipit: unde nec lædere hostem poterat, nec ipse

A) ab eo lædi. Florentini interea in cacumine collis castellum opido imminens excitarant: à quo cum Genuenses haud levia detrimenta acciperent; missus est ad illud expugnandum Hieronymus Montignius, vir fortis ac strenuus, & tam in terrestribus quam navalibus rebus spectatæ virtutis & scientiæ: is impigre munus mandatum exsecutus est; castello magno certamine cum magna sui & Genuensis nominis gloria tandem expugnato; quæ res animos Florentinorum fregit; qui quattuor millia passuum castra retro retraxerunt, ac de sese in sua recipiendo cogitare cœperunt: præterea classis ad Liburnum partem copiarum in terram exposuerat: quæ per circumjectam regionem excurrentes omnia populationibus, cædibus, direptionibus, ruinis, ceterisque belli cladibus impleverunt; arce quadam Vada nomine capta & incensa. At à mari magno numero ferrearum bombardarum, (nondum enim usus ænearum in Italia inductus erat) turrin Liburni continenter magnoque impetu verberabant. Florentini novos Legatos cum ingenti auri vi ad exercitum mittunt, Antonium Pucium & Bernardum Nerum; qui Castellum à Genuensibus paullo ante captum recuperarunt. In qua pugna Antonius Martianus Comes, unus ex ipsorum ductoribus cecidit: copiisque iterum Petrasanctam admotis, opido brevi potiti sunt, proditione defendentium; cum rebus gerendis præessent Casanus à Mari arcis præfectus, Matthæus Fliscus Vicarius, & Antonius Montaltus militiæ rector: arx tamen à Genuensibus tenebatur; quam ingressi sunt Dionysius Rizotus & Jacobus à Spedia: quibus rebus Genuæ cognitis, magnum subito armatorum subsidium à Magistratu sancti Georgii comparatum est; Ludovicusque Fulgosius summus Dux hujus belli creatus, mille & quingentis aureis nummis ad eum missis; quattuor insuper Legatis additis, Thoma Justiniano, Lazaro Lomellino, Hieronymo Palmario, Paulo Lercario. Interea Laurentius Medicus ad exercitum venit, cum magna auri summa: sub cujus adventum arcis præfectus, quique cum illo se arce, ut diximus, incluserant; qui litteris & promissis suis arcem retinendi atque omnia ultima perpetiendi spem Genuensium crexerant, ne oppugnatione quidem expectata, aut pugna tentata, turpem deditionem fecerunt, cum magna ipsorum nominis infamia. Antoniusque Montaltus, Casanus à Mari, & Augustinus Ravascherius proditionis insimulati carcere inclusi sunt; in quo fuerunt, donec Adorniis regnantibus, dimissi sunt: cum Ravascherius in opido Erice securi percussus fuisset: neque Dominicacius Auria ad se purgandum Genuam reversus est; sed civilibus procellis se eripiens Romam se contulit, ad stipendia Pontificis acceptus. At Genuæ paullo post Magistratus, qui summæ belli præesset, creatus est, Jacobus Justinianus, Joannes Baptista Grimaldus, Brancaleo Auria, Baptista Passagijs. Idem turpis exitus rerum Liburnensium fuit, à quo opido classis re infecta discessit, cum magna Constantini Auriæ præfecti & Hieronymi Guani unius ex Navarchis infamia; quos vulgo fremebant, *Vinum aureum lagenis à Florentinis missis potasse.*

Insequens annus ejus sæculi octogesimus quintus nihil habuit, præter duodecim Oratores Romanam tandem profectos; qui obedientia delata, iussu Senatus Genuam reversi sunt: cum Lazarus Auria solus apud Pontificem remansisset; ut de conditionibus pacis cum Florentinis componendæ cum Pontifice ageret: quæ initio sequentis anni ejus sæculi octogesimi sexti brevi ita convenit: ut Florentini arcem Sergianelli, quam tenebant, dimitterent; omnique jure suo in rebus Sergianensibus cederent; contra Genuenses Petram sanctam omneque jus suum in Florentinos transferrent: qua de causâ

caussa Florentini omnia sua è Sergianello exportare cœperunt: nihilque exspectabatur, quam ut vacuo excederent: cujus tradendi cum præstituta dies venisset; Florentini mutata voluntate, iurijurandi religione ac fide promissorum spreta, arcem tradere recusarunt: quin contra ad Sergianæ expugnationem se comparare cœperunt. Hujus mutationis causa fuit Pontifex in amicitiam suam traductus, atque à Genuensibus abalienatus, ob multas offensiones & irritationes: quarum prima fuit, quod cum nonnullam pecuniarum summam à Genuensibus publice mutuum quæsivisset; Genuenses mutuam quidem pecuniam dederunt: ceterum ita illiberalibus modis, ita omnia minute persequentes, ac Pontificem velut faucibus presum ad suas condiciones adducentes; tamquam, non cum maximo Principe, sed cum vacillantis fidei mercatore agerent: ad hoc Lazarus Auria filiam suam Pontificis filio Francisco matrimonio jungere recusavit: præterea pecunias quasdam à Pontifice in ædificationem ædiculæ in mole, divæ Claræ titulo insignem, missas Genuenses retinuerunt, affirmantes, eas sibi à Pontifice multis nominibus debitas: postremo aulae quædam Pontificis Genuam advecta, Genuenses, per magnam Pontificiæ majestatis, atque ipsius Innocentii civis sui contemptum, non prius dimiserunt, quam portorio soluto: quæ injuria, quique sui contemptus Pontificis animo alte infedit: quibus injuriis impulsus, cum sese cum Laurentio Medicio nova affinitate junxisset, Magdalena Laurentii filia eidem Francisco matrimonio conjuncta; totum se ab omni studio sensuque Genuensium disjunctum in Florentinorum amicitiam tradidit: qua Florentini sublatis, animos ad spem Sergianæ recuperandæ erexerunt.

A. C. 1487. Interca, cum Paulus Cardinalis, ejusque ratio gerendæ Reipublicæ civibus non satisfaceret; hoc liberæ civitatis, anno insequenti ejus sæculi octogesimo septimo, fecerunt, ut decem cives eligerent, penes quos regimen rerum tam publicarum quam sancti Georgii esset, cum amplissima potestate: ii fuerunt Hector Fliscus, Raphael Oddonus, ambo Jurisconsulti, Franciscus Lomellinus, Constantinus Auria, Melchior Nigronus, Stephanus Cicada, Angelus Grimaldus, Hieronymus Palmarius, Petrus Baptista Ghuissius, Christophorus Davania, Franciscus Camulius, Pelegrus Rebuffus.

Eodemque anno initium factum est belli Florentini, quod morbus Laurentii Medicii ad hoc tempus distulerat: qui tandem infesto exercitu fines Sergianenses ingressi, castra ad fluvium Macram ponunt. At Genuæ, omni adhibita contentione, decem triremes comparatæ sunt: quas conscenderunt tria delectorum peditum millia in terram exponenda: quibus præfuit Joannes Ludovicus Fliscus: triremium præfecti fuerunt Balthassar Lomellinus, Michael Turbinus, Joannes Caldera, Raphael Reccus, Lucas Pinellus, Lazarus Grimaldus, Joannes Baptista Biasia, Antonius Saulius, ejusque loco Paulus Justinianus, Christophorus Spinula, Augustinus Auria, ejusque loco Franciscus Sorius: præterea Franciscum Spinulam, Hieronymum Nigrum, Augustinum Auriam, Francum Justinianum, in Provinciam Narbonensem, & in Montemferacem, atque circumjectas regiones, ad novos milites scribendos, mittunt. Interca classis Ericem tenuit; copiæque in terram expositæ Sergianello arci admotæ sunt, quam oppugnare instituunt: cumque artius urgerent, Laurentiusque Medicus interea ad exercitum venisset, Florentini castra promovent: nec Genuenses certamen detrectant: ac, quamquam prælium acriter initum est, tamen victoria penes Florentinos mul-

A titudine longe superantes fuit: Duxque Joannes Ludovicus captus in potestatem Laurentii venit. Victoriæ paucis post diebus deditio Sergianæ consecuta est, satis constanter primo à præsidibus, Hectore Flisco, Luchino Stella, Luca Pinello defensæ: Constantino Auria & Pasquale Saulio Legatis Genua missis, qui omnibus rebus ac summæ belli præessent, omnia ex opido Erice impigre providentibus & suggerentibus: isque fuit belli Sergianensis finis.

B Per ea tempora, ne Magistratus quidem sancti Georgii molestiis in Corsica insula caruit: tam à Thomasino Fulgosio, qui res tumultibus & seditionibus miscendi finem numquam faciebat; quam à Paulo Lecca, qui superiore anno defecerat: ut bello Sergianensi finito, necesse fuerit triremes in Corsicam mittere: quarum ope, simulque opera prætorium munus regentium, Thomasinus in potestatem sancti Georgii venit; qui, jussu præsidum civitatis, quibus amplissimam omnium rerum potestatem mandatam diximus, in arcem Ericis in custodiam adservandus ductus est. Ægre eam rem tulere Paulus Cardinalis Dux & Fulgosinus filius: qui cum de universo Magistratu poenas palam sumere non possent, in Angelum Grimaldum, qui liberius in Thomasinum inductus fuerat, omnes impotentis iracundiæ aculeos flexerunt: qui noctu à satellitibus missis circumventus, multis ac mortiferis vulneribus acceptis, adhuc tamen spirans relictus est: quod idem paucis ante diebus Tobie Lomellino acciderat privatis odii causis, illorum jussu interfecto: quæ impotentissimæ tyrannidis atrociora exempla magnum cumulum superioribus offensionibus addiderunt, ingentesque faces jam concepto universæ civitatis in Fulgosios regnantes odio subdiderunt.

A. C. 1488. Igitur anno ejus sæculi octogesimo octavo, triremium in Corsicam adventu arce Lecca, quam Joannes Paulus, ut diximus, invaserat, recuperata, D Ginercaque opido parto, tumultus Corsicæ consopiti sunt: neque tamen Genuæ à Corsorum & Florentinorum molestiis liberatæ otium fuit. Paulus enim Fulgosius Dux eam sibi universæ civitatis odii molem conflasse intelligens, à qua procul dubio obruendus esset; ad aciora remedia salutis suæ comparanda animum adjecit: quæ simul ad inimicos suos principatu patriæ arcendos, si ipse forte ab eo dejectus esset, valerent: quare præfatus, civitatem numquam quieturam, nisi in fide & tutela Sfortianorum, id quod ipsi sæpe experti essent, facile civitati persuadet, ut Oratores ad urbem Duci Mediolanensi usitatis conditionibus tradendam mittat. Erat tum regimen omnium rerum penes Ludovicum Sfortiam Joannis Galeacii Ducis patrum; qui bona Ducis, matre ab aula ablegata, ac Joanne Galeacio ipso Duce hebeti ac socordi ingenio ad nullum negotii genus habili, arcibusque, ærario, atque omni militia, ac ceteris, quibus principatus innitur, paullatim in suam potestatem redactis, excepto titulo Principis, omnia pro Principe gerebat. Ad hunc igitur Legati venerunt: quos paullo post consecutus est Fulgosinus Pauli ipsius Ducis filius: cum quo Ludovicus affinitatem subito conjunxit; Clara Joannis Galeacii Ducis sorore notha illi in matrimonium data, nuptiis omni regis opulentis apparatu coram ipsis Genuensibus Legatis factis: quæ res Genuæ auditæ vehementer capita adversarum Factionum commoverunt; intelligentes, quantum potentia Pauli affinitate & opibus Sfortianorum subnisi augeretur; sive ille Ducis, sive Vicarii Sfortianorum titulo (hæc enim inania nomina esse) res regeret: quæ res ipsos illius pedibus proculcandos perpetuo projiceret. Ibletus igitur & Joannes Ludovicus, qui interea à Florentinis dimissi fuerunt prin-
T t 2 cipes,

cipes, in Paulum conjurant; Baptistamque Fulgosium execrabili odio in Paulum efferatum, atque Augustinum & Joannem Adornios adversæ Factionis principes, qui tum Sylvani in opido suo ætatem agebant, in societatem consiliorum adsumunt: per aliasque species urbe egressi, Joannes Ludovicus in montana contendit, copiasque tam ex opidis & ditione Flisca, quam ex tota circumjecta regione cogere instituit: Ibletus suburbanis & amœnis locis substitit; perque illos tamquam animi caussa vagus, quotidianis conviviis & jocis omnem suspicionem à se avertere studebat: cum tamen non falleret; ipseque & Paulus sese tamquam comitate certantes mutuo captarent; studeretque Paulus dolis & insidiis circumventum comprehendere, quoniam ad apertam vim animus non suppetebat, universæ civitatis odio cohibitus. Ibletus igitur periculosum ratus, jam amplius differre; cum paucis his, quos habebat, qui non plus centum armati fuerunt, urbem porta Hircorum ingreditur; proximumque templum divi Stephani titulo insigne statione firmat; ibique fratrem & ceteros Factionis Duces expectare constituit. Animum Pauli impetus subiit, Ibletum, antequam majores vires colligeret, illico invadere: ceterum duo eum retinuerunt; & nox imminens, & nonnullorum civium Ibleto occulte faventium dissuasiones; spem facientium facile fore, ut res cum Ibleto, communibus amicis, sese interponentibus, sine offensionibus componantur: quorum consilia eo facilius Paulus auribus admisit, quod audivit, Baptistam Fulgosium per idem tempus in urbem venisse; qui, quod studia Fulgosianæ Factionis in illum magis propenderent, formidolosus ipsi in primis erat. Cum tota nox consiliis concordie agitandis sine effectu traducta esset; orto sole, Joannes Ludovicus, qui cum magna armorum multitudine paulo ante urbem intrarat, simul cum ceteris conjunctis prætorium invadere decrevit. At Cardinalis pœnitentia captus pridie hosti fere inermi in fortuna pugne tentanda non prævertisse; tum voluntati populi parum in se firmatæ diffidens, cum exiguo præsidio, quod circum se habebat, ægre in arcem se subduxit: cum Baptista ardore ulciscendæ injuriæ provectus, ita acceleraret, ut haud dubitatum sit, quin patrum asscutorus fuerit; ac pœnas tantæ perfidiæ sumpturus, ni Paulus Auria, vetus gentis Fulgosianæ amicus & studiosus, variis colloquiis illum retinisset: quibus tempus datum est Paulo ad fugam præripientiam. Prætorio igitur occupato, Magistratus ad statum rerum ordinandum & constituendum creatus est: quæ res maximarum difficultatum plena fuit: neque enim ratio inibatur Augustinum & Joannem Adornios, qui in urbem venerant, mitigandi & sedandi; qui quamquam potentiam & dignitatem Fliscorum æquo animo ferebant, opes tamen Baptistæ Fulgosii adversæ Factionis hominis excellere, haud æquis oculis adspiciebant. At Factionum principes arcem, quod unum opus restabat, circumstant, oppugnareque instituunt: quod negotium arduum & lentum fore apparebat: nam, præter arcem opere munitissimam ac validis præsidiis firmatam, Paulus totam eam insulam domorum, quæ ab arce ipsa ad ædem divi Syri pertinent, haud contemnendis præsidiis tenebat: ad hoc validis trabibus, veluti vallo ac perpetuo opere, sepserat: ex quibus domibus continentes eruptiones à militibus in urbem fiebant; quotidique inter ipsos & obsidentes prælia committebantur: in quibus multante oculos inspectantium civium cadebant; civitasque cadaveribus implebatur: sed nihil erat ad adspæctum miserabilius ac fœdus, quam assiduæ domorum ruinæ, atque amplissimorum ædificiorum incendia: quam fœditatem ac miserationem augebant imbellis ætas, ac sexus è flammis, quibus

A omnia sua absumenda relinquebant, feminudi vix evadentes; matronæque parvulos natos gestantes: quæ tota urbe discurrentes, flebilibusque questibus fortunam suam lugentes, Superumque atque hominum opem & misericordiam supplicibus precibus implorantes, totam urbem luctu replebant: sed nihil erat horribilius, quam tacita cogitatio, quæ animos hominum subibat; cives ipsos in patriam ea edere crudelitatis exempla, quibus nulla majora ab immani barbarie execrabili odio efferata expectanda fuissent: civitatem ipsos suam, in qua nati & educati essent, incendiis & ruinis deformantes: adeo nihil est in feritate ulterius, quo cæca Factionum rabies non perveniat.

B At cives, cum tot malis obtorpuissent, consilii inopes duas legationes, alteram ad Gallorum Regem ad civitatem illi dedendam mittunt; postulandumque, ut illico subsidio accurrat; nec patiatur, præclaram urbem suam tot rebus gestis claram conflagrare: alteram ad Pontificem, oratum, ut ipsum patrii soli, in quo editus in lucem sit, misericordia tandem capiat, ac communem patriam saltem ab interitu servet. Nihil læti Oratores à Pontifice abstulerunt, nullamque opem ab illo impetrarunt; & Ludovicum odio prosequente, & Ibleto, quem auctorem horum motuum sciebat, occulte favente; ad hoc memoria contemptus sui nondum animo oblitterata: postremo fama exierat, illum occultis consiliis, quæ cum Ibleto contulerat, imperio Genuæ imminere: cujus rei causâ, post initam concordiam, ut dicemus, Episcopum in proximis locis urbis deprehensum, ad Ibletum clam missum; cum mutato habitu sacram personam diffimulans aliquot dies latuisset: qui tamen ullis efflagitationibus ab illo impetrare numquam potuit, ut capita conferrent: quod eam rem Ibletus neque occulte esse posse intelligebat; seque alienissimo tempore suspectum omnibus esse facturam, magnaue invidia oneraturam.

D Interea Ludovicus consilia astu ducta sibi procedere lætus, usitatum artificium urgens, ancipiti facto geminas machinas adversus Genuenses comparat: nam, & Jo. Franciscum Sanseverinum Cajatiæ Comitem cum haud contemnendis copiis intrare fines Genuenses jubet, quod ille impigre exsequitur; & Corradulum Stangam, ac Brandum Castillionum, viros spectatæ prudentiæ atque insignis probitatis, tum autem rerum usu atque artificio consiliorum leniter ducendorum Antistites, Legatos Genuam mittit: ut hinc terrore suo objecto, illic animos Genuensium permulcendo, ac bona spe implendo, illos tandem ad sua consilia adduceret: quorum mittendorum egregiam occasionem illi præbuit Thomas Justinianus, per ea tempora Legatus ad eum à Genuensibus missus, ad civitatem excusandam; si, superbia & arrogantia Fulgosini patientiam hominum vincente, arma contra Paulum in amicitiam paulo ante receptum sumpsisset: quem Ludovicus comiter excepit, excusatione civitatis accepta; pauloque post cum duobus Legatis suis, quos diximus, Genuam remisit. Senatu Oratoribus Ludovici dato, alter eorum in hanc sententiam verba fecisse dicitur: *Posses quidem Princeps noster, ac Ludovicus patrus pro jure suo vobiscum agere, Patres; vosque in antiquum dominatum repetere: verum ille ab omni hac cogitatione & ab omni vi afferenda ita abhorret, ut etiam a suadendo sibi abstinendum ducat; sed vestram Rempublicam, vestraque omnia vestri arbitrii, vestrique consilii esse velit: nihil enim, cum de vobis & de rebus Genuensibus cogitat, spectare solet, Patres, quam hujus civitatis, quæ charissima illi semper fuit, tranquillitatem & salutem: quas res cum vobis ipsis magis quam ceteris omnibus cordi esse necesse sit; nihil esse putat, quamobrem aut ipse, aut omnino mortalium quisquam de illis magis quam vos ipsi laboretis: cujus rei vel ea* sit

fit fides, quod cum multis jam annos à Sfortiano imperio defecissetis; ipseque ut cum maxime in flore virium esset, & nunc quoque sit; totaque Italia nutu ejus horreat, cujus res quacunque velit, inclinare possit; discordiaque vestra mille illi in die occasiones praeberent Genuam recuperandi; nihil tamen prius movendum duxit, quam à vobis ipsis per ampla hac legatione, quam ad vos, urbemque, & ditionem vestram illi dedendum nuper misistis, invitatus: vestra igitur potius quam sua causa nos huc ad vos Ludovicum misit, Patres, dato mandato, ut voluntatem vestram exploraremus, ad eamque consilia nostra accommodaremus: quod si eam mentem vobis divinitus datam in vobis offenderemus, ut sana consilia amplecti possitis; tum nostra partes essent, difficultates, quae rem distinerent, tollere conari: eaque de causa exiguas illas armatarum copias, Cajatio Duce, fines Genuenses intrare jussit; ut seditiosis & ambitiosis civibus bonum publicum morantibus terrori essent: sin aliter animati essetis; tum vero, nos nullare tentata, domum cum adductis copiis reverteremur: proinde quid nobis faciendum sit, decreto vestro praescribite, Patres: vultis in antiquum Sfortianum imperium redire? praeter tranquillitatem & perpetuam quietem hujus urbis, ac perpetuam illius propugnationem, omnis honor & pretium vobis apud illos erit; nosque mandatum munus exsequi pergemus: vultis inani libertatis specie capti, in hoc statu rerum perseverare, seditionibus, tumultibus, incendiis, ruinis domorum, ceterisque belli cladibus perpetuo obnoxii? tum nos ex hac urbe protinus faceffemus, curam ac sollicitudinem rerum vestrarum vobis relinquentes. Facerent, quod è fide & sapientia sua ducerent, à Senatu permixtum: civesque quattuor illis additi, cum quibus de rebus componendis agerent. Illi cum principibus Factionum, cognita Senatus voluntate, colloquia de conditionibus pacificationis instituunt; resque per nonnullos dies magnis verborum contentionibus ac pertinacibus disputationibus agitata est: primoque in conditionibus jactatum, ut duae hae gentes ditionem Genuensem inter se partirentur; Adornisive Saona, ac tota ora Ligustica in Occidentem spectans cederet: Paulus civitati regendae praesset: à quo consilio Ludovicum non omnino abhorrentem ferebant: sed discussa est odiosae rei mentio consensu universae civitatis: per ingentia certamina tandem res eo deducta est, ut Baptista Fulgus ex urbe protinus facefferet; atque Antipolim in antiquas sedes & domicilium suum se reciperet: qui ab Augustino Adornio, in cujus domum ventitare solebat, ac cum illo sermones conferre, Ibleto & Joanne Ludovico praesentibus, comprehensus, Joanni Grimaldo Antipolim, unde profectus erat, devehendus traditur: Ibleto & Joanni Ludovico fratribus Fliscis suus honor, suusque eminens dignitatis locus in urbe illibatus maneret: regimen civitatis, Sfortiani Vicarii titulo, in decennium penes Augustinum Adornium esset: Paulus Cardinalis Dux magistratu se abdicaret; Castellumque & reliquas arces, quas habebat, Principi illico traderet: si in urbe manere in animo haberet, nullis se rebus publicis interponere liceret, sed sacra, ac quae sui muneris essent, curaret. Interea, dum illi à Pontifice aequalibus sacrorum sacerdotiorum vestigalibus subveniretur, fenaureorum nummum millia quotannis illi penderentur à Ludovico: pro qua summa nonnulli cives Genuenses fidejusserunt.

Quibus rebus transactis, Paulus duabus navibus iter Romam dirigit: quarum altera adversa tempestate ad littora Corsicae eversa, naufragio cum omnibus superstantibus periit; altera incolumem illum in portum Civitatis veteris invexit: qui inde Romam se, patriam numquam revisurus, contulit: vir vividi quidem & peracris ingenii, ceterum mali pravique: sacrae professionis ac sacerdo-

A talis muneris numquam memor; sed per omnem vitam inquinatus, ac facinoribus & sanguine suorum civium contaminatus: quibus rebus peractis, amplissima sexdecim civium legatio Mediolanum missa est, ad ignominiam & turpitudinem civitatis, servitute in celebri totius Insubriae spectaculo, cum usitato illo regii splendoris apparatu, palam profitenda, testatiorem faciendam.

B Pax & quies à moderato Sfortianorum imperio reddita civitatem à praeteritis malis & calamitatibus recreare coepit: cives enim sese ad intermissam industriam revocantes, commercia frequentare, in negotiationem proficisci, omnibus curis praeteritis, damnis fariendis, ac rei augendae invigilare: quibus rebus civitas per quattuor annos, qui pacem consecuti sunt, brevi opibus privatim & publice aucta est: cum pretia portionum sancti Georgii, quae vilissima fuerant, haud parum creverint: ceterum gaudium felicitis hujus rerum cursus haud sincerum praebat hominum Adornianae Factionis audacia scelere inflammata. Ii cum diu depressi aetatem egissent; partim multis injuriis ab inimicis affecti, partim in eo, quod ipsi injuriam facere prohibiti essent, sese injuriam accepisse putantes, tempus explendarum cupiditatum, atque inimicorum ulciscendi venisse rati, dies noctesque tota urbe discurrere; ac tamquam in capta civitate grassantes spoliare, rapere, verberare, vulnerare, interficere etiam, pecunias ab invitis extorquere; prostremo à nullo maleficii ac facinoris genere abstinere; Adornis fratribus regnantibus partim conniventibus, partim suorum libidini nimium indulgentibus: qui suorum malefactorum facinus ipsis indignum malo publico pejore exemplo addiderunt.

C Margarita Comes Tendae, sive quia viribus plus poterat, amplificareque fines cupiebat, sive quia se parum cultam à Domino Petrae latae Reipublicae fiduciario putabat, arma illi intulit. Ille rem Genuensibus subito demonstrat, Petramque latam, nisi propere subsidio catur, in manum mulieris venturam docet: in quo majorem rem Genuensium quam ipsius agi: penes illos enim justum ac summum, penes se tantummodo precarium Petrae latae dominatum esse: quae si deferatur, tum vero omnium fiduciariorum Reipublicae eandem fortunam fore; quo tenuibus ipsos per se opibus à Genuensibus neglectos, potentiores accolae è vestigio sint occupaturi. Enimvero Genuae omnes pro se quisque opem protinus ferendam dicere: quin etiam poenas temeritatis à superba muliere expetendas; quae nulla re laesa fiduciariorum Reipublicae bello ultro laceffere ausa sit: ceterum privatarum rerum respectus, ut plerumque fit, publico bono praeponderavit: oppressa est enim ejus rei mentio ab Adornis fratribus; adversus quos pauci vocem libertatis memorem mittere audebant: iis affinitas Margaritae, cujus filiam Augustinus uxorem duxerat, fide, decore, existimatione, publica dignitate potior fuit. Ea res civitatem in antiqua mala procul dubio redeffissent; nisi virtus & prudentia Conradoli Stangae, qui perpetuus rerum Ludovici procurator ejus jussu Genuae confederat, nascentibus malis occurrisset: qui partim audaciam perditorum ac facinorosorum hominum compescendo, partim laesos solando, illorumque dolorem excusatione temporum mitigando, Adorniosque fratres ad suorum furorem ac scelus comprimendum hortando, semina turbidarum gliscentia extirpavit. Is vir, cum magnam prudentiae ac verae & neutiquam fucatae probitatis opinionem haud immerito sibi conflasset, studiaque Genuensium percepisset, ad eorumque intimos sensus penetrasset, leniter negotia ducendo atque animos civium suaviter tractando, brevi in eum gratiae & charitatis locum venerat, ut omnium ordinum voluntates teneret; in ejusque

moderatione cuncta versarentur: qui auctoritate tantum valuit, ut Genuenses Florentinis irritatos, ob Sergianam, Petrā sanctam, ac reliquam ditio- nem Lunensem amissam, à pio & justo bello illos persequendo cohibuerit; trimestribus induciis im- petratis, quod Ludovici rationes ita ferre diceret, ne eo tempore Genuenses & Florentini armis inter se contenderent: quæ induciæ, Ludovico efflagi- tante, sæpe renovatæ sunt: postremæ annuæ fue- runt, à Ludovico enisis precibus, Branda Castillo- nio ea de causâ Genuam missō, impetratæ; cum civitas dolorem & injurias suas optime merito Prin- cipi haud retractanter condonaret.

At Adornii fratres, ut gratiam principum civita- tis, ac Nobilitatis, & bonorum recuperarent, in- genti promerito animos irritatos permulserunt, spe facta tributi tollendi; cum sese omnes potentia & opum suarum nervos in eam rem contenturos fi- dem dedissent: ceterum res suo ipsa molimine gra- vis disputationibus & contentionibus in biennium extracta est: plebs enim ad primam rei mentionem atrox coorta est; nihil aliud tributum tollere esse dictitans, quam onera publica in pauperes ac te- nuiores derivare: quorum irritatos animos multi ejus- dem corporis homines circumeuntes, ac singu- los prehensantes, seditiosis orationibus insuper ac- cenderent: unusque ex iis acrioris ingenii vir, haud exiguum numerum secretum in locum con- vocatos tali oratione in Nobilitatem ac principes civitatis inflammare conatus sit: *Eum semper miserrimum plebis statum esse audiui, cives; cum il- la in eum locum adducta esset, ut nusquam alio, nisi ad serviendum nata putaretur: at ea est multis ab hinc annis fortuna nostra, ut servitio diuturno usu assue- facti, quod reliquis humilibus & tenuioribus homini- bus in miseriis semper ultimum fuit, id nos in sum- mo beneficio libenter accipiamus, ac praeclare etiam nobiscum ea in re actum putemus: aliam enim opinio- nem animis imbiberunt potentiores & opulenti cives no- stri, existimantes plebem tantummodo ad sanguinem illi mittendum, animamque hauriendam natam: quo enim alio spectant tributa sublata, quibus necessaria pu- blica impendia tuemur? quæ cum simul cum tributis non tollantur, (immortalia enim sunt) alia ratio eorum tuendorum necessario incunda erit: at hæc quæ tandem alia esse poterit, quam portiorum augendorum ac du- plicandorum? quæ cum ab omnibus aqualiter solvantur; fiet, ut corpus pauperum & tenuiorum, qui sola bra- chia habent, quibus suam & parvulæ familiæ vitam tolerant, quod corpus numero haud minus decupla parte civitatis sit, novem onerum publicorum partes subeat: cum interea opibus affluentes cives non plus decima tan- tummodo onerum parte graventur: quare quid esse pos- sit ad cogitationem horribilius? cum sæpe fando audive- rim præclaras civitates, eos, quibus nulla aut pertenuis res familiaris esset, capite tantum censuisse: quorum corporibus tantummodo, ceteris oneribus liberis, civi- tas ad usus publicos uteretur: & ii homines crudele hoc consilium struunt, quos non pudet alternis pene verbis divini Numinis timorem ac mentis conscientiam itera- re: in quibus hominibus si ulla esset pietatis erga Deum immortalē scintilla; profecto nosejus imaginem expri- mentes, natureque & religionis necessitudine ipsis con- junctos tanto odio non persequerentur: nisi forte conscien- tiæ stimulis inducti hæc moliuntur; ut, cum non eam modo Reipublica partem, quæ tota ipsorum est, hoc est, honores, magistratus, classium præfecturas, urbium & insularum præturas, ceterasque Reipublica procuratio- nes, cum tanto ac tam multiplici emolumento suo posse- dissent; alterius quoque partis onerum publicorum, quæ tota nobis jure debetur, magnam partem usurparent: eam igitur nobis totam restituere velint; ut sic Respu- blica aqualiter partita inter nos sit: illisque honores & emolumenta cedant; onera tota in nos incumbant: ce- terum hoc quamquam acerbissimum est; magis tamen*

A me ignavia & socordia nostra conficit ac macerat; qui collum abominabili jugo patienter subiecturi simus, ne- que ferro nos à tanta tyrannide vindicaturi: quamquam ne id quidem soli ignavia assignandum est; sed fortuna iniquitati, quæ nos multis ab hinc annis Duce & capite orbatos teneat: cum Duces ad eam rem à nobis in pri- mis creati, idque titulo præferentes, jamdiu privata consilia sequentes, ac, defensione nostra omnino omissa, cum inimicis ipsis nostris, ac cum splendidioribus & po- tentioribus familiis conspirarint. Una est igitur nos è tantis angustiis eripiendi via, quam dicam; quamque utinam tantum roboris ac virilis indolis in vobis esset, ut capere in animum induceretis; devotam hanc civi- tatem, vobisque perpetuo iniquam relinquendo, alia- que sedes vobis querendo: qua in re nullum, aut pere- xiguum damnum faceretis; brachia ipsa, atque indu- striam & artificia, omnia denique (ut inquit ille) bo- na vestra vobiscum ferentes, quibus vitam toleratis: quæ res, ubicumque homines sunt, vos alent: sique tota & integra Respublica opulenti civibus nostris ce- det: quibus si nova plebe urbs replenda fuerit; eam multis blandimentis delentam atque immunitate omnium onerum invitam accersant, necesse est: quæ onera in- tegrali ipsis solis erunt subeunda. Sic fiet, ut pravum consilium in caput machinatoris tandem recadat. Ora- tio magis ad commotiones animorum faciendas, quam ad aliquid certi consilii capiendum valuit.

Cum interea Senatus modo multis ex principibus civitatis, modo consilio universæ civitatis, sæpe con- vocatis, rem acriter urgeret, ac sententias civium exquireret: quibus cum variaretur, paucis dissen- tientibus, ac rem producentibus; tandem unus ex principibus civitatis assurgens ejusmodi oratione contra tributa disseruit: Nulla res, Patres, specie aq- uior umquam fuit, quam tributum; quod onera ci- vitatis inter cives, pro modo rei cujusque familiaris, aqualiter distribuit: ceterum res nulla iniquior: quæ ut civitatibus in solo feraci & uberi sitis salubris est; ita solo macro & sterili utentium, & mercatorio qua- st- u, & industria vitam tolerantium pestis & venenum est: qualis est civitas nostra, quæ commercii & ne- gotiatione alitur. Omnis porro mercatoria industria fide in primis continetur; de qua integra & illibata ser- vanda ante omnia laborare omni ope mercator debet: nam, quibuscumque tandem deirimentis à fortuna affi- ciatur, & ad quem quamvis inopem statum redigatur; fide non labefactata se erigere ab omni casu potest, & in pristinum fortuna statum restituere: at, fide laben- te & vacillare incipiente, quamvis exiguis damnis ac- ceptis, corruiat necesse est: neque ulla spes meliorum re- rum suarum affulgere illi potest, quam fide prius recu- perata: quæ res semper ardua fuit: & quoniam mihi cum gnaris hujusmodi rerum sermo est; nihil est, quod rem vobis juxta mecum notam demonstrare studeam: atque, ut ad propiora descendamus, fingamus censum vigesimo quinto quoque anno novum institui; quæ res multis difficultatibus implicata semper fuit; multorum rem magno censi necesse est, ad quem censum modus tributi anniversarii dirigatur: quo temporis tractu ne- cesse est fortunam multorum immutari; (ut nihil est mercatoria negotiatione magis casibus & calamitatibus obnoxium, & fortuna libidini expositum) ac multos, qui, dum census ageretur, amplissimis opibus uteban- tur, pauperes fieri: quam rem mihi in longa ætate ali- quando usu venisse fateor; quod idem multis aliis quo- que contigisse sensi: quod si verum fateri volumus; ne- minem forum mercatorium ingredi non negabimus, qui non in iisdem angustiis aliquando fuerit: quæ in re qua- ro, in talem statum adducto quæ ratio sui expediendi incunda sit: sive enim Magistratui vulnera sua nudet; petatque, se tamquam non solvendo, vel tributo eximi omnino, vel illud imminui; tum vero omnem fidem sibi ipse abjudicat, ac spem pristina fortuna recuperan- da in perpetuum præcidit: sive plagas acceptas compri- mat, ne fidem labefactet; tributo anniversario omnem

questum magnitudine sua quotannis mergente, vires assumere ac se recreare numquam potest: quæ res cum frequentissima sit, nemoque fere illius expertus invenitur; brevi necessario fiet, ut homines commercia & industriam plane relinquere cogantur: quod jam factum esset; nisi paucis ab hinc annis tributum per impotentem regnantium libidinem institutum esset, ut tam exiguo temporis curriculo homines non bene penitus extitalem illius veneni vim percipere potuerint: quam cum sentire cœperimus, nullaque alia sit nos alendi via; brevi omnes ad necessitatem antiquam, patriam relinquendi, ac novas sedes quærendi adigemur: moxque plebs, quæ à Nobilitate & opulentis civibus alitur, nos consequetur: sicque civitas hæc ferarum silvestrium domicilium ac stabulum fiet: huc accedit, quod, cum idem orbis in omnes annos volvatur, ut ex divitibus parentibus nati, profusis sumptibus, ac quotidiani cultus & victas luxu re tandem consumpta, filios pauperes relinquant; qui egestatis non ferentes in varias orbis regiones commeant, seseque ad industriam conferunt; opibusque tandem aucti patriam, unde profecti sunt, repetunt, opibus suis ornamento & comodo illi futuri: ceterum observatum est, ex vicenis quibusque, qui Genua questus causa proficiscuntur, vix binos in patriam redire; ceteris vel fato absumptis, vel uxore implicitis, vel civilium discordiarum procellas detestantibus, vel libertatem à domesticis affinium & propinquorum molestiis amplectentibus: quod plerique adhuc fecerunt, id omnes in posterum facient; ne rem suam tot laboribus partam tributo paullatim absumendam objiciant: quale igitur est istud consilium, quod Genuam, quæ urbe nulla sub celo habitatoribus frequentior est, in vastas solitudines sit mutaturum? aut quid est, quod nonnulli seditiosi atque infima sortis homines, quibus in civitatis concordia ac quiete nullus locus est, cælum ac terras misceant; ac nihil aliud tributis tollendis queri dicant, quam, ut sanguis pauperibus mittatur? ante tempus quærentes, quæ alia re impendia publica tueamur, quam novis portoriis: quibus uno ac perfacili responso oratio præcidi possit; Genuam, tributo sublato, in eo statu fore, in quo quingentos annos continenter fuit; usque ad hoc tempus, quo viginti circiter ab hinc annis tributum institutum est: quare quid vos retinet, egregii cives, quo minus tetræ jugum, quæ res in manu vestra est, extemplo excutatis, vosque ac liberos vestros ex voracissimis faucibus lupa dies ac noctes vos comedentis eripatis? Hæc oratio rem inclinatam tandem impulit; tributaque in perpetuum sublata sunt; compositumque est cum Magistratu sancti Georgii, ut is inopiam ærarii sublevet, tribus & triginta librarum millibus Reipublicæ quotannis pendendis.

Per idem tempus nuncius dupliciter lætus Roma venit; Innocentium octavum mortuum, qui patriæ perpetuo iniquus fuisset; in ejusque locum Rodericum Borgiam Hispanum patriam Valentinum successisse, Alexandrum sextum vocatum, quem civitas amabat, ob memoriam Calisti patrui, qui semper propensus atque honorificus in Genuenses fuerat; quique in controversia inter Florentinos & Genuenses Oratores de primo honoris loco, secundum Genuenses judicium tulerat, quorum civitas vetustior esset, ac ducatus titulo insignis; ad hoc Genuenses bellica virtute ac militarium & navalium rerum scientia & usu præstarent, cum ipsi bella sua virtute, suisque corporibus gessissent; Florentini mercenariis armis uterentur, militarium munerum ipsi expertes ac penitus ignari; ad hoc Genuenses clarissimarum victoriarum toto mari Mediterraneo partarum, ac nomine & imperio Genuensi in multas longe diffitas gentes prolata gloria fulgerent; quodque caput fuit, majorem operam omnibus temporibus & locis Christianæ Reipublicæ potentissimis classibus, corporibus, ac sanguine suo adversus illius hostes navassent.

A Per ea tempora Ludovicus Sfortia Genuam civitatem à Regibus Francorum, ut ab illorum Majoribus Sfortiani antea Duces obtinuissent, fiduciam perpetuo impetravit: eo res redierant, ut de civitate nostra, injussu illius civium, eorumque voluntate minime explorata, inter externos Principes contraheretur; nihil ista Genuensibus curantibus: decesserat enim vetus gloriæ studium, atque imperii proferendi, nominisque illustrandi cupiditas, felicitium animorum cogitationes; in eorumque locum unum pacis & quietis desiderium successerat: præ quo cetera omnia, tamquam nihil ad se pertinentia contemnebant.

B Per eadem tempora multa inania solatia populo Genuensi data sunt; quorum primum fuit, Isabella Alphonfi Aragonii filia ad urbem adventus ad Joannem Galeacium conjugem proficiscentis: in qua plausibus, aliisque effusæ lætitiæ argumentis, apparatusque regii splendore excipienda, donis colenda, amplissimis lautis in civitate ac totis Genuensibus finibus, per quos iter facere contigit, præbitis, civitas egregiæ suæ in Principem voluntatis per amplam significationem dedit. Aliud solatium huic continuatum est, nuptiæ Joannis Adornii, Joannis Francisci Sanseverini filia uxore ducta, omni regiæ opulentia apparatu, omnique spectaculorum genere celebrata: in quibus rebus illud maxime insigne fuit; ingens vis argenteorum vasorum non modo publice, sed à singulis officiorum corporibus, necnon ab omnibus Liguriæ civitatibus atque opidis, ad honestandas nuptias, Joanni donatorum: adeo cæca quædam & inanis ambitio mentes Genuensium dementarat; ut eos donis colerent, ac velut idola venerarentur; quos seditionum ac novandarum rerum auctores, quietisque publicæ, privatæ ambitionis causa perpetuos perturbatores, bellisque civilibus ac magnis cladibus civitatem perpetuo involvere solitos, capitali odio prosequi oportebat: nec parvæ hilaritati civitati fuit occultus adventus Beatricis Ducis Ferrariensis filia, ac Ludovici uxoris, animi causa atque visendæ civitatis gratia, Mediolano profectæ: quæ humili & alieno habitu personam dissimulare conata est; ut ignota liberiores omnium rerum voluntates, liberioresque per urbem ultro citroque commeatus haberet, affectationum & salutationum impedimentis soluta: detectæ honores fortunæ, amplitudini, & studiis Genuensium convenientes habiti.

Insequens annus, qui fuit ejus sæculi nonagesimus tertius, (nam superius res gestas quattuor antecessentium annorum, annos ipsos non distinguentes, simul complexi sumus) duabus rebus insignis fuit: altera fuit hyems tam gelida, ut omnis & portenti loco habita sit: mare enim (quod ex omnium sæculorum memoria numquam auditum est) circa molem ac pontes ita alto gelu concretum est; ut nautæ scaphas & cetera navigia omni remorum vi connisi à terra propellere non possent: incunteque vere, pestilentia adeo gravis urbem invasit, ut ex capitibus, qui Genuæ remanserunt, vix quintus quisque superstes fuerit. Alterum fuit ad omnem posteritatem memorabile, novus orbis à Christophoro Columbo Genuensi cive inventus: quem certum nuncium Genuam attulerunt, Franciscus Marchesius Jurisconsultus, & Joannes Antonius Grimaldus, Oratores Genuensium ex Hispania reversi; quo duabus de causis missi fuerant: & Ferdinando atque Isabellæ Regibus gratulatum, ob regnum Granatæ, Mauris expulsis, tandem partum; & ad controversias nonnullas componendas, pacemque celsissimorum Regum impetrandam: quod utrumque ad effectum perduxerunt; & controversiis honorificis conditionibus compositis, & pace impetrata.

Ceterum res à Columbo gestæ, quamquam infinitæ

nitæ gloriæ civitati nostræ fuerunt; tamen nimium ex spatio excefferim, si eas persequi aggrediar: quæ res neque instituti operis est; & à multis prolixè facta: in primis ab Antonio Gallo cive Genuensi, ac magistratus sancti Georgii Scriba, qui æqualis illorum temporum fuit; nosque ipsi laudes Columbi in *Elogiis* nostris attigimus; rerumque gestarum ac

A meritorum magnitudinem; quorum gloria omnes gentes atque omnia sæcula longe superavit, magnifica Oratione ac Panegyrico cælo æquavimus. Unum illud silentio non præteribo, nullam omnino esse urbem sub cælo, quæ clariore alumno illustretur; Romam semper excipio, cui nihil mortale comparare fas duxerim.

V B E R T I F O L I E T A E,
PATRICII GENVENSIS,
HISTORIAE GENVENSIVM
LIBER XII.

A. C.
1494.



EQVITVR annus ejus sæculi nonagesimus quartus, toti Italiæ perpetuo lugubris, atque ad omnem posteritatem memorabilis, quo primum arma externa in Italiam ab illiusmet Principibus introducta sunt; eorumque bellorum initium factum, quæ miseram Provinciam continentibus direptionibus, rapinis, incendiis, civitatum everfionibus, ceterisque omnibus, alia super aliam cumulatis belli cladibus, sexaginta plus continentes annos lacerarunt ac deformarunt; tandem bonam illius partem exterorum imperio subjecerunt. Caput & origo horum malorum Ludovici ambitio fuit; qui Aragonensem domesticum inimicum evertere studens, Carolum octavum Gallorum Regem in Italiam evocavit: quod pravum consilium divini Numinis evidenti judicio ipse primus luit, avita ditione omnium, quæ sub cælo sunt, opulentissima ac feracissima, ab eisdem ipsis Gallis spoliatus; ipseque captivus in Galliam ductus, atque angusto carcere inclusus, in quo diu maceratus extremum tandem vitæ diem conclusit.

Carolus igitur, cum omnibus Galliæ viribus subnixus, ingentibus equestribus & pedestribus copiis septus, Alpes transcendere, & regnum Neapolitanum invadere constituisset; præmuniendas sibi in Italia maritimas vires intelligens, ne terrestribus opibus hosti tanto superior, maritimis cederet, eaque parte res Gallica claudicaret, classem augere decrevit: quod is idem, cui id expeditissimum erat, propter Genuæ opportunitates, Ludovicus in se suscipit; eaque de causâ ingens auri pondus Genuam mittit; quattuorque ingentes corbitæ ac duodecim triremes, quæ classi regiæ adderentur, brevi instructæ sunt. Cujus anni initio Ferdinandus Neapolitanus Rex fato functus, Alphonsum filium successorem reliquit: qui simul atque regnum iniit, terra & mari diligenter comparare instituit; ut tantæ in se incubituræ moli resisteret: huic Paulus Fulgosius Cardinalis, & Ibletus Fliscus, mutabilis ingenii homo, ac nemini umquam fidus, qui ad eum se contulerant, persuadent, ut, quoniam classem Gallica superiorem paratam haberet, occupet ipse bellum facere, atque oram Ligusticam invadere: sic fore, ut Gallos distineat, incitatumque illorum cursum retardet: probato consilio, Rex classem illico in Liguriam mittit, quam iidem Paulus & Ibletus conscenderunt, quæ extemplo portum Lunensem tenuit: ubi aliquamdiu fuit, irrita

spe illius oræ accolas in partes Aragonenses traducendi. Interea Ludovicus, classis Aragonensis adventu cognito, tria peditum millia in urbis præsidium mittit; cum totidem Helvetii ea de causâ à Gallo missi fuissent.

C Eo tempore Joannes Ludovicus Fliscus, quamvis corpore non satis valens, Spediam contenderat; animo, si facultas data esset, cum fratre ipso dimicandi; quem ob pravos mores ac mutabilem fidem impense oderat. At Proceres Galli turpe sibi putantes fociorum agrum sua causâ, ipsis inspectantibus, bello uri, rem communi Marti committere constituunt: quare magnus Galliæ Scutifer, Joannes Maria Sanseverinus, Joannes Adornius, Augustini Vicarii frater, classe conscensa, quæ fuit undecim ingentium corbitarum, triremium duodecim, viginti myoparonum, quos *galliones* appellant, iter in hostem dirigunt: quorum adventum Aragonenses minutionibus & imbecillioribus navigiis suis diffisi haud expectandum rati, protinus itinere retro repetito, in portum Liburni se recipiunt: at Galli hoste non invento, fide incolarum collaudata, quam neque preces flexissent, neque minæ labefactassent, neque belli clades infregissent, Genuam revertuntur; castello prius in scopulo non procul à Portu Veneris opido ædificato, ac præsidio firmato.

E Interea Dux Aurelianensis Genuam venit; cujus præsentia res acceleravit, cum Carolus Alpes jam transisset. At classis Aragonensis, cujus præfectus erat Fridericus Alphonsi Regis frater, cum copiis, quas Neapoli adduxerat, quasque in finibus Pisanis coegerat, ineunte autumno, è portu Liburni movit, & in Liguriam venit; primoque adventu Rapallum opidum occupat ac munit, præsidiiisque firmat; cum Reccum usque opidum cum quattuor peditum millibus excurrisset: quibus rebus auditis, Galli è vestigio Genua movent, marique ac terra hostem petunt; cum Aurelianensis Dux cum mille Helvetiis classem conscendisset, Antoniusque Maria Sanseverinus & Joannes Adornius terrestres copias ducerent: qui cum ad hostem pervenissent, primo congressu Helvetii acri Aragonensium impressione retro compulsi sunt: ceterum, numero pugnantium subinde crescente, recrudit pugna; Gallique ponte, qui opido & planicie, quæ est ante opidum, interjectus est, facile potiti sunt: per quod tempus auditum est, Joannem Ludovicum Fliscum cum haud contemnenda armatorum manu appropinquare: qua fama perculsi Aragonenses, veriti, ne ancipiti discrimine circumventur, in fugam se conjiciunt, montana petentes; spe sese Ibleti præsentia tutos fore: quæ spes homines frustrata est; plus ducentis illorum interfectis, ac

ac multo majore numero capto; in quibus fuerunt Julius Urfinus, Fulgosinus, & Orlandinus Fulgosi: qui Fulgosinus, cum evadere potuisset, tamen incertos casus veritus, ac timens, ne in manus Ludovici veniret, potius consilium duxit sese Aurelianensi Duci tradere: at Ibletus regionum gnarus, opidanorum Rapallensium favore, quibus charus fuit, evasit, per montesque ac valles errabundus cum parvulo filio ter spoliatus est: quare ad filium conversus, *Neceſſe eſt, inquit, fili, nos ad imitationem parentis noſtri Ade nos conformantes nudos iter facere: hac enim una eſt via latronum manibus nos eripiendi, ſpoliorum ſpe illis præſiſa.*

At Helvetii victores Rapallum opidum captum diripiunt; cum illorum impetum Joannes Adornius reprimere non potuiſſet: quorum rabies eo provecta eſt, ut valetudinarium ingreſſi, circiter quinquaginta homines in lecto ægrotos cubantes innoxios, quique nullam belli partem attigiffent, miſericordiam ſuppliciter implorantes crudeliſſime jugularint: quod immanis atrocitatis facinus Genuæ cognitum, miras animorum commotiones fecit; omneſque vulgo pro ſe quiſque clamare, tam inauditam ac tam barbaram ſævitiam haud impunitam omittendam; nec patiendum, homines ſui generis ac ſanguinis ab alienigenis, atque omnis humanitatis expertibus domi ſuæ nihil commeritos jugulatos: at Adornii fratres mitigare plebem accenſam cupere; interque ancipitia conſilia fluctuare; hinc vereri, ne nimis adverſando ſtudia multitudinis magis irritarent; illinc plebem armatam horrere, quæ non tam facile arma deponat, quam induat: ceterum caſus conſilium expedivit: verborum enim contentione inter nonnullos Genuenſes & Helvetios orta, res ad jurgia, mox ad manus venit: cumque vulgatum eſſet, Genuenſes ab Helvetiis interfici, ſubito tabernæ clauſæ ſunt, momentoque temporis magna hominum multitudo in armis fuit; qui omnes ad locum, ubi commiſſa erat rixa, accurrentes, haud exiguum Helvetiorum numerum, qui ſuis laborantibus ipſi quoque ſubſidio accurrerant, interficiunt; quorum mors ſaluti ipſiſmet Helvetiis fuit: populi enim indignationem mitigavit, incitatumque ardorem reſſit: cum ſatis illorum ſanguine manibus Rapallinecatorum parentatum eſſe ducerent: quare Proceres Galli, qui furori concitatae multitudinis in claſſem ſe ſubtraxerant, poſtero die, rebus pacatis, ac civitate in tranquillum redacta, in terram deſcenderunt.

At Rex Aſtam pervenerat; cum claſſis omnibus rebus inſtructa Genuæ ſtaret, ad omnia, quæ uſus belli poſtulaſſent, parata: erant autem onerariæ ingentis magnitudinis duodecim, ac reliquæ minores corbitæ varii generis ac nominis omnino ſexaginta, triremes triginta, in quibus una fuit majoris formæ: quo tempore Apennino per Regem nondum ſuperato, Joannes Galeacius Dux fato functus eſt, cui Ludovicus ſucceſſit; ad quem novum regnum gratulatum civitas ſub finem hujus anni ampliſſimam legationem ſexdecim civium miſit: qui fuerunt Franciſcus Soſia Juriconſultus, Carolus Spinula, Francus Flifcus, Anfaldus Grimaldus, Baptiſta Lomellinus, Melchior Nigronus, Paris Pinellus, Cyprianus Palavicinus, Lucas Juſtinianus, Donatus Marcus, Vincentius Saulius, Angelus Majolus, Baptiſta Caſella, Andreas Ferrarius, Buzalinus, Ludovicus Croccia.

Eodem tempore Princeps Salernitanus, & Balthaſar Pufferla Ducis Mediolani, & Epiſcopus Pariſienſis, Regiſ miſſu Genuam veniunt; poſtulantque, ut Genuenſes Florentinis bellum moveant; perſancte ac prolixe promittentes, Regem Sergianam & Petramſanctam, ſimul atque illis potitus fuerit, Genuenſibus reſtituturum: ceterum, cum auditum eſſet, Sergianam, Petramſanctam, totumque agrum Lunenſem à Rege occupatum; omni ea co-

A gitatione plane depoſita, Legati recedunt; Rexque Piſas ingreſſus libertatem Piſanis reſtituit: à quo Genuenſes, quattuor Oratoribus ad illum miſſis, ſua ſibi opida reſtitui, ut Rex promiſerat, poſtularunt, nihilque impetrarunt: quæ res non minus Ludovico quam Genuenſibus gravis fuit; cum idem per Galeacium Sanſeverinum fruſtra tentafſet, fidem promiſſorum ſibi ipſi à Rege factorum teſtatus. Sunt, qui putant, hanc primam ejus animi irritationem in Gallos fuiſſe.

B Per ea tempora Alphonſus, cum audiſſet Carolum, Alpiſ jam ſuperatis, inſtitutum iter perſequi; metuens, ne populi, quibus ſeſe multis de cauſſis capitaliter inviſum ſentiret, odium metu tum compreſſum, in adventu Gallorum fiducia præſentis auxilii effunderent; regno Ferdinando filio, cum quo nullæ odiorum cauſſæ Neapolitanis eſſent, ceſſit: claſſeque conſenſa, cum ingenti auri pondere ac magna gemmarum vi in Siciliam ſe ſubduxit.

C Interea Carolus, cum aliquamdiu cum Ludovico fuiſſet; Apennino tranſcenſo, Florentiamque ingreſſus, Florentinos, ſpe facta, ac fide data, ſimul atque à bello Neapolitano rediret, Piſas, aliaque loca, quæ præſidiis ſuis occupafſet, reſtituturum, ſibi ſocietate ac ſœdere conjunxit: inſtitutumque iter perſequens, rebus Senenſium compoſitis, per ditionem Pontificiam pacatum iter faciens, Oſtia tamen ac nonnullis aliis opportunis locis præſidio firmatis, regni Neapolitani fines infeſto exercitu ingreditur: primoque adventu Capua munitiſſima urbe, ac prævalido præſidio firmata, quam rem diuturni atque ingentis certaminis fore omnes præceperant animis, ſine ulla dimicatione potitus eſt; ab Joanne Jacobo Trivultio, cujus fidei maxime Ferdinandus tantæ urbis cuſtodiam crediderat, nulla oppugnatione exſpectata, tradita. Capuæ exemplum ipſa regia urbs Neapolis ſecuta eſt: cum populus, eo nuncio audito, tumultuari ac voluntates in novum dominium propenſas (ut eſt perpetuus Neapolitanorum mos) nudare cœpiſſet. Fridericusque fortunæ cedendum intelligens, in arcem novam cum ſeptingentis Helvetiis, Friderico patruo, ac Davalo Piſcariæ Marchione, ſingularis ac conſtantiſſimæ in Regem ſuum fidei viro, ſe recepiſſet: quam urbem Carolus biduo poſt ingreſſus; omnibus lætitiæ ſignificationibus à populo in omne aſſentationis genus natura compoſito exceptus: qui ſecundiſſima fortuna uſus, brevi totum fere regnum Neapolitanum, ſine ullo certamine, Proceribus ac populis ad ſeſe tradendum certatim accurrentibus, obtinuit: qui incredibilis, atque ex omni ſæculorum memoria numquam auditus felicitatis curſus cum omnes Italos ingenti ſtupore defixiſſet; tum vero illum in primis perculit, qui rerum auctor & machinator fuerat, Ludovicum ipſum, quem pravi conſilii poenitere cœpit; quod indomita cupiditate Aragonenſes evertendi cæcatus, non animadvertiſſet perniciem, quam aliis machinatus eſſet, in ſuum ipſius caput poſſe recidere: neque enim impotentem Gallorum cupiditatem minus ditioni Mediolanenſi quam Neapolitanæ imminere: ut nil mirum eſſet, ſi Galli, Aragonenſibus perdomitis ac ſubactis, victricia arma in ſe vertiſſent: cum præſertim Carolus multa ſigna parum propenſi animi, neque ſatis ſinceræ in ipſum fidei dediſſet: nam præter Sergianam, ac Petramſanctam, agrumque Lunenſem Genuenſibus, ipſo efflagitante, non reſtitutum, principatum Tarenti, promiſſum non dabat; negans ſeſe, niſi toto regno capto, obſtriſtum: ad hoc Joannem Jacobum Trivultium ex Mediolanenſis Nobilitatis principibus, ac Guelpharum partium caput, magno in honore, honorificisque conditionibus, per ampliusque ſtipendiis auctum apud ſe habebat: præterea Paulum Fulgoſium Cardinalem, Ibletumque Flifcum ingentibus promiſſis oneratos ſibi devinxerat; plurimum ad res Mediolanenſes, in illius virtute

ac nomine, ad Genuenses, in horum auctoritate & potentia tentandas ponens: in quibus privatim offensionibus irritatus Ludovicus, regios procuratores, quicquid de causa Genuam venerant, novam classem comparare vetuit; triremesque regias, quæ in portu erant, retinuit: acrioribusque remediis salutis suæ consulendum statuens, Senatum Venetum appellat: cujus animum eadem cogitationes jam ante versare coeperant: quippe quibus tanta Gallorum felicitas, nimisque in Italia potentia non minus suspecta ac formidolosa esset.

Interea Florentini, Regem tantis occupationibus in regno Neapolitano implicitum minora ista minus animadversurum, aut curaturum, rati; occasione arrepta Pisas recuperandi, copiis admotis urbem circumfidunt: quam cum artius in dies premerent, parvumque præsidium à Rege in arce relictum tantam urbem non satis defenderet; in Genuensium opem, Legatis missis, confugiunt. Legationisque princeps in Senatum introductus, misericordiam Genuensium tali oratione commovere aggressus dicitur: *Is est status rerum nostrarum, Patres, in eum locum à fortuna adducti sumus: ut servitus, quam nihil hominibus, præsertim in libertate vivere assuetis, execrabilius, aut abominabilius est, nobis minimum malorum videatur: ea enim per octoginta annos à Florentinis perpeffi sumus, qua omnem cogitationem vincant: mitto gravia & intolerabilia tributa: mitto continentes exactiones: nam hac, quamquam dura & acerbata, tamen non omnino inusitata sunt in impotenti regnantium dominatu: mitto contumelias ac contemptum: cum ab omni publica procuratione, omnique munere publico exclusos, etiam iis, ad qua alienigena admitti solent, nullo alio nos, quam vilium & degenerum capitum loco habeant: qua tamen res immanem hominum avaritiam atque efferatam in nos animum satiare non possunt. Duo illa sunt execrabilis atque ex omni sæculorum memoria nunquam audita crudelitatis exempla: quam Florentini non modo in res & prædia nostra intenderunt, sed ad corpora ipsa nostra, nec non ad mutata testa & civitatem inanem extenderunt. Alterum est, opus fossarum & aggerum intermissum: quod Majores nostri tanta cura & impensatuebantur: quo factum est, ut ager Pisanus humilis atque depressus, aquis ex supernis locis assidue confluentibus nusquam derivatis late restagnantibus, cæno & paludibus totus obductus sit: quorum pestilenti habitu calum infectum, corpora nostra olim salubria pestiferis morbis continenter involvat, assidueque funeribus civitatem repleat: cujus etiam humido afflatu compagibus ædium solutis: complura tam publica quam privata ædificia, mira pulchritudine ac regia magnificentia extructa, quotidie ac passim ruentia urbem miserabili ceteris omnibus, unis Florentinis jucundo spectaculo, sædis ruinis deformant: alterum est, commercia & negotiatio nobis adempta: mercatoriaque industria ac facultas, lanæ & serici opificia exercendi interdicta: ut, quæ urbs olim compluribus clarissimis victoriis omnes Mediterranæ oræ Provincias fama nominis sui implevit, amplissimisque mercatorum societatibus omnes Europa, Asia, atque Africa urbes occupavit, quaque nulla opibus & divitiis in Italia florentior fuit: nunc mercatorio quaestu adempto: unde alimenta sibi paret, nullam viam expeditam habeat: qua duæ res quo tandem alio spectant, nisi ut, ea patriæ relicta, qua nos alere non possit, alias sedes nobis queramus? sicque Pisa ex frequentissima incolarum urbe, solitarium nemus, ac latebra ferarum fiat. Atque utinam, Patres, ea, quæ nunc vobis oratione demonstrare conamur, oculis subicere possemus: utinam squalorem misera civitatis, ac vultus Pisanorum mortis imaginem exprimentes intueremini: profecto nostrarum arummarum vos misericordia caperet. Mens divinitus Carolo data est, libertate restituta, nos è voracissimis Florentinorum faucibus eripiendi: sempiternum hoc beneficium celsissimo Regi debemus: ceterum breve futurum est: quod nos, sanguine assidue misso, enecti &*

A *ex sanguine tueri non possumus: nisi lumen Deus ipse vobis præferat, Patres, nos infidem accipiendi, propugnationemque civitatis nostræ suscipiendi: cujus rei, præter communem humanitatem, Reipublicæ vestra rationes necessitatem quamdam vobis imponunt: è quorum re non sit, Pisas in potestatem Florentinorum venire: ex qua una gradus ad res vestras, atque ad portum nobilissimum Lunensem fieri possit: ad quem illos cupiditatis oculos adjecisse, declarant Sergiana, Petrasancta, agerque Lunensis nuper vobis ademptus: ceterum hæc consilii vestri sunt: nobis una tantummodo relicta sunt partes, misericordiam & opem vestram, id quod enis precibus facimus, implorandi: fidemque vestram obtestandi, ne nos ad præceptum consilium descendere patiamini: uxoribus, & parvulis natis, omnique imbelli ætate jugulata, patriam incendi, nosque insuper cum illa concremandi, quod utique, multorum clarorum populorum exemplo, facere decrevimus, à vestra ope, cum in nullam aliam hoc tempore confugere possimus, deserti. Miserabilis oratio vim habuit Genuensium misericordiam commovendi: qui bono animo Pisanos esse jubent, quos ope sua sese numquam deserturos pollicentur: Magistratumque octoviralem creant: cui rerum Pisanarum cura mandata est: ii statim ingentem vim hastarum, scutorum, thoracum, omnisque telorum generis Pisas mittunt: simulque cum illis Alexandrum Nigronium Legatum, cum haud exiguo argenti pondere: dato mandato ditionis Genuensis hominibus Pisano agro finitimis, ut nava ac sedula opera sua ad ea, quæ usus Pisanorum postularint, Legatusque imperarit, parati sint.*

B *Interea inter maximos & potentissimos Christiani orbis Principes, Alexandrum Pontificem maximum, Maximilianumque Cæsarem, Ferdinandum, & Isabellam Hispaniæ Reges, Senatum Venetum, Ludovicum Sfortiam Mediolani Ducem, fœdus arcendi belli adversus quoscumque ditiones fœderatorum vexantes, mense Aprili Venetiis ictum est: cum in eam civitatem amplissimæ legationes eorum Principum cum liberis mandatis convenissent: quo atroci & minime expectato nuncio perculsus Carolus, mentis diu impos obtoruit: quæ res causa fuit, consilia Galliæ repetendæ, ad quæ jam pridem animum adjecerat, accelerandi: rebus igitur Neapoli nondum fatis constitutis, nec dum animis Neapolitanorum in se firmatis; quin contra multis populis tædio Gallicorum morum vacillantibus, ac vetus Aragonensium imperium respicere incipientibus; cum nonnulli etiam aperte defecissent, iter ingreditur: cum prius summa omnia fecisset, ut Pontificem à societate fœderatorum avelleret; fatis sese ab illo habere dicens, si ille sese medium gerendo in neutris partibus fuisset, jusque fiduciæ regni Neapolitani sibi auctoritate Pontificia confirmaret: quorum neutrum impetrare potuit; Pontifice respondente, neque se recentem societatis fidem elusurum, neque jus fiduciæ illi prius ratum facturum, quam causa per judicium diligenter cognita: qui congressum Caroli jam fines Pontificios ingressi devitans, sese in civitatem Urbevetanam cum ducentis cataphractis equitibus, quingentis levis armaturæ, ac tribus peditum millibus subduxit; Legato Romæ relicto, qui Regem omni honoris genere acciperet, omnique officio coleret. Rex, cum paucis diebus in urbe fuisset, institutum iter per Etruriam persequens, locis Romanæ Ecclesiæ, quos suis præfidiis occupat, liberis relictis, præter Ostiam, cui Julianum Roborem Cardinalem, eundemque Episcopum Ostiensem præfecit; contentionibus Pisanorum & Florentinorum agitato, qui utrique fidem promissorum testabantur; illi libertatis conservandæ, hi Pisanorum sibi restituendarum: inter ancipitia consilia diu fluctuatus; nulla decreta, omnibusque suspensis relictis, iter nonnihil intermissum repetit: cum prius, incredibili at-*

que inveterata cupiditate Genuæ sibi adjungendæ, ipse per se flagrans; ad hoc assiduis stimulis Cardinalium Roboreji, & Jani Fulgosi, Ibletique Flisci, & aliorum exsulum Genuensium instigatus, spem facientium rerum haud dubie novandarum, Sergiana ipsos haud contemnendis copiis, quarum Dux fuit Philippus Sabaudianus, ad res Genuenses tentandas mittere decrevisset; imperassetque Duci Salandæ, ut cum copiis, quas habebat, sese cum illis jungeret; idemque mandatum dedisset Vitelliis fratribus, qui ducentos cataphractos ducebant, tantoque intervallo retro remanserant, ut jam Regem consequi non possent: quibus copiis septem triremes majoris, duas minoris formæ, dualque biremes addidit, cum non plura navigia ex tota classe superessent; quarum præfectus erat Miolantius: quæ lateribus terrestrium copiarum prætentæ maritimas opportunitates exercitui præberent, suisque animos adderent.

• Per ea tempora trepidus nuncius à Genuensibus incolis urbis Peræ & Chiensibus missus venit, Turcam ingentem classẽ comparare: quam rem Genuenses haud contemnendam rati, quinque ingentes corbitas comparant; quas præter consuetam nauticam turbam trecenti armati conscenderunt: cui classi præfectus est Thomas Justinianus; qui, cum accelerans Chium appulisset, omnia pacata & tranquilla invenit: nihil Turcam movisse, neque movere in animo habere: nullam denique in illis Provinciis armorum suspicionem esse. Existimatum est Venetorum ac Ludovici id fuisse commentum: ut, eo metu injecto, Genuensium animos à cogitatione novorum consiliorum ad sua tutanda averterent.

At Rex tentandum prius ratus, si sine strepitu armorum destinata consilia ad effectum perducı possent, fecialem Genuam cum his mandatis mittit: *Regem amplam legationem quattuor primariorum Procerum Genuam mittere decrevisse: qui de maximis rebus & ad illorum commoda & dignitatem in primis pertinentibus cum Magistratu Reipublicæ, ac sancti Georgii agat: nihil armis opus esse; neque ullum metum esse ab eo Rege, qui Genuenses semper unice dilexerit; illorumque Rempublicam honoribus & commodis amplificatam semper optarit.* Responsum est feciali: *Hanc sese Regis celsissimi atque invicti in se voluntatem honorificam in primis putare: Legatos se comiter accepturos & reverenter; ac quæ exposuerint, cognituros: ceterum cum non plus quinquaginta capitibus veniant, in quibus nullus omnino Genuensis sit.* Vix fecialis legationem renunciarat, cum Antonius Maria Fliscus, cum parte copiarum regiarum Sergiana educta, infesto exercitu fines Genuenses invadit; Trebianumque opidum, circumjectamque regionem occupat, Bernardino Adornio & Juliano Magnerni expulsi: eodemque tempore Roborejus & Fulgosi Cardinalis, & Ibletus Fliscus cum exercitu Sergiana movent; qui nuncius Adornios fratres vehementer percussit, considerantes civitatem secum ipsam discordem intestinis odiis inter se flagrare, Regem potentem firmissimis copiis fultum, quem tanta victoria fulgentem omnes horreant: qui variis consiliis multorum agitati, cum nonnulli auctores essent, ut Ludovico relicto, qui non satis illos defendere posset, sese in fidem Regis darent; manere tamen in fide decreverunt: cum gens Spinula, cujus vires & opes supra quam modicæ erant, maximis clientium gregibus in urbem introductis, studia cum illis conjunxissent: qui Spinulani cum Adornianis conjuncti, numerum decem armatorum millium conficiebant. Hi omnes sese mutuo hortantes, atque ad Gallos arcendos acuentes, ad omnia intenti, nullam sibi quietem dare, vigilare, excubias agere, mœnia circuire, stationibus portas firmare: qui curas civitatis & ditionis defendendæ partientes, ne illam nudam & apertam hostilibus conatibus relinquerent, Bernardinum

A Adornium cum quingentis armatis mittunt, qui oræ in Orientem versæ præsidio sit: ad hoc nonnullos Fulgosianæ Factionis homines, quorum inquietum ingenium suspectius erat, exsulio multatos intra horæ spatium urbe excedere cogunt: sed nihil æque conspectum erat, atque Conradoli Stangæ diligentia, ac vigilantia, & sapientia: is omnia maxima & minima obire, omnibus rebus adesse, omnibus consiliis interesse, in medium consulere, omnia providere, omnibus rebus occurrere, nulla umquam metus aut suspicionis de Genuensium fide & constantia significatione data: cum igitur Principum foederatorum in primis interesset, Genuenses à Gal-
B lis abstrahere; illos per litteras assidue hortabantur, ut ab omni studio, sensuque Gallorum se penitus segregantes, cum reliqua Italia, adversus perpetuos nominis Italici hostes conspirarent: sed nullæ crebriores erant, quam Ludovici ipsius litteræ, quarum summa fere hæc erat. Multa, eaque prolixè, de sua egregia ac perpetua in Genuenses voluntate, præfabatur; qui apud ipsum fratrum charitatem obtinerent: numquam se de illorum fide ac studio dubitasse; quarum alteram sinceram, alterum incensissimum in se semper cognovisset: sed monere illos, majores ac firmiores copias, ipsum & Venetos, quam Galli habeant, contraxisse; ut omittet
C potentissimos Europæ Principes, qui omnes in Gallos conspirarint, qui omnium regnorum viribus connisi, si res postulet, subsidio venturi sint: præ quibus quotam tandem partem Gallos esse? hortari proinde se, ac postulare, ne quid per inconsultum metum, quod sequius sit, de se ac de rebus suis consulant.

Interea, cum exercitus à Rege, qui fuit septem armatorum millium partim peditum, partim equitum, Genuam venisset; totum illud spatium, quod ædi sanctæ Agathæ & colli Albarii interjectum est, infederunt, flumine Bisamnio inter ipsos & urbem
D intercedente: cum classẽ septem triremium ac duorum myoparonum in sinu Rapallensi reliquissent; sperantes, suum adventum aliquos motus Genuæ excitaturum: quæ spes cum vana evasisset, aliquot dies nihil tentantes in speculis fuerunt. Interea Rex in late patentes Longobardiæ agros descenderat, qui in finibus Parmensibus ad Tarum fluvium exercitum foederatorum obvium habuit: cum quo signis collatis dimicavit: multique æquales illorum temporum tradiderunt, æquo Marte à pugna discessum esse: quod, ut ad clades acceptas, verum
E esse potest; ita, si, quod unum Rex intendebat, spectemus, negare non possumus, quin Rex superior evaserit: qui, hostibus submotis, per medios illos invitos sibi iter aperuerit; quod, hoste inspectante, nec laceßere, aut terga abeuntis invadere audente, persecutus est.

Interea Genuæ, cum auditum esset, Baptistam Fulgosium cum haud contemnendis copiis adventare; antequam ancipiti discrimine cingerentur, rem
F fortunæ ac communi Marti committere constituunt, initio à maritimo bello facto: quare octo triremes, ingentemque corbitam, ac duo minora navigia comparant atque instruunt: cui classi Franciscum Spinulam cognomento Maurum præficiunt, Trierarchis additis, quorum Fabricius Justinianus Gibbus cognominatus duas ducebat, Bernardus Fliscus totidem; Casanus Marinus, Bernardus Rovoretus, Andreas Justinianus, Joannes Turrius, singuli singulas. Franciscus igitur, classẽ illico conscensã, Rapallum petit: cum quo una profecti sunt Joannes Ludovicus Fliscus, & Joannes Adornius terrestrium copiarum Duces, sexcentis delectis militibus in alia minora navigia impositis: qui, itinere celeriter confecto, Rapallum nocte appellant, copiisque silentio in terram expositis, parvo negotio, nihil sentientibus Gallis,
Vv 2 opi-

opidum expugnant, praesidiumque Gallorum capiunt; atque, cum, tumultu exaudito, maxima pars armatorum, qui erant in classe, in terram desiliissent, suis laborantibus subsidio accurrentes, classis Gallorum defensoribus vacua sine certamine à Genuensibus capta est: Miolantiusque praefectus sese Ibleto Levanto, quem Ludovicus Spinula celoci suae majoris formae praefecerat, tradidit, decem ducatorum millibus in redemptionem suam promissis, toto argenti abaco illi pignori dato, quem oravit, ut sese in Provinciam Narbonensem extemplo deferret: ceterum cum Ibletus herum suum prius consulere voluisset, spatium dedit persequentibus illum comprehendendi; qui Ducibus traditus est. Ingens praeda fuit, quae milites, ac socios nauticos, Ducesque ipsos ditavit. Cujus cladis nuncio accepto, extemplo Cardinales ac ceteri Proceres vasis conclamatis discedunt, agmine in composito, atque iter fugae similis quam profectio facientes: à quibus insequendis Augustinus urbanam juventutem continuit. Vitelloctiusque Vitellius, qui Clavarum usque perrexerat, discessu Genuensis exercitus audito, castris retro motis, in sua reversus est: opidumque Spedia ac nonnulla opida Orientalis orae, quae sub adventum Gallorum defecerant, in veterem obedientiam redierunt, quod idem fecit urbs Albintemelium; quam Paulus Baptista Fulgosius, ac Lucas Auria, & Monæci Dominus occupant.

Eodem tempore Ferdinandus Rex litteris suis peramanter scriptis certiores Genuenses fecit, sese Neapolim, Gallis ejectis, intrasse; omnibus effusae voluntatis signis à Neapolitanis exceptum. Jucundus in primis Genuensibus nuncius fuit; qui animi laetitiam supplicationibus decretis, aliisque significationibus testificati sunt: atque insuper duas ingentes corbitas, Nigroniam & Lomellinam, subsidio Regi miserunt: quae magno usui, magnoque adjumento Regi fuerunt in navali praelio cum Gallorum classe commisso: quae subsidium in arcem novam introducendum vexerat: quam Aragonenses, Genuensibus additis auxiliis aucti, illorumque virtute adjuti in fugam conjecerunt ac profligarunt.

Eodem anno, cum Pisani omnia, Florentinis urgentibus, artiora in dies fierent; ne Pisani animum desponderent, eo missus est Fracassius Sanseverinus, Genuensesque, Venetorum Scriba ac Conradolo Stanga continenter instantibus, spemque facientibus Sergianæ & Petrasanctæ recuperandæ, haud exiguum pecuniarum summam Pisas miserunt. Interea, incunte autumnus, pax inter Regem & Ducem Mediolani ad Novariam convenit; approbantibus Venetis, quos tedium belli & impensarum ceperat; quibus integra duorum mensium deliberatio reservata est ejusdem pacis ineundæ. Multae fuerunt conditiones pacis, quas non necesse habui persequi; illas tantum scribere satis habens, quae rem Genuensem attingunt: Rex Spediam & alia loca occupata Genuensibus restitueret: Genuenses vicissim Miolantium & ceteros captivos dimitterent; triremes & naves ad Rapallum captas restituerent: Duxque pariter triremes Genuæ retentas restitueret: liceret Regi stipendia solventi, quot naves libuisset, Genuæ comparare; Genuensesque Regi armamenta, ceterosque omnes navales apparatus, mercede accepta, commodare obstricti essent, modo ne ad res hostium Genuensis Reipublicae fovendas pararentur: Duxque mox suis sumptibus duas ingentes corbitas Genuenses omnibus necessariis rebus refertas Regi commodaret: Genuenses copias Pisas missas, Duxque Fracassum revocarent: neque se Genuenses posthac bello inter Florentinos & Pisanos interponerent: pro quarum rerum ac ceterarum conventarum observatione, Regi à Genuensibus certis obsequiis & à Duce arce Castellet-

A to caveretur: quam Dux Ferrariensis, qui ea de causa ab utroque Principe evocatus, in castra venerat, pro sequestre ac communi arbitrio teneret: quas res Dux cum per litteras & nuncios Genuensibus demonstrasset; duo Regis procuratores Genuam illico venerunt; quattuorque naves conduxerunt: quos tamen Genuenses varia causantes, ac retractantes, tamdiu extraxerunt, dum auditum est, Ferdinandum arce nova potitum: quare Galli naves, quarum nullus usus futurus esset, dimiserunt; stipendiis, quae jam perfolverant, recuperatis.

B Hoc anno sive exortus, sive (quod magis crediderim) detectus est morbus ille; quem ex contagione contractum, quarum illa efficacissima est, cum mas cum femina corpus miscet, Galli *Neapolitanum*, Itali *Gallicum* vocant, mutuo errore utriusque nationis, alteram ab altera illum accepisse credentis: certioribus auctoribus ac verisimiliora tradentibus libentius steterim, illum ex novo tum recenter invento orbe, ubi morbus hic frequentissimus est; neque fere illius expertus est, in Italiam allatum: qui morbus Veteribus plane ignotus, ac numquam antea auditus, incredibili celeritate toto orbe nostro pervagatus, brevi omnes ejus Provincias comprehendit: quamquam non sum nescius, virum doctissimum, ac poetam iis, quos mirata est antiquitas, conferendum, Hieronymum Fracastorium aliam opinionem habuisse, ac de re in *Syphili* suo acutissime disputasse: cui ego, ut fidem non abrogaverim; ita historiam scribentis est, potius sese ad communes & forenses opiniones accommodare, quam Philosophorum, quamvis acutissime conclusas, rationes sequi: hujus morbi initia atrocissima & horribilia fuerunt; tempus postea, quod omnia solvit; ac complura sollerti Medicorum investigatione & industria inventa remedia vim morbi ita mansuefecerunt, ut jam non formidolosior sit, quam ceteri morbi: ejus natura ea est, ut multo ante ex contagione contractus, non prius se indicet, quam totum corpus contaminarit; luesque pigro progressu occulte obrepens, ad jecur pervenerit: quo infecto, sanguis ab illo, tamquam à fonte, corruptus manans, morbum compressum tandem aperit: interiores enim artus ac membrorum compages acerrimis ac vix humanae patientiae tolerabilibus doloribus initio, ut diximus, urebat; forasque erumpens omnem cutem immanibus pustulis atque ulceribus deformabat: quin, carne etiam velut ad extremam tabem extenuata, horribilibus ossium abscissibus, ita effigiem oris immutabat, ut aegrotus ne ab ipsis quidem intimis familiaribus, ac quotidianis ministeriis assidentibus ullo modo agnosceretur: neque hoc erat ultimum malorum; illi erant exsecrabilis luis abominabiles effectus, membra plane adempta; aliisque nares, aliis aures, aliis lumina ipsa exesa. Huic morbo, cum varia remedia Medicorum ars, ut diximus, excogitavit; tum certum illud, ac praesens à natura datum, inde allatum est, unde morbus manasse creditur; hoc est, ex ipsis Orientalibus Indiis, in quibus arbor nascitur, in cujus recentibus fructibus ea inest à natura indita virtus, quae hoc morbo correptos brevi prorsus liberet. Hujus arboris trunci naturalem virtutem parva ex parte retinentes ad nos allati in scorbem conteruntur; ex qua aqua ad dimidiam decoquitur, cujus bina pocula in die aegrotanti dantur; F isque, poculo hausto in lecto, multa superingesta veste collocatur; cui calor subito conceptus magnam vim sudoris exprimit: parcissimo autem cibo aegrotus utitur, à vino atque ab omni eduliorum genere abstinens, praeter panem torridum; cujus non plus fere duas uncias cum paucis passiarum acinis in prandio & in coena sumit: tandem jecore, aquae virtute purgato, pestiferæque luis vi partim inedia consumpta, partim exsudata, quadragenorum dierum curatione aeger sanatur: qui totum illud tempus con-

conclavi inclusus, fenestris clausis, omnibusquerimis ita obstructis, ut nulla aura possit penetrare, numquam in lucem prodiens traducit. Hujus morbi hoc tempore effectus fere sunt nonnulli, non tamen admodum acuti: artuum dolores, exteriores pustulae, ac cutis glabra, omnibus pilis atque ipsis etiam palpebris decidentibus, quae non nisi longo tempore renascuntur.

A.C. 1496. Per idem tempus praefectus arcis Sergianae, vir Gallus, occulta consilia de arce restituenda cum Genuensibus serere coepit; quae brevi, anno ejus saeculi nonagesimo sexto, Christophoro Catanio, Francisco Lomellino, Petro Persio internunciis emissis, ad effectum perducta sunt, viginti quattuor aureorum millibus praefecto persolutis: qui civitate Genuensi donatus est; Sergianaque urbs cum arce Genuensibus restituta. Eadem opera Petrasancta ipsa quoque recuperata esset; ni nostri procrastinassent, sperantes sese extrahendo, praefectum Gallum ad aequiores conditiones adducturos: quae cunctatio Lucensibus tempus praevertendi dedit: quibus praefectus, ipse quoque emptus, opidum tradidit: quod factum animos Genuensium in Lucenses vehementer irritavit: qui illico cum Ludovico egerunt, daret operam, ut Lucenses Genuensibus suum opidum mox restituerent: aut permitteret Genuensibus, Lucensium audaciam bello persequi. Benigne Legatis appellatis Ludovicus, nihil esse, cur ad arma eatur, respondet; sese enim effecturum, ut Petrasancta ad Genuenses sine strepitu redeat: qui tamen cum nihil promissorum praestaret, Genuenses iras à Lucensibus in illum flexerunt; frementes, gratum esse Ludovico Lucensium factum, qui numquam, ejus injussu, tantam rem ingressi essent: nudasse tandem animum Ludovicum tot artificiorum fucis involutum; illudque haud obscure agere, ut Genuenses, viribus subinde praecisis, paullatim enervet. Igitur omnibus Genuensium curis in Petrasanctam recuperandam versis, cum de ea re consilia frequenter haberentur; Stephanus Justinianus censuit, omnia auxilia foederatis neganda, donec Petrasancta ad Genuenses rediret: quae sententia cum Adornii fratribus molestissima fuisset, oppressa est ejus rei mentio.

Eo anno (quoniam hanc quoque rem Annales nostri non omittendam duxerunt) Maximilianus Caesar Genuam venit, omni honorum genere exceptus: cui cum Ludovicus obviam processisset, eumque per omnes suos fines deduxisset; Genua quoque quattuor Oratores illi obviam missi sunt, Lucas Grimaldus, Franciscus Soffia Jurisconsultus, Cosmus Zerbius, Baptista Spinula: ad gratulandum sospitem in Italiam adventum, juriumque eximiorum, quibus superiores Caesares Genuam civitatem impartiti sunt, probationem petendam: quam rem Caesar in adventum suum Genuam distulit.

A.C. 1497. Insequens annus ejus saeculi nonagesimi septimus nihil habet, praeter tres ingentes corbitas & duas triremes adversus piratas missas; quarum praefectus fuit Joannes Ludovicus Fliscus: qui piratas infecutus, portu Tolonensi inclusos aliquot dies obsedit; & arcem Castelletum à Ferrariensi, sub finem anni, Ludovico restitutam.

A.C. 1498. Sequentis anni ejus saeculi nonagesimi octavi initio atrox procella repente exorta est; cujus tantavis fuit, ut magnam partem molis recenter aedificatae, raro exemplo, dejecerit. Eo anno Ludovicum Genuae visendae cupido incescit: nullus umquam Princeps apparatus, aut magnificentius, ac splendidius, aut hospitalius acceptus est: nam primum quattuor ex primariis civibus illi obviam ultra montium juga missi sunt, duplicatus numerus illum ad radices montium excepit, ad vicum Rivarolum quingenti adolescentes sumptuosissimis vestibus ex serico & purpura induti praesto illi fue-

A runt: Dux uraniscum subire recusavit, neque hastas sustinentes à Magistratu gestari passus est, detectoque capite urbem est ingressus, in praetoriumque divertit: cum centum privatae aedes, quae in civitate magnificentissimae erant, omni argenti, pretiosae stragulae, aulæorum, serici, purpuræ, ac reliqui splendidi apparatus luxu instructae in hospitium cohortis paratae fuissent: comiter ac familiariter, omnique fastu deposito, cum civibus fuit; cum quibus urbem ac circumjecta suburbana circumibat, magnificentiam & amplitudinem villarum admirans: donatus est quattuor aureis crateribus, ingentis ponderis; lautiaque illi, totique cohorti ample praebita.

B Eo anno Carolo octavo fato functo Ludovicus duodecimus Dux Aurelianensis in regnum successit: ad quem civitas duos Oratores, Carolum Spinulam & Francum Justinianum, gratulatum misit: quo tempore Florentini Oratorem Genuam miserunt, postulatam, ne Genuenses Pisanis, in magnas angustias ab ipsis adductis, opem ferrent; qui, nulla re transacta, discessit. Eo anno in Corsica initium tumultuum factum est, qui eodem fere tempore nati & oppressi sunt: cum Joannes Paulus Lecca ex Sardinia cum quinque tantum comitibus in Corsicam transisset: qui, cum ad eum primo magni hominum concursus facti essent, tota insula discurrere coepit, Corsos ad se Ducem sequendum, ac libertatem repetendam invitans: ceterum brevi ex insula expulsus est ab Ambrosio Nigro adversus illum missio. Is vir in rebus Corsicis mira ac perpetua felicitate usus est; saepe in eam insulam publice missus; tumultusque partim nascentes, partim jam, viribus assumptis, corroboratos semper parvo certamine compressit: quorum meritorum ergo statua marmorea viventi haud contemnendis praemiis donato biennio post in aedibus Georgianis posita est.

D Annus ejus saeculi nonagesimus nonus insignis est Domini mutatione: ejus anni initio Ludovicus Rex Genuenses, quod in partibus Ludovici Sfortiae hostis sui essent, toto regno suo exterminavit. A.C. 1499. At Ludovicus Dux, Rege ditionem suam invadente, mille peditum subsidium cum trimestri stipendio à Genuensibus postulavit, impetravitque: ceterum felices Regis processus, resque Ludovici Ducis ad malam spem inclinatae, liberas voces eorum Genuensium, quibus dominatus Ludovici ac regnum Adorniorum fratrum odio erat, excitarent. Igitur cum Ludovicus, fortunae cedendum statuens, ditione sua relicta, in Germaniam se recepisset: Bernardinusque à Curte arcem Mediolani sibi à Ludovico, veteri & amantissimo hero, à quo opibus & honoribus auctus fuerat, creditam raro atque adeo unico perfidiae exemplo, hero vix finibus egresso, Regi tradidisset; civitas consilium cepit, Regis, cujus potentiae obsisti non posset, sibi conciliandi; seque usitatis conditionibus illi tradendi, novo Magistratu ea de causa creato. At Adornii fratres, cum Regis gratiam sibi privatim adjungere frustra tentassent, civitate excedunt; Joannesque, navi conscensa, Neapolim contendit; Augustinus vero in paternam ditionem se recepit. At Rex urbe Mediolano potitus; cum in controversia inter Genuenses & Florentinos, primum honoris locum Genuensibus adjudicasset; Scipionem Barbavarum Mediolanensem Jurisconsultum Genuam ad res interea regendas mittit; curamque civitatis custodiendae Joanni Ludovico Flisco mandat. Igitur civitas, rebus cum Rege jam compositis & transactis, conditionibusque postulatis à Rege, ejusque consilio comprobatis, viginti quattuor Oratores ad obedientiam palam, sollemnique jurejurando deferendam ad Regem mittit, Joannem Marinum, Nicolaum Odericum, ambos Jurisconsultos,

tos, Christophorum Catanium, Nicolaum Brignallium, Petrum Baptistam Guizum, Joannem Ambrosium Fliscum, Stephanum Cicadam, Afranium Ususmarium, Andream Cicerem, Bartholomæum Cevam, Nicolaum Amandolam, Augustinum Lomellinum, Joannem Ambrosium Nigronum, Joannem Baptistam Facium, Ansalduum Grimaldum, Vincentium Saulium, Petrum Calisanum, Ambrosium Zerbium, Demetrium Justinianum, Bernardum Salvagum, Christophorum Spinulam, Hieronymum Auriam, Jacobum Centurionem, Lazarum Fatinantium: qui obedientiam in magno Procerum confessu detulerunt: cum Philippus Clevensis Regis consanguineus, electus Genuæ Vicarius, coram Rege ac Proceribus per sancte jurasset, sese leges Genuensium, illorumque jura eximia, atque inter ipsos & Regem conventa servaturum.

A.C. 1500. Hic annus postremum quintum decimum sæculum Christianæ religionis miserabili fine conclusit. Ludovicus enim à Gibellinæ Factionis capitibus, Gallorum imperium fastidientibus & adspersantibus, evocatus, in Italiam venit, ingentibus plaussibus ac concursibus faventium populorum exceptus: qui brevi omnem fere ditionem amisam recuperavit: quo incredibilis felicitatis cursu Genuenses, qui nimis celeri rerum Ludovici desperatione ad Gallos defecerant, perculsi; cum nihil copiarum à Trivultio extorquere potuissent, Magistratu duodecim civium cum amplissima omnium rerum potestate creato; Domino Monceci, Domino Serravallis, Joanni Ludovico Flisco, Joanni Cebæ mandant, ut certum militum numerum singuli in præsidium urbis scribant, ab Italis quantum possent abstinentes: qui mille ducentos armatos omnino coegerunt, ac Genuam miserunt: cum per idem tempus deleta quingentorum peditum manus, Duce Saotio Gallo, à Rege è Provincia Narbonensi submissa Genuam appulisset: quibus præsidii aucta & firmata civitas, secura à tumultibus fuit. Per idem tempus litteræ à Ludovico & Ascanio fratre humanissime atque amantissime scriptæ Magistratui redduntur; quibus ditionis recuperatæ ac feliciter procedentium consiliorum Genuenses certiores faciebant: simul veteris amicitie atque artificis multorum beneficiorum mutuo factorum necessitudinis admonebant. Nihil respondendum, Gallis Proceribus à re haud dissimulanter abhorrentibus, Senatui visum.

At Ludovicus cum Novariam, præsidio Gallorum ejecto, atque incolumi dimisso, recuperasset; haud contemnendis copiis contractis, ea urbe se continebat; cui cum Trivultius & Tramolius copias admovissent, urbe exiens, fortunam pugnæ experiri constituit: ceterum, cum animadvertisset Helvetios, quos magno numero conduxerat, Gallis sese immiscentes cum illis colloquia serere, copias in urbem reduxit; seseque ab Helvetiis proditum sentiens, quam ex illorum manibus elaberetur querens, ad consilium, quod non tam tutum, quam unicuique erat, necessitate subactus descendit; vestitumque gregarii Helvetii militis inductus, sese illorum agminibus, spe fallendi, insinuavit: ceterum agnitus ac comprehensus, inaudito perfidiæ exemplo, in manus Gallorum ab exercitu ipso suo traditur: à quibus in Galliam illico missus est, atque in opido Lochio carcere inclusus, nullo solatio à Gallis umquam dato, miserabilem vitam terminavit. Par fortuna Ascanii fratris Cardinalis fuit: qui, cum in manus Venetorum casu incidisset, ab illis, Gallis poscentibus traditus est. Hac mercede Ludovico sua sibi immoderata ambitio stetit; huncque fructum externorum armorum in Italiam ad aliorum perniciem introductorum cepit, ipse Princeps ab illis everfus.

A.C. 1501. Annus primus sexti decimi sæculi Christianæ re-

ligionis, præter molem viginti cubitos auctam, expeditionem habet decem octo navium in regnum Neapolitanum adversus Fridericum Aragonium, jussu Regis, factam: quarum navium, decem Gallorum fuerunt, octo Genuenses; omnes corbitæ, præter triremes quattuor Genuenses: quæ Trierarchos habuerunt, Antonium Mariam Fliscum, Davidem Stalianum, Baptistam Pogium, Philippum Palavicinum; cum corbitis ingentis magnitudinis præessent Joannes Lomellinus, Raphael Grimaldus, Vincentius Fliscus, Carolus Furnarius. Hujus classis præfectus fuit ipse Vicarius regius Philippus Clivius, insigni titulo Halmiratis Genuensium sumpto: quem titulum Rex ipse quoque illi comprobavit.

B Ceterum, cum, Friderico jam omnia tenente, inane inceptum evasisset; ne sine ullo omnino fructu ea expeditio esset, Clivius præparatam in regnum Neapolitanum curam in Turcam, insulam Lesbum ac civitatem occupantem, vertit: quod, cum religionis studio, tum Genuensium precibus inductus, fecit, cupientium incommodam Turcarum vicinitatem procul ab insula Chio amovere: atque in itinere quattuor & triginta Venetorum triremes obvias habuit: qui, Halmirate rogante, potius pudore quam voluntate inducti, ne in officio adversus Christianæ religionis hostes cessasse viderentur, se cum illo consociarunt: igitur cum ad insulam appulissent, copiis ac bellicis apparatibus, tormentisque in terram expositis, mœnia quater incipiunt; neque dubitatur, quin Christiani urbe potituri fuerint, si Galli ipsi ac Veneti impigram & fidelem operam navassent: segniter agendi causa fuit Gallis, quod Halmirati nationis nomine (erat enim Burgundus) inviso victoriæ honorem inviderunt; Venetis, quod eam insulam in Genuensium manum venire non satis æquo animo ferebant: irritus igitur conatus fuit. Enituit in ea oppugnatione virtus & constantia adolescentis; cujus nomen ab Annalibus præteritum miror, cum rem gestam debitis laudibus non fraudarint: quem tradunt, cum signum gestans mœnia audacter conscendisset; Turcis creberrimo sagittarum jactu illum incessentibus, manu signi hastili confixa, multisque corporis locis transfixum, numquam tamen signum dimisisse, aut locum, in quo constiterat, deferuisse prius, quam Halmiras receptui cani jussisset: qui adversam Venetorum voluntatem, iniquumque in se suorum animum sentiens, ne in spem irritam tereret tempus, retro iter repetit: in quo itinere proximus summo discrimini fuit, cum, adversa exorta tempestate, navis Lomellina, qua vehebatur, undis hausta esset; quo etiam naufragio, una ex Gallicis navibus, cum omnibus vectoribus, periit.

E Per ea tempora egregia occasio omissa est, urbis Plumbini imperio adjiciendæ; quam ipse Jacobus Dominus Genuam veniens, imminentem procellam à Cæsare Borgia Duce Valentiniensi fugiens, Genuensibus venalem obtulit: ceterum Genuenses veriti, ne Regis animum offenderent, si ejus injussu eam emptionem fecissent; ejus voluntatem primo per litteras sciscitati sunt: qui, cum animum non nudaret, offensionem Alexandri Pontificis veritus; Jacobus ipse in Galliam contendit: cum quo Genuenses unum ex publicis Scribis miserunt, postulatam, ut aut propugnationem Plumbini adversus Valentiniensem susciperet; aut permitteret, Genuenses de opido cum Jacobo transigere: ceterum, dum Rege extrahente, res lentius ducitur; opidani adventanti Valentino, metu direptionis opidum tradunt: quæ res instituta consilia evertit.

F Eo anno Joannes Paulus Lecca ex Sardinia, in qua insula diu exfularat, in Corsicam rursus tra-

trajicit; satisque firma hominum coacta manu, haud contemnendos motus excitavit: adversus quem missi primo sunt Emanuel Fliscus & Silvester Justinianus, quibus successit Alphonsus Carrettus, cui paulo post additus est Ambrosius Niger, à Sicilia cum navi sua reversus: qui, cum Carrettus in morbum incidisset, solus res gessit; strenuamque & egregiam operam Reipublicae navavit. Joanne Paulo contuso & profligato, ejusque filio capto, atque Ericem in custodiam missio, totaque insula pacata: quas res tanta cum moderatione gessit, Corforum animos leniter tractando: ita praefercia indomitae gentis ingenia emollivit, ut libenter jugo collum subjicerent, eumque ipsum sui domitorem Ambrosium, quem ob frænum acceptum odisse potius videri possent, summa benevolentia amplexi sint, patronumque adsciverint, atque in omni vita coluerint: quarum rerum causa Genuenses infinitato honore statuam in ædibus Georgianis Ambrosio erexerunt.

Extrema hujus anni pestilentia tentata sunt; quae paulatim gliscente Magistratus, cui de ea renegotium datum est, patresfamilias sese atque omnem familiam domi continere iussit; ne contagione magis vulgaretur morbus: magnaue pecuniarum undique erogatarum facta est impensa; primariis ac gravibus viris regionatim ac vicatim distributis, qui egentium domi inclusorum inopiam sublevarent: tandem Magistratus diligentia serpens lues discussa est; circumque acto autumno corpora salubria esse coeperunt.

A. C. 1502.
1503. At alter, & tertius hujus saeculi annus nihil sane habent memoriae prodendum, praeter Ludovici Regis adventum; qui Mediolano in Galliam rediens, animi causa, Genuam divertit, magnifice, & apparate, omnique effusae lætitiæ significatione à Genuensibus acceptus. Regis in urbem ingressus causam certaminum præbuit; contentione de primo honoris loco in uranisco, qui de more Regi subeundus erat, deferendo inter Nobilium Factionis & popularis nominis primarios adolescentes exorta: illis eum honorem ad genus, his ad ætatem, exemplo ceterorum Magistratum, trahentibus: studiisque utrimque accensis, res ingentibus certaminibus acta est; Nobilesque talem orationem habuisse dicuntur: *Si apud alium cujusvis nationis judicem gubernator, de jure primi loci in hac deducendi Regis pompa, ambigeretur; certam nos Nobiles & exploratam victoriam haberemus justitia nostra confisi, ac firmissimis rationibus subnisi: nunc apud te nobili Gallia ortum virum, vel solum ipsum nobilitatis nomen, quo in florentissimo illo regno nihil est secundum religionis res, ad venerationem sanctius, sperare possumus per se satis fore ad causam tenendam: ac nos popularium civium rationem non satis mirari possumus; neque intelligere, quo illi consilio inducti, quamve spem in manibus habentes hanc contentionem nobiscum suscipere non dubitarint: nisi forte præterita tempora illis spiritus faciunt, illorumque animos inflant; haud secum reputantes, quantum inter sanctum & sapientem judicem, nulla animi permotione in alterutram partem propendentem, & concitatam atque imperitam multitudinem interfit: apud illum enim veritatem & rationem salam valere: ab hac concitata per vim, arma, seditionem, jus & fas opprimi; præstantes viros & primarios cives everti; quietem civitatis turbari; Rempublicam labefactari; postremo omnia divina & humana misceri: id quod istorum Majores fecerunt: qui homines novi ac nulla majorum splendore decorati, nullisque in patriam meritis commendati, non satis habuerunt, sese in procuratione Reipublicae, quam numquam, nisi per pauci eorum aliquando, concessu ac beneficio nostro habuerunt, atque in honoribus & muneribus publicis pares nobis facere; sed per summam injuriam ab illis nos dejecerunt; principatumque patriæ sub ducatus titulo per fraudem invasum, ac per vim re-*

A tentum, factiosis legibus suis sibi firmarunt, nobis ad illud numquam admissis; quamvis in partem gerenda Reipublicae, summo hoc imperii loco excepto nos aliquando acceperint, ac sepe dejecerint: haudquaquam veriti præmortui pudoris homines, eos viros à procuratione Reipublicae arcere, qui illam soli per multa sacula gesserant; quique atque ipsorum Majores, sua virtute, laboribus, discriminibus, sanguine denique ipso suo hanc rem ex parva amplam fecerant; clarissimisque partis victoriis nomen Genuense antea humile & obscurum, clarum atque omnibus Mediterranei maris accolis populis verendum fecerant; ac summum potentia & auctoritatis locum in rebus maritimis patriæ pepererant: accedebant ad merita, complurium clararum familiarum inveteratus splendor, magnaue opes & potentia, quod alterum est ordinis nostri haud mediocre ornamentum; quo popularium corpus omnino carebat: ut minus mirum sit, talibus Majoribus ortos homines avitam & velut hereditariam impudentiam hac quoque in re exprimere; neque Nobilitati de primo honoris & dignitatis loco velle concedere: sed mutata ratio temporum est; felixque ille dies civitati nostra tandem illuxit, cum non jam vi ac ferro, ut adhuc populo regnante factum est, res obtinenda sunt; sed jure & honestis artibus agendum: non debetis igitur tantam indignitatem ferre, Galli; sed putare, inter cetera munera, res corruptas ac prostratas emendandi & erigendi, qua de causa vos accersivimus, nosque vobis regendos tradidimus, hoc non in postremis vobis impositum onus, ut sua cuique reddantur; quod primum & præcipuum est concordia & tranquillitatis civitatis stabilienda fundamentum: suus igitur locus Nobilitati à vobis est restituendus; quam facultatem vobis Deus immortalis dedit, quorum superexsuperantes vires, quod pudor non facit, se efferentem popularium audaciam coercere possunt: id quod vos facturos, non modo pro vestra justitia & equitate, sed pro sapientia quoque non dubitamus; si cogitaveritis, nihil aliud esse Nobilitatem, quam inveteratas familiarum opes, ac veterem splendorem egregiis virtutis operibus, ac meritis in patriam paulatim collectum: qua virtute, quibusque meritis cum Respublica in primis stet; nullus est acrior stimulus ad virtutem incitandam, hominesque impellendos ad fortem & indefessam operam Reipublicae navandam, quam spes gentis illustranda, ac nominis familia propagandi, gratiamque ipsorum meritis debitam ad filios & posteritatem transfundendi: qua spe præcisa, studia quoque civium erga patriam relanguescant, atque adeo exstinguantur necesse est: nemo enim tantum laborum & dimicationum impenderet in magnam aliquam gloriam & amplitudinem parandam; si ea brevi ævo suo terminaretur; ac nisi meritorum gratia in posteros redundaret, qua illos conspectos & verendos præ ceteris faceret. Hoc crimine sese Reipublica obstringunt, qui Nobilitatem deprimunt, ignobiles homines illi æquando: à quo crimine nobilissima Gallorum natio & natura & voluntate remotissima semper fuit: quo in regno si tertius, quem appellant, ac politicus ordo in conventibus parem sibi cum Nobilitate locum postularet; tantam arrogantiam vos non jam verbis & disputationibus refellendam, sed manu & fuste damnandam putaretis: ex intimis igitur sensibus vestris aliorum animos fingite, Galli; quemque generose indignationis motum in rebus vestris haberetis; eundem erga populos, qui vobis parent, adhibete: illud vobiscum reputantes, judicium vos contra nos ferre non posse, quo non simul vos ipsos, ac Gallicam Nobilitatem damnetis; qua nulla sub calo juris & dignitatis sua apud plebem retinentior umquam fuit.

Cum perorassent Nobiles, haud minus vehementi oratione populares in contrariam sententiam ita differuerunt: Si in judiciis de magnis rebus vocabula potius sequi, quam rem spectare oportet, Gubernator; frustra a nobis omnis labor in defendenda causa nostra suscipitur: ceterum nos recreat; quod in te tali viro tantum roboris esse remur, ut non te ab inanibus imaginibus auferri sinas, sed res suis momentis possis ponderare:

rare: non negamus, Gubernator, Nobilitatem venerabilem rem esse; recteque ac sapienter Gallos celsissimum quemque locum illi tribuere confitemur; sed de ea non ex nomine, sed ex re, ac solida ipsa ratione statuendum est: nempe igitur dicebatis, Nobiles, Nobilitatem esse inveteratas familia opes, ac Majorum in Rempublicam merita. Age, utramque rem in utroque corpore, Nobilium & popularium, perpendamus. Ut igitur a meritis initium facientes clariora tantummodo attingamus; an pœnitent nobilissima insula Chii, atque utriusque Phocæ Genuensi imperio adjecta? ejusdemque insula adversus Venetos magno virium apparatu mari ac terra invadentes retenta? an sordet Famagusta Cyprici celebre emporium capta, regnumque ipsum Cyprici eligale factum, ac regii generis homines captivi, atque obsides Genuam adducti? jam vero illud, quo nostra omnia continentur, quo tandem in pretio habendum erit? insula Corsica adversus celsissimum & prepotentem Regem Alphonsum defensa; Bonifacium opidum, quod arx & claustra illius insula est, arta obsidione terra ac mari circumfessum, ex illius faucibus ereptum, admirabili illo incredibilis audacia & fortitudinis edito exemplo? postremo quæ res à Genuensibus gesta est, quæ ad gloriam navalis prælii possit adspirare, quo is ipse inclytus Alphonsus Rex, idemque clarissimus & fortissimus imperator victus est, ac simul cum Rege Navarra, ac magno Magistro divi Jacobi, centumque Proceribus dominatu populorum insignibus captus? Multa quidem à corporis vestri hominibus insignes sunt edita pugna atque egregia parva victoria, quibus nomen Genuense clarum ac formidolosum fecerunt; neque enim merita fortium virorum comprimere aut elevare candoris est nostri: ceterum, si quis vestra cum nostris conferat, inveniat vestra ad gloriam quidem esse insignia; nostra vero neque gloria inferiora & utilitate longe antecellere: quæ utilitas finis publicorum consiliorum est, eamque Respublicas gerentes in deliberationibus spectare in primis solent: in splendore vero & amplitudine familiarum, quod alterum querebatur; qua tandem re gentes Adornia, Fulgosia, Montalta, Guarca, quattuor illis vestris longe opibus & potentia inter vos antecedentibus inferiores sunt? ea certe superant, quod diutius rerum potita sunt; ac diuturnior fuit illorum principatus: ceterum tam vestra quam nostra hæc clara familia è malis publicis creverunt: & adhuc istos non pudet nos, non modo socios in Nobilitate, per summam nostri & sui ignorationem adspernari; sed contumelioso quoque plebejorum atque impudentium nomine appellare? viros ab omni ipsos pudoris specie derelictos; quodque in ipsos valet crimen, in alios conferentes: neque vero Majorum nostrorum injuria illos Reipublica procuratore & honoribus publicis privarunt; sed intolerabilis ipsorummet superbia & arrogantia: neque enim Simon Buccanigra, vir clarus ac fortis, Nobilitatem à gerenda Republica arcuit; sed Rempublicam, quam totam, ceteris exterminatis, quattuor familia, Spinula, Auria, Grimalda, Elisca, ad se attraxerant, ex illorum manibus extorsit; ac regimen omnibus bonis & honestis civibus commune instituit: quod ideo popolare vocavit, quod populum omnem amplecteretur, neque certis tantum familiaribus circumscriberetur: à quo, tantum abest, ut Nobiles excluderet, ut contra, omnes familias nobiles, quæcunque, ejurata Nobilium quattuor familiarum Factione, ad illud admitti voluerint, libenter amplexus sit; illisque honores & magistratus publicos, præfecturas classium mandavit; omnique honorum genere illos persecutus sit: quæ aequitate id affecutus est, ut magna Nobilium pars studia cum illo conjunxerit, pecuniis illum juverit; superbo quattuor familiarum jugose exemptam letans: non ademisse igitur Nobilitati Simon procuratorem Reipublicæ, sed ademptam restituisse censendus est: qui quattuor familias dejicere quidem impotenti dominatu potuit, arrogantiam & fastum illis eripere non potuit: neque ulla lenitate & justitia sua inducere, ut æqualitatem juris cum reliquis civibus amplecterentur; ac cum cetera civitate in sancte institu-

A tam formam Reipublicæ, ac commune civitatis bonum capeffendum consentirent, seque in ordinem cogipaterentur; sed contra, experta, animoque alte insidenter regnandi dulcedine omne jus, fas, pudorem, patria caritatem incaptis mentibus opprimente, arma contra patriam sepe tulerunt; quibus non civitatem, in quam ultro invitabantur, sed impotentem dominatum repetebant: quis igitur eam legem improbet, aut factiosam appellet; quæ illos ab ea procuratore Reipublicæ arcuit, à qua ipsimet sese prius sejunxerant? quamque modo aperta vi, modo insidiis oppugnabant? ceterum Nobilitatis nomen in civitate vetustum, & à Reipublica procuratore (quantum ex veteribus monumentis conjici licet) inductum, ab illis omisum est; qui post institutam communem & popularem Reipublicæ formam, ad Rempublicam gerendam deinceps succrescebant: ne cum illis consentire viderentur, qui à reliqua civitate consilia separarant; atque Factionem Reipublicæ instituta adversam ita nomine detestarentur, quemadmodum re se ab illa segregarant: quare factum est, ut Nobilitatis nomen, quod prius generis fuerat, tum primum Factionis esse cœperit; quippe cum complures corporis nostri gentes vetusto splendore ac potentia illustres, maximisque gestis rebus clara, ac ceteris omnibus ornamentis prædita, quæ necessariam Nobilitatem secum trahunt, populares vocentur; & contra, complures homines ab illis in corpus suum accepti, ac familiaribus & nominibus illorum adscripti, novi ac degeneres, nullis honoratis parentibus orti, nullisque in patriam insignibus meritis ipsi, aut Majores eorum conspecti, Nobilitatis nomen sibi assumant; nulla earum rerum subnisi, quæ Nobilitatem connexam habent. Illud vero perridiculum est; ut, quos homines idem mercatorius quæstus, eademque nummularia & navicularia, quam juxta nobiscum faciunt, nobis pares faciat, eosdem solum nomen, contra omnium seculorum & gentium exempla, ceteris hominibus eadem professione, iisdemque exercitiis conjunctis præferat: diversa est Gallia vestra ratio, Gubernator; in qua nobilissima Provincia Nobilitas utraque re à populo distinguitur, & inveterata Majorum splendore, & diverso vita ac cultus & studiorum genere. Solum igitur nomen, quod nos ea de causa, quam modo audisti, repudiamus, vos nobis præferet, quos res pares facit? & hi homines nos impudentes appellare non verentur; nos ne impudentes; an vos arrogantes, qui atati apud omnes nationes debitum honorem detrahitis? quoque loco illi in gravioribus rebus, nimirum in Magistratibus & in Republica gerenda ceditis; eum illi in minus seriis rebus atque in ejusmodi pompis auferre studetis? quam atatem si tu Gubernator loco suo non fraudaris; non tu Gallorum institutum à nostris rebus longe diversum damnasce, sed quod à gravi & religioso judice expectandum fuit, statuisse existimaberis. Usus in Magistratibus & in Republica gerenda secutus Clivius secundum populares judicium tulit: accessit hæc ad veteres complures odii causas nova animorum irritatio; fortuna ad impendentes calamitates viam præmuniente.

Octo dies Genuæ Rex fuit; mirifice ad spectu urbis, cæli salubritate, hortorum amœnitate, ædificiorum specie, domestici cultus splendore delectatus: cum omnia urbis interiora loca, cum paucis comitibus obiret, ac, quæ visenda essent, contemplaretur; seque in civium colloquia & consuetudinem comiter & perhumaniter daret, convivia cum illis hilariter iniret, choreis nobilium matronarum interesset: hæc altero anno. Tertius vero ne mutus omnino sit, facit Julius secundus, ditionis Genuensis homo, ad summum pontificatus fastigium elatus; qui Pio tertio Senensi in locum Alexandri sexti demortui suffecto, cum sex tantummodo & viginti dies in Pontificatu fuisset, successit.

Sequuntur anni ejus sæculi quartus & quintus, A.C. 1504-1505. nonnihil à pestilentia tentati; quæ tamen non magnos progressus habuit, cum initis summa diligentia, omnique remediorum genere, obviam itum esset:

esset: magnis autem contentionibus, verborumque certaminibus hi anni agitati sunt; quæ Pisani præbuerunt: qui ad extrema adducti omni alia via ex jugo Florentinorum evadendi præcisa, cum nullam non prius tentassent, dominatum ejus ipsius civitatis suæ, quæ de maritimo imperio tot sæcula varia fortuna cum Genuensibus dimicasset, ad Genuenses ultro detulerunt; supplicibusque & enis precibus, ut illud acciperent, egerunt: quæ res studia civium divisit; cum non modo in publicis consiliis, sed in coetibus & conventibus hominum quotidianis sermonibus agigaretur; cum alii effuso desiderio amplam & perhonorificam rem in sinum cælesti beneficio ultro delatam amplexarentur; alii contra præcipiti (ut ipsi appellabant) consilio non minus acriter obsisterent: quæ contentiones, animis accensis, cum pro sententia utrimque obstinate pugnaretur, ad jurgia sæpe exarferunt; propeque factum est, ut res à verborum contentionibus ad manus & ad ferrum deduceretur.

In dissuadentibus acerrimus fuit Joannes Ludovicus Fliscus; qui multorum populorum dominatu, multisque clientelis fultus, longa opibus & potentia tum antecellebat. Is adversus tantam civitatis voluntatem, (omnis enim fere civitas in Pisanos accipiendos impotenti desiderio ferebatur) nonnullis ex principibus civitatis studiorum & sententiæ sociis, aperte tendebat: multa autem opulentum atque ejus fastigii civem in eam mentem impulsisse dicuntur: primum gentis & Factionis suæ Fliscæ respectus; (nam hæc quoque recens Factio ad veteres accesserat, *Catorum* nominata, ab eo animali, quo galeæ insigni Flisca gens utitur, multosque humilis fere fortis homines, tam in urbe ipsa, quam in ora Orientali comprehendebat) cum intelligeret tantarum virium ac tanti imperii publicam accessionem, esse suæ ac suorum privatæ potentiæ & dominatui infringendo; regnantibusque aptiorem esse imbecillam, quam prævalentem civitatem: quam cupiditatem usque adeo patriæ charitati prævertunt; ut potentioribus familiis perpetua disciplina fuerit, publicas vires depresso habere, atque enervare: deinde quod Regi Gallorum gratificari cuperet; cujus dominatu opes suæ in primis stabant, cuique infinito beneficio erat obstrictus, omni Occidentali ora regenda, ac prope fiduciaria ab illo accepta, cum magna dignitatis & emolumentorum amplificatione: sciretque, Regi cordi haudquam esse, Genuam supra modum crescere; ac viribus corroboratam & imperio auctam, contumaciorem adversus imperia fieri; animosque simul cum opibus ad libertatem & ad jugum excutendum attollere. Accessit tertia, eaque turpissima fordium nota; nam hæc quoque vehemens opinio vulgo fuit, hominem ingenti auri vi à Florentinis emptum. Is igitur, cum in privatis civium coetibus, qui ad illum frequentes conveniebant; tum in consilio universæ civitatis, quod crebro habebatur, incitato ardori tali oratione palam refragari solebat: *Quæ duo, Patres, in deliberationibus de magnis rebus plurimum semper apud omnes potuerunt; ea ambo mihi Pisarum dominatum ultro ad nos delatum repudianti, & ab eo accipiendo vos deterrenti in primis adversantur: alterum est splendor & magnitudo magni incrementi, quod cum summa publica dignitate civitatis nostræ imperium & vires duplicet: alterum nostra præservida ac celeria ingenia, acquirendique semper avida, & ad subita, tam de magnis, quam de parvis rebus consilia capienda prompta, ne dicam præcipitia. Hæc duo res ita hoc tempore apud multos vestrum valent; ita plerique impotenti hac cupiditate rapiuntur; ut non modo difficultatēs & incommoda, quæ in decora hac specie latent, ipsis in mentem venire non possint; sed ne orationem quidem de illis vos admo-*

mentium auribus admittant: quos, ne quid gravius dicam, boni ac dignitatis publica parum studiosos vocant; atque in circulis & coetibus vulgo lacerant: ceterum decet graves viros ac patria vere amantes cives, præ publica utilitate, omnia levia ducere; neque incommotis hominum sermonibus à rectis consiliis deterri. Ego quidem, quamvis adversa invidia subjici malo, quam susceptam eorum, quæ Reipublica salutaria censeo, defensionem deferere; & ab incommotis, quæ multa & magna speciosum consilium tegit, proponendis abstinere. Non sum nescius, Genuenses, quam natura hominibus insita sit acquirendi cupiditas: ceterum hujus cupiditatis modus facultate & viribus nostris est terminandus: ut, si res, in quam desiderium nostrum fertur, vel in ea nobis parienda, vel in parta tuenda nostrarum virium non sit; ab ea quarenda prorsus abstineamus: quæ igitur tanta amentia vis nos tenet; aut unde novum hunc furorem nobis esse objectum dicam; ut, qui nostris viribus ipsi stare non possumus, alios fulciendos suscipiamus? quique ipsi liberi esse nescimus, aliis imperare quæramus? ac, quod jugum ipsi nos viribus nostris excutere non valemus, aliis nos imposituros speremus? non minus ridiculi, quam si cujus tanta sit corporis imbecillitas, ut neque stare, neque ingredi ipse, nisi scipione innisus possit; alios is corpore suo a casu sustinendos sumat: illisque haud absimiles, qui stomachi imbecillitate laborantes; cum perexiguam ac tenue alimentum vix concoquere possint; magnam ciborum vim non modo esu suavium, sed genere quoque salubrium sibi ingerentes, pro eo ut nimia copia extenuatum ventrem corroborarent, exiguas illas vires, ac, reliquum quod est naturalis vigoris, obruunt, ac corpus ipsum tandem conficiunt. Nam, per Deum immortalem, quid tandem nobis animos facit, ut tantam negotii molem nobis temere conflare non dubitemus? an ingens fortium virorum ac strenuorum bellatorum numerus, quos urbs & ditio nostra fert? an opima vectigalia, publicaque opulentia, quæ quamvis magnum & diuturnum bellum alere possit? quæ utraque re hosti, quem novum nobis adsciscimus, longe sumus superiores? totum contra est, Genuenses: nam hæc omnia parva & tenuia nobis sunt: hosti contra, ampla & copiosa: omnis enim fere plebs nostra urbana, opifices & sellularii sunt, minime idoneum cuivis militia genus; cum ardor ille & studium militarium rerum, quod crebra ac magna expeditiones excitabant, illis jam pridem intermissis, in hominibus nostris consenuerit; ac pro militibus & nautis, urbem publicanis & extrinam facientibus refertam habeamus. Neque vero negaverim, cum in urbe, tum in ditione nostra multos fortes & strenuos viros reperiri: ceterum navalibus rebus assuefacti, in quibus omnem ætatem agunt, nullique omnino nationi de virtute ac scientia in illis concedunt, terrestribus bellis minime apti sunt. Externo milite conducto res agenda est: at unde tandem pecunia in stipendia erogabuntur? ex arario-ne, quod nullum habemus? an ex vectigalibus publicis, quæ omnia alienata sunt? nec cogitamus, tantam esse publicam egestatem, ut stipendia in paucos urbis præsidarios, & duas, summum tres, custodie triremes, atque in nonnullos alios necessarios sumptus agre conitamus; ne dum tanto insuper extraordinario onere affectas vires nostras aggravemus? tributo, inquit. Utinam, Genuenses, is esset in nobis animi ardor, ea patria charitas, ut pro illius dignitate & amplitudine incensa, omni re nostra privata nos spoliare non dubitaremus: ceterum, obsecro vos, an non estis experti in bello, quod cum hoc ipso hoste, quem nobis paramus, de agro Lunensi gessimus, quam parum in hac spe sit ponendum; cum hosti nullam aliam ob causam non exigua parte veteris ditionis nostræ cesserimus, quam quod tributo gravaremur? cum tamen illud ita, & tempore breve, & re exiguum fuerit, ut, præ magnitudine ejus, quod instat, vix compareat: an non memoria teneamus, quanta contentione à patribus nostris pugnatum sit, ut tributum, quod ostiatim pendendum erat ex lege antea lata, quæ non plus vicennalis fuerit, tolleretur? cum cives aperte ferrent, sese, urbe habitationibus inani relicta, alias sedes sibi quaesituros;

atque alio commigraturos? an jam excidit, ita avos nostros à tributo abhorruisse; ut in bellis Mediolanensibus, in quibus de libertate ipsa & salute nostra dimicabatur, portum Liburni, cujus tanta essent civitati nostra ad maritima commercia opportunitates, perexiguo pretio alienarint potius, quam modicum illud conferrent? Longe alius, mihi credite, Genueses, habitus animorum est nunc, cum improvise ac splendida objecta species ardorem ac parum cogitatum rationem nostram excitat; ac tum erit, cum primus ipse impetus confederit; atque assiduo tributo rem suam privatim unusquisque paulatim confici sentiet: qua re fiet, ut de possessione Pisarum hosti turpiter concedere cogamur; ac speciosi & pravi consilii nullum alium quam fama levitatis ac temeritatis fructum percipiamus. Nolite putare, hoc bellum navalibus illis expeditionibus fore simile; quas ingentes adversus potentissimas nationes susceperunt: in quibus cives ipsi, ac Genueses, & Liguria nationis homines gratuitam operam Reipublica navabant; non modo publica dignitate & salute illos monente & instigante; sed privatis quoque rationibus ita ferentibus; cum aliter maritima commercia, quibus res omnis publica & privata nostra continebatur, stare non possent: at nunc ararii pecuniis, externo conductio milite, bellandum est, ac diu bellandum: non enim impetu, sed perseverantia gerendum est hoc bellum: neque enim hostis, nisi Pisis recuperatis, quieturus est: neque liberum est illi hoc quiescendi consilium; quod necessarium facit ipsius fortuna, quæ omnis in ejus urbis & ditionis possessione versatur: ad quod bellum vires ei suffecturas, neque satietatem illum capturam, cum omnium temporum exemplo, tum nunc in hoc ipso bello Pisano, ut cum maxime, docuit, maxima bella ac diuturna cum prapotentibus Principibus gerendo, ingentesque exercitus pecuniis suis alendo. Qui igitur nomen meum perstringunt, imperitamque plebem mihi irritant, unam habent me refellendi viam; si docuerint, unde in tantum & tam diuturnum bellum, quo civitatem nostram student implicare, sumptus sint erogandi: hanc autem nullam esse video; nisi si cives sese, pro sua quisque rei modo, eam summam conferre paratos dicant; in eamque rem sese ipsi ac nomen suum obstringant, quæ non minus quingenta aureorum millia anniverfaria conficiat: hoc uno, si illud perfectum mihi dant, non inanibus istis ardoribus ac tumidis verbis, assequi possunt, ut boni & amantes patriæ cives habeantur. Atque ego, Patres, perinde, quasi libera nobis sint de tanta re consilia, neque omnia à voluntate & nutu Regis pendeant, ita disputo; cujus mens prius exploranda est, atque ad eam deliberationes nostræ dirigendæ: nisi forte ea quoque nos agitat rabies; ut ejus injussu, tantam rem ingrediendo, tantum insuper Regem ad jam destinatum hostem adjiciendo, nos ac Rempublicam precipitem dare properemus. Ego, Patres, pravum consilium omni ratione nobis abjiciendum censeo; atque ab eo bello abstinendum, quod temere susceptum, turpiter sit nobis ab illo exhaustis deponendum.

Cum perorasset Joannes Ludovicus; unus ex iis civibus, qui Pisas accipiendas decernebant, ita contra illum disseruit: Miratus sum Flisum, Patres, initio dicendi tam multis verbis invidiam à se detestari conatum; quam si cui res ipsa constat, frustra oratio studet amovere: & Hercule! ut nemo Flisum accuset, nemo illum bona mente uti neget; quid aut esse ad ignavia & desidia famam testatus, aut fieri in Rempublicam hostilius possit; quam tantam imperii, dignitatis, utilitatis quoque publica & privata accessionem ultro ac sine certamine delatam repudiare? atque ea cum ita sint; ille tamen pro eo, ut cum ceteris in praelaro consilio consentiat, non satis habens, tanta omnis civitatis voluntati auctoritate & potentia sua impedimento esse, ultro etiam nos, si Diis placet, aspera oratione lacere non dubitat; furorem & amentiam iis, qui ab ipso dissentiant, obijciendo: res ipsa ad liquidum enucleata docebit, in utrosque hoc maledictum recidat: atque, ut te tris

A vestigiis persequar, Flisce, nimis visus es mihi vires nostras elevare ac premere; contra hostis nobis destinati ad calum extollere; sic nullum nobis ararium, nulla vectigalia esse, sic plebem minime aptam militia dicebas: contra, hæc omnia hosti copiosa esse: qua in re, contra sentiendo, statuo nos longe hosti his omnibus rebus esse superiores. Mirabarque acumen ac sapientiam tuam; qui non intelligeres, nos, non imbecillitate virium, sed ad causas discordiarum inter cives summum magistratum ambientes, tollendas, externos ad nos regendos accersisse: quod idem Majores nostri, tum, cum hac civitas in flore virium maxime esset, sæpe fecerunt; exteris Pratoribus privata fortune hominibus Rempublicam gerendam tradentes: argumento sunt ingentia bella cum iis ipsis Principibus, quibus parebamus, cum tadium illorum imperii nos capiebat, gesta; acriæque terrestria pralia cum illis nostra & patrum atque avorum nostrorum memoria commissa; in quibus semper superiores evasimus: quæ res eam quoque tibi orationem eripit; urbanam plebem nostram ac Ligures homines navalem rem tractare solitos, inutiles esse terrestribus bellis: quo (pace tua dixerim, Flisce) quid pronunciari possit imperitius? fuit quidem semper omnis nostrorum hominum gloria & commendatio in rebus navalibus, quæ non minore animi & corporis robore, quam pedestria bella egent: non quod non ad terrestria bella apti essent; sed quod fortuna civitatis occasionem illis non dabat terrestrium bellorum tractandorum: ad quæ si mutata conditio urbis, ac mutata tempora illis viam patefaciant; quis dubitat, quin nostri homines idem robur, eandemque in rebus maritimis ab omnibus testatam virtutem ad illa non minore cum gloria sint translaturi? vivida enim sunt nostris hominibus atque impigra ingenia; tum autem laborum & malorum tolerantia; quæ res prima in militibus postulantur: & tamen tu homines nostros tamquam opifices & sellularios, à bellicis rebus tractandis arcebas: quasi non major opera in opificiis exercendis, ac non multo major sit apud hostem opificum & sellulariorum copia: quorum nemo bellum, aut aciem, aut mare umquam adspexit: bella mercenario milite exercere soliti; cum nostri inter ferrum & arma, in maritimis saltem bellis, nascentur & educuntur: in quibus non minora funera gladiis ac missilibus cadentium, quam in pedestribus aciebus eduntur: qua in re, Flisce, si hoc bellum, quod accipiendo Pisanos se sponte nobis tradentes paramus, mercenario & conducto milite gerendum est; quid attinebat te de sellulariis mentionem facere, quibus ad bellum uti nolimus? si nostris hominibus strenuis ac fortibus viris rem gerere decrevimus; neque egestas ararii, neque vectigalia alienata, quorum nullus, aut perexiguus usus futurus est, nos à praelaro consilio revocare debent: neque Majores nostri tanta contentione de tributo tollendo dimicarunt, quod nomen hoc per se tantopere abominarentur; sed quod egre ferebant, non in usus publicos, sed in regnantium libidines rem suam familiarem sibi extorqueri. Longe alia mens erit civibus nostris; cum intellexerint, se in patria decus & utilitatem, in imperium proferendum, in vectigalia augenda, in Rempublicam àre alieno liberandam, in commercia magno cum publico & privato suo, ac liberorum suorum compendio augenda conferre: ardore & studio, praelaraque emulatione inter se in conferendo certabunt, si bene aliorum animos ex meo spectro; illud secum reputantes quod vulgo dictitari solet; recte obolum in denarii, recte denarium in mina lucrum impendi: jam illud facite cogitatis, Patres; inferentem bellum, quadruplo tanto propulsante superiorem opibus esse oportere: præsertim si illum ex possessione rei, quam teneat, defectum veniat: ad hoc imperio subjunctis benevolis, ac rem non modo non gravate, sed cupide quoque juvenibus: id quod nobis de Pisanis usu veniet, execrabilis odio in Florentinum nomen efferatis: cum sit in proverbio, Hominem mortuum, non, nisi à quatuor vivis, domo extrahi posse: ita ne vero, Flisce, nobis non est cum imbelli ac contempto populo par certamen; neque bellum, quod ab illo nobis imminet, no-

strarum virium est? qui Mediolanenses Principes, ac Reges ipsos Gallos infinitis partibus viribus superiores sustinimus. Venetam vero urbem longe opulentissimam, omnique veteris fortuna copia abundantem, non modo in nos incumbentem non expavimus, sed omni terrore belli in illorum regiones translato, illos ad necessitatem de salute & de libertate sua dimicandi, & pacem supplices postulandi adegimus: & nunc pavore degenerum sellulariorum à tanti splendoris & utilitatis consilio desistemus? pudeat Majorum nostrorum, pudeat hominum, qui vivunt, pudeat denique hujus lucis. Ad quod consilium, præter ceteras utilitatis & opportunitates communes nobis cum omnibus, qui imperium suum augent, quas innumeras non necesse habeo apud mecum juxta gnaros persequi; duo à nobis præterea præcipui & ingentes fructus percipiendi hortantur: primus est, facilius nos alendi, qua omnino caremus; quamque agger totius Etruria feracissimus Pisanus nobis abunde supeditabit; pro qua re semper vota fecimus. En erit umquam, cum magna civitas à ditione sua alatur; neque precariam vitam ab externis Provinciis ducat? quod omnibus ac perpetuis votis expetivimus; id ultro oblatum, per illum ipsum immortalem Deum, qui numine & benignitate sua illud obtulit, ne despiciamus, Patres. Alter est ille non exiguus fructus; quod, validam coloniam in agrum Pisanum mittendo, civitatem nostram pręgravante multitudine exoneramus, ac quietiorem reddimus, nimia turba, seditionum sæpe causa, sublata; egestatemque tenuiorum campis, in quibus se exerceant, ex quibusque victum sibi parent, assignatis: cum opificia & nautica industria non satis sit ad tantum numerum alendum: quæ res ad imperium quoque Pisanum nobis stabiliendum valebit; præsertim si illius civitatis Optimates & principes civitate nostra ac jure suffragii donaverimus; atque in par nobiscum jus Reipublica gerenda adsciverimus: quod utrumque exemplum veteres ac maxima civitates nobis præbuerunt: nam, quod de mente & assensu Regis prius quaerendo censuit Fliscus; ne ego quidem, Patres, ab eo dissentio: verum sic statuo, Regis voluntatem à nobis ipsis pendere: neque enim tanto ardori ac civitatis consensui umquam refragabitur: jurabit quoque opibus suis ad rem obtinendam: quod si nos lente & segniter agere viderit, si sententiis inter nos disceptare cognoverit; quis dubitet, quin à sese novo negotio, nostra causa, implicando abhorreat; quod nos, quorum tanta res agitur, frigide suscipere senserit? tuum est igitur, Flisce, ac tui similium, omissa contentione, cum ceteris in præclaro consilio conspirando, Regem in assensum trahere: ego, Patres, illud consilium toto pectore amplectendum censeo, quod sine summa ignavia & Reipublica prodita infamia omitti non potest.

Contentiones de Pisanis rebus vix dum finitas longe acriora certamina de nostris ipsis exceperunt, anno sexto, & septimo ejus sæculi exercita: quibus
 A. C. duobus annis nulli umquam, post Genuam conditam, fuerunt, in quibus clariora edita sint documenta, aut natura insitæ Nobilitati superbiæ ac fastus, aut effrenatæ plebejorum atque infimæ sortis hominum libidinis, in libertate & impotenti dominatu exercendo nullum modum facientis: quique magis docuerint, discordiarum nostrarum (quæ plurimæ ac variæ fuerunt) nullas umquam fuisse acriores & vehementiores, quam illas, quibus Nobilium Factio & popularium corpus inter se contenderunt: quippe quæ cetera dissidia & odiorum causas obruerint, ceterarumque Factionum respectus oppræsserint; ipsasque inter se contrarias Factiones hostili odio modo inter se dissidentes ad sese attractas conjunxerint: contra easdem ipsas sectas singulas inter se bifariam dissectas distraxerint, Gibellinosque in Gibellinos ipsos, Guelphosque in Guelphos, Adornianos in Adornianos, Fulgosianos in Fulgosianos armarint: contra, Gibellini cum Guelphis, Adorniani cum Ful-

A gosianis modo hostiliter infensis, in perniciem suæmet sectæ hominum ab ipsis abstractorum studia conjunxerint; prout singulæ hæc sectæ ab alterutra Nobilium vel popularium Factione amplectebantur: quas res scripturus vehementer me animo perturbari sentio; numquam me in difficiliore aut magis lubrico loco versatum intelligens: arduum enim in primis est homini in rebus, quas stilo tractandas suscipit, nato & educato, ita aut animi permotiones regere, ne in alterutram partem propendeant; aut stilo ita moderari, ne legentes, quæ scripta sunt, quamvis cum fide & veritate conjuncta, potius ad partium suspicionem, quam ad veritatis studium trahant: ceterum animus ita hac in re ab hoc morbo liber fuit; ut Deum immortalem precer, ut hominibus, qui scripta hæc nostra in manus fument, in judicio de me ac de scriptis meis faciendo, eam mentem det, quam mihi in scribendo dedit: multæ in liberis civitatibus discordiarum civilium causæ esse solent; vel æris alieni, cujus magnitudine, velut tetra quadam tyrannide, tenues homines à divitibus & potentioribus civibus oppressi prægrave jugum, si nulla alia sit via, armis arreptis, excutere conantur; vel agrorum, quos in paucorum potestatem & possessionem cessisse, reliqua civium multitudo in egestate & solitudine ætatem agens, per ignaviam, ut plurimum, amissos, per vim recuperare contendit: quæ res Lycurgum & Solonem sapientissimos Legislatores, illum ad agrariæ legis, hunc ad tabularum novarum necessitatem adegerrunt: asperum quidem utrumque & amarum remedium, ac rerum possessoribus vix tolerabile; ceterum, ad res ab interitu sistendas, unicum: quod exemplum prius sanctissimus Vates, & divino colloquio dignus habitus Moses, & ad Hebræum populum legibus formandum divino consilio electus, prodiderat; debitorum remissione septimo quoque anno, novaque agrorum divisione quinquagesimo quoque instituta, nascenti malo, sapientiore consilio, occurrens, quam ceteri jam exortum extinguere conati sunt: quod exemplum ac remedium multi sæpe tentarunt, partim felici successu, partim tristi eventu, ipsisque auctoribus pernicioso: ceterum nullus est acrior, aut validior stimulus ad odia accendenda, civisque inter se armandos, quam dignitatis & honoris contentio, dimicatioque de summo in Republica loco; dum alii æquales, alii superiores non ferunt: quæ tanta animis civium imbibit solet; ut, cum ceteræ, quas diximus, controversiæ & dissensiones salubribus legibus sæpe sint sublatae, hæc una vix umquam aliter quam ferro decreta sit: multæ sunt enim Nobilitatis laudes, multosque illa & acres habet ad virtutes stimulos, magnaque ad laudem & ad gloriam adjumenta: quippe, quod ceteros homines una tantum officii religio ad recte faciendum, ac cum fide & innocentia vivendum inducat: at Nobilibus, præter hanc communem causam, ipsorum Majores quandam magis necessariam rationem officii colendi imponent; ut non solum suam, sed Majorum suorum vicem in fama paullatim collecta tuenda, sibi laborandum censeant: quorum Majorum decora & merita in posteritatem, tamquam jure hereditario, transfusa, dupliciter, & sua, & aliena virtute, Nobilitatem venerabilem faciunt: ceterum unum hoc vitium natura insitum habet Nobilitas, quod illius laudes haud leviter deformet: elationes enim spiritus facere, animosque hominum ad superbiam, sæpe etiam ad intolerabilem arrogantiam solet inflare; ut æquabilitatem juris cum ceteris civibus ferre non possit; primariorumque è populari corpore civium opibus auctorum atque ad eandem gloriam, quam Nobilium Majores pepererunt,

succrescentium industriam depressam cupiunt: immemores eadem fuisse gentis suae initia; iisdemque artibus, quibus novos homines niti vident, ipsorum Majores ex ignobilibus Nobiles factos: quae contentio animos civium inexpiabilibus atque occulte gliscentibus odiis paullatim imbuens, civitates bellis civilibus involvere, atque evertere tandem solet: trecentisque circiter ab hinc annis (ut remotiora omittam) factum est, ut Nobilitas in omnibus fere Italiae civitatibus ab honoribus, & Magistratibus, omnique procuratione Reipublicae dejecta sit: quin etiam in nonnullis ab aditu ad praetorium lege exclusi sint Nobiles; idque assecuti, ut, quos aequales ferre noluerint, Dominos habuerint.

Is tum morbus civitatem nostram tenebat; cum nullae earum causarum, quas modo commemoravimus, seditiones ac tumultus, quos mox scripturi sumus, conflarint: nam neque plebs ullo aere alieno se oppressam querebatur; neque Genuae in solo macro atque arido ulli sunt agri, qui dividantur; & in populari corpore, quamquam nonnulli homines erant novi; qui ipsi, vel eorum patres ad Reipublicae procurationem venerant, (quae tamen eadem ipsa quoque exceptio in Nobilium Factione erat) maxima tamen pars vel ex veteribus priscae Nobilitatis familiis erant, quae ante quattuor praepotentium familiarum regnum Rempublicam in manu habuerant; quaeque iis de causis, quas superius diximus, à Nobilium Factione ad popolare corpus transierant; vel ex iis, qui post dominatum quattuor familiarum à Simone Buccanigra extinctum, creverant; jamque compluribus progeniebus Reipublicae procurationem obtinuerant; quique neque domestici cultus splendore, egregiusque in Rempublicam meritis ac claris rebus gestis, neque ulla alia in re Nobilium Factioni de dignitate concedebant: qui Nobilitatis tantummodo nomine superiores, ceteris omnibus rebus pares, ea appellatione inflati, populares spernebant. At juvenus, cujus libidinem fervor aetatis impotentior faciebat, tenuioribus injuriis & contumeliis per varias occasiones imponere, pugnis & colaphis caedere, ferrum etiam nonnumquam intentare, vulnera infligere; neque saepe admoniti ullum injuriarum finem facere: qui etiam eo arrogantiae processerant; ut non satis haberent, impotentem superbiam exercere; sed illam quoque aperta specie praerferrent; cum capulis brevium gladiatorum, quos sub veste gestabant, contumeliosum titulum inscripsissent, *Rusticanos male mulctans*. Ac ne primariorum quidem popularis corporis civium minor indignatio animum versabat; cum ferre non possent, eos homines, qui Factionis tantummodo nomine differrent, ceteris omnibus rebus pares, honore & dignitate sibi praerferri aequum censere: quam rem eo quoque indigniorem putabant, quod forma Reipublicae popularis esset & appellaretur; summumque civitatis imperium ducentos circiter ab eo tempore annos perpetuo ac semper usurpato jure popularium esset, à quo Nobiles legibus ab ipsismet acceptis excludebantur: jus igitur suum ferro & seditione, si nulla alia re possint, vindicandum statuunt; cujus rei consilia struere coeperunt: quorum consiliorum sunt qui Julium secundum non expertem faciant, virum capitali odio Gallos Pontificiae dignitati perpetuo iniquos prosequentem; eamque viam expeditissimam judicantem, invisam nationem, ac Romano solio praegravem, juraque Ecclesiae imminuere tendentem, Genua exigendi: cui opinioni fidem affirmavit fama, quae per eos dies manavit, Pontificem Saonensibus de Genuensium injuriis expostulantibus, ac multa adversus illos petentibus, respondisse: *Abire*

vero, Saonenses, ac civibus vestris renuntiate, bono animo sint: brevi enim futurum, ut Genuenses ea negotii mole domi implicentur, quae illos à vestrarum & ceterarum rerum cogitatione avertat. Nos rem incompartam in medio relinquimus.

At populares cives, ut omnia prius tentarent ante, quam ad extrema descenderent, rem ad dignitatem & potentiam Nobilium Factionis imminuendam commenti sunt: sermonem enim induxerunt, de duabus tertiis honorum ac magistratuum publicarumque procurationum partibus popularis corporis civibus dandis; idque aequum esse disputabant: popularium enim numerum Rempublicam gerentium auctum esse; duploque plures Nobilibus populares esse: porro eorum ipsorum popularium duo corpora esse, duasque Factiones, diversis nominibus distinctas; mercatorum & opificum eorum, qui officia ingenio homini haudquaquam pudenda exercerent: tres igitur Genuae esse Rempublicam gerentium civium Factiones: proinde suam unicuique tertiam partem deberi; injuriumque esse, Factionem Nobilium, quae non plus tertia parte sit, dimidiam partem trahere. Adversus ejus rei mentionem atroces exorti sunt Nobiles; vociferantes, per has ambages id agi, ut ipsi à Republica gerenda excludantur: cui enim id non apparere, cum in decretis faciendis numerus suffragiorum propenderet? legesque ac pacta testari, quibus dimidia pars Nobilibus concessa sit: neque tria esse Rempublicam gerentium civium, sive illa corpora, sive Factiones, ac sectas vocare libeat; sed duo tantum, Nobilium & popularium; duas igitur esse debere magistratuum & honorum partes: neque Factiones ab exercitiis fieri, sed à genere: aliter Nobiles & eos populares, qui mercatores vocantur, unum tantum corpus fore; aequum enim à Nobilibus mercatorum quaestum fieri.

Cum res exitum non reperiret; populares intelligentes, se multitudine & conjunctione plebis, quam sibi idem populi nomen conciliet, antecellere; quae plebs tum solum praevaleat, cum res ad manus revocatur; non cum consiliis & disputationibus ducitur, in quibus pauciores semper superiores futuri sint; quamquam primo à plebe armanda nonnihil abhorrebant, inconsultam libidinem timentes, qui metus rem aliquandiu distinuit; tamen hoc ut minimum malorum eligentes, illam tandem commovendam statuunt. Igitur cum res ad vim & ad arma spectaret, nonnulli leves exorti casus occasionem consiliis diu ante concoctis ad effectum perducendis praebuerunt. Emanuel Canalius pecuniam, portorii cujusdam causa sibi debitam, in mercatorio foro à Nobili quodam poscebat: illo recusante, ac multa causante, ad verborum altercationes ac clamores ventum est: cumque res incaluisset, dixit Emanuel, sese enim vero, si ille pecuniam debitam voluntate non solvat, jus suum per judicium persecuturum: quae judicii comminatione Nobilis, tamquam atroci injuria offensus, manum in Canalius intendit: quae indignitas in medio ipso foro edita magnas animorum commotiones fecit; omnesque, qui aderant, vociferari, tantam superbiam non esse ferendam; tabernaeque opificum ac mensariorum, quae erant circa forum, clausae sunt: propeque factum est, ut ad arma conclamaretur: ceterum prudentia nonnullorum gravium & proborum civium se interponentium, in primis vero Uberti Solarii Hastensis Praetoris virtute & diligentia, qui, ad primum tumultus crepitum, statim eo cum valida manu accurrit, animi mitigati sunt, atque imminens periculum in praesentia compressum: qui Praetor, Vicario regio absente, qui salutis procurandae causa ad aquas Statiellas concesserat,

cesserat, ut plebis animos tot injuriis irritatos aliquo dato solatio permulceret, nonnullos nobiles adolescentes, quorum libido in injuriis & contumeliis intemperantior fuerat, unumque popularem civem paullo vehementioris ac fervidioris ingenii in hominibus concitandis, de summi Magistratus consilio, exsulio mulctavit: quibus rebus quamquam erumpens seditio in praesens, ut diximus, repressa est; non tamen animi sedati sunt; resque magnis certaminibus in Senatu acta est; popularibus Senatoribus pugnantibus, ut ista Regi nunciarentur, qui acrioribus remediis imminenti malo occurreret, atque indomitam nobilium adolescentium libidinem coerceret: ceterum nihil impetrari potuit, Nobilium Senatorum Factione obfistente: quæ res popularium civium, vel eorum, qui quietioris ingenii habebantur, indignationem mire accendit: vehementemque suspensionem commovit, aspera & atrocia superbiae & arrogantiae à juventute quotidie edita exempla, non modo permixta, sed suavis quoque seniorum admixta: omnia igitur inter ipsos Senatores suspecta esse; quæque fierent, ac dicerentur, mutuo in deteriorem partem accipi: nemo Reipublicæ consulere, sed omnes Factioni servire; nihil, quod pro illa faceret, turpe aut pudendum ducere.

Tam sollicita civitate, omniumque animis expectatione suspensis, quorum hi motus essent evasuri; alter casus, post mensis spatium, intervenit, qui animorum commotiones haud parum auxit. Rusticanus quidam è valle Porciferæ in area divi Laurentii, in qua ædes Flischorum sunt, venales fungos habebat: ad eum accessit Barptolomæus Fliscus; qui pretium percunctatus, cum rusticanus paullo cariores, ut Flisco videbatur, indicaret, neque de pretio convenirent; contumeliosis verbis Fliscus hominem objurgare coepit: rusticanoque paullo liberius respondenti validum colaphum impexit, ex quo sanguis manavit. Vociferante rusticano, in imperio tanti Regis talibus injuriis homines affici; Ghilio quidam lanius ex eadem valle oriundus, turbulenti ac minime timidi ingenii vir, injuria popularis sui offensus, illius partibus susceptis, inclamare Fliscum coepit, ac vicem læsi minaci potius quam flebili voce conqueri; Fliscisque, qui aderant, gentilem suum defendentibus, populi concursus statim ad commotam rixam factus est; armaque à nonnullis arrepta, neque abfuisse à periculo Flisci; nisi regius Vicarius Roccabertinus, qui in urbem redierat, Barptolomæum & Ghilionem statim in exsiliū egisset: illum, quod causam tumultui, rusticanum verberando, præbuisse: hunc, quod invidiam facti contumacia sua nimis inflammasset: secundum ea, sexaginta civibus ex primoribus civitatis nominatim convocatis, ad pacem hortatur, bona concordiae & mala discordiae longa & sapienti oratione persecutus: cum illud addidisset, Regem non satis majestatem suam à Genuensibus cultam putaturum; nisi iidem justitiam quoque colant, deinde in maleficia & facinora, quæ quotidie admittebantur, aspere invehit, monuit, ut ab injuriis desisteretur: quibus non minus regium imperium, quod contemni videatur, quam violati ipsi, lædatur: cum diceret, non esse ea laturum Regem; cujus bonitate si leniter utaris, nihil illo esse mitius; si abutaris, nihil asperius: proinde caverent, ne ejus iracundiae aculeos sibi irritarent; ejusque mansuetudinem potius quam severitatem experirentur: esse hoc in primis Regi cordi; neque se ulla habere enisiora aut vehementiora mandata; quæ ipse acerrime exsequi, nisi respiciant, in animo habeat: neque culpam magis penes juvenes, quam penes senes esse: qui juvenutis libidinem & inconsultam rationem modera-

tionem & prudentia sua regere debeant: in quo officio si cessarint; tum vero sese ad necessitatem adactum iri, illorum partes severitate animadversionis ac suppliciorum acerbitate supplendi. Hæc cum gravi & minaci voce pronunciasset; finem dicendi fecit, nihilque præterea in ea congregatione actum est; cum populares cuperent quidem de re toties in coetibus jactata, ac tantis contentionibus agitata, hoc est, de duabus tertiis publicorum munerum populo concedendis, in eo consilio agi, quæ res concordiam civitatis distineret: ceterum ejus referendæ nollent esse auctores, ad ambitionis suspensionem detestandam.

Igitur cum, tota civitate expectatione suspensa, vulgatum esset, nullam mentionem de nova munerum & honorum partitione in congregatione factam esse; vulgoque fremerent, populum extrahi, ac ludibrio esse; eam occasionem arripientes ii, qui rerum novandarum cupidi erant, nonnullos ex infimæ fortis hominibus concitant, qui, Ducibus Paulo Baptista Justiniano, & Emanuele Canalis, illo claro, hoc honesto loco ortis, domo armati profilientes ad arma conclamant: iis primo pauci se adjunxerant: qui urbe discurrentes, ac nomen Regis & populi crebris clamoribus subjicientes, cum per campum Auriarum transirent, nonnullorum Nobilium verbis ipsos contumeliose appellantium provocati, omni nocentium, vel innocentium omisso discrimine, iram in primum obvium effundunt. Is fuit Vicecomes Auria, egregius civis, rectique exempli, & moderati ingenii vir; quem omnis culpæ exsortem crudeliter interficiunt; Augustinumque Auriam, nonnullosque alios Nobiles, ut quisque in illos incidebat, vulnerant. Strepitu exaudito, Joannes Ludovicus Fliscus ex ædibus suis ad Inviolatæ edito loco fitis, cum haud contemnenda clientium manu in inferiora loca ad tumultus comprimendos descendit: eodemque tempore Roccabertinus Vicarius ex prætorio inermis, scipionem tantummodo manibus tenens, profilit; ac per urbem discurrens ab armis discedi minaciter ac pro imperio jubet: cui cum ferociter responsum esset, non prius populum arma depositurum, quam duæ tertiæ partes in magistratibus & Republica gerenda concederentur; Roccabertino noctem appropinquantem verito, quæ solutiorem libidinem peccandi facere soleat, nullo pudore, aut poenæ metu audaciam tenebris obtectam cohibente, necessitas expressa est promittendi, sese morem populi voluntati gesturum. Flisco obfistente, ac reclamante, fides Vicarii constitit: postero enim die in universæ civitatis consilio, cui pauci ex Nobilibus interfuerunt, Vicario regio approbante, duæ tertiæ munerum publicorum, omnisque Reipublicæ procurationis populo concessæ sunt; ex eoque decreto, eaque portione duodecimviralis Magistratus *Pacificatorum* nomine appellatus, creatus est; ad hoc summus ipse, quem antianorum appellabant, & ceteri civitatis Magistratus electi sunt. Primum Pacificatorum, una cum regio Vicario, opus fuit, Regem de iis, quæ acta erant, certiores facere: quorum litteris placatus dicitur Rex: ex quibus cognovit civitatem in tranquillum redactam; cum primus nuncius tumultus illum vehementer commovisset. Eas litteras, paucis post diebus, consecutus est Nicolaus Odericus Jurisconsultus, initio motuum statim Orator missus: qui civitatis factum, si opus esset, purgaret; ac jura civitatis & populi defenderet.

At Genuæ cum omnia satis pacata viderentur; tabernisque apertis, opifices & mensarii ad omnifariam industriam rediissent; ecce tertio à decreto facto die, multitudo atrocior ac majoribus motibus ad seditionem coorta, per urbem pluribus

agminibus armata discurrens, domos Nobilium hostilem in modum invadit, ac, veluti capta urbe, diripit: popularium primoribus frustra obstitentibus, ac reclamantibus: qui contra, quam præceperant animis, experti sunt, facilius plebem concitari, quam comprimi; illamque difficilius arma deponere, quam sumere. At maxima pars Nobilium, partim metu, partim indignatione urbe excedunt; in suaque quisque suburbana se recipit, exitum rerum expectantes: quod idem fecerat prius Fliscus, atque in prædio ad quartum ab urbe lapidem primo substitit; tandem, cum res urbanæ duriores in dies fierent, in privatam arcem suam Montobium concesserat. At Nobiles, quamquam multis locis sparsi erant, non tamen se deseruerant; nonnullosque elegerant, qui, partitis muneribus, causam suam defenderent; ac quæ è re ipsorum essent, ubique obirent, in primis apud Regem. Qui motus in Galliam portati, Regem ad necessitatem adegerunt, Ravastenum Genuam mittendi: cujus viri summa nobilitas & dignitas majorem vim habitura esset, ad verecundiam Genuensibus injiciendam, incitatosque motus sistendos: cujus appropinquantis fama Genuam perlata, populares cives Barptolomæum Cevam intima familiaritate homini cognitum obviam mittunt: paulloque post missi sunt, Vincentius Saulius, Demetrius Justinianus, Leonardus Facius; Hastam usque procedere jussi, ibique hominem præstolari: quam etiam in urbem se contulit Joannes Ludovicus Fliscus, ac non exiguus cum illo Nobilium numerus: omnia utrimque metu & expectatione suspensa erant; graveque utrique parti videbatur, tantam rem unius Ravasteni arbitrio permissam: populares constantiæ plebis diffidere; Nobilibus nihil longius videri, quam ut in patriam redirent.

Dum Ravastenus Hastæ, utraque parte moram ægre ferente, cunctatur, Genuæ tumultuabatur: cumque auditum esset, Janum, Octavianum, Alexandrum Fulgosios Roma moturos; ac, nisi à Pontifice retineantur, Genuam auxilio Nobilibus venturos: ad hoc Joannem Paulum Leccam, Nobilium instinctu, in Corsica res moturum; visum est primariis popularibus, ad plebis animos retinendos, aliqua blandimenta dare: Magistratus igitur sexviralis creatus est; illique negotium datum, portoria & alia publica onera minuendi. Jacobusque à Mari, capitis Corfi Dominus, cujus fides popularibus, multis de causis, suspecta esse coepit, in arcem Ericis in custodiam missus est.

Interea Ravastenus Hasta profectus ad urbem venit; atque in suburbanis in pago, qui vulgo *Campi* vocatur, substitit: cui, honoris causa, Magistratus civitatis ac delecta popularium adolescentium cohors pretiosum holosericum induta obviam processit: quo comitatu cinctus, delectaque septingentorum peditum manu ac centum quinquaginta equitum ala stipatus, urbem est ingressus, truci vultu atque in speciem minitabundo: cum Magistratus veluti anteambulones antecedere jussisset: quod ab illis moerentibus & conditionem patriæ ingemiscantibus, obedienter tamen (ita postulantibus Reipublicæ temporibus) factum est: isque dolor animis Genuensium alte infedit; tamquam id factum speciem servitii præferret. Ravasteni opus primum fuit, ad terrorem suum denunciandum, securis, & jugum in area prætorii statutum: cumque, appropinquantibus Kalendis Septembribus, quo die novus summus Magistratus tum creabatur, rogatus, placeret ne illi Magistratum, ex formula recentis decreti, creari, responsum nullum dedit: quod silentium populares vehementer perculit, verentes, ne res ad

antiquam formam redigeretur. Tam suspensis animis occultus Joannis Ludovici Flisci ad urbem adventus additus est; qui cum nonnullis armatis in ædes suas ad Inviolatæ se contulerat: ad quem frequens Nobilium concursus statim factus est; telaque & arma eo comportari coepta: qua re perculsi populares, ad Ravastenum accedentes orant & postulant, ut ipsos ac populum ab Joannis Ludovici impetu securum faciat: ille Joannem Ludovicum, ne is quidquam injussu suo posset movere, in prætorio retinuit: quo metu soluti populares, à Ravasteno tandem expresserunt, ut Magistratus ex novi decreti præscripto crearentur: quibus etiam instantibus, Joannes Ludovicus urbe excedere jussus est: qui cum imperata cunctanter & retractanter faceret, arma à tenuioribus arrepta sunt, ut renitentem extruderent.

Eo tempore primarii populares domi se continebant; neque in ullam fere Reipublicæ partem interponebant: majorque prope erat ipsius inter se populi, quam cum Nobilitate dissensio: dictitantibus primoribus, sese arrogantiam & audaciam infimæ plebis ferre non posse; indignantibusque, summam Reipublicam atque omnium rerum arbitrium in civitatis faciem recidisse: quique Nobilitatem paullo ultra æquabilitatis jura se efficerentem ferendam non duxerint, iis nunc infimæ plebis dominatum subeundum esse: satius esse in antiqua redigi mala, quam in tantis asperitatibus & indignitatibus versari. Contra plebs ita disputabat: non se pro paucorum potentia; sed pro populi libertate arma sumpsisse: quam libertatem potentiores in seditione conflanda numquam spectasse, sed ad primum civitatis locum, dejectis Nobilibus, adspirasse, superbosque homines eo se servire putare, quod non regnent; societatemque tenuiorum fastidire; cum quibus tamen tot egregios cives, atque ingenio & consilio pollentes, tum autem de re familiari bene constitutos, nulumque sordidum aut pudendum quæstum facientes conjunctos videant: si plebi omnino serviendum sit, splendidius certe esse erga Nobilitatem servitium: quid autem illos in se despicere, præter fortunam ac tenues opes? an poenitere fortis ac strenuæ à tenuioribus Reipublicæ navatæ operæ? quorum vigilantia occulta inter Ravastenum & Fliscum inita consilia detecta sint, eorumque virtute discussa; Fliscus urbe exactus, necessitas Ravasteno suoapte ingenio à re abhorrenti imposita, Magistratus ex novi decreti præscripto creandi? primariis istis interea sedentibus, segniterque in causâ versantibus.

In tantis mutuis animorum offensionibus, plebs cum in ædem divæ Mariæ Castelli convenisset, octo Tribunos plebis creant; veteri Romanorum nomine tantummodo, non autem jure repetito: cum illi intercessionem dumtaxat haberent, his omnium rerum summa potestas permissa esset: qui, tribunali in prætorio constituto, non modo ceterorum Magistratum, & Prætoris decretis, & voluntati intercedebant; sed quæ ipsis libuissent, de omnibus maximis & minimis rebus decernebant: periculosumque in primis ac capitale erat, illorum voluntati obstitisse; cum magnis hominum gregibus stipati incederent, ac jus dicerent: ut ceterorum Magistratum potestas pro nihilo esset.

Eo tempore, cum omnis ora in Orientem versa præsidii Joannis Ludovici teneretur, jussu Regis ipsius, qui totam eam oram homini custodiendam & regendam commiserat; ipseque Joannes Ludovicus in suburbano, ad quartum lapidem substitisset; duobus millibus & quingentis armatis in illum missis, se Rapallum recipere coactus est: missique sunt Spediam duo Legati, qui opidum faventibus municipibus recuperarunt; haud exiguoque

quoque militum numero in agro Lunensi scripto, Philippino Flisco, qui cum mille quingentis peditibus ab Joanne Ludovico missus Spediam iterum intrarat, ejecto, totam Ligusticam oram brevi Reipublicæ recuperarunt. Enimvero Joannes Ludovicus, simulque cum illo Nobilitas omnis, occasione Regis in populum incitandi læta, per litteras & nuncios injuriam apud Regem conqueruntur; quam non sibi magis quam ipsi Regi per summum illius contemptum factam dicunt: quem contemptum cum per se Rex negligere non debeat; tum quod inulta audacia, ni propere obviam eatur, ulterius sit progressura; periculumque sit, ne ipsa urbe Genua Regem exigit: nam superiora quidem à populo admissa, quamquam gravia & acerba, ad seditionis tamen tantummodo interpretationem revocari posse: in hoc vero postremo populum à Rege perspicue defecisse; qui arma contra illum aperte tulerit, ditionemque regiam Ligusticæ oræ invaserit; ejusque loca, administris & procuratoribus regiis expulsis, Regi per vim ademerit: cui autem dubium esse, quin plebs, si tempus detur, conscia, quo se crimine obstrinxerit, patrocinio sese alterius Principis, ad commeritas poenas subterfugiendas, communiat? Eas porro esse Genuæ opportunitates, eaque momenta illam urbem in rebus Italicis terra ac mari facere; ut ab omni Principe, ad quemcumque se Genuenses contulerint, cupide in fidem accipiantur. Contra Odericus causam populi constanter defendebat; quem Gallicæ regis ac nominis Galli perpetuo studiosum fuisse, dicebat; ejusque majestatem pie & sincera fide, cum omnibus temporibus, tum post exortos tumultus, ut cum maxime coluisse, ac semper culturum: neque ullum umquam casum constantem & contestatam ejus fidem labefacturum: ad eos autem tumultus intolerabilibus Nobilitatis injuriis, ac non ferenda superbia adactum: cui cum nullum esset adversus Nobilitatis injurias in æquitatem Magistratum perfugium, cum æqualia essent suffragiorum momenta; idcirco duas tertias illorum partes quæsisse, easque ab ipso regio Vicario Roccabertino, re præsentī certum judicium subiciente, impetrasse: quæ una res, arrogantia Nobilium cohibita, causas dissidiorum sit sublatura, civitatemque in tranquillum statum redactura. Neque esse, quod Nobilitas postremi hujus admissi, Orientalis oræ Joanni Ludovico ademptæ, invidiam inflammare contendat; illudque ad defectionis crimen rehovare studeat: non enim ab omni verisimilitudine modo abesse, sed ridiculum plane esse; populum Genuensem umquam cogitasse de Rege ex ora Ligustica expellendo; quem in ipsa urbe ferat, ejus Vicarium retinendo, ac summa veneratione colendo: debere igitur Regem pro sua sapientia & æquitate, rem in meliorem partem accipere; ac cogitare, populum Genuensem merito ad necessarium consilium descendisse; sine quo non se à jugo Nobilitatis liberum intelligeret: quo modo enim ferret, oram Ligusticam, à qua civitas alatur, in manu infensissimi hostis sui esse; à quo obsessā precariam vitam illius arbitrio duceret? non igitur Regi ea loca adimere intendisse; sed ex iis hostem exigere, seque obsidione eximere, voluisse. Genuensem populum, paratum eandem oram cuicumque Regis procuratori, modo ne ex hostibus suis sit, regendam tradere. Hæ contentiones cum Regem animo nutantem diu fatigassent; is exitus ejus actionis fuit; ut, quod Nobiles de periculo alterius Principis accersendi, ad Regem in populum accendendum proposuerunt, id animum Regis in causam populi inclinavit: qui quamquam graviter delictis populi offensus, tantam licentiam & auda-

A ciam non impunitam cuperet; ad hoc naturali insita Gallorum animis in Nobilitatis nomen propensione, occultis sensibus Nobilitati faveret; tamen temporibus serviendum statuit; concitatoque animos populi beneficio potius flectendos, quam exspectatione supplicii exasperandos: metu, ne, dum ipse comparat, populus occuparet in alienam opem & fidem confugere: ac potentiam Cæsaris veritus, quæ, vivo Philippo filio tanti regni successore formidolosa in primis erat; veniam admissorum decreto suo populo dat: legemque de duabus munerum & honorum partibus comprobatur: ad Nobilitatis tamen solatium, ut loca Joanni Ludovico ablata restituantur, imperat: quarum rerum diploma conscriptum Michaeli Ricio Jurisconsulto, exsuli Neapolitano, viro impigro, magnique in rebus publicis usus atque ingenii ad animos hominum tractandos in primis apti, deferendum dat.

Interea Genuæ vehementer laborabatur; neque res urbanæ turbulentiores umquam fuerunt: ut complures probi ac præstantes cives de relinquenda urbe, seseque ex illa colluvione subtrahendo, cogitarent: cum ii, qui domos Nobilium diriperant, quorum magnus erat numerus, causas discordiarum, rixarum, seditionum quotidie ferebant; solique in pretio essent turbulenti homines, egentes, obæratī, flagitiis & sceleribus inquinati, capitalia ausi, & ad vim, cædem, atque ad omne facinus parati; quorum urbs plena erat: quæ res cum ipsis quoque Tribunis intolerabiles esse cœpissent; illis non repugnantibus, Tarlatinus quidam, ordinum ductor, magni in rebus bellicis nominis, magnique animi & consilii vir, Pisus accersitus est, ad nefariorum hominum audaciam comprimendam, duobus peditum millibus ea de causa illi attributis. Ejus virtute & opera rebus urbanis satis pacatis, Ricus Genuam venit; diplomaque Regis Magistratui reddit. Enimvero illi gaudio exultare, manusque ad cælum tollere, D Deoque immortalī gratias agere, qui eam mentem Regi dedisset, finemque domesticis malis tandem imposuisset; populumque egregiæ victoriæ adversus Nobiles compotem fecisset; ea re impetrata, quæ ipsis arma induerat: qua lege non solum firmissimus clypeus adversus Nobilitatis superbiam & injurias datus esset; sed Nobilitas pedibus populi subiceretur. Longe alia mens in Tribunis, atque in humili plebe, iisque, qui turbulentum magis quam pacatum civitatis statum, tamquam ipsorum libidini aptiorem, optabant: quorum mentes tanta amentię verius quam pertinacię vis tenuit; ut benignitate Regis sprete, neque duobus tantis beneficiis, & impunitatis, & legis comprobata contenti; quia tertium non impetrarant: pro eo ut dicto audientes essent, ac Joanni Ludovico ablata restituerent; tamquam laudi sibi ducerent, contumelias in Regem contumeliis cumulare; novam insuper expeditionem in opidum Monæcum decernerent, quod factiosis Guelphorum & Gibellinorum temporibus occupatum Grimalda gens retinebat: sive temere credentes eadem facilitate arcem munitissimam expugnari posse, qua nuda & aperta loca recuperata fuerant; sive eam causam fore sperantes, continuandi sibi magistratus, popularium Optimatibus temerarium consilium, inaneque evasurum tacite damnantibus, ac mœrentibus, & ingemiscen-
F tibus claram victoriam populi insania corrumpi; ac Rempublicam, causamque populi furentis multitudinis insania ac perdita Tribunorum ambitione in præcipitem & irrevocabilem casum dari; eamque molem regis iræ sibi ipsi à populo consilari, qua haud dubie obruendus esset. Ejus expeditionis Dux creatus est is ipse Tarlatinus: qui, Ravasteno invito,

invito, cum duabus triremibus, quarum præfecti fuerunt alterius Gaspar Guanus, alterius Joannes Baptista Davania; ac cum nonnullis minoribus navigiis sub exitum mensis Septembris profectus est.

Novæ quotidie res excogitabantur, quæ quietem civitatis exagitarent: in quibus illa fuit, nova Reipublicæ proposita forma, sex & triginta civium creandorum, in quorum numero essent antiani, ac nonnulli alii majores Magistratus, quibus stipendium de publico assignaretur; penes quos summa esset omnium rerum potestas, eaque quinquennalis esset: quæ consultatio cum aliquandiu civitatem tenuisset; tandem vana evasit: cumque quotidie novæ hominum sectæ orirentur variis titulis insignes; specie ad auctoritatem summi Magistratus tuendam, re ad illam infringendam; quæ eo magis imminuebatur, quo magis sectæ alia ex alia in dies orientes multiplicabantur; electi sunt quattuor cives, quos Ductores urbanarum rerum appellarunt, viri graves, & experientes, quietisque publicæ amantes: ii fuerunt, Fabricius Justinianus, Bernardus Castillionus, Petrus Calisanus, Marcus Terrilius; delecta quadringentorum cohorte illis attributa. Nec spes de illorum virtute concepta civitatem fefellit; omnibus exsulibus, qui plurimi in urbem confluxerant, civitate & tota Genuensi ditione exactis, facinorosorum & seditiosorum audacia se veritate animadvertendi repressâ: quibus rebus factum est, ut civitas à præteritis malis & ærumnis haud parum respirarit. At Ravastenus tantis indignitatibus commotus; simul indignatus, majestatem & imperium regium adeo contemni; auctoritatemque suam in dies vilescere atque imminui intelligens; ad hoc turpe sibi putans, ejus fastigii ejusque nobilitatis viro, speciem tantum se, non vim Vicarii regii obtinere; procuratore deposita, urbe excessit; Deum prius hominesque testatus, furentis plebis insaniam in Genuensium caput brevi recasuram; seseque magis civitatis malis, atque imminente calamitate, quam suis ipsius injuriis, commoveri. Fuere, qui putarint, auctoritatis Ravasteno abrogandæ non magis temeritatem plebis, quam aulicam obtrectationem causam fuisse: hancque invidiam Rocabertinum occultis consiliis illi conflasse, offensum ejus adventu, ac Regi, ejusque consilio succensentem; qui, tamquam in ipso non satis animi ac consilii esset, ad res Genuensium regendas, alium supermiserit, cujus splendor ipsius luminibus obstrueret: ad hoc Chiamontis Cardinalis Rothomagensis fratris filio, atque Italicis rebus cum summo imperio præfecto, à Ravasteno capitali odio diffidenti gratificari cupientem: nos in re non satis comperta suam cuique existimationem liberam relinquimus.

Discessu Ravasteni, plebis animi creverunt, ejusque libido solutior facta est; omniaque ad nutum Tribunorum, ceteris Magistratibus spretis, fiebant. Per ea tempora æmulatio partium inter Adornianos & Fulgosianos occulte gliscebatur; quæ una res esset causæ populari evertendæ: huic malo subito occursum est, utrarumque partium capitibus in ædem divi Dominici convocatis: inter quos, paucis commutatis verbis, convenit, ut depositis Factionibus ab eo tempore maxime alienis, omnia studia in susceptam populi causam defendendam unanimes conferrent. At Tribuni asperis verbis popularium primores lacerare: quorum languore & desidia fieri, ne Monæcum caperetur; brevi profecto casurum, si illi cum cetera civitate viribus & consiliis conjunctis, in causam ipsi quoque descendant: sed non omnino desertam esse Rempublicam: annisuros enim ceteros cives, ut suam & cessantium, ne dicant patriam prodentium,

A vicem suppleant. Ad ea respondere Optimates; sese de patriæ charitate, ac boni & dignitatis publicæ studio neque Tribunis, neque multitudini, neque ulli omnino mortalium concedere: ceterum in magnis rebus aggrediendis, non impetu animi rapi, sed ratione duci oportere: non minorem igitur ipsorum futurum fuisse ardorem, in Monæco ex injustorum possessorum manibus extorquendo, quam Tribunorum, aut multitudinis: verum quam tandem ope arcem situ munitissimam ac pene inexpugnabilem, quæ prævalidos regios exercitus multos menses distinere possit, cum exiguis illis & subitariis copiis tentari? aut quid aliud tantis pecuniarum & laborum impensis, quam dedecus queri? facere hoc non novum Tribunos & multitudinem; ut principes cives maledictis conscindant; omniaque eorum facta & dicta ad suspicionem & ad invidiam trahant. Utantur proinde illi usitato vitio: sese enim salutaris sententiæ suæ perpetuo retinentes fore: ceterum plebs tantam contentionem animis imbiberat; ut magna opificum & sellulariorum pars, relictis tabernis, ac quotidiano quæstu, quo alebatur, omisso, ingenti agmine Monæcum contenderit, libidinem animi solam duces sequentes: fueruntque terrestres copię Monæcum obsidentes hac urbana multitudo auctæ sex omnino hominum millia: ceterum urbanorum adventus impedimento potius quam adjumento rebus fuit: omnium enim militarium numerum rudes & infucti; cum neque imperiis parere didicissent, neque ulla verecundia cohiberentur: ac, quæ libido animi ferret, omisso discrimine in rem ne, an contra esset, exsequi festinantes omnia turbabant: parumque abfuit, quin milites importunitatem fastidientes, obsidione soluta à signis discederent.

At Nobilium Factio, quæ tanto novi regii decreti vulnere icta plane conciderat, omnisque consilii inops obtorpuerat; recentibus plebis facinoribus cognitis, à summa desperatione ad spem victoriæ animos erexit; intimis sensibus gaudens, viam sibi à plebis insania ad illam sterni: quam spem ut adjuvarent, quattuor Oratores ad Regem mittunt, Antonium Spinulam, Laurentium Lomellinum, Stephanum Vivaldum Jurisconsultum, Joannem Jacobum Auriam: qua re cognita, populus duos ipse quoque Oratores mittit, Paulum Francum Bulgarum, & Simonem à jugo: qui tamen in conspectum Regis vehementer populo irritati admissi non sunt; sed prope regia faceffere jussi, cum unus Odericus remansisset: qui, quamquam Nobilium Oratoribus perspicuam defectionem populi criminantibus, Regemque in illum incitantibus, causam populi constanter defenderet; res tamen neque longæ neque ambiguæ deliberationis fuit. Rex enim tantam contumaciam cohibendam ducens, ne impunitas populum ad majora & graviora in dies audenda proveheret; simul ut majestatem à contemptu vindicaret; ad hoc morte Philippi Hispaniarum Regis liberatus metu Cæsaris, qui ad eum diem ipsius cupiditati moderatus fuerat; aperto tandem bello Genuenses persequi decrevit: cui ipsemet præesse constituit, in rebus Neapolitanis expertus, quanti interesset, Principesne bel-la ipsimet gererent, an Ducibus & præfectis gerenda permetterent: cum præsertim nullum esset descensus in Italiam incommodum; itinere jam decreto ad constitutum cum Pontifice colloquium, qui ipsum Bononiæ præstolabatur, ut de bello Veneto capita conferrent: cujus uterque cupidissimus erat, gravissimæque causas habebat: nihil igitur dissimulans, insequentis anni initio ejus sacculi septimi comparare instituit; atque interea omnibus iniquitatibus Genuenses vexare; mandato Chia-

Chiamontio dato, ne quidquam annonæ ex Insu-
bria Genuam subvehi permetteret; & arcis præ-
fecto, quantis maximis detrimentis possit, Ge-
nuenses afficere jussit. Enimvero imperio lætus
præfectus, vir pravo & sævo ac rapaci ingenio,
ad lædendumque prono, cupide imperata exsequi
pergit: igitur cum die festo magnus hominum &
mulierum, tam nobilium quam popularium, nu-
merus in ædem divi Francisci arcis prope conjun-
ctam ad sacra convenisset; statim foribus templi
obseratis, populares cives, quotquot in æde inven-
ti sunt, nobilibus ac mulieribus dimissis, capti-
vos fecit; quos multos dies in carceribus reten-
tos, multaque aspera & acerba perpeßos, non
nisi decem aureorum nummum millibus redem-
ptos dimisit: ad hoc complures onerarias in portu
bombardarum ictibus depreßit: quibus multos
quoque peregre, quo suarum rerum usus ferret,
commearantes incautos & inermes exanimavit; cum
noctu tecta ac privatas domos continentibus icti-
bus peteret.

Eo tempore miserabilis in primis erat civitatis
status, multis undique iniquitatibus conflictata; ac
cum præsentibus malis exercitæ, tum formidine
futurorum ab ira & indignatione Regis sollicitæ, ad
hæc minis Ferdinandi Hispaniensis Regis, & Du-
cis Sabaudia perterritæ: quorum ille amicitia &
affinitate Gallo conjunctus erat; hic bellum ad
Monæcum in ipsis ditionis suæ januis ægre fere-
bat: quibus malis & periculis usque adeo feroces
animi plebis infracti non sunt; ut contra, prima-
rios cives ad necessitatem ingentis auri summæ,
hujus belli civilis causâ, inveniendæ & adden-
dæ, minis adegerit. Una in tantis tenebris spes
Pontificii auxilii elucebat: ad quem duo Orato-
res missi sunt: Dominicus Adornius & Augusti-
nus Folieta: qui Pontificem ad patrocinium &
propugnationem miseræ civitatis, ac Ligusticæ na-
tionis suæ suscipiendum commoverent: in primis ad
deprecatoris & pacificatoris partes, sacrosanctam-
que auctoritatem inter Genuenses & iratum Re-
gem interponendas. Altera quoque legatio quat-
tuor civium, eodem tempore, ad Chiamontium
missa est: ii fuerunt, Joannes Baptista Lazania
Jurisconsultus, Joannes Baptista Cocarellus, La-
zarus Pichenottus, Josephus Dernisius; qui ho-
minem civitati placarent; cumque, si fieri posset,
à consilio subsidii Monæco submitendi abduce-
rent: ceterum harum legationum dispar eventus
fuit: nam qui ad Chiamontium missi sunt, ad il-
lum accedere, atque ultra opidum Serravallem,
quousque perrexerant, progredi permitti non sunt,
retro in sua reverti jussi. At Pontifex nihil in pio
officio cunctatus, per nuncios & litteras vehe-
menter scriptas, Regem à suscepto consilio ma-
gnopere revocare instituit; & ab armis Genuensi
populo inferendis, omni contentione, omnibus-
que precibus detertere: cujus obedientia conten-
tus, ut popularem illam Reipublicæ formam,
quam ipsemet Rex comprobarat, complectatur,
rogat: in qua obedientia haud retractanter Ge-
nuenses fore in se recipiebat, precibus consilia
quoque addens: eos enim motus in Italia iis armis
movendis excitari posse, quæ instituta consilia
belli Veneti, quod utrique caput curarum sit,
everterent: quæ preces & consilia cum Regem
nihil commovissent; indignatus Pontifex, tam par-
va fuisse, in re præsertim cum tanta honestate
conjuncta, auctoritatis suæ apud Regem momen-
ta; ex eaque re, quam parvum ipse gratiæ locum
apud Regem teneret, conjiciens; ad hoc Rotho-
magenis animo, ad Pontificatum haud obscura
ambitione tendentis, perpetuo sibi suspecto; cujus

A cupiditati Regem servientem haud sincera fide
colloquium petere veritus; inchoata consilia defe-
rens, Romam profectus est, causam insalubris
cæli profectioni prætexens. Exarsit Rex hac sub-
ita Pontificis mutatione, illum omni conten-
tione retinere conatus: quæ contentio quo ma-
jor erat, eo magis suspicionem Pontificis augebat.
Gravis hæc irritatio animorum utriusque Princi-
pis fuit: quo factum est, ut Pontifex Venetis
mitigatus animum ad pacificandum cum illis adji-
ceret.

B Interea Genuæ Rocabertinus, jussu Regis
omnem speciem juris adversus Genuenses quæ-
rentis, urbe excesserat: quo profecto, eadem
nocte milites prætoriani in arcem concesserunt:
totumque insequentem diem silentium & admira-
tio civitatem regio rectore orbatam tenuit: cum
tamen vexilla regia in summa turri prætorii ere-
cta essent; reverentiaque quædam etiam in plebis
animis erga Regem residua esset: quam opinio
sapientium fuit, facile potuisse ad saniora consilia
revocari, atque in potestate bonorum esse; nisi
arcis præfectus, tamquam id consulto ageret, ut
homines ad extremam desperationem adigeret,
assiduis injuriis suis animos in dies magis exaspera-
rasset.

C Interea Nobiles tria millia peditum scripserant;
quibus, nonnullis ex copiis suis additis, Chia-
montius Ivonem Alegrum præfecit: quo ad ob-
sidionem Monæci solvendam profecto, copiarum
Sabaudia, quæ ad Trophæa Augusti contractæ
erant, ipsæ quoque movent: quarum appropin-
quantium metu Genuenses, Monæco tandem o-
missio, Albintemelium se recipiunt: in quam ur-
bem paullo ante tormenta, & reliquæ machinæ,
omnisque bellicus apparatus, jussu novorum Tri-
bunorum, subductus fuerat. At Alegrus, Mo-
næco sola adventus sui fama liberato, quam rem
non exigui certaminis fore crediderat, omnem co-
natum suum in oram Ligusticam convertit; quam
brevi totam Regi recuperavit. Jacobumque Fran-
cum præfectum portus Mauriti, Genuensem
civem ex primariorum numero, insinuatum,
quod duos Regis caduceatores necasset, jugo sus-
pendit.

D Interea plebs ad graviora in dies admittenda,
eaque, quæ Regis animum magis irritarent, præ-
ceps agebatur: nam cum litteræ Caroli Dominici
Carretti Cardinalis Finariensis, qui apud Regem
magnum auctoritatis & gratiæ locum obtinebat,
E Magistratui redditæ essent, quibus ille Genuenses
amice monebat, ut pertinaciæ finem tandem fa-
cerent; ac cogitarent, quam inferius viribus suis
esset, ipsos omnium Principum societate desertos,
tanti Regis omnibus opibus suis in ipsorum per-
niciem incumbentis impetum sustinere: id si fe-
cissent, facile apud clementem animum veniam
errantium inventuros; resque sine armis, aliqui-
bus tolerabilibus conditionibus faciles transactu
fore: in eam rem sese partes suas, ac quidquid
precibus apud Regem valeat, pro sua in ipsorum
civitatem benevolentia, interpositurum. Hic o-
F mnes enimvero primarii cives, pro se quisque ma-
gnopere suadere, ut sapientia & amica monita ac-
cipiantur; neque tanta occasio Regis placandi,
atque instantis pestis avertendæ ultro oblata omit-
tatur: quam enim tantam rabiem animos Ge-
nuensium agitare; ut major ipsorum, rerumque
civitatis suæ exteris, quam ipsos misericordia ca-
piat? aut quid ulterius ipsis esse in votis potuisse,
quam, venia eorum, quæ adversus Regis ma-
jestatem admittenda negare non possent, impetra-
ta, ac duabus tertiis honorum & Magistratuum

partibus ipsius Regis lege sibi firmatis, quæ una res Genuenses inter se commiserit, cum Rege in pace & in gratia esse? quid populum ulterius, si optio detur, petere posse? aut quid esse amentius, cum Regem placatum habere possint, eum nulla de causâ iratum experiri malle? quid illos spectare? quem finem tandem propositum habere? odium, quod execrabile in Nobiles gerant, ipsos contra illos armasse: quid igitur illos perpetuis hostibus suis quod ægrius sit, facere posse; quam ut tantas illis impositas injurias, domibus direptis, nonnullis eorum cæsis, ad necessitatem patriæ relinquendæ adactis, illis invitis, inultas ferant? longe hoc gravius vulnus, & acriorem doloris morsum in illorum animis fore, quam has ipsas injurias, ac damna perpeffa. Redirent vero in patriam actutum Nobiles, ad jucundum spectaculum oculis fruendum: quid contra, illis jucundius facturos, quam, certa impunitate ultro oblata neglecta ac repudiata, sese suppliciis suis, quæ ipsos, nisi relipiscant, certa maneat, crimina lucentes, iis ipsis, quos læserint, inspectandos præbere; temeritatem exprobrantibus, ipforumque ærumni superbo ludibrio insultantibus? qua oratione cum nihil obstinatas imperitæ multitudinis mentes moverent; ad jurgiaque & clamores res venisset, parumque abesset, quin ad ferrum quoque exarderet; Tribuni, ad imminens certaminis periculum discutiendum, ad præceptum consilium animum adjecerunt; quod illico effectum habuit: plebs enim, occulto illorum suasu, Paulum Novium, de suo corpore hominem, Ducem creavit; humili quidem loco ortum, ac sordido & pudendo fullonica quæstu vitam tolerante, ceterum animo egregio, quem statim tanto fastigio æquavit; ac mente integra, & casta, atque ab omni forde libera, & adversus corruptiones, quibus sæpe à Gallis tentatus est, invicta; in causâque populi illi commissâ acriter tuenda constanti virtute: quæ res Regi nuntiata, iram & indignationem jam commotam auxerunt: quam etiam Nobilium Factio & Cæsar ipse mire inflammavit: illi, cum Regi demonstrassent, populum, insignibus Regis ex locis publicis dejectis, in eorum locum Cæsariana insignia posuisse; tamquam significantes eam urbem Imperii cameram, ut vocant, esse: hic, cum vehementer per litteras & Oratorem suum, Regem Genuensibus placare studuisset, atque ab armis civitati inferendis magnopere revocasset, auctoritatis suæ partes, pro jure sacri Imperii, in rebus componendis professus: quo officio, quaque Cæsaris contentione graviter Genuenses apud Regem offenderunt; tamquam ipsi in Cæsaris opem confugissent, cujus verecundia illi injecta ipsum ab incepto deterrent; summumque hoc beneficium belli à se amoti Cæsari potius, quam ipsius benignitati & clementiæ deberent: igitur, copiis ac reliquis apparatibus auctis, itineri tandem se dedit; Alpibusque superatis, Hastam venit.

Interea Genuæ aluerant & provexerant audaciam & temeritatem plebis felices per eos dies in ora Orientali successus: in quam sub adventum Regis in Italiam, Joannes Ludovicus, ut viam regis cœptis præmuniret, Hieronymum filium, unaque Emanuelem Fliscum, cum tribus peditum millibus, atque ala equitum, misit: qui cum Rapallum opidum tenuissent, indeque profecti Reccum versus iter cepissent, obvias in itinere habuerunt copias à Paulo Duce missas, à quibus fusi fugatique sunt: eadem hora Orlandinus Fliscus, qui Reccum venerat, cum audisset Fliscos suos ab urbanis fufos; ipse quoque fortuna pugnae prius modice tentata, fugam cepit: quibus successibus Dux & Tribuni animos sustulerunt, sese ad defendendum præparantes: Finariensisque Cardina-

lis monita auribus non admittentes, per crebras litteras & nuncios, illos ad meliorem mentem se convertendos, & ad pacem ac veniam à Rege petendam subinde hortantis, Porciferanos ad focum comburendum per totam eam regionem, Serravallem usque & Savinionem mittunt; ut inopiam exercitus aggravarent: ad hoc arcem Castellatium vocatam, in cacumine montis urbi imminenti sitam, quæ exiguo Gallorum præsidio tenebatur, deditione ab illis facta, in potestatem redigunt: castelloque in Promontorio in caput Phari vergente, Riparolo & Sancto Petro arenæ (hæc sunt vicorum nomina) interjecto, per quod adscensus est ad Castellatium, ædificato, ut iter hosti intercluderent; quod ab ea parte ad urbem brevius est, quam per inferiorem viam sancti Petri arenæ mari contiguam; arcem Castellatium oppugnare, bombardisque statutis verberare instituunt; ignaviam & desidiam primariis civibus exprobrantes, quam simulatione prudentiæ tegant; qui domi latentes consilia à communi causâ separent, civitatemque, quantum in ipsis esset, hosti prodant: quæ, si ipsi studia sua cum ceteris conjungant, acriterque in causâ versentur, facile defendi possit: quid enim tandem, dempto hoc regii nominis fulgore, ad metum tam terribile proponi? omnibus enim saltibus & angustiis itineris ad urbem ferentis, vel parvo præsidio infestis, quo modo copias regias penetraturas? aut vero quo modo Regem, si Genuenses non segniter & cunctanter agere intellexerit, omnesque unanimes ad libertatem suam defendendam animos & corpora præparare; sese atque exercitum in tantum discrimen dare, atque in perangustas valles altissimis undique cinctas montibus, inter omnia inimica & infesta, demittere ausurum? seque iis locis includere, unde, omnibus aditibus parvo obice clausis, nulla sit evadendi spes: ipsique, atque omnibus, qui cum illo fuerint, fame sit pereundum? omnem spem Regis esse in discordiis civium: quam si Genuenses concordem illi adimant, profecto factum iri, ut ab illis bellum abstineat: neque alia de causâ putandum, Cardinalem Ferrariensem ipsos, tot aliis super alium nunciis & litteris, ad pacem & obedientiam hortari; quam difficultatum conscientia, quodque successibus diffidant Galli: ceterum sapientium istorum, qui se à ceteris segregarunt, consilium non magis exitu in utramque fortunam lætum, quam susceptu pravum fore: si enim Galli Genuam subjunxerint; parem omnium conditionem fore; neque illos eximios Regi futuros: at, si Genuenses, id quod sperandum sit, vicerint; omne servatæ libertatis decus penes multitudinem, quam ipsi despiciant, fore: quæ armata, discriminibus suis illius vindex & assertrix fuerit.

Dum ea summo cum ardore Genuæ à populo geruntur, Rex Hasta movit; qui per Burgum Furnariorum, & Serravallem iter faciens, cum Genuensibus finibus appropinquasset; statim signa apparere cœperunt, quam leviter fundata sint imperitæ multitudinis consilia, in discriminibus absentibus contemnendis ferocis, in presentibus subeundis ignavæ: sexcentorum enim armatorum statio, quæ primas angustias infederat, ad aspectum adventantis regii exercitus, vix prima pugna tentata, turpiter se in fugam conjicit: quod exemplum ceteri secuti, ipsi quoque, locis ac saltibus, quibus præsidio erant, relictis, in urbem se recipiunt: magna Porciferanorum multitudine illos sequente: quæ res ingentem trepidationem Genuæ fecit; ut præ metu homines vix mentis compotes essent, confusaque agrestium & urbanorum multitudo passim discurrerent, quæque cariora quisque habebat, vicino suo custodienda daret: tamquam alienæ magis quam suæ domui confi-

confideret, alterque alteri salutem & fortunas suas commendaret, ac ne ope & consilio suo se deficerent, pro amicitia orarent; velut plus animi ac roboris unusquisque in altero quam in se putaret: at Tribuni, quique rebus praeerant, Porciferanos in vacuas domos Nobilium distribuerunt; viarumque ostia ceteri omnis consilii inopes transversis trabibus & catenis obferare instituunt: cum, vulgus, omiſſa rerum publicarum cura, sibi quisque privatim consulens, faxis ac telis, quaecumque ad manus fuerunt, comportatis domum suam muniret, quasi privati parietes, quam moenia urbis, tutiores ac tectiores ad hostilem impetum illos facturi essent.

At Rex, libero transitu sibi dato, quam rem per tot saltuum angustias, totque artas semitas, itineraque ardua, aspera, confragosa, magnorum certaminum fore timuerat, jugis superatis, in inferiora descendit; atque in eo loco paullisper subſtitit, qui in duo itinera ſecatur: quorum alterum in vallem Porciferæ, alterum in vallem Bifamnis fert; cum, reliquis copiis ultra jugum ſubſiſtere juffis, multitudine potius ceterorum inopia aggravante, quam vires adjuvante, octingentos tantummodo cataphractos, ac mille quingentos levis armaturæ equites, duodecimque millia peditum, dimidium Helvetios, dimidium aliarum nationum, duceret; ingenti vi Nobilitatis Gallæ, atque egregia Nobilium Mediolanensium cohorte ſtipatus; Marchione Mantuano comitante, quem in magno pretio habebat, magnoque honoris titulo auxerat, præfectura Ordinis ſancti Michaelis illi donata, ac vexillo tradito; qui honos multis ab eo tempore annis poſt obitum Ludovici undecimi nemini omnino habitus fuerat. Rex poſtero die Riparolum vicum uſque perrexit, quod ab urbe trium millium paſſuum diſtat intervallo: eodemque die exercitus in caſtellum, quod in Promontorio ſupra ædificatum diximus, à Chiamontio erectus eſt: cum octo armatorum millia ex urbe prodiſſent, atque in colle caſtello excitato ſuperſtante conſtituiſſent, Jacobo Corſo Duce rerum militarium ſatis perito, Tarlatini Vicario; qui neque via maritima ob adverſas tempeſtates, neque terreſtri à Gallis impedita, qui omnem Occidentis oram occupant, Genuam redire potuerat. Harum copiarum major pars, Gallis collem conſcendentibus, in locum paullo inferiorem deſcendit, atque in tumulto quodam conſtitit, ſatis ferocem virium fiduciam præferens, loci præſidio tuta: adverſus quos Chiamontius genus hominum potius contemnens, quos maxima ex parte opifices & ſellularios eſſe, ac minime aptos militiæ crederet, quam multitudine & loco iniquo, quo ſubeundum erat, deterriſus, egregiam Nobilium cohortem, ac non exiguam fortium virorum manum mittit: quorum impetum Genuenſes intrepide ſuſtinerunt; acrique commiſſo prælio, Galli haud levia detrimenta accipiebant: loci iniquitate illos premente, ac ſuperne emiſſis telis graviter accidentibus: quam rem conſpicatus Chiamontius, duas bombardas protinus eo trahi jubet: quæ ſtatutæ, lateraque Genuenſium inceſſantes, illos coegerunt, locum quem ad eam horam conſtantiffime atque intrepide tutati fuerant, deſerere, & in ſuperiora ad ſuos, quos reliquerant, ſe recipere; Gallis illos ſequentibus & ordines ſervantibus: quorum diſceſſu conſpecto, ii, qui erant in caſtelli præſidio, metu, ne, Gallis ſe inter exercitum & caſtellum inſinuantibus, interciperentur; hoſte non exſpectato, turpiter caſtellum deſerunt: quorum fuga animadverſa, ii, qui in tumulto reliqui erant, iter ſe in ſuperiora recipiendi interceptum cernentes, per devias & præcípites vias, multis ex ſuis deſideratis, in urbem ſe recipiunt: quo infelici rerum ſucceſſu civitate mœrore &

A luſtu conſternata Oratores ad Regem miſſi ſunt, Stephanus Juſtinianus & Baptiſta Rapallus, ad civitatem aliquibus conditionibus dedendam: qui in conſpectum Regis non admiſſi, à Rothomagenſi Cardinali auditi ſunt. Is brevi reſponſo orationem illis præcidit: non aliter illos accepturum Regem, quam de ſe, fuiſſeque omnibus, ac tota Republica arbitrio illi permiſſo: dare autem fidem Regem, ſuam cuique privatam rem ſalvā & intactam fore. De quibus rebus dum Oratores cum Rothomagenſi agunt; ingens hominum multitudo, cui pax & compoſitio non placebat, cum omnia ultima experiri conſtituiſſent, neque à Magiſtratu retineri potuiſſent, armata ex urbe proſiliit: quæ cum cacumen, in quo ſitum eſt Caſtellatium, tenuiſſet; per dorſum montis deſcendere, caſtelloque appropinquare cœpit; ferocem ſpeciem præbentes, illud recuperare tendentium, ac certamen non detrectantium: quibus exercitus pars ſeſe oppoſuit; acreque prælium commiſſum eſt, quod tres continentes horas duravit: tandemque urbani in ſpem irritam ſe laborare intelligentes, fortuna pugnæ neutro inclinata, ſe in cacumen Caſtellatii recipiunt: cum toto temporis ſpatio, quo pugnatum eſt, Rex majorem aliquem metum veritus, in eo ſpatio, quod C amni & caltris interjectum erat, in equo, Nobilium globo atque exercitus robore latera cingente, armatus conſtituiſſet: ceterum, cum Oratores in urbem reverſi legationem renunciaſſent; nox, quæ inſecuta eſt, quæque diem deditionis faciendæ anteceſſit, tota inter flebiles queſtus patriæ caſum lamentantium, ac ſe, natos, fortunas ſuas miſerantium, atque incertorum, quo ira & indignatio Regis evaſura eſſet, traducta eſt: cum matronæ, atque omnis puerilis ætas linteis induti, ac ramos olæ præferentes per omnia templa vagi pacem divini Numinis ſupplicibus precibus ac lacrymis expoſcerent. At Dux, iique, qui D eorum admiſſorum ſibi conſcii erant, quæ omnem ſpem veniæ adimerent; fide primariorum civium, ac potentium, & ſplendidiorum familiarum multum accuſata; illorumque caput exſecrati, qui in medio curſu eorum conſiliorum, quorum ipſi met fuiſſent auctores, mediæ ac tenuis fortis homines graviter & ſtrenue in cauſſa verſantes, per ſummam perfidiam deſeruerint; neque id mirum eſſe, quippe qui ad illud conſilium non ſtudio communis libertatis, ut par fuerat, ſed privata ambitione impulſi deſcenderint, ſperantes ſeſe, Nobilibus deſectis, ſolos regnaturos; cui conſilio cum non ſucceſſerit, tum vero cum amiſſa ſpe dominandi, fidem ſimul deſeruiſſe, conſiliaque à reliquis civibus ſegregaviſſe; atque à Rege jam tum, cum Haſtæ adhuc eſſet, veniam ſibi & incolumitatem pactos (ea enim fama manarat) reliquos ſuppliciiſus macerandos prodidiſſe: iis igitur atque ejuſmodi multis in illos aſpere inveſti, urbe excedentes Piſas verſus iter capiunt: poſtero die iidem Oratores ad Regem redierunt, juſſi, in quaſcumque conditiones poſſent, rem tranſigere: deditioque Regi facta eſt: qui veritus, ut Helvetii, iique, qui voluntariam militiam profitebantur, contineri ab urbe diripienda poſſent, portam urbis ac circumjecta editiora loca validis Gallorum ſtationibus firmat, quæ ab aditu urbis Helvetios prohibeant. Chiamontiusque, prius egregio præſidio in Caſtellatium introducto, cum magna reliquarum copiarum parte urbem eſt ingreſſus: qui arma & tela omnia à Genuenſibus conditionem ſuam animo ingemiſcentibus tradita in arcem Caſtelletum comportari juſſit. Poſtero die Rex ipſe armatus, ac nudatum gladium ſtringens iter ad urbem cepit: cui ſummus Magiſtratus cum quadraginta civibus ex longe primariis uſque ad divi Theodori

obviam processit : qui humi supplices procubuerunt; Stephanusque Justinianus, cui non quidem ætate, ceterum ingenii & consilii fama antecedenti illud negotium datum est, in hanc sententiam locutus fertur : *Si hostilem animum in te gerentes, celsissime Rex, atque odio imperii tui à te defecissemus; essentque ideo, qui nos nulla prorsus venia dignos censerent; at tu indignus tamen esses, qui illam suppliciter petentibus negares; cuique maiorem vim adhiberet, maioremque ulciscendi cupiditatem injiceret injuriarum tibi factarum recordatio, quam parcendi, Christianissimi Regis augustissimum nomen: cui nihil absconum tibi est faciendum; sed cogitandum, quam à sapientia & contestata pietate tua alienum sit, quam professionem præ ceteris Regibus insigni titulo refers, non eandem factis quoque exprimere; cuius nullum præceptum enisus est, quam injurias non modo veniam petentibus, sed porro ledere pergentibus dimittere: ceterum nihil tale nos initio horum motuum cogitasse, vel ea sit fides, quod Vicarios tuos in urbe retinuimus, omni honore & reverentia obedienter coluimus, nihilque, nisi illis auctoribus, publice tentavimus; ac legem de duabus tertiis munerum publicorum & magistratuum partibus, quod unum esset remedium ad Nobilitatis fastum & arrogantiam comprimendam, non nos tulimus, sed à Vicariis ipsis tuis impetravimus, à te ipso postea, re diligenter cognita, approbatam. Hic petimus a te, Rex; ne, quæ adhuc diximus, ac mox dicturi sumus, ea putes nos ad elevandam culpam nostram, ac noxam à nobis amovendam, aut ad meritum & beneficium tuum, si nobis ignoscendum statueris, extenuandum pronunciare: agnoscimus peccatum, defectionem fatemur, poenas commeritas non inficiamur: ceterum in eam sententiam disputare nos putes; ut ea, quæ consecuta sunt, non tam voluntati nostræ, quam temporibus & casibus assignanda doceamus; neque ullo nostro in te odio, aut malevolentia, aut consilio ab imperio tuo nos eximendi ductos ea admisisse; sed studiis partium abreptos, sed ardore contentionis cecatos, sed impetu animi precipites actos; non satis cogitasse, an simul, cum cupiditate Nobilium arrogantiam cohibendi, te quoque offenderemus. Non in rebus æstimandis, Rex, sapientes & graves viri tam res suis ipsas momentis ponderare solent, quam voluntatem facientium spectare: ac proinde ut illa fuerit, ita de rebus existimare. Multa sæpe filii in parentes, multa in Deum ipsum immortalem homines peccant, pietatisque jura prosterunt, animi libidini obsequentes; qui, si ad meliorem mentem conversi veniam petant, cupide in gratiam recipiuntur: non enim animo se divine legi, aut parentum obedientia subtrahendi peccarunt; sed quo cupiditatum astus ferebat, eo se abripi passi sunt: eadem adversus te, Rex, causa nostra est; qui nunquam, mente sedata, te ledere cogitavimus; eadem tot motibus & perturbationibus agitata, quo nos dimitteremus, parum consideravimus: peccatumque nostrum, quod grave fatemur, non voluntatis, neque cogitata rationis, sed precipitis animi fuit: quem si in gravibus & sapientibus viris cohibere arduum est; quanto eundem in imperita & concitata multitudine regere difficilius est? id quod nos ipsi sæpe experti sumus; qui omnia summa fecimus, omnique dimicatione pugnavimus, ut ab ea mente plebem abduceremus: semperque auctores fuimus, voluntatem & iussa tua odiis ac studiis nostris prævertendi: ut, si separare causam nostram à cetera civitate velimus, ac, nihil nos in te, quamobrem nobis succenseas, admisisse, contendamus; æquitatis tua fuerit, defensionem nostram auribus admittere: ceterum non est in animo, hoc facere; neque eximii tibi esse cupimus, aut precipuum aliquod jus nobis postulamus; eandemque nostram, quam universæ civitatis, fortunam esse volumus: cui, omni juris disputatione omissa, in tuam misericordiam confugienti, tibi supplici & ad genua advoluta, si ignoscendum duxeris, maiorem tibi gloriam servata, quam victa pepereris: quippe quod hoc magna ex parte fortuna & aliorum, illud virtutis ac totum tuum sit.*

Flexibile iras supplex oratio dicitur; statimque

A animi regii mitigati signa apparuerunt: gladio condito, ac magistratu, ac reliquis consurgere iussis: quibus præcedentibus, Rex sub uranisco urbem ingressus, omnium primum templum maximum adit: in quo obfusa miserabilis species virginum, atque innocentis ætatis manus, & ramos oleæ ad Regem tendentium, atque humi prostratorum, misericordiam flebilibus precibus implorantium, vehementer illum commovit: qui in prætorium divertit; jugisque multis in urbis locis statutis, nonnullos facinoribus & sceleribus inquinatos suspendi iussit: secundum ea consilium universæ civitatis convocatum est: in quo magistratuum & munerum distributio ad veterem formam dimidiæ partis redacta, nihil popularibus repugnantibus; Gal-
B lis vero nimiam popularium facilitatem mirantibus atque iridentibus: qui rem tanta dimicatione impetratam, nulla vi adhibita, temere profunderent: secundum ea suggestum in area prætorii duorum cubitorum altitudinis exstructum est, pretiosa stragula instratum; alterum angustius illi superpositum, textili aureo contextum: in eo sella erat, in qua Rex sub uranisco confedit, quinque Cardinalibus, magnaque Principum, & Procerum, ac Legatorum turba stipatus: quibus inspectantibus, Magistratus urbis venerabundi procumbentes, veniam petunt, impetrantque: nonnullis exceptis, quorum audacia insignior fuerat, quorumque nomina de scripto recitata sunt: quibus tamen Rex facultatem fecit, causam, si vellent, dicendi, ac sese à criminibus, quibus infimulabantur, purgandi: ut appareat, aliorum potius instinctu, quam sua sponte Regem ad eos damnandos descendisse: ad hoc civitatem trecentis millibus aureorum nummum damnavit: de qua tamen summa facile exoratus centum millia remisit; die solutionis in quartum decimum mensem præstituta: præter quadraginta millia, quæ præsentia numerata sunt: præsidium ducentis stipendiariis auxit, ac triremibus tribus, quas perpetuo ad urbis & oræ Ligusticæ custodiam armatas esse voluit: accessit triste spectaculum rerum ex circumjectis villis: quas voluntariam militiam professi, qui à diripienda urbe prohibiti fuerant, diripuerunt; per mediam urbem sub oculis ipsorum Dominorum res suas cognoscentium, neque hiscere, aut vocem libertatis memorem mittere audentium, ab iis ipsis prædonibus per alteram urbis portarum ingressis, adversamque petentibus asportatarum: quæ tamen omnia quamquam miserabilia erant, ac non nihil pungebant, levius tamen ferebantur: illa duo alte in sensus hominum lugentium & mœrentium, non modo libertatem, sed omnem illius speciem amissam, penetrarunt: liber conventorum & foederum cum Rege ictorum palam combustus; atque arx, tamquam perpetuæ Genuensium compedes, ædificari iussa in altero portus cornu: à quo præcelsus ac peramplus scopulus atque undique abscissus prominens, quem caput Phari appellant, in mare longe excurrit, à quo totus fere circumluitur: perexiguum illud spatium, quo terræ conjungitur, præalto terræ hiatu, duabus præruptis rupibus interjectis, ab ea abscinditur; ut nullus sit ad illum, invitis iis, qui scopulum teneant, accessus. In hoc scopulo arx ædificata
F est, totum scopuli ambitum munimento suo amplexa: quæ arx inexpugnabilis omnino est, ne cuniculis quidem obnoxia: & duritia filicis repugante; & quod subeuntia navigia telis & lapidibus superne devolutis, quorum recta regione venientium gravissimus ictus est, sese perfringenda, hominesque superstantes proterendos obijciant. Hanc arcem qui tenet, is Genuam maritimis comœtibus, quibus ea urbs alitur, clausam & arcta obfidione pressam habet: hujus igitur arcis mercede, sua sibi Genuensibus insania stetit; quæ non magis

gis populi, à quo se Gallus ejectum videri voluit; quam Nobilium quoque Factionis, quæ illum accersierat, simulque cum illo arma tulerat, cervicibus imposita est: quæ res documento erit, qua fructus spe, in intestinis discordiis, externa auxilia adversus civem ac domesticum inimicum quaerantur.

Rebus Genuensibus constitutis; Magistratuque quattuor civium, qui de furtis & rapinis factis quaerent; aliis item quattuor, qui in eos, qui pecunias publicas tractant, inquirerent, creatis; discessit: cum prius de Demetrio Justiniano, spectato ac fama prudentiæ claro cive, capitale supplicium sumpsisset: ædesque Pauli Novii Ducis, ac Pauli Baptistæ Justiniani complanari iussisset: cuius Pauli tristis & miserabilis casus fuit; qui per multis Italiæ locis pervagatus, cum tandem Pisas venisset, ex eaque urbe conscendens Romam peteret, captus fuit à Corsetto quodam ordinum ductore, qui sub ipso militaverat; atque Petro Joanni regiæ classis præfecto pretio octingentorum aureorum nummum traditus: qui Genuam adductus, in area prætorii, jussu Regis, securi percussus est; ea illa ipsa plebe, quæ hominem ad tantum fastigium extulerat, quæ illum omnibus effusæ voluntatis studiis, omnique venerationis sanctitate coluerat, inspectante ac nihil movente; nemineque vocem mittere audente: ejus exanime corpus in quattuor frustra discerptum est, quæ super urbis portis suspensa sunt; caputque hasta præfixum in summa prætorii turri statutum. Illud quoque haud mediocriter animos commovit; quod Rex nummum insigni suo, veteri civitatis signo omisso, in posterum signari iussit; ut servitium testatius orbi esset: quæ omnia à Genuensibus mœrentibus ac conditionem suam ingemiscientibus, obedienter tamen facta sunt: ceterum propior erat dolor immanis pecuniarum summæ, qua civitas damnata fuerat, persolvendæ. Rem novam ad onus aliqua ex parte levandum commenti sunt: pondus enim argentei nummi imminutum est, & pretium auctum.

Eo anno Ferdinandus Hispaniæ Rex Neapoli profectus, Hispaniam repetens, ad oram Genuensem appulit; adversaque tempestate portum Genuensem, contra, quam animo destinarat, subire coactus est, honorifice & amanter acceptus: cui etiam, honoris causâ, quattuor Legati ex primoribus civitatis, ad extremos fines, obviam missi sunt: cum primum per tempestatem licuit, portu Genuensi cum viginti triremibus solvens, Saonam se contulit: ubi Gallus Rex illum præstolabatur: qui ad omnem suspicionem detestandam, candoremque animi præferendum, scapha conscensa, appropinquanti obviam exiit, ac cum tribus tantummodo comitibus triremem regiam conscendit: nec minora fiduciæ signa dedit Hispanus, urbem Saonam ditionis Gallicæ ingressus, seque potestati Regis Galli committens. Magna fuit ejus congressus species, duorum videlicet in terris potentissimorum Regum, quique Europæ res potentia & auctoritate sua, suisque consiliis traherent; magna Principum & Procerum turba, omnique fere regnorum suorum Nobilitate stipatorum; magnosque ea res hominum concursus fecit ad insigne spectaculum oculis fruendum: admirationi in primis erat gratia ex tantis inimiciis, tantisque odiorum causis subito conciliata; quam augebant effusæ inter se voluntatis assidue ab utroque edita signa, cum familiariter & peramanter una essent: quibus rebus Christianum orbem in spem diurnæ quietis & tranquillitatis erexerunt; cum omnes illud amicitiae & pacis foedus sanctissimum ac sempiternum fore judicarent; quod non per Legatos & internuncios, sed inter eos ipsos Reges inter sacra hospitalia ictum

A esset: ceterum eventus concitatæ spei contrarius docuit, quam parum stabili gratia amicitiae Regum inter se nitantur; quamque parum sincera sit foederum fides: dum Reges jus, fas, jurisjurandi religionem, pudorem, hominum sermones, divini Numinis foederum testis ultricem iram, ac quidquid sancti inter mortales est, præ impotenti regnandi cupiditate leviter ducunt. Rebus omnibus transactis, Reges in sua quisque discedunt: cum Gallus multis blandimentis mœrorem civitatis lenisisset; pretio domorum arci Castelletto circumjectarum, quas præfectus injuste diruerat, Dominis persoluto; sacro sudario effigie Christi Domini impressa venerabili, quod Genuenses religiose in æde divi Barptolomæi adservabant, ejusdem præfecti opera ablato, unaque cum ejusdem divi pede in Galliam transmissio, civitati restituto & in antiquam sedem reposito; postulatis Saonenfium, juribus, ac dignitati imperioque populi Genuensis prægravibus, rejectis.

Ceterum nihil gratius fuit, quam Rodulfus Lanioius civitati cum summo imperio præfectus; vir justus ac sanctus, & in omnibus officii gradibus caste & integre servandis in primis diligens. Hujus viri multa eximia extiterunt, in rebus lapsis restituendis, civitatisque quiete constituenda: nam civitatem, omnemque Genuensem ditionem facinorosis hominibus, seditiosis, ac vitam latrocinii, rapinis, maleficiis tolerare solitis purgavit; partim merito supplicio affectis, partim in exsiliū actis: & prætorianorum ceterorumque stipendiariarum licentiam ab injuriis faciendis, pudicitia mulierum tentanda, aliisque maleficiis admittendis, severitate poenarum cohibuit; cum nullus esset ignoscendi locus apud hominem precibus inexorabilem; omnes denique civitatis partes ad bonam frugem egregia disciplina conformavit: quæ non modo, ipso res regente, sed ad multum tempus viruit ac viguit: ut multis ab eo tempore annis, majore quiete, tranquillioreque rerum statu numquam Genuenses usi sint; regiumque servitium civitati in bonum vertisse vulgo gauderent. Tantorum meritorum gratiam præclaro fine conclusit, ipsi perhonorifico, ceterum Genuensibus lugubri, quos tanto rectore orbavit: nam, cum in controversia cum Saonenfibus, qui cladibus Genuensium animos sustulerant, atque consueta onera & tributa solvere recusabant, judex à Rege datus, causâ cognita, secundum Genuenses judicium tulisset; offensus nonnullorum civium Genuensium importunitate, qui non veriti essent contra patriæ jura, Saonenfibus favore suo adesse; asperis verbis in illorum projectam impudentiam, ne diceret perfidiam, palam investus; cum vitia civitatis virtute sua superiora ferre non posset; neque celsum ingenium, atque ab omni labe integrum, inter corrupta omnia libidine, ambitione, avaritia principum civitatis, privatis compendiis ac cupiditatibus servientium, præque illis bonum & dignitatem publicam contemnentium, versari; facultate à Rege tandem impetrata urbem reliquit, bonis lugentibus: munusque & procurationem sponte ab se abjudicatam Francisco Roccaoardæ, longe diversi ingenii viro, successiori tradidit: cum non plus annum Genuæ fuisset, qui fuit ejus sæculi octavus.

Insequens annus nihil memorabile habet præter multiplicem ac civitati perutilem, simulque speciosam operam Ædiliū, quos Patres communis appellant; aquæductibus multis in locis resectis, lanienis, quæ in celebribus urbis locis tetro odore suo offendeabant, in loca remotiora translatis, arcibus ac plateis publicis resectis, ac lateribus coctis stratis: quæ res salubriorem civitatem, illiusque ad spectum speciosorem fecit; ingenti immanium taxorum ac scopulorum vi mole communita, fundamen-

damentisque illi augendæ jactis : quæ maxima est impensæ & laboris pars : ut digni sint , quorum nomen in obscuritate non lateat : fuerunt igitur , Joannes Ambrosius Nigronius , Sorleo Lomellianus , Bernardus Francus Julia , Baptista Botius , Anastasii cujusdam Siculi architecti opera usi : quattuor item ingentes corbitæ civitatis impensis & stipendiis armatæ sunt ; ac Regi in usum belli missæ , quod ipse & foederati cum Venetis gerebant ; quod bellum illos in extremas angustias adduxit.

A.C. 1510. Insequenti anno novæ discordiarum causæ inter Julium Pontificem & Gallos exortæ sunt : quos Julius , cum Venetis ex tantis inimiciis in gratiam receptis fœdere icto , cum bello persequi decrevisset ; novi motus in Liguria atque in ipsa urbe Genua excitati sunt. Marcus Antonius enim Columna , unaque cum illo Janus & Octavianus Fulgosi , missu Pontificis , in agrum Lunensem venerunt : cum quibus Hieronymus Lazari filius , & Nicolaus Auria Genua profecti , mox se conjunxerunt ; Spediamque celebre portus Lunensis emporium defensoribus vacuum occuparunt ; cum undecim triremes Venetorum , unaque Pontificia , cui præerat Balthasar Biaffia , eodem tempore oræ Genuensi essent illatæ ; multosque mortales ad arma contra Gallos capienda concitassent : ceterum civitatis constans in Regem fides exstaret , magna vi pecuniis summo cum civitatis consensu coacta : cum in consilio universæ civitatis ex trecentis suffragiis , novem tantummodo repugnantia inventa sint , prævalidaque classe illico instructa , quattuor myoparonum , quos *galliones* vocant , duarumque ingentium onerariarum , ac nonnullarum minutiorum navium longarum , quæ additæ sunt ad classem Gallorum sex triremium , uniusque myoparonis , ac navis fratris Berardini celebris nominis piratæ , quam ducebat Petrus Joannes præfectus : cujus classis fama perlata , cum etiam audiretur Factionem Adornianam adversus se consurrecturam ; Fulgosi , qui jam Reccum usque opidum processerant , Spediam repetunt : primusque ille conatus , qui fuit sub veris initium , irritus evasit : sub exitum æstatis , cum fama exiisset , Pontificem , magno Helvetiorum numero conducto , Liguriam bello terrestri ac maritimo repetiturum ; classis majore navium numero aucta & firmata est ; tredecim myoparonibus , quattuor onerariis ingentis magnitudinis , nonnullisque minutioribus navigiis additis. Initioque Septembris mensis classis Pontificia adfuit : quæ cum primo appulsu promontorium , quod Caput montium appellatur , tenuisset ; urbem prætervecta , Vada usque Sabatia perrexit , spe frustrata Helvetiorum , quos præsto se habituram sperarat : eos , stipendiis jam acceptis , Rex majoribus præmiis à Pontifice avertit , sibi que adjunxit. Interea regia & Genuensis classis , Duce Petro Joanne , adventu Pontificiæ classis cognito portu Veneris solvens , iter retro repetit : quæ cum Genuam usque processisset , ante ostium portus , Pontificia omiſſa , in ancoris stetit : cum qua tamen , in illius reditu è Vadis Sabatis , eminus bombardis tantummodo conflixit : inane igitur hoc quoque secundum inceptum fuit : sed tertius quoque conatus , quo Genua repetita est , non minus fructu caruit : cum Pontificia classis , Franco Giberto cive Genuensi præfecto , portu Veneris præterito , in quo erat regia classis , ad idem promontorium appulsa esset , & ante portum in ancoris stetisset ; nonnullis etiam armatis noctu in terram expositis , ut experiretur , ecquos motus ipsius præsentis aspectus in urbe excitaret : ceterum Genuenses in fide regia manserunt ; cum totam eam noctem in armis fuissent , assiduis bombardarum ictibus clas-

sem petentes : igitur Pontificii in spem irritam sese terere tempus intelligentes , ancoris sublati , itinere , quo venerant , retro repetito , Liburnum se recipiunt : ad quem usque portum classis regia è portu Veneris illos insecuta est : quibus omiſſis portu Veneris præsidio firmato , Genuam revertitur.

Initium insequentis anni ejus sæculi undecimi A.C. 1511. triste fuit , civium Genuensium suppliciis : nam Joannes Interianus , & Dominicus quidam à sancto Petro securi percussi sunt ; & nonnulli alii cives , quos ejusdem criminis suspicio attigit , partim ære , partim exsilio mulctati. Hieronymoque Auria Lazari filio eodem crimine quattuor virali judicio Jurisconsultorum Gallorum damnato , contumelia addita est bonorum publicorum , ac villæ in fundo , quem habebat ad Coronatæ , disturbatæ ; primumque in illo exemplum indutum est , uxoris exsilio mulctandæ. Alexander quoque Fulgosi Episcopus Abintemeliarum , partium potius quam Episcopalis professionis memor , urbem occulte ingressus est , animo Vicarium regium obruncandi , populumque in Gallos excitandi & armandi : detecta sunt consilia ab uno ex participibus munice Trebrianensi ; qui proditoris præmium , ultimum supplicium tulit , quo illico affectus est : at Episcopus fuga se periculo eripuit : qui tamen in itinere comprehensus , ac Mediolanum perductus supplicium effugit , rebus Mediolani novatis : & in Corsica consilia Rinuci à Roca res novas molientis in ipso initio , antequam quidquam moveret , oppressa sunt : ipseque Rinucius , quamquam sese in loca sentibus obfrita atque aditu difficilia recepisset , à militibus præfidiariis trucidatus.

Sub finem anni missi sunt ad Regem Legati , Francus Fliscus , Thomas Catanius , Joannes Passianus , Pantaleo Rebuffus , ad nonnulla à Rege postulanda : in primis ad Vicarii avaritiam & rapacitatem accusandam , petendumque , ut homo vulgo invisus magistratu amoveretur , alio in ejus locum missio. Omnia à Rege libenter concessa sunt , tantam obedientiam , tamque constantem fidem remunerandam censente : præter remotionem Vicarii , cum is ad causam suam defendendam affuisset : neque tamen Rex summa contentione agens , impetrare à Genuensibus potuit , ut Legatos suos ad Concilium Pisenum mitterent : re vera , ne se ac civitatem crimine defectionis à sacro sancto Romano solio , quod ipsi & Majores ipsorum semper sincera fide coluissent , obstringerent ; in speciem tamen excusantibus metum , ne bona sua toto orbe Christiano dissipata , ac commerciis implicata , prædæ occupantibus à Pontifice darentur.

Sequitur annus ejus sæculi duodecimus , qui A.C. 1512. dominatui Gallorum finem attulit ; cum res Gallicæ in Insubria ad iniqua inclinata essent , Helvetique , Sedunensis Cardinalis impulsu , in Italiam descendissent , Mediolanumque occupassent : quare Julius adjuvandam fortunam statuens , Fulgosiam Factionem iterum contra Gallos excitat : quæ cum occulte moveri sensissent Genuenses , dulcedine præsentis quietis capti , ab omnique consilio abhorrentes , quod illam turbaret ; ac propterea regium dominatum tanti boni auctorem & conservatorem toto animo amplexi ; unanimes omnia studia in illum defendendum conferunt ; quare regiis triremibus absentibus , duo peditum millia scribi decernunt ; negotio eorum cogendorum dato Hieronymo Flisco , Notho Sabaudia , Marchioni Finarii : cum à Trivultio ac Pelitia regiis Ducibus paucorum equitum & peditum subsidium frustra postulassent ; respondentibus pauculas eas copias , quæ superstites essent , præsentibus negotiis implicitas nullo modo posse immitti : ceterum , cum eorum , qui copias cogere jussi fue-

fuerant, fides suspecta esse cœpisset, tamquam Adornianis rebus occulte faventium; octo ex præstantioribus civibus electi sunt, qui omni ope studerent unanimum consensum inter cives tueri; ac capitibus Factionum, si urbi appropinquassent, aut aliquid movissent, tamquam hostibus Reipublicæ obsisterent. Janus igitur Fulgosius mense Junio, cum quinquaginta cataphractorum equitum ala, ac delecta quingentorum peditum manu, una cum fratribus ab exercitu Pontificio profectus, Liguriæ fines ingressus Clavarum venit: urbi appropinquans fecialem ad Magistratum mittit, cum litteris Sedunensis Cardinalis Legati Germaniæ & Insubriæ, ac summi exercitus fœderatorum Ducis: quibus petebat, ut Janus in urbis possessionem introduceretur: ceterum, quoniam litteræ ad Magistratum tantummodo datæ erant, sine ulla mentione regii Vicarii; prope factum est, ut fecialis jugo suspenderetur: discussum periculum est, auctoritate Magistratus Basiæ sese interponentis, ac contendentis, ne jus gentium violaretur.

At Vicarius regius, cum avaro & libidinoso Rempublicam gessisset, sentiretque se nullius voluntatem tenere; sibi ipse conscius, quæ commertus esset, imminenti procellæ se subtrahens, per speciem exeuntis urbem animi causâ, in arcem novam capitis Phari concessit: magno cum civium dolore, à quibus nullis precibus revocari in urbem potuit; cum se paratos dicerent, eo obsidum numero & genere, quos ipse delegisset, omnique alia ratione illi cavere: quod exemplum secuti Helvetii prætoriani, Jano appropinquante, comitatu impetrato, ipsi quoque urbem relinquunt; civitasque triduum sine rectore fuit, dum Janus urbem esse ingressus, paulloque post supervenit Petrus Fulgosius Baptistæ filius, cum litteris Sedunensis Cardinalis, in eandem sententiam, in quam datæ fuerunt litteræ à Jano allatæ, scriptis; petitque se rebus præfici: ceterum cives metu, ne ex competitorum contentione aliqui motus exciterentur, nihil cunctandum rati, Janum prætulērunt: qui, cum paria essent Sedunensis suffragationis momenta, propendentis in se Pontificis favore præponderavit: tertioque Kalendas Julias, universæ civitatis consensu, magna cum Fulgosianæ Factionis lætitia Dux creatus est: cujus primum opus fuit, duodecim millia aureorum nummum Sedunensi pecunias undique corroganti missa, per Joannem ab Erice Jurisconsultum, & Andream Auriam; ideo legatos, ut inopiam ærarii excusarent, si exiguam summam Sedunensis conquestus esset: omnesque curæ civitatis in arcium, à quibus civitas velut obsessa tenebatur, obsidionem & oppugnationem instruendam versæ sunt; septem bombardis ea de causâ à Pontifice missis. Vetus arx Castelletum octo diebus tripartito bombardis quasiata deditionem fecit; duodecim aureorum nummum millibus præfecto persolutis, ipsoque & præfidiariis incolumibus sub signis expansis dimissis. Majoris moliminis, diuturniorisque temporis fuit nova arx capitis Phari, ad quam oppugnatio mox translata est. Eodem anno Plebes Teici, quam Lucas Spinula possederat, in potestatem Magistratus sancti Georgii venit: ceterum classis Gallorum onerariam Hispanam mercibus Genuensium magni pretii onustam cepit; mercatoresque Genuenses, Regis jussu, à Gallia exacti sunt. Sub finem anni, quattuor Oratores Mediolanum missi sunt, ad Maximilianum Sfortiam, paternam ditionem recuperatam gratulatum, quam Principes fœderati post ingentia certamina illi restituerant.

A.C. 1513. Insequenti anno ejus sæculi tertio decimo Julius Pontifex mortuus est: quo Principe, animi magnitudine, clarissimis rebus gestis, constanti iurium Romani solii propugnatione, ditionisque

A Pontificiæ amplificatione, perpetuo Italicæ libertatis studio, nullus Pontifex multis ab hinc sæculis memorabilior fuit. Is annus Genuensibus varius, agitatus, mutationibus obnoxius in primis fuit: cujus initia egregio facinore ad omnem posteritatis memoriam insignia in primis fuerunt. Obsidebatur, ut diximus, arx nova, terra marique, quattuor magnis ac nonnullis minoribus navibus mari illam cingentibus: per ea tempora Galli in loco ab omni Genuensium scientia longe remoto, ad littora Normandiæ, prægrandem onerariam instruxerant, omni annonæ & comituum genere & copia, omnique bellico apparatu refertissimam: quæ navis tanta maris spatia à nemine conspecta emensa, cum in mare Ligusticum incolumis pervenisset, ad sextumque Idus Martias, cum civitas, ut mos est Genuensium, in speculis esset, prima luce in alto apparuisset; tumidis velis portum Genuensem petens, omnium animis expectatione suspensis, quænam ea navis esset; propinqua classi, quæ arcem obsidebat, facta, nihil hostile (neque enim verisimile erat) Navarchis suspicantibus; secundissimo flante vento, per mediam Genuensem classem, magna cum audacia prætervecta, incolumisque ad arcem appulsa, scopulo ipsi, in quo arx edificata est, applicatur; rudentibusque illi alligatur: qui tristis nuncius tota urbe vulgatus civitatem luctu opplevit: ut omnes per vias & plateas discurrentes, matronæque omnis decoris oblitæ in publicum profilientes, velut mente à sensibus alienata, aliique alios tamquam magis mentis compotes rogantes, veluti extremum urbis excidium adesset, consilii inopes trepidarent. Hic Emanuel Caballus, vir fortis ac strenuus, nauticarumque rerum in primis peritus, Ducem & Magistratum adit: *Ac non fletibus, inquit, ac questibus, Patres, imminens perpetui jugi periculum, sed virtute & audacia discutiendum est: agendum & audendum est: atque in extremis rebus, nihil est tam audax, temerarium, præceps, quod tentandum non sit. In eam rem operam meam profiteor; in meque recipio hostilem navem ab arce abstrahere: neque est consilii aut deliberationis, sed facti res: maturandum est igitur prius, quam hostis allata subsidia exponat. Jubete mihi navim, ex iis, quæ sunt in obsidione, dari: cetera mihi expedienda permitte: eam navim spero arcem salutis & libertatis nostræ fore.* Oratio Caballi magis in admirationem virtutis hominis Magistratum vertit, quam ulla effectus spe in re, quæ nullam facultatem natura sua habere videbatur, confirmavit: ceterum, quoniam in ea tentanda nihil damni fiebat, mos gestus est Caballo: cui cum egregia hominum manus, virium robore & ætate florentium, ex omnibus ordinibus se applicassent: eo agmine stipatus, inter vota & preces circumfusæ multitudinis, ire fortes ac felices jubentium, cum ad crepidinem urbis in partem à conspectu arcis aversam venisset; navim, jussu Magistratus, eo applicitam consensurus, ad juvenes, qui cum sequebantur, conversus, *Agite, inquit, egregii & fortissimi juvenes, qui socios & comites vos tanti discriminis mihi addidistis: properemus ad gloriam, quæ alterutra certa nos manet; vel patria, si votis successerit, à sempiterno servitio liberata; vel, si fatum adversum fuerit, anima memorabili charitatis in patriam exemplo illius saluti sponte devota: cum magna animorum alacritate illi succlamatum esset, navem una cum ceteris conscendit, proramque in arcem dirigit. At Galli ex arce navim prodeuntem velis datis conspicati, primo ad se venire, non credere: quam ubi ad arcem tendentem vident; mirari præceps consilium, atque hominum stultitiam, quos ultima desperatio ad certam & inevitabilem perniciem ageret, irridere: bombardisque adventantem incessere cœperunt: quarum creberrimis ictibus cum multi asseribus*

ribus resilientibus exanimarentur, multi sopirentur, invicta tamen stetit adversus tantam procel-
lam superstitum virtus & constantia: qui cum tan-
dem arci appropinquassent, ut interiores periculo
bombardarum essent; Emanuel secundo vento u-
sus, navim inter scopulum, in quo arx est, &
navim hostilem insinuavit; rudentibusque, quibus
navis terræ alligata erat, securi rescisis, latereque
suæ navis hostilis lateri applicato, in illam impi-
gre insilit: idem ceteri faciunt, Ducem sequen-
tes: Gallicque audacia obstupefacti, vix primo im-
petu sustentato prælio, mox omisso, qua cuique
expeditum fuit, se pesti subtrahere contendunt.
Maxima pars à Genuensibus capta est; pauci cum
in scapham se demississent, incolumes in proximam
arcem pervenerunt: ad quam nonnulli, qui in-
consulto pavore, ceteri omnis consilii inopes in
mare se projecerant, adnatate contendebant; quam
pauci tenuerunt: major pars vel undis hausta est,
vel missilibus supervenientibus exanimata: me-
morabileque facinus à Benedicto Justiniano ephe-
bo admissum silentio prætereundum non est: in
quo tantus ardor animi fuit, ut præfectum ipsum
hostilis navis ad arcem adnatantem conspicatus,
sefe in mare projicere non dubitarit; hominemque
assécutus, captivum ad Genuensem navim attra-
xerit. Emanuel, egregio edito facinore, una cum
capta navi ad urbem applicitus, exscensione facta,
per mediam urbem inter lætas gratulantium vo-
ces, servatoremque patriæ ac libertatis asertorem
acclamantium, eodem agmine comitatus in præ-
torium venit: quem Magistratus meritis laudibus
profecutus, donisque, honoris causa, auctum,
immunem à publicis oneribus ipsum & liberos fe-
cit: ex captivis, quicumque Ligustici nominis
sunt reperti, proditoris damnati jugo suspensi
sunt: reliqui in custodiam dati.

Per idem tempus Gallus, induciis cum Rege
Hispano factis, ingentibus pedestribus & equestri-
bus copiis Insubriam bello repetit. Massiliæque
novem triremes, ac quinque barchias, quinque
galliones, tres caravelles, nonnullas celoces arma-
vit; quæ classis portum Herculis Monæci, quem
nunc *Villa Francha* appellamus, subit: quam clas-
sem fama erat nothum Sabaudium & Hierony-
num Adornium consensuros. At Genuenses ipsi
quoque classem auxerunt: quæ fuit omnino qua-
draginta quinque navium varii generis ac magni-
tudinis: cui classi Nicolaus Auria præfectus est.
Procedebat obsidio; cum dolus Caroli cujusdam
ordinum ductoris natione Corsi emanavit: qui
pretio emptus, annonæ & aliarum rerum subsidia
subinde in arcem submittebat: comprehensus igitur,
& in vincula in arcem Castelletum datus est;
ceterum paullo post nulla alia de causa dimissus,
quam quod Ducem affinitate attingeret.

Interea, cum in Insubria Gallis omnia secunda
essent, classisque maritima appropinquare dicere-
tur; rebus suis timere Fulgosi cœperunt; Flisco-
rumque fides illis suspecta esse, verentibus, ne
occulta consilia cum Adornis haberent, de ipsis
ejiciendis, ac Gallis in urbem & in veterem domi-
natum recipiendis. In his suspicionibus incidit ca-
sus, qui animos jam commotos magis exasperaret:
venerant in prætorium tres fratres Flisci; factum-
que est, ut in multo colloquio Hieronymus ma-
ximus natu, & Jacobus Lomellinus, ex studiis
utriusque contentione, ad clamores primo, dein-
de ad jurgia & convicia venerint; postremo res
ad ferrum exarserit, gladiis ab utroque eductis:
verum interponente se Duce sedata est; cum
Fulgosinus Ducis frater aperta signa dedisset ani-
mi in Lomellinum propensioris: ceterum, cum
duo ex Fliscis fratribus prætorium nihil suspican-
tes exissent, postremus Hieronymus ipse quoque
exiit, nihil sibi cavens, ut in nulla suspecta re:

A vix pedem porta extulerat, cum idem Fulgosinus,
& Ludovicus, ac Zacharias fratres Ducis, hasti-
libus armati, hominem improvise deprehensum
circumsistunt & obtruncant; Joannemque Ambro-
sium Fliscum, qui se Hieronymo comitem addi-
derat, in ore vulnerant. At Sinibaldus & Otho-
bonus atroci casu fratris percussi, sibi que metuen-
tes, in ædes suas ad Inviolatæ se recipiunt, Ador-
norum ac populi nomen subijcientes: indeque in
arcem suam Montobium contendunt.

B His discordiarum feminibus inter Fulgosios &
Fliscos jactis, classis regia Genuam venit; atque
ante ostium portus stetit: adversus quam classis
Genuensis è portu exiit, multasque horas utraque
classis nihil movens, nulla pugna tentata, nullis
tormentis displois, altera alterius conatus specta-
bunda stetit: postridie ejus diei Antoniotus &
Hieronymus Adornii fratres ab opidis suis, cum
tribus armatorum millibus profecti, in vallem Por-
ciferæ descendunt: Janoque Duce, qui illis ob-
viam exierat, atque iis, qui erant in arcis obsidio-
ne in fugam compulsis, subsidia annonæ & cetero-
rum commeatuum in arcem introducunt; sicque
obsidio soluta est. At Janus non sibi par certamen
cum Adornis eo tempore esse intelligens, animis
civium in illos inclinatis, actuario cum fratre Ful-
golino consensu, in classem se recipit: quo eod-
em tempore Adornii fratres urbem sunt ingressi
à civibus evocati: qui, tumultu excitato, in æ-
dem divi Laurentii convenerant; cum eadem ho-
ra Flisci per averfam portam ipsi quoque, cum
magna Castellorum & ditionis suæ hominum
manu, urbem ingressi essent: paucisque post die-
bus ex litteris Regis Antoniotus urbi præfectus
est, cum titulo regii Vicarii. In prælio, quo Ja-
num ex mœnibus ab Adornis paullo ante deje-
ctum diximus, captus est Zacharias unus ex fra-
tribus Ducis, cædis Hieronymi Flisci particeps:
qui perfidia rusticani cujusdam, qui hominem fi-
de data servandum susceperat, in manum Flisco-
rum eo tempore, quo urbem ingressi sunt, tradi-
tus, illico ab armatis, qui erant cum Fliscis,
confossus est: neque satiatis Fliscis inimici morte,
exanime corpus equi cauda alligatum per urbem
raptatum est: quod atrox spectaculum animos po-
pularium misericordia & ira commovit; vulgo
fremetium, atque indignum & crudele facinus
detestantium, auctoresque execrantium. Novo
Vicario novus Baliae Magistratus additus est; quat-
torque Oratores ex civitatis principibus ad clas-
sem, quæ se in portum Lunensem ad Spediam
opidum subduxerat, missi sunt; Melchior Nigro-
nius, Ansaldus Grimaldus, Vincentius Saulius,
Augustinus Ferrarius: qui à præfecto & ceteris
primoribus postularent, ut, aliquibus honestis &
tolerabilibus conditionibus, classem in portum de-
ducerent, ac suam Reipublicæ restituerent; ipsi-
que in animum inducerent, in patriam reverti, ac
cum ceteris civibus suis in obedientiam Regis con-
sentire. Qui paullo post, nulla re confecta, in
urbem reversi sunt; cum neque in classem accepti
essent, neque eorum oratio auribus admissa: ab
opidanis quoque portus Veneris verbis male acce-
pti, ac conviciis appetiti, quin etiam haud procul
à discrimine abfuerint: per quod tempus classis
regia magna omnium necessariarum rerum subsidia
introduxit; cum à Genuensibus, qui sub obedi-
entiam redierant, parvis damnis carpendis prædisque
minutorum navigiorum ac mercium faciendis non
abstinerent. Arce firmata, regia classis Spediam
contendit; in quo portu duas triremes amisit à
classe Genuentium captas, dum ipsæ paullo in-
cautius celocem fugientem persequuntur: magna-
que remigii pars primo illo impetu obtruncata
est.

Dum ea in Liguria geruntur, Galli ingentem
& me-

& memorabilem cladem in Insabria, ad urbem Novariam, ab Helvetiis acceperunt: quo ictu regia auctoritas, & dominatus, qui ab eventibus exercitus pendebat, Genuæ concidit: qua re audita, classis e portu Lunensi extemplo solvens, Genuam venit; propeque ab urbe ante ostium torrentis Feritoris, quem Bisamnem vocant, in ancoris stetit: in qua fuerunt complures Auriæ familiæ homines, neque parvus numerus ceterorum primariorum civium, Fulgosianas partes sequentium: sub cujus adventum, classis Gallorum sese imparem Genuensi intelligens, itinere retro, quo venerat, repetito, in Galliam navigavit, civitatemque deseruit: per quod tempus auditum est, Octavianum Fulgosium, magni nominis virum, cum haud contemnendis copiis, in quibus nonnulli fuerunt Hispani, terrestri via Genuam petere. Adornii igitur & Flisci, tantis undique terra & mari circumstantibus terroribus, seseque à Gallis, quorum opibus innisi stabant, destitutos prorsus intelligentes; cum præsertim arx Castelletum cervicibus imminens à præsidio Fulgosianorum tenebatur, cum sua sponte, tum amicis suadentibus, cecedendum statuunt: quare ad quartam horam noctis sub signis & ordines servantes urbem exeunt, ac Montobium se recipiunt: eodemque tempore, qui erant in classe, exsensionem faciunt; cum primarii cives tota nocte vigilantes, atque omnes urbis partes obeuntes, plebem ac Fulgosianarum partium homines per urbem discurrentes à rapinis & maleficiis cohibendos suscepissent: posteroque die Octavianus, Petro gentili comite, cum exigua Hispanorum manu, urbem intravit; prætoriumque ingressus, oratione temporis apta animos civium ad bonam spem erexit, magnamque sui expectationem commovit: postridie consilio universæ civitatis convocato, cui interfuerunt quadringenti cives, summo omnium consensu Dux renunciatur.

Pudet me instabilitatis nostræ; cum confidero, anni curriculo civitatem nostram quater rectores & principes mutasse: ad duodecimum enim Kalendas Julias anni superioris dominatui regio finis impositus est: cui successit Janus Fulgosius Dux: quo exacto, Antoniottus Adornius principatum est adeptus, sub titulo regii Vicarii; in quo cum non plus quam duos & viginti dies fuisset, Octaviano Fulgosio adventanti cessit; qui ad quintum decimum Kalendas Julias hujus anni, nondum curriculo anni confecto, Dux creatus est: amantissimus patriæ civis, bonumque publicum privatis commoditatibus anteponeus, innocensque homo, ac memorabilis vir; memorabilior futurus, si in civitate concordia, aut in qua execrabilium partium insania non ita alte in animis civium insedisset: cui, vix inito magistratu, necessitas expressa est octoginta millia aureorum nummum Hispaniensi Vicario regio solvendi, promissorum in stipendium equitatus sæpe commodati: erogata est ea summa ex ærario sancti Georgii.

Octavianus igitur principatum adeptus omnes curas in res lapsas restituendas, afflictamque Rempublicam erigendam confert: omnium publicarum curarum caput tum erat, arcem capitis Phari cervicibus civitatis imminentem è manibus Gallorum extorquere; qua, illis potentibus, omnia consilia ad irritum recasura essent. Octavianus igitur obsidione repetita nihil eorum, quæ viam ad rem ad exitum perducendam expedirent, cura & cogitatione omittebat: cui architectus quidam oblatus est; qui magnifice sese efferens, in se recipit navigio quodam firmissimæ crassitudinis, ad machinas immensi ponderis vehendas, quod Genuenses *pontonem* vocant, machinis quibusdam ab ipso inventis contecto, copias ad radices Promontorii, in quo arx ædificata est, exponere; quæ solo, qua terrenum est, suffossio, cuniculis subtus arcem pe-

netrarent; pulvereque tormentario indito & accenso turre everterent: quod consilium etsi gravibus, & sapientibus viris, rerumque usu præditis, ipsique in primis Octaviano vanum videbatur, tamen voluntati multitudinis indulgendum statuit: quæ speciosa rei experiendæ cupiditate flagrabat: ceterum vanum inceptum evasit, navigio ingenti ictuum bombardarum vi tandem depresso: quæ res duodecim ducatorum millibus Reipublicæ stetit.

Cum maximam curarum partem obsidio arcis ad se traheret, non tamen cetera negligebantur: purgatum est igitur id portus spatium, quod inter ædem sancti Marci & pontem Cataniorum intercedit: in longitudinem quingentos & septuaginta dodrantes, in latitudinem trecentos patens; cum altitudo decem novem dodrantium esset. Multa, eaque haudquaquam levia impedimenta Octaviano per ea tempora subinde objecta sunt; quæ optimum consiliorum cursum retardare, incitatumque studium in arce oppugnanda debilitare ac frangere possent: adversus quæ omnia invicta stetit Octaviani virtus & constantia; quæ, impedimentis omnibus superatis, illum arcis tandem compotem fecerunt: nam & commercia infesta erant à Gallorum & Sarracenorum classibus per circumjecta maria discurrentibus: adversus quas quattuor triremes armatæ & emissæ sunt, Andrea Auria præfecto: & Janum Fulgosium, fama erat, Saonæ, quam ille urbem tenebat, res novas moliri; contra quem delecta trecentorum armatorum manus ab Octaviano missa est: quorum impetum ille haudquaquam expectandum ratus, fuga sua liberam ejus urbis possessionem Octaviano reliquit.

Ceterum hæc leviora & faciliora; illa major negotii moles fuit, quod Adornii, Fliscis conjunctis, exhibuerunt: qui Mediolanensis Ducis, & Helvetiorum faventium auxilio subnisi, Montobio profecti, in maritima descendentes, primo adventu Clavarum & portum Delphini opida occuparunt: adversus quos missus est ab Octaviano Nicolaus Auria, cum mille & quingentis peditibus, quem paulo post consecutus est Fridericus Archiepiscopus Salernitanus Ducis frater, cum magno numero hominum Factionis Fulgosianæ: qui, Clavaro duorum dierum oppugnatione frustra tentato, in sua se receperunt; Andrea Auria littora quam proxime poterat, legente præsidio triremium iter illis securum præbente. Nec contra minus irritum fuit Adorniorum & Fliscorum inceptum; qui Clavaro profecti, cum duobus armatorum millibus, copias urbi admoverunt; eo spatio castris occupato, quod portis Hircorum & Olivellæ interjectum est: qui cum decem dies, nulla re tentata, segne tempus trivissent, nullosque motus ipsorum adventus in urbe fecisset; castris retro raptim motis, urbem liberam reliquerunt; nonnullis bombardis, ac non exigua impedimentorum parte (ignotum, quæ tam trepidæ festinationis causa fuerit) relictis. Per idem tempus Scriba quidam Cæsaris à Gurgensi Cardinali missus Genuam venit, militum & pecuniarum subsidia in usum belli, quod Cæsar cum Venetis gerebat, postulans; qui, nulla re impetrata, discessit; cum illi demonstratum esset, nullo jure urbem Genuam erga Cæsarem ad talia obstringi.

Interea obsidio terra ac mari acriter urgebatur, cumque auditum esset, Massiliæ diligenter comparari, eodemque tempore navicula quædam onusta annona classem obsidentem venti favore præterlapsa, ipsi scopuli crepidini, in quo arx est, se applicavisset; classis initio insequentis anni, qui fuit ejus sæculi quartus decimus, numero aucta, & firmata est: quæ fuit omnino duarum ingentium onerariarum, octo triremium, septem brigantinorum, ac nonnullorum aliorum minorum navigiorum: cum etiam terrestres copię centum equitum ac non-

A. C. 1514.

nullorum peditum numero auctæ essent, ac præter hanc classem, quinque quoque naves & myoparo armatæ, quæ classi Gallorum opponerentur: ad hoc tres onerariæ & duo myoparones ad bellum armatæ adversus quemdam piratam navium Genuensium prædas agentem. Tandem obsidio arcis ad finem pervenit; Galli que sese undique cinctos & ad extrema adductos, subsidiis nusquam apparentibus, cernentes, de deditioe, muliercula quadam, quæ inter arcem & urbem commicare solebat, interprete, agere cœperunt: quæ inter cupientes in has condiciones facile convenit: *Ut, nisi ad septimum Kalendas Septembris subsidium à Gallis in arcem introductum esset, arx Duci, bombardæque, & ceteri omnes belli apparatus, qui in ea erant, traderentur: præfecto & militibus incolumibus dimissis, cui viginti duo aureorum nummum millia pro stipendiis à Rege debitis numerarentur.* In quæ observanda utrimque obsides dati sunt: à Gallis tres ex primariis Proceribus; à Genuensibus Simonettus frater Ducis, & Hieronymus Fulgosii, Franciscus Grimaldus, Martinus Bottus: cumque pactus dies venisset, subsidiaque nusquam apparuissent, arx Duci tradita est: quod egregium in patriam meritum Octavianus longe majore promerito cumlavit; præclari atque unici multis ab hinc sæculis exempli, & ad omnem posteritatem memorabilis edito facinore: arcem enim eodem die demoliri cœpit; nec prius abstitit incepto, quam tota solo æquata est: quæ res ita animos hominum affecit, ut, præ superfundente se lætitia, vix mentis compotes essent, neque à lacrymis abstinere: vulgo igitur omnis ætas ac sexus inter se libertatem tum vere recuperatam, jugumque externum discussum gratulari: tum in admirationem Octaviani versi, constantiam primo & virtutem meritis laudibus ad cælum extollere, quæ tot interposita impedimenta in arce expugnanda superavit: animi deinde magnitudinem & singularem in patriam charitatem divinis laudibus ornare; qui, cum ejus arcis præsidio opes gentis suæ Fulgosianæ Genuæ ad æternitatem posset stabilire; omnia tamen, præ patriæ amore, leviter duxerit: libertatem igitur atque omnia sua Genuenses Octaviano debere; hocque illud esse beneficium, quod perpetua memoria retinendum sit; nomenque Octaviani liberatoris & fervoris patriæ sempiterna veneratione ab omni posteritate colendum: ceterum Octaviani celsum animum, ac publici boni amantem omnes æque laudant: at factum ipsum & consilium reprehensores inveniunt; in quibus fuisse dicitur ipse frater Ducis Fredericus, vehementioris ingenii ac cupiditatibus impotentius servientis vir; quod in Octaviano mitius fuit, rectique & probi amantius; à consilio specie potius decoro, quam re, ut dictitabat, sapienti, aut patriæ utili magnopere Ducem revocare conatus: quod ut in concordia civitate animis civium boni publici studiosis probandum non negaret; ita in ea, quæ in mille Factiones distracta sit, in alte mentibus hominum insidentes, ut evelli non possint; in quaque animi civium in alia omnia magis quam in bonum publicum versi sint, arce diruenda, neque libertatem civitatis stabiliri, in qua cives longa defuetudine esse nesciant; neque tranquillitati civitatis consuli, quam Factiones assidue perturbare necesse sit: quin etiam viam magis ad turbandam quietem patefieri; ea re sublata, cujus metus homines in officio contineat: non igitur arce disturbanda impedimenta libertatis tolli; sed frenum licentiæ cum magno civitatis malo perfringi: argumento esse proxima tempora; cum, Gallis alienigenis hominibus arcem tenentibus, civitas numquam quietior fuerit; nullusque civitatis status multis ab hinc annis existerit, quo cives magis gauderent,

A neque in quo retinendo constantiores, aut magis unanimes fuerint: quid igitur inani, ac temerario, patriæque inutili consilio Octavianum assueturum, quam ut opes familiæ tanto præsidio in perpetuum firmandas evertat? viamque ad stabile ac sempiternum Genuæ imperium ducentem à fortuna patefactam, inscitia sua sibi ipse obstruat? quod imperium ut in pacata civitate, neque Factionibus depravata, à nemine bono cive est invadendum; ita in ea, quæ libertatis bona non noscat, quæque nullum ejus senium habeat; atque adeo, quæ sine Dominis esse aut nesciat, aut non possit; quæque sibi in illos sponte adsciscat: in civitate igitur ita morata, imperium ultro oblatum non esse repudiandum: quod si tu per inscitiam à te projicias, alius sit, civitate ipsa volente, occupaturus.

B Eo anno octo Oratores ad Leonem decimum, ad obedientiam deferendam, missi sunt; cujus legationis princeps fuit Joannes Baptista Lazania Jurisconsultus. Opposuit se Orator Gallus, negavitque obedientiam Genuensium Regi Gallo subjunctorum à Pontifice accipi debere, magnam ea in re Regi suo injuriam fieri dictitans, ejusque jura imminui: idque scripto testificatus est. Quæ oratione sprete, Pontifex secundum Genuenses C judicium tulit, qui libertatem, à Gallis armis ereptam, recuperassent: delatamque obedientiam accepit.

D Infesta fuerunt eodem anno maritima commercia, & à Turcis, & à Gallis: quorum illi sinum Lunensem cum septem triremibus ingressi prædas hominum & navium egerunt; hi, Periane Duce, ad littus Valentinum ingentem onerariam magni pretii mercibus onustam ceperunt: adversus eum emissæ est classis, non modo cum nullo fructu, sed cum damno quoque; duabus triremibus ad littus Dertusiæ adversa tempestate depressis: plaga quoque à Turcis accepta est; altera ex duabus triremibus, una cum duabus biremibus ad tutelam Corsicæ à Magistratu sancti Georgii armatis, simul cum Matthæo Truco præfecto classis, & Stephano Lercario Trierarcho capta, alteriusque Trierarcho Francisco Furnario interfecto.

E Eo anno Hieronymus Adornius & Scipio Fliscus, Factionum Fulgosianæ adversarum capita, facinus audax, quod à multis temerarium existimatum est, aggressi sunt. Castelletto enim, parvo & obscuri nominis Adornianæ gentis opidulo, quod est in confinibus Montisferacis, cum delecta quingentorum Itolorum manu, quorum Dux fuit Joannes Camillus quidam à Montibus Neapolitanus, iter Genuam versus capiunt, sperantes, si urbem furto intrassent, sese, Factione sua excitata; improvise adventu Fulgosianos incautos, ac solute agentes, (ut in nulla tali suspicione) oppressuros: verum cum paullo serius, quam constituerant, itineri se dedissent; seditione nullorum militum retenti, quæ prius comprimenda fuit, non ita accelerare potuerunt, ut non lux illos opprimeret in cacumine montis, in quo sita est arx Castellatium vocata, civitati imminens. Ibi paulisper addubitarunt, iter ne, quo venerant, retro esset repetendum, cum furtum insidiarum non successisset; an aliquo se abendum, ubi non conspecti posteram noctem expectarent: vicit sententia, quæ porro eundem censuit: monte igitur descendunt, ac per portam Carbonariæ, custodibus neglectam, urbem ingrediuntur; ad prætoriumque nomen Adorniorum & Catorum subjicientes, (ita appellabantur Flisci à gentilitio insigni galeæ) recta pergunt: illudque bipartito à duabus portis septi, quod arcem claudit, quarum altera ad publicas ædes Prætoris fert, invadunt; portasque refringere instituunt: strepitu exaudito, Octavianus, qui de inimico-

rum

rum consiliis certior factus, totam noctem armatus vigilarat, soleque orto, nihil luce tentaturos adversarios ratus, sese dearmarat, ac quieti dederat; statim è lecto se projicit, ac seminudus, scuto tantum tectus, ac gladium stringens è prætorio prodit; prætorianisque, ejus jussu, subito armatis, porta Ambrosiana audacter patefacta, magno impetu hostes invadit; ipsoque incurfu recentes atque integri Adornianos nocturno itinere fessos facile avertunt: quos non prius insequendi & premendi finem fecit Octavianus, quam, illis profligatis, Hieronymum, & Scipionem, nec non Neapolitanum Ducem ceperit: cum interea altera manus per portam in ædem divi Dominici versam ab Octaviano circummissa brevi circuitu, eos, qui alteram portam prætoriiis ædibus objectam oppugnabant, quibus præerat Augustinus Magnernius, à tergo adorti, ipsos quoque eodem tempore fudissent: omni igitur periculo audacia & celeritate Octaviani discussio, tumultuque sedato, Adornius & Fliscus in custodiam dati sunt.

A.C. 1515. Interea anni, qui sequitur, ejus sæculi quincti decimi initio, Franciscus Vallesius Princeps Angulefmenfis, Ludovico duodecimo, nullis sexus virilis relictis liberis, mortuo in regnum Galliarum succederat; magna cum populorum Gallicorum, atque omnium illius regni ordinum lætitia: ad præstans enim & vividum ingenium, animi magnitudinem, omnium magnarum rerum neutiquam vulgatam cognitionem, generosos spiritus, ut nihil in eo esset submissum, aut humile, nihil non amplum & sublime; accedebat summa in omnes humanitas, eximia liberalitas, ad hoc ætatis flos, egregiaque corporis forma atque oris decor: ut nihil à tot in illum naturæ & fortunæ congestis donis, nisi magnum & præclarum expectaretur: quæ virtutes, ut suorum animos ad maxima quæque speranda erexerant; ita in illis, quibus nimis Gallorum opes formidolosæ erant, quique Gallos supra modum in Italia crescere nolebant, magnas animorum commotiones fecerunt: quas ipsemet Franciscus auxit, tum titulo Ducis Mediolanensis una cum regio assumpto, tum magnis hominum & pecuniarum quotidie cogendis copiis; qui quamquam, simulatque regnum inuit, nihil antiquius habuit, quam destinata à Ludovico ad bellum Mediolanense consilia ad effectum perducere; cupiditatem tamen suam initio summa ope dissimulare studuit; ut diligentiam adversariorum in comparando, atque sese, ad inceptis obviam eundum, præparando, consopiret: ceterum, cum tanti bellici apparatus occulti esse non possent; nihilque appareret, quo vertendi essent, præter ducatum Mediolanensem; quamquam Galli alia in speciem præferre non desisterent; haud jam cunctandum rati Maximilianus Dux Mediolani, quique cum illo consentiebant, Principes, foedus incunt, Italiæ ab invadentibus Gallis defendendæ, bellicque propulsandi; necnon arma infaustis, si res poscat, contra inferendi, ad eos ab alienis petendis ad sua tutanda avertendos. Fuerunt autem, qui nomina dederunt, Cæsar Ferdinandus Aragoniæ ac Neapolis Rex, Maximilianus Dux Mediolani, Helvetii; reservatusque est Pontifici locus, ac præstituta dies foederi nomen suum adscribendi: non quod ille animi dubius esset, aut minore ardore Gallos ab Italia arcere cuperet; minusque illud foedus opibus suis juvare paratus esset, cujus immo auctor & caput fuisset; sed quod multas se causas habere putabat, animi sui contra Gallos non nudandi: ad quam rem Galli, aliis super alias legationibus missis, numquam attrahere potuerunt: cum ipse miro artificio, illorumque amicitiam simulans, perplexis responsis illos ex-

A traheret: ceterum, quo artificio alios ludificabatur, eodem ipse ab homine amicissimo Octaviano Fulgoso elusus est. Is (ut ad res nostras redeam) cum adversariorum insidiis assidue peteretur; non tam potentia sua, quamquam ne ea quidem exigua, aut contemnenda erat, quam externo auxilio formidolosus; ipse quoque validioribus præfidiis res suas communiendas ducens, inter anticipata consilia sese Gallis, an foederatis applicandi primo fluctuatus est. Ad Gallos illum inclinare hinc nimis illorum opes, sibi præsertim tam propinquæ; iis ne ipse una cum ceteris obrueretur formidare, cum omnium sæculorum usus doceret, quam parum foederibus fidendum esset; quam illa parum firmo vinculo, atque omni levi de causa solubili constricta essent: illinc suspecta foederatorum victoria, Mediolanensis animo sibi periniquo, atque in adversarios mire propenso: contra à Gallis hominem retrahere Pontificis verecundia, atque amicitia cum Juliano fratre, ac Medicia gente perpetuis ac mutuis officiis culta; multaque Mediciorum in se omnium temporum, & præsertim in ducatu acquirendo, merita; tum autem dura illa conditio Genuæ Gallorum dominatui, quo ipse illam exemisset, iterum subjungendæ; sine qua re nulla erat cum illis amicitia spes. Vicit tandem, quod utilius sibi & rerum suarum statui stabiliendo aptius & tutius visum est: foedus igitur & amicitia cum Gallis, Duce Borbonio internuncio, in has conditiones sancita est: *Regi principatus Genuæ ad veterem formulam, & in eas conditiones, quibus Galli Genuæ præerant, ante Ludovicum duodecimum, & ante librum foederum & conditionum ab illo combustum; ejus perpetuus Vicarius Genuæ esset Octavianus, cum amplissima munerum & procuratorum mandatarum potestate: præter ordinaria vicariatus emolumenta & compendia anniversaria, pensio senum millium aureorum nummum, ac quaternum Friderico fratri, ex arario regio persolverentur: arcis Castelletti possessio Regi traderetur: arcem Promontorii Phari restituere Regi ne liceret: item præfectura ala centena cataphractorum, Ordineque Michaelitano, qui tum honos, re nondum tam vulgata, apud Gallos in amplissimis erat, Octavianus donaretur.*

Suboluerant hæc consilia foederatis, quamquam omni ope ab Octaviano occultata; qui & dum ea ducuntur, & post rem transactam illam, tam constanter ipsi quoque Pontifici negavit; eamque fidem promittenti, nihil sese illo infcio facturum, habuit Pontifex; ut Mediolanensem ab illo armis petendo averterit, à quattuorque Helvetiorum millibus, quos conduxerat, cum Adornis & Fliscis in illum vertendis. At ubi, Genua Gallis tradita, res palam facta est; haud difficile fuit Octaviano animum Pontificis mitigare: epistola enim submississime scripta, cum pluribus verbis causas, quæ ipsum ad illud consilium impulsissent, persecutus esset; ac docere conatus, non aliter se rerumque suarum statum incolumem esse potuisse: *Una, inquit, res est, Pater, qua me pungat, tui offensio; in quam me dupliciter incurrisse intelligo; quod te tantopere celatum voluerim, ac rem tibi querenti & instanti obstinate negaverim; qua res te induxit, ut foederatis de me ac de fide mea prolixè promitteres, majestatemque tuam ac reverentiam, quam tibi summam debeo, ludibrio exhibuisse videar: altera offensionis causa est, quod me cum hoste ejus causa, quam tu una cum ceteris foederatis defendendam suscepisti, adversus tanta à te accepta beneficia ingratus conjungere veritus non sim. Difficilis mihi esset utriusque purgatio, adversus privatos homines; aut adversus eos Principes, qui rerum ignari publicas res privatis rationibus metiri solent: ceterum apud te omnium hujus ætatis sapientissimum Principem, gnarum, quid Principibus liceat, aut consuetum*

sit, pro principatu non modo conservando, sed etiam augendo, causam meam facilem fore spero: nam neque consilia mea tibi, quamquam animo in me amicissimo, omni reverentia à me perpetuo culto & colendo enunciare debui; quæ mihi maxime necessaria, ac sine quibus ego stare non possem, tu impedire potuisses; & vero debuisses, quod rationibus à te defendenda Italia, atque illius libertatis asserenda susceptis adversabantur: quam rem tibi caput curarum esse intelligebam; cuique te neque meam, neque cuiusque amicitiam prævertere æquum erat: & ignoscere debes, si extrema necessitate subactus ad illud consilium descenderim; ad quod ceteros Principes longe leviores causa, nemine illos reprehendente, aut factum damnante, impellere solent. Excusationem Octaviani Pontifex, quando factum mutari non poterat, aut accepit, aut accipere simulavit.

Idem habitus animorum in civibus Genuensibus fuit: quibus rem Octavianus non prius, quam transacta esset, demonstravit: nec dubitatur, quin prius edocti consilium approbaturi fuerint; quieti rerum status in Gallorum dominatu memoria nondum obliterata, neque animorum propensione in eam regiam adhuc extincta. At multis mali exempli res videri; Octavianum Ducem tantam rem privatis consiliis transegisse, civitatemque facti & consilii ignaram publico injussu extero Principi tradidisse: ceterum quod cives consulti haud retractanter facturi fuerant, factum tuendum non consulti duxerunt: princepsque Genua vexillum regium in Italia sustulit: statimque Regem pecuniarum & hominum auxiliis juvit, octoginta aureorum nummum millibus, Octaviano suadente, mutuis datis, & duobus peditum millibus per speciem Ovatae & Gavii opidorum, nonnullorumque locorum Reipublicæ recuperandorum, scriptis: quæ copiæ Nicolao Fulgoso custodiæ urbis præfecto Duce, locis nominatis recuperatis, neque segnem in bello Mediolanensi, neque inutilem operam Regi navarunt: ad quem, memorabili illa de Helvetiis parta victoria, belloque confecto, Octavianus, ad amicitiam faciendam, Mediolanum se contulit: octo Legatis illum comitantibus: Nicolao Oderico Jurisconsulto, Joanne Auria aurore militiæ Equite, Melchior Nigronio, Afranio Ufusmario, Stephano Justiniano, Baptista Lomellino, Augustino Ferrario, Augustino Majolo, ad deditionem publice faciendam missis.

A.C. 1516. Sequitur annus ejus sæculi sextus decimus, expeditione in Cortogolim celebris eo tempore nominis piratam magis, quam ulla re gesta insignis. Is viginti longarum navium varii generis præfectus decem octo onerarias Genuenses tritico onustas ceperat; infestaque commercia Genuensibus faciebat, magnis quotidie detrimentis illos afficiens. Armatae sunt igitur contra hominem decem & octo triremes; quarum duæ Pontificiæ fuerunt, quas ducebat Antonius Biasia Ligur ab opido Spedia: duæ civitatis, quibus præerat Andreas Auria; octo privatorum Genuensium civium, Sebastiani Auria, Bonifacii Lomellini, Nicolai Camillæ, Jacobi Rapalli, Matthæi Truchi, Hieronymi Furnarii, Bernardi à Domo culta, Joannis Pini, Baptistæ Delphini: sex Gallorum, quattuor Perianes, duabus frater Bernardinus præerant; tres myoparones ipsi quoque Gallorum, ac nonnulla alia minora navigia. Huic classi à Pontifice, qui magnam impensæ partem fecit, præfectus est Fridericus Archiepiscopus Salernitanus, qui vexillum Pontificium sustulit. Is è portu Genuensi solvens, Bisertam, oræ Africanæ urbem, quam Veteribus Uticam puto fuisse, tenuit; classemque Cortogolis quindecim biremium ac nonnullarum triremium in Bagrada flumine inventam defensoribus vacuum cepit, Christianosque nexos solvit, ac Bisertam circumfedit, suburbis direptis. Ducis consilium erat classem piratæ è flumine educere;

A aut si id, adverso flante vento, non posset, comburere: ceterum milites magis prædæ quam incendio faciendo intenti fuerunt: brevique Christiani inceptum omittere coacti sunt; non tam metu ingentis Afrorum multitudinis, quæ ad opem obsessæ urbi ferendam continuo accurrit; quam validi coorti venti vi inde abstracti, duabus navibus amissis, quæ flumen subierant; classeeque piratica ab incendio intacta turpiter relicta. Tunc tum vis venti Christianos compulit: qui stagnum per tenuem curipum scaphis ingressi, Mauris à terra frustra prohibere conatis, triremem Genuensem superioribus annis à Turcis captam recuperant: inde Lothophagitim insulam, quæ *Gerbis* nunc appellatur, petunt: nonnullisque biremium alveis incensis, itinere retro repetito, Genuam tandem appellant; nullo alio operæ pretio facto, quam nonnullorum minorum navigiorum, atque exiguæ prædæ Genuam adductæ. Purgatus est eo anno ab Ædilibus interior portus, ingenti purgamentorum vi egesta; alveusque in decem octo dodrantium altitudinem depressus, magnorum navigiorum capax factus est; fundamentaque turris & pontis resecta sunt; murusque interius, & exterius, ingentium saxorum substructione, firmatus.

C Duo insequentes anni nihil memorabile sane habent, præter insignem à Gallis civitati factam contumeliam: qui cum Guascis Ovata & Gavium proxime à Genuensibus recuperatas repetentibus adjudicassent; Genuensis Orator ea de causâ ad Regem missus, impudenti postulato à regis administris acceptus est; affirmantibus non aliter in Regis conspectum illum admissum iri, quam octoginta millibus aureorum nummum Regi mutuo datis: quod cum facere Genuenses recusassent, Orator re infecta Genuam rediit.

D At qui insecutus est annus, ejus sæculi decimus nonus, insignis in primis est, egregio ab Andrea Auria, atque ad omnem posteritatem memorabili, edito facinore: clarum esse coeperat hujus viri nomen; cujus impigra & indefessa fortisque opera erat in Sarracenorum rebus vexandis. Ad illum igitur opprimendum classis tredecim navium longarum, quarum una majoris formæ, tres minoris triremes fuerunt, reliquæ novem biremes, omni bellico apparatu affatim instructa, ac strenuis bellatoribus usuque navalium rerum peritis referta à Rege Tunetano comparata & armata Tuneto emissâ est. Cujus rei certior factus Auria, nihil cunctatus, duabus triremibus voluntarii remigii ad quattuor veteres coacti remigii additis, è portu Genuensi solvit: qui cum insulam Planasiam ad decimum Kalendas Majas appulisset; prima luce hostilem classem quattuor triremium, quas diximus, ac quinque biremium, plenis velis valido ac secundo flante vento in se tendentem in conspectu habuit: quare summæ amentię ratus, sese prælio non modo ob majorem navium numerum, sed ob adversum ventum tam iniquo committere; fuga simulata, iter retro repetit, hoste insequente: cumque promontorium Illuæ insulæ, quod sancti Andree vocant, tenuisset; animadvertit Turca Auria consilium non ad fugam spectare, sed superiorem conditionem in pugna querere: quare prorsus conversis, quæ in nostris simulata fuerat fuga, cam ipse veram cepit. At Auria, cum eum diem destinasset rei inter ipsum & hostem decernendæ, concitatis navibus fugientem insequi coepit, duabus ex veteribus triremibus relictis, quæ recentior armatas, ac cursum ceterarum non æquantes remulco traherent; consilio hostem morandi, dum quattuor relictæ triremes ipsum assequerentur: ceterum, res longe aliter, quam animo fore præceperat, cecidit: validus enim ventus urgens illum classi hostili ita proxime invexit, ut electionem pugnæ animo destina-

destinatam in necessitatem verterit: cum duabus igitur illis tantummodo triremibus, quas habebat, tantum discrimen subire coactus Auria, paucis suos cohortatus, ut ad impetum hostilem fortiter excipiendum animos & corpora acuerent; praelium audacter committit: cumque triremis, ac quinque hostiles biremes prætoriam, ac reliquæ tres minoris formæ triremes patronam circumstitissent; incredibili virtutis & constantiæ exemplo hostilem impressionem quartam horæ partem sustinens, spatium dedit Philippo Auria, qui reliquas quattuor triremes trahebat, se cum circumventis triremibus coniungendi, ac praelium incundi; quod ejus adventu paullatim recrudescens, atrocissimum factum est: tantoque irarum certamine, tantaque animorum constantia, ab utroque gesta res est, ut per dimidiam horam, qua totis viribus pugnatum est, nullum discrimen appareret, quo fortuna rem inclinatura esset; ac modo hi, modo illi propiores periculo essent: cum Auria nullas boni ac strenui Ducis, in providendo, occurrendo, qua laborari à suis videbat, pugna, ubi segnior erat, excitanda & restituenda, partes prætermitteret; Philippinusque in media pugna mole acriter versans duo vulnera accepisset: tandem nostris acriter connitentibus, hostilis classis superata & profligata est, sex navibus captis: cum tres biremes, beneficio potius adversæ tempestatis, quæ nostros ab illis insequendis continuit, quam virtute evasisent, totæ perfractæ ac laceratæ. Cruentum in primis utrumque praelium fuit; cum ex delecta sexcentorum Turcarum bellatorum manu, quæ, præter navales socios, classem conscendit, non plus viginti quinque superstites fuerint, reliquis omnibus cæsis; & in classe Genuensi magnus fortium virorum numerus ceciderit, major vulneratus sit; ut ingenti sanguinis effusa vi mare infectum late circa rubrum factum sit. Redeuntem victricem classem atrox tempestas adorta est: quæ illam diu jactatam tandem in portum sancti Florentii insulæ Corsicæ compulit: cujus tempestatis tanta vis fuit, ut Andreas propior pene summo discrimini ab illius impetu, quam in prælio, fuerit: qui, tranquillitate tandem reddita, itinere discriminum pleno confecto, cum sex hostilibus captis navibus, magno agmine captivorum è durissima servitute ereptorum antecedente, velut triumphans urbem est ingressus.

A.C.
1520.

Anno ejus sæculi vigesimo, Genuenses Saonenfium contumacia irritati; maritima commercia illis ademerunt; navibus eorum jussis portum Genuensem petere, portoriaque Genuæ solvere: cum, eorum suasu, Alegrius regius Vicarius Saonæ sallem, ejusque vectigal, magno cum Republicæ damno, Genuensibus ademptum, refractis cellis, sibi assumpsisset: quod tamen paullo post, jussu Regis, restituit; Hieronymo Monelia ea de causâ ad Regem missa. Insignis est hic annus Selimi Turcarum Principis longe potentissimi, magnitudinemque rerum gestarum clarissimi, ejusdemque infensissimi Christianorum hostis, & Maximiliani Cæsaris obitu; successioneque Caroli nepotis in imperium; Francisco Gallorum Rege dejecto, cujus in eo loco petendo incredibilis exarsit ambitio: at longe insignior foedere inter Leonem Pontificem & Carolum Cæsarem icto: ad quod Pontifex sese multis ac gravibus Gallorum injuriis attractum dictabat: quarum duæ illæ fuerunt insignes; quod Parmam & Placentiam Romano folio non restituerant, quodque Pontificiam jurisdictionem in Mediolanensi ditione infringere. Titulus foederis fuit, communis defensio adversus invadentes, Florentinis quoque comprehensis; ac Mediolani recuperatio, in cujus principatus possessionem Franciscus Sfortia exsul induceretur, Parma & Placentia Romano folio restituta: cum in-

At terea, dum quæ ad apertum bellum necessaria essent, comparantur, furtum insidiarum experiri placuisset; atque hinc Adornii exsules res Genuenses, illinc Franciscus Sfortia, qui cum eo erant Tridenti, Mediolanenses exsules magno numero, res Mediolanenses tentarent.

Igitur insequenti anno ejus sæculi vicefimo uno, Hieronymus Adornius, cum novem triremibus, quarum septem fuerunt Neapolitani regni, duæ Pontificiæ, in oram Ligusticam venit; qui improvise adventu Genuensi portui illatus, Octavianum & Gallos, ut in nulla suspecta re solute & negligenter agentes, opprimeret: resque tanta diligentia occultata est, ut maritimis & terrestribus itineribus clausis, per viginti dierum curriculum, magna cum omnium admiratione, nullus nunciatorum, quæ ultra fines Genuenses fierent, acceptus sit: ceterum, quæ diligentia ad celandum & consopendum Octavianum adhibita fuit, ea illum expergefecit: suspicione enim vehementi incensus vir sagax, ac rebus invigilans, sese adversus subitos nec opinatos casus munire instituit; nonnullo numero militum, præter ordinarios præfidiarios, in urbem introducto, atque ala equitum sua, quam honorariam à Rege habebat, accersita; cui in locum Ugonis Pepuli Vicarii sui, Taliarinum Auriam præfecerat; locis opportunis custodiis firmatis. Adornius igitur cum Genuensibus finibus appropinquasset, altum tenuit, ne conspiceretur: ceterum à celoce, quæ Genuam iter habebat, conspectus est: quam frustra per aliquod spatium infecutus, cum capere non potuisset, spem fallendi omisit: celox Genuam appulsa, quæ viderat, nunciavit, Octavianusque stationes auxit, custodias & vigilias diligentius agi imperavit. Vanus igitur appulsus Adornii ad Genuensem portum fuit; cum nonnulla loca urbis tentasset, copiis in terram expositis: spe igitur potiundæ urbis dejectus, oram Orientis petit; Clavarumque opidum custodiis neglectum improvise adventu occupat: quo eodem tempore terrestri itinere Antoniottus frater, cum quingentis peditibus, ad opidum Petram sanctam, ac nonnullis aliis in circumjecto agro Lunensi scriptis, pervenit: quo Clavari relicto, Hieronymus Reccum opidum petit; indeque in Occidentem navigans, prætervectus, cœnobium sancti Andree, quod tria millia passuum ab urbe distat, tenuit: adversus quem missa est delecta armatorum manus, atque equitum ala, quæ exsensus in terram prohiberent: in eoque itinere Taliarinus vulneratus à sclopi ictu, è latenti celoce emissio, accepit, ex quo paullo post decessit, classis cum consilia non successissent, itinere retro repetito, Romam versus navigavit. Adornii fratres, cum terrestribus copiis Apennino superato, cum Cæsariano exercitu, cujus Dux erat Prosper Columna, se conjungunt.

Sequitur annus lugubris & infestus, ejus sæculi vigesimus alter: in quo civitas nostra, cui cives discordiæ malorum & ærumnarum omnis generis mercede steterant, quæ una resisterat direptionis clades, hanc quoque, ne quid esset in calamitatibus & miseriis reliquum, quod ad illam non perveniret, experta est: cujus infelicis eventus odium nihil est, quod in exterum exercitum transferamus: nam ille ad hostilem urbem invadendam venerat, & in capta jure belli usus est: tota culpa, ac facti invidia nostra, ac patrum nostrorum est; dum utraque Adorniana & Fulgosiana Factio, quæ omnem civitatem comprehenderant, funestum principatum ex patriæ casu execrabili pertinacia altera petit, altera retinet. Igitur Prosper, cum non modo Mediolanum ab invadentibus Gallorum florentissimis copiis magna constantia & virtute defendisset; sed justæ quoque pugnae fortunam expertus, eas copias ad Biccoc-

cam perexiguum & obscuri antea nominis pagum, Mediolano & Modœtiæ interjectum, fudisset, ac profligasset; Scutumque, regium Vicarium, qui cum exercitus reliquis in urbem Cremonam se receperat, tandem ad dedendæ urbis necessitatem adegisset, peramplis & honorificis conditionibus, ad quas Prosper facile descendit; cura Genuæ è manibus Gallorum eripiendæ illum stimulante, ac Hieronymo Adornio verius ita jubente, quam incitante. Hunc Cæsar, ob egregiam perspectam indolem, vividamque perspicacis ingenii, ac cujusvis negotii capacem vim, ad hoc eximium consilium, tum singularem eloquentiam plurimi faciebat; imperatque Prospero, ac reliquis Ducibus, & Proceribus, ut res Genuenses, quæ sibi cordi in primis essent, Hieronymo regendas & administrandas permitterent, atque ei dicto audientes essent: quod igitur unum opus belli restabat, Genuæ capiendæ, hoc exsequi aggreditur Prosper: ac, cum amplius viginti millium veteranorum exercitu, ex Hispanis, Germanis, Italis constante, ex Insubria movet. Erant in exercitu, Franciscus Sfortia Dux Mediolani, Franciscus Marchio Piscarius, clarissimi nominis Dux, qui copiis Italis & Hispanis præerat, Antoniottus & Hieronymus Adornii fratres cum non exiguo suarum partium civium numero non humili modo & medio, sed summo quoque loco ortorum, quos detestabilis partium animo imbibita contentio ad abominandum facinus rapiebat: cum Genuam pervenissent, Prosper munera cum Piscario partitus, urbem ipse à parte in Orientem versa, Ducem Mediolanensem secum habens, cum Germanis & equitatu oppugnandam suscipit. Piscarius cum Italis & Hispanis ante portam divi Thomæ occidentem solem spectantem confedit.

Interea ab Octaviano, jam inde ab initio, hostium consilii Genuæ bello petendæ certiore facto diligenter comparatum fuerat, magno cum civium ardore, quibus Octavianus, ac regimen Gallorum in primis acceptum erat, ab eoque mutando vehementer abhorrebant: eaque de causâ duodecim cives longe primarii ex utraque Factione, ex eorumque numero, qui bonum & quietem civitatis studiis partium anteferebant, electi fuerant; iisque negotium datum, pecuniæ in instantis usum belli omnibus rationibus conquirendæ & expediendæ: ii fuerunt, Joannes Jacobus Auria, Augustinus Palavicinus, Baptista Spinula, Afranius Ususmarius, Baptista Lomellinus, Petrus Grimaldus, Stephanus Justinianus, Joannes Baptista Francus Cocarelus, Antonius Saulius, Augustinus Ferrarius, Thomas Inurea, Augustinus Majolus: missusque in Galliam fuerat Catanius Lomellinus, ad opem à Rege petendam: qui, nulla mora interposita, imperavit Ducibus suis, quos in Italiam ad bellum Insubicum, cum quindecim millibus peditum, ac non contemnendo equitatu, destinarat; quique, Alpius jam superatis, in Taurinos descenderant; iter Genuam averterent, ad eam urbem ab obsidione eximendam: quam eodem tempore Petrus Navarrus, magni nominis Dux, acerrimique ingenii, ac prompti & sagacis consilii vir, maritima via à Rege missus, cum quattuor triremibus intravit. At Piscarius, bombardis statutis, murum portis sancti Thomæ & sancti Michaelis interjectum quater instituit; simul litteras ad Octavianum dat, quibus hominem hortatur, ac monet, ut, quoniam sese adversus tantum impetum victoris exercitus imparem intelligere possit; salutaria consilia obstinatis pro sua sapientia præferens, civitatem honestis conditionibus, iisque, quas ipsemet petierit, dedat: quod ni faciat, direptionem urbis minaciter denunciat: caveat enim, ne nimio principatus amore, quem nullo modo retinere possit, patriam suam in præcipitem & irrevocabilem

A casum det: id Octavianum ceteræ suæ prudentiæ, ac tot editis in patriam charitatis signis, congruenter facturum: Octavianum anceps cura in diversum trahere; hinc moveri ingenito in patriam amore, quam tanto discrimini subijcere nollet; illinc invidiam vereri, si, reliquis civibus tam incensis studiis in regium dominatum consentientibus, ipse solus, qui eos immo titubantes in fide Regis retinere debuisset, causam regiam, cujus tutela ipsius muneris esset, destituisset: consilio, quod commodissimum putavit, rem expedivit: summo enim Magistratu, ac consilio Batiæ ad se vocatis, ac Piscarii litteris recitatis, ait, satis sibi animi & virium esse, ad regium principatum, quorum nullum patriæ utiliore ipsimet experti sint, tuendum: ceterum, quoniam eventus bellorum incerti sint, liberum se civibus suis in tanto discrimine de se ac de rebus suis statuendi arbitrium permittere, dicit; eo staturus, quod ipsi decreverint: notam enim sibi esse Regis voluntatem; qui, pro sua in Genuenses effusa benevolentia, Genuam potius salvam & incolumem in manu hostium suorum esse cupiat, quam in sua eversam aut direptam.

B Omnibus Octavianum laudantibus, ac simile hoc reliquorum suorum fecisse dictitantibus, amplissima potestas omnium rerum, ac vel civitatis defendendæ, vel cum hostibus, quibuscumque conditionibus visum fuerit, transigendi & paciscendi, potestas iisdem ipsis civibus, quos ad pecunias conficiendas electos diximus, mandata est: eadem, quæ Piscarius, Adornii quoque per litteras continenter instare; metum direptionis, ni pertinaciæ finis fieret, crebro inculcantes: contra Fulgosianni differre & extrahere, subsidia expectantes; eodemque tempore utraque Factio mutua se proditiæ patriæ invidia onerare. Fulgosi cæcam ambitionem Adorniorum graviter accusare; qui se tanto parricidio patriæ obstringerent; arma illi inferendo, exercituque ad eam diripiendam adducto: contra Adornii totam culpam & crimen in Fulgosi transferre; qui non libertatis patriæ, quæ jam exteris serviat, sed impotentis dominatus retinendi studio, non dubitent illam exteris diripiendam projicere; neque se direptionem urbis exteris, sed illorum Ducem Prosperum promississe: porro Cæsarianum exercitum etiam sua sponte, sine ipsis, Genuam bello fuisse petiturum, perspicuo omnibus appariturum; quicumque secum reputaverint, necessarium illud eis consilium esse, qui, nisi Genua adjuncta, aliter partum Insubiæ imperium tueri non possint: diripiendæ igitur urbis culpam non penes se Adornios, qui ejus auctores non sint, neque ab ea mente Cæsarianos Duces abducere possint; ac ne penes quidem ipsos Cæsarianos, qui eam jure belli militibus debitam negare non posse dicant; quique, quantum in ipsis est, ab illa abhorreant; ipsosque Genuenses, ut eam vitent, finem pertinaciæ faciendo, per litteras assidue moneant, & hortentur: totam igitur culpam illorum, qui in urbe sunt, rabiei assignandam; qui regnandi exsecrabilem libidinem patriæ salutis anteponant: cum præsertim patriæ nihil intersit; Gallis ne, an Cæsarianis pareat. Ad ea urbani respondere: quin igitur, si nulla culpa direptionis in Adornis est, studia non à comminantibus separant, atque ab exercitu pestem patriæ inferente discedunt? sic fiet, ut, qui sunt in civitate, Adornianæ Factionis homines, cum intellexerint, eam causam à capitibus suis, illorum ab exercitu discessu, improbari, studia sua cum reliquis civibus conjungant; unanimisque civitas adversus communem hostem inexpugnabilis sit. At, quin contra, Adornii respondere: si Fulgosi æquum censent, Adornios, ac tot egregios ac primæ nobilitatis cives, qui cum ipsis sunt, ut direptionis periculum prohibeant, ab exercitu, qui ipsos, in patriam restitutum venerint, disce-

discedere; cur non Fulgosi ad idem periculum arcendum non patria ipsi excedunt.

Hæc atque his similia cum utrimque magna ac pertinaci contentione jactarentur; bonis ingemiscantibus, ac suam & communis patriæ vicem miserantibus, execrabilemque Factionum rabiem execrantibus, quam ne instans quidem & ante oculos positum excidium mitigaret; interea Piscarius magnam partem muri continenter verberando prostraverat; quæ res necessitatem expressit Magistratui Basiæ deditionis faciendæ. Missi sunt igitur tertio Kalendas Junias ad Prosperum, qui de conditionibus agerent, ac referrent, Thomas Catanius, & Paulus Francus Bulgarus: quibus profectis, Magistratus per libellum manu Augustini Ferrarii collegii nomine scriptum mandavit, ut, quoniam omnis mora, Piscario acriter urgente, nimis periculosa esset, quibus maxime tolerabilibus possent conditionibus deditionem illico facerent; neque nisi transacta & confecta re, à Prospero discederent: libellus forte redditus est Bulgaro; qui illum compressit, collegamque celavit: eorum enim hominum erat Bulgarus, qui à deditione abhorrebat; fierique posse sperabat, ut, de interpositis conditionibus disputando, res extraheretur: quarum multæ cum non omnibus satisfacerent (quæ est in humanis sententiis varietas) instituta deditionis consilia everterentur: qui postea, ad invidiam & culpam à se amovendam, ita factum purgabat; ut diceret, cum libellum non Magistratus ipsius, sed privati hominis fuisse, cui parendum non esset; neque futilem rem sibi cum collega communicandam visam, ne ea res aliquam moram interponeret iis, quæ publice à Magistratu imperata erant, exsequendis: Legati igitur benigne & comiter à Prospero accepti, non multis commutatis verbis, cum eo convenerunt; ut postero die civitas certis conditionibus traderetur, interea oppugnationem ab ea abstineret. Sese ita prorsus facturum respondet Prosper; ceterum, suum tantum, non alienum factum posse præstare: enise igitur monuit, caverent à Piscario.

At Piscarius gloriæ tantæ expugnatae urbis, tantique pretii operæ Regi navatae in se vertendæ cupiditate flagrans, nihil differendum ratus, eodem die, quo Legati cum Prospero pepigerant, urbem, qua murus patefactus ruinis erat, aggreditur: cujus impetum Nicolaus Fulgosi fortissime excepit; acriterque per aliquot horas pugnatum est: cui laboranti Philippinus Auria, qui cum delecta manu superiorem proximum locum tutandum suscepit, per internuncium demonstrat; quoniam nullus sui usus esset in loco, qui ipsi obvenerat, ab hoste non tentato; sese, si ita ipsi placeat, cum suis ad opem ferendam illico occursum. Repudiatum est ultro delatum auxilium à Nicolao, socium laudis defensæ urbis non ferente: fato, dum ingruentem vim suam refringi non vult, mentes hominum obcæcante. Accessit alterum incommodum gravis vulneris à Nicolao accepti; cujus curandi causâ, pugnam, quam acriter sustinebat, omittere coactus est: qua fama vulgata, continuo ejus cohors, pugna omissa, locum deserit, seque fugæ mandat. Piscariusque per stragem diruti muri, ac per proximam portam sancti Michaelis refractam cum omnibus copiis suis in urbem penetrat: quam etiam ab aversa parte Prosper, ac Mediolanensis Dux, Adornique fratres, quique cum illis erant Genuenses exsules, eadem nocte intrarunt: urbsque à militibus direpta est; quorum cupiditas non ultra rerum prædam (ita jubentibus Ducibus) provecta est; nullaque edita sunt libidinis aut crudelitatis exempla: ceterum nullius urbis præda multis ab eo die jam annis magis opima fuit; aut magis exercitum ullum ditavit: præter enim ingentem argenti facti, atque auri, & gemmarum vim; ac præter magni pretii supellecti-

lem, qua nulla urbs Italiæ eo tempore instructior erat; immanis pecuniæ summa à civibus sese, ac domos, & liberos redimentibus coacta est: direptioneque tota ea nocte, & insequenti die terminata; quæ omnes fere cives, sine ullo Factionum discrimine, contra quam multi sperarant, comprehendit: qua in re pudet me referre, nonnullos cives Genuenses, ex iis, qui in exercitu erant, eundem habitum animi, quem exteri hostes, tamquam contagione contractum induisse; ac, velut ipsi quoque prædam ex hostili capta urbe jure belli peterent, larvis tectos domos civium suorum, ac cœnobîa Monacharum, pretiosioribus rebus referta, eo tamquam in loca, quæ religio tuta faceret, comportatis, diripuisse: adeo nihil est tam sanctum ac venerabile, quod sacra auri fames intactum relinquit. Non plus triduo, post captam & direptam urbem, Antoniottus alter ex fratribus Adornis major natu Dux creatus est, cum nulla aut parva legum observatione; concordî fratre Hieronymo, longe ingenio, consilio, eloquentia, tum autem auctoritate apud Principes antecedente, ætati haud gravate de honoris loco concedente. Arx quoque Castelletum præfecto cum omnibus rebus suis, ac præfidiariis ex pacto incolumibus dimissis, brevi tradita est: ac Bernardus Gallus triremium & maritimæ custodiæ præfectus creatus. Fulgosiorum fratrum dispar fortuna fuit. Fridericus enim Archiepiscopus cum de defensione desperasset, cum nonnullis Factionis suæ civibus, quorum studia ardentiora exstiterant, in classem se subduxit, captaque urbe, abiit: à quo consilio abhorruit Octavianus; invidiosum sibi ac criminofum apud Gallos & Regem, à quo tot beneficiis & honoribus auctus fuerat, ratus, si ipse, qui pro loco quem summum obtinebat regius Genuæ Vicarius, postremus defensionem urbis, ac non nisi omnia ultima expertus, omittere debuisset, ceteris illam defendentibus, princeps deseruisset: ac ceteris idem faciendi exemplum prævisse videretur, auctorque amittendæ urbis fuisse; quæ, nisi ipse illam, ac defendentium incensum ardorem deseruisset, retineri potuerit: sunt qui putent, illam quoque causam Octavianum retinuisse; quod viri pii ac divini Numinis in primis metuentis mentem pungeret, si ipse communis calamitatis, quam, non prohibendo, urbeque hosti non tradenda (quod ipsius erat potestatis) civibus suis conflasset videretur, solus expers esset. In potestatem igitur hostium una cum Petro Navarro venit: apud quos haud longo post tempore, non sine suspitione veneni, decessit: isque exitus fuit Octaviani viri in amanda patria unici exempli.

Eo anno Hadrianus Pontifex absens creatus, cum decem octo triremibus Romam petens, Genuam venit: cui ii honores habiti sunt, qui in urbe recenti clade concussa & afflicta maximi haberi potuerunt: ad quem venerandum Dux Mediolani, Columna, Piscarius Genuam protinus venerunt, iis sacrarum turrium tinnitibus, iisque omnibus honoribus & effusæ lætitiæ signis eversores Genuæ excepti, quibus conditores excipi potuissent, cum magna omnium ordinum ingemiscantium & moerentium indignatione: petierunt hi Proceres, simulque cum illis nonnulli alii, sese noxa, si qua contracta esset ex direptione Genuæ, solvi: quibus Pontifex respondit, *Nec possum, nec debeo, nec volo*. Eodem quoque anno ædificatio turris sacræ ædis Laurentianæ ad finem perducta est; altitudine triginta dodrantes minore, quam Octavianus privato ære extollendam destinarat, & utraque ora in potestatem Antoniotti Ducis venit.

Eodem anno Solimanus Turca Rhodo tandem potitus est: tradentibus Hierosolymitanæ militiæ Fratribus, cum oppugnationem incredibili virtutis, fortitudinis, audaciæ, exemplo diu sustinuisent; duarumque navium Genuensium, Auriæ & Ferrariæ, subsidia ferentium ab illis conductarum infelix exitus

exitus fuisset; hac ad littus Monœci adversa tempestate depressa, illa ad Sardiniae littora quasiata, & lacerata, inhabilique ad navigandum facta.

A. C. 1523. Insequenti anno, cum tempus foederis inter Gallos & Venetos initi exisset; Veneti ad partes Cæsarianas ab Hieronymo Adornio ea de causa à Cæsare ad illos legato traducti, ad societatem inter ipsum Cæsarem, & Hadrianum Pontificem, & Anglum Regem ictam se addiderunt. At Gallus nihil clade ad Biccocam accepta infractus, florentem triginta millium armatorum exercitum in Italiam ad Mediolanum recuperandum misit: qui brevi, compluribus Gallicarum partium studiosis magnis agminibus ad eum confluentibus, duplicatus fere est: cui Cæsariani Proceres sese impares ad resistendum æquo campo cernentes, Mediolano se incluserunt: quo metu perculsa civitas, res necessarias ad defensionem comparare & expedire instituit: ceterum insequenti anno civitas metu liberata est:

A. C. 1524. quo, Francisco Duce Urbini à Venetis cum haud contemnendis copiis Cæsarianis subsidio missio; arcta obsidione, qua Mediolanum premebant Galli, laxata, cum ii aliquantum ab urbe recessissent; Duces Cæsariani adventu Ducis Borbonii, qui à rege suo defecerat, animis aucti, urbe egressi sunt: Gallosque astutis consiliis ac furtis insidiarum vexantes, atque haud parvis damnis per varias occasiones assidue carpentes, cum à consilio universae pugnae tentandae abhorrerent, longe copiis imminutos Novariam tandem compulerunt, & ad necessitatem Italiae relinquendae adegerunt. Liberata quidem est Gallorum metu civitas; ceterum longe majore malo conflictata: magna enim pestilentiae vis incubuit; quæ diu ac late grassata ingentem mortalium numerum absumpsit.

At Borbonius, Insubria è periculo erepta, magni animi magnæque audaciæ consilium cepit, Regem in Gallia ipsa vexandi & exercendi: cui consilio opportuna visa est Massilia maritima urbs: qua si potitus esset, firmum ac stabilem aditum in Galliam Cæsarianis patefaciebat. Ea igitur expeditione decreta; ad eam urbem oppugnandam, illinc Cæsarianus exercitus terra, hinc classis quatuor ingentium onerariarum ad pugnam & bellum armatarum, septem triremium ac nonnullorum aliorum varii generis navigiorum Genuæ comparata, cui Quæstor Nicolaus Belogius, præfecto absente, præfuit, profecta est; quæ tamen ea de causa præfecti absentiae, numquam Ligusticæ oræ fines prætervecta est, cum exercitus terrestris Massiliam circumfedisset. At Rex, ingenti ac florentissimo exercitu brevi comparato, in Provinciam Narbonensem iter intendit: quem adventantem Cæsariani non expectandum rati; obsidione soluta, trepido discessu Italiam repetunt.

Rex curam in res Massilienses comparatam, omnemque vim belli in Italiam vertit: in quam ipse met omni Galliae Nobilitate stipatus descendit: cuius primi eventus secundissimi fuerunt; Mediolano capto, totaque ditone Mediolanensi, præter Laudem Pompeji & Papiam, recuperata, in quas urbes Cæsariani se subdixerunt: parique felicitate maritima Gallorum classis Saonam, & Varaginem, atque omnem fere oram Ligusticam Occidentalem cepit. Insubria acerrimo bello ardente, Regeque Gallo Papiam arcta obsidione premente, ne Genuenses quidem & Ligusticæ res, quas bellum Insubricum suo motu trahebat, quietæ erant; cum Galli totam oram Occidentem spectantem tenerent; classisque Gallorum decem triremium, ac nonnullorum gallionum in Vadis Sabatis staret; Marchioque Salucianus, ad quem summa Ligusticarum rerum pertinebat, Saona, in qua urbe ipse substiterat, Laurentium Cærium Varaginem misisset; qui opido præesset, ac Genuam, & Adornium Cæsarianas partes sequentem pro-

A/ pinquo bello urgeret: ceterum Laurentio à Rege evocato, Hugo à Moncada, Cæsarianarum rerum in Liguria procurator, anni initio, qui fuit ejus sæculi vigesimus quintus, ad occupata A. C. 1525. loca à Gallis recuperanda cum classe quindecim triremium, ac nonnullarum onerariarum, belli causa additarum, cui præfuit Barptolomæus Fliscus, Genua movet; Varaginemque prætervectus, advectas copias, quæ fuerunt pedites quatuor millia numero, in terram exponit, à parte in Occidentem vergente; quæ inter opidum & Saonam interjecta, subsidia ab ea urbe submittenda ab accessu opidi excluderent: bombardisque statutis, B opidum verberare instituit. Qua re cognita, Gallica classis ad opem ferendam continuo è Vadis solvit; Moncadaque interea, cum oppugnatio ab ea parte sine fructu esset, castris in aversam partem, quæ Genuam spectabat, translatis, opidum illinc urgebat: ceterum classem Gallorum appropinquantem non expectandam ratus, receptu in classem suam non satis expedito, castra terrestri via retro movet: cum sensim se recipientem Jo- cantes Corfus è gente & Factione Blanca, spectati in rebus bellicis usus & peritiæ, quem Varaginis præfidiarii, ne absente Cærio sine capite essent, sibi ipsimet præfecerant; patefactis portis, C cum omnibus copiis magno impetu invadit, ac parvo certamine fundit; Moncada summo Duce, simulque cum illo nonnullis aliis ordinum Ductoribus, ac Proceribus captis: in quibus fuerunt Barnabas, & Georgius Adornii, ac Barptolomæus Spinula: quem Moncadam Jocantes ad Salucianum misit: quibus rebus gestis, classis Gallica ante ostium portus stetit, onerariamque cepit: ac paullo post induciæ inter civitatem & Gallos factæ sunt.

Ceterum civitatem & Adornianos expectatione rerum Insubricarum, à quarum eventu rerum suarum status pendeat, sollicitos, ac metu formidolosæ & propinquæ potentiae sollicitos, lætus atque inexpectatus nuncius Gallici exercitus ad Papiam à Cæsarianis Ducibus incredibili Cæsaris felicitate fusi ac profligati, ipsiusque Regis capti, recreavit. Ejus victoriæ Genuensibus statim fructus apparuit; Saona, totaque Occidentali ora, Gallorum discessu, ipsis libera relicta: captus Rex mense Majo Genuam adductus est; atque inde in Hispaniam evectus: cujus permisso, Andreas Auria, cum nullus ipsius Regi usus esset, ad Pontificis stipendia transivit.

E Anno insequenti ejus sæculi vigesimo sexto, A. C. 1526, cum Rex Gallus à Cæsare tandem dimissus, armorum societatem cum Pontifice & Venetis adversus Cæsarem junxisset; Borboniusque, cui summa Italicarum rerum à Cæsare mandata est, ex Hispania cum quatuor triremibus Genuam reversus in Insubriam profectus esset; mense Augusto Gallorum classis triremium decem septem oræ Ligusticæ illata, Saonam iterum capit: Genuamque intactam prætervecta, Liburnum usque processit: ibique præsto habuit classem Venetorum quattuordecim triremium, ac Pontificiam sex, cui præerat Andreas Auria; ut naves omnino essent triginta septem numero: quæ classes conjunctæ, littoribus Genuensibus invectæ, brevique utraque ora Ligustica occupata, urbem obsidione urgere instituunt; prædasque navium, mercium & hominum agendo, ea damna civitati intulerunt, quorum æstimatio ad decies centena millia aureorum nummum adscendisse credita sit; quibus tamen detrimentis non ita civitas animis cecidit, ut non classem compararit, quæ Cæsarianæ classi viginti duarum navium ex Hispania expectatæ, Vicarium Neapolitani regni, & Marconem cum quattuordecim Hispanorum peditum millibus vehenti auxilio esset:

set: quæ longa & difficili navigatione, multisque impedimentis iter tardantibus, sinum tandem sancti Florentii in insula Corsica tenuit: ex quo, militibus prius à nausea & maris jactatione sex dierum quiete refectis, solvens, Genuam iter dirigit: ceterum, cum ad promontorium usque, quod Caput montium appellatur, perrexisset, deficiente vento, cursum tenere non potuit: quam in salo stantem unus Auria ex tota classe cum sex triremibus suis aggressus est: crebrisque bombardarum ictibus incessens, una navi depressa, classem disjecit: ut iter ab urbe Genua Neapolim avertere coacta sit: duabusque navibus quæ quassatæ & laceratæ classem sequi non potuerunt, in eundem sinum sancti Florentii, unde profectæ erant, reversis; quæ in illis erant copię in terram egressæ, terrestri via Bonifacium se conferunt; ex eoque opido in proximam insulam Sardiniam trajiciunt.

A. C. Sequitur annus ejus sæculi vigesimus septimus, 1527. in quo magna annonæ penuria in civitate laboratum est; ut terni tantummodo, iique perexigui, panes viritim distribuerentur: quamvis classis fœderatorum discessu suo liberam Genuensem oram reliquisset: cujus ea, quæ Orienti objicitur, confestim recuperata est; portusque Delphini viginti millibus passuum distans ab urbe, ne hostium receptaculum esset, munimento firmatus: ad hoc quattuor naves instructæ armatæque sunt; quæ per circumjecta maria discurrentes, præsidio essent navibus in Siciliam, & in alia loca circummissis, ad annonam undique convehendam: quarum duæ, Ferraria, & Boscaina Rapallensis in sinu sancti Florentii à classe Gallica deprehensæ, quam Andreas Auria, qui ad stipendia Gallorum interea reversus fuerat, ducebat, summus præfectus ab illis creatus, in terram sese ejecerunt. Eas littori illisas ac perfractas Galli incendunt; cum nautica turba in terram defiliens periculo se eripuisset. Primum opus Auria ad stipendia Gallorum, ut modo diximus, reversi, fuit portum Delphini tentare: quem, haud parvo numero militum exposito, Philippinus Auria illorum Dux terra, classis mari, urgere incipiunt, adversus eos missus est Augustinus Spinula, custodiæ ac præsidii urbani præfectus, cum delecta oëtingentorum armatorum manu: qui noctu profectus, itinere rapidim facto, prima luce in cacumine imminenti montis apparuit: descendenti Philippinus nihil detrectans obviam it: acreque prælium ad pagum sancti Michaelis opido proximum commissum est: quod cum multas horas durasset; ad extremum omnibus viribus conissi Genuenses copias Gallicas fundunt ac profligant, Philippino Duce capto: ceterum, cum rumor percrebuisset, Gallos in vallem Porciferæ descendisse, Spinula propere revocatus rem absolvere non potuit. At Auria occasionem rei bene gerendæ non prætermittens, concitatis navibus, proas in classem Genuensem dirigit: quem classarii adventantem procul conspicati, discessu terrestrium copiarum animo infracti, sese in eo portu haud tutos intelligentes, illo relicto, trepida fuga littus legentes, Rapallum petunt: quorum metu, & trepidatione animadversa; remigium, ad libertatis vocem à nonnullis eorum proclamatam, adversus Duces confurgit, magnaque eorum pars, Ducibus frustra illos retinere conatis, in terram propinquam defiliit: quæ res classem remigio nudatam immobilem Auria sine certamine capiendam præbuit: omnesque triremes, quæ fuerunt septem omnino, duæ Genuensis custodiæ, quibus præerat Julianus à Ripa, duæ Britii Justiniani, quas ducebat Dominicus filius, tres præsidiariæ Siciliæ, in potestatem hostium venerunt: quibus captis, Auria portu Delphini, nemine obsistente, potitus, onerarias, quæ necessario in portu remanserant, diripit; itaque in ea expeditione fortuna versavit opes, ut terrestrem victoriam civitati & Adornis, maritimam Auria & Gallis dederit.

A Interea Lautrechus à Rege Gallo cum florentissimis copiis in Italiam missus, ad opem Pontifici ferendam, eumque obsidione eximendum, simul ad Neapolitanum regnum bello petendum; per circumpadanos campos iter faciens, cum paullum declinans, Genuensibus finibus appropinquasset, opidumque Boscum expugnasset; vehementer perculsa civitas tantam in se incumbentem tempestatem haudquaquam expectandam rata, recenti memoria direptionis animis insidente, Vincentium Palavicinum oratorem ad Lautrechum mittit; qui cum illo de conditionibus deditionis ageret. Is à Lautrecho comiter acceptus, omnia, quæcumque postulavit, à libente impetravit; præter Saonæ veteri Genuensi dominatui restitutionem; quam rem suæ potestatis esse, seque ulla de ea habere à Rege mandata, negavit: ad illum igitur mittendum; neque dubitare se dixit, quin Rex, pro sua fide & sapientia, æqua postulantis morem sit gesturus: quo responso dato; rem cum Genuensibus transactam credens, Cæsare Fulgosio relicto, qui inchoata consilia exsequeretur, repetitum iter persequitur. Genuenses, Saonæ restitutione non impetrata, quod tum erat Genuæ curarum caput; metuque exercitus Gallorum soluti, omnem eam cogitationem de civitate Gallis dedenda plane deponunt: facialemque à Cæsare, qui cum non plus quam trecentis peditibus ad urbem Regis nomine petendam venerat, nullo certo responso dato, dimittunt.

Compositionis spe frustratus Cæsar, ad vim animum adjicit; urbique appropinquans, coenobium divi Benigni loco edito situm, & civitati imminens, occupatum valido præsidio firmat: ipse in littore ad sanctum Petrum Arenæ confidit. Dolum & insidias in illum urbani struunt: silentioque noctis Augustinus Spinula præsidiariorum præfectus, Sinibaldus Fliscus, ac Martinengus Brixienis urbem exeunt; qui ad divi Lazari extremis vigilibus Cæsaris oppressis, statuque hostilium rerum ab illis diligenter cognito, ac colle conscenso; coenobium à Cæsare occupatum recuperant, Borrasino ordinum ductore, simulque præsidio à Cæsare relicto, capto: cumque dilucesceret, dorsum montis descendunt, spe ipsum quoque Cæsarem incautum improvise adventu opprimendi: cumque in plana descendissent, bifariam divisi, alii superiore itinere, alii inferiore, secus littus ad Cæsarem contendunt: ceterum eventus longe contrarius fuit: nam Cæsar tumultu excitatus, armis repente arreptis, præsidioque ingentis onerariæ, quæ ædificabatur, terga tegente, suorum animis ad pugnam confirmatis, in compositos & solutis ordinibus venientes urbanos magno impetu adortus, parvo certamine, atque ipso pene incurfu fundit ac fugat, Spinula & Martinengo captis: inchoatamque victoriam persequens, porro ire pergens, ad coenobium sancti Theodori, Hispanorum stationem, quæ erat in ejus loci præsidio, congregi ausam pari eventu fusam in fugam conjicit: in urbem tamen, portis obseratis, penetrare non potuit. Ceterum cives, consiliis dedendæ urbis repetitis; (Antoniotto permittente, qui contra tantam civitatis voluntatem tendere non ausus, in arcem, Philippino captivo secum ducto, quem paulo post liberavit, se recipit) civitas igitur Augustinum Ferrarium & Jacobum Lomellinum ad Cæsarem mittit: qui reseratis portis, hominem, civitate Regi dedita, in urbem introduxerunt. Hujus deditionis tam cupide, nulla que vi adhibita, faciendæ multæ fuerunt causæ: penuria, ac fames, assidua impendia exinanitæ civitati prægravia, maritima commercia, quibus civitas alitur, à Gallis clausa, qui maris potentes Genuam velut faucibus premerent: in primis vero cupido Saonæ recuperandæ: quæ res, Gallis invitis, magni certaminis, magnorumque impendiorum, neque certæ, aut exploratæ spei erat: cum Rex eam urbem validis munimentis ac præsidiis firmasset, spe

non solum sua sponte concepta, sed à Fulgoso, & Auria, quin etiam à Lautrecho ipso civibus facta, si ipsi sub obedientiam Regis rediissent, Regem pro sua justitia, quæ Genuensium essent, illis in amicitiam & fidem receptis restitutum: numquam animum Regis fuisse dictitantibus, Saona Genuenses privare, quod nullo jure facere poterat; sed eam Adornis hostibus suis, ac partes Cæsarianas sequentibus adimere. Cæsaris boni civis officium in patriam constitit; direptionibus prohibendis, ac rebus pacandis: ut numquam minore cum tumultu, ac minoribus cum offensionibus, rerum status Genuæ mutatus sit.

Paucis post diebus, Theodorus Trivultius regius Vicarius Genuam venit. Causa Cæsaris prætereundi, ea, credo, Regi fuit, ut omnes cives benevolentia pariter comprehenderet, significatione animi

A in neutram partem propendentis; alteram partem, si Cæsarem præfecisset, perpetuo offensam haud dubie habiturus. Igitur Galli, Genua sibi adjuncta, maritimas opes stabilire, cumque aditum in Italiam Hispanis intercludere intendentes, animo Auria præfecti donatione torquis atque ordinis Michaelitani (quo honore nullus amplior ab ea regia tum haberi poterat) in se firmato: expeditionem in insulam Sardiniam decernunt: in quam Auria cum classe profectus est, Laurentium Cerium à Rege missum, qui terra, ipse mari res gererent, secum vehens: quæ classis cum insulam tenuisset, copiis expositis, urbem Turritanam haud magno certamine cepit, B majore cum exercitus damno, quam fructu, ingenti vi morborum ex pestilenti cælo contracta; quibus cum exercitus catervatim absumeretur, damno incepto omisso, reversi sunt.

P A V L V S F O L I E T A L E C T O R I S.

VBERTVS frater eo animo patriam Historiam Latinis illustrandam litteris susceperat, ut institutam scriptionem tam diu persequeretur, quoad vita suppetisset: ad quam si paucorum etiam annorum accessionem fieri contigisset, saltem ad ea tempora perduxisset, quibus non ita multos ab hinc annos constitutam iterum Remp. habemus. At vero tam præclarum ipsius consilium mors immatura præripuit, gravissima domestica laudis, nec levioris publici splendoris, & gloria jactura; ut ne faustissimum quidem illum recuperata libertatis annum attingere atque adeo res superioris gestas ad exitum perducere fuerit integrum, quod illi scio in optatis fuisse maximum. Nunc ego cum in opere hoc edendo, inchoato, ut dixi, nondum tamen absoluto, incredibile rei hujusce in primis à fratre relictum optimo cuique civi desiderium intelligerem; animum ad eam cogitationem adjeci, num ratio per me aliqua iniri posset, qua illud ipsum utcumque leniretur: in qua cura dum totus versor, percommode accidit, ut amicus meus, quam apud se habebat (unde nescio erutam) ejus ipsius anni historiam, & superioris reliquam mihi ultro offerret: hanc avidè arreptam cum attente legissem, visa est, ut Latine, sic vere etiam, nec minus accurate perscripta. Itaque non alienum me facturum existimavi, si ad fraternos libros adscribendam curarem. Quod factum, sedulitatemque meam bonos omnes aequi bonique facturos confido.

A. C. Insequenti anno ejus sæculi vicesimo octavo, ex 1528. contentione, quæ inter Carolum Quintum & Franciscum Valesium Gallorum Regem acerrima versabatur, ardebat Italia bello: Genuensibus vero temporum perturbatione, multorumque casu conflictantibus, Dux præerat Antoniotto Adurnus, qui Caroli partes sequebatur; cum, propter eas causas, quæ sunt à me demonstratæ, frequens civium multitudo majores Magistratus adiit; ad eosque retulit, uti per eorum auctoritatem aliqui deligerentur, qui accurato consilio, optima institutione virtutis, justitiæque civilis informarent; legesque præberent, quibus constituta civitas ad eam concordiam, quæ omnium bonorum votis semper fuerat expetita, sese tandem aliquando componeret, ac stabiliret. Patres statim comprobare: cupideque amplexi, Antoniotto justis de causis non invito, eam potestatem ac curationem duodecimviris mandaverunt: ii fuere, Francus Fliscus, Baptista Spinula, Augustinus Palavicinus, Stephanus Justinianus, Augustinus Lomellinus, Philippus Cattaneus, Joannes Baptista Monelia, Nicolaus Grimaldus Ceba, & Hieronymus Auria, is, qui postea in sacrum Senatum à summo Pontifice est cooptatus. Erat ea re magna in lætitia & gratulatione civitas; neque fere quisquam omnium erat, qui, cum discordiarum civilium finem, firmamque tranquillitatem futuram sibi animo proponeret, tum sibi, tum fortunis communibus novam de cælo lucem obortam non existimaret: ita non solum homines vultu serenitatem, verum etiam urbs ipsa quasi sensum hilaritatis adspectu præ se ferre quodammodo videbatur. Jam susceperant operam Duodecimviri, cum judicio bene consulti, tum valde integritate probati, ad eamque rem administrandam tota se cogitatione converterant: verum nescio quo fato fieri videmus, idque longa humanarum rerum actione cognitum, ut magnarum curarum magnæ fere esse soleant difficultates, & moræ. Etenim quædam tristissima tempora consecuta sunt; quibus factum est, ut illius

procuracione negotii necessario supersedendum fuerit. Nam, cum omnis ora maritima adversariorum præfidiis teneretur, eorumque magna atque expedita classe maria longe lateque obsiderentur: neque ad ea convehenda, quæ ad victum necessaria sunt, ullus pateret aditus; ingens inopia, summaque annonæ caritas civitatem occupavit. Quare, dum exigua quædam alimenti ratio in singulorum capita describenda esset, & lacrymales interea gemitus diurni nocturnique exaudirentur, atque ex omni parte miserissima fames, & foedissimus horror ingrueret, hominum mentes in longe diversas curas, aliosque labores avocabantur.

Accidit autem per id tempus, ut Lautrechii in Italiam adventu (is erat imperator, qui totius exercitus regii potestatem gerebat) status civitatis sit facta commutatio: itaque per adversam Factionem E Antoniotto Adurno facultate data sese libere subducendi, Theodorus Trivultius Regis nomine ad Reipublicæ custodiam & gubernationem receptus est: postquam rerum commutationem, nihilominus in instituta ratione erectioribus animis obfirmati cives, ubi primum licuit, id quod instituerant, perficere rursus aggressi sunt, Trivultio ipso consentiente, seu id ex animo faceret, sive obscuro consilio, ac simulato; quo magis in recenti honoris gradu collocatus ea humanitatis specie voluntates hominum sibi conciliando, omnes in suscepta Regis amicitia atque in officio contineret: id utrum fuerit, haud F mediocrem admirationem afferebat.

Eodem anno, ineunte vere, gravissima, maximeque horribili pestilentia urbs conflictari coepit: fuerant hyeme tota, quæ antecesserat, austris leniter flantibus, imbres maximi, itaque assidui; ut sol moderator temporum, quique vitam & salutem larga luce mortalibus affert, tres prope menses haud se terris ostenderit: quæ postea, ubi verni caloris appulsu tepescere sunt; ex humidis seminibus, quæ conceperant, vaporibus excitatis, facile aerem infecere: in quam pestilentem luem eo proclivius hominum

minum corpora concidebant, quod humores, quos ex mala victus ratione, fame dominante, contraxerant, magis erant ad putrescendum parati: quamquam ea contagio non modo in tenues & obscuros incubuit; sed latius serpens, arripuit etiam claros & locupletes: quorum cum alii acerbissimo fato interissent, alii focos & lares patrios mortis timore perculsi deseruissent; facta erat in urbe miseranda vastitas & solitudo.

Interea Savonenses, qui Genuensibus adjuncti, jam ante se eorum ditioni subiectos & vectigales esse ægre ferebant, more multorum, qui secundam fortunam ferre haud facile possunt, liberius atque audacius ea moliri cœperunt, quæ frustra persæpe tentaverant. Induxerant in animum suum, idque, quibuscumque rationibus poterant, evincere conabantur, uti ad se naves omnes cum mercibus atque oneribus libere commearent; atque ita negotiationem maritimam omnem à Genuensibus averterent: præterea salis facultatem, quam Genuenses suo sibi jure reservant, omni contentione elaborabant, ut in suam quoque ditionem vindicarent: quæ sane res præterquam quod jus Genuensium imminuerent, in eorum etiam detrimentum maximum recidebant. Hos motus & conatus parum consideratos, cum alias & magna spe aggressi tentassent, quod ad mercatus forique celebritatem, natura loci adjuvante, brevi res suas, & quæstu, & potentia magnopere se amplificare posse confiderent; quamlenissimis semper verbis inculcati fuerant, amiceque commonefacti, ut à proposito desisterent; in eoque manerent, quod antiquissimo fœdere convenissent; &, quoniam iniquum erat, cum alienam sibi potestatem assumere, tum id recusare, quod sua voluntate, atque optimo jure ad id tempus dependerant; cogitare eos oportere, & quid possent, & quid deberent: quorum utrumque si non attenderent, in altero injuste atque injuriose facere, in altero parum prudenter. Hujusmodi verbis, & multis præterea, in hanc sententiam, quæ ad sanandas eorum mentes pertinebant, cum sæpe fuissent admoniti; illi tamen in suscepta pertinacia acriter persistebant, ac per id tempus commodam occasionem nacti, paucorum potentium, qui suis privatim cupiditatibus & commodis serviebant, studio largitioneque adjuti, exploratam in spem venerunt, se per Regis ministros & Consiliarios à Rege, quod cupierant, consecuturos. Genuenses, qui ne id facerent, summa semper cum diligentia præcaverant, ubi præter spem, & contra, quam licebat, factum cognoverunt; eosque, qui parere consueverant, animadvertentes jam se murorum molibus & propugnaculis communire, perinde quasi armis & spe bellum præsumerent; gravi nimirum, justoque dolore sunt commoti: & eo magis, quod cum legationes ad Regem misissent, quæ pro se causam demonstrarent; docerentque, si id juris, eamque auctoritatem Savonensibus attribueret, eum contra omnia jura facturum videri; de sententia ipsum dimovere non potuerunt: quæ causâ, ut paullo post demonstrabimus, ad institutæ rationis novæ Reipublicæ formæ progressum exitumque inveniendum, maximum momentum attulit.

Iisdem temporibus, cum Lautrechus terrestribus copiis Neapolim obsidione premeret; Andreas Auria, ad quem Regis nomine summa officii, imperiique maritimi respiciebat, eodem Philippinum Auriam octo cum triremibus miserat; ut hostes integra oppugnatione obsiderentur: qui, cum Ugonis Moncadii audacia concitati, cum triremibus sex & biremibus duabus prælio rem committere, atque Auria classem, quæ in Salernitano sinu confederat, adoriri non dubitassent, egregia Aurianorum virtute profligati sunt: quo in prælio Moncadius cecidit; Alphonfus Avalus, Afcanius Columna, multique præterea amplissima fortuna viri capti conservatique

sunt: & ea demum secuta, quæ ut uberius memoriarum prodantur, non est præsentis instituti mei.

Post eam insignem victoriam, Andreas Auria in magna animi lætitia haud omnino poterat sedata cogitatione conquiescere: &, quam jucunda, quæ pro Rege fuerant ipsius auspiciis gesta, in illius memoria insidebant; tam erant illa acerba, quæ de civium suorum præsentibus incommodis, & de iis, quæ multo graviora impendere videbantur, assidue cogitabat: verum, quoniam in hujus viri clarissimi mentionem sæpenumero incurram; quæ de ejus natura & moribus spectata & cognita sunt, hic me locus monet, ut silentio non præteream. Is genere admodum nobili fuit, ad spectu plane regio, ad gloriam atque omnia summa natus: quamquam ad bellicam laudem, eamque maritimam, se magis convertit: amor ipsius erga patriam facit, ut cum Cæsare non sit comparandus; qui suam oppressit: singularis humanitas erga omnes, ne cum Catone; qui truci severitate fuisse dicitur: in eo tamen utriusque natura inerat; industria, horribilique vigilantia illum æquabat; hunc invicta justitia, mente, & recte factis; magnitudine animi utrumque, vir in primis & civis, & imperator optimus. Hic igitur, ut dicebam, decreta de Savonensibus interposita, imminemtemque patriæ perniciem secum ipse considerans, magnoque animi motu perturbatus afflictabatur: scripserat ad Regem accuratissimas litteras; miserat etiam certos homines, qui supplicibus verbis tantam ac tam gravem indignitatem deprecarentur, regiamque fidem & sapientiam implorarent: sed qui in ancipiti etiam causâ, pro maximis ipsius meritis fuisset sublevandus, in justissima destitutus fuit: quapropter, postquam ad æquissimam rationem impetrandam, non egregiam voluntatem suam, non merita, non recentis victoriæ gratiam, non denique supplices pro patria preces, apud Regem valuisse, intellexit; statuit se ab illius amicitia avertere: fuere aliæ præterea causæ ipsius privata, justæ illæ quidem & magnæ, quæ id suaserunt: verum hæc, quam exposui, præcipuas partes habuit: illas vero nunc à me commemorari necesse non est.

Erix est opidum, quod abest ab urbe Genua millia passuum sexaginta, ad portum Veneris tutissimo loco positum: eo Andreas Auria se recepit; multa animo movens, atque ad omnes casus excubans; quos vel occulta hominum consilia adducere, vel turbulenti illius tempestatis motus aperte invehere potuissent: mox vero exacto tempore, ad quod imperio Regis munus suum obstrinxerat, ubi satis officio factum existimavit; cum rite prius per certum nuncium voluntatem suam Regi denunciasset, omni illius sacramento solutus est: & quamquam postea Rex (quod plerumque accidere solet, ut id percipere expetant, quod paullo ante neglexerunt) omni diligentia per idoneos homines conatus est Auria sibi voluntatem recuperare; ille tamen, summis præmiis, quæ proponebantur, summis pollicitationibus rejectis, in suscepta sententia permansit: ac, cum Neapolim cum omnibus suis triremibus navigasset, (jam enim Philippinus redierat) tractabantur conditiones, quibus Caroli sese rebus adjungeret, in Arimen insulam concessit; Gallorumque classem quoquo versus progredientem hostilem in modum persequi cœpit, ac male habere. Iisdem diebus Lautrechus mortem obiit, atque is exercitus, qui Neapolim obsederat, dissolutus est: magnaque ex parte subita morborum vi miserrime absumptus.

Hac in fortunæ rerum omnium commutatione Theodorus Trivultius, qui Regis nomine Genuam regebat, rebus suis diffidens, de præfidiis in urbe collocandis cogitabat. Erant in Gallia Cisalpina Alexandriæ peditum circiter duo millia: hos ad se summa celeritate accersierat: qui, ut postea cognitum est, non ita multum morati, cum profectio-

nem parassent, certiores facti anguste stipendium illis persolutum iri, simulque veriti pestiferum æstus, quem audierant Genuæ ingravescere quotidie magis, à proposito itinere destiterunt. Hoc consilio Theodori cognito, Andreas Auria, qui omnem vim cogitationum, actionumque suarum eo direxerat, ut à cervicibus patriæ jugum omne depelleret, rem sibi diutius differendam non existimavit: jamque classe atque animo paratus propius accedebat: quæ cum adversarii, qui se paullo ante in portum receperant, præsensissent, sibi timentes fugam spectare cœperunt. Transierat jam dies, qui est a. d. iv. Idus Septembris, & nox infecuta obscuram admodum caliginem cœlo invexerat: cum illi è portu educti sese in tenebras & fugam conjecere: & quamquam, perinde, quasi decertaturi essent, instrumentorum bellicorum horrifero ingentique fragore inanes auras complerent; omne tamen eorum certamen in cursu & celeritate positum erat. Auria primo fugientes infecutus, deinde cum nocte circumfusus occasionem bene gerendæ rei nullam videret, se tamdiu sustinuit, quoad dies illuxit. Prima vero luce duas triremes, quæ Savona directo itinere Genuam contendebant, imprudentes aggressus expugnavit: totidemque præterea ab omnibus remigibus ac propugnatoribus desertæ in ejus potestatem devenere: quæ cum incautius, præpropereque festinatione è portu egredi colluctarentur, in procurentibus faxis hærentes, cursum conficere non potuerunt.

Erat in urbe deformis solitudo, eaque in solitudine plena timoris atque terroris omnia. Magistratus, qui aderant, solivagi, sollicitaque trepidatione suspensi: Auriam vicina littora circumfidentem quattuor cives adeunt, afflictam illi fortunam urbis commendant & civium salutem: rogant, ne quid novi tumultus per oppugnationem excitari velit; quod in patriæ discrimen ac calamitatem sit recasurum. Quibus ille comiter acceptis, quid esset suæ voluntatis atque propositi accurato sermone demonstravit: ejus vero sermonis hæc fere summa fuit: *Non esse consilium suum novo aliquo motu patriam perturbare: sed perturbatam potius, ad pacatam quietem recreare, si posset: antiquissimam sibi hanc curam fuisse: proinde nunciarent ceteris civibus, optima ut spe essent: seque, dum ne ab externo presidio urbem occupari paterentur, ad eos, nisi ita eorum voluntas ferret, non progressurum.* Posteaquam hoc renunciatum est, pro foribus ejus templi, quod à Vincis nomen accepit, Theodorus Trivultius, qui ex arce ægre eo descenderat, paucos, qui aderant, cohortatus est, ne à pristina fide desciscerent; ne vellent novos casus, duriolemque fortunam periclitari: atque ut ab Regis amicitia ornamenta ac comoda exspectarent amplissima: quorum se auctorem adjutoremque præcipuum fore pollicebatur: multaque præterea addidit, quorum commemoratione existimavit, eorum voluntates & studia posse ad sese traducere. Abeuntem è frigida concione, atque in arcem, unde exierat, regredientem, pauci, qui affuerunt, prosecuti sunt. Postridie vero mane, cum Auria certior esset factus, Trivultium de præsidiis accersendis valde laborare; veritus ne rei bene gerendæ oblata facultas è manibus elaberetur, illius consiliis anteverendum existimavit. Itaque oppugnationem aggressus, nullo propè negotio urbe potitus est. Nam Janus Brandus notus è Corsica miles, qui tum cum parva manu molem portui objectam asservabat, cum ab ea parte nulla esset armorum irruptio facta, sed per paullo superiorem locum ingressum sibi patefecissent; primum in credita sibi custodia se continuit: deinde, audito libertatis ac divi Georgii nomine, quod passim Auriani milites maxima voce conclamabant, impium duxit, contra ejus sanctissimum nomen armis contendere, sub cujus patrocinio insula ipsius germana patria æquissimo imperio regebatur. Et Boraxinus, cui Sarzanæ convallis littus præsidio non minus firmo defendendum contigerat,

A Helvetique circiter sexaginta, qui stationem ad palatii sedes tenebant, parum ausi contra jam victores infestis signis consurgere, facile cessarunt. Qua in rerum trepidatione, Theodorus Trivultius, cum omnia in Auria potestatem jam venisse cognovisset, se in arce omni spe destitutus inclusit. Hæc, quæ in urbe gesta sunt, in suburbanis prædiis, quo vitandæ pestilentia causa civitatem omnem commigrasse supra demonstravimus, statim audita sunt. Quare celeriter magno omnium consensu, eo confluit: advocata vero concione, omnium ordinum viri in Aurianam porticum frequentes convenere: ubi Andreas Auria hujusmodi fere verba habuisse dicitur: *Plurimum laborum, quos & multos & varios in vita suscepi, fructum hodie fero, cives mihi carissimi: quod hoc loco, hocque rerum statu, nostrum hunc consensum video: nos non jam ullum externorum Dominorum superbum imperium premit: non ullius Sylla aut Marii improba Factiones ad arma concitant: quæ turbulenta, pravisque studiis involuta fuerunt, abiire: pacata, aperta, liberaque nobis jam sunt omnia: proinde, ut hic dies finem nobis multarum attulit ærumnarum, ita vehementer velim, ut universis nova sit principium salutis. Nolite existimare, quæ temporum, rerumque conversionibus fiunt & commutantur, eadem esse, aut casu evenire: quacumque apud nos fieri videmus, omnia fluunt à Providentia cuncta prospicientis & moderantis Dei. Circumspicite frequentiam vestram, qui tota regione disjuncti antea, misera in urbe solitudinem feceratis: cælum jam & ipsum ad novam celebritatem & alterius initium vita nos vocat: & ad spem meliorem stabilienda nobis civitas est: multa circumstant difficultates: sed nihil est tam difficile, quod virtute perfici non possit. Cujus viam ingressi olim Majores nostri, omnia dura atque aspera pervadere, suique nominis gloriam ad ultimas Aegæi atque Ionii maris oras protendere potuerunt. Verum, cum omnis virtutis, tum maxime civilis qua nos indigemus, custos ac conservatrix concordia est. Quas calamitates superioribus annis propter dissensiones, perpeffa sit civitas nostra, dolore prohibeor commemorare: hac ipsa quasi æreo muro ubi nos seposuimus, omnis erit omnibus adversis rebus interclusus aditus: nullaque existet umquam tanta vis, qua bene corroboratas opes & vires nostras queat contundere: nam, si, quidquid agitur seditione infirmissimum est: id profecto ad immortalitatem convalescit, quod animorum conjunctione manitur: tollantur in posterum omnes de principatu controversiæ: non Factio cum Factione, neque pars cum civium parte configat: sed, si vere cives appellari volumus, ad communem honesta vita societatem, & ad recte facta singulorum inter se virtus cum virtute conspiret. Id tamen meo sane judicio effici nullo modo poterit: nisi prius bene explicatam libertatem possederitis hanc, pro qua recuperanda cogitandum nobis esset, si viri estis, feras etiam gentes, terras omnes, omnia maria movere: hanc, inquam, ego hodierno die vobis restituo. Ea ne vestris è manibus eripiat: & cum tam opportunum tempus vestrum conservandorum divinitus oblatum sit, ne mox, ubi effugerit manibus, votis id optaturi sitis, providete.*

Hac concione habita, grata concionis admurmuratio consecuta est. In qua Francus Fliscus, qui in Duodecimviris principem locum obtinebat, de hac ipsa re statim referre cœpit, ac quorundam nominatim sententias rogare: eo in hunc sermonem ingressio, placitum est omnibus, ut Senatus haberetur. Itaque postero die, qui civitati lætissimus, maximeque salutaris illuxit, publico consilio convocato, cum magna futuri eventus expectatione, cives frequentissimi convenissent, Auria consilium una alacrique omnium consensione sanxerunt. Qua in re Baptista Lomellini egregia virtus enituit; qui primus sententiam rogatus, non solum sui sensus testificatione illustri, verum etiam gravissima cohortatione ceteros excitavit: ac, cum multa ornate præclareque dixisset de libertate, de concordia, de beata civium vita; & memorabilia multorum facta ex omni prisorum

Ligurum antiquitate collecta in medium attulisset, beneficentiae fontes aperuit; reique suae familiaris partem pro patriae, communiumque fortunarum praesidio pollicitus est. Cujus exemplum pulcherrimae laudis studio complures secuti, eandem voluntatem praese tulerunt. Illud postremo non est silentio praetereundum, eo ipso die in tam frequenti conventu neminem fuisse valetudine tentatum: cum antea per incautos vel solo tactu passim dira contagia serperent. Ita novum tranquillitatis ac concordiae statum placidus & pacatus aer excepit; ex eoque tempore dies deinceps secuti sunt salubriores.

Haec mihi perspicua erant brevitate perstringenda, quibus tamquam fundamentis positis, ad operis mihi propositi aedificationem accedam, haud sane multo cum artificio. Qui vero his temporibus in hoc scribendi genere magnifice versantur, si luminibus nostris obstruxerint; aequo animo feram, eorum orationis altitudinem admirabor: dum illi ipsi nolint, non me magnopere exaggerationis laudem adamare; sed eam vehementer persequi, quae à simplici, sed non inculta tamen veritate proficiscitur. Postquam igitur Genuensium libertas hoc Reipublicae fundamentum sibi constituit: resque cum fama ipsa, tum eorum literis late percrebuit; Italia tota ejus facti auspicia bonis omnibus profecuta est: progressumque illis optavit longe secundiorem: praesertim cum omnes intelligerent, Genuenses pacatam vitam degere cupientes, justitiam, non injuriam, rerumque suarum conservationem, non alienarum occupationem meditari.

Eo tempore Franciscus Borbonius regii exercitus imperator, Ticinum urbem circumsidebat. Ad eum Octavianus Saulius hujus rei nomine Legatus: qui, expositis foederibus amicitiae, egregiaeque Genuensium in Regem voluntatis, demonstravit, eos non repentino aliquo motu in hanc mentem incidisse, ut dissidentes civium animos componerent; sed antiquam hanc illis fuisse curam, ad quam etiam ab ipso Rege, re cum illo justis de causis communicata, quodammodo incitati, beneque animati fuerant: propterea Regi minime mirum videri debere, si id jam perfecissent, quod & sibi ipsis utile, & cuivis bono rectum videri possit. Quod vero ad novam Reipublicae constitutionem attinebat; liberorum hominum, inquit, esse proprium ita vivere, quo modo ipsis videatur esse maxime commodum; dum ne alteri noceant: idcirco nemini se injuriam facere arbitrari; si, qui antea aliorum sibi patrocinium accersere consueverant, jam consiliorum ipsi suorum moderatores esse velint. Regiamici, nemini hostes, omnibus aequi. Borbonius, qui & natura mitis & Genuensium rebus haud iniquus erat, pauca pro tempore questus, & quae in rem suam facere videbantur, placide locutus, Saulium in honore habuit; sed tamen eum ab se dimittendum non existimabat. Itaque diebus ibi aliquot consumptis, cum animadverteret diem ex die expectari, reditumque suum diutius, quam ipse volebat, impediri, tacite se subduxit, deviusque itineribus Genuam reversus est.

Hoc in rerum statu Genuensibus de futuro eventu sollicitis, periculaque imminencia longe circumspicientibus, necessarium visum est, dare operam, ut ad hostilem oppugnationem, quam jam jam futuram animis augurabantur, omnibus rebus essent parati. Quamobrem, cum pecunia in primis quaerenda esset, centum & quinquaginta aureorum nummum millia à procuratoribus Curiae sancti Georgii mutua sumperunt: cui novis vectigalibus cautum est: quae primo domibus imposita, cum eorum exactio nimis acerba videretur, mox in salem translata sunt, & quando Duodecimviri, quorum prudentia civitas regebatur, gravioribus curis distinebantur, quam ut rebus omnibus praesto esse possent; quattuor creati sunt, qui quaecumque ad rem bellicam pertinebant, omnia summa diligentia administrarent: & quo tutius faciliusque urbs custodiri, vigili-

A que communiretur; ea quattuor in partes descripta, totidem è praestantibus virtute civibus ductores delecti sunt: quorum separatim suam quisque stationem obtineret, ad eamque propinquorum civium manu comparata, noctu atque interdiu excubaret. Missi praeterea sunt quoquoque belli regionisque periti homines, qui, quascumque copias possent, contraherent. Et quamquam ea res difficultatem habitura esse videbatur; propterea quod pestilentia robur & sobolem militum, magnamque mortaliū partem in Liguria consumpserat; tamen ex opidis finitimis satis validam peditum manum in urbem adduxerunt: alii vero tum ex Liguria, tum ex Corsica in dies expectabantur: habebat praeterea in triremibus suis Andreas Auria Hispanos homines acres, praeliisque assuetos, quos variis locis & temporibus captos, remiges esse jussit: hos, quod & in ea fortuna diutius ipsos detineri haud aequum existimabat, ut qui ad partes Caesaris jam esset adjunctus; & quia ratio temporis ita postulare videbatur; omnes solvi atque in armis esse jussit.

His ita constitutis rebus, plurimum fiducia ac spiritus omnibus accessit. Illud quidem à nonnullis haud recte dictum videtur, *Animum nostrum mala persape, bona minime umquam praesagire*: etenim vis illa animae, quae cogitationes & consilia explicat; ubi, quae ab ipso consulta sunt, animadvertit optime procedere; videtque eventus sequi maxime secundos, atque optatos: eam ipsam spem, qua nitebatur, multo etiam firmiorem facit: existimatque praepotentem justitiam, id est, Deum ipsum in suam ipsius causam esse propensorem: ac propterea acriori voluntate ac studio cetera persequitur.

Arx erat intra urbem, in monte qui Sanus appellatur: in quam, ut supra demonstratum est, Trivultius se receperat: haec in primis erat expugnanda: rem suscepit Philippinus Auria: quam cum esset aggressus, in eoque negotio esset occupata civitas; interea de Francisci Borbonii adventu fama perfertur. Qua re subito allata, variisque hominum sermonibus aucta; omissa arcis expugnatione, alacres universi adversus venientem hostem se confirmarunt: ac, ne vel eruptionem ex arce tentantibus facilis exitus esset, vel advenientibus hostibus eo aditus pateret; ab ea parte, qua periculum imminebat, quae ad Septentrionem vergit, duplicem fossam perduxerunt. In urbe, quae fuit militaris usus imperita, & vel propter aetatem, vel sexum infirmior multitudo, ejus magna pars prout cuique visum est, cum iis rebus, quae praedae cupiditatem invehere plerumque consueverunt, eo adducta est, ubi ab omni esset periculo tuta. Ad montes finitimos, locis & ad hostium iter observandum, & ad eos vexandos opportunis, dispositae sunt cohortes quaedam, atque in duas partes distributae: quarum alteri Boraxinus, alteri Grechetus Justinianus praepositi sunt. Superaverant jam Galli montium juga, qua ex Gallia citeriori Genuam per Pulciferam vallem iter expeditum est: ea est vallis primo angusta, variisque anfractibus inflexa; deinde directa, mollique planicie se magis aperit, plurimis domiciliis distincta atque ornata: alluitur torrente, qui nisi cum se majores imbres à nubibus erumpunt, peramœna lenitate delabens infuit in mare, duo ornatissima suburbia in littore interfecans; Cornelianum, & alterum magis ad urbem pergens, quod ab arena nomen accepit. Cum Morigallum pervenissent, qui pagus ab urbe abest millibus passuum quattuor, ibi confederunt: eodemque, cum eorum nonnulli in proximos colles incautius pervenissent, circiter triginta capti sunt, remisque additi: erant in Gallorum exercitu complures Genuenses: his, publica interposita fide, unius diei & noctis spatium praefinitum est, quo ex adversariorum castris discedere impuneliceret: quod si in suscepta pertina-

cia permanissent, palam pronunciatum est, fore ut eorum bona proscriberentur; ipsique in patriæ proditorum censerentur loco. Id cum in castris esset auditum, paucis admodum consilii mutationem attulit: nam seu pudore adducti, seu quod ex suo ipsorum iudicio atque animi conscientia sibi timerent, sive quod exploratam sibi victoriam promitterent; ad suos redire, utique temporis opportunitate neglexerunt.

Postridie vero ejus diei, hoc est, Kal. Octobris, audax internuncius à Francisco Borbonio in urbem venit: qui cum in Curiam, quam frequentissima hominum vis & multitudo compleverat, esset introductus, sine ulla orationis præmuntione, Ego, inquit, regis Legati nomine, publicus velpacis velbelli nuncius adveni: si vos in Regis fidem ac potestatem restituitis; pacem, summamque Regis indulgentiam vobis offero: sin parere recusatis, bellum, incendium, omnesque cruciatus, atque acerbitates denuncio: itaque utrum placati Regis clementiam, an irati potentissimam manum experiri malitis, considerate. In tam frequenti armatorum celebritate atque concursu, maximo strepitu, confusisque conclamantium vocibus tota Curia concrepabat: quare Ambrosius Gentilis Senarega publicus Scriba suggestum conscendere iussus; silentio indicto, hanc Galli orationem, quam pauci in proxima tantum corona excipere potuerant, pleniori voce pronuntiavit: quod eo consilio factum esse comperio, ut, cum omnes intelligerent secum tam minaciter agi, verbis suis, quasi telis altius adactis omnium aures ferientibus, eorum animi, quos jam concordia amorque libertatis concalcescerat, libera indignatione magis etiam accenderentur. Sane amor atque iracundia duæ sunt à natura datæ homini faces; quarum utraque multum per se potens pollensque est: verum ubi altera alterius sibi auxilium assumpsit, rapimur inflammati in omne periculum, nullusque umquam terror tantus impendat, quem subire non sumus parati. Ea audita oratione, parum abfuit, quin ipse internuncius occideretur: verum in multitudine irarum stimulis concitata, affuit quorundam prudentia moderatrix perturbationum; qua per summam contentionem factum est, ne jus in eo legationis violaretur. Ubi vero clamor resedit, armatorumque concursus repressus est; Augustinus Palavicinus, cui respondendi potestas est permissa, Regem, inquit, Gallorum hæc civitas omnibus officiis, & quibuscumque potuit studiis, semper coluit: deque illius amplitudine & majestate, quam & salvam & diuturnam esse cupit, nihil umquam nisi amice atque honorifice cogitavit: hæc observantia & voluntas nihil immutata est; & quoad ille patietur, non immutabitur: sed rerum natura una in re nos disjungit, quod Regibus hoc fere est innatum, ut omnia suo ipsorum imperio subiecta esse velint; & si qua civitates eorum se tutela ac fidei commendant ac tradunt, in eodem loco reponant: nos vero libertati studemus, atque ad hanc unam referimus omnia: hanc vim & cupiditatem nobis natura insitam frangere, atque obistere, nec possumus, nec debemus: & nunc quidem in novo hoc statu rerum nobis constituendo, ab ejus imperio minime disidemus; sed magis intranos ipsi consentimus. Regis benevolentiam sane plurimi facimus; pacem vero, quam affers, cum non pax, sed servitutis pactio ea sit, repudiamus: quod si ad bellum vocemur, non libenter quidem huc descendimus; sed tamen non ita excidimus animis, ut lacepsiti, armis contendere recusemus. Proinde Regis Legatus etiam atque etiam cogitet, quid suscipiat, & quo prorumpat: memineritque eum ipsum locum, ubi consedit, ex Gallorum calamitate nomen olim accepisse. Illius minas ut non pertimescamus, suadet libertas, patriæque vox, superiores nobis seditiones exprobrantis: quare aut retinebimus libertatem, aut simul cum illa urbem, regionem, vitamque ipsam relinquemus: verum, quoniam Dii justis causis favent, qui hunc etiam ardorem

mentibus nostris addiderunt; speramus fore, ut illum potius audacia sua, quam nos consilii nostri pœniteat. Gallus hoc responso accepto discessit: quænam aliquot cives à Curia ad certum usque locum deduxerunt, unde ad suos sine ullo incommodo se recipere posset.

Porro, ut majori militum numero, majoribusque præfidiis urbs communita esse videretur; factum est, ut quacumque ille per urbem iter haberet, ita copiarum disponderentur, ut quæ primo visæ fuerant, alio rursus loco, atque alio, quo testioribus viis antevertentes se profundeabant, eadem conspicerentur: cujus ille ostentationis ignarus, menteque percussus, cum in castra ad Borbonium pervenisset; præterquam quod retulit, Genuenses animis esse ad dimicandum paratos; præsidiorum & rerum omnium opinionem uberius auxit: quæ res & audaciam hostium imminuit; & spem, qua concitati ad exorientem Genuensium splendorem extinguendum, communemque vitæ societatem perturbandam venerant, infregit. Maximis itaque laudibus ornanda concordia est: de qua mihi sæpenumero est dicendum: neque vereor, ne ineptus existimer; si in hujus mentionem frequens oratione incurram: præsertim, cum hæc præcipua virtus sit, cujus divinis consiliis salus civitatis sit constituta; & qua sublata, civilis omnis virtus intereat, omniaque præclara facinora ad perniciem delabantur: civium quidem communio instar est unius hominis, multos sensus & pedes, multas manus habentis: atque ut corpora nostra, si bene constituta sint, morbis fere non tentantur, omniaque incommoda facillime perferunt: ita hæc societas, si eam sibi temperationem adhibuerit, ut summa conjunctione ea congruant, è quibus constat, valens vigensque, diu ab externa vi se facile tuctur, atque conservat.

Persuaserat sibi Franciscus Borbonius civitatem hanc nondum ex inveteratis dissensionum morbis convaluisse; atque intra cutem aliquid ulceris latere: cui rei ille potissimum confisus, nullo prope negotio voti se compotem fore arbitrabatur. At vero ubi aliud comperit, quam quod ejus opinio ferebat; non ultra sibi progrediendum existimavit: sed profecto vir ille summa nobilitate, egregiaque virtute ornatus, moderatissimi sensus fuit: præclare poterat, si acerbior hostis esse voluisset, regioni detrimentum, ædificiisque & navibus, quæ in sicco erant, ignes inferre; verumtamen ab omni se prorsus injuria & maleficio temperavit: ex eo die nihil præterea accidit, quo uberius mihi scribendi facultas suppediretur.

Descenderat Sinibaldus Fliscus ex montibus, qui ad Gallorum castra pertinebant; hunc ab hostibus circumventum magno in discrimine versari, fama dimanarat: quæ rumoris aura repente excitata fecit, ut plenissima cohors ex urbe procurreret, laboranti Flisco subsidium allatura: sed cum parvo confecto spatio, ei redeunti atque incolumi occurrisset, se repressit, eoque, unde discesserat, regressa est. Hostes vero interea terrorem inferre, propius adequitare, speciemque pugnae objicere atque ostentare non desistebant: sed tamen cum aliquo in periculo res esse videretur, nunciatum est, eos castra movisse, celerique se protectione subducere: quod cum esset auditum, initum consilium est, an abeuntes hostes insequi præstaret: sane plerisque ea sententia probabatur; sed tamen itum est in sententiam illorum, qui dissuadebant: non ob id solum, quod tutior visa sit, verum etiam quia rector: non enim bellum aliis inferre, sed illatum tantum defendere, Genuensibus erat propositum. Hujus oppugnationis, si ita appellare velimus, hic fere exitus fuit: qua in re Sextini, atque accolæ Porciferæ vallis præclaram virtutem atque operam præstiterunt: quapropter iis immunitates datæ.

Postri-

Postridie vero ejus diei Duodecimviri, quorum summa auctoritate totius civitatis consensu omnia gerebantur, unum in locum convenerunt: ut quod fuerat ante in eorum collegio multis lucubrationibus, longaque accuratione consideratum atque compositum, id jam ederent in lucem; & Rempubicam constituerent: ac primum quidem, ut seditionum seminaria, pestiferaque Factionum nomina tollerentur; civitasque non vel unius, vel paucorum privatae utilitati serviret, sed communi omnium æqualitate contineretur; inventum est illud temperamentum, ut omnes, qui vel dignitatis splendore, vel integritate morum, merito in civium numero reponendi essent, in octo & viginti familiis describerentur: ex quibus unus dumtaxat civium ordo constatus est: iisque omnibus, pro cuiusque natura & meritis, aditum ad omnes magistratus patere voluerunt. Hac igitur æquali civitatis descriptione constituta, ut jam ipsi Duodecimviri ex amplissima, quam gerebant, potestate decederent, civitasque suum statum ac fortunam acciperet; Ducem, octoque gubernatores Reipublicæ pari potestate, ex iis viris, quorum de bonitate ac virtute magna opinio erat, creaverunt: his præterea octo procuratores adjuncti sunt. Dux primus fuit Obertus Cataneus Lazarius; cui quod esset sine liberis, ad opinionem integritatis plurimum valuit: quod consentaneum esse videretur, quem rerum privatarum cura minus afficere atque impedire posset, cum in publico officio & munere multo diligentius atque incorruptius invigilaturum. Gubernatores fuere Nicolaus Justinianus, Petrus Lercarius, Thomas Cataneus, Laurentius Fliscus Ragius, Hieronymus Lomellinus, Joannes Baptista Sallutius, Nicolaus Nigronus, Grimaldus, Simon Auria Buzzallus, Petrus Joannes Cibo Clavica, Augustinus Pinellus. Quinque præterea Censores creati sunt, qui supremi nominantur, Andreas Auria, Baptista Spinula, Sinibaldus Fliscus, Thomas Nigronus Pluma, Paris Gentilis: his quattuor annorum spatium est præstitutum. Auriam tamen, propter singularia ipsius merita, Respublica perpetuo Censorem esse voluit: de ceteris autem Magistratibus; quot sint, & quam habeant auctoritatem, quantumque cuique Magistratui temporis præstitutum sit, ex quibus, & à quibus, & qua ratione eligi soleant; item de judiciis, & quadringentorum consilio; de institutis, & legibus, harumque omnium constitutiones & differentias accurate explicare, atque distinguere, non est mihi hoc loco propositum: novarum institutionum liber publicus in monumentis à Scribis custoditur; in quo hæc diligentissime scripta sunt: quæ si quis cognoscere voluerit, ex eo petat licebit.

Interea de Savona oppugnanda consilium initur: paratus jam erat exercitus: cum eo Augustinus Spinula & Philippinus Auria ad eam oppugnationem profecti sunt. Savonenses, qui in Francisci Borbonii robore spem suam collocaverant; cum eum, reflante fortuna, Alexandriam cecidisse cognovissent, fracti animis, supercilium ac spiritum, quem sumpserant, remisere: itaque ad belli Duces, quos commemoravi, de communi consilio legatione missa, ad deditiois conditionem, polliciti, nisi intra septimum diem subsidia sibi venirent, se suæque omnia Genuensium potestati permitturos; hac una exceptione adhibita, ut Moreta regius præfectus tormenta bellica, quæ Regis nomine tum erant adducta, & res suas privatas sibi exciperet; fieretque potestas, ut abiret incolumis; atque in hanc pacem dati sunt obsides ex primis civitatis. Abbas quidam Fondratus Alexandriam profectus erat, ad auxilia evocanda; sed, cum frustra id tentatum esset, & jam dies effluxisset, quæ ex pacto deditio ni erat constituta, Savonenses se dederunt. Postero autem die Andreas Auria & Sinibaldus Fliscus

A eo profecti Reipublicæ nomine, opidi possessionem acceperunt: idque Joanni Baptistæ Lafagnæ Jurisconsulto & Baptistæ Lomellino custodiendum regendumque tradidere: is est Lomellinus, qui ob eximiam virtutem & prudentiam ad summum Ducatus fastigium postea evectus est. Lafagna vero ob præclaras res gestas & erga Rempubicam promerita, in multis legationibus, Gubernatorum ordini connumeratus fuit; & (quod propter pietatem, non omittendum videtur) cum apud Ludovicum Gallorum Regem Legatus Reipublicæ gravissima negotia feliciter tractasset; ab eodem sanctissimum sudarium superioribus annis ablatum, & in Galliam transmissum, civitati ut restitueretur, ab eodem impetravit; quod postea apud eandem divi Bartholomæi sacras ædes, unde fuerat abreptum, maxima veneratione & incredibili totius populi lætitia conservatum est; cum in eo Jesu Christi Domini nostri vera effigies, ad Abgarum Regem transmissa, sit impressa: cujus gratia singularique beneficio à tyrannide ereptam, libertatique restitutam, sperandum est, antiquam hanc Rempubicam rectis legibus & moribus reformatam, æmulatione antiquorum Genuensium, piam, justam, bello fortem, perpetuamque futuram.

AD LECTOREM

Q VONIAM Obertus frater, amice Lector, immatura morte nobis præter spem ereptus est, non potuit multa illustrium familiarum nostra civitatis monumenta colligere, quæ suam Historiam non mediocriter illustrassent; vel incuria superiorum Scriptorum prætermissa, vel nulla earundem familiarum curiositate, tamen si honesta, & debita, neglecta: quocirca & recte, & pro bono facturum me putavi, si quæ saltem ad me pervenerunt de Cybo gente scitu dignissima, & publica auctoritate confirmata, extremo Operi adjicerem: quæ profecto, si cognovisset frater, non minus libenter, quam ipse modo faciam, diligentia & labore suo posteris prodidisset. Igitur trahit hac gens originem suam à Gracis: quod, & nomen ipsum ΚΥΒΟ, & insignia taxillis distincta, satis aperte declarant: nec desunt, qui affirmant, multis ante bellum Trojanum atavibus ex ea veluti arbore plures surculos cum ceteris Arcadicis in Italiam esse traductos; ut quæ in Græcia perdidit floruerat, in Italia quoque germen emitteret. Sed ego non refero, quæ laborant antiquitate sua: quæ tamen multi tum Græci, tum Latini Scriptores de Gracis familiis loquentes sub nomine Cubea, & ΚΥΒΟ, scripta reliquere. Dicam tamen in publicis Genuæ scriptis antiquiorem memoriam esse Rubaldini & Facini anno 1154. hos subsecutus est Hermes anno 1188. qui una cum multis aliis Nobilibus subscripsit paci, quæ facta est cum Pisanis, cujus exstant in tabulario Genuensi acta publica. Anno vero 1200. floruit Gulielmus, vir in Republica maxime insignis; cujus sunt illustres illæ inscriptiones in D. Francisci templo. Eiusdem adis elogis immortalitatem est consecutus Lanfrancus, qui fuit ex octo Nobilibus unus, qui anno 1241. ut scribit Justinianus, ad gubernacula Reipublicæ sederunt. At vero multo majore splendore Romanorum Pontificum illustrata est, videlicet Bonifacii IX. & Innocentii VIII. præcipue vero Leonis X. & Clementis VII. Medicea familia, qui huic ex materno sanguine fuere conjunctissimi: quattuor item Cardinalium, & multorum Prasulum excellenti probitate & doctrina præstantium. Sed ne longior sim, & horum præcipuam historiam scribere videar, subjiciam paucis monumenta aliquorum, quæ ad hanc usque diem servata sunt, & ad memoriam laudum domesticarum, & ad illustrandam hujus familie nobilitatem.

Antiqua quadam diplomata testantur Othonem pri- A. C.
mum Rom. Imp. Guidoni Cybo Genuensi & successoribus 962.
propter multa & grata servitia, quæ Ecclesia Romana
& Imperio intra & extra Italiam exhibuerat, donasse

in perpetuum nobilia Castra in valle Arni, Montemuarcum, Crolarium, & Laterinam cum eorum districtu: illumque declarasse Heroem atque Cohortium nobilium & equitum Sacri Imp. Tribunalum.

A.C. 1028. Post multos annos cum Sarraceni Caprariam & Gorgonam insulam occupassent, Lambertus Cybo, ut erat vir praelio strenuus & exercitatus, eos inde expulit; eaque loca ipse potitus est, posterique, penes quos deinde jus & imperium multos annos fuit, Pratores in eas insulas miserunt: qua omnia patent tum ex libris S. Georgii, tum ex antiquis auctoribus, praecipueque ex Fanusio Campano. Perstringuntur haec brevius, quam rerum ipsarum cognitio & dignitas postularet: sed in hominum negligentiam conferenda est culpa, qua nos non modo rerum ornamentis, sed ipsis etiam rebus multorum annorum privavit.

A.C. 1243. Anno deinde 1243. Mutius Gulielmifrater suis sumptibus triremem instruxit, qua cum ad Tunetis Regem sibi amicissimum veheretur, casuque supra Calaridem in alteram Pisanorum triremem tunc nominis Genuensis hostium incidisset, superatam eam atque depressam Regi donavit; nostris tamen Christianis, qui remis addicti erant, liberatis. Praclarum hoc factum narrant Capharus, Stella, & Justinianus Scriptores satis cogniti.

A.C. 1345. Calojannes KúC, arcis & insulae Chios Dominus & gubernator, cum premeretur obsidione à Simone Vignosio praefecto novem & viginti triremium Populi Genuensis nomine, frustra à Bizantio auxilium expectasset; tandem & arcem & insulam certis pactis Genuensibus tradidit, fide iis iurejurando devincta, ab iisque honestis conditionibus acceptis, diplomatibus confirmatis, ac demum civitate sibi tributa, ut publica exstant acta inter conventiones Chiorum, qua in urbe nostra apud Bernardum Justinianum jurisconsultum asservantur. Cetera usque ad annum 1439. interciderunt: quo anno

A.C. 1439. Andreas Cybo, cum nostra Respublica in Cypri regno Salaminam urbem obtineret, timeretque, ne hostes illam occuparent, in eam ipse praesidii causa cum imperio missus est: quam provinciam multa cum dignitate atque virtute obiit: non enim urbem solum ab hoste defendit; sed cum stipendium militi deesset, argentum ipse partim de suo confectum, partim ab amicis mutuum eidem numeravit: quod postea à Republica cum magna grati animi significatione recepit. Rem hanc Roccatialiata antiquitatis nostra studiosissimus, ex tabulario nostro publico, ut hic refertur, excepit.

A.C. 1440. Proximo anno Aranus Cybo missus fuit in auxilium Renati Andegavensis, regni Neapolitani Regis, cum commeatu & sagittariis septingentis: deinde propter rem bene gestam & summam, qua in eo erat, prudentiam, Prorex creatus est: ac demum ob egregiam fidem insignibus pavonis decoratus, Gallica sententia inscriptis, Leauté passe tout. Idem quoque Aranus Innocentii VIII. pater anno 1443. post reditum missus iterum est Neapolim ad Alphonsum Aragoniae Regem à Magistra-

A tu, quem Genua Supremorum vocant, ut cum eo de foedere & pace ageret, quam pepigisse constat exemplo mandati authentici, quod in eodem tabulario Roccatialiata reperit. Quod vero Aranus Neapoli Regis vicem gesserit, testatur etiam Thomas Fregosius Genua Dux quibusdam suis mandatis, Leonardo Petrasanta datis: qui quidem Leonardus ad Alphonsum tunc Neapolis Regem missus erat, aliisque ipsius epistolis & instructionibus.

B Annus post octuagesimum septimum, Nicolaus Constantia Archiepiscopus, & Innocentii Pontificis consobrinus, Rapallum profectus est, simulans se novi aliquid tentare, quemadmodum scribit Justinianus, ut foedus cum Duce Mediolani ineundum impediret: qui Dux alieni appetens, & inter ceteros Italiae Principes valde potens, Rempublicam in apertum suae libertatis discrimen adducere videbatur: sed cognitio ab adversariis consilio, infecta re, domum revertit: quo etiam tempore divino beneficio violentas manus Ducis effugit.

C Innocentius Cybo Francisci Comitiss Anguillariae filius, A.C. 1517. qui summus praefectus Ecclesiastica rei bellica sub finem Pontificatus Innocentii VIII. est constitutus, à Leone X. avunculo suo ex Magdalena Medicea Pontificis sorore in Cardinalium numerum cooptatus: cujus Pontificis illa fuere tunc verba gratissima & humanissima, Ab Innocentio accepi, Innocentio reddo. Porro hic variis, amplissimisque muneribus, atque legationibus est functus: & quo tempore Clemens VII. indignam illam calamitatem periculit, intercessit auctoritate sua XII. Cardinalium sententia, qui Parmam convenerant, ne Pontificium solium Avenionem transferretur: qua res magnam ei in universa Ecclesia benevolentiam apud omnes bonos conciliavit, magnamque auctoritatem: sed non minus sibi Caroli V. voluntatem devinxit, cum in obitu Alexandri Medici primi Ducis devotum ei Florentinum statum conservavit, compressis civium animis, coactoque populo ad electionem Cosmi Medici: à quo pro tanto beneficio petiit solum, ut iustitia propugnator, Imperatori obsequens, & ad ejus commoda paratus, ultorque parricide Laurentii Medici esse vellet, qua omnia ut facile prudentissimus Princeps facturum se est pollicitus, ita deinde cum multa laude, ac fructu suo, suaeque familiae, cumulate praestitit.

D Anno 1520. Laurentius, Innocentii Cardinalis frater, A.C. 1520. Marchio Massa, & pater Alberici Principis, in exercitu Imperatoris Duci adscriptus est, Genuaeque in iis difficultatibus opem tulit, in quibus conjecta erat à strenuo illo Gallorum milite, quem Dominum Sappolum nominabant: habuitque in bellis contra Mediolanenses, multos gradus, valde claros: praefectus cohortis Pontificiae Clementis VII. fuit, & aliquando etiam rem Ecclesiasticam tamquam generalis praefectus cum summo imperio administravit: tandemque Bononia libertatem ac dignitatem in Clementis captivitate defendit: ut fama hominis per Christianum orbem pervulgata, multaque Pontificia diplomata confirmarunt.


F I N I S.

DVCE REIPUBLICAE GENVENSIS

S E R E N I S S I M O

HIERONYMO CLAVARO.





209

ANTIQ
ITALIÆ

88